



Ew Testamento: Chipay Tawkquiztan

New Testament in Chipaya

Contents

SAN MATEO	1
SAN MARCOS	55
SAN LUCAS	88
SAN JUAN	148
HECHOS	193
ROMANOS	247
1 CORINTIOS	270
2 CORINTIOS	293
GÁLATAS	307
EFESIOS	315
FILIPENSES	323
COLOSENSES	329
1 TESALONICENSES	335
2 TESALONICENSES	340
1 TIMOTEO	343
2 TIMOTEO	350
TITO	355
FILEMÓN	358
HEBREOS	360
SANTIAGO	378
1 SAN PEDRO	384
2 SAN PEDRO	391
1 SAN JUAN	395
2 SAN JUAN	401
3 SAN JUAN	402
JUDAS	403
APOCALIPSIS	405

Ew Testamento: Chipay Tawkquiztan

New Testament in Chipaya (BL:cap:Chipaya)

copyright © 2009 Wycliffe Bible Translators, Inc.

© 2009, Wycliffe Bible Translators, Inc. All rights reserved.

Language: Chipaya

Translation by: Wycliffe Bible Translators, Inc.

Chipaya [cap], Bolivia

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Chipaya

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright information.

You do not sell this work for a profit.

You do not change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

ISBN 978-1-5313-0130-9

PDF generated on 21 Sep 2016 from source files dated 20 Sep 2016

baeaa6d6-fcc1-578f-afbd-04a9c5c14184

This print-on-demand edition of Scripture is designed, produced, and provided at cost by the Digital Bible Society. This is made possible through partnerships with the Bible League of Canada, Open Doors International and other missions and translation agencies. We are deeply grateful for the sacrifices made in translating this edition of Scripture and the generosity of others in making this Bible available to you.

To order additional copies of this Bible or hundreds of translations like it or to learn more about our ministries and the mission of Scripture distribution in every language, we invite you to visit www.DBS.org (USA), www.BibleLeague.ca (Canada), and www.OpenDoors.org (Europe). May God bless your work in sharing and teaching these Scriptures, until, as it is written, the earth is *“filled with the knowledge of the glory of the LORD, as the waters cover the sea.”* (Habakkuk 2:14)

EL SANTO EVANGELIO SEGUN SAN MATEO

¹ Jesucristuqui Davidž majchmajtquiztan, nižaza Abrahamž majchmajtquiztan tjoñitača. Jesucristuž tuquita atchi ejpnacača tinacaqui.

² Abrahamqui Isaacž ejptača. Isaacqui Jacobž ejptača. Jacobqui Judaž ejptača, niž jilanacžtanpacha. ³Judaqui Fares ejptača, Zaratanpacha. Tamarqui Fares Zara maatača. Faresqui Esromž ejptača. Esromqui Aramž ejptača. ⁴Aramqui Aminadabž ejptača. Aminadabqui Naasonž ejptača. Naasonqui Salmonž ejptača. ⁵Salmonqui Booz ejptača. Rahabqui Booz maatača. Boozqui Obedž ejptača. Rutqui Obedž maatača. Obedqui Isafž ejptača. ⁶Isaqui David cjita chawc jilirž ejptača. Davidqui Urías tjunatan zalžcu Salomonž ejptača.

⁷Salomonqui Roboamž ejptača. Roboamqui Abías ejptača. Abiasqui Asaž ejptača. ⁸Asaqui Josafatž ejptača. Josafatqui Joramž ejptača. Joramqui Uzías ejptača. ⁹Uziasqui Jotamž ejptača. Jotamqui Acaž ejptača. Acazqui Ezequías ejptača. ¹⁰Ezequiasqui Manasés ejptača. Manasesqui Amonž ejptača. Amonqui Josías ejptača. ¹¹Josiasqui Jeconías ejptača, niž jilanacžtanpacha. Nii timpuqui Israelit žoñinacaqui preso chjitzatača Babilonia cjita yokquin.

¹²Jalla nektzanaqui Jeconiasqui Salatielž ejptača. Salatielqui Zorobabelž ejptača. ¹³Zorobabelqui Abiudž ejptača. Abiudqui Eliaquimž ejptača. Eliaquimqui Azorž ejptača. ¹⁴Azorqui Sadocž ejptača. Sadocqui Aquimž ejptača. Aquimqui Eliudž ejptača. ¹⁵Eliudqui Eleazarž ejptača. Eleazarqui Matanž ejptača. Matanqui Jacobž ejptača. ¹⁶Jacobqui Josež ejptača. Josequi María lucutača. Mariiqui Jesús majtchinča. Nižaza Jesusaqui Yooz cuchanžquita Cristo cjitazakazza.

¹⁷Tunca pusin atchi ejpnacaž kamta wachquichiča Abrahamž timpuquiztan Davidž timpucama. Nižaza tsjii tunca pusin atchi ejpnacaž kamta wachquichiča Davidž timpuquiztan Israel žoñinacaž Babilonia cjita yokquin preso chjichta timpucama. Nižaza tsjii tunca pusin atchi ejpnacaž kamta wachquichiča Babilonia yokquin chjichta timpuquiztan Cristuž nasta tjuñicama.

JESUCRISTUŽ NASTA

¹⁸Jalla tužučha Jesucristuž nastauqui. Niiž maa María cjitiqui Josižtan zalzjapa kazzintača. Ima lucžtan kamcan ica cjissinča Yooz Espiritu Santuž cjen. ¹⁹Naaža lucu José cjitaqui Yooz kuzcama kamñitača. Niiž tjun María icaž cjen Josequi kuz turwaysi cjissičha. Nektzan jamazit jaljtis pecatča. Kjanacama ultimu jaljtitasadž niiqui, Maríqui žoñiž chjaawjkatta cjitasača, ana honorchiz. ²⁰Jalla nuž jaljtis pinsan, Yooz Jilirž anjilaqui wiiquin niižquiz tjonziča, tuž cjian:

—José, Davidž majchmaati, Yooz Espiritu Santuqui am maataka t'icziča. Jalla nižtiquiztan ana jiwjata naatan zalzqui. ²¹Nižaza majttanaqui, wawž tjuuqui Jesús cjitaž cjequiča. Jalla niiqui niiž wajtchiz žoñinaca ujnacquiztan liwriyaquiča. —Nuž cjichiča anjilaqui. ²²⁻²³Tuqui timpuquiztanpacha Yooz Jiliriqui profetžquiz chiikatchičha, tuž cjian:

“Tsjaa tunsill turqui icaquiča. Nektzan lucmajch wawa mataquiča. Nii wawaqui Emanuel cjitaž cjequiča”.

Emanuelqui tuž cjiča: učumnacatanča Yoozqui. Nii profetž takucama cumplissičha Jesucristuž nastanaqui.

²⁴Jalla nektzan Josequi tjaji wajtžcu, Yooz anjilaž mantitacama ojkchiča. Mariatan zalziča. Nižaza persun tjunjapa ricujchiča. ²⁵Naaža majtz tjuñicama Josequi Maríatan anapan ultimu lucutiñi paasiča. Jalla nižtiquiztan ana zalzi cjihucatača, pero chicapan kamñitača. Wawa majttan, Jesús cjita tjuužtan tjuuzkatchičha.

¹ Belén cjita wajtquiz nižaza Judea cjita yokquin Jesusaqui majttatača. Nii nacionž chawjc jiliritača Herodes cjitaqui. Jalla nii tuqita timpuquiz jalla tužu watchitakalča. Nii nacionquin Jerusalén cjita wajtquin tuwanchuctan tsjii kjaž žoñinacaqui irantižquichiča. Mago cjita žoñinacatača ninacaqui, warawar puntu istutiñi. ²Jerusalén wajtquiz irantižcu pewcpcwcziča tuž cjican:

—Uzca nassiča judfo žoñinacž chawjc jiliriqui. ¿Jakziquintaya? —jalla nuž cjican pecunchiča. Nižaza cjichiča, —Wejrnacqui tuuna žejlcan niiž nastiquiztan warawara cherchinča. Jalla nižtiquiztan nii rispiti tjonchinča, —jalla nuž cjican mazziča.

³ Herodes cjita jiliriqui magonacaž quint'ita nonžcu, ancha pinsamintu apazziča persun kuzquiz. Nižaza Jerusalén wajtquiz kamñi žoñinacami ancha kuzquiz pinsatča.

⁴ Jalla nektanaqui nii rey jiliriqui templu chawjc jilirinaca, nižaza lii tjaajiñi maestrunaca kjawziča. Ninacžquiz pewcziča:

—¿Jakziquint Cristuqui majtta cjesaya? —jalla nuž cjican pewcziča.

⁵ Ninacaqui kjaaziča tuž cjican:

—Belén wajtquinča, Judea yokquin. Tsjii profetaqui cjjirchiča, tuž cjican:

⁶ “Judá yokquinča Belén watjaqui. Jalla nii watjapanča chekanaqui, parti watjanacquiztan Judá yokquin. Jalla nektan tsjii chawc jiliriqui ulnaquiča. Jalla niiqui wejt Israel žoñinacaz mantaquiča; nižaza cwitaquiča”.

⁷ Jalla nektanaqui Herodes jiliriqui magonaca jamazit kjawziča. Nektanaqui zumpacha pewcziča, čjul timpuquiztan nii warawaraqui paristčhaja, jalla nii. ⁸ Jalla nektanaqui Herodesqui magonaca cuchanchiča Belén watja, jalla tuž cjican:

—Nii Belén watja oka, nižaza nii wawž puntu zumpacha pjurwiit'auquiča. Wawa watžcuqui, wejtquiz mazcaquiča. Wejrmi zakal ojkc pecuča, wawa rispiti.

⁹ Jalla nektan Herodes jiliriz čhiizinta taku nonžcu, magonacaqui ojkičiča. Jerusalén watja ulantan, nii tuuna cherta warawaraqui ninacž tucquin wilta okatča. Jakziquin nii wawa želatčhaja, jalla nii juntun tsjitsiča warawaraqui. ¹⁰ Nii warawara tsjitsi cheržcu, magonacaqui ancha wali cuntintutača. ¹¹ Nektanaqui kjuya luzcu, wawa cherchiča Marii maatanpacha. Jalla nektanaqui ninacaqui quillziča wawa rispitsjapa. Paaz cja cjetžcu, wawžquiz zuma cusasanaca onanchiča, kori, insinzu, mirra. Jalla nuž nii wawžquiz rispitičiča. ¹² Jalla nektanaqui wiiquin Yoozqui magonacžquiz čhiizinchiča, ana Herodes kjutñi quepajo. Jalla nižtiquiztan persun watja quejpchiča yekja jicz kjutñi.

EGIPTO YOKQUIN ATIPASSIČHA

¹³ Jalla nektanaqui nii magonacaž ojktan tsjii Yooz Jilirž anjilaqui wiiquin Josežquiz parisquichiča. Nektan tuž cjichiča:

—Žaazna, tii wawa chjicha maatanpacha. Egipto yokquin oka, atipasjapa. Herodes jiliriqui tii wawaž kjuraquiča conzjapa. Jalla nii Egipto yokquin am želaquiča, čjolorat wejrcu amquiz wilta chiyachaja, jalla niicama. —Jalla nuž wiiquin čhiichiča anjilaqui.

¹⁴ Jalla nuž anjilaž čhiitiquiztan Josequi nii orapacha žaaziča. Nektan wawžtan maatan chjitičiča. Nii weenpacha ulanchiča Egipto yok kjutñi. ¹⁵ Jalla nicju kamchiča Herodes ticzcama. Niiž tuquitapancha Yooz Jiliriqui profetžquiz čhiikatchiča, tuž cjican: “Egipto yokquiztan wejt persun Maati kjawznacha”. Jalla nii profetž čhiita takuqui cumplissiča.

HERODESQUI JESUSA CONKATZ PECATČHA

¹⁶ Herodesqui kuzquiz tantiyassiča, “Magonacaqui wejttañž burlaskalak” cjican. Jalla nižtiquiztan walja žawzičiča. Jesucristo majtta timpu tantiichiča magonacaž maztiquiztan. Jalla nuž tantižcu mantichiča Belén wajtquin nižaza nii wajtž tjiyaran tjapa lucmajch wawanaca pizc watquiztan kozzuc conajo. ¹⁷ Jalla nuž cumplissiča Jeremías cjita profetž cjjirta takuqui. ¹⁸ Tuqui timpuqui Jeremiasqui cjjirchiča, tuž cjican:

“Ramá cjita wajtquin wali chawc llaqui želaquiča nižaza alto joržtan kaaquiča. Raquel cjitiqui ancha kaaquiča naaža maatinacžquiztan. Ana wira kuztami ch'uj cjequiča. Nižaza naaža maatinacaqui ticziž cjequiča”.

Jalla nuž cjjirchiča Jeremías cjita Yooz taku paljayñi profetaqui.

¹⁹ Wiruñaquí Herodes cjeta jiliriqui ticziča. Jalla nekztanaquí tsjii Yooz Jiliriz anjilaquí Josežquin wíla parisiquichiča wíiquin. Nii oraquí Josequí Egiptuquin tira želatča. Anjilaquí cjichiča:

²⁰ —Žaazna, tii am uza chjicha maatanpacha. Israel yoka quepa. Am wawa conz pecñi Herodes jazic ticziča.

²¹ Jalla nuž cjen Josequí žaažcu Israel yokquin nii uztan maatan chjitchiča.

²² Israel yokquin Judea provinciquin Arquelao cjeta jiliritača mantiñiqui. Jalla niiča Herodes majchqui. Niiž ejpž puestuquizpacha luzzitača. Josequí nii quintu zizcu, Judea yokquin kamz jiwjatchiča. Nekztan tsjii anjilaquí wíiquin Josežquíz paljaychiča, Judea yokquíz ana kamajo, antiz Galilea yokquin okajo. Jalla nekztan Galilea yok kjutñi ojkchiča. ²³ Jalla nii yoka irantižcu, Nazaret cjeta wajtquíz kamchiča. Tuquí timpuquí Yooz cuntiquiztan chiiñi profetanacaquí mazinchiča, Jesusaquí “nazareno” cjetazakaz cjequiča, jalla nuž cjican mazinchiča. Nazaret wajtquíz kamcan profetanacaž čhiita taku cumplissiča.

3

JUAN BAUTISTA YOOZ TAKU PALJAYÑI

¹ Niiž wiruñaquí Juan Bautistaquí Judea provinciquin želatča, ch'ekti yokquin. Yooz taku paljayatča, ² tuž cjican:

—Kuznacaž campiya. Arajpach Yoozquí waj mantaquiča. Nii timpuquí žcatžinžquiča.

³ Tuquí timpuquí Isafas cjeta profetaquí Juanž puntuquiztan cjiyrchiča, tuž cjican:

“Ch'ekti yokquin tsjii žoñž joraž nonžta cjequiča. Alto jorquiztan tuž cjican čhiyaquiča: ‘Tsjii chawcj Jiliriz tjonauquiča. Jaziqui zuma kamañ jicz tjaczna. Tsjii jicztakaz ančuca kuznaca zumpacha azquicha, nižaza zuma lilitumapanž cjee’”.

Jalla nuž cjiyrтатаča Juanž puntuquiztan.

⁴ Juanž zquítiqui camello cjeta animalž chomquiztan watstatača. Niiž cinturonaquí zkizitača. Nižaza langosta cjeta kolta animalanaca lujñitača. Munti misq'uinaca lujñinakaztača. ⁵ Walja žoñinacaquí Juanž taku nonžni tjonñitača, Jerusalén chawc wajtquiztan, nižaza Judea yokquiztan, nižaza Jordán cjeta puj žcatirantan. Walja žoñinaca tjonñitača. ⁶ Jakziltat niiž persun ujnaca mazzaža jalla ninacžquíz Juanquí bautis-siča Jordán cjeta pujquíz. ⁷ Nii tama žoñinacžtanpacha walja fariseonacami, nižaza saduceonacami jalla nii jilirinacami Juanžquin tjonchizakazza bautista cjisjapa. Jalla ninaca cheržcu, Juanquí tuž čhižinčiča:

—Zkoražtakaz incallñi žoñinaca. Yooz Ejpquí ujchiz žoñinaca wajillaž casticaquiča. ¿Ject ančucaquíz nii mazzejo? ¿Nii casticu atipzjapa wejtquinž tjonkaya? ⁸ Kuz campiichinčhucžlaj niiqui, zumapankaz kamaquiča, ančuca campiita kuz kjanapacha tjeezjapa. ⁹ Ančhucquí anaž mit kuzziz porapat čhiyasaquiča, tuž cjican: “Wejrnacquí Abrahamž majchmaatinacžquiztanpacha tjoninča, Yoozquí anaž wejrnaca casticasača”. Jalla nižta ana čhiichiz waquisiča. Yoozquí tii maznacquiztan žoñiž cjskatasača, Abrahamž majchmaatinaca cjisjapa. ¹⁰ Ančhucquí tsjii frut muntižtakazza. Ana zuma fruta pookñi muntiqui k'aatztaž cjequiča jir achžtan. Jalla nuž k'aatztiquiztanaquí, ujtaž cjequiča. Jalla nižta irataž ančucaquíz wataquiča. Ana zuma kamañchiz žoñinaca casticta cjequiča. ¹¹ Wejrquí wereral čhiyuča. Kjastankal bautisuča, ančuca kuznaca campiitiquiztan. Tsjiqui wejt wirquin tjonča. Jalla niiqui Espíritu Santužtanami nižaza arajpach ujžtanami bautisaquiča. Jalla niiča wejtquiztan tsjan juc'ant poderchizqui. Niižquíz atintisjapa anal waquisuča, niiž čhjata jeržcu chjojksinimi. Inakaztča wejrquí. ¹² Ančhucquí trigo zkalažtakazza. Nii tjoñi jiliriqui trigonaca kjojaquiča. Nekztan itzanacami zuma trigumi pjalzaquiča. Nii zuma triguquí ricujtaž cjequiča. Niiž persun kjuyquin majtaž cjequiča. Nii itzanacazti liwj ujtaž cjequiča, ana wira tjesñi ujquíz. Jalla nižta irataž ančucaquíz wataquiča.

JESUSAQUI BAUTISTATAČHA

¹³Niž wiruñaqi Jesusaqui Galilea yokquiztan Jordán cjita pujquin ojkcichiča, jakziquint Juan želatčhaja, jalla nicju. Bautiskatzjapa Juanžquin ojkcichiča. ¹⁴Jesusiž irantitan, Juanqui ana nii bautis pecatčha. Jalla tuž cjichiča:

—Amž wejr bautis waquiziča. ¿Am wejtquiz tjonkaya? ¿Weriž bautista cjisjapaya? — Jalla nuž cjichiča Juanqui.

¹⁵Nekztan Jesusaqui kjaaziča, tuž cjican:

—Anzikam wejr bautisaquiča. Yooz mantitacama liwj cumplis waquiziča učumqui. —Jalla nuž kjaaztiquiztan Juanqui “iyaw” cjichiča.

¹⁶Nekztanaqui Juanqui Jesusa bautissiča. Kjazquiztan ulnan, nii orapacha arajpacha cjetziča. Nekztan Jesusaqui cherziča Yooz Espiritu Santo palomažtakaz chjijwžquiñi. Jalla niž juntuñpacha Espiritu Santuqui irantižquichiča. ¹⁷Nekztanaqui arajpachquiztan tsjii jora paljayžquiñi nonziča, jalla tuž cjiñi:

—Tiiča wejt ultim k'ayi Maatiqumi. Tiiž cjen ancha cuntintutčha wejrqui. —Jalla nuž cjichiča nii tsewctan chiižquiñi joraqui.

4

JESUSAQUI DIABLUŽ YANŽTA

¹Jalla nekztanaqui Jesusaqui Jordán cjita pujquiztan ojkcichiča. Nuž okan, Espiritu Santuqui Jesusa chjitchiča ch'ekti yokquin, Satanás diabluž yanžta cjisjapa. Satanasqui Jesusa ujquiz tjojtskatz pecatčha.

²Jalla niwc žejlcan, Jesusaqui pusi tunc tjuñi pusi tunc arama ana čhjeri lujlchiča. Jalla nii pusi tunc tjuñi wattiquiztan ancha čhjeri eeckatchiča. ³Jalla nekztanaqui diabluqui Jesusižquiz macjatchiča ujquiz tjojtskatz yanzjapa. Jalla tuž cjichiča:

—Amqui ultim Yooz Maatimžlaj niiqui, tii maznacquiztan t'anta tuckatalla.

⁴Jesusaqui kjaaziča, tuž cjican:

—Cjirta Yooz takuqui tuž cjiča: “Žoñinacaqui anaž čhjeržtan alaja žetasäča. Yooz takučha chekanaqui, jalla niiča ultim čhjerižtakazqui”. Jalla nuž kjaaziča Jesusaqui.

⁵Jalla nekztanaqui diabluqui Jesusa chjitchiča Jerusalén, Yooz illzta chawjc watja. Jalla nicju timplu tsewcta pjurniguin yawkatchiča. ⁶Nekztan diabluqui cjichiča:

—Cjirta Yooz takuqui tuž cjiča:

“Yooz Ejpqui niž anjilanaca mantaquiča am cwitajo. Ninacz persun kjaržtan am cwitaquiča, ana am kjojcha chjojričta cjejajo mazquizimi”.

Jazic, ultim Yooz Maatimžlaj niiqui, tsewctan kozzuc tii yokquiz layzca. —Jalla nuž cjichiča nii diabluqui.

⁷Nekztanaqui Jesusaqui kjaaziča tuž cjican:

—Cjirta Yooz takuqui zakaz cjiča: “Žoñiqui ultim arajpach Yooz ana inakaz nuž yanznaquiča”. Jalla nuž cjirtača.

⁸Jalla nekztanaqui wilta ujquiz tjojtskatz yanzjapa, diabluqui Jesusa chjitchiča pajk cur puntiquin. Jalla niwc chjitzcu, diabluqui tjapa tii muntuquiz žejlñi nacionanaca nižaza tjapa ninacz cusanančtanpacha, nižaza tjapa ninacz honoranacztanpacha jalla ninaca diabluqui Jesusižquiz tjeeziča. ⁹Nekztan nii diabluqui cjichiča:

—Tjapa tinaca amquiz tjaasača, wejtquizim quillzaja, nižaza wejr rispitchaja, niiqui.

¹⁰Jalla nižtiquiztan Jesusaqui kjaaziča, tuž cjican:

—Satanás, wejtquiztan zaraka amqui. Cjirta Yooz takuqui tuž cjiča: Yooz Jiliržquinkaz rispita, nižaza nii alaja sirwa. Niikazza am Yooz Jiliriqui.

¹¹Jalla nuž Jesusiž chiihtiquiztan diabluqui Jesusižquiztan zarakchiča. Nekztan tsjii kjaž anjilanacaqui Jesusižquin atinti tjonchiča.

JESUSAQUI GALILEA YOKQUIN OJKCHIČHA

¹²Niž wiruñaqi Jesusaqui quintu nonchiča, Juan carsilquiztača, jalla nii. Jalla nii quintu nonžcu, Galilea yokquin ojkcichiča. ¹³Pero Nazaret wajtquin ana kamchiča; antis Capernaum wajtquin kami ojkcichiča. Capernaum watjaqui kot atquiztača, Zabulon

yokquin nižaza Neftalí yokquintača. ¹⁴Jalla nuž ojktiquiztan Isaías profetaž cjiirta taku cumplissičha.

¹⁵Jalla tuž cjiirchiča Isaías profetaqui:

“Zabulón, nižaza Neftalí, am yokaqui kot atquizza, nižaza jiczquizza Jordanquiztan tuwanchuc. Nižaza Galilea yokquinča. Jalla nii Galilliquinaqui yekja wajtchiz žoñinacaž kamča. ¹⁶Am yokquin žejlñi žoñinacaqui zumchiquiz kamča, ana zuma kamañquiz. Ninacaqui tsjii žoñi cheraquiča. Nii žoñiqui zuma kamaña tjeeznaquiča, zuma kjanažtakaz. Ticzi žoñinacažtakaz kamča; anaž Yooz kamaña zizza. Pero kjanapachaž Yooz zuma kamaña tjeezta cjequiča.”

¹⁷Jalla nektanaqui Jesusaqui Yooz puntu kjanzt'i kallantichiča, tuž cjan:

—Kuznaca campiya. Arajpach Yooz waj mantaquiča. Jalla nii timpuqui žcatžinžquiča. —Jalla nuž paljajchiča.

PAJKPIC CH'IZ TANŇI ŽOÑINACA JESUSIŽ KJAWŽTA

¹⁸Jesusaqui Galilea cjita kot at tjiyaranž okatča. Jalla nuž ojkan pucultan jilazulla žoñinaca cherchiča. Tsjiiqui Simón cjitatača, nižaza Pedro cjitazakaztača. Tsjiiqui Andrés cjitatača. Jalla ninacaqui ch'iz tanñinacatača. Nii oraqui ninacaqui ch'iz tanz kjazquiz tjojsi želatča. ¹⁹Jalla ninacžquiz Jesusaqui tuž cjan paljajchiča:

—Wejttan chica ojklajñi cjee. Jaknuž ch'iz juntichamžlaja, jalla nižta irata ančhucqui Yooztajapa žoñinaca juntaquiča.

²⁰Jalla nuž chiitiquiztan nii pucultan žoñinacaqui nii orapacha ch'iz tanz eccu, Jesusižtan chica ojklajchiča.

²¹Jalla nektanaqui tsjii koloculla najwcjapa ojžcu Jesusaqui tsjii pucultan jilazulla žoñinaca cherchizakazza. Tsjiiqui Jacobo cjitatača. Tsjiiqui Juan cjitatača. Zebedeož majtčača. Niiž ejpžtanpacha warcuquiz želatča, ch'iz tanz azquichcan. Jalla nii cheržcu, Jesusaqui ninaca kjawziča. ²²Nektan nii orapacha warcumii niž ejpmi eccu, Jesusižtan chica ojklajchiča.

ŽOÑINACA JESUSA APŽA

²³Tjapa nii Galilea cjita yokaran ojklajchiča, zapa ajcz kjuyquiz Yooz puntu tjaajincan. Nižaza paljajchiča, Yooziž mantita žoñinacaž cjee, cjan. Nižaza tjapaman laanaca čhjetinchiča. ²⁴Jesusiž ojklajta, jalla nii quintuqui tjapa Siria yokquin ojkičiča. Jalla nižtiquiztan, tjapaman conchiz žoñinacami, nižaza tjapaman laa ayiñi žoñinacami, nižaza zajraž tanta žoñinacami, nižaza t'ucur žoñinacami, nižaza ana ojklajy atñi zuch žoñinacami, tjapaman laanaca Jesusižquin chjitžtatača. Nektanaqui Jesusaqui nii laanaca čhjetinchiča. ²⁵Galilea žoñinacaqui nižquin walja apžquichiča, nižaza Decápolis watjanacquiztan žoñinacami, nižaza Jerusalén wajtquiztan žoñinacami, nižaza Judea yokanacquiztan žoñinacami, nižaza Jordán puž tuwanchuctan žoñinacami. Tjapa nii žoñinacami jalla nuž Jesusa apžiča.

5

JECTNACAT CUNTINTU ŽOÑINACA

¹Walja tama žoñinaca cheržcu, Jesusaqui tsjii kolta curulla yawchiča. Jalla nektan nii curullquin julziča. Nižaza niž kjawža žoñinacaqui niž muytata ajczičha. ²Jalla nektan Jesusaqui ninacžquiz tjaajñi kallantichiča, tuž cjan:

³—Jecnacat “wejrqui ujchizpanča” cjan persun kuzquiz sint'ičhaja, jalla ninacaž Yooz wajtchiz žoñinaca cjequiča. Nektanqui cuntintuž cjequiča.

⁴Jecnacat persun ujquiztan llaquita žejlčhaja, jalla ninacžquiz Yoozqui kuznaquiča. Nektan cuntintuž cjequiča ninacaqui.

⁵Jecnacat humilde kuzziz cječhaja, jalla ninacžquiz Yoozqui irinsaž tjaaquiča, ew yoka. Nektan cuntintuž cjequiča.

⁶Jecnacat Yooz kuzcamakaz kamz ancha pecčhaja, jalla ninacžquiz Yoozpanž zuma kamzjapa yanapaquiča. Nektan cuntintuž cjequiča.

⁷Jecnatat parti žoñinacžtajapa oksñi kuzziz cječhaja, jalla ninaczquiz Yoozqui zakaz oksnaquiča. Nekztan cuntintuž cjequiča.

⁸Jecnatat ancha zuma kuzziz cječhaja, jalla ninacaqui Yooz cheraquiča. Nekztan cuntintuž cjequiča.

⁹Jecnatat pasinsis kuzziz kamñi cječhaja, jalla ninacaqui Yooz maati cjitaž cjequiča. Nekztan cuntintuž cjequiča.

¹⁰Jecnatat Yooz kuzcama kamtiquiztan chjaawjta sufráčhaja, jalla ninacaž Yooz wajtchiz žoñinaca cjequiča. Nekztan cuntintuž cjequiča.

¹¹Jecnatat weriž cjen žoñinacaž chjaawjta cječhaja, nižaza kijchta cječhaja, nižaza tjpaman toscar tawkžtan quintra ch'aanita cječhaja, jalla ninacami cuntintuž cjequiča. ¹²Jecnatat weriž cjen jalla nižtanaca sufrichi cječhaja, jalla ninaczquiz Yoozqui arajpachquin wali pajk honora tjaaquiča. Jalla nižtiquiztan tii muntuquiz kamcan, cuntintukaž cjee. Ančhucqui cjuñzna. Yooz cuntiquiztan chiiñi profetanacaqui nižta zakaz sufrichiča tuqui timpuquiztanpacha.

CRIICHINACŽ PUNTU

¹³Jesusaqui tjaajinchizakazza:

—Ančhucqui tii muntuquiz kamcan yacu cuntažtakazza, parti žoñinacžtajapa. Pero yacuqui lak'až cjesaž niiqui, žkjažpant wilta walipan cjsnasajo? Anapanž cjesača. Nekztan anaž čhjuljapami sirwasacha; tjojtapanž cjesača; nekztan žoñinacaž tjecžtaž cjequiča.

¹⁴Ančhucqui tii muntuquiz kamcan, parti žoñinacžtajapa kjana cuntažtakaz cjesača, zuma kamaña zizajo. Tsii curquiz kjuyta watjaqui, ana chjojžta cjesača. ¹⁵Tsii lamparaqui tjeežtaž cječhaj niiqui, anapanž cajón koztan nonžta cjesača. Lamparaqui tjeežtaž cječhaj niiqui, tsewc tsjiptapanž cjesača, tjapa nii kjuyquiz žejlñi žoñinacžtajapa kjanajo. ¹⁶Jalla nuž ančhucqui lamparažtakaz cjee, žoñinacžtajapaqui. Kjanapacha zuma kamañchiz cjee. Nekztan žoñinacaqui ančuca zuma kamaña cheržcu, ančuca arajpach Yooz Ejpžquin honora tjaaquiča.

LII PUNTU

¹⁷Jesusaqui tjaajinchizakazza:

—Wejrqui ana tjonchinča Moisés lii tjtanskatzjapa, nižaza profetanacaž tjaajintanaca tjtanskatzjapami. Jalla nižta anaž pinsa ančhucqui. Wejrqui ana tjonchinča nii tuquita Yooz tjaajintanaca tjañiiqui; antis tjonchinča cumpliskatzjapa. ¹⁸Wereral chiižinuča. Tuquita Yooziž tjaata liiquiztan tjapa puntumi tjapa letrami anaž tjatanta cjequiča, tjappacha cumpliscama. Ima tii muntumi arajpachami tucužinžnan, nii liiqui anapanž tjatantaž cjequiča. ¹⁹Jalla nižtiquiztan jequit tuquita Yooziž tjaata liiquiztan tsjii mantita, kolta lii cjenami, ana pajz pecčhaj niiqui, nižaza yekjap žoñinacžquiz nižtapacha tjaajinčhaja, jalla nii žoñiiqui arajpach Yooz wajtquin anaž čhjul honorchiz cjequiča. Pero jequit nii tuquita lii mantita cazačhaja, nižaza yekjap žoñinacžquiz nižtapacha tjaajinčhaja, jalla nii žoñiiqui arajpach Yooz wajtquin chekan honorchiz žoñiž cjequiča.

²⁰Ančucaquiz wejr chiižinuča. Lii tjaajiñi maestruncami, nižaza fariseo žoñinacami žejlča. Pero ančhucqui ninaczquiztan anaž juc'anti Yooz mantitacama kamačhaj niiqui, anapanž arajpach Yooz wajtquin luzasača. Yooz mantitacama kamstanča, arajpach Yooz wajtquin luzjapa.

ŽAWJZ PUNTU

²¹Jesusaqui tjaajinchizakazza:

—Ančhucqui tuquita atchi ejpnacžquiztan tuž nonzinčhucča. Ninacaqui cjiñitača, tuž cjican: “Anača žoñi conzqui. Jequit žoñi conačhaja, niiqui juzjitaž cjequiča”. ²²Pero wejr chiižinuča, jequit tsjii jilžjapa žawjwačhaj niiqui, jusjitaž cjequiča. Nižaza jequit tsjii jilžtan ch'aačhaj niiqui, Junta Suprema cjita chawjc jilirinacaž jusjitaž cjequiča. Nižaza jequit tsjii jilžquiz “ana zumamča” cjican ch'aančhaj niiqui, infiermuquin ch-jatkattaž cjequiča.

²³ Nižaza tii puntu zakal cjeeča. Jequit niiz ofrenda Yooz yujcquin chjichačhaj niiqui, nižaza chjichcu niiz jilžtan quintra tanasta cjušnačhaj niiqui, ²⁴ jalla nekztan ima ofrenda tjaacan, nii timpluquizpacha ecla. Nekztanaqui niiz jilžquin pertuna mayiza ojkla. Niižtan jilžtan walikaz cjila. Jalla nekztanaqui timpluquin quejžpcu, ofrenda Yoozquin tjaasača.

²⁵ 'Jequit am quintra quijchi cječhaj niiqui, nižaza jilirž kjuya chjichačhaj niiqui, jalla nii quijchi žoňžquiz pertunam mayizaquičha ana enenzcu, ima jilirž kjuya irantican. Pertunazta cjequiz niiqui, anam juez jiliržquin intirjita cjequičha jusjita cjsjapa. Amqui ultimpacha juez jiliržquin intirjita cjesaž niiqui, nii juez jiliriqiu am tsjii policiiquin zakaz intirjasača; carsilquiz chawjcta cjesača. ²⁶ Weraral chiižinuča. Carsilquiz chawjctam cjesaž niiqui, anam ulanasača, liwj pacañcama.

ADULTERIO PUNTU

²⁷ Jesusaqui tjaajinchizakazza:

—Ančhucqui tuquita atchi ejpnacžquiztan tuž nonzinčhucča: “Anača adulteriuquiz ojklayzqui”. ²⁸ Pero wejrqui tuž chiižinuča, jakzilta luctakat yekja maataka “wejt maatakaj cjejaa” cjican pinsičhaja, jalla niiqui persun kuzquiz niwjtanaqui adulterio paachizakazza Yooz yujcquiziqui.

²⁹ Am žew latu čhujquiqui ujquiz tjojtskatčhaj niiqui, nii čhujqui leczna, nižaza nawjk tjojtta. Jalla nuž tsjii čhujquiqui pertissi cjenaqui am parti curpuqui ana infiernuquin tjojtta cjesača. Jalla nuž waliž cjesača. ³⁰ Nižaza am žew kjarauqui ujquiz tjojtskatčhaj niiqui, nii kjara pootzna, nižaza nawjk tjojtta. Jalla nuž tsjii kjarauqui pertissi cjenaqui am parti curpuqui ana infiernuquin tjojtta cjesača. Jalla nuž waliž cjesača.

TJUNATAN JALJTIS PUNTU

³¹ Jesusaqui tjaajinchizakazza:

—Ančhuca tuquita atchi ejpnacaqui tuž cjiñitača: “Jecmiž niiz persun tjunatan jaljtasaž niiqui, primiruqui tsjii ultim jaljtita cjjirta papel certificado tjaasa”. ³² Pero wejrqui tuž chiižinuča, jakziltamiž persun tjunatan jaljtasaž niiqui, nižaza ana čjul adulterio motivo želan, jalla niwjtanaqui naa ultimu jaljtita tjunqui adulterio cjskatasacha. Nižaza jakziltami naa ultimu jaljtita tjunatan zalznačhaj niiqui, adulterio ujanž paača.

JURAMENTO PUNTU

³³ Jesusaqui tjaajinchizakazza:

—Nižaza ančhucqui tuquita atchi ejpnacžquiztan tuž nonzinčhucča: “Anača toscar tawkžtan juramento paazqui. Juramento paaquiz niiqui, tjapa nii juramentužtan com-promitta takupanž cumplisnaquičha Yooz yujcquiziqui”. ³⁴ Pero wejrqui tuž chiižinuča, anaž čjulquiztanami juramento paasača, werara chiižpanča. Nižaza anača “arajpacha zizza” cjican juramento paazqui. Yooztajapača arajpachaqui. ³⁵ Nižaza anača “tii yoka zizza” cjican juramento paazqui. Yooztajapača tii yokaqui. Nižaza Jerusalén wajtž tjuu aynakcan anača juramento paazqui. Chawjc Yooz Jiliržtajapača nii watjaqui. ³⁶ Nižaza anača “wejt persun acha zizza” cjican juramento paazqui. Amqui anam zinta tsok charquiztan chiw charquin tuckatasacha. Nižaza anam zinta chiw charquiztan tsok charquin tuckatasacha. ³⁷ Jalla nižtiquiztan, “Jesalla” cjicanaqui, “Jesalla” cjispanča; nižaza “Anaž” cjicanaqui, “Anaž” cjispanča. Zajra diabluž cjen juramento paazqui žejlča.

ANA WALI TJEPUNTA PUNTU

³⁸ Jesusaqui tjaajinchizakazza:

—Ančhucqui tuquita atchi ejpnacžquiztan tuž nonzinčhucča: “Tsjii žoňiqui yekja žoň čhujqui pjatžinasacha, nekztan nii pjatni žoň čhujqui pjatžintazakaz cjesača. Nižaza tsjii izke chjatkatžinasaz niiqui, nii chjatkatni žoň izke chjatkatžintazakaz cjesača”. ³⁹ Pero wejr chiižinuča, anača kijtžni žoňiqui nižtapacha kijtžqui. Nižaza am quintra tsjii yujc latu kijchasaž niiqui, kijchta cjskazza, tsjii yujc latužtanpachami. ⁴⁰ Nižaza jakziltamiž am tanžcu am almilla kjanž pecčhaj niiqui, kjaňaj cjskazza, irztanpachami.

⁴¹ Jakziltamiž niiz kuzi tsjii tupucama, amquiz chjitskatasaz niiqui, juc'anti tupucama

chjichna. ⁴² Jakziltamiž amquiztan mayasaž niiqui, tjaa amqui. Nižaza jakziltamiž amquiztan tomžni tjonasaž niiqui, onzna amqui.

QUINTRA ŽOŇINACŽTANAMI ZUMA MUNAZIZA

⁴³Jesusaqui tjaajinchizakazza:

—Nižaza ančhucqui tuquita atchi ejpnacžquiztan tuž nonzinčhucča: “Mazinacžtan zuma munaziza. Nižaza am quintra žoŇinacžtan chjaawjkata”. ⁴⁴Pero wejr chiižinuča, am quintra žoŇinacžtanami zuma munaziza. Nižaza am quintra laykiŇi žoŇinacžtajapa zuma kuztan Yoozquiztan maynaquiča. Nižaza am quintra chjaawjkatŇi žoŇinacžquin zumapan paa. Nižaza am quintra ch'aaŇinacžquinami kichŇinacžquinami zumapan Yoozquiztan mayt'izina. ⁴⁵Jalla nuž zuma kamcan ančhucqui tjeeža, arajpach Yooz Ejpž maatičhucča, nii. Yoozqui zuma žoŇinacžquizimi ana zuma žoŇinacžquizimi liwž tsjiikaz niž paata tjuŇi tewkkačča. Nižaza niž kuzcama kamŇinacžquizimi nižaza ana niž kuzcama kamŇinacžquizimi tjapa ninacžquiz chijŇi apayžquiča. ⁴⁶Ančhucqui persun okžni žoŇinacžquizkaz okznaquiž niiqui, jalla nuž paatiquiztan čhjul premio Yoozquiztan tanznaquejo? Jalla nižtakaz kamčča ana wali impuesto cobriŇinacami. ⁴⁷Nižaza ančhucqui persun jilanacžquizkaz tsaanaquiž niiqui, jalla nijwctan čhjul zumaž ančhuc pajo? Jalla nižtakaz paačča ana Yooz pajŇinacami. ⁴⁸Ančhucqui walja zuma kuzziz kama, jaknužt ančhuc arajpach Yooz Ejp walja zuma kuzzizpančhalaja, jalla nuž.

6

ZUMA KAMŽ PUNTU

¹Jesaqui tjaajinchizakazza:

—Ančhucqui anačha persunpacha honorchizkaz cjis peczqui. Anačha žoŇinacž yujcquiz ančhuca Yooz custurumpinaca paazqui, žoŇinacžquiztan honorchiz cjisjapa. Ančhucž jalla nuž persun honorchizkaz cjis pecaquiž niiqui, nii honorchiz kaz cjequiča. Ančhuca arajpach Yooz Ejpqui ana iya honora tjaaquiča. ²Ana zum kuzziz žoŇinacaqui t'akjir žoŇinacžquiz onanžcu žoŇi žoŇinacžquin mazmazŇičča, “onanchinča” nuž cjicanaqui. Ajcz kjuyaranami calliranami jalla nižta paaŇičča, žoŇinacaž ninacžjapa zuma chiyajo. Pero wejrqui weraral chiižinuča. Jalla nižta paaŇi žoŇinacaqui nii honorchizkaz cjequiča. Ančhucqui anačha nižta iratapacha kama. ³Ančhuczi t'akjir žoŇinacžquiz onanžcu, jalla nii ančhuca onantaqui anaž jecžquizimi mazmaznaquiča, “onanchinča”, cjicanaqui. ⁴Nižaza t'akjir žoŇinacžquiz jamazit onaquiča. Aunquimi ančhucaž jamazit paachiž cjenami, ančhuca Yooz Ejpqui cherčča. Jalla nuž cheržcu ančhucaquiz kjanacama honora tjaaquiča, tsjii premiužtakaz.

MAYIZIZ PUNTU

⁵Nižaza nii ana zum kuzziz žoŇinacaqui Yoozquin mayizican jalla tuž justazŇičča. Ajcz kjuyquizimi call isquinqizimi tsjtchi Yoozquin mayiziŇičča, tjapa žoŇinaca cherajo. Wejrqui weraral chiižinuča, jalla nuž paažcu ninacaqui nii honorchizkaz cjequiča. Ančhucqui anačha nižta irata mayizizqui. ⁶Ančhuczi Yooz Ejpžquin mayizizjapaqui, kjuyquiz luz waquizičča, nižaza kjuy chawjcz waquizičča. Jalla nektan ančhuca Yooz Ejpžquin mayizasachča. Jalla nuž zinalla mayizan ančhucatan chicaž cjequiča Yooz Ejpqui. Jalla nuž jamazit mayiztiquiztan Yooz Ejpqui ančhucaquiz honora tjaaquiča, tsjii premiužtakaz.

⁷Yoozquin mayizcan, anačha wiltan wiltan takunaca quejpžcu quejpžcu mayizizaqui. Jalla nuž mayizaquiž niiqui, inapanikazza. Jalla nižtaž mayizza ana Yooz pajŇi žoŇinacaqui. Jalla nuž wacchi chiican mayizitiquiztan “nonznaqueeka Yoozqui” cjican. ⁸Jalla nižta anaž ančhuc cjeella. Ančhuca Yooz Ejpqui zizza, čhjulut ančhuc pecčhaja, jalla nii. Ima ančhucaž mayizan, panž zizza Yooz Ejpqui. ⁹Jaziqui ančhucqui jalla tuž mayizaquiča: “Yooz Tata, amqui arajpachquin žejlčča. Am tjuu honorchiz aptitaj cjlalla. ¹⁰Nižaza am mantiz timpu tjonchej cjlalla. Nižaza tii muntuquiz žejlŇi žoŇinacaqui am kuzcamaj kamlalla. Jaknužt am kuzcama kamčhaja arajpachquin žejlŇinaca, jalla nižta. ¹¹Nižaza tonjiqui čheri tjaažcalla čheržtan kamzjapa. ¹²Nižaza wejtnacaž

paata ujnaca pertunalla, jaknužt wejrnacqui wejtnaca quintra paañi pertunučhaja, jalla nižaza. ¹³Nižaza anaž anawalinacžquiz tjojtskatala, antis anawalinacquiztanž liwriyalla. Amčha wiñaya juc'ant mantiñamqui, nižaza amčha wiñaya juc'ant azzizqui, nižaza amčha wiñaya juc'ant honorchizqui. Jalla nužoj cjila. Amén.”

¹⁴ ‘Ančhuca quintra paañinacžquiz pertunaquiča. Nekztan Yooz Ejp zakaz ančhuca ujnaca pertunaquiča. ¹⁵Ančhuca quintra paañinacžquiz ana pertunaquiž niiqui, nekztan ana zakaz Yooz Ejpqui ančhuca ujnaca pertunaquiča.

AYUNAS PUNTU

¹⁶—Ančhucqui ayunascan anaž llaquit chercherchiz cjee. Ana zum kuzziz žoñinacaqui llaquit chercherchiz ayunasničha, žoñinaca ninaca ayunasni cherajo. Wejrqui weraral chiižinučha, jalla nuž paatiquiztan ninacaqui inapanikaz cjequiča. ¹⁷Ančhuczi ayunascanaqui zumpacha yujcmiž awjzna, nižaza zumpacha achami čhjiyczna, ¹⁸žoñinaca pačhuc ayunasni ana nayajo. Yooz Ejpqui ana cherta cjenacqui tjappacha cherčha, jamazit ančhuc paatami. Yooz Ejpqui ančhucaquiz zuma honoraž tjaaquiča, tsjii premiužtakaz.

CUSASANAC PUNTU

¹⁹Jesusaqui tjaajinchizakazza:

—Tii muntuquiz kamcanaqui anačha muzpa cusasanaca juntizqui. Kjurinacakaz ančhuca juntita cusasanaca lulaquiča. Nižaza parti ančhuca juntita cusasanaca inapankaz chjiytaquiča. Nižaza tjañiqui kjuyaž luzasačha, ančhuca cusasanaca tjanzjapa. ²⁰Nonžna, arajpachquin muzpa cusasanaca juntaquiča. Arajpachquin cusasanaca lujlñimi, nižaza cusasanaca akziñimi, nižaza cusasanaca tjanzziñimi ana željčha. ²¹Jakziqizt ančhuca cusasanaca juntita željčhaja, jalla nicjukaž ančhuc kuz tjaačha.

ZUMA KAMAÑCHIZ, ANA ZUMA KAMAÑCHIZ PUNTU

²²Jesusaqui tjaajinchizakazza:

—Žoñž čhjujquiqui persun curpuž lamparažtakazza. Jaziqui žoñž čhjujqui zuma cjequiž niiqui, zuma cheraquiča. Jalla nižtakaz žoñž kuzqui zuma cjequiž niiqui, zuma kamaquiča. ²³Žoñž čhjujquizti ana zuma cjequiž niiqui, zumchiquiztakaz ojklayaquiča. Ančhuca kamaña zumchiquiz panž cjequiž niiqui, juc'anti juc'anti zumchiquiz cjisnaquiča. Nekztan ¿jaknužt zuma kamasajo?

PAAZ PUNTU

²⁴Jesusaqui tjaajinchizakazza:

—Anaž jakziltami pizc patruna sirwasačha. Pizc patrunchiz cjesaž niiqui, tsjii patrunžquiz ana pectaž cjesačha. Tsjii patrunžquiz pectaž cjesačha. Tsjii patrunžquizkaz zuma sirwasačha. Jalla nižtiquiztan Yoozquiz sirwican anaž ancha paazquiz kuz tjasačha. Nižaza paazquiz kuz tjaaquiž niiqui, anaž Yoozquin ancha kuzziz cjesačha.

YOOZ EJPQUI NIIŽ MAATINACA CWITIČHA

²⁵Jesusaqui tjaajinchizakazza:

—Ančhucaquiz tuž chiižinučha, žejtzjapaqui kjaz liczmi lujl čhjerimi pecčha. Jalla nuž cjenami ančhucqui anačha kuzquizic čhjerquiztan llaquita cjisqui. Nižaza curpu wali cjisjapa zquiti pecčha. Jalla nuž cjenami ančhucqui anačha zquitquiztan llaquita cjisqui. Čhjul čhjerquiztanami žoñž žetiž juc'anti importičha. Nižaza čhjul zquitquiztanami persun curpuž juc'anti importičha. ²⁶Laylayni wežlanacaž chernza. Jalla nii wežlanacaqui ana zkalami čhjacačha, nižaza ana zkalquiztanami ricujčha, nižaza ana čhjeri yaaz zquitchizza. Jalla nuž cjenami ančhuca arajpach Yooz Ejpqui wežlanacžquiz čhjeri tjaačha. Yooz yujcquiziqui ančhucqui čhjul wežlanacquiztanami juc'antiž importičha. ²⁷Anaž jec kolta žoñimi persunpacha tsjan lajcha paki atasacna, llaquiziñi kuzziz cjenami ancha lajcha pecni kuzziz cjenami.

²⁸ ‘¿Kjažtiquiztan ančhucqui zquitquiztankaz llaquit kuzziz cjesajo? Plantanacž pjajkjallaž chernza, jaknužt pjajkčhaja, jalla nii. Ninacaqui anaž langza, nižaza anaž kawančha.

²⁹Jalla nuž cjenami nii pjajkjallanacaqui ancha c'achjallačha. Finu zquiti cujtžcumu ricachu

Salomón cjeta jiliriqiu anaž juc'ant c'achja nii pjajkallanacžquiztanami. ³⁰Plantanacaqui tsjii upacamakaz žejlčha. Nekztanaqui jakatažu kattažu jurnuquiz tjutjunzjapa ujžtačha. Jalla nižta cjenami Yooz Ejpacha nii plantanaca cwitičha. Ančhucqui čjul plantaquiztanami juc'antipanž importičha. Jalla nižtiquiztan Yoozqui ančhuc juc'ant cwitičha, Yoozquin ana tjapa kuzziz cjenami. ³¹Jalla nižtiquiztan ančhucqui anačha llaquita kuzziz cjisqui, čjul čhjerquiztanami, nižaza kjaz licquiztanami, nižaza čjul žquitquiztanami. ³²Ana criichi žoñinacaqui tii muntu cucasanacžquin kuzziz ojklajčha. Ančhuczi ana nižta kuzziz cjeella. Ančhucachha arajpach Yooz Ejpchizqui. Čhultakičha ančhucqui pecčhaj niiqui, liwj zizza Yooz Ejpqui. ³³Jalla nižtiquiztan Yooz Ejpžquinpankaz walja kuzziz cjee. Nižaza niiž mantita zuma kamañquiz kuzziz cjee. Jalla nekztanaqui ančhucaltaqui cawalikaz cjequičha čjulumi. ³⁴Jakan čjulut anawalinaca watačhaj niiqui, jalla nii ana juyza paa tonjiqui. Jakaqui čjulut watačhaj niiqui, jakapachaž jaknužquinami wataquičha. Zapuru čjul anawalinacaqui žejlñipančha.

7

ŽOÑINACŽTAN ZUMA KAMA

¹Jesusaqui tjaajinchizakazza:

—Ančhucalaqui anačha žoñinacž uj chii chiizqui. Jalla nuž žoñinacž uj chii chiyaquič niiqui ančhucqui juc'ant ujchiz cjequičha Yooz yujcuziqui. ²Nižaza žoñinacžquizimi “Amqui Yooziž castictaj cjila”, cjican chiyaquič niiqui anchucqui Yooziž casticta zakaz cjequičha. Žoñinacžtan zuma kama. Nekztan Yooz Ejpqui ančhucatan zumaž cjequičha. ³Nižaza amqui am jilž čhujcquiz tsjii cjuchilla cherasaž niiqui, žkjažtiquiztan am persun čhujcquiz pajk cjuchji ana cherjo? ⁴Am persun čhujcquiz nii pajk cjuchji ana cherasaž niiqui, žkjažtiquiztan am jilžquiz chiijo, “Jila, am čhujcquiztan cjuchilla apakžinačha”, cjicanajo? ⁵Ana zum kuzziz žoñimčha amqui. Am persun čhujcquiztan pajk cjuchji apakalla. Nekztan zuma cherasačha, y nižaza am jilž čhujcquiztan cjuchilla apakasačha.

⁶Yoozquin criichi žoñinaca, ančhucqui Yooz taku anapan nonz pecñi žoñinacžtan Yooz puntu ana paljayaquičha. Ninacaqui pacunacažtakazza. Nižta žoñinacaqui ančhucaltan ch'atñi pacužtakaz cjesačha. Nižaza nii Yooz taku anapan nonz pecñi žoñinacaqui cuchinacažtakazza. Yooz puntu nonžcu, kuzquikaz žawjčha.

YOOZQUIN MAYIZIZQUI

⁷Jesusaqui tjaajinchizakazza:

—Yooz Ejpžquiztan mayaquič niiqui, Yooz Ejpqui tjaaquičha. Nižaza Yoozquin kju-raquič niiqui, Yooz wachaquičha. Nižaza kjuy zanquiztan t'oc t'ocaquič niiqui, cjet-žintaž cjequičha. ⁸Jequit mayačhaja, risiwaquičha. Nižaza jequit Yoozquin kjuračhaja, wachaquičha. Nižaza jequit kjuy zanquiztan t'oc t'ocačhaja, cjetžintaž cjequičha. Jalla nužučha Yoozquiz mayizizqui.

⁹Anaž jakziltami ančhucma majch t'anta mayanaqui maz chjalznasačha. ¹⁰Nižaza anaž jakziltami ančhucma majch ch'iz mayanaqui zkora chjalznasačha. ¹¹Ančhucqui ana zum kuzziz cjenami zuma cusasanaca tjayinčhucčha persun maatinacžquiz. Jaziqui ančhucma arajpach Yooz Ejpqui mayñi maatinacžquiz juc'ant zumaž tjaasačha.

¹²Jaknužt ančhucqui parti žoñinaca ančhucatan zuma munaziz pecčhaj niiqui, jalla nižtapacha parti žoñinacžtan zuma munaziz waquizičha ančhucqui. Jalla niipan Moisés liiquiz chiichičha, nižaza Yooz cuntiquiztan chiiñi profetanacaž cjiirtanacami.

ZKOZ JICZ, PAL JICZ

¹³Jesusaqui tjaajinchizakazza:

—Yoozquin ojcz pecčhaj niiqui, zkocz zanquiztan luzza. Infiernuquin ojknj jicz palačha, nižaza pal zanchizza. Jalla nijwcchuc ojknj žoñinacaqui muzpačha. ¹⁴Tsjic zakaz žejlčha. Arajpachquin ojknj jicz zkocačha, nižaza zkocz zanallchizza. Nižaza c'ujlcullačha arajpachquin ojknj jiczqui. Jalla nii jiczquinaqui koluckaz žoñi ojčha.

KAMAÑQUIZTAN PAJTA CJESAČHA ŽOÑINACAQUI

¹⁵Jesusaqui tjaajinchizakazza:

—Ančhucqui zumpacha cwitasaquičha toscar taku chiichiiñi žoñinacžquiztanami. Jalla ninacaqui “Yooziž tjaata taku chiyučha” cjiñizakazza. Ninacaqui ančhucquiz tjonža, tsjii uuzi zkizi tjtžta kitižtakaz. Ninacž kuzqui anawira zumačha. ¹⁶Ninacž ana zuma kamañquiztan pajtaž cjequičha, ultimu ana zum žoñinacaqui. Tsjii ch'ap muntiqui uwaz frutchiz anaž cjesačha. Nižaza tsjii ch'ap plantaqui higo frutchiz anaž cjesačha. Jalla nižtapančha ana zum kuzziz žoñinaca. Zuma kamañchizqui anapanž cjesačha. ¹⁷Tjapa zuma muntinacaqui zuma fruta pookñičha. Nižaza tjapa ana zuma muntinacaqui ana zuma fruta pookñičha. ¹⁸Zuma muntiqui anapanž ana zuma frutchiz cjesačha. Nižaza ana zuma muntiqui anapanž zuma frutchiz cjesačha. ¹⁹Jakzilta muntit zuma fruta ana pookzaja, k'atžtaž cjequičha nižaza ujtaž cjequičha. ²⁰Jalla nižtanacquiztan ančhucqui ana zum kuzziz žoñinaca pajaquičha, ninacaž ana zuma kamañquiztan.

ANA YOOZ WAJTQUIN OJKŇI ŽOŇI

²¹Jesusaqui tjaajinchizakazza:

—Yekjap žoñinacaqui wejtquiz “wejt Jiliri, wejt Jiliri” paljajčha. Pero nuž chiicanami, anaž wejt arajpach Ejpž mantuquiz kamaquiz niiqui, anapanž arajpach wajtquin okasačha, nižaza anapanž arajpach Yooz Ejpž mantuquiz želasča. ²²Ultim žoñi pjalz tjuñquiziqui wacchi žoñinacaqui wejtquiz paljajajčha, tuž cjican: “Wejt Jiliri, wejt Jiliri, am tjuu aynakcan Yooz taku paljajchinčha, nižaza am tjuu chiican zajranaca chatkatchinčha, nižaza am tjuu aynakcan wacchi milajrunaca paachinčha”. Jalla nuž cjican wejtquiz paljajajčha. ²³Jalla nuž paljaytiquiztanami wejrqui cjeečha, “Ančhuc anawira pajchinla pero. Wejtquiztan zaraka. Ančhucčha ana zuma paañinacaqui”.

PIZC PUNTA ŽOŇINACAQUI

²⁴Jesusaqui tjaajinchizakazza:

—Jakziltami weriž chiita taku nonžaja, nižaza weriž chiita tawk jaru kamčhaja, jalla niiqui zuma intintazñi žoñinacačha. Intintazñi žoñiqui jalla tužučha. Tsjii maz lum juntuñ kjuya kjuyčha. ²⁵Nekztanaqui chijñi chijinchičha. Nekztan puj kjazqui walja tsijtchičha, nižaza pjatzičha, nižaza tjamiqui walja tjamchičha nii kjuya quintra. Pero nii chijñimi, tjamimi, kjazmi ana nii maz juntuñ kjuyta kjuyaqui pali atchičha. ²⁶Jaziqui jakziltami weriž chiita taku nonzcanpacha ana wejt tawk jaru kamčhaja, jalla niiqui zumzu žoñičha. Zumzu žoñiqui jalla tužučha. Ana zuma yokallquiz pjil yok juntuñ kjuya kjuychičha. ²⁷Nekztanaqui chijñi chijinchičha. Jalla nekztan puj kjazqui walja tsijtchičha, nižaza pjatzičha, nižaza walja tjamchičha nii kjuya quintra. Jalla nekztanaqui nii pjil yok juntuñ kjuyta kjuyaqui muzpa tsucchuca pajlzičha.

²⁸Jesusaž jalla nuž tjaajñi žeržtan, nonžñi žoñinacaqui walja ispantichičha niiz tjaajintiquiztan. ²⁹Jesusaqui walja zizñi zizñi tjaajinchičha. Lii tjaajñi maestrunacaqui ana nižta tjaajñitačha.

8

MOJKCHI JANCHICHIZ LAA ŽOŇI ČHJETINTA

¹Jalla nekztanaqui Jesusaqui curquiztan chjiwžquichičha. Nižaza muzpa žoñinaca apzičha. ²Tsjii mojkchi janchichiz laa žoñiqui Jesusižquiz macjatžquichičha. Jesusiž quillžcu, tuž cjichičha:

—Wejt Jiliri, tii laaquiztanž čhjetnalla. Am wejr čhjetinzim pecčhaj niiqui, wejr čhjetinzim atčha.

³Jalla nekztanaqui Jesusaqui kjaržtan lanžcan, tuž cjichičha:

—Wejr am čhjetnasachiya. Čhjetintam cjissa.

Jesusaž jalla nuž chiiitiquiztan, nii mojkchi janchichiz žoñiqui laaquiztan žejtchi quirchičha. ⁴Nekztanaqui Jesusaqui niizquin chiižinchičha, tuž cjican:

—Wejr am tsjii cjesača. Jalla tii čhjetintiquiztanaqui anam jeczquizimi maznaquiča. Timpluquin oka. Jalla nicju timplu jiliržquin persunpacha tjeežca, žejtchi, jalla nii. Nižaza Moisés mantita ofrenda tjaaquiča, tjapa žoñinaca zizajo, laaquiztan čhjetinta, jalla nii.

TSJII ČHJETINTAQUI

⁵Jalla nekztanaqui Jesusaqui Capernaum cjiita watja luzziča. Jalla nuž luzan tsjii roman sultat capitán jiliriqui nižžquin macjatžquichiča. Nekztanaqui roct'ichiča, ⁶tuž cjican:

—Wejt Jiliri, kjuyquiz wejt piyuna ajpžquiz žejlča, ana tsijtñi. Nižaza walja ana wali ayiñča.

⁷Nekztanaqui Jesusaqui cjichiča:

—Nii čhjetñi okasača.

⁸Nii sultat capitán jiliriqui kjaaziča, tuž cjican:

—Wejt Jiliri, anal wejt kjuyquiz am tjonžca cjiyi atasača. Wejrqui amquiztan inakaztča. Jaziqui takukaz chiya čhjetinzjapa. Nekztan wejt piyunaqui čhjetinta cjequiča. ⁹Wejrpacha wejt pajk jilirž mantuquiz želuča. Niiž mantitacama ojklayiñča. Nižaza wejt mantuquiz sultatunaca žejlča, čhjulut wejr mantučhaja, jalla nuž cjen zultatunaca ojčča. Nižaza zultatu kjawznučhaja, zakaz tjončča. Nižaza wejt piyuna čhjulu paajumi mantučhaja, zakaz paača.

¹⁰Jalla nuž nonžcu, Jesusaqui nii jiliri ancha zuma kuzziz naychiča. Nekztanaqui nuž nayžcu Jesusaqui niž apžñinacžquiz cjichiča:

—Wejrqui weraral cjiwča. Chekapan tii žoñiqui ju'ant Yoozquin kuzzizza, tjapa Israel wajtchiz žoñinacžquiztanami. ¹¹Nižaza wejrqui cjiwča, tuwantan tajatan muzpa žoñinacaqui tjonaquiča, arajpach Yooz wajtquin luzjapa. Jalla nii Yooz wajtchiz žoñinacaqui Abrahamžtan, Isaacžtan, Jacobžtan, jalla ninacžtan juntupacha cuntintuž cjequiča. ¹²Israel žoñinacazti arajpach Yooz wajtquin žejlchucatača. Pero Yooz wajt zawntan zumchiquiz chjatkataž cjequiča. Jalla nicjuž kaaquiča, nižaza izke jojcan želaquiča.

¹³Jalla nekztanaqui Jesusaqui capitán jiliržquiz tuž cjichiča:

—Am kjuya oka. Jaknužt am tjapa kuztan criičhaja, jalla nižtapachaž cjequiča.

Jalla nii orapacha niž piyunaqui žejtchi quirchiča.

ŽOÑINACA ČHJETINTA

¹⁴Nekztanaqui Jesusaqui Pedruž kjuya ojčkichiča. Jalla nicju ajpžquiz Pedruž ajmuž maa cherchiča ch'ujlñi conžtan laa cjichi. ¹⁵Naaža kjara lanžinchiča. Nuž lanztiquiztan nii ch'ujlñi conquistat žejtchinča. Nii orapacha žaažcu, ninaca atinti kallantichinča.

¹⁶Nii čhjetinta quintu nonžcu tjuñiž kattan muzpa zajraž tanta žoñinaca Jesusižquiz zjičtatača. Jesusaqui tsjii taku chiižcu zajranaca chjatkatchiča. Nižaza tjapa laanaca čhjetinchiča. ¹⁷Nii čhjetintanacaqui Isaías profetaž chiita taku cumplissiča. Isaiasqui cijrchiča tuž cjican: “Tsjii žoñiqui učhum laa curpunaca tjupi cjisakataquiča, nižaza conanacquiztan učhum čhjetnaquiča”.

JESUCRISTUŽTAN CHICA OJKLAYZ PUNTU

¹⁸Wiruñaquei tsjii noojiqui muzpa žoñinacaqui walja muytata Jesusižquiz ajcziča. Jalla nižta cheržcu, Jesusaqui mantichiča, kotž tsjii latuquiztan okajo. ¹⁹Jalla nekztanaqui tsjii lii tjaañi mastruqui Jesusižquiz macjatžquichiča, tuž cjican:

—Tjaajñi Maestro, jakzitchum okačhaja, amtan chicapachal ojklayasača.

²⁰Jesusaqui nižžquin kjaaziča, tuž cjican:

—Kitinacami kjuychizza. Nižaza wežlanacami tjurchizza. Wejrzi anal kjuychizza, tjajzjapami.

²¹Tsjiiqui nižžquiz apžñi žoñinacžquiztan zakaz paljaychiča, tuž cjican:

—Wejt Jiliri, amtan chica ojklayasača. Pero wejt ejpča ticziqui. Nekztan iyal wejt ejp tjatsñi okaž cjeella.

²²Jesusaqui kjaaziča, tuž cjican:

—Wejtan chicaka am ojklaya. Ticzižtakaz žoñinacaqui, jalla ninacaj ticzinaca tjatžlani.

JESUSAQUI TJAMIMI KJAZ LJOJKIMI MANTIČHA

²³ Jalla nuž chiyžcu Jesusaqui warcuquiz luzziča. Niiž tjaajinta žoñinacaqui luzziza-kazza. ²⁴ Ninacaž kotquiz okan, tjamiqui walja tjamchiča. Jalla nuž tjaman kjaz ljojkiqui warcu tjetanz pecatča. Jesusazti tjabatča. ²⁵ Nii kjaz ljojkiž cjen tjaajinta žoñinacaqui Jesusa žinchiča, tuž cjan:

— ¡Wejt Jiliri! ¡Liwriyalla! Tii warcu kjazquiz julzmayača. Ticznačhani učumqui.

²⁶ Jesusaqui kjaaziča, tuž cjan:

— ¿Kjažtiqiztan ančhucqui anča tsuctsucjo? Ančhucqui anača wejtquin tjapa kuzziz.

Jalla nekztan Jesusaqui žaažcu, tjamimi kjaz ljojkiimi uziča. Jalla nuž chiitiquiztan tjamimi kjaz ljojkiimi apaltichiča. ²⁷ Nii apaltiñi cheržcu niižtan ojklayñi žoñinacaqui ispantichiča, nižaza tuž cjichiča:

— ¿Čhjul žoñit teejo? Tjamimi tii kot kjaz ljojkiimiž tiž čhiita takukaz cazla.

ZAJRAŽ TANTA ŽOÑINACA

²⁸ Nii kotž nawjctuiñtan irantižcu, Jesusaqui Gadara cjita yokquin ulanchiča. Ulantan pucultan žoñinacaqui campu santuqiztan tjonchiča. Nii pucultan žoñinacaqui zajraž tantatača walja ana walinacatača, žoñinacžtan kichasñipanikaztača. Jalla nižtiqiztan nii jiczquiz ana jecmi ojklayñitača.

²⁹ Jesusižquin macjatžcu nii zajranacaž tanta žoñinacaqui kjawchiča, tuž cjan:

— ¿Kjažtiqiztan wejtnacaqui mitisejo? Ima casticiz timpu irantižcan amqui tekz tjonchamča, wejrnaca sufriskatzjapa. ¿Kjažtatajo? —Nuž cjan kjawchiča.

³⁰ Nižaza nii nawjkchuc cuchinacaqui ojklayča lujlan. ³¹ Zajranacaqui Jesusižquiz rocchiča tuž cjan:

— Amqui wejrnaca chjatkataquiž niiqui, nii cuchinacžquin wejrnaca luzkatalla.

³² Jalla nekztanaqui Jesusaqui cjichiča:

— Nižtaqui, oka. Cuchinacžquin luzca.

Jalla nuž chiitiquiztan zajranacaqui žoñinacžquiztan ulanchiča; cuchinacžquin luzziča. Zajranacaž luztiqiztan cuchinacaqui tsjii barranc k'awquin tjojtsiča, kotquiz-pachatača. Jalla nužquiz kjaztan tsamžcu, ticziča nii cuchinacaqui.

³³ Jalla nii cuchi itzñinacaqui anča tsucchi zajtchiča. Watja irantižcu, nii pucultan zajraž tanta žoñinacž puntuqiztan quint'ichiča, nižaza tjapa nižta watchinacami. ³⁴ Jalla nii quintu nonžcu tjapa nii wajtquiz žejlñi žoñinacaqui ulanchiča, jakziqin Jesusa želatčhaja, nicju. Jesusižtan zalžcu, ninacaqui rocchiča, ninacž yokquiztan okajo.

9

ZUCH ŽOÑI ČHJETINTA

¹ Jalla niiž wiruñpachaqui Jesusaqui wilta warcuquiz luzziča. Nekztan kotž tsjii latuqiztan kajkchiča. Nižaza niiž persun watja irantichiča. ² Jalla nijwc žoñinacaqui Jesusižquin tsjii zuch žoñi chjitchiča. Tjajz zqutinacžtanpacha ajpchi chjitchiča. Ninacž tjapa kuz cjcjiñi cheržcu, Jesusaqui laa žoñžquiz paljajychiča, tuž cjan:

— Jila, ana llaquis; tjup kuzziz cjee. Am ujnacac pertuntača.

³ Jalla nižta čhiñi nonžcu yekjap lii tjaajñi maestrunacaqui kuzquiz tuž pinsichiča: “Yooz quintrala; tii žoñž takuqui anawalipanla”. ⁴ Pero Jesusaqui ninacž kuzquiz pinsita zizatča. Jalla nekztan ninacžquiz cjichiča:

— ¿Kjažtiqiztan ančhucqui nižta ana zuma pinsamintuchiztajo? ⁵ ¿Jakzilta takut pjasila čhiiz cjesajo? ¿“Am ujnaca pertuntača” čhiiz pjasila cjesaya? Už ¿“Tsijtsna, oka”, jalla nuž čhiiz pjasila cjesaj? ⁶ Tsewctan cuchanžquita Yooz Zoñtča wejrqui. Tii muntuquiz jiliritča, ujnaca pertunzjapami. Razunal chiyuča. Nuž zizjapa, ančhucqui tiiž chera.

Jalla nekztanaqui nii zuch žoñžquiz cjichiča:

— Tsijtsna, am tjajz zquiti apta; nižaza am kjuya oka.

⁷ Jalla nii orapacha tsijtsiča, nižaza niiž kjuya ojkcchiča. ⁸ Žoñinaca nii cheržcu, tsucchi quirchiča, nižaza “Yoozqui honorchiz cjilalla” cjan čhiichiča. Yoozqui žoñinacžquiz nižta čhjetinñi azi tjaachiž cjen, nuž čhiichiča.

MATEO KJAWŽTA

⁹Nii kjuyquiztan ulanžcu Jesusaqui Mateo cjita žoňi cherchiča. Mateoqui impuesto cobriňi puestuquiz julzi želatča. Jesusaqui nižquiz cjichiča:

—Wejttañ chica ojklaya.

Jalla nekztan Mateoqui tsijtsu, Jesusižtan ojkchiča. ¹⁰Niž wiruň Jesusaž Mateož kjuyquin lulan, muzpa impuesto cobriňinacami nižaza ujchiz žoňinacami irantichiča. Nižaza ninacaqui Jesusižtan niiž tjaajinta žoňinacžtan chica julziča tsjii mizquiz. ¹¹Fariseo žoňinacazti jalla nii cheržcu, Jesusiž tjaajinta žoňinacžquiz pewcziča, tuž cjican:

—¿Kjažtiquiztan ančhuca tjaajiňi maestruqui impuesto cobriňinacžtan nižaza ujchiz žoňinacžtan čhjeri lujljo?

¹²Jesusaqui jalla nižta pewcžni nonžcu ninacžquiz cjichiča:

—Zuma wiw žoňinacaqui anaž médicu kullňimi pecča. Antiz laa žoňinacaž médicu kullňimi pecča. ¹³Yooz takuqui tuž cjiča: “Oksňi kuzziz žoňinaca juc’antil pecuča wilana jawkňi žoňinacžquiztan”. Tantiya čjul puntut tii Yooz taku čiičhaja, nii zumpacha intintaza. Jaziqui wejrqui “Zuma kamuča” cjiňi žoňinacžquiz anal kjawsňi tjonchinča. Antiz “Ujchizpanča” cjiňi žoňinacžquiz kjawsňi tjonchinča, ninacž kuz campiiata cjisjapa.

AYUNAS PUNTU

¹⁴Juan Bautistaž tjaajinta žoňinacaqui Jesusižquiz macjatžquichiča. Nekztan pewcziča, tuž cjican:

—Wejrnacmi fariseo žoňinacami walja ayunasiňča. Amiž tjaajinta žoňinacazti ana ayunasňipanla. ¿Kjažtiquiztan nižtajo?

¹⁵Nekztanaqui Jesusaqui kjaaziča, tuž cjican:

—¿Kjažt weriž tjaajinta žoňinaca llaquit kuzziz ayunasasajo, weriž želanpachajo? Wejrqui zalz kazzi tjowažtakaztča. Ninacaqui zalz pjijstiquiz invittanacaztakazza. Zalz kazzi tjowaž želan, niiž zalz pjijstiquiz invittanacaqui ana llaquit kuzziz ayunasasasča. Pero tsjii timpuž tjonaquiča. Jalla nii timpuquiz zalžni tjowa kjažtaž cjequiča; jalla nekztanž ayunasasasča.

¹⁶‘Anaž jakziltami tsjel zqiti ew rimintužtan rimintasača. Ew rimintuqui jalj-tapasasča, nižaza nii ach zqitiqui juc’anti wjajržcu tsjelanznasasča. ¹⁷Nižaza anaž jakziltami ach zkiz luuzquiz ew vinu alznasasča. Jalla nižtaž alznasaž niiqui, zkiz luuz panž wjajrskatasasča ew vinuqui. Nekztan vinumi zkiz luuzmi pertisnasasča. Ew vinu ew zkiz luuzquiz panž alznasasča. Jalla nuž zumpacha cjesasča vinumi zkiz luuzmi.

JESUCRISTUČHA LAA ŽOŇI ČHJETINŇIQUI

¹⁸Jesusaž tjaajnan, tsjii judfo žoňinacž jiliriqui irantichiča. Jesusiž yujcquin quillziča, tuž cjican:

—Wejt majtqui ticžnił jitča. Amqui wejt kjuya okasaž niiqui, naaquiz am persun kjaržtan lanznasasča. Nekztan naaquiz žetaquiča.

¹⁹Nekztanaqui Jesusaqui tsijtsu nii jiliržtan ojkchiča tjaajinta žoňinacžtanpacha. ²⁰Jalla nuž okan, tsjaa laa maatak žonqui Jesusižquiz wirquiztan macjatžquichinča. Tunca paan wata ljok tjawksňi laakaz t’akjiri želintača. Jesusižquiz macjatžcu Jesusiž zquit puntallquiz lanzinča. ²¹Ima macjatcan pinsichinča, “Wejrqui niiž zquitilla lanžcu žetaka wejrqui” cjican. ²²Jalla nuž lanžtiquiztan Jesusaqui jalla naaža kjutňi kjutžcu naa maatak žoň cherziča. Nekztan tuž cjichiča:

—Cullaca, tjup kuzziz cjee. Amiž tjapa kuztan cričiči cjen, žejtchi cjissamča.

Jalla nii orapacha žejtchin cjissinča.

²³Jalla nekztanaqui Jesusaqui tira ojkchiča. Nii jilirž kjuya irantican Jesusaqui cherchiča, nii jilirž majt tjazjapa banda pjujňinacaqui listutakalča, jalla nii. Nižaza žoňinacaqui ančaž kaacan arančiča.

²⁴Nuž cheržcu Jesusaqui ninacžquiz cjichiča:

—Ančhucqui tekztanž ulna. Taa uzqui anača ticzinqui, antiz tjaiča.

Jalla nuž Jesusiž chiitiquiztan, žoñinacaqui nižquin tjassiča. ²⁵Nekztanaqui Jesusaqui ninaca ulanskatchipanča. Nekztan luzcu, naaža ticzi uza kjarcu tanžcu, žinziča; žejtchinpacha. ²⁶Jalla nekztanaqui tjapa kjutni nii yokquin nii milajru quintu ojkičiča.

ZUR ŽOÑINACA ČHJETINTA

²⁷Jalla nijwctan ulanžquitiquiztan pucultan zur žoñinacaqui nižquin apžquichiča, kjawcan:

—Davidž majchmaatquiztan tjoñi, wejrnaca okznalla, —cjican.

²⁸Nekztan Jesusaž kjuya luztan nii zur žoñinacaqui nižquin macjatchiča. Nekztan Jesusaqui ninacžquiz pewcziča, tuž cjican:

—Wejrqui ančhuc cherkatasacha, ¿jalla nii crii ančhucya?

Ninacaqui kjaaziča, tuž cjican:

—Wejt jiliri, criyuča.

²⁹Jalla nekztanaqui Jesusaqui ninacž čhjujqui lanlanžinčiča. Nižaza cjichiča:

—Ančhucaž tjapa kuztan criitiquiztan cherñi cjisna.

³⁰Nii orapacha ninacž čhjujquiqui cherñi cjissiča. Nekztanaqui Jesusaqui ninacžquiz zumpacha chiižinčiča, tuž cjican:

—Tii čhjetintaqui anaj jecmi zizla; ančhucmi anaž jecžquizimi chiichiyaquičiča.

³¹Jesusaž nuž chiižinčiž cjenami, ninacaqui ulanžcu, tjapa yokaran nii čhjetinta quintu parličičiča.

ANA CHIIÑI ŽOÑI ČHJETINTA

³²Nii kjuyquiztan ulnan yekjap žoñinacaqui tsjii zajraž tanta žoñi zjijcchiča. Zajraž tantiquiztan ana chiiñi atatča. ³³Nekztanaqui Jesusaqui nii zajra chjatkatčiča. Jalla nuž chjatkatiquiztan nii ana chiiñi žoñiqui chiyi kallantichiča. Zoñinacazti jalla nii cheržcu walja ispartichi cjissiča, tuž cjican:

—Tii Israel yokquiz ana wira tižtanaca cheriñtača wejrnacqui.

³⁴Pero fariseo nžoñinacazti tuž cjetča:

—Tiiqui zajranacž jilirž aztankaz zajranaca chjatkatničiča.

³⁵Jesusaqui tjapa wajtquiztan watja nižaza jochquiztan jochi ojklaychiča, judío ajc kjuyquizimi tjaajincan. Yooz mantuquiz kamz puntu chiižinčiča. Nižaza tjpaman laanacami nižaza jallc'a curpuchiznacami čhjetinčiča. ³⁶Zoñinaca cheržcu, ninaca okziča. Ana awatirchiz uuzanacažtakaz želatča. ³⁷Zoñinaca okzcu, Jesusaqui niž tjaajinta žoñinacžquiz paljaychiča, tuž cjican:

—Weraral cjiwča. Zkalaqui walja žejlča. Pero zkala ajžni žoñinacača upaqui. ³⁸Yooz Ejpqui zkal Patrunača. Jalla nižtiquiztan Yooz Patrunžquiztan mayiza, zkala ajžni žoñi cuhnajajo.

10

TUNCAPAN APOSTOLONACA ILLZTA

¹Jalla nekztanaqui Jesusaqui niž tuncapan illzta žoñinaca kjawziča. Nekztan ninacžquiz mantiz poder tjaachiča, zajranaca chjatkatžjapa, nižaza tjpaman laanacami jallc'a curpuchiznacami čhjetnajo.

²Nii tuncapan illzta apostolonacaqui jalla tižta tjuuchiznacatača: Primiruqui Simonatača, nižaza niž tsjii tjuuqui Pedro cjitazakaztača. Nekztan niž lajktača, Andrés cjita. Nekztan Jacobotača, nižaza niž jila Juan. Nii pucultanaqui Zebedeož majchwichtača. ³Nekztan Felipitača, Bartolometacha, Tomastača, nižaza Mateotača. Nii Mateozti impuesto cobriñitača. Nekztan Jacobotača, Alfeož majchtača. Nekztan Lebeotača nižaza niž tsjii tjuuqui Tadeo cjitazakaztača. ⁴Nekztan Simonatača, niž cananista cjita partiquiztantača. Ultimquiziqui Judas Iscariotetača, jalla niž Jesusiž quintra tarasunchičiča.

ILLZTA ŽOÑINACA CUCHANTA

⁵Jesusaqui nii tuncapan illzta žoñinaca cuchanžquichiča, niiž cuntiquiztan ojklajajo. Ima cuchanžcan tuž chiižinčiča:

–Judío yokquinpanž ojklayaquiča, Samaria yokquin nižaza yekja yokanacquin ana ojklayaquiča. ⁶Israel wajtchiz žoñinacžquinkaz okaquiča. Jalla ninacaqui katchi uuzinacažtakaz žejlča. ⁷Arajpach Yooz mantuquiz kamz timpu žcatžinžquiča. Jalla nii paljaycan ojklayžcaquiča. ⁸Nižaza laanaca čhjetnaquiča. Nižaza ticzinaca jatatskataquiča. Nižaza mojkchi janchichiz žoñinaca čhjetnaquiča. Nižaza zajranaca chjatkataquiča. Tii mantiz poderaqui ančhucaquiz nužkaz tjaatača. Jalla nižtiquiztan tii poderžtan žoñinacžquiz yanapžcu anaž čhjulumi mayaquiča pacajo.

⁹Paaz ana chjichaquiča, kor paazmi, chiw paazmi, cobre paazmi. ¹⁰Nižaza ana chjichaquiča žak quelzmi. Tsjii almilla alaja chjichaquiča. Nižaza ana iya čhjulumi chjichasača, ana yekja čhatami, nižaza atsmi. Yooztajapa langžnacinacžquiziqui čhjeriqui tjaata cjis waquiziča.

¹¹Ančhucqui wajtquizimi jochquizimi irantižcuqui, zuma žoñipanž kjurznaquiča. Nuž zuma žoñi wachuqui, niiž kjuyquiz alujasaquiča, nii wajtquiztanami jochquiztanami ulanzcama. ¹²Tsjii kjuya luzcu, tsaanaquiča, “Ančhuc walipaj cjila”, cjan. ¹³Nii kjuychiz žoñinaca zumažlaj niiqui, jalla ninacžtaqui walipanž cjequiča. Yekjapa žoñinacaqui ana zumažlaj niiqui, jalla ninacžtaqui čhjulumi anawalikaz cjequiča. ¹⁴Jakziltat ančhuc ana risiwaquič žniiqui, nižaza ančhuc ana nonz pecaquič žniiqui, ninacžquiztan okaquič ančhucqui. Nii kjuyquiztan ulnaquiča nižaza nii wajtquiztanacqui. Nekztan nii wajtquiztan kjojchquiz žcatchi pulpunaca tsajt tsajtsnaquiča. Jalla nii tsajt tsajttaqui siñalaž cjequiča ninacž quintra, ančhuc ana risiwčič cjen. ¹⁵Weraral cjiwčiča. Casticz tjuñquiziqui nii ančhuc ana zuma risiwčič žoñinacžti juc'anti castictaž cjequiča, Sodoma cjita Gomorra cjita, jalla nii wajtchiz žoñinacžquiztan.

CHJAAWJKATŃINACA ŽELAQUIČA

¹⁶Jesusaqui tjaajinchizakazza:

–Tii werič chiižinta taku nonžna. Wejrqui ančhuc cuchnuča. Ančhucqui kitinacž taypiquiz ojklayaquiča, uuzanacažtakaz. Jalla nižtiquiztan ančhucqui walja kuzziz cjee. Listuž cjequiča žkoražtakaz, pero zuma paazjapa. ¹⁷Ančhucqui persunpachaž walja cwitazaquiča. Ančhucqui jilirinacžquin intirjita cjequiča; nižaza ajcz kjuyquiz wjajttaž cjequiča. ¹⁸Nižaza ančhucqui wejt puntuquiztan parličič cjen chjičtaž cjequiča prefectonacžquinami, nižaza tsjan chawjc jilirinacžquinami. Nekztan ančhucqui wejt puntuquiztan chiyaquiča, nii jilirinacž yujcquizimi, nižaza ana judío wajtchiz žoñinacž yujcquizimi. ¹⁹Jilirinacžquiz intirjitaž cjenami, ana kuz turwaysi cjequiča, čhjulut ančhuc kjaaznačhaja, nižaza jaknužt kjaaznačhaja, jalla nii. Jilirinacž yujcquiz prisintiz ora, Yoozqui ančhuca kuzquiz chiiz taku tjaaquiča, jaknužt chiizalaj, nii. ²⁰Ančhuca persun kuzquiztan anaž chiyaquiča. Antiz ančhuca Yooz Ejpž Espiritu Santuqui ančhuc chiikataquiča.

²¹Nii timpuquiziqui žoñinacaqui persun jilž quintra aptjapznaquiča persun jila conkatzjapa. Nižaza ejpnacaqui persun maatinacž quintra aptjapznaquiča. Maatinacžti persun maa ejpnacž quintra zakaz aptjapznaquiča, persun ejpnaca conkatzjapa. ²²Tjapa ana criichi žoñinacaqui ančhucaquiz ch'aanaquiča wejt puntu parličič cjen. Pero jakziltat ticzcama wali tjurt'iñi kuzziz cječaj niiqui, liwriitaž cjequiča, Yooztan wiñaya kamzjapa. ²³Tsjii wajtchiz žoñinacaqui ančhuc chjatkataquič žniiqui, ninacžquiztan yekja wajtquin okaquiča. Weraral cjiwčiča, wejrqui arajpachquiztan cuchanžquita žoñtča. Ima werič tii muntuquiz wilta tjonan, ančhucqui tjapa Israel watjanacžquin anaž iranti atasacha.

²⁴Tjaajinta žoñiqui niiž tjaajiñižquiztan anaž juc'anti cjesača. Nižaza piyunaqui niiž patrunžquiztan anaž juc'anti cjesača. ²⁵Tsjii tjaajinta žoñiqui niiž tjaajiñiž irata, jalla nižta tjaajiñiž cjisnaquič žniiqui, cuntintuž cjis waquiziča. Nižaza tsjii piyunaqui niiž patrunž irata, jalla nižta patrunaž cjisnaquič žniiqui, cuntintuž cjis waquiziča. Nonžna ančhucqui, quintra žoñinacaqui “Beelzebú” cjan zjira jilirž tjuužtan wejtquiz

tjuuskataquiči nīquī, ančhucaquiz juc'ant anawal tjuužtanž tjuuskataquiča. Wejrqui kjuychiz patrunžtakaztča, ančhuczi wejt kjuj familiažtakaza.

²⁶ Jalla nižtiquiztan ančhucqui anaž žoñi eksna. Tjapa chjojzakuñ tjaajintami zuma kjana ziztaž cjequiča. Nižaza tjapa jamazit tjaajintami nižtakaz zuma kjana zizta-pankaz cjequiča. ²⁷ Tjapa weriž chjojzaka tjaajintanacami ančhucqui žoñinacž yujcquiz kjanacama paljayaquiča. Nižaza tjapa weriž jamazit tjaajintanacami ančhucqui paljayaquiča, tjapa žoñinaca nonzjapa. ²⁸ Nonžna ančhucqui, anača eksqui tii curpu alaja conñinacžquizimi. Ninacaqui animuqui anaž conasača. Antiz Yoozquizpan eksna. Jalla niiča curpumi animumi infiernuquin wiñaya t'akjisiskatñiqui.

²⁹ Tsjii paaztan pizc wežlanaca kjayasača. Jalla nuž koluc valorchiz kjayžcumi ančuca Yooz Ejpqui ninaca cwičiča. Yooz Ejpž ana munan, tsjii wežlaqui anaž ticznasača. ³⁰ Jilanaca, Yooz Ejpqui tjapa ančuca ach charanaca kanžintača. ³¹ Jalla nižtiquiztan anaž čjulquiztanami eksna. Wežlanacžquiztan ančhucča juc'ant valorchizqui. Yooz Ejpqui ančhuc juc'anti cwitaquiča wežlanacžquiztan.

³² Jakziltat parti žoñiž yujcquiz wejt favora cječhaj niiqui, nižazakal wejrqui wejt arajpach Yooz Ejpž yujcquiz nii žoñž favora chiyacha. ³³ Nižaza jakziltat parti žoñž yujcquiz wejr ana pajñi nicačhaj niiqui, nižaza wejrqui wejt arajpach Yooz Ejpž yujcquiz nii žoñž quintra ana pajñi zakal chiyacha.

³⁴ Tii taku nonžna. Weriž tjontiquiztan žoñinacaqui ana zumquin cjequiča; quintrasñi cjequiča. Nekztan aptjapznaquiča. Ana criichinacaqui criichi žoñinacž quintra cjequiča. ³⁵ Weriž tjontiquiztan tsjii maatiqui persun ejpžjapa quintraž cjequiča. Nižaza tsjaa majtqui persun maajapa quintra cjequiča. Nižaza tsjaa wazmi persun kjan maajapa quintra cjequiča. ³⁶ Jalla niža zapa mayni familianacaqui ninacporož quintraž cjequiča. ³⁷ Jakziltat persun maa ejpžquizkaz kuzziz cječhaja, jalla niiqui anaž wejt partiquiz cjichuca cjesača. Nižaza jakziltat persun ocjalžquizkaz kayazt'ačhaja, jalla niiqui anaž wejt partiquiz cjichuca cjesača. ³⁸ Jakziltat wejt partiquiz cjis pecčhaj niiqui, tjapa kuztanž wejtquiz cjistanča. Sufrijsapaqui listoj cjila, ticzcama. Ana niža wejtquin tjapa kuztan cječhaj niiqui, anaž wejt partiquiz cjichuca cjesača. ³⁹ Jakziltat weriž cjen persun anazum kamañquiztan ana jaytačhaja, jalla niiqui ultimquiziqui ana liwriita cjesača. Nižaza jakziltat weriž cjen persun anazum kamañquiztan jaytačhaja, jalla niiqui ultimquiziqui liwriitaž cjequiča; Yooztan wiñaya zuma kamaquiča.

⁴⁰ Jequit ančhuc risiwčhaja, nižaza wejrmi zakaz risiwčha. Nižaza jequit wejr risiwčhaja, jalla niiqui nižazakaz wejt Yooz Ejpmi risiwčha. ⁴¹ Jequit tsjii Yooziž cuchanta profeta risiwaquiči niiqui, jalla niiqui profetažtakaz honorchiz zakaz cjequiča. Nižaza jequit tsjii Yooz kuzcama kamañ žoñi risiwačhaja, jalla niiqui Yooz kuzcama kamañž premio, jalla nižtakaz honorchiz cjequiča. ⁴² Nižaza jequit tsjii wejtquin kuzziz žoñžquiz yanapachaja, jalla niiqui honorchiz zakaz cjequiča. Jequit wejtquin criichi žoñžquiz tsjii tasa kjaz onačhaja, jalla niiqui honorchiz zakaz cjequiča. —Jalla nuž chiichiča Jesusaqui.

11

JUAN BAUTISTAŽ CUCHANŽQUITA ŽOÑI

¹ Niiž tuncapan illzta žoñinacžquiz tjaajinz žeržcu, nekztan Jesusaqui ojkičiča, yekja watjanac kjutñi. Wajtquiztan watja ojklaychiča, žoñinacžquiz tjaajni, nižaza Yooz taku paljaji.

² Juanqui nii oraqui carsilquiztača. Jalla nicju Cristuž ojklaytanaca quintu nonchiča. Nekztanaqui Juanqui tsjii kjažt mazinaca Jesusa pewczñi cuchanžquichiča. Nekztan irantižcu Jesusižquiz ³ pewcziča, tuž cjican:

—Cristuqui tjoniz cjispacha; ¿Amj Yoozquiztan cuchanžquita Cristumkaya? ¿Už yekjaž tjewznasa, jaa?

⁴ Jesusaqui ninacžquiz kjaaziča, tuž cjican:

—Jaknužt cherčhaja nonžaja, jalla nii tjappachaž Juanžquiz quint'ižcaquiča ančhucqui.

⁵ Zur žoñinacac cherča, Zuch žoñinacaqui ojklayča. Mojkihi janchichiz žoñinacaqui

chjetintača. Oñi žoñinacaqui nonža. Nižaza ticzi žoñinacaqui jacatatskattača. Nižaza pobre žoñinacžquiz Yooz liwriiñi taku paljaytapanča. ⁶Jakziltat weriž paatanaca cheržcu, nižaza weriž chiitanaca nonžcu, ana kuz turwayziłaj niiqui, walipanikaz cjequičha.

JUAN BAUTISTA PUNTU

⁷⁻⁸Jalla ninacaž ojktan, Jesusaqui chiyi kallantichiča Juanž puntuquiztan. Žoñinacžquiz tuž cjichiča:

—Ch'ekti yokquin, ħchjulu cherzñi ojkchinčhuctaya? ħTjamiž tjizinta caña cherzñi ojkchinčhuctajo? Anačhay. ħFino zquiti cujtchi žoñi cherzñi ojkchinčhuctajo? Chawjc jilirž kjuyquin zuma zquiti cujtchi žoñi žejlča. Jalla nii zizza ančhucqui. ⁹ħChjulu cherzñi ojkchinčhuctaya? ħYooz cuntiquiztan chiiñi profeta cherzñi ojkchinčhuctaya? Jesalla, ultim werara nuž ojkchinčhucča. Juanqui tuqita profetanacžquiztan juc'ant chekanča.

¹⁰Juanž puntuquiztan Yooz takuqui tuž cjiča:

“Yooz Ejpqui tsjii žoñi cuchanžcaquiča ima Cristuž Yooz taku paljayi ojklayan. Nii žoñiqui Israel žoñinacžquiz Cristu zuma tjewskataquiča”.

¹¹Weraral cjiwča. Juan Bautistača parti žoñž maatinacžquiztan tsjan juc'antiqui. Pero chjul Yooz maatimi žoñž maatiquiztan tsjan juc'antiča. Arajpach Yoozquin kuzziz žoñinacača Yooz maatinacaqui.

¹²Juanž tjontiquiztan anzama muzpa žoñinacaqui ts'acjazcan arajpach Yooz man-tuquiz luz pecča; walja tjapa aztan nižaza tjapa kuztan luz pecča. ¹³Juanž tjonz-cama, tjapa tuqita profetanacž chiitanacami nižaza Moisés liinacami arajpach Yooz cuchanžquita puntuquiztan chiiča. ¹⁴Elias cjita profetaqui wilta tjoniz cjispacha; nii Elias tjonz cuntiquiztanča Juan Bautistaqui. Jalla niic werarača. Nuž criiz waquiziča. ¹⁵Jakziltačhalaj nonžni cjunčhiz, jalla niiqui tii chiitaqui nonžna.

¹⁶ħKjažtat tii timpuquiz žejlñi žoñinacajo? ħJecnaca iratat tinacajo? Jalla tižta ocjalanacažtakazza tinacaqui. Yekjap ocjalanacaqui palazquin julzi uzinča, nižaza ninacž mazinaca kjawkjawža, tuž cjican: ¹⁷“Tsajtsjapa pincallu pjuchinča. Ančhuczti ana tsajchinčhucča. Nižaza kaayikaayi wirzu itzinča. Ančhuczti ana kaachinčhucča”. Jalla nuž cjichiča ocjalanacaqui. Jalla nižta iratača tii timpuquiz žejlñi žoñinacaqui. ¹⁸Juan tjonchiča. Niiqui zumanaca ana lujlñiča, nižaza ana licñiča. Jalla nižtiquiztan ančhucqui tuž cjinčhucča, “Juanqui zajraž tantača” cjican. ¹⁹Niž wiruñaquí wejrqui tjonchinča, arajpach Yooz Ejpž cuchanžquita Žoñi. Wejrqui zumanaca luluča, nižaza licuča. Jalla nižtiquiztan ančhucqui wejt puntuquiztan cjiča: “Niičha ancha lujlñiqui, nižaza licñiqui, nižaza niičha ujchiz žoñinacž maziqí, nižaza anawali impuestu cobriñinacž maziqí”. Jalla nuž cjinčhucča wejt puntuquiztan. Tuž zakal cjiwča: Yooz puntu zuma zizñi žoñinacaqui Yooz tjaajintacama kamča.

ANA YOOZQUIN KUZZIZ ŽOÑINACA

²⁰Jalla nektanaqui Jesusaqui chiichiča, chojru kuzziz žoñinacž puntu. Tsjii watjanac-quiz ancha milajrunaca paachiča. Pero nii wajtchiz žoñinacazti persun uj ana pajchiča; nižaza kuznaca ana campiichiča. Jalla nižtiquiztan Jesusaqui ninacžquiz ayjatchiča, tuž cjican:

²¹—Corazín wajtchiz žoñinaca, ančhucquiz ancha anawaliž wataquiča. Nižaza Betsaida wajtchiz žoñinaca, ančhucquiz ancha anawalizakaz wataquiča. Ančhucwa watjanacquiziqui walja milajrunaca paachinča. Tiro cjita nižaza Sidón cjita watjanacquiz nii milajrunaca paataž cjitasaž niiqui, nii ortanpacha nii wajtchiz žoñinacaqui Yoozquin kuzziz cjitasača; nižaza “ujchizpanča wejrncacqui, pertunalla”, cjitasača. Nižaza uj zint'ižcu nii wajtchiz žoñinacaqui llaquita kuz kjanapacha tjeezñi cjitasača, lutu zquiti cujtžcu, nižaza achquiz kjupžtan tjalžcu. ²²Jalla nižtiquiztan ančhucqui juyzu casticž tjuñquiziqui juc'anti casticaž cjequičha nii Tiro cjita nižaza Sidón cjita watjanacchiz žoñinacžquiztan. ²³Capernaum wajtchiz žoñinaca, ħkjažtiquiztan ančhucqui pinsejo, “Yoozqui učhum honorchiz cjizkataquiča”, cjicanajo? Anaž nuž cjesača. Pero ančhuczti kozzuc tjojttaž cjequičha infiernuquin sufrisjapa, ujchiz žoñinacžtan chica. Ančhucwa

wajtquiziqui walja milajrunaca paachinča. Sodoma cjita wajtquiz nii milajrunaca paataž cjitasaž niiqui, nii watjaqui anz tii tjuñinaca žejltsasača. ²⁴Jalla nižtiquiztan nii juyzu casticz tjuñquiziqui ančhucqui juc'anti castictaž cjequiča, Sodoma wajtchiz žoñinacžquiztan.

YOOZQUIN KUZZIZ ŽOÑINACA

²⁵Jalla nii orazakaz Jesusaqui chiichiča:

—Wejt Yooz Tata, amqui honorchizam cjlilla. Arajpachquin žejlñinacami tii muntuquiz žejlñinacami amča mantiñamqui. Amqui humilde žoñinacžquiz chjozaka tjaajinta tjeezamča. Zizñi žoñinacžquizimi intintazñi žoñinacžquizimi nii chjozaka tjaajintanacami ana zizkatchamča. ²⁶Yooz Tata, amiž muntaqui nužuča.

²⁷Yooz Tata, tjapa amiž ziztanacaqui wejtquiz tjaajinchamča. Ultimquiziqui anaž jecmi wejr am Majch zumpacha pajča. Am alaja wejr zumpacha pajča. Nižaza anaž jecmi am Yooz Ejp zumpacha pajča. Wejr alaja am zuma pajuča. Nižaza jakziltižquiz wejrqui zizkatz pecačhaja, jalla ninacazakaz am zuma pajasacha. ²⁸Ančhucqui jakziltat ana zumanacquiztan otchižlaj niiqui, wejtquizza macjatžca. Nižaza jakziltat persun aztan Yooz watja irantiz otchižlaj niiqui, wejtquizza macjatžca. Weril ančhucquiz jeejkatača. ²⁹Wejrqui pasinsis kuzziztča, nižaza humilde kuzziztča. Jalla nižtiquiztan weriž tjaata kamaña catoka; nižaza wejt puntuquiztan zizñi cjee. Nekztan persun kuz jeejz wachaquiča. ³⁰Weriž tjaata kamañaqui anača ch'ama, nižaza wejt manta paazqui cježakazza.

12

JEEJZ TJUŇI QUINTU

¹Tsjii jeejz tjuñquiziqui Jesusaqui niž tjaajinta žoñinacžtan čhjecta zkalanan taypiranž okatča. Tjaajinta žoñinacaqui čhjeri eecskatchiča. Nekztan ninacaqui tric oz chjojlunaca kjajpžcu, tric lučhiča. ²Fariseo žoñinacaqui jalla nižta paañi cheržcu, Jesusižquiz cjichiča:

—Chera, tii amiž tjaajinta žoñinacaqui trabajla. Jeejz tjuñquiziqui nižta trabajzqui učhum lii quintrala. —Jalla nuž chiican ujhiz jwes pecatča. ³Nekztanaqui Jesusaqui ninacžquiz kjaaziča, tuž cjican:

—Ančhucqui tuž liichinčhucča, žanajaa? Čhjeri eecznanaqui David cjita žoñiqui niž mazinacžtan tižta paachiča. ⁴Niiqui Yooz timpluquin luzcu Yooz yujcquin nonžta t'antanaca lujlchiča. Čhjul žoñimi anapantača permitta nii t'antac lujlžqui. Lii quintrala niiqui. Timplu jilirinacapankaz lulasacha. Pero nii Davidzti lujlchipanča. Nižaza niž mazinacaqui nii t'anta lujlchizakazza. ⁵Nižaza Moisés liiquiz tižta liichinčhucž, žana jaa? Jeejz tjuñquiziqui timplu jilirinacaqui ana jeejžla. Jalla nuž ana jeejztiquiztanaqui, ninacžtjapa anaž ujhiz cjesača. ⁶Ančhucquiz cjiwča. Tekz tsjiča timpluquiztan juc'ant chekanaqui. ⁷Nižaza ančhucqui cjiwrta Yooz taku ana intintazzinčhucča. Yooz taku tuž cjiča: “Wejrqui wilana jawkñi žoñinaca anal pecuča. Okzñi kuzziz žoñinacapan pecuča”. Tii Yooz taku intintaztasaj niiqui, anaž ančhucqui tii žoñinaca ujhiz jwes pectasača. Tii žoñinacaqui jaziqui anaž uj paača. ⁸Wejrqui tsewctan cuchanžquita Yooz Žoñtča. Wejrpanikal jeejz tjuñquizimi mantasača.

KJARA KJONCHI ŽOŇI ČHJETINTA

⁹Jalla nekztanaqui najwcchuc ojkžcu judío ajcz kjuyquiz luzziča. ¹⁰Jalla nicju tsjii žoñi želatča kjara kjonchi. Tsjii quintra žoñinacaqui uj jwesjapa Jesusižquiz pewcziča tuž cjican:

—Jeejz tjuñquiziqui žoñi čhjetinz cjesaya, už anapan cjesaj? nuž cjican pewcziča.

¹¹Jesusaqui ninacžquiz kjaaziča tuž cjican:

—Jeejz tjuñquiziqui uuzac tujquiz tjojtsiž cjesaž niiqui, žkjaža ančhuczti tujquiztan uua juoži ana okasajo? ¹²Pero žoñiqui uuzižquiztan juc'antiž walča. Jalla nižtiquiztan jeejz tjuñquizimi anača lii quintra zuma paazqui.

¹³Jalla nektzanaqui Jesusaqui laa žoňžquiz cjichiča:

—Am kjara zjijca.

Nektzan žejtchi cjissiča, nii tsjii kjara wiwuž nižtapacha. ¹⁴Jalla nektzanaqui fariseo žoňinacaqui ulanžcu, Jesusiž conzjapa kazziča.

¹⁵Jalla nii zizcu Jesusaqui najwčhuc ojkchiča. Nižaza muzpa žoňinacaqui Jesusižquiz apziča. Jesusaqui tjapa nii apzňi laanaca čhjetinchiča. ¹⁶Nektzan ninacžquiz mantichiča, ana jecžquizimi Jesusiž čhjetinňi puntuquiztan parlajo, nii.

PROFETAŽ CHIITA TAKU CUMPLITA

¹⁷Jalla nižta ojklaycan, Jesusaqui Isaías profetaž cjiirta taku nužquiz cumplissiča. Yoozqui Isaiasquiz tuž cjiirkatchiča:

¹⁸“Jalla tiiča weriž illzta žoňiqui, weriž mantitacama ojklayňi žoňi. Jalla niižquin kayazt'uča. Niiž cjen cuntintutča wejrqui. Jalla nuž cjiča Yoozqui. Wejt Espiritu Santuqui niiž kuzquiz cjequiča. Niiqui yekja watjanacchiz žoňinacžquin Yooz liwriňi taku paljayaquiča. ¹⁹Žoňinacžquizimi ana ch'aanaquiča, nižaza ana kjawaquiča. Calliran alto joržtan ana paljayaquiča. ²⁰Tsjii tjuwanta caňami anaž kjolaquiča. Nižaza ch'aman asňi michami anaž tjesaquiča, niiž ultimpacha legal mantiz tjuňicama. ²¹Niiž cjen yekja watjanacchiz žoňinacaqui zuma liwriiz tjuňi tjewznaquiča”.

Jalla nuž Jesusiž puntuquiztan Yooz takuqui cjiča.

JESUSIŽ QUINTRA CHIČHA

²²Jalla nektzanaqui tsjii laa žoňiqui Jesusižquin chjichtatača. Nii žoňiqui zajraž tantaž cjen zuratača, nižaza ana chiiňitača. Jesusaqui nii žoňi čhjetinchiča. Jalla nižtiquiztan cherni chiiňi cjissiča. ²³Jalla nuž čhjetintiquiztan tjapa žoňinacaqui ispantichiča tuž cjican:

—¿Tii Davidž majchmajtquiztan tjonňi cjesaya? ¿Tiipan Cristo cjesaya?

²⁴Nii nonžcu fariseo žoňinacaqui tuž cjichiča:

—Tiiqui ana wal žoňikalala. Zajranacž Beelzebú jilirž aztankaz yekja zajranaca ch-jatkatča.

²⁵Jesusaqui ninacž pinsitanaca zizziča, jalla nižtiquiztan ninacžquiz cjichiča:

—Jakzilta nacionamiž partira partira t'akznaquiž niiqui, nižaza t'aka t'aka kichasaquiž niiqui, k'ala tjatantaž cjequiča. Tsjii watjamiž nižaza tsjii kjuya familiamiž nižta t'aka t'aka cjsnaquiž niiqui, anaž tjurasacha. ²⁶Jalla nižta irata Satanás diabluqui persun partira chjatkattasaž niiqui, niipacha t'akztasacha. Jalla nuž t'akžtiquiztan niiž mantiz azi anaž tjurasacha. ²⁷Ančhucqui wejt puntuquiztan cjiňčhucča, “Beelzebú diabluž aztan zajranaca chjatkatcha”. Jalla nuž cjiňčhucča. Jalla nužžlaj niiqui, ¿ject ančhucpa partira žoňinacžquiz azi tjaazjo, zajranaca chjatkatzjapajo? Jalla nižtiquiztan kjanapachaž wejt puntuquiztan tsjii kjutňi čhiichinčhucča, nii. ²⁸Wejrzi Yooz Espiritu Santuž aztan zajranaca chjatkatiňča. Jalla niicž cjiča, Yooz mantiz timpu ančhucquiz žcatžinžquiča, nii.

²⁹Tsjilla cjesacha. Anaž jecmi tsjii azziz žoňiž kjuyquiziqui luzi atasacha; nižaza anaž niiž kinakunacami jwesi atasacha, ima čhejlcanaqui. Nii čhejlžcu, nektzan tjapa kinakunaca jwesi luzasacha.

³⁰Jecchalaj ana wejt favora, niiqui wejt quintrača. Nižaza jequit wejtta chica Yooz kjutňi žoňinaca ana macjatskatčaha, jalla niiqui žoňinacaž Yoozquiztan tirkatcha.

³¹Jazic ančhucquiz chiyuča, tuž cjican: tjapa ujnacami nižaza tjapa ana zum takunacami pertuntaž cjesacha. Pero jakzilta žoňit Yooz Espiritu Santuž quintra chiyachaj niiqui, anaž pertuntaž cjesacha. Nii žoňiqui wiňaya ujchiz cjequiča. ³²Jakzilta žoňit wejt quintra chiyachaj niiqui, pertuntaž cjesacha. Pero jakzilta žoňit Yooz Espiritu Santuž quintra chiyachaj niiqui, anaž pertuntaž cjequiča. Nii žoňiqui wiňaya ujchiz cjequiča; anawira pertuntaž cjequiča.

FRUTANAC PUNTU

³³Nekztan Jesusaqui tjaajinchiča, tuž cjan:

—Zuma muntizlaj niiqui, zuma frutaž pookča. Nižaza ana zuma muntizlaj niiqui, ana zuma frutaž pookča. Jalla nižtiquiztan muntiqui niž frutquiztan pajza, zuma ana zuma, jalla nii. ³⁴Zkoražtakaz ančhucqui, ana zum žoňchucča. ¿Kjažža ančhucqui zumanaca chiyasajo? Ančhuca kuzquiz pinsitaqui ana zuma parijula. Jaziqui ančhucča anazumanacapan chiiñinacaqui. ³⁵Tsjii zuma žoňiqui zuma chiiča, niž zuma kuzquiztan. Nizaza tsjii ana zum žoňizti ana zumapaž chiiča, niž ana zuma kuzquiztan. Jaknužt kuzquiz pinsičhaja, jalla nuž chiiča žoňinacami. ³⁶Ančhucaquiz cjiwča, juyzu casticz tjuñquiziqui zapa mayni cwinta tjaastanča, tjapa ana zuma chiitanacami. ³⁷Ančhucaž chiitiquiztan jama jusjitaž cjequiča, ujchiz cječhaja, ana ujchiz cječhaja, nuž.

ANA CRIICHI ŽOŇINACA

³⁸Jalla nekztanaqui yekjap fariseo žoňinacaqui lii tjaajiñi maestruncžtan Jesusižquiz jichiča:

—Maestro, am milajru paañi cherez pecuča.

³⁹Jesusaqui ninacžquiz kjaaziča tuž cjan:

—Ana zum žoňinacčhucča. Ana Yoozquin kuzziz žoňinacčhucča. ¿Kjažt tsjii milajru mayča, zinalažtakaz? Jonáz cjita profetž zinala, niikaz ančhucaquiz tjaata cjequiča. ⁴⁰Jonasqui pajk ch'iz pjuchquiz žejlchiča čhjep majžtan čhjep aramžtan. Jalla nižta irata wejrqui tii yok koztan kamača čhjep majžtan čhjep aramžtan. ⁴¹Juyzu tjuñquiziqui, jalla nii casticz tjuñquiziqui Níive wajtchiz žoňinacaqui jacatataquiča. Nekztan ninacaqui tii timpuquiz kamñi žoňinacž uj tjeeskataquiča. Jonás Yooz taku paljaytiquiztan ninacaqui Yoozquin kuzziz cjissiča. Pero wejrtča Jonasquiztan juc'ant chekanaqui. Tii timpuquiz kamñi žoňinacžti anaž Yoozquin kuz tjaača. ⁴²Nižaza casticz tjuñquiziqui tsjaa waruta maatak jilirqui jacatataquiča. Nekztan naaqui tii timpuquiz kamñi žoňinacž uj tjeeskataquiča. Naaqui najwka yokquiztan tjonchinča Salomonžtan zali, nižaza niž zuma razunchiz taku nonžni. Pero tejkz wejrtča Salomonquiztan tsjan juc'ant chekanaqui. Pero tii timpuquiz kamñi žoňinacžti wejt taku anaž nonz pecča.

ZAJRA PUNTU

⁴³'Tsjii zakal quint'asača. Tsjii zajraqi žoňžquiztan ulanžcu kjoñ yokaran ojklayñitacha, jeejzjapa kjurcan. Ana jeejz watžcuqui, kuzquiz pinsichiča, tuž cjan: ⁴⁴"Jaziqui wejr quepaka jakziquiztan ulanzquituchaja, jalla nicju". Jalla nuž quejpcu nii žoňžtan wilta zalchiča. Nii žoňiqui pewža kjuyažtakaztača, cuza žcayi, azquitža, pero laachitacha. ⁴⁵Jalla nuž zaltiquiztan nii zajraqi pakallak juc'ant anawali zajranaca zjiqqui ojkiča. Zajranaca zjiqžcu, tjappacha nii žoňž kuzquiz luzziča. Jalla nižtiquiztan nii žoňiqui juc'ant ana waliž cjissiča tuquita kamzquiztan. Jalla nižta irata tii ana zum žoňinacžquiz wataquiča. —Jalla nuž quint'ichiča Jesusaqui.

JESUSIŽ FAMILIA

⁴⁶Jesusaqui iyapanž žoninacžquiz chiyatča. Jalla nuž chiyan niž maaqui lajknacžtan irantižquichiča. Žoňinacž tjiuquin želan, nižtan parlis pecatča. ⁴⁷Tsjii žoňiqui Jesusižquiz mazziča, tuž cjan:

—Am maa lajknacžtanpacha tii tjiuquiz žejlča. Am kjawž, amtanž parlis pecča.

⁴⁸Jesusaqui mazñi žoňžquiz kjaaziča, tuž cjan:

—¿Ject wejt maaya? ¿Ject wejt jilanacaya?

⁴⁹Jalla nuž chiižcu tjaajinta žoňinacž kjutñi kjaržtan tjeeziča, nižaza cjichiča:

—Tinacača wejt maami, wejt jilanacami. ⁵⁰Jecnacami wejt arajpach Yooz Ejpž kuzcama kamčhaja, jalla ninacača wejt jilanacami, wejt cullaquinacami, wejt maami.

ZKALA ČHJACZ QUINTU

¹Nii noojpacha Jesusaqui kjuyquiztan ulanchiča. Kot kjutñi ojkcucu kot atquiz julziča.

²Jakziquin nii želatčhaja, jalla nicju žoňinacaqui walja ajcziča. Jalla nižtiquiztan

tjaajinzjapa tsjii warcuquiz luzzičha. Nekz julzičha. Tjappacha žoñinacaqui kot at tjiiquiz žejlchičha. ³Jalla nekztanaqui Jesusaqui žoñinacžquiz walja Yooz puntunaca tjaajinchičha, tjpaman quintunacžtan. Jalla nuž tjaajincan tuž cjichičha:

—Tsjii žoñiqui zkal čhjaqui tewcchičha. ⁴Zkala čhjaccan, parti simillaqui jicz latuquiz tjojtsičha. Nekztan wežlakaz nii simillac ilziqui. ⁵Parti simillazti maz yokaran tjojtsičha. Nekztan koloculla pjila želan ratulla jeczičha. ⁶Jalla nuž jecžtiquiztan sii kjakiqui ujchičha; koluc sep'allchiztačha nekztan. Ratulla kjonchičha. ⁷Parti simillazti ch'ap ch'ap yokaran tjojtsičha. Ch'apinacakazza ancha pajkchiqui, nižaza atipchiqui. ⁸Parti simillazti zuma yokquiz tjojtsičha. Nekztan zuma pookchičha. Yekjap simillaqui patac čherchiz zapa zkal ozquiz pookchičha; nižaza yekjap simillaqui sojta tuncan čherchiz zapa zkal ozquiz pookchičha; yekjap simillaqui quinsa tuncan čherchiz pookchičha. ⁹Jakziltažlaja nonžni cjuñchiz niiqui, nonžla.

¹⁰Jalla nekztanaqui tjaajinta žoñinacaqui Jesusižquiz macjatchičha, nižaza pewczičha, tuž cjican:

—¿Kjažtiquiztan am nižta quintunacžtankaz žoñinacžquiz tjaajinya?

¹¹Jesusaqui kjaazičha tuž cjican:

—Arajpach Yooz mantuquiz kamz puntuquiztan ch'aman intintazzuca quintunacžtan tjaajnučha. Ančhucacuizkaz Yoozqui zizkatz munčha nii puntunacquiztanaqui. Parti žoñinacžquiziqui Yoozqui ana zizkatz munčha. ¹²Jequit zizačhaja, jalla niižquiziqui juc'ant tjaajinz tjaataž cjequičha. Nekztan zumpacha zizniž cjequičha. Jequit ana zizačhaja, jalla niiž kuzquiztan kjañtaž cjequičha nii ana intintaztanacaqui. ¹³Jalla nižtiquiztan wejrqui tižta quintunacžtan paljayučha. Parti žoñinacaqui weriž paata cheržcumi ana cherchižtakaz cjissa. Nižaza weriž chiita taku nonžcumi, ana nonžnižtakaz tučha; ana intintazni žoñinacačha ninacaqui. ¹⁴Jalla nižta cjisiž cjen, Isafas profetž taku cumplissa. Jalla tuž Isaiasqui cijrchičha:

“Ančhucqui nonznaquičha. Nonžcu, ana intintazaquičha. Nižazaž cheraquičha. Cheržcu, anaž tantiyasaquičha. ¹⁵Tii žoñinacž kuznacaqui chojrju cjisičha; ana zumaž nonža. Nižaza čhjucchiz cjenami ana cheržni atčha, zur žoñižtakaz. Jalla nuž cjisnaquičha, ana cheržni cjisjapa, nižaza ana nonžni cjisjapa, nižaza ana kuzquiz intintižni cjisjapa, nižaza ana wejtquin macjatzjapa. Ana wejtquin tjontiquiztan, ana liwriita cjesačha”.

¹⁶Ančhucčha cuntintu. Ančhucqui cheržni žoñinacčhucčha. Nižaza nonžni žoñinacčhucčha. Ančhucčha Yooziž wintižtaqui. ¹⁷Weraral cjiwčha. Wacchi profetanacami nižaza zuma kuzziz žoñinacami ančhucadž chertanaca cherz zakaz pecatčha. Pero ana cherchičha. Nižaza ančhucadž nonžtanaca nonz zakaz pecatčha. Pero ana nonzičha. Ančhucžti cherchinčhucčha, nižaza nonzinčhucčha. ¹⁸Jazic ančhucž nonžnalla. Jalla tuž cjičha nii zkala čhjacz quintuqui. ¹⁹Nii jicz latuquiz tjojtsi simillaqui jalla tižta žoñinacačha. Ninacaqui arajpach Yooz mantuquiz kamz puntuquiztan nonzcanpacha, ana intintazza. Diabluqui ninacž kuzquiz tjonžcu, ninacaž intintazta kjañčha. ²⁰Nižaza nii maz yokquiz tjojtsi simillaqui jalla tižta žoñinacačha. Ninacaqui Yooz taku nonžcu nii ora cuntintuž nonža; cuntintuž catokčha. ²¹Pero ninacaqui ana tjapa kuztan catoktiquiztan zkoluc zep'ichiz zkalažtakazza. Jalla nižtiquiztan ana tjuraquičha. Yooz taku criichiž cjen, sufraquičha; nižaza chjaawjkattaž cjequičha. Jalla nekztan orallaž quejpsnaquičha. ²²Nižaza nii ch'ap yokquiz tjojtsi simillaqui jalla tižta žoñinacačha. Ninacaqui Yooz taku nonžcu, catokčha. Pero nekztan juc'anti kuz tjaačha tii muntu cusasanacqui. Wali jiru kamžpanž pecčha. Persun kuzquiz pectiquiztanaqui Yooz taku tjažta ninacž kuzquiz. Jaziqui ana zuma kamčha; ana pookniž zkalažtakaz kamčha. ²³Nižaza nii zum yokquiz tjojtsi simillaqui jalla tižta žoñinacačha. Ninacaqui Yooz taku nonžcu, zuma tjapa kuz catokčha; zuma intintičha. Jalla nižtiquiztan zuma kamañchiz cjissa, zuma pookchi zkalažtakaz. Nii zuma pookni žoñinacaqui zuma kamañchizpanž cjissa, jaknužt tsjii simillaqui patac čherchiz, sojta tunc čherchiz, quinsa tunc čherchiz pookčhaja, jalla nižtačha.

²⁴ Tsjii quintužtan quint'ichiča Jesusaqui, tuž cjan:

—Arajpach mantiñi Yooz puntuqui jalla tužuča. Tsjii žoñiqui zuma similla čhjacchiča zkal yokquiz. ²⁵ Tjapa niž žkuychiz žoñinacaž tjan, tsjii quintra žoñiqui tjonchiča. Nekztan zkalquiz ana wal pastunaca čhjacchiča. Jalla nuž ana wal čhjacžcu, ojkchiča. ²⁶ Nii tric zkala jecžtan, chicapacha pajkchiča nii ana wal pastunacaqui. Nižaza pizcpacha pookchiča. ²⁷ Jalla nii cheržcu, nii piyunanacaqui patrunžquin mazñi ojkchiča. Niižquin mazziča, tuž cjan: “Wejt Patruna, amiž čhjecta simillaqui zumažlaj niiqui, žjakziquiztan tii ana wal simillanaca pajkchitaya?” ²⁸ Patrunaqui kjaaziča, tuž cjan: “Tsjii quintra žoñiqui nižta paačhani”. Jalla nekztanaqui piyunanacaqui pewcziča tuž cjan: “ŽWejrnaqui nii ana wal pastunaca k'achasaya?” ²⁹ Nii patrunaqui cjichiča: “Ana k'achaquiča. Ana wal pastu k'achcan yekjap tricžtanpachaž k'achnasacha. ³⁰ Antiz pizcpacha pajkla, cujich timpu tjonzcama. Jalla nekztan wejt piyunacnacaqui cuchantaž cjequiča. Ninacaqui anawal pastunaca ricujaquiča. Nekztan kojchquiz čhejlznaquiča ujjapa. Jalla nekztanaqui tricuz ricujžcu, wejt tiric yaaz kjuyquiz majcznaquiča”.

³¹ Nižaza Jesusaqui tsjii puntuzakaz quint'ichiča, tuž cjan:

—Arajpach Yooz mantiz puntuqui tužuča. Tsjii žoñiqui niž yokquiz mostas similla čhjacchiča. ³² Mostas simillaqui parti simillquiztan juc'ant zkoltallača. Jalla nuž cjenami pajkžcuqui tjapa zkalanacquiztan tsjan pakjiča. Pajk muntižtakaz cjissa. Nekztan wežlanacaqui nii mostas munti itzquiz tjuraž tjacniž tjonča.

LIWATUR QUINTU

³³ Jesusaqui tsjii quint'ichizakazza, tuž cjan:

—Arajpach Yooz mantiz puntuqui jalla tužuča. Tsjaa maatak žonqui čhjep medida tupžcu nii liwatura jac'uquiz utchinča; nižaza t'ajzinča, tjapa nii t'anti maza tsjtkatzjapa.

³⁴ Tjapa tjaajintanacami quintunacžtan paljaytatača. Arajpach Yooz puntuquiztan tjaajincan, Jesusaqui quintunacžtankaz tjaajinchiča. ³⁵ Jalla nuž tjaajincan, Jesusaqui tuquita profetaž chiita takuqui cumplissiča. Profetaqui jalla tuž cjirchiča: “Quintunacžtankaz chiyuča. Tii muntu kallantitiquiztan weriž chiita tjaajintanaca ana intintazucača. Jalla nii ana intintazanaca paljajuča”.

ANA WAL PASTU QUINTU INTINTAZKATTA

³⁶ Jalla nižta puntunaca chiiz žeržcu, Jesusaqui žoñinacžquiztan ojkchiča; kjuyquiz luzziča. Jalla nicju niž tjaajinta žoñinacaqui macjatchiča, tuž cjan:

—Nii zkal yokquiz čhjecta ana wal pastu, jalla nii puntuquiztan wejtnacaquiz intintazkatalla.

³⁷ Jalla nekztanaqui Jesusaqui intintazkatchiča tuž cjan:

—Wejrqui tsewctan cuchanžquita Yooz Žoñiča. Wejrtiča zuma similla čhjacnižtqui.

³⁸ Nii zkal yokaqui tii muntuča. Nii zuma zalanacaqui cjiča, arajpach Yooz mantuquiz kamñi žoñinacača nii. Ana zuma pastunacaqui diabluz mantuquiz kamñi žoñinacača.

³⁹ Nii ana wal pastu čhjacniži diablupachača. Zkala ajz timpuqui tii muntu tucuzinž timpuča. Nii zkala ajzñi piyunanacaqui Yooz anjilanacača. ⁴⁰ Jaknužt nii ana wal pastunaca ricujžcu, ujqin ujjapa tjojttaž cječhaj niiqui, jalla nižta irataž wataquiča tii muntu tucuzinžcan, ultim juyzuž nekz. ⁴¹ Jalla nii oraqui wejt anjilanaca cuchanžcača, tii muntuquiztan tjapa ana wal žoñinaca ricuji. Wejt anjilanacaqui tjapa ujnaca paakatñi žoñinacami, nižaza tjapa ana wali paañinacami ricujaquiča. ⁴² Jalla nuž ricujžcu, infiernuquin tjojttaž cjequiča kjakchi jurnuquiztakaz. Jalla nekzi anchaž kaaquiča, nižaza waljaž izke kjojznaquiča. ⁴³ Yooz kuzcama kamñi žoñinacazti arajpach Yooz wajtquiz želaquiča, tjuñižtakaz kjancan. Jakziltat nonzñi cjuñichizčucžlaja, nonžna.

IYA QUINTUNACA

⁴⁴ Arajpach Yooz mantuquiz kamañaqui jalla tužuča. Tsjii yokquiz pajk paaz čhjojžtatača. Tsjii žoñiqui nii čhjojžta paaz wajtchiča. Nii wajtžcu, wilta čhjojžiča nekzpacha. Ancha cuntintutača. Nekztanaqui tjapa niž cusasanaca tuyi ojkchiča. Niiž

cusasanaca tjujžcu, nii yoka kjajčičha. Jalla nužučha arajpach Yooz kamañquiz luzqui. Nii kamañaqui čhjulquiztanami juc'anti valorchizza.

⁴⁵Nižaza arajpach Yooz mantuquiz kamañaqui tužučha. Tsjii tintichiz žoñiqui zuma valorchiz perlanaca kjayi ojkcichča. ⁴⁶Nekztan tsjii ancha zuma valorchiz perla wajtchičha. Jalla nekztanaqui tjapa niiz cusasanaca tuchičha, nii perla kjajzjapa.

⁴⁷Nižaza arajpach Yooz mantiz puntuqui tužučha. Tsjii ch'iz tanñi žoñinacaqui niiz ch'iz tanz pajk kotquiz tjojtzičha. Jalla nuž tjojtžtiquiztan tjpaman ch'iznaca tanchičha.

⁴⁸Nekztan ch'iz tanz chjijpztanaqui, kot at tjiiquin jwessičha. Jalla nekztanaqui ninacaqui nijwc julžcu, ch'iz pjalzičha. Zuma ch'iznaca canastiquiz yaazičha. Ana zuma ch'iznacazti tjojtchičha. ⁴⁹Jalla nižta irataž tii muntu tucužinžtanaqui wataquičha. Anjilanaqui ulanžcaquičha žoñinaca pjali, zuma žoñinaca ana zuma žoñinaca, nii. ⁵⁰Nii ana zuma žoñinacaqui infieruquin tjojttaž cjequičha tsjii kjakchi jurnuquiztakaz. Jalla nekzi ancha kaaquičha, nižaza izke kjojaquičha.

⁵¹Jalla nekztanaqui Jesusaqui žoñinacžquiz pewczičha, tuž cjican: —¿Ančhucqui tjapa tii weriž chiita quintunaca intintiya?

Nii žejlñi žoñinacaqui kjaazičha, tuž cjican:

—Wejt Jiliri, wejrnacqui intintasučha.

⁵²Nekztan Jesusaqui cjichičha:

—Tsjii lii tjaajñi maestruqui arajpach Yooz mantuquiz cjsnaquiz niiqui, tsjii kjuya patruñažtakaz cjissa. Jalla nuž cjistiquiztan niiz ziztanacquiztan zuma tjaajintanaca zizkatasučha, tuqita tjaajintami nižaza anzta tjaajintami.

⁵³Jalla tii arajpach Yooz mantiz puntuquiztan chiz žeržcu, jalla nekztan Jesusaqui ojkcichča, niiz persun yoka. ⁵⁴Jalla nicju irantižcu, ajcz kjuyquiz tjaajñi kallantichičha. Nii nonžñi žoñinacaqui ispantichičha tuž cjican: —¿Jakziquin tii žoñizti ancha tižtanaca zizñi cjissitajo? ¿Kjažt ancha tižta milajrunaca paasajo? ⁵⁵Carpinterož majchkazza tiiqui. Tiiž maaqui María cjitičha. Nižaza tiiž lajknacaqui Jacobočha, Josečha, Simonačha, nižaza Judassa. ⁵⁶Nižaza tiiž cullaquinacaqui učumnacžtan kamčha. Jalla nižtiquiztan, jjakziquin tiiqui tižtanaca zizzitajo?

⁵⁷Jalla nižta pinsitiquiztan ninacaqui Jesusižjapa quintra cjissičha. Pero Jesusaqui ninacžquiz cjichičha:

—Persun wajtchiz žoñinacami, nižaza persun kjuychiz žoñinacami tsjii Yooziž uchta profetžquiz ana rispitičha. Parti žoñinacazti niizquiz rispitičha.

⁵⁸Jalla nižtiquiztan nekzi ana ancha milajrunaca paachičha, nii wajtchiz žoñinacaqui Jesusižquiz ana criičiž, nekztan.

14

JUAN BAUTISTA CONTA

¹Jalla nii oranaca Herodes cjita jiliriqui Jesusiž quintu nonchičha. ²Jalla nuž nonžcu, niiz piyunanacžquiz cjichičha:

—Juan Bautistala tiiqui. Ticziquiztan jacatatchila. Jalla nižtiquiztan walja milajrunaca paazjapa poderchizlani.

³Jalla nuž tsucchičha Herodes jiliriqui. Tuquiqui Herodesqui Juan tankatchičha. Čhejlžcu carsilquin chjitchičha. Jalla nuž paachičha, niiz tjunaž cjen. Niiž tjunqui Herodías cjitičha. Tuquiqui naaqui niiz jilž tjuntačha. Felipe cjitatačha Herodes jilaqui. ⁴Jalla nižta anawali zalziž cjen, Juanqui Herodižquiz chiižinchicha tuž cjican:

—Naa maatak žon anaž am tjun cjichuca. Felipiž tjunčha naaqui.

⁵Jalla nuž chiižintiquiztan Herodes Juan konz pecatčha. Pero žoñinaca ekscu ana atchičha. Tjapa žoñinacaqui Juanžquiz rispitičha tuqita Yooz taku parliñi profetažtakaz. ⁶Nii Herodesqui niiz persun cumpleañ tjuñquiziqui pijjsta paachičha. Jalla nuž pijjsta paan, naa Herodías majtqui ulanžquichinčha, invittaž žoñinacž yujcquiz tsati. Jalla nuž tsatan ancha justassičha Herodesqui. ⁷Zuma tsattiquiztan Herodesqui taku onzičha, tuž cjican:

—Čhjulum mayčhaja, jalla nii tjaasača.

⁸ Ima mayan maaqui mataquiz mantichinča, Juanž acha mayzjapa. Jalla naaža maaž chiita takucama Herodesquiztan maychinča, tuž cjan:

—Tsjii chuwquiz Juan Bautistaž acha tjaalla.

⁹ Jalla nuž maytiquiztan Herodesqui l'act'azziča. Pero invittaž žoñinacaž nonznan taku onziča. Jalla nižtiquiztan naaža maytacama mantichiča. ¹⁰ Juanqui carsilquiz želatča. Jalla nijwc cuchanchiča, Juanž acha pooti. ¹¹ Jalla nektanaqui tsjii chuwquiz acha zjijcžcu, naaquiz tjaatača. Nektan naaqui maaquinž tjaachinča.

¹² Jalla nii quintu nonžcu, Juanž tjaajinta žoñinacaqui Juanž curpu chjichi tjonchiča. Nektanaqui nuž chjichcu niiz curpu tjatziča. Jalla nuž tjatžcu, Jesusižquin mazni ojkiča.

LULJ ČHJERI TJAATA

¹³ Nii quintu nonžcu Jesusaqui najwk ojkiča, ana žoñi žejlž yokquin. Warcuquiz ojkiča. Pero žoñinacaqui nuž ojki quintu nonchiča. Jalla nektanaqui ninacaqui nii yokaranpacha wajtanacquiztan ulanchiča. Jesusižquin wilta zali kojchin ojkiča.

¹⁴ Warcuquiztan ulanžcu Jesusaqui tama žoñinaca cherchiča. Jalla nuž cheržcu niiz kuzquiz sint'ichiča ninacžtajapa. Nektan zjijta lanaca čhjetinchiča. ¹⁵ Waj zezi cjisan niiz illzta žoñinacaqui Jesusižquin tjonchiča, tuž cjan:

—Waj zezilla. Čhjeri pecča. Tii yokquiziqui anaž čhjeri žejl-la. Jalla nižtiquiztan tii žoñinaca cutzna. Okaj cjee, joch kjuyaran čhjeri kjayžcumi lulačhani tinacni.

¹⁶ Jesusaqui ninacžquiz cjichiča:

—Anaž cucha cjesača. Ančucaž čhjeri tjaaquiča.

¹⁷ Nektanaqui ninacaqui kjaaziča, tuž cjan:

—Wejtnacalta ana lulj čhjeri žejlča. Pjijska t'antalla pizc ch'iztankaz žejlča.

¹⁸ Jesusaqui ninacžquiz cjichiča:

—Nii čhjeri wejtquiz zjijca.

¹⁹ Jalla nektanaqui Jesusaqui žoñinacžquin mantichiča, pasturan julzna cjee. Jalla nuž julzkatžcu nii pjijska t'anta nii pizc ch'iz persun kjaržtan tanziča. Tanžcu tsewcchuc arajpach kjutni cherziča, nižaza Yooz Ejpžquin gracias cjan chiichiča. Nektanaqui t'anta kjolžcu tjaajinta žoñinacžquiz tojunchiča. Nektan ninacaqui parti žoñinacžquin partir psychiča. ²⁰ T'antanaca ch'iznac lujlžcu liwjpacha nii žoñinacaqui chjekchi cjis-siča. Nižaza nii t'antiquiztan nii ch'iznacquiztan žejtchinacaqui tuncapan canasta chjijpi ricujtača. ²¹ Jalla nii t'anta ch'iz lujlchi žoñinacaqui pjijska warank luctakanacatača. Maatakanacami ocjalanacami ana kantatača nii oraqui.

JESUSAQUI KJAZ JUNTUŃ OJKČHA

²² Nektanaqui Jesusaqui niiz tjaajintanaca warcuquiz luzkatchiča, niiz tuqui kota kakjayajo tsjii latu kotquin irantizcama. Jesusazti nii žejlñi žoñinacžquiz persun kjuyquin okaj cjan nijwctan najwkchuc cuchanchiča. ²³ Jalla nuž cuchanžcu Jesusaqui curulla yawchiča, zinalla Yooz Ejpžtan parlisjapa. Jalla nuž mayizan ween cjis-siča. Nicju zinatača Jesusaqui. ²⁴ Nii oraqui niiz tjaajinta žoñinacaqui kotž taypiquin okatča. Tjami qui warcuž quintra walja tjamatča. Nižaza kjaz ljojki warcu waljaž aytin-quiskatatča. ²⁵ Wali chawc kjantati Jesusaqui ninacžquin žcatžinchiča, kjaz juntuñ ojkan. ²⁶ Niiz tjaajinta žoñinacaqui, Jesusa kjaz juntuñ tjoñi cheržcu, ancha tsucchiča, nižaza kjawchiča, tuž cjan:

—Cuntinažlani —cjan kjawchiča.

²⁷ Pero ninacaž kjawan Jesusaqui ninacžquiz paljayžquichiča, tuž cjan:

—Tjup kuzziz cjee. Wejrpanča. Anaž tsuca.

²⁸ Nektanaqui Pedruqui paljaychiča, tuž cjan:

—Wejt jiliri, amžlaj niiqui, wejr kjawznalla kjaz juntuñ ojczjapa am irantiscama.

²⁹ Jesusaqui niizquiz cjichiča:

—Pichalla amqui.

Nekztanaqui Pedruqui warcuquiztan ulanžcu, kjaz juntuñ oki kallantichiča, Jesusa jakziquin tjenatčhaja, jalla nicju. ³⁰Nii walja tjamiž cjen tsucchiča. Tsuczcu, kjazquiz luzi kallantichiča. Nekztan kjawchiča, tuž cjican:

—Wejt Jiliri, wejr yanapalla, wejr žejtkatalla.

³¹Nii orapacha Jesusaqui Pedruž kjara tanzicha, nižaza nižquiz cjichiča:

—Ancha upa kuzzizamčha amqui. ¿Kjažtiquiztan am kuz turwayskatchamtaya?

³²Ninacaz warcuquin luztan, tjamiqui zekchiča. ³³Jalla nii cheržcu warcuquiz žejlñi žoñinacaqui Jesusiž yujcquiz quillziča, tuž cjican:

—Chekapan werara Yooz Maatimkalala amqui.

LAANACA ČHJETINTA

³⁴Jalla nuž kota kajžcu, Genesaret cjita yoka irantichiča. ³⁵Nii yokchiz žoñinacaqui Jesusa pajchiča. Jalla nekztan “Jesusa tekz žejlčha”, cjican liwj nii yokaran mazmazziča. Nii quintu maztiquiztan tjapa laanaca zjijcchiča, jakziquin Jesusa želatčhaja, jalla nicju.

³⁶Nii žoñinacaqui Jesusižquiz walja rocchiča, tuž cjican: —Am zquit puntalla mekaz lanzkatžinalla. Tjapa lanzñi žoñinacaqui žejtchi cjissiča.

15

UJ PUNTU

¹Jalla nekztanaqui tsjii kjaž fariseo žoñinacaqui nižaza tsjii kjaž lii tjajajiñi maestruncz-tanpacha Jesusižquiz macjatchiča. Ninacaqui Jerusalén wajtquiztan tjonchiča. Jesusižquiz pecunchiča, tuž cjican:

²—¿Kjažtiquiztan amiž tjajintanacaqui učhum tuqita atchi ejpnacž custurumpi ana cazjo? Ana kjara awjžcu, lujl-la.

³Pero Jesusaqui ninacžquiz pewcziča, tuž cjican:

—Ančhuczi, ¿kjažtiquiztan Yooz mantita lii ana cazjo? Nii lii caz cjenpacha persun custurumpinacakaz paala ančhucui. ⁴Yoozqui tuž cjichiča: “Am maa ejpmi respitaquiča”. Nižaza cjichiča: “Jequit persun maa ejpž quintra chjaawjkatačhaja, jalla niiqui contaj cjila”. ⁵Pero ančhuczi tuž tjajajiñčhucča: “Žoñiqui persun maa ejpžquin chiyasača, tuž cjican: “Am anal yanapasača. Tjapa wejt cusasanaca Yoozquin tjaatača nekztan”. ⁶Jequit nižta chiyachaj niiqui, niž persun maa ejpžquiz anaž yanapchuca cjesača. Jalla nuž tjajinca ančhucui Yooz mantita ana walkatchinčhucča, persun custurumpi jarukaz ojckjapa. ⁷Ana wal kuzziz žoñinaca. Isafas cjita profetaqui ančhuca puntuquiztan zuma kjana cjjirchiča, tuž cjican:

⁸“Tii žoñinacaqui atžtankaz wejtquiz rispitcha. Pero tinacž ultim kuztzi wejtquiztan ažquinča. Nižaza wejr anaž rispitcha. ⁹Tinacaqui inakaz wejtquin custurumpi paača. Tinacž tjajintanacaqui žoñiž mantitakazza”.

¹⁰Jalla nekztanaqui Jesusaqui žoñinaca kjawziča, nižaza tuž cjichiča:

—Nonžna, nižaza intintazñi kuzziz cjee. ¹¹Anaž zawncan kjuyllchuc žoñž atquiz luzñiqui uj cjesača žoñžquiziqui. Antiz žoñž atquiztan ulanñi, jalla niž uj cjesača žoñžquiziqui.

¹²Jalla nuž chiitiquiztan Jesusiž tjajinta žoñinacaqui nižquin macjatchiča, nižaza cjichiča:

—Nii fariseo žoñinacaqui am chiita taku nonžcu ancha žawjwatčha. ¿Nii ana naychamjo?

¹³Pero Jesusaqui ninacžquiz kjaaziča, tuž cjican:

—Jakzilta zkalat wejt arajpach Yooz Epiž ana čhjacta cječhaja, jalla nii zkalaqui zep'ižtanpacha kajlžtaž cjequiča. ¹⁴Ninacžquiz ana chjijquiza. Ninacaqui zur žoñinacaz-takazza. Yekja zuranacžquiz irpican, pucultanpacha wali ojtquiz tjojtjnasača.

¹⁵Pedruqui Jesusižquiz cjichiča:

—Tii puntuquiztan wejtnacaquiz tjajznalla.

¹⁶Jesusaqui cjichiča:

—¿Ančhucqui zakaz ana intintiya? ¹⁷ Tjapa atquiz luzni čhjeriqui pjuchquiz luzza, nekztan wir kjutniž ulanča. ¿Jalla nii ana intintiya? ¹⁸ Pero atquiztan ulanni chiitaqui kuzquiztan tjonča. Jalla nii žoňžquiziqui uj cjesača. ¹⁹ Kuzquiztanpanž ulanča tižtanaca, ana wali pinsisnacaqui, nižaza žoňi conzqui, nižaza adulteriuquiz ojklayzqui, nižaza yekja maatakžtan žejlzqui, nižaza cusasanaca kjaňzqui, nižaza toscar taku chiizqui, nižaza ana wal taku joojoozqui. ²⁰ Jalla nižtanaca uj cjesača žoňžquiziqui. Pero ana kjara awjžcu, jalla nižta lujžcu, anapan uj cjesača. Jalla niiqui žoňž custurumpikazza.

YOOZQUIN KUZUZ MAATAKA

²¹ Jalla nekztanaqui Jesusaqui nijwctan ojkchiča Tiro nižaza Sidón cjita yokquin. ²² Jalla nijwc želan tsjaa cananea yokchiz žoňqui Jesusižquiz tjonzinča, kjawcan:

—Wejt Jiliri. Davidž majchmajtquiztan tjonni. Wejr oksnalla. Wejt majtqui zajraž tantača. Jalla nižtiquiztan ana wira wali laača.

²³ Jesusaqui ana čjulumi kjaaziča. Jalla nekztan niž tjaajinta žoňinacaqui roqui tjonchiča, tuž cjican:

—Tsjika oka cjee. Učhum wirquiz kjaw jawi apžquiča.

²⁴ Nekztanaqui Jesusaqui cjichiča:

—Yooz Ejpqui wejr cuchanžquichiča Israel wajtchiz žoňinacžquin, ninacžquinkaz. Nii Israel žoňinacaqui katchi uuzanacžtakazza.

²⁵ Pero naa maatak žoňqui macjatžquichinča, nižaza niž yujcquiz quillzinča, tuž cjican:

—Wejt Jiliri, wejr yanapt'alla.

²⁶ Nekztan Jesusaqui naaquiz cjichiča:

—Maatinacž t'anta ana kjaňasäča, pawčžquin tjaazjapaqui. Jalla niiqui ana wali cjesača.

²⁷ Jalla nuž chiižinta cjenami naaqui cjichinča:

—Jesalla, wejt Jiliri. Pero pacunacami patrunaž mizquiztan tjawkzi čhjerilla lujčha.

²⁸ Jalla nekztanaqui Jesusaqui cjichiča:

—Cullacalla, walja Yoozquin kuzzizamča. Jaknužum am pecčhaja, nužoj cjila.

Jalla nii orapacha naaža majtqui žejtchi cjissinča.

LAANACA ČHJETINTA

²⁹ Jalla nekztanaqui Jesusaqui nijwctan ulančiča, Galilea cjita kot ata watchiča. Nekztan tsjii curulla yawžcu julziča. ³⁰ Tama žoňinacaqui irantižquichiča, jakziquin nii želatčhaja, jalla nicju. Ninacaqui laanaca zjijčhiča, zuch žoňinaca, zur žoňinaca, ana chiiňi žoňinaca, čhjojritžta žoňinaca, tjapaman laanaca, jalla ninaca zjijctatača, Jesusiž yujcquin. Jesusaqui ninaca liwž čhjetinčiča. ³¹ Jalla nuž cheržcu, žoňinacaqui ancha ispantichiča. Ana chiiňi žoňinacaqui chiiňi cjissiča. Čhjojritžta žoňinacaqui žejtchi cjissiča. Zuch žoňinacaqui ojklayňi cjissiča. Zur žoňinacaqui cherňi cjissiča. Jalla nuž cheržcu žoňinacaqui walja Yooz honora waytichiča, “Israel žoňinacž Yooz ancha honorchiz cjilalla”, cjican.

JESUSAQUI ČHJERI TJAAČHA

³² Jalla nekztanaqui Jesusaqui niž tjaajinta žoňinaca kjawžcu, tuž cjichiča:

—Tii žoňinacžtajapa kuzquiz anchal sint'uča. Čhjep maj wejtta chica žejlča, nižaza ana čjul čhjerchizza. Persun kjuyanacquin anal cutz pecučha ana lujchi cjen. Tinacaqui ana lujchi okaquiž niiqui, jiczaranž tismayasača.

³³ Nekztan niž tjaajinta žoňinacaqui cjichiča:

—¿Jaknuž čhjeri cunsicas, tii wacchi žoňinacžtajapajo? Tii yokquizic anaž kjayzmi žejlča.

³⁴ Jesusaqui ninacžquiz pewcziča, tuž cjican:

—¿Kjaž t'antichizt ančhucjo?

Ninacaqui kjaaziča, tuž cjican:

—Pakallak t'antača, nižaza tsjii kjaž ch'iznacžtan.

³⁵ Jalla nekztan Jesusaqui nii žoñinacžquiz mantichiča, yokquiz julznajo. ³⁶ Nekztan persun kjaržtan nii pakallak t'anta ch'iztanpača tanziča. Jalla nekztan Yoozquin gracias cjan tjaachiča. Nekztan nii t'antanaca ch'iznaca kjolkjolziča. Nekztan niiz tjaajinta žoñinacžquiz toj tojziča. Nekztan ninacazti partir paychiča nii tama žoñinacžquiz. ³⁷ Tjapa nii tama žoñinacazti čjheri lujlžcu chjekchi cjsiča. Nižaza žejtchinacaqui pakallak canasta chjijpi ricujtatača. ³⁸ Pusi warank luctak žoñinacatača lujlchiqui. Nižaza nii oraqui maatakami ocjalami muzpa želatčay, pero ana kantatača. ³⁹ Jalla nekztanaqui Jesusaqui nii žoñinacžquiz liwj cuchanchiča okajo. Niimi warcuquin luzziča. Nekztan Magdala cjita yokquin ojkiča.

16

JESUSIŽ QUINTRA ŽOÑINACA

¹ Fariseo žoñinacami, saduceo žoñinacami Jesusa chertzni ojkiča. Jesusiž quintra uj jwes pecatča. Jalla nižtiquiztan Jesusižquiztan maychiča, arajpach milajru tjeeznajo, tsjii sinalažtakaz. ² Jesusaqui ninacžquiz kjaaziča, tuž cjan:

—Zezilla arajpach tsjiri ljoc cjsi cjen, “Jakac zuma tjuñiž cjequiča” cjiñčucča. ³ Nižaza wentan tjuñi tjewktan arajpach tsjiri ljoc cjsi cjenaqui, walja tsjiri cjenaqui, “Tonjiqui ana zum tjuñiž cjequiča” cjiñčucča. Ana zum kuzziz žoñinaca. Ančhucqui tsewcta tsjiri cheržcu, zuma tjuñi ana zuma tjuñi cječhaja, jalla nii zumpacha zarayiñčucča. Pero ančhucqui weriž paata sinalanaca cheržcu, ana zuma zarayiñčucča. ⁴ Ana zum kuzziz žoñinacaqui Yoozquiztan zarakchiž cjen, sinala sinala mayča. Ančhucžtajapa Jonás puntuqui siñalažtakaz žejlča. Ana iya tjeežta cjequiča. —Jalla nuž chiižcu Jesusaqui ninacžquiztan zarakchiča.

⁵ Niiz tjaajinta žoñinacaqui kotquin tsjii latu kajkiča. Nižaza t'anti žaka chjitz tjtstkalča. ⁶ Nekztanaqui Jesusaqui ninacžquiz cjichiča:

—Tii taku nonžna. Fariseo žoñinacž liwaturžquiztanami nižaza saduceo žoñinacž liwaturžquiztanami zumpacha cwitasaquiča.

⁷ Jalla nii chiita nonžcu, tjaajinta žoñinacaqui ninacpora parlassiča, tuž cjan:

—Učhumqui ana t'anta zjijctča, jalla nižtiquiztan nižta chiiča.

⁸ Jesusaqui ninacž pinsita zizcu, ninacžquiz paljaychiča tuž cjan:

—¿Kjažtiquiztan ančhucqui t'antiquinkaz pinsejo? Ančhucqui ancha upa kuzzizčhucča. ⁹ Anapanž ančhucqui wira intintas, žtižta ana cjuñžjo? Pjijjska t'antiquiztan pjijjska warank luctak žoñžquiz partir payžcu lujlkatchinla. Nekztan ¿kjaž canasta nii žejtchi t'antanaca ricujtataya? ¹⁰ Nižaza pakallak t'antiquiztan pusi warank luctak žoñžquiz partir payžcu lujlkatchinla. Nekztan ¿kjaž canastat nii žejtchi t'antanaca ricujtataya? ¹¹ Fariseo žoñinacž puntuquiztanami nižaza saduceo žoñinacž puntuquiztanami, jalla nii liwatur puntu chiičinča. Jalla nii chiitaqui anača ultim t'anti puntuquiztanaqui. ¿Anaž nii intintas, ančhucya?

¹² Jalla nekztanaqui ninacaqui zumpacha intintaziča. Jesusaqui ultim t'anti liwaturquiztan ana nii puntu chiižinčiča. Pero fariseož tjaajinta puntuquiztan nižaza saduceož tjaajinta puntuquiztan, jalla nii puntu chiižinčiča, jalla nii tjaajintanacquiztan cwitasaquiča, cjan.

¿JECT JESUSAQUI?

¹³ Jalla nekztanaqui Jesusaqui Cesarea de Filipino cjita yokquin ojkiča. Nii irantižcu, niiz tjaajinta žoñinacžquiz pewcziča, tuž cjan:

—Wejrqui tsewcta cuchanžquita Yooz Žoñtča. Žoñinacaqui wejt puntuquiztan ¿kjažt cjeejo?

¹⁴ Ninacaqui kjaaziča, tuž cjan:

—Yekjapanacaqui am puntuquiztan tuž cjicha: “Juan Bautistača niiqui”. Yekjapanacaqui cjiča, “Eliassa niiqui”. Nižaza yekjapanacaqui cjiča, “Jeremiassa niiqui”. Nižaza yekjapanacaqui cjiča, “Tsji yekja profetača niiqui”.

¹⁵ Jalla nekztanaqui Jesusaqui ninacžquiz pewcziča, tuž cjan:

—Ančhuczti wejt puntuquiztan ħkjažzaž cjeejo? ¹⁶ Simón Pedruqui tuž cjichiča:

—Yooziž uchta Cristumčha amqui, žejtñi Yooz Maatimčha.

¹⁷ Jesusaqui nekztan cjichiča:

—Simón, Jonás maati, jalla nuž chiitiquiztanaqui cuntintum cjee amqui. Anaž jakzilta žoñimi amquiz nii tjaajinchiqui. Wejt arajpach Yooz Ejppankazza am zizkatchiqui. ¹⁸ Amquiz cjiwčha. Tekztan najwkchuc amqui Pedro cjitam cjequiča. Nižaza tii maz simintuchiz wejrqui wejt icliza kjuyačha. Wejt iclizaqui wejtquin kuzziz žoñinacačha. Ticzmi wejt iclizquiztan ana atipasačha. ¹⁹ Wejrqui amquiz llawižtakaz poder tjaačha žoñinaca arajpach Yooz mantuquiz luzkatzjapa. Tii muntuquiz amqui jequit Yooz mantuquiz luzkatačhaja, jalla niiqui arajpach Yooz wajtquin luzkatta zakaz cjequiča. Nižaza tii muntuquiz jequit Yooz mantuquiz ana luzkatačhaja, jalla niiqui arajpach Yooz wajtquin ana luzasačha.

²⁰ Jalla nekztanaqui Jesusaqui niiz tjaajinta žoñinacžquiz mantichiča, tuž cjican:

—Anaž jecžquizimi maznaquiča, “Ničha Cristuqui” cjicanaqui.

JESUSAQUI NIIŽ TICZ PUNTU CHIIČHA

²¹ Nekztan najwkchuc Jesusaqui tjaajinta žoñinacžquiz niiz ticz puntuquiztan paljayi kallantichiča, tuž cjican:

—Wejrqui Jerusalén watja ojkstančha. Jalla nicju nii wajtchiz jilirinacami, nižaza timplu jilirinacami, nižaza lii tjaajiñi maestrinacami jalla ninacaqui wejr walja sufriskataquiča. Ultimquiziqui wejr conaquiča. Jalla nuž contiquiztan čhjep majquiztan jacatatačha.

²² Nekztanaqui Pedruqui Jesusa tsjii latu čhjitchiča, chiižinzjapa. Chiižinzcan, tuž cjichiča:

—Wejt Jiliri, amiž nuž chiitacama Yooz Ejpqui anaj niic nuž munlalla. Amquiz anaj nižta watlalla.

²³ Jalla nuž chiitiquiztan Jesusaqui Pedruž kjutñi kjutziča, tuž cjican:

—Satanás, wejtquiztan zaraka. Amqui wejr ujquiz tjojtskatz pecčha. Am kuz pinsitaqui anaž Yooz pinsita, antiz žoñiž pinsitakazza.

²⁴ Jalla nekztanaqui Jesusaqui niiz tjaajinta žoñinacžquiz cjichiča:

—Jequit wejtta chica kamz pecčhaj niiqui, primiruqui persun kamañ wiraqui tjazla. Sufrijsjapaqui listoj cjiła, ticzcama. Nekztan wejtta chicaž kamaquiča. ²⁵ Jakziltat persun kamañ wira ana tjats pecčhaj niiqui, arajpach kamañuqui ana tjaataž cjequiča. Jakziltat wejt laycu persun kamañ wira tjaznačhaja, jalla niiqui arajpachquin wiñaya kamaquiča. ²⁶ Tsjii žoñiqui tjapa tii muntuquiz žejlñi cusasanaca kanasačha. Pero nekztan infiernuquin okaquiz niiqui, tjapa nii kanta cusasanaca, ħčhjuljapat sirwejo? Inakaz cjequiča. Arajpachquin Yooztan kamzqui persun liwriizqui anaž paasztanac kjayasačha. ²⁷ Wejrqui tsewtan cuchanžquita Yooz žoñičha. Tsjii noojiqui wejrqui wejt anjilanacžtan quejpžcačha; wejt Ejpž wali aztan quejpžcačha. Jalla nuž quejpžcu, wejrqui zapa maynižquiz tjaačha, jaknužt kamčhaja, jalla nii jaru tjaačha. ²⁸ Weraral cjiwčha. Tsjii noojiqui wejrqui mantiz poderžtan tjonačha. Yekjap tekzi žejlñi žoñinacaqui nii noojcama ana ticznaquiča.

17

JESUSAQUI TSJEMATAŽ ČJISSIČHA

¹ Sojta tjuñquiztan Jesusaqui Pedružtan, Jacobžtan, Juanžtan, Jacobož lajk, jalla ninaca čhjitchiča. Ninacžtan alaja nuž pajk curquin ojkžcu, yawchiča. ² Jalla nicju ninacž yujcquin tsjemat chercherchiz cjissiča. Jesusiž yujcqui walja c'ajñi cjissiča tjuñižtakaz. Nižaza niiz zquitimi muzpa llijñi cjissiča, nižaza ancha chiwi. ³ Nii orapacha Moiesta Eliastan parizichiča. Nii pucultan žoñiqui Jesusižtan parlican želatčha. ⁴ Jalla nekztan Pedruqui Jesusižquiz cjichiča:

—Wejt Jiliri, tekz žejlzqui walikazza. Am pecaquiz niiqui, čhjep chjujlli kjuyaž kjuyačha wejrnaquci, tsjiiqui amta, tsjiiqui Moiesta, tsjiiqui Eliasta.

⁵ Pedruž nuž chiyan, zuma kjañi tsjiriqui ninacžquiz urpuntichiča. Tsjirquiztan tsjii jora chiižquichiča, tuž cjican:

—Tiiča wejt k'ayi Maatiqui. Tiiž cjen anchal cuntintutča. Jalla tiiž takunaca catoka.

⁶ Jalla nii chiižquita nonžcuqui, nii čhjep tjaajinta žoñinacaqui yokquiz tuzi t'okziča. Muzpa tsucchiča. ⁷ Jalla nuž tuzi t'okzi želan, Jesusaqui ninacžquiz macjatžquichiča. Ninacžquiz kjaržtan lanlanžinchiča, tuž cjican:

—Tsijtsna. Anača tsuca.

⁸ Ninacaqui acha waytižcu Jesusa alajakaz cherziča, ana iya jecmi cherchiča.

⁹ Nekztanaqui curquiztan chjijwžcan, Jesusaqui ninacžquiz mantichiča, tuž cjican:

—Anaž jecžquizimi nii ančucaž cherta maznaquiča, weriž ticziquiztan jacatatta, jalla niicama.

¹⁰ Nekztanaqui niiz tjaajinta žoñinacaqui Jesusižquiz pewcziča, tuž cjican:

—Lii tjaajiñi maestrunacaqui cjiñiča, primero Elías profetaqui tjonstanča, nii. ¿Kjaž-tiquiztan nii maestrunacaqui niža chiya?

¹¹ Jesusaqui kjaaziča, tuž cjican:

—Ultimupanž Eliasqui wejt tuqui tjonchiča. Niiqui tjappachaž tjacziča, wejr tjonz-japa. ¹² Wejrqui cjiwča. Eliasqui tjonchitala. Pero lii maestrunacaqui nii Elías ana pajchila. Antiz ninacž kuczama nii Elías čhjulumu sufriskatchiča. Nižaza ninacaqui wejrzakaz ancha sufriskataquiča.

¹³ Jalla nuž Jesusiž chiitiquiztan nii tjaajinta žoñinacaqui tantiyazziča, Juan Bautistača Eliasqui, nii.

TSJII MAJCHQUI ZAJRAŽ TUCKATTA

¹⁴ Jalla nekztanaqui curquiztan chjijwžcu, parti žoñinacžquiz irantižquichiča. Nekztan tsjii žoñiqui Jesusižquiz macjatžcu, niiz yujcquiz quillziča. Nižaza tuž cjichiča:

¹⁵ —Wejt Jiliri, wejt majchquiz okžnalla. Niiqui t'ucñipanča. Ancha sufriča. Avisac ujqiz tjojtsa, nižaza kjazquiz zakaz tjojtsa. ¹⁶ Tekz zjijcchinča am tjaajinta žoñinacžquiz. Ninacaqui ana čhjetñi atchiča.

¹⁷ Jesusaqui kjaaziča, tuž cjican:

—Tii timpuquiz kamñi žoñinacaqui ana Yoozquin kuzzizza, ana zumača. ¿Čhjulorcamat wejr ančhucatan želaqui? ¿Čhjulorcamat ančucaquiz awantaqui? Wejtquin zjijca nii am majch.

¹⁸ Jalla nekztanaqui Jesusaqui nii majch tanñi zajra ujziča; nekztan chjatkatchiča. Jalla nii orapacha žejtchi cjissiča. ¹⁹ Jalla nekztanaqui tjaajinta žoñinacaqui Jesusižquiz zinapora pewcziča, tuž cjican:

—¿Kjažtiquiztan wejrnacqui zajraž tanta žoñi ana čhjetñi atchintaya?

²⁰ Jesusaqui kjaaziča, tuž cjican:

—Ančhucqui anača Yoozquin tjapa kuzziz. Jalla nižtiquiztan ana chjatkatati ača. Weraral cjiwča. Tsjii mostasa cjita simillaqui koltallača. Čhjactiquiztan walja pakjiž pajkča. Yoozquin tjapa kuzzizčhuc cječhaj niiqui, jalla tuž paasača. Tii curumiž mantasača, tuž cjican: “Tekztan najwk oka”. Jalla nuž mantitiquiztan curucž okasača. Tjappacha čhjulumu paasača ančhucqui, ultimu Yoozquin tjapa kuztan cječhaj niiqui. ²¹ Pero tii punta zajra chjatkatzjapa, Yoozquin mayiziz waquiziča. Nižaza ayunas waquiziča.

²² Galilea yokaran juntupacha ojklaycan, Jesusaqui niiz tjaajinta žoñinacžquiz chichiča, tuž cjican:

—Wejrqui tsewtan cuchanžquita Yooz Žoñtča. Wejrqui žoñinacž kjarquin intirjital cjeeča. ²³ Nižaza contal cjeeča. Nižaza čhjep majquiztanzi jacatatača.

Jalla nuž chiitiquiztanaqui ancha llaquisiskatchiča nii tjaajintanacžquiz.

²⁴ Nekztan Jesusižtan niii tjaajintanacžtanpacha Capernaum watja irantichiča. Nekztan timplujapa impuesto cobriñinacaqui Pedružquin cherzñi ojkcichiča. Jalla niiižquin zalžcu pewcziča tuž cjican:

—¿Ančhuca tjaajñi maestruqui timplu impuesto ana pacñikaya?

²⁵ Pedruqui kjaaziča, tuž cjican:

—Impuesto pacñipančhay.

Jalla nekztanaqui Pedruqui kjuyquiz luzziča, jakziquin Jesusac želatčhaja, jalla nicju. Ima Pedruž chiyana, Jesusaqui niiižquiz paljaychiča, tuž cjican:

—Simón, ¿tii tantiya? Tii muntuquiz žejlñi jilirinacaqui impuesto cobriñiča. ¿Jakzil-tižquiztan cobriya? ¿Persun wajtchiz žoñinacžquiztankaya? už ¿yekja wajtchiz žoñinacžquiztan, ja'?

²⁶ Pedruqui kjaaziča tuž cjican:

—Yekja wajtchiz žoñinacžquiztanpanča.

Nekztan Jesusaqui cjichiča:

—Jalla nižtiquiztan nii jilirinacž persun wajtchiz žoñinacaqui impuestonaca ana pacasača. ²⁷ Jalla nuž cjenami, anaž jecmi učhum quintra inžiñi cjiskatz pecuča. Jaziqui kotquin oka. Nekztan ch'iz tanzjapa kjazquiz anzuelo tjojtznaquiča. Primiru tanzi ch'iz lecznaquiča. Nii ch'iz ata waakatžcu, tsjii paaz wachaquiča. Nii paazqui wejt impuestojapa, nižaza am impuestojapa wacaquiča. Nii paaz chjicha, učhum impuestonaca paczjapa.

18

¿JECT TUCQUIN CJES?

¹ Jalla nii orapacha tjaajinta žoñinacaqui Jesusižquiz macjatžcu pewcziča, tuž cjican:

—Arajpach Yooz wajtquiz, ¿ject juc'ant pajk puestuquin uchtaž cjeequi?

² Jalla nekztanaqui Jesusaqui tsjii uza kjawziča. Nii uza ninacž taypiquiz tsjtskatchiča.

³ Nekztanaqui Jesusaqui cjichiča:

—Weraral cjiwča. Ančhucqui tii ocjalž kuz irata, nižta kuzziz pecča. Ančhuca kuz ana campiiata cječhaj niiqui, arajpach Yooz wajtquiz anapan luzasača. ⁴ Jalla nižtiquiztan tii ocjalž kuz irata, jalla nižta humilde kuzziz cjis waquiziča. Jakzilat nižta kuzziz cjisnaquiž niiqui, jalla niiiča arajpach Yooz wajtquiz juc'ant honorchizqui. Juc'ant zuma puestuquiz uchtaž cjequiča. ⁵ Jequit weriž cjen tsjii ocjalažtakaz humilde kuzziz žoñi risiwčhaja, jalla niiqui wejrzakaz risiwčha.

PAAZQUIZTAN CWITASA

⁶ Nižaza jakzilta humilde kuzziz žoñit wejtquin tjapa kuztan criyačhaja, jalla niiižquiz ana jakziltami ujquiz tjojtskatz waquiziča. Ujquiz tjojtskataquiž niiqui, nii ujquiz tjojtskatñi žoñž jorquiz tsjii pajk molinu tjaaj mokžcu, koz kotquiz jacuntiz waquiziča. Jalla nii tsjan cusaž cjesača nii ujquiz tjojtskatñi žoñžtaqui. ⁷ ¡Žoñinacajay! Ujquiz tjojtzaquiča, nižaza ujquiz tjojtskataquiča. Pero nekztan ana walinaca tjonaquiča. Tii muntuquiz ujquiz tjojtskatñinaca panž želaquiča, pero nii ujquiz tjojtskatñinacaqui ninacžtajapa ana waliž cjequiča.

⁸ Jalla nižtiquiztan am kjarazlaj už kjojchažlaj ujquiz tjojtskatčhaja, nii uj paañi kjara cjicu už kjojcha cjicu pootzna, nižaza najwk tjojta. Jalla nuž tsjii kjara cjicu už tsjii kjojcha cjicu pertissi cjenami am parti curpuqui ana infiernuquin tjojttaž cjesača. Jalla nuž waliž cjesača. ⁹ Nižaza am čhujucqui ujquiz tjojtskatčhaja, jalla nii čhujucqui lecžna, nižaza najwk tjojta. Yooztan wiñaya kamzjapaqui tsjii čhujucqui pertissiž cjequiž niiqui, waliž cjequiča. Tjapa curpuqui infiernuquin tjojttaž cjequiž niiqui, ana waliž cjequiča.

ZARAKCHI UUZA QUINTU

¹⁰ Humilde kuzziz žoñinacžtan ana chjaawjkata. Ančhucaquiz cjiwča, ninacž anjilanaqui wejt arajpach Yooz Ejpž yujcquiz žejlñipanča. ¹¹ Wejrqui tsewtan

cuchanžquita Yooz Žoñičha. Wejrqui tii muntuquiz tjonchinča, ujquiz kamñi žoñinaca liwriizjapa.

¹² ¿Jalla tii tantiya? Tsjii žoñiqui patac uuzichiztača. Patac uuziquiztan tsjiillaqui yekjaquin zaraktan, nii žoñiqui nii llatuntunc llatuncani uuzinaca curquin ecaquiča, zarakchi uua kjuržquizjapa. ¹³ Nižaza katchi uua wachaquiž niiqui, nekztan walja chipznaquiča ana zarakchi uuzanacžquiztan juc'anti. ¹⁴ Jalla nižta irata ančhuca arajpach Yooz Ejpqui humilde kuzziz žoñinacžquiztan anapan jakziltami pertita cjis munča.

UJ PERTUNZ PUNTU

¹⁵ 'Am jilaqui am quintra ana wali paaquiž niiqui, jalla niižtan zinapora palt'a, niiž ana wali paata ujquiztan "ujchizpanča" cjican cjeequi. Jalla nuž amiž chiižintiquiztan catokaquiž niiqui, nii jilaqui ricujta cjequiča. ¹⁶ Zinapora chiižintiquiztan ana nonz pecaquiž niiqui, nii uj paañi jilžquiztan okaquiča. Nekztan iya pucultan jila kjawžcu, wilta nii uj paañi jilžquin okaquiča, niiž paata uj tjeezjapa. Jalla nuž paažcu pucultan cjicu už čhjepultan cjicu testicž taypiquiz niiž paata uj tjeežta cjequiča. ¹⁷ Nii uj paañiqui anapanž niiž uj maz pecaquiž niiqui, jalla nii puntuquiztan tjapa icliz jilanacžquin maznaquiča. Anapan niiž uj maz pecaquiž niiqui, ana Yoozquin criichi jilažtakaz čhejlinaquiča, nižaza impuesto cobriñi žoñižtakaz.

¹⁸ Ultim weraral cjiwča. Tii muntuquiz jequit am čhelačhaja, jalla niiqui arajpach Yooziž čhejlta zakaz cjequiča. Nižaza tii muntuquiz jequit am cutznačhaja, jalla niiqui arajpach Yooziž cutžta zakaz cjequiča.

¹⁹ Tii zakal chiižinuča. Tii muntuquiz pucultan ančhucqui tsjiikaz Yoozquiztan mayaquiž niiqui, ančhucaquiž tjaataž cjequiča. Wejt arajpach Yooz Ejpqui ančhucaž mayta tjaaquiča. ²⁰ Nižaza tsjii pucultanami čhjepultanami wejtquin kuzziz cjen wejt tjuuquiz ajcznaquiž niiqui, jalla ninacž taypiquiz wejrzakaz želača.

²¹ Wiruñiqui Pedruqui Jesusižquin pewczñi ojkcichiča. Zalžcu, jalla tuž pewczičha:

—Wejt Jiliri, ¿Kjaž wiltamiž wejt jilaqui wejt quintra uj paažcu pertuna mayisasaya? ¿Nižaza wejrqui kjaž wiltat pertunasaya? ¿Pakallak wilta pertunasaya?

²² Jesusaqui niižquiz kjaaziča, tuž cjican:

—Wejrqui cjiwča, anaž pakallak wilta cjesača. Antiz pakallak tunc pakallakuni wiltan wiltan pertunasacha.

KAJCHIZ ŽOÑI QUINTU

²³ Arajpach Yooz mantiz puntuquiztan jalla tuzuča. Tsjii chawc jiliriqui piyunanacžquiz kaja packatz pecatča. ²⁴ Jalla nuž packatan tsjii kajchiz žoñiqui zjijctatača. Nii žoñiqui walja kajanacchiztača, tsjii kjaž millona. ²⁵ Nii piyunžtaqui anaž pacz paaz želatča. Nekztan patruñiqui jalla tuž mantichiča: "Tii žoñi tuya, paaz cuscisjapa. Nižaza niiž tjunmi, ocjalanacami, tjapa niiž cusasanacami liwž tuyła kaja pacz paaz cuscisjapa". ²⁶ Nekztanaqui nii piyunaqui patruñž yujcquiz quillziča, nižaza roct'ichiča, tuž cjican: "Wejt patruña, pertunalla. Tjappachal pacača". ²⁷ Nižtami patruñiqui ancha okziča; nižaza nii kaja ana cobrichiča. Jalla nižtiquiztan liwrii cjišičha nii kajquiztan. ²⁸ Wajilla nii piyunaqui nijwctan ulanžcu tsjii piyun maztan zalchiča. Nii piyun maziqi tsjii kjažtalla kajatača nii pertunta piyunžquiz. Nekztan nii pertunta piyunaqui jor t'ullcu tanchiča, nii packatzjapa, tuž cjican: "Kajquiztan tjappacha paca". ²⁹ Jalla nekztanaqui nii piyun maziqi niiž yujcquiz quillziča, nižaza roct'ichiča, tuž cjican: "Pasinsis kuzziz cjee. Nii kajallquiztan tjappachakal pacača". ³⁰ Nii kaja cobriñizti ana munchiča. Antiz carcilquin uchantichiča, jalla nii kaja paczcama. ³¹ Parti piyunanacaqui nižta paañi cheržcu ancha sint'ichiča. Nekztan patruñžquiz maziž ojkcichiča. Jalla nicju tjappacha quint'ichiča, jaknužt watčhaja, nii. ³² Jalla nekztanaqui patruñiqui nii pertunta piyuna wilta kjawžkatchiča. Nekztan cjichiča: "Ana zum kuzziz piyuna, wejrqui tjapa am kajanaca pertunchinča, amiž roct'iñiž cjen. ³³ Jaknužt wejrqui am kajquiztan, pertunchinčhaja, jalla nužuzakaz amlaqui am piyun mazquiz pertunstanča". ³⁴ Jalla

nektzanaqui patrunaqui juc'anti žawjzičha. Nižaza mantichičha, nii piyuna casticzjapa, tjapa niž kaja paczcama.

³⁵Jesusaqui nii quintu quint'ican jalla tuž žerzičha:

—Jakzilta ančhucaquiztan niž jilžquiz kuzquiztan ana pertunačhaja, jalla nužuzakaz wejt arajpach Yooz Ejpqui ančhucaquiz ana pertunaquičha.

19

MAATAKŽTAN JALJTIZ PUNTU

¹Jalla nuž tjaajinžcu Jesusaqui Galilea yokquiztan ojkchičha. Judea yokquin iran-tichičha, Jordán cjita puž tuwanchuc. ²Muzpa žoñinacaqui nižquiz apzičha. Jalla nicju muzpa laanaca čhjetinchičha.

³Jalla nektzanaqui yekjap fariseo žoñinacaqui Jesusižquiz macjatchičha, ujquiz tjojt-skatzjapa. Nektzan tuž pewczičha:

—¿Čhjul uj paatiquiztanaqui persun maatakžtanaqui jaljtasaya?

⁴Jesaqui ninacžquiz kjaazičha, tuž cjican:

—Yoozqui tii muntu paacan, luctakžtan maatakžtan paachičha. ¿Cjijrta Yooz takuqui ana liichinčhucjo? ⁵Yooz takuqui tuž cjičha: “Jalla nižtiquiztan tsjii žoñiqui tjunatan zalzjapa, maa ejpžquiztan zarakstančha. Zalžcu pucultan tsjii lucutiñi cjissa”. ⁶Jalla nuž kjanapacha tjeeža, anaž iya pucultan žoñi, pero tsjiikazza. Jalla nižtiquiztan anaž jaljtasačha. Yoozza tsjii luctakžtan tsjaa maatakžtan chjalziqui, tsjii lucutiñi cjisjapa. Yooz chjalžtaqui ana jaljta cjesačha.

⁷Nektzanaqui pewczičha tuž cjican:

—Moisesqui jalla tuž mantichičha. Tsjii certificado de divorcio tjaaquiz niiqui, tjunatan jaljtasačha. ¿Kjažtiquiztan nižta mantichejo, ana jaljtiz želanajo?

⁸Jesaqui ninacžquiz kjaazičha, tuž cjican:

—Ančhucaž chojru kuzziz cjen Moisesqui tjunatan jaljtis lii tjaachičha. Primirquiztan-pacha anataž nižta. ⁹Wejrqui ančhucaquiz chiižinučha. Adulteriuquiz ojklayniž cjenkaz am maatakžtan jaljtasačha. Jequit ana adulterio paachiž cjenauqui niž persun maatakžtan jaljtačhaja, nižaza yekja maatakžtan zalznačhaja, jalla niiqui adulterio uj paačha. Nižaza jequit divorcita maatakžtan zalznačhaja, nii zakaz adulterio paačha.

¹⁰Tjaajinta žoñinacaqui nižquiz cjichičha:

—Luctakžtan persun maatakžtan jalla nižta cjesaž niiqui, anaž cumpinčha zalzqui.

¹¹Jesaqui nektzan cjichičha:

—Tjapa žoñinacaqui tii tjaajinta anaž catokaquičha. Jakziltižquiz Yoozqui tjaajnačhaja, jalla niiqui tii tjaajintaqui catokaquičha. ¹²Žoñinacaqui punta punta ana zalzi cjičha. Yekjapanacaqui nastiquiztanpacha ana zalzuačha. Yekjapanacazti capunapantačha, jalla nižtiquiztan ana zalzñi atasačha. Yekjapanacazti ana zalz pecčha, arajpach Yooz Ejpžtajapa langzjapa. Jecmiž tii takucama kami catokaquiz niiqui, paj kamla.

OČJALANACŽ PUNTU

¹³Žoñinacaqui ocjalanaca Jesusižquiz zjjcchičha, ocjalanacžquiz kjaržtan lanznajo, nii ocjalanacžtajapa Yoozquin mayižinajo. Pero tjaajinta žoñinacaqui zjjcñi žoñinacžquiz atajchičha. ¹⁴Nektzan Jesusaqui cjichičha:

—Tii ocjalanaca wejtquin tjonaj cjee, ana ataja. Tii ocjalanacž kuz irata jalla nižta kuzzizza arajpach Yooz mantita kamañchiz žoñinacaqui.

¹⁵Nektzan Jesusaqui ocjalanacžquiz kjaržtan lanzičha. Jalla nektzan nii yokquiztan ojkchičha.

RICACH TJOWAQUI TJONCHIČHA

¹⁶Wiruñauqui tsjii tjowaqui Jesusa cherezni ojkchičha. Nektzan pewczičha, tuž cjican:

—Zuma Maestro, Yoozta wiñaya kamzjapa, ¿čhjul zumanacat wejr paasaya?

¹⁷Jesaqui kjaazičha, tuž cjican:

—Ķjažtiqiztan “Zuma Maestro” cjee amjo? Tsjii alajača zumaqui. Yoozkazza niiqui. Yooztan wiñaya kamz pecčhaj niiqui, Yooz Epiž mantitanac jaru kama cjee.

¹⁸Nii tjowaqui jalla nektzan kjaaziča, tuž cjican:

—Ķčjul mantitanacaya?

Jesusaqui nižquiz cjichiča:

—Anača žoñi conzqui. Anača adulteriuquiz ojklayzqui. Anača tjangzqui. Anača toscara chiizqui, jecžquizimi. ¹⁹Am maa ejpmi rispitaquiča. Jaknužum persunpachquiz okzñamžlaja, jalla nižta okzñi kuzziz cjispanča žoñinacžquizimi, lijitum mazižtakaza.

²⁰Nii tjowaqui nektzan cjichiča:

—Tjapa nii mantitanacami cumpliñča koltiquiztanpacha. Ķjaziqui čjulut wejttajaltasa?

²¹Jesusaqui tuž cjichiča:

—Anča wali cjissim pecčhaj niiqui, oka, nižaza amta željñi cusasanaca tuyzna. Jalla nii tuyžcu, porinacž ona. Jalla nižtiqiztan arajpachquin cusasanacažtakaz zuma honora tjaatam cjequiča. Jalla nii cumpliscu wiltam tjonaquiča wejttan chica ojklayzjapa.

²²Jalla nižta chiita nonžcu, nii tjowaqui walja llaquita kuzziz ojkičiča. Anča ricachutača.

²³Jalla nektzanaqui Jesusaqui niž tjaajinta žoñinacžquin cjichiča:

—Weraral ančhucaquiz cjiwča. Tsjii ricachu žoñi arajpach Yooz mantuquiz luzjapa anča ch'amaž cjesača. ²⁴Tsjii camello cjita animala željča. Nii camelluqui ch'aman acuj cjuñ pjetquiz luzasača. Jalla nižtaž ricachunacaqui tsjan ch'amača Yooz kamañ jicquiz luzqui, Yooz wajtchiz žoñi cjisjapa.

²⁵Jalla nuž nonžcu, tjaajinta žoñinacaqui walja ispantichiča. Nektzan ninacpora pewcsarassiča, tuž cjican:

—Ķjectpan liwriita cjesajo?

²⁶Jesusaqui ninacž kjutñi cherziča. Jalla nektzan cjichiča:

—Žoñinacaqui anaž persunpacha liwrii atasacha. Yoozpankazza liwriiñiqui. Yoozqui jecmi liwrii atasacha.

²⁷Jalla nektzanaqui Pedruqui Jesusižquiz cjichiča:

—Wejt Jiliri, wejrnacqui tjapa persun cusasanaca jaytichinča, amtan chica ojklayzjapa. ĶJalla nižtiqiztan wejrnacqui čjulut canas?

²⁸—Jesusaqui kjaaziča, tuž cjican:

—Weraral ančhucaquiz cjiwča. Ew muntuquiz želan, wejrqui poderchiz puestuquiz luzača. Ančhucakaz poderchiz puestunacquiz luzaquiča, tuncapan Israel partira mantizjapa. ²⁹Jakzilta žoñit weriž cjen kjuyanaca, jilanaca, cullaquinaca, maa ejp, tjun, ocjalanaca, yokanaca ecačhaja, jalla ninacaž walja zuma kamañ wirchiz cjequiča. Nižaza arajpachquin Yooztan wiñaya kamaquiča. ³⁰Arajpachquin Yoozqui wacchi tii timpuquiz tucquin cjiñi žoñinaca wirquin cjiskataquiča. Nižaza Yoozqui wacchi tii timpuquiz wirquin cjiñi žoñinaca tucquin cjiskataquiča.

20

PIYUNANACŽ QUINTU

¹Arajpach mantiñi Yooz puntuquiztan jalla tužuča. Wentanalla tsjii yokchiz wali pajk patrunaqui piyunanaca kjuri ulanchiča, uwas frut zkala ajzjapa. ²Piyunanacžtan acuerduquiz luzziča, zita langžtan tsjii denario cjita paaz paczjapa. Jalla nektzanaqui langžñi cuchanžquichiča. ³Nektzan wenzlaka wilta ulanchiča. Palazquin inakaz željñi žoñinaca cherchiča. ⁴Ninacžquiz paljaychiča, tuž cjican: “Ančhucqui wejt zkal yokquin langžñi oka. Wejrkal zumpacha pacača”. Nektzanaqui ninacaqui ojkičiča. ⁵Taypuru patrunaqui wilta ulanchiča, iya piyunanaca kjuri, nižaza langznajo. Nižaza taypuru zezi cjeella wilta ulanchiča, piyunanaca kjuri, nižaza langznajo. ⁶Nii noojpacha zezi cjee wilta palaz kjutñi ulanchiča. Nižaza palazquin inakaz željñi žoñinacžtan zalchiča. Ninacžquiz paljaychiča tuž cjican: “ĶKjažtiqiztan ančhucqui tonj zita ana langz željjo?”

⁷Ninacaqui patrunžquiz kjaaziča, tuž cjan: “Anaž jecmi wejrnac langznajo rocchiča”. Nekztanaqui patrunaqui cjichiča: “Ančhucqui wejt yokquin zakaz langzñi oka. Wejrkal jaknižlaj nil pacača”. ⁸Tjuñiž kattan nii yokchiz patrunaqui niž langzkatñi encargado mantichiča, tuž cjan: “Kjawžca langzñi piyunanaca, paczjapa. Primiruiqui wiri tjonchi piyunanacžquiz pacaquiča; wirquin, tuqui tjonchi piyunanacžquiz pacaquiča”. ⁹Jalla nekztanaqui nii wiri luzzi piyunanacaqui langzkatñižquiz macjatchiča. Zapa mayni ninacžquiz pactača, tsjii nooj lanžtaž nižtapacha. Tsjii denario cjita paaz tanzicha. ¹⁰Jalla nekztanaqui wirquin paczquita primiru piyuna luzzi žoñinaca kjawžtatača. Jalla nii primiru piyuna luzzi žoñinacaqui pinsichiča jila paca tanzjapa wiri piyuna luzzi žoñinacžquiztan. Jalla nekztanaqui pacchiča tsjii denario cjita paaz zakaz. ¹¹Jalla nii paca tanžcu patrunž quindra quijchiča, ¹²tuž cjan: “Tii wirquin piyuna luzzi žoñinacaqui tsjii orakaz langziča. Wejrnaczi primirquiztanpacha langzinča, nižaza zita ancha sii kjakquiz otžcan langzinča. Ninacžquizimi wejtnacaquizimi tsjiikaz pacchamča”. Jalla nuž cjan quijchiča. ¹³Nii patrunaqui tsjii ninacžquiz kjaaziča, tuž cjan: “Jila, amquiz anal incallchinča. Jalla nuž tsjii acuerduquiz luztapanla, tsjii denario paaz paczjapa. ¹⁴Tii paca tanzna, nižaza oka. Tii wirquin piyuna luzzi žoñinacžquiz nižazakaz pacz pecuča, amquiz pactala, jalla nuž zakaz. ¹⁵Wejt persun paaztan jaknužut wejr pinsučhaja, jalla nuž wejt munañpiquez pacasača. Weriz zuma pacñi kuzziz cjen amqui iñiziñi kuzziz cjissamla”. ¹⁶Jalla nižta irataž wirquin cjiñinacaqui tucquinž cjequiča. Nižaza tucquin cjiñinacaqui wirquinž cjequiča. Kjawžta žoñinacaqui wacchiča. Illzta žoñinaczi kolucullača.

JESUSAQUI NIIŽ TICZ MAZZIČHA

¹⁷Wiruñaquei Jesusaquei niž tjaajinta žoñinacžtan Jerusalén ojkchiča. Jalla nuž jiczquiz ojkan, Jesusaquei tsjii latu niž tuncapan illzta žoñinaca chjitchiča, nižaza ninacžquiz tuž cjichiča:

¹⁸—Ančhucqui zizza, tii jiczqui Jerusalén kjutñiž ojkča, nii. Jerusalén wajtquin wejrqui intirjital cjeeča timplu jilirinacžquizimi lii tjaajiñi maestrinacžquizimi. Jalla ninacaqui wejr conaquiča. Wejrqui tsewctan cuchanžquita Yooz Žoñtča. ¹⁹Nižaza wejrqui yekja wajtchiz žoñinacžquiz intirjital cjeeča, ana wali burla paata cjisjapa. Nižaza wejrqui wjajttal cjeeča. Ultimquiziqui cruzquiz ch'awcta contal cjeeča. Jalla nekztan čhjep majquiztanzi jacatatača.

TSJII FAVORA MAYTA

²⁰Jacobžtan Juanžtan ninacž maaqui Jesusižquiz macjatžquichinča. Jacobžtan Juanžtan ninacž ejpqui Zebedeo cjitatača. Jalla naa maaqui maatinacžtanpacha Jesusižquin macjatchinča. Nekztanaqui naaqui Jesusiž yujcquiz quillzinča, tsjii favora mayzjapa.

²¹Nekztan Jesusaquei naaquiz cjichiča:

—¿Amqui čhjulum pecya? —cjan.

Naaqui kjaazinča, tuž cjan:

—Amqui am mantis puestuquin luzcu tii wejt pucultan majchnaca am latuquiz uchnalla, tsjiiqui žew latuquiz nižaza tsjiiqui zkar latuquiz.

²²Jesusaqui tuž kjaaziča:

—Ančhucqui čhjulut mayčhaja ana intintazza. Wejrqui walja sufris tanča. ¿Nižtapacha ančhuc sufrasaya? Nižaza tsjii nooj ancha sufrican watača tsjii bautismožtakaz. ¿Jalla nižtapacha ančhuc sufrasaya?

Ninacaqui tuž kjaaziča:

—Nii sufris watimi atasacha.

²³Nekztan Jesusaquei cjichiča:

—Weraral cjiwča. Ančhucpacha sufris tanznaquiča, tsjii licz wazužtakaz. Nižaza sufris wataquiča, tsjii bautismožtakaz. Pero wejrqui mantis puestuquin luzcu, žew latuquizimi zkar latuquizimi ana jecmi uhasača. Wejt Yooz Ejpkaz nii puestunaca tjaaquiča jecžtajapa tjacžtakazlani, jalla ninacžta.

²⁴Parti nii tuncapan illzta žoñinacaqui nii mayta puntu nonžcu nii pucultan jilazullcaž quintra žawjchiča. ²⁵Pero Jesusaqui tjappacha nii tjajintanaca kjawziča, nekztan tuž cjichiča:

—Ančhucqui zumpacha zizza, jalla tužu. Tii muntuquiz naciñ jilirinacaqui patrunaž-takaz mantiñiča, nižaza chawc jilirinacaqui parti žoñinacžquiziqui niiž mantita cazkatñi-pankazza. ²⁶Ančhucqui ana nižta irata cjee. Tsjii kjutñiča nii irat kuzqui. Ančhucaquiztan jequit chawc jilirižtakaz cjis pecčhaja, jalla niiqui piyunažtakaz cjis waquiziča parti žoñinacžquiziqui. ²⁷Nižaza jequit ančhucaquiztan tucquin mantiñi cjis pecčhaja, jalla niiqui wirquin cjis waquiziča, parti žoñinacaž mantitacama cjisjapa. ²⁸Wejrqui tsewctan cuchanžquita Yooz Žoñtča. Wejrpacha tii muntuquiz ana tjonchinča, sirwita cjisjapa. Antiz wejřča tjonchinqi, žoñinacžquiz sirwisjapa, wejř ticzcama. Jalla nuž ticžcu walja preciochiztakal cjeeča, žoñinaca liwriizjapa. —Jalla nuž cjichiča Jesusaqui.

ZUR ŽOÑINACA ČHJETINTA

²⁹Jalla nekztanaqui Jericó wajtquiztan ulnan, muzpa žoñinacaqui Jesusižquiz apziča. ³⁰Jicz latuquin pucultan zur žoñi julzi želatča. Ninacaqui Jesusaž watñi nonžcu, kjawchiča tuž cjican:

—Wejt Jiliri, Davidž majchmajtquiztan tjonñi, wejrcacž okznalla.

³¹Nekz žejlñi žoñinacaqui ninacžquiz uziča, ch'uj cjejajo. Ninacazti juc'anti kjawchiča, tuž cjican:

—Wejt Jiliri, Davidž majchmajtquiztan tjonñi, wejrcacž okznalla.

³²Jalla nekztan Jesusaqui tsijtscu, ninaca kjawziča. Kjawžcu ninacžquiz tuž pewcziča: —Čhjuluz werj paaj cjii ančhucya?

³³Nii zur žoñinacaqui kjaaziča, tuž cjican:

—Wejt Jiliri, wejtnaca čhjujquič čhjetinžinalla.

³⁴Nekztanaqui Jesusaqui ninacžquiz sint'izcu čhjujqui lanlanžinčiča. Jalla nii ora-pacha cherñi cjišiča. Jalla nekztanaqui Jesusižquiz apziča.

21

JESUSAQUI JERUSALEN WAJTQUIN LUZZIČHA

¹Jerusalén watja žcatžincan, Betfagé watja irantichiča. Betfagé watjaqui Olivos cjita curu žcatitača. Nicju irantican Jesusaqui pucultan tjajinta žoñinaca cuchanchiča, tuž cjican:

²—Jalla nii najwkta watja oka. Jalla nicju mokta ljat azni wachaquiča, nižaza pajk zjiyc maltum wawchizza naa azniqui. Mokta jeržcu wejtquin akžcaquiča. ³Jakzilta žoñimiž atajasaž niiqui, niižquiz ančhucqui “Wejt Jiliriž pecčha. Wajilla tjepunta cjequiča tii azniqui”, nuž cjican nii žoñžquiz cjequiča. —Jalla nuž mantichiča Jesusaqui.

⁴Jalla nii watchiqui profetaž cjiřta taku cumplissiča. Tuqitan nii profetaqui tuž cjiřčiča:

⁵“Siñ wajtchiz žoñinacžquiz tuž chiya: Chera, ančhucya chawc Jiliri tjonča, humilde kuzziz. Nižaza zjiyc maltum aznuquiz yawchi tjonacučiča, nižaza nii zjiyc aznuž maatanpacha tjonacučiča. Jalla ninacaqui carga kuzñi aznunacača”.

Jalla nuž cjiřčiča nii profetaqui.

⁶Jalla nekztanaqui nii pucultanaqui ojkičiča. Nižaza jaknužt Jesusaqui mantičhaja, jalla niicama paachiča. ⁷Ninacaqui ljat azñi naaža pajk zjiycanpacha akžquičiča. Jalla nuž akžcu, zqutinaca aznunacžjuntuñ caruntichiča. Nekztan Jesusaqui yawchiča. ⁸Niiž ojcz jicz latuquiz muzpa žoñinaca želatča. Ninacž zquti jiczcu čhjinziča. Yekjapaqui ramuz čhjañinaca murchiča jiczquiz čhjinzjapa. ⁹Tucquin ojkiñ žoñinacami wirquin tjonñi žoñinacami chipcan walja wiwi kallantičiča, tuž cjican:

—¡Viva tii Yooz tjuuquiz tjonchi žoñi! ¡David cjita chawc Jilirž majchmajtquiztan tjonñi! ¡Amqui rispittaj cjila! ¡Amquiz honora tjaataj cjila! ¡Yooz Ejpžquin zakaz honora tjaataj cjila! —Jalla nuž wiwchiča.

¹⁰Jesusaž Jerusalén watja luztan, tjapa nii chawjc wajtchiz žoñinacaqui walja ispantichi tjojnackchiča. Nižaza walja pewcpewcziča, tuž cjan:

—¿Jectpan teejo?

¹¹Žoñinacaqui tuž kjaaziča:

—Tiiqui Jesusa cjita profetala. Nazaret de Galilea, jalla najwktan tjonchiča.

JESUSAQUI TIMPLU PEWZIČHA

¹²Jalla nekztan Jesusaqui Yooz timpluquin luzziča. Jalla nicju tuyñinacami kjayñinacami timpluquiztan liwj tirkatchiča zancchuccama. Nižaza paaz campiñi žoñinacž mizami pjocžinchiča; paloma tuyñinacž sillami pjocžinchičakazza. ¹³Jalla nuž paažcu tuž cjichiča:

—Yooz Takuqui tuž cjiča: “Wejt kjuyaqui Yoozquin mayiziz kjuyača”. Ančhuczti tjañinacž kjuyažtakaz paachinčhucča.

¹⁴Jalla nicju tsjii kjaž zur žoñinaca Jesusižquiz macjatžquichiča, nižaza tsjii kjaž zuch žoñinaca. Jesusaqui ninaca čhjetinchiča. ¹⁵Pero timplu jilirinacami lii tjaajiñi maestrinacami jalla nii čhjetiñi milajru cheržcu, žawjchiča. Nižaza ocjalanacaqui timpluquin Jesusižquiz tuž wiwchiča: “¿David cjita chawc jilirž majchmajtquiztan tjonñi! ¿Rispiťaj cjila!” Jalla nuž nonžcu timplu jilirinacami lii maestrinacami ancha žawjchiča Jesusiž quintra. ¹⁶Nekztan Jesusižquiz paljaychiča, tuž cjan:

—¿Tinacaž čhiita taku ana nonžjo?

Jesusaqui ninacžquiz kjaaziča, tuž cjan:

—Nonznučha. Nižaza nii puntu Yooz takuqui tuž cjiča:

“Ocjalanacami piz itzñi wawanacami wejtajapa honora zumpachaž tjaaquiča. Jalla nuž paaquiča Yoozqui”.

¿Jalla nii cjiťrta Yooz taku liichinčhuckaya; ana jaa?

¹⁷Jalla nekztanaqui ninacžquiztan ojkičiča. Betania watja ojkičiča. Jalla nicju alujassiča.

ANA FRUTCHIZ MUNTI

¹⁸Jakatažuqui wenzlaka Jerusalén watja quejpcan čhjeri eescatchiča. ¹⁹Jic latuquiz higo munti cherchiča. Jalla nii muntiquin macjatčiča, fruta apakžcu lujljapa. Pero fruta ana wajtchiča, čhjañichiz alajatača. Jalla nižtiquiztan Jesusaqui nii muntiquiz cjichiča:

—Jazic anam iya fruta pookñi cjequiča.

Jalla nii orapacha nii muntiqui kjonchiča. ²⁰Jalla nižta munti kjonñi cheržcu, tjaajinta žoñinacaqui ispantichiča, nižaza Jesusižquiz pewcziča, tuž cjan:

—¿Kjažtquiztan nii higo munti ratulla kjonya?

²¹Jesusaqui tuž kjaaziča:

—Weraral ančhucaquiz cjiwča. Ančhucqui Yoozquin tjapa kuztančhucčhalaj niiqui, nižaza ana payznakñi kuzzižhucčhalaj niiqui, tii irata zakaz paasača. Nižaza juc'ant pajk milajru paasača. Tii curumi mantasača, tuž cjan: “Tekžtan oka. Pajk kotquin tjojsna”. Jalla nuž mantižcu nižta zakaz okasača. ²²Nižaza ančhucqui čhjulumi tjapa kuztan Yoozquiztan mayačhaja, jalla niit jama ančhucaquiz tjaataž cjequiča.

¿JEC JESUSIŽQUIZ MANTICHI?

²³Jerusalén irantižcu Jesusaqui wilta timpluquin luzziča. Jalla nicju tjaajnan, timplu jilirinacami wajtchiz jilirinacami nižžquiz macjatžquichiča. Nekztan pewcziča, tuž cjan:

—¿Jec am mantichi tii paazjapajo? ¿Jec jilirit am utchi jilirižtakaz cjisjapajo?

²⁴Jesusaqui ninacžquiz tuž kjaaziča:

—Wejrzal ančhucaquiz tsjii pewcznača. Ančhucqui wejtquiz kjaaznaquiž niiqui, wejrzakal ančhucaquiz maznača, jec wejr mantichi, nii. ²⁵Wejtquiz kjaaznalla. ¿Ject Juan mantižquichi bautisjapaya? ¿Yoozkaya, žoñinaca, ja!?

Jalla nekztanaqui ninacpora parlatča, tuž cjan:

—¿Jaknužum cjeequi? Učhumž “Yoozqui Juan mantichiča” cjananž kjaaznaquič niiqui, jalla tiicni učhumnacaquič kjaaznačan, cjanan: “Nižtiquiztan žkjažtiquiztanž ančhucqui ana nii criichinčhucta?”²⁶ Nižaza učhumž “Zoñiqui Juan mantichiča” cjananž kjaaznaquič niiqui, žoñinacaquič učhumnacaquič žkjaž cjiqejó? —Jalla nuž parlatča. Žoñinacaquič Juanž puntu cjiñiča, Yooz parti parliñi profetača niiqui. Jalla nižtiquiztan ninacaquič žoñinaca eksiča, “Učhum conačhani”, cjanan.

²⁷Jalla nuž parližcu ninacaquič Jesusižquič cjičiča:

—Ana zizuča wejrnacqui.

Jalla nižta kjaaztiquiztan Jesusaquič cjičiča:

—Wejrmí ana zakal ančhucquič maznača, jec wejr mantichi tii paazjapa.

PUCULTAN MAJCHWICH QUINTU

²⁸Wiruñaquič Jesusaquič tsjii puntu chiichiča, tuž cjanan:

—Tii puntu tantiya. Tsjii žoñiqui pucultan majchwichtača. Tsjiižquič cjičiča: “Wejt maati, tonjiqui uwas frut ajžñi oka”.²⁹ Nii mantita maatiquič tuž kjaaziča: “Anača”. Jalla niž wiruñalla niž kuz campiichiča. Nekztan uwas frut langžñi ojkičiča. ³⁰Nižaza nii ejpquič tsjii maati cheri ojkičiča. Niižtan zalžcu, nižtazakaz uwas frut ajžñi mantichiča. Jalla niiquič kjaaziča, tuž cjanan: “Tata, okasača”. Ultimquiziqui nuž cjisquič ana ojkičiča. ³¹Nii pucultanquiztan žakžilta maatič niž ejpž mantitacama paachiya?

Ninacaquič kjaaziča tuž cjanan:

—Primiru mantitaž, jalla niiča.

Jalla nekztanaquič Jesusaquič cjičiča:

—Weraral ančhucquič cjiwča. Impuesto cobriñinacami, nižaza ujchiz maatakanacami arajpach Yooz wajtquič ančhucž tuquič luzaquiča. ³²Juan Bautistaquič tjaajñi tjonchiča, jaknužt ančhucalaquič kamžtažlaja, jalla nii tjaajinchiča. Pero ančhucquič niž tjaajinta ana criichinčhucta. Impuesto cobriñinacazti nižaza ujchiz maatakanacazti niž tjaajinta criichiča. Jalla nii cherchinčhucta ančhucquič. Jalla nižtanaca cheržcumi, ančhucquič ana Yoozquin cjisjapa kuz campiichinčhucta. Ančhucta niž taku ana criichinčhucquič.

ANA WAL PIYUNANACŽ QUINTU

³³Jalla tii quintu zakaz nonžna. Tsjii yokchiz patrunaquič uwas zkala čhjacchiča. Nekztan uwas zkala muytata pirka pirkichiča. Nižaza tsjii maz ojt paachiča, uwas kjaz spjijtzjapa. Nižaza tsjii campanturiž cherchi kjuychiča, nii zkala itzjapa.

Nekztan nii patrunaquič zkala yoka alquilchiča piyunanacžquič. Nekztan jicž ojkičiča.

³⁴Zkala ajž timpu irantižcan, patrunaquič tsjii kjaž piyuna cuchanžquichiča, niž parti zkala ricujajo. ³⁵Pero nii zkala alquilñi žoñinacazti nii cuchanžquita piyunanaca tanchiča. Tsjiiquič kitžtača. Tsjiiquič contača. Tsjiiquič maztan čhajtača. ³⁶Nekztanaquič patrunaquič wilta piyunanaca cuchanžquichiča, primirquiztan juc'anti. Pero nii zkala alquilñi žoñinacazti nižtapacha ana wali paachizakazza. ³⁷Ultimquiziqui patrunaquič niž persun majch cuchanžquichiča, tuž tantiican: “Wejt ultim maatiquič rispitižinaa” cjanan. ³⁸Niž majch cheržcu, nii alquilñi žoñinacaquič ninacpora palt'ichiča, tuž cjanan: “Jalla tiikat liwž tii irinsa tanznačhani. Jalla nižtiquiztan ž-conla, učhumnacaltajapa tii yok irinsa cfejajo”. ³⁹Jalla nekztanaquič nii žoñinacaquič majch tanchiča; nekztan yokquiztan jwescu conchiča.

⁴⁰Jalla nekztanaquič Jesusaquič pewcziča, tuž cjanan:

—Jalla nii patruncha tjonžcu, žčjulukat nii alquilñi žoñinacžtajapa paachani?

⁴¹Žoñinacaquič kjaaziča tuž cjanan:

—Nii ana wal žoñinacaquič contaž cjequiča, ana importayžcu. Nekztan nii zkala yoka yekja piyunanacžquič alquilaquiča, zkala ajž timpu niž parti zkala ricujžcu nižquič tjaata cjisjapa.

⁴²Nekztan Jesusaquič ninacžquič cjičiča:

—Yooz takuquič tuž cjiča:

“Kjuy pirkiñinacaqui tsjii maz tjojtchiča. Nii tjojta mazqui isquinquiz cjissiča. Juc'ant chekan mazqui cjissiča. Yoozqui nuž utchiča. Učhumqui jalla nii cheržcu ispantichiča”.

Jalla nuž cjiča cjiirta Yooz takuqui. Ančhucqui nii Yooz taku liichinčhucča, ¿ana jaa?

⁴³ Ančhucquiza chiižinuča, ančhucqui nii ana wal alquilni žoñinacažtakazza. Jalla niž-tiquiztan ančhucqui Yooz kjuychiz famillquiztan chjatkattaž cjequiča. Yekja žoñinacaqui Yooz famillquiza luzaquiča. Yooz kuzcama kamni žoñinacaqui luzaquiča. ⁴⁴ Nonžna. Maz puntuquiztan zakal chiyuča. Jakziltat nii maz cjen ujqiz tjojtsnačhaja, jalla niiqui pirasužtakaz t'okuntaž cjequiča. Nižaza jakziltiž juntuñ nii mazqui tjojtsnaquiza niiqui, pulpužtakaz t'okuntaž cjequiča. Nii žoñinacaqui k'ala akžtaž cjequiča.

⁴⁵ Jalla nii Jesusiž chiita takunaca nonžcu, timplu jilirinacami, fariseo parti jilirinacami tantiichiča, ninacž puntu chiiñi, nii. ⁴⁶ Jalla nuž tantiižcu, Jesusa tanz pecatča. Pero ana atchiča, parti žoñinaca ekskcu. Parti žoñinacaqui Jesusiž puntu tantiyatča, Yooz taku parliñi profetača, nii.

22

YOOZ KJUYCHIZ FAMILIA

¹ Jalla nektzanaqui Jesusaqui wilta tjaajinchizakazza. Jalla tuž cjican quint'ichiča:

² —Arajpach Yooz kjuychiz familiaqui jalla tužuča. Tsjii chawjc jiliriqui niiz majchajapa zalz pijjsta paachiča. ³ Niiz piyunanaca cuchanchiča, invitta žoñinaca kjawžni. Nii kjawžta žoñinacaqui ana tjonz pecchiča. ⁴ Nektzanaqui yekja piyunanaca cuchanchizakazza, tuž cjican: “Invitta žoñinacžquin mazca, ‘Chjeri lujlz tjacžtača. Wejt wacanaca conkatchinča, nižaza cjew animalanacami. Tjappacha listuča, jaziqui pijjistiquin tjonla’”. ⁵ Jalla nuž chiyanami nii invitta žoñinacaqui ana cazquichiča. Tsjiiqui zkal yoka ojkičiča. Tsjiiqui tuyžtan ojkičiča. ⁶ Parti invitta žoñinacaqui kjawžni cuchanta piyunanaca tanziča. Nektzan kitčiča, conañcama. ⁷ Jalla nektzanaqui nii chawc jiliriqui ninacž quintra žawjziča. Nektzan zultatunaca cuchanžquichiča, nii piyuna conñinaca conžcajo. Nižaza, ninacž watja ujžcajo. ⁸ Jalla nižta paažcu chawc jiliriqui piyunanacžquiza cjičiča: “Tjappacha zalz pijjstac listuča. Nii primir invitta žoñinacaqui ana tjonz waquiziča. ⁹ Jalla nižtiquiztan ančhucqui pajk calliranž ojklajžca. Jecnacžtanami zalačhaja, jalla ninacžquiza tjonajum cjequiča tii zalz pijjistiquin”. ¹⁰ Jalla nektzanaqui piyunanacaqui call kjutni ulanchiča, nižaza tjapa niiz zaltanaca kjuyquiza ajcskatžquichiča, zuma žoñimi, ana zuma žoñimi. Jalla nektzanaqui pijjsta paaz kjuyaqui chjiipsi cjissiča.

¹¹ Jalla nektzanaqui chawjc jiliriqui luzquichiča invitta žoñinaca cheržni. Tsjii žejlñi žoñi naychiča, ana pijjsta paaz zquiti cutchi želatča. ¹² Jalla nuž nayžcu nii chawjc jiliriqui niizquin paljaychiča tuž cjican: “Jila, ¿kjažtiquiztan amqui ana pijjsta paaz zquiti cajtchi luzquichamtajo?” Nii žoñiqui ch'uj quirchiča. ¹³ Nektzanaqui chawjc jiliriqui pijjsta atintiñi žoñinacžquiza mantichiča, tuž cjican: “Kjojchanacami kjaranacami čejlžina. Zawnc zumchiquiza tjojta, jalla nicju kaala, nižaza niiz izke kjojla”.

¹⁴ Jesusaqui cjichizakazza:

—Kjawžta žoñinacaqui tamacha. Illzta žoñinacaqui kolucullača.

IMPUESTO PACZ PUNTU

¹⁵ Jalla nektzanaqui fariseo žoñinacaqui ojkičiča. Ninacaqui acuerduquiza kazziča, Jesusiž quintra tsjii uychiz cjiskatzjapa. Jaknužumi Jesusa tsjii ana wali chikataquiča; jalla nii uychiz cjiskatz pecatča. ¹⁶ Jalla nektzan ninacž partiquiztan yekjap žoñinaca cuchanžquichiča, Herodes parti žoñinacžtanpacha. Jalla nii cuchanta žoñinacaqui Jesusižquiza cjičiča:

—Maestro, wejrnc zizuča, amqui werarapan chiiča, nižaza Yooz kamañ puntuquiztan weraram tjaajiñamča, kjažtami žoñiqui chiičhani, nižaza kjažta žoñimi želačhani. ¹⁷ Jaziqui amqui tii tantiižinalla. ¿Roman chawc jiliržquin impuesto pacz wali cjesaya? už ¿anaž wali cjesaj? Jalla nii ziz pecuča.

¹⁸ Pero Jesusaqui ninacž ana zuma pinsita intinzuna zizziča. Jalla nižtiquiztan ninacžquiz kjaaziča tuž cjan:

—Ana zum kuzziznaca, ¿kjažtiquiztan ančhucqui wejt quintra uj jwes pecjo? ¹⁹ Impuesto pacz paaz tjezna.

Jalla nekztan tsjii denario cjita paaz zjicčiča. ²⁰ Jalla nii paaz cheržcu, Jesusaqui ninacžquiz pewcziča, tuž cjan:

—Tii paazquiz ¿jecž yujctaya? Nižaza tii cjjirta tjuu, ¿jecž tjuutaya?

²¹ Nii quintranacaqui kjaaziča, tuž cjan:

—Roman chawc jiliržtača.

Jesusaqui nekztan cjichiča:

—Roman chawc jiliržtaqui jalla nii jiliržquin tjaasa. Nižaza čjulut Yooztaqui Yoozquinpan tjaasa.

²² Jalla nuž nonžcu, nii quintranacaqui ispantichiča. Nekztan Jesusižquiztan zarakžcu ojkchiča.

JACATATZ PUNTU

²³ Jalla nii noojpacha yekjap saduceo parti žoñinacaqui Jesusa cheri ojkchiča. Saduceo parti žoñinacaqui ana criiñitača, ticziquiztan jacatatz, nii. Jalla nuž cjenami Jesusižquiz pewcziča. Tii quintu quint'ican, pewcziča, tuž cjan:

²⁴ —Maestro, Moisesaqui učumnacalta cjjirtkalča, tuž cjan: “Tsji žoñi ticznasaž niiqui, niíž tjun ana ocjalchiz cjesaž niiqui, nekztan nii ticzi žoñž jilaqui naa žewatan zalz waquiziča, nii ticzi jilž cuntiquiztan ocjala paazjapa”. ²⁵ Jaziqui wejrnacporquiz pakallak jilazulca želatča. Jilir jilaqui zalsiča. Nekztan ticziča ana ocjalchiz. Jalla nekztan jilirž jar jilaqui naa žewatan zalsizakazza. ²⁶ Nii jilaqui ticzizakazza ana zinta ocjala ecžcu. Nekztan yekja taypir jilžtan nižtakazak watchiča. Nižaza tjappach nii pakallak jilazullquizquiz nižta watchiča. ²⁷ Tjapa nii pakallak jilazulcaž ticztan, naa žewqui ticzizakazza. ²⁸ Jaziqui ticziquiztan jacatatzcu, naa žewqui ¿jakziltiž tjun cjequejo? Tjappacha naatancama zalzitača.

²⁹ Jesusaqui ninacžquiz tuž kjaaziča:

—Ančhucqui tsjii kjutñi kiwkchinčhucča. Ančhucqui Yooz takumi ana zuma zizza. Nižaza Yooz azimi ana pajča. ³⁰ Ticzi žoñinacaž jacatattanaqui zalzqui ana želaquiča. Žoñinacami žoñž maatinacami ana zalznaquiča. Nii timpuquiz žoñinacaqui arajpach Yooz anjilanacažtakaz cjequiča. ³¹ Pero nii ticziquiztan jacatatz puntu, ¿Yooz tawkquiz ana tuž ličinčhucjo? Tii puntuquiztan Yoozpachaž chiichiqui. Jalla tuž cjan Yoozqui cjichiča: ³² “Wejrqui Abrahamž Yoozza, nižaza Isaacž Yoozza, nižaza Jacobž Yoozza”. Anača ticzi žoñž Yoozqui. Antiz žejtñi žoñž Yoozza.

³³ Jalla nuž chiita nonžcu, nekz žejlñi žoñinacaqui Jesusiž chiitiquiztan ispantichiča.

JUC'ANT CHEKAN MANTITAQUI

³⁴ Jalla nuž chiižcu Jesusaqui saduceo parti žoñinaca ch'uju paachiča. Jalla nuž ch'uj paatiquiztan fariseo parti žoñinacaqui wilta ajcziča. ³⁵ Tsjii lii maestruqui nižaza fariseo partinacžquiztan uj jwesjapa yanz pecatča. Jesusižquiz pewcziča, tuž cjan:

³⁶ —Maestro, učum liiquiztanaqui ¿čhjul mantitat juc'ant chekanaya?

³⁷ Nekztan Jesusaqui kjaaziča, tuž cjan:

—Tii mantitača juc'ant chekanaqui. “Ančuca Yooz Ejp Jiliržquiz sirwa, tjapa kuztanami, tjapa animužtanami, tjapa pinsamintužtanami”. ³⁸ Parti mantitanacquiztan cjenauqui jalla niiča chekanaqui. ³⁹ Niiž jaru tii mantitaqui žejlča. “Jaknužum persunpachquiz okzñamžlaja, jalla nižta okzñi kuzziz cjistanča žoñinacžquizimi, liijitum mazižtakaz”. ⁴⁰ Jalla nii pizc mantitanacača chekanaqui. Nižaza tjapa Moisés tjaata liimi, nižaza tjapa profetanačaz tjaajintanacami nii pizc mantitanacž partiquiztan chiiča.

CRISTUŽ PUNTU

⁴¹ Fariseo žoñinacaž ajczi želan, Jesusaqui ninacžquiz pewcziča tuž cjan:

—Ančhucqui Cristumž puntuquiztan tantiya. ¿Cristuqui jecž majch niiqui?

⁴² Nekztanaqui ninacaqui Jesusizquiz kjaaziča, tuž cjican:

—Davidž majchmajtquiztan tjonničha niiqui.

⁴³ Jalla nuž kjaaztquiztan Jesusaqui ninaczquiz cjichiča:

—David jiliri qui Cristuž puntuquiztan chiican, “Chawc Jiliri” cjichiča. Jalla nuž chiizcu, Yooz Espiritu Santuž chiikatchiqui.

⁴⁴ Davidaž cjjirta Yooz takuqui tuž cjiča:

“Yooz Jiliri qui wejt chawjc Jiliržquiz cjichiča: ‘Wejrqui am kjojch koztan am quintri žoñinaca tjeczkatača. Nii oracama wejt žew latuquiz julzna’.”

⁴⁵ Jaziqui Davidaqui “chawjc Jiliri” cjichiča Cristuž puntuquiztan. Jalla nižtquiztan j jaknužt nii chawjc Jiliri Davidž majchqui cjesajo? —Jalla nuž pewczičha Jesusaqui.

⁴⁶ Anaž jecmi kjaazni atchiča, ana zinta takumi. Jalla nužquiztanpacha ana čjulumi pewczii atchizakazza iya. Jalla nii orquiztanpacha pecunz eksipanča nii quintra žoñinacaqui.

23

ANA ZUM TJAAJIŃINACŽ PUNTU

¹ Jalla nekztanaqui Jesusaqui nekz žejlŃi žoñinaczquizimi niiz tjaajinta žoñinaczquizimi tuž cjichiča:

² —Lii tjaajiŃi maestruncami nižaza fariseo žoñinacami persun puntuquiztan tuž tantiiča, tjaajinz puestuquiz uchtača Moisés liiquiztan punta punta tjaajinzjapa, nii. Jalla nuž tantiiča persun amtiquiziqui. ³ Ančhucqui ninacaž tjaajintacama oka. Nižaza ninacaž chitacama paa. Pero ninacz kamz jaru, ana kama. Ninacaqui tjaajinča, pero persun tjaajinta jaru ana oj kča, ana cumpliča. ⁴ Ninacaqui walja mantitanaca paača, walja kuzižtakaz žoñinaczquiz jepča. Tjapa ninacz mantitanacaqui anapan atchucača. Jalla nuž cjenami tjapa mantitanaca žoñinaczquiziqui tirapanž ijsijča. Pero ninacapacha anaž čjulquizimi yanapča nii cumplisjapa. ⁵ Ninacaqui čjululu paatami paača, žoñinacakaz cherajo. Yujc ayquizimi kjarquizimi cjjirta Yooz taku jweranchiž ojklajča, nižaza parti žoñinaczquiztan juc'anti lajch chajljchiz zquiti cajtchiž ojklajča. Jalla nižtaž ojklajž jutztaza. ⁶ Pjijstiquiz cjen tucquin panž julz pecča. Nižaza ajcz kjuyquiz cjen tucquin panž julz pecča honorchiz cjisjapa. ⁷ Ninacaqui žoñinacz taypizquiz cjen rispizžtan tsanta cjis pecča, nižaza “Maestro” cjita cjis pecča.

⁸ “Ančhucqui anača žoñinaczquiz “maestro” cjita cjis peczqui. Tjapa ančhucqui jilazullquičhucča. Tsjii Maestručhizčhuckazza. Cristučha nii Maestruqui. ⁹ Nižaza ančhucqui tii muntuquiz kamcan anaž jeczquizimi “ejp” cjican chiiz waquiziča. Tsjii Ejpchizčhuckazza. Arajpach Yooz Ejpča niiqui. ¹⁰ Nižaza ančhucqui anača žoñinaczquiz “jiliri” cjita cjis peczqui. Tsjii jilirchizčhucča. Cristučha niiqui. ¹¹ Ančhucquiztan jequit jiliržtakaz cjis pecčhaja, jalla niiqui piyunažtakaz cjis waquiziča parti žoñinaczquiziqui. ¹² Jequit persun honora waytiz pecčhaja, ultimquiziqui ana honorchiz cjequiča. Nižaza jequit humilde kuzzizlaja, jalla niiqui ultimquiziqui honorchiz cjequiča.

¹³ Lii tjaajiŃi maestruncami, nižaza fariseo parti žoñinaca, ana zuma kuzziz žoñinaczchucča. Ančhucqui anawalipanž cjisnaquiča. Žoñinaca atajiŃchucča, arajpach Yooz wajtchiz ana luzajo. Ančhucpachaž ana luzza, nižaza pecchi cjenami parti žoñinaczquizimi ana luzkatiŃchucča.

¹⁴ Lii tjaajiŃi maestruncami, nižaza fariseo žoñinaca, ana zuma kuzziz žoñinaczchucča. Ančhucqui anawalipanž cjisnaquiča. Žew maatakanaczquiztan kjuy cusasanaca kjaŃiŃchucča. Jalla nuž paažcumi nii maataka incallzjapa ažka ažka Yoozquin maytažoka payiŃchucča ninacztajapažtakaz. Jalla nuž paatiquiztan ančhucqui juc'anti castictaž cjequiča.

¹⁵ Lii tjaajiŃi maestruncami, fariseo žoñinaca, ana zum kuzziz žoñinaczchucča. Jaziqui ančhucqui anawalipanž cjisnaquiča. Ančhucqui jaknužumi ančuca cutzturumpi jaru žoñinaca ojkkatzkaz pecča. Jalla nuž ojkkatzcuqui ančhucqui nii žoñinaca ančucaquiztan pizc wilta wilta juc'anti anawaliž cjiskatča, infernuquin casticta cjisjapa.

¹⁶ Ančhucqui anawalipanž cjisnaquičha, zur žoñižtakaz irpiñinaca. Ančhucqui cjiñčhuc-
 čha: “Jakziltat timplu tistiwcchiz juramintu paaquiž niiqui, jalla nii juramintuqui anaž
 walčha. Pero jakziltat timplu kor paaz tistiwcchiz juramintu paaquiž niiqui, jalla nii
 juramintuqui walčha”. ¹⁷ Zumzu zur žoñinaca. ¿Jakziltat juc'ant chekanaqui, timpluquin
 žejlñi korinacakaya, už timplupanej? Timpluž cjen nii korinacaqui walčha. ¹⁸ Nižaza
 ančhucqui cjiñčhuczakazza: “Jakziltat timplu altar tistiwcchiz juramintu paaquiž niiqui,
 jalla nii juramintuqui anaž walčha. Pero jakziltat altarquin uchta ofrenda tistiwcchiz
 juramintu paaquiž niiqui jalla nii juramintuqui walčha”. ¹⁹ Zumzu zur žoñinaca. ¿Jakziltat
 juc'ant chekanaqui, ofrendakaya, už altarapanej? Altaraž cjen nii ofrendaqui walčha.
²⁰ Jakziltat altar tistiwcchiz juramintu paaquiž niiqui, nižaza tjapa nii altar juntuñ žejlñi-
 naca tistiwcchiz juramintu paačha. ²¹ Nižaza jakziltat timplu tistiwcchiz juramintu paaquiž
 niiqui, nižaza timpluž Yooz tistiwcchiz juramintu paačha. ²² Nižaza jakziltat arajpach
 tistiwcchiz juramintu paaquiž niiqui, nižaza arajpach Yooz tistiwcchiz juramintu paačha.
 Yoozqui arajpachquin žejlčha, nižaza arajpachquiztan mantičha.

²³ ‘Lii tjaajiñi maestrunaca, nižaza fariseo žoñinaca, ana zum kuzziz žoñinacčhucčha.
 Ančhucqui anawalipanž cjisnaquičha. Ančhucqui diezmos tjaayiñčhucčha mentquiztan,
 anizquiztan, cominquiztan. Jalla nii kolta plantanacquiztan ančhucqui diezmos tjaay-
 iñčhucčha. Pero ančhucqui liiž chekan mantitanac jaru ana kamiñčhucčha. Yooz kuz jaru
 ana kamiñčhucčha, nižaza ana okziñi kuzzizčhucčha; nižaza ana Yoozquin kuzzizčhucčha.
 Jalla nižta chekan lii jaru ana kamiñčhucčha. Jalla nižta jaru kamz waquizičha, diezmos
 tjaacanami. ²⁴ Ančhucqui zur irpiñinaca. Tižta irata paayiñčhucčha. Tsjii žoñiñi kolta
 zmoyalla culchičha ana lujljapa. Jalla nuž cjenami pajk ana wali animala ana culčcu
 lujlchičha. Jalla nižta irata paayiñčhucčha.

²⁵ ‘Liy tjaajiñi maestrunaca, nižaza fariseo žoñinaca, ana zum kuzziz žoñinacčhucčha.
 Anawalipanž cjisnaquičha ančhucqui. Wazumi chuwami zawnctanaqui ajuntaž cjesačha.
 Jalla nuž cjenami kjuyltan cjujchiž cjesačha. Jalla nižtaž ančhucqui. Zawncta curpuqui
 walikaz chercherčha. Ančhuca kuzquiztzi cjujchinacažtakaz žejlčha. Tjañi zaazmi anawali
 paazmi jalla nižta kuzzizčhucčha ančhucqui. ²⁶ Zur fariseo žoñinaca, primiruqui zuma
 kuzziz cjisna ajunta chuwažtakaz; nekztanaqui zuma žoñiž tsijtchizakaz cjequičha.

²⁷ ‘Lii tjaajiñi maestrunaca, nižaza fariseo žoñinaca, ana zum kuzziz žoñinacčhucčha.
 Anawalipanž cjisnaquičha ančhucqui. Chiw ljocžtan tjarta sipulturužtakazza ančhucqui.
 Ančhuca tsitiqui walikazza. Ančhuca kuztzi ana walipančha. Sipultura ticzi žoñinacž
 tsjijnacžtan chjijpsi, nižta ana waličha. ²⁸ Jalla nižtaž ančhucqui. Žoñinacaqui ančhuc zuma
 žoñižtakaz nayčha. Pero ančhuca persun kuzquiztzi juc'ant anawalinaca žejlčha.

²⁹ ‘Lii tjaajiñi maestrunaca, nižaza fariseo žoñinaca, ana zum žoñinacčhucčha. Anawali-
 panž cjisnaquičha. Ančhucqui profetanacž sipulturunaca azquichiñčhucčha, nižaza
 Yooz kuzcama kamñita žoñinacž monumentunaca c'achjalla cjiskatiñčhucčha. ³⁰ Nižaza
 nii zuma žoñinacž puntuquiztan tuž cjiñčhucčha: “Učhum tuquita atchi ejpnacaqui
 anawali kamchičha. Wejrnacqui nii tuqui timpluquiz kamtasaz niiqui, anaž profetanaca
 conzjapa yanaptasačha”. ³¹ Jalla nuž chiican, ančhucpacha chiičha, profeta conñi žoñinacž
 majchmaatičhucčha, nii. ³² Jaknuž ančhuca tuquita atchi ejpnacaqui anawali paatčhaja,
 jalla nižtakaz payiñčhucčha.

³³ ‘Zkoražtakaz žoñinaca. Zkoražta sarchiz žoñinaca. Ančhucqui anapanž wira ati-
 pasačha infiernuquin casticquiztanaqui. Castictapanž cjequičha. ³⁴ Ančhuc juc'ant
 casticta cjisjapa, ančhucaquiz cuchanžcačha profetanaca, nižaza Yooz puntu zuma
 zizñinaca, nižaza Yooz puntu tjaajinñinaca. Jalla nii žoñinaca cuchanžquichiž cjen,
 ančhucžtzi tsjii yekjanaca conaquičha, yekjanaca cruzquiz ch'awcnaquičha, yekjanaca
 ajc kjuyquizpacha wjajtaquičha. Nižaza yekjanaca wajtquiztan watja tanzjapa apz-
 naquičha. ³⁵ Jalla nuž paatiquiztan ančhuca ujnacquiztanami nižaza ančhuca tuquita
 atchi ejpnacž ujnacquiztanami castictaž cjequičha. Ančhuca atchi ejpnacaqui zuma žoñi
 conchičha, Abelquiztanpacha asta Berequías majch Zacarías, jalla niicama. Zacariasqui

timpluquizpacha contatača, altar žcati. ³⁶ Ančhucaquiz weraral cjiwcha. Tjapa nii uj paatanacquiztan casticta cjequičha tii timpuquiz kamñi žoñinacaqui.

JERUSALEN WAJTCHIZ ŽOÑINACŽ PUNTU

³⁷ Nekztan Jesusaqui chiichiča, tuž cjican: Jerusalén wajtchiz žoñinaca, Jerusalén wajtchiz žoñinaca. Profetanaca coničhucča. Nižaza Yooz cuchanžquita profetanaca maztan čhaciñčhucča. Kjaž wilta wejrqui tii žoñinaca juntis pecchinča, cwitisjapa. Jaknužt wallpiquei kjar koztan ozmachanaca cwitičhaja, jalla nižta irata tii žoñinaca cwitis pecchinča. Tii žoñinacazti wira ana nuž cwitiskatz pecchiča. ³⁸ Tii taku nonžna. Ančhuca kjuyanacaqui jaytitaž cjequičha. ³⁹ Ančhucaquiz cjiwča. Tsji noojiquei ančhucqui wejt puntuquiztan chiyauičha, tuž cjican: “Yooz Jilirž tjuuquiz tjonñi, amqui honorchiz cjila”. Jalla nii noojcama ančhucqui ana wejr wilta cheraquičha.

24

JUDIO TIMPLU PUNTU

¹ Nekztanaqui Jesusaqui timpluquiztan ulanchičha. Nekztan niž tjaajnta žoñinacaqui nižžquin macjatžcu, tuž cjichiča:

—Cherzna. Ancha c'achjača tii timplu kjuyanacaqui.

² Jesusaqui kjaaziča, tuž cjican:

—Tjapa tii timplu kjuyanaca zumpacha chernza. Ančhucaquiz weraral cjiwča. Tsji noojiquei tii kjuyanacaqui k'ala pajltaž cjequičha. Ana zinta tii maznaca pirkita želaquičha.

TII MUNTU TUCUZINZ PUNTU

³ Nekztan ninacaqui Olivos cjita curullquin ojkcichiča. Nicju Jesusaž julzi želan, tjaajnta žoñinacaqui nižžquiz jamazit tuž cjichiča:

—Maznalla. ¿Chjulorat nii amiž čhiita wataqui? Nižaza am tjonz siñala, ¿jakziltat cjeequiya? Nižaza tii muntu tucuzinz siñala, ¿jakziltat cjeequiya?

⁴ Nekztanaqui Jesusaqui kjaaziča tuž cjican:

—Ančhucž cwitaza, ana jecmi ančhucaquiz incallskata. ⁵ Muzpa žoñinacaqui wejt tjuužtan tjonaquičha, “Wejrtča Cristutqui” cjican. Jalla nuž chižcu tama žoñinaca incalltaž cjequičha. ⁶ Nižaza ančhucqui quira žejlž quintunaca zizaquičha; nižaza yekja quira quintunaca arawasaquičha. Jalla nuž cjenami anaž tsuca. Nuž watstanča. Imaziča tii muntu tucuzinzqui. ⁷ Nacionpora talznaquičha; nižaza quira paaquičha. Nižaza mach'a želaquičha, nižaza conanaca ojklayaquičha, nižaza walja yoka chekjincan terremotož wataquičha, wacchi yokaran. ⁸ Tjapa tii wattanaqui juc'anti t'akjiz želaquičha.

⁹ Jalla nekztanaqui ančhucqui jilirinacžquiz intirjitaž cjequičha sufriskatzjapa. Nižaza contaž cjequičha ančhucqui. Nižaza ančhucaž wejtquiz criichiž cjen, tjapa ana criichi žoñinacaqui ančhuca quintraž cjequičha. ¹⁰ Jalla nuž watan, muzpa Yoozquin criichi žoñinacaqui quejpsnaquičha. Yoozquin criichi žoñinacž quintra cjisnaquičha, jilirinacžquin intirjizcama. Criichi žoñinacžquiz ancha chjaawjkataquičha nii quejpsñinacaqui. ¹¹ Muzpa toscara chiiñinaca ojklayaquičha, tuž cjican: “Yooziž tjaata takučha tiiqui”. Nii toscar takunacžtan muzpa žoñinacžquiz incallaquičha. ¹² Anawalinacaž miraquičha. Žoñinac-pora ana zuma munasaquičha. ¹³ Jakziltat wejt tjonzcama tjurt'iñi kuziz želačhaja, jalla niiqui ultimquiziqui liwriitaž cjequičha. ¹⁴ Yooziž liwriita žoñinacača Yooz kjuychiz familiaqui. Jalla nii zuma taku tjapa kjutñi tii muntuquiz parlitaž cjequičha, tjapa žoñinaca zizajo. Jalla nii wattanaqui tii muntuquiz tucuzinznaquičha.

¹⁵ Tii zakal cjiwča. Tii puntuquiztan Daniel cjita profetaqui cjjirchiča: “Tsji noojiquei tsji juc'ant ana wali akñi žoñi parizaquičha. Yooz chekan kjuyquinkaz luzaquičha”. (Tii taku liñiqui intintaza.) ¹⁶ Jalla nuž cheržcu Judea yokquin žejlñi žoñinacaqui curunacžquin atipz waquizičha. ¹⁷ Nižaza nuž cheržcu kjuy juntuñ žejlñi žoñinacaqui chjužcu ana kjuya luzla, cusasanaca chjitzjapa. ¹⁸ Nižaza pampiquin žejlñi žoñinacaqui persun zquiti apti ana quejžquila. ¹⁹ Nii tjuñquiziqui ic maatakanacami k'azllu wawchiz maatakanacami ancha t'akjiri želaquičha. ²⁰ Yoozquinča mayiza ančhucqui, anaj zac timpuquin nižtanaca

watsjapa, nižaza anaj jeejz tjuñquiz nižtanaca watsjapa. ²¹Tii sufris timpu juc'anti sufris cjequiča yekja sufrisnacquiztanami. Yooz tii muntu paatiquiztan jecchuc anapanča tižta sufrisnacaqui watchiqui. Nižaza tekžtan najwcchuc anaž iya juc'anti sufrisqui cjequiča. ²²Yoozqui anaž tii sufrisnaca tucuskatasaż niiqui, tjapa žejlñi žoñinacaqui ticznasača. Yoozqui niž illžta žoñinacž laycu nii sufrisnaca tucuskataquiča.

²³Nižaza yekjap žoñinacaqui ančhucaquiz chiyasača, tuž cjican: “Tekziča Cristuqui”. Yekjapac chiyasača, “Nii nacjuča Cristuqui” cjican. Jalla nuž chiyalami anapanča nii taku criyaquiča ančhucqui. ²⁴Incallñi žoñinacž tjonaquiča. Yekjapaqui “Cristučha wejrqui” cjequiča. Yekjapaqui “Yooziž tjaata taku mazniñičha wejrqui” cjequiča. Ninacaqui walja ispančiuca milajrunacž paaquiča, incallžjapa. Tjapa žoñinacž incallž pecaquiča, asta Yooziž illžta žoñinacami. ²⁵Ima tižtanacž tjonan wejrqui ančhucaquiz ultim weralar maznuča, ana incallta cjisjapa. ²⁶Žoñinacaqui “Ch'ekti yokquin cheržquilalla, nicjuča Cristuqui” cjequiča. Jalla nii quintu nonžcu, anapanž okaquiča. Nižaza “Tii kjuyquizza Cristuqui” cjequiča. Jalla nii quintu nonžcu, anapan criyaquiča.

JESUCRISTUQUI WILTA TJONAQUIČHA

²⁷Ančhucaquiz cjiwča. Jalla tižtal irata tjonača wejrqui. Wejrqui tsewctan cuchanžquita Yooz Žoñičha. Jaknužt lliwjlliwjñi tuwantan tajachuc lliwjčhaja, jalla nuž tjonača. ²⁸Jakziquin zerwi žejlčhaja, jalla nekzi zkaranačaż ajcznaquiča.

²⁹Nekztanaqui tii sufris timpu wattan, tjuñiqui zumaquiča; kataquiča, ana iya kjanaquiča. Jiimi nižazakaz ana iya kjanaquiča. Warawaranacami pachquiztan tjojtснаquiča. Nižaza tseec azziz žejlñinacaqui chjekinskattaž cjequiča. ³⁰Jalla nekztanaqui arajpachquin wejt siñalaqui parisaučiča. Wejrqui tsewctan cuchanžquita Yooz Žoñičha. Jalla nuž wejt siñala cheržcu tjapa ana criiči žoñinacaqui kaaquiča. Ninacaqui wejt tjonz cheraquiča. Wejrqui tsjir typiquiz tjonača walja aztan, nižaza Yooz Epiž aziž tjeežcan. ³¹Nižaza wejt anjilanaca cuchanžcača weriž illžta žoñinaca juntjapzjapa, trompeta tjawžcu. Illžtanacaqui tjapa tii muntuquiztanpacha juntaptaž cjequiča.

³²Ančhucqui higuera munti puntuquiztan zizza, jalla tuž. Higuera muntiqui ch'oñnantiz kallantaquiz niiqui, waj kutunz timpuž kallantaquiča. Jalla nii zizza ančhucqui. ³³Jalla nižta irataž tjapa weriž chiita wattan, tii muntuqui waj tucuzinzaquiča. Jalla nuž ančhucaquiz zizkatz pecučha. Jaknužt tsjii žoñiqui kjuy zana žcatžinčhaja, luzjapa, jalla nižta irataž žcatžinčiča tii muntu tucuzinžqui. ³⁴Ančhucaquiz weralar cjiwča. Ima tii timpuquiz kamñi žoñinacž ticznac, tjapa weriž chiitanaca wataquiča. ³⁵Arajpachami tii yok muntumi liwj tucuzaučiča. Wejt takunacazti wiraž ana tucuzaučiča.

³⁶Pero wejt tjonz tjuñimi, wejt tjonz orami anaž jecmi zizasača, anaž arajpach Yooz anjilanacami, anaž Yooz Majchmi. Yooz Ejp alajakaz zizza.

³⁷Jaknužt Noež timpu watčhaja, jalla nuž wataquiča wejt tjonz tjuñquiziqui. ³⁸Noež timpuquiz ima tii muntu kjaztan tuzkatta cjen, žoñinacaqui tuž kamñitača, lujlan, liccan, zalcan, zalzjapa majtnaca tjaacan. Jalla nuž kamñitača Noež warcuquiz luz tjuñicama. ³⁹Kjaz juyzu tjonzcama žoñinacaqui ana čjul tantiyassi žejlčhiča. Nekztan kjaz tjontiquiztan tjappacha žoñinacaqui kjazquiz kuzta ticziča. Jalla nižta irataž wataquiča wejt tjonž tjuñquiziqui. ⁴⁰Jalla nii noojiqui pucultan žoñiqui pampiquin cječhani. Tsjiiqui arajpach kjutñi waytižcu chjitžtaž cjequiča. Tsjiiqui ectaž cjequiča. ⁴¹Nižazakaz pucultan maatakanacaqui jawuncan želáčhani. Tsjaaqui arajpach kjutñi waytižcu chjitžtaž cjequiča. Tsjaaqui ectaž cjequiča.

⁴²Jalla nižtiquiztan ančhucqui walja naynay želaquiča. Čjulorot wejr, am Yooz Jiliri, tjonačhaja, jalla nii ora ana zizzuca. ⁴³Ančhucqui tii zizza. Kjuychiz žoñiqui tjañi tjonz ora ziztasaż niiqui, walja naynay željtasasča, niž kjuya ana tjañiž luzta cjisjapa. ⁴⁴Jalla nižta irataž ančhucqui naynay želaquiča. Tiripintit, ana pinsita orquiz tjonača. Wejrqui tsewctan cuchanžquita Yooz Žoñičha.

PIZC PUNTA PIYUNANACA

⁴⁵ Tsjii kjuychiz žoñiqui piyunanacžquiz kjuya tjisičha, cwtisjapa, nižaza lujl ora čheri tjaazjapa. ¿Jakzilta piyunat zuma cumpliñi, nižaza zuma cwtiñiya? Nii tantiya. ⁴⁶ Jalla tižtaž piyunanacaqui. Kjuychiz žoñiž irantižcan tsjii piyunaqui cwtican žejlchičha, jaknužt cumpjiitažlaja, jalla nuž cumplican žejlchičha. Jalla ničha zuma piyunaqui. Nižaza nii piyunaqui cuntintuž cjequičha. ⁴⁷ Ančhucaquiz weraral cjiwčha. Nii kjuychiz žoñiqui tjapa niiž cusasanaca cumpjiyaquičha nii zuma piyunž kjarquiz. ⁴⁸ Nii kjuy cumpjiita piyunaqui ana zuma cječhaj niiqui, pinsasačha jalla tuž: “Aaaa, wejt patrunaqui ana uri tjonasaka”, cjan cjequičha. ⁴⁹ Jalla nektan parti piyunanacžquiz wjajtasacha. Nižaza ana zum žoñinacžtan cumpant'asačha, lujlcanami liccanami. ⁵⁰ Jalla nuž kaman, nii kjuychiz patrunaqui tiripintitž tjonauquičha, tsjii ana zizta orquiz. ⁵¹ Jalla nektanaqui nii ana zum piyunaqui zuma castictaž cjequičha. Nižaza nii ana zuma piyunaqui chjatkattaž cjequičha. Nižaza infernuquin žejlcan, kaaquičha, nižaza izke kjojaquičha.

25

TUNCA TURKANACŽ QUINTU

¹ Tii zakal chiyučha. Arajpach Yooz mantis puntuqui jalla tužučha. Tunca turtakanacaqui micha tanžcu tsjii zalñi tjowžquin ojkičha. ² Pjijskaltanaqui ima ojkan ana zuma tantiichičha. Tsjii pjijskaltanaqui zuma listu tjaczitačha. ³ Nii pjijskaltan ana zuma tantiitazzi turtakanacžti michaka chjitchičha, ana iya parafina chjitchičha, tsjižtan camzjapaqui. ⁴ Nii pjijskaltan zuma listu ojkhinacaqui wilta camzjapami parafina chjitchičha. ⁵ Nii zalñi tjowaqui ana uri tjonchičha. Jalla nižtiqiztan tjaji tjonkatchičha tjappacha. Nižaza tjajchičha. ⁶ Jalla nektanaqui chica arama kjawñi jora nonzičha, tuž cjan: “Cherzna. Zalñi tjowa tjonžca. Ulanžca nižaza risiwčha”. ⁷ Tjapa nii turtakanacaqui žaazičha, nižaza micha teezjapa tjaczičha. ⁸ Niiž upaquiztanalla nii pjijskaltan ana zuma tantiyazzi turtakanacaqui tsjii pjijskaltan turtakanacžquiz cjichičha, “Parafina tojnalla, wejtnaca parafina upzičha. Nižaza wejtnaca micha tjessa”. ⁹ Pero nii walja tantiitazzi turtakanacaqui tuž kjaazičha: “Ana atchua. Wejtnacaltami ančhucaltami anaž wacasačha. Jalla nižtiqiztan ančhucadž oka, jakziquin parafina tujčaja, jalla nicju. Ančhucaltajapa kjayžca”. ¹⁰ Nii pjijskaltan turtakanacadž parafina kjayi ojktan, zalñi tjowaqui irantižquichičha. Nektan nii tantitazzi turtakanacaqui zalñi tjowžtan kjuyquiz luzzičha, zalz pijsta paazjapa. Jalla nektanaqui kjuya chawczičha. ¹¹ Wiruñauqui nii kjayi ojki turtakanacaqui quejpžquichičha, tuž cjan: “Wejt Jiliri, Wejt Jiliri, cjetznalla, cjetznalla”. ¹² Pero niiqui kjaazičha, tuž cjan: “Ančhuc anal pajučha”.

¹³ Jalla nižtiqiztan Jesusaqui ninacžquiz chiižinchičha tuž cjan:

—Anchucqui walja zuma listu tjacziz cjequičha. Wejt tjonz tjuñi orami ana zizza.

TJAATA PAAZNACA QUINTU

¹⁴ Arajpach Yooz kamañauqui jalla tužučha. Tsjii žoñiqui jicžquin ojkc cjen, niiž piyunanaca kjawzičha. Piyunanacžquiz paaz tjiižičha.

¹⁵ Tsjii tsjižquiz pjijska warank paaznaca tjaachičha. Tsjižquiz paa warank paaznaca tjaachičha. Tsjižquiz tsjii warank paaznaca tjaachičha. Zapa maynižquiz ninacž negocio paaz atñi jama tjaachičha. Jalla nektanaqui ojkičha. ¹⁶ Nii tsjii pjijska warank paaznaca tanzñi piyunaqui paaztan negocio paachičha. Jalla nuž paažcu tsjii pjijska warank paaznacžtan canchičha. ¹⁷ Nižazakaz nii tsjii paa warank paaznaca tanzñi piyunaqui paaztan negocio paachičha. Jalla nuž paažcu tsjii paa warank paaznacžtan canchizakazza. ¹⁸ Nii tsjii warankalla paaznaca tanzñi piyunazti patrunž paaz chjozičha. Yokquiz ojt jwetžcu, jalla nekc chjozičha.

¹⁹ Ažktan niiž wiruñ nii paaz kajñi patrunaqui quejpžquichičha. Jalla nektanaqui piyunanacžquiztan kaja cobrichičha. ²⁰ Primiruqui nii tsjii pjijska warank paaznaca tanzñiqui tjonchičha. Jalla niiqui patrunžquiz paaznaca intirjichičha, tuž cjan: “Wejt Jiliri, wejtquiz pjijska warank paaznaca tjaachamčha. Nii paaztan trabajžcu, iya pjijsk warank paaztan canchinčha. Jalla tičha amiž tjaatami nižaza weriž cantami”. ²¹ Patrunaqui

niižquiz cjichiča: “Walikazza. Amqui ancha zuma piyunamča. Zuma trabajchamča. Zkoluc paaz zuma trabajtiquiztan, jaziqui juc'anti paaznaca amquiz cumpjiyača”. Nižaza cjichiča: “Luzca. Wejttan chica chjipzna. Cuntintum cjee”.²² Jalla niž wiruñ nii tsjii paa warank paaznaca tanzñi piyunaqui tjonchiča, tuž cjican: “Wejt Jiliri. Wejtquiz paa warank paaznaca tjaachamča. Iya tsjii paa warank paaztan canchinča. Jalla tiicha amiž tjaatami nižaza weriž cantami”.²³ Niiž patruaqui nižquin cjichiča: “Walikazza. Amqui ancha zuma piyunamča. Zuma trabajchamča. Zkoluc paaz zuma trabajtiquiztan, jaziqui juc'anti paaznaca amquiz cumpjiyača”. Nižaza cjichiča: “Luzca. Wejttan chica chjipzna. Cuntintum cjee”.²⁴ Pero nekztan nii tsjii warank paaznaca tanzñi piyunaqui tjonchiča. Niiqui patruñquiz cjichiča: “Wejt Jiliri. Amqui c'ar patruamča. Jalla nii zizzatuča. Amqui ana čjulumi paažcumi canñamča. Nižaza ana čjacžcumi, ajžñamča.”²⁵ Jalla nižtiquiztan ekzinča, nižaza ojžcu am paaznaca yokquiz chjojchinča. Pero tekziž am paazqui”.²⁶ Patruaqui nii piyunžquiz tuž kjaaziča: “Ana zum piyuna. Jayri piyuna. Wejrqui ana čjacžcu ajžñinpanča, nižaza ana čjulumi paažcu caniñpanča. Jalla nižtapanim zizla amqui.”²⁷ Jalla nižtiquiztan wejt paaz bancuquiz mekaz uchanchucataž, jalla. Jalla nuž paatasaj niiqui, wejrqui quejpžcu bancuquiztan paaz majchtanpacha ricujtasacha”.²⁸ Jalla nekztanaqui nii patruaqui nekiž žejlñi žoñinacžquiz cjichiča: “Tii piyunžquiztan nii warank paaznaca kjaña. Nii tunca warank paaznacchiz piyunžquiz tjaa.”²⁹ Jakziltat želinchižlaja, jalla niižquiz iya tjaataž cjequiča, jilacama. Nižaza jakziltat zkoluc želinchižlaja, nižaza ana zuma trabajchižlaja, jalla niižquiztan tjappacha kjañtaž cjequiča.³⁰ Tii ana zum piyuna chjatkata, zawncta zumchiquin. Jalla nicju kaaquiča, nižaza izke kjojaquiča”.

ŽOÑINACA PJALŽTAŽ CJEQUIČHA

³¹ Wejrqui tsewtan cuchanžquita Yooz žoñiča. Tsjii noojiqui wejrqui wilta tjonacha, wejt azi tjeečan. Rey cjita Jiliri cjeeča. Tjapa wejt anjilnacžtanpacha tjonacha. Poderchiz tjonacha žoñinaca pjalzjapa. Tsjan chekan juez Jiliritča wejrqui.³² Wejt yujcquin tjapa tii muntuquiz kamañi žoñinaca juntjaptaž cjequiča. Jalla nekztanaqui wejrqui ninaca pjalznača, jaknužt tsjii awatiriqui uua yekja nižaza cabra yekja pjalznačhaja, jalla nuž.³³ Pjalžcu uuzanacaqui žew latuquiz cjequiča, cabranacazti zkar latuquiz cjequiča.³⁴ Wejrtča chekan juez jiliritqui. Nekztanaqui wejt žew latu pjalžtanacžquiz tuž cjeeča: “Wejt Epiž k'aachita žoñinaca, pichalla ančhucalta tjaczta kamaña tanzjapa. Tii muntu paata ora, niwjctanpacha ančhucalta nii kamaña tjacztača, Yooztan kamzjapa, nii kjuychiz familia cjisjapa”.³⁵ Nižaza cjeeča, “Ančhucqui zamanaca paachinčhucča. Weriz čjheri eecsiž cjen, ančhucqui wejtquiz čjheri tjaachinčhucča. Nižaza weriz kjaz pecan, ančhucqui wejtquiz kjaz onanchinčhucča. Nižaza yekja yokquin ojklayan, ančhucqui wejtquiz tjajz kjuyquiz kjawzinčhucča.”³⁶ Weriz ana zquitchiz cjen ančhucqui zquiti onanchinčhucča. Nižaza laaquiči cjen, wejtquin tjonzinčhucča. Nižaza carsilquiz chajwcta cjen, ančhucqui wejtquin cherzñi tjonchinčhucča”.³⁷ Jalla nekztanaqui zuma kamañchiz žoñinacqui wejtquin cjequiča: “Wejt Jiliri, žčjulora am čjheri eecsi cherchintaya? Nižaza čjheri lujlzjapa, žčjulora onanchintaya? žčjulora am kjaz pecan, onanchintaya?”³⁸ žčjulora am yekja yokquin ojklayan tjajz kjuyquiz kjawzintaya? žčjulora am ana zquitchiz cjen, zquiti onanchintaya?³⁹ Nižaza žčjulora am laaquiči cjen, tjonzintaya? žčjulora am carsilquiz cjen, amquin tjonzintaya?”⁴⁰ Jalla nekztanaqui zuma kamañchiz žoñinacžquiz kjaaznača, tuž cjican: “Anchucaquiz weraral cjiwča. Wejrtča chekan juez Jiliritqui. Čjulora wejt jilnacžquiz yanapčhaja, humilde jilanacž cjenami, jalla niiqui wejtquiztakaz yanapchinčhucča”. Nuž chiyacha pjalz tjuñquiz.

⁴¹ Jalla nekztanaqui wejrqui, chawc juez Jiliri cjican, nii zkar latu pjalžtanacžquiz cjeeča: “Ančhucqui, Yoozqui ančuca quintrača. Jaziqui wejtquiztanž infiernuquin oka. Diablužtami niž anjilnacžtami tjacztača nii infiernuquin. Ančhucqui zakaz nii infiernuquin

wiñaya sufraquiĉha. ⁴² Weriz ĉheriž eecsiž cjen, anĉhucqui ana wejtquiz ĉheri onanchinĉhucĉha. Weriz kjaz pecan, anĉhucqui ana wejtquiz kjaz onanchinĉhucĉha. ⁴³ Weriz yekja yokquin ojklayan, ana tjajz kjuyquiz kjawzinĉhucĉha. Weriz ana zquitĉhiz cjen, ana zquiti onanchinĉhucĉha. Weriz laa cjen, nižaza carsilquiz cjen, anĉhucqui ana wejr cheržni tjonzinĉhucĉha”. ⁴⁴ Jalla nektanaqui ninacaqui cjequiĉha: “Wejt Jiliri, ĉĉjulora am ĉheri eecsi cjen, kjaz pecchi cjenami, yekja yokquin ojklaychi cjen, ana zquitĉhiz cjen, laa cjen, carsilquiz chawcta cjen, jalla ĉjulora am nižta cherĉhinta? Nižta cherĉhinta, yanaptasaĉha”. ⁴⁵ Jalla nektanaqui wejrqui, chawc juez Jiliri cjican, ninacžquiz kjaaznaĉha, tuž cjican: “Anĉhucquiz weraral cjiwĉha. ĉĉjulora wejt jilanacžquiz humilde cjenami ana yanapĉhizlaja, wejtquitzakaz ana yanapĉhizlaja”. ⁴⁶ Jalla nektanaqui nii ana zuma kamaĉhiz žoñinacaqui infiernuquin cuchantaž cjequiĉha, wiñaya castica cjisjapa. Nii zuma kamaĉhiz žoñinacazti Yooztan chica wiñaya kamzjapa okaquiĉha.

26

JESUSA TANZ TANTIITA

¹ Tjappacha nii chiiĉhina žeržcu, Jesusaqui niž tjaajinta žoñinacžquiz cjichiĉha:

² —Anĉhucqui zizza, puc majĉha pascua pjijsaqui. Jalla nii pjijsa ora wejrqui intirjital cjeĉĉha cruzquiz ch'awcta cjisjapa. —Jalla nuž cjichiĉha Jesusaqui.

³ Jalla nii oraqui timplu jilirinacami, liy tjaajiñi maestrunacami judío wajtĉhiz jilirinacami ajcziĉha, Caifás jilirž kjuy patiuquiz. Caifás cjitaqui timplu jilirinacžquiztan chawc jiliritaĉha. ⁴ Jalla nicju ninacaqui palt'ichiĉha, nižaza kazziĉha mañžtan Jesusa tanzjapa. Jalla nuž tanžcu, Jesusa conzjapa kazziĉha. ⁵ Nuž kazcu tuž cjichiĉha:

—Pjijsa paan Jesusa tanz anaž cjichuca. Žoñinacaqui aptjapznasaĉha.

JESUSIŽ ACHQUIZ ASIITI ALZTA

⁶ Jesusaqui Betania wajtquiz želatĉha, Simonž kjuyquiz. Niiž tuquiqui Simonaqui janchi mojkĉi laataĉha. ⁷ Jalla nekž želan, tsjaa maatak žonqui Jesusižquiz macjatžquichinĉha. Naaqui tsjii putilla ĉhjtĉhinĉha. Nii putillquiz cuza mazk'a ulurchiz asiiti želatĉha, anĉha jila walurchiz. Nii putilltaĉha zuma alabastro cjita maztan paataqui. Jesusa mizquiz želan naa maatak žonqui niž achquiz zuma asiiti alžinĉhinĉha. ⁸ Niiž tjaajintanaqui nii cheržcu, žawjziĉha, naa žoña quintra. Jalla nekžtan tuž cjichiĉha:

—ĉKjažtiquiztan tii walurchiz asiiti pertejo? ⁹ Jalla tiiqui antis tuchucataĉha walja jiluñ, nižaza pori žoñinacžquiz yanapzjapa.

¹⁰ Jesusaqui nii chiiñi nonžcu tjaajintanačžquiz ujziĉha:

—ĉKjažtiquiztan taa žonatan ĉhjjcisejo? Anaĉha taa žon kjaž cjisqui. Jalla tuž taa žoñaž paataqui wejtquiztan walikazza. ¹¹ Porinacžquiz yanapz pecaquiž niiqui, porinacaqui anĉhucatan panž želaquiĉha. Wejrzi anĉhucatan ana željztanpanĉha. ¹² Jalla taa maatak žoñqui wejtquiz tii zuma ulurchiz asiiti alžinžcu, wejt curpu tjaczinĉha, tjatta cjisjapa.

¹³ Anĉhucquiz weraral cjiwĉha. Jakziquinami tii muntuquiziqui liwriñi Yooz taku parlita cjeĉhaja, jalla nižtazakaz taa maatak žonaž paataqui parlita zakaz cjequiĉha, jalla naaquiztan cjuñta cjisjapa.

JUDASQUI JESUS TARAZUNAQUIĉHA

¹⁴ Tuncapan illzta žoñinacžquiztan tsjiiqui Judas Iscariote cjitataĉha. Jalla niiqui ojĉhiĉha timplu jilirinacžtan parli. ¹⁵ Jalla nuž parlican cjichiĉha:

—Anĉhucquiz Jesusal intirjasaž niiqui, anĉhucqui ĉkjaž paaz pacas?

Jalla nii orapacha quinsa tunc paaznaca Judasquiz pacĉhiĉha. ¹⁶ Jalla nužquiz Judasqui ĉĉjulorat Jesusa tankatĉhuca cjeĉhaja, jalla nii ora walja kjurchiĉha.

SANTA CENA PAACHIĉHA

¹⁷ Jalla nektanaqui ana liwaturžtan t'anta lujlz pjijsa, jalla nii pjijsaž primir tjuñquiz tjaajinta žoñinacaqui Jesusižquin macjatžcu tuž pewcziĉha:

—ĉJakziquin wejrnaqui tjaczni ojĉ pecya, pascu ĉheri lujlzjapaya?

¹⁸ Jesusaqui tuž kjaaziĉha:

—Watja oka. Tsjii zoñžtan zalaquiča. Niižquiz cjee, “Maestruqui ž-cjiča. ‘Wejt ticz ora wajillača. Am kjuyquiz pascua pjijzta paača wejt tjaajinta zoñnacžtan’ ”.

¹⁹ Nekztanaqui Jesusaž mantitacama ojkchiča. Nii tokinz'tita kjuyquiz pascu čhjeri tjacziča.

²⁰ Weenjapa cjistan Jesusaqui nii kjuyquiz žejlcan mizquiz julziča niiž tuncapan tjaajinta zoñnacžtan. ²¹ Jalla nuž čhjeri lujlcan, ninacžquiz cjichiča:

—Ančhucaquiz weraral cjiwča. Tsjii tsjii ančhucqui wejt quintra paaquiča, nižaza tarazunaquiča.

²² Jalla nuž chiitiquiztan tjaajinta zoñnacqui walja llaquita cjissiča. Jalla nekztan ninacaqui tsjiiza tsjiiza pewcziča, tuž cjican:

—Wejt Jiliri, žwejr cjesajo?

²³ Nekztanaqui Jesusaqui tuž kjaaziča:

—Anziqui wejtan chicaž tii chuwquiztan lujlča nii tarazunni zoñiqui. ²⁴ Wejrqui tsewctan cuchanžquita Yooz Zoñtča. Jaknužt cjiirta Yooz takuqui cjičhaja, jalla niicama okača. Nii tarazunni zoñiqui anaj maa pjuchquiztan nastčhaja, waliz cjitasacha niižtaqui. Wejr tarazuntiquiztan wali chawc ujchiz cjequiča.

²⁵ Jalla nekztanaqui Judasqui, nii tarazunni zoñiqui, tuž cjichiča:

—Maestro, žwejr cjesajo?

Jesusaqui tuž kjaaziča:

—Jesalla, amchiya.

²⁶ Jalla nuž pascua čhjeri lujlcan Jesusaqui niiž persun kjaržtan t'anta tanziča. Nekztan Yooz Ejpžquin gracias cjican tjaazcu, t'anta kjolziča. Jalla nuž kjolžcu, niiž tjaajinta zoñnacžquiz tjaachiča, tuž cjican:

—Lujlzna. Jalla tiiča wejt curpu cuntaqui.

²⁷ Jalla nekztan persun kjaržtan tsjii wazu tanziča. Yooz Epžquin gracias cjican tjaachizakazza. Nekztan tjaajinta zoñnacžquin čhjalžcu zapa mayni licchiča. Jalla nuž čhjalžcu, tuž cjichiča:

—Tii wazquiztan tjapa ančhucqui liczna. ²⁸ Wejt ljocquiztanž cjiča tiiqui. Wejt ljocžtan tsjii ew acta tjulžtaž cjequiča. Wacchi zoñnacž laycu wejt ljocqui tjawktaž cjequiča ninacž uj pertunta cjsjapa. ²⁹ Wejr cjiwča. Uwas kjaz ana iya licača, čhjulorcama wejt Yooz Ejp tjapa mantačhaja, jalla nekztan ančhucatan wilta uwas kjaz licača.

TJAAJINTA ŽOÑINACAQUI WICHANZNAQUIČHA

³⁰ Nekztan Yooz wirzu itzcu, Olivos cjita curulla ojkchiča. ³¹ Jalla nekztanaqui Jesusaqui niiž tjaajinta zoñnacžquiz tuž cjichiča:

—Jalla tii weenqui tantal cjeeča. Nekztan tjapa ančhucqui ana wejtquin kuzziz tucaquiča. Jalla nuzpan cjiirta Yooz takuqui cjiča: “Uza awatiri contanaqui uuzanacaqui wichanznaquiča”. ³² Wejr jacatatžcuqui ančhuca tuqui okayača Galilea cjita yoka.

³³ Nekztanaqui Pedruqui cjichiča:

—Tjappacha ana amquin kuzziz tucačhani. Wejrzi ana wira niža cjesača.

³⁴ Jalla nuž chiitiquiztan Jesusaqui tuž kjaaziča:

—Amquj weraral cjiwča. Jalla tii weenpacha čhjep wilta amqui ana wejr pajni chiican k'otaquiča, ima wallpaž kjawan.

³⁵ Nekztan Pedruqui Jesusižquiz kjaaziča, tuž cjican:

—Wejrqui amtan chicami waztal ticznasača. Anapan amquiztan k'otasača.

Nižaza tjapa nii tjaajintanaqui tsjiika chiichiča.

JESUSAQUI GETSEMANI CJITA YOKQUINČHA

³⁶ Jalla nekztan Jesusaqui niiž tjaajintanacžtan Getsemaní cjita yoka irantichiča. Jalla niwjc irantižcu, ninacžquiz cjichiča:

—Tekz julzna ančhucqui. Wejrqui nii nawcju Yooz Ejpžtan parli okača.

³⁷ Jalla nekztan Pedružtan nižaza Zebedeož pucultan majchnacžtan chjitchiĉha. Nekztanaqui Jesusaqui kuzquiz walja llaquisatĉha, nižaza anĉaž llactazatĉha. ³⁸ Jalla nižtiqiztan Jesusaqui nii ĉjepultan chjichta tjaajintanacžquiziqui cjichiĉha:

—Wejt kuzqui anĉa llaquissa, ticzmayaĉha. Anĉhucqui tekzi žela. Wilaquiĉha, anaĉha tjajaquiĉha.

³⁹ Jalla nekztanaqui Jesusaqui tsjii koluc nawjĉhuc ojkcĉiĉha. Yokquizkaz tuzi t'okžcu Yoozquin mayizichiĉha, tuž cjican:

—Wejt Yooz Ejp. Tii juc'ant sufris timpu anal watz pecuĉha. Tii sufrisquiztan liwriichucažlaj niiqui, amqui wejr liwriyalla. Pero anal wejt kuzcama cjis pecuĉha. Antiz jaknužt am kuz amtiĉhaja, am munañpakaj cjila.

⁴⁰ Jalla nekztanaqui tjaajintanacžquin quejpžquichiĉha. Tjajchi zalchiĉha. Jaziqui Jesusaqui Pedružquiz cjichiĉha:

—ĴAnĉhucqui anapanz wejtta tsjii orami wilasi atya? ⁴¹ Tjaji watzi žela, nižaza wilazaquiĉha. Yoozquin mayizaquiĉha, ana ujquiz tjojtsjapa. Chekapan, anĉhuc kuzqui wilasaĉha. Pero anĉhuc curpuzti anaž awantasaĉha.

⁴² Nekztan Jesusaqui wilta Yooztan parli ojkcĉiĉha. Tuž cjican, mayizichiĉha:

—Wejt Yooz Ejp, tii sufrisquiztan ana liwriita cjichucažlaj niiqui, am kuz munañpakaj cjila.

⁴³ Nekztan wilta tjaajintanacžquin quejpžcu tjajchi zalchiĉha. Anĉa tjaji tjonatĉha.

⁴⁴ Ĵjepquiziqui wilta ninacžquiztan ojkcĉiĉha, Yooz Ejpžquin parli. Primiru jaknužt parliĉhaja, jalla nuž zakaz parliĉiĉha. ⁴⁵ Jalla nekztanaqui tjaajintanacžquin quejpĉiĉha. Ninacžquin paljayĉiĉha, tuž cjican:

—Jaziqui tjajĉinĉhucĉha anĉhucqui, nižaza jeejzinĉhucĉha. Nužukazza. Wejrqui ujchiz žoñinacž kjarquiz intirjital cjeeĉha. ⁴⁶ Žaazna. Ojkla. Wejr tankatni žoñiqui nii najwcž tjonĉha.

JESUSA PRESO CHJICHTA

⁴⁷ Jesusa nuž ĉiyan, Judasqui irantižquichiĉha. Niitaĉha Jesusiž tuncapan illta žoñinacžquiztanqui. Judastan tama žoñinacaqui tjonĉiĉha pajk cuchillunacĉiz, nižaza wjajtz carotinacĉiz. Timplu jilirinacami wajt jilirinacami ninaca cuĉhanžquichiĉha.

⁴⁸ Tarazunni Judasqui niiz tuquilla nii žoñinacžtan kazzitaĉha, tuž cjican:

—Wejrqui nii žoñiquiz ĉjulznaĉha. Jalla niiz cjequiĉha nii žoñiqui. Jalla nekztan zuma tanžcu ĉjichaquiĉha.

⁴⁹ Jalla nuž kazcu Judasqui Jesusižquiz macjatchiĉha, tuž cjican:

—Tjaajiñi Maestru, Ĵwalikazkay?

Jalla nuž tsaanžcu, ĉjulziĉha. ⁵⁰ Jesusaqui niizquiz kjaaziĉha, tuž cjican:

—Jila, Ĵĉjulquin am tjonjo?

Jalla nekztanaqui žoñinacaqui žcatžinžquichiĉha, nižaza preso ĉjichi tanchiĉha.

⁵¹ Jalla nuž paan, tsjii tsjii Jesusiž tjaajinta žoñiqui pajk cuchillu joožcu, quintri žoñž cjuñi ĉhjajtžinĉiĉha. Nii cjuñi ĉhjajtžinta žoñiqui timplu jilirž piyunataĉha. ⁵² Jalla nekztan Jesusaqui tuž cjichiĉha:

—Am pajk cuchillu ĉhjozna, nii cuchill ĉhjozquiz. Jakziltat pajk cuchillu joojooĉhaja, jalla ninacaqui pajk cuchillžtan conta zakaz cjequiĉha. ⁵³ Wejt Yooz Ejpžquiztan mayasaĉha, wejtquiz yanapžjapa. Jalla nuž maytiquiztan wejt Yooz Ejpqui anzpĉaž wacĉi anjilanaca cuĉhanžcasaĉha, tuncapan walja tama eješitonacacama. ĴNii ana zizya? ⁵⁴ Pero jalla nižta anal mayaĉha. Jalla tižta watstanĉha, jaknužt ĉjijrta Yooz taku ĉhiĉhaja, jalla nii cumplistanĉha.

⁵⁵ Jalla nekztanaqui Jesusaqui nii tjonĉi žoñinacžquiz cjichiĉha:

—Anĉhucqui pajk cuchillunacžtan wjajtz carotinacžtan wejr tani tjonĉinĉhucĉha, wejr tjañi ĉjes, nižtažtakaz. ĴKjažtiquiztan nižta tjonĉinĉhucĉta? Zapurupan anĉhucatan žejlĉinĉha, timpluquiz tjaajincan. Jalla nii oranacaqui anaž wejr tanchinĉhucĉha. ⁵⁶ Tjapa tii watñinacaqui jaknužt tuqita profetanacaž ĉjijrtĉhaja, jalla niit jama cumplistanĉha.

Jalla nekztanaqui tjapa Jesusiž tjaajinta žoñinacaqui tsucaña wichanziĉha. Jesusa zinalla ecĉiĉha.

CHAWC JILIRINACŽ YUJCQUIN CHJICHTA

⁵⁷ Jalla nii Jesusa tanñi žoñinacaqui Caifás cjita jiliržquin chjitchičha. Caifasqui timplu jilirinacž chawc jiliritačha. Caifás kjuyquin liy tjaajiñi maestruncami wajt jilirinacami ajczitačha. ⁵⁸ Pedruqui nii chawc jilirž kjuy patiucoma apzičha ažquiztanalla. Nii patiuquin luzcu, julzi želatčha wijilñi policianacžtan. Jaknužt Jesusa watchaja, jalla nii chertzjapa želatčha.

⁵⁹ Timplu jilirinacami, wajt jilirinacami, tjapa mantiñi jilirinacami Jesusiž quintra uj jwes pecatčha, toscaraž cjenauqi, conkatzjapa. ⁶⁰ Wacchi žoñinacami toscar tawkžtan prisintižquichičha Jesusiž quintra uj tjojtunzjapa. Pero ana čjul uj jwesi atchičha. Ultimiquiziqui pucultan toscar tisticunacaqui apantižquichičha, ⁶¹ tuž cjican:

—Tii žoñiqui cjiñičha, “Yooz timplu t'ezinžu, čhjep majqu wital tsijtsnasačha”.

⁶² Jalla nektanaqui timplu chawc jiliriqi tsijtsičha. Jesusižquiz cjichičha:

¿Kjažtiquiztan am ana kjaazjo? ¿Kjaž cjican tii žoñinacaqui am quintra chiijo?

⁶³ Jalla nuž chiižinanami Jesusaqui ch'uju žejlčičha. Jalla nektanaqui nii timplu chawc jiliriqi nižquiz cjichizakazza:

—Žejtñi Yooz tjuuquiz am juramintu paakatačha, werara chiizjapa. Mazna. ¿Amqui Cristumkaya? ¿Nižaza Yooz Majchpanikaya?

⁶⁴ Jesusaqui kjaazičha, tuž cjican:

—Wejrčhay. Amqui jaknužum chiičhaja, jalla nužučha. Wejr zakal ančhucquiz cjeečha. Wejrqi tsewctan cuchanžquita Yooz žoñtčha. Tsjii noojiqui ančhucqui wejr cheraquičha, juc'anti azziz Yooz žew latuquiz julzi. Nižaza arajpachquiztan tsjir tapyquiz wila tjonačha.

⁶⁵ Jalla nuž kjaaztiquiztan timplu chawc jiliriqi niž persun zquiti wjajržinčičha, žawjchi kjanapacha tjeezjapa. Nižaza cjichičha:

—Tii žoñiqui persun tawkžtan Yooz quintra chiichičha. ¿Kjažt iya tisticunaca pecznasajo? Ančhucpacha tiiž ana wal takunaca nonzinčhucčha. ⁶⁶ ¿Kjažtat cjees?

Ninacaqui kjaazičha, tuž cjican:

—Tiiqi ujchizpančha. Paj ticzla.

⁶⁷ Jalla nektanaqui Jesusiž yujcquiz llawzižtan tjujti kallantichičha, nižaza wjajtchičha. Partinacaqui yujcquiz čhajczičha, ⁶⁸ tuž cjican:

—Amqui Cristumžlaj niiqui, jazic ¿jequit am čhajcjo? Jalla nii pajalla.

PEDRUQUI K'OTCHIČHA

⁶⁹ Nii ora Pedruqui zancu kjuy patiuquin julzi želatčha. Nekz želan tsjaa piyuniqi nižquiz macjatžcu paljaychinčha, tuž cjican:

—Amqui ojklajñamla nii Galilea yokchiz Jesusižtan, ¿ana jaa?

⁷⁰ Pedruqui parti žoñinacž yujcquiz k'otchičha, tuž cjican:

—Čjulquiztankam chiičhani, anal intintazučha.

⁷¹ Nektanaqui Pedruqui zan kjutñi žcatžinčičha. Nektan tsjaa piyuniqi nii cheržcu parti žoñinacžquiz cjichinčha:

—Tii žoñipan ojklayatla tii Nazaret wajtchiz Jesusižtan chica.

⁷² Pedruqui wila k'otchičha. Juramintužtan tuž cjichičha:

—Nii žoñi anapan pajučha.

⁷³ Jalla niž upaquiztan nekz žejlñi žoñinacaqui Pedružquiz macjatžcu, cjichizakazza:

—Chekapan, amqui zakaz Jesusiž parti žoñinacžtan chica ojklajñamla. Am takuqi kjanapachala, ninacaž takukam chila.

⁷⁴ Nektanaqui Pedruqui wila k'otchičha, juramintu paacan.

—Anapal nii žoñi pajučha. Toscana chiičinžlaj niiqui, Yooz wejr casticačhani. —Nuž cjichičha Pedruqui. Jalla nii orapacha tsjii wallpi jora kjawchičha. ⁷⁵ Jalla nii wallpa kjawñi nonžcu, Pedruqui Jesusiž chiita taku cjuñzičha. Niiž tuquiqui Jesusaqui cjichičha: “Ima wallpaž kjawan, čhejp wila amqui ana wejr pajñi chiican k'otaquičha”. Jalla nuž cjuñžcu Pedruqui nektan ulanchičha. Nižaza walja kuzquiz sint'ican kaachičha.

27

JESUSAQUI CHAWC JILIRIŽQUIN CHJICHTA

¹Kjanžqitan tjapa timplu jilirinacami, wajtchiz jilirinacami tsjii acuerduquiz luzziča Jesusa conkatzjapa. ²Jalla nekztan Jesusa chejlžcu chjitchičha Poncio Pilato cjita chawc jiliriržquin. Nii oraqui naciona mantiñi gubernutača Pilatuqui.

JUDASQUI TICZIČHA

³Jesusa tarazunñi Judasqui Jesusa conata cheržcu, kuzquiz walja sint'ichiča. Jalla nuž sint'ižcu nii quinsa tunc tjaata paaz tjepunchičha timplu jilirinacžquizimi wajtchiz jilirinacžquizimi. ⁴Paaz tjepunžcu, tuž cjichiča:

—Wejr uj paachinča. Ana čjul ujchiz žoñi tarazunchinča.

Ninacazti niižquiz tuž kjaaziča:

—Jalla niiqui, žčjul importejo wejtnacaquiztanajo? Niiqui amtakazza.

⁵Jalla nekztanaqui Judasqui timpluquinpacha nii paaz tjojtunchičha. Nekztan ojkchiča. Persunpacha jora mokžcu, tsjijscu ticziča.

⁶Nektanaqui timplu jilirinacaqui paaz ricujžcu, tuž cjichiča:

—Tii paazqui anaž učhumqui ofrend cajquiz uhasača. Tiiča žoñž ljok kajayta paazqui.

⁷Nektanaqui ninacaqui kazziča nii paaztan yoka kajayzjapa. Nii yokaqui Campo del Alfarero nižta cjita tjuuchiztača. Yekja wajtchiz ticzi žoñinaca tjazjapatača nii yokaqui.

⁸Nužquiz tii timpucama nii yokž tsjii tjuuqui Campo de Sangre cjitazakaztača. ⁹Jalla nuž Jeremías profetž takuqui cumplissiča. Tuqui timpu Jeremiasqui cjiyrchiča, tuž cjan: “Israel žoñinacaqui nii žoñi tankatz precio utchiča, quinsa tunc paaznaca, jalla nii. ¹⁰Nii quinsa tunc paaznacžtan Campo del Alfarero cjita yoka kjayaquiča, jaknužž Yooz Jilirirž mantičhaja, jalla nuž”.

JESUSAQUI CHAWC JILIRIŽ YUJCQUIN ŽEJLČHA

¹¹Nektanaqui Jesusaqui naciona mantiñi chawc jiliriržquin chjichtatača. Nii mantiñi jiliriqui Jesusižquiz tuž pewcziča:

—žAmqui judionacž chawc jilirimkaya?

Jesusaqui tuž kjaaziča:

—Am jaknužžum chiičhaja, nužuča.

¹²Timplu jilirinacami wajtchiz jilirinacami, jalla ninacaž uj tjojtuntan, Jesusaqui anaž čjulumi kjaaziča. ¹³Jalla nekztanaqui Pilato jiliriqui tuž cjichiča:

—žAnam am kjaaznaquiya tjapa tii am quintra chiyanauqui?

¹⁴Jesusažti jalla nuž chiyanami ana čjulumi kjaaziča. Jalla nižtiquiztan nii mantiñi chawc jiliriqui ispantichiča. Ana čjul pinsimi atchiča.

¹⁵Jalla nii pascu pijjztiquiz Pilato chawc jiliriqui tsjii cuzturumpichiztača. Tsjii priz žoñiqui cutzpanikaztača žoñinacaž chiitacama. ¹⁶Tsjii ana wal žoñiqui Barrabás cjita prisu zakaztača. ¹⁷Žoñinaca ajcziž cjen Pilatuqui ninacžquiz pewcziča, tuž cjan:

—žJakzilta tii tanta žoñinacat liwrii cutžta cjeequi? žBarrabás cjeequi? už žJesús, Cristo cjita cjeeja?

¹⁸Pilato jiliriqui zizziča, Jesusa chjaawjcu judío žoñinacaqui nii intirjichiča, jalla nii.

¹⁹Pilatuqui niiz jusjiis mizquiz julzi želatča. Jalla nicju želan niiz tjunqui tsjii žoñi mažni cuchanžquichinča. Nii mažni žoñiqui tuž chiichiča: “Am tjun cjiča: ‘Nii zuma žoñžquiz ana mitisaquiča. Nii žoñiž cjen tižwan juc'ant ana wali čjuuzinča. Nii žoñžquiz ana mitis waquiziča’”.

²⁰Pero timplu jilirinacami wajtchiz jilirinacami, nii žejlñi žoñinacžquiz intin-tiskatchičha, Barrabás cutzna cjeyajo, nižaza Jesusa contaj cjila cjeyajo. ²¹Jalla nekztanaqui nii mantiñi jiliriqui wilta žoñinacžquiz pewcziča, tuž cjan:

—žJakzilta pirit tii pucultan tantanacquiztan liwrii cutznaqui?

Žoñinacaqui kjaaziča, tuž cjan:

—Barrabás cutzna.

²²Pilato jiliriqui wilta ninacžquiz pewcziča, tuž cjan:

—Tii Cristo cjita Jesusižquiz, ħċhjulut wejr paa-aqui?

Tjappacha nii žoñinacaqui kjaaziċha, tuž cjican:

—ġCruzquiz ch'awczna!

²³Nekztanaqui Pilato jiliriqui cjichiċha:

—ħĊhjul uj paachi teejo?

Nii žoñinacazti juc'anti kjawchiċha:

—ġCruzquizka ch'awczna! —cjican.

²⁴Jalla nektanaqui Pilato jiliriqui naychiċha, nii žoñinaca ana intintiskatchuca. Nii žoñinacaqui walja žawjchiž ch'ajrapatċha. Jalla nektanaqui Pilato jiliriqui kjaz zjijck-atċhiċha. Nii zjijċta kjazquiz kjara awjziċha žoñinacž yujcquiz, tuž cjican:

—Tii zuma žoñiž ticzqui anaž wejt uj cjequiċha. Anċhuca uż cjequiċha.

²⁵Tjapa nii žoñinacaqui kjaaziċha, tuž cjican:

—Wejtnacaltazat uj cjeċhani, nižaza wejtnaca ocjalanacžtami.

²⁶Jalla nektanaqui Pilato jiliriqui Barrabás liwrii cutziċha. Nektanaqui Jesusa wjajtzjapa mantichiċha. Nižaza cruzquiz ch'awcta cjeajo, zultatunacžquiz intirjichiċha.

²⁷Jalla nektanaqui nii mantita zultatunacaqui jilirž palacio kjuyquin Jesusa ħjitchiċha. Nektanaqui tjapa nii zultatž tropanaca kjawsassiċha, Jesusa muytata. ²⁸Nektanaqui Jesusa ħjokkchiċha. Jalla nuž ħjokkžcu tsjii ljoc murat zquti tjutzċiċha. ²⁹Nektan niž achquiz ch'ap pillužtakaz paažcu scaržinchiċha, nižaza žew kjarquiz wara tanskatchiċha. Jalla nuž paažcu niž yujcquiz quillziċha, tuž cjican:

—ġViva tii judío žoñinacž ħawc jiliri! —Jalla nuž ċhiċan burla paachiċha.

³⁰Nižaza llawzižtan nižquiz tjutċhiċha. Niiž kjarquiztan wara kjañcan, achquiz wjajtċhiċha. ³¹Jalla nuž burla paažcu, nižquiztan ljoc murat zquti ħjokkchiċha. Nektan wilta niž persun zquti tjutzċiċha. Jalla nektanaqui cruzquiz ch'awczjapa Jesusa ħjitchiċha.

JESUSAQUI CRUZQUIZ CH'AWCTA

³²Jalla nuž Jesusa ħjċhcan tsjii Cirene wajtċhiz žoñi zalžquichiċha. Simón cjitataċha. Jalla nii žoñiċqui Jesusiž cruzca kuzkatchiċha.

³³Jalla nuž Gólgota cjita yokquin irantichiċha. Nii yokaqui “Ach Tsjij yoka” cjitazakaztaċha.

³⁴Jalla nicju tsjii vinžtan jaržtan t'ajžta lickatchiċha. Pero nii mallžcu, ana licz pecchiċha.

³⁵Cruzquiz ch'awczcu, zultatunacaqui Jesusiž zquti tanzjapa surtiassiċha. Jalla nuž paatan profetž takuqui cumplissiċha. Nii tuqita profetaqui tuž cjichiċha: “Wejt zquti tanzjapa surtiasaquiċha”. ³⁶Jalla nektanaqui nijwcpacha ninacaqui wilzjapa julziċha.

³⁷Kjažtiqiztan Jesusa cruzquiz ch'awctatažlaja, jalla nii tabliquiz cjjirtataċha, tuž cjican, “Tiiċha Jesusaqui, judío žoñinacž ħawc jiliri”. Jalla nuž cjjiržcu ach tsewctuñ nii tabla ch'awczinchiċha.

³⁸Nižaza pucultan tjañinaca cruzquiz ch'awctataċha, tsjiiċqui žew latu tsjiiċqui zkar latu.

³⁹Nekz watñi žoñinacaqui iñarcan, aċha wewcžiñitaċha. ⁴⁰Nižaza tuž cjichiċha:

—Amqui cjiñamla, “Timplu t'ezinžcu ħjep majquiztan tsjitsnasaċha”. Jalla nižta payi atasaz niiqui, jazic persunpacha liwriisalla. Yooz Maatimžlaj niiqui, cruzquiztan apakscu, ħjjijwžcalla.

⁴¹Jalla nižta irata zakaz iñarchiċha timplu jilirinacami, liy tjaajiñi maestrinacami, fariseo parti žoñinacami, wajtċhiz jilirinacami. Jalla ninacaqui porapat parlassiċha tuž cjican:

⁴²—Tiiċqui yekja žoñinaca liwriichiċha, pero persunpacha anaž liwrii atċha. Israel žoñinacž ħawc jilirizžlaj niiqui, cruzquiztan apakscu, ħjjijwžquila. Nektan nižquiz criyasaċha. ⁴³“Tiiċha cjiñiqui, Yoozquin tjapa kuzziztċha. Wejrtċha Yooz Maatiqui”, cjican. Yoozqui tii k'aachichizlaja, jaziqui anzpacha Yooz tiij liwriila.

⁴⁴Nii cruzquiz ch'awcta tjañinacami Jesusižquiz quintra ċhiċhizakazza.

JESUSAQUI TICZIĊHA

⁴⁵ Taypurquiztan majña kak oracama tjapa nii yokaqui zumchi cjissičha. ⁴⁶ Jalla nii orapacha Jesusaqui tjapa aztan kjawchičha, tuž cjican:

—Elí, Elí, ¿lama sabactani? —Jalla nii takuqui cjicha: “Wejt Yooz, wejt Yooz, ¿kjažtiquiztan wejr jaytichamtajo?”

⁴⁷ Yekjap nekz željñi žoñinacaqui jalla nii kjawñi nonžcu, cjichičha:

—Nonžna. Tiiqui Elías profetaž kjaw kjawla.

⁴⁸ Nekztan tsjii tsjiiqui esponja cjita kjaz ch'umñi apti zajtchičha. Jar vinu ch'umkatžcu zjijcchičha. Nekztanaqui war puntiztan chjapžcu, Jesusižquin chjalzičha, liquinzjapa.

⁴⁹ Parti žoñinacaqui cjichičha:

—Žela cjee. Antiz chekžla, Elías tii liwrii cunamit tjonačhan.

⁵⁰ Nekztanaqui Jesusaqui altu joržtan wilta kjawchičha. Jalla nuž kjawžcu ticzičha.

⁵¹ Jalla nii orapacha pajk timplu cortina chicatquiz juystokaz wjajrzičha, tsewctan kozzuc. Nižaza yokac chjekinčičha. Nižaza cur akjinacaqui c'acchičha. ⁵² Nižaza sipulturanacaqui cjetsi cjissičha. Muzpa Yoozquin criichi ticzi žoñinacaqui jacatatchičha. ⁵³ Jesusaž jacatattiquiztan nii parti jacatatchi žoñinacaqui Jerusalén wajtquiz luzquichičha. Jalla nicju muzpa žoñinacaqui ninaca cherchičha.

⁵⁴ Zultat capitanaqui nii Jesusa wijilñi zultatunacžtanpacha yoka chjekiñi cheržcu, nižaza tjapa nii watñi cheržcu, walja tsucchičha. Jalla nekztan cjichičha:

—Chekapan tii žoñiqui werar Yooz Maatitakalala.

⁵⁵ Jalla nicju wacchi maatakanacaqui želatčha, ažquiztan chekžcan. Nii maatakanacaqui Galilea yokquiztanpacha Jesusa apzičha, nii atintizjapa. ⁵⁶ Jalla nii maatakanacaqui tuž cjita tjunchiztačha: María Magdalenatačha; nižaza Mariiqui Jacob Josež maatačha; nižaza Zebedeož tjun želatčha. Naaqui majchwichiztačha.

JESUSIŽ CURPU TJATŽTA

⁵⁷ Waj zumznan, tsjii ricach žoñi, José cjita tjonchičha. Arimatea wajtchiz žoñitačha. Nižaza Jesusa cumpañ'iñi žoñitačha. ⁵⁸ Jalla nii žoñiqui Pilato jiliržquin zali ojkcchičha. Nuž zalžcu, Jesusiž curpu maychičha. Nekztan Pilato jiliri qui mantichičha nii curpu intirjajo.

⁵⁹ Josequi Jesusiž curpu chjichcu, limpu saban pañžtan capzičha. ⁶⁰ Niižta ew sipultura želatčha, mazquiztan jwetta. Jalla nii sipulturniž Jesusiž curpu tjatčičha. Jalla nuž tjatžcu, sipulturniž zana pajk maztan pjuczičha. Nekztan ojkcchičha. ⁶¹ Jalla nicju María Magdalena, nižaza tsjaa María julzi želatčha, sipulturniž yujcquiz.

SIPULTURA ZUMPACHA PJUCŽTA, NIŽAZA WIJILTA

⁶² Jakatažuqui, jeejz tjuñijapa tjaczcu, timplu jilirinacami, fariseo parti žoñinacami Pilato jiliržquin zali ojkcchizakazza. ⁶³ Jalla nuž zalžcu tuž cjichičha:

—Wejt Jiliri, wejrnacqui tuž cjuñznučha. Tii toscar chiiñi žoñiqui, žejtcanaqui, tuž cjichičha: “Čhjep maj ticziquiztan jacatatačha wejrqui” cjican chiiñitačha. ⁶⁴ Jalla nižtiquiztan mantižinalla čhjep majcama sipultura zumpacha wijilta cjila. Ana zuma wijilta cjequiz niiqui, niž tjaajinta žoñinacaqui ween niž curpu chjichi tjonasačha. Jalla nekztanaqui žoñinacžquiz k'otasačha: “Jesusaqui ticziquiztan jacatatchičha” cjican. Nižta toscara juc'ant anawaliž cjesačha, primira toscara chiiťiquiztan.

⁶⁵ Jalla nekztanaqui Pilato jiliri qui ninacžquiz cjichičha:

—Jalla tekz zultatunaca željčha wijilñijapaqui. Ančhucqui oka, nii sipultura zumpachaž chawjčca, jaknužt atčhaja, jalla nuž.

⁶⁶ Jalla nekztanaqui ojkcžcu, sipultura zumpacha chawjčquichičha. Nižaza nii chawjčca maz latuquiz sinalt'ižcu ecchičha. Nižaza nekzpacha nii sipultura wijilñi zultatunacami ecchičha.

¹ Kjantati jeej tjuñi wat̄cu María Magdalena cjitiqiu tsjaa Mariatan sepultura chertzñi ojkchīcha, primir siman tjuñi kallznan. ² Tsjii Yooz anjilaqiu arajpachquiztan chji-jwžquichīcha. Nekztan yoka walja chjekinchīcha. Anjilaž nii sipultura pjuczta maz cjewžinchiqiu. Nekztan Yooz anjilaqiu nii maz juntun̄ julzīcha. ³ Anjilaqiu ancha kjañchīcha liwliwjñižtakaz. Nižaza ancha chiwitācha niiz̄ zquitiqiu, kjatñižtakaz. ⁴ Jalla nuž cheržcu wijilñi zultatunacaqiu walja tsucchīcha chjekinzcama. Ticzi žoñižtakaz cjissīcha. ⁵ Jalla nekztanaqiu nii anjilaqiu maatakanacžquiz cjichīcha:

—Anaž ančhuc eksna. Wejrqui zizūcha, ančhucqui Jesusaž kjurčha, cruzquiz ch'awcta Jesusa. ⁶ Anaž tekz žejlčha. Niiqiu jacatatchīcha, jaknužt chiitčhaja, jalla nuž. Pichay, tii sipultura chertzna. ⁷ Nekztanaqiu apuraž oka. Niiz̄ tjaajinta žoñinacžquiz mazca, tuž cjan: “Jesusaqiu ticziquiztan jacatatkalčha. Ančhuca tuqui Galilea yokuin okaychīcha. Jalla nicjuž ančhucqui Jesusa jacatatchi cheraquičha”. Wejrqui cuchanzquitācha tii puntuquiztan ančhucaquiz maznajo. —Nuž cjan paljaychīcha anjilaqiu.

⁸ Jalla nekztanaqiu sipultur kjuya cheržcu, maatakanacaqiu apura ojkchīcha, ispantichi nižaza walja cuntintu. Zati pariju ojkchīcha tjaajintanacžquin mazñi. ⁹ Jalla nuž okan Jesusaqiu ninacžquiz parizichīcha. Nekztan ninacžquiz tsaanchīcha. Nii maatakanacaqiu Jesusižquiz macjatžcu rispitan, quilljatchīcha, Nekztan niiz̄ kjojcha žcojrzčīcha. ¹⁰ Jalla nekztanaqiu Jesusaqiu cjichīcha:

—Anaž ančhucqui eksna. Wejt jilanacžquin mazca, Galilea yok kjutñi ojkla ninacaqiu. Jalla nicju ninacaqiu wejr cheraquičha. Jalla nii maznaquičha.

ZULTATŽ QUINTU

¹¹ Jalla nuž nii maatakanacaž okan wijilñi zultatunacaqiu watja ojkchīcha. Nekztan timplu jilirinacžquin tjapa watchinaca quint'ichīcha. ¹² Jalla nekztanaqiu timplu jilirinacaqiu wajtchiz jilirinacžquin parli ojkchīcha. Nuž parližcu tsjii acuerduquiz luzzīcha. Jalla nekztanaqiu nii quint'iñi zultatunacžquiz paaz tjaachīcha, ¹³ tuž cjan:

—Ančhucqui tii wajtchiz žoñinacžquiz cjequičha: “Ween wejtnacaž tjan, niiz̄ tjaajinta žoñinacaqiu Jesusiž curpu kjañžcu chjitchīcha”. Jalla nužuz̄ cjequičha. ¹⁴ Chawc jiliriqiu ančhucaž quint'ita nonznaquiz̄ niqiu, wejrnacqui niiz̄tan parlačha ančhucqui ana casticta cjisjapa.

¹⁵ Jalla nekztanaqiu nii zultatunacaqiu nii ch'iižinta paaz tanžcu, ojkchīcha. Jalla nekztan nii paaz laycu toscara chiichīcha. Jalla nižta toscar quintu judío žoñinacaqiu chiichiñīcha anz tii timpuquiziqui.

JESUSIŽ MANTITANACA

¹⁶ Jalla nii maatakanacaž maztiquiztan nii tuncaman tjaajinta žoñinacaqiu Galilea yoka ojkchīcha, Jesusaž t'okint'ita curquin. ¹⁷ Jalla nicju Jesusa cheržcu, niiz̄quiz rispitchīcha. Yekjapa kuz turwaysi zelatčha, ultim uwerara Jesucristo, už anaj Jesucristo. ¹⁸ Jalla nekztanaqiu Jesusaqiu ninacžquin macjatžcu, tuž cjichīcha:

—Wejtquizpacha tjapa mantiz poder tjaatačha, arajpachquin žejlñinaca mantizjapami, nižaza tii yok muntuquiz žejlñinaca mantizjapami. ¹⁹ Jaziqiu ančhucqui cuchnučha. Tjapa tii muntu nacionacžquin oka. Tjapaman nacionchiz žoñinacžquiz wejtquin kuzziz cjisjapa tjaajinžca. Nižaza Yooz Ejp, Yooz Majch, Yooz Espiritu Santo, jalla wejtnaca tjuužtan criichi žoñinaca bautizaquičha. ²⁰ Nižaza tjapa weriž mantitanaca nii žoñinacžquiz tjaajnaquičha ninaca cazajo. Zapuru wejrqui ančhucatan chica cječha, tii muntu tucuzinžcama. Jalla nii ančhucqui tiraž cjuñaquičha. Jalla nužoj cjila. Amén.

EL SANTO EVANGELIO SEGUN SAN MARCOS

¹Liwriiñi takuqui Jesucristo Yooz Majch puntuqiztan jalla tužuča. Jesucristučha Yooz Majchqui.

JUAN BAUTISTAŽ PUNTU

²Tuqui timpuqui tsjii Yooz cuntiquiztan chiiñi profeta želatča, Isaías cjita. Nii profetaqui cjiyrchiča tii takunaca:

“Nonžna. Yoozqui Jesucristuž tuqui tsjii žoñi cuchanžcaquiča, tjappacha tjacznažo. ³Jaziqui ch'ekti yokquin nii žoñž joraqui altu tawkžtan paljayaquiča, tuž cjican: ‘Tsjii chawc jiliriqui tjonaquiča. Jaknužt jicz zuma tjacznačhaja, jalla nižta ančhuca kuznaca zuma tjaczna. Ančhuca kamañanacaqui zuma lijitumapanž cje’”

Nuž cjiyrchiča Isaías cjita žoñiqui.

⁴Jalla nižtapan Juan Bautistaqui ch'ekti yokquin parizizquichiča. Nižaza žoñinaca bautissiča. Nižaza paljaychiča, tuž cjican:

—Kuznacaž campiya, ujnaca pertunta cjisjapa. Nekztan ančhuc bautisasača.

⁵Tama žoñinaca Juanžquin ojkičiča, Judea cjita yokquiztan, nižaza Jerusalén cjita wajtquiztan. Jakzilta žoñit persun ujnacquiztan “ujchizpanča” cjican kuzquiz zint'ičhaja, jalla niiqui bautistatača Jordán cjita puj kjazquiz.

⁶Juanž zquitiqiu camello chomquiztan watstatača. Nižaza Juanqui zkiz tsjaychiztača. Niiž čheriqui tižtatača: langosto cjita kolta animalanaca, nižaza misq'ui. Jalla nii lujlñitača. ⁷Juanqui ojklaycan žoñinacžquiz paljaychiča, tuž cjican:

—Tsjiiqui wejt wirquin tjonča. Jalla niiča wejtquiztan tsjan juc'anti poderchizqui. Niižquiz atintisjapa anal waquisučha, niiž čhjata jeržcu chjojkinimi. Inakztča wejrqui.

⁸Kjzantakal bautisučha. Nii tjonñi jilirizti Espiritu Santužtan bautisaquiča.

JESUSAQUI BAUTISTATAČHA

⁹Nekztanaqui Jesusaqui Nazaret cjita wajtquiztan ojkičiča. Nazaaret watjaqui Galilea cjita provinciquintača. Jesusaqui Juanžquin ojkičiča, Jordán cjita pujquin. Nekz Juanqui Jesusa bautissiča. ¹⁰Jesusaqui kjazquiztan ulancan arajpacha cjetzi cherchiča, nii orapacha. Yooz Espiritu Santo palomažtakaz chjijwžquini cherziča. Niiž juntuñpacha irantižquichiča. ¹¹Nekztan arajpachquiztan tsjii jora paljayžquini nonziča, tuž cjican:

—Amčha wejt k'ayi Maatimqui. Amiž cjen ancha cuntintučha wejrtqui.

JESUSIŽTAN DIABLUŽTAN

¹²Nekztanaqui Espiritu Santuqui ch'ekti yokquin Jesusa ojklayskatchiča. ¹³Jalla nicjuž pusi tunc tjuñi kamchiča Jesusaqui. Nekziqui q'uit animalanaca zakaz želatča. Jaziqui Satanás cjita diabluqui Jesusižquiz tjonziča; ujquiz tjojtskatz pecatča. Pusi tunc tjuñi ujquiz tjojtskatz yanznatča. Nekztan Yooz anjilanacaqui tjonžtjonžquiniča Jesusa atintizjapa.

JESUSAQUI TJAAJINCHIČHA

¹⁴Wiruñaquí Juanqui carsilquiz chawjctatača. Nekztan Jesusaqui Galilea cjita yokquin ojkičiča. Nii yokquin Yooz liwriiñi taku paljaychiča, jaknužt žoñinaca Yooz wajtchiz žoñi cjisjaja, nii. ¹⁵Tuž cjican, paljaychiča:

—Tii timpumiž otča. Anzpacha žoñinacaqui Yooz wajtchiz žoñi cjesača. Kuznaca campiya, “ujchizpanča”, cjican. Nekztan tii liwriiñi takuž tjapa kuztan catoka. Tii takuž criya.

CH'IZ TANÑI ZOÑI KJAWŽTA

¹⁶ Tsjii pajk kota želatča, Galilea cjita. Jesusaqui kot ataran ojklaycan pucultan jilazullca cherchiča; Simón, nižaza Andrés cjitatača. Ninacatača ch'iz tanñinacaqui. Nii ora ch'iz tanz kjazquiz tjojtznatča. ¹⁷ Nekztan Jesusaqui ninacžquiz cjichiča, tuž cjican:

—Ančhucqui, wejttan chicaž ojklayñiž cjee. Anziqiu ch'iz tanz langzzizza. Pero wejrqui ančhucquaz yekja langzquin utznača, Yooztajapa žoñinaca kjawzqui, nii.

¹⁸ Nekztanaqui nii orapacha ninacaqui ch'iz tanz eccu, Jesusižtan chica ojklayñi cjsiča.

¹⁹ Jesusaqui tsjii koloculla nawjčjapa ojčžcu, tsjii pucultan žoñinaca cherchizakazza; Jacobo, nižaza Juan cjitatača. Ninacž ejpqui Zebedeo cjitatača. Nii pucultan žoñinaca warcuquiz želatča, ch'iz tanz azquichcan. ²⁰ Jaziqui Jesusaqui ninaca kjawziča, nižtan chica ojklayñi cjsjapa. Ninacž ejp warcuquiz želatča, piyunanacžtan. Pero Jacobžtan Juanžtan ejp ecchiča, Jesusižtan ojklayzjapa.

ZAJRAŽ TANTA ŽOŃI

²¹ Nekztanaqui jeejz tjuñi Capernaum cjita watja luzziča Jesusižtan ninacžtan. Nekziqui judfo žoñinacž ajcz kjuyquiz luzziča. Nekztan Jesusaqui tjaajinčiča. ²² Chawc jiliri irata tjaajnatča, zuma zizñi. Judiuž lii tjaajñinacažtakaz ana nuž tjaajnatča. Jesusiž tjaajintiquiztan žoñinacaqui ispanťičiča:

—¡Ancha cuzala! —cjican.

²³ Nii ajcz kjuyquizpacha tsjii zajraž tanta žoñi želatča. Nii žoñiqui kjawchiča, tuž cjican:

²⁴ —Jesusa, Nazaret wajtchiz žoñimla. ¿Kjažťiquiztan am wejtnacaquiz mitizi? Wejrnaca aki tjonchamžlani. Jaziqui am pajuča. Zuma Yooz Žoñimla. —Nuž cjican, kjawchiča.

²⁵ Nekztan Jesusaqui zajrižquiz ujziča, tuž cjican:

—¡Ch'uj žela! Tii žoñžquiztan ulna.

²⁶ Nekztan zajraqui nii tanta žoñi chekjinskatžcu, nižaza altu tawkžtan kjawžcu, ulančiča. ²⁷ Nižta cheržcu, žoñinacaqui ancha tsucchiča. Ninacpora parlassiča, tuž cjican:

—¿Čhjulut nižta teejo? Tsjemataž tjaajinla. Walja azziz tawkchizla. Tii žoñiqui zajramiž mantila. Nižaza zajrami tiiž taku cazla. —Nuž ispanťiči parlassiča.

²⁸ Oralla Jesusiž paataqui mazmaztatača tjapa nii yokaran.

SIMON PEDRUŽ AJMUZ MAA

²⁹ Nekztanaqui ajcz kjuyquiztan ulanžcu, Jesusaqui Simón, nižaza Andrés, jalla ninacž kjuyquiz luzziča, Jacobžtan Juanžtan, nuž. ³⁰ Simónž ajmuz maaqui ajpsquiz ch'ujlñi conchiz laaquichi želatča. Tjapa curpu walja kjakatča. Jaziqui Jesusižquiz mazziča.

³¹ Jesusaqui macjatžcu, naaža kjara tanžcu, tsjitskatchiča. Nekztanaqui naaža kjakñi cona zarakchiča. Nekztan naa žonqui ninaca atintichinča.

ANCHA ŽOŃINACA ČHJETINTA

³² Nekztanaqui nii zez tjuñiž kattan Jesusižquiz tjapa laaquichi žoñinacami, nižaza zajraž tanta žoñinacami zjijctatača. ³³ Nižaza Jesusaž alujta kjuy zanaran tjapa nii wajtchiz žoñinacaqui ajcziča. ³⁴ Nekztanaqui Jesusaqui tjapaman laa žoñi čhjetinčiča. Žoñinacžquiztan muzpa zajranaca chjatkatchiča. Zajranacaqui Jesusa pajčiča; pero Jesusaqui ana chiikatchiča.

YOOZ TAKU PARLITA

³⁵ Jakawenz tažquiu ima kjanžcan Jesusaqui žaaziča, iya zumchi zumchi cjican. Wajťquiztan ulanžcu, ana žoñž žejlz yokquin ojkičiča, Yooz Ejpžtan parli. ³⁶ Wiruñauqui Simonaqui niž maznacžtan Jesusa kjuri ojkičiča. ³⁷ Jesusižquiz zalžcu cjichiča:

—Tjapa žoñinacaqui am pewc pewcža.

³⁸ Nekztan Jesusaqui cjichiča, tuž cjican:

—Nacjuñž ojkla, visin watjanacquin. Nicju zakaz Yooz taku paljayzquiztanča wejrqui. Jalla nijjapa tii muntuquiz tjonchinča.

³⁹ Nekztanaqui Galilea yokaran ojklayčiča, ajcz kjuyanacquin Yooz taku paljaycan, nižaza zajranaca chjatkatan.

MOJKCHI JANCHICHIZ ŽOŇI

⁴⁰ Tsjii mojkchi janchichiz žoňi želatča. Niiqui Jesusižquiz tjonchiča. Quillžcu, rocchiča, tuž cjan:

—Wejr čhjetinzim pečhaj niiqui, wejr čhjetinzim atča amqui.

⁴¹ Nekztan Jesusaqui nii žoňi okžcu, niižquiz lanziča, tuž cjan:

—Wejr am čhjetnasachiya. Jaziqui čhjetintam cjissa.

⁴² Jalla nuž chiitiquiztanaqui nii orapacha nii žoňiqui žejtchi cjissiča, mojkchi janchi laa cjitiquiztan. ⁴³⁻⁴⁴ Nekztanaqui Jesusaqui nii žoňžquiz iwj'ichiča, tuž cjan:

—Jaziqui tii čjul am chiichijay! Anača jeczquizimi chiichiizqui. Timpluquin oka amqui. Nekztan timplu jiliržquin persuna tjeežca. Nižaza čhjetintiquiztan Moisés mantitacama paa. Jaknužt Moisesqui ofrenda uchajo mantičhaja, jalla nuž ofrenda uchaquičha. Jalla nižtiquiztan žoňinaca am žejtchi zizaquičha. Jazic oka amqui. —Nuž mantichiča Jesusaqui.

⁴⁵ Nekztan nii žejtchi žoňiqui tjapa kjutňi ojklaychiča, nii žejtta quintu parlican. Tjapa žoňinacžquin nii quint'ichiča. Jalla nekztanaqui tjapa žoňinacaqui Jesusižtan zalz pecatča. Jalla nižtiquiztan Jesusaqui anaž jakzi wajtquizimi luzi atchiča, žoňiž zizan. Ana žoňž žejlz yokuň ojklaychiča. Nižtami tjapa kjuttan žoňinacaqui niižquin tjonňitača.

2

ZUCH ŽOŇI ČHJETINTA

¹⁻² Tsjii kjaž majquiztan Jesusaqui Capernaum wajta quejpchiča, persun kjuyquiz. Nii zicuqu, tama žoňinacaqui ajcziča, kjuya chjijpscama. Nižaza anatača campo kjuy zanaran. Nekztan ajczi žoňinacžquiz Jesusaqui Yooz taku tjaajinchiča. ³ Nuž tjaajnan, pakpaltan žoňinaca tjonchiča, tsjii zuch žoňi kuzi. ⁴ Muzpa žoňi ajcziž cjen, Jesusižquin ana macjati atchiča. Nekztanaqui tsewctan kjuya pjetžcu, pjetquiztan zuch žoňi kjuyllchuc chjijunžquichiča, niiž tjajz zquitquiziqui. ⁵ Ninacaqui Jesucristužquin tjapa kuztan tjonchiča. Nii nayžcu, Jesusaqui zuch žoňžquiz paljaychiča, tuž cjan:

—Jilala. Jaziqui am ujnaca pertuntača.

⁶⁻⁷ Kjuyquiz julzi yekjap žoňinaca želatča, judiuž lii tjaajiňi žoňinaca. Ninacaqui kuzquiz pinsatča, tuž cjan:

—ĽKjažtiquiztan tiiqui nižta chiijo? Anawalipanča tiiz takuqui. ĽJect ujnaca pertunasajo? Yoozpanikazla ujnaca pertunňiqui. —Jalla nuž pinsichiča lii tjaajiňi žoňinacaqui.

⁸ Jesusaqui persun kuzquiz ninacž pinsita zizziča. Nekztan ninacžquiz paljaychiča, tuž cjan:

—ĽKjažtiquiztan ančhuca kuz nižta pinsejo? ⁹ ĽJakzilta takut pjasila chiiz cjesajo? Tii zuch žoňžquiz chiižinsjo, “Am ujnacami pertunta”, Ľcjis pjasila cjesaya? už “Tsijtsna. Am tjajz zquiti aptižcu oka”, Ľnuž chiiž pjasila cjesaj? ¹⁰ Tsewctan cuchanžquita Yooz žoňtča wejrqui. Tii muntuquiz jiliritča, ujnaca pertunžjapami. Jalla nii zizjapa, ančhucqui tiiz chera.

Nekztanaqui zuch žoňžquiz cjichiča:

¹¹ —Amquiz cjwčha, tsijtsna. Am tjajz zquitinaca aptaza. Oka am kjuya. —Nuž cjan chiichiča Jesusaqui.

¹² Nekztanaqui nii zuch žoňiqui tsijtsiča. Tjajz zquiti aptichiča. Liwž tjappachaž cheran, ulanchiča. Jalla nižta cheržcu tjapa žoňinacaqui walja ispantichi quirchiča, tuž cjan:

—Tižta wira ana cheriňča.

Nekztanaqui Yoozquin honora waytichiča.

LEVI CJITA ŽOŇI

¹³ Nekztanaqui Jesusaqui wajtquiztan ulanžcu, pajk kot ataran wilta ojklayatča. Nuž ojklayan, žoňinacaqui niižquin macjatžquichiča. Nekztan Jesusaqui ninacžquiz tjaajinchiča. ¹⁴ Wiruňaquí nawjajapa ojkiča. Jiczquiz ojkan, Leví cjita žoňi cherchiča,

aduanž kjuyquiz julznan. Levíž ejpqui Alfeo cjitatača. Jesusaqui niížquiz paljaychiča, tuž cjican:

—Wejttan chica ojklayñim cjequiča.

Nekztan tsijtscu, Jesusižtan ojkchiča Leviqi. ¹⁵Nižaza Leviž kjuya luli ojkchiča. Nicju Jesusižtan niíž tjaajintanacžtan nuž lulan, aduanerunacžtan nižaza ujhiz žoñinacžtan nekzizakaz lulatča. Muzpa žoñinacaqui Jesusižquin apzitača. ¹⁶Tsjii kjažt judiuž lii tjaajiñi žoñinaca zakaz želatča, fariseož partinacami. Jaziqui Jesusižtan anazum žoñinacžtan juntu lulan, naychiča. Nekztan pewcziča niíž tjaajinta žoñinacžquiz, tuž cjican:

—¿Kjažtiquiztan tii Jesusa aduanerunacžtan nižaza ujhiz žoñinacžtan lujljo?

¹⁷Ninacž chiita nonžcu, Jesusaqui kjaaziča, tuž cjican:

—Zuma žejtchinacaqui anaž kullñi pecasača. Laa žoñinacž kullñic pecča. Wejrqui “Zumal kamuča” cjiñi žoñinacžquiziqui ana kjawzñi tjonchinča. Antiz “ujhizpanča” cjiñi žoñinacžquiz kjawzñi tjonchinča.

AYUNAS PUNTU

¹⁸Juanž tjaajintanacžtan fariseož parti žoñinacžtan, jalla ninacaqui ayunasñipantača. Jaziqui žoñinacaqui Jesusižquiz pewczñi tjonchiča, tuž cjican:

—¿Kjažtiquiztan Juanž tjaajintanacžtan nižaza fariseož tjaajintanacžtan ayunasñejo? Amiž tjaajintanacžtan ana ayunasñipanla.

¹⁹Nekztan Jesusaqui ninacžquiz tuž cjichiča:

—Zalz pijstiquiz impittaž cjenacqui, ¿kjažt ayunasasajo? Zalsñi žoñžtan pijjstaž paača. Zalsñi žoñi želanpacha, anaž ayunasasača. ²⁰Tii jarquin nii zalsñi žoñiž kjantaž cjequiča. Nekztanž ayunasasača.

²¹Jesusaqui tii takuzakaz chiichiča:

—Anaž jakziltami zijzi zquitquiziqui ew rimintižtan rimintasacha. Nižta rimintasaž niiqui, zijzi zquiti juc'anti wjajrskatasacha. Ewqui zijziquiztan jaljiznasacha. Nekztan juc'antiž tsjelanznasacha. ²²Nižaza anaž jakziltami zijzi zkiz luusquiz ew vino alznasacha. Nižta alznasaž niiqui, zkiz luus wjajrskatasacha ew vinuqui. Nekztanaqui zkiz luusmi vinumi pizcpacha pertisnasacha. Ew vinuqui ew zkiz luusquizpanž alznasacha. —Nuž cjichiča Jesusaqui.

JEEJZ TJUŇI QUINTU

²³Nekztanaqui tsjii jeejz tjuñi Jesusaqui tiric zkal taypiran okatča tjaajintanacžtan. Zkal taypiran ojkan tjaajinta žoñinacaqui tiric oza kjajpchiča. ²⁴Nii cheržcu, yekjap fariseonacaqui Jesusižquiz paljaychiča, tuž cjican:

—Cherzna. ¿Kjažtiquiztan nižta paajo? Jeejz tjuñquiziqui nižta anapanča paazqui. Učhum lii quintrala, ¿ana jaa?

²⁵Nekztan Jesusaqui kjaaziča, tuž cjican:

—Ančhucqui Yooz taku liichinchucča, ¿ana jaa? Cjijrta Yooz takuqui tuž cjiča: učhum tuqita atchi ejp, David cjiataqui, niíž mazinacžtan čheri eecskatchiča. Ana čjul čherchiz cjen, ²⁶Yooz timpluquiz luzziča. Nii ora timplu chawc jiliritača Abiatar cjiataqui. Timpluquin Yooz yujcquiz nonžta t'antanaca želatča. Jalla nii t'anta aptižcu, lujlchiča David cjiataqui. Nižaza niíž mazinacžquiz tojunchiča. Anapantača permitta nii t'anta lujlžquí ina žoñžlaqui. Nižta lujlžcuqui lii quintrala niiqui. Timplu jilirinacžtapankaz nii t'anta lulaj cjiataqui.

²⁷Nekztanaqui Jesusaqui ninacžquiz chiižinchizakazza:

—Žoñž laycu jeejz tjuñiqui uchtatača. Nii jeejz tjuñquiztanaqui žoñiča juc'ant chekanaqui. ²⁸Wejrqui tsewctan cuchanžquita Yooz Žoñiča. Jeejz tjuñquizimi čhjululu paaz cjenami weril mantasacha. —Nuž cjichiča Jesusaqui.

¹ Nekztanaqui Jesusaqui wilta tsjii judionacž ajcz kjuyquiz luzziča. Nekz tsjii kjara kjoŋchi žoŋi želatča. ² Ujchiz jwesjapa quintri žoŋinacaqui Jesusa awayt'atča, jeejz tjuŋquiz čhjetnaquiya, už anaž čhjetnasaj.

³ Nekztanaqui Jesusaqui kjara kjoŋchi žoŋžquiz paljajychičha, tuž cjican:

—Tsijsna. Tii taypiquin cjisna.

⁴ Nekztan parti žoŋinacžquiz paljajchizakazza, tuž cjican:

—Jeejz tjuŋquiziqui učhum liiqui kjažt cjeejo? Jžoŋžquiz zuma paasaya uz žoŋžquiz ana zuma paasaja; žoŋž wira liwriyasaya uz žoŋž wira ticksatasaja? —Nuž pewczičha Jesusaqui.

Ninacazti ch'ujukaz želatča. ⁵ Nekztan Jesusaqui niž muytata željŋi žoŋinacž kjutŋi chercherziča. Ninacžjapa žawjchičha; nižaza ninacž chojru kuzziz cjen, llaquitatača. Nekztan laa žoŋžquiz paljajychičha, tuž cjican:

—Am kjara chjinzna.

Nuž kjara chjinžcu, žejtchi quirchičha. ⁶ Nekztanaqui fariseo žoŋinacaqui ulanchičha. Ulanžcu Herodes partinacžtan Jesusiž quintra parlichičha:

—J'Jaknužt Jesusa conas? —cjican.

JESUSAQUI TJAAJINCHIČHA

⁷ Nekztanaqui Jesusaqui niž tjaajintanacžtan ojklajychičha pajk kot ata. Muzpa tama žoŋinacaqui apziča. ⁸ Tjapa kjuttan yokquiztan tjonchičha, Galilea yokquiztan, Judea yokquiztan, Jerusalén wajtquiztan, Idumea yokquiztan, Jordán puž najwctan yokquiztan, Tiro Sidón wajtanac kjuttan, tjapa tii yokanacquiztan Jesusižquin tjonchičha, niž ancha wali paatanaca cheri. ⁹ Nekztanaqui Jesusaqui niž tjaajintanacžquiz chiižinchiča:

—Wejtta warcuž tjacžina, tii tama žoŋinaca ana wejtquiz ts'acjasajo.

¹⁰ Muzpa žoŋinacaž čhjetintaž cjen, tjapa laa žoŋinacaqui Jesusižquin tjonchičha. Niižquiz lanzjapa, ancha ts'acjassiča.

¹¹ Nižaza čhjuloramai zajranacaqui nii cherčhaja, niž yujcquiz quillziča. Kjawcan, chiichičha:

—Yooz Matimča amqui, —cjican.

¹² Jalla nekztanaqui Jesusac ninacžquiz walja iwjt'ichiča, tuž cjican:

—Wejtquiztanac anača ančhucqui chiizqui, “Yooz Maatimča”, cjican.

TUNCAPAN APOSTOLONACA ILLZTA

¹³ Nekztanaqui Jesusaqui tsjii curullquin yawchičha. Niiž kuz pecta žoŋinaca illžcu ninaca kjawziča. Nekztan niižquin macjatčičha illzta žoŋinacaqui. ¹⁴ Tuncapan žoŋi utchičha niižtan kamajo, nižaza Yooz taku parlajo. ¹⁵ Ninacžquiz poderchiz cjiskatchičha, Yooz aztan laa žoŋinaca čhjetnajo, nižaza zajrami chjatkatajo. ¹⁶ Nii illzta žoŋinacaqui tinacatača; Simonatača; niiqui Pedro cjitazakaztača. ¹⁷ Jacobotača; Zebedeož majchtača niiqui. Juantača; Jacobož lajktača niiqui. Jacobžtan Juanžtan altu jorchiz cjen Boanerges cjitazakaztača. ¹⁸ Andrestača. Felipitača. Bartolomitača. Mateotača. Tomastača. Yekja Jacobotača; Alfeož majchtača niiqui. Tadeotača. Yekja Simonatača; tsjii politicutača niiqui, cananiž partitača. ¹⁹ Judas Iscariotitača; Jesusiž quintra tarazunchičha niiqui. Jalla nužuča Jesusiž illzta žoŋinacaqui.

JESUSIŽ QUINTRA CHIICHIČHA

Nekztanaqui Jesusaqui kjuyquin ojkcchičha niž illzta tjaajintanacžtan. ²⁰ Nekziqui muzpa žoŋinacaqui ajcsizakaztača. Jesusaqui niž tjaajintanacžtanaqui ana čhjeri luli atchičha, žoŋinacaž muzpa ajcziž cjen. ²¹ Nekztanac yekjap žoŋinacaqui cjichičha:

—Lucurataž niiqui, —cjican.

Jaziqui žoŋiž lucurata čjiŋiž cjen Jesusiž parintinacaqui tjonchičha Jesusa chjichi.

²² Nižaza Jerusalenquiztan judiuž lii tjaajinacqaqui tjonchičha, tuž cjican:

—Jesusaqui Beelzebú cjeta zajraž tantača. Nii zajriž jilirž aztan yekja zajranaca chjatkatničha tiiqui. —Nuž cjichičha.

Beelzebú cjetaqui zajriž jiliritičha.

²³ Nekztanaqui nižta chiiŋi žoŋi kjawžcuqui, Jesusaqui paljajychičha, tuž cjican:

—¿Jaknužt Satanás cjita zajraqui persunpacha chjatkatasajo? ²⁴ Tsjii wajtchiz žoñinacaqui pizcquiz t'aknsasaž niiqui, tsjiimi tsjiimi quintrasasaž niiqui, nii wajtaqui tjtantaž cjequičha. ²⁵ Nižaza tsjii kjuychiz žoñinacaqui pizcquiz t'aknsasaž niiqui, tsjiimi tsjiimi quintrasasaž niiqui, nii kjuychiz žoñinaca wichansasača. ²⁶ Satanasaqui persuna t'aknsasaž niiqui, ezasača. Niiž aziqui miransnasača. Anaž azziz cjesača.

²⁷ 'Jaziqui anaž jecmi tsjii azziz žoñž kjuyquiziqui luzi atasacha, ima azziz žoñi čhejl-canaqui. Anaž niiž kinakunacami jwesi atasacha. Čhejlžcu, nekztan kinakunaca jwesi luzasača.

²⁸ Cheka ultimu werara chiyučha, tjapa ujnacami tjapa anazum takunacami pertuntaž cjesača. ²⁹ Pero jakzilta žoñit Yooz Espirituž quintrā chiičhaj niiqui, anaž pertunta cjesača. Nii žoñiqui wiñaya ujchiz cjequičha.

³⁰ Žoñiž “Zajraž tantamča amqui,” cjiñiž cjen, nuž paljajčiča Jesusaqui.

JESUSIŽ MAATAN LAJKNACŽTAN

³¹ Nekztanaqui Jesusiž maatan lajknacžtan tjončiča. Kjuy zanquiztan tsjitscu, Jesusa kjawskatchičha. ³² Kjuyltan žoñinacaqui Jesuižquiz muytata julzi želatča. Ninacaqui Jesusižquiz mazziča:

—Tekz am maa tjonchinča am lajknacžtan. Am kjawža, —cjan.

³³ Nekztanaqui Jesusaqui kjaaziča:

—¿Ject wejt maajo, wejt jilanacajo?

³⁴ Nii muytata julzi žoñinacž kjutni cheržcu, Jesusaqui cjichiča:

—Tinacača wejt maaqui, wejt jilanacaju. ³⁵ Jakziltat Yooz mantitacama ojčhaja, niičha wejt jilaqui, wejt cullaqui, wejt maaqui.

4

ZKALA ČHJACZ QUINTU

¹ Wilta Jesusaqui kot atquiz tjaajinčiča. Nekztanac muzpa žoñinacaqui niižquiz macjatžquičiča. Jalla nekztan Jesusaqui walsiquiz luzziča kot kjutni. Žoñinacazti kot atquiz žejlčiča. ² Nekztan nii walsiquiztan žoñinacžquiz muzpa tjaajinčiča, tuž cjan:

³ —Nonžna ančhucqui. Tsjii žoñiqui zkal čhjaqui tewcchiča. Nekztan zkal semilla wicchan wicchanka čhjacchiča. ⁴ Nuž čhjacan, parti semillanacaqui jicz latuquiz tjojt-sičha. Nekzi wežlanacaqui tjončiča nii semilla luli. ⁵ Parti semillanacaqui maz yokaran tjojt-sičha. Maz juntuñauqui ljawallatača yokaqui. Nekztan ratulla jecziča nii čhjactaqui. ⁶ Pero sii kjakiqui nii čhjactaqui ujsičha. Ana kozi zep'i atžcu, ratulla kjoñčiča. ⁷ Parti semillanacaqui ch'ap yokaran tjojt-sičha. Nekztan ch'apinacakaz pajkchi, nii čhjactaqui tjtanchičha. Ana pookčiča. ⁸ Parti semillanacazti zuma yokquiz tjojt-sičha. Nekztan cuza jecziča, pajkchiča, čhjerchiča. Jaziqui nii semillanacaqui quinsatunca sojtatunca, patac čhjerchiz zapa zkal ozquiz, nuž pookčiča.

⁹ Jalla nekztanaqui Jesusaqui chiižinčiča:

—Jakziltažlaja nonžni cjuñchiz niiqui, nonžla.

ČHJACZ QUINTU INTINTISKATTA

¹⁰ Wiruñauqui Jesusa zinalla želan, niiž tuncapan tjaajinta žoñinacžtan nekz žejlñinacžtan, ninacaqui Jesusa pecunchičha čhjacz quintu. ¹¹ Nekztanaqui Jesusaqui kjaaziča, tuž cjan:

—Ančucaquiz Yooz tjaajnaquičha ančuca kuzquiz, niiž mantita kamaña puntuquiztan zizjapa. Yekjap žoñinacžquizti quintunacžtankaz nii puntuquiztan chiyučha, ana criichi kuzziz cjen. ¹² Jalla nižta chiyučha, chercanpacha ana zizajo, nonzcanpacha ana intintajo, ana kuz campiižkatajo, ujquiztan ana pertunta cjisjapa.

¹³ Nekztanaqui Jesusaqui tjaajinta žoñinacžquiz pewcziča, tuž cjan:

—¿Anača tii zkala čhjacz quintu ziz, ančhucjo? ¿Jaknužt parti weriž chiita quintunaca zizasajo? ¹⁴ Ančucaquiz tjaajnuča. Zkala čhjacz quintuqui jalla tuž cjiča: Jakziltat Yooz taku paljajčhaja, jalla niičha nii zkala čhjacni žoñiqui. ¹⁵ Tsjii semillanacaqui jicz latuquiz

tjojtsičha. Čhjulatorat tsjii žoñinacaqui Yooz taku nonžaja, oralla Satanasaquí tjončha, kuzquiztan nonžta taku kjañzjapa. Jalla nižtačha nii jicz latuquiz yokažtakaz žoñinacaqui.

¹⁶Nižaza tsjii semillanacaqui maz yokaran tjojtsičha. Nii maz yokažtakaz žoñinacaqui Yooz taku nonžcu, orallaž catokčha. Pero tsjii upacamakaz Yooz tawk jaru kamčha. ¹⁷Ana koz zep'ichiz zkalažtakazza ninacaqui. Yooz taku catoktiquiztan yekjap žoñinacaqui quintrassa, ninaca chjaawjčha. Nižaza pruebanacac tjončha. Nekztan ratulla Yooz taku tjatža, quejpsa.

¹⁸Nižaza tsjii semillanacaqui ch'ap yokaran tjojtsičha. Nii ch'ap yokažtakaz žoñinacaqui Yooz taku nonža. ¹⁹Nekztanaqui čhjulinami pinsičha. Wali jiru cjis pecčha; čhjultakimiž pecčha. Nekztan kuzqui turwaysa. Nižta kuzziz cjen, Yooz taku tjananñičha. Ch'ap yokaran čhjacta semillanaca ch'apiz atipta, anaž pakji atčha. Jalla nižtaž nii ch'ap yokažtakaz žoñinacaqui. Nužquiz nii žoñž kuzquiz Yooz takuqui anaž pookčha.

²⁰Tsjii semillanacaqui zuma yokquiz tjojtsičha. Nii zuma yokažtakaz žoñinacaqui Yooz taku nonžcu, tjapa kuztan catokčha. Nekztanaqui ninacž kuzquiz Yooz takuqui cusaž pookčha. Nii zum yokquiz čhjactaqui cusaž čhjerčha —quinsatunca, sojtatunca, patac čhjerchiz zapa zkal ozquiz. Jalla nižta Yooz takuqui pookčha zuma žoñinacž kuzquiziqui.

MICHA TJEEZ QUINTU

Jesusaqui tsjiižtan quint'ichičha, tuž cjan:

²¹—Micha ana tjeeznasačha cajun kjuyltan nonzjapa, nižaza tjaž zquit koztan nonzjapa. Jalla nižta cjesajo? Anaž cjesačha. Micha tjeezqui iztacž juntuñ nonznasačha, zuma kajajo. ²²Čhjulu čhjojžtami wažtapanikaz cjequičha. Nižaza Yooz puntu ana ziztanacami kjanapacha ziztapanikaz cjequičha. ²³Jakziltažlaj nonžni cjuñchiz niiqui, nonža.

²⁴Jesusaqui cjichizakazza:

—Weriž čhiita taku zuma nonžnalla ančhucqui. Jaknužt ančhuc tjaačhaja, jalla nižtazakaz Yoozqui ančhucaciz tjaasačha; iya zakaz yapznasačha Yoozqui. ²⁵Jakziltažlaj catokni kuzziz niiqui, juc'anti zuma kuz tjaataž cjequičha, Yooz taku intintajo. Jakziltažlaj ana catokni kuzziz niiqui, juc'anti turwayskattaž cjequičha. Jalla nižtiquiztan Yooz takuqui anapan intintiñž cjequičha. —Nuž tjaajinčičha Jesusaqui.

ZKAL QUINTU

²⁶Nižaza Jesusaqui iya tjaajinčičha, tuž cjan:

—Yooz wajtchiz žoñinacaqui jalla tužučha. Tsjii žoñiqui zkala čhjacčha. ²⁷Nekztan ween tjačha, majiñ žaaža. Jaknužt zkalaqui jecžaja, pajkčhaja, nii ana zizza žoñiqui. ²⁸Zkal yokaqui juyžtokaz pookčha. Primiruqui zkalaqui jecža, nekztan pjajkjalličha, nekztan ozziz cjissa, nekztan čhjerchizza. Nuž pookčha. ²⁹Nekztan zkala wejliž cjen pajk cuchillžtan zkala ajza. Zkala ricujz timpučha.

MOSTAZA CJITA SEMILLA PUNTU

³⁰Jesusaqui tsjii quintužtan tjaajinčičha.

—Yooz wajtchiz žoñinaca, jalla nii puntu irata čhjulat cjesajo? Ančhucaciz cjiwčha, tii quintu irata cjesačha, mostaz quintu. ³¹Tsjii semillaqui mostaza cjitačha. Tjapa semilliquiztan juc'ant zkoltallačha. ³²Pero čhjacta mostaz semillaqui walja pakji pajkčha, čhjul zkalquiztanami juc'anti. Pajk itzzizza. Layni wežlanacami itzquiz julžcu, ziwžquiz jeejnasačha. —Nuž tjaajinčičha Jesusaqui.

³³Jalla nižta quintunacžtan žoñinacžquiz tjaajinčičha, quintu nonžni otčačhama.

³⁴Quintunacžtankaz tjaajinčičha. Nekztan niž persun tjaajinta žoñinacžquiz zapa quintumi intintiskatchičha, parti žoñinacž ana želan.

JESUSAQUI TJAMIMI KJAZ LJOJKIMI MANTIČHA

³⁵Tsjii nooj tjuñž kattan, Jesusaqui niž tjaajinta žoñinacžquiz paljayčičha, tuž cjan:

—Tii kotž najwktuñtanž ojklaj, —cjan.

³⁶Nekztan parti žoñinaca eccu, Jesusaqui tsjii walsiquiz ojkcichičha niž tjaajintanacžtan. Nižaza yekja walsanacaqui ninacžtan čhica ojkcichičha. ³⁷Nekztanaqui tsjii wali pjursanti tjami zalčičha. Jaziqui juc'anti tjamiž cjen walsiquiz ancha kjaz luzzičha. Walsaquí

jozipan kjaz chjijpsiča. ³⁸Jesusaqui walsa kjuyltan tsjii azquiz tjabatča, wirquin. Tjaajinta žoñinacaqui Jesusa žiñziča, tuž cjan:

—¡Tjaajiñi Maestro! ¡Ticzmayala učumqui! ¿Anam llaquisya?

³⁹Wajtzcuqui Jesusaqui tjami mantichiča, apaltajo. Kjaz ljojki mantichizakazza:

—¡Ch'uj žela! —cjan.

Nekztanac tjamimi nižaza kjaz ljojkinacami apaltichiča. ⁴⁰Nekztan Jesusaqui ninacžquiz cjichiča:

—¿Kjažtiqiztan ancha tsucchinčuctajo? ¿Ana wejtquiz kuzzizčuckaya?

⁴¹Tjaajinta žoñinacaqui ancha ispantichi cjissiča. Ninacpora parlassiča, tuž cjan:

—¿Čhjul žoñit teejo? Tiiž takucama tjamimi nižaza kjaz ljojki mi czla.

5

ZAJRAŽ TANTA ŽOÑI

¹Nekztanaqui kotž najwctuñtan irantichiča Gadara cjita yokquin. ²⁻³Jesusaqui walsiquiztan ulantan, tsjii zajraž tanta žoñiqui campu santuquiztan tjonchiča. Campu santuquin kamñitača. Nižaza anaž jecmi nii zajraž tanta žoñi čheli atatča, jir carinžtanami. ⁴Kjaž wilta kjojchami kjarami carinžtan čhejlžinzpantača. Čhejlžtiqiztan carinaqui kjoksñi pankaztača; t'una kjolžñi pankaztača. Anaž jecmi nii žoñž azquiziqui alcansatča, nii atipzapaqui. ⁵Ween majiñ campu santuran cururan ojklajñitača kjawcan. Maztan persun janchi chjojriñitača. ⁶Ažquiztan nii žoñiqui Jesusa cheržcu, zajtžquichiča, Jesusiž yujcquiz quillzlaki. ⁷Nekztan altu joržtan čhiichiča, tuž cjan:

—Jesusa, Arajpach Yooz Maati, ¿kjažtiqiztan am wejtquiz mitisi? Am roct'uča, anaž wejr tjanalla, anaž wejr sufriskatala.

⁸Tuquiqui Jesusaqui mantichiča, tuž cjan:

—Zajra, tii žoñžquiztan ulna.

Nuž mantiquiztan zajraqui čhiichiča. ⁹Nižaza Jesusaqui pewcziča:

—¿Čhjul tjuuchizamta? —cjan.

Nii zajraqui kjaaziča, tuž cjan:

—Tama cjitaž wejt tjuuqui. Tamača wejrnacqui.

¹⁰Nekztan nii zajranacaqui Jesusižquiz ancha rocchiča, ana najwcuñ ojklayskatajo.

¹¹Nekziqit tsjii lumquiz tama cuchinacaqui lulatča. ¹²Nižtaqui Jesusižquiz rocchiča, tuž cjan:

—Cuchinacžquin wejrnac cuchnalla. Cuchinacžquizkaz luzkatalla.

¹³Nekztanac Jesuac cjichiča:

—Oka nižtaqui.

Ulanžcu zajranacami cuchinacžquiz luzziča. Tsjii pizc waranka cuchinaca želatča. Zajranacaž luztan cuchinacaqui ispantichiča. Kot kjutñi jira pariju chjucuntichiča. Kjazquiz luzcu, ticziča.

¹⁴Nekztanaqui nii cuchi itzñi žoñinacaqui tsucaña zajtchiča. Wajtquinami jochquinami cwint'ičhiča cuchi kjazquiz katta quintu. Nekztan žoñinacaqui ojkičiča, nii paatanaca cheržni.

¹⁵⁻¹⁶Jesusižquin irantižcu, zajraž tanta žoñi žejtchi cherchiča. Julzi, zqitimi cajtzi, žejtchi, nižta cherchiča. Jalla nuž cheržcu nii žoñinacaqui ancha tsucchiča. Ispantichiča. Nekztan nii cheržni žoñinacaqui yekja žoñinacžquiz mazziča. Jaknužt nii zajraž tanta žoñi watčhaja, jaknužt nii cuchinacami watčhaja, nii mazmazziča. ¹⁷Nekztanaqui žoñinacaqui Jesusižquiz rocatča:

—Tii yokquiztan okalla amqui, —cjan.

¹⁸Nekztan Jesusa walsiquiz luznan nii žejtchi žoñiqui Jesusižquiz rocatča:

—Amtanpan tira žejlz pecuča, —cjan.

¹⁹Jesusaqui ana munchiča, tuž cjan:

—Am kjuya oka amqui, am jamillanacžquin. Ninacžquiz mazca, “Wejr okziča Yoozqui. Yooz čhetintitča wejrqui”, cjan.

²⁰Nekztanaqui Tunca Wajtanaca cjita yokaran ojklaychiča nii žejtchi žoñiqui. Nicjuñ jaknuž Jesusaqui nii čhjetinchižlaja, jalla nii mazmazquichiča. Jalla nekztanaqui nii maztquiztan tjapa žoñinacaqui tsucchiča.

JESUCRISTUČHA LAA ŽOŇI ČHJETINŇIQUI

²¹Nekztanaqui Jesusaqui kot najwctuñtan quejpžquichiča walsiquiz. Kot ataran želan, nekziqiu muzpa tama žoñinacaqui niž muytata ajcziča. ²²Jalla nekztan tsjii Jairo cjita žoñiqui tjonchiča. Judionacž ajcz kjuy jiliritača niiqui. Jesusa cheržcu niiž yujcquiz ezlaki quillziča. ²³Nekztan Jesusižquiz ancha rocchiča, tuž cjican:

—Ticzmayaz wejt kolta uzqui. Tjonžcalla amqui. Wejt uzaquiz am persun kjaržtan lanžinalla, wejt uz žetajo, ana ticznajo.

²⁴Nekztanac Jesusaqui nižtan chica nii žoñž kjuya ojkičiča. Okan tama žoñinacaqui Jesusiž wirquiz apziča, ts'acjascan tejwc tejwcarascan. ²⁵Žoñinacž taypiquiz tsjaa laa žon želatča. Tuncapan wata ljoc okiñtača. ²⁶Tsjii kjaž kullñi žoñinacžquin ojkinča. Juc'anti sufriskatchiča ninacaqui. Nužquiz inapankaz tjappacha naaža cusasa castassinča. Naa žonqui juc'anti laa cjisnatča; ana wira žeti atatča. ²⁷⁻²⁸Jesusiž paata quintunaca nonchinča. Nekztan Jesusiž wirquiztan macjatchinča. Tama žoñinacž taypiquiz želan, tuž cjican pinsichinča:

—Niiž zquitikaj lanžnučhaj niiqui, žetaka.

Nekztan niž zquiti lanžinča. ²⁹Lanžcu nii orapacha tsijtsičha naaža ljoc ojkiñiqui. Žejtchinča. Persun janchiquiz naychinča, nii laaquiztan žejtchi. ³⁰Jesusaqui persun kuzquiz naychiča, niž aztan naa žon čhjetinchiča, nii. Nayžcu wir kjutñi cherziča. Nekztan pewczičha, tuž cjican:

—¿Ject wejt zquiti lanzejo?

³¹Nekztanac niž tjaajinta žoñinacaqui cjichiča:

—Cherzna. Tama žoñinaca ancha amquiz ts'acjassa. ¿Kjažtiquiztan am nuž pewczjo, “Ject wejr lanzejo?” cjicanajo.

³²Nekztan Jesusac žoñinacž kjutñi chercherziča, jectčhalaj nii lanzi, nii pajzjapa.

³³Nekztan naa žonqui persun curpu žejtchi nayžcuqui, ekeksan cjarcatcan macjatchinča, Jesusiž yujcquiz quillzinča. Nekztan naaqui tjapa werara mazzinča. ³⁴Nekztan Jesusaqui cjichiča:

—Cullacalla. Tjapa kuztan criichiž cjen, čhjetinta cjissamča. Jaziqiu žejtchipanim cjequičha. Cuntintum okaquičha.

³⁵Nekztanaqui Jesusiž naa žonaquiz chiyan, tsjii žoñinacaqui tjonchiča; Jairo cjita judio jilirž kjuyquiztan tjonchiča. Nii jiliržquiz cjichiča:

—Am uzqui ticzinča. Anam iya tii maestružquiz molistis waquiziča.

³⁶Jesusazti nii žoñinacž chiita taku ana catokchiča. Nekztan nii jiliržquiz cjichiča:

—Ana am niic kuz turwayskata. Yoozquin tjapa kuztanpan cjeella.

³⁷Nekztan Jesusaqui Pedružtan Santiagužtan Juanžtan (Santiaguž lajk) ninacakaz apskatchiča. Partinaca ana apskatchiča Jesusaqui. ³⁸Nekztan judío jilirž kjuyquin irantižquichiča. Nekzi žoñinacaqui ancha kjawcanž kaatkalča. Nižta cherchiča Jesusaqui. Ancha arnatča nii kañi žoñinacaqui. ³⁹Kjuyquin luzcu, Jesusaqui cjichiča:

—¿Kjažtiquiztan ancha aranje, nižaza kaajo? Taa uzqui anača ticzin, tjajča.

⁴⁰Nekztan nii žejlñi žoñinacaqui tjassiča, nii nonžcu. Jesusazti zancuñ nii žoñinaca ulanskatchiča. Nekztanaqui Jesusaqui maa ejpžtan niž mazinacžtan luzziča, jakziquin naa uz želatčhaja, nicju.

⁴¹Nekztan Jesusaqui naa uza kjara tanzičha. Nižaza altu tawkžtan chiichiča:

—Talita cumi, —cjican.

Nii takuqui cjičha, “Usalli, žaazna”.

⁴²Nekztanac nii orapacha naa uzqui žaaziñča. Ojklaychiñča. Tuncapan watchiztača naa uzqui. Nekztanaqui nii žoñinacaqui kuz kata tsucchiča. Ancha ispantichiča.

⁴³Nekztan Jesusaqui zuma iwjt'ichiča, tuž cjican:

—Ana jeczquizimi tii čhjetinta quintu chii chiyacuicha.
Nuž mantižcu, ninacžquiz mantichizakazza, naa uzaquiz čhjeri tjaajo, nii.

6

NAZARET CJITA WAJTQUIN OJKCHIČHA

¹ Nekztanaqui Jesusaqui najwctan persun wajtquin ojkchiča niž tjaajintanacžtan.
² Jeejz tjuñquiziqui judionacž ajcs kjuyquiz tjaajinchiča. Nii nonžcuqui žoñinacaqui ispartichiča, tuž cjan:

—Ĵakziquin zizzit tii žoñi tii tjaajinznacaya? ĴJaknuž zizzit tii tjaajinznacaya? ĴJaknuž paachit tii milajrunacaya? ĴJaknužupan teejo? ³ Tiiqui carpintirukazla, María majčičha tiic, Ĵana jaa? Tiiž lajknacaqui Jacobo, José, Judas, Simón cjitača. Ninacžtan tiiž cullaquinacžtan tii wajtquiz učhumnacžtan kamča. —Nuž cjichiča.

Nekztanaqui nii wajtchiz žoñinacaqui Jesusiž quintra muzpa žawziča. ⁴ Nekztan Jesusac chiichiča:

—Tjapa žoñinacaqui Yooziž uchta profetžquiz rispitle. Pero persun wajtchiz žoñinacami persun parintinacami persun familianacami profetžquiz anaž rispitz pecniča.

⁵ Nekziqui nii wajtquiz tsjii kjažultan žoñi čhjetinchiča, kjaržtan lanžcu. Ana iya milajru paayi atchiča. ⁶ Ana criiñiž cjen Jesusaqui cjichiča:

—ĴKjažtiquiztan tii žoñinacaqui ana criijo? ĴKjažt cjisnaquejo?

Nekztanaqui nii wajtquiztan ulanžcu, visinunacž wajtquiztan wajta tjaajinñi ojklaj-
chiča Jesusaqui.

TJAAJINTA ŽOÑINACA CUCHANTA

⁷ Jesusaqui niž tuncapan tjaajinta žoñinaca kjawžcu, pucultan pucultan cuchanchiča:

—Ančhucqui Yooz aztan zajranaca chjatkataquiča, —cjan.

⁸ Jalla nekztanac mantichiča, tuž cjan:

—Ančhucqui anaž čhjulumi chjichaquiča jiczjapaqui, anaža žak quelzmi anaza čhjer-
imi anaza paazmi. Tsjii atskaz chjichaquiča. ⁹ Čhjata čhjatžcuča okaquiča. Nižaza tsjii zquitilchizkaz okaquiča, ana pizc zquitchiz. ¹⁰ Ančhucqui jakziquinž alujasačhaja, nekziž kamaquiča, čhjulorat nii wajtquiztan ulnačhaja, niicama. ¹¹ Jakzilta watjat ančhuc ana cherez pecčhaja, nižaza ančhuca takumi ana nonz pecčhaja, jalla nii wajtquiztan ulnaquiča. Nekztan nii yok pulpu ančhuca kjojchquiztan tsajt tsajtsnaquiča, ninacž uj tjeezjapa. Ultim weraral cjiwča, juyzu tjuñquiziqui Sodomo nižaza Gomorra cjita watjanacchiz žoñinacaqui castictaž cjequiča. Pero nii ana ančhuc pecni žoñinacazti juc'anti castictaž cjequiča. —Nuž cjichiča Jesusaqui.

¹² Jalla nekztanaqui niž tuncapan tjaajinta žoñinacaqui Yooz taku paljayi ulanchiča, tuž cjan:

—Ančhucqui tjappacha kuz campiya. Ančhuca uj paaznacaqui eca.

¹³ Nekztanaqui zmalu zajranaca chjatkatchiča. Nižaza asiitižtan achquiz tjawkžcu, muzpa laanaca čhjetinchiča.

JUAN BAUTISTA CONTA

¹⁴ Tjapa kjutni nii yokaran žoñinacaqui Jesusiž ancha wali paata milajrunaca zizziča. Herodes cjita nacionž chajwc jilirimi zizzizakaztača. Nii Jesusiž paata milajrunacž puntu nonžcuqui, Herodesaqui cjichiča:

—Juan Bautistala tiiqui. Ticziquiztan jacatatchižlani. Jalla nižtiquiztan walja milajrunaca paazjapa poderchizlani.

¹⁵ Yekjap žoñinacaqui cjichiča:

—Elias cjita profetila tiiqui.

Yekjapaqui cjichiča:

—Tuquitan Yooz taku parliñi profetažtakazla tiiqui.

¹⁶ Jesusiž quintu nonžcu Herodes cjita nacionž chawc jiliriqui cjichiča:

—Juan Bautistala tiiqui. Wejrqui tiiž acha pootkatchinča. Anziqui jacatatchila tiiqui.
—Nuž cjichiča Herodesaqui.

¹⁷ Tuquiqui tužu watchičha. Herodiy cjita žonqui Felipiž tjuntačha. Felipitačha Herodes jilaqui. Nekztan Herodesaqui Felipiž tjunatan zalsičha. Nekztan Herodiy cjita tjunqui Herodižquiz paljaychičha:

—Nii Juan tankata. Carsilquiz chawjczna. —Nuž cjichinčha naaqui.

¹⁸ Tuquitan Juanqui Herodes cjita jiliržquiz chiižinchičha, tuž cjican:

—Am persun jilž tjunatan zalsamčha amqui. Nuž ana waquisičha. Jaziqui liy quintram kamčha amqui.

¹⁹ Nekztanaqui naa Herodiyqui Juanž quintra ancha žawjchinčha. Conkatzpan pecatčha. Pero ana atchinčha. ²⁰ Juanqui zuma kuzziztačha, ana ujchiz žoñi. Nekztan Herodesaqui Juanžquiz eksičha. Nekztan Herodiyqui ana conkati atchinčha. Herodesaqui Juanž taku nonžcu, walja paysnakchičha. Jalla nuž cjenami Juanž taku justazñipankaztačha.

²¹ Wiruñauqui niiz cumpliaños pjijztiquiz Herodesaqui cusa čherinaca luli kjawzičha. Wajt jilirinaca, sultatž jilirinaca, Galiliquiztan ricach žoñinaca, ninaca kjawzičha. Nii tjuñquiz naa Herodiyqui ancha kuz tjutzinčha, Juan conkatzjapaqui. ²² Nii nooj jakziquin čheri lujlčhaja, nicju Herodiyž turqui tsati luzzinčha. Nekztanaqui naa turaž ancha tsajtchinčha. Nii cheržcu, justazzičha Herodižtan niiz invitta žoñinacžtanaqui. Nekztan nii Herodes jiliričqui naa turaquiz paljaychičha, tuž cjican:

—Čjululm pecčhaj niiqui, wejtquiztan mayaquičha. Amquiz tjaačha.

²³ Jaziqui Herodesac turaquiz juramentužtan chiichičha, tuž cjican:

—Čjululu pecanami amiž maytacama chicat wejt nacionami amquiz tjaasačha.

²⁴ Nekztan ulanžcu naa turqui maa pewczinčha:

—¿Čjulul wejr mayas, mama? —cjican. Maaqui kjaazinčha:

—Juan Bautistiž acha maya.

²⁵ Nekztan apura jiliržquiz luzquichinčha naa turqui. Maychinčha maaž mantitacama, tuž cjican:

—Anzpacha tsjii chuwwiz Juan Bautistiž achal pecučha.

²⁶ Nekztanaqui nii jiliričqui ancha llectazzičha. Juramentužtan chiichiž cjen, nižaza niiz mazinacaž nonziž cjen, ana kjaž cjiji atchičha. ²⁷ Nekztan sultatu cuchanchičha Juanž acha zjijcajo. ²⁸ Carsila ojkičha mantita sultatuqui. Nekztanaqui Juanž acha pootžcu chuwwiz zjijcchičha. Naa turaquiz acha tjaatatačha. Nekztan naaqui maaquin acha tjaažquichinčha.

²⁹ Jalla nekztanaqui Juanž acha poota nonžcuqui, Juanž tjaajintanaqui niiz curpu mayi tjonchičha, chjitzjapa, yokquiz tjaztjapa.

LULJL ČHJERI TJAATA

³⁰ Wiruñauqui Jesusiž cuchanta žoñinacaqui quejpžquichičha. Jesusižquiz cwint'ichičha tjapa ojklajtanacami tjapa tjaajintanacami. Nekztan Jesusaqui ninacžquiz paljaychičha, tuž cjican:

³¹ —Jakziqint ana žoñinaca žejlčhaja, nicju tjappachaž ojklalla. Nicju jeejžcaquičha. Ancha žoñinacaž tjončtjonžtiquiztan wira ana čherimi lujlzucatačha.

³² Nekztanaqui Jesusižtan niiz tjaajinta žoñinacžtan, jalla ninacakaz ojkičha; ana žejlz yokquin walsiquiz ojkičha. ³³ Pero eclichi žoñinacaqui ninaca ojkičheri. Žoñinacaqui ninaca pajžcu tjapa wajtquiztan kjojčuñ zajtchičha. Jaziqui nii žoñinacaqui Jesusiž tuqui irantichičha. ³⁴ Jesusaqui nii yokquin irjatžcuqui walsiquiztan ulanchičha. Nekztan tama žoñinaca cherzičha. Nii žoñinaca okzičha. Ana awatirchiz uuzanacžtakaz nii žoñinaca želatčha. Nekztanac Jesusac walja tjaajinchičha. ³⁵ Ima tjuñ katalla Jesusiž tjaajintanaqui tjonchičha, tuž cjican:

—Ana žejlz yokquizla učumqui. Tjuñi qui wajillaž kataquičha. ³⁶ Jaziqui tii žoñinacaqui joch kjuñimi wajt kjuñimi cuchnalla, nicju čherimi kjayžcajo. Ninacžta čheri ana žejlčha.

³⁷ Jesusaqui kjaazičha:

—Ančhucčha tinacžquiz čheri tjaa.

Ninacaqui cjichičha:

—¿Tinacžquiz čhjeri tjaazjapa, paa patac paaztan t'anta kjayi okas?

³⁸Nekztan Jesusac kjaaziča:

—¿Kjaž t'antat ančhucalta žejljo? Cheržca ančhucqui.

Nekztan cheržcu quejžpžquichiča ninacaqui. Nekztan chiichiča, tuž cjican:

—Pjijska t'anta pizc ch'iz žejlča.

³⁹Jalla nekztanaqui Jesusaqui ninacžquiz cjichiča:

—Jaziqui pastu yokaran t'aka t'aka tii žoñinaca tjulžna, ⁴⁰patacquiztan pataca, pjijska tuncquiztan pjijska tunca.

Nekztan nužupan julziča žoñinacaqui. ⁴¹Nekztanaqui Jesusaqui nii pjijska t'anta pizc ch'iz niiz kjarquiz tanzcuqui, tsewchuc cherziča. Nekztan Yooz Ejpžquin gracias cjican chiichiča. Nekztan t'anta kjolziča. T'una t'una kjolžcu, tjaajintanacžquiz tojziča, parti žoñinacžquiz onajo. Nižaza nii pizc ch'iz tojzizakazza žoñinaca lulajo. ⁴²Nekztan tjapa žoñinacaqui chjekci cjissiča. ⁴³Nekztanaqui žejtchi t'anti t'unanacami ch'iz t'unanacami tuncapan canasta chjippi ricujchiča. ⁴⁴Nii t'anta lujlñi luctak žoñinacaqui pjijska warankatača.

JESUSAQUI KJAZ JUNTUŇ OJKCHIČHA

⁴⁵Nekztanaqui Jesusaqui niiz tjaajintanaca walsiquiz luzkatchiča, nii kota kakajo, Betsaida cjita wajtquin kotž najwcchaktan. Ninacž ojktan Jesusaqui parti žoñinacžquiz cjichiča:

—Ančhuca kjuyaž okaquiča.

⁴⁶Žoñinaca cuchanžcuqui Jesusaqui cur kjutñi yawchiča, Yooz Ejpžtan parlisjapa.

⁴⁷Nii oraqui zumchitača. Curquin Jesusaqui zinallatača. Pajk kotquiziqui nii tjaajinta žoñinaca walsiquiz kjaz kot taypiquintača. ⁴⁸Jesusaqui curquiztan walsa cherchiča. Tjamiqi pjursantitača. Nii tjaajinta žoñinacaqui tjapa aztan langznatča, najwcchaktan walsa tjakzjapa. Ima kjantatiž cjen ninacžquin ojkchiča Jesusaqui. Kjaz juntuŇ ojkchiča, tsjii latu watzjapa. ⁴⁹Nii tjaajintanacazti Jesusa kjaz juntuŇ ojkñi cherchiča. Nekztanac kjawchiča:

—Cuntinaž caa, almaž caa, —cjican.

⁵⁰Ancha tsucchiča. Nekztanaqui Jesusaqui paljaychiča, tuž cjican:

—Anača tsuca ančhucqui. Wejrtča. Tjup kuzziz cjee.

⁵¹Nekztanaqui walsiquiz luzziča Jesusaqui. Nii oraqui tjamiqi zekziča. Jalla nekztanaqui tjaajintanacaqui ispantichiča. Inakaz cjissiča. ⁵²Ninacatača ana nii t'anta milajru intintazñinacaqui. Imazi ninacž kuznacatača zizñi.

JESUSAQUI LAA ŽOÑINACA ČHJETINCHIČHA

⁵³Nekztanaqui pajk kota kajžcuqui Genesaret cjita yokquiz irantichiča. Nekztan walsa kjaz kot atquiz mokžcu ecchiča. ⁵⁴Walsiquiztan ulnan žoñinacaqui Jesusa pajchiča. ⁵⁵Jalla nekztanac nii žoñinacaqui tjapa kjutñi ojkchiča, laanaca zjijczjapa. Jakziquint Jesusa želatčhaja, nicju laa žoñinaca zjijcchiča zquitquiz callžcu. ⁵⁶Jochiran kolta watjaran pajk watjaran ojklayatča Jesusaqui. Jakziquint ojklayatčhaja, nekzi laa žoñinaca zjijcñipankaztača. Nižaza žoñinacaqui Jesusa rocchiča, laa žoñinaca Jesusiž zquiti lanznajo. Jesusiž zquiti lanzñinacaqui žejtchiča.

7

¿ČHJULUT UJ CJES ŽOŇŽQUIZQUI?

¹Nekztanaqui fariseo žoñinacaqui Jesusižquiz macjatchiča, tsjii kjažt judiuž lii tjaajiñi-nacžtan Jerusalenquiztan tjonchi. Jakziquin Jesusa želatčhaja, jalla nicju ajcsiča. ²Nižaza nekzi Jesusiž tjaajinta žoñinacaqui čhjeri lulatča, kjara awjz costumbre ana paažcu. Nuž ana kjara awjžcu lulan, cherchiča parti žoñinacaqui. Nekztan quintra chiichiča. ³Nii fariseo žoñinacaqui ana kjara awjžcu, wira ana lujlñitača. Parti judio žoñinacaqui nižtakaztača. Jaziqui tuquita žoñinacž costumbre nužupan chjojñitača. ⁴Nižaza čhjeri kjayžcu ana kjara awjz costumbre paažcu, ana wira lujlñipantača. Nužupan ancha

costumbre cumpliñinacatača. Wazunacami mazcanacami jir mazcanacami catrinacami nižtanaca ajunñipankaztača. ⁵Nuž cjen nii fariseo žoñinacaqui judiuž lii tjaajiñinacžtan Jesusižquiz pewcziča, tuž cjan:

—¿Kjažtiquiztan am tjaajintanacaqui tuqita costumbre ana cumplejo? Ana kjarajwžcu lujl-la.

⁶Jesusaqui ninacžquiz kjaaziča, tuž cjan:

—Anazum kuzziz žoñinacčucča ančhucqui. Ultim werara ančuca puntuquiztan chiichiča tuqita Isaías cjita žoñiqui. Tuž cjan cjiřtkalča:

“Tii žoñinacaqui tawkžtankaz Yooz rispitiča; juntunkazza. Ultimu kuzquiz ana Yooz rispitiča. ⁷Inapankaz Yooz sirwiča tii žoñinacaqui. Tinacaqui žoñž taku tjaajiñiča, “Tiiča Yooz takuqi”, cjan”.

—Nuž cjiřtkalča Isaías cjita žoñiqui.

⁸Jesusaqui cjichizakazza:

—Nižtapan ančhucqui Yooziž mantita ana cumpliñčucča. Žoñž cuzturumpi cumpliñčucpankazza. Mazcanacami wazunacami ajunž nižta costumbrenaca cumpliñčucpankazza. ⁹Ančhucqui Yooziž mantita tjanča. Ančuca costumbrekaz tucquin utča. ¹⁰Tuqita Moisés cjita žoñiqui chiižinchiča:

“Am maa ejp rispita. Nižaza jakziltami niiž maa ejpž quintra chjaawjkatačhaja, jalla niiqui, contaj cjila”. Nuž mantichiča Moisesaqui. ¹¹Ančhuczi tuž cjiñčucča: “Jakzilta žoñit niiž maa ejpžquiz chiyasača, tuž cjan, “Wejrqui amquiz anal yanapi atasacha. Tjapa wejt cusasanaca, Yoozquiz tjaatača”. ¹²Nuž chiyachaj niiqui, maa ejp yanapž anaž waquisiča”. Nuž cjiñčucča ančhucqui. ¹³Nižtiquiztan ančuca costumbre ana tjatžniž cjen, Yooz mantitaqui tjatža. Jalla nižta paayiñčucpankazza ančhucqui. —Nuž chiižinchiča Jesusaqui.

¹⁴Nekztanaqui Jesusaqui wilta žoñinaca kjawziča, tuž cjan:

—Ančhucqui, tjappacha nonžna. Wejt taku intintazni cjee. ¹⁵Anaž zawntan kjuylchuc luzñiqui uj cjesača žoñžquiziqui. Žoñž kuzquiztan ulanñi niiž uj cjesača žoñžquiziqui. ¹⁶Jakziltažlaj nonžni cjuñchiz niiqui, nonžla.

¹⁷Nekztanac Jesuac žoñinaca eccu kjuya ojkcichiča. Kjuya luzcu niiž tjaajintanacaqui Jesusižquiz nii ana intintazta takunaca pewcziča. ¹⁸Jalla nekztan Jesusaqui kjaaziča, tuž cjan:

—¿Ančhucqui nižtakaz anaž naazy? ¿Anapanž intintiya? Tužuča niiqui. Anača zawntan kjuylchuc luzñiqui uj cjesača žoñžquiziqui. ¹⁹Nii lujltaqui kuzquiz ana luzasača; pjuchquizpanž luzza. Nekztan pjuchquiztan wir kjutñi ulanča zawncchuc. Jalla nižtiquiztan čjul čheripankaz lulasacha žoñinacaqui.

²⁰Nekztan cjichizakazza:

—Kuzquiztan ulanñi niiž uj cjesača žoñžquiziqui. ²¹Žoñž kuzquiztan tižta ana walina ulanča: anawali pinsiz, adulteriuquiz ojklaz, yekja maatakžtan žejlz, žoñi konz, ²²tjañi cjis, wali jiru cjis pecz, uj paaz, incallz, anawali kamañchiz cjis, čhultaki zmaz, anazum takunaca joojooz, mita cjis, anazum kuzziz cjis. ²³Nižtanaca kuzquiztan ulanča. Jalla nižtanaca uj cjesača žoñžquiziqui.

JESUSIŽQUIN KUZUZ MAATAKA

²⁴Nekztanaqui Jesusaqui tsjisiča. Jakziquin Tiro Sidón cjita watjanaca žejlčhaja, nijcchuc ojkcichiča. Nicju tsjii kjuyquiz alujassiča. Ana žoñiž pajta kamz pecatča. Pero ana pajta kamzqui anapantaž atčuca. ²⁵Jesusiž tjonta zizcu nii orapacha tsjaa žonqui Jesusiž yujcquiz quillzaki macjatžquichinča. Naaža uzqui zajraž tantatača. ²⁶Sirofenicia cjita yokchiz žontača naaqui. Grecia cjita taku chiyiñtača. Jaziqui naa žonqui Jesusa rochinča:

—Wejt uzaquiztan zajra chjatkatžinalla, —cjan.

²⁷Nekztan Jesusaqui kjaaziča:

—Primiru maatinaca čjери čjeku lujlsa. Maatinacž čheriqui kjañžcu pawcžquin tojtanz anaž waquiziča.

²⁸Naaqui kjaazinča, tuž cjican:

—Nužupanzača. Weraram chiiča. Pero pacunacami mis koztan ocjalž tajwka čhjerinaca lujlča.

²⁹Nekztanac Jesusac chiičiča:

—Amiž zuma chiitiquiztan zajraqi ulanskatchinča am uzaquiztanaqui. Jaziqui am kjuya quepa.

³⁰Nekztanaqui kjuya quejpchinča naa žonqui. Nii kjuyquin naaža uz ajpsquiz želanami, zajraqi chekapanž ulantkalča.

OŃ ŽOŃI ČHJETINTA

³¹Nekztan Jesusaqui Tiro cjita yokquiztan quejpžquichiča. Sidón cjita watja, Decápolis cjita yoka watžcu Galilea cjita kot ataran ojklaychiča. ³²Nicju tsjii oň žoňi Jesusižquiz zijictatača. Cjacija chiiñizakaztača. Nekztan žoñinacaqui Jesusižquiz rocatča:

—Am kjaržtan tii žoňi lanžinalla, —cjican.

³³Nekztanaqui Jesusaqui nii žoňi chjitchiča tsjii latu. Nekztan nii oň žoňž cjuñquiz loc'anžtan čhjarziča. Nekztan llawsižtan tjujtžcu nii žoňž las lanziča. ³⁴Nižaza Jesusaqui tsewchuc cheržcu:

—Aayj, —cjican llactazziča.

Nekztan chiičiča,

—Efata, —cjican.

Nii tsjemat taku cjiča, “Cjetzi cjee”, nii.

³⁵Nekztanac nii žoňž cjuñinacaqui cjetzi cjissiča. Niiž lasqui žejtchizakazza. Cusa chiiñi cjissiča. ³⁶Nekztanaqui Jesusaqui mantichiča, tuž cjican:

—Tii anam jecžquizimi maznaquiča.

Nekztanaqui žoñinacaqui nii taku ana cassiča. Nekztan Jesusaqui juc'anti ana chiychijajo mantichiča. Nekztan nii žoñinacazti juc'anti mazmazziča tjapa kjutñi.

³⁷Jaziqui walja ispantichiča nonžni žoñinacaqui, tuž cjican:

—Tjapa niž paatanacaqui ancha zumača. oň žoňimi nonskatñiča. Up žoňimi chiikatñiča. Ancha cusača.

8

JESUSAQUI ČHJERI TJAACHIČHA

¹Tsjii nooj muzpa žoñinacaqui wilta ajcsiča. Čhjeri miranzcama žejlchiča. Nekztan Jesusaqui niž tjaajintanaca kjawžcu, ninacžquiz paljaychiča, tuž cjican:

²—Čhjep maj tii žoñinacaqui wejtta kamchiča. Jaziqui tinacaqui ana čhjerchizza. Tinacžquiz okžnuča. ³Ana čhjeri tjažcu kjuya cuchnasaž niiqui, jiczquiz čhjerž kjara tismayasača. Yekjap žoñinacaqui ažquiztan tjonchiča.

⁴Jesusiž tjaajintanacaqui kjaaziča:

—Wazquizza učhumqui; anaž čhjulumi žejlča tekziqui. Ĺčjul čhjeri tii žoñinacžquiz tjaasajo, wejrnacjo?

⁵Nekztan Jesusaqui ninacžquiz cjichiča:

—ĹKjaž t'antat ančhucalta žejlya?

Tjaajintanacaqui kjaaziča:

—Pakallaku.

⁶Jaziqui Jesusaqui nii žoñinacžquiz chiičiča:

—Ančhucqui, yokquiz julzna.

Nekztanaqui t'anta tanžcu Yooz Ejpžquin gracias cjican chiičiča. Nekztan t'anta kjolkjolžcu, niž tjaajintanacžquiz tjaachiča, žoñinacžquiz tojznajo. Nekztan partir psychiča tjaajinta žoñinacaqui. ⁷Nii tjaajintanacaqui tsjii kjaž chi'iznacchiztača. Nii tanžcu Jesusaqui wilta Yooz Ejpžquin gracias cjican chiičiča. Nekztan tjaajintanacžquiz chiičiča:

—Tii žoñinacžquiz tii ch'iznaca tojna, ančhucqui.

⁸ Nii žoñinacaqui lujlchiča, chjekañcama. Nekztan žejtchi čherinaca tjappacha juntižcu, pakallaku canasta chijjpsiča. ⁹ Nii lujlñi žoñinacaqui tsjii pusi warankatača. Nekztan Jesusaqui žoñinaca cuchanchiča, kjuya okajo. ¹⁰ Jesusaqui tjaajintanacžtan walsiquiz luzcu, Dalmanuta cjita yokquin ojkchiča.

JESUSIŽ QUINTRA ŽOÑINACA

¹¹ Fariseo žoñinacaqui tjonžcu, Jesusižquiz ch'ayi kallantichiča, tuž cjican:

—Amqui Yooztamčhalaj niiqui, milajru tekz paalla nižtaqui.

¹² Nekztan Jesusaqui walja llactazcan ujrsiča. Nekztan čiichiča, tuž cjican:

—¿Kjažtiquiztan milajrukaz pecjo? ¿Tii žoñinacajo? Weraral cjiwčha, milajru ana paasača.

¹³ Nii žoñinaca eccu, walsiquiz luzcu, ojkchiča, wilta kot nawjktuñtan kajczjapa.

¹⁴ Jesusiž tjaajintanacaqui t'anta chjitz tjatsiča. Tsjii t'antakaz želatča walsiquiz.

¹⁵ Nekztan Jesusaqui ninacžquiz chiižinchiča:

—Cwitazaquiča fariseož liwaturžquiztan nižaza Herodiž liwaturžquiztan.

¹⁶ Nekztan nii tjaajinta žoñinacaqui Jesusiž chiižintiquiztan palt'ichiča, tuž cjican:

—Učhumqui ana t'anta zjičtala. ¿Kjaž cjeequejo?

¹⁷ Nekztan ninacaž nuž parlan, Jesusaqui pewcziča:

—¿Kjažtiquiztan t'antiquiztan parli ančhucjo? ¿Anapanž intintiy? ¿Kjažtat ančhucjo? ¿Ančhuca kuzqui ana naazñipan, kjažtatajo? ¹⁸ ¿Ančhuca čhjujuiqui anaj cherchiya? ¿Ančhuca cjuñimi anaj nonziya? ¿Tii anapanž cjuñkaya? ¹⁹ Wejrqui pjijjska t'antižtan pjijjska warank luctak žoñinaca lulunchinča. ¿Nekztan kjaž canastat nii žejtchi t'anta ricujtatajo?

Ninacaqui kjaaziča:

—Tuncapani.

²⁰ Nekztan Jesusaqui pewczizakazza:

—Wejrqui pakallaku t'antižtan pusi warank žoñi lulunchinča. ¿Nekztan kjaž canastat nii žejtchi t'anta ricujtatajo?

Ninacaqui kjaaziča:

—Pakallaku.

²¹ Nekztan Jesusaqui pewczizakazza:

—¿Anapanž zuma intintas, ančhucjo?

ZUR ŽOÑI ČHJETINTA

²² Nekztan Betsaida cjita yokquin irantichiča. Nekzi tsjii kjažu žoñinacaqui Jesusižquiz tsjii zur žoñi zjičchiča. Zjiččcu rocchiča:

—Tii lanžinalla, —cjican.

²³ Nekztan Jesusaqui nii zur žoñž kjarcu tanžcu, wajtž tjuya chjitchiča. Nekztan niiž čhjujquiz llawsižtan t'awziča. Kjaržtan lanžcu pewcziča:

—¿Jaziqui čhjultakinacam cherya?

²⁴ Zur žoñiqui acha waytižcu chercherziča. Nekztan kjaaziča:

—Žoñi cherchucača, ojklayñi. Pero ana cusal cheruča; muntinacažtakaz nii žoñinaca cheruča.

²⁵ Jesusaqui nii žoñž čhjujquiz wilta kjaržtan lanziča, zuma cherajo. Nekztan niiž čhjujqui zuma žejtchiča. Nii žoñiqui zuma calaru cherchiča ažkquin. ²⁶ Jesusaqui čhjetinžcu niiž kjuya cuchanchiča, tuž cjican:

—Anam wajtquiz luzaquiča. Anaž jecžquizimi tii čhjetinta chiyaučiča.

¿JECT JESUSAQUI?

²⁷ Nekztan Jesusaqui tjaajintanacžtan ojkchiča, Cesarea de Filipo cjita yok kjutñi. Ojkcan Jesusaqui pewcziča:

—¿Ject wejrjo? ¿Kjažt cjii žoñinaca wejt puntuquiztanajjo?

²⁸ Niiž tjaajinta žoñinacaqui kjaaziča:

—Yekjap žoñinaca, “Juan Bautistala”, cjiča. Yekjapac, “Eliasia”, cjiča. Yekjapac, “Tsjii Yooz taku parliñi profetala”, cjiča.

- ²⁹ Nekztan Jesusaqui pewcziča:
 —¿Ančhuczti, jaknuž cjii wejt puntuquiztanajo?
 Pedruqui kjaaziča:
 —Yooziž cuchanžquita Cristumča amqui, —cjican.
³⁰ Nekztan Jesusaqui mantichiča:
 —Anaž jecžquizimi nii maznaquiča.

JESUSAQUI MAZINCHIČHA NIIŽ TICZ

- ³¹ Nekztan niiz tjaajinta žoñinacžquiz wilta tjaajni kallantichiča, tuž cjican:
 —Wejrqui tsewctan cuchanžquita Yooz Žoñtča. Jaziqui ancha t'akjisača. Wajt jilirinacami timlu jilirinacami judio tjaajiniñacami, ninacaqui wejtquiz chjaawjkataquiča. Wejrqui contal cjeeča. Nekztan čhjep majquiztan jacatatača.
³² Jesusaqui nuž kjanacama niiz ticz mazinchiča. Tii mazintiquiztan Pedruqui tsjii latu Jesusa chjitchiča. Nekztan paljaychiča, tuž cjican:
 —¿Kjažtiquiztan nižta chiijo? Anapan nižta chiyalla amqui.
³³ Jesusaqui wir kjutni parti tjaajinta žoñinacžquin cherziča. Nekztan Jesusaqui Pedro ujziča, tuž cjican:
 —Satanás, zaraka wejt yujcquiztan. Amiž pinsita anača Yooziž pinsita, žoñiž pinsitakazza.
³⁴ Nekztan Jesusaqui nekz željni žoñinaca kjawžcu, chiižinchiča, tuž cjican:
 —Jequit wejttañ chica ojklaz pecčhaj niiqui, primiraqui persun kamañ wiraqui tjažla. Sufrijsapaqui listoj cjila, ticzcama. Nekztan wejttañ chicaž kamaquiča. ³⁵ Jakziltat persun kamañ wira ana tjažt pecčhaj niiqui, arajpach kamañiqui ana tjaataž cjequiča. Jakziltat tii muntuquiz Yooz tawc laycu nižaza wejt laycu persun kamañ wira tjažznačhaja, jalla niiqui arajpachquin wiñaya kamaquiča. ³⁶ Tsjii žoñiñi tjaapa tii muntuquiz željni cusasanaca canasača. Pero nekztan infiernuquin okaquž niiqui, tjaapa nii canta cusasanaca, ¿čhjulpat sirwasajo? Inakaz cjequiča. ³⁷ Arajpachquin Yooztan kamzqui persun liwriizqui anaž paasztanac kjayasača. ³⁸ Wejrqui cjiwča, tii muntuquiz žoñinaca željča, ana Yooz kuzcama ojklayni, persun kuzcama ojklayni, ujchizza. Nii žoñinacžtan želan, jakziltat wejtquiztan nižaza wejt tawcquiztan asačhaja, nižaza ana pajni chiyáčhaj niiqui, jalla niizquiztan wejrzañ ana pajni chiyáčha. Tsjii nooj wejrqui wejt Ejpž aztan tjonača zuma arajpach Yooz anjilanacžtan. Nii ora wejtquiztan asni ana pajni žoñinacžquiztanacqui wejrzañ ana pajni chiyáčha. Wejrqui tsewctan cuchanžquita Yooz Žoñtča. —Nuž cjichiča Jesusaqui.

9

- ¹ Jesusaqui cjichizakazza:
 —Ultimu werara wejr cjiwča, tsjii nooj Yoozqui aztan mantaquiča. Ima nii tjuñi tjonan yekjap tekzta žoñinacaqui anaž ticznaquiča.

JESUSAQUI TSJEMATA CJISSIČHA

- ² Sojta tjuñquiztan Jesusaqui čhjepultan tjaajinta žoñinaca chjitchiča, Pedro, Jacobo, Juan, jalla ninacžtan. Pakpaltan tsjii curu yawchiča. Nicju nii čhjepultanž yujcboz Jesusaqui tsjemat chercherchiž cjišsiča. ³ Niiž zquitiñi ancha llijatča. Ancha chiw kjañižtakaztača. Anaž jec žoñimi nižta chiwi zquiti cjskati atča. ⁴ Nekztan pucultan žoñinaca jecžquichiča; Elías nižaza Moisés cjitatača ninacaqui. Jesusižtan parlichiča.
⁵ Nekztan Pedruqui Jesusižquiz paljaychiča:
 —Wejt Tjaajni. Walikazza tekz željzqui. Čhjep chjujlli kjuya kjuyznasača, tsjiiñi amta tsjiiñi Moiesta, tsjiiñi Eliasta. ⁶ Nekztan nii tjaajinta žoñinacaqui ancha tsucchiča. Pedruqui čhjulut chiyi ana zuma tantiuchucatača.
⁷⁻⁸ Nekztan ninacžquiz tsjiriñi urpuntichiča. tsewctan tsjirquiztan tsjii joraqui chiižquichiča:
 —Wejt k'ay Majchča tiiqui. Tiižquiz nonžna.

Nekztan tjaajinta žoñinacaqui tjapa kjutñi chercherziča. Anazaka čhjulumi tjenčiča. Jesusapankaz želatča nii chjepultan žoñinacžtan.

⁹Jesusaqui nii curquiztan chjijwžquican ninacžquiz paljaychiča, tuž cjican:

—Ančhucaž cherta ana jecžquizimi chiichiyaquiča. Weriž jacatattan, nekztan chiichiyaquiča ančhucqui. Wejrqui tsewtan cuchanžquita Yooz Žoñiča.

¹⁰Ninacpora pewcsarasiča:

—¿Čhjulut tii jacatatz puntu cjeejo?

Nižtami Jesusiž chiitacama ojkchiča. ¹¹Nekztan Jesusižquiz pewcziča:

—Judiuž lii tjaajiñinacaqui cjiñiča, “Primuruqui Elías profetaqui tjonstanča”, nii. ¿Kjažtiquiztan nižta chiya?

¹²Jesusaqui kjaaziča, tuž cjican:

—Ultimupan Elías profetaqui primiru tjonchiča, tjappacha tjaczjapa. Nižaza cjjirta Yooz takuqui tuž cjiča, wejr tsewtan cuchanžquita Yooz Žoñiž puntuquiztan. Tekziqui ancha sufracha wejrqui. Čhjaawjtaza iñartaza cjeeča. ¹³Jaziqi wejr cjiwčha, Eliazaqui tjonchila. Nekztan žoñinacaqui Elías ninacž munañparu paachiča. Nužupan cjjirta Yooz takuqui cjiča Elías puntuquiztan. —Nuž cjichiča Jesusaqui.

ZAJRAŽ TANTA UZA ČHJETINTA

¹⁴Nekztan parti tjaajinta žoñinacžquiz irantichiča. Nekzi muzpa žoñinacaqui želatkalča. Parti tjaajintanacžtan judiuž lii tjaajiñinacžtan ch'aaatkalča. ¹⁵Tjappacha Jesusa cheržcu ispanti ch'uj cjichiča. Nekztan tsaani zajtchiča. ¹⁶Jesusaqui pewcziča, tuž cjican:

¿Ninacžtan čhjulut chiyas?

¹⁷Tsjii žoñiqui kjaaziča:

—Tjaajiñi Maestro, wejrqui wejt uza amquiz zjicchinča. Zajraž luztan, upa cjissiča.

¹⁸Jakziquinami zajraqi wejt uzquiz pankaz luzza. Nekztan t'uckatča. Nekztan yokquiz tjojtsa. Atquiztan čh'utukaž jup'okiča. Ižkekaž jojča. Ljajtikaž cjissa. Jaziqi amiž tjaajintanacžquiz rocchinča, zajra chjatkatajo. Ninacaqui ana chjatkatati atchiča.

¹⁹Jaziqi Jesusaqui kjaaziča:

—Ančhucqui, ana criiñi žoñinacčhucpanča. ¿Čhjuloracamat ančhucatan kamac wejrjo? ¿Čjuloracamat ančhucatan awantac wejrjo? Nižtac nii uza zjicžca.

²⁰Nekztan nii uzac zjicčatača. Nii zajraqi Jesusa cheržcu uza t'uckatchiča. Nekztan nii uzaqui yokquiz tjojtsiča. Yokquizpacha zunt'ichiča, atquiztan čh'utu jup'okcan.

²¹Jesusaqui ejpžquiz pewcziča:

—¿Čhjuloratanpacha am uza laacjichitajo?

Niž ejpqui kjaaziča:

—Koltallquiztanpacha. ²²Tii zajrapan wilta wilta tjojt tjojtscatčhani ujquizimi kjazquizimi ticskatzjapaqui. Am cunam atčhani. Tii kullžinalla. Okžnalla wejrnacqui.

²³Nekztan Jesusaqui nii ejpžquiz chiichiča:

—¿Kjažtiquiztan am nuž cjeejo, “Am cunam atčhan”, cjicanajo? Yoozquin tjapa kuzziz žoñiqui čhjulumpankaz atasacha.

²⁴Nii uz ejpqui altu joržtan chiichiča:

—¡Tjapa kuzziz wejrqui! ¡Juc'anti Yoozquin kuzziz cjis yanapt'alla!

²⁵Jesusaqui naychiča, muzpa žoñinaca ajcsquiñi. Nekztan zajra ujziča, tuž cjican:

—Zajra, amqui tii uza upa oñi cjiskatchamča. Wejrqui am mantuča. Tiižquiztan ulna. Anam iya tii uza tanaquiča.

²⁶Nii zajraqi uza wilta t'uckatchiča. Nekztan ancha kjawcan, ulanchiča. Nii uza ticzižtakaz cjissiča. Nekztan jila parti žoñinacaqui chiichiča:

—¡Ticzila tii uzaqui!

²⁷Nekztan Jesusac kjarallcu tanžcu žinziča. Nekztan nii uzaqui tsjitsiča. ²⁸Nekztanac tjaajinta žoñinacaqui kjuy luzcu jamazit Jesusižquiz pewcziča, tuž cjican:

—¿Kjažtiquiztan wejrnacqui ana nii zajra chjatkatati atajo?

²⁹Jesusaqui kjaaziča:

—Ana Yooztan parliscu ana ayunascu, anaž tii zajranacaqui chjatkati atasacha.

JESUSAQUI NIIŽ TICZ MAZINCHIČHA

³⁰Nekztanaqui Jesusaqui niiž tjajjintanacžtan ojkchiča Galilea yoka nuž. Ana žoñiž zizan nekz žejlz pecatčha, niiž tjajjinta žoñinacžquiz iya tjajjinzjapa. ³¹Tuž cjican tjajjinchičha:

—Wejrqui tsewtan cuchanžquita Yooz Žoñičha. Tsjii žoñiqui wejr tarazunaž paaquičha, wejr tankatzjapa. Nekztan tantapal cjeeča. Contal cjeeča. Nekztan čhjep majquiztan jacatatačha.

³²Tjajjintanacaqui Jesusiž takunaca ana cusa intintazi atchiča. Nižaza Jesusa iya pewcz ekičha:

—¿Kjažt cjiy, nii am takunacajo? —Nuž cjican, pewcz pecatčha, pero.

¿JEC ŽOÑIT TUCQUINAQUI?

³³Nekztan Capernaum cjita wajta irantichiča. Kjuyquiz luzcu Jesusaqui niiž tjajjintanaca pewczičha:

—¿Ojkcan ančhuc čhjulučha parliya?

³⁴Nekztan anaž čhjulumu kjaazičha. Ojkcan tii puntu parlatčha, “¿Ject tucquinaqui cjes?” cjican.

³⁵Nekztan Jesusaqui julzičha. Niiž tuncapan tjajjinta žoñinaca kjawžcu, paljaychičha:

—Jakziltat tucquinac cjis pecčhaj niiqui, wirquinpankaz cjis waquizičha. Mantapaaž-pankaz waquizičha.

³⁶Jesusc tsjii uza kjawžcu, taypiz tsijtskatchičha. Nii uza žcojrzičha, tuž cjican:

³⁷—Jakzilta žoñit wejt laycu tsjii ocjala sirwičhaja, jalla niiqui wejr sirwičha. Nižaza anaž wejr alaja sirwičha; wejrž cuchanžquiñi nii zakaz sirwičha.

CRISTUŽ FAVORA PAAŃI ŽOŃI

³⁸Nekztan Juanqui cjichičha:

—Tjajjiñi, am tjuužtan tsjii žoñiqui zajranaca chjatkatatčha. Niiqui ana učumtan chica ojklajničha. Nekztan wejrnacqui ujinčha, “Nižta anačha paazqui”, cjican.

³⁹Jesusaqui cjichičha:

—Ana nižta chiya. Jakzilta žoñit wejt tjuužtan tsjii milajru paačhaj niiqui, wejt quintra ana pjazila chiyauičha. ⁴⁰Jakzilta žoñižlaja ana učum quintra niiqui, učumnaca partizakazza. ⁴¹Weraral chiyučha, ančhucqui Cristuž illzta žoñinacpančhucčha. Jakzilta žoñit weriž cjen ančhucaquiz tsjii kjazllami onančhaja, jalla niiqui nekztan ultimu juc'ant zumanaca tanznaquičha arajpachquin.

UJQUIZTAN CWITASA

⁴²Nekztan Jesusaqui tjajjinchičha, tuž cjican:

—Wejtquiz criichi žoñinaca žejlčha, humilde kuzziz cjiñi. Jakzilta žoñit nižta criichi žoñinaca ujquiz tjojtškatačhaja, jalla niiqui ana wali paačha. Nii paañi žoñiž jorquiz pajk tjajj mokžcu, koz kotquiz jacuntiz waquizičha. Jalla nižta tsjan cusaž cjesačha nii žoñžtaqui. ⁴³Am kjarat ujquiz tjojtškatž pecčhaj niiqui, pootzna. Infiernuquin pizc kjarchiz ojkzqui, nii ana waliž cjesačha. Juc'anti cusaž cjesačha tsjii kjarchizkaz arajpachquin luzqui. Infiernuquin ujqui wira ana tjesnasačha. ⁴⁴Infiernuquiziqui žoñi lujlñi lak'unacami anaž ticznaquičha. Nii asñi ujqui anaž wira tjesnaquičha. ⁴⁵Nižaza am kjojchat ujquiz tjojtškatž pecčhaj niqii, pootzna. Infiernuquin pizc kjojchchiz Yooz cuchnasaž niiqui, ana waliž cjesačha. Juc'anti cusaž cjesačha tsjii kjojchchizkaz arajpachquin ojkzqui. Infiernuquin ujqui wira ana tjesnasačha. ⁴⁶Infiernuquiziqui žoñi lujlñi lak'unacami anaž ticznaquičha. Nii asñi ujqui ana wira tjesnaquičha. ⁴⁷Am čhjuyquit ujquiz tjojtškatž pecčhaj niiqui, leczna. Infiernuquin pizc čhjucchiz Yooz cuchnasaž niiqui, ana waliž cjesačha. Juc'anti cusaž cjesačha tsjii čhjucchizkaz arajpachquin ojkzqui. ⁴⁸Infiernuquiziqui žoñi lujlñi lak'unacami anaž ticznaquičha. Nii asñi ujqui ana wira tjesnaquičha.

⁴⁹“Tjapa žoñinacaqui ujžtan tjacžtaž cjequiča. Zapa wilananacaqui yawcžtan tjacžta-panča, jalla nižta. ⁵⁰Yacuqui zumača. ¿Yacuž lak'anznasaž niiqui, kjažt wilta ch'uyi cjisnasa? Yawcchizpanž ančhuc želaquiča. Porapat zumaž kamaquiča.

10

JALJTIZ PUNTU

¹Nekztan Jesusaqui Capernaum wajtquiztan ulanžcu, Judea yokquin ojkchiča; nižaza Jordán cjita pužž najwctuñtan ojkchiča. Nicju muzpa žoñinacaqui wilta ajcsiča. Nekztan Jesusaqui wilta tjajinchiča, jaknužt tjajinižtažlaj, nii. ²Fariseo žoñinacaqui tjonchiča, Jesusa ujquiz tjojskatzjapa. Nekztan pewcziča, tuž cjican:

—¿Učhum liiqui kjažt cjeejo? ¿Tsjii luctakaqui persun tjunatan jaljtiz waquizasaya? Tjaajnalla.

³Jesusaqui ninacžquiz pewcziča:

—¿Moisés cjita žoñiqui, jaknužt ančhucakuiz mantichiya?

⁴Nekztan ninacaqui kjaaziča:

—Moisesaqui tuž mantichiča, “Tsjii luctakaqui certificado de divorcio tjaasača tjunatan jaljtizjapa. Nekztan jaljtasača.”

⁵Nekztanaqui Jesusaqui chiižinchiča:

—Ančhuca chojru kuzziz cjen nuž mantitatača. ⁶Niiž tuquiqui ana nižta mantitatača. Tuqui timpuqui Yoozqui tjappacha paacan, žoñi paachiča luctaka maataka. ⁷“Nižtiquiztan žoñiqui maa ejpžquiztan zarakauiča, tjunatan kamzjapa. ⁸Nekztan nii lucutiñi žoñiqui tsjikaz cjiša”. Anaž iya pucultan žoñi, pero tsjikazza. ⁹Yoozqui tsjii lucutiñi cjiskatchiča. Nekztan lucutiñi žoñiqui anapan jaljtiz waquiziča.

¹⁰Wiruñaquu niiž tjajinta žoñinacaqui kjuyquiz Jesusa jamazit pewcziča nii jaljtiz puntuquiztan.

¹¹Jesusaqui kjaaziča:

—Jakzilta žoñit tjunatan jaljtizcu yekja maatakatan zalžaj niiqui, ujž paača, tuqita tjuna quintra. ¹²Nižaza jakzilta žont persun luctakžtan jaljtizcu, yekja luctakžtan zalžaj niiqui, ujkazak paača, tuqita lucž quintra.

JESUSAQUI OCJALANACA K'AACHIČA

¹³Tsjii nooj žoñinacaqui Jesusižquin ocjalanaca zjijcchiča, kjaržtan lanznajo. Nuž zjijcan Jesusiž tjajintanacaqui nii ocjala chjaawjchiča. ¹⁴Nižta chjaawjni nayžcu Jesusaqui žawjchiča. Nekztan tjajinta žoñinacžquiz chiižinchiča, tuž cjican:

—Tii ocjalanacaqui wejtquiz tjonaj cjee. Anaž chjaajwa. Tii ocjalanacž kuzziz irata, jalla nižta žoñinacača Yooz wajtchiz žoñinacaqui. ¹⁵Ultim wereral chiyuča, ocjalanacaqui maa ejpž mantitanaca cazza. Jalla nižta irata žoñinacaqui Yooz mantitanaca caz waquiziča. Ana cazaquiča niiqui, wira ana Yooz wajtchiz žoñinaca cjequiča.

¹⁶Nekztan Jesusaqui ocjalanaca žcojržcu k'aachichiča. Zapa maynižquiz kjaržtan lanžcu:

—Yooz am wintijla, —cjichiča.

RICACH ŽOÑIŽ QUINTU

¹⁷Nekztanaqui žoñinacžquiztan Jesusaž zaraktan tsjii žoñiqui zati pariju tjonchiča, niiž yujcquiz quillslaki. Nii žoñiqui cjichiča:

—Tjaajini Maestro, zumamž amqui. Yooztan wiñaya kamzjapaqui, ¿chjul zumanacat wejr paasaya?

¹⁸Jesusaqui kjaaziča:

—¿Kjažtiquiztan, “Zumamž amqui”, cjeejo? Anaž jec žoñimi zumaqui, Yoozpankazza zumaqui. ¹⁹Amqui Yooz mantitanaca zizñamča: “Anača adulteriuquiz ojklayzqui. Anača conzqui. Anača tjañi cjisqui. Anača toscara chiizqui. Anača incallzqui. Am maa ejpča rispitzqui”.

²⁰Nii žoñiqui kjaaziča:

—Tjaajini Maestro, koltallquiztanpacha tjapa tinaca caziñča.

²¹Jesusaqui nii žoňž kjutňi cherziča, k'aachtican. Nekztan cjichiča:

—Tsjii cusasa pjaltiča amtaqui. Tjappacha am čhjulutki žejlñinaca tuyzna. Poris žoňinacžquiz nii paaz ona. Oka jaziqui. Nekztan am arajpachquin juc'anti ricachum cjequiča. Nuž paažcu wejtquin tjona. Sufrijsapa listu cjee. Nekztan wejtta chica ojklayňi cjequiča.

²²Walja ricachutača nii žoňiqui. Nekztan nii chiitiquiztan ancha upa kuz cjissiča. Llaquita ojkchiča.

²³Nekztan Jesusaqui tjapa kjutňi chercherziča. Nekztan tjaajintanacžquiz paljay-chiča, tuž cjican:

—¡Ricachunacžtaqui walja ch'amača Yooz wajtchiz žoňinaca cjisqui!

²⁴Niiž tjaajintanacaqui Jesusaž chiitiquiztan ancha tsucchiča. Nekztanaqui Jesusaqui wilita paljaychiča, tuž cjican:

—Jilanaca. ¡Jakzilta žoňit tii wir cusasanacquiz kuz tjaachaja, jalla ninacžtaqui walja ch'amača Yooz wajtchiz žoňinaca cjisqui! ²⁵Tsjii camello cjita animala žejlča. Nii camelluqui ch'aman acuj cjuňquiz luzasača. Ricachunacazti tsjan ch'aman Yooz wajtquiz luzasača, Yooz mantita žoňinaca cjisjapa.

²⁶Nii chiitiquiztan tjaajinta žoňinacaqui juc'anti tsucchiča.

—¿Jequit liwriita cjesajo? —cjican, pewcsassiča.

²⁷Jesusaqui ninacžquiz cherziča. Nekztanac cjichiča:

—Žoňiqui anaž persunpacha liwrii atasacha. Yoozpankazza liwriiňiqui. Yoozqui jecmi liwrii atasacha.

²⁸Nekztan Pedruqui Jesusižquiz paljaychiča:

—Nonžna. Wejrnacqui tjappacha ecchinča, amtan chica ojklayzjapaqui.

²⁹Nekztan Jesusaqui cjichiča:

—Weraral ančhucacuz cjiwča. Jakzilta žoňit Yooz tawk laycu wejt laycu kjuya, jilanaca, cullacanaca, maa, ejp, maatinaca, zkananaca, jalla ninaca ecačhaj niiqui, ³⁰tii muntuquiz kjuyanaca, jilanaca, cullacanaca, maanaca, maatinaca, zkananaca, nižtanaca patac wilitaž ninacžtajapa želaquiča. Pero chjaawjta iňartazaž cjequiča. Jalla nuž cje-nami, arajpachquin wiňaya Yooztan zuma kamaquiča. ³¹Walja anzič tučquin žoňinacaqui wirquin cjisnaquiča ultimquiziqui. Nižaza walja anzič wirquin žoňinacaqui tučquin cjisnaquiča ultimquiziqui.

JESUSAQUI NIIŽ TICZ MAZINCHIČHA

³²Nekztan Jesusaqui Jerusalén cjita wajtquin okatča tjaajintanacžtan. Jesusača ninacž tuqui ojkchiqui. Nii tjaajinta žoňinacaqui tsucchi okatča. Nii parti apžñinacaqui ekscan okatča. Nekztanac Jesusac niiž tuncapan tjaajintanaca kjawžcu, tsjii kjutňi chjitchiča. Nekztan jaknužt niižquiz watačhaja jalla nii mazinchiča. ³³Jesusac cjichiča:

—Nonžna. Wejrqui tsewtan cuchanžquita Yooz žoňičha. Jerusalén watjaž ojkča učhumqui. Jalla nii wajtquin tarazuna paatal cjeeča. Timlu jilirinacžquiz nižaza judfo tjaajñinacžquiz tantal cjeeča. Nekztan ninacaqui, “Ticžla tiiqui”, cjequiča. Nekztan yekja wajtchiz žoňinacžquiz intirjital cjeeča. ³⁴Nekztan wejr munu paatal cjeeča. Llawsiztan tjujttal cjeeča. Wjajttal cjeeča. Ultimquiziqui contal cjeeča. Nekztan ticžcuqui čhjep majquiztanac jacatatača.

JACOBŽTAN JUANŽTAN

³⁵Nekztanaqui Zebedeož majchnacaqui Jacobžtan Juanžtan Jesusižquin macjatchiča tuž cjican:

—Tjaajñi Maestro, čhjulut amquiztan pecučhaj niiqui, tjaalla.

³⁶Jesusaqui pewcziča:

—¿Čhjuluž pecya?

³⁷Nii pucultan žoňiqui kjaaziča:

Čhjuloram am tjappacha mantačhaj niiqui, wejrnac julskatalla, tsjiiqui žew kjuttan, tsjiiqui zkar kjuttan.

³⁸ Nekztan Jesusaqui cjichiča:

—Ančhucqui tii mayta ana intintichiñčhucča. Wejrqui tsjii wasu licznača. Nižaza tsjii bautismo bautista cjeeča. ¿Jalla nižtapacha ančhuc sufri atasajo?

³⁹ Ninacaqui kjaaziča:

—Atasačhay.

Nekztan Jesusaqui cjichiča:

—Wejr irata ančhucqui tsjii wasu licznaquiča. Nižaza tsjii bautismo bautista cjequiča.

⁴⁰ Pero žewquiztan nižaza zkarquiztan julznaj cjičhaj niiqui, wejr ana nii atasacha. Jakziltižtažlaj nii julz tjacžta niiqui, ninacžtaž cjequiča.

⁴¹ Nekztan nii parti tunca tjaajintanacaqui nuž nonžcu, žawjchiča Jacobuž nižaza Juanž kjutni. ⁴² Nekztan Jesusaqui tjaajinta žoñinaca kjawziča, tuž cjican:

—Ančhucqui zizza. Tsjii nacionž chawjc jiliriqui nacion nužpachaž cazkatča. Tsjii c'ari patruñažtakaz cjsisa jilirinacaqui. Jilirinacaqui tjapa žoñinaca rispitskatča. ⁴³ Ančhuczi anača nižta cjsiqui. Jakziltat ančhucaquiztan juc'ant chekan žoñi cjis pecčhaj niiqui, partinacž piyuna cjis waquiziča. ⁴⁴ Jakziltat ančhucaquiztan ancha tucquin cjis pecčhaj niiqui, tjapa žoñinacž mantuquizpanž cjis waquiziča. ⁴⁵ Jalla nižtijapa wejr tjonchinča. Tsewctan cuchanžquita Yooz Žoñtča. Pero ana žoñiž sirwita cjisjapa tjonchinča. Antiz žoñinaca sirwisjapa tjonchinča. Žoñinacž cuntiquiztan ticzjapami, žoñinaca liwriizjapami, nijapa tjonchinča wejrqui.

ZUR ŽOŃI ČHJETINTA

⁴⁶ Nekztan Jesusaqui Jericoquiztan ulanžquichiča tjaajinta žoñinacžtanami tama žoñinacžtanami. Jicz latuquiz tsjii zur žoñi julzi želatča, tomangžcan. Bartimeo cjitatača, Timeož majch. ⁴⁷ Nii Nazaret wajtchiz Jesusa macjatžquiñi nayžcu, nii zur žoñiqui kjawchiča, tuž cjican:

—¡Jesusa, Davidž Majchimča! ¡Wejr okžnalla!

⁴⁸ Nekztan žoñinacaqui nii zur žoñi ujsiča:

—¡Ch'uj žela! —cjican.

Nekztan nii zur žoñiqui juc'anti kjawchiča:

—¡Davidž Majch, wejrpanž okžnalla!

⁴⁹ Nekztan Jesusaqui tsijtsiča.

—Nii žoñi kjawžca, —cjichiča. Žoñinacaqui nii zur žoñi kjawziča, tuž cjican:

—Tsijsna. Zuti cjee. Jesusaž am kjawža.

⁵⁰ Nekztan niiž zquiti cujtžcu, tjojtichiča. Jesusižquin macjatchiča. ⁵¹ Nekztan Jesusaqui nii žoñi pewcziča:

—¿Čhjulum pecya? ¿Kjažum wejr paljay-ya?

Nii zur žoñiqui kjaaziča:

—Tjaajini Maestro, ancha zurtča wejrqui. Chertz pecuča.

⁵² Jesusaqui cjichiča:

—Am tjapa kuztan cjen žejtchamča. Jazic oka.

Nii orapacha nii žoñž čhjujiqui cjetsiča. Cherñi cjissiča. Nekztan Jesusaž okan nii žoñiqui apziča.

11

JESUSAQUI JERUSALEN WATJA LUZZIČHA

¹ Nekztanaqui pizc wajtquin irantichiča Tsjiiqui Betfagē cjiatača, tsjiiqui Betania cjiata. Jerusalén wajtž žcatillatača, Olivos cjiata cur zanquiz. Jesusaqui tsjii pucultan tjaajinta žoñinaca tuqui cuchanchiča, ² tuž cjican:

—Jerusalén watja oka. Irantižcu tsjii mokžta aznu cheraquiča. Nii aznuqui ana zinta žoñiž yawztača. Jalla nii aznu jweržcu wejtquin zjijcaquiča. ³ Yekjap žoñiž pewcznanaqui, “¿Kjažtiquiztan nižta paa?” cjenauqui, ančhucqui tuž kjaaznaquiča, “Chawjc jiliriž pecča”, cjican. “Upaquiztan tii aznuc tjepuntaž cjequiča”.

⁴ Nekztan nii pucultanaqui ojkcichiča. Tsjii aznu cherchiča, kjuy zanquiz mokžta; callquiztača. Nekztan ninacaqui aznu jwersiča. ⁵ Yekjap nekz žejlñi žoñinacaqui pewcziča:

—¿Kjažtiquiztan ančhuc nii aznu jwerjo?

⁶ Jesusiž chiiacama kjaaziča. Nužquiz nii žoñinacaqui cutziča. ⁷ Jesusižquin nii aznu zjičchiča. Nekztan zquitinaca carunsiča, Jesusiž yawzjapa. ⁸ Yekjap žoñinacaqui ch'ojña ramuzanaca pootžcu, nii jiczquiz chjinchiča. Zquitinaca chjinchizakazza. Nuž paachiča rispitsjapa.

⁹ Jesusiž tucquin ojkn̄i žoñinacami Jesusiž wirquin apžñi žoñinacami tjappacha wiwchiča, tuž cjican:

—¡Viva tii Yooz tjuuquiz tjonchi žoñi! ¡Yooz wintijla! ¹⁰ ¡Tiiž mantaquiča, učhum tuquita žoñiča David cjita, jalla nižta! ¡Yooz wintijla! ¡Viva učhum Yooz!

¹¹ Jalla nužu Jesusaqui Jerusalén watja luzziča. Nižaza timpluquiz luzziča. Tjapa kjutñi chercherchiča. Nekztan tjuñiž zeziž cjen Betania cjita wajtquin ojkcichiča niž tuncapan tjaajinta žoñinacžtan.

ANA FRUTCHIZ MUNTI

¹² Jakatažuqui Jesusaqui Betania wajtquiztan ulanžcan, čhjeri eecskatchiča. ¹³ Ažquiztan higer munti cherchiča, ch'ojña chjañchiz. Nii munti cheržñi ojkcichiča, “Frutaj žejlž”, cjican. Nii munti irantan, chjañkaz želatča. Anatača frut timpu.

¹⁴ Nekztan Jesusaqui nii muntiž quintra chiichiča:

—Tii muntiquiztan anaž jecmi iya fruta lulaquiča.

Niž tjaajintanacaqui nii chiita nonziča.

JESUSAQUI TIMPLU PEWZIČHA

¹⁵ Nekztan Jesusaqui niž tjaajinta žoñinacžtan Jerusalén watja irantižcu timpluquiz luzziča. Nekztan timpluquiztan zawncchuc liwj tuyñi žoñinacami kjayñi žoñinacami tjirkatchiča. Paaz campiñi žoñinacž mizami paloma tuyñiž zillami k'ala pjokžinchiča. ¹⁶ Jesusaqui nii timplu patiuran kužñi žoñinaca k'ala jarq'uichiča. ¹⁷ Nekztanac chižinchiča, tuž cjican:

—Cjijrta Yooz takuqui tuž cjiča: “Wejt kjuyača Yooztan parlis kjuyaqui. Jakzilta žoñimi Yooztan parlasača tekziqi.” Ančhucqui tii timplu tjangz kjuyažtakaz paachinčhüča.

¹⁸ Nekztan timplu chawjc jilirinacaqui judio lii tjaajiñinacaqui nii quintu zizcu parličiča:

—¿Jaknužt tii Jesusa conas? —cjican.

Tjapa žoñinacazti Jesusiž tjaajintiquiztan ispantichiča:

—Ancha cusala, —cjican.

Nižtiquiztan nii quintri žoñinacaqui Jesusižquiztan eksñitača. ¹⁹ Tjuñiž kattan Jesusaqui wajtquiztan ulančiča niž tjaajinta žoñinacžtan.

ANA FRUTCHIZ MUNTIQUI KJOŇCHIČHA

²⁰ Jakawenztažuqui nii higer cjita munti wilta watchiča. Waaa, kjoñchi cherchiča, žep'anacžquiztanpacha. ²¹ Pedruqui Jesusiž tuquita chiita taku cjuñžcu cjičiča:

—Tjaajiñi Maestro, cheržca. Amqui tii muntiž quintra chiichamča. Jaziqi kjoñchiča.

²² Jesusaqui kjaaziča:

—Yoozquiz tjapa kuztan cjee. ²³ Weraral cjiwča, jakzilta žoñit nii najwc curquiz, “Curu, tekztan zaraka. Pajk kotquiz luzca”, nuž cjican chiyasaž niiqui, nižtapachaž curu okasača, ana paysnakasaž niiqui, tjapa kuztan cjesaž niiqui. ²⁴ Jaziqi ančhucaquiz chiyučha, čhjulumi Yoozquiztan mayizaquž niiqui, tjaataž cjequiča, Yoozquin tjapa kuztanž cjee.

²⁵ Nižaza ančhucqui čhjulorat Yoozquiztan mayisaja, nii orac ančhuca quintra žoñinacž uj pertunaquiča. Nekztan ančhuca Yooz Ejpqui ančhuca ujmi zakaz pertunaquiča.

²⁶ Ančhucqui ana žoñž uj pertunasaž niiqui, nižaza arajpach Yooz Ejpqui ančhuca ujnaca anazakaz pertunasača.

¿JECT JESUSIŽQUIZ MANTICHI?

²⁷ Nekztanaqui Jesusaqui Jerusalén watja wilta quejpcchiča niiz tjaajinta žoñinacžtan. Jesusaž timpluran ojklayan timplu jilirinacžtanami lii tjaajiñinacžtanami wajt jilirinacžtanami jalla ninacaqui Jesusižquin tjonchiča. ²⁸ Nekztan pewcziča:

—¿Ject jilirit am mantichi, tii paazjapajo? ¿Jec jilirit am utchi jilirižtakaz paazjapajo?

²⁹ Jesusac nekztan kjaaziča:

—Wejrmi jazic ančhucaquiz zakal pewcznača. Ančhucaž kjaaztan, wejr zakal ančhucaž pewcžtac kjaaznača, jec jilirit wejr utchi, nii. ³⁰ Tiil pewcznača ančhucaquiz. ¿Ject Juan mantichi, bautisjapajo? Yoozkaya už žoñej. Jazicž kjaazna.

³¹ Nekztanac ninacpora ancha ch'aasi kallantichiča, tuž cjican:

—¿Kjažum kjaaznaquejo? “Yooz mantitača”, cjequiz niiqui, nekztan “¿Kjažtiquiztan ančhuc nii Juan ana criichinčhuctajo?” nuž cječhan tiicni. ³² Učhumqui anapanča chiyi atasača, “Žoñiž mantitacha”, cjican.

Žoñinacaqui walja nii Juanžquin rispittiquiztan, cjichiča:

—Werara Yooz taku parliñi profetača Juanqui.

Nižtiquiztan nii jilirinacaqui žoñinaca ekskcu, ³³ ana kjaazñi atchiča. Ninacaqui chiichiča:

—¿Jaknužukazlan? Nekztanac Jesusac cjichiča:

—Nižaza wejr ana zakal maznasača, jec jilirit wejr utchi, nii.

12

ANA ZUM PIYUNANACŽ QUINTU

¹ Nekztan Jesusaqui tsjii quintu paljaychiča, tuž cjican:

—Tsji žoñi želatča, patru. Nii žoñiqui uwas zkala čjacchiča. Nekztan pajk uyu pirkichiča nii zkali muytata. Nižaza maz ojt paachiča, uwas kjaz spjijtzjapa. Nekztan campanturi cherchi torre pirkichiča, zkala itzjapa.

² Nekztan nii patrucaqui zkala partira tjaachiča piyunanacžquiz. Nekztan ažkquin ojkičiča. ³ Nekztanaqui zkala ricujz timpuž tjonan nii patrucaqui tsjii piyuna cuchanžquichiča, niiz partir zkala ricujzjapa. ⁴ Nii partira tanzñi žoñinacaqui patrucaž cuchanžquita piyuna tanžcu kijtchiča. Wajjtchiča. Ana čjulchiz cuchanchiča patrucažquin. ⁵ Nekztan nii patrucaqui tsjižtan wilta cuchanžquichiča. Nii partira tanzñi žoñinacaqui nii patrucaž piyuna maztan čhajcchiča. Achquiz chjojritchiča. Chjaawjkatchiča. ⁶ Nekztan nii patrucaqui wilta tsjii piyuna cuchanžquichiča. Čhjep wiltiquiziqui piyuna conchiča. Nižta anawali paachiča tsjii kjaž cuchanta piyunanacžquiz. Partiqui wjajttatača. Partiqui contatača.

⁷ Iya tsjii želatča nii patrucaž k'ay majch. Ultimquiziqui nii patrucaqui k'ay majch cuchanžquichiča, “Wejt majch rispitta cjequiča”, cjican. ⁸ Nii partira tanzñi žoñinacžtan ninacpora parlassiča tuž cjican, “Tsji nooj tii majchqui ejpž irinsa tanznasača. Tii zkali yokanaca k'alaž ricujasača. Ojklaj tiiž conla. Nekztan tsjii nooj učhumnacaltaž tjappacha tii zkali yokanaca cjequiča, jalla”. ⁹ Nekztanaqui nii majch tanžcu conchiča. Nekztan nii yokquiztan niiz ticzi curpu jwescu, tjojtchiča.

¹⁰ Nekztan Jesusaqui pewcziča:

—¿Nii uwas zkaličiz patrucaqui, čjulul paačhaja? Wejr cjiwcha, nii patrucaqui tjonaučiča. Nekztan nii partira tanzñi žoñinaca conaquiča. Nekztan niiz uwas zkali yokanaca yekjanacžquiz tjaaučiča.

¹¹ Ančhucqui Yooz taku liichinčhucča, žana jaa? Tsji Yooz takuqui tuž cjiča:

“Kjuy pirkiñinacaqui tsji maz tjojtchiča. Nii tjojt mazqui isquinquiz cjišiča. Ultimquiziqui tucquin cjišiča. ¹² Yoozqui nuž cjkatchiča. Nii cheržcu ancha ispantichinčhumča”.

Nuž cjiča cjižrta Yooz takuqui.

¹³ Nekztanaqui nii quintri žoñinacaqui Jesusa tanz pecatča:

—Tii quintu wejtnaca quintraž, —cjican.

Nekztan nii žejlñi žoñinaca ekscu, quintri žoñinacaqui Jesusa ecchiča, ana kjaž cjiscu. Nužquiz ojkcchiča.

TASA TJAAZ PUNTU

¹³ Yekjap fariseo žoñinacaqui Herodes žoñinacžtan cuchanžquitatača, Jesusa pewczñi. Niiž chiitiquiztan tsjii anazum taku jwes pecatča. ¹⁴ Jaziqui cjichiča:

—Tjaajiñi Maestro, zizuž wejrnacqui, am werarapan chiiñamča, žoñinacaž am quintra chiichiz cjenami. Nižaza am taku anaj tsjii tsjii chiichila žoñinacž laycu. Yooztan kamz puntuquiztan werarapan tjaajiñamča. Jazic tjaajžnalla tii puntu. Wejrnacqui César cjita jiliržquiz tas paaz tjaayiñča. ¿Nuž walikazkay už anaž wali cjesaj? ¿Nii tas paaz tjaaz waquizasaya, už anaž waquizasaj, jaa?

¹⁵ Jesusaqui ninaca pizc kuzziz zizatča. Nekztan kjaaziča:

—¿Kjažtiquiztan ančhucqui wejr ujchiz jwes pecjo? Tsjii paaz zjijca, chertzjapa.

¹⁶ Tsjii paaz zjijcchiča. Nekztan Jesusac pewcziča:

—¿Tii paazquiz, jecz yujctaya? ¿Jecz tjuu cjiirtataya?

Ninacaqui kjaaziča:

—César cjita jilirž tjuučča. Niiž yujcča niiqui.

¹⁷ Nekztan Jesusaqui chiiichiča.

—Čhjulumi jiliržta cjenauki jiliržquiz tjaa. Nižaza čhjulumi Yoozta cjenauki Yoozquiz tjaa.

Nuž chiitiquiztan ninacaqui ancha ispantichiča.

JACATATZ PUNTU

¹⁸ Nekztan yekjap saduceo žoñinacaqui Jesusa chertzñi ojkcchiča. Jacatatz puntu ana criiñipantača. Jesusižquin macjatžcu pewcziča:

¹⁹ —Tjaajiñi Maestro, Moisesaqui učhumnacalta cjiirtkalča, tuž cjican: “Tsji žoñi ticznasaž niiqui, niiž tjun ana ocjalchiz cjesaž niiqui, nekztan nii ticzi žoñž jilaqui naa žewatan zals waquiziča, nii ticzi jilž cuntiquiztan ocjala paazjapa”. ²⁰ Jaziqui pakallak jilazullca želatča. Nii jilir jilaqui zalsiča. Nekztan ticziča ana ocjalchiz. ²¹ Nekztan tsjii taypir jilaqui naa žewatan zalsizakazza. Nekztan ana ocjalchiz ticzizakazza. Nekztan yekja taypir jilaqui naa žewatan zalsizakazza. Nekztan ana ocjalchiz ticzizakazza. ²² Tjappach nii pakallak jilazullcanacaqui naa žonatan zalsiča. Nekztan tjappacha ana ocjalchiz ticziča. Ultimquiziqui naa žonqui ticzinča. ²³ Jaziqui žoñinaca jacatattanaqui wilta žeti tantanaqui ¿jakzilta jilž tjun naa žon cjequejo? Pakallakuqui naa žonatan zalsiča.

²⁴ Jesusaqui kjaaziča:

—Ančhuca takuqui tsjii kjutñi chiyiñčhucpanča. Ančhucqui Yooz takumi Yooz azimi anapan zizza. ²⁵ Ticzi žoñinacaž jacatattanaqui anaž zals želaquiča. Anaž tjtjowami turtakanacami zalznaquiča. Arajpach anjilanaca irataž kamaquiča. ²⁶ Jacatatz puntuquiztan Moisesaqui liwruquiz cjiirtkalča. Liichinčhucča, ¿ana jaa? Tsjii ujsñi kalquiztan Yoozqui Moisesquiz paljaychiča, tuž cjican: “Abrahamž Yooztča wejrtča. Nižaza Isaacž Yooztča, nižaza Jacobž Yooztča”. ²⁷ Yooz Ejpqui anača ticzi žoñž Yoozqui, žejtñi žoñž Yoozqui. Nižtiquiztan ančhuca takuqui ancha tsjii kjutñipankazza.

¿JAKZILTA YOOZ MANTITAT CHEKANAQUI?

²⁸ Nekztanaqui žoñinacžtan Jesusižtan ch'aasñi nonžcu tsjii judiuž li tjaajiñi žoñiqui macjatžquichiča. Jesusaž zuma kjaaztiquiztan nii žoñiqui pewczizakazza, tuž cjican:

—¿Jakzilta Yooz mantitat chekanaqui?

²⁹ Jesusaqui kjaaziča:

—Tii Yooz mantitača chekanaqui: “Nonžna ančhucqui, Israeli wajtchiz žoñinaca. Tsjan chawjc jiliriča učhum Yoozqui. Ana iya yekja Yooz žejlča. Yoozqui jiliripanča.

³⁰ Ančhucqui tii ančhuca Yoozquiz tjapa kuztan sirwaquiča, nižaza tjapa animužtanami, nižaza tjapa pinsamintužtanami, nižaza tjapa aztanami”. Jalla nii Yooz mantitača chekanaqui. ³¹ Nižtazakaz nii jaru tii Yooz mantitac žejlča. Tuž cjicha: “Jaknužum

persunpachquiz okzñamžlaja, jalla nižta okzñi kuzziz cjistanča žoñinacžquizimi, ljitum mazižtakaz”. Tii pizc mantitanacača juc'ant chekanaqui čhjul mantitanacquiztanami.

³²Nekztan nii judío tjaajiñiqui cjichiča:

—Tjaajiñi Maestro, werara chiichamča. Am chiitaqui cusača. Tsjii Yoozpankaz žejlča; ana iya želasča. ³³Tii Yoozquiz sirwispanž waquizila, tjapa kuztan, nižaza tjapa animužtan, nižaza tjapa pinsamintužtan nižaza tjapa aztan. Nii jaruqui jaknužum persunpachquiz okzñamžlaja, jalla nižta okzñi kuzziz cjistanča žoñinacžquizimi, ljitum mazižtakaz. Yoozquin ujta wilana puntu mantitami nižaza ofrenda tjaaz mantitami jalla nii mantitanacžquiztan tii pizc Yooz mantitanacača juc'ant chekanaqui.

³⁴Nii judío tjaajiñi žoñiqui zuma intintazzi razunchiz chiichiča. Nižta nayžcu Jesusaqui chiichiča:

—Amqui Yooztan kamz jicz cježullača, Yooz mantita žoñi cjisjapa.

Nekztan žoñinacaqui iya pecunchi Jesusižquiz pewczñi anaž atatča.

¿CRISTUQUI JECŽ MAJCHTATA?

³⁵Jaziqui Jesusaqui timpluquiz tjaajincan, cjichiča:

—Nii judío tjaajiñinacaqui tuž cjiča: “Davidž majchkazza Cristuqui”. ¿Kjažtiquiztan nuž cjejo? ³⁶Arajpach Yooz Espirituqui David chiikatčičiča, tuž cjan:

“Yooz Ejpqui wejt chawjc jiliržquiz cjichiča: ‘Tsji ora wejrqui am kojch koztan am quintri žoñinaca t'okskatača. Nii oracama wejt žew latu julzna’”.

³⁷Jaziqui Davidaqui persunpacha cjichiča: “Chawjc jiliriča tiiqui”. ¿Nižtiquiztan jaknužt niž chawjc jiliri niž majchqui cjesajo? —Nuž cjichiča Jesusaqui.

Nii tama žejlñi žoñinacaqui Jesusiž taku nonz jutztaziča.

JUDIO LII TJAAJIÑINACA

³⁸Nižaza tjaajincan Jesusaqui cjichiča:

—Judío lii tjaajiñinacžquiztan cwitzazaquiča. Ninacac tol zquitchiz ojklaz jutztaziča. Ninacaqui palazquiz tsaanskatzmi rispitskatzmi jalla niika pecniča. ³⁹Ninacaqui ajcz kjuyquiz tucquin julz pecniča. Nižaza pjijstiquiz lujlan ancha tucquin cjičjis pecniča.

⁴⁰Ninacpacha žewžewanaca t'akjiri cjiskatniča. Nižaza žoñinaca incallzjapa ažka Yooztan parlatžoka cjiñiča. Jaziqui ninacaž juc'anti casticta cjequiča.

OFRENDA PUNTU

⁴¹Nekztan Jesusaqui ofrenda tjaaz cajun yujcquin julziča. Nekzi žoñinaca paaz uchan cherčiča. Yekjap ricachunacaqui muzpa paaz utčiča. ⁴²Nekztan tsjaa poris žewqui tjonchinča. Pizc paazalla utchinča, koluculla. ⁴³Jalla nekztanaqui Jesusaqui niž tjaajinta žoñinacžquiz kjawziča. Nekztan intintiskatchiča:

—Weraral chiyuča, naa poris žewqui nii cajunquiz juc'anti utchinča, tjapa nii parti žoñinacžquiztan cjen. ⁴⁴Nii parti žoñinacaqui čhjetinta paaz utčiča. Naa poris žewzti tjappacha naatan kamñi paaz utčiča.

13

JUDIO TIMPLUŽ PUNTU

¹Nekztan timpluquiztan ulnan tsjii tjaajinta žoñiqui Jesusižquiz paljayčiča, tuž cjan:

—Tjaajiñi Maestro, cheržca. Tii pajk maznacami tii pajk kjuyanacami ancha cusača.

²Jaziqui Jesusaqui nižquiz chiichiča:

—Tii pajk kjuyanaca cherča amqui. Wejrqui cjiwča, tsjii nooj ana zinta tii maznacaqui pirkita želaquiča. Tjappacha pajlžtaž cjequiča.

TII MUNTU TUCUZINZ PUNTU

³Nekztan Olivos cjeta curu ojkiča, timpluž zanquiz. Nekzi Jesusac julzi želatča; ana iya žoñi želatča. Nekztan Pedružtan, Jacobožtan, Juanžtan, Andrestan, ninacaqui Jesusižquiz pewcziča, tuž cjan:

⁴—Maznalla wejtnacaquiz. ¿Čhjulorat nii amiž chiita wataquejo? ¿Ima amiž chiita watan, čhjulunacat wataquejo?

⁵ Nekztan Jesusaqui kjaaziča:

—Ančhucqui persunpachquiz cwitaza, anača jecžquizimi incallskata. ⁶ Žoñinacaqui wejt tjuu aynakanž tjonaučiča, tuž cjican: “Wejrtča Cristutqui”, Jalla nekztanaqui muzpa žoñinacaqui incallskataquiča.

⁷ Ančhucqui quintunaca nonznaquiča, quira žejlz quintunaca, ch'ajwa quintunaca. Nekztan anača tsucaquiča ančhucqui. Nižtapanž wataquiča. Tii muntu tucuzinzqui imaž irjatžquiča. ⁸ Nacionporož kichjasaquiča. Wajtporaž kichjasaquiča. Tjapa kjutñi yokac chjeknaquiča. Mach'anaca želaquiča. Žoñipora kichjasaquiča. Ancha žoñinaca t'akjisaquiča tjapa kjutñi. Sufrisnaca uzcakaž kallza. Wiruñac juc'ant sufrisnaca želaquiča.

⁹ Ančhucqui persuna waljaž cwitazaquiča. Žoñinacaqui ančhuc tanžcu jilirinacžquin chjichaquiča. Nekztan ajcz kjuyquiz wjajtažakaz cjequiča ančhucqui. Weriz cjen chawjc jilirž yujcquizimi wajt jilirž yujcquizimi apantitaž cjequiča. Nekztan wejt puntuquiztan ninacžquiz maznaquiča ančhucqui. ¹⁰ Ima tii muntuž tucuzan, Yooz takuqui tjapa nacionquin maz maztaž cjequiča. ¹¹ Čhjulorat ančhucqui jiliržquiz apantita cječhaja, jalla nii ora anača eksnaquiča, žkjažt wejr cjeequejo? —cjicanaqui. Nižaza anača ancha čhjulu chiismi pinsaquiča ančhucqui. Nii oraqui Yooz ančucaquiz tjajznaquiča, čhjul takut chiyačhaja, nii. Ančuca persun pinsita inapankazza. Nii oraqui Yooz Espirituqui ančucaquiz chiikataquiča. ¹² Tsjii jilaqui persun jila tarasunaquiča konkatzjapa. Ejpnaqui persun maati tarasunaquiča konkatzjapa. Maatinacami maa ejpž quintra tsijtsnaquiča konkatzjapa. ¹³ Ančhuc weriz cjen tjapa žoñinacaz čhjaawjtaž cjequiča. Jakzilta žoñit ticzcama wejtquiz tjurt'ačhaja jalla niiqui lwriitaž cjequiča.

¹⁴ Daniel cjita Yooz taku parliñi profetaqui cjjirtkalča, tuž cjican: “Tsji nooj tsjii juc'ant anawal akñi žoñi želaquiča”. Jakziquin niiqui ana žejlsalaja, nicjuñ želaquiča tii anawaliqui. Čhjulorat ančhucqui nižta cheračhaja, nii ora curunacquin atipas waquiziča tjapa Judea yokquin žejlñinacaqui. Liñi žoñiqui intintazla. ¹⁵ Nii kjuy juntuñ žejlñi žoñinacaqui chjijwžcu ana kjuya luzla, čhjulumi chjichi jwesjapa. ¹⁶ Nii zkalquin žejlñi žoñinacaqui ana kjuya quejpla, zquiti apti. ¹⁷ Nii timpuquiziqui ic maatakanacami k'azllu wawchiz maatakanacami ancha t'akjiri cjequiča. ¹⁸ Yoozquinča mayiza ančhucqui, anaj zak timpuquin tižtanacac tjonla, nii. ¹⁹ Tii sufris timpu yekja sufrisnacuztan juc'anti sufris cjequiča. Tuqui timpuqui Yoozqui tii muntu paachiča. Nekztan jecchuc anapanž tižta sufrisnacac watchiqui. Tekztan najwcchuc anaž iya juc'anti sufrisqui cjequiča. ²⁰ Yoozqui anaž tii sufrisnaca tucuskataquiz niiqui, tjapa žoñinacaz ticznaquiča. Yoozqui niiz illta žoñinacž cjen tii sufrisnaca tucuskataquiča.

²¹ Nižaza yekjap žoñinacaqui ančucaquiz chiyaquiča: “Chera. Ticjuča Cristuqui”. Yekjapac chiyaquiča: “Nacjuča Cristuqui” cjican. Nuž chiichiž cjenami, anapanča nii taku criyaquiča ančhucqui. ²² Incallñi žoñinacaz tjonaučiča. Tsjii incallñinacaqui: “Cristutča wejrqui”, cjequiča. Yekjapazti: “Yooz taku parliñiča wejrqui”, cjequiča. Ninacaqui walja ispantichuca milajrunacaz paaquiča, incallzjapa. Tjapa žoñinacaz incallz pecaquiča, Yooz illta žoñinacami. ²³ Ima tižtanacaz tjonan wejrqui ančucaquiz mazinchiñiča. Nižtiquiztan walja cwitazaquiča ančhucqui. Nižta kuzziz cjee.

ĴAKNUŽT CRISTUQUI TJONAQUI?

²⁴ Nekztanaqui tii sufris timpu wattan, tjuñiqui zumaquiča. Nižaza jiizmi anaž iya kjanaquiča. ²⁵ Warawaranacami tsewctan tjojtснаquiča. Tseecu azziz žejlñinacaqui chjekinskattaž cjequiča. ²⁶ Jalla nekztanaqui žoñinacaqui tii tsewctan cuchanžquita Yooz žoñiž cheraquiča. Wejrqui tsjir taypquiz tjonacha, walja aztan, ancha ispantichuca. ²⁷ Nekztanaqui tjapa kjutñi nii arajpach Yooz anjilanacaqui cuchanta cjequiča, weriz illztanaca juntjapžcajo. Tjapa yok tjyquiztanpacha tjapa arajpach tjyquiztanpacha juntjapžtaž cjequiča.

²⁸ *Ančhucqui tii puntu zizaquiča higuera cjita muntiquiztan. Čhjulorat nii muntiqui ch'ojñantis cjisajaja, jalla nii ora waj kutunz timpu žcatiča. Nužupanž zizza ančhucqui. ²⁹ Jalla nižtapacha tii weriž chiita watan, ančhucqui tuž zizaquiča; tii tsewctan cuchanžquita Yooz Žoñiqui wajillaž tjonacquiča, nii. Nižaza tii muntu tucuzinzqui žcatillača. ³⁰ Weraral cjiwča, tjapa tii timpuquiz žejlñi žoñinacaqui ana ticznaquiča, ima tii weriž chiita watan. ³¹ Arajpachami yokami tucuzacquiča. Wejt takunacazti wiraž ana tucuzacquiča. Nužupanž cumplisnaquiča.

³² *Wejt tjonz tjuñimi wejt tjonz orami anaž jecmi zizasacħa, anaž nii arajpach Yooz anjilanacami, anaž Yooz majchmi. Yooz Ejp alajakaz zizza.

³³ *Ančhucqui, persuna naazna, cwitaza, Yoozquin mayiza. Čhjulorat nii tjuñi tjonacħaja, nii ora ana zizza ančhucqui. ³⁴ Jalla tii quintuž iratača wejt tjonz tjuñi. Tsjii žoñiqui ažkquin ojkc tantiichiča. Ima niž kjuyquiztan zarakcan zapa mayni niž piyunacžquiz langz tjaača. Kjuy cwitiñi žoñžquiz zuma cwitajo mantiča. ³⁵ Nekztan ojžcu, čhjulorat nii kjuychiz žoñiqui quepacħaja, jalla nii ora, piyunacacqui ana zizza, niit už zeztan tjonacħaja, niit už chica arama tjonacħaja, niit už kjantat ora tjonacħaja niit už wentan tjonacħaja. Čhjulorat tjonacħaja, ninacaqui anaž zizza. Nižtiquiztan piyunacacqui listuž cjila. ³⁶ Jalla nii irata ančhucqui listuž cjee. Tiripintit ančhucaž tjan tjonasacħa. ³⁷ Wejrqui ančhucquizimi tjapa žoñinacžquizimi chiyučħa, listupančħa cjee.

14

¿JAKNUŽUM JESUSA TANAS?

¹ Puc majkaz pjaltiča pascu pjiztquinaqui. Nii orazakaz yekja pjiztaqui kalltiznatčħa, ana liwaturchiz t'anta lujl pjizta. Jalla nii ora timplu jilirinacžtan judio tjaajñinacžtan palt'ichiča, tuž cjican:

—¿Jaknužum Jesusa incallžcu tanas?

Nižaza nuž tanžcu, Jesusa conzjapa kazziča.

² Ninacaqui tantiižcu, cjichiča:

—Pjiztquiz anaž tanz waquizasacħa. Žoñinacaqui učhum quintraž cjisnasacħa.

JESUSIŽ ACHQUIZ ASIITI ALŽTA

³ Jesusaqui Betania cjita wajtquiz želatčħa, Simonž kjuyquiz. Nii Simonaqui tuquitan mojkchi janchichiz žejlñitača. Nekzi lulan tsjaa maatak žonqui tsjii putillžtan tjonzinčħa. Nii putillquiz cusa mazk'a ulurchiz asiiti želatčħa, nardo cjita, ancha jila walurchiz. Nii putillaqui zuma alabastro cjita maztan paatatača. Nekztan naa maatak žonqui putilla kjolžcu Jesusiž achquiz asiiti alsinčħa. ⁴ Yekjap nekc žejlñi žoñinacaqui žawjziča. Ninacpora palt'ichiča, tuž cjican:

—¿Kjažtquiztan nii mazk'a ulurchiz asiiti pertejo? ⁵ Naalaqui asiiti tuysalani quinsa patac denario cjita paazuñ. Nekztan nii paazqui poris žoñinacžquiz onansalani.

Naaža quintra chutchiča. ⁶ Nekztan Jesusaqui chiichiča:

—¿Kjažtquiztan taa žonatan chjijcisejo? Anača taa žon kjaž cjisqui. Wejtquiziqui walika paachinčħa. ⁷ Poris žoñinacami panž žejlčħa. Čhjulorami ninacžquiziqui yanapasacħa. Wejrqui anal ančhucatan tira želača. ⁸ Taa žonqui jaknužt payi atčħaja, nii paachinčħa. Ima wejt curpu tjan asitiztan alsinčħa. ⁹ Chekpacha weraral cjiwča, jaksiquinami tjapa kjutñimi Yooz taku parla cječħaja, jalla nicju taaža paata parla cjequiča, taa maatak žon cjuñznajo.

JUDASQUI JESUSA TANKATZ PINSICHIČHA

¹⁰ Nekztanaqui Judas Iscariotiqui timplu jilirinacžquin palt'i ojkcichiča. Jesusiž tunca-pan tjaajinta žoñinacžquiztantača Judasqui. ¹¹ Judas taku nonžcu jilirinacaqui ancha chipchiča:

—Paaz tjaasacħa, —cjican.

Nekztanaqui Judasqui tantiichiča, čhjulorat wali cječħaja, Jesusa tankatzjapa, nii.

PASCU ČHJERI LUJLCHIČHA

¹² Pjizta kallni tjuñi, ana liwaturžtan t'anta lujlz pjizta, nii tjuñi judio wajtchiz žoñi-nacaqui pascu uua conñiča. Nii noopacha tjaajinta žoñinacaqui Jesusižquiz pewcziča:

—¿Jakziquin wejrnacqui ojcz waquiziya, pascu čhjeri luli tjaczjapaya?

¹³ Nekztan Jesusaqui pucultan tjaajintanaca cuchanchiča, tuž cjican:

—Wajtquin oka. Nekzi tsjii žoñžtan zalaquiča kjaz luuz kužži. Nii žoñž wirquiz apz-naquiča. ¹⁴ Jakziquin nii žoñi qui luzačhaja, jalla nicju nii kjuychiz žoñžquiz paljayaquiča, tuž cjican: “Tjaajiñiqui cjichiča: ¿Jakziquin wejt tjaajintanacžtan pascu čhjeri lulasaya? ¿Jaknit nii kjuyajo?” ¹⁵ Nekztan nii kjuychiz žoñi qui tsewcta pisuquin tsjii pajk kjuya tjeeznaquiča ančhucaquiz. Nii kjuya listu tjaczta cjequiča. Jalla nicju učumqui čhjeri kisanquiča. —Nuž mantichiča Jesusaqui.

¹⁶ Nužquis nii pucultan tjaajintanacaqui zarakchiča. Watja ojckhiča. Jesusiž chiitacama nižtapacha watchiča. Nekztanacqui pascu čhjeri kissiča.

¹⁷ Tjuñiž kattan Jesusaqui tjonchiča tuncapan tjaajintanacžtan. ¹⁸ Čhjeri lujlcan Jesusaqui chiichiča:

—Weraral cjiwča, ančhucaquiztan tsjii wejttan lujlñiqui wejr tarazunaquiča.

¹⁹ Ninacaqui nužquiz llaquita cjissiča. Nekztan ninacaqui Jesusižquiz pewcziča. Tsjiiqui:

—¿Wejr kay? —cjichiča.

Tsjii:

—¿Wejr kay? —cjichizakazza.

²⁰ Nekztanac Jesusac kjaaziča:

—Tuncapaniž ančhucqui tsjiiqui wejr tarazunaquiča. Anziqui niiča wejttan chica čhjeri lujlchi. ²¹ Wejrqui tsewctan cuchanžquita Yooz žoñčha. Wejr okača, Yooz taku cijirtacama. Jakziltat wejr tarazunačhaja, jalla niiqui juc'anti castictaž cjequiča. Nii tarazuñi žoñi qui anaj maa pjuchquiztan nastčhaj niiqui, juc'ant cusaž cjitasacha.

²² Nekztanacqui čhjeri lujlcan, Jesusaqui t'anta tanžcu Yoozquin gracias cjican chiichiča. Nekztan t'anta kjolžcu, tjaajintanacžquiz tojziča, tuž cjican:

—Tanzna. Tii t'antača wejt curpu cuntaqui.

²³ Nekztan tsjii wazu tanzhiča. Yoozquin gracias cjican chiichizakazza. Nekztan ninacžquiz tjaatan, tjappacha ninacaqui nii wazquiztan licziča. ²⁴ Jesusaqui chiichiča:

—Wejt ljocquiztan cjiča tiiqui. Wejt ljocžtan tsjii ew acta tjulžta cjequiča. Wejt ljocqui tjapa žoñinacž cuntiquiztan tjawktaž cjequiča. ²⁵ Weraral cjiwča, uwas kjaz ana iya licača, čhjlorat Yooz tjapa mantačhaja, jalla nii oracama.

PEDRUQUI JESUSA ANA PAJŃI TUCAQUIČHA

²⁶ Tsjii Yooz wirsu itscu ojckhiča Olivos cjita curullquin. ²⁷ Nekziqui Jesusaqui chiichiča:

—Tii weenaqui tjapa ančhucqui ana wejtquin kuzziz tucaquiča. Nižtapan cijirta Yooz takuqui cjiča:

“Wejr arajpach Yoozqui awatiri conača. Nekztan uzanacaqui wichansnaquiča”.

²⁸ Jesusaqui cjichizakazza:

—Nekztan jacatatžcuqui ančhuca tuqui okjayača Galilea cjita yokquin

²⁹ Nekztan Pedruqui chiichiča:

—Tjappacha ana amquin kuzziz cječhani. Wejrqui ana wira nižta cjesača.

³⁰ Jesusaqui kjaaziča:

—Weraral cjiwča, tii weenpacha amqui ana wejr pajñi tucaquiča, Ima wallpaž pizc wilaž kjawan, amqui čhjep wila wejr ana pajñim chiyaquiča.

³¹ Pedruqui juc'anti tjurt'ichiča, tuž cjican:

—Wejrqui amtan chicami waztal ticznasača. Anapan amquiztanac zarakasača.

Tjapa nii tjaajintanacaqui nižtapacha tjurt'ichiča.

JESUSAQUI YOOZTAN PARLICHİČHA

³² Nekztan Getsemaní cjita yokquin ojckhiča. Nicju Jesusaqui niž tjaajinta žoñi-nacžquiz chiichiča:

—Tekzi julzna. Wejrqui Yooztan parli okača.

³³ Nekztan Pedružtan Jacobžtan Juanžtan chjitchičha. Jesusaqui walja llaquita kuzziz turwaysičha. ³⁴ Niiž tjaajintanacžquiz paljaychičha:

—Wejt kuzqui ancha llaquita, ticzucača. Ančhucqui tekzi žela. Wilazaquičha; anača tjajaquičha.

³⁵ Nekztan tsjii koluc tuquinalla ojkcichča Jesusaqui. Yokquizkaz tuzi t'okziča. Yoozquiztan mayizichičha, tuž cjan:

—Tii juc'ant sufris timpu anal wats pecučha. Tii sufrisquiztan liwriychucažlaj niiqui, amquiž liwriyalla.

³⁶ Tira maycan cjichičha:

—Yooz Ejp, amqui čhjulumpankam atasacha. Tii sufrisnacquiztan liwriyalla. Pero anal wejt kuzcama paaz pecučha. Jaknužt am kuz antičhaj niiqui, jalla nuž am munañpaj cjila.

³⁷ Nekztanaqui tjaajintanacžquin quejpžquichičha. Tjajchi zalchičha. Nekztanaqui Jesusaqui Pedružquiz cjichičha:

—¿Simona, amquim tjajya? ³⁸ ¿Anam tsjii orami wilazi atya? Wilaza. Yoozquiztan mayiza, ana ujquiz tjojtžjapa. Ančhucqui ancha kuztanča. Pero ančuca curpuzti anaž awantasača.

³⁹ Nekztan Jesusaqui wilta Yooztan parli ojkcichča. Tuquiqui jaknužt parličhaja, nižtazaka parličičha. ⁴⁰ Wilta tjaajintanacžquin quejpžquichičha. Wilta tjajchi zalchičha. Ancha tjaji atipskatchičha. Ninacaqui Jesusižquiz ana kjaazni atchičha. ⁴¹ Jalla nekztan Jesusac čhjep wilta ojkcžu quejpžquichičha. Nekztan chiichičha:

—Jaziqui tjajchinčhucča, ančhucqui, nižaza jeejzinčhucča. Nužkaz. Wejrqui tsewtan cuchanžquita Yooz žoñtča. Wejrqui ujchiz žoñinacž kjarquiz tankattal cjeeča. Nii ora anziqui irjatžquichičha. ⁴² Žaazna. Ojkla. Cheržna. Wejr tarazuñi žoñiqui nii nacjuž tjonča.

JESUSAQUI TANTATAČHA

⁴³ Nii ora Jesusaž nuž chiyan, tsjiiqui tuncapan tjaajinta žoñinacžquiztan tjonchičha, Judas cjita. Tama žoñinacaqui Judastan tjonchičha pajk cuchillunacchiz, nižaza wajtž carotnacchiz. Timplu chawjc jilirinacžtan judío lii tjaajiñinacžtan wajt jilirinacžtan ninacaž cuchanžquita tjonchičha. ⁴⁴ Tuquitan nii tankatni Judasqui kazziča Jesusa tankatzjapa. Nuž kazcu, cjichičha:

—Tsjii žoñil chjulznača. Niiž niic cjequičha. Nekztan zuma tanžcu chjichaquičha.

⁴⁵ Nii ora Judasqui Jesusižquiz macjatchičha:

—Tjaajiñi Maestro, —cjican.

Nekztan nii chjulziča. ⁴⁶ Nekztan žoñinacaqui Jesusa tanchičha, preso chjitzjapa. ⁴⁷ Tsjii nekz tsjitchi žoñiqui pajk cuchillu jwessiča. Jalla nekztan tsjan chawjc jilirž piyuna chjojritchičha. Tsjii cjuñi pootžcu apakchičha. ⁴⁸ Nekztan Jesusac chiichičha:

—Ančhucqui cuchillunacžtan carotnacžtan wejr tani tjonchinčhucča, tsjii tjañi cjes, nižtažtakaz. ⁴⁹ Zapuru ančhucaltan žejlchinča, timpluquiz tjaajincan. Wira ana wejr tanchinčhucča. Pero anziqui jaknužt Yooz taku chiičhaja, nužupanž cumplita cjila.

⁵⁰ Nekztanaqui tjapa niiž tjaajinta žoñinacaqui tsucaña wichanziča. Jesusa zinalla eclichičha.

⁵¹ Tsjii tjowaqui Jesusa apziča, tsjii zquiti irzi. Nii tjowac tantazakaztača. ⁵² Nekztan nii zquiti cutžcu, k'alapacha tsucaña atipchičha.

JESUSA CHAWJC JILIRINACŽQUIN CHJICHTA

⁵³ Nekztanaqui Jesusaqui chjichtatača timplu tsjan chawjc jilirž kjuya. Nekziqui timplu chawjc jilirinacžtan wajt jilirinacžtan judío lii tjaajiñinacžtan ajczitača. ⁵⁴ Pedruqui ažquiztan apziča, chawjc jilirž kjuy patio luzcama. Nii patuquiz zultatunacžtan julzi želatča, uj latuquiz kutuncan.

⁵⁵ Kjuyquiziqui timplu jilirinacaqui tjapa jiliri mazinacžtan Jesusiž quintra chiiñi žoñi kjuratča, Jesusa conta cjisjapa. Ana zinta uj wajtchičha. ⁵⁶ Muzpa tama žoñinacaqui

Jesusiž quintra toscara chiichiča. Pero ninacž toscar takuqui anaž wira casatča. ⁵⁷Yekjap žoñinacaqui tsijtsu toscara chiichiča, tuž cjican:

⁵⁸—Wejr nonziñča, tii žoñi tuž chiiñi, “Tii žoñiž kjuyta timplu pajlnača. Nekztan čhjep majquiztan yekja timplu kjuyača, ana žoñiž kjuyta”. Nuž chiiñi nonzinča wejrqui.

⁵⁹Anaž nižtami žoñinacž takuc casatča. ⁶⁰Ultimquiziqui nii timplu chawjc jiliriqi tsijtsiča žoñinacž taypiquiz. Jesusižquiz pewcziča:

—¿Anam kjaazñi at, kjažtatajo? ¿Kjaž cjican am quintra chii tii žoñinacajo?

⁶¹Jesusaqui ana čhjulu tawkžcu, želatča, ana kjaaziča. Nekztan nii tsjan chawjc jiliriqi wilta pewcziča:

—¿Amqui Cristumkaya? ¿Arajpach Yooz Machimkaya?

⁶²Jesusaqui kjaaziča:

—Jesalla. Wejrtča Cristutqui. Wejrqui tsewtan cuchanžquita Yooz Žoñtča. Tsjii nooq ančhucqui wejr cheraquiča, juc'anti azziz Yooz latuquiz julzi. Nekztan arajpachquiztan tsjirquiz tjonača.

⁶³Nižta chiitiquiztan nii timplu chawjc jiliriqi niž zquti wjajrzinchiča, žawjchi tjeezjapa. Nekztan cjichiča:

—¿Kjažtiquiztan iya quintra chiiñi žoñi pecasajo? ⁶⁴Ančhucqui nonzinčhucča. Tiiž takuqui Yooz quintrača. Ana walipanča. ¿Čhjulučhum paaqui, kjažum cjeequi? ¿Tantiyalla?

Nekztan tjappacha quintra chiichiča:

—Tii žoñi contaj cjila, —cjican.

⁶⁵Nekztan yekjapaqui Jesusižquiz llawsižtan tjujtchiča, wjajtchizakazza. Nekztan niiž yujc pañžtan tjožinžcu, cjichiča:

—¡Pajalla, jaziqui! ¿Ject am wjajtchejo?

Nižaza zultatunacaqui Jesusiž yujcquiz čhajcziča.

PEDRUQUI JESUSA ANA PAJÑI TUCCHIČHA

⁶⁶Nii ora Pedruqui kjuy patiuquiz želatča. Nekzi tsjaa žonqui tjonchinča. Naa žonqui timplu tsjan chawjc jilirž piyunitača. ⁶⁷Pedruž uj latuquiz kutnan, cherchinča. Nekztan paljajchinča:

—Amqui nii Nazaret wajtchiz žoñžtan chica ojklajñamla, nii Jesusižtan.

⁶⁸Pedruqui Jesusa ana pajñi chiichiča:

—Nii žoñi anal pajuča. Am takumi anal intintuča.

Nuž chiižcu, zancu ulanchiča. ⁶⁹Nicju naa žonqui wilta cherchinzakazza. Nii žejlñi žoñinacžquiz maazinča, tuž cjican:

—Tii žoñiča ninacžtan chica ojklajñi.

⁷⁰Pedruqui wilta Jesusa ana pajñi chiichiča. Nekztan tsjii upaquiztan nii žejlñi žoñinacaqui Pedružquiz cjichizakazza:

—Chekapan amqui ninacžtan chica ojklajñi žoñimla. Amqui Galilea wajtchiz žoñimla. Nii žoñinacž irataž chiiñamla.

⁷¹Nekztan Pedruqui juramintužtan chiichiča, tuž cjican:

—Wejr toscara chiichinžlaj niiqui, Yooziž castictal cjila. Tii amiž chiita žoñi ana wira pajuča.

⁷²Pizcquizic nii orapacha tsjii wallpaqui kjawchiča. Nekztanaqui Pedruqui Jesusiž chiita taku cjuñziča. Tuž mazinčitača, “Ima wallpaž pizc wiltaž kjawan, amqui čhjep wilta wejr ana pajñim tucaquiča”. Nekztanaqui Pedruqui nii cjuñžcu, ancha llaquita cjissiča. Nekztan ancha kaachiča.

¹ Kjantati timplu chawjc jilirinacžtan wajt jilirinacžtan judfo lii tjaajiinacžtan tjap-pacha jilirinacžtan ajczitača. Nekztan Jesusa čhejlčcu Pilato jiliržquin chjitchiča. Nekztan niizquiz intirjichiča. ² Nekztan Pilatuqui pewcziča:

—¿Am judionacž chawjc jilirimya?

Jesusaqui kjaaziča:

—Nužupanzača, amiž chiitacama.

³ Nekztan nii timplu jilirinacaqui Jesusiž quintra čhjultaki tjojtunchiča. ⁴ Pilatuqui pewczizakazza:

—¿Kjažtiquiztan am ana kjaazni atjo? Tjapamanaž am quintra chiila, pero.

⁵ Jesusaqui ana čhjulu tawkčcu želatča. Nužquiz Pilatuqui ana iya čhjulumu chiižini atchiča.

ŽOŇINACAQUI JESUSIŽ QUINTRA CHIICHIČA

⁶ Pilatuqui pascu pjiztiquiz tsjii piriz žoŇi cutzñipantača žoŇinacž chiitacama. ⁷ Carsilquiz tsjii kjažultan gobierno quintri žoŇinacž chawjcta želatča. Barrabás cjita ujchiz žoŇi carsilquiz chawjctazakaztača. Revolucionquiz žoŇi conchiča Barrabás cjita žoŇiqui. ⁸ Jaziqi žoŇinacaqui Pilatu pewczni tjonchiča, tuž cjican:

—Wejtnacalta tsjii žoŇi cutžinalla. Tuquitanpacha nuž cutzñampanla amqui.

⁹ Pilatuqui kjaaziča:

—¿Ančhucqui pecya, tii judionacž chawjc jiliri cutzta cjisjapajo?

¹⁰ Jesusa čhjaawjcu, nii timplu jilirinacaqui Pilatužquiz intirjichiča; nii zizziča Pilatuqui. ¹¹ Nekztan nii timplu jilirinacaqui Jesusiž quintra žoŇinaca aptjapchiča. Nekztan žoŇinacaqui maychiča, Barrabaspankaz cutzta cjisjapa. ¹² Pilatuqui wilta pewcziča:

—¿Tiižti? ¿Jaknužt wejr paaj cjii ančhucjo? Ančhucqui tii judionacž jiliriča cjinčucla.

¹³ Nii žoŇinacaqui kjawchiča:

—¡Tii žoŇi conzna! ¡Cruzquiz ch'awczna!

¹⁴ Nekztan Pilatuqui chiichiča:

—¿Kjažtiquiztan, čhjul uj paachit teejo?

Nii žoŇinacazti juc'anti kjawchiča:

—¡Cruzquiz ch'awczna!

¹⁵ Pilatuqui nužquiz žoŇinacž kuz wali cjisjapa Barrabás cutziča. Jesusa cusa wja-jtkatžcuqui, Pilatuqui zultatunacžquiz intirjichiča, cruzquiz ch'awcta cjisjapa.

¹⁶ Nekztan nii zultatunacaqui jilirž kjuy patiuquin Jesusa chjitchiča. Nekzi parti zultatunaca ajcznajo kjawziča. ¹⁷ Nekztan Jesusižquiz tsjii morat zquiti tjutziča. Nižaza tsjii ch'apirar pillu irata nižtižtan Jesusiž achquiz scarzinchiča. ¹⁸ Nekztan ararcan kjawchiča:

—¡Viva tii judfo nacionž chawjc jiliri! —cjican.

¹⁹ Nekztan tsjii paržtan Jesusiž achquiz t'etkatchiča; llawsižtan tjujtchiča; rispittažoka quillsiča. ²⁰ Nekztan burla paažcuqui Jesusižquiztan nii morat zquiti chjojkžinchiča. Niiž persun zquiti tjutziča. Nekztanaqui Jesusa chjitchiča cruzquiz ch'awczjapa.

JESUSAQUI CRUZQUIZ CH'AWCTATAČA

²¹ Tsjii Cirene wajtchiz žoŇi želatča, Simón cjita. Pucultan žoŇž ejptača niiqui, Rufo, nižaza Alejandruž ejp. Jochquiztan kajkžcatča. Nekz watan mantichiča, Jesusiž cruza kužajo. Nužquiz uytissiča.

²² Nekztan Jesusaqui Gulgota yokquin chjichtatača. Gulgota cjitaqui tuž cjiča: “Ach Tsjii Yokača”. ²³ Nekztan Jesusižquiz vinu mirržtan t'ajžta tirinchiča. Jesusazti ana licz pecchiča. ²⁴ Jalla nekztanaqui cruzquiz ch'awczcu, sultatunacaqui zurtiychiča niiz zquitinaca tanzjapa, jakzilta sultatut nii zquiti tanznačhaja, nii zizjapa.

²⁵ Wenzlaka Jesusaqui cruzquiz ch'awctatača. ²⁶ Kjažtiquiztan tii žoŇi cruzquiz ch'awctatažlaja, niiqui cjiyrchiča tsjii tawliquiz, tuž cjican: “Tiiqui judionacž chawjc jiliriča”.

²⁷Jesusižtan chicapacha tsjii pucultan tjañinaca yekja cruzanacquiz ch'awctazakaztačha, tsjiic žew kjuttan tsjiic zkar kjuttan. ²⁸Nužupan tuquitan cjiirta Yooz taku cjičha. Nii Yooz taku tuž cjičha: “Ujchiz žoñinacžtan chica uchtačha”. Nužquiz nii Yooz takuqui cumplissičha.

²⁹Žoñinacaqui nezk watcan acha wewcžinchičha; ancha žawjchi, tuž cjan:

—jAaj! Amqui timplu pajltasačha. Nekztan čhjep majquiziqui wilta kjuytasačha, jalla nuž cjičhamčha, čana jaa? ³⁰Jaziqui persunpacha am cruzquiztan zarakalla. Persunpacha liwriyalla amqui.

³¹Nižaza nii timplu chawjc jilirinacžtan judío tjaajiñinacžtan parlassičha, Jesusa iñarcan, tuž cjan:

—Yekjapanacžquiz liwriičičha tiiqui. Persunpachazti anaž liwrii atčha. ³²Cristužlaj niiqui, Israel nacionž chawjc jilirižlaj niiqui, persunpachaj cruzquiztan apakscu, chji-jwžquila. Nekz cryaquiž učumqui.

Žoñinacaqui Jesusa iñarchičha. Niižtan chica ch'awcta žoñimi iñarchizakazza.

JESUSAQUI TICZIČHA

³³Taypurquiztan tjapa nii yokac zumchi cjišičha, majñakak oracama. ³⁴Nii ora Jesusaqui tjapa aztan kjawchičha:

—Eloi, Eloi člama sabactani? —Tii takuqui cjičha: “Wejt Yooz, wejt Yooz čkjažtquiztan wejr ecchamtajo?”

³⁵Yekjap nezk žejlñinacaqui nii taku nonžcu cjichičha:

—Nonžna. Elías kjawža tiiqui, nii tuquitan Yooz taku parliñi profetaqui.

³⁶Tsjiiqui ninacžquiztan zajtchičha. Nekztan tsjii esponja cjita kjaz licñiquiz jar vinu licskatchičha. Nekztan quejžcu tsjii parquiz tsjiipchi Jesusižquiz macjatskatchičha nii jar vinu ch'umznajo. Nekztan nii žoñiqui parti žoñinacžquiz čhičhičha:

—Tjewžla učumqui. Jaknužukat Eliasac cruzquiztan apaki tjonačhani, niiz čekžla.

³⁷Jesusaqui juc'anti kjawchičha. Nužquiz ticzičha. ³⁸Nii oraqui pajk timplu pañu juystokaz chicatquiz wjajrsičha, tsewctan kozzuc. ³⁹Nii romanž sultatunacž jiliričquiqui Jesusiž ujuc kjuttan želatčha. Tjappacha niiz wattanaca cheržcu cjichičha:

—Chekapan Yooz Majchtakalčha tii žoñiqui.

⁴⁰Nižaza tsjii kjažultan maatakanacaqui ažquiztan čekzičha. Nii maatakanacaqui tinacatačha: María cjititačha, Magdalena wajtchiz žonqui. Nekztan María cjitizakaztačha, Josež maa, nižaza Jacobž maa (lajktačha Jacoboqui). Nekztan Salomé cjititačha. ⁴¹Nii maatakanacaqui Jesusa apzitačha, nižaza yanaphitačha, Jesusa Galilea yokaran ojklayan nii ora. Nekztan ninacaqui Jesusižtan chica Jerusalenquin tjonchičha. Nii cruzaž nekzičquiqui muzpa maatakanaca želatčha.

JESUSAQUI TJATŽTATAČHA

⁴²Nii noojiqui pjijzta tjacz tjuñitačha. Jeež tjuñi ispirazakaztačha. ⁴³Nižtquiztan tjuñiž kattan tsjii José cjita Arimatea wajtchiz žoñiqui walja tjup kuzziz Pilatužquin ojkičhičha. Nekztan Jesusiž curpu maychičha. Walja rispitta jiliritičha nii Josiqui. Yooz tjapa mantiz timpu tjewznatčha. ⁴⁴Niiz žtontiquiztan, Pilatuqui ispančhičha, tuž cjan:

—čKjažt waj ticzi cjesajo?

Nekztan zultatž jiliri kjawzičha, nii pewczjapa. ⁴⁵Nii zultatž jiliričquiqui kjaazičha:

—Jesalla, ticzičha, —cjan.

Nekztan Pilatuqui Jesusiž curpu chjitzjapa permiso tjaachičha José cjita žožžquiz:

—Nižtaqui niiz curpu chjichalla, —cjan.

⁴⁶Nekztan Josiqui zuma čhiw pañu kjaychičha. Jesusiž curpu chjiunžcu nii pañquiz tejlzičha. Nekztan tsjii sipulturquiz majkzičha. Nii sipulturaqui pajk mazquiz pjettatačha. Nii sipulturž zana tsjii pajk maztan pjuczičha. ⁴⁷Pucultan maatakanacaqui Jesusiž curpu tjatni čerchičha. Tsjaaqui María Magdalena cjititačha. Tsjaac María cjitizakaztačha, yekja Josiž maa.

16

JESUSAQUI JACATATCHIČHA

¹Judionacž jeejz tjuñi jakatažu María Magdalenatan Jacobž maa Mariatan Salomatan, nii čhjepultan maatakanacaqui cusa ulurchiz asiiti kjaychičha, Jesusiž ticzi curpu tjajlinzjapa. ²Ancha wentan ninacaqui sipultura cherzñi ojkchičha tjuñiž tewctanalla. ³Sipultura ojkan ninacpora parlasičha tuž cjan:

—¿Jequit učhuntaqui cjetžinaquejo? ¿Nii pjucžta pajk mazjo?

⁴Nekztan irantižcu, nii pajk pjucžta mazqui cjetžta cherzičha. ⁵Sipultura luzcu, žew latu kjuyltan tsjii tol chiw zquitchiz tjowa julzi cherchičha. Nužquiz nii maatakanacaqui ancha tsucchičha. ⁶Nii tjowaqui paljaychičha, tuž cjan:

—Anaž tsuca maataka. Ančhucqui Jesusaž kjurčha, nii cruzquiz ch'awcta žoñi. Ni-iqui jacatatchičha jaziqui. Anačha tekzi. Chernalla. Tii sipulturquiz ana žejlčha. ⁷Jazic ančhucqui oka. Niiž tjaajinta žoñinacžquin mazca. Pedružquizimi zaka mazna. Tuž cjan ančhuc maznaquičha: “Jesusaqui ančhucaž tuqui okjayaquičha Galilea cjita yokquin. Nekzi Jesusižtan zalaquičha ančhucqui. Jaknužt tuquitan chiižinchipančhaja, jalla nužučha”.

⁸Nekztanaqui nii maatakanacaqui sipulturžquiztan ulanžcu, zati pariju quejpchičha, tsucaña chjekincan. Tsucaña ana čhjulumi chiyi atchičha jecžquizimi.

JESUSAQUI MARIA MAGDALENAQUIZ PARIZIČIČHA

⁹Jesusaqui kjantatilla jacatatchuqui primiraqui María Magdalenaquiz parizichičha. Tuquitan Jesusaqui naaquiztan pakallaku zajranaca chjatkatchitačha. ¹⁰Naa žonqui Jesusiž mazinacžquin mazñi ojkchinčha. Ninacaqui llaquita želatčha, kaacan. ¹¹Nekztan mazzinčha:

—Jesusaqui jacatatchičha. Wejrqui nii cherchinčha, —cjan.

Nii nonžcu nii tjaajinta žoñinacaqui ana criichičha. Inapanka chiitažoka naychičha.

¹²Wiruñauqui pucultan tjaajinta žoñinacaž wajtquiztan okan, Jesusaqui parizichizakazza, tsjemata cjissi. ¹³Nekztan quejpžcu, nii pucultanaqui parti tjaajintanacžquiz mazzičha. Nii mazta ana zakaz criichičha.

JESUSAQUI WILTA PARIZIČIČHA

¹⁴Wiruñauqui Jesusaqui nii tuncamani tjaajinta žoñinacžquiz parizichičha, čhjeri lulan. Ninacaqui jacatatta maztaqui ana criichičha. Nekztan ninacž ana criiñi kuzziz cjen ninacžquiz iwjt'ichičha Jesusaqui. ¹⁵Nižaza Jesusaqui mantichičha, tuž cjan:

—Jazic ančhucqui okaquičha tjapa kjutñi tii muntu intiru. Tjapa žoñinacžquizimi liwri-iñi taku paljayaquičha. ¹⁶Jakziltat tii taku criiçhaja, jalla niiqui liwriitaž cjequičha; nižaza bautista cjequičha. Jakziltat tii taku ana criiçhaj niiqui, ancha castictaž cjequičha. ¹⁷Yooz taku criichinacaqui tii milajrunaca paaquičha. Wejt tjuuquiz zajranaca chjatkataquičha. Yekja takunaca chiyaquičha. ¹⁸Zkora tanžcu zkoržquiz ana chjojrictaž cjequičha. Tsjii veneno licžcu, ana ticznaquičha. Kjaržtan lanžcu, laa žoñinaca čhjetnaquičha. Nižta paaquičha Yooz taku criiçhaja žoñinacaqui.

JESUSAQUI ARAJPACHA OJKCHIČHA

¹⁹Nii taku chiižcu chawjc jilir Jesusaqui arajpacha ojkchičha. Nekzi Yooz žew latuquiz julzičha. ²⁰Nekztanaqui nii tjaajinta žoñinacaqui ulanžcu, tjapa kjutñi Yooz liwriiñi taku paljaychičha. Chawjc jiliripančha Jesucristuqui. Jalla niičha ninacžquiz yanapñiqui. Nii Yooz aztan paata milajrunacaqui tuž cjičha: “Tii Yooz takuqui werarapančha”. Nužupanž cjila. Amén.

EL SANTO EVANGELIO SEGUN SAN LUCAS

¹⁻² Ancha zuma Teófilo, tii cartal amquin cjiyrzcuča, Jesucristuž puntuquiztan. Jesucristuž nasta tjuñquiztanpacha jaknužt watčhaja, jalla niiqui ana tjatziča cherchi žoñinacaqui. Nii cherchi žoñinacaqui wejtnacaquiz tjaajinchiča. Nižaza yekja žoñinacžquiz tjaajinchizakazza Jesucristuž puntuquiztan. Nekztan tsjii kjaž žoñinacaqui Jesucristuž puntuquiztan cjiyrchiča niiz jaru niiz jaru. ³ Nižaza wejrqui zumpacha pewcpeczinča jaknužt Jesucristuž nasta tjuñquiztanpacha watčhaja, jalla nii. Jalla nuž pewcpecwczu wejrqui pinsichinča Jesucristuž puntuquiztan cjiyrzjapazakaz niiz jaru niiz jaru. “Jalla niic waliz cjesača”, cjican pinsichinča wejt kuzquiz. Jaziqui walja zuma Teófilo, amquin tii cartal cjiyrzcuča, “Jesucristuž puntu tjaajintanaca zumpacha zizajo.

JUAN BAUTISTAŽ NASTAQUI

⁵ Ima Juan Bautistaž nasan jalla tuž watchiča. Judea yokquin Herodes cjita pajk jiliriqui mantiñitača. Nižaza Zacarías cjita timplu cwitiñi žoñi želatča. Niiqui Abías cjita t'akquiztantača. Niiz tjun cjititača Elisabet. Ninacaqui Aarón cjita tuquita atchi ejpžquiztan tjonñitača. ⁶ Nii pucultan lucutiñ žoñiqui Yooz yujcquiziqui zuma kamañchiztača. Yooz Epiž mantitacama kamñitača. Jalla nuž kaman ana čhjul ujmi ninacž quintra tjeezñi atasacha jecmi. ⁷ Ninacaqui ana zinta majchiztača. Elisabet cjitiqui ana wira matiñitača. Nii oraqui pucultan lucutiñi chawc chawcwatača.

⁸ Tsjii nooj Zacarías t'akquiztan turnuž tjonatča, Yooz sirwizjapa timpluquiz. Jalla nižtquiztan Zacaríasqui Yooz sirwatča timpluquiz. ⁹ Nii timplu cwitiñinacaqui tsjii žoñi inzinzu tjaazñi illzñipantakalča. Nekztan Zacarižquiz illziča. Jalla nuž illztaž cjen Zacaríasqui Yooz timpluquiz luzziča, inzinzu tjaazñi. ¹⁰ Jalla nii inzinzu tjaazñi oraqui tama žoñinacaqui Yoozquin mayizican želatča timplu zancu. ¹¹ Jalla nekztanacqui tsjii Yooz anjilaqui Zacarižquiz parisquichiča timpluquiz. Nii anjilaqui inzinzu altarž žew latuquiz tsjitsiča. ¹² Anjila cheržcu Zacaríasqui kuz turwaysi cjsičiča, ancha tsucchiča. ¹³ Anjilaqui cjičiča:

—Zacarías, ana am tsuca. Yoozqui amiž mayizitaqui nonziča. Jalla nižtquiztan Yoozqui am Elisabet cjiti tjunaquiz lucmajch wawaž majtkataquiča. Jalla nuž majttan am wawaqui Juan cjita tjuuchiz cjequiča. ¹⁴⁻¹⁵ Jalla nii am majchqui walja pajk jiliriz cjequiča Yooz Ejpž yujcquiziqui. Jalla nii majttiquiztanaqui, amqui cuntintum cjequiča, walja chipsnaquiča. Nižaza walja žoñinacami chipsnaquiča, am tjunaž majttiquiztanaqui. Am majchqui vinumi awarintimi ana licaquiča. Ima maa pjuchquiztan ulnan Yooz Espiritu Santuqui am majch kuzquiz luzaquiča. ¹⁶ Am majchqui walja Israel wajtchiz žoñinaca Yooz Ejpžquin wilta sirwizkataquiča. ¹⁷ Nižaza am majchqui ima Jesucristuž ojklayan ojklayaquiča, Yooz taku paljaycan. Cjuñzna. Tuqui timpuqui tsjii Yooz puntu paljayñi profeta želatča, Elías cjita. Yooz Espiritu Santuqui nii Eliasquiz Yooziž tjaata taku paljayskatchiča. Jalla nii tjaata taku paljaychiča Eliasqui, ana ekskcu. Yoozquin tjurt'ini kuzziztača. Jalla nižtapacha Yooz Espiritu Santuqui am majchquiz Yooziž tjaata taku paljayskataquiča. Niiz paljaytiquiztan ejpžtanami maatinacžtanami wilta zuman-skataquiča. Nižaza am majch paljaytiquiztan ana Yooz kuzcama kamñi žoñinacami Yooz kuzcama kamñi cjsnaquiča. Jalla nižtquiztan Israel wajtchiz žoñinacaqui Yooz Majch tjonz tjuñi tjewznaquiča. Zuma kamcan, ninacaqui tjewznaquiča, Yooz Majch zuma risiw't'isjapa. —Jalla nuž Zacarižquiz paljaychiča nii Yooz anjilaqui.

¹⁸ Nekztan Zacaríasqui anjilžquiz pewcziča, tuž cjican:

—¿Ultim werara amiž chiitajo? ¿Jaknužt zizasajo? Wejrqui walja chawc žoñtla pero. Wejt maatakami chawc žon zakazza.

¹⁹ Nii anjilaqui kjaaziča, tuž cjican:

—Wejrqui Gabriel cjititča. Yooz manta payiñtča. Yoozqui wejr mantižquičha amquiz tii zuma takunaca maznajo. ²⁰ Amqui weriž chiita ana criitiquiztan, upam cjisnaquičha, am maati majtcama. Yooziž pinsita tjuñquiz weriž chiita takuqui cumplisnaquičha. —Jalla nuž chiichiča anjilaqui.

²¹ Zacarías timplu kjuyltan ažka želatča, ulanžquiz oraqui watatča. Jalla nižtiquiztan tjewzñi žoñinacaqui kuzquiz pinsichiča, kjažtiquiztan ana ulanžquejo, jalla nii. Žoñinacaqui zancu muzpa tjewznatča, Zacarías ulanžquizcama. ²² Nekztanaqui Zacariasqui ažktanalla ulanžquičiča. Pero ana jaknužt chii atchiča. Jalla nižtiquiztan nii zawnc žejlñi žoñinacaqui ispantichiča. “Timplu kjuyltan anjilžtan zalzižlani”, jalla nuž cjejas- siča. Upa cjissiz cjen Zacariasqui žoñinacžquiz kjaržtan paljaychiča.

²³ Tsjii kjaž majquiztan Zacariasqui timplu cwitis turnu cumplichiča. Nii tjuñinaca žeržcu, persun kjuya ojkičiča. ²⁴ Wiruñauqui niž Elisabet cjiti tjunqui ica cjissinča. Nekztan Elisabet tsjii pjijska jiiz kjuyaran želatča. Ana kjuyquiztan kjuya ojklaychinča. Naaqui persun kuzquiz pinsichinča tuž cjican: ²⁵ “Yooz Jiliriqui wejr cjuñžcu, wejtquiz ickatchiča. Jaziqui žoñinacaqui anaž iya wejr iñarasacha”.

JESUCRISTUŽ NASTAQUI MAZINTAČHA

²⁶ Nekztanaqui sojta jiizquiztan Elisabet ickattanaqui, Yoozqui Gabriel cjita anjila cuchanžquičiča Galilea cjita yokquin, Nazaret cjita wajtquiz. ²⁷ Nii wajtquiz tsjaa tunsill tur želatča María cjiti. David cjita atchi ejpžquiztan tjoniñtača. Mariiqui José cjita žoñžtan kazzintača zalzjapa. Yoozqui naa Mariaquiz anjila cuchanžquičiča. ²⁸ Naaquiz tjonžcu, anjilaqui paljaychiča, tuž cjican:

—Cullacalla, Yooz k'ayamča amqui. Yooz kjarquizza. Nižaza Yoozqui amtan chica- pachača. Yoozqui tjapa maatakžquiztanam amquiz juc'ant wali favoraž paaquičha. — Jalla nuž tsaanchiča anjilaqui.

²⁹ Anjilž taku nonžcu Mariiqui ispantichinča. Kuzquiz pinst'ichinča, nii tsaantaqui anal intintasača, cjican. ³⁰ Nekztanaqui anjilaqui naaquiz cjichiča:

—María, ana tsucaquiz amqui. Yoozqui amquiz wali pajk favora paaquičha. ³¹ Jalla nižtiquiztan amqui icaquičha. Lucmajch wawchizim cjequičha. Nii wawaqui Jesús cjita tjuuchiz cjequičha. ³² Tsjii nojiqui nii am majchqui wali pajk jiliriz cjequičha. Arajpach Yooz Ejpž Majchpanča niiqui. Werar Yooz Ejpqui niž Majchquiz pajk mantiñi cjisnataquičha, Israel wajtchiz žoñinacžjapa. Am David cjita atchi ejptača tuquita pajk mantiñiqui. Jalla nižta pajk mantiñi cjequičha am majchqui. ³³ Israel wajtchiz žoñinaca wiñayaž mantaquičha. Niž mantitauqui wiñayaž želaquičha. Anaž tucuzinznasača. — Nuž paljaychiča anjilaqui.

³⁴ Nekztanaqui Mariiqui anjilžquiz pewczinča, tuž cjican:

—¿Jaknužt tii cjesaya? Wejrqui ana luctaka pajuča.

³⁵ Nii anjilaqui kjaaziča, tuž cjican:

—Yooz Espiritu Santuqui amquiz tjonznaquičha. Jalla nuž tjonan arajpach Yoozqui niž aztan tsjirižtakaz wezcaquičha am juntuñ. Nii oraqui Yooz Espiritu Santuqui am t'icznaquičha. Jalla nižtiquiztan nii am maatiqui juc'ant zuma lititum kamañchiz cjequičha. Yooz Majchpanča niiqui. ³⁶ Nižaza amquiz maznuča tuž, am jamillquiz- tan Elisabet cjitiqui ickatchitača, chawc žon cjenami. Tuquiqui žoñinacaqui Elisabet puntuquiztan cjiñitača: “Naa žonča ana matiñqui” cjicanaqui. Jaziqui sojta jiizkaz icchinča. ³⁷ Yoozqui čhulumipankaz paasača. —Jalla nuž chiichiča anjilaqui.

³⁸ Nekztanaqui Mariiqui cjichinča:

—Wejrqui Yooz Jiliriz mantitacama kamiñ žontča. Yoozqui wejtquizimi amiž chiita- cama paaj cjila.

Jalla nuž Mariaž chiitan, anjilaqui ojkičiča.

MARIAŽ ELISABETAQUIN OJKTA

³⁹ Nekztanaqui tsjii kjaž majquiztan Mariiqui zati pariju ojkinča Judea cjita kolta curunacchiz yokquin. ⁴⁰ Jalla nicju Zacarías kjuya luzzinča. Kjuya luzcu Elisabetaquiz

tsaanchinča. ⁴¹ Nuž Mariaž tsaanan Elisabeta wawaqui pjuch kjuyj cjenpacha kissičha. Nekztanaqui nii oraqui Espíritu Santuqui naa Elisabetaquiz luzzičha nižaza chiikatchičha. ⁴² Jalla nekztan naaqui alto tawkžtan Mariaquiz paljaychinča, tuž cjan:

—Yoozqui amquiz tjapa maatakžquiztanami wali pajk favora paachičha. Nižaza nii am majchqui walja honorchiz cjesaž cjila. ⁴³ ¿Kjažtiquiztan taa arajpach Jilirž maaqui wejtquin tjonžquejo? Wejrqui inakaztčha. Anal waquisučha. ⁴⁴ Amiž tsaanta taku nonžcu, wejt wawaqui pjuchquiz ancha cuntintu kis kissičha. ⁴⁵ Yooziž apayžquita taku criichamčha, nii Yooziž chiita takucama cumplisnaquičha, jalla nii criichamčha. Jalla nižtiquiztan zuma cuntintum cjequičha. Nuž cjichinča Elisabetqui.

⁴⁶ Nekztanaqui Mariiqui chiichinča, tuž cjan:

“Wejt Yooz Jilirž honoral waytačha. ⁴⁷ Wejt Liwriiñi Yooziž cjen, wejt kuzmi anchaž chipčha. ⁴⁸⁻⁴⁹ Wejrqui inakaztčha. Yooz mantitacama kamiñ žontčha. Yoozqui wejtquiz cjuñžquichičha. Jaziqui walja azziz Yooz Ejpqui wejtquiz t'iczičha. Jalla nuž wejtquiz pajk obra paachičha. Tekztan nawjčchuc tjapa žoñinacaqui wejt puntuquiztan parlaquičha: ‘Yoozqui naaquiz zuma favora paachičha’, cjan. Werar Yoozqui jecžquiztanami juc'anti zumapankazza. ⁵⁰ Yoozqui tjapa niižquin rispitiñ žoñinaczquiz okžnipanča, watay wata okžnipanča. ⁵¹ Yooza walja pajk obranaca paañiqui. Mit kuzziz žoñinacz pinsitanaca inakaz cjissa. ⁵² Walja azziz jilirinaca jwessa ninacz puestuquiztan. Antiz humilde kuzziz žoñinaca honorchiz cjskatčha. ⁵³ Nižaza jakziltat ana cusasanacchiz t'akjiri žejlčhaja, jalla nii t'akjirinaczquiz walja cusasanaca tjaaquičha Yoozqui. Antiz ricahunzcazti laachi kjarquiz ana čhjulchiz quejpkataquičha. ⁵⁴⁻⁵⁵ Nižaza Yoozqui učhum tuquita atchi ejpnaczquizimi, Abrahamžquizimi, Abrahamž majchmaatinaczquizimi, jalla ninaczquizimi taku tjaachičha, ninaca tirapan okznajo. Jalla nuž okžcu Yoozqui walja yanapčha Israel wajtchiz Yooz sirwiñi žoñinaczquin, ninaca ana tjatsñičha”. Jalla nuž chiichinča Mariiqui.

⁵⁶ Tsjii čhjep jiiž Mariiqui Elisabetatan kamchinča. Nekztan quejpcchinča naaža persun kjuya.

JUAN BAUTISTAŽ NASTA

⁵⁷ Naa Elisabeta majtz tjuñiqui irantižquichičha. Nekztan lucmajch wawa majtchinča. ⁵⁸ Jalla nuž cjen, Yoozqui Elisabetaquiz ancha zuma favora paachičha. Jalla nii quintu zizcuqui, Elisabeta wisinunacami jamillanacami naaquin tjonžñi ojkičha. Nekztan ninacz tjonžtan, Elisabetaqui ancha cuntintutakalčha. Ninacami cuntintuzakaztačha. ⁵⁹ Jalla nekztan quinsakal tjuñiquiztan Zacariastan Elisabetatan timplu ojkičha wawa chimpus cuztrumpi paakatžjapa. Nii cuztrumpi paatan ejpž tjuužtan tjuuzkatž pecatčha, Zacarías cjan. ⁶⁰ Wawž maaqui cjichinča:

—Anaž. Tii wejt maatiqui Juan cjita tjuuchizpanž cjequičha.

⁶¹ Partinacazti pewczičha:

—¿Kjažtiquiztan nižta tjuuskatz pecjo? Am jamillanacquiztan anaž nižta tjuuqui žejlčha.

⁶² Jalla nekztanaqui wawž ejpžquiz kjaržtan pewczičha, čhjul tjuuchizim pecas, jalla nii. ⁶³ Ejpqui tsjii maychičha, tjuu cjjiržjapa. Nekztanaqui cjjirčičha, tuž cjan: “Wejt maatiqui Juan cjitaž cjequičha”. Nekztanaqui tjappacha ispantichičha nii puntuquiztan.

⁶⁴ Nii orapacha Zacariasqui wilta chiiñi cjissičha. Jalla nuž wilta chii atcan, Yooz honorla paljaychičha. ⁶⁵ Jalla nuž cjen wisinunacami ispantichi quirchičha. Tjapa kjutñi nii Judea yokaran nii quintu ojkičha. ⁶⁶ Tjappacha nii quintu zizñi žoñinacaqui kuzquiz pinsičičha: “¿Tii uzaqui čhjulut cjisnaquejo?” cjan. Yooz kjarquizpantačha nii wawaqui.

⁶⁷ Nekztanaqui Yooz Espíritu Santuqui Zacarižquiz chiikatchičha. Jalla nižtiquiztan Zacariasqui Yooziž tjaata takucama paljaychičha, tuž cjan:

⁶⁸ “Yooz Jiliri honorchiz cjlalla. Niičha Israel žoñinacz Yoozqui. Učhum Yoozqui niiž mantitacama kamiñ žoñinaczquin cjuñzičha. Jaziqui liwriita cjequičha učhumqui.

⁶⁹ Yoozqui walja azziz Liwriiñi cuchanžquichiča, učumnaquiz. Davidž majch maatináčquiztanpacha majttača nii Liwriiñiqui. David cjitaqui Yooz mantitacama kamñitača. ⁷⁰ Tuqui timpuquiztanpacha jalla nužupan Yoozqui taku tjaachiča. Yooz taku paljayñi žoñinacaqui niiž jaru niiž jaru nii Yooziž tjaata taku mazmazziča. ⁷¹ Nii maztaqui tužutača: ‘Liwriitačhumž cjequičha, učum quintra žoñináčquiztanami, učum chjaawjkatñi žoñináčquiztanami’. ⁷² Yooz Ejpqui učum tuquita atchi ejpnáčquiz taku tjaachiča, tuž cjican: ‘Wejrqui ančhucaquiz tira okzniñča. Weriž zuma tjaata taku anal tjatsnača’. ⁷³ Nižaza Yooz Ejpqui učum tuquita Abraham ejpžquiz taku juramintužtan tjaachiča, nijapami učumjapami. ⁷⁴ Učum quintra žoñináčquiztanami liwriitanaqui, učumqui ana ekscu Yoozquin sirwasača. ⁷⁵ Nižaza učumqui Yooz kuzcamakaz zuma lijtuma kamaquičha. Jalla nuž kamcan učumqui Yooz sirwaquičha ticzcama”. ⁷⁶⁻⁷⁷ Nižaza Zacariasqui tira paljaychiča, tuž cjican: “Juan, wejt maati, amqui Jesús Jilirž tjonz tuqui ojklayaquičha, Israel žoñinaca nii zuma tjewznajo. Amqui jaknužt žoñináč ujnacami pertunta cječhaja, jalla nii intintiskataquičha. Žoñináč ujnaca pertunta cjen, liwriitaž cjequičha. Jalla nuž intintiskattiquiztanauqui profeta cjitam cjequičha amqui, arajpach Yooziž tjaata taku paljayni profeta. ⁷⁸ Yoozqui učum ancha okniž cjen učum liwriyaquičha. Tsewctanpacha tsjii Liwriiñi cuchanžquichiča, učum kuzquiz tjuñižtakaz kjanajo. Jalla nižtiquiztan ew timpužtakaz cjequičha. ⁷⁹ Jalla nii Liwriiñiqui zuma kjanacamapanž Yooz zuma kamañ jicz tjeznaquičha, zumchiquiztakaz kamñi žoñináčquizimi, ticquiztan eksñi žoñináčquizimi. Nižaza nii Liwriiñiqui učum zuma irpaquičha, Yooz Ejpžtanami učumtanami zumanznajo”.

Jalla nuž cjichiča Zacariasqui.

⁸⁰ Nekztanaqui nii Juan cjita uzaqui pajkchiča. Zapuru juc'anti Yoozquin tjurt'iñi kuzziztača. Jalla nekztanaqui tsjii ch'ekti yokquin ojklayatča, Israel wajtchiz žoñináčquiz niiž obra tjezcama.

2

JESUCRISTUŽ NASTA

¹ Jalla nii timpuquiz tsjii walja chawc jiliri želatča, Augusto cjita. Nii chawc jiliriqui mantichiča, tuž cjican:

—Tjappacha žoñinacaqui tjuu apuntiskataquičha.

² Nii timpuquiz Cirenio cjita jiliri želatča, Siria yokchiz žoñinaca mantiñi. Jalla nii timpuquiz primir censuqui watchiča. ³ Nekztanaqui tjapa žoñinacaqui persun watja ojkspantača, persun tjuu apuntiskati. ⁴ Jalla nuž cjen José cjita žoñiqui Galilea cjita provinsiquiztan, Nazaret cjita wajtquiztan ulanžquichiča. Judea cjita provinsiquin, Belén cjita wajtquin ojkičiča. Jalla nicju David cjita tuquita atchi ejpqui nassitača. Davidž majchmaatquiztan tjonñitača Josequi. ⁵ Jalla nuž cjen nicju ojkičiča, tjuu apuntiskati. María cjiti turatan zalzjapa kazzitača Josequi. Nii oraqui naa Mariiqui Espiritu Santuž t'icžtatača. Juztan Mariatan pucultan ojkičiča, tjuu apuntiskati. ⁶ Belén wajtquin irantižcu, María majts oraqui tjonchiča. ⁷ Jalla nicju Mariiqui primir wawa majtchinča, Belén wajtquiz, animalž tjajz kjuyquiz. Wawaqui pañ awallžtan capžtatača. Jalla nuž capžcu animalž tjajz kjuyquiz t'apžtatača. Anaž iya alujamintu wajtchucatača.

AWATIRINACAQUI JESUSIŽQUIZ RISPITI TJONCHIČHA

⁸ Belén wajt žcatiran uuzi itzñi awatirinaca želatča. Awatirinacaqui pakara uuzi itzñitača pamparanpacha. ⁹ Jalla nuž želan tiripintit Yooz anjilaqui jeczquichiča. Tsewctan nináč kjutñi walja kjanžquichiča. Nuž cheržcu ninacaqui ancha tsucchiča.

¹⁰ Jalla nekztanaqui nii anjilaqui cjichiča:

—Ana tsuca ančhucqui. Zuma quintul zjjicžcuča. Tsjii Liwriiñiqui tjapa žoñináčtjapapa cuchanžquitača. Jalla niiž cjen žoñinacaqui zuma cuntintuž cjequičha. ¹¹ Tii zeziqui Davidž wajtquiziqui tsjii wawa majttača. Jalla niiqui Jesucristo Yoozza, ančhuc Liwriiñi.

¹² Ančhucqui nii wawa wachaquičha pañ awallžtan capžta; nižaza animalž tjazj kjuyquiz t'apžta wachaquičha. Jalla nuž wažtaž cjen siñala cuntažtakaz cjequičha. Jalla nuž cjenauqui ančhucqui zizaquičha, chekapan weraraž chiitkalala, niiqui. —Nuž cjichičha anjilaqui.

¹³ Jalla nektzan anjilžtan chica tama Yooz anjilanacaqui tsewctan jecžquichizakazza. Yooz anjilanacaqui Yooz honora waytichičha, tuž cjican:

¹⁴ —Tsewcta arajpach Yooz honorchiz cjilalla. Nižaza tii yokquiziqui Yooz okžta žoñinaca zuma cuntintu kuzziz cjilalla.

¹⁵ Jalla nuž chiižcu, Yooz anjilanacaqui tsewc arajpacha quejpchičha. Nektzan nii awatirinacaqui porapat parlassičha, tuž cjican:

—Anjilaž maztaqui arajpach Yoozquiztan tjonchikalala. Tsjii Liwriiñi majttakalala. Jalla nii cheriž Belén watjaž ojklalla.

¹⁶ Jalla nektzanaqui awatirinacaqui zati pariju ojkičha. Belén wajtquin animalž tjazj kjuyquiz luzzičha. Nekzpacha awatirinacaqui zalchičha Mariatan Juztan wawa t'apzi.

¹⁷ Ninacžtan zalžcu tjappacha Yooz anjilaž chiitanaca nii wawž puntuquiztan quint'ichičha.

¹⁸ Awatirinacaž nuž maztiquiztan, tjappacha nonžñi žoñinacaqui ispantichičha. ¹⁹ Mariižti persun kuzquiz nii mazta chjojchinčha. Nii mazta puntuquiz pinsican walja pinsamintu aptazzinčha. ²⁰ Awatirinacaqui uuzi ichi quejpchičha. Nižaza Yooz honora paljaychičha, tuž cjican:

—Yoozza chekanaqui. Ancha waličha učumž nonžtanaca, učumž chertanacami. Yooz anjilaž chiitacama nižtapacha cherchinčhumla. —Jalla nuž cjican Yooz honora waytissičha awatirinacaqui.

JESUSAQUI TIMPLUQUIN CHJICHTAČHA

²¹ Majttiquiztan quinsakal tjuñquiziqui jalla nektzan nii wawžquiz chimpuz cuztrumpi paachičha. Ima Mariaž ican, Yooz anjilaqui Mariaquiz chiichičha, “Jesús cjita cjequicha amiž primir majtta wawaqui”. Jalla nižtiquiztan nii anjilaž chiita tjuužtan tjuuzkatchičha.

²² Tuquitanpacha tsjii taku mantichičha Moisesqui, tuž cjican: “Majtžcu ima pusi tunc tjuñiž cjen, maatakanacaqui Yooz sirwiz cuzturumpinaca ana payi atasacha. Pusi tunc tjuñiž tjonan, timpluquiz tsjii cuztrumpi paazpančha. Jalla nektzanaqui wilta Yooz sirwiz cuztrumpiž paasačha”. Jalla nižtiquiztan majtta tjuuquiztan pusi tunc tjuñi pjožkan Juztan Mariatan ninacž wawa chjitchičha Jerusalén cjita watja. Jalla nicju timpluquin ojkičha wawa Yoozquin cumpjii. ²³ Tsjii Yooz liiqui tuž cjichičha, “Primir lucmajch wawa majtžcu, Yoozquin cumpjitaž cjequičha Yooz sirwajo”. Nuž Yooz lii ut'aysiž cjen lii jaru cumplichičha. ²⁴ Yooz mantita lii jaru nii lucutiñiqui ojkičha. Yooz liiqui zakaz cjičha: “Tsjii pariza paluma uz tsjii pariza wežla palomažtakaz Yoozquin tjaaspančha”. Jaziqui nužupan Yoozquin tjaachičha.

²⁵ Nii timpuqui Jerusalemquiz tsjii Simeón cjita žoñi želatčha. Nii žoñiqui Yooz kuzcama kamñitačha; Yooz lii jaru kamñitačha. Nižaza Israel wajtchiz žoñinacž Liwriiñi tjewzičha. Simeonqui Espiritu Santuž irpita žoñipantačha. ²⁶ Espiritu Santuqui Simeonžquiz taku tjaachičha, tuž cjican: “Ima ticzcan, amqui Yooz cuchanžquita Liwriiñi Jiliri cheraquičha”. ²⁷ Jalla nuž taku tjaatiquiztanaqui Espiritu Santuqui Simeón irpichičha timplu kjutñi. Nii oraqui Jesusiž maa ejpqui nii timpluquin chjitchičha. Nekziqui Jesusižquiz mantita lii jaru cumplichičha. ²⁸ Jesusa cjita wawa cheržcu, Simeonqui kjaržtan kaazičha. Jalla nuž kaažcu, Yooz honorchiz cjeajo, tuž cjichičha:

²⁹ —Yooz Tata, wejrqui amiž mantitacama kamiñ žoñtčha. Tuquiqui wejtquiz taku tjaachamčha. Anziqui amiž chiita taku cumplichamčha. Jaziqui tižtiquiztanaqui cuntintul ticznasačha. ³⁰ Jaziqui wejt persun chjujčžtan tii amiž cuchanžquita Liwriiñi cherchinčha.

³¹ Tjappacha tii muntuquiz žejlñi žoñinacžtajapa tii Liwriiñi cuchanžquichamčha. ³² Tii Liwriiñiž cjen, Israel žoñinacžquizimi parti žoñinacžquizimi Yooz kamañ jicz tjeježtaž cjequičha, liwriita cjeajo. Nižaza tii Liwriiñiž cjen, Israel wajtchiz žoñinacaqui zuma honorchiz cjisnaquičha. —Jalla nuž chiichičha Simeonaqui.

³³Simeonz chiitiquiztan Jesusiž maa ejpqui ninacž kuzquiz ispantichiča. ³⁴Nekztanaqui Simeonaqui ninacžta Yoozquin mayizichiča walikaz cjejajo. Nižaza Jesusiž maaquiz paljayichiča, tuž cjican:

—Werarapančhay, tii wawaž cjen walja Israel wajtchiz žoñinaca liwriitapanž cjequiča. Nižaza tii wawaž cjen yekjapa Israel wajtchiz žoñinacazti ujquin tjojtznacuiča. Tiiqui walja chawc jiliripanž cjequiča. Pero walja žoñinacazui nii anaž rispitaquiča, Yooziž cuchanžquita cjenami. ³⁵Tii wawaž cjen žoñinacaz kuzquiz pinsitanacaqui pajtaž cjequiča. Nižaza María, amqui tii wawaž cjen ancha llaquitam cjequiča. —Jalla nuž mazziča Simeonaqui.

³⁶⁻³⁷Nii oraqui tsjaa Ana cjiti žon želatča, timpluquiz zakaz. Naatača Yooz taku paljajni profetqui. Jalla naaqui Fanuelž majttača, Aser cjita t'akquiztan. Pakallawk wata zalztiquiztan, naaža lucuqui ticziča. Anziqui walja chawc žontača. Quinsakalc tunca pusin watchiztača naa žewqui; timpluquiztan anapan ulniñtača. Ayunascan Yoozquin mayizican, Yooz Ejpžquin sirwiñtača majiñami weenami. ³⁸Jesus cjita wawa timpluquiz želan, nii orapacha Ana cjiti žonqui nii wawžtan zalchinča. Nuž zalžcu Yoozquin sparaquiž cjichinča. Nekztan nii wawž puntu paljaj kalltichinča Jerusalén watja liwriiz tjuñi tjewžñinacžquiz.

JESUSAQUI PAJKCHIČHA

³⁹Tjapa Yooz mantita lii cumplizcuqui Jesusiž maa ejpqui Galilea yokquin quejpchiča. Niiž persun watja Nazaret cjita quejpchiča. ⁴⁰Jalla nii wajtquinaqui nii uzaqui pajkchiča. Tsjan tjupi y nižaza tsjan čhjultaki zizni cjissiča. Yooz Ejpqui nii walja cwitichiča, nižaza yanapchiča.

⁴¹Zapa wata niiž maa ejpqui Jerusalenquin ojkiča, pascua pjišta payi. ⁴²Jesusaqui tuncapan wajtchiz cjen, niiž jamillžtan Jerusalenquin ojkiča pascua pjišta cuztrumpi payi. ⁴³Jalla nekztan pjišta žeržcuqui, quejpchiča ninacaqui. Jesús uzazti Jerusalén wajtquiz eclichiča. Niiž maa ejp ana eclini naychiča. ⁴⁴Niiž maa ejpqui pinsatča, “Niiž mazinacžtanž caa”, cjican. Jalla nuž cjen niiž maa ejpqui ojkiča tsjii nooj intiru. Pero tjuñi kattan, Jesusa kjurchiča jamillanacžquin nižaza ocjalž maziran. ⁴⁵Maa ejpqui Jesusa ana wači atchiča. Jalla nekztanaqui Jerusalén watja quejpchiča, jalla nicju kjurzjapa.

⁴⁶Tsjii čhjep majquiztan, maa ejpqui Jesús watchiča timplu kjuyla. Timpluquiz Israel lii tjaajni maestrunacžtan želatča. Maestrunacž takunaca nonznatča. Y nižaza maestrunacžquiz pewcznatča Jesusaqui. ⁴⁷Nii uzaž paljayta taku nonžcu tjapa žoñinacaqui ispantichiča, nii uzaž nuž čhjulumu zizniž chiyani. ⁴⁸Jalla nekztanaqui nuž žejlñi cheržcu, ispantichi cjišiča maa ejpmi. Nekztanaqui niiž maaqui chiižinčinča:

—Aay, tii wejt uza jay. ¿Kjažtiquiztan am nižta eclichamta? Am ancha llaquita kjurchinča wejrnacqui. —Jalla nuž maaqui nižquiz chiižinčinča.

⁴⁹Jalla nekztanaqui Jesusaqui maaquiz kjaaziča, tuž cjican:

—¿Wejr tjapa kjutni kjurchamkaya? Wejt persun Ejpž kjuyquiz žejlstanpantača wejtlaqui. ¿Jalla nii ana zizzat amya?

⁵⁰Jalla nuž chiyani niiž maa ejpqui ana intintazziča.

⁵¹Nekztanaqui Jesusaqui maa ejpžtan Nazaret cjita watja ojkiča. Nicju irantižcu maa epiž mantianaca cazniapanikaztača. Maaqui jalla niiž nuž wattanacquiztan kuzquiz chjojchinča. ⁵²Jalla nekztan Jesusaqui tsjan pajkchiča. Nižaza tsjan zizni pinsam-intuchiztača. Yooz Ejpmi žoñinacami niiž cjen cuntintutača.

3

JUAN BAUTISTAQUI YOOZ TAKU PALJAYCHIČHA

¹Zacarias Juan cjita majchqui Yooz taku paljaj kallantichiča. Jalla nii timpuquiz tii jilirinaca želatča. Tsjiiqui Tiberio cjitatača, juc'ant chawc jiliritača niiqui. Tunca pjijskan wata jiliri cjican mantichiča. Nižaza tira mantiñipantača. Tsjiižuñqui Poncio Pilato cjitatača. Niiqui mantichiča Judea cjita yokquin. Tsjiižuñqui Herodes cjitatača. Niiqui Galilea yokquin chawc jiliritača. Niiž lajkqui Felipe cjitatača. Nii Felipiqui

Iturea cjita yoka, Traconite cjita yoka, jalla nii pizc yokquin mantiñitača. Tsjiižuñqui Lisianas cjitatača. Niiqui Abilinia cjita yokquin mantiñitača. Nii timpuqui ninacatača pajk jilirinacaqui. ² Nižaza nii timpuqui Anastan Caifastan timplu chawc jilirinacatača. Nii timpuqui Juanqui želatča tsjii ch'ekti yokquin. Jalla nuž želan Yoozqui Juanžquiz takunaca paljaychiča. ³ Nekztan Juanqui tjapa kjutñi Jordán puj yokaran ojklaychiča. Nicju žoñinacžquiz paljaychiča, tuž cjican:

—Ančhucqui kuznacaž campiya; Yoozquin kuzziz cjisna. Nekztan ančhuca ujnaca pertunta cjequiča. Jalla nekztanaqui bautistaž cjesača. —Jalla nuž paljaychiča Juanqui.

⁴ Tuqita tsjii Isaías cjita Yooz taku paljayñi profeta želatča. Niiž cjjirra takucama watchiča. Jalla tuž cjican, cjjirchiča:

“Ch'ekti yokquin tsjii žoñiqui altu tawkžtan paljayžcaquiča, tuž cjican: ‘Tsjii chawc jiliriž tjonaquiča. Jaziqui zuma kamañ jicz tjaczna. Tsjii zuma jicztakaz ančhuca kuznaca zumpacha tjaczna, y nižaza zuma lijitumapanž cjee. ⁵ K'awanaca liwj tjattjatzna. Curunacami lumanacami zumpachaž wjajržna, nii jicz zuma zok'o okajo. Nižaza nii t'ojonacaqui zumpacha kjujzcatzna. Jalla nuž zuma kamañ jicz tjacznaquiča. ⁶ Nii chawc jiliriž tjontan, tjapa tii muntuquiz željñi žoñinacami Yooz Epiž cuchanžquita Liwriiñiž cheraquiča’”.

Jalla nuž cjican cjjirchiča nii Isaías cjita žoñiqui.

JUAN BAUTISTAQUI ŽOÑINACŽQUIZ CHIIŽINCHIČA

⁷ Nekztanaqui žoñinacaqui tjapa watjanacquiztan ulanžquichiča, Juanž bautista cjisjapa. Juanqui nii žoñinacžquiz cjichiča:

—Zkora irata incallñi žoñinaca. Yooz Ejpqui ujchiz žoñinaca wajillaž casticaquiča. ¿Ject ančhucaquiz nii mazzejo? ¿Nii casticu atipzjapa wejtquinž tjonya? ⁸ Kuz campichinčhucžlaj niiqui, zumapankaz kamaquiča, ančhuca campiita kuz kjana tjeezjapa. Ančhucqui anaž mit kuzziz porapat chiyasaquiča, tuž cjican: “Wejrnacqui Abrahamž majchmaatinacžquiztanpacha tjoniñča. Yoozqui anaž wejrnaca casticasača”. Jalla nižta ana chiiichiiz waquisiča ančhucqui. Yoozqui tii maznacquiztan Abrahamž majchmaatinaca paasača. ⁹ Ančhucqui tsjii frut muntižtakazza. Ana zuma fruta pookñi muntiqui k'aačhtaž cjequiča jir ahtan. Jalla nuž k'aačhtiquiztanaqui, ujtaž cjequiča. Jalla nižta irataž ančhucaquiz wataquiča. Ana zuma kamañchiz žoñinaca castictaž cjequiča. —Nuž cjican paljaychiča Juanqui.

¹⁰ Jalla nekztanaqui žoñinacaqui Juanžquiz pewcziča:

—¿Jaziqui čjulut paaqui wejrnacjo?

¹¹ Nekztanaqui Juanqui kjaaziča, tuž cjican:

—Jequit pizc almillchiz cjechaj niiqui, tsjii almillaqui ana almillchiz žoñžquin tjaasača. Tsjii wacchi čhjerchiz žoñiqui tsjii ana čhjerchiz žoñžquin niž čhjeri tojnaquiča. —Nuž cjichiča Juanqui.

¹² Jalla nekztanaqui tsjii impuesto cobriñi žoñinacaqui Juanžquin tjonchiča, bautista cjisjapa. Nekztanaqui Juanžquiz pewcziča, tuž cjican:

—Tjaajiñi, ¿wejrnacqui čjulut paaquiya?

¹³ Juanqui kjaaziča, tuž cjican:

—Lii jaruž cobraquiča. Anaž juc'anti cobraquiča ančhucqui.

¹⁴ Nižaza tsjii zultatunacaqui Juanžquiz pewcziča, tuž cjican:

—¿Wejrnaczi čjulut paaquiya?

Juanqui kjaaziča, tuž cjican:

—Ančhucqui žoñžquiztan anaž čhjulumi kjañasača. Nižaza anaž fuerziyasača. Nižaza žoñžquizimi ana inapankaz tjojnasača, tsjii cusasa packatzjapami. Nižaza ančhuc persun suelduchiz cuntintupanž cjee. —Jalla nuž cjican kaaziča Juanqui.

¹⁵ Tjapa žoñinacaqui Yooziž cuchanžquita Cristuž tjonz ancha tjewznatča. Jalla nižtiquiztan žoñinacaqui kuznacquiz pinsichiča: “Juanqui Cristužlani” cjican. ¹⁶ Pero Juanqui tjappacha nii žoñinacžquiz cjichiča:

—Nonžna. Wejrqui kjaztangkal bautisuča. Tsjiižuñ wejt wirquin tjonča. Jalla niiqui Espíritu Santužtanami arajpach ujžtanami bautisaquičha. Jalla niiča wejtquiztan tsjan juc'ant poderchizqui. Anal niiz čhjata chjojkinimi atasča, niizquiz atintisjapa. Inakaztča wejrqui.

¹⁷Juanqui tira paljaychiča, tuž cjican:

—Ančhucqui trigo zkalažtakazza. Nii tjoñi jiliriqui trigonaca kjojaquičha. Nekztan itsanacami zuma trigumi pjalznaquičha. Nii zuma triguqui ricujtaž cjequičha. Niiž persun kjuyquin majcžtaž cjequičha. Nii itsanacazti liw ujžtaž cjequičha, ana tjesñi ujquiz. Jalla nižta irataž ančhucaquiz wataquičha.

¹⁸Jalla nuž žoñinacžquiz chiižinchiča Juanqui. Nižaza yekja chiižintanacami paljaychiča, zuma Yooz taku paljaycan. ¹⁹Nižaza wiruñauqui Juanqui Herodes cjita jiliržquiz iwjt'ichizakazza. Herodes cjita jiliriqui niiz jilž tjunatan zalsičha. Felipe cjitatača niiz jilaqui. Nižaza Herodesqui iya anawalinaca paachitakalča. Nekztan Juanqui Herodesquiz iwjt'ichiča tjapa niiz anawali paatiquiztan. ²⁰Herodeszti ana nonziča. Juc'anti anawalinaca paachiča, Juan carsilquiz chawjczcama.

JESUCRISTUŽ BAUTISTA

²¹Juanqui ima carsilquiz chawcta želan, walja žoñinaca bautissiča. Nižaza Jesusa bautissizakazza. Jesusaqui bautista cjiscu Yooz Ejpžquín mayizatča. Nii orapacha arajpacha cjetziča. ²²Yooz Espíritu Santuqui tsjii palumažtakaz chjiwžquičiča Jesusiž juntuñ. Nižaza arajpachquiztan tsjii altu jora paljayžquini nonziča. Nii joraqui tuž cjican chiižquičiča:

—Amča wejt ultim k'ayi Maatimqui. Amiž cjen anchal cuntintutča wejrtqui.

JESUCRISTUŽ TUQUITA ATCHI EJPNACAČHA TINACAQUI

²³Jesusaqui nii oraqui quinsatunc watchiztača. Jalla nekztanaqui niiz Yooz Epiž tjauta trabajo kallantichiča. Jesusiž tuquita atchi ejpnacaqui tinacača. Primero Josež maati cjiatažtakaztača. Josequi Eliž majchtača. ²⁴Eliqui Matatž majchtača. Matatqui Leviž majchtača. Leviqui Melquiž majchtača. Melquiqui Janaž majchtača. Janaqui Josež majchtača. ²⁵Josequi Matatías majchtača. Matatiasqui Amós majchtača. Amosqui Nahumž majchtača. Nahumqui Esliž majchtača. Esliqui Nagaiž majchtača. ²⁶Nagaiqui Maatž majchtača. Maatqui Matatías majchtača. Matatiasqui Semeiž majchtača. Semeiqui Josež majchtača. Josequi Judaž majchtača. ²⁷Judaqui Joanaž majchtača. Joanaqui Resaž majchtača. Resaqui Zorobabelž majchtača. Zorobabelqui Salatielž majchtača. Salatielqui Neriž majchtača. ²⁸Neriqui Melquiž majchtača. Melquiqui Adiž majchtača. Adiqui Cosamž majchtača. Cosamqui Elmodamž majchtača. Elmodamqui Erž majchtača. ²⁹Erqui Josuež majchtača. Josuequi Eliezerž majchtača. Eliezerqui Jorimž majchtača. Jorimqui Matatž majchtača. ³⁰Matatqui Leviž majchtača. Leviqui Simeonž majchtača. Simeonqui Judaž majchtača. Judaqui Josež majchtača. Josequi Jonanž majchtača. Jonanqui Eliaquimž majchtača. ³¹Eliaquimqui Meleaž majchtača. Meleaqui Mainanž majchtača. Mainanqui Matataž majchtača. Matataqui Natanž majchtača. ³²Natanqui Davidž majchtača. Davidqui Isaiž majchtača. Isaiqui Obedž majchtača. Obedqui Booz majchtača. Boozqui Salmonž majchtača. Salmonqui Naasonž majchtača. ³³Naasonqui Aminadabž majchtača. Aminadabqui Aramž majchtača. Aramqui Esromž majchtača. Esromqui Fares majchtača. Faresqui Judaž majchtača. ³⁴Judaqui Jacobž majchtača. Jacobqui Isaacž majchtača. Isaacqui Abrahamž majchtača. Abrahamqui Tarež majchtača. Tarequi Nacorž majchtača. ³⁵Nacorqui Seruž majchtača. Seruqui Ragauž majchtača. Ragauqui Pelegž majchtača. Pelegqui Heberž majchtača. Heberqui Salaž majchtača. ³⁶Salaqui Cainanž majchtača. Cainanqui Arfaxadž majchtača. Arfaxadqui Semž majchtača. Semqui Noež majchtača. Noequi Lamecž majchtača. ³⁷Lamecqui Matusalenž majchtača. Matusalenqui Enocž majchtača. Enocqui Jaredž majchtača. Jaredqui Mahalaleelž majchtača. Mahalaleelqui

Cainanž majchtača. ³⁸ Cainanqui Enós majchtača. Enosqui Staž majchtača. Setqui Adanž majchtača. Adanqui Yooziž paatiquiztan Yooz maatitača.

4

SATANAS CJITA DIABLUQUI JESUSA UJQUIZ TJOJTSKATZJAPA PECATČHA

¹ Jesusiž kuztan Yooz Espíritu Santuž kuztan tsjii kuzziztača. Jalla nuž cjen Jesusaž Jordán cjita pujquiztan okan, Espíritu Santuqui Jesusa chjitchičha ch'ekti yokquin. ² Jalla nii ch'ekti yokquin željčičha pusi tunc tjuñi. Jalla nuž želanaqui nii Satanás cjita diabluqui Jesusa ujquiz tjojskatzjapa pecatčha. Jalla nii pusi tunc tjuñi Jesusaqui ana čheri lujlčičha. Jalla nižtquiztan pusi tunc tjuñquiztan ana lujlčičž cjen čheri eecskatchičha. ³ Jalla nekztanaqui nii diabluqui cjichičha:

—Ultim Yooz Maatimžlaj niiqui, amqui tii mazquiztan t'anta tuckatalla. —Nuž diabluqui čhičičha.

⁴ Jesusaqui kjaazičha, tuž cjican:

—Cjijrta Yooz takuqui tuž cjičha: “Žoñinacaqui anaž čheržtan alaja žetasača. Yooz takučha chekanaqui, jalla niičha ultim čherižtakazqui, Yooztan wiñaya žetzjapaqui”.

⁵ Jalla nekztanaqui nii diabluqui Jesusa chjitchičha tsjii pajk cur puntiquin. Jalla nicju tjapa tii muntuquiz željči yokanaca tjeezičha tsjii ratukaz. ⁶⁻⁷ Nekztanaqui diabluqui Jesusižquiz cjichičha:

—Wejt yujcquiz quillsnaquiž niiqui, nižaza wejr rispitaquiž niiqui, tjapa tii yokquiz željčičha amquiz tjaataž cjequičha. Wejrqui tjapa tii yokanaca tjaačha, am mantisjapa. Tii yokquiz željčičha amtaž cjequičha tjappacha. Tii tjappacha wejtquiz tjaatatača. Jaziqui wejrqui jakziltižquiz tjaaz pecučhaja, jalla nižquinqin tjaasača. —Jalla nuž cjichičha diabluqui.

⁸ Nekztanaqui Jesusaqui kjaazičha, tuž cjican:

—Satanás, wejtquiztan zaraka. Cjijrta Yooz takuqui tuž cjičha: “Ultim arajpach Yoozquinkaz rispita. Nižaza nii alaja sirwa. Niikazza Yooz Jiliričha”, nuž cjican cjijrtača.

⁹⁻¹¹ Nekztanaqui nii diabluqui Jesusa chjitchičha Jerusalén cjita watja. Nicju timplu pjurniquin chjitchičha. Nekztan cjichičha:

—Cjijrta Yooz takuqui tuž cjičha: “Yooz Ejpqui nižž anjilanaca mantaquičha, am cwitisjapa. Ninacž kjaržtan am cwitaquičha, ana am kjojcha čhjojržitža cjejajo čhjul mazquiztanami”. Nuž cjijrtača. Jaziqui ultim Yooz Maatimžlaj niiqui, tsewctan kossuc tii yokquiz layžcalla.

¹² Nekztanaqui Jesusaqui kjaazičha, tuž cjican:

—Cjijrta Yooz takuqui tuž cjičha: “Žoñiqui ultim arajpach Yooz ana inakaz nuž yanznaquičha”.

¹³ Jalla nekztanaqui diabluqui ana čhju lu iyas pinsiñi cjissičha, Jesusa ujquiz tjojskatzjapaqui. Nekztanaqui tsjii kjažtapacha nižquiztan zarakčičha. Wiruñ wilta ujquiz tjojskatz yanznaquičha.

JESUCRISTUQUI YOOZ PUNTU PALJAYCAN OJKLAYCHIČHA

¹⁴ Nekztanaqui Jesusaqui quejpžquičičha Galilea cjita yokquin. Walja Espíritu Santuž azziztača. Tjapa yok kjutñi nižž quintuqui ancha ojkčičha. ¹⁵ Galilea yokquin želan judfo ajcz kjuyanacquizimi tjaajiñitača. Nižž tjaajintiquiztan tjapa žoñinacaqui nižž honora waytichičha.

NAZARET CJITA WAJTQUIN OJKCHIČHA

¹⁶ Nekztanaqui nižž persun watja ojkčičha, Nazaret cjita. Jalla niitača nižž pajkta watjapaqui. Jeejz tjuñ nojiqui ajcz kjuyquin luzzičha, nižž cuztrumpi jaru. Jalla nii ajcz kjuyquin željčan, tsjitsičha Yooz taku liizjapa. ¹⁷ Nekztanaqui Isafas cjita profetaž cjijrta Yooz taku, jalla nii libruqui chjalžtatača Jesusa liyajo. Nii libro cjetžcu wajtčičha tii cjijrta taku. Nekztan liičha, tuž cjican:

¹⁸ “Yooz Espíritu Santuqui wejt kuzquiz žejlča. Wejrqui illztača, pori žoñinacžquiz zuma taku maznajo. Nižaza wejrqui cuchanžquitača llaquizni žoñinaca ana llaquiz llaquizajo. Nižaza wejrqui cuchanžquitača tanta žoñinacžquiz maznajo, ‘Liwriitaž cjequiča ančucqui’ cjan. Nižaza wejrqui cuchanžquitača zur žoñinacž čhjujqui čhjetnajo. Nižaza wejrqui cuchanžquitača ana zuma langzkatta žoñinaca liwriyajo. ¹⁹ Yooz Ejpqui žoñinacžquiz zuma fawora paaquiča. Jalla nuž nii zumanaca paazjapa Yooz Espíritu Santuqui wejtta chicapachača”.

Jalla nuž Yooz taku cjjirtača.

²⁰ Jalla nekztanaqui Jesusaqui nii libro pjucžcu ajcz kjuya atintiñi žoñžquiz intirjichiča. Nekztanu nužquiz julziča. Tjappacha nekž žejlñi žoñinacaqui tira nižžquin chekznatča.

²¹ Nekztanaqui paljayi kallantichiča, tuž cjan:

—Tonjpacha tii cjjirta Yooz taku cumplissiča ančucaž nonžnan.

²² Nekztanaqui žoñinacaqui chiichiča, tuž cjan:

—Walikazza tii Jesusaqui.

Nižž zuma chiita takunacžquiztan ispantichiča. Ninacpora parlassiča, tuž cjan:

—¿Anaj tiic Juz maatiya?

²³ Nekztan Jesusaqui tuž chiichiča:

—Ančucaquiztan žoñi wejtquiz chiyačhani, “Am kullñi žoñimžlaj niiqui, ima wejr kullcan, am persunpacha kullalla”. Wejrqui Capernaum wajtquin milajrunaca paachinča, jalla nii quintu nonzinčucča. Jaziqui ančucqui wejtquiz tuž chiyačhani: “Nižtapacha tii am persun wajtquin paažinala”. Nuž wejtquiz chiyačhani.

²⁴ Jesusaqui tirapan paljayichiča, tuž cjan:

—Weraral chiyučha. Yekja wajtchiz žoñinacaqui tsjii Yooz taku paljayñi profeta zuma risiwasača. Persun wajtchiz žoñinacazti nii Yooz taku paljayñi profetžquiz anaž juyzu paača. ²⁵ Tuquiqui tsjii Elías cjita Yooz taku paljayñi profeta želatča. Nii timpuqui walja žewžew maatakanaca želatča Israel wajtquinaqui. Čhjep wata sojta jiižziz ana wira chijinčiča. Jalla nižtiquiztan walja mach'atača. Ana čhjeri želatča nii wajtquinaqui. ²⁶ Israel wajtquin walja žewžew maatakanaca želanami, Eliasqui ninacžquin ana cuchantatača. Pero Sarepta cjita wajtquin tsjaa žew želatča, Sidón cjita wajtž žcati. Jalla naa yekja wajtchiz žewaquin cuchantatača Eliasqui. Jalla nužupan cjetča. ²⁷ Nižaza tuqui timpuzakaz tsjii Eliseo cjita Yooz taku paljayñi profeta želatča. Nii timpuqui walja mojki janchichiz laa žoñinaca želatča; lepra cjita conača niiqui. Pero Eliseuqui persun wajtchiz laa žoñinacžquiz ana čhjulumi čhjetinčiča. Antiz tsjii Naamán cjita Siria wajtchiz žoñžquiz čhjetinčiča. —Jalla nuž chiichiča Jesusaqui.

²⁸ Jalla nuž chiita nonžcu, tjappacha nii ajczñi žoñinacaqui muzpa žawjchiča Jesusiž quintra. ²⁹ Ninacaqui walja tsjitsiča. Nekztanaqui wajtquiztan Jesusa ulanskatchiča. Nii watjaqui pajk waranc k'aw žcati želatča. Jalla nuž k'aw kjutñi Jesusa chjitchiča, nii k'awquiztan kossuc tjojtsjapa. ³⁰ Ultimquiziqui Jesusazti ninacž taypi watchiča. Ana čhjulumi kjaž cjita ojkičiča.

TSJII ZAJRAŽ TANTA ŽOÑI ČHJETINTA

³¹ Nekztanaqui Jesusaqui ojkičiča Capernaum cjita watja Galilea cjita yokquin. Jalla nicjuqui jeejz tjuñ nooj Jesusaqui tjaajinčiča ajcz kjuyquin. ³² Nižž tjaajintiquiztan žoñinacaqui walja ispantichiča. Jesusaqui pajk jilirž tawkžtan tjaajinčiča.

³³ Jalla nii ajcz kjuyquiz tsjii zajraž tanta žoñi želatča. Nii žoñiqui kjawchiča, tuž cjan:

³⁴ —¡Ay! Jesusa, Nazaret wajtchiz žoñimča. ¿Kjažtiquiztan am wejtnacaquiz mitizi? ¿Kjažtiquiztan wejrnac aki tjon amjo? Wejrqui am pajučha. Yooziž zuma cuchanžquita žoñimča amqui. —Jalla nuž cjichiča nii zajraqui.

³⁵ Nekztanaqui Jesusaqui nii zajrižquiz ujziča, tuž cjan:

—¡Ch'uj žela! ¡Tii žoñžquiztan zaraka!

Jalla nekztanaqui žoñi tjojtcu zajraqui ulanchiča žoñinacž cheranpacha. Ana nii žoñi čhjojritžcu, ecchiča. ³⁶ Nekztan tjapa žoñinacaqui ispantichiča. Jalla nekztan parlassiča, tuž cjan:

—¿Ĉhjul mantiĉi takumekaz chiila tiiqui? Walja azziz tawkchizza. Tii ŝoĉiŝi zajramiŝ mantila. Tiiŝ mantitiquiztan zajramiŝ ulanla. —Nuŝ ispantichi parlassiĉha.

³⁷Tjapa kjutĉi nii yokaran Jesusiŝ ispantichuca paatanacqiztan walja parlasĉitaĉha.

SIMON PEDRUŝ AJMUŝ MAA ĈHJETINTA

³⁸Nekztanaqui Jesusaqui nii ajcz kjuyquiztan ulanŝcu ojkchiĉha. Nekztan Simonŝ kjuyquin luzziĉha. Jalla nekz Simonŝ ajmuŝ maa ch'ujlĉi cona laacjichi ŝelatĉha. Tjapa curpu walja kjakchi ŝelatĉha. Nii ŝejlĉi ŝoĉinacaqui Jesusiŝquiz roct'ichiĉha:

—Ĉhjetinŝinalla, —cjican.

³⁹Nekztanaqui Jesusaqui naa laa ŝona kjutĉi chutjatchiĉha. Nekztan laa ŝon ĉhjetinchiĉha. Ch'ujlĉi conaqui apaltichiĉha nuŝquiz. Nii orapacha naa ŝonqui ŝaazinĉha, nekztanaqui ninaca atinti kallantichinĉha.

TJAPAMAN LAA ŝOĉINACA ĈHJETINTA

⁴⁰Nekztanaqui tjuĉiz kattan, ŝoĉinacaqui tjapaman laa ŝoĉinaca zjiŝcchiĉha, Jesusa ĉhjetnajo. Nekztan Jesusaqui zapa mayniŝquiz persun kjarŝtan lanziĉha. Jalla nuŝ lanŝcu ĉhjetinchiĉha. ⁴¹Niŝaza tsjii kjaŝ laa ŝoĉinacŝquiztan zajranaca ulanskatchiĉha. Jalla nuŝ ulanskatan zajranacaqui kjawchiĉha:

—Yooz Maatimĉha amqui, —cjican.

Nii zajranacaqui zizatĉha, Yooziŝ cuchanŝquita Cristupankazza Jesusaqui, jalla nii. Jalla niŝtiquiztan Jesusaŝti zajranacŝquiz ujziĉha, tuŝ cjican:

—Jalla wejt puntuquiztan anapanĉha chiichiisqui.

JESUSAQUI YOOZ ZUMA KAMAŃ PUNTU PALJAYCHIĉHA

⁴²Niiŝ jakakataŝ wentan Jesusaqui wajtquiztan ulanchiĉha, ana ŝoĉiŝ ŝejlz yokquin. Pero nii wajtchiz ŝoĉinacasti walja nii kjurchiĉha. Niŝtami kjurnĉi ŝoĉinacaqui irantichiĉha jakziŝquin Jesusa ŝelatĉhaj, jalla nicju. Nii ŝoĉinacaqui Jesusaŝ atajs pecatĉha, ana jakziŝquinami okajo. ⁴³Pero Jesusaqui ninacŝquiz cjichiĉha:

—Yekjap watjanacquin jaknuŝt ŝoĉinacaqui Yooz zuma kamaĉhiz kamz waquiziĉhaja, jalla nii paljayquiztanĉha wejrqui. Jalla nijapa wejrqui tii muntuquiz cuchanŝquitaĉha.

⁴⁴Jalla nuŝ paljaycan Jesusaqui ojklaychiĉha Galilea yokaran. Jalla nuŝ ojklaycan ajcz kjuyquizimi paljayĉitaĉha.

5

JESUCRISTUQUI MILAJRU PAACHIĉHA

¹Tsjii nooj Jesusaqui tsjii pajk kot atquin ŝelatĉha. Genesaret cjitaĉha nii pajk kotaqui. Jalla nekz ŝelan walja ŝoĉinacaqui niizquin tjonchiĉha. Yooz taku nonzjapa niiz muytata ancha ts'acjasatĉha. ²Jesusaqui pizc laachi warcu cherchiĉha kot atquiz. Tsjii ch'iz tanĉi ŝoĉinacaqui warcunaca ecchitaĉha. Ninacaqui ch'iz tanz rednaca awjnatĉha. ³Jalla nekztanaqui Jesusaqui Simón cjita ŝoĉiŝ warcuquiz luzziĉha. Simonŝquiz nii warcu kolec atskatchiĉha kot mor kjutĉi cheechi. Jesusaqui warcuquiz julŝcu, ŝejlĉi ŝoĉinacŝquin tjaajĉi kallantichiĉha. ⁴Jalla nuŝ ŝoĉinacŝquiz tjaajĉi ŝerŝcu, Simonŝquiz cjichiĉha:

—Tii warcu am chjicha tsjan kos kjutĉi. Jalla nekztan am ch'iz tanz rednaca tjojtĉna.

⁵Simonaqui kjaaziĉha tuŝ cjican:

—Wejt Tjaajĉi Maestro, zeziŝqui wejrnacqui pakara langzinĉha, pero ana zinta ch'iz tanchinĉha. Niŝtaqui amiŝ mantanaqui wejt ch'iz tanznaca tjojtznaĉha.

⁶Nekztanaqui ch'iz tanz tjojtŝcu, walja muzpa ch'iz tanchi jooziĉha, redmi wjajrŝni kallantichiĉha. ⁷⁻⁸Nii oraqui ninacŝ mazinaca yekja warcuquintaĉha kolec aŝkquinalla. Ch'iz tanz wjajrŝni kallantiquiztan mazinaca kjarŝtan wilzcu, kjawziĉha yanapi tjonajo. Nii mazinacaqui irantiŝcu, nii pizc warcuquiz ch'iztan chjiŝpsiĉha. Ch'iztan jos nii kotquiz kos julŝni tjurchiĉha nuŝ wacchi ch'iz tanziz cjen. Nii cherŝcu, Simón Pedruqui Jesusiŝ yujcquiz quillziĉha. Nekztan cjichiĉha:

—Wejt Yooz Jiliri, ancha ujchiz ŝoĉtĉha wejrqui. Amtan chica ojklayzqui anal waquizuĉha.

⁹Jalla nii wacchi ch'iz tanchiž cjen, Simonaqui walja ispartichiča, nižaza niž mazi-nacami. ¹⁰Tsjii pucultan mazinacaqui Jacobžtan Juanžtan cjitatača. Ninacaqui Zebedeož majchnacatača. Jacobžtan Juanžtan nižaza ispartichi cjišičha. Jesusaqui Simonžquiz cjichiča:

—Ana am tsuca. Jalla tekztan nawjkchuc jaknuž ch'iz juntichamžlaja, jalla nižta irata amqui žoñinacam juntaquiča Yooztajapaqui.

¹¹Jalla nekztanaqui warcunaca yokquin irantiskatzcu, ninacaqui tjappacha ecchiča. Nižaza nii ch'iz tanz langz jaytichiča Jesusižtan chica ojklajzjapa.

MOJKCHI JANCHICHIZ LAA ŽOŇI ČHJETINTA

¹²Tsjii noojiqui Jesusaž tsjii wajtquiz želan, tsjii mojkchi janchichiz laa žoñi tjonchiča. Jesusa cheržcuqui, niž yujcquiz puct'ichiča yokquizpacha. Jalla nekztanaqui rocchiča, tuž cjan:

—Wejt jiliri, wejr čhjetnalla. Am wejr čhjetinzim pecčhaj niiqui, wejr čhjetinzim atča amqui.

¹³Nekztanaqui Jesusaqui kjaržtan lanziča, tuž cjan:

—Wejr am čhjetnasachiya. Jaziqui čhjetintam cjiša.

Jalla nuž chiitiquiztanaqui nii orapacha nii žoñiqui žejtchi cjišičha mojkchi janchi laaquiztan. ¹⁴Nekztanaqui Jesusaqui nii žoñi mantichiča ana jecžquizimi nuž nii čhjetinta puntu chiichiyajo. Nižaza cjichiča:

—Timpluquin oka amqui. Timplu jiliržquin persuna tjeežca. Nižaza čhjetintiquiztan Moisés mantitacama paa. Jaknuž Moisesqui ofrenda uchajo mantičhaja, jalla nuž ofrenda uchaquiča. Jalla nižtiquiztan žoñinaca am žejtchi zizaquiča. Jazic oka amqui. —Nuž mantichiča Jesusaqui.

¹⁵Jalla nuž ana chiyajo mantichiž cjenami, Jesusiž paata puntu juc'anti juc'anti parlita cjišičha tjapa kjutni žoñinacžquin. Jalla nii quinto nonžcuqui, ju'anti žoñinacaqui ajcsquichiča Jesusiž taku nonzjapa. Nižaza laanacami ajcquichiča Jesusaž čhjetinta cjisjapa. ¹⁶Jalla nižtiquiztanaqui Jesusaqui nii žoñinacžquiztan zarakžcu ana žoñinacž žejlz yokquin ojkičiča. Jalla nii yokquin Yooz Ejpžquin mayizichiča.

ZUCH ŽOŇI ČHJETINTA

¹⁷Tsjii nooj niž wiruž Jesusaqui tjaajnatča. Jalla niiran fariseo cjita žoñinacaqui julzi želatča, nižaza judiuž kamañ lii tjaajiñi žoñinaca želatča. Jalla ninacaqui tjapa Galilea watjanacquiztan tjonchiča, nižaza Judeaquiztan, nižaza Jerusalequiztan. Nižaza Jesusaqui laa žoñinaca čhjetincan, Yooz azi tjeeziča. ¹⁸Jalla nekztanaqui tsjii kjaž žoñinacaqui tsjii zuch žoñi zjičičha tjajz zquitquiz callžcu. Irantižcu kjuyquiz majcz pecatča. Jesusiž yujcquiz nonzinz pecatča. ¹⁹Pero muzpa žoñinacacaz ajcsiž cjen, ana Jesusižquin macjati atchiča. Nekztanaqui kjuya yawžcu, tsewctan kjuya pjetčiča, tejanaca apakžcu. Pjetquiztan nii zuch žoñi tsewctan kjuychuc majcčiča tjajz zquitquiz callžcu. Kjuyltan žejlñi žoñinacž taypi nuž Jesusiž yujcquin apjatčiča. ²⁰Ninaca tjapa kuztan tjonchi nayžcu Jesusaqui laa žoñžquiz cjichiča:

—Jilala, jaziqui am ujnacaqui pertuntača.

²¹Jalla nekztanaqui judiuž kamañ lii tjaajiñinacžtan fariseonacžtan kuzquiz pinsi kallantichiča, tuž cjan: “Ĵject tii žoñejo? ĴKjažtiquiztan nižta chiijo? Yooz quintra anawalipanla tii žoñž takuqui. Ĵject ujnaca pertunasajo? Yoozpanikazla ujnacaqui pertunñiqui”. Jalla nuž pinsichiča nii žoñinacaqui.

²²Jesusaqui persun kuzquiz ninacaz pinsita naychiča. Nekztan ninacžquiz paljay-chičha, tuž cjan:

—ĴKjažtiquiztan anhuca kuz nižta pinsejo? ²³ĴJaksilta takut pjasila chiiž cjesajo? Tii zuch žoñžquiz chiižinsjo, “Am ujnacami pertunta”, Ĵcjis pjasila cjesaj? už “Tsijsna. Am tjajz zquiti aptižcu oka”, Ĵnuž chiiž pjasila cjesaj? ²⁴Tsewctan cuchanžquita Yooz Žoñičha wejrqui. Tii muntuquiz jiliritča, ujnaca pertunzjapa. Razunal chiyučha. Jalla nii zizjapa ančhucqui tiiž chera.

Nekztanaqui zuch žoñžquiz cjichiča:

—Amquiz cjiwčha, tsijtsna. Am tjajz zqutinaca aptaza. Oka am kjuya. —Nuž cjican chiichiča Jesusaqui.

²⁵Nii orapacha nii zuch žoñiqui tsijtsičha, žoñinacaž cheranpacha. Tjajz zquti aptičzu, persun kjuya ojkičiča. Yooz honora waytican ojkičiča. ²⁶Jalla niža cheržcu tjapa žoñinacaqui walja ispantichi quirčiča. Ekeksan ninacaqui Yooz honora waytichizakazza. Nižaza ninacpora parlassizakazza:

—Tonj tjuñiqui walja ispantichucanaca cherchinčhumčha.

LEVI CJITA ŽOÑIQUI JESUSIŽQUIN KUZZIZ CJISSIČHA

²⁷Jalla nekztanaqui Jesusaqui ulanchičha. Jalla nuž ulanžcu tsjii Leví cjita žoñi cherčiča. Impuesto cobriñi žoñitača niiqui. Impuesto cobriñi puestuquiz julzi želatča žoñinacžquiz cobrican. Jesusaqui nii žoñžquiz cjichiča:

—Wejttanž ojkla.

²⁸Nekztanaqui Leví cjita žoñiqui tsijtsičha. Impuesto cobriz langz apatatžcu, Jesusižtan chica ojkičiča.

²⁹Nekztanaqui Jesusižtan pjijsta paazjapa, Leviqui persun kjuyquiz zuma čhjeri tjacz-ičha. Čhjeri lujlan Jesusaqui impuesto cobriñinacžtan nižaza yekja ujchiz žoñinacžtan chica julzi želatča. ³⁰Jalla nii cheržcu, fariseo žoñinaca nižaza judiuž lii tjaajiñi maestrunaca jalla ninacaqui Jesusiž tjaajinta žoñinacžquiz chuchi kallantichiča, tuž cjican:

—¿Kjažtiqiztan impuesto cobriñinacžtanami ujchiz žoñinacžtanami čhjeri lujl an-čhucjo?

³¹Nekztanaqui Jesusaqui nuž nonžcu kjaaziča ninacžquiz, tuž cjican:

—Wiw žoñinacaqui kullñi žoñi anaž pecasača. Antiz laa žoñinacaž pecchiya. ³²Wejrqui “zumal kamuča” cjiñi žoñinacžquiziqui anal kjawžni tjonchinča. Antiz “ujchizpanča” cjiñi žoñinacžquiz kjawžni tjonchinča, ninaca Yoozquin kuzziz cjisjapa.

AYUNAS PUNTU

³³Jalla nekztanaqui žoñinacaqui Jesusižquiz chiichiča, tuž cjican:

—Juanž tjaajintanacami fariseož tjaajintanacami walja ayunasñičha. Y nižaza ninacž cutztarumpi jaru walja Yoozquin mayiziñičha. Pero amiž tjaajinta žoñinacžti ana ayunasñipanla. ¿Kjažtiqiztan nižtajo? Čhjeriž lujlžla, nižaza mazk'a kjaz licžla, nižtakazla. —Nuž cjican uj tjojtunz pecchiča nii žoñinacaqui.

³⁴Nekztanaqui Jesusaqui ninacžquiz kjaaziča, tuž cjican:

—Zals pjijstiquiz žoñinacaž impittaž cjenaqui, ¿kjažt zalsñi žoñitajapa ayunasasajo? Nii zalsñi žoñi želanpacha anaž ayunasasača. ³⁵Tii jarquin nii zalsñi žoñiž kjañtaž cjen, jalla nekztanž ayunasasača.

³⁶Tsjii taku chiichizakazza, tuž cjican:

—Anaž jecmi tsjii ew zquitqiztan riminta apakasača, tsjelanzi zquti rimintisjapa. Jalla nuž paaquiz niiqui, nii ew zquti pertisnaquiča. Nižaza nii ew riminta apjattaqui tsjel zquitqiztan tsjemata cjequičha. ³⁷Nižaza anaž jecmi tsjii zijzi zkiz luusquiz ew vino alznasača. Niža alznasaž niiqui, zkiz luus wjajrskatasacha ew vinuqui. Nekztanaqui zkiz luusmi vinumi pizcpacha pertisnasača. ³⁸Ew vinuqui ew zkiz luusquizpanž alznasača. Nekziqiu zkiz luusmi vinumi zumapanž cjesača. ³⁹Y nižaza t'amchi vinu licžcu, anaž ew vinu pecasača. “Wejtta t'amchi vinuqui walikazza”, cjican cjequičha. Nižtazakaz žoñinacaqui Yooziž tjaata ew kamaña ana pecasača.

6

TSJII JEEJZ TJUÑQUIZ WATTA

¹Tsjii jeejz tjuñ noojiqui Jesusaqui zkal taypiranž okatča niž tjaajinta žoñinacžtan. Jalla nuž ojkan niž tjaajinta žoñinacaqui tric oza kjajpchiča. Nuž kjajpžcu kjaržtan kjojchiča. Nekztan lujlchiča. ²Nii cheržcu tsjii kjažultan fariseo žoñinacžti ninacžquiz pewcziča, tuž cjican:

—¿Kjažtiquiztan ančhucqui nižta paajo? Jeejz tjuñquiziqui nižta anapanča paazqui. Učhum lii quintrala, ¿ana jaa?

³Nekztanaqui Jesusaqui ninacžquiz kjaaziča, tuž cjican:

—Ančhucqui Yooz taku liichinčhucpanča, ¿ana jaa? Cjijrta Yooz takuqui tuž cjiča: učhum David cjita tuquita atchi ejpqui niž mazinacžtan čhjeri eescatchiča. ⁴Čhjeri eeczanaqui arajpach Yooz timpluquin luzziča. Nicju Yooz yujcquiz nonžta t'antanaca želatča. Jalla nii t'anta aptižcu, lujlchiča. Nižaza niž mazinacžquiz tojunchiča. Anapantača permitta nii t'anta lujlsqui ina žoñžlaqui. Nižta lujlžcuqui, lii quintrala niiqui. Timplu jilirinacžtapankaz nii t'anta lulaj cjitaqui.

⁵Nižaza Jesusaqui ninacžquiz cjichiča:

—Wejrqui tsewctan cuchanžquita Yooz žoñtča. Jeejz tjuñquizimi čhjulu paaz cjenami mantasača. —Nuž cjichiča Jesusaqui.

KJARA KJOŇCHI ŽOŇI ČHJETINTA

⁶Niž wiruñ jeejz tjuñquiziqui Jesusaqui luzziča judionacž ajcz kjuyquiz. Jalla nii ajcz kjuyquin tjaajni kallantichiča. Nicju tsjii žoñi želatča žew kjara kjoñchi. ⁷Nižaza judiuž lii tjaajniñnacžtan, fariseonacžtan želatča. Nii žoñinacaqui Jesusaž awayt'atča, jeejz tjuñquiziqui čhjetnaqui anaž čhjetna, jaa, jalla nii. Jalla nuž awayt'atča, Jesusiž quintra nii jaru aptisjapa. ⁸Pero Jesusaqui nižta ana wali pinsitanaca kuzquiz naychipanča. Jalla nekztanaqui kjara kjoñchi žoñžquiz paljajychiča, tuž cjican:

—Tsijsna. Tii taypiquin cjisna.

Nuž čhiitiquiztanaqui nii žoñiqui nii taypiquin tsijsiča. ⁹Nekztanaqui Jesusaqui parti žoñinacžquiz paljajchizakazza, tuž cjican:

—Wejrqui ančhucquaz tsjii pewcsnasača. ¿Jeejz tjuñquiziqui učhum liiqui kjažt cjeejo? žoñžquiz zuma paasaya uz žoñžquiz ana zuma paasaja. Žoñž wira liwriyasaya uz žoñž wira ticskatasaja. Ančhucqui zumpacha zizza, zuma paazqui učhum lii jaruča jeejz tjuñquizimi. —Jalla nuž cjican, čhižinchiča Jesusaqui.

¹⁰Jalla nekztanaqui Jesusaqui niž muytata žejlñi žoñinacž kjutñi chercherziča. Nekztan kjara kjoñchi žoñžquiz cjichiča:

—Am kjara chjinzna.

Nii žoñiqui nuž kjara chjinzcu niž kjara žejtchi quirchiča. ¹¹Quintra žoñinacžti nii cheržcu walja žawjchiča Jesusiž quintra. Jalla nekztanaqui ninacpora pewcsarasiča, jaknužt Jesusiž quintra paa-as, jalla nii.

TUNCAPAN APOSTOLONACA ILLZTA

¹²Niž wiruñiqui Jesusaqui tsjii curullquin ojkičiča Yooz Ejpžquin mayizi. Ween pakara Yooz Ejpžquin mayizichiča. ¹³Tjuñiž tjewctanalla, niž tjaajinta žoñinaca kjawziča. Kjawžcu, Jesusaqui tuncapani illziča niž mantita apostolonaca cjisjapa. ¹⁴Nii illzta apostolonacaqui tuž cjita tjuunacchiztača: Simonatača; nižaza niž tsjii tjuuqui Pedro cjitazakaztača. Andrestača, Simonž lajk Jacobotača. Juantača. Felipetača. Bartolometača. ¹⁵Mateotača. Tomasatača. Jacobotača; niiqui Alfeo cjita žoñž majchtača. Simonatača, nižaza niiqui Canaan t'akquiztantča. ¹⁶Judastača, Jacobž lajk; nižaza Judas Iscariotitača; jalla niiqui Jesusiž quintra tarazunchiča.

¹⁷Jalla nekztanaqui Jesusaqui niž illztanacžtan chjijwžquichiča curullquiztan. Pampiquin irantižcu, niž tjaajinta žoñinacžtan tsijsiča. Nicju wacchi žoñinaca želatča, tjapa kjuttan Judea yokquiztan, nižaza Jerusalén wajtquiztan, nižaza Tiro yokquiztan, nižaza Sidón yokquiztan, jalla nii yokanacquiztan tjonchiča. Nii žoñinacaqui Jesusiž takunaca nonžni irantižquichiča. Yekjapanacaqui tjonchiča laanacquiztan čhjetinta cjisjapa. ¹⁸Nižaza yekjapanacaqui tjonchiča zajranacaž tantiquiztan liwriita cjisjapa. Jalla nekztanaqui Jesusaqui ninaca čhjetinchiča. ¹⁹Jesucristuqui čhjetinz azziztača. Nižaza Jesusaqui tjapa nii žejlñi laanaca čhjetinchiča niž aztan. Tjappacha laa žoñinacaqui Jesusa lanz pecatča, čhjetinta cjisjapa.

²⁰ Nekztanaqui Jesusaqui niiz tjaajinta žoñinacž kjutñi cherziča. Nekztan paljajychiča, tuž cjican:

—Ančhucqui porinaca, Yooz mantita zuma kamañiqui ančhucaltajapača. Jalla niž-tintintuzan cuntintuz cjee.

²¹ Čheri eecšinaca, wiruñ Yoozqui ančhucacqui wali cjiskataquiča, tsjii čheržtan chjekchižtakaz. Jalla nižtintintuzan cuntintuz cjee.

‘Llaquitanaca, anžic ančhuc kaačan. Wiruñiqui ananiž chipchiquiča. Jalla nižtintintuzan cuntintuz cjee.

²²⁻²³ Ančhucqui, Yooz Majchquin sirwiñi žoñinacčhucča. Quintra žoñinacaqui ančhucacqui čhaawjkatča. Nižaza jakurpayaquiča. Nižazaž ch'aanaquiča. Nižaza iñaraquiča. Ančhucacqui ana zumapanž nayaquiča. Jalla nuž cjenami anča cuntintuz cjee. Ančhuczi arajpachquin ojkcucu, wali kamañ wira tanznaquiča, tsjii chawc premiužtakaz. Nižtapan tuquitanpacha tii žoñinacž tuquita atchi ejpnacaqui Yooz sirwiñi profetanacžquiz čhaawjkatñipantača. Jalla nižtintintuzan anžiqui cuntintuz cjee.

²⁴ Ančhucqui ricachunaca, cuntintukaz tii wirquiz kamchinčhucča. ¡Wiruñ anawali-panž ančhucacqui wataquiča!

²⁵ Ančhucqui zuma cusasanacchiz kamchinaca, poričtakaz cjisnaquiča. Yoozquin ana cjuñziž cjen t'akjiriž cjisnaquiča. Ana walinacquiztan chipchinaca tsjii noojiqui ananiž kaaquiča nižaza llaquitaž cjequiča.

²⁶ Ančhucqui, Yooz taku čhiitažoka cjiñi žoninacčhucča. Tjapa žoñinacaqui ančhucacqui honora waytaquiz niiqui ančhucacqui juc'ant anawaliž cjequiča. Tuquitanpacha tii žoñinacž tuquita atchi ejpnacaqui nižtapan honora waytichiča toscara čhiichiñinacžquiz.

QUINTRA ŽOÑINACŽTANAMI ZUMA KUZIZPANŽ CJEE

²⁷ Ančhucqui, wejť taku nonžinaca, ančhucacqui tuž cjiwča: Ančhucacqui quintra žoñinacžtanami zuma kuzizpanž cjee. Y nižaza zumapanž ninacžtan paa, nižaza ančhucacqui čhawjkatñinacžtanami zumapanž cjee. ²⁸ Nižaza ančhucacqui quintra laykiñi žoñinacžquiz zuma tawkžtan paljaya ančhucqui. Nižaza ančhucacqui iñariñi žoñinacžtajapa zuma tawkžtan Yoozquin mayť'ižina. ²⁹ Jakžiltamiž am yujcquiz kichasaž niiqui, ana nižtapacha amqui kicha. Anača cutjatzqui. Nižaza jakžiltamiž am ira kjañaasaž niiqui, nii kjañaj cjee. ³⁰ Nižaza jakžiltamiž amquiztan mayi tjonasača, nuž tjaa. Jakžiltamiž amquiztan kjañaasača, nuž kjañaj cjee. Anam amqui quijasača. ³¹ Jaknužť ančhucqui parti žoñinaca ančhucatan zuma kamz pecčhaj niiqui, jalla nižtapacha ančhucqui žoñinacžtan zuma kama.

³² ‘Yekjapanacaqui ančhucatan zumaž munaziča. Ančhucqui ninacžtan alajapankaz zuma munazaquiz niiqui, žkjažtintintuzan ančhucqui “Zumal paa-uča” cjican chiyasajo? Nižta iratazakaz paača anawal kuziz žoñinacami. ³³ ‘Yekjapanacaqui ančhucacqui yanapča. Ančhucqui ninacžtan alajapankaz yanapaquiz niiqui, žkjažtintintuzan ančhucqui “Zumal paa-uča” cjican chiyasajo? Nižta iratazakaz paača anawal kuziz žoñinacami.

³⁴ ‘Yekjapanacaqui ančhucacqui onza. Ančhucqui ninacžtan alajapankaz onznaquiz niiqui, žkjažtintintuzan ančhucqui “Zumal onznuča” cjican chiyasajo? Nižta irata zakaz paača anawal kuziz žoñinacami. Nekztan tsjii onžnžakaz tjewza. ³⁵ ‘Pero ančhucqui quintra žoñinacžtanami zuma munazizpanž waquiziča. Nižaza ančhucqui quintra žoñinacžquiz-imi yanapz panž waquiziča. Nižaza ančhucqui onžcumu anaž tjewz waquiziča “Niimiž onz, jaa” cjicanaqui. Jalla nuž kamtiquiztanaqui Yoozqui ančhucacqui tsjii pajk honora tjaaquiča. Nižaza nuž kamtiquiztan ančhucqui tjeeža werar arajpach Yooz maatinacaž, nii. Nižaza nuž kamcanaqui Yooz irataž kamča. Yoozqui okžnžakazza quintra žoñinacžquiziqui. ³⁶ ‘Yooz Ejpqui walja okžnžpanča. Nižta irata ančhucqui okžni kuziz cjee.

ZUMA KAMAQUIČHA

³⁷ Ančhucalaqui anača žoñinacž uj paatanaca čhii čhiizqui. Jalla nuž žoninacž uj paatanaca čhii čhiyaquiz niiqui ančhucqui juc'ant ujchiz cjequiča Yooz yujcquiziqui. Nižaza žoñinacžquizimi “Amqui Yooziž castictaj cjila”, cjican čhiyaquiz niiqui ančhucqui Yooziž casticta zakaz cjequiča. Nižaza jakžilta žoñit ančhucacqui quintra uj paačhaja, jalla

niižquiz pertunz waquizičha. Nekztan Yoozqui ančhucaquiz ujnaca zakaz pertunaquičha. ³⁸ Ančhucqui okzñi kuzziz žoñinacžquizimi tjaa. Jalla nuž tjaan Yoozqui ančhucaquiz juc'anti tjaaquičha. Jalla tuž Yoozqui tjaaquičha. Ančhuca quelzquiz chjippi tjaaquičha. Tsajtsucu tsajtsucu nižaza walja kala ts'aczcucu tjaaquičha. Jakziltat tuptalla tjaačhaja, jalla niižquiz nuž tuptalla zakaz Yoozqui tjaaquičha. Nižaza jakziltat čhuñi kuzziz tjaačhaja, jalla niižquiz nuž čhuñi zakaz Yoozqui tjaaquičha.

³⁹ Jesusaqui tsjii takunacžtan chiičičha, tuž cjican:

—¿Jaknužt zur žoñiqui yekja zur žoñi irpiñižtakaz zuma chjichasajo? Pucultanpachaž ojtquiz tjojtsnasačha. Jalla nižtaž ana zuma cjičjiñi žoñinacaqui. ⁴⁰ Tsjiilla cjesačha. Tsjii tjaajinta žoñiqui niž tjaajinižquiztan anaž juc'anti cjesačha, aunquimi istutiižcu tjaajini maestruapanikaz cjequičha. —Jalla nuž tjaajinčičha Jesusaqui.

UJ PUNTUQUIZTAN

Nižaza Jesusaqui tjaajinčičha, tuž cjican:

⁴¹ —Amqui am jilž čhjujquiz tsjii cjujchilla cherasaž niiqui, ¿kjažtiquiztan am persun čhjujquiz pajk cjujchi ana cherjo? ⁴² Am persun čhjujquiz nii pajk cjujchi ana cherasaž niiqui, ¿kjažtiquiztan am jilžquiz chiijo, “Jila, am čhjujquiztan nii cjujchilla apakžinačha”, cjicanajo? Ana zum žoñičha amqui. Primeruqui am persun čhjujquiztan pajk cjujchi apakalla. Nekztan zuma cherasačha. Y nižaza am jilž čhjujquiztan cjujchilla apakasačha. —Jalla nuž tjaajinčičha Jesusaqui uj puntuquiztan.

ŽOÑINACAQUI PAJTAŽ CJESAČHA NINACŽ KAMTIQUIZTAN

⁴³ Nižaza žoñinacž kamañ puntuquiztan Jesusaqui tjaajinčičha tuž cjican:

—Tsjii zum muntiquiztan ana zum frutanaca anawira pookasačha. Nižaza tsjii ana zum muntiquiztan zum frutanaca anazakaz pookasačha. ⁴⁴ Nižaza zapa muntinaca niž frutanacquiztan pajza. Jalla nižtiquiztan tsjii ch'ap muntiquiztan higo fruta anaž pooki atasacha. Nižaza tsjii ch'ap muntiquiztan uwas fruta anaž pooki atasacha. ⁴⁵ Tsjii zuma kuzziz žoñiqui zuma takunaca paljayñipančha. Tsjii ana zuma kuzziz žoñizti ana zuma takunaca paljayñipančha. Jaknužt kuzquiz pinsičhaja, jalla nuž chiičha žoñinacami.

⁴⁶ Jesusaqui cjichizakazza:

—Ančhucqui anaž weriž chiiacama kamčha. Jaziqui, ¿kjažtiquiztan ančhucqui wejt tjuu aynakjo, wilta wiltajo, “Wejt Jiliri, wejt Jiliri”, cjicanajo? ⁴⁷ Yekjap žoñinacžti wejtquin tjonžcu wejt takunaca tjapa kuz nonža Nižaza weriž chiiacamaž kamčha. Jalla tižtaž nii žoñiqui. ⁴⁸ Jalla nii žoñiqui kjuya kjuychičha. Primeraqui yoka jwetchičha, maz zaljapa. Nii mazquin zalžcu, jalla nii maz juntuñ čhjujčičha nii kjuy simintu. Nekztan kjuya pirkichičha. Wiruñaquu tsjii puju kjaz chjippi ojkičičha, walja pjatsi. Nekztanaqui nii kjazqui ojkičičha, kjuya t'eznata. Pero anapan t'ezñi atchičha. Nii kjuyaqui maz juntuñ kjuytatačha. ⁴⁹ Yekjap žoñinacžti wejt taku ana tjapa kuz nonža. Nižaza weriž chiiacama anaž kamčha. Jalla tižtaž nii žoñiqui. Jalla nii žoñiqui kjuyazakaz kjuychičha, ana maz simintuchiz. Wiruñaquu nižazakaz tsjii puju pjatzi, kjazqui kjuya t'ezinsjapa ojkičičha. Nekztanaqui nii kjuyaqui ezzičha. K'ala kuztačha. Jalla nižtaž nii ana weriž chiiacama kamañ žoñiqui.

7

TSJII ČHJETINTAQUI

¹ Jesusaqui nuž paljayz žeržcuqui, Capernaum cjita watja ojkičičha. ² Nicju tsjii romano zultat jiliri želatčha. Niiž ancha zuma piyunaqui ancha laatačha, ticzmayatačha. ³ Nii zultat jiliriqui Jesusiž quintu ziccu, tsjii kjažultan judionacž jilirinaca cuchanžquichičha, Jesusižquiz rocžcajo niž piyuna čhjetnajo. ⁴ Jalla nekztanaqui mantita žoñinacaqui Jesusižquiz macjatčičha. Nekztanac ancha roct'ichičha, tuž cjican:

—Tii zultat jiliriqui ancha zumačha. Jalla nižtiquiztan yanapchucapančha. ⁵ Učhum watja walja rispitičha. Nižaza tsjii učhumž ajcz kjuya kjuykatchičha niiqui.

⁶⁻⁷ Nekztanaqui Jesusaqui nii rocñinacžtan ojkchiča. Kjuya žcati cjisnan, nii zultat jiliri qui tsjii niž mazinaca cuchanžquichiča, Jesusižquiz chii, tuž cjan:

—Wejt jiliri, am yujcquizic anal waquizuča, am wejt kyuyquiz luzajo. Wejrqui persunpacha eksinča am kjuri ojkzjapa. Am ojkzqui ch'amaž cjesača. Tekztanpacha tsjii taku chiyalla. Nuž amiž chiitiquiztanac žetaquiča wejt piyunaqui. ⁸ Wejrmi wejt jiliriž mantitacama ojklayińča. Nižaza wejt zultatunacaqui weriž mantitacama ojklayińča. Jaziqi tsjiimil mantuča, “Oka” cjan. Nekztan ojkča. Nižaza tsjiimil kjawznuča. Nekztanac tjonča. Nižaza tsjiimil mantuča, “Tižta paa” cjan. Niimi zakaz paača. Nižtakaz amqui mantasača, wejt piyuna žetajo.

⁹ Jalla nižta taku nonžcu, Jesusaqui, chiichiča:

—Cusapachaž chiča nii žońiqi, —cjan.

Nekztanaqui apsnii žońinacž kjutńi chersiča. Cheržcu tuž cjichiča:

—Chekapan tii žońiqi juc'ant Yoozquin kuzzizza tjapa Israel wajtchiz žońinacžquiztanami.

¹⁰ Nii jiliriž cuchanta žońinacaqui jilirž kjuya irantižcu chekapan laa piyuna žejtchi zalchiča.

TSJII ŽOŃI JACATATCHI

¹¹ Wiruńaqui Jesusaqui tsjii Nań cjeta watja ojkchiča, niž tjaajnta žońinacžtan nižaza tama žońinacžtan. ¹² Wajt žcati irantižcu, tsjii alma callńi cherchiča. Jalla nii ticziqui zinta maatača. Niiž maaqui žewtača. Walja nii wajtchiz žońinacaqui cumpańtatča.

¹³ Cheržcu, Jesucristu jiliri qui naa maatak žonaquiz okziča, tuž cjan:

—Ana kaa amqui.

¹⁴ Nekztanaqui Jesusaqui žcatžinchiča. Almiž cajuna lanziča. Alma callńinacaqui nužquiz tsjitsiča. Nekztanaqui Jesusaqui ticzi žońžquic cjichiča:

—Jilala, amquiz cjiwča, “Žaažna”.

¹⁵ Jalla nii chiitiquiztanaqui nii ticzi žońiqi žaaziča. Nekztanac chii kallantichiča. Nekztanaqui Jesusaqui niž maaquiz intirjichiča. ¹⁶ Jalla nuž cheržcu, tjappacha tsuchiča. Nižaza tjappacha Yoozquin honora waytichiča, tuž cjan:

—Učhum wajtquizpacha tsjii chawc Yooziž cuchanžquita žońiqi jecsila, oré. Yoozqui niž wajtchiz žońinaca yanapi tjonchiča.

¹⁷ Jalla nekztanaqui tjapa Judea yokaran nižaza nii yok tjiyaran Jesusiž zuma paata quintu ojkchiča.

JUAN BAUTISTAQUI JESUCRISTUŽ PUNTU ZIZ PECCHIČHA

¹⁸ Juan Bautistaž tjaajnta žońinacaqui nii žońi jacatatchi quintu quint'ichiča Juanžquiz. Jalla nižtiquiztan Juanqui Jesusiž quintu zizzizakazza. Nekztanaqui pucultan niž tjaajntanaca kjawziča. ¹⁹ Nekztan Jesusižquin cuchanžquichiča, nižquin pewcznajo, tuž cjan:

—Cristuqui tjonitaž cjila. ¿Amqui Yoozquiztan cuchanžquita Cristumpankaya; uz yekjaž tjonasaj?

²⁰ Juanž cuchanta žońinacaqui Jesusižquin žcatžinchiča. Jalla nekztanaqui irantižcu, cjichiča:

—Juan Bautistaqui wejrnacž cuchanžquiča amqui pewcznajo: “Cristuqui tjonitaž cjila. ¿Amqui nii Cristumkaya, uj yekjaž tjonasaj?”

²¹ Nii orapacha nuž irantitiquiztan Jesusaqui walja žejłńi laanaca čhjetinchiča. Nižaza zajraž tanta žońinaca čhjetinchiča. Nižaza zur žońinacž čhjujqui čhjetinchiča. ²² Jalla nekztanaqui Jesusaqui ninacžquiz kjaaziča, tuž cjan:

—Juanžquin quepa. Amiž chertanaca nonžtanaca quint'ižca. Weriž paatanaca mazca. Zur žońinaca cheržńi cjissila. Nižaza coj žońinaca zuma kjojchchiz ojklayińi cjissila. Nižaza mojkchi janchichiz žońinacami zuma janchichiz žejtčhi cjissila. Nižaza oń žońinacami nonžńi cjissila. Nižaza ticzi žońinaca jacatatchi cjissila. Nižaza pori žońinacžquiz Yooz liwrińi taku paljaytapanča. ²³ Jakziltat weriž paatanaca, chiitanaca nonžcu ana kuz turwayzižlaj niqiu, walipanikaz cjequiča.

JUAN BAUTISTAŽ PUNTU

²⁴Juanž cuchanžquita žoñinacaž ojktan, Jesusaqui Juanž puntuquiztan chiichiča. Tjapa žoñinacžquiz tuž cjichiča:

—¿Čhjulu ch'ekti yokquin chertzni ojkcchinčhuctaya? ¿Tsjii tjamiž tjižinta kalu chertzni ojkcchinčhuctaya? Anapanž jaz. ²⁵¿Tsjii finu zquitchiz žoñi chertzni ojkcchinčhuctaya? Anapanž, jaz. Finu zquitchiz žoñinaca chawc jilirž kjuyquiz žejlča. Nižaza wali jiru kamñi cusasanacchiz žoñinaca chawc jilirž kjuyquiz žejlča. ²⁶Nekztanac, ¿čhjulu chertzni ojkcchinčhuctajo? Yooz taku paljayñi profeta chertzni ojkcchinčhucča. Nužupancha. Juanqui Yooz yujcquiz juc'antiča parti Yooz taku paljayñi profetanacžquiztanaqui. ²⁷Juanž puntuquiztan Yooz tawk libruquiz cjiřtača tuž cjan:

“Yooz Ejpqui tsjii žoñi cuchanžcaquiča ima Cristuž Yooz taku paljayi ojklayan. Nii žoñiqui Israel žoñinacžquiz Cristo zuma tjewskataquiča”.

²⁸Juan Bautistača parti žoñž maatiquiztan tsjan juc'antiqui. Pero tjapa Yoozquin kuzziz žoñimi Yooz maati cjequiča. Čhjul Yooz maatimi žoñž maatiquiztan tsjaa juc'antiča. —Jalla nuž cjichiča Jesucristuqui.

²⁹Jalla nuž nonžcuqui tjapa Juanž bautistaž žoñinacami cjichiča:

—Zumapanča Yooz Ejpqui, —cjananaqui. Nužuzakaz cjichiča impuesto cobriñi žoñinacami, Juanž bautista cjananaqui. ³⁰Pero fariseo žoñinacazti judiož lli tjaajiñinacžtanpacha Yoozquin kuzziz puntuquiztan chiižinta ana juyzu paachiča. Nižaza Yooziž cuchanžquita Juan Bautista ana rispitchicha. Nižtiquiztanaqui ana Juanž bautistatača.

³¹Jesucristo Jiliriqui cjichiča:

—¿Kjažtat tii timpuquiz žejlñi žoñinacajo? ¿Jectnaca iratatajo tinacajo? ³²Ocjala irataž tinaca, ¿ana jaa? Ocjalanacaqui palazquin uzincan niž mazinacžquiz altu tawkžtan kjaw kjawča, tuž cjan: “Wejrnacaž pincallu pjujtan, ana tsajtchinčhucča ančhucqui. Wejrnacaž llaquita itsan, ana kaachinčhucča”. Jalla niža ocjala iratača tii timpuquiz žejlñi žoñinacaqui. ³³¿Kjažtiquiztan niža iratajo? Juan Bautistaqui tjonchiča. T'anta ana lujlñitača. Vinumi ana licñitača. Jalla nižtiquiztan ančhucqui chiichinčhucča: “Zajriž tantača niiqui”, cjan. ³⁴Wiruñaquí wejrqui tjonchinča. Čhjulumi lujlchinča. Nižaza čhjulumi licchinča. Jalla nižtiquiztan ančhucqui wejt quintra chutča: “Walja lujlñiča licñiča tiiqui. Jalla tiipanča ujchiz žoñinacž maziquiya, nižaza impuesto cobriñinacami”. Nuž chiyiñchucča. ³⁵Tuž zakal cjiwča: Yooz puntu zuma zizñi žoñinacaqui Yooz tjaajinta puntu tjeeža.

JESUSAQUI TSJII FARISEO ŽOÑŽ KJUYQUIN LUJLCHIČHA

³⁶Wiruñaquí tsjii fariseo žoñiqui Jesusa luli kjawziča. Nekztanaqui niž kjuya ojkcchiča Jesusaqui. Niž kjuya irantižcu misquiz julziča lujlžapa. ³⁷Nii wajtquizpacha tsjaa ancha ujchiz maatak žonqui želatča. Jesusa luli ojkcchi quintu zizcu, fariseo žoñž kjuya irantižquichiča alabastro cjita maz putillžtan. Nii putillaqui zuma uluraz aceiti chijjipitača.

³⁸Nižaza naaqui ancha kaacan Jesusiž kjojch latuquiz julzinča. Jalla nekztanaqui naaža čhjuc kaj čhjojcan Jesusiž kjojcha awjñi kallantichinča. Nekztan naaža persun charžtan Jesusiž kjojcha chjuzinčinča, zuma kjoñipacha. Nekztan Jesusiž kjojcha chjulsinča. Nekztanaqui Jesusiž kjojchiz nii zuma uluraz aceitižtan tjajlzinčinča. ³⁹Jalla nuž chertzcuqui, fariseo impitñi žoñiqui persun kuzquiz pinsichiča, tuž cjan: “Tii žoñiqui ultim werar Yooz taku paljayñi žoñižlaj niiqui, tiiqui zizkalal, taa maatak žoñ ancha uj payiñča, jalla nii. Taa žoñti tiž kjojcha zakal lanlanža”.

¿JAKZILTAT JUC'ANTI YOOZQUIN K'AACHIÑI CJESAYA?

⁴⁰Jalla nekztanaqui Jesusaqui fariseo žoñžquiz cjichiča:

—Simona, amquiz tsjii taku chiyasača.

Nekztan nii Simón cjita fariseuqui kjaaziča, tuž cjan:

—Tjaajiñi, wejtquiz chiyalla.

⁴¹Jalla nekztanaqui Jesusaqui cjichiča:

—Tsjii pucultan žoñiqui denario cjita paaz kajatača. Tsjii žoñiqui 500 denario cjita paaz kajatača. Tsjiižuñzti 50 denario kajatača. ⁴²Jalla nektanaqui nii pucultanaqui ana wira pjojki atchiča. Nižtami ana wira pjojki atchiž cjen nii kajñi žoñiqui nii pucultan žoñinacžquiz cjichiča: “Ančhucaž kajžta paazqui anal cobrača. Jaziqui nužquizpanikal pertunača”.

Nektanaqui Jesusaqui fariseo žoñžquiz pewcziča, tuž cjan:

—Jaziqui kjaaznalla amqui. ĽJakziltat nii pucultan žoñžquiztan nii ana cobriñi žoñžquiz juc'anti k'aachiñi cjesaya?

⁴³Jalla nektanaqui Simón cjita fariseuqui kjaaziča, tuž cjan:

—Nii pajk kaja ana cobrita žoñiqui juc'ant k'aachiñi cječani.

Nektanaqui Jesusaqui cjichiča:

—Razunam chiiča.

⁴⁴Nektanaqui naa maatak žona kjutñi cheržcu Jesusaqui Simonžquiz cjichiča:

—Wejrqui am kjuya luzquichinča. Amqui anam kjaz onanchamča, tii wejt kjojcha awjzjapa. ĽTaa maatak žon cherkay? Taa maatak žonzi persun čhjujč kajližtan wejt kjojcha awjzinča. Nektanaqui persun charžtan čhjujzinča. ⁴⁵Amqui wejtquiz anam čhjulzamča. Naazti nuž luzcu wejt kjojchami čhjul čhjulžinčinča. ⁴⁶Amqui wejt achquiz ana aceitimi alžinčamča. Naazti wejt kjojchquizimi zuma uluraz aceite alzinča. ⁴⁷Jalla nižtiquiztan amquiz chiižinuča tužu. Walja naaža ujnaca pertuntiquiztan taa maatak žonqui juc'anti wejr k'ayachtiča. Jakziltat ujlliquiztan pertunta cječaja, jalla niiqui anaž juc'anti k'ayachtiča.

⁴⁸Jalla nektanaqui Jesusaqui naa maatak žonaquiz cjichiča:

—Am ujnacaqui pertuntača.

⁴⁹Nektan parti impitta žoñinacaqui nii nonžcu ninacpora parla kallantassiča, tuž cjan:

—ĽJect tii žoñejo? Wali ujnacamiž pertunla. Ujquiztan žoñinacamiž pertunča.

⁵⁰Jesusaqui naa maatak žonaquiz cjichiča:

—Amiž criitiquiztan jaziqui amqui liwriitača. Jaziqui cuntintum okaquiča.

8

MAATAKANACAQUI JESUSIŽQUIZ YANAPCHIČHA

¹Wiruñaquí Jesusaquí wacchi watjanacaran jochinacaran ojklaychiča. Jalla nuž ojklaycan Yooz mantita zuma kamaña, jalla nii puntu paljaychiča. Niiž tuncapan illzta apostolonaca niižtan chicapachatača. ²Nižaza tsjii kjažultan niiž čhjetinta maatakanaca cumpañtichiča, ninacžtan chica. Niiž tuquiqui nii maatakanacaqui zajraž tantatača, y nižaza conanacchiztača. Jalla nii maatakquiztan tsjaaqui Marfa Magdalena cjititača. Jalla naaquiztan pakallak zajranaca ulanchitača. ³Nižaza tsjaa žon želatča, Juana cjiti, Chuza cjita žoñž tjuntača. Naaža lucuqui Herodes cjita jiliri yanapñi secretariotača. Nižaza tsjaa Susana cjiti žon želatča. Nižaza tsjii kjažultan iya maatakanacaqui apsñi-tača. Nii maatakanacaqui persun cusastan atintiñitača Jesusižquiz.

ČHJACZ QUINTU

⁴Walja žoñinacaqui watjanacquiztan Jesusa cheri ulanžquichiča. Walja žoñinacaž nuž juntazziž cjen, Jesusaqui tsjii quintu quint'ichiča, tuž cjan:

⁵—Tsjii zkala čhjacñi žoñiqui zkali čhjaqui ojkičiča. Nektan zkali semilla wichcan wichcan čhjacchiča. Čhjaccan, parti semillanacazti jiczaran tjojtsiča. Nii tjojtisi semillaquí tjeantatača, y nižaza wežlanacaž lujltatača. ⁶Tsjii parti zkali semillanacazti maz yokaran tjojtisiča. Nii tjojtisi semillanacaquí jecžcanpacha nužquiz kjoñchiča. Anaž umit yoka želatča. ⁷Parti zkali semillanacazti čh'ap yokaran tjojtisiča. Nužuntu pakan čh'apinacakazza atipchiquí. ⁸Parti zkali semillanacazti zum yokquiz tjojtisiča. Nektan pajkchiča. Nuž pajkžcu, zuma čhjeri pookchiča, patac čhjerchiz zapa čhojlluquiz. —Nuž quint'izcu Jesusaquí altu tawkžtan cjichiča:

—Jecčhalaj cjuñchiz niiquí, ž-nonžna.

⁹Jalla nektanaqui niiž tjaajinta žoñinacaqui Jesusižquiz pewcziča:

—¿Jaknužt chii tii am takojo? —cjican pewcziča. ¹⁰Jalla nektanaqui Jesusaqui kjaaziča tuž cjican:

—Ančhucaquiz Yoozpachaž tjaajnaquiča ančhuca kuzquiz, niiž mantita kamañ puntuquiztan, nii. Yekjap žoñinacžquiztti quintunacžtankaz chiyučha Yooz mantita kamaña puntuquiztan. Jalla nužquiz weriž chiita quintu nonžcuqui parti žoñinacaqui ana wira intintiñiž cjissa. Weriž chiitiquiztanaqui ana wira tantiiñiž cjissa.

¹¹Nektanaqui Jesusaqui niiž tjaajinta žoñinacžquiz cjichiča:

—Jalla tižta puntunacquiztanž chiičha wejt zkala čhjacz quintuqui. Yooz takučha nii zkal semillanacaqui. ¹²Nii jiczaran žejlñi žoñinacaqui Yooz taku nonziča. Yooz taku nonžtanaqui, diablu cjita zajraqi tjonza, ninacž kuz turwayžinzjapa. Jalla nuž paača diabluqui, nonžñi žoñinacž Yooz taku ana crijajo, y nižaza ninacž ana liwriita cjejajo. ¹³Nižaza nii maz yokaran žejlñi žoñinacaqui Yooz taku nonziča. Yooz taku nonžcupacha cuntintuž catokčha. Pero Yoozquin tjapa kuzzizpan ana nonža. Tsjiipacamakaz catokčha. Čhjul pruebaž tjonanami ratullaž quejpsa. ¹⁴Nižaza nii ch'ap yokaran žejlñi žoñinacaqui Yooz taku nonziča. Yooz taku nonžcu anaž tjapa kuztan catokčha. Cusasanacapankaz cherza; nižaza wali jiru kamspanž pecčha; nižaza pijistanacapankaz pecčha. Jalla nižtiquiztan čjul ana walinaca tjontan, ninacž kuznaca turwayskatčha. Persun kuzquiz pectiquiztanaqui Yooz taku tjatža. Jalla nižtiquiztan ana zuma kamasučha. Ana pookñi zkalažtakaz kamčha. ¹⁵Nii zum yokquiz žejlñi žoñinacaqui Yooz taku nonziča. Tjapa kuztan Yooz taku nonža. Tjapa kuztanž catokčha. Nižaza Yooz takucama zuma kamčha Yoozquin tjurt'iñi kuzziz. Jalla nižtiquiztan zuma pookñi zkalažtakaz kamčha, zumapankaz kamčha.

MICHA TJEEZ QUINTU

¹⁶Jesusaqui tjaajinchiča tuž cjican:

—Anaž jecmi micha tjeeznasučha cajun kjuyltan nonzjapa, už tjajz zquit koztan nonzjapa. Michu tjeez nonz juntuñpanž nekzipan tewznasučha kjuyquiz luzñi žoñinacžquin kjanajo. ¹⁷Čhjulu čhjojžtami wažtapanikaz cjequiča. Nižaza ana Yooz puntu ziztanacami kjanapacha ziztapanikaz cjequiča.

¹⁸Weriž chiita taku zuma nonžnalla ančhucqui. Jakziltažlaj catokñi kuzziz niiqui, juc'anti zuma kuz tjataaž cjequiča, Yooz taku intintajo. Jakziltažlaj ana catokñi kuzziz niiqui, juc'anti turwayskattaž cjequiča. Jalla nižtiquiztan Yooz takuqui anapan intintiñiž cjequiča, “intintučha wejrqui” chiichiž cjenami. —Jalla nuž tjaajinchiča Jesusaqui.

JESUCRISTUŽ FAMILIA PUNTU

¹⁹Wiruñaquí Jesusiž maatan niiž lajknacžtan irantižquichiča, jakziquin Jesusac želatčhaja, jalla nicju. Pero niižquin ana macjati atchiča. Kjuyquiz walja žoñinaca želatčha.

²⁰Jalla nektanaqui tsjii žoñiqui Jesusižquiz mazziča, tuž cjican:

—Am maami am jilanacami kjuj zancu žejlčha. Am cherz pecčha.

²¹Jesusaqui nektan kjaaziča, tuž cjican:

—Yooz taku nonžñi žoñinacaqui y nižaza Yooz takucama kamñi žoñinacaqui, ninacapančha wejt familia cuntaqui, wejt maa cuntaqui, y nižaza wejt jilanaca cuntaqui.

JESUSAČHA TJAMIMI KJAZ LJOJKIMI MANTIŇIQUI

²²Tsjii nooj Jesusaqui niiž tjaajinta žoñinacžtan luzziča tsjii warcuquiz. Nektanaqui tuž cjichiča:

—Tii kotž nawjktuñtanž ojklaj.

²³Jalla nuž ojkan Jesusaqui tjaajičha. Nektanaqui tiripintit wali pjursanti tjami zalchiča. Jalla nii tjamiž cjen warcuqui kjaz ljojkižtan julzmayaž cjisnatčha, kjaz chjiipi.

²⁴Nektanaqui Jesusiž tjaajinta žoñinacaqui Jesusa žinčiča, tuž cjican:

—Tjaajini Maestro, Tjaajini Maestro, kotquiz julzmayaž cjis učumqui. Ticznačan učumni. —Jalla nuž chiitiquiztanaqui Jesusaqui žaaziča. Nektanaqui tjamžquiz nižaza kjaz ljojkiimi mantichiča apaltajo. Jalla nuž mantitiquiztanaqui tjamimi kjaz ljojkiimi

apaltichiča. Ch'ujupan cjissiča. Nužquiz walikaztača. ²⁵Jalla nektanaqui Jesusaqui niiz tjaajinta žoñinacžquiz chiižinčiča, tuž cjan:

—¿Ana wejtquin kuzziz cjissinčuckaya? —Nuž pewcziqiztan, nii tjaajinta žoñinacazti tsucchi ispantichi cjissiča. Nižtiqiztan ninacpora parlassiča, tuž cjan:

—¿Ject tii žoñejo? Tjamimi kjazmi tiiz mantitacamaž ojkča, tiiz chiita takukaz cazza.

TSJII ZAJRAŽ TANTA ŽOŃI ČHJETINTA

²⁶Nižtami Gadara cjita yokquin irantichiča, kotž nawjktuñtan, Galilea cjita yokž nawjktuñtan. ²⁷Jesusa yokquiz chjijwžtan tsjii nii wajtchiz žoñiqui macjatžquichiča. Ažk watanaca zajraž tantapantakalča nii žoñiqui. Zajraž tantiqiztan ana zquiti cutñitakalča. Nižaza ana kjuyquizimi kamñitakalča. Campu santuran kamñitakalča. ²⁸⁻²⁹Jesusa cheržcu, niiz yujcquiz tuzi t'okziča yokquizpacha; kjawcan puct'ichiča. Nektanaqui Jesusaqui žoñi tanñi žajra mantichiča žoñžqiztan ulnajo. Nii chitiquiztan zajraqui kjawchiča, tuž cjan:

—Jesusa, Arajpach Yooz Maati, ¿kjažtiqiztan am wejtquiz mitisi? Am roct'uča, anaž wejr tjatnalla, anaž wejr sufriskatalla.

Tuquiqui wilta wilta zajraqui nii žoñi tanñitakalča. Nižaza nii wajtchiz žoñinacaqui zajraž tanta žoñi čejlñitakalča, y nižaza carinžtan mokñitakalča. Jalla nuž moktiqiztanami čejltiquiztanami carina kojžcu atipasñipankaztakalča. Jalla nektan zajraqui nii žoñi ch'ekti yokaran zajt zajtskatchiča. ³⁰Nektanaqui Jesusaqui nii pewcziča, tuž cjan:

—¿Čhjul tjuuchizzamta?

Nii zajraqui kjaaziča:

—Tama cjitaž wejrqui, —cjan.

Tama zajranacaqui nii žoñžquiz lusñitakalča. ³¹⁻³²Žcati cururan wacchi cuchinacaqui lujlan žejlñitakalča. Jalla nižtiqiztan zajranacaqui Jesusižquiz rocchiča, tuž cjan:

—Anaž wejrnac casticta cjejajo mantalla. Nii cuchinacžquin luzkatalla. —Jalla nuž mantiskatz pecchiča zajranacaqui. Nektanaqui Jesusaqui nuž mantichiča. ³³Jalla nektanaqui nuž mantitiquiztan zajranacaqui žoñžqiztan ulanžcu cuchinacžquin luzi ojkchiča. Cuchinacžquin luzcuqui cuchinaca tjiiranchiča tsjii k'aw kjutñi. Nektanaqui nii cuchinacaqui kossucpacha tjojsiča nii barranc k'awquiz. Nižaza kotquin tjojsiča. Jalla nužquiz tjapa ticziča.

³⁴Cuchi itzñinacaqui nii cheržcu walja tsucchi zajtchiča. Watjaran jochiran quintu quint'ican ojklaychiča. ³⁵Nii quintu nonžcu walja žoñinacaqui ojkchiča nii paatanaca cheri. Jesusižquin irantižcu, nii zajraž tanta žoñi žejtchi cherchiča. Nii žoñiqui julzi želatča Jesusiž kjojch latuquiz, zquiti cujtchi. Nižaza zuma tawkchiztača, ana lucuratžtakaztača. Jalla nuž cheržcu, nii cheri tjonchi žoñinacaqui nužquiz ispantichiča. ³⁶Nii žoñi čhjetinči cherchi žoñinacaqui quint'ichiča parti žoñinacžquiz, jaknužt Jesusaqui žoñi čhjetinčhaja, jalla nii. ³⁷Nii quintu nonžcu, tjapa Gadara cjita yokquiz žejlñi žoñinacaqui Jesusižquiz roqui kallantichiča nawjk okajo. Nii žoñinacaqui cuchinacž pertissiz cjen waljaž eksnatča. Jalla nižtiqiztanacaqui Jesusaqui tsjii warcuquiz luzziča, ojkzjapa. ³⁸Nii zajriqiztan čhjetinta žoñiqui Jesusižquiz rocchiča, tuž cjan:

—Amtan chical ojkkatalla.

Pero Jesusaqui kjaaziča, tuž cjan:

—Tekz am žela. ³⁹Am kjuya oka. Žoñinacžquizim amqui quint'aquiča jaknužt Yoozqui am čhjetinčhaja, jalla nii.

Nektanaqui nii žoñiqui ojkchiča. Jalla nuž ojkžcu tjapa kjutñi watjaran quint'ichiča, jaknužt Jesusaqui nii čhjetinčhaja, jalla nii.

JESUCRISTUČHA LAA ŽOŃI ČHJETINŃI

⁴⁰Jalla nektanaqui Jesusaž kotž nawjktuñtan quejppžqiztan, žejlñi žoñinacaqui tjapa kuz risiwchiča. Tjappacha Jesusiž tjonz tjewsitača. Nektanaqui niiz tjontiquiztan cuntintutača.

⁴¹Jalla nektzan tsjii Jairo cjita žoñiqui irantižquichiča; ajcz kjuy jiliritača. Nii žoñiqui Jesusiž yujcquiz puct'ichiča. Nekztanaqui rocchiča niiž kjuya okajo. ⁴²Nii oraqui nii žoñž zinta majtqui ticzmayatača. Tuncapan watchiztača naa majtqui. Nekztan Jesusaqui jilirž kjuya ojkcichiča. Jesusaž okan, walja žoñinacaqui ts'acjascan apziča.

⁴³Jalla ninacžtan juntu tsjaa laa maatak žonqui okatča. Tuncapan wata inturu ljok ojknī laa t'akjisichintakalča. Nižaza medicunacžquiz kullkatjawi ancha castassinča, ana čjulchiz cjissintača. Nuž kullkatžcumi ana wira žetatča. ⁴⁴Nekztanaqui naa laa žonqui Jesusiž wir kjuttan macjatchinča. Niiž zquit tjiiquiz lanzinča. Nii orapacha nuž lanžcuqui žejtchinča. Nižaza ljok ojknīmi tsijtsiča.

⁴⁵Jalla nekztanaqui Jesusaqui pewcziča, tuž cjican:

—¿Ject wejr lanzejo?

Tjappacha ninacaqui ana zizñi chiichiča, nuž pewcžtiquiztan. Jalla nuž cjen Pedruqui niiž mazinacžtan cjichiča:

—Tjaajiñi Maestro, tii žoñinaca ancha amquiz ts'acjassa, nižaza tjapa kjuttanž am tewjtewjčča. Jaziqui žkjažtiquiztan am nuž pewcžjo, “¿Ject wejr lanzejo?” cjicanajo?

⁴⁶Nekztanac Jesusaqui cjichiča:

—Tsjii tsjiiqui wejr lanziča. Wejr persun kuzquiz naychinča wejt aziqui tsjii čhjet-inčiča, jalla nii.

⁴⁷Naa maatak žonqui waj nuž Jesusiž kuzquiz pajta ziztiquiztan, cjarcatcan macjatchinča. Nekztan Jesusiž kjojchquiz quillzinča. Tjapa žoñinaca želan naaqui mazzinča, nii orac lanzintaž naaqui, jalla nii. Nižaza nii lanžcu nii orapacha žejtchi quirchinča naaqui. Jalla nuž cjican mazzinča Jesusižquiz. ⁴⁸Jalla nekztanaqui Jesusaqui cjichiča:

—Cullacalla, tjapa kuztan criichiž cjen čhjetinta cjissamča. Jaziqui cuntintum am okaquiča.

⁴⁹Jesusaž ima naatan parla žeržnan, tsjii žoñiqui tjonchiča Jairo cjita žoñž kjuyquiztan. Nii Jairuqui ajcz kjuy jiliritača. Tjonchi žoñiqui Jairužquiz cjichiča:

—Am majtqui ticzinpanča. Anam iya tii Maestružquiz molistis waquiziča.

⁵⁰Jalla nii takunaca nonžcuqui, Jesusaqui Jairužquiz cjichiča:

—Ana am nic kuz turwayskata. Yoozquin tjapa kuzziz cjee. Nekztan am uzqui žetaquiča.

⁵¹Jairuž kjuya irantižcu, Jesusaqui anaž jecmi kjuyquiz luzkatchiča. Jesusižtan Pedružtan, Jacobžtan, Juanžtan, naa uza maa ejpžtan jalla ninacakaz luzkatchiča. ⁵²Nii kjuyquiz žejlñi žoñinacaqui tjappachaž kaatkalča. Nižaza naa uzaž ticziž cjen walja llaquitatakalča. Pero Jesusaqui ninacžquiz cjichiča:

—Anaž kaa. Taa uzqui anača ticzin, antiz taa uzqui tjajča.

⁵³Nuž Jesusiž čhiitiquiztan nii žejlñi žoñinacaqui tjassiča nii nonžcu. Ticzinpanča nuž zizziča parti žoñinacaqui. ⁵⁴Jalla nekztanaqui Jesusaqui naa uza kjara tanzinčiča, y nižaza altu tawkžtan chiichiča, tuž cjican:

—Kolta cullacalla, žaazna.

⁵⁵Nii orapacha wilta žejtchin cjissinča. Nižaza nii orapacha tsijtsinča. Nekztan Jesusaqui mantichiča naa uzaquiz čhjeri tjaaznajo. ⁵⁶Naaža maa ejpqui nuž jacatatchiž cjen ancha ispantichiča. Nekztanaqui Jesusaqui ninacžquiz paljaychiča:

—Anaž jecžquizimi čhiichiyaquiča tii čhjetinta quinto, —nuž cjichiča Jesusaqui.

9

APOSTOLONACA CUCHANTA

¹Jalla nekztanaqui Jesusaqui niiž tuncapan illzta apostolonaca kjawziča. Nekztan ninacžquiz mantiz azi tjaachiča, tjapaman zajranaca chjatkatzjapa, nižaza tjapaman laanaca čhjetinzjapa. ²Nižaza Jesusaqui ninacžquiz mantichiča Yooz zuma kamañ puntuquiztan paljayajo, y nižaza laa žoñinaca čhjetnajo. ³Nižaza cjichiča:

—Ančhucqui anaž čhjulumi čhjičhaquiča, jiczquin ojkan. Anaza ajtsmi, anaza žak quelsmi, anaza čherimi anaza pazmi. Nižaza zinta zquitikaz čhjičhaquiča.

⁴Jakzi kjuyquinami irantižcuqui nii kjuyquin alujasaquičha. Jalla nicjuž kamaquičha, nii yokquiztan ojkzcama. ⁵Yekjap wajtchiz žoñinacaqui ančhuc anaž risiwz pecaquiž niiqui, nii wajtquiztanž ulnaquičha. Nižaza ančhuca kojchquiz zcatchi pulpunaca tsajt tsajtsnaquičha. Jalla nii tsajt tsajtstaqui siñalaž cjequičha ninacz quintra, ančhuc ana risiwchiž cjen.

⁶Jalla nektanaqui Jesusiž nuž taku tjaatiquiztan apostolonacaqui niiz mantitacama ojkchičha. Tjapa jochinacz kjutñi ojkchičha, liwriñi Yooz taku paljaycan, y nižaza laanaca čhjetincan.

JUAN BAUTISTAŽ PUNTU

⁷Tsjii chawc jiliriqui Herodes cjita želatčha. Jesusiž quintu zizcu, ana čhjulumi naazipančha nii oraqui. Inakaz želatčha. Jesusiž quintu nonžcu yekjapanacazti cjichičha:

—Juanqui ticziquiztan jacatatchižlani.

⁸Yekjapanacazti chiichičha tuž cjican:

—Tiila Eliasqui; jeczquichila.

Elfas cjitaqui tuquita Yooz taku paljayñi profetatačha. Yekjapanacazti Jesusiž puntu chiichičha, tuž cjican:

—Tiila tsjii tuquita Yooz taku paljayñi profetaqui, jacatatchila.

Jalla nuž cjenami Herodes cjita jiliriqui inakaz cjissičha. ⁹Nii Herodesqui tuž cjichičha:

—Wejrpančha mantichintqui, Juanž acha muržcajo. Anziqui wacchi milajru paata quintunaca nonznučha. ¿Jectpan nii milajrunaca paañejo? ¿Juanpan cjesajo?

Jalla nektanaqui Herodesqui Jesusižtan walja zalz pecchičha.

ŽOÑINACŽQUIZ ČHJERI TJAAZ MILAJRU

¹⁰Wiruñaqi Jesusiž illzta apostolonacaqui cutjatchičha. Nektzan Jesusižquiz quint'ichičha jaknužt kamčhaja, jalla ninaca. Jalla nektanaqui Jesusaqui ninaca chjitchičha tsjii ana žejlz yokquin, Betsaida cjita wajtž žcati. ¹¹Nuž ojkta zizcu, žoñinacaqui walja apzičha. Nektanaqui nuž apžtiquiztan Jesusaqui zuma risiwchičha. Ninaczquiz paljaychičha Yooz mantita zuma kamañ puntu. Nižaza laanaca čhjetinchičha.

¹²Zezi cjee ora Jesusiž tuncapan illzta apostolonaca niizquin macjatchičha, tuž cjican:

—Tii žoñinaca cuchna joch kjutñi wajt kjutñi okaj cjee; tjjaz kjuya kjuržcaj cjee; nižaza lujlz čhjeri kjuržcaj cjee. Tekziqui anaž čhjulumi žejlčha. Jalla nuž cuch waquizičha amqui.

¹³Pero Jesusaqui niiz illzta apostolonaczquiz chiižinchičha, tuž cjican:

—Ančhucž antiz čhjeri tjaa.

Ninacaqui kjaazičha, tuž cjican:

—Anaž wejtnacalta čhjulumi žejlčha. Pjijska t'antallžtan pizc ch'izlližtan, nižtallakaz wejtnacalta žejlčha. Tinaczquiz tjaazjapa anapan wacasačha. Tinaczquiz tjaasjapa, ¿čhjeri kjayi okasaya?

¹⁴Nii žejlñi žoñinacaqui pjijska warank luctakatačha. Nektanaqui Jesusaqui niiz tjaajintanaczquiz cjichičha:

—Tjulžna tii žoñinacaqui pjijska tuncquiztan pjijska tunca jalla nuž t'aka t'aka tjulžna.

¹⁵Jalla nuž niiz mantitacama paachičha. Nektzan tjappacha julzičha. ¹⁶Nektanaqui Jesusaqui persun kjarquiz nii pjijska t'anta nii pizc ch'iz tanzichha. Nuž tanžcu arajpach kjutñi cherzičha. Nektzan Yooz Ejpžquin sparaquiž cjichičha, jalla nii t'antiquiztan, ch'izquiztan. Jalla nektanaqui t'unžcu niiz tjaajintanaczquiz chjalzičha, parti žoñinaczquiz tojznajo. ¹⁷Nektanaqui tjapa nii žoñinacaqui chjekañcama lujlchičha. Jalla nuž lujltanaqui žejtchi t'anta ch'iz t'ananaca tuncapan canasta chjippi ricujchičha.

JESUSAČHA YOOZIŽ CUCHAÑŽQUITA CRISTUQUI

¹⁸Tsjii nooj ana žoñinaca želan, Jesusaqui Yooz Ejpžquin mayizatčha. Niiz tjaajinta žoñinacapanatačha niiztan chicapachaqui. Jesusaqui ninaczquiz pewczichha:

—¿Jaknužt pinsi žoñinacaqui wejt puntuquiztanajo?

¹⁹Nektanaqui nii tjaajintanacaqui kjaazičha, tuž cjican:

—Yekjap žoñinacaqui cjičha, Juan Bautistaž amqui. Yekjapanacazti zakaz cjičha, Elías amqui. Yekjapanacazti cjičha, tuqita Yooz taku paljayñi profetažlani jacatatchini, —jalla nuž cjičha.

²⁰Jaziqui nekztanaqui Jesusaqui wilta pewczičha, tuž cjican:

—Ančhuczti, ¿wejt puntuquiztan kjažzaž cjeejo?

Pedruqui kjaazičha, tuž cjican:

—Yooziž cuchanžquita Crustumčha amqui.

²¹Jalla nekztanaqui Jesusaqui zumpacha niiz tjaajintanacžquiz iwjt'ichičha, ana jecžquizimi nižta maznajo.

JESUSAQUI NIIŽ PERSUN TICZ MAZZIČHA

²²Nižaza Jesusaqui cjichičha:

—Yooz cuchanžquita žoñičha wejrqui. Pero walja sufristančha; nižaza wajt jilirinacami timplu chawc jilirinacami judiož lli tjaajiñinacami wejr ana jilirižtakaz nayaquičha. Nižaza wejr conta cjistančha. Nižaza čhjep majquiztan jacatatačha.

²³Wiruñaquí tjapa nii žejlñi žoñinacžquiz paljaychičha, tuž cjican:

—Jequit wejttañ chica kamz pecčhaj niiqui, primiraqui persun kamañ wira tjažla. Nižaza čhjul pruebanaca watanami zapuru wejttañ chicapacha cjee, aunquimi persun wirami apt'ačhani. ²⁴Jakziltat persun kamañ wira ana tjats pecčhaj niiqui, arajpach kamañaquí ana tjaataž cjequičha. Jakziltat wejt laycu persun kamañ wira tjažznačhaja, jalla niiqui arajpachquin wiñaya kamaquičha. ²⁵Arajpachquin wiñaya kamañ wira pertaquiz niiqui, ¿tii muntuquiz žejlñi cusasa čhjuljapat sirwasajo? ²⁶Nižaza quintra žoñinacaz želan, jakziltat wejtquiztan wejt tawkquiztan ana pajñi chiyauiz niiqui, wejrqui nižtazakal niizquiztan ana pajñi chiyučha wejt mantiz timpuquiz, nekziqui. Tsji noojiqui walja poderchiz quejpžcačha wejt Yooz Ejpž aztan, nižaza wejt Yooz Ejpž anjilananacžtanpacha. Mantizjapa quejpžcačha. ²⁷Weraral cjiwčha. Tsji žoñinaca tekz žejlcanpacha anaž ticznauičha ima Yooz mantiz timpuquiz kallantan.

JESUSAQUI TSJEMATAŽ CJISSIČHA

²⁸Tsjii quinsakal tjuñquiztan Jesusaqui curulla yawchičha Yooz Ejpžtan parli. Nižaza čhjepultan niiz illzta žoñinaca chjitchičha, Pedružtan, Jacobžtan, Juanžtan; jalla ninacaqui Jesužižtan chica ojkičha. ²⁹Yooz Ejpžtan parlican, Jesužiž yujcni niiz kujtta zquitimi walja llijñi kjanapanikaz cjissičha, chiwicamatačha. ³⁰Nii orapacha pucultan luctak žoñiqui parisžquichičha, Jesužižtan parlisjapa. Nii pucultanaqui Moiestan Eliastantačha. ³¹Nii pucultanaqui walja chiw kjana llijñi taypikuiz tjonatčha. Jesužiž ticz puntu parlatčha. Jerusalén wajtquiz jaknužt ticznačhaja jalla nii puntu. ³²Nii oraqui Pedružtan niiz mazinacžtan ančaž tjaji tjonkatatčha pero nii cheržcu ninacž tjajimi zajtchičha. Jesužiž tjeežta honora cherchičha nii pucultan žoñinacaz nižtan želan. Walja chiwi llijñi kjanñi cherchičha. ³³Pucultan žoñinacaz Jesužižquiztan zarakan, Pedruqui cjičhičha:

—J Wejt Tjaajiñi Maestro, tekz žejlqui walipankazza! Jaziqui čhjep chjujlli kjuysla, tsjiuqui amta, tsjiuqui Moiesta, tsjiuqui Eliasta, jalla nuž.

Pedruqui ana zuma tantičcu chičhičha. ³⁴Jalla nuž Pedruž chyan, tsji tsjirižtakaz macjatžquichičha. Nekztan ninacžquiz urpuntichičha. Jalla nuž urpuntitiquiztan nii čhjepultan illzta žoñinacaqui walja tsucchičha. ³⁵Tsjirquiztan tsji jora chiižquini nonzičha, jalla tuž cjican:

—Jalla tiičha wejt k'ayi Maatiqui. Jalla tiiž chiita taku nonžna.

³⁶Jalla nuž nii joraž chiitan, Jesusaqui zinalla želatčha. Nii čhjepultan illztanacaqui nužquiz ch'uju quirchičha. Ana jecžquizimi nii cherta puntu chiichičha.

TSJII ZAJRAŽ TANTA ŽOÑI ČHJETINTA

³⁷Niž jaka tažu curquiztan chjiwžquichičha. Walja žoñinacaqui Jesužižtan zali tjonchičha. ³⁸Nii tama žoñinacžquiztan tsji žoñiqui altu tawkžtan paljaychičha, tuž cjican:

—Wejt Tjaajiñi Maestro, wejt zinta majch cheržinžcalla. ³⁹Wilta wilta zajraž tantačha. Nii zajraqui ančaž kjaw kjawkatčha. Nižazaž t'uckatčha. Atquiztan ch'utuž jupokskatčha.

Persun janchiž čhjojriskatčha. Niižquiztan ana zarakz pecčha. ⁴⁰ Amiž tjaajinta žoñinacžquiz rocchinčha, wejt majch čhjetžinajo. Ana atchipančha.

⁴¹ Jalla nekztanaqui Jesusaqui kjaazičha, tuž cjican:

—Tii žoñinacajay ana criiñipančha. ¡Walja ujnacchizčhucupančha ančhucjay! ¿Čhjul oracamat ančhucatan wejr želaquiya? ¿Čhjul oracamat ančhuca ujquiztan wejr awantaquiya? Nižtaqui am majch zjičcalla.

⁴² Nii žoñž laa majch Jesusižquiz macjatan, zajraqui yokquiz tjojtchičha. Wilta t'uckatchičha. Jalla nekztanaqui Jesusaqui zajra ujzičha. Nii žoñž majch čhjetinžcu, niiž persun ejpžquiz intirjichičha. ⁴³ Nii Yooz aztan paata obra cheržcu tjapa žoñinacaqui ispan-tichičha. Žoñinacaž ispan-tichi želan, Jesusaqui niiž tjaajinta žoñinacžquiz paljaychičha, tuž cjican:

⁴⁴ —Tjapa kuztanž tii weriž paljayta nonžna ančhucqui. Anaž tjatzna. Wejrqui tsewctan cuchanžquita Yooz Žoñtčha. Quintra žoñinacžquiz wejr intirjital tarazuntal cjeečha.

⁴⁵ Jalla nuž chiyana niiž tjaajinta žoñinacaqui ana intintazzičha. Nižaza nii chiitauqui ana kjanzt'itatačha, ninaca intintajo. Ana intintazcumi, pewcz eksnatčha niiž chiita taku kjana intintisjapa.

YOOZ YUJCQUIZ, ¿JECT TUCQUIN CJES?

⁴⁶ Wiruñauqui niiž tjaajinta žoñinacaqui ninacpora ch'aassi kallantichičha, jakziltat ninacžquiztan tucquin cjes, jalla nii. ⁴⁷ Ninacž kuz pinsita zizcu Jesusaqui tsjii uza tsijtskatchičha niiž latuquiz. ⁴⁸ Nekztan ninacžquiz paljaychičha:

—Jequit wejt cuntiquiztan tsjii uza risiwčhaj niiqui, wejrpacha risiwčha. Nižaza jequit wejr risiwčhaja, nižaza risiwčha wejr cuchanžquiñi. Jakziltat ančhucaquiztan wirquin nayta cjičjiyačhaja, jalla niičha tucquin zuma honorchizqui.

⁴⁹ Wiruñauqui Juanqui cjičhičha:

—Wejt Tjaajiñi Maestro, tsjii žoñiqui am tjuu chiican zajranaca chjatkatchičha. Nii cheržcu wejrnacqui ujinčha, “Ana nižta paa”, cjican. Nii žoñiqui anačha učumnacatan ojklayñi.

⁵⁰ Pero Jesusaqui cjičhičha:

—Anaž nuž atajčha, jalla. Nižta paañiqui anačha učumnacatan quintra. Jakziltazlaja ana učumnacatan quintra, jalla niiqui učum favoraž paačha.

TSJII OJKTA PUNTU

⁵¹ Jalla nekztanaqui Jesusiž arajpacha ojcz tjuñi žcatžinžcatčha. Jalla nižtiquiztan walja p'ektichičha Jerusalén watja ojczjapa. ⁵² Niiž tuqui žoñinaca cuchanchičha, alujamint kjuya kjuržcajo. Jalla nekztanaqui nii cuchanta žoninacaqui Samaria cjita yokquin tsjii watja macjatchičha. ⁵³ Nii Samaria wajtchiz žoñinacazti ana kjuyquiz kjawz pecatčha Jesusaž Jerusalén watja ojcz cjen. ⁵⁴ Nii quintu nonžcu Jacobžtan Juanžtan Jesusižquiz cjičhičha:

—Wejt Jiliri, ¿kjažt cjes? Wejrnacqui arajpachquiztan uj mantižquila, cjiwčha, ninaca tjatanzjapa. Jaknužt tuqui timpu Elías cjita Yooz taku paljayñi profeta paatčhaja, jalla nuž. Jalla nuž waliž cjesaž, ¿ana jaa?

⁵⁵ Jalla nuž chiitiquiztan Jesusaqui ninacaž kjutñi cherzičha. Nekztanaqui ujzičha, tuž cjican:

—Ančhuca kuzqui ana waličha. Anaž tantiyassa ančhucqui. ⁵⁶ Wejrqui tsewctan cuchanžquita Yooz Žoñtčha. Wejrqui tsewctan tjonchinčha, ujhiz žoñinaca liwriizjapa. Ana tjonchinčha ujchiz žoñinaca tjatanzjapa.

Jalla nekztanaqui yekja watja ojkičha.

JESUCRISTUŽTAN CHICA OJKLAYZ PUNTU

⁵⁷ Jiczquiz okan, tsjii žoñiqui Jesusižquiz cjičhičha:

—Wejt Jiliri, jakziquinam ojčhaja amqui, wejrqui chicapachal ojklayz pecučha.

⁵⁸ Nekztan Jesusaqui niižquiz kjaazičha, tuž cjican:

—Kitinacami kjuychizza. Nižaza wežlanacami tjurchizza. Wejrzi anal kjuychizza, tjažjapami.

⁵⁹Wiruñaquí Jesusaquí yekja žoñžquíz tuž cjichiča:

—Wejttañ chicaž ojklaya.

Nii žoñiquí kjaaziča, tuž cjan:

—Wejt Jiliri, primiraquí wejt ticzi ejp tjažznača.

⁶⁰Nekžtan Jesusaquí kjaaziča, tuž cjan:

—Ticzižtakaz ana zuma kamañchiz kamñi žoñinacaquí, jalla ninacaj ticzinaca tjažža. Amqui ojkla, Yooz mantita zuma kamañ puntuquiztan paljayzjapa.

⁶¹Wiruñaquí yekja žoñiquí Jesusižquíz cjichiča:

—Wejt Jiliri, amtañ chica ojklayz pecuča. Pero primiraquí wejt familianacžquíz wejt ojklayz puntu mazinžquíz pecuča.

⁶²Nekžtan Jesusaquí kjaaziča, tuž cjan:

—Jakziltat Yooztajapa langžni kalltičhaja, jalla niiquí tirapan Yoozta langz waquiziča, ana wir kjuñi cheržcu. Jakziltat wir kjuñi cheržnasaz niíqu, nižaza tuquita kamañ wirquíz quejps pecasaž niíqu, jalla niiquí anaž Yooz mantita zuma kamaña tanžnasacha.

10

JESUSAQUI YOOZ LANGZQUIN ŽOÑINACA CUCHANČIČHA

¹Jalla wiruñaquí Jesusaquí pakallak tunc žoñinaca illziča. Jalla nuž illžcu Jesusaquí niiz tuquí tjapa kjuñi pucultañ pucultañ cuchanchiča, jakziquint okačhaja, jalla nii. ²Ima cuchancañ ninačžquíz cjichiča:

—Tsjii puntul chiižinasacha. Zkalaquí walja žejlča. Pero zkala ajžni žoñinacača upaqui. Yooz Ejpuž zkal Patrunača. Jalla nižtiquiztan Yooz Ejpužquiztan mayiza, zkala ajžni žoñinaca cuchanžcajo.

—Jalla nuž paljayčiča Jesusaquí, žoñinacača zkalažtakaz. ³Nižaza Jesusaquí niiz cuchanžquita žoñinacžquíz cjichiča:

—Ančhucquí uzanacažtakaz cuchnuča. Tanñi kitinacaž cheechi žoñinacž taypiquin ojklayaquiča ančhucquí. Jaziquí persunpachaž cwitazaquiča. ⁴Nižaza anaza quelsmi čjichaquiča, anaza paaz pulsami. Ana enenžcu jicžquizic okaquiča. ⁵Tsjii kjuya luzcu, ančhucquí tsaanaquiča, tuž cjan: “Tii kjuychiz žoñinacaquí walipankaj cjila”. ⁶Nicju zuma kamñi žoñinaca želaquíz niíqu, walipankaz cjequiča nii kjuychiz žoñinacaquí. Nižaza nii kjuyquíz zuma kamñi žoñinaca ana želaquíz niíqu, ančhucaž tsaanta takuquí nužquíz kaz cjequiča. ⁷Kjuyquiztan kjuya ana ojklayaquiča. Tsjii kjuya irantižcu, nekžpachapan kamaquiča. Čjulut nii kjuychiz žoñinacaquí onačhaja jalla niiz lujlžnaquiča. Langžni žoñinaca pacta cjis waquiziča. ⁸Tsjii watja irantižcu nii wajtquíz jakziltakat ančhuc kjawžnačhaj niíqu, jalla nekziquí lujlžnaquiča čjulul onanami.

⁹Nižaza nekž žejlñi laanaca čjetnaquiča. Nižaza paljayaquiča, tuž cjan: “Yooz mantita zuma kamaña ančhucaquíz žcatžinžquiča”. ¹⁰⁻¹¹Nižaza tsjii wajtquíz irantižcuquí, jalla nii wajtquíz anaž ančhuc kjawžnaquíz niíqu, calli kjuñiž ulnaquiča, nii wajt žoñinacžquíz tuž cjan: “Tii wajt pulpu wejtnaca kjojchquíz zcatčhapan cjan, jalla tii wajt pulpu tjappacha tsajt tsajtsnača. Jalla tii tsajtstaquí siñalaž cjequiča ančhuca quintra. Pero ančhucquí tuž zizla, Yooz mantita zuma kamaña ančhucaquíz žcatžinžquičitača”. Jalla nuž čhižcuquí, nii ana ančhuc kjawžni wajtquiztan okaquiča. ¹²Wejr cjiwča ančhucaquíz; casticž tjuñquiziqui nii wajtchiz žoñinacaquí juč'anti casticž cjequiča, nii tuquita Sodoma cjita wajtchiz žoñinacžquiztanaquí.

YOOZQUIN ANA JUYZU PAAÑI ŽOÑINACŽ PUNTU

¹³¡Corazín wajtchiz žoñinaca, ančhucaquíz anawaliž wataquiča! ¡Nižaza Betsaida wajtchiz žoñinaca, ančhucaquíz anawaliž wataquiča! Ančhuca watjanacquiziqui walja milajrunaca paatatača. Tiro Sidón cjita watjanacquíz nii milajrunaca paataž cjitasaž niíqu, walipan nii wajtchiz žoñinacaquí werar Yoozquíz cjuñžniž cjitasača, “Ujchizpantča; pertunalla”, cjanacuí. Nižaza ninacž uj sint'ičcu nii wajtchiz žoñinacaquí llaquita kuz

kjanapacha tjeesni cjitasača, lutu zquitchiz cujtžcu, nižaza achquiz kjupžtan tjalžcu, jalla nuž. ¹⁴Jalla nižtiquiztan ančhucqui casticu tjaaz tjuñquiziqui juc'anti castictaž cjequiča nii Tiro Sidón cjita watjanacchiz žoñinacžquiztanaqui. ¹⁵Capernaum wajtchiz žoñinaca, ĸjažtiquiztan ančhucqui pinsejo, “Yoozqui učum honorchiz cjiskataquiča”, cjicanjo? Anaž nuž cjesača. Pero ančhuczti kozzuc tjojttaž cjequiča infiermuquin sufrisjapa, parti ujchiz žoñinacžtan chica.

¹⁶Nekztan Jesusaqui niž tjaajinta žoñinacžquiz tuž cjichiča:

—Jakziltat ančuca taku nonžaj niiqui, nižaza wejt takumiž nonža. Nižaza jakziltat ančuca taku ana nonz pecčhaj niiqui, nižaza wejt taku anaž nonz pecča. Nižaza jakziltat wejt taku ana nonz pecčhaj niiqui, nižaza werj cuchanžquiñi Yooz Ejp anaž nonz pecča.

CUCHANTA ŽOÑINACAQUI QUEJPŽQUICHIČHA

¹⁷Wiruñaquí nií pakallak cuchanta žoñinacaqui ancha cuntintu quejpžquichiča, tuž cjican:

—Wejt Jiliri, am tjuu chiižcu, am aztan zajranacami ulanskatchinča.

¹⁸Nekztanaqui Jesusaqui ninacžquiz cjichiča:

—Jesalla, tsjii rayužtakaz Satanás cjita diabluqui arajpachquiztan tjojtšičha. Jalla nuž cherchinča. ¹⁹Wejrqui ančucaquiz wejt azi tjaazinča. Jalla nižtiquiztan ančhucqui zkorami yek'achuncami tjecznaquiž niiqui anaž kjaž cjisnasača. Nižaza nií wejt aztan tjapa quintranaca atipaquiča. ²⁰Zajranacaž ulantiquiztan ančhucqui anaž ancha chipchipasača. Antiz ančuca tjuunaca arajpachquin apuntitiquiztan, nekztanž ančhucqui chipchizp waquiziča.

CUNTINTU ŽOÑINACA

²¹Nií orapacha Jesusaqui ancha cuntintutača Yooz Espiritu Santuž cjen. Nekztan cjichiča:

—Yooz Tata, arajpachquinami yokquizimi ampanča wali chawc jilirimqui. Am puntunaca humilde žoñinacžquiz tjeezamča, intintajo. Pero tii muntuquiz wali estudiantinacami zizñinacami am puntunaca anaž intintazziča, čhjojžtažtakaz ninacžquiziqui. Jalla nužupanča am munañpaqui, Yooz Tata. Jalla nižtiquiztan am honora waytuča.

²²Nižaza Jesusaqui cjichiča:

—Yooz Tata, tjapa amiž ziztanacami wejtquiz tjaajinchamča. Anaž jecmi wejt kuz zizza. Yooz Tata, am panikaz wejt kuz zizza. Nižaza am kuz anaž jecmi zizza. Wejr panikal zizuča. Nižaza Yooz Tata, jakziltižquiz wejrqui am kuz zizkatz pecučhaja, jalla ninacazakaz am kuz zizaquiča.

²³Jesusaqui niž tjaajinta žoñinacžtan zina želatča. Ninacžquiz cheržcu cjichiča:

—Anchucqui zuma paatanaca cherchinčhucča. Jakziltat weriž paatanaca persun čhjujčtan cherchižlaja, cuntintuž cjesača. ²⁴Wacchi tuqita Yooz taku paljayñinaca nižaza tuqita chawc jilirinaca, jalla ninacaqui weriž zuma paatanaca cherz pecatča. Pero ana cherchiča. Nižaza ninacaqui Yooz puntu takunaca nonz pecatča. Pero ana nonziča. Jaztankaz ančhucqui tii cherchinčhucča, nižaza nonzinčhucča. Jaziqui cuntintuž cjee.

ZUMA KUZIZ ŽOÑINACA

²⁵Wiruñaquí tsjii judiož lií tjaajiñi žoñiqui tsijsičha. Nekztanaqui Jesusižquiz paljay-čiča, Jesusa lií quintra čhiikatjapa. Nekztan pewczičha, tuž cjican:

—Wejt Tjaajiñi Maestro, Yooztan wiñaya kamzjapa ĸčhjulul paaz waquizisaya?

²⁶Nekztanaqui Jesusaqui nižquin kjaaziča, tuž cjican:

—ĸKjaž cjiřtat učum liiquiziya? ĸJaknuž liichamtajo?

²⁷Nií lií tjaajiñiqui kjaaziča, tuž cjican:

—Žoñinacžlaqui Yoozquin tjapa kuzziz cjistanča. Yoozquin tjapa animužtanami sirwistanča, nižaza tjapa aztanami, nižaza tjapa pinsamintužtanami. Tjapa kuzziz Yoozquin cjistanča. Nižaza jaknužt persunpachquiz okzñamžlaja, jalla nižta okzñi kuzziz cjistanča žoñinacžquizimi, lijitum mazižtakaz.

²⁸ Jalla nektanaqui Jesusaqui cjichiča:

—Walikam kjaaza. Jalla nuž amiž kjaaztacama kamaquiz niiqui, Yooztan wiñayam kamaquiča.

²⁹ Jesusiž čhiitiquiztan nii lii tjaajiñiqui atipz pecatča. Jalla nektanaqui Jesusižquiz pewcziča, tuž cjican:

—¿Jec žoñinacžquiz wejrלאqui okstankaya?

³⁰ Nektanaqui Jesusaqui kjaaziča, tuž quint'ican:

—Tsjii žoñiqui Jerusalén wajtquiztan okatča, Jericó cjita wajt kjutñi. Nuž jiczquiz okan, tsjii kjažultan tjañinacžtan zalziča. Tjañinacaqui nii žoñi kijtchiča, nižaza tjapa niž žqutinaca niž paaznaca kjañchiča. Nektanaqui zuma chjojrıcama ana žaaničapa ecchiča. Nužquiz ticzmaya želatča. ³¹ Nektan tsjii icliz jiliriqui nii jicziñpacha okatča. Pero chjojrıcata žoñi cheržcu, tsjii latu chjuužcu watchiča. ³² Niiž jarupachaqui tsjii timpluquiz sirwiñi žoñiqui nii jicziñpacha ojchizakazza. Nižaza nii chjojrıcata žoñi cheržcu, nawcjuñ zakaz chjuuziča. ³³ Jalla nektanaqui tsjii Samaria wajtchiz žoñiqui nii jicziñpacha tjonchizakazza. Jalla nuž nii kijčta chjojrıcata žoñi cheržcu, ancha okziča.

³⁴ Jalla nektanaqui kijčta žoñžquiz macjatčiča. Chjojrıcama cheržcu kullzinčiča aceitižtan vinžtan. Nuž kullžcu chjojrı jeržinčiča zumpacha. Nektanaqui persun aznuquiz tewžcu chjtčiča, tsjii alujamintuquin. Jalla nicju cwtičiča. ³⁵ Jaka tažuqui ima wilta jicz ojkan nii Samaria wajtchiz žoñiqui persun paaz jescu, pizc billete pacčiča alujamintuchiz žoñžquiz. Nektan cjichiča, “Tii chjojrıcata žoñi am cwtižinalla. Tii paaz ana alcansaquiz niiqui, wejrqui pjojkača, quejpžcuqui”. ³⁶ Jaziqui, ¿jakziltat nii čhjepultiquiztan chjojrıcata žoñžquiz zuma okzikaya, lıjtum mazižtakaza? ¿Jaknužum am tantii? Kjaaznalla.

³⁷ Jalla nektanaqui nii lii tjaajiñiqui kjaaziča, tuž cjican:

—Nii oksni žoñipanča zuma mazižtakazqui.

Nektanaqui Jesusaqui cjichiča:

—Jaziqui oka, nužuzakaz ammi paalla.

³⁸ Jalla nektanaqui Jesusaqui tira ojkiča. Ojkan tsjii wajtquin luzziča. Jalla nicju Marta cjiti žonqui naaža kjuyquiz Jesusa kjawzinča. ³⁹ Martiqui cullacchiztača, Maria cjititača. Mariiqui Jesusiž kojch latuquiz julzinča, nii chiiñi nonzjapa. ⁴⁰ Martizti naaža kjuy lurañquiz kuz tjaatča. Nektan Jesusižquiz macjatčiča, tuž cjican:

—Wejt Jiliri, taa cullaquiqui wejr zinallakal tii kjuya lurañnacquiz jakjurpayča. Ana wejr yanapča. ¿Anam wejtquiztan sint'ıya? Am chiižinžinalla, wejr yanapajo.

⁴¹ Nektanaqui Jesusaqui naaquiz kjaaziča, tuž cjican:

—Marta, Marta, kjuy lurañnacžquiz kuz tjaachiž cjen am kuzqui turwayzikalala. Jalla nižtquiztan ancha llaquitamkalala amqui. ⁴² Tsjii zintallapanikaz žejlča chekanaqui. Mariiqui nii zuma illzinča. Naaqui kuz tjaača wejt taku nonzjapa. Anaž jecmi taa cullaqui wejt taku nonžtquiztan apaki atasacha.

11

YOOZ EJPŽQUIN MAYIZIZ PUNTU

¹ Tsjii nooj tsjii yokquin Jesusaqui Yooz Ejpžquin mayizatča. Nuž mayiziz žeržtanaqui niž tjaajintanacžquiztan tsjii tjaajinta žoñiqui pewcziča tuž cjican:

—Jaziqui wejt Jiliri, Yooz Ejpžquin mayiziz tjaajznalla. Jaknužt Juanqui niž tjaajinta žoñinacžquiz Yooz Ejpžquin mayiziz tjaajinchižlaja, jalla nuž.

² Nektanaqui Jesusaqui tjaajinčiča, tuž cjican:

—Yoozquin mayizizqui tužuča:

“Učhum arajpach Yooz Ejp, am tjuuqui zuma honorchiz cjilalla. Nižaza am mantiz timpu irantižquilalla. Nižaza am munañpaj cjilalla tii yokquizimi tsewc arajpachquinami. ³ Nižaza tonjtijapa nižaza zapurutijapa čjheriž tjaažcalla, azziz cıjsjapa. ⁴ Wejrnacqui pertunchinča wejtnacaquiz ana zuma paani žoñinaca.

Jalla nižtiquiz amqui wejtnaca ujnacaž pertunalla. Nižaza čhjul anawalinacami wejtnacaquiz ana watkatala. Antiz čhjul anawalinacquiztanami liwriyalla”.

⁵Nekztan Jesusaqui ninacžquiz cjichizakazza:

—Tsjii žoñiqui amiguchiztača. Nii amiguqui chica aramaž kjuyquiz tjonchiča, tuž cjican: “Amigo, čhjep t'antaž kajžnalla. ⁶Wejt kjuyquiz tsjii žoñi irantižquichiča jiczquiztan. Anaž wejtac čhjulumi žejlča nižquiz tjaazjapa”. ⁷Nektanaqui nii žoñiqui kjaaziča kjuyltan, tuž cjican: “Anaž wejr chiižina. Kjuyami zuma chawjčztacha. Nižaza wejt ocjalanacaqui ajpžquiz wejttan chicaž tjačča. Anaž žaazni atasacha. Nekztan anal čhjulumi tjaayi atasacha”. ⁸Amiguž cjenami ana tjaayi žaaz pecchiča. Pero nižtami tjaayi žaaziča, ana iya molistita cjeajajo. ⁹Jaziqui cjiwča, Yooz Ejpžquiztan maya, nekztan Yooz Ejpqi ž-tjaaquiča. Nižaza zuma kamaña kjurzna, nekztan wachaquiča. Nižaza kjuy chawjczquiztan t'oc t'ocžcaquiča, nekztan cjetžtaž cjequiča. ¹⁰Mayni žoñinacami ninacž mayta tjaataž cjequiča. Nižaza kjurni žoñinacami nuž kjurzna wachaquiča. Nižaza chawjczquiztan t'oc t'ocni žoñinacžquizimi cjetžtaž cjequiča. Jalla nužuča Yooz Ejpžquin mayiziqui.

¹¹žKjažt tsjii ejpqui ančhucporquiz t'anta mayniž majchquiz “Tiž t'antaqui” cjican tsjii maz chjalznasajo? Anapanž nuž cjesača. Nižaza, žkjažt ejpqui ch'iz mayni majchquiz “Tiž ch'izqui” cjican zkorakaz chjalznasajo? Anaž nužupan chjalznasajo. ¹²Nižaza žkjažt ejpqui wallpi ziñi mayni majchquiz “Tiž wallpi ziñiqui” cjican yek'achunca chjalznasajo? Anaž nužupan chjalznasajo. ¹³Jaziqui ančhucqui ana zum kuzziz cjenami zuma cusasapanikaz tjaasača persun maatinacžquiziqui. Ancha zuma kuzziz Yooz Ejpqi juc'ant zumanaca ančhucquiz tjaasača. Jakziltat Espiritu Santo mayačhaja, jalla nižquiz arajpach Yooz Ejpqi Espiritu Santo cuchanžcaquiča, nii mayninacž kuzquiz.

JESUSIŽ QUINTRA CHIICHIČA

¹⁴Wiruñaquí zajraqui tsjii žoñi upa cjiskatchiča. Nekztanaqui Jesusaž nii zajra ulanzkattan, nii upa ana chiiñi žoñiqui chii kallantichiča. Nekztan nuž paatiquiztan nekž žejlñi žoñinacaqui walja ispantichiča. ¹⁵Yekjap žoñinacaqui Jesusiž quintra chutchiča, tuž cjican:

—Tiiqui anawal žoñikalala. Zajranacž Beelzebú jilirž aztan yekja zajranaca chjatkatča.

¹⁶Yekjap quintra žoñinacaqui yanz pecatča, arajpach Yooz aztan milajru paañi, ana arajpach Yooz aztan paañi, jalla nii. Yanzjapa pewcziča:

—Jaziqui arajpach milajru paala, —cjican.

¹⁷Pero Jesusaqui ninacž kuz zizziča. Jalla nižtiquiztan paljaychiča, tuž cjican:

—Tsjii nacionchiz žoñinacaqui t'aka t'aka cjisnaquiči niiqui, ninacaž kichassiž cjen, nii nacionaqui tjtantaž cjequiča. Nižaza tsjii famillchiz žoñinacaqui chaasaquiči niiqui, ninacaž kichassiž cjen nii famillaqui tjtantaž cjequiča. ¹⁸Nižaza Satanás cjita zajraž partimi t'aka t'aka cjesaž niiqui, ultimu tjtantaž cjesača. žKjažt nii zajranacž azi tjurasajo? Anaž azziz cjesača. Anapanž tjurasajo. Jaziqui ančhucqui tuž cjiča, wejrqui zajranacž Beelzebú cjita jilirž aztan yekja zajranaca chjatkatča, jalla nuž cjiča ančhucqui. ¹⁹Pero wejrqui anaž nužu jalla. Nonžna. Ančhuc parti nacami zajranaca chjatkatnižakazza. žJecž aztan ninac chjatkatjo? žBeelzebú cjita zajriž aztan chjatkatjo? Anaž cjesača. Ančhuc parti žoñinacž paatiquiztan intintiz waquiziča, zajriž aztan anapan zajranaca chjatkatasača, jalla nuž intintiz waquiziča. Jalla nižtiquiztan ančhucqui kjanapachača ana zuma razunchizqui. ²⁰Jaziqui ultim werara Yooz aztanpankal wejrqui zajranaca chjatkatuča. Yooz aztan chjatkatiquiztan, kjanapacha tježa, Yooz mantiz kamañi timpu irantižquiča, jalla nii.

²¹Tsjilla quint'asača. Tsjii walja armichiz žoñiqui persun kjuya walja tjurt'iñitača. Jalla nižtiquiztan kjuyquiz chjojtanaca segurotača. ²²Nuž armichiz cjen cuntintu želatča. Nekztanaqui tsjii tsjan tjup žoñiqui tjonchiča. Armichiz žoñi atipžcu, tjapa niž armanaca kjañchiča. Nekztan tjapa niž chjojta cusasanaca kjañchizakazza. Nekztan tjup žoñiqui niž mazinacžquiz kjañta cusasanaca tojunchiča.

²³ Nonžna. Jakziltat ana wejt favora cječhaj niiqui, wejt quintrača. Nižaza jakziltat Yooztajapa žoñinaca ana juntjapi yanapčhaj niiqui, wejt quintra Yoozquiztan žoñinacaž wichanskatča.

ZAJRIŽ PUNTU

²⁴ Nižaza Jesusaqui cjichiča:

—Tsjii zakal quint'asacha. Tsjii zajraqui žoñžquiztan ulanžcu kjoñ yokaran ojklajchiča, jeejzjapa kjurcan. Ana jeejz wažcuqui, niiž kuzquiz pinsichiča, tuž cjan: “Jaziqiu wejr quepaka jakziquiztan ulanžquitučhaja, jalla nicju”. ²⁵ Jalla nuž quejpcu niiž ulanta žoñžquiz zalchiča. Nii žoñž kuzqui tsjii zuma pewžta kjuyažtakaztakalča, nižaza zuma žcay azquitzta kjuyažtakaztakalča. ²⁶ Jalla nuž zaltiquiztan nii zajraqui pakallak juc'ant anawali zajranaca zjijqui ojkičiča. Ninaca zjijcžu, tjapa nii zajranacaqui žoñž kuzquiz luzziča. Jalla nižtiquiztan nii žoñiqui juc'ant anawaliž cjissiča tuqita kamquiztan, tsjan ana zuma.

²⁷ Jesusaž nuž quint'an, tsjaa maatak žonqui nii žejlñi žoñinacžquiztan altu joržtan paljaychiča, tuž cjan:

—Honorchiz cjila am matiñ maaqui, am jwessinž cjen.

²⁸ Nekztanaqui Jesusaqui cjichiča:

—Juc'ant honorchiz cjila Yooz taku nonžninaca. Nižaza Yooz tawk jaru kamñinaca.

ŽOÑINACAQUI SIÑALA CHERZKAZ PECATČHA

²⁹ Tsjan tsjan žoñinacaqui Jesusiž muytataž ajcznatča. Nekztanaqui Jesusaqui paljayi kallantičiča, tuž cjan:

—Jazta timpu žoñinacaqui ana zum kuzzizza. Milajru siñala paañipankaz pecča. Tuqui timpuqui Jonás cjita žoñiqui želatča, Yooz taku paljayñi. Jalla nižta paljayzqui tsjii siñalažtakazza, Yooziž cuhanžquita cjan. Wejrzakal Yooz taku paljayuča. Anaž iya čjul siñalami želasača tii žoñinacžtaqui. ³⁰ Yooz Ejpqui Nínive cjita wajtchiz žoñinacžquiz Jonás cjita žoñi cuhanžquichiča, casticu tjaaz tjuñi maznajo. Jalla niitača siñalaqui, nii timpuquiz kamñi žoñinacžtaqui. Nižaza Yooz Ejpqui arajpachquiztan wejr cuhanžquichiča. Jalla wejrtča siñalaqui, jazta timpuquiz kamñi žoñinacžtaqui. Anaž iya čjul siñalami tjaataž cjequiča. ³¹ Pjalz tjuñquiziqui, jazta timpuquiz kamñi žoñinacaqui pjaltaž cjequiča, zuma, ana zuma, jalla nii. Ana zuma žoñinacaqui castictaž cjequiča. Nonžna. Tuqui timpuqui tsjaa maatak jilir želatča, wartuñtan waja mantiñ. Pjalz tjuñquiziqui naaqui jakatatžu jazta timpuquiz kamñi žoñinacž uj kjana tjeeznaquiča, jazta žoñinaca casticta cjeajo. Naaqui muzpa ažkquiztanpacha tjonchinča Salomón cjita jiliržquiz zali, niiž zuma razun taku nonžni. Pero tekzi wejrqui želuča Salomonžquiztan tsjan chekan jiliriqiu. Pero jazta timpuquiz kamñi žoñinacaqui wejt taku anaž nonz pecča. Nižtiquiztan juc'ant ujchizza, nižaza juc'ant castictaž cjequiča.

³² Nižaza pjalz tjuñquiziqui Nínive wajtchiz žoñinacaqui jacatatžu jazta timpuquiz kamñi žoñinacž uj kjana tjeeznaquiča. Jonás cjita žoñiž Yooz taku paljaytquiztan, nii Nínive wajtchiz žoñinacaqui Yoozquin kuzziz cjissiča. Pero tekzi wejrqui želuča Jonasquiztan tsjan chekan jiliriqiu. Nižaza wejrtča tsjan chekan Yooz taku parlñtqui. Pero jazta timpuquiz kamñi žoñinacžti anal Yoozquin kuzziz cjissiča, weriž paljayta Yooz taku nonžcu. Nižtiquiztan juc'ant ujchizza. Nižaza juc'ant castictaž cjequiča.

KJANQUIZ KAMZ QUINTU

³³ Nekztanaqui Jesusaqui quint'ichiča tuž cjan:

—Anaž jecmi tsjii lámpara tjeecu, chjožzakquiz nonznasača, nižaza anaž tsjii cajon kjuyлами nonznasača. Nii lamparaqui tseecupanž tsjijpsnasača, kjuyquiz luzñi žoñinacžquiz kjanajo. ³⁴ Žoñž čhjuquiqui persun kuz lamparažtakazza. Žoñž čhjuquiqui zumažlaj niiqui nižaza žoñž kuzmi zumazakazza, zuma kjanquiztakaz kamča. Pero žoñž čhjuquiqui ana zumažlaj niiqui, kuzmi ana zumazakazza, zumchiquiztakaz kamča. ³⁵ Zuma kjanquizim kamčhaj niiqui, persun kamaña zumaž cwitazaquiča, ana zumchi kamañchiz cjisjapa. ³⁶ Tsjii žoñiqui kjanquiztakaz zumapankaz kamčhaj niiqui, nižaza ana čjul ana

waliquiz kamčhaj niiqui, liwj niiz kamtanaca zumaž cjequičha, jaknužt tsjii lámpara wali kjančhaja, jalla nuž.

ANA ZUM KUZZIZ ŽOŃINACŽ PUNTU

³⁷ Jesusaž chiyen, tsjii fariseo žoñiqui Jesusa čheri luli kjawzičha, niiz kjuyquin. Pucultanaqui kjuya irantižcu, kjuya luzzičha. Nekztan mizquiz julzičha. ³⁸ Jesusaqui kjara awjz custurumpi ana cumplichičha ima lujlcan. Jalla nii cheržcu fariseo žoñiqui ispantichičha. Jesusaqui persun kuzquiz naychičha fariseo žoñiž ispantita. ³⁹ Nekztanaqui Jesusaqui niizquiz paljaychičha, tuž cjican:

—Tsji žoñiqui tasanaca chuanaca zawnctankaz awjza, nižaza chjujža. Nižta iratačha ančhucqui fariseonaca. Ančhucqui zawnctankaz limpučha. Pero kjuyltanaqui ančhuca kuzqui walja cjujchinacchizpančha. Ančhuca kuzquiz tjangz zizza, nižaza čjul anawali paazmi zizza. ⁴⁰ ¡Zumzu žoñinaca! Yoozqui curpumi kuzmi paachičha. ¡Jalla ančhucqui anaž nii zizjo? ⁴¹ Ančhuca cusasanacquiztan žoñinacžquiz tjaaz waquizičha. Ančhucqui tjapa žoñinacžtan okžni kuzziz cjesaž niiqui, ančhuca kuzmi zumapanž cjesačha Yooz Ejpž yujcquiziqui, ana kjara awjz custurumpi paažcumi.

⁴² ¡Ayii pori fariseonaca! Ančhucqui Yoozquin diezmos tjaayiñčhucčha, nižaza tjapa plantanacquiztanami diezmos tjaayiñčhucčha. Jalla nuž paacan walikazza. Pero nuž tjaacanami ančhucqui ana ligituma zuma kamañquiz kamchinčhucčha, nižaza ana Yoozquin kuzzizčhucčha. Zuma kamzqui, nižaza Yoozquin kuzzizqui, jalla niičha chekanaqui. Pero diezmos tjaazmi zakaz cumpliz waquizičha.

⁴³ ¡Ayii pori fariseonaca! Ajcz kjuyquiziqui tucquin julzkaz pecčha, nižaza honorchizkaj cjiw cjičha ančhucqui. Nižaza ančhucqui jakzi calliranami zuma rispitchizkaž wejr tsaanja cjičha ančhucqui.

⁴⁴ ¡Ayii pori fariseonaca! Nižaza ¡ayii pori lii tjaajiñinaca! Ana ligitum kuzzizčhucčha. Ančhuca liqui cjičha jakziltat tsjii sipultur juntuñ ojkchaja jalla niiqui Yoozquin ana macjatasacha. Jalla nižta irata ančhucqui žoñinacžquiz ana Yoozquin macjatskatčha. Pero žoñinacaqui ančhucaž puntu cjiñčha, “Yooz žoñinacačha ninacaqui”. Ančhucqui ninaca incallčha, ana zuma kuzziz cjen. Ančhucqui ana pajta sipulturažtakazza.

⁴⁵ Jalla nuž chiitiquiztan tsjii lii tjaajiñiqui kjaazičha, tuž cjican:

—Tjaajiñi Maestro, jalla nuž chiižcu, wejtnacquiz ana zumam chiičha.

⁴⁶ Nekztanaqui Jesusaqui cjichičha:

—¡Ayii pori lii tjaajiñinaca! Ančhucqui parti žoñinacžquin niiz jaru niiz jaru ch'ama cuzturumpinaca yapchinčhucčha: kuzi cuntažtakaz jepzinčhucčha. Ch'ama cuzturumpinaca yapchiž cjenami, ančhucqui anaž tsjii loc'anžtanami yanapz pecčha, žoñinaca nii cuzturumpinaca cumplajo.

⁴⁷ ¡Ayii! Ančhucqui ancha t'akjiričha. Ančhuca tuquita atchi ejpnacaqui Yooz taku paljayñi profetanaca conchičha. Ančhucpacha nii paljayñinacž sipulturanaqui kjuyñičha, niwjtanaqui ančhucqui rispitažokaz cjičha. Pero ančhucqui anaž ultimu rispitičha. ⁴⁸ Tuquiqui ančhuca ejpnacaqui nii Yooz taku paljayñinaca conchičha. Nuž conchi cjenami ančhucaquiztan walikazza. Anzimi ančhucqui sipulturanaqui kjuyčha, zuma žoñižtakazza. Pero ultimquiziqui ančhucqui ninacaž paljayta Yooz taku anazakaz nonz pecčha.

⁴⁹ ¡Jalla nižtiqiztan Yooz Ejpqui ančhuca puntuqiztan zuma razun taku chiichičha, tuž cjican: “Wejrqui wejt taku paljayñi profetanacami apostolonacami cuchanžčacha. Nekztanaqui yekjapanaca nii Yooz taku paljayñinacžquiztan contaž cjequičha. Yekjapazti kijchtaž cjequičha”. ⁵⁰ Tii muntu kalltiz, niwctanpacha Yooziž cuchanžquita žoñinaca conchičha ančhuca tuquita atchi ejpnacaqui. Ančhucqui nižta ana wal kuzzizakazza. Jaziqui Yoozqui jazta timpuquiz željñi žoñinacžquiz zakaz casticaquičha. ⁵¹ Tsjii Zacarías cjita žoñiqui altaržtan timplužtan, jalla nii taypiquiz contatačha. Abel contiquiztanami Zacarías contiquiztanami nižaza tjappacha contanacquiztanami Yooz Ejpqui jazta timpuquiz željñi žoñinacžquiz casticaquičha.

⁵² ¶Ayii pori lli tjaajiñinaca! Liwriiñi Yooz taku liižcu, zizcu, žoñinacžquiz ana nii tjaajinčinčucča. Yooz taku tsjii llave irata tanzinčucča. Nii llave tanžcanpacha ančhucmi liwriiñi Yooz jiczquiz ana luzzinčucča. Y nižaza nii llave tanžcu, ana cjetžinčinčucča, liwriiñi Yooz jiczquiz žoñinaca luzajo. ⁵³ —Jalla nuž chiižinžcu Jesusaqui ojkcchiča.

Nii lli tjaajiñinacžtan nii fariseonacžtan, jalla ninacaqui muzpa žawjchi cjissičha Jesusiž quintra. Nižaza ninacaqui Jesusižquiz wiltan wiltan pewcziča, ⁵⁴ Jesusiž quintra tsjii ujchiz jwezjapa. Jesusiž kjaaztiquiztan uj tjojtunz pecatča.

12

FARISEO ŽOÑINACA

¹ Jesusaž nuž tjaajnan, zmali wacchi žoñinacaqui tjonchiča, waranka waranka. Nižaza zmali porapat tewksascan tewksascan tjonchiča. Primeraqui Jesusaqui niiz tjaajinta žoñinacžquiz paljaychiča, tuž cjican:

—Fariseo žoñinacaqui anaž ultimu Yoozquin kuzzizza. Anaž lijitum Yooz žoñinacača, aunquimi lijitum žoñižtakaz cjicjiñi cjenami. Ninacžquiztan zumpachaž cwit'azaquiča, ana ninaca irata cjisjapa. ² Tsjii noojiqui tjapa chjojzakuñ paatami tjeežtaž cjequiča. Nižaza tjapa chjojzakuñ pinsitami ziztaž cjequiča. Tsjii noojiqui žoñž ultim kuz tjeežtaž cjequiča. ³ Nižaza jamazit chiitanacami kjana ziztaž cjequiča. Chjojzakuñ chiitanacami tjapa žoñinacaqui zizaquiča.

¿JECŽQUIN EKS WAQUIZIYA?

⁴ Jaziqui ančhucqui, wejt mazinaca, tuž wejr chiižinuča. Anača eksqui tii curpu alaja conñižquiziqui. Curpu conžcu anaž iya čjulumi payi atasacha. ⁵ ¿Jecžquin antiz ančhucqui eks waquiziya? Yooz Ejpžquin eks waquiziča. Yooz Ejpqui žoñž curpu žeti tucuzinskatžcu žoñž animumi infiernuquin tjojtjapa azzizza. Jalla niizquizza chekanaqui eksqui.

⁶ Tsjii pjijska wežlaqui pizc paazkaz cwističa. Anača juc'ant valorchiz cjen, Yooz Ejpqui zapa wežlallami cjuñča. ⁷ Pero zapa žoñžquiz juc'anti cjuñča. Nižaza ančuca ach charami kanžintacha, zintallquiztan zintalla. Anaž ančhucqui tsuca. Nii wežlanacžquiztan ančhucča juc'ant valorchizqui. Yooz Ejpqui ančhuc juc'ant cwitaquiča wežlanacžquiztan.

JESUCRISTUŽ FAVORA CJEE

⁸ Ančucaquiz cjiwča: Jakziltat parti žoñž yujcquiz wejt favora cječhaj niiqui, nižaza wejrqui Yooz anjilanacž yujcquiz nii žoñž favorazakal chiyacha. ⁹ Jakziltat parti žoñž yujcquiz wejr ana pajñi nicačhaj niiqui, nižaza wejrqui Yooz anjilanacž yujcquiz nii žoñž quintra ana pajñi zakal cjeeča.

¹⁰ Jakzilta žoñit Yooz Epiž cuchanžquita Žoñž quintra chiyachaj niiqui, pertuntaž cjesača. Pero jakzilta žoñit Yooz Espiritu Santuž quintra chiyachaj niiqui, anapanž wira pertuntaž cjequiča.

¹¹ Wiruñaquí ančhucqui juezanacž yujcquin nižaza jilirinacž yujcquin chjichtaž cjequiča, ajcz kjuyquiz. Jalla nuž chjichtiquiztan ana kuz turwaysi cjequiča, jaknužt chiyachaja, nižaza jaknužt tjurt'azalaja, jalla nii. ¹² Ančuca chiiz ora Yooz Espiritu Santuqui ančuca kuzquiz chiižjapa tjaajznaquiča, jaknužt chiižalaj, jalla nii.

CWITAZA, ZMAŽŇI KUZZIZ ANA CJISJAPA

¹³ Tsjii žoñiqui Jesusižquiz paljaychiča, tuž cjican:

—Wejt Tjaajiñi Maestro, wejt jilžquiz čiinalla, wejt parti irinsa tjaa-ajo.

¹⁴ Nekztanaqui Jesusaqui niizquiz cjichiča:

—Jila, ¿kjažtiquiztan amqui wejr jilirižtakaz cheržjo? Anapanž wejr juez partirtqui, ančuca quija azquitzjapaqui.

¹⁵ Nižaza Jesusaqui ninacžquiz cjichiča:

—Persun kuzquiz naazna, nižaza cwitaza ana zmazñi kuzziz cjisjapa. Žoñž wira kamañaqui anaž niiz wacchi cusasanacquiztan yatisinsa.

¹⁶Jalla nekztanaqui Jesusaqui tii quintu quint'ichiča, tuž cjican:

—Tsjii ricach žoñi želatča. Nii žoñž yokquiziqui zkalanacaqui ancha cusa pookchiča. ¹⁷Jalla nuž pooktiquiztan nii ricach žoñiqui kuzquiz pinsichiča, tuž cjican: “¿Kjažt wejr cjejejo? Wejt yaaz kjuyanacaqui tii ajzta zkal čhjeri anaž wacasacha”. ¹⁸Jalla nekztanaqui pinsichiča, tuž cjican: “Aaaa. Tuž jazic cjeeka. Wejt zkala yaaz kjuyanaca pajlnaka. Nekztanaqui tsjan pajk kjuyanaca kjuysnaka. Jalla nekz tjappach zkal čhjeri yaaznaka, nižaza tjapa wejt cusasanaca”. ¹⁹Jalla nekztanaqui nii ricach žoñiqui niiz persun kuzquiz cjichiča: “Aaaa. Wejrqui zmali cusasanaca yaazinča, nižaza zmali čhjerinaca yaazinča, ažk wata tjurnipacha. Jeejznaka, nižaza cusa lujlsnaka, licsnaka. Nižaza cuntintul cjeeka”. ²⁰Pero Yoozqui nii žoñžquiz cjichiča, “Zumzu žoñimča amqui. Tižwanpacha amqui ticznaquiča. Am zkal čhjerimi am cusasanacami nii yaaztanacami inamayaž cjequiča, ¿čhjuljapat cjeequi neejo? ¿Jecžtapan cjeequi neejo?” ²¹Jaknužt nii ricach žoñžquiz watčhižlaja, jalla nižta irataž wataquiča persunjapapankaz cusasa juntjapñi žoñinacžquiziqui. Nižta žoñinacaqui Yooz yujquiziqui poripanž cjisnaquiča.

YOOZ EJPQUI NIIŽQUIN KUZUZ ŽOÑINACA CWITIČHA

²²Jalla nekztanaqui Jesusaqui niiz tjajinta žoñinacžquiz cjichiča:

—Ančhucaquiz tuž cjiwča. Žoñiqui žejtzjapaqui lujl čhjeri pecča. Jalla nuž cjenami, ančhucqui anača čhjerinacžquiz kuzqui llaquizizkatzqui. Nižaza žoñiqui curpu wali cjisjapa zquti pecča. Jalla nuž cjenami ančhucqui anača zqutinacžquiz kuzqui llaquizizkatzqui. ²³Žoñž žetiqui čhjerquiztan juc'anti importiča. Nižaza persun curpumi zquitquiztan ju'canti importiča. ²⁴Wežlanacžquiz chernza. Anaž zkalami čhjacača. Nižaza anaž ajza. Nižaza ana čhjeri yaaz quetallchizza. Nižaza ana čhjeri yaaz kjuychizza. Jalla nuž cjenami nii wežlanacžtaqui lujl čhjerinacami panž žejlča. Yooz Ejpkaž čhjeri tjaacha. Pero ančhucqui Yooz yujquiziqui wežlanacžquiztan juc'antiž importiča. Jaziqui ančhucaquiz zakaz Yoozqui lujl čhjeri tjaquiča, žejtzjapaqui. ²⁵Anaž jec kolta žoñimi persunpacha tsjan lajcha paki atasacha, llaquiziñi kuzziz cjenami ancha lajcha pecñi kuzziz cjenami. ²⁶Jalla nižta ana atchucažlaj niiqui, ¿kjažtquiztan lujl čhjerinacžquizimi zqutinacžquizimi ančhuca kuzqui llaquizizkatjo?

²⁷Plantanačž pjajkallaž chernza. Anaž langza. Anaž kawanča. Yoozqui nii pjajkallanacaž pjajkkačča. Zmali finu zquti cujtžcumi anaž jecmi pjajkallquiztanami juc'ant c'achalla cjesača. Nižaza finu zquti cujtžcumi nii ancha ricachu Salomón jiliriqiu anača pjajkallquiztan juc'ant c'achaqui. ²⁸Plantanaqaqui tsjii upacamakaz c'achallača. Nekztanaqui jakatažu kattažu tsjii jurnuquiz tjutjunzjapa ujtžača. Jalla nuž cjenami Yooz Ejpkaž nii plantanacami nižta cwitiča. Ančhucča Yoozquin ana tjapa kuzziz žoñinaca. Ančhuczti Yooz yujquiziqui čhjul plantaquiztanami juc'antiž importiča. Jalla nižtiquiztan Yoozqui ančhuc juc'anti cwitiča; zquitchiz panž cjequiča. ²⁹Jalla nižtiquiztan ančhucqui ana ancha llaquiziñi kuzziz ojklaya, čhjul čhjeri kjurquiztanami. ³⁰Tii muntuquiz ana Yoozquin criichi žoñinacaqui ancha llaquiziñi kuzziz ojklayača nižta cusasanaca kjurcan. Ančhucqui anača nižta llaquiziñi kuzziz ojklayzqui. Werar Yooz Ejpchizčhucča. Yooz Ejpqui zizza, čhjulut ančhuc pecčhaj, jalla nii. Ančhucqui čhjeri, zquti, cusasanaca pecča, žejtzjapa, jalla nii zizza Yooz Ejpqui. ³¹Nižtiquiztan ančhucqui Yooz Ejpžquinpankaz walja kuzziz cjee. Nižaza niiz mantita zuma kamañquiz kuzziz cjee. Nekztanaqui Yooz Ejpqui ančhucaquiz čhjulumi cawalikaz tjaquiča.

ARAJPACHQUIN CUSASANACCHIZ ŽOÑINACA

³²Nižaza Yooz Ejpqui ančhuca uchaquiča mantiñi puestuquiz. Jalla nužučha Yooz munañpaqui. Tii muntuquiz žejlcan anaž eksna, ančhucqui wejt uzanacčhucča, aunqui kolucullami. ³³Ančhuca cusasa žejlñinaca tuysna. Nekztan t'akjiri kamñi žoñinacžquiz tojna. Tii muntuquiz žejlcan jaknužt ančhucaqui zuma žak quels tjaczaja, jalla nižta irata zuma munaziñi kuz tjacz waquiziča wiñaya zuma kamzjapa. Arajpachquin zuma

cuntintu kamzjapa, ančhuca kuz tjaczna, zuma azquicha. Tii muntuquiziqui tjañ žoñiqui ančhuca cusasanaca kjañasača. Arajpachquin tjañ žoñinaca ana luzasača. Nižaza tekziqui tjujtami cjurimi ančhuca zquitinaca lulasača. Arajpachquin tjujtami cjurimi ana želasača. ³⁴ Jakzilat tii muntuquiz walja cusasanachizlaja, tii muntuquiz kamañ wirquiz kuz tjaača. Pero jakzilat arajpachquin kamañ wirquiz kuz tjaačhaja jalla niiqui arajpachquin walja cusasanacchiz cjequičha.

KUZ TJACZI CJEE

³⁵ Nižaza Jesusaqui tii quintu quint'ichiča, tuž cjican:

—Arajpachquin ojkszjapa ančhucqui kuz zuma tjaczi tjewžna, tsjii tjeežta lamaparaž-takaz. ³⁶ Tižtažtakaz cjee. Tsjii patruanaqui zalsñi pijjstiquin ojkcichiča. Piyunanacaqui patrunž cuttižquiz tjewža, niž irantižquitan kjuy zan chawjcz cjetžinzjapa. Jalla nižta irata ančhucqui Yooz tjonz tjuñi zuma tjewžna. ³⁷ Weraral cjiwča. Patrunaž tjonz oraqui jakzilta piyunanacat tjaji wajtsi tjewznačhaja, jalla ninacaqui cuntintuž cjee. Jalla nii piyunanacaqui patrunž misquiz julskatraž cjequičha. Nekztanaqui nii patruapachaž čhjeri tjaaquičha, nižaza ninacžquiz atintaquičha. Jalla nižta irata Yoozqui paaquičha niž tjonz tjewžninacžquiz. ³⁸ Chica aramami, kjantatimi, čhjolorakat nii patruanaqui irantižquičhani. Nii oraqui jakzilta piyunanacat tjaji wajtsi tjewz tjewznačhaja, cuntintuž cjequičha. ³⁹ Tsjiilla zakaz cjiwča, ančhucaž zizjapa. Tsjii kjuychiz žoñiqui čhjolorat tjañi tjonachaja, jalla nii ora zizaquiz niiqui, tjaji wajtsipan tjewznaquičha, nii tjañi ana luzkatzjapa, nižaza ana tjangskatzjapa. Tjañi tjonz ora zizcu, anapan niž kjuya nužkaz ecasača. ⁴⁰ Ančhucmi nižaza Yooz tjonz tjuñi walja listu tjacziž tjewžna. Tiripintit tsjii ana pinsita oraqui wejrqui quejpžcača. Wejrtča tsewctan cuchanžquita Yooz Žoñtqui.

PIZC PUNTA PIYUNANACA

⁴¹ Jalla nekztanaqui Pedruqui Jesusižquiz pewcziča, tuž cjican:

—Wejt jiliri, ž tii quintu quint'ichamča wejtnacaltajapakazkaya? už ž tjapa žoñinacžta-japa, jaa?

⁴² Jesús jiliriqui kjaaziča, tuž cjican:

—Tsjii kjuy cwitiñi žoñi želatča zuma cumpliñi, nižaza zuma intintiñi. Nii kjuychiz tuyñuqui zuma žoñž kjarquiz niž kjuya ecchiča, tjapa nii kjuyquiz žejlñinacžtan. Čhjeri tjaaz ora čhjeri tjaajo, jalla nuž zakaz ecchiča nii žoñž kjarquiz. Žject nii zuma cumpliñi žoñejo? ⁴³ Jalla tičha nii žoñiqui. Kjuy tuyñu quejpsquizcama jakzilta žoñit niž kjuya zuma cwitican žejlčhaja, jalla niičha zuma cumpliñi žoñiqui. Nižaza cuntintuž cjequičha nii zuma cwitiñi žoñiqui. ⁴⁴ Wejrqui weraral cjiwča. Kjuya tuyñuqui cumpliñi žoñž kjarquiz tjapa kjuy cusasanaca ecasača. ⁴⁵ Tsjemata cwitiñi žoñi zakaz želatča. Nii žoñiqui kuzquiz pinsichiča, “Kjuychiz tuyñuqui anaž uri tjonasaž, jaz”, cjican pinsichiča. Jalla nekztanaqui nii kjuychiz luctaka cjiñi maataka cjiñi piyunanaca wjajtñitača. Nižaza nii žoñiqui persun lujlsquin licsquin kuz tjaačiča. ⁴⁶ Tiripintit tsjii ana pinsita nooj kjuychiz tuyñuqui quejpžquichiča. Tsjii ana zizta ora quejpžquichiča. Jalla nižtiquiztan kjuychiz tuyñuqui nii ana zuma cwitiñi žoñžquiz juc'anti anawaliž casticu tjaaquicha. Nii ana zuma žoñiqui jaknužt ujchiz žoñinacž castictaž cječhaja, jalla nižtapacha castictaž cjequičha.

⁴⁷ Tsjii piyunaqui zumpacha niž patruanaž pecta langz zizziča. Niiž patrunž langz zizcanpacha, ana langziča. Jalla nuž zizcanpacha, ana langztiquiztanaqui juc'anti castictaž wjajtzaž cjequičha. ⁴⁸ Nižaza jakzilta piyunat ana niž patruanaž pecta langz zizzaja, jalla nižta cjenpacha ana cumpličhaja, jalla niiqui upa casticta cjequičha. Jakzilta žoñžquiz wacchi cusasanaca cwitajo tjaatčhaja jalla nii žoñiqui tjapa nii cusasanacquitzan quint'istanča. Jakzilta žoñžquiz wacchi cusasanaca cwitajo cumpjiita cječhaja, jalla nii žoñiqui cusasanacchiz tuyñužquiz quint'istanča tjapa cumpjiita cusasanacquitzan.

IYA TJAAJINTA

⁴⁹ Tsjiilla zakaz quint'ichiča Jesusaqui, tuž cjican:

—Tekz werjqui tsjii uj peksnižtakaz tjonchinča. Nii uj peks oraqui wajiž cjila.

⁵⁰ Wejrqui tsjii wali pajk prueba watača bautismužtakaz. Nižaza nii watscama, ancha

llaquital cjeeča. ⁵¹ Weriž tjontiquiztan žoñinacaqui anazumquin cjequiča; t'aka t'akaž cjequiča, wejtquiz criichinaca, ana wejtquiz criichinaca, jalla nuž. ⁵² Tii timpuquiztan nawjkchuc tsjii famillanacami t'aka t'akaž cjequiča. Tsjii famillquiz pjijskaltan cječhani, čhjepultanac quintraž cjequiča pucultan žoñžjapaqui. ⁵³ Nižaza ejpžtan persun majchtan quintraž cjequiča. Nižaza majchžtan persun ejpžtan quintraž cjequiča. Nižaza maatan persun tjunmat matatan quintraž cjequiča. Nižaza naa tjunmat matatan persun maatan quintraž cjequiča. Nižaza kjan maatan wazatan quintraž cjequiča. Nižaza wazatan kjanatan quintraž cjequiča. Jalla nuž cjisnaquiča, wejtquiz criichinacžtan ana wejtquiz criichinacžtan.

KUZ CAMPIYA, ANA CASTICTA CJEYAJO

⁵⁴ Jalla nekztanaqui Jesusaqui žoñinacžquiz cjichiča:

—Ančhucqui cjiñčucča, wacchi tsjirinaca tajatan ulanžcaquiž niiqui, “chijnačhani”, nuž cjiñčucča. Nekztan jalla nuž chijñiž watča. ⁵⁵ Nižaza wartan quera queržcaquiž niiqui, “kjutñit cječhani”, nuž cjinčucča. Nekztan jalla nuž kjutñiž watča. ⁵⁶ ĩHipócrita cheechi žoñi! Ančhucqui jana lįjıtum kuzziz žoñinaca! Tjamž puntu tsjirž puntu walja zizni chiiñčucča. ĩKjažtiquiztan Yooz siñalanaca ana tantiyasajo? Kuz campiya, ima casticz ora irantan.

⁵⁷ Nižaza ĩkjažtiquiztan kamz puntu ana tantiyasajo, jaača zuma kamčhaja, jaača ana zuma kamčhaja, jalla nii? ⁵⁸ Jakziltat am quijžcu jiliržquin chjichačhaja, jalla niižquiztan pertunam mayizaquiča ana enenžcu, ima jiliržquin irantican. Am quija ana pertunazta cjenaqui, nii jiliri qui policiiquiz am intirjasača. Nekztanaqui nii policiaqui am carsilquiz chawcwasacha. ⁵⁹ Nekztanaqui wejrqui cjiwča, carsilquiztanaqui anapanim ulnasača, liwj tjappacha paczcama. Anziqui kuz campiya; Yoozquiztan pertuna maya, ana casticta cjeyajō.

13

YOOZQUIN KUZUZ CJEJ

¹ Nii orapacha tsjii kjaž žoñinacaqui quinto zjijcchiča, Jesusižquiz mazni. Tuž cjican quint'ichiča. Pilato cjita jiliri qui tsjii Galilea wajtchiz žoñinaca conkatchiča. Nii conta žoñinacž ljocqui animal ljocnacžtan t'ajziča. Tuquiqui animala contkalča, Yoozquin ofrenda tjaazjapa. ² Jalla nuž nonžcu Jesusaqui cjichiča:

—ĩKjažtiquiztan Galilea wajtchiz žoñinacžquiz nuž anawali watchitajo? ĩParti Galilea wajtchiz žoñinacžquiztan juc'ant ujhiz ninacajo? ĩJalla nižtazaž ančhuc pinsiya?

³ Ančhucqui anača nižta pinsa. Ančhucqui Yoozquin kuzzizpan cjee. Ana nižta cjisnaquiž niiqui, ančhucquiz juc'ant anawaliž watasacha.

⁴ Jesusaqui quint'ichizakazza, tuž cjican:

—Tsjii tunca quinsakalcuni žoñinacaqui ticziča Siloé cjita wajt campanturi jalla ninacž juntuñ pajłtiquiztan. ĩKjažtiquiztan nižta watchitajo? ĩParti Jerusalén wajtchiz žoñinacžquiztan juc'ant ujhiz ninacajo? ĩJalla nižtazaž ančhuc pinsiya? ⁵ Ančhucqui anača nižta pinsa. Ančhucqui Yoozquin kuzzizpan cjee. Ana nižta cjisnaquiž niiqui, ančhucquiz juc'ant anawaliž watasacha.

ISRAEL ŽOÑINACŽ PUNTUQUIZTAN

⁶ Jalla nekztanaqui Jesusaqui tsjii quinto zakaz quint'ichiča, tuž cjican:

—Tsjii žoñi qui niiz yokquiz jiws muntinaca čhjacchiča. Tsjii nooj ojkcchiča “jiwsa pookchižcaa” cjican, ojkcchiča. Irantižcu, muntinacquiz ana čjul jiws frutanaca watchiča. ⁷ Jalla nižtiquiztan nii yoka cwitiñi žoñžquiz cjichiča: “Chera, čhjep wata jiws frutanaca kjuri tjonchinča. Ana jiws frutanaca pookchikalča. Jaziqui tii muntinaca k'atzna. Inapanikaz žejlča.” ⁸ Jalla nekztanaqui nii yoka cwitiñi žoñi qui patrunžquiz cjichiča: “Wejt patruna, tii watcamakaz žela cjee. Wejrqui yokal zumpacha kjullznača, nižaza wanžtan wanit'ača. ⁹ Jalla nižtiquiztanaqui jiws frutanaca pookž atčhani. Anapan pookaquiž niiqui, nekztanaqui k'atžtaž cjequiča”. —Jalla nuž quint'ichiča Jesusaqui.

TSJAA MAATAK ŽONQUI ČHJETINTATAČHA

¹⁰ Tsjii jeejz tjuñquiziqui, Jesusaqui ajcz kjuyquiz tjaajnatčha. ¹¹ Jalla nekz želatčha tsjaa laa maatak žon. Tunca quinsakalcun watanaca laatačha. Tsjii zajraqui naa žon taj chutu paatkalčha. Nižtiquiztanaqui anawira ts'iru tsijtsniñtačha, ana čhju lu paazjapami. ¹² Jesusaqui naa žon cheržcu, kjawzičha, nekztan tuž cjichičha:

—Cullacalla, am laaquiztan liwriita cjequičha.

¹³ Nekztanaqui Jesusaqui niž kjaržtan lanzičha naa žonaquiz. Jalla nii orapacha naa žonqui ts'iru cjissinčha. Nižtiquiztan Yooz Ejpžquin honora paljaychiñčha. ¹⁴ Nii ajcz kjuy jilirizti Jesusižjapa žawjičha, nii jeejz tjuñquiz čhjetintiquiztan. Nekztanaqui nii jiliriqui žoñinacžquiz cjichicha:

—Sojta tjuñikaz langz waquizičha. Jalla nii langz tjuñiran laanacaqui tjonsa čhjetintaž cjisjapa. Anačha jeejz tjuñquiziqui tjonzqui.

¹⁵ Jalla nekztanaqui Jesús Jiliriqui nii jiliržquiz cjichičha:

—Ana zum kuzziz žoñinaca. Jeejz tjuñquiziqui tjapa ančhucanacaqui wacami aznumi cutzniñchucčha, kjaz liqui okajo, žana jaa? ¹⁶ Taa maatak žonqui Abrahamž majch maatquiztan tjoniñčha. Tunca quinsakalcun wata chututučha, Satanás cjita zajraž nuž chutu paañiz cjen. ¿Kjažt tii jeejz tjuñquiziqui taa laa žonqui ana čhjetinta cjesajo? Jeejz tjuñquizmi čhjetinzpanikazza.

¹⁷ Jesusiž nuž chiitiquiztanaqui tjapa niž quintra žoñinacaqui azzi quirchičha. Parti žoñinacazti cuntintutučha, Jesusaž nuž pajk milajrunaca paachiž cjen.

YOOZ MANTAPARU OJKŇI ŽOÑINACŽ PUNTU

¹⁸ Jalla nekztanaqui Jesusaqui cjichičha:

—Tižtačha Yooz mantaparu ojkŇi žoñinacž puntuqui. Jalla nii puntuqui intintazkatasachha, mostaz cjita semillž puntu chiitiquiztan. Jalla tužučha. ¹⁹ Tsjii mostaza cjita semilla žejlčha, ancha zkoltalla. Žoñiz čhjactan, walja pakjiž pajkčha, tsjii pajk muntiž, nizta pakji. Nižaza nii mostaz muntiquiz wežlanacaqui tjuraž paasačha. Jalla nužupan Yooz mantaparu ojkŇi žoñinaca yapaquičha, mostaz munti pajkŇila, jalla nizta irata.

²⁰ Nižaza Jesusaqui cjichičha:

—Tii takunacžtanzakaz Yooz mantaparu ojkŇi žoñinacž puntu intintazkatasachha. Jalla tužučha. ²¹ Tsjaa maatak žonqui čhjep tupu jac'užtan levaturžtan t'ajzinčha. Nekztanaqui tjappacha nii t'anti masaqui t'amchičha. Jalla nizta iratačha, tjapa kjutŇi tii muntuquiz žoñinacaqui Yooz mantita kamañchiz cjisnaquičha.

LIWRIITA ŽOŇŽ PUNTU

²² Wiruñaquí Jerusalén jiczquiz ojkcan, Jesusaqui tjaajinchičha. Jakziran watatčhaja, jalla nii watjaran jochiran tjaajinchičha. ²³ Nuž tjaajnan, tsjii žoñiqui Jesusižquiz pewcz-ičha, tuž cjican:

—Wejt Jiliri, ¿koluckaz liwriita žoñinacajo?

Nekztanaqui Jesusaqui kjaazičha, tuž cjican:

²⁴ —Ančhucqui tjapa kuz cjee, arajpach ojkŇi zkoz jicz zanquiz luzjapa. Wejrqui ančhucquiz cjiwčha. Casticz tjuñquiziqui tjapa žoñinacaqui luz pecaquičha. Nii oraqui anaž ataquičha. Jalla nižtiquiztan anziqui liwriiñi zanquiz luzjapa, tjapa kuz cjee. ²⁵ Tsjii noojiqui arajpach kjuychiz tuyñuqui tsijtsnaquičha liwriiñi zana chawjczjapa. Ančhucqui, zawnctan cjiñinaca, nii chawjczta zanquiz t'ok t'okaquičha, tuž cjican: “Wejt jiliri, cjetznalla, cjetznalla”. Kjuychiz žoñiqui kjaaznaquičha, tuž cjican: “Anal ančhuc pajučha. ¿Jecnactčhuckazlaj ančhucqui?” ²⁶ Jalla nuž chiitiquiztan ančhuczti zakaz chiyachani, tuž cjican: “Amtan chica lujchinčha. Nižaza wejtnaca wajt calliran tjaajinčhamčha”. ²⁷ Pero nii arajpach kjuychiz tuyñuqui kjaaznaquičha, tuž cjican: “Ančhucqui anapal pajučha, cjiwla. Wejtquiztan oka, tjapa ančhucqui ana zuma kuzzizčhucčha”. ²⁸ Nekztan Jesusaqui cjichičha:

—Abrahamžtan, Isaacžtan, Jacobžtan, tjapa Yooz taku paljayñi profetanacžtan, tjapacha ninacaqui arajpach Yooz kjuyquiz želaquiča. Ančhuczti zawnctanpanikaz želaquiča. Jalla nuž zawnctan žejlcan ančhucqui kaaquiča, nižaza ižkež jojaquiča, ana luzzucaž cjen. ²⁹ Tjapa kjuttan criichi žoñinacaqui arajpach Yooz kjuyquin luzaquiča, užatan, wartan, tajatan, tuwantan, nuž tjapa kjuttan. Nižaza nii luzzi žoñinacaqui arajpach Yooz kjuyquiz cusa atintitaž cjequiča. Yooz čhjeri luli julznaquiča. ³⁰ Nižaza Yoozqui arajpachquin yekjap tii muntuquiz wirquin cjiñi žoñinaca Tucquin cjiskataquiča. Nižaza yekjap tii muntuquiz Tucquin cjiñi žoñinaca wirquin cjiskataquiča.

JERUSALEN CJITA WAJTQUIN TICZ PUNTU

³¹ Jesusiž taku žeržtan, nii noopacha, tsjii kjaž fariseo žoñinacaqui tjonchiča, tuž cjan:

—Tekztan am oka. Herodes cjita jiliriqui am conz pecča.

³² Jalla nekztanac Jesusaqui kjaaziča, tuž cjan:

—Ančhucqui nii mañus Herodesquin oka. Niižquin chiižca, tuž cjan: “Tsjii kjaž tjuñi tirapal Yooz obranacal paa-uča, zajranaca chjatkatcan, laanaca čhjetincan. Nekztan tsjii kjaž tjuñquiztan wejt obra žerznača”. ³³ Pero wejrqui tsjii kjaž tjuñi tiral kamača, Jerusalén wajtquin ticzca. Jerusalén wajtquin Yooz taku paljayñi profetanacaqui ticstanča.

³⁴ ¡Jerusalén, Jerusalén wajtchiz žoñinaca! Ančhucqui Yooz taku paljayñinaca coničhucča. Nižaza Yooziž cuchanzquita žoñinaca maztan čhjaquiničhucča. Wallpiquei persun ozmachanaca kjarž koztan juntiñil, jantey. Jalla nižta irata wejrqui tii wajtchiz žoñinaca juntiz pecuča. Ančhuczti ana wira wejtquin tjonz pequiničhucča. ³⁵ Jalla nižtiquiztan ančuca wajt yokaqui ana Yooz kjarquiz žejlča. Nižaza wejrqui cjiwča. Tsjii noojiqui ančhucqui wejt puntuquiztan chiyaučiča, “Honorchiz cjila, tii Yooziž cuchanzquita žoñiqui”. Jalla nii oracama, ančhucqui wejr ana wilta cheraquiča.

14

TSJII CURPU TJUUCHI ŽOÑIQUI ČHJETINTATAČHA

¹ Tsjii jeež tjuñquiziqui Jesusaqui tsjii fariseo jilirž kjuya luli ojkcichiča. Yekja fariseo žoñinacaqui Jesusa awayt'atča. ² Nižaza nii kjuyquiz želatča tsjii curpu tjuuchi žoñi. Jesuž žcati želatča. ³ Nii cheržcu Jesusaqui fariseo žoñinacžquiz lii tjaajñinacžquiz, jalla ninacžquiz pewcziča, tuž cjan:

—¿Jeež tjuñquiziqui tsjii laa žoñi čhjetnasaj? už ¿ana čhjetnasaj?

⁴ Ninacazti ch'ujukaz cjišiča. Nekztanaqui Jesusaqui laa žoñi kjawžcu, čhjetinchiča. Nekztan laa žoñžquiz cjičiča:

—Oka amqui —cjanacqui. ⁵ Nekztanaqui Jesusaqui fariseo žoñinacžquiz tuž cjičiča:

—Jeež tjuñquiz cjenami aznumi wacami tujquiz tjojsiž cjen okžcu, ¿anaž jooznasajo?

⁶ Jalla nuž čhiitiquiztanaqui ana jaknuž kjaazñi atčiča.

PJIZTA PUNTU

⁷ Nekztanaqui Jesusaqui nii kjuyquin lujlcan jalla tižta cherčiča. Kjawžta žoñinacaqui Tucquin julz kjuratča, nižaza honorchiz cjis pecatča. Jalla nižta cjičjiñi cheržcu, Jesusaqui, tuž cjičiča:

⁸ —Amqui tsjii zalzñi pijztiquiz kjawžta cjesaž niiqui, anača Tucquinpan julzqui. Am jarupacha tsjii juc'ant jilir žoñiqui tjonasaž niiqui, am Tucquin julzpantaž cjesača. ⁹ Jecčhalaj pucultan ančhucqui kjawzi, jalla nii kjawzñi žoñiqui amquiz chiyasača, “Am julz tii juc'ant jiliržquin tja”, cjan. Jalla nižtiquiztanaqui amlaqui azanpanti wirquin julz cjesača. Am aziž cjesača. ¹⁰ Ana nižta paa. Antiz tuž cjee. Tsjii zalzñi pijztiquiz kjawztaž cjesaž niiqui, wirquinpankaz julzqui. Nekztan nii kjawzñi žoñiqui irantižcuqui, amquin chiyasača, tuž cjan: “Wejt k'ayi jila, ticchuc watžca, Tucquin julzca”. Jalla nuž kjawžcu Tucquin tjułžtiquiztan parti žoñinacž čhjujquiziqui honorchizim cjesača. ¹¹ Jakzilta žoñit parti žoñinacžquiz persun honora chii chiyachaj niiqui, wiruñauqui nii žoñiqui ch'ujukaz cjesača. Pero humilde kuzziz žoñizti honorchiz cjiskattaž cjequiča.

¹² Nižaza Jesusaqui nii kjawzñi žoñžquiz cjičiča:

—Čhjeri tjasim pecĥaj niiqui, anam kjawznaquiž am persun mazinacĥquiz, nižaza am persun jilanacĥquiz, nižaza am persun famill parintinacĥquiz, nižaza am ricach visinunacĥquiz, jalla ninacĥquiz alaja anam kjawznaquiĥa. Ninaca čhjeri luli kjawznasaž niiqui, ninacaqui am zakaz kjawznasaĥa. Nižtiquiztan amzakam čhjeri tanznaquiĥa. Nižtiquiztan ana gastichim cjequiĥa. ¹³ Ana niža paa. Antiz tuž cjee. Čhjeri tjasim pecĥaj niiqui, kjawznaquiĥa pori žoñinaca, zuch žoñinaca, coj žoñinaca, zur žoñinaca, jalla ninacĥquiz kjawznaquiĥa. ¹⁴ Nuž paažcu cuntintum cjequiĥa. Ninacaqui anaž čhjulumi tjepñi atasacĥa. Yooz zuma kamañchiz žoñinacĥ jacatatž tjuñiž tjontan, jalla neksim amqui tjepuntam cjequiĥa.

¹⁵ Jalla nuž Jesusiž čhiita taku nonžcu, tsjii julzi žejlñi žoñiqui Jesusižquiz cjichiĥa:

—Arajpach Yooz Ejpž kjuyquin lujlñinaca cuntintuž cjequiĥa.

¹⁶ Jalla nektanaqui Jesusaqui nii žoñžquiz quint'ichiĥa, tuž cjican:

—Tsjii nooj tsjii žoñiqui pajk pjijzta paachiĥa. Tuquiqui walja žoñinaca kjawskatchiĥa pjijztiquiz. ¹⁷ Pjijzta čhjeri lujlz ora piyunaqui kjawžta žoñinacĥquiz cuchanžquitaĥa, tuž cjeajo: “Tjappacha listu tjacžtaĥa, jaziqui ž-tjona”. ¹⁸ Nektanaqui kjawžta žoñinacaqui pasinza mayizichiĥa. Tsjii žoñiqui cjichiĥa: “Anzilla yoka kjaychinĥa. Jalla nii cheržquistanĥa. Jalla nižtiquiztan amqui wejr pasinzt'alla”. ¹⁹ Tsjiižti cjichiĥa: “Anzilla tunca waca kjaychiñĥa. Jalla nii waca yanstanĥa. Jalla nižtiquiztan zumaž pasinzt'alla”. ²⁰ Tsjiižti cjichiĥa: “Anzilla tjunatan zalzinĥa. Nižtiquiztan anal oki atasacĥa”. ²¹ Nii cuchanžquita piyunaqui quejžpžcu patrunžquiz tjappacha quint'ichiĥa, jaknuž žoñinacat kjaaztĥaja, jalla nii. Nuž quint'itiquiztan nii patrunaqui walja žawjchi cjissiĥa. Nižaza piyunžquiz cjichiĥa: “Uri ojklajžca calliran nižaza wajt tjiyaran. Pori žoñinaca zjiyczna, nižaza zuch žoñinaca, cojonaca, zuranaca, jalla ninaca kjawžca”. ²² Wiruñauqui nii piyunaqui maziĥa tuž cjican: “Wejt patruna, amiž mantitacama ojklaychinĥa. Nižaza iya julz campo žejlĥa”. ²³ Nektanaqui patrunaqui cjichiĥa piyunžquiz: “Wilta ojklajžca callinacaran jicznacaran. Žoñinaca kjawkjawcan ojklajžca kjuyquiz čhjijpsnajo. Kjawžta žoñinacĥquiz tjonkatžca”.

²⁴ Nektan Jesusaqui cjichizakazza:

—Wejrqui cjiwĥa. Weriz primira kjawžta žoñinacaqui anapan čhjeri lulasaĥa wejt arajpach pjijztiquiziqui. —Jalla nuž cjichiĥa Jesusaqui.

JESUCRISTUŽQUIN KUZZIZ PUNTU

²⁵ Walja žoñinacaqui Jesusa apziĥa. Nektanaqui Jesusaqui tsjitscu žoñinacž kjutñi quejpciĥa, tuž cjican:

²⁶ —Jakzilta žoñit wejtquin kuzziz cjeĥaj niiqui, niž persun ejpmi, maami, tjunmi, maatinacami, persun jilanacami, persun cullaquinacami, nižaza niž persun kamañ wirami, jalla ninacžquistanami wejtquin juc'anti kuzziz cjistanĥa. Anaž wejtquin juc'anti kuzziz cjequiž niiqui, anaž wejt partir žoñi cjichuca cjesaĥa. ²⁷ Jakzilta žoñit wejt partir žoñi cjis pecĥaj niiqui, tjapa kuztanž wejtquiz cjistanĥa niž persun wira apt'iz cjenami. ²⁸ Tsjilla cjesaĥa. Jequit tsjii campanturi kjuyz pecĥaj niiqui, primiruqui gasto zumpacha tantiistanĥa, paaz wacata ana wacata, jaknuž nii campanturi tsajczjapa, jalla nii. ²⁹ Ana zumpacha tantižcu kallantaquiž niiqui, nektan ana tsauqui atchuaž cjesaĥa. Jalla nuž ana tsajcñi cheržcu parti žoñinacaqui nii žoñžquiz inarasaĥa, ³⁰ tuž cjican: “Nii žoñiqui campantur kjuyi kallantichiĥa. Nektan ana tsauqui atchiĥa. Ana zuma tantiichiĥa”. Jalla nuž tjasquiĥa. ³¹ Nižaza jakzilta chawc jilirit quira zalz pecaĥaj niiqui, primiruqui zumpacha tantiistanĥa, niž tunca warank zultatunaca tsjiizuñž paatunc warank quintra zultatunacĥquiz atipata, ana atipata, jalla nii. ³² Ana atipchucazlaj niiqui, quintra jiliržquin ažquin cjen cjemisuna cuchana, nužquiz pasinza paajo, acuerdo luzjapa. ³³ Jalla niža, ima wejtquiz kuzziz cjen, zumpacha tantiz waquiziĥa. Jakzilta žoñit čhjultakviztanami anaž wejtquiz juc'anti kuzziz cjequiž niiqui, anapanž wejt parti žoñi cjesaĥa.

³⁴ Yacuqui zumaĥa. Yacuqui lak'ansasaž niiqui, jkakužt wilta zuma cjesajo?

³⁵ Anapanž cjesaĥa. Anaž yokjapa sirwasaĥa, nižaza anaž yok kulljapa sirwasaĥa. Jalla

nuž ana sirwanami tjojtspanikazza. Jakziltažlaj cjuñchiz niiqui, zumpacha nonžna Yooz puntu intintisjapa.

15

KATCHI UUZU QUINTU

¹ Impuesto cobriñi žoñinaca nižaza ujchiz žoñinaca Jesusižquiz macjatžquichiča, niiz taku nonzjapa. ² Jalla nižtiquiztanaqui fariseo žoñinacžtan lii tjaajiñinacžtan jalla ninacaqui Jesusiž quintra chutchiča, tuž cjican:

—Tii žoñiqui ujchiz žoñinacami risiwnipanikazza, nižaza ninacžtan chica čhjeri lujlñiča.

³ Jalla nižtiquiztan Jesusaqui ninacžquiz quint'ichiča tuž cjican:

⁴ —Tsjii žoñiqui patak uuzichiztača. Nekztanaqui tsjiilla katchiča. Jalla nekztanaqui parti uuzinaca ilakz yokquin ecchiča, katchi uuzi wajtzcama. ¿Jakziltat ančhucaquiztan ana niža paajo? ⁵ Nižaza katchi uuzi wajtžcuqui, azkar juntuñ tjojtžcu, awatiriqui tjonchiča, ancha cuntintu. ⁶ Nižaza kjuya irantižcuqui žcatinta visinunacžquiz nižaza mazinacžquiz kjawziča, tuž cjican: “Wejtan cuntintuž cjee. Wejt katchi uuziqui wajtch-inča”. ⁷ Nižaza wejrqui cjiwča, jalla niža iratača arajpachquinaqui. Tsjii ujchiz žoñiqui Yoozquin kuzziz cjesaž niiqui, arajpachquin žejlñinacaqui ancha cuntintuž cjisnaquiča. Llatunc tunc llatuncani ana Yoozquin kuzziz žoñinaca želačhani: “Wejrnaqui zuma kamok”, cjicanaqui. Pero arajpachquinaqui ninacžquiztan juc'anti cuntintuž cjequiča nii zinta Yoozquin kuzziz žoñiž cjen.

KATCHI PAAZ QUINTU

⁸ Jesusaqui quint'ichizakazza, tuz cjican:

—Nižaza tsjaa tunca paazziz žon želatča. Nekztanaqui tsjii paaz tjtanchinča. Paaz tjtanzču, lámpara pekzinča. Nižaza kjuya pewchinča, zumpacha. Nuž zuma pewcan, katchi paaz wajtchinča. ⁹ Nii paaz wajtžcu, mazinacžquiz nižaza žcatinta visinunacžquiz kjawzinča, tuž cjican: “Wejtan cuntintuž cjee. Wejt katchi paaz wajtchinča”. ¹⁰ Wejrqui cjiwča. Nižaza arajpachquinaqui Yooz anjilanacaqui cuntintuž cjequiča čhjulorami tsjii ujchiz žoñiqui Yoozquin kuzziz cjisnačhaja, jalla nii oraqui.

EJPŽQUIZTAN ZARAKCHI MAJCH QUINTU

¹¹ Nižaza Jesucristuqui tii quintu zakaz quint'ichiča, tuž cjican:

—Tsjii žoñi želatča, pucultan lucmajch ocjalchiz. ¹² Nii upaňazta majchqui ejpžquiz cjichiča: “Tata, irinsaž wejtquiz tjaall amqui”. Jalla nekztanaqui ejpqui irinsa t'akžinchiča pucultan majchnacžquiz. ¹³ Tsjii kjaž majquiztan upaňazta majchqui irinsa tuychiča. Nekztan tjappacha niiz cusasanaca juntjapžcu, ažkquin ojkičiča yekja nacionquin. Nekztan nii nacionquin tjappacha niiz cusasanaca gastichiča, ana zuma kamcan. ¹⁴ Nužquiz tjappacha cusasanaca miržcuqui, upaňazta majchqui ana čhjulchiz cjišičiča, žoñi maya. Nižaza nii nacionquiz čhjeri upsiča. Upaňazta majchqui čhjerž kjara passiča. ¹⁵ Nekztanac niiqui langz kjuri ojkičiča. Tsjii žoñžquiz langz wajtchiča. Nii patrunaqui jochi mantichiča, cuchi ichajo. ¹⁶ Ancha čhjeri eeczatchiča nii ejpžquiztan zarakchi majchqui. Ana čhjululimi onantaž niiqui. Jalla nekztanac cuch lulinacami chjajpinacami lujlznatakaztača. ¹⁷ Jalla nekztanaqui kuzquiz pinsiskatchiča, tuž cjican: “Tjappacha wejt ejpž piyunanacaqui cusa čhjerinaca lujlčhani. Nižaza žejtchinacami žejlčhani. Wejrzi tekzi t'akjiri želuča; čhjerž kjara pascu, ticz atučhani. ¹⁸ Quepaž wejrqui, tira wejt ejpžquin. Nižaza wejt ejpžquin cjeeča: ‘Wejt Tata, Yooz quintra am quintra uj paachinča. ¹⁹ Wejrqui anam am maati cjichucača. Kjažllami tsjii am piyunažtakaz uywalla’”. Jalla nuž cjican pinsičiča. ²⁰ Nekztanaqui ejpžquin zarakchiča; ejpž kjuy kjuťni ojkičiča. Ažkquin cjen ejpqui niiz majch pajchiča. Kuzquiz ancha okziča, ancha k'aaztichiča. Nekztan majch zali zajtchiča. Majch žcojžcu, chjulziča. ²¹ Nekztanaqui majchqui ejpžquiz cjichiča: “Tatay, wejrqui Yooz quintra, am quintra uj paachinča. Jaziqui wejr am maati anaž cjichuca”. ²² Jalla nekztanaqui ejpqui

piyunanac̄quiz cjichiča: “Uri, jila walurchiz zquiti jwesanzca. Nii zquitžtan wejt majch tjutžna. Niiž loc'anquiz zurtija majczina. Nižaza zapato tjutžna. ²³Nekztanac ančhucqui walipunt cjew wacaž zjjczca conzjapa. Pjijztaž paaquiča. Zuma čheriž lulaquiča. ²⁴Wejt majch ticzižtakaz katchitača. Jaziqui ticziquiztan jacatatchižtakaz tjonchiča. Nižtami nižtan zalchinča”. Jalla nekztanaqui pjijzta payi kallantichiča.

²⁵Jalla nuž upaňažta majch tjonz ora, niž jilaqui joch yokuintača. Kjuj žcati irantižcan, pjijzta nonziča, tsajtñi wayliž jora. ²⁶Jalla nižtiquiztanaqui jilir majchqui tsjii tsjii piyuna kjawziča. Nuž kjawžcu, “¿Čhjulut wat?” cjan, pewcziča. ²⁷Piyunaqui kjaaziča, tuž cjan: “Am lajkqui tjonchila. Wiwusa anazak kjaž cjissi tjonchiča. Nižtiquiztan am ejpqui walipunt cjew wac conkatchiča, pjijzta paazjapa”. ²⁸Jalla nii quintu zizcu, jilir majchqui walja žawjchiča. Pjijztiquiz ana luz pecatča. Nuž cjen ejpzakazza nii roqui ulanzquichi luzcajo. ²⁹Nekztanaqui jilir majchqui ejpžquiz cjichiča: “Kjaž watanaca wejrqui am sirwichinča. Nižaza ana mantitacama okintača. Jalla nuž cjenami ana wira tsjii cabrallami onanňamtača, wejt mazinacžtan pjijzta paazjapami. ³⁰Anziqui tii am ana cazñi majchqui tjonchiča. Tiiqui ana zuma kamcan am paaz gastichila, ana zum maatakanacžtan zejlcjan. Nuž paata cjenami, nižtajapa tsjii walipunt cjew waca conchamča”. ³¹Jalla nekztanaqui niž ejpqui kjaaziča, tuž cjan: “Wejt maati, amqui wejt chicaž kamňampanla. Tjapaž wejtac žejl-la, niic amtacamača. ³²Tii am lajkqui ticzižtakaztača. Jaziqui ticziquiztan jacatatchižtakaz tjonchiča. Nižaza katchitača. Jaziqui wažtača. Jalla nižtiquiztan ancha cuntintuž cjen pjijzta paaz wauziča”.

16

CUSASANACA CWTIŇI PIYUNA QUINTU

¹Nižaza Jesusaqui niž tjajinta žoňinac̄quiz tsjii quintu zakaz quint'ichiča, tuž cjan: —Tsji ricach žoňi želatča. Niiž kjuj cusasanaca cwitajo tsjii piyuna utchiča. Wiruňaqui yekja žoňinacaqui nii patrunžquiz mazziča, tuž cjan: “Tii am piyunaqui am cusasanaca ancha anawali gastiñiča”. ²Jalla nekztanaqui patruaqui piyunžquiz kjawziča, tuž cjan: “¿Čhjul quintu am puntuquiztan nonojo? Jaziqui jaknužum amqui wejt cusasa cwtižinčhaja, jalla nii wejtquiz quint'alla. Amiž ana zuma cwtižiči cjen anam iya wejt cusasa cwtisača”. ³Nekztanaqui nii piyunaqui pinsichiča, tuž cjan: “¿Jaziqui kjažt wejr cjisnaquejo? Wejt patruaqui wejrž jakjurpayla nii wejt langzquiztanaqui. Jaziqui ana ancha langziž cjisnula wejrqui. Wejtta azi ana žejlča, zkal yokquiz langzjapa. Nižaza žoňžquiztan tomangz eksnuča, azuča. ⁴¿Jalla nuž ana langžñi atchiž cjen, čhjulut paa-as?” Nekztan piyunaqui cjichiča: “Aaaa. Čhjulut paa-as, nii zizuča wejrqui. Nekztan žoňinaca wejr atintiž želačan. Wejr kjawznačan ninacž kjuyquizimi”. ⁵Jalla niž pinsita jaru piyunaqui zina zina patrunž kajchi žoňinaca kjawziča. Tsjii primira kajchi žoňžquiz pewcziča, tuž cjan: “¿Kjažum wejt patrunžquiz kajchamta?” ⁶Kajñi žoňiqui kjaaziča, tuž cjan: “Patac turril aceite kajchinča”. Jalla nekztanaqui piyunaqui cjichiča: “Tiž am factura. Uri julzna. Yekja factura paa. Pjijjska tunca turril aceitekaz cjižrna”. ⁷Wiruňaqui tsjiizuň kajchi žoňžquiz pewcziča, tuž cjan: “Am, ¿kjažum kajchamta wejt patrunžquiz?” Kajñi žoňiqui kjaaziča, tuž cjan: “Patac quintal tiricu”. Nii piyunaqui cjichiča: “Tiž am factura. Nižaza yekja factura paa, quinsakal tunca quintal tiricukaz cjižrna”. ⁸Jalla nii piyunaž nuž paan patruaqui nii anawal piyuna c'uňchi pajchiča, niž cusasanaca cwtiñi. Jalla nižtažtakaz anawali kamñi žoňinacaqui tii muntuquiz cusasquin kuzziz kamča. Jalla nuž kamcan ninacaqui c'uňchi tjojnakñiča zuma kamñi žoňinac̄quiztan juc'anti.

⁹Wejrqui cjiwča. Tii ujchiz muntuquiz kamcanaqui žejlñi cusasanaca gasti waquiziča, zuma paacan tsjii zuma amigo tanzjapa. Jalla nekztan ticžcu ančhucqui kjawztaž cjequiča niž arajpach kjuyquin.

¹⁰Jakzilta žoňit koluc cusasanaca zumpacha cwit'ačhaj niiqui, nižaza wacchi cusasanaca zumpachazakaz cwit'aquiča. Nižaza jakzilta žoňit koluc cusasanaca ana zuma cwit'ačhaj

niiqui, nižaza wacchi cusasanaca ana zuma cwit'ichiž cjequiča. ¹¹Nižaza jakzilta žoñit tii ujchiz muntuquiz žejlñi cusasanaca ana zumpacha cwit'asačhaj niiqui, jalla nižta ana zuma kamchiž cjen, Yoozqui werar arajpach cusasanaca nii cwitiñijapa ana tjaasača. ¹²Jakzilta žoñit Yooziž tjaata cusasanaca ana zuma cwit'ačhaj niiqui jalla nižta ana zuma kamchiž cjen, Yoozqui arajpach cusasanaca tjaaz cjen pacha ana tjaasača.

¹³Anaž jakzilta piyunami pizc patruna sirwi atasacha. Piyunaqui tsjii patrunžquikaz kuz tjaasača. Tsjiizuñ patrunaž jaytaquiča. Nižaza nii piyunaqui tsjii patrunžquikaz zumpacha sirwaquiča. Nii tsjii patrunžquiz anapan zuma sirwi atasacha. Yoozmi paazmi žejlča pucultan patrunažtakaz. Pero žoñinacaqui pucultižquiz kuz ana tjaasača. Tsjii patrunžquizpankaz zuma sirwasača.

¹⁴Ancha paaz pecni fariseo žoñinacaqui tjapa Jesusiž chiita taku nonziča. Jalla nuž nonžcu Jesusa iñarchiča. ¹⁵Jesusaqui nižtiquiztan cjichizakazza:

—Ančhucqui cusa žoñižtakaz ojklayiñchucča žoñž yujcquiziqui. Yooztti ančhuca kuz zizza. Tii muntuquiz žejlñi žoñinacaqui ana zuma kuzziz žoninacž honorakaz waytiča. Yooz Ejpzti nii ana zuma kuzziz žoñinaca čjaawjñipanča.

LII PUNTU

¹⁶Nižaza Jesusaqui cjichiča:

—Juan Bautistaž tjonzcama, Moisés mantita lii azziztača. Nižaza Yooz taku paljayñi profetž tjaajintanacami azziztača, Juan Bautistaž tjonzcama. Nii timpuqui jalla nii mantita takunaca azziztača. Pero Juan Bautistaž tjontiquiztan, liwriñi Yooz taku nižaza Yooz mantita kamañ puntu paljayzqui, jalla ničha tsjan chekanaqui. Jaziqui walja žoñinacaqui Yooz mantita kamañquiz luzjapa tjapa kuz tjaacha.

¹⁷Jalla nuž cjenami tjuñimi warawarami yokami katasača. Pero tjapa nii arajpach Yooz liizti anaž wira katasača.

JAKJURPAYZ PUNTU

¹⁸Nižaza Jesusaqui cjichiča:

—Jakzilta žoñit niž maataka jakjurpayžcu yekja maatakžtan zalsnačhaj niiqui, jalla nuž cjenauqui adulterio uj paača. Nižaza jakzilta žoñit jakjurpayta maatakžtan zalsnačhaj niiqui, adulterio uj zakaz paača.

RICACH ŽOÑŽTAN PORI ŽOÑŽTAN QUINTU

¹⁹Nižaza Jesusaqui tsjii quintu zakaz quint'ichiča, tuž cjan:

—Tsjii wali jiru ricach žoñiqui želatča. Zuma finu zquiti kujtžñitača. Nižaza zapuru pijjztakaz ancha cusa čhjeri lujlchiča. ²⁰Nii oraqui tsjii pori žoñi želatča Lázaro cjita. Niiž janchiqui walja zkira cjijtchitača. Zapuru ricach žoñž kjuy zanquiz julzi žejlñitača. ²¹Nii ricachuqui žejtchi čhjerinaca tjojtñitacha. Nii pori žoñizti tjojtta žejtchi čhjerinaca lujl pecñitača. Pacunacaqui pori žoñžquiz macjatžcu niž zkiranaca issañitača. ²²Tsjii noojiqui nii pori žoñiqui ticziča. Nekztanaqui Yooz anjilanaqui nii chjitchiča Yooz illzta zuma yokquin, Abraham cjita žoñžtan chica želajo. Wiruñauqui nii ricachu žoñiqui ticizakazza. Nekztanaqui yokquiz tjatžtatača. ²³Nii ricachu žoñiqui infiernuquin sufrican želatča. Nicju sufrican, tsewc kjutñi cherchiča. Ažquiztan cherchiča Abrahamžtan Lazaružtan. ²⁴Jalla nuž cheržcu, kjawchiča, tuž cjan: “Abraham tatay, wejr okznalla. Lázaru cuchanžca, niž loc'ana kjaztan t'awžcu, wejt lasquiz lanznajo, ch'uñkatajo. Tii asñi ujquiz anchal sufručha”. ²⁵Abrahamzti cjichiča: “Jila, cjuñznalla, muntuquiz kamcan, ancha cusa kamchamča. Lazaruzti t'akjiri kamchiča. Jaziqui anziqui Lazaruqui kuztača, ancha cuntintučha. Amzti ancha sufričha. ²⁶Nižazakaz Yoozqui pajk pal k'awa utchipanča wejtnacquiztanami amquiztanami. Jaziqui tekžtan nawjkchuc ojkc pecñinacaqui anaž okasača. Nižaza nawjktan tjonz pecñinacaqui anaž tjonasača”. ²⁷⁻²⁸Jalla nekztanaqui nii ricuqui cjichiča: “Abraham tatay, wejtta pjijskaltan jilanaca žejlča. Jaziqui am rocučha, wejt ejpž kjuyquin Lázaro cuchanžinžcalla, ninacžquiz paljayajo, nižaza tii infiernuquiz ana tjonajo”. ²⁹Pero Abrahamqui nižquiz kjaaziča, tuž cjan: “Ninacžta žejl-la Moisés cjiřtami nižaza Yooz taku paljayñi profetanacž cjiřtami.

Nii cjiyrtanacquiz cazla, kuz tjaala”. ³⁰Jalla nektanaqui nii ricuqui kjaazičha tuž cjan: “Razunam chiičha, Abraham tatay. Pero tsjii žoñiqui ticziquiztan ninacžquin okačhaj niiqui, Yoozquin kuzziz cjisakatačhani”.

³¹Nektanaqui Abrahamqui cjičičha: “Ninacaqui Moisés mantita taku nižaza Yooz taku paljayñinacž taku ana criyačhaj niiqui, tsjii ticziquiztan jacatatchi žoñž takumi ana zakat criyačhani”. —Nuž quint'ichičha Jesusaqui.

17

UJQUIZ TJOJTJA PUNTU

¹Nektanaqui Jesusaqui niiz tjaajinta žoñinacžquiz cjičičha:

—Ujquiz tjojskatñi žoñinaca žejlñipantačha. Pero Yoozqui nii ujquiz tjojskatñi žoñinacaqui anawaliž watkataquičha. ²Jakzilta žoñit Yoozquin kuzziz žoñi ujquiz tjojskatačhaj niiqui, nižta ana zum žoñinacaqui koz kot kjazquin tjojttaž waquizičha, tsjii pajk taj maztan jorquiz mokžinta. Jalla nuž tsjan cusaž cjesačha nii ujquiz tjojskatñi žoñžtaqui.

³Nižta žoñinacžquiztan ančhucqui walja cwitassa, ana ujquiz tjojsjapa. Tsjii am jilanacžquiztan am quintra uj paačhaj niiqui, jalla niizžquiz žumpacha chiižina, niiz kuz campiita cjeajo. Nektan niiz kuz campiita cječhaja, jalla nii uj paañi žoñžquiz pertunaquičha amqui. ⁴Zapa wiltami nii am quintra uj paañi žoñiqui pertuna mayizičhaj niiqui, amqui pertunaquičha, tsjii nooj pakallawk wilta am quintra uj paanami.

YOOZQUIN KUZUZ PUNTU

⁵Wiruñaqi Jesusiž illta žoñinacaqui Jesusa jiliržquiz paljayčičha tuž cjan:

—Juc'anti Yoozquin kuzziz cjisjapa yanapalla.

⁶Nuž maytiquiztan Jesusaqui kjaazičha, tuž cjan:

—Tsji mostaz semillaqui aunqui koltallami wali pakji pakñičha. Jalla nižta iratačha ančhucqui. Yoozquin walja kuzzizčhucčhalaj niiqui, milajrunacami zakaz paasačha. Walja Yoozquin kuzziz želanaqui, tii sicómoro cjita muntiquiz cjesačha, tuž cjan, “Tekztan pajlta cjee, nižaza kotquin tjojtta cjee”. Jalla nuž chiitiquiztan nižtapachaž cjesačha.

PIYUNŽ PUNTU

⁷Jesusaqui cjičizakazza:

—Tsjiilla chiyasačha. Ančhucquiztan piyunchiz žoñi želasačha. Piyunaqui joch yokquiztan tjonasačha, uywanaca itzcu, nižaza zkala yoka kjullžcu. Jalla nuž langquiztan tjonanaqui, anapanž ančhucqui cjesačha, “Watžca, julzna, tiičha lujlna” cjičanaqui.

⁸Ančhucqui antiz piyunžquiz cjesačha, “Čhjeriž apura kiswa. Nižaza wejr atintisjapa, zumpacha tjaczna. Wejrqui lulačha, licačha. Nektanž amqui lulaquičha, nižaza licaquičha”. Jalla nuž tsjii piyunžquiz cjesačha. ⁹Jakzilta piyunat niiz patrunž mantitanaca paačhaj niiqui, patruñacqui sparaqiz cjesajo? ¹⁰Ančhucqui Yooz piyunažtakazza. Jalla nižtiquiztan tjapa Yooz mantitacama kamcan, ančhucalaqui chiiz waquizičha, tuž cjan, “Wejrñacqui am piyunitičha. Inakaztčha wejrñacqui. Jaknužt paaz waquizičhaja, jalla niikaz paayinčha”.

MOJKCHI JANICHIZ ŽOÑINACA ČHJETINTATAČHA

¹¹Jalla nektanaqui Jesusaqui Jerusalén watja ojkan, Samaria cjita yoka Galilea cjita yoka nii taypiquin watchičha. ¹²Nektanaqui tsjii watjallquiz, waj irantawc cjen, tuncaltan mojkchi janichiz žoñinacaqui Jesusižquin zalí tjončičha. Ažquiztan Jesusižquiz chiižinčičha. ¹³Altu tawkžtan tuž cjičičha:

—Jesusa, Jiliri, wejtnacaquiz okznalla!

¹⁴Jalla nii laanaca cheržcu, Jesusaqui cjičičha:

—Icliz jiliržquin persun janči tjeežni oka.

Jalla nuž ojkan, laanacaqui žejtchi quirčičha. ¹⁵Tsjii tsjiiqui persun janči žejtchi cheržcu cuttičičha, Jesusiž kjutñi, altu joržtan Yooz honora waytican quejpčičha.

¹⁶Jalla nuž Jesusižquin wilta zalžcu, niiz yucquiz quillzičha, nižaza tuzi t'okzičha yoka

iranta. Jesusižquiz ancha sparaquiž cjichiča. Nii žoñiqui Samaria wajtchiz žoñitača. ¹⁷Nekztanaqui Jesusaqui cjichiča:

—¿Ančhucqui anataj tuncaltanpacha žejtchinčucjo, tii laaquiztanajo? ¿Jakziqint tsjii partinacajo? ¹⁸Amqui anaž tii wajtchiz žoñila. Am zinakaz quejppžquila Yoozquin honora wayticanauqui.

¹⁹Nekztan Jesusaqui nii žoñžquiz cjichiča:

—Tsjitsna, oka. Amiž tjapa kuz criitiquiztan, jaziqui čhjetintamča.

YOOZ MANTIZ TJUŇI PUNTU

²⁰Nekztanaqui fariseo žoñinacaqui Jesusižquiz pewcziča, tuž cjican:

—¿Čhjlorat Yooz Epiž mantiz tjuñi irantižcaquiya?

Nekztanaqui Jesusaqui kjaaziča, tuž cjican:

—Yooz Epiž mantiz tjuñiqui anača cherchuca. ²¹Anača “tekipan” cjican nii tjuñi tjeeznasacha. Nižaza anača “nii nawjk” cjican nii tjuñi tjeeznasacha. Yooz mantizqui žoñinacž kuzquizpachača. Jalla nižtiquiztanac Yooz mantizqui anaž cherchuca cjesača.

²²Jalla nekztanaqui Jesusaqui niiz tjaajintanacžquiz cjichiča:

—Tsjii sufris timpuqui irantižcaquiča ančhucquiz. Jalla nekztanac ančhucqui wejr arajpachquiztan quejpsquini cherz pecaquiča, tsjii noojillami. Pero weriž arajpachquin želan, anaž wejr cheri atasacha. Wejrqui tsewctan cuchanžquita Yooz žoñiča. ²³Nižaza nii sufris timpuquiziqui žoñiqui Cristuž puntuquiztan parlaquiča, tuz cjican: “Arajpachquiztan chjiwžquichiča. Tekzi žejlča”. Tsjiižti zakaz chiyauquiča, “Nii nacjuča Cristuqui” cjican. Pero ančhucqui anaž nicju okaquiča, nižaza nii chiita taku anaž criyaquiča.

²⁴Tsjii liwjlwjni rayu cjita tjonñila, jantey, jalla nuz liwjtayžcaquiča, liwjpacha irantaž kjanžnaquiča. Jalla niža irata wejrqui arajpachquiztan wilta tjonacha. Weriž tjonan, tjappacha zizasacha. Jalla nižtaž wejt tjonz tjuñiž cjequiča. ²⁵Anziqui primiraqui wejrqui walja sufristanča. Nižaza tii timpuquiz kamni žoñinacžquiztan anapan criital cjeeča. Ana werj cherz pecaquiča. ²⁶Jaknužt Noež kamta timpuquiz watčhaja, jalla nižtazakaz wataquiča ima weriž tjonan. Wejrqui tsewctan cuchanžquita Yooz žoñiča. ²⁷Noež timpuquiz jalla tuž kamničača žoñinacaqui. Zuma čheri lujlñitača, nižaza licničača. Nižaza zalñitača, nižaza zalzjapa tjaañitača. Jalla nuž žoñinacaqui kamchiča asta Noež pajk warcu kjuyquiz luzcama. Yooz kamañquiz kamzqui ana importayñitača. Jalla nekztanaqui kjaz juyzuqui tjonchicha. Jalla nii juyzuquiziqui tjappacha anawali kamni žoñinacaqui ticziča. ²⁸Nižaza jaknužt Lot cjita žoñž timpuquiziqui watčhaja, jalla nižtazakaz wataquiča ima weriž tjonan. Lujlñitača, licničača, kjayñitača, tuyñitača, čhjacničača, y nižaza kjuya kjuyñitača. Yooz kamañquiz kamzqui ana importayñitača.

²⁹Jalla Lotž Sodoma cjita wajtquiztan ulantan, tiripintit uj azupri chijni tjonchicha. Nuž chijintiquiztan tjappacha ujžcu ticziča. ³⁰Wejt tjonz tjuñquiziqui niža iratazakaz wataquiča. Wejrqui tsewctan cuchanžquita Yooz žoñiča.

³¹Nii wejt tjonz tjuñquiziqui jakziltat kjuy zawncu želačhaja, anaž kjuy cusasanaca aptiñi luz waquiziča. Nižaza jakziltat joch yokquin želačhaja, anaž wajt kjuya cuttis waquiziča. ³²Lotž tjuna puntuquiztan cjuñzna. ³³Jakziltat persun kamañquiztan ana jaytačhaja, jalla nižtazakaz anaž arajpachquin kamaquiča. Nižaza jakziltat persun kamañ wira jaytičhaja, jalla nižtazakaz arajpachquin wiñaya kamaquiča.

³⁴Nižaza wejrqui cjiwča. Weriž tjonan nii arama pucultan tsjii kjuyquiz tjajaquiča. Jalla nuž tjajan, tsjiiqui arajpach kjutni waytižcu chjichtaž cjequiča, tsjiižti pachpiziqui nii kjuyquiz ectaž cjequiča. ³⁵Nižaza pucultan maatakanaca chica jawuncan, tsjaaqui arajpach kjutni waytižcu chjichtaž cjequiča. Tsjaazuñti pachpiziqui ectaž cjequiča. ³⁶Nižaza pucultan luctakanaca joch yokquin želan, tsjiiqui arajpach kjutni waytižcu chjichtaž cjequiča, tsjiižtižti nii joch yokquinpacha ectaž cjequiča.

³⁷Jalla niža tjaajinta takunaca nonžcu, niž tjaajinta žoñinacaqui pewcziča, tuž cjican:

—Wejt jiliri, ¿jakziquin tižtanaca wataquiya?

Jalla nekztanaqui Jesusaqui kjaaziča, tuž cjican:

—Jakziquin ticzi janchi žejlčhaja, jalla nicju cunturinacaqui muzpa ajcsničha. Jalla nižta irata jakziquin ana wali paañinacaqui žejlčhaja, jalla nicju ana walinaca wataquičha.

18

ŽEW ŽONATAN JUEZ JILIRŽTAN QUINTU

¹Nekztanaqui Jesusaqui tjaajinchičha, žoñinacžlaqui Yoozquin mayizizpančha, ana upa kuzcan, jalla nuž tjaajinchičha. ²Tjaajincan jalla tuž quint'ichičha:

—Tsjii juez jiliri tsjii wajtquiz želatčha. Yooz ana rispitiñitačha, nižaza ana čhjul žoñimi rispitiñitačha. ³Nii wajtquizpacha želatčha tsjaa žew maatak žon. Tsjii nooj naa žonqui juez jiliržquin ojkciničha, tsjii quija quijsquizjapa, nižaza naaža quinrižtan naa zumpacha azquichajo. ⁴⁻⁵Ažkapan juez jiliriqui ana naaža quija nonz pecchičha. Niiž wiruñ nižtami pinsičičha, tuž cjican: “Taa žew žonqui tirapanikal quijžtan wejr molističha. Yoozmi žoñimi wejtta anaž importičha. Jalla nuž cjenami taaža quija nonznačha, wejtquiz ana tira molistajo tii quijžtan. Wejrqui ana azquichačhaj niiqui, naaž tjontjonanaqui wejt žawjwat zjijcnačhani”.

⁶⁻⁷Nekztanaqui Jesús Jiliriqui cjichičha:

—Jalla nuž čhičičha nii anawal juez jiliriqui. Nižaza Yooz Ejpqui niiž illzta žoñinacž quijanaca azquichaquičha. Ninacaqui majiñami weenami Yoozquinkaz mayizičha. Ninacž mayizitiqiztan Yoozqui ana enenžcu ninacž quintranaca azquichaquičha. ⁸Wejrqui cjiwčha, tsjii noojiqui Yooz Ejpqui niiž illztanacž quija apuraž atintaquičha. Yooziž tsewctan cuchanžquita Žoñi tjontan, Yoozqui ultimupan niiž illztamiž quija azquichaquičha. Nii tjonz tjuñquiziqui, žtii yokquiz žejlñi žoñinacaqui Yoozquin kuzziz želasaya?

YOOZQUIN MAYIZIZ PUNTU

⁹Tsjii žoñinacaqui želatčha, persun honora waytican, nižaza parti žoñinaca iñarcan. Jalla nii žoñinacžquiz tii quintu quint'ichičha Jesusaqui, tuž cjican:

¹⁰—Pucultan žoñinacaqui timpluquin ojkciničha, Yoozquin mayiza. Tsjiiqui fariseo partiquiztantäčha. Tsjiižuñqui impuesto cobriñi žoñitačha. ¹¹Fariseo žoñiqui tsijtchi mayiziñitačha, tuž cjican: “Yooz Tata, amquiz sparaquiž cjiwčha. Wejrqui anačha nii yekja žoñinaca iratitqui. Ninacačha tjañinacaqui, nižaza ninacačha ñejonacaqui, nižaza ninacačha adulteriuquiz ojklajñinacaqui. Nižaza wejrqui anačha tii impuesto cobriñi iratitqui.

¹²Wejrqui pizc wilta simanquiz ayunasiñčha. Nižaza tjapa weriž cantiquiztan tsjii tunca parti tjajiničha”. ¹³Jalla nii impuesto cobriñi žoñizti wirquin acha colzi želatčha. Ana tsewcchuc cherzipanž želatčha. Jalla nuž persun ujchiz cjen persun tuzi čhajccan želatčha. Nižaza cjichičha: “Yooz Tatay, wejr ujchizpantčha. Wejr okznalla”. ¹⁴Jaziqui ančhucaquiz cjiwčha. Nii impuesto cobriñi žoñiqui Yooz Epiž yujcquiziqui niiž ujquiztan liwriitačha. Niiž kjuya pertunta ojkciničha. Nii fariseo žoñizti Yooz Epiž yujcquiziqui tira ujchizpantäčha. Ana pertunta cjissičha. Persun honora waytiñi žoñinacaqui ultimquiziqui azipanž cjesačha. Nižaza ultimquiziqui humilde kuzziz žoñinacazti honorchiz cjiskattaž cjequičha.

OCJALANACŽ KUZ PUNTU

¹⁵Tsjii nooj žoñinacaqui Jesusižquin ocjalanaca zjijcchičha, kjaržtan lanznajo. Nuž zjijcan, Jesusiž tjaajinta žoñinacaqui ocjala zjijcni žoñinaca užičha. ¹⁶Nuž nonžcuqui Jesusaqui kjawzičha, tuž cjican:

—Ocjalanaca wejtquin tjonaj cjee, ana čhižina. Tii ocjalanacž kuz irata jalla nižta kuzzizca Yooz Epiž mantita kamañchiz žoñinacaqui. ¹⁷Tii razunazakal chiyučha. Ana tii ocjalanacž kuz irata Yoozquin kuzzizalaj niiqui, ana Yooz Ejpž arajpach watja luzasačha.

LIWRIITA CJIS PUNTU

¹⁸Wiruñiqui tsjii jiliriqui Jesusižquiz pewczičha, tuž cjican:

—Tjaajini Maestro, zumačha amqui. Arajpach wajtquin wiñaya kamzjapa, žchjulul paasaya?

¹⁹Nekztanaqui Jesusaqui kjaazičha, tuž cjican:

—¿Kjažtiquiztan amqui wejtquiz “zumačham” cjeejo? Anaž jecmi zumaqui, Yooz-pankazza zumaqui. ²⁰ Amqui Yooz mantitanaca zizza: “Anača adulteriuquiz ojklazyqui. Anača žoñimi conzqui. Anača tjañi cjisqui. Anača toscarami chiizqui. Am maa ejpča rispitzqui”.

²¹ Nekztanaqui nii jiliri qui cjichiča:

—Wejrqui koltallquiztanpacha tjapa nii lii jaru cumpliñča.

²² Jalla nuž nii žoñiž chiita nonžcu, Jesusaqui cjichiča:

—Tsjillakaz pjaltiča amtaqui. Tjappacha am čhjultak cusasanaca tuysna. Nekztan porinacžquiz nii paaz ona. Jalla nuž onanžcuqui tsewcta arajpachquin juc'ant ricachum cjequiča. Jaziqui nekztan wejtan chica ojklayñi cjesača.

²³ Nii orauqui walja ricachutača nii žoñiqui. Jalla nuž Jesusiž chiitiquiztan nonžcu, walja llactaziča. ²⁴ Nii žoñi llaquita cheržcu, Jesusaqui cjichiča:

—Ricahunacžtaqui walja ch'amača Yooz kamañ jiczquiz luzqui, Yooz mantita kamañquiz cjisjapaqui. ²⁵ Tsjii camello cjita pajk animalaqui ch'aman acuj cjuñquiz luzasača. Ricahunacžtaqui tsjan ch'amača Yooz jiczquiz luzqui, Yooz mantita kamañquiz cjisjapaqui.

²⁶ Jalla nii nonžcu, nonžni žoñinacaqui cjichiča:

—¿Jequit liwriita cjesajo?

²⁷ Nekztanaqui Jesusaqui cjichiča:

—Žoñiqui anaž persunpacha liwrii atasacha. Yoozpankazza liwriñiqui. Yoozqui jecmi liwrii atasacha.

²⁸ Nekztanaqui Pedruqui cjichiča:

—Wejt jiliri, wejrnaqui tjappacha ecchinča, amtan chica ojklazyjapa.

²⁹ Jalla nekztanaqui Jesusaqui kjaaziča, tuž cjican:

—Weraral chiyuča. Jakzilta žoñimi kjuya, maa ejp, jilanaca, cullaquinaca, tjun, maatinaca, jalla ninaca ecčhaj niiqui, Yooz mantita kamañquiz ojklazyjapa, ³⁰ tii muntuquiz žejlcan juc'anti tjaataž cjequiča. Y nižaza arajpachquin ojžcu, Yooztan wiñaya cuntintu kamaquiča.

JESUSAQUI NIIŽ PERSUN TICZ ORA MAZZIČHA

³¹ Nekztanaqui Jesusaqui niiz tuncapan tjaajintanaca tsjii latu kjawziča, tuž cjican:

—Jaziqui Jerusalén watjaž ojkla. Wejrqui tsewctan cuchanžquita Yooz Žoñiča. Tuquitanpacha Yooz taku paljayñi profetanacaqui wejt puntuquiztan mazincan cjiirchiča. Jalla nii Jerusalén wajtquin ninacž mazinta taku tjappacha cumplisnaquiča. ³² Yekja wajtchiz žoñinacžquiz intirjital cjeeča. Nižaza ancha iñartal cjeeča; arartal cjeeča. Nižaza llawzižtan tjujtal cjeeča. ³³ Nižaza wjajtal cjeeča. Nekztanaqui contal cjeeča. Pero ticžcuqui čhjep majquiztan jacatatača.

³⁴ Jalla nii tjaajinta žoñinacaqui Jesusiž chiita ana zinta intintazatča, čjul puntuquiztan chiichaja, jalla nii. Nii takuqui ana intintichuc takužtakaztača.

ZUR ŽOÑI ČHJETINTA

³⁵ Jalla nekztanaqui Jesusaqui Jericó cjita wajt žcati irantatča. Jalla nuž irantan tsjii zur žoñi jicz latuquiz julzi želatča, niiqui kjaraž chjinchjinatča onajo. ³⁶ Walja žoñinaca watwatñi nonžcu, zur žoñiqui pewzčiča, tuž cjican:

—¿Kjažtiquiztan tama tama žoñinaca watwat?

³⁷ Nekztanaqui žoñinaca kjaaziča, tuž cjican:

—Jesusa, nii Nazaret wajtchiz žoñiqui watča tii jiczquiz.

³⁸ Jalla nii zizcu, zur žoñiqui altu joržtan kjawchiča, tuž cjican:

—¡Jesusa, Davidž maati, wejr okznalla! Ana wali želuča.

³⁹ Nii Jesusiž tuqui ojknī žoñinacaqui nii zur žoñi ujziča, ch'uj želajo. Zur žoñizti juc'anti altu joržtan kjawchiča, tuž cjican:

—¡Davidž majch, wejr okznalla!

⁴⁰ Nekztanaqui altu joržtan chiiñi nonžcu, Jesusaqui tsijtsiċha. Zur žoñi zjijqui cuchanchiċha. Zur žoñi žcatžinžcu Jesusaqui pewcziċha, tuž cjican:

⁴¹ — ĶĊhjulut amta wejr paaquiya?

Nii zur žoñiqui kjaaziċha, tuž cjican:

— ĶWejt Jiliri, ċhjujquiz cjetžinalla!

⁴² Nekztanaqui Jesusaqui cjichiċha:

— Am ċhjujquicui cjetžtaj cjisla. Amiž tjapa kuz criitiquiztanaqui, ċhjetintamċha.

⁴³ Nii orapacha zur žoñiqui cherni ċjissiċha. Nekztanaqui Jesusižtan chica ojklayatċha, Yoozquin honora waytican. Jalla nižta paata cheržcu, tjapa žoñinacaqui Yoozquin honora waytichizakazza.

19

JESUSIŽTAN ZAQUEOŽTAN

¹ Jalla nekztanaqui Jerusalén wajt kjutñi ojkcán Jesusaqui Jericó cjita watja luzziċha; nekztan nii wajt taypiguiz watċhiċha.

² Nicju tsjii ricach žoñi želatċha Zaqueo cjita. Nii žoñiqui impuesto cobriñiž jiliritaċha, anċa ricachutaċha. ³ Nižaza nii žoñiqui Jesusa pajz pecatċha. Kolta žoñitaċha. Jalla nižtiguiztan wacċhi žoñinacž taypiguiz cjen, Jesusižquin anataċha cherċuċa. ⁴ Nekztan Zaqueoqui tucquin žajtžcu tsjii sicómoro cjita munti yawċhiċha, Jesusa cherzjapa. Nii munti, jicž latuquiz želatċha, Jesusiž watz žcatipan. ⁵ Nii munti nuž watcan, Jesusaqui tsewċċuc cherziċha. Nuž cheržcu cjichiċha:

— Zaqueo, apura ċhjiwžwċa. Tonj tjuñi am kjuyquiz kamstanċha.

⁶ Jalla nuž ċhiitiguiztan Zaqueoqui apura ċhjiwžwċhiċha. Anċa cuntintu Jesusa risiwċhiċha. ⁷ Jalla nii cheržcu, tjappacha nii žoñinacaqui Jesusiž quintra ċuchċhiċha, tuž cjican:

— Jesusaqui nii ujċiz žoñž kjuya kami ojċċha.

⁸ Jalla nekztanaqui Zaqueoqui tsijtscu, Jesusa Jiliržquiz cjichiċha:

— Wejt Jiliri, tii zizza. Porinacžquiz tjaa-aċha ċhicata wejt cusasa žejlñinaca. Nižaza jakzilta žoñžquiztan wejr incalltuċhaja, jalla nii žoñžquiz wejr tjepnaċha pajkpic wiltiguiztan juċ'anti.

⁹ Nekztanaqui Jesusaqui cjichiċha:

— Tonj tjuñi tii kjuychiz žoñinacaqui liwriitaċha, Yooz kamañquiz luzjapa. Tii žoñiqui Abraham cjita majċhmaatiguiztanpacha tjonñiċha. ¹⁰ Wejrqui tsewċtan ċuchanžquita Yooz žoñtċha. Wejrqui tii muntuquiz tjonċinċha, ujċiz žoñinaca kjawwžñi, nižaza ninaca liwrii.

PIYUNANACŽQUIZ PAAZ INTIRJITA QUINTU

¹¹ Jerusalén wajtž žcati želan, žejlñi žoñinacaqui pinsiċhiċha, tuž cjican: “Anzilla Yooz mantiz tjuñiqui tjonaċhani”. Jalla nuž pinsitiguiztan, nižaza nii žejlñi žoñinaca nižž ċhiita taku nonznan, Jesusaqui tii quintu paljayċhiċha, ¹² tuž cjican:

— Tsjii žoñi želatċha rispitta familliquiztan. Nii žoñiqui ažkquin yekja wajtquin ojċċhiċha, ċhawc jilir nombramiento tanzjapa. Nuž tanžcu quejpžcaquiċha. ¹³ Ima ojkcán, nii žoñiqui tunca nižž piyunanaca kjawziċha. Kjawžcu zapa maynižquiz tsjii pajk valorċiz paaz intirjiċhiċha. Nižaza ninacžquiz cjichiċha: “Tii paaztan negociož paaquiċha, wejt quejpsquizcama”. ¹⁴ Nii žoñž persun wajtċiz žoñinacaqui nii walja ċhjaawjkatċhiċha. Jalla nižtiguiztan nižž wirquin tsjii cumizuna mantichiċha, tuž cjeajo: “Tii žoñi anaž pecċha uċċum ċhawc jiliri ċjisjapa”. ¹⁵ Nižtami ċhawc jiliri nombritataċha. Nekztan nižž yoka quejċhiċha, mantizjapa. Niiž irantižcuqui, kjawwžñi ċuchanchiċha nižž paaz intirjita žoñinacžquin, jaknužt zapa mayni paaztan canċhaja, jalla nii zizjapa. ¹⁶ Primir piyunaqui prisintichiċha, tuž cjican: “Wejt patruna, am paaztan canċinċha tunca wiltan wiltan juċ'anti”. ¹⁷ Nii ċhawc jiliri qui nii piyunž honora paljayċhiċha, tuž cjican: “Anċa waliċha. Zuma piyunamċha amqui. Nii žkoluc paaztan zumpacha trabajċamċha. Jazi qui amqui jilirim cjequiċha, tunca watja mantiñim cjequiċha”. ¹⁸ Tsjii piyunazti prisintichizakazza,

tuž cjan: “Wejt patruna, am paaztan canchinča pjijska wiltan wiltan juc'anti”. ¹⁹Nii chawc jiliriqui paljaychiča, tuž cjan: “Jaziqui jilirim cjequiča. Pjijska wajtquiztan mantiñim cjequiča”. ²⁰Nekztanaqui tsjii piyunazti prisintichizakazza, tuž cjan: “Wejt patruna, tiž am paazqui. Tsjii pañquiz žcucžcu chjojchinča. ²¹Amqui walja cumpliskatñi patronamča. Jalla niziqtuiztan am eksinča. Ricujñamča ana amiž nonztaqui. Nižaza ajzñamča ana amiž čhjactaqui”. ²²Nekztanaqui nii chawc jiliriqui chiižinchiča, tuž cjan: “Ana zum piyunamča amqui. Am persun chiita takuqui am uj tjeeža. Amqui zizzamča, wejrqui kjanapanžlani cumpliskatiñ žoñtni, jalla nii. Ana weriž nonztaqui ricujiñchalani. Ana weriž čhjactaqui ajzniñchalani. ²³Nižtiqtuiztanaqui, žkjažtiqtuiztanam amqui wejt paaz ana bancuquiz majcžinjo? Bancuquiz majcžintiquiztan wejrqui paaz machtanpacha ricujtasacha, tekz quejpžcu”. ²⁴Nekztanaqui nii patron jiliriqui parti žoñinacžquiz mantichiča, tuž cjan: “Intirjita paaz kjažzna. Nii tunca paazžiz žoñžquiz tjaa”. ²⁵Žoñinacaqui cjichiča: “¡Wejt Jiliri! Tunca paazžizza nii žoñiui”. ²⁶Patron jiliriqui kjaaziča, tuž cjan: “Ančhucaquiz tii razunal cjiwča. Jakzilta žoñit niiž wacchi tjaata cusasa zuma cwitača, jalla niižquiz juc'anti tjaata cjequiča. Nižaza jakzilta žoñit niiž koloculla tjaata cusasa ana zuma cwitačhaja, jalla niižquiztan asta nii zkolocullami kjañtaž cjequiča”. ²⁷Nižaza nii jiliriqui mantichiča, tuž cjan: “Nii wejt quintra žoñinacaqui ana wejr pecchiča ninacž chawc jiliri cjisjapa. Jaziqui zjijczna ticju. ¡Zjijcžcu wejt yujcquiz conzna!” Jalla nuž mantichiča nii jiliriqui.

JESUSAQUI JERUSALENQUIN LUZZIČHA

²⁸Jalla nuž quint'ižcu, Jesusaqui Jerusalén watja tira ojkičiča. ²⁹Betfagé cjita nižaza Betania cjita watjanaca žcatžincan, nižaza Olivos cjita curulla žcati želan, jalla nekztan pucultan niiž tjaajinta žoñinaca cuchanchiča, ³⁰tuž cjan:

—Nii nawjka watja oka. Jalla nicju ančhucqui mokta aznu wačhaquiča. Anaž jecmi nii aznuqui yawchi. Jalla nekztanaqui moktiqtuiztan jweržcu, tekz zjijca. ³¹Jalla nuž jweržcu zjijcawc cjen cunamit žoñimiž pewcznačan, “žKjažtiqtuiztan tii aznu jwerjo?” cjicanaqui. Jalla nii puntu pewcziqtuiztan ančhucqui kjaaznaquiča, tuž cjan: “Jesusa Jiliriz tii aznu pecča”.

³²Nekztanaqui nii pucultan tjaajintanacaqui ojkičiča. Jaknužt Jesusa chiičhaja, jalla nuž cjitacama watchiča. Jalla nuž tsjii mokta aznu watchiča. ³³Jalla nuž jweran, nii aznuž tuyñunacaqui pewcziča, tuž cjan:

—žKjažtiqtuiztan nii aznu jwer ančhucjo?

³⁴Tjaajintanacaqui kjaaziča, tuž cjan:

—Jesusa Jiliriqui tii aznuž pecča.

³⁵Nekztanaqui Jesusižquiz chjitchiča. Nekztan zquitinaca jepžcu ninacaqui Jesusižquiz yawkatchiča. ³⁶Nii aznuquiz Jesusaž jicžquiz okan, žoñinacaqui zquiti chjinchiča, zquitinac juntun okajo chawc jiliriztakaz. ³⁷Olivos cjita curulla watan, Jerusalén watja tjenziča. Jalla nekztanaqui tjapa niiž tjaajinta žoñinacaqui altu joržtan Yooz honora wayti kallantichiča. Chipchipcan Yooz honora waytichiča, tjapa Jesusiž paata milajrunaca cherchiz cjen. ³⁸Nižaza cjichiča:

—¡Chawc Jiliri! ¡Yooz tjuuquiz tjonchi jiliri! ¡Honorchiz cjila! ¡Arajpacha žejlñinaca cuntintuž cje! ¡Arajpach Yoozquin wali honorchiz cjila!

³⁹Jalla nuž Jesusižquiz honora waytituiztan tsjii žejlñi fariseo žoñinacaqui paljaychiča, tuž cjan:

—Tjaajiñi Maestro, tii am apžni žoñinaca ujzna ch'uj želajo.

⁴⁰Nekztan Jesusaqui kjaaziča, tuž cjan:

—Ančhucaquiz cjiwča, tii žoñinacž ch'uj cjisnaquila niiqui, tii maznacamiž altu joržtan chiyasacha, wejt honora waytizjapa.

⁴¹Jerusalén watja žcatžincan, jalla nii watja cheržcu, Jesusaqui nii wajtchiz žoñinacž cjen kaachiča, ⁴²tuž cjan:

—Jerusalén wajtchiz žoñinaca, tonj tjuñquiziqui wejt puntuquiztan intintaztasaz niiqui, zuma cuntintuž cjitasača. Walipankaz kamtasacha. Ančuca kuznaca jeejskatz pecuča. Pero wejt puntuquiztan ančucaquiztan čhjojžtača. Jaziqui ančhucui Yooz zumanaca anaž cherasača. ⁴³Wejt puntu ana intintazziž cjen walja anawali tjuñinacaž tjonaquiča. Nii tjuñinacuziqui ančuca quintra žoñinacaqui tii wajtž tjuya tsjii pirka quintra paaquiča. Tjapa kjuttanž ančuca wajt muytata quintrarionacaqui želaquiča. ⁴⁴Nižaza ančuca wajt pirkami k'ala pajltaž cjequiča. Tii wajtchiz žoñinaca ocjalanacžtanpacha contaž cjequiča. Nižaza tjappacha k'ala pampa nonžtaž cjequiča, anaž maz tawkitami želaquiča. Yoozqui anchucaquiz tsjii liwriiñi cuchanžquichiča; ančhuczi tii liwriiñiqui ana pajchinčhucča. Jalla nižtiquiztan tii wataquiča. —Jalla nuž cjichiča Jesusaqui.

JESUSAQUI TIMPLU PEWZIČHA

⁴⁵Jerusalén watja irantižcu, Jesusaqui timpluquiz luzziča. Timpluquiztan zawncchuc liwj tuyñinacami kjayñinacami tjirkatchiča. ⁴⁶Ninacžquiz cjichiča:

—Cjijrta Yooz takuqi tuž cjiča: “Wejt kjuyaqui Yoozquin mayiziz kjuyača”. Ančhuczi tii wejt kjuya tjañi žoñinacž kjuyažtakaz paachinčhucča.

⁴⁷Jalla nekztanaqui zapuru Jesusaqui tjajnatča timpluquiz. Pero timplu jilirinacami lii tjajjiñi maestruncami wajt jilirinacami, jalla ninacazti jaknužt Jesusa coni atas, jalla nii kaznatča. ⁴⁸Pero tjappacha nii wajtchiz žoñinacaqui Jesusiž taku nonžjapa kuz tjaatča. Jalla nižtiquiztan ana jaknužquiztanami nii conz puntuqui asiptiskatz atatča.

20

¿JECT JESUSIZQUIŽ MANTICHI?

¹Zapuru Jesusaqui timpluquiz žoñinacžquiz tjajnatča, y nižaza liwriiñi Yooz taku paljayatča. Jalla nuž tjajnan, tsjii nooj timplu jilirinaca, lii tjajjiñi jilirinaca, wajt jilirinaca, jalla ninacaqui Jesusižquiz macjatčiča. ²Nuž macjatžcu Jesusižquiz paljayčiča:

—Jaziqui am chiyauiča. ¿Jec am mantichi tii paazjapajo? Nižaza ¿jec jilirit am utchi jilirižtakaz cjisjapajo?

³Nekztanaqui Jesusaqui kjaaziča, tuž cjan:

—Wejrmi jazic ančucaquiz zakal pewcznača. ⁴¿Ject Juan mantižquichi bautisjapajo? ¿Yoozkaya uz žoñinaca, ja? Kjaazna.

⁵Jalla nuž chiitiquiztanaqui ninacpora ch'aasi kallantichiča, tuž cjan:

—¿Jaknužum cjeeqi? “Yooz mantitača” cjan učum kjaaznaquič niiqui, “¿Kjažtiquiztan ančhuc nii Juan ana criichinčhuctajo?” jalla nuž cječhan tiicni. ⁶“Žoñiž mantitacha Juanqui” cjan učum kjaaznaquič niiqui, tjapa žoñinacaqui učum conačhani maztan čhjajawi. Tii žoñinacaqui Juanž puntuquiztan cjiñiča, niiqui werarapanča Yooz taku paljayñi profetaqui, jalla nii.

⁷Nuž palt'ižcu nii jilirinacaqui kjaaziča, tuž cjan:

—Wejrnacqui anal zizuča, jequit Juanqui bautisajo mantižquitčhaja, nii.

⁸Nekztanaqui Jesusaqui cjichiča:

—Nižaza wejrqui ana zakal maznasača, jec jiliriž mantita paa-učhaja wejrqui, nii.

ANA WAL PIYUNANACA QUINTU

⁹Nekztanaqui Jesusaqui žoñinacžquiz paljayi kallantichiča. Paljaycan tii quintu quint'ichiča, tuž cjan:

—Tsjii patrun žoñiqui uwasanac zkala čhjaczīča. Nekztan nii zkala partira tjaachiča piyunanacžquiz. Nekztanaqui ažkquin ojkičiča ažk tjuñi kami. ¹⁰Uwasa ajz cūjīča timpu tjontan patrunaqui piyuna cuchanžquichiča niž partir zkala ricujjapa. Nii pachpiquiz partira langžni žoñinacazti patrunaž cuchanžquita piyuna kijchcu chjatkatchiča. Ana čhjulchiz cuchanchiča. ¹¹Nekztanaqui patrunaqui wilta tsjiižtan piyuna cuchanžquichiča. Nekztan partir yokquiz kami žoñinacaqui patrunaž cuchanžquita piyuna ch'aanchiča, nižaza kijtchiča, nižaza ana čhjulchiz cuchanchiča

patrunžquin. ¹² Nekztanaqui patrunaqui tsjiižtan cuchanžquichiča. Nii partira žoñinacaqui cuchanžquita piyuna chjojritchiča, nižaza chjatkatchiča.

¹³ Nižtami nii yokchiz patrunaqui pinsichiča, tuž cjan: “¿Chjulut wejr paas? Wejt k'ayi majch cuchnača. Jalla nuž cheržcuqui nii partira žoñinacaqui rispitačhani”. ¹⁴ Pero partira zkala langžni žoñinacasti cuchanžquita majch cheržcu, ninacpora parlassiča, tuž cjan: “Tiiqui tjappacha tii irinsa tanznačhani. Jaziqui ticž conžla. Nekztan učhumž tii zkal yokac tanznaquiča”. ¹⁵ Nuž pinsitiquiztan partira langžni žoñinacaqui cuchanžquita majch yok tjija jwescu conchiča.

‘Jaziqui pewcznuča:

—Nii zkal yokchiz patrunaqui ¿chjulukat nii žoñinacžtanac paačhani? ¹⁶ Wejrqui cjiwča. Tjonžcu zkal yokchiz patrunaqui partira langžni žoñinaca conaquiča. Nekztanaqui patrunaqui niž zkal yoka yejkžquin tjaaznaquiča.

Jalla nuž nii quintu nonžcu, žoñinacaqui cjichiča:

—jYooz munañpaqui anaj nii cjila!

¹⁷ Jesusaqui ninacž kjutni cheržcu cjichiča:

—Wejt puntuquiztanaqui cjiirta Yooz takuqui tuž cjiča:

“Kjuy pirkiñinacaqui tsjii maz tjojtchiča. Nekztanaqui tjojtta mazqui isquinquiz cjis-siča. Ultimquiziqui tucquin cjis-siča”.

¹⁸ Nii maz cjen jakziltat ujquiz tjojtsnačhaja, jalla niiqui pirasužtakaz t'okuntaž cjequiča. Nižaza jakziltiž juntuñ nii mazqui tjojtsnaquiž niiqui, pulpužtakaz t'oknaquiča.

—Jalla nuž cjichiča Jesusaqui.

TASA PACZ PUNTU

¹⁹ Jesusaqui nii quintu chiyatča quintra žoñinacž puntu. Jalla nižtiquiztan timplu jilirinaca, nižaza lii tjaajiñi maestrinaca, jalla ninacaqui Jesusaqui tanz pecatča nii orapacha. Pero parti žejlñi žoñinaca ekscu, ana tani atchiča. ²⁰ Pero nii quintranacaqui Jesusižquiz tiraž awayt'atča. Nižaza tsjii kjažt awayt'ini žoñinaca mantichiča, Jesusižtan ojklajajo zuma žoñižtakaz. Nuž chica ojklajcan Jesusižquiztan ana zuma taku pecatča, uj tjojtunzjapa. Jalla nuž uj jwezanžcu nii wajt chawc jiliržquiz intirjiz pecatča. ²¹ Jalla nuž awayt'ican Jesusižquiz pewcziča tuž cjan:

—Tjaajiñi Maestro, zizuž wejrnacqui, am werarapan tjaajiñamča. Kjažtam parti žoñinacac chiyaj cjee, amqui werarapankaz chiiñamča Yooz kamañ puntuqui. ²² Jaziqui tjaajznalla tii puntuquiztan. Wejrnacqui César cjita chawc jiliržquiz tas paaz tjaayiñiča. ¿Jalla nuž tas paaz tjaazqui wali cjesaja, uz anaž wali cjesaj?

²³ Pero nuž pewcztiquiztan nonžcu Jesusaqui ninacž pizc kuzziz naychiča. Nekztanaqui cjichiča:

—¿Kjažtiquiztan ančhucqui chawc ujquin wejr tjojtskatz pecjo? ²⁴ Tsjii paaz zjijca, cherzjapa.

Paaz zjijcžcu, Jesusaqui cjichiča:

—¿Tii paazquiz jecž yujcta? ¿Nižaza tii paazquiz jecž tjuu cjiirata?

Ninacaqui kjaaziča:

—César cjita jilirž yujcča, niž tjuuzakazza.

²⁵ Nekztanaqui Jesusaqui ninacžquiz cjichiča:

—Chjulumi jiliržta cjenauqui jiliržquiz tjaa. Nižaza čhulumi Yoozta cjenauqui Yoozquiz tjaa.

²⁶ Anaž jecmi Jesusižquiztan ana wal taku jwesi atasacha nii žejlñi žoñinacž yujcquiz cjanpachaqui. Jalla nuž Jesusiž kjaaztiquiztanaqui ninacaqui ispantichiča; ch'uju cjis-siča.

ŽOÑINACA JACATATZ PUNTU

²⁷ Wiruñauqui tsjii kjažt saduceo cjita žoñinacaqui Jesusižtan zali ojkcichiča. Nii saduceo žoñinacaqui tjaajiñitača, ticzi žoñiqui anapan jacatatasacha, nuž cjiñitača. Jalla nii jacatatz puntuquiztan Jesusižquiz paljaychiča, ²⁸ tuž cjan:

—Tjaajiñi Maestro, Moisesaqui učumnacalta cjiirtkalča, tuž cjan: “Tsjii žoñi ticznasaž niiqui, niiz tjun ana ocjalchiz cjesaž niiqui, nekztan nii ticzi žoñž jilaqui naa žew žon tjunatan zals waquiziča, nii ticzi jilž cuntiquiztan ocjala paazjapa”.²⁹ Jaziqi pakallak jilazullca želatča. Jilir jilaqui zalsiča. Nekztan ticziča ana ocjalchiz.³⁰ Nekztanaqui tsjii taypir jilaqui žew žon tjunatan zalsizakazza. Nekztan ticzizakazza ana ocjalchiz.³¹ Nekztanaqui yekja taypir jilaqui žew žon tjunatan zalsizakazza. Niiz jaru niiz jaru naa tjunatan zalsiča tjapa nii pakallak jilazullcanacaqui. Nižaza tjappacha ticziča jilazullcanacaqui. Ana ocjala ecchipanča.³² Ultimquiziqui naa maatak žonqui ticzinča.³³ Jaziqi žoñinaca jacatattanaqui, žakzilta jilž tjunt cjequejo naa žonjo? Tjappacha nii pakallak jilazullcaqui naa žonatan zalsiča. —Jalla nuž pewcziča saduceo quintra žoñinacaqui.

³⁴Jalla nižta puntuquiztanaqui Jesusaqui kjaaziča, tuž cjan:

—Tii muntuquiz žejlcanaqui luctakami maatakami zalza; nižaza maatinaca zalsjapa tjaača.³⁵ Jakziltat Yoozquin kuzzizlaj niiqui ticziquiztan jacatatžcu, arajpach wajtquin želaquiča. Nicju žejlcan ana zalznaquiča. Nižaza anaž zalzmi želasača.³⁶ Arajpachquin žejlcan, žoñinacaqui anjilažtakaz cjequiča; ana ticznasača. Nižaza jalla nuž jacattiquiztanaqui Yooz žejtñi maatinacapanča.³⁷ Yooz tawk libruquiz tsjii ujsñi kal quinto žejlča. Nii quinto quint'ican Moiespachača učum zizkatchi, žoñinaca ticziquiztan jacatatrñi, jalla nii. Nii Yooz tawk libruquiz Moiesqui cjiirčiča, tuž cjan: “Yooz jiliriqi Abrahamž Yoozza. Nižaza Isaacž Yoozza. Nižaza Jacobuž Yoozza”.³⁸ Nii žoñinacž curpu ticziž cjenami, žejtča. Yoozqui anača ticzi žoñž Yoozqui. Niiča žejtñi žoñž Yoozqui. Tjapa Yoozquin kuzziz žoñinacaqui žejtchipan žejlča.

³⁹Jalla nekztanaqui tsjii kjaž lli tjaajiñi maestrunacaqui cjichiča:

—Zuma Tjaajiñi Maestro, walim chiichamča.

⁴⁰Jesusiž walja zizñi zizñi chiican quintra žoñinacaqui eksiča iya pewczjapaqui. Panž atiptatača ninacaqui.

JESUSAQUI TSJII PEWCZIČHA

⁴¹Nekztanaqui Jesusaqui cjichiča:

—Žoñinacaqui tuž cjiñiča: “Cristučha Davidž Majchqui”. ĺKjažtiquiztan nuž cjeejo?

⁴²⁻⁴³Davidpachača cjichi Salmos cjita libruquiz, tuž cjan:

“Yooz Ejppui wejt chawjc jiliržquiz cjichiča: ‘Am kjojch koztan am quintri žoñinaca t'oksnacha, jalla nii t'okscama wejt žew latuquiz julzi žela amqui’”.

⁴⁴Davidpachača Cristuž puntuquiztan “Wejt chawjc jiliriča” cjan chiichiča. Jalla nižtiquiztan, žaknužt Cristo chawjc jiliri cjanpacha Davidž majch cjesajo?

JUDIO LII TJAAJIÑI MAESTRUNACŽ PUNTU

⁴⁵Tjapa žoñinacaž nonznan, Jesusaqui niiz tjaajinta žoñinacžquiz paljaychiča, tuž cjan:

⁴⁶—Lii tjaajiñi maestruncžquiztan cwitaza. Ninacaqui tol zquitchiz ojklayz justasñiča, walja honorchiz cjisjapa. Nižaza palazquiz ojklaycan zuma rispitchiž tsaanskatž pecñiča. Nižaza ajcz kjuyquiz tucquin julz pecñiča. Nižaza pjijstiquiz lujlcan ancha tucquin julžcu honorchiz cjskaz pecñiča.⁴⁷ Nižaza ninacapacha žew maatakž cusasanaca tanzjapa, incallča. Žoñinaca incallzjapa Yooztan ažka ažka parlitažoka cjiñiča. Yoozquin tjapa kuzziz žoñinacažtakaz tjeez pecča. Jalla nižtiquiztan ninacaqui juc'ant tsjan anawaliž castictaž cjequiča.

OFRENDA PUNTU

¹Tsjii nooj timpluquiz žejlcan, Jesusaqui wali jiru ricach žoñinaca cherchiča ofrendajquiz paaz uchñi. ²Nižaza tsjaa poris žew maataka cherchiča. Naa žewqui pizc paazalla utchiñča. ³Jalla nii cheržcu Jesusaqui cjichiča:

—Tii razunal cjiw'cha. Taa poris žew žonqui ofrend cajquiz juc'ant jila utchiñ'cha, tjapa parti žoñinacžquiztan. ⁴Parti žoñinacaqui žejtchi paaz utchi'cha. Naa poris žewzti tjappacha naaža paaz utchiñ'cha; ana iya žejl'cha, čhjeri kjayzjapa.

JUDIŪŽ TIMPLU PUNTU

⁵Yekjap žoñinacaqui timplu puntuquiztan parlat'cha, nižaza nii timpluquiz žejl'ni č'achja maznac puntuquiztan parlat'cha, nižaza nii Yoozquiz ofrenda tjaata puntuquiztan parlat'cha. Jalla nuž nonžcu timplu puntuquiztan Jesusaqui chiichi'cha, tuž cjican:

⁶—Tsjii nooj tjapa tii timplu pajltaž cjequi'cha. Ana zinta tii maznaca pirkita želaqui'cha.

TII MUNTU TUCUZINZ PUNTUQUI

⁷Jalla nekztanaqui Jesusižquiz pewczi'cha, tuž cjican:

—Tjaajiñi Maestro, žčhjlorat tii amiž chiita wataquejo? Ima amiž chiita takunaca watan, žčhjulut siñalažtakaz cjequejo?

⁸Nekztanaqui Jesusaqui cjichi'cha:

—Ančhucqui persunpachquiz cwitaza, anača incallskata. Walja žoñinacaqui wejt tjuu aynakanž tjonaqui'cha, tuž cjican: “Wejrt'cha Cristutqui”. Nižaza “Wajillaž Cristuž tjonaqui'cha”. Nuž cjicanž ojklayaqui'cha. Jalla nuž chiyamani ančhucqui anača crya, nižaza anaž ninacžtan apznaqui'cha. ⁹Čhjlorat quira zalz quintumi nižaza kichas zalz quintumi želačhaj niiqui ančhucqui wiraž ana tsucaqui'cha. Nuž: watanami imaž tii muntu tucuzinzqui irjatžcaqui'cha. Jalla nižta ana walinacača primiraqui watstanqui.

¹⁰Jesusaqui tira paljaychi'cha, tuž cjican:

—Tsjii nacionžtan tsjii nacionžtan kichasaqui'cha nacionpora. Nacionanacquiztan quiranaca zalassaqui'cha. ¹¹Nižaza pajk terremotonacaž wataqui'cha, yokaž čhekinkatcan. Nižaza parti yokaran wali chawc mach'a želaqui'cha. Nižaza parti yokaran anawal cona želaqui'cha. Nižaza arajpachquin anawali ispantichucanacaž parizaqui'cha, pajk siñalažtakaz wataqui'cha.

¹²Pero ima tižtanaca watcan ančhucqui tantaž cjequi'cha, nižaza kijčhtaž cjequi'cha. Nižaza ajcz kjuyquin chjichtaž cjequi'cha uj jwesanzjapa. Nižaza carsilquiz chawctaž cjequi'cha. Nižaza wali chawc jilirž jujcquin chjichtaž cjequi'cha. Jalla nižtanacaž ančhucquiz wataqui'cha, ančhucquiz wejtquin kuzziz cjen. ¹³Jilirž jujcquiz chjichta cjen, ančhucqui wejt favoraž tjurt'auqui'cha. ¹⁴Ima jilirž jujcquiz tjurt'ican ančhucqui ančhucquiz kuzquiz ana tantiiz waquizi'cha, jaknužt tjurt'ačhaja, jalla nii. ¹⁵Tjurt'iñi čhiiz oraqui weril zizñi taku tjaajžcača ančhucquiz kuzquiz. Nii ančhucquiz zizñi taku čhiitiquiztan anaž jecmi ančhucquiz quindra kjaazñi atasacha. Inakaz cjisnaqui'cha. ¹⁶Ančhucqui tarasuntaž cjequi'cha. Maa ejp, jilanaca, famillanaca, mazinaca, jalla ninacžquiztanami tarasuntaž cjequi'cha ančhucqui. Nekztan yekjap ančhucquiztan contaž cjequi'cha. ¹⁷Nižaza wacchi tii muntuquiz kamñi žoñinacaqui ančhucquiz čhaawjkataqui'cha, weriž cjen. ¹⁸Jalla nuž cjenami anaž zinta ančhucquiz ach charami pertiskatta cjequi'cha. ¹⁹Nižaza sufrichiž cjenami jakziltat zumpacha Yoozquin tjurt'ichi cječhaja, Yooztan wiñaya cuntintu kamaqui'cha.

²⁰Jesusaqui cjichizakazza:

—Jerusalén watja zultatuž muyuntita cjen, ančhucqui naaznaqui'cha, ultimu nii watjauki t'ezintaž cjeekalaka, jalla nuž cjequi'cha ančhucqui. ²¹Jalla nuž naazcan, Judea yokquin žejl'ni žoñinacaqui cur kjutñi zajtcu atipz waquizi'cha. Nižaza Jerusalén wajtchiz žoñinacaqui wajtquiztan ulanz waquizi'cha. Nižaza joch yokquin žejl'ni žoñinacaqui ana wajtquin quejpsquiz waquizi'cha, atipz waquizi'cha. ²²Nii noojiqui Yoozqui Israel žoñinaca casticaqui'cha. Casticaz puntuquiztan tjapa Yooz tawk libruquiz cjiirtaqui cumplisnaqui'cha. ²³¡lc maatakanacajay! ¡Wawa t'ichiñi maatakanacajay! Ancha ana wali sufraqui'cha. ¡Tjapa tii yokquiz žejl'ni žoñinacajay! Ančaž llact'azaqui'cha, castictaž cjequi'cha. ²⁴Žoñinacaqui quirquiz ticziž cjequi'cha. Yekjap žoñinacacazti tanžcu chjichtaž cjequi'cha yekja nacionquin. Nižaza yekja wajtchiz žoñinacaqui tii wajtchiz žoñinaca mantaqui'cha, nii yekjanacž timpu tucuzinzcama, nižaza Yooz munañpa timpucama.

²⁵ Jalla nekztanaqui tjuñquizimi jiiquizimi warawarquizimi, jalla ninaczquiz siñalanaca wataquiča. Nižaza pajk kot ljojkiž kjawaquiča. Jalla nižtiquiztan tii yokquiz žejlñi žoñinacaqui walja tsucchi kuzziz cjequiča, nižaza turwayžinta kuzziz cjequiča. ²⁶ Arajpachquin žejlñi kjananacami čhjekinskattaž cjequiča. Jalla nii cheržcu žoñinacaqui pinsaquiča, tii muntu kjažt wataquejo, jalla nii. Tii muntu tucuzinz tjewznaquiča. Jalla nižta watan žoñinacaqui tsuscukaz tismayaquiča. ²⁷ Jalla nekztanaqui žoñinacaqui wejr, nii tsewtan cuchanžquita Yooz Zoñi, quejpžquiñi cheraquiča. Walja kjancan wejt azi tjeežcan tsjir taypiquiz tjonača. ²⁸ Jalla nižta anawalinaca wati kallantan, ančhucqui walja Yoozquin kuzziz cjee. Achamiž wayta, tsewcchucča chernza. Wajillaž ančuca ultim liwriiz tjuñi tjonaquiča.

²⁹ Nižaza Jesusaqui tii quintu quint'ichiča tuž cjican:

—Higo muntiquiztan naazna; čhjul muntimi naazna. ³⁰ Ančhucmi tsjii munti ch'ojñapachaž c'ajan tuž zizza, kjutunz timpu žcatžinča, jalla nii. ³¹ Jalla nižta irataž tii weriž chiitanaca watan, ančhucqui tuž zizaquiča, Yooz mantiz tjuñi žcatžinča, jalla nii.

³² Tii razunal cjiwča. Ima tjapa tii timpuquiz kamñi žoñinacaž ticznán, tjapa weriž chiitanaca wataquiča. ³³ Arajpachami yokami tucuzinzaquiča. Wejt takuzi anapanž tucuzinzaquiča, panž cumplisnaquiča.

³⁴ Ančhucqui persunpachquiz cwitaza. Ančhucqui anaž turpi kuzziz cjee. Ana wali kamz cjen, nižaza licz cjen, nižaza tii wir cusasanaczquiz kuz tjaaz cjen, jalla nuž cjen žoñinacaqui turpi kuzzizza. Ana zuma kaman Yooz tjonz tjuñi tiripintit ančhuc tanaquiča ³⁵ tsjii trapaqui tiripintitž tanža, jalla nižta irataž Yoozqui tii muntuquiz ana wali kamñi žoñinaca tiripintit tanaquiča, casticzjapa. ³⁶ Ančhuczi listu tjaczi tjewznñi cjee. Zapuru ančhucqui Yoozquiztan azziz cjisjapa mayiza, tjapa watñi anawalinacquiztan atipzjapa, nižaza tsewtan cuchanžquita Yooz Žoñž yujcquiz zuma prisintizjapa.

³⁷ Jalla nuž tjaajinchiča Jesusaqui. Majiñqui Jesusaqui timpluquiz tjaajnatča zapuru. Weenqui Olivos cjita curullquin želi okatča. ³⁸ Tjapa žoñinacaqui wentan timpluquiz tjonatča Jesusiž taku nonznñi.

22

JESUSA TANZ TANTIHA

¹ Jalla nekztanaqui ana liwaturchiz t'anta lujlz pijjsta irantižcatča. Nii pijjstaqui pascua cjitatača. ² Nii oraqui timplu jilirinacami lii tjaajini maestrinacami, “¿Jaknužt Jesusa conas?” cjican kazziča. Pero ninacaqui parti žoñinaca walja ekskú, ana coní atchiča.

³ Jalla nekztanaqui Satanás cjita zajraqui Judas kuzquiz luzziča. Judasqui Iscariote cjitazakaztača. Judasqui parti tuncapan illzta žoñinaczquiztan nekztantača. ⁴ Judasqui timplu chawc jilirinacztanami, timplu zultatž jilirinacztanami parli ojkcchiča. Ninacztan zalžcu, parličiča, jaknužt ninacz kjarquiz Jesusa intirjas, jalla nii. ⁵ Jalla nuž Judas parlitiquiztan quintra žoñinacaqui ancha cuntintutača. Paaz tjaaz compromitchiča. ⁶ Jalla nižtiquiztan Judasqui asiptichiča, “Way” cjican. Nekztanaqui tantiya kallantichiča, jaknužt ana tama žoñi želan Jesusa intirjas, jalla nii.

SANTA CENA PAACHIČHA

⁷ Jalla nekztanaqui ana liwaturchiz t'anta lujlz pijjstaqui irantižquichiča. Nii pijjistiquiz tsjii uuzi wilana conspantača, pascua pijjsta paazjapa. ⁸ Nekztanaqui Jesusaqui pucultan nižž tjaajintanaca cuchanchiča. Pedružtan Juanžtan ninacatača. Ima cuchancan ninaczquiz tuž cjichiča:

—Ančhucquiž oka, učhumnacaž pascua čhjeri lujlzjapa, tjaczca.

⁹ Nekztanaqui nii pucultan tjaajintanacaqui Jesusižquiz pewcziča, tuž cjican:

—¿Jakziquin wejrnacqui čhjeri tjacznaquiya?

¹⁰ Jesusaqui kjaaziča, tuž cjican:

—Ančhucqui watja luzcu, tsjii žoñžtan zalaquiča kjaz luuz kuzzi. Nii žoñž wirquiz apznaquiča, jakziquin luzačhaja, jalla nekz. ¹¹ Jalla nekz luzcu nii kjuychiz žoñžquiz paljayaquiča, tuž cjican: “Wejt Tjaajini cjiča: ¿Jakziquin visitz kjuya žejlya, wejt

tjaajintanacžtan pascu čhjeri lujlžapaya?”¹² Nekztanaqui tsewcta pisuquiz tsjii pajk kjuya tjeeznaquičha ančhucaquiz. Nii kjuya listu tjaczta cjequičha. Jalla nekz čhjeri lujlž tjacznaquičha.

¹³Jalla nekztanaqui nii pucultanaqui ojkchičha. Nekztan Jesusiž chiitacama watchičha. Jaziqui nekziqui pascu čhjeri kissičha.

¹⁴Pascu čhjeri lujlž ora cjen, Jesusaqui niiz illzta žoñinacžtan misquiz julzičha. ¹⁵Jalla nuž julžcu Jesusaqui ninacžquiz cjichičha:

—Wejrqui ančhucatan tii pascu pjijsa čhjeri lujlžjapa ancha pecchinpančha, ima ticzcan. ¹⁶Ančhucaquiz cjiwčha, ančhucatan ana iya tii pjijsa paačha, čhjuloracamat Yooz ultimu tjapa mantachaja, jalla nii oracama. Nekztan tii pjijsa wilta paa-čha.

¹⁷Jalla nekztanaqui Jesusaqui persun kjaržtan wasu tanzičha. Nekztan Yooz Ejpžquin sparaqiz cjichičha. Nekztanaqui niiz illztanacžquiz cjichičha:

—Tii wasu tanžna. Ančhuccama tojžcuqui liczna. ¹⁸Tekztan nawjkchuc wejrqui uwaz kjazqui anal iya licačha, čhjuloracamat Yooz tjapa mantachaja, niicama.

¹⁹Jalla nii licžcuqui, Jesusaqui persun kjaržtan t'anta tanzičha. Nekztan Yooz Ejpžquin sparaqiz cjichičha. Nekztanaqui t'anta kjolžcu niiz illztanacžquiz tjaachičha, tuž cjican:

—Tiičha wejt curpuž cuntaqui. Tii wejt curpuqui intirjitaž cjequičha ančhuca laycu. Nižaza wejr cjuñžcu, tii lujlžnaquičha.

²⁰Nekztan čhjeri lujlžcu, wasu tanzičha. Nekztan niiz tuqui chiita taku irata chiichizakazza, tuž cjican:

—Wejt ljocqui ančhuca laycu tjawktaž cjequičha. Wejt ljocžtan ew žejtz kamaña ut'aytaž cjequičha. Tii wazuquiztan liczqui wejt ljoc cuntiquiztančha.

²¹Wejt quintra tarasunñi žoñiqui wejtjan chicapachačha tii misquiz. ²²Wejrqui tsewctan cuchanžquita Yooz Žoñičha. Wejrqui Yooz Epiž munañpi jaru jalla nii kamañ jiczquiz okačha. Wejt quintra tarasunñi žoñžquizzti anawaliz cjisnaquičha.

²³Jalla nuž chiitiquiztan tjaajinta žoñinacaqui ninacpora pewcsassičha:

—¿Jequit wejrnacquiztan nii tarasunñi žoñi cjes? —Nuž cjican ninacpora pewcsassičha.

¿JEQUIT TUCQUIN CJEEQUI?

²⁴Jalla niiz wiruñnaqui nii tjaajintanacaqui ch'aassičha, ject tucquin naazi cjeequi, jalla nii. ²⁵Pero Jesusaqui ninacžquiz cjichičha:

—Chawc jilirinacaqui persun wajtchiz žoñinaca mantiñičha anawal patrunažtakaz. Nižaza nii jilirinacaqui mantita žoñinacžquiz jilirž honorakaz waytiskatčha, “walipan paačha tii jiliriqi”, cjican. ²⁶Ančhuczti anaž nižta paaz waquizičha. Antiz ančhucqui tižta paaz waquizičha. Jakziltat tsjan chawc jilirizlaj niiqui, tjowažtakaz cjis waquizičha. Nižaza jakziltat mantiñizlaj niiqui, piyunažtakaz cjis waquizičha. ²⁷¿Ject tucquin chekan žoñejo? ¿Misquiz julžni žoñej chekanaqui? Už ¿nii misquiz atintiñi žoñej, jaa? Tii razunal cjiwčha: Misquiz julžni žoñičha tucquin chekanaqui. Jalla nuž cjenami wejrqui ančhucaporquiz atintiñi žoñižtakazčha.

²⁸Ančhucqui wejtjan chica žejlchinčhucpančha wejtquiz anawali watanami. Wejtquiztan ana zarakchinčhucčha. ²⁹Jalla nižtiquiztan wejrqui ančhuc uchačha, mantiñi jilirinaca cjisjapa. Jaknužt wejt Yooz Ejpqui mantiñi jiliri cjisjapa wejr utčhaja, jalla nižta. ³⁰Jalla nuž cjen ančhucqui arajpach wajtquin wejtjan chica želaquičha, nižaza wejtjan chica lujlžnaquičha. Nižaza nekziqui wejtjan chica jilirž silquiz julžnaquičha tuncapan Israel t'akquiz žoninaca pjalžjapa.

SIMON PEDRUQUI JESUSA ANA PAJÑI CHIYAQUIČHA

³¹Nekztan Jesusaqui cjichičha:

—Simona, Simona, tiim zizaquičha amqui. Satanasqui am pecčha, niiz parti cjskatzjapa. Trigožtakaz layinz pecčha, ujquiz tjojtskatzjapa. ³²Simona, am laycu tjurt'izinchinčha ana juc'anti upa kuzziz cjejajo. Amqui Yoozquin tjapa kuztan quejpžcu am jilanaca yanapaquičha tjup kuzziz tjurt'ajo.

³³Nekztanaqui Simonaqui cjichičha:

—Wejt Jiliri, wejrqui listučha amtan chica ojkzjapa; carsilquizimi lusasača; nizaza amtan chicapachami ticsnasača.

³⁴Jalla nuž chiitiquiztanaqui Jesusaqui cjichiča:

—Pedro, amquiz chiyučha, ima wallpaž kjawan, amqui wejt puntuquiztan nicaquiča. Čhjep wilta wejr ana pajñim chiyaquiča.

JESUSIŽ CHIIŽINTA TAKUNACA

³⁵Jalla nekztanaqui Jesusaqui paljaychiča, tuž cjican:

—Tuquiqui wejrqui ančhuc cuchanchinča ana quelzziz, nižaza ana paazziz, nižaza ana yekjat čhjatchiz. Jalla nuž okan ĺančhucaquiz čhjulut pjaltichiya?

Nekztanaqui ninacaqui kjaaziča:

—Anaž čhjulumi pjaltichiča, —cjican.

³⁶Nekztanaqui Jesusaqui ninacžquiz cjichiča:

—Anziqui jakziltat quelzziz cječhaja, nii quelzqui chjicha. Nižaza jakziltat paazziz cječhaja, nii paazqui chjicha. Jakziltat ana armichiz žejlčhaja, persun chaquita tuyžla, arma kjayžjapa. ³⁷Ančhucaquiz chiyučha. Wejt puntuquiztanaqui Yooz takuqui tuž cjicha: “Castictaž cjequičha anawal žoñinacžtan chica”. Wejt persunquiz cumplistanča nii cjjirta Yooz takuqui. Nižaza tjapa cjjirta Yooz takuqui wejt puntuquiztan cumplistanča.

³⁸Jalla nekztanaqui ninacaqui cjichiča:

—Wejt Jiliri, tekzi pizc arma žejlča.

Jesusaqui kjaaziča:

—Nužquizka cjila, —cjican.

JESUSAQUI YOOZ EJPŽQUIN MAYIZIČIČHA

³⁹Jalla nekztanaqui Jesusaqui ulanchičha. Olivos cjita curullquin ojkchiča, jalla nicju ojkñipantača. Tjaajinta žoñinacaqui Jesusižquiz apziča. ⁴⁰Olivos cjita curulla irantizcu, Jesusaqui cjichiča:

—Yooz Ejpžquin mayiza ana ujquiz tjojtsjapa.

⁴¹Nekztanaqui Jesusaqui niiz tjaajintanacžquiztan žoñiž maz čhjacta, jalla nužullquin ojkchiča. Jalla nicju quillsičha Yooz Ejpžquin mayizizjapa. ⁴²Mayizican cjichiča:

—Yooz Tata, amqui munaquiz niiqui, wejr liwriyalla tii sufrisquiztan. Pero anal wejt kuzcama ojkz pecučha. Jaknuž am kuz munčhaja, jalla niicama ojkz pecučha.

⁴³Jalla nii oraqui arajpachquiztan tsjii Yooz Epiž cuchanžquita anjilaqui jecžquichiča, Jesusa azi tjaazjapa. ⁴⁴Jesusaqui jalla nuž ancha llact'azcan, tjapa aztan Yoozquin mayizatča. Jalla nuž mayizan ancha pjalni pjatzičha ljocžtakaz čhjujatča yok kjutñi.

⁴⁵Yoozquin mayiziz žeržcu, tsjitsičha Jesusaqui. Nekztanaqui niiz tjaajintanacžquiz quejpcchiča. Ninaca llaquizinpantiž tjabatča. Nuž cjen Jesusaqui tjañi zalchiča. ⁴⁶Jalla nekztanaqui Jesusaqui cjichiča:

—ĺAnčhucqui kjažtiquiztan tja-jjo? Žaazna, Yoozquin mayiza ana ujquiz tjojtsjapa.

JESUSA PRESO TANTA

⁴⁷Jesusaž ima parla žerznan, walja žoñinaca tjonchiča. Judas cjita žoñiqui tucquinpan tjonchiča. Judasqui nii tuncapan illta žoñinacž partiquiztantača. Nekztan Jesusižquin macjatchiča chjulzjapa. ⁴⁸Jesusaqui Judasquiz cjichiča:

—Judas, ĺwejr tsjii chjulžcum amqui tarazunaquiya? Wejrtča Yooz cuchanžquita žoñtqui.

⁴⁹Jesusižtan žejlñi žoñinacaqui jalla nižta cheržcu, pewcziča, tuž cjican:

—Wejt Jiliri, ĺcuchillu armižtan tjurt'aquiya?

⁵⁰Tsjii nii tjaajintanacžquiztan timplu jilirž piyuna čhjojritchiča, žew cjuñi chja-jtžinchiča. ⁵¹Pero Jesusaqui cjichiča:

—Nužquizkaz cjee. Armižtan ana iya tjurt'aquiča.

Nekztanaqui nii orapacha Jesusaqui nii piyunž cjuñi lanžcu čhjetinchiča. ⁵²Timplu chawc jilirinacami nižaza timplu zultatž jilirinacami, nižaza wajt jilirinacami, jalla ninacami Jesusa preso chjichi tjonchiča. Ninacžquiz paljaychiča Jesusaqui, tuž cjican:

—¿Kjažtiquiztan ančhucqui cuchillu armižtan, nižaza tuñžtan tjonchinčhucta, wejr tanzjapaya? ¿Wejrqui tjañ žoñtkaya? ⁵³ Zapuru timpluquiz kamchinča ančhucatan chica. Nii oraqui wejr ana kjaž cjichinčhucča. Pero anziča ančhucata tanz oraqui. Tii orakaz zumchiquiz kamñinacaqui mantasača.

PEDRUQUI JESUSA ANA PAJŃI CHIICHIČHA

⁵⁴ Jalla nektanaqui žoñinacaqui Jesusa preso tanchičha. Tanžcu timplu chawc jilirž kjuya chjitchičha. Pedruqui ažkquiztanalla apziča. ⁵⁵ Jalla nii jilirž kjuy patio taypiquiz tsjii uj luminaru taaziča. Žoñinacaqui uj muytata julzi želatča. Nižaza Pedruqui ninacžtan chica julzi želatča. ⁵⁶ Jalla nuž uj kjanquiz julzi želan, tsjaa piyun žonqui Pedro žejlŃi cherchinča. Nekztan naaqui cjichinča:

—Tii žoñiqui nii žoñžtan chica ojklajñitala, niž žtiic, ¿ana jaa?

⁵⁷ Pedruzti nuž cjitiquiztan nicchiča, tuž cjican:

—Cullaca, nii žoñi anal pajuča.

⁵⁸ Jalla niž wiruñpacha, tsjiizuñ Pedro cherchizakazza. Jalla nuž cheržcu, cjichiča:

—Amqui nii parti žoñimla.

Nekztanaqui Pedruqui kjaaziča; tuž cjican:

—Anapanča wejrqui.

⁵⁹ Tsjii orquiztanaqui yekja žoñiqui paljaychizakazza, tuž cjican:

—Ultim werara, tii žoñiqui nii žoñžtan chica ojklajñipantala. Tiiqui Galilea wajtchiz žoñizakazla.

⁶⁰ Jalla nektanaqui Pedruqui cjichiča:

—Jila, čjulukam nižta chiičhani, anal zizuča.

Jalla nuž chiyan nii orapachaqui tsjii wallpi jora kjawchiča. ⁶¹ Jalla nuž wallpi jora kjawan, Jesusaqui Pedruz kjutŃi kjutžcu cheržquichiča. Jalla nižtiquiztan Pedruqui, Jesús Jilirž tuqui chiita cjuñziča. Tuquiqui Jesusaqui cjichiča: “Ima wallpaž kjawan, amqui wejt puntuquiztan nicaquiča. Čhjep wilta wejr ana pajŃim chiyaquiča”. ⁶² Jalla nuž watžcu, Pedruqui ulanchičha. Nuž ulanžcu ancha kaachiča, Jesusa ana pajŃi chiižcu.

⁶³ Jesusa itžŃi žoñinacaqui walja iñarchičha. Nižaza Jesusa wjajtchiča. ⁶⁴ Nižaza Jesusiž čhjucqui chawcžinžcu yujcquiz kijtchiča, tuž cjican:

—¡Tantiyalla! ¿Ject am kijchjo?

⁶⁵ Nižaza niž quintra čjul anawalinacami chiičiča, nuž iñarchičha.

JESUSA JILIRINACŽ YUJCQUIZ CHJICHTA

⁶⁶ Tjuñiž tjewctanalla, tjapa judío jilirinacaqui juntassiča, wajt jilirinacami, timplu jilirinacami, lii tjaajiñinacami, jalla ninacami. Jalla nektanaqui Jesusa chawc parliz kjuya chjitchičha. Nicju ajczi jilirinacžquin apantichiča. Nekztan jilirinacaqui nižquiz pecunhiča, tuž cjican:

⁶⁷ —Jaziqui am chiya, ¿ampanim Cristumpanikaya?

Jesusaqui kjaaziča, tuž cjican:

—Wejrqui “jesalla” cjež niiqui, anaž wejr criyaquiž ančhucqui. ⁶⁸ Nižaza wejrqui ančhucacuzi pewcznaž niiqui, anaž wejr werara kjaazta cjeeča. Nižaza wejr anaž cujtznacučiča ⁶⁹ Wejrqui tsewctan cuchanžquita Yooz Žoñtča. Tekztanpacha wejrqui tjapa azziz Yooz Ejpž žew latuquiz julzi cjeeča. —Jalla nuž kjaaziča Jesusaqui.

⁷⁰ Jalla nektanaqui tjapa nii žejlŃi žoñinacaqui pecunhiča, tuž cjican:

—¿Am Yooz Majchimpanikaya?

Nekztan Jesusaqui kjaaziča, tuž cjican:

—Wejrpanča, ančhucuz pecunča, jalla nužupanča.

⁷¹ Jalla nektanaqui ninacaqui cjichiča:

—¿Čjul juc'antiž tisticu tumpasajo? Učhumpachala niž persun ata chiiñi nonztaqui, ana wali chiičiča, “Yooz Majchča wejrqui” cjican.

23

JESUSIŽTAN PILATO CJITA JILIRIŽTAN

¹Jalla nekztanaqui tjapa nii željñi jilirinacaqui tsijtsičha. Nekztanaqui Jesusa chjitchičha Pilato cjita jiliržquin. ²Jalla nicju uj tjojtñi kallantichičha, tuž cjican:

—Wejrnacqui tii žoñi wajtchinčha, tii wajtchiz žoñinacžquiz anawaliz aptjapcan zelatčha. Jalla nuž wajtchinčha. Tii žoñizakaz cjičha: “Učhumqui Romanž jilirž tasa ana tjaaz waquzičha” jalla nuž cjičha tiiqui. Nižaza cjičha, “Wejrtčha Yooz cuchanžquita Cristutqui”. Nuž cjican, cjičha, “Wejrtčha chawc jiliritqui”.

³Jalla nekztanaqui Pilato cjita jiliri qui tuž pewczičha:

—¿Judío wajtchiz žoñinacž chawc jilirim amya?

Nekztan Jesusaqui kjaazičha, tuž cjican:

—Jalla nužupančha, am nuž čiita, jalla nii.

⁴Nekztanaqui Pilatuqui timplu chawc jilirinacžquiz, nižaza željñi žoñinacžquiz cjičha:

—Anal tii žoñžquiz čhjul ujmi wačučha.

⁵Nii žoñinacazti ancha ujqiz tjojtskatz pecatčha. Jalla nižtiqiztan cjičha:

—Tii žoñiqui niž tjaajintižtan waljaž tjojktila tjapa Judea yokquin željñi žoñinacaqui. Primiraqui Galilea yokquinž nižta paatčha tiiqui. Jaziqui tekzi nižtazakaz paačha.

JESUSA HERODIŽQUIZ CHJICHTA

⁶Jalla nuž nonžcu, Pilatuqui pewczičha, tuž cjican:

—¿Tiiqui Galilea yokchiz žoñikaya?

⁷“Jesalla” cjican kjaaztan, Pilatuqui Herodes cjita Galilea chawc jiliržquin nii Jesusa cuchanchičha. Herodesqui Jerusalén wajtquiz želatčha nii ora. ⁸Jesusa cheržcuqui Herodesaqui ancha cuntintutačha. Walja niž puntuqiztan quintunaca nonchičha. Jalla nižtiqiztan ažkanaca Jesusižtan zalz pecatčha. Jesusa milajru paañi cherez pecatčha. ⁹Herodesaqui walja pewcñi kallantichičha. Pero Jesusazti ana kjaazñi željchičha. ¹⁰Jalla nicju zakaz timplu jilirinacami lii tjaajiñinacami chicapacha želatčha. Ninacaqui walja Jesusiž quintra čiichičha, uj tjojtunžjapa. ¹¹Herodesaqui zultatunacžtan Jesusa inarchičha. Burla paachičha. Zultatunacaqui Jesusižquiz chawc jilirž punchu tjutzičha. Jalla nekztanaqui Herodesaqui wilta Pilatužquin cuchanžquichičha. ¹²Nii oraqui Herodestan Pilatužtan amigo pajassitačha. Niiž tuquiqui quintratačha.

JESUSA PILATUŽQUIN CUCHANTA

¹³Jalla nekztanaqui Pilatuqui juntjapchičha timplu jilirinacami wajt jilirinacami, nižaza žoñinacami. ¹⁴Juntjapžcu, cjičha:

—Ančhucqui wejtzquiz tii žoñi zjijcchinčhucčha, tuž cjican: “Tii žoñiqui žoñinacaz aptjapñičha”. Nekztanaqui ančhuca yujcquiz tiižquiz pecunchinla. Jalla nuž pecuntiquiztan tii žoñž ujqui ana watchinpanla, anchucaž tii žoñžquiz uj tjojtuntiquiztanaqui.

¹⁵Herodesaqui nižazakaz ana čhjul ujmi watchičha. Jalla nižtiqiztan wilta wejtzquin cuchanžquitačha. Ziza ančhucqui, tii žoñiqui anapanž ticz waquzičha. ¹⁶Jaziqui cunkal casticačha, nekztanaqui cutsnačha.

¹⁷Nii pjijstiquiz cjenacqui Pilat jiliri qui cuzturumpichiztačha, tsjii pres žoñi liwrii cuts, jalla nii. Nii cuzturumpi paañitačha žoñinacž kuz wali cjisjapa. ¹⁸Jalla nuž Pilatuž čiitiquiztanaqui tjappacha nii žoñinacaqui kjawi kallantichičha, tuž cjican:

—¡Panž chjichla tiiqui! ¡Antiz Barrabás cutsla!

¹⁹Jalla nii Barrabasqui carsilquiz chawctatačha, nii wajtzquin jilirž quintra žoñinaca aptjapkalčha, y nižaza žoñiž contkalčha. Jalla nižtiqiztan carsilquiz chawctatačha.

²⁰Pilatuqui Jesusa cuts peccan žoñinacžquiz wilta paljaychičha. ²¹Nii žoñinacazti juc'anti altu joržtan kjawchičha, tuž cjican:

—¡Cruzquiz ch'awczna! ¡Cruzquiz ch'awczna!

²²Čhjep wiltiquiz Pilatuqui paljaychičha tuž cjican.

—Tii žoñi, ħċhjul anawali paachejo? ¡Wejrqui tii žoñž uj ana wachula! ¡Anaž ticz waquiziċha tiiqui! ¡Jaziqui cunkal castiċha, nekztanac cutsnaċha!

²³ Pero nii žoñinacazti juc'anti kjawċhiċha, “Cruzquiz ch'awczna” cjican. Timplu jilirinacami žoñinacami anċha kjawċhiċha, Pilatuž kuz atipsicama. ²⁴ Jalla nuž kjawtiqiztan Pilatuqui ninacž kuzcama paachiċha. Jesusa cruzquiz ch'awczajo mantichiċha. ²⁵ Nižaza Pilatuqui Barrabás cjita žoñi cutziċha žoñinacž kuzcama. Nii Barrabasqui carsilquiztaċha, jilirž quintra žoñinaca aptjaptiquiztan, nižaza žoñi contiquiztan. Pilatuqui Jesusa intirjichiċha nii žoñinacž kuzcama wali cjejjajo.

JESUSA CRUZQUIZ CH'AWCTA

²⁶ Jalla nekztanaqui zultatunacaqui Jesusa ħjitchiċha, cruzquiz ch'awczjapa. Jalla nuž ħjichan tsjii žoñi tanzċiċha cruza tjuzjapa. Nii žoñiqui Cirene wajtċhiztaċha, Simona cjitataċha. Jochquiztan tjonatċha. Jalla nuž Simona tanžcu zultatunacaqui Jesusiž cruza tjuziċha. Nekztan Jesusiž wirquiz ojkkatchiċha.

²⁷ Walja žoñinacaqui apznatċha. Walja maatakanacžquiz ċheržcu paljayċhiċha, tuž cjican:

—Jerusalén wajtċhiz maatakanaca, wejtquiztan ana kaa. Anċhuca persunjapa nižaza anċhuca maatinacžquiztan kaa. ²⁹ Tsjii ora tjonaquiċha. Nii orauqi žoñinacaqui sufris cjen ċhiyaquiċha, “Ana majtñi maatakanacaqui cuntintuž cjequiċha. Nižaza anaž icċhi maatakanacaqui cuntintuž cjequiċha. Nižaza anaž piz t'ichiñi maatakanacaqui cuntintuž cjequiċha”. ³⁰ Nii ora zakaz žoñinacaqui walja sufris cjen curunacžquiz paljayaquiċha, tuž cjican: “Wejtnac juntuñ tjojtžca”. Nižaza lumanacžquiz cjequiċha, “Wejrnacž ċhojsna, tsjii tjatta cunta”. ³¹ Tsjii ċh'ojñi muntiquiz tižta paaquiž niiqui, kjoñ muntiquiz juc'ant ana wali paaquiċha. —Jalla nuž paljayċhiċha Jesusaqui.

³² Zultatunacaqui pucultan tjañinaca cruzquiz ch'awczjapa ħjitchiċha Jesusižtan ċhica. ³³ Calavera cjita yoka irantižcu, Jesusa cruzquiz ch'awcċhiċha. Nižaza nii pucultan tjañinaca cruzquiz ch'awctazakaztaċha, tsjii tjañizti žew latuquiztan, tsjii tjañizti zkar latuquiztan. ³⁴ Cruzquiz ċh'awctan, Jesusaqui ċjichiċha:

—Yooz Tatay, tii žoñinaca pertuna, ċhjulut paaċhaja, anaž intintiċha ninacaqui.

Nii ora zultatunacaqui Jesusiž zquiti tanzjapa, zurtiyassiċha. ³⁵ Jalla nekzi žoñinacaqui walja ċekznatċha. Jilirinacami anċha burla paachiċha, tuž cjican:

—Tiiqui yekjanaca liwriiċhiċha. Ultim werar Cristumċhalaj niiqui, Yooziž illztamċhalaj niiqui, persunpacha liwriyalla.

³⁶ Nižaza zultatunacaqui burla paachiċha. Macjatžcu jar vinu tirinċhiċha. ³⁷ Nižaza ċjichiċha:

—Amqui judionacž ċhawc jilirimċhalaj, niiqui, persunpacha liwriyalla.

³⁸ Nižaza cruzquiz Jesusiž ach juntuñ litranaca ċjirtataċha. ċhjep tawkquiztan ċjirtataċha, griego taku, latín taku, hebreo taku. Jalla tuž ċjirtataċha: “Tiiċha judionacž ċhawc jiliriqui”.

³⁹ Tsjii ċh'awcta tjañi žoñiqui Jesusižquiz ana wal taku ċhiċhiċha, tuž cjican:

—Amqui Cristumċhalaj niiqui, persunpacha liwriyalla. Nižaza wejrnacmiž liwriya.

⁴⁰ Tsjii ċh'awcta tjañizti nii tjañ mazquiz ujziċha, tuž cjican:

—Amqui cruzquiz ch'awctazakazza. ħAm anam Yooz eks, kjažtatajo? ⁴¹ Uċhumqui ujquiztan sufristanċha. Cruzquiz ċh'awcta ċjispanz waquiziċha. Tii žoñizti ana ċhjul ujċhizza.

⁴² Nekztan nii tsjii tjañ žoñiqui Jesusižquiz paljayċhiċha, tuž cjican:

—Jesusa, ċhjulorat amqui mantiz kallantaċhaja, jalla nii ora wejr ċjuñznulla.

⁴³ Nekztanaqui Jesusaqui kjaaziċha, tuž cjican:

—Weraral amquiz ċjiwċha, tonjtanpacha amqui wejttnan ċhica cjequiċha, Paraíso cjita zuma yokquinaqui.

JESUSAQUI TICZIĊHA

⁴⁴Nii oraqui taypuruč cjisnatčha. Tjapa nii yokaqui zumchi cjissičha, majňakak oracama. ⁴⁵Tjuňiqui zumchi cjissizakazza. Nižaza pajk timplu cortina chicata wjarzričha. ⁴⁶Jalla nektzanaqui Jesusaqui altu joržtan kjawchičha, tuž cjan:

—Yooz Tatay, am kjarquiz wejt animu cumpjyüčha.

Jalla nuž chiižcu, ticzičha.

⁴⁷Jalla nuž watchi cheržcu tsjii romanž zultat jiliriqui Yooz honora paljaychičha, tuž cjan:

—jUltim weraratakälčha, tiiqui lijitum žoňitakälčha! Ana ujchiztakälčha.

⁴⁸Nižaza nuž watchi cheržcu tjapa nii cherňi žoňinacaqui ancha llaquita ojkičha.

⁴⁹Jesusič mazinacami nižaza nii Jesusa Galilea wajtquiztan apzi maatakanacami ažkquiztan chekzcan quirchičha. Tsjjtsucakaz cheksičha nii watňiqui.

JESUSIŽ CURPU SIPULTURQUIZ TJATŽTA

⁵⁰Tsjii zuma žoňi želatčha José cjita. Yooz mantitacama kamňitachha. Judea yokquin Arimatea wajtchiz žoňitachha. Judiuž jilirinacž partitachha. ⁵¹Nii zuma Josequi Yooz mantiz tjuňiž tjewsnipantachha. Nižaza niiqui anatačha Jesusa konz kuzzizqui parti jilirinacžtanaqui. ⁵²Nekztan Pilatužquin ojkičha Jesusiž curpu mayi. ⁵³Nektzanaqui Josequi Jesusič curpu cruzquiztan apakžcu tsjii wali pajk paňužtan capzičha. Nektzanaqui sipulturniž tjtazičha. Nii sipulturniž wali pajk mazquiz pjettatakälčha. Anatakälčha yekja almami tjatta niiqui. ⁵⁴Jeejz tjuňi žcatžintiquiztan, žoňinacaqui tjaczatčha jeejz tjuňquiz žejlzjapa. ⁵⁵Nii Galilea yokquiztan Jesusičtan chica tjonchi maatakaqui Juzquiz apzičha, Jesusič sipulturnu cheri, jaknužt tjtaztažlaja, nii cheri. ⁵⁶Jalla nektzanaqui persun kjuya quejpžcu, zuma ulurchiz aceitenaca nižaza tjaljinz cremanaca jalla nii tjaczičha. Nektzanaqui jeejz tjuňquiziqui jeejzičha, judiuž lii jaru.

24

JESUSAQUI JACATATČIČHA

¹Tumincuqui simana kalltiznan maatakanacaqui Jesusič sipultura ojkičha walja wentan. Tjaczta ulurchiz aceitenaca chjitchičha, Jesusič curpu tjaljinzjapa. Jalla nuž okan yekja maatakanacaqui cumpant'ichizakazza. ²Jalla nicju irantižcu nii sipulturnu pjuczta mazqui cjetžta cherzičha. ³Nektzanaqui sipulturniž luzzičha. Pero Jesusič curpuqui ana wajtchičha. ⁴Jalla nižtiquiztan ninacž kuz turwayskatatčha. Ana jaknužquin zizi atchičha, čhju lu paachuca, jalla nii. Nuž želan pucultan luctak žoňižtakaz tsjjsi cherzičha. Ninacž zqiti walja llijatčha. Maatakanacžtan chica cjissičha. ⁵Jalla nuž cheržcu walja tsucchičha maatakanacaqui. Tuzi t'okzičha. Jalla nuž cjen pucultan luctakažtakaz anjilaqui chiižinchičha maatakžquiz, tuž cjan:

—žKjažtiquiztam ančhucqui ticzinacporquiz žejtni žoňi kjurjo? ⁶Anaž tekz žejlčha niiqui. Jacatatchičha niiqui. Ančhucž cjuňzna, Galilea yokquiz ojklayan Jesusaqui nižta mazinchipanla, jalla nii. ⁷Nicju Jesusaqui mazinchičha, “Yooz Epiž cuchanzquita Žoňtčha wejrqui. Ujchiz žoňinacž kjarquiz intirjital cjeečha. Nižaza cruzquiz ch'awcžcu contal cjeečha. Pero čhjep majquiztanaqui jacatatačha”. Jalla nuž Jesusaqui mazinchičha.

⁸Jalla nuž chiyan maatakanacaqui cjuňzičha Jesusič mazinanaca. ⁹Jalla nektzanaqui sipulturnižtan quejpžcu, tjappacha quint'ichičha niž tuncamani illzta žoňinacžquiz, nižaza tjapa nezk žejlňi žoňinacžquiz. ¹⁰Jalla nii quint'iňi maatakanacaqui tižta tju-uchiztačha: Marija Magdalenatačha, Juanatačha, Jacobuž maatačha Mariiqui, nižaza tsjii kjaž yekja maatakanacatačha. Jalla ninacaqui Jesusič illzta žoňinacžquiz quint'ichičha, jaknužt watchi, jalla nii. ¹¹Jalla nii maatakanacž quint'ita anapan criichičha Jesusič illzta žoňinacaqui.

—žČhjulukat lucuratažtakaz chiičhani nii maatakanacaqui? —jalla nuž cjichičha Jesusič illzta žoňinacaqui.

¹²Jalla nuž ana criižcumi Pedruqui ulanžcu sipulturnu cheržni zajtchičha. Colžcu sipulturnu kjuylichuc cherzičha. Nii capžta paňunaca tsjii latu chjojkižta želatčha. Jalla nii cheržcu, walja kuzquiz pinsican ojkičha, čhjulut watčhaja, jalla nii.

EMAUS CJITA WAJTQUIN OJKTA

¹³ Nii noojpacha pucultan Jesusiž tjaajinta žoñinacaqui Emaús cjita watjaž okatča. Emaús watjaqui tsjii tuncaman kilometrotača Jerusalén wajtquiztan. ¹⁴ Jiczquiz ojkan, ninacpora parllassatča, tjapa Jesusiž puntu watchinaca, jalla nii. ¹⁵ Nuž parlasan, Jesusapachača žcatžinžquichi. Nekztan ninacžtan chica ojkičiča. ¹⁶ Jesusižtan chica ojkanami, nii pucultanaqui anapan pajñi cjissiča. ¹⁷ Jalla nekztanaqui Jesusaqui ninacžquiz pewczyča, tuž cjican:

—Jiczquiz ojkan, žčhjul puntu ančhucqui parlasjo? žKjažtiquiztan llaquita ančhuc ojko?

¹⁸ Tsjiizuñqui Cleofás cjitatača. Jalla niiqui kjaaziča, tuž cjican:

—Tjapa žoñinacaqui Jerusalén wajtquiz wajtchi quintu zizza. Am nekž žejlcan, žnii watchinaca anam ziz, jaa?

¹⁹ Nekztanaqui Jesusaqui kjaaziča, tuž cjican:

—žčhulu watchitaya?

Nekztanaqui nii pucultanaqui cjichiča:

—Tii quintu žejlča. Tsjii Jesusa cjita žoñi želatča, Nazaret wajtchiz žoñi. Yooz taku paljayñi profetatača niiqui. Yooz Ejpž yujcquizimi žoñinacž yujcquizimi walja Yooz aztan milajrunaca paachiča. Nižaza Yooz taku zumapan parličiča. ²⁰ Jalla nekztanaqui učhum timplu jilirinacami učhum wajt jilirinacami nii Jesusa intirjichiča cruzquiz ch'awczjapa, conzjapa. ²¹ Wejrnacqui cjetuča, “Niiqui Israel wajtchiz žoñinaca liwriyaa” cjichintača. Nižaza tonjtanpacha čhjep majča, tižta watchiqui. ²²⁻²³ Wejtnacauiztan tsjii kjaž maatakanacaqui wentan Jesusiž sipulturu cheržni ojkičiča. Jalla nekztanac “Jesusiž curpu ana žejlča” cjican tjončiča. Tjonžcu quint'ichiča, tižta. Sipulturquin anjilanaca chertkalča. Anjilanacaqui cjitkalča “Jesusaqui vivo žejtčiča” cjican. Jalla nuž quint'itkalča maatakanacaqui. Jalla nuž quint'itiquiztan tsucchinča wejrnacqui. ²⁴ Jalla nii quintu nonžcu tsjii kjažt wejtnaca mazinacaqui sipulturu cheržni ojkičiča. Nii maatakaž quint'ita, jalla nižtapacha cherziča. Pero Jesusa ana cherčiča.

²⁵ Jalla nekztanaqui Jesusaqui cjichiča:

—Ancha ana intintiñi ančhucqui. žKjažtatajo? žAncha ch'aman criichinčhucča tjapa Yooz taku paljayñi profetanacž cjiirtaqui! ²⁶ Ima honorchiz mantican, Cristuqui nuž sufrispantaž niic, žana jaa?

²⁷ Jalla nekztanaqui Jesusaqui ninacžquiz tjaajñi kallantichiča, tjapa cjiirta Yooz taku-naca niiz puntuquiztan, jalla nii. Tjaajincan, Moisés cjiirta libruquiztan kallantichiča. Nižaza tjappacha Yooz taku paljayñi profetanacž libruquiztan tjaajinčiča niiz persun puntuquiztan.

²⁸ Jalla nekztanaqui jakziquin ojktčhaja, jalla nicju irantitan, Jesusaqui tira wajtž cjichitača. ²⁹ Nii pucultan žoñinacaqui Jesusižquiz rocatča, tuž cjican:

—Wejtnacatan žela. Tjuñi zezillaž cjissa, jož zumča.

Nekztanaqui Jesusaqui ninacžtan chica tsjii kjuyquiz želi luzziča. ³⁰ Nekztanaqui tjapa ninacaqui misquiz julziča. Nuž julžcu Jesusaqui t'anta tanziča niiz kjaržtan. Nekztanaqui Yooz Ejpžquin sparaquiz čjichiča. Nekztan ninacžquiz tojziča. ³¹ Nuž paan nii pucultan žoñinacaqui Jesusa pajñiž cjissiča, čhjuyqui cjetžintaztakaz. Pero nii orapacha Jesusaqui liwž katchiča. ³² Nii pucultanaqui ninacpora parlasiča, tuž cjican:

—Učhumnacatan jiczquiz okan nižaza Yooz taku tjaajnan, učhumnaca kuzqui ancha zint'atča. Jalla nižtataž, žana jaa?

³³ Jalla nekztanaqui ana tjewžcu Jerusalén watja quejpchiča. Jalla nicju Jesusiž tuncaman illta žoñinacžtan zalčiča, yekja mazinacžtan juntazzi. ³⁴ Ninacaqui cjichiča:

—Ultim werara jacatatchipanča Jesusa jiliriui. Simonaqui zakaz cherčiča.

³⁵ Nekztanaqui nii pucultanaqui zakaz quint'ichiča, jaknužt jiczquiz okan, ninacžquiz watčhaja, jalla nii. Nižaza jaknužt Jesusižquiz pajtčhaja t'anta tojznan, nii quint'ichizakazza.

JESUSAQUI TIRIPINTIT PARIZIČIČA

³⁶ Jalla nuž parlan, Jesusapachača ninacž taypiz tsijtsiqui. Jesusaqui ninacžquiz tsaanchičha, tuž cjan:

—¡Zuma kuzziz cjee!

³⁷ Ninacaqui ancha ispantichi cjissičha, ancha tsucchiča. Pinsichiča, “Almaž caa” cjan. ³⁸ Pero Jesusaqui cjichiča:

—¿Kjažtiquiztan ančhucqui tsucchinčhucta? ¿Kjažtiquiztam wejt puntuquiztan ančhucua kuzquiz turwaysita? ³⁹ Wejt kjaraž chernza. Wejt kjojčaž chernza. Wejrpachača. Lanzna. Chera. Tsjii alma animuqui ana janchichizza, nižaza ana tsijchizza. Ančhucqui cherča, wejrtča janchichizmi tsijchizmi.

⁴⁰ Jalla nuž chiican, Jesusaqui kjaranaca kjojchanaca tjeeziča. ⁴¹ Jalla nektzanaqui nii željñi žoñinacaqui kuzquiz pinsichiča, “Jesusaqui željča werara, ana werara”, nii. Nižtami cuntintutača. Ispantichi želan, Jesusaqui ninacžquiz cjichiča:

—Ančhucalta ¿čhjulul lujljzapa žejl?

⁴² Nektzanaqui Jesusižquiz tjaachiča ch'iz canca, nižaza mazk'a. ⁴³ Jesusaqui nii čheri tanžcu lujlchiča ninacaž cheran. ⁴⁴ Nektzanac cjichiča:

—Tuquiqui ančhucaltan žejlcan ančhucuaquiz mazinchintača, jaknužt wejtquiz watastažlaja, jalla nii. Jaziqui cumplispantača tjapa wejt puntuquiztan cjiirta Yooz takunaca. Moisesqui wejt puntuquiztan cjiirchiča, nižaza tuquita Yooz taku paljayñi profetanacaqui cjiirchizakazza wejt puntuquiztan. Nižaza salmos cjita liwruquiz cjiirta zakaztača wejt puntuquiztan. Jalla nii tjapa cumplispantača.

⁴⁵ Jalla nektzanaqui Yooz taku tjaajincan zumpacha intintiskatchičha. ⁴⁶ Nižaza cjichiča:

—Jalla tuž cjiirtatača. Cristuqui ticspantača. Nižaza čhjep majquiztan jacatatspantača. ⁴⁷ Nektzan Cristuž mantita kamañquiz kamcan žoñinacaqui tjapa kjutñi nacionanacaran liwriñi taku paljaystanča. Jerusalén wajtquiztan liwriñi taku paljayi kallantistanča. Jalla tuž cjan, paljayaquiča, “Yoozquin kuzziz cjee, nižaza kuznaca campiya, ujnaca pertunta cjisjapa”. ⁴⁸ Ančhucqui jalla nižtapacha paljayaquiča. Tistic-unacača ančhucqui. ⁴⁹ Yooz Ejpqui ančhucuaquiz taku compromitchičha ančhucua kuzquiz Espiritu Santu cuchanzjapa. Wejrqui ančhucuaquiz wajilla cuchanzčača nii wejt Yooz Epiž compromitta Espiritu Santo, jalla nii. Nižaza tii Jerusalén wajtquizpachaž kaml, tsewctan cuchanzquita Espiritu Santuž azi tanzcama.

JESUSA ARAJPACHQUIN CHJICHTA

⁵⁰ Jalla nektzanaqui Jesusaqui ninaca chjitchičha wajtž tjiya, Betania cjita watjacama. Jalla nicju kjara waytžcu, ninacžquiz cjichiča:

—Yooz Ejpqui ančhucuaquiz zuma yanapla.

⁵¹ Jalla nuž chiižcuqui, Jesusaqui ninacžquiztan zarakchiča. Tsewcchucpacha waytiscu chjichtatača. ⁵² Nii ecta žoñinacaqui Jesucristuž honora paljayžcu Jerusalén cjita watja ancha cuntintuž cuttižquichiča. ⁵³ Jalla nicju ninacaqui timpluquiz pan žejlchiča, Yooztajapa honora waytican. Jalla nužoj cjila. Amén.

EL SANTO EVANGELIO SEGUN SAN JUAN

YOOZ TAKU CJITAČHA JESUCRISTUQUI

¹ Ima tii muntu želan Jesucristo želatča. Jalla niiča Yooz Taku cjita. Nižaza Yooz Ejpžtanča. Niimi Yooz zakazza. ² Primirquiztanpacha niiqui Yooz Ejpžtanpanča. ³ Jalla niiž cjen Yoozqui tjappacha paachiča. Tjapa niiž paatacamača. Anaž yekjaž paataqui žejlča. ⁴ Jalla niizakazza žeti tjaachiqui. Nižaza žejtcen žoñinacaqui persun kuzquiz zuma kamaña zizasäča. Tsjii kjanažtakaz Jesucristuqui Yooz zuma kamaña žoñž kuzquiz zizkatñiča. ⁵ Jaknužt tsjii kjanaqui zumchiquiz kjančhaja, jalla nižta Jesucristuqui zumchiquiz ojklayñi žoñinacž kuzquiz zuma kamaña zizkatča. Nii zumchiquiz ojklayñi žoñinacača ana zuma kamañchizqui. Pero Jesucristuž cjenpankaz Yooz zuma kamaña zizasäča.

⁶ Tsjii Yooziž cuchanžquita žoñi želatča, Juan cjita. ⁷ Nižaza Jesucristučha zuma kamaña zizkatñiqui. Juanqui Jesucristuž puntuquiztan mazñi tjonchiča, tsjii kjanažtakaz. Nižaza testicu cuenta Jesucristuž puntu werara mazzinchiča. Tjapa žoñinacžquiz nuž mazzinchiča, Jesucristužquiz criyajo. ⁸ Juanqui anača ultim Yooz zuma kamaña zizkatñiqui. Antiz tsjii testicu cuenta tjonchiča, nii Yooz zuma kamaña zizkatñiž puntuquiztan mazzinzjapa. ⁹ Jesucristučha ultim Yooz zuma kamaña zizkatñiqui. Jalla niiča zapa žoñinacž kuzquiz Yooz zuma kamaña zizkatñiqui. Nižaza Jesucristuqui tii muntuquiz tjonchiča.

¹⁰ Jalla nuž tjonžcu tii muntuquiz kamchiča. Nižaza niiča tjapa tii muntuquiz žejlñinaca paañiqui. Niiž paataž cjenami tii muntuquiz žejlñi žoñinacaqui Jesucristo ana pajz pecchiča. ¹¹ Jesucristo Yooz Majchqui niiž persun wajtchiz žoñinacžquiz tjonchiča. Pero nii žoñinacazti Jesucristo ana pajz pecchiča. ¹² Pero jakziltami nii Jesucristo pajz pecčhaja, nižaza niižquin tjapa kuztan criičhaja, jalla ninacaqui ultim Yooz maatinacapanž cjissa. ¹³ Jalla nuž muñchiča Yoozqui. Anaž persun maa ejpž kuzcama, nižaza anaž persun kuzcama, nižaza anaž žoñiž pinsitacama, antiz Yooziž pinsitacama žoñinacaqui Yooz maatinaca cjissa.

¹⁴ Yooz Taku cjita Jesucristuqui tii muntuquiz tjonžcu, žoñž curpuchiz wejtnacatan juntu kamchiča. Jalla tii muntuquiz kamcan Jesucristuqui Yooz zuma okžñi kuz tjeeziča. Nižaza Yooz litum kamañ puntunacami werara tjeeziča. Tii muntuquiz kaman, wejrnacqui niiž ancha zuma arajpach kamaña cherchinča. Niiča Yooz Ejpž zinta Majchqui. Jalla nižtiquiztan niiž tjeežta arajpach kamañaqui niiž kamañapankalča. ¹⁵ Juanqui nii Yooz Majch puntu mazzinchiča, tuž cjican:

—Jalla tiiž puntuquiztan tuqui chiichinča, tuž cjican: “Tsjiiqui tjončha wejt jarupacha. Jalla niiča wejtquiztan juc'ant chekanaqui. Ima weriž nasan pan želatkalča niiqui”.

¹⁶ Nii Yooz Majchqui tsjan juc'ant zuma kuzziz cjen učumnacaquiz zuma arajpach kamañchiz cjiskatčiča juc'anti juc'anti. ¹⁷ Tuqui timpu Moisesqui lii mantitanaca žoñinacžquiz tjaachiča. Jaziqui Jesucristuqui Yooz zuma okžñi kuz žoñinacžquiz tjeeža. Nižaza žoñinacžquiz Yooz zuma kamañchiz cjiskatča, nižaza Yooz puntunaca zizkatča. ¹⁸ Jesucristučha Yooz Majchqui. Anapanž jec žoñimi Yooz cherchiqui. Niiž zinta Majch alajakazza Yooz cherchiqui. Nii Yooz Majchqui Yooz Ejpžtan tsjii kuzzizpankazza. Jalla nižtiquiztan niiča Yooz puntunacami werara zizkatñiqui.

JUAN BAUTISTAŽ CHIITA TAKU

¹⁹ Juanž mazzintaqui Jesucristuž puntuquiztan jalla tužuča. Jerusalén wajtchiz judfo žoñinacaqui Juanž puntuquiztan iya ziz pecatča. Nekztan timplu jilirinacami timpluquiz sirwiñinacami Juanžquin pewczñi cuchanžquitatača. Ninaca pewczičha, tuž cjican:

—¿Amqui jequimta?

²⁰Juanqui zumpacha mazzinchiča. Nii pewcwni žoňžquiz ana nicchiča. Mazzincan tuž cjichiča:

—Wejrqui anača Cristutqui, ančucaž tjewžtaqui.

²¹Jalla nekztanaqui nii pewcwni žoňinacaqui wilta pewcziča tuž cjican:

—¿Jequimt amjo? ¿Elías cjita profetamkaya?

Juanqui kjaaziča, tuž cjican:

—Anača Eliastqui.

Nekztanaqui ninacaqui pewcziča, tuž cjican:

—Nii profeta tjoniz cjizpacha, žniimi amya?

Juanqui kjaaziča, tuž cjican:

—Wejr anača niitqui.

²²Jalla nekztanaqui ninacaqui cjichiča:

—¿Jecpant amjo? Wejrnacqui quintu chjitstanča wejrnac cuchanžquiňinaczquin. Am persun puntuquiztan žkjažum cjii?

²³Nekztan Juanqui tuž kjaaziča:

—Wejrtča alto joržtan ch'ekti yokquin paljajiňtqui. Tuž paljajiňča: “Yooz Jiliržtapa zuma kamaň jicz tjaczna”. Jaknužt Isaías cjita profeta chiičhaja, jalla nuž paljajiňča.

²⁴Nii pewcwninacaqui fariseo žoňinacaž cuchanžquitatača, Juanžquin. ²⁵Ninacaqui pewczizakazza tuž cjican:

—Nižtaqui amqui anaž Cristumni, nižaza anaž Eliasni, nižaza anaž nii tjonni profetamni. Ana nižta žoňimžlaj niiqui, žkjažtiquiztan am judio žoňinaca bautisjo?

²⁶Juanqui ninaczquiz kjaaziča tuž cjican:

—Wejrqui kjaztankaz bautisiňča. Judio žoňinaczquiztan tsjiiqui žejlča, jalla niiqui ančhucqui anaž pajča. ²⁷Jalla niiqui wejt jaruž tjonča. Jalla nuž cjenami niiča wejtquiztan juc'ant tsjan chekanaqui. Jalla nii atintizjapa wejrqui anal waquizuča, niiz zapat chiqui jwerzinimi, anaž cjichuca.

²⁸Betábara cjita yokquin nuž Juanžquiz pecuntatača. Betábara cjita yokaqui Jordán cjita puž tuunača. Jalla nicju Juanqui bautisatča.

UZI WILANAŽTAKAZA JESUCRISTUQUI

²⁹Jakatažuqui Juanqui Jesusa tjonni cherchiča. Jalla nuž cheržcu, tuž cjichiča:

—Cherzna. Tiiča Yoozquiztan cuchanžquita žoňi, uuzi wilanažtakaz. Jalla tiiqui tii muntuquiz žejlňi žoňinacz cuntiquiztan ticznaquiča. Ujchiz žoňinacz laycu ticznaquiča, ninacaž ujnacquiztan ana casticta cjejajo. ³⁰Wejrqui tiiz puntuquiztan mazzinčinča tuž cjican: “Wejt wirquin tjonča tsjiiqui. Jalla niiča wejtquiztan juc'ant tsjan chekanaqui. Ima weriž nasan, niiqui želatkalča”. ³¹Wejrqui persunpacha tii žoňi anal zizaytuča, jecčhalaj, jalla nii. Wejrqui Yooz mantita jaru kjaztan bautisiňča, Israel wajtchiz žoňinaczquiz nii pajkatta cjisjapa.

³²Nižaza Juanqui Jesusiž puntuquiztan tuž chiichizakazza:

—Wejrqui arajpachquiztan Yooz Espiritu Santo palumažtakaz chjiwžžquiňi cherchinča. Nekztan nii palumaqui Jesusiž juntuňpacha cjisquichiča. ³³Tuquiqui wejrqui persunpacha tii žoňi anal zizaytuča, jecčhalaj, jalla nii. Pero Yoozqui wejr mantichiča kjaztan bautisajo. Nižaza wejtquiz tuž cjichiča: “Espiritu Santuqui jeczquiz chjiwžžčahaja, nižaza niizquiz želačhaja, jalla niiča Espiritu Santužtan bautisniiqui. Jalla nii cheržcu niizquiz pajaquiča”. ³⁴Jaziqui nižtapan cherchinča, jalla nižtiquiztan wejrqui ančucaquiz maznuča, tiiča werar Yooz Maatiqui, cjican.

ANDRESTAN PEDRUŽTAN

³⁵Jakatažuqui Juanqui pucultan niiz tjaajinta žoňinacztan tsijtsi želatča. ³⁶Jesusaž nijcchuc ojklayan, Juanqui niizquin cheržcu tuž cjichiča:

—Cherzna. Tiiča Yoozquiztan cuchanžquitaqui. Uuzi wilanažtakaz cjequiča.

³⁷Nii pucultan Juanž tjaajintanacaqui jalla nuž chiiňi nonžcu Jesusižquiz apziča.

³⁸Jalla nekztanaqui Jesusaqui wir kjutni cheržcu, ninaca apzquini naychiča. Ninaczquiz cjichiča:

—¿Ĉhjuluz anĉhuc kjurya?

Nii apzñi žoñinacaqui tuž kjaaziĉha:

—Rabbí. (Rabbí cjita takuqui Tjaajiñi Maestro cjiĉha ninacž tawkquiztan.) ¿Jakziquinam am kanya?

³⁹Jesusaqui ninacžquiz cjichiĉha:

—Picha. Wejttan oka, chertzjapa.

Jalla nektzanaqui tjonzñi ojkchiĉha, jakziquin kamchitažlaja, jalla nicju. Tjuñi zezi cjen nii pucultanaqui Jesusižtan kamchiĉha nii zeztan ween pakara.

⁴⁰Tsjii pucultiquiztan Andrés cjitataĉha, Simón Pedruž lajkaĉha. Jalla niiquei Juanž chiita nonžcu Jesusa apziĉha. ⁴¹Pero Andresqui ima Jesusižtan ojklaycan niiz Simón cjita jila kjuri ojkchiĉha. Jalla niiztan zalžcu, tuž mazziĉha:

—Wejrqui Mesiasan zalchinĉha. (Ninacž tawkquiztan Mesías cjita tjuuqui Cristuž cjicha. Cristo cjita tjuuqui “Yooz illzta” cjiĉha.)

⁴²Jalla nektzanaqui Andresqui niiz jila Jesusižquiz zjiczchiĉha. Jesusaqui nii cheržcu, tuž cjichiĉha:

—Amqui Simona cjitamĉha, Jonás majch. Tekztan najwchuc Cefas cjita cjequiĉha. (Cefas cjita tjuuqui Pedro cjiĉha, ninacž tawkquiztan. Pedro cjita tjuuqui “maz” cjiĉha.)

FELIPŽTAN NATANAELŽTAN

⁴³Jakatažuqui Jesusaqui Galilea yokquin ojkz pinsichiĉha. Jalla nuž okawk cjen, Felipe cjita žoñžtan zalchiĉha. Niižquiz tuž cjichiĉha:

—Wejttanpanim chica ojklayaquiĉha.

⁴⁴Nii Felipiqui Betsaida wajtchiz žoñitaĉha. Andrestan Pedružtan nii wajtchiz žoñinacazakaztaĉha. ⁴⁵Jalla nektzanaqui Felipiqui Natanael kjuri ojkchiĉha. Jalla niiztan zalžcu cjichiĉha:

—Tsjii žoñžtan zalchinĉha. Niiž puntuquiztan Moisesqui cjjrchipantala Yooziž tjaata liy librunacquiz. Nižaza niiz puntu profetanacaqui cjjrchizakaztaĉha. Niiquei Jesusa cjitaĉha, Josež majch. Nazaret wajtchiz žoñiĉha nii Jesusaqui.

⁴⁶Jalla nuž nonžcu Natanaelqui tuž cjichiĉha:

—¿Nazaret wajtquiztan zuma žoñi želasajo? Anaž jaz.

Felipiqui niižquiz tuž kjaaziĉha:

—Cheržquily.

⁴⁷Jesusaqui Natanael cjita žoñi macjatžquiñi cheržcu, tuž cjichiĉha:

—Cheržca. Nii žoñiĉha lijitum Israel wajtchiz žoñiqui, ana incallñiqui, nižaza zuma kuzzizza.

⁴⁸Jalla nektzanaqui Natanaelqui Jesusižquiz pewcziĉha tuž cjican:

—¿Jaknužum am wejr pajjo?

Jesusaqui niižquiz kjaaziĉha tuž cjican:

—Ima Felipe am kjawznan, wejrqui am cherchinĉha, higo munti koztan.

⁴⁹Natanaelqui tuž cjichiĉha:

—Tjaajiñi Maestro, am Yooz Maatimkalala, Israel žoñinacž chawc Jilirimkalala.

⁵⁰Nektzanaqui Jesusaqui niižquiz cjichiĉha:

—Wejrqui chiichinĉha, am higo munti koztan žejlñi cherchinĉha, nii. Jalla nižta chiitiquiztan alaja wejtkuizim kuzziz cjissamĉha. Pero wiruñaju juc'ant pajk obranaca cheraquiĉha amqui.

⁵¹Nižaza Jesusaqui cjichizakazza:

—Anĉhucacuz weraral cjiwĉha. Anĉhucqui arajpacha cjetsi cheraquiĉha, nižaza Yooz anjilanacaqui wejt juntuñ chjijwžquiñi yawžquiñi cheraquiĉha. Wejrtĉha tsewctan cuchanžquita Yooz Žoñtqui.

¹ Čhjep majquiztan tsjii zalz pjižta želatča Caná wajtquin, Galilea yokquin. Jesusiž maa nicju želatča. ² Nižaza Jesusaqui niž tjaajinta žoñinacžtanpacha nii zalz pjižtiquiz kjawžtatača. ³ Jalla nuž pjižta paan vino upzitača. Jalla nektzanaqui Jesusiž maaqui nižquiz cjichinča:

—Vino upziča.

⁴ Jesusaqui naaquiz tuž kjaaziča:

—Maataka, žkjažtiquiztan nii puntu wejtquiz chijjo? Wejt langz ora imaziča.

⁵ Pero naaqui neks atintiñi sirwizunacžquiz cjichinča:

—Tiiž mantitacama ančucz paaquiča.

⁶ Jalla nicju sojta pajk maz luuznaca želatča. Judío žoñinacaqui ajunz cuzturumpi paazjapa luuznaca joojooñitača. Zapa luuzquiz quinzakal tunc litro, patac litro, nuž kjaz lužñitača. ⁷ Nektzan Jesusaqui nii pjižta paañi sirwizunacžquiz mantichiča, tuž cjan:

—Tii luuznacqui ančucqui kjaz chjijpznaquiča.

Nektzanaqui luuz joracama kjaznaca chjijpziča. ⁸ Jalla nektzanaqui Jesusaqui cjichiča:

—Jaziqui tsjii zkoluculla coožna. Nektzan pjižta paañi patrunžquiz chjicha.

Jalla nuž niiž chitacama chjitchiča. ⁹ Nii pjižta paañi patrunaqui mallziča nii kjazquiztan vino tucchi. Jakziquiztan tjonchi nii vino, jalla nii ana zizatča. Sirwizunacaz zizatča. Ninacaz kjazqui cootkalča. Jalla nuž nii vino mallžcu pjižta paañi patrunaqui nii zalzñi tjowa kjawziča. ¹⁰ Nektzan tuž cjichiča:

—Čjul žoñimi zuma vino panž tjaacha primiraqui. Nektzan kjawža žoñinacž zuma vino lictan nii jaru ana zuti zuma vino zakaz tjaacha. Amzti tii oracama tii ancha zuma vino čhojcham, žkjažtatajo?

¹¹ Jalla niitača Jesusaž primer paata milajruqui. Caná de Galilea wajtquiz paachiča. Jesusaqui nii milajru paacan, niž arajpach kamañami azimi tjeeciča. Jalla nižtiquiztan nižtan chica ojklayñi žoñinacaqui nižquizimi tjapa kuz cjissiča, nižaza criichiča.

¹² Jalla niž wiruñ Capernaum wajtquin ojkičiča. Niiž maatan, niž lajknacžtan, niž tjaajinta žoñinacžtan, jalla ninacaqui nižtan chica ojkičiča. Jalla nicju tsjii kjaž maj kamchiča.

TIMPLU PEWŽA JESUCRISTUQUI

¹³ Judío žoñinacž pascua pjižta wajillatača. Jalla nižtiquiztan Jesusaqui Jerusalén watja ojkičiča. ¹⁴ Jalla nicju timplu patiuquiz luzcu, animala tuyñinaca cherchiča. Vacanaca, uuzinaca, nižaza palumanaca jalla nižtanaca timplu patiuquiz tuyñi cherchiča. Nižaza paaz campiiñinaca ninacž puestuquiz julzi cherchizakazza. ¹⁵ Jalla nižtanaca cheržcu Jesusaqui poota zkizquiztan lazu paachiča. Jalla nektzanaqui nii laztan zancchuc liwž tirkatchiča vacanacami, uuzinacami tjapa nii tuyñinacžtanpacha. Nii paaz campiiñi žoñinacž paazmi k'ala witzinchiča, nižaza ninacž mizanacami pjokžinchiča. ¹⁶ Nektzan paluma tuyñi žoñinacžquiz ujziča tuž cjan:

—Tjapa tinaca jwesa. Wejt Yooz Ejpž kjuya anača tuyz kjuya tjaczqui.

¹⁷ Jalla nektzanaqui niž tjaajinta žoñinacaqui cjiřta Yooz taku cjuñziča. Yooz tawk libruquiz tuž cjiřtkalča: “Am kjuya rispitta cjiskatz pecuča. Nuž pectiquiztan akztal cječa”.

¹⁸ Jalla nektzanaqui judío žoñinacaqui nižquiz pewcziča tuž cjan:

—Jalla nižtanaca paazjapa, žject am mantichejo? Yoozqui am mantichižlaj niiqui, tsjii siñala milajruž tjeěžna.

¹⁹ Jesusaqui tuž kjaaziča:

—Tii timplu pajlžta cjequiča. Nektzan čhjep majquiz wilta tsijsnača.

²⁰ Jalla nižta chiiñi nonžcu judío žoñinacaqui cjichiča:

—Tii timplu kjucanaqui pusi tunc sojtan wata kjuytala pero. ŽAmqui čhjep majquizkaz tii timplu tsijsnasajo? Anapan niim atasacha amqui.

²¹ Jalla nuž nii timplu puntuquiztan chiican Jesusaqui niž persun curpu puntuquiztanž chiyatča. ²² Jesusaž ticziquiztan jacatattan niž tjaajinta žoñinacaqui nii chiita cjuñziča.

Nekztan Yooz takumi criichiča, Jesusaž jacatatz punto cjiyrta. Nižaza Jesusiž chiitanacami criichizakazza.

²³ Pascua pjijztiquiz Jesusaqui Jerusalén wajtquiz želatča. Jalla nicju želan walja žoñinacaqui niizquin criichiča. Niiž paata milajrunacami siñalanacami, nii cheržcu criichiča. ²⁴ Jesusaqui niiz persun kuzquiz žoñinacž kuz, jaknužt cječhaja, jalla nii zizatča. Jalla nižtiquiztan Jesusaqui nii juntuñ criichi žoñinacžquiz ana juyzu paachiča. ²⁵ Jesusaqui persunpacha žoñinacž kuz jaknužt cječhaja jalla nii zizatča. Jalla nižtiquiztan niiqui anaž jec tjaajžnimi pecatča žoñinacž kuz puntuquiztanaqui.

3

JESUSIŽTAN NICODEMUŽTAN

¹ Tsjii fariseo žoñi želatča, Nicodemo cjita, judfo žoñinacž jiliritäča. ² Jalla nii Nicodemuqui tsjii ween Jesusižquin tjonžni ojkičiča. Nekztan Jesusižquin paljaychiča, tuž cjican:

—Tjaajni Maestro, žoñiqui ana Yooz poderžtanžlaj niiqui, nekztan ana milajrunaca paasača, amiž paata milajru, nižtanacami. Jalla nižtiquiztan wejrqui zizuča, Yoozquiztan tjonchamča, Yooz obra tjeežni nižaza Yooz puntu tjaajni.

³ Jalla nekztanaqui Jesusaqui niizquiz cjichiča:

—Amquiz weraral cjeeča. Jequit ana pizc wilta nassi cječhaja, jalla niiqui arajpach Yooz wajtquiz ana kamasäča.

⁴ Jalla nižta chiitiquiztan nii Nicodemo cjita žoñiqui tuž pewcziča:

—Pero, ¿kjaž tsjii žoñiqui wilta majtta cjesajo? Wilta majtta cjisjapa, ¿maa iczquiz wiltaž luzasajo?

⁵ Jesusaqui tuž kjaaziča:

—Ultimu werarapal cjiwča. Jequit kjazquiztanami Espiritu Santužquiztanami ana nassi cječhaja jalla niiqui arajpach Yooz wajtquiz ana luzasača. ⁶ Jequit maa ejpžquiz-tankaz nassaja, jalla niiqui žoñž kamañchizkazza. Pero jequit Yooz Espiritu Santuquiztan zakaz nassaja, jalla niiqui Yooz Espiritu Santuž kamañchizza. ⁷ Weriž chiitiquiztan anam am ispantaquiča. Tjapa žoñinacaqui pizc wilta nastanpanča cjiwča. ⁸ Nicjumi ticjumi tjamiqi tjamča. Nii tjamž jora nonžcanami jakziquiztan tjamžquichaja, jakzitčuc ojkičhaja, jalla nii ana zizluca. Jalla nižta irataž Yooz Espiritu Santuqui jecž kuzquizimiž luzasača. Nižaza ana Yoozquin criichi žoñinacaqui criichi žoñinacž kamaña cherča. Pero nii Espiritu Santuž tjaata kamaña ana intintazucača.

⁹ Jalla nekztanaqui Nicodemuqui wilta pewcziča, tuž cjican:

—¿Jaknužupan cjes teejo?

¹⁰ Jesusaqui niizquin tuž kjaaziča:

—Amqui Israel žoñinacžquiz tjaajni maestrumla. ¿Jalla tii weriž chiita ana intintazucakaya? ¹¹ Ultimupan wejr cjiwča. Wejrqui tii puntuquiztan intintazcu chiyučha. Weraraž chiyučha, tii weriž zizta nižaza cherta puntunacami. Jalla nuž cjenami amqui weriž chiita anam catokča. ¹² Tii muntuquiz watni puntuquiztan chiyana ana intintazca amqui. Jaziqi juc'ant altu razunžtan arajpach Yooz puntuquiztan chiyana, ¿jaknužt am intintasajo?

¹³ Anaž jecmi arajpachquin yawchiqui. Wejrpankal arajpach Yooz puntuquiztan zumpacha zizuča. Wejrqui arajpachquiztan chjijwžquichinča. Wejrqui arajpachquiztan cuchanžquita Yooz Žoñičha. ¹⁴ Nižaza wejrqui cruzquiz waytital cjistanča. Jaknužt Moisesqui tsjii korquiztan paata zkora pajk tuñquiz waytitchaja, jalla nižta wejrqui waytital cjistanča, ¹⁵ wejtquin criichi žoñinacžquiz ew kamaña tjaazjapa, ninaca Yooztan wiñaya kamajo, ana infiernuquin sufrajo.

YOOZ EJPČHA ŽOÑINACŽQUIZ OKŽŇIQUI

¹⁶ Yooz Ejpqui tii muntuquiz žejlñi žoñinacžquiz ancha okžquichipanča. Jalla nižtiquiztan niiz zinta Majch cuchanžquichiča, žoñinacžquiz ew kamañchiz cjskatzjapa. Jakziltat niiz zinta Majchquiz criyačhaja, ew kamañchiz cjequiča Yooztan wiñaya kamzjapa ana

infiernuquin sufrajo. ¹⁷Yooz Ejpqui niiz Majch tii muntuquiz cuchanzquichiča. Niiz cjen žoñinaca liwriita cjesača infiernuquin ana casticta cjisjapa.

¹⁸Jakziltat Yooz Majchquiz criyačhaja, jalla niiqui ana infiernuquin castictaž cjequičha. Pero jakziltat Yooz Majchquiz ana criyačhaja, jalla niiqui infiernuquin castictapanž cjequičha, Yooz zinta Majchquiz ana criitiquiztan. ¹⁹Yooz zinta Majchča Yooz kamaña tjeezñiqui zuma kjanažtakaz. Jalla nuž cjenaqui tii muntuquiz tjonan, žoñinacaqui ana wali kamañchiz kamzpanž pecatča, zumchiquiz kamzpanž pecatča. Nižaza ninacaž ana wali kamtanacaž cjen Yooz kamañchiz cjis ana pecchipanča. Jalla nižtiquiztan castictapanž cjequičha. ²⁰Tjapa ana wali kamñinacaqui Yooz kamaña tjeezñijžapa quintrača. Nižaza Yooz kamaña tjeezñižquiz anaž cherez pecča, ninacž ana wali kamtanaca ana tjeezta cjisjapa. ²¹Pero jakziltat werar Yooz kamañ jaru kamz pecčhaja, jalla niiqui Yooz kamaña tjeezñižquiz macjatžquičha kjanapacha tjeezjapa, niiz zuma kamtanaca Yooz aztan kamtača, nii. —Jalla nuž cjichiča Jesusaqui.

JUAN BAUTISTAŽ CHIITA

²²Jalla nuž Nicodemužtan parližcu, Jesusaqui tjaajintanacžtan Judea yokquin ojkičiča. Jalla nicju niiz tjaajintanacaqui bautiscan žejlchiča. ²³Nižaza Juan bautiscan zakaz želatča. Salim cjeta wajt žcati Enón cjeta wajtquin želatča. Jalla nicju wacchi kjaz želatča. Nekztan žoñinacaž tjonatča bautista cjisjapa. ²⁴Jalla nižtanaca watchičha, ima Juanqui carsilquin chawcta cjen.

²⁵Jalla nekztanaqui Juanž tjaajinta žoñinacžtan tsjii kjaž judío žoñinacžtan ch'aassičha, ajunz cuzturumpi puntuquiztan. ²⁶Juanž tjaajintanacaqui niizquin mazni tjonchiča, tuž cjan:

—Tjaajini maestro, tsjiiqui amtan chica želatča Jordán puž tuuna. Amqui niiz puntuquiztan mazzinchamča. Jalla niiqui tekz žejlča bautiscan. Nižaza tjapa žoñinacaqui nižtan ojzpanž cjissa.

²⁷Juanqui ninacžquiz tuž cjichiča:

—Yooz Ejpqui wejtquiz tsjii kamaña tjaachiča; nižaza tsjii puestuquiz wejr utchiča. Jaknužt Yoozqui žoñžquiz kamaña tjaatčhaja, jalla nii jaru žoñiqui kamz waquiziča. ²⁸Ančhucpacha weriž chiita nonzinčhucča. Wejr cjichinča: Anača wejr Cristutqui. Wejrzi niiz tuqui cuchanzquita žoñtča. ²⁹Tsjii zalz pjiztquiz zalzi tjowaqui yanapni mazinacžquiztan tsjan importantiča. Nii zalzi tjowaqui tjunchizza. Yanapni mazinacaqui jalla nii nonžcu cuntintučha, nižaza chipchipča. Jalla niža iratača anziqui. Wejrqui Jesusiž quintu nonžcu ancha cuntintučha. ³⁰Niiqui juc'anti juc'anti tucquin cjistanča. Wejrzi nižquiztan juc'anti juc'anti wirquin cjistanča.

JESUSAČHA TSEWCTAN TJONCHI ŽOŇI

³¹Nii tsewctan tjonchi žoñičha tjapa žoñinacžquiztan juc'anti chekanaqui. Tii yok muntuquiz kamni žoñinacaqui tii yokjapakaz kamañchizza. Nižaza tii yokjapa kamaña puntuquiztankaz parličha. Nii tsewctan tjonchi žoñizti tjapa žoñinacžquiztan juc'antiča.

³²Nii tsewctan tjonchi žoñiqui arajpachquin čhjulut chertčhaja, nonžtčhaja, jalla nii žoñinacžquiz mazziča. Jalla nii zumanaca maztiquiztanami žoñinacaqui anaž wira criiz pecča. ³³Jakziltat niiz mazta criičhaja, niiqui tjurt'acuiča, Yooziž chiita takuqui werarapankalala, cjan. ³⁴Yooziž cuchanzquita žoñiqui Yooz takupanž parličha. Yooz Espiritu Santučha niiz kuzquiz žejlñipan, yanapzjapa. Jalla nižtiquiztan Yooz takupanž parličha. ³⁵Yooz Ejpqui niiz Majch k'aachiča. Jalla nižtiquiztan tjappacha tjaachiča niiz Majch kjarquiz. ³⁶Jalla nižtiquiztan jakziltat Yooz Majchquiz criyačhaja, jalla niiqui Yooztan wiñaya kamaquiča. Nižaza jakziltat ana Yooz Majchquiz criyačhaja nižaza ana cazačhaja, jalla niiqui anapanž Yooztan kamasacha. Nižaza Yooz Ejpqui cjiča, nii žoñiqui castictaž cjequičha.

¹ Žoñinacaqui Jesusižquiz walja tjonchiča niižtan chica ojklajzjapa, Juanžquiztan juc'ant tama. Nižaza Juanžquiztan juc'anti žoñinaca bautissicha. Jalla nii quintu ojklayan, fariseo žoñinacaqui nii quintu nonchiča. Nekztan Jesusižtan quintrazi kallantichiča. Nii zizziča Jesusaqui. ² Jalla nuž nii Jesusiž bautis quintu ojklajchiž cjenami, Jesusaqui anaž bautissiča. Antiz niiž tjaajinta žoñinacakaz bautisatča. ³ Pero fariseo žoñinacaqui Jesusiž puntuquiztan nonžcu, Jesusižtan quintrazi kallantichiča. Jalla nižtiquiztan Jesusaqui Judea yokquiztan zarakchiča, Galilea yokquin quejpžquizjapa.

⁴ Jalla nii jiczquiz ojkan, Samaria yoka nuž watstantača. ⁵ Jalla nuž Samaria yokquin ojkan Sicar cjita wajtquin irantichiča. Tuqui timpu Jacob cjita žoñiqui niiž José cjita majchquiz tsjii yoka tjaachitača. Nii yok žcati Sicar cjita watja želatča. ⁶ Jalla nicju tsjii kjaz tuj želatča, Jacobž tuj cjitatača. Jesusaqui jiczquiz ojktiquiztan otchiča. Nekztan tuj latuquiz julziča. Nii oraqui taypur wajitača. ⁷⁻⁸ Nekztanaqui niiž tjaajinta žoñinacaqui watja luzziča lujl čheri kjajzjapa. Jesusaž nuž zinalla želan, tsjaa Samaria wajtchiz maatakuqui nii tujquin kjaz cooyi tjonchinča. Jesusaqui naaquiz paljaychiča:

—Kjaz onalla, —cjican.

⁹ Jalla nuž kjaz tomangztiquiztan naa Samaria wajtchiz maatak žonqui cjichinča:

—Amqui judío žoñimla. Wejrqui Samaria wajtchiz žontča. ¿Kjažtiquiztan amqui wejtquiztan kjaz mayo?

(Judío žoñinacžtan Samaria wajtchiz žoñinacžtan porapat ana parliñipanla, pero.)

¹⁰ Jalla nekztanaqui naa maatakaž chiihtiquiztan Jesusaqui tuž kjaaziča:

—Wejrqui amquiztan kjaz maychinča. Pero amzti wejt puntuquiztanami nižaza Yooziž tjaaz puntuquiztanami intintisaž niiqui, jalla nekztan wejtquiztan žejtñi kjaz maytasacha. Nižaza nii žejtñi kjaz tjaatam cjitasacha.

¹¹ Jalla nekztanaqui naa maatakuqui tuž cjichinča:

—Señor, am anaj kjaz coozzaml. Tii tuj koziča. ¿Jakzictanam nii žejtñi kjaz tjaasajo?

¹² Učhum Jacob cjita tuquita ejpqui tii tuj ecanchiča. Nižaza tii tujquiztan kjaz licñitača, nižaza niiž maatinacami, nižaza niiž animalanacami. ¿Amqui niižquiztan juc'antim cjes, kjažtatajo?

¹³ Jalla nekztanaqui Jesusaqui naaquiz cjichiča:

—Jakziltat tii tuj kjazquiztan licħhaja, jalla niiqui wilaž kjaz pecaquiča. ¹⁴ Pero jakziltat weriž tjaata kjaz licħhaja, jalla niiqui anaž iya kjaz pecniž cjequiča. Weriž tjaata kjazqui niiž persun kuzquiz tsjii jalzurižtakaz cjisnaquiča wiñaya žejtzjapa.

¹⁵ Jalla nekztanaqui naa maatak žonqui niižquiz cjichinča:

—Señor, nii kjaz tjaalla, ana iya kjaz peczjapa, nižaza tii tujquiz ana iya kjaz cooyi tjonzjapa.

¹⁶ Nekztanaqui Jesusaqui naaquiz cjichiča:

—Oka, am luctaka kjawžca. Nekztan wiltam wejtquin tjonaquiča.

¹⁷ Naa maatak žonqui tuž kjaaziča:

—Ana luctakchiztča.

Jalla nuž kjaaztiquiztan Jesusaqui tuž cjichiča:

—Amqui weraram chiiča, “Ana luctakchiztča” cjicanaqui. ¹⁸ Amqui pjijska luctakchiz-takalala amqui. Jalla nižtiquiztan anziqiu am lucum cjiħhaja, jalla niiqui anaž am ultim lucuqui. Jaziqiu weraram chiiča. ¹⁹ Jalla nekztanaqui naa maatak žonqui Jesusižquiz tuž cjichinča:

—Señor, amħha profetaqui, nuž tantiyuča. ²⁰ Wejtnaca tuquita ejpnacaqui tii curquiz Yooz rispitiħhaja. Ančhuc judío žoñinacazti cjiħhucħha, Jerusalén wajtquin Yooz rispitsa, nii.

²¹ Nekztanaqui Jesusaqui naaquiz tuž kjaaziča:

—Maataka, weriž chiiħa taku criya. Tsjii tjuñi tjonħa. Jalla nii tjuñquiziqui anaž tii curquizimi nizaza anaž Jerusalén wajtquizimi Yooz Ejp rispitaquiħha. ²² Ančhucqui Yooz ana zuma pajžcu rispitcha. Wejrnaczi Yooz litituma pajžcu rispituħha. Judío partiquiz-tanž Yooziž cuchanžquita Liwriñiqui tjonħa. ²³ Nii tjonz tjuñquiziqui, nižaza anzimi,

werar Yooz Ejp rispitiinacaqui kuztanami animužtanami Yooz rispitaquiča. Nižaza Yooz Ejpž kuzcama wereraž rispitaquiča. Jalla nižta rispitiinacaž Yooz Ejpqui pecča. ²⁴ Yoozza ana janchichizqui, animužtakaz. Jalla nižtiqiztan nižžquin rispitiinacaqui kuztanami animužtanami nii rispitanča. Nižaza Yooz kuzcama werera rispitanča.

²⁵ Jalla nekztanaqui naa maatak žonqui Jesusižquiz cjichinča:

—Tsjii noojiqui tsjii Yoozquiztan cuchanžquita cjitaqui tjonacučiča. (Mesías, nižaza Cristo cjitazakazza niiqui.) Jalla nii tjonžcu wejtnacaquiz tjapa Yooz puntuquiztan tjaajnaquiča.

²⁶ Nekztanaqui Jesusaqui naaquiz tuž cjichiča:

—Werjtča niitqui, amquiz paljayuča.

²⁷ Jalla nuž parlan Jesusiž tjaajinta žoñinacaqui quejžquichiča. Nuž Jesusaž tsjaa Samaria wajtchiz žonatan parliñi cheržcu, ispantičiča. Ancha ispantižcu tjapa nii tjaajintanacaqui ana pewcžñi atchiča, “Naaquiztan žčhjulul pec?” cjican, už “žKjaž-tiquiztan naa žonatan parli?” cjican ana pewcžñi atchiča. ²⁸ Nekztanaqui naa maatak žonqui kjaz luuz eccu, watja ojchinchča. Nekztan žoñinacžquin tuž quint'ichinča:

²⁹ —Ojklay, tsjii žoñiž cheržquily. Niiqui tjapa weriž kamta puntu zizza. Wejtquiz nii puntu chiichiča. žAnaj tii Yooz cuchanžquita Cristo cjesaya?

³⁰ Nekztanaqui žoñinacaqui wajtquiztan ulanžquichiča, jakžiquin Jesusa želatčhaja, jalla nicju. ³¹ Ima nii žoñinacaž irantižcan, niž tjaajintanacaqui Jesusižquiz chiižinchiča, tuž cjican:

—Tjaajini Maestro, čhjululla mekaz lujlžnalla.

³² Jesusazti ninacžquiz cjichiča:

—Wejtac yekja lujlž žejlča. Jalla nii lujlžqui ančhucqui anaž pajča.

³³ Jalla nuž chiitiquiztan niž tjaajintanacaqui ninacpora pewcsassiča, tuž cjican:

—žJequit tiižquiz lujlž čhjeri žjijcanchi cjesajo?

³⁴ Jesusaqui ninacžquiz cjichiča:

—Wejrqui wejt cuchanžquiniž kuzcama kamuča. Nižaza niž pecta langz cumpluča. Jalla niiča wejtta lujlž čhjeri cuntaqui. ³⁵ Ančhucqui cjinčhucča, “Zkala ajžquinaqui pajkpic jiiz pjaltiča”, jalla nuž cjinčhucča. Pero wejr ančhucquiz cjiwča, “Nii žoñinacžquin chern. Pookchi zkalanacažtakaz ninacaqui. Ricujz pecča. ³⁶ Jakziltat nii pookchi zkalanaca ricujáčhaja, jalla niiqui pactaž cjequiča. Nižaza nii ricujta žoñinacaqui Yooztan wiñaya kamaquiča. Jalla nižtiqiztan zkala čhjacñimi ajžñimi nuž chicapacha cuntintuž cjequiča. ³⁷ Tii zkala puntuquiztan chiitaqui werarapanča. Jalla tuž cjiča: “Zkala čhjacñiqui tsjiiča. Nižaza zkala ajžñiqui yekjáča”. ³⁸ Wejrqui ančhuc cuchanžquichinča, ana amiž trabajta zkala ricujzjapa. Yekjanacača nii zkalac trabajchi Yooz taku paljaycan. Ančhucqui nii trabajtiqiz yapzinčhucča, ultimquiziqui Yooztajapa ricujta cjisjapa.

³⁹ Jalla nekztanaqui wacchi Samaria wajtchiz žoñinacaqui nižquiz criichiča, naa maatak žonaž maztaž cjen. “Niiqui tjapa weriž kamta puntu zizza”, jalla nuž cjican mazinča naaqui. ⁴⁰ Nižaza Jesusižquiz tjonžcu, nii Samaria wajtchiz žoñinacaqui Jesusižquiz rocchiča, tuž cjican:

—Wejtnacatan kamt'alla.

Nekztanaqui Jesusaqui ninacžtan puc maj kamchiča. ⁴¹ Jalla nuž niž persuna tjaajintiquiztan iya juc'anti nii žoñinacaqui nižquiz criichiča. ⁴² Ninacaqui naa maatak žonaquiz tuž cjichiča:

—Wejrnacqui criyuča. Anaž amiž maztiqiztankaz criyuča. Antiz niž taku persuna nonžcupan criyuča. Chekapan, tiiqui Yooz cuchanžquita Cristukalča, žoñinacžquiz liwriñiqui. Anzil nii zizuča wejrnacqui, niž tjaajinta taku nonžcu.

TSJII ČHJETINTAQUI

⁴³ Puc majquiztan Jesusaqui Galilea yokquin ojchichiča.

⁴⁴ Jalla nekztanaqui Jesusaqui tuž chiichiča:

—Tsjii Yooz cuntiquiztan chiiñi profetaqui niiz persun wajtchiz žoñinacžquiz ana rispitača.

⁴⁵ Jalla nektanaqui Galilea irantitan, nii žoñinacaqui Jesusa zuma risiwchiča. Nii žoñinacaqui Jerusalén ojkchizakaztača, pascua pjjizta payi. Jalla nicju žejlcan tjapa Jesusaž paatanaca cherchiča. Jalla nižtiqiztan nii žoñinacaqui Jesusa zuma risiwchiča.

⁴⁶ Galilea yokquin žejlcan, Jesusaqui Caná cjita watja wilta ojkchiča. Tuquiqui nii wajtquiz kjazquiztan vino tuckatchičha. Tsjii pajk jilirž secretariuqui Capernaum wajtquiz želatča. Nii secretariuž majchqui laatača. ⁴⁷ Jesusaž Judea yokquiztan Galilea tjonchi quinto zizcu, nii secretariuqui Jesusa roqui ojkchiča niiz kjuyquin tjonžcajo, nižaza niiz majch čhjetnajo. Niiz majchqui ticzmayatača. ⁴⁸ Jalla nektan Jesusaqui nižquiz cjichiča:

—Ančhucqui sinalanacami milajrunacami ana cheraquiž niiqui, ana criyasača.

⁴⁹ Nektan nii secretariuqui cjichiča:

—Señor, ima wejt majch ticznan wejt kjuyquin tjonžcalla.

⁵⁰ Jesusaqui nektan cjichiča:

—Am kjuya quepa, am majchqui žetaquiča.

Nektan nii secretariuqui jalla nuž Jesusaž chiitan nii criichiča. Jalla nektan kjuya quejpciča. ⁵¹ Jalla nuž niiz kjuya okan, niiz piyunanacaqui nižquin zalžquichičha, tuž cjican:

—Am majchqui žejtchiča.

⁵² Jalla nuž chiitiquiztan nii secretariuqui pewcziča, čhjulora niiz majch žeti kallantichi, jalla nii. Niiz piyunanacaqui cjichiča:

—Zezcu taypuruž paztanalla nii kjakñi ch'ujlñiqui apaltichiča.

⁵³ Nii ejpqui cjuñziča, nii orapacha Jesusaqui cjichiča, “Am majchqui žetaquiča”. Jalla nižtiqiztan nii ejpqui tjapa kuztan Jesusižquiz criichiča, tjapa niiz kjuychiz žoñinacžtanpacha.

⁵⁴ Judea yokquiztan Galilea quejpžcu, Jesusaqui nii milajru paachiča. Jalla nižtanaqui pizc wilta milajru paachiča.

5

LAA ŽOŇI ČHJETINTA

¹ Wiruñaquí judío žoñinacaqui pjjizta paatča. Jalla nuž paan, Jesusaqui Jerusalén watja quejpžquichičha. ² Jerusalén wajtquiz tsjii pajk zana želatča, uuzi zana cjita. Jalla nii žcati tsjii žoñiž paata cocha kjazjapa želatča. Nii cochaqui Betesda cjitatača Hebreo tawkquiztan. Nii coch muytata pjijska kjuyallanaca želatča. ³ Jalla nekzi wacchi laanaca želatča, zuranaca, zuch žoñinaca, ana tsjijtñinaca. Nii laa žoñinacaqui kjaz kizkiz tjewznatča. ⁴ Awiz awizaqui tsjii anjilaqui nii cochquiz tjoñičha kjaz tjarñi. Jalla nuž nii kjaz tjarnan, primera kjazquiz luzzi žoñiqui žejtchi cjisñitača, čhjul laaquiztanami. ⁵ Tsjii laa žoñiqui quinsa tunc quinsakalcun wata laa želatča. ⁶ Jesusaqui nii laa žoñi cherchiča. Nektan Jesusaqui zizzi cjissiča, nii žoñi ažk watanaca laachitača, nii. Jalla nuž zizcu nii laa žoñžquiz pewcziča tuž cjican:

—¿Žejtchi cjissim pecya?

⁷ Nii laa žoñiqui kjaaziča tuž cjican:

—Señor, anaž jecmi tii kjaz tjarnan wejr luzkatñi žejlča. Luz pecučha, pero yekjakaz wejt tuqui luzza, tii kjazquizqui.

⁸ Nektanaqui Jesusaqui nižquiz cjichiča:

—Žaazna, am tjajz zquiti apta, ojklaya.

⁹ Jalla nii orapacha žejtchi cjissiča. Niiz tjajz zquiti aptižcu ojkchiča. Jeejz tjuñquiz nii čhjetintaqui watchičha. ¹⁰ Jalla nižtiqiztan judfo žoñinacaqui nii čhjetinta žoñžquiz tuž chiižinchiča:

—Jeejz tjuñquiziqui, anača tjajz zquiti joojooz cjitaqui. Lii quintrala niiqui.

¹¹ Nii čhjetinta žoñiqui tuž kjaaziča:

—Jalla nii wejr čhjetiñi žoñiqui wejr mantichiča, tuž cjan: “Tjajz zquiti aptižcu, oka”. Jalla nuž cjichiča.

¹²Nii judío žoñinacaqui pewcziča tuž cjan:

—Ject amquiz nuž cjichejo, “Tjajz zquiti aptižcu oka”, cjanajo?

¹³Jesusaqui nii oraqi walja nekz žejlñi žoñinacž taypiquiztan katchiča. Jalla nižtiquiztan nii žoñiqui ana pajchiča, ject nii čhjetinčhaja, jalla nii. ¹⁴Niiž wiruñ Jesusaqui nii laaquiztan žejtchi žoñžtan zalchiča timpluquin. Nekztan niižquiz cjichiča:

—Jila, amqui žejtchamča. Jaziqui ana wila uj paaquiča. Uj paaquiz niiqui, amquiz juc'ant anawlim cjisnasača.

¹⁵Jalla nekztanaqui nii žoñiqui judío žoñinacžquin mazñi ojkcichiča, Jesusača nii čhjetiñi žoñiqui, jalla nii mazziča. ¹⁶Nii Jesusaž nižta jeejz tjuñquiz čhjetintiquiztan judío žoñinacaqui Jesusiž quintra cjissiča; conz pecatča. ¹⁷Ninacžquiz Jesusaqui tuž cjichiča:

—Wejt Yooz Ejpqui tiraž langža, wejrmi nižtapachal langznuča.

¹⁸Jalla nižta chiitiquiztan nii judío žoñinacaqui juc'ant žawjchiča, nižaza juc'anti conz pecatča. Jesusaqui jeejz tjuñquiz ana permitta langz mantichiča, judío žoñinacž lii quintra. Nižaza “Yooz Ejpča wejt persun Ejpqui” cjan chiichiča. Nuž cjan “Wejrmi Yoozakatča” cjichiča. Jalla nižtiquiztan nii judío žoñinacaqui Jesusiž quintra juc'anti aptichiča, conzjapa.

JESUCRISTUČHA YOOZ MAJCHQUI

¹⁹Nižaza Jesusaqui tuž cjichiča:

—Ančhucaquiz weraral chiyuča. Wejrčča Yooz Majchqui. Pero persun kuzcama anal paasača. Yooz Epiž tjaata obranacal paa-uča. Jaknužt Yooz Ejpqui obra paačhaja, jalla nužuzakaz wejr Yooz Majchqui obra paa-uča. ²⁰Yooz Ejpqui wejr k'aachiča, nižaza tjapa niiž paata obranacami wejtquiz tjeeža. Nižaza Yooz Ejpqui juc'anti pajk obranacaz tjeeznaquiča, ančhuc ispantichi cjeajo. ²¹Jaknužt Yooz Ejpqui ticzinaca jacatatskatčhaja, nižaza wila žeti tjaachaja, jalla nižta zakaz wejrqui žeti tjaacha, wejt munañpicama. ²²Yooz Ejpqui persunpacha ana casticu tjaacha. Pero wejtquiz tjapa niiž mantiz poder intirjichiča castictu tjaazjapa. ²³Jalla nuž intirjichiča, tjapa žoñinaca wejtquiz rispitažo, jaknužt Yooz Ejpžquin rispitchaja, jalla nuž. Jakziltat wejtquiz ana rispitchaja, jalla niiqui wejr cuchanžquini Yooz Ejpžquin ana zakaz rispitcha.

²⁴Ančhucaquiz weraral chiyuča. Jakziltat weriž chiita taku nonžcu tjapa kuztan catokčhaja, nižaza wejr cuchanžquinižquiz kuz tjaachaja, jalla niiqui Yooztan wiñaya kamča. Nižaza ana casticta cjequiča. Infiernuquin ojknii jiczquiz eccu, arajpach ojknii jiczquiz kamča, Yooztan wiñaya kamzjapa. ²⁵Ančhucaquiz weraral chiyuča. Tsjii timpu tjonča, nižaza anzimi nii timpuča. Anziqui ticzižtakaz kamñi žoñinacaqui wejt taku nonznaquiča. Jakziltat wejt taku nonžcu tjapa kuztan catokačhaja, jalla niiqui ew kamañchiz kamaquiča. Yooz Majchtča wejrqui. ²⁶Yooz Ejpqui persunpacha žejtkatz poderchizza. Nižaza wejt Yooz Ejpqui nii poder wejtquiz intirjichiča. ²⁷Wejrqui tsewctan cuchanžquita Yooz Žoñiča. Jalla nižtiquiztan Yooz Ejpqui pjalz puestuquiz wejt utchiča. Jaziqui arajpachquin kamzmi nižaza infiernuquin casticizmi jalla nii mantiznaca wejtquiz intirjichiča. ²⁸Tii weriž chiitiquiztan ana ispanta. Tsjii timpu tjonča. Jalla nii timpuquiz tjapa ticzinacaqui wejt joraž nonznaquiča. Nekztan sipulturquiztanž žaaznaquiča. ²⁹Zuma kamchinacaqui jacatataquiča Yooztan wiñaya kamzjapa. Ana zuma kamchinacazti jacatataquiča infiernuquin casticta cjisjapa.

YOOZ EJPŽTAN YOOZ MAJCHTAN

³⁰“Wejrqui persun kuzquiztanac anal pjalnasača. Jaknužt wejt Yooz Ejp mantičhaja, jalla niicamal pjalnuča. Anal wejt kuzquiztan pjalz pecuča. Antiz wejr cuchanžquiniž kuzcama pjalz pecuča. Jalla nižtiquiztan weriž pjaltaqui ligitumača. ³¹Wejrkal persunpacha wejt favora chiyasaž niiqui, weriž chiita taku anaž walasača. ³²Pero yekja tisticu wejt favora žejlča. Jalla niiča Yooz Ejpqui. Niiž wejt puntuquiztan chiita takuqui werarapanča. Jalla nii zizuča. ³³Ančhucqui Juanžquin pewcziči cuchanžquichinčhucča

wejt puntuquiztan. Niiž kjaaztaqui werarapanča. ³⁴ Žoñiž wejt favora werara chiiñiž cjenami, wejtquiz anaž ancha importiča. Yooz Ejpča wejt favora ultim werara chiiñiqui. Nuž cjiwča, ančhuc wejtquiz criyajo, ančhuc liwriita cjisjapa. ³⁵ Juanqui tsjii tjeezta lamparažtakaz kjanatča. Jalla nuž kjančan nii Juanqui wejt puntu kjanzt'ichiča. Nižaza tsjii upacamakaz niiž kjanquiz ančhucqui cuntintu kamchiča. ³⁶ Juanqui wejt favora chiičiča. Pero tsjiiqui željča Juanžquiztan juc'anti. Jalla niiča Yooz Ejpqui. Niiqui wejt favora zakaz chiiča. Nižaza wejt Yooz Ejpqui wejr mantičiča obranaca cumplizjapa. Tii obranacquiztan wejr pajtapan cjesača, Yoozquiztan tjonchin, ana Yoozquiztan tjonchin, nii. Tii weriž paata obranaca kjanapacha tjeeža, Yooz Epiž wejr cuchanžquita, jalla nii. ³⁷ Wejr cuchanžquiñi Yooz Ejpča wejt favora chiiča. Ančhucqui niiž persun jora ana nonznasača nižaza niiž tsiti ana cherasača. ³⁸ Yooz Ejpqui wejr cuchanžquičiča. Pero ančhucqui wejtquiz ana criiča. Jalla nižtquiztan niiž takumi ančuca kuzquiz ana zakaz catokča. ³⁹ Ančhucqui cjiirta Yooz taku ančaž istutičiča. Nekztan ančhucqui tantičiča, “Yooz taku istutičičiž cjen wejrnacqui Yooztan wiñaya kamaka,” cjican. Pero nii cjiirta Yooz takunacaqui wejt puntuquiztanž chiiča. ⁴⁰ Jalla nuž istutižcupacha, ančhuczi anaž wejtquiz macjatž pecča, Yooz Ejpžtan wiñaya kamzjapaqui.

⁴¹ Žoñinacaž tjaata honora wejtquiz anaž importiča. ⁴² Ultim ančhucqui ana Yoozquin kuzzičhucča. Nii zizuča. ⁴³ Wejt Yooz Ejpž cuntiquiztan tjonchi cjenami, ančhucqui anaž wejr criiča. Pero yekja žoñiqui persun kuzcama ančucaquiz tjonasaž niiqui, niižquiz criyasaž, jaz. ⁴⁴ Ančhucqui ančhucporaž honorchiz cjevas pecča. Ančhucqui Yooziž tjaata honorchiz cjisjapa anaž importiča. Jaziqi, ĵaknužt ančhuc wejr criyasajo? ⁴⁵ Ančhucqui Moisés liiquiz kuz tjaachiž cjen, pinsaquiča, Yooztan wiñaya kamaka, jalla nii. Pero nii Moisespacha ančuca ujnacaž tjeeznaquiča, Yooz Ejpž yujcquiziqui. Anača wejrqui Yooz Ejpž yujcquiz ančuca ujnaca tjeezniñtqui. ⁴⁶ Moisesqui wejt puntuquiztan cjiirčiča. Jalla nižtquiztan ančhucqui Moisés cjiirta criitasaž niiqui, wejtquiz zakaz criitasača. ⁴⁷ Ančhucqui nii Moisés cjiirtanaca ana criičaj niiqui, ĵaknuž weriž chiitanaca criyasajo?

6

JESUSAQUI ČHJERI TJAĀČHA

¹ Jalla nuž chiižcu Jesusaqui Galilea cjita kotž nawjctuiñtan ojkičiča. Nii kotaqui Tiberias, cjitazakaztača. ² Walja žoñinacaqui niižquin apziča, milajrunaca paañi cherčzu nižaza laanaca čhetinchi cherčzu. ³ Pero Jesusaqui tsjii curu yawhiča niiž tjaajintanacžtan. Jalla nicju julziča. ⁴ Nii oraqui judío žoñinacž pascua pjijzta žcatitača. ⁵ Acha waytižcu, Jesusaqui walja žoñinaca apžquiñi cherchiča. Nekztanaqui Felipžquiz paljaychiča, tuž cjican:

—ĴJakquiztan lujlž čhjerinaca kajyžcaqui, tii tama žoñinacžquiz luli tjaazjapaya?

⁶ Jesusaqui nuž chiičiča Felipe yanzjapa, jaknužt kjaazñi, jalla nii. Nii ora Jesusa persun kuzquiz zizatča, jaknužt nii žoñinaca luli tjaačhaja, jalla nii. ⁷ Nekztanaqui Felipiqui kjaaziča, tuž cjican:

—Paa patac pajk paaz lurchiz t'anta anaž alcansasača, zapa mayni zkoluccama lujlž cjenami. ⁸ Tsjii tjaajintaqui, Andrés, cjitatača, Simón Pedruž lajk. Jalla niiqui tuž cjichiča:

⁹—Tekz tsjii uza željča, pjijska siwat t'antichiz, pizc ch'izziz. Pero ĵtama žoñinacžquiz wacas teejo?

¹⁰ Nekztanaqui Jesusaqui mantičiča:

—Tjappacha nii žoñinaca, julznajo.

Jalla nii yokaqui walja pastu yokatača. Nekziqui tsjii pjijska warank luctak žoñinaca julziča. ¹¹ Jalla nekztanaqui Jesusaqui nii t'anta tanžcu, Yoozquin gracias cjican cjichiča. Nekztanaqui tjaajintanacžquin tjaachiča. Jalla nii tjaajintanacaqui partir paychiča nii julzi žoñinacžquiz. Nužuzakaz nii pizc ch'iztan tojžcu, lujlkatchiča, jaknužt zapa mayni

pecatčhaja, jalla nuž. ¹²Jalla nuž nii žoñinacaž chjekchiž cjen, Jesusaqui niiz tjaajintanaca mantichiča, tuž cjan:

—Nii žejtchi t'unanaca ricuja, ana čhjulumi pertita cjeajo.

¹³Nekztanaqui žoñinacaž lujl žeržtan, niiz tjaajintanacaqui nii pjijska siwat t'antiquiztan žejtchinaca ricujchiča. Tuncapan canasta chjijpi ricujchiča. ¹⁴Nekz žejlñi žoñinacaqui Jesusiž paata milajru cheržcu, tuž cjichiča:

—Chekapani, tiikalala nii tjonñi profetaqui.

¹⁵Jesusaqui ninacž kuzquiz naychiča. Ninacaqui Jesusa pporzaž majkz pecatčha, ninacž chawc jiliri cjeajo. Jalla nižtiquiztan Jesusaqui ninacžquiztan zarakžcu cur punt kjutñi yawchiča, zina žejljzapa.

JESUSAQUI KJAZ JUNTUŃ OJKČHA

¹⁶Tjuñiž kattan niiz tjaajinta žoñinacaqui kot atquin chjijwžquichiča. ¹⁷Nii curquiztan chjijwžcu warcuquiz luzziča, Capernaum watja irantizjapa. Jalla nekztanaqui kotquiz oki kallantichiča. Ween zumchitača. Jesusaqui imapanž ninacžquin tjonatčha. ¹⁸Kotquiz okan tsjii pjursant tjamiqui tjamžquichiča. Jalla nižtiquiztan kjaz ljojkinacaqui waljaž ljojkinžquichiča. ¹⁹Tsjii tupu zkoluc jilalla ojkičhiž cjen, ninacaqui Jesusaž warcuquin žcatžinžquini cherchiča. Jesusaqui kjaz juntun tjonatčha. Pero Jesusižquiz ana pajatčha nii zumchiquiz cjen. Jalla nekztan ninacaqui ancha tsucchiča. ²⁰Nekztan Jesusaqui ninacžquiz tuž cjichiča:

—Werjtčha. Anača tsuca.

²¹Jalla nuž chiiitiquiztan ninacaqui Jesusa warcuquiz cuntintu luzkatchiča. Kot taypiquiztača. Pero nii ratupacha kot atquin cjišičha, jakzi wajtquin okatčhaja, jalla nicju.

ŽOÑINACAQUI JESUSA KJURČHA

²²Jakatažuqui nii kotž nawjctunñan ecta žoñinacaqui Jesusa ana cherchiča. Zezcu zeztan tsjii warcukaz želatčha. Jesusaqui warcuquiz ana luzziča. Niiž tjaajinta žoñinacakaz warcuquiz ojkičiča. Pero jakziquin Jesusaqui želatčhaja, ana zizziča nii ecta žoñinacaqui. ²³Nekztan yekja warcunacaqui irantižquichiča Tiberias cjita wajtquiztan. Jakziquin nii žoñinaca t'anta lujlchižlaja, jalla nicju irantižquichiča. Ima lujlkatan, Jesús Jiliriqui Yoozquin parličičha gracias cjan. ²⁴Nekzi ecta žoñinacaqui Jesusami niiz tjaajintanacami ana nekz cheržcu warcunacquiz luzziča. Capernaum watja ojkičiča Jesusa kjuri.

JESUCRISTUŽ CHIITA TAKU

²⁵Kot tsjii latuquin irantižcu, žoñinacaqui Jesusižtan zalchiča. Jalla nuž zalžcu niizquiz pewcziča tuž cjan:

—Tjaajiñi Maestro, ħčhjulora tekz irantižquichamtajo?

²⁶Jesusaqui ninacžquiz tuž kjaaziča:

—Ančhucaquiz ultim weraral chiižinuča. Zezcu ančhucqui t'anta lujlchinčhucča chjekjañcama. Jalla nižtiquiztanž ančhucqui wejr kjurčha. Weriž paata milajru anaž intintazza ančhucqui. Jalla niiz intintaztasaz niiqui anaž wejr kjurtasača čhjeri lujljzapakaz. Antiz wejr kjurtasača, Yooz puntu tsjan zizjapa. ²⁷Anača miranzñi čhjerquinaqui kuz tjaazqui. Tsjii ratujapakazza niiqui. Antis ana miranzñi Yooz čhjerquiñičha kuz tjaa. Yooz Ejpžtan wiñaya kamzjapača niiqui. Nii Yooz čhjeriqui wejrqui ančhucaquiz tjaasača. Yooz Ejpqui nijapa wejr utchipančha. Wejrqui tsewctan cuchanzquita Yooz Žoñičha.

²⁸Jalla nekztanaqui nii žoñinacaqui pewcziča tuž cjan:

—ħčhjul obranacat paaz waquisasaya, Yooz munaña cumplisjapaya?

²⁹Jesusaqui ninacžquiz kjaaziča, tuž cjan:

—Yooz cuchanzquita Žoñžquiz kuz tjaa; niizquiz criya. Jalla niičha Yooz munañpaqui.

³⁰Nekztanaqui ninacaqui cjichiča:

—ħAmqui čhjul milajrum tjeeznas, wejrnac cherzjapajo? Nekztan amquin criyasača. ħčhjul obram paa-as? ³¹Učhum tuquita atchi ejpnacaqui ch'ekti yokquin maná cjita

čhjeri lujlchiča. Nižaza nii puntuquiztan Yooz tawk libruquiz tuž cjjirtača: “Moisesqui ninacžquiz arajpachquiztan tjonni čhjeri tjaachiča”.

³²Jalla nuž chiitiquiztan Jesusaqui tuž kjaaziča:

—Ančhucaquiz ultim weraral chiižinuča. Moisesqui ančhuca atchi ejpnacžquiz čhjeri tjaachiča. Pero Moisesqui anača tjaachiqui ultim werar arajpach t'anta čhjeriqui. Wejt Yooz Ejpča ultim werar arajpach t'anta čhjeri tjaachiqui. ³³Jalla nii Yooziž tjaata t'antaqui arajpachquiztan chjijwžquichiča. Jalla niiča tii muntuquiz žejlñi žoñinacžquiz arajpach žeti tjaañiqui.

³⁴Nekztanaqui ninacaqui Jesusižquiz cjichiča:

—Señor, nii t'anta čhjeri panž tjaalla.

³⁵Jalla nekztanaqui Jesusaqui tuž cjichiča:

—Wejrtča arajpach žeti tjaani t'antitqui. Jequit wejtquin tjonachaja jalla niiqui ana wira čhjeri eeczñiz cjequiča; nižaza jequit wejtquiz criyačhaja, jalla niiqui ana wira kjaz kjara pasñiž cjequiča. ³⁶Tuqui wejrqui ančhucaquiz chiičinča, “Ančhucqui wejr cherčcumi wejtquiz ana criichinčhucča”. ³⁷Yooz Ejpqui wejt mantuquiz cjisjapa žoñinaca intirjichiča. Tjapa nii intirjita žoñinacaqui wejtquiz tjonauiča. Nižaza jakziltat wejtquiz tjonachaja, jalla niiqui ana weriž čhjatkataž cjequiča. ³⁸Wejrqui arajpachquiztan ana wejt persun kuczama payi tjonchinča. Antiz wejrqui wejr cuchanžquini Yooz Ejpž kuczama payi tjonchinča. ³⁹Jalla tiiča wejt Yooz Ejpž kuzqui. Niiž kuz tuž pecča, wejr ana zinta niiž intirjita žoñinaca pertiskatajo, nižaza ninaca jacatatskatajo. ⁴⁰Nižaza tiiča wejt Yooz Ejpž kuzqui. Niiž kuz tuž zakaz pecča, jequit wejr pajačhaja, nižaza wejtquin criyačhaja, jalla niiqui Yooztan wiñaya kamaquiča. Nižaza wejrqui ninaca ticziquiztan jacatatskatača ultim juyzu pjalz tjuñquiziqui. Jalla nužuča wejt Yooz Ejpž kuzqui.

⁴¹Tuqui Jesusaqui chiičiča, tuž cjican:

—Wejrtča arajpachquiztan tjonchi t'antitqui. Jalla nii chiitiquiztan judío žoñinacaqui niiž quintra chutchiča. ⁴²Ninacaqui cjichiča:

—¿Anaj tii Jesusac Jus maatejo? Učhumqui niiž maa ejpžquiz pajla. ¿Kjaž tiizti “Arajpachquiztan tjonchinča” cjican chiyasajo?

⁴³Jalla nekztanaqui Jesusaqui ninacžquiz cjichiča:

—Ančhucqui anaž nuž wejt quintra chucha.

⁴⁴Yooz Ejpqui wejr cuchanžquichiča. Nižaza niiča wejtquiz macjatskatñiqui. Jakziltat wejt Epiž macjatskata cječhaj niiqui jalla ninacakaz wejtquiz tjonasača. Anažlaj wejt Epiž macjatskatžquitaqui, wejtquiz anaž tjonasača. Nižaza jacatatz tjuñquiziqui wejtquiz criichinacaqui jacatatskatača, ninaca Yooztan wiñaya kamzjapa. ⁴⁵Profetanacaqui tuquitan tuž cjjirchiča: “Yoozqui tjapa niiž partir žoñinacžquiz tjaajnaquiča”. Jalla nižtiquiztan jequit wejt Epiž tjaajinta nonžaja, nižaza catokčhaja, jalla niiqui wejtquiz tjonča, nižazaž criiča.

⁴⁶Jalla nuž wejt Yooz Epiž tjaajinta cjenami, anaž jecmi persun čhjujčtan Yooz Ejp cherchiqui. Wejr alajača Yooz Ejp cherchintqui. Wejrqui Yooz Ejpžquiztan tjonchinča. ⁴⁷Ančhucaquiz ultim weraral chiyuča. Jequit wejtquiz criyačhaja, jalla niiqui Yooztan wiñaya kamča; nižaza arajpachquin žejtñiž cjequiča. ⁴⁸Wejrtča arajpach žeti tjaani t'antitqui. ⁴⁹Ančhuca tuquita atchi ejpnacaqui ch'ekti yokquin maná cjita t'anta lujlchiča. Pero nii t'anta lujlchiž cjenami, ninacaqui ticzizakazza. ⁵⁰Wejrtča arajpachquiztan tjonchi t'antitqui. Jequit wejt t'antiquiztan lulačhaja, jalla niiqui Yooztan wiñaya kamaquiča; arajpachquin žejtñiž cjequiča. ⁵¹Wejrqui arajpachquiztan tjonchinča. Jajiqui wejrpanča žeti tjaani t'antitqui. Jequit tii t'antiquiztan lulačhaja, jalla niiqui Yooztan chica wiñaya kamaquiča. Tii wejt curpuqui t'anta cuntača. Wejt curpuqui tjaaača, tii muntuquiz žejlñi žoñinaca Yooztan wiñaya kamajo. ⁵²Jalla nuž chiitiquiztanaqui nii judío žoñinacaqui ninacpora ch'aazi kallantichiča, tuž cjican:

—¿Kjaž tiiz persun curpu učhum lulajo tjaasajo?

⁵³Jesusaqui nekztanaqui cjichiča:

—Ančhucaquiz weraral chiyučha. Jequit ančhucaquiztan wejt curpu ana lulačhaj niiqui, nižaza wejt ljoc ana licačhaj niiqui, jalla niiqui anapanž ultimu arajpach žejtz wirchiz cjesača. Anapan Yooztan wiňaya kamasacha. ⁵⁴ Jequit wejt curpu lulačhaj niiqui, nižaza wejt ljoc licačhaj niiqui, jalla niiča Yooztan chica wiňaya kamñiqui. Nižaza nii žoñinacaqui tsjii tjonz tjuñquiziqui weriž jacatatskattaž cjequičha, Yooztan wiňaya kamzjapa. ⁵⁵ Wejt curpuqui ultimu arajpachquin žejtkatni čheričha. Nižaza wejt ljocča ultimu arajpachquin žejtzjapa liczqui. ⁵⁶ Jequit wejt žejtkatni curpu lujlčhaja, nižaza wejt žejtkatni ljoc licčhaja, jalla ninacača wejttan tsjii kuzzizqui. Nižaza wejrtča ninacžtan tsjii kuzzizqui. ⁵⁷ Wejr cuchanžquiñi Yooz Ejpča arajpach žejtñi kamañchizqui. Wejrmi niž cjen arajpach žejtñi kamañchiztča. Nižaza jequit wejtquiztan lujlčhaja, jalla niiča weriž cjen arajpach žejtñi kamañchizqui. ⁵⁸ Wejrtča nii arajpachquiztan tjonchi t'antitqui. Jalla tii t'antaqui anača nii maná cjita t'anta irataqui. Nii maná t'anta lujlchiz cjenami, ančhuca tuquita atchi ejpnacaqui ticziča. Jequit tii wejt t'anta lulačhaja, jalla niiqui arajpachquin wiňaya žetaquičha.

⁵⁹ Jalla nuž Jesusaqui tjaajinčiča Capernaum wajtquiz ajcz kjuyquiz.

TSJII ŽOÑINACAQUI ANAŽ CRIIČHA

⁶⁰ Jalla nižta tjaajinta nonžcu walja nižquiz apzñinacaqui tuž cjichiča:

—Tii chiitaqui ch'amača intintazqui. ¿Jequit tiž tjaajintizquiz criyasajo?

⁶¹ Jesusaqui persun kuzquiz zizziča, tsjii apzñi žoñinacaqui niž chiitiquiztan chutčiča jalla nii. Jalla nižtquiztan tuž cjichiča:

—¿Tii chiitiquiztan chuchya, wejtquiztan zarakz pecya? ⁶² Tuquiqui arajpachquin wejr želatča. Ančhucqui wejr wilta arajpachquin ojknī cheraquiz niiqui, nektzan žaknužt ančhuc cjeequi? ⁶³ Tsjii žoñiqui animuž cjen žejtča. Niiž curpuqui curpukazza, ana wiňaya žejtñičha. Nižaza weriž chiita takuqui ančhuca animunaca arajpachquin žetñi cjiskatasacha, Yooztan wiňaya kamajo. ⁶⁴ Yekjapanacaqui ančhucaquiztan wejtquiz ana criičha.

Jesusaqui primirquiztanpacha zizziča, jequit nižquin ana criiči cječhaja, jalla nii Nižaza zizziča, jequit niž quintra tarazuna paáčhaja, jalla nii. ⁶⁵ Jalla nektzanaqui Jesusaqui tuž cjichiča:

—Wejrqui cjichinpanča, “Yooz Ejppankazza žoñinaca wejtquiz macjatskatñiqui, wejtquiz criizjapa. Jequit wejtquiz macjatžquiči cječhaja, jalla niiqui wejtquiz tjonča, nižaza criičha. Pero jequit ana macjatžquiči cječhaja, jalla niiqui anapan wejtquiz tjonasacha, criizjapa”.

⁶⁶ Jalla nektzanaqui walja nii apzñinacaqui Jesusižquiztan zarakchiča. Niižtan chica ana iya ojklaychiča. ⁶⁷ Nektzanaqui Jesusaqui niž tuncapan tjaajintanacžquiz pewczičha, tuž cjican:

—¿Ančhuczakaz zarakz pecya?

⁶⁸ Nektzanaqui Simón Pedruqui kjaaziča, tuž cjican:

—Wejt Jiliri, ¿jecžquin wejrnac okasajo? ¿Yooz puntu tjaajinta cjisjapajo? Am takunacakazza werara tjaajintaqui, jaknužt Yooztan wiňaya kamčhaja, nii. ⁶⁹ Wejrnacqui amquiz criichinča. Nižaza zizñi cjissinča, amqui Yooz cuchanžquita Cristumpanča; wiňaya žejtñi Yooz Ejpž Maatimča.

⁷⁰ Jesusaqui nektzan tuž cjichiča:

—Wejrqui ančhuc illzinča, tuncapani. Jalla nižta cjenami tsjii ančhucaquiztan diabluž mantuquiz žejlča.

⁷¹ Jalla nuž chiican Jesusaqui Judas Iscariote, niž puntuquiztan chiichiča. Simonž majčtača niiqui. Judasqui tuncapan illzta žoñinacžquiztanpachača. Niiqui tarasunažcu, Jesusa intirjaquičha quintra žoñinacž kjarquiz.

¹Jalla nektanaqui Jesusaqui Galilea yokaran ojklaychiča. Judea yokquin ana ojklayz pecatča. Jalla nicju judfo žoñinacaqui Jesusa conz pecatča. ²Nii timpuqui tsjii judfo žoñinacž pijjztaqui žcatitača. Nii pijjzta paazjapa chjujlla kjuyanaca kjuychiča. ³Jalla nižtiquiztan Jesusiž lajknacaqui nižquiz paljajchiča, tuž cjan:

—Ana tekz žela amqui. Judea yokquin oka. Jalla nicju am apzñinaca žejlča. Jalla ninacžquiz amiž paata obranaca cherskata. ⁴Jakziltami žoñinacžquiz persun poder cherskatz pecčhaja, jalla niiqui anaž chjojzacuñ obranaca paača. Jaziqui amqui obranaca paaz poderchizzamžlaj niiqui, kjanapacham žoñinacžquiz tjeeznaquiča.

⁵Jesusiž lajknacami ana nižquin criichiča. ⁶Nekztan Jesusaqui ninacžquiz cjichiča:

—Ančhucqui čhjulorami pijjzta okasača. Wejt ojzk oraqui imaziča. ⁷Tii muntuquiz žejlñi žoñinacaqui ančhucatan ana chjaawjkatasacha. Wejttanztii chjaawjkatča. Wejrqui kjanapacha tjeeznuča ninacaž ana wali paatanaca. Jalla nižtiquiztan wejttan quintracha.

⁸Ančhucakaz pijjzta oka. Wejrqui anal okasača. Wejt ojzk oraqui imaziča.

⁹Jalla nuž chiižcu, nii Galilea yokquin eclichiča.

JESUSAQUI PIJIZTA OJKCHIČHA

¹⁰Niž lajknacaž pijjzta ojktanaqui Jesusaqui chjojzacuñ ojkhizakazza, žoñinaca ana cherajo. ¹¹Judfo žoñinacazti Jesusa kjurchiča nii pijjzta paañi žoñinacžporquiz, tuž cjan:

—¿Jakziquin nii žoñi želasaya?

¹²Wacchi nii pijjztiquin žejlñi žoñinacaqui Jesusiž puntu parlatča. Yekjap žoñinacaqui cjetča: “Niiča zuma žoñiqui”. Yekjap žoñinacazti cjetča: “Niiča ana zuma žoñiqui. Žoñinacžquiz tsjii kjutñi tjaajincan incallñiča”.

¹³Pero judfo jilirinaca ekscu, anaž jecmi Jesusiž favora cuza kjana parlatča, antiz jamazitž parlatča.

¹⁴Pijjzta taypi cjisnan, Jesusaqui timpluquin luzcu tjaajinchiča. ¹⁵Jesusaž nuž tjaajnan judfo žoñinacaqui ispantichiča, tuž cjan:

—¿Kjaž tii žoñiqui zizñi zizñi tjaajnasajo, ana instutiižchojo?

¹⁶Jalla nuž nii judfo žoñinacaž parlitiquiztan Jesusaqui tuž kjaaziča:

—Weriž tjaajintaqui anača wejt kuzquiztan jwesta. Antiz wejr cuchanžquiñiž kuzquiztan tjonča. ¹⁷Jakzilat Yooz kuzcama kamz pecčhaj niiqui, nii žoñiqui zizaquiča, weriž tjaajintaqui Yoozquiztan tjonchiča, nii. Anača wejt persun kuzquiztan tjonchiqui.

¹⁸Jakzilat persun kuzcama tjaajinčhaja, jalla niiqui persun honorakaz waytiz pecča. Pero wejrqui Yooz kuzcama tjaajnuča. Yooz Ejpqui wejr cuchanžquichiča. Jaziqui Yooz honora waytiz pecuča. Weriž tjaajintami kamtami Yooz kuzcamapankazza. Werarapanča. Ana zinta toscara chiyasacha.

¹⁹‘Moisesqui ančhucaltajapa lii ecchiča, ¿ana jaa? Jalla nuž ecchiž cjenpacha, anaž jecmi ančhucquiztan nii lii jaru kamchinčhucča. ¿Kjažtiquiztan ančhucqui wejr conz pecjo, ančuca lii quintrajo?

²⁰Jalla nižtiquiztan nii žoñinacaqui kjaaziča tuž cjan:

—Amqui zajraž tantamča. ¿Ject am conz pecjo?

²¹Jesusaqui ninacžquiz kjaaziča tuž cjan:

—Tsjii pajk obra paachinča jeež tjuñquiz. Jalla nižta paatiquiztan ančhucqui ispanichinčhucča. Pero weriž paata obra ana intintazinčhucča. ²²Nonžna. Moisesqui janchiquiz chimpuz cuzturumpi ančhucquiz mantichiča. Primirquiztanpacha ančuca atchi ejpnacatača nuž mantichiqui. Wiruñaquí Moisés zakaz nuž mantichiča, nii jaru. Jalla nižtiquiztan ančhucqui nii lii jaru žoñiž janchiquiz chimputa cjskatiñčhucča, jeež tjuñquizimi. ²³Moisés lii rispittapanž cjisjapa, ančhucqui jeež tjuñquiz cjenami žoñiž janchiquiz chimputa cjisinčhucča. Jalla nižtiquiztan ¿kjažtiquiztan ančhucqui wejt quintrajaw-jo, weriž jeež tjuñquiz žoñiž curpu čhetintiquiztanajo? ²⁴Ančhucqui, Yooz kuzmi nižaza žoñiž kuzmi ana zizcuqui, anača uj jwez peczqui. Ujchiz jwez peccuqui zuma ujchiz jwezpanča.

¿JAKZQUIZTAN TJONCHI JESUSAJO?

²⁵ Jalla nektanaqui yekjap Jerusalén žejlŋi žoŋinacaqui pewcziča, tuž cjican:

—Tiiča nii konz pecta žoŋi, žana jaa? ²⁶ Pero tekz žejl-la, anaž chjojzacuŋ tjaajinla; kjanaž tjaajinla. Niiž quintra žoŋinacaqui ana kjažmi cjila. Jaziqui, žilirinacami pajkay, tiiqui Yooz cuchanžquita Cristokay? Anapanž cjesača. ²⁷ Wejrnacqui zizuča, jakziquiztan tii žoŋi tjonchižlaja, jalla nii. Pero Cristuž tjonžcuqui anaž jecmi zizaquičha jakziquiztan tjončhaja, jalla nii.

²⁸ Jalla nektanaqui Jesusaqui timpluquin tjaajincan, alto tawkžtan tuž cjichiča:

—Ančhucqui cjiŋchucča, nii žoŋi pajuča, nižaza jakziquiztan tjonchižlaja, nii. Ul-timu ančhucqui wejr ana pajča. Wejrqui persun kuzquiztan ana tjonchinča. Antiz cuchanžquita tjonchinča. Nii wejr cuchanžquiniiqui zuma lujitumača. Nižaza ančhucqui nii ana pajča. ²⁹ Pero wejrqui nižquiztan tjonuča. Nižaza niiqui wejr cuchanžquichiča. Jalla nižtiquiztan wejrqui nii pajuča.

³⁰ Jalla nižta chiitiquiztan ninacaqui preso tanz pecatča. Jesusiž preso tanta cjis oraqui imazitača. Jalla nižtiquiztan ana jakziltami tanzŋi atchiča. ³¹ Jalla nuž tanz pecŋi žoŋinaca želanami walja žoŋinacaqui Jesusižquin criichiča. Nii criichinacaqui tuž cjichiča:

—Yooz cuchanžquita Cristo tjonžcuqui, žtii žoŋžquiztan juc'ant cuza milajrunaca paasajo?

ZULTATUNACA CUCHANTA

³² Jalla nektanaqui fariseo žoŋinacaqui Jesusiž puntu chiitanaca nonžcu, ninacaqui timplu žilirinacžtanpacha Jesusa preso tani zultatunaca cuchanžquichiča. ³³ Jalla nižtiquiztan Jesusaqui cjichiča:

—Wejrqui tsjii kjaž žiizkal ančhucatan želača, jalla nektan wejr cuchanžquinižquin quepača. ³⁴ Jalla nektan ančhucqui wejr kjuraquičha. Jalla nuž kjurcan anaž wejr wachi ataquičha. Nižaza ančhucqui anaž oki atasacha, jakziquint wejr želačhaja, jalla nicju.

³⁵ Jalla nektanaqui nii judío žoŋinacaqui ninacpora pewcsassiča, tuž cjican:

—ŽJakziquint tii okas, ana watžta cjisjapajo? ŽYekja yokquin kamŋi judío žoŋinacžquin nižaza nekz žejlŋi žoŋinacžquin okas teejo, ninacžquin tjaajinzjapajo? ³⁶ ŽČhjulut tiiž chiitac cjes? “Ančhucqui wejr kjuraquičha, pero wejr ana wachi ataquičha”, cjican. Nižaza “Ančhucqui anaž oki atasacha, jakziquint wejr želačhaja, jalla nicju” cjican. Jalla nuž chiyanaqui, žčhjulut cjes?

³⁷ Jalla nektanaqui pjižta tucuziŋž tjuŋquiziqui wali chawc tjuŋitača. Jalla nii tjuŋquiziqui Jesusaqui tsijtscu, alto tawkžtan paljaychiča:

—Jakziltat kjaz kjara passaja, jalla niiqui wejtquiz macjatžca, wejt wiŋaya žejtkatŋi kjaz liczjapa. ³⁸ Jequit wejtquiz cryačhaja, jalla niiž kuzquiztan walja zumanaca ulnaquičha jaknužt tsjii zuma jalzurquiztan zuma kjaznaca ulančhaja, jalla nižta. Jalla nuž Yooz tawk libruquiz cjirtača.

³⁹ Jalla nuž chiican Jesusaqui Espiritu Santuž puntuquiztan chiichiča. Wiruŋaqui Yooz Espiritu Santuqui Jesusižquiz criichinacž kuzquiz luzaquičha. Pero Jesusaqui imaž ticznatča, nižaza imaž tsewc arajpacha okatča. Jalla nižtiquiztan imazitača Espiritu Santo tjaataqui.

CRISTUŽ PUNTU PARLITA

⁴⁰ Jalla nuž Jesusaž chiita nonžcu yekjap žoŋinacaqui cjichiča:

—Chekapan tiiča nii tjonŋi profetaqui.

⁴¹ Yekjapazti tuž cjichiča:

—Tiiča Yooziž cuchanžquita Cristuqui.

Yekjapanacaqui cjichiča:

—ŽKjaž Galilea žoŋinacžquiztan Cristuc nasasajo? Anaž cjesača. ⁴² “Cristuqui Davidž majchmajtquiztan naspanča, nižaza Belén cjita wajtquin nasaquičha. Nii watjaqui Davidž watja cjitača”. Jalla nuž cjicha Yooz takuqui.

⁴³Jalla nuž parliču nii žoñinacaqui t'aka t'aka cjišičha, Cristuž puntuquiztan ch'aazcu.

⁴⁴Yekjapanacaqui Jesusa preso tanz pecatčha. Jalla nuž peccanami, ana jaknužumi payi atchičha.

⁴⁵Timplu zultatunacaqui timplu jilirinacžquinami fariseonacžquinami quejpcchičha, ana Jesusa preso tani atžcu. Nii jilirinacaqui zultatunacžquiz cjichičha:

—¿Kjažtiquiztan ančhuc nii ana zjijcjo?

⁴⁶Nii žultatunacaqui kjaazičha, tuž cjican:

—Anaž jecmi chiičha, jaknužt nii žoñi chiyatčhaja, jalla nužuqui. ¿Yooziž cuchanzquita nii žoñejo?

⁴⁷Jalla nektanaqui fariseo žoñinacaqui tuž cjichičha:

—¿Ančhuczakaz incallskatchinchucž, jaz? ⁴⁸Tjapa učhum jilirinacami nižaza tjapa fariseo žoñinacami nižquinanaqui ana cričhipanla. ⁴⁹Tii ana lii pajñi žoñinacaqui, jalla ninacakazza nižquin cričhiqui. Ninacaqui Yooziž castictapanž cjequičha.

⁵⁰Nicodemo cjitatačha tsjiiqui ninacžquiztan. Tuquiqui ween chjojzacuñ Jesusižquin zina ojkičha. Jalla niiqui ninacžquiz cjichičha:

⁵¹—Učhum liiqui tuž cjičha, “Tsjii žoñiqui ima casticta cjican, primero kjawžta cjequičha, niž persun razuna nonžta cjisjapa”. Nuž cjičha učhum liiqui, ¿ana jaa?

⁵²Nektanaqui ninacaqui kjaazičha tuž cjican:

—¿Am zakaz Galileaquiztanajo? Yooz taku istutiya. Anaž jec profetaqui Galileaquiztan tjonasačha. Jazim zizaquič, jaz.

⁵³Jalla nektanaqui tjappacha persun kjuya ojkičha.

8

ADULTERIUQUIZ OJKLAYŃI ŽON

¹Jesusaqui Olivos cjita curulla ojkičha. ²Jakatažuqui kjantati timpluquin quejpcquičičha. Tjapa nekž željñi žoñinacaqui nižquin tjonchičha. Jesusaqui julžcu wilta tjaajinchičha. ³Jalla nuž julzi tjaajnan, lii tjaajinacami fariseonacami tsjaa maatak žon zjijcchičha. Jalla naa maatak žonqui adulterio paachiž cjen tanstkalčha. Žoñinacaqui jalla nuž tanžcu naa maatak žon Jesusiž yujcquiz zjijcchičha. Nižaza nii željñi žoñinacž taypquiz tsjitskatchičha naa žonqui. ⁴Nektanaqui ninacaqui Jesusižquiz tuž paljajychičha:

—Tjaajni Maestro, taa maatak žonqui adulterio paanipacha tanassinčha. ⁵Moisés liiquiz tuž mantitačha, “Tižta adulteriuquiz cjičjiñi žoñinacaqui čhajc jawi conz cjitačha”. Am, ¿kjažum cjiy?

⁶Jalla ninacaqui nuž paljajychičha, Jesusa kjaz cjiñit cjes, jalla nii zizjapa. Nižaza Jesusiž chiitiquiztan ujchiz jwez pecatčha, niž quontra tsjii uj tjojtunzjapa. Jalla nektanaqui Jesusaqui pachpiquiz colžcu yokquiz cjičji kallantichičha, niž loc'anžtan. ⁷Pero ninacaqui tirapanž Jesusižquiz pewcnatčha, “Am, ¿kjažum cjiy?” cjican. Jalla nektan Jesusaqui zumpacha acha waytižcu, ninacžquiz cjichičha:

—Ančhucaquiztan jakziltapirižlaj ana ujchiz, niiqui primiru taa maatak žonaquiz maztan čhajczkazza.

⁸Jalla nuž chiižcu wilta colžcu yokquiz tira cjičratčha. ⁹Jalla nuž Jesusiž chiitiquiztan nii žoñinacaqui persun ujquiztan sint'ichičha. Nektanaqui mayat mayat ch'uju ulñi kallantichičha. Chawc žoñinacž primiraqui ulanchiqui. Nektan tjappacha nii žoñinacž ulantan, Jesusaqui naa maatak žonatan, nuž pucultankaz, eclichičha. ¹⁰Jalla nektanaqui Jesusaqui wilta acha waytichičha. Anaž jecmi želatčha. Naa maataka alajakztačha. Nektan naaquiz cjichičha:

—Cullaca. ¿Jakziquin amquiz uj tjojtunñi žoñinacajo? ¿Ana jakziltami am castiqui atchikaya?

¹¹Naa maatak žonqui cjičhinčha:

—Wejt jiliri, anaž jakziltami wejr castiqui atchičha.

Nektanaqui Jesusaqui naaquiz cjichičha:

—Wejrmi anal am ujquiztan casticača. Jaziqui oka amqui, anam iya uj paaquiča. — Nuž pertunchiča Jesusaqui.

KJANAŽTAKAZ JESUCRISTO

¹² Wiruñaqi Jesusaqui žoñinacžquiz wilta paljaychiča, tuž cjanan:

—Wejrqui tii muntuquiz žejlñi žoñinacžquiz zuma kamaña tjeeznuča, tsjii kjanažtakaz. Jakziltat wejt kamañ jaru kamačhaja, jalla niiqui anawal zumchiquiz anaž kamaquiča. Nižaza nii zuma kamañchiz žoñinacača wiñaya Yooztan kamñinacaqui.

¹³ Jalla nekztanaqui nii fariseo žoñinacaqui cjichiča:

—Am alaja am persunjapa chiiča. Jalla nižtiquiztan anaž walča.

¹⁴ Jesusaqui kjaaziča, tuž cjanan:

—Tii weriž chiitaqui wejt persunjapa cjenami walča. Wejrqui zizuča jakziquiztan tjontučhaja, nižaza jakzit wejr okačhaja, jalla nii. Anchuczi anaž nii zizza. ¹⁵ Ančhucqui žoñiž pinsita jarukaz wejtquiz uj tjojtz pecča. Pero wejt kuz ana zizza. Wejrzi anal niža uj tjojtñičha. ¹⁶ Pero weril tsjii žoñžquiz “Uj paachamča” cjeež niiqui, wejrqui weraral chiyučha nii žoñiž uj paañiž cjen. Anal wejt kuzquiztankaz chiyučha. Wejr cuchanžquiñi Yooz Ejpž kuzcamakal wejrmi chiyučha. Wejrmi wejt Yooz Ejpmi tsjiikaz chiyučha. ¹⁷ Ančuca liiquiz tuž cjiirtača: “Pucultan tistic žoñinacaqui tsjiikaz chiyaquiž niiqui ninacž chiitaqui walča”. ¹⁸ Wejrqui persun puntuquiztan chiyučha. Nižaza wejr cuchanžquiñi Yooz Ejpqui wejt puntuquiztan zakaz chiiča. Jaziqui weriž chiitaqui panž walča.

¹⁹ Jalla nekztanaqui ninacaqui Jesusižquin cjichiča:

—¿Jakziqint am Ejpjo?

Jesusaqui tuž kjaaziča:

—Ančhucqui wejr anaž ultimu pajča, nižaza wejt Ejpmi anaž pajča. Wejr ultimu pajčhaj niiqui, wejt Ejp zakaz pajasacha.

²⁰ Nuž tjaajincan Jesusaqui timpluquiz želatča. Jakziqin ofrenda utz cajanaca želatčhaja, jalla nekž želatča. Nuž želan, anaž jecmi Jesusa preso tanchiča. Jesusa preso tanta cjis oraqui imazitača.

JESUSA OJKZ PUNTU

²¹ Jalla nekztanaqui Jesusaqui wilta ninacžquiz cjichiča:

—Wejr okača. Jalla nekztanaqui ančhucqui wejr kjuraquiča. Pero jakziqint wejr okačhaja, jalla nicju ančhucqui anaž oki atasacha. Ančhucqui ticznaquiča persun ujquiztan ana pertunta.

²² Nekztanaqui nii judío žoñinacaqui cjichiča:

—Tiiqui chiiča, “Jakziqint wejr okačhaja, jalla nicju ančhucqui ana oki atasacha”, cjananž chiiča. ¿Tiiqui persunpacha curpu conasaya?

²³ Nekztanaqui Jesusaqui tuž cjichiča:

—Ančhucqui tii kozta yokchiz žoñčuckazza. Wejrzi tsewcta yokchiz žoñčha. Ančhucqui tii yokquiz žejlñi žoñž kuzcama kamiñčhucča. Wejrzi ana tii yokquiz žejlñi žoñž kuzcama kamiñča. ²⁴ Jalla nižtiquiztan wejrqui ančucaquiz chiichinča, ančhucqui ticznaquiča, persun ujquiztan ana pertunta. Ultimupan ančhucqui weriž chiitaqui ana catokaquiž niiqui, ticznaquiča, persun ujquiztan ana pertunta.

²⁵ Jalla nekztanaqui ninacaqui pewcziča, tuž cjanan:

—¿Jequimt amjo?

Jesusaqui tuž kjaaziča:

—Jaknužt wejt persun puntuquiztan chiintčhalaja, jalla niža žoñtpanča wejrqui. ²⁶ Ančuca puntuquiztan wejtta walja chiiz žejlča, ančuca uj tjeezjapa. Pero wejt chiizqui anača wejt kuzquiztanqui. Antiz wejr cuchanžquiñiž kuzcamapankazza. Wejr cuchanžquiñi qui werara chiiñipanča. Wejrqui nižquiztan nonžtanaca maznuča tii muntuquiz žejlñi žoñinacžquiz. Jalla nižtiquiztan weriž chiitaqui ančuca puntuquiztan ultim weraracha. —Jalla nuž chiichiča Jesusaqui.

²⁷ Jalla nuž Yooz Ejpž puntuquiztan chiyán, nii judío žoñinacaqui ana intintazziča.
²⁸ Jalla nekztan Jesusaqui cjichiča:

—Wejrqui tsewctan cuchanžquita Yooz Žoñtča. Čjulorat ančhucqui wejr tsewcchuc waytita cheráčhaja, jalla nii ora ančhucqui zizaquičha, weraracha wejt persun puntuquiztan chiitaqui, nii. Wejrqui anal wejt persun kuzquiztan kamuča. Antiz wejt Yooz Epiž kuzcama kamuča. Wejt waytiz oraqui jalla niizakaz zizaquičha. ²⁹ Wejr cuchanžquiñiqui wejttan chicaž žejlča. Wejrqui niiž kuzcamapan kamuča. Jalla nižtiquiztan wejt Ejpqui anaž wejr zina ecča.

³⁰ Jalla nuž Jesusiž chiitiquiztan muzpa žoñinacaqui nižquin criichiča.

LIWRIZ PUNTU

³¹ Jalla nekztanaqui Jesusaqui nižquiz criichi judío žoñinacžquiz cjichiča:

—Ančhucqui weriž chiita tawkquiz tjapa kuztan tjurt'aquič niiqui, ultim werara wejt partir žoñinaca cjequičha. ³² Nižaza Yooz takučha ultim weraraqui, nii zizaquičha. Jalla nuž werara zizcu liwriiž cjequičha.

³³ Nii ana criichi judío žoñinacaqui Jesusižquiz kjaaziča, tuž cjican:

—Wejrnacqui Abrahamž majchmajtquiztan tjoniñča. Jaziqi Yooz wajtchiz žoñinacča wejrnacqui. Yekjaž mantuquiz anaž wira žejlčinča. Amzti, ¿kjažtiquiztan chiichamta, “Ančhucqui liwriiž cjequičha” cjicanajo?

³⁴ Jesusaqui ninacžquiz cjichiča:

—Ančhucquiz weraral chiyučha. Jakziltat uj paacan kamčhaja, jalla niiqui ujž mantuquiz kamča. ³⁵ Tsjii mantita piyunaqui patrunž kjuyquiz kamchi cjenami ultimu anaž nii kjuychiz famillž partiquiz želasacha. Antiz nii famillž majchqui jalla niiča famillž partiquiz žejlñipanča. ³⁶ Jalla nižtiquiztan ančhucqui Yooz Majchiž liwriita cjequič niiqui ultim werara liwriita cjequičha, Yooz kjuychiz famillquiz cjisjapaqui. ³⁷ Wejr zizuča, ančhucqui Abrahamž majchmajtquiztan tjoniñčhucča, nii. Pero jalla nuž cjenami, ančhucqui weriž chiitanaca anapan catokča. Jalla nižtiquiztan ančhucqui wejr conz pecča. ³⁸ Wejrqui chiyučha, wejt Yooz Epiž chiitanaca, jalla nii. Ančhuczi ančhucua epiž chiita jaru paacha.

³⁹ Ninacaqui tuž kjaaziča:

—Wejtnaca atchi ejpča Abrahamqui.

Pero Jesusaqui ninacžquiz cjichiča:

—Ančhucqui ultimu Abrahamž majchmajtčhuc cjičhaj niiqui, niž kamta irataž kamčhani. ⁴⁰ Yoozquiztan nonžtanac jaru werara chiichinča. Jalla nuž werara chiitiquiztan ančhuczi wejr conz pecča. Abrahamqui ana nižta paachiča. ⁴¹ Ančhucqui persun epiž kamta irataž kamča.

Nekztanaqui ninacaqui cjichiča:

—Wejrnacqui anača adulteriuquiz kamñi maa ejpžquiztan tjoniñqui. Wejtnaca maa ejpnaca zizuča. Nižaza wejrnacqui tsjii arajpach Ejpchizkazza. Yoozza niiqui.

⁴² Jesusaqui nekztan cjichiča:

—Ančhucua ejpqui Yoozalaj niiqui, ančhucqui wejttan zuma munazitasacha. Wejrqui Yooz Ejpžquiztanča; nižquiztan tjonučha. Niiž pinsitiquiztan tekz ti muntuquiz želuča. Anal wejt kuzcamakaz tjončinča. Wejt Yooz Ejpqui wejr cuchanžquichiča.

⁴³ ¿Kjažtiquiztan ančhucqui weriž chiitanaca ana intintazasajo? Ančhucqui weriž chitanaca anapanž kuztan nonz pecča, nekztan. ⁴⁴ Ančhucua ultim ejpqui diablučha. Niiž kuzcama kamz pequiñčhucča. Primirquiztanpacha niiča žoñi conñiqui. Nižaza diablucqui werara chiizquiztan ana juyzu paañičha. Anapanča werar taku chiñi niiqui. Niiž ana zum kuzcamapan toscar takunaca chiičha. Niipankazza toscara chiñiqui. Nižaza niičha toscar chiñinacž ejpqui. ⁴⁵ Wejrqui ančhucquiz weraral chiyučha. Ančhucua diablu ejpchiz cjen, weriž werara chiitanaca ana criñčhucča. ⁴⁶ ¿Ject ančhucquiztan tsjii weriž paata uj tjeenasasajo? Wejrqui Yooz taku werarapan chiyučha. ¿Kjažtiquiztan wira ana wejtquiz crii ančhucjo? ⁴⁷ Yooz partir žoñinacaqui Yooz takuž nonža. Ančhuczi anapanča Yooz partira. Jalla nižtiquiztan ančhucqui Yooz taku ana nonz pecča.

IMA ABRAHAM ŽELAN, JESUCRISTUQUI ŽELATČHA

⁴⁸Nekztan judfo žoñinacaqui Jesusižquiz kjaazičha tuž cjan:

—Amqui anawal Samaria wajtchiz žoñimžlani. Zajraž tanta žoñimžlani. Nužupančha.

⁴⁹Jesusaqui ninacžquiz tuž kjaazičha:

—Wejrqui anačha zajraž tantitqui. Wejt Yooz Ejpž honora waytučha. Ančhuczti wejr iñarcan wejtquiz anaž honora tjaačha. ⁵⁰Wejrqui persun honora ana waytiz pecučha. Tsjiiqui žejlčha. Jalla niičha wejt honora waytiz pecñiqui. Jalla niičha ligituma pjalžñiqui. ⁵¹Wejrqui ančhucaciz weraral chiyučha. Jequit weriž chiitacama kamčhaja, jalla niiqui ana ticžñiž cjequičha; Yooztan wiñaya kamaquičha.

⁵²Jalla nuž chiitiquiztan judfo žoñinacaqui tuž kjaazičha:

—Jalla nuž amiž chiitiquiztan wejrnaacaqui zizzinčha, zajraž tantapanimkalal amqui. Abraham ticzičha; profetanacami ticzizakazza. Amzti cjičha, “Jequit weriž chiitacama kamčhaja, ana ticžñiž cjequičha”, nii. ⁵³Amqui wejtnacaž ticzi Abraham ejpžquiztan tsjan jilirim cjes, ¿kjažtatajo? Yooztajapa chiiñi profet žoñinacami ticzičha. ¿Chjul žoñipanim amzť cjesajo?

⁵⁴Jesusaqui tuž kjaazičha:

—Wejt persun honora waytaž niiqui, jalla nuž waytita honoraqui anaž walčha. Wejt Yooz Ejpčha wejt honora waytiñiqui. Jalla niž puntu ančhucqui “Wejtnaca Yoozza” cjiñchucčha. ⁵⁵Ančhucqui nii Yoozqui anapan pajčha. Wejrkal nii pajučha. “Wejrqui Yooz Ejp anal pajučha”, cjesaž niiqui, wejrqui toscaral cjesačha, ančhuc irata. Yooz Ejp pajučha; nižaza niž chiitacama kamučha. ⁵⁶Tuquita atchi Abraham ejpqui wejt tjonž tjuñi nonžcu, walja cuntintutačha. Nižaza wejt tjonž tjuñi zizcu, walja chipchičha.

⁵⁷Jalla nuž chiitiquiztan nii judfo žoñinacaqui Jesusižquiz cjičhičha:

—Amqui imazi pjizka tunc watchizzam pero. ¿Jaknužť amzť Abraham pajcham cjesajo?

⁵⁸Jesusaqui ninacžquiz tuž kjaazičha:

—Ančhucaciz ultim weraral cjiwčha. Ima Abraham želan, wejrqui žejlchinčha.

⁵⁹Jalla nuž chiitiquiztan judfo žoñinacaqui maznaca aptičhičha. Jesusa maztan čhajcz pecatčha. Jesusazti chjojzičha. Nekztan timpluquiztan ulančhičha. Nekž žejlñi žoñinacž tayıpquiztan atıpassičha.

9

ZUR ŽOÑI ČHJETINTA

¹Jalla nekztanaqui Jesusaqui jiczquiz ojckhičha. Nii jicz latuquiz tsjii zur žoñi želatčha. Majttiquiztanpacha zuratačha. ²Jalla nii žoñi cheržcu Jesusiž tjaajinta žoñinacaqui pewczičha, tuž cjan:

—Tjaajiñi Maestro, ¿kjažtiquiztan zurapan majttata? ¿Niiž maa ejpž ujquiztan nižta zura majtta cjesaya? Už ¿persunž ujquiztan cjesajť

³Jesusaqui ninacžquiz tuž kjaazičha:

—Anaž niž persun ujquiztanami, nižaza anaž niž maa ejpž ujquiztanami zura majttatačha. Antiz zura žejlčha, niž zuržquiz Yooz obra tjeežta cjisjapa. ⁴Jaknužť žoñinaca majiñ langžaja, jalla nižta irata wejrnacqui tii muntuquiz žejlcan langstančha. Wejt cuchanžquiñiž tjaata obranaca langstančha. Zumz timpu wajillačha. Zumchi cjenaqui anaž jecmi langzua. ⁵Tii muntuquiz žejlcan wejrqui žoñinacžquiz Yooz zuma kamaña tjeeznučha, tsjii kjanažtakaz.

⁶Jalla nuž chiižcu, Jesusaqui yokquiz tjujzičha. Nekztan nii tjujžta llawsa yok pjilžtan tjarzičha. Jalla nii aptižcu nii zur žoñž čhjujczquiz tjalilžinčhičha. ⁷Nekztanaqui nii zur žoñžquiz cjičhičha:

—Siloé cjeta coch paata kjazquin oka. Jalla nicju čhjujqui awjžca.

Siloé cjeta tjuuqui “Cuchanžquita” cjičha ninacž tawkquiz. Jalla nekztanaqui nii zur žoñiqui ojckcu čhjujqui awjzičha. Nekztan cherñi cjišičha. Cherñi quejppžquičhičha. ⁸Jalla nekztan niž žcati kamñi žoñinacami nižaza nižquiz pajñi žoñinacami nii žejťchi cheržcu, tuž cjičhičha:

—¿Anaj tiiqui nii paaz tomtomangzñi žoñiya? Tuquiqui julzi žejlñitala.

⁹Yekjapanacaqui cjetča:

—Niipansala.

Yekjapac cjetča:

—Anapanž nii tiiqui. Nižtažtakazla, pero.

Pero nii žejtchi žoñipachača cjichiqui:

—Wejrpantča.

¹⁰Jalla nekztanaqui nižžquiz pewcunchičha:

—¿Kjažum am jazic cher, kjažtatajo?

¹¹Niiqui ninacžquiz kjaaziča tuž cjican:

—Nii Jesusa cjita žoñiqui llawsižtan yok pjilžtan tjarziča. Jalla nuž tjaržcu wejt čhjujquiz tjalžinčiča, tuž cjican: “Siloé cjita kjazquin oka. Jalla nicju ajunžca”. Jalla nekztanaqui ojkchinča wejrqui. Čhjujqui ajunžcu cherñi cjissinča.

¹²Jalla nekztanaqui nii žejtchi žoñžquiz pewczizakazza tuž cjican:

—¿Jakziquin nii žoñiya?

Niiqui tuž kjaaziča:

—Anal zizuča.

¹³Jalla nekztanaqui jakatažquiqui nii zurquiztan čhjetinta žoñiqui fariseo partinacžquin chjichtatača. ¹⁴Jeež tjuñquiz Jesusaqui nii milajru paachiča. ¹⁵Fariseo žoñinacaqui nii zurquiztan čhjetinta žoñžquiz wilta pecunchičha, tuž cjican:

—¿Anziquiqui kjažtam cherya?

Nii žoñiqui tuž kjaaziča:

—Llawsižtan pjilžtan tjaržcu, wejt čhjujqui tjalžinčiča. Jalla nekztan wejt čhjujqui ajunžcu, cherñi cjissinča. Jaziquiqui cheručha.

¹⁶Tsjii fariseo žoñinacaqui nii Jesusižjapa quintra chiichiča, tuž cjican:

—Nii žoñiqui anaž Yooz partiquiztan cjesača. Niiqui ana jeež tjuñimi rispitchila.

Yekjapazti cjetča:

—¿Kjažt ujchiz žoñiqui nižta milajrunaca paasajo? Anaž cjesača.

Jalla nižtiquiztan Jesusiž puntuquiztan t'aka t'aka cjissiča. ¹⁷Jalla nuž t'aka t'aka cjiscu, wilta nii zurquiztan čhjetinta žoñžquiz pecunchičha, tuž cjican:

—¿Amquiqui kjažum cji, am čhjujqui čhjetini žoñž puntu?

Nii žoñiqui tuž kjaaziča:

—Wejrqui cjiwča, jalla niičha Yooz cuntiquiztan chiiñi profet žoñipanqui.

¹⁸Tuquiqui nii žoñiqui zuratača, jaziqui cherñi cjissiča. Pero nii judío žoñinacaqui nii milajru ana criiz pecatča. Jalla nekztan nii žoñž maa ejp kjawziča, pewczjapa. ¹⁹Jalla tuž pewczičha:

—¿Tiic am majchkaya? ¿Tiic zurapan majttatakaya? ¿Kjažt tiizti cherñi cjesajo?

²⁰Nii maa ejpqui kjaaziča, tuž cjican:

—Tiipanča wejtnaca majchqui. Nižaza zurapan majttatača. Jalla niikal chiyasača.

²¹Anziquiqui cherñi cjissižlani, jalla nii puntuquiztanaqui anal zizuča. Nižaza jecčhalaj tiž čhjujqui čhjetinči anal zizuča. Tiika pewcnani. Pajk žoñičha tiiqui. Tiipachaž razunaqui tjaasača.

²²Nii judío žoñinacaqui tsjii acuerduquiz parlassitača, jakzilat Jesusiž puntuquiztan “Tiičha Cristuqui” cjican chiyachaja, jalla niiqui ajcz kjuyquiztan chjatkattaž cjistanča. Jalla nii acuerduquiz parlassitača. Jalla nižtiquiztan nii zur žoñž maa ejpmi ekziča; ana kjanacama chiiž pecatča. ²³Jalla nižtiquiztan ninacaqui kjaaziča, tuž cjican:

—Tiika pewcnani. Pajk žoñičha tiiqui.

²⁴Jalla nekztanaqui nii judío žoñinacaqui nii zurquiztan čhjetinta žoñi wilta kjawziča. Nekztan tuž cjichičha:

—Yooz honora wayta. Anača Jesusiž honora waytizqui. Wejrnaca zizuča, nii čhjetinñi cjita žoñiqui walja uj paañipanča.

²⁵Jalla nekztan nii zurquiztan čhjetinta žoñiqui tuž kjaaziča:

—Wejrqui anal zizuča, uj paañi ana uj paañi, nii. Pero wejrqui zuratača. Jaziqui cheruča. Jalla nužupan zizuča.

²⁶ Wilta niižquin pecunchiča, tuž cjan:

—¿Jaknužt paachitajo? ¿Jaknužt am čhjujqui čhetintajo?

²⁷ Nii žoñiqui tuž kjaaziča:

—Ančhucaquiz chiichinsala. Weriz chiita ana nonz pecča. ¿Kjažtiquiztan wilta wilta wejr chiiyaj cjeejo? ¿Ančhucazakak niižtan chica ojklayñi cjis pecjo?

²⁸ Jalla nekztanaqui nii judío žoñinacaqui nii zurquiztan čhetinta žoñžquiz ch'aañičiča tuž cjan:

—Amqui nii žoñž jaru ojčča. Wejrnaczi Moisés jaru okuča. ²⁹ Yoozqui Moisesquiz chiichiča. Jalla nii zizuča. Tii žoñžquiztanaqui anal zizuča, jakziquiztan tjončhaja, jalla niimi.

³⁰ Jalla nekztanaqui nii čhetinta žoñiqui tuž cjichiča:

—Tiiča ispantichuca. Ančhucqui jakziquiztan tjončhaja, nii ana zizza. Wejtquiz pero čhjujqui čhetinžinčiča. ³¹ Učhumqui zizla. Yoozqui ujchiz žoñinacž mayiztaqui anaž nonznasača cjiča. Yooz rispitñi žoñinacžquizimi nižaza Yooz kuzcama kañi žoñinacžquizimi, jalla ninacžquiz nonznasača Yoozqui cjiča. ³² Anawira tsjii zur žoñž čhjujqui čhetinta quintu željñitala, tuquitanpachami. ³³ Nii žoñiqui ana Yooz partiquiztanžlaj niiqui, ana čjul pajk obrami paačhani.

³⁴ Jalla nekztanaqui nii judionacaqui tuž cjichiča:

—Amqui ujchizpan majttamtača. ¿Jaziqui wejtnacaquiz tjaajinzim pec, kjažtatajo? Jalla nekztan nii zurquiztan čhetinta žoñi ajc kjuyquiztan chjatkatchiča.

ZURANŽ PUNTUQUIZTAN

³⁵ Jalla nuž chjatkattiquiztan Jesusaqui zizziča. Jalla nekztan nii žoñžtan wilta zalčcu, tuž cjichiča:

—¿Tsewctan cuchanžquita Yooz Žoñžquizim criya?

³⁶ Nii čhjujqui čhetinta žoñiqui tuž kjaaziča:

—Señor, maznalla, ¿ject niiqui? Wejrqui niižquin criyasača.

³⁷ Jesusaqui niižquin kjaaziča, tuž cjan:

—Anziqui werim cherča. Niiča wejrtqui, amtan parliñtqui.

³⁸ Jalla nekztanaqui nii žoñiqui Jesusiž yujcquiz rispitcan quillziča, tuž cjan:

—Wejt jiliri. Amquiz criyuča.

³⁹ Jesusaqui niižquiz cjichiča:

—Wejrqui tii muntuquiz tjonchiča, žoñinaca pjalzjapa. Tsjii žoñinaca željča ana zuma kamañchiz. Pero ninacž ujquiztan kuz zint'iča, “ujchizpanča wejrqui” cjan. Wejrqui tjonchinča ninaca zuma kamañchiz cjiskatzjapa. Tsjii žoñinaca željča. Jalla ninacaqui ana zuma kamañchizakazza. Pero “Yooz puntu zuma zizuča” cjiñiča. Jalla nuž chiichiyani ninacača zur žoñinacažtakaz. Jalla nii tjeezjapa, tii muntuquiz tjonchinča.

⁴⁰ Jesusaž nuž chiyan yekjap fariseo žoñinacaqui niž žcati želatča. Ninacaqui nii chiita nonžcu, pewcziča tuž cjan:

—¿Wejrnacmi zur žoñinacažtakaz cjesajo? Anaž cjesača.

⁴¹ Jalla nekztanaqui Jesusaqui ninacžquiz tuž cjichiča:

—Ančhucqui persun kuzquiz zur žoñižtakaz naytasaj niiqui, ančhucqui anaž ančhuca ujquiztan casticta cjitasača. Pero “Wejrnacqui Yooz puntu zuma zizuča” cjanž chiila. Jalla nižtiquiztan ančhuca ujquiztan casticta cjequiča.

UUZANACŽ QUINTU

¹ Jesusaqui zakaz cjichiča:

—Ančhucaquiz weraral chiyuča. Jakziltat uuzi uyquiz ana zan kjutan luzzaja, yekja latuquiztan chjojzacuñ luzzaja, jalla niiča ana wal tjañiqui. Uuzanaca kjañzjapa luzza.

²Pero jakziltat uuzi uy zanquiztanpan luzzaja, jalla niiĉha uuzi itzñi awatiriqui. ³Niżaza uy zana cwiitiñi žoñiqui uy zana cjetžiñiĉha nii uuza awatiri luzjapa. Niżaza nii uuzanacaqui awatirž jora pajĉha. Nii awatiriqui uuza tjuucu tjuucu kjawža, niżaza uyquiztan jwessa. ⁴Jalla nuž tjapa niž uuzanaca jwescu, niž uuzanacž tucquinž ojkĉha. Niżaza nii uuzanaca niž wirquiz apža, jora pajžcu. ⁵Tsjii ana pajta žoñž wirquiziqui anaž apža, antiz nii ana pajta žoñžquiztan zajtĉha, niž jora ana pajžcu.

⁶Jalla nuž Jesusaqui quint'ichiĉha. Pero nonžñi žoñinacazti ana wira intintazĉha, ĉjul puntuquiztan chiiĉhaja, jalla nii.

ZUMA AWATIRI

⁷Jalla nektanaqui Jesusaqui wilta ninacžquiz chiiĉiĉha, tuž cjan:

—Anĉhucaquiz weraral chiyuĉha. Wejrtĉha uuzi uy zantqui. ⁸Ima weriž tjonan, žoñinacaqui tjonĉiĉha, “Yoozquiztan tjonuĉha”, cjanacaqui. Pero tjañicamaĉha tjapa nii tjonĉi žoñinacaqui. Uuza tjangžñinacaĉha ninacaqui. Pero ninacž wirquiziqui wejtuuzanacaqui ana apžiĉha. ⁹Wejrtĉha uuzi uy zantqui. Jakziltat weriž cjen Yooz jamillquiz luzzaja jalla niiqui liwriitaž cjequiĉha. Jalla niiqui Yooz uuza cuntaž cjequiĉha. Uuza uyquiz luznaquiĉha, zaž ulnaquiĉha, zuma pastu watzjapa. Liwriitapaž cjequiĉha.

¹⁰Tjañi cjiĉiñi žoñinacaqui tjonĉha, cjisñi, coni, niżaza tirkati, jalla nii alaja tjonĉha. Wejrzi tjonĉinĉha, zuma kamaña tjaażjapa, anĉhuc anĉha zuma kamañĉiz cjkatzjapa. ¹¹Wejrtĉha zuma awatirtqui. Tsjii zuma awatiriqui niž uuzanacž laycu ticznasaĉha. ¹²Pero yekjapanacaqui paca tanzjapakaz uuza ichñiĉha. Jalla ninacaqui tsjii uuzi tanñi animalaž tjonan uuzi eccu zatasaha. Nii uuzaqui anaĉha persun uuzanaca. Jalla nuž uuzanaca ectan nii anawal animala tjonchiqui uuzanacž tanĉha, niżaza witĉha. Anaĉha niža zuma awatiriqui. ¹³Nii anawal awatiriqui paca tanzjapakaz uuzi ichñiĉha. Ana nii uuzanacžjapa juyza paañiĉha, ĉjulunacat wataĉhaja, jalla nii. Jalla nižtiquiztan uuzanaca eccu, anawal animalquiztan zatasaha.

¹⁴⁻¹⁵Wejrtĉha zuma awatirtqui. Jaknužt wejt Yooz Ejpqui wejtquiz pajĉhaja, niżaza wejrmi wejt Ejpžquiz pajuĉhaja, jalla nižaĉha wejrqui wejt uuzanacžquiz pajuĉha, niżaza wejt uuzanacaqui wejtquiz pajĉha. Wejrqui wejt uuzanacž laycu ticznaĉha. ¹⁶Wejtta zakaz žejlĉha yekja uuzanaca ana tii uyquiz cjiñiqui. Wejrqui nii uuzanaca ricujzquiztan zakaztĉha. Jalla ninacaqui wejt taku cazaquiĉha. Tjapa wejt uuzanacaqui tsjii tamaž cjequiĉha, niżaza tsjii awatirĉiz.

¹⁷Wejt uuzanacž laycu ticznaĉha, niżaza jacatataĉha. Jalla nižtiquiztan Yooz Ejpqui wejr k'aachiĉha. ¹⁸Anaž jecmi wejr ticzkatasaha. Antiz wejrqui persun kuzquiztan ticznaĉha. Niżaza poderchiztĉha jacatatjapa. Jalla nii poder wejt Yooz Ejpqui wejtquiz tjaachiĉha.

¹⁹Jalla nuž Jesusiž chiita taku nonžcu judfo žoñinacaqui wilta t'aka t'aka cjsiĉha. ²⁰Tsjii žoñinacaqui cjichiĉha:

—Zajraž tantala. Lucuratala tiiqui. ¿Kjažtiquiztan tiiž chiita anĉhucqui nonžjo?

²¹Yekjapac cjichiĉha:

—Tiiqui anaž zajraž tanta žoñiža chiiĉha. ¿Niżaza zajraž tanta žoñiqui tsjii zur žoñi ĉhjetnasajo? Anaž cjesaha.

TSJII ŽOÑINACAQUI JESUSA ANA NONZ PECĉHA

²²Zac timputaĉha. Niżaza Jerusalén wajtquin timplu cumpleañ pjižta paatĉha. ²³Jalla nii oraqui Jesusaqui timpluquin ojklayatĉha, Salomón cjeta kjuy patiuran. ²⁴Jalla nuž ojklayan judfo žoñinacaqui Jesusiž muytata ajcziĉha, tuž cjan:

—ĉĉjulorcama amqui wejtnaca kuz turwayskataquejo? Amĉhalaj Cristumž niiqui, tsjiika kjanacama chizna.

²⁵Jesusaqui ninacžquiz tuž kjaaziĉha:

—Anĉhucaquiz nuž cjichinĉha. Pero weriž chiitami ana criichinĉhucĉha. Jaknužt wejt Yooz Ejp mantaĉhaja, jalla nii mantita jaru zuma obranacal paa-uĉha. Jalla nii obranacaz cjen, anĉhucqui zizasaha, werjtĉha Cristo už anažlaj Cristo, nii. ²⁶Anĉhuczi ana wejtquiz criiĉhucĉha. Anĉhucqui anaĉha wejt uuažtakazi, jaknužt tuquiqui chiituchaja, jalla nii.

²⁷ Wejt uuzanacaqui wejt jora pajča, nižaza wejrqui wejt uuzanaca pajuča. Nižaza nii wejt uuzanacaqui wejtquiz apžquiniipanča. ²⁸ Wejrqui ninacžquiz zuma kamaña tjaa-uča, Yooztan wiñaya kamzjapa. Anapan infernuquin okasača. Nižaza anaž jecmi wejt kjarquiztan ninaca kjañasača. ²⁹ Wejt Yooz Ejpqui wejt kjarquiz tjaachiča. Jalla niiqui tjappachquiztanami juc'ant azzizza. Jalla nižtiquiztan anaž jecmi Yooz Ejpžquiztan wejt uuzanaca kjañasača. ³⁰ Wejtta wejt Yooz Ejpžtan tsjii kuzziztča.

³¹ Jalla nuž chiitiquiztan nii judío žoñinacaqui maztan aptižcu wilta Jesusižquiz čhajcz pecatča. ³² Nekztan Jesusaqui ninacžquiz cjichiča:

—Wejrqui Yooz Ejpž aztan zuma obranacal ančhucaquiz tjeezinča. Nii zuma obranaca Yooz kuzcama paachinča. ¿Jakziltat nii zuma obranacquiztan wejr maztan čhajcz pecjo?

³³ Nii judío žoñinacaqui tuž kjaaziča:

—Anal am čhacača, zuma obriquiztan. Yooz quintra chiitiquiztan am čhacača. Amqui žoñimkazza. Pero Yooztakam cjiicjiča.

³⁴ Jalla nekztanaqui Jesusaqui ninacžquiz tuž cjichiča:

—Ančhuca liiquizpacha tuž cjiirtapanča: “Yoozqui cjiča: ‘Ančhucqui Yooztakazza.’”

³⁵ Cjiirta Yooz takuqui anaž niqi atasacha. Jalla nii zizza učumqui. Yoozqui niž taku catokni žoñinacž puntuquiztan cjichiča, “Ančhucqui Yooztakazza”, cjiicanaqui. ³⁶ Yoozqui wejr ut'aychiča tii muntuquiz cuchanžquizjapa. Jalla nižtiquiztan wejrqui cjichinča, “Wejrtča Yooz Majchtqui”. Jalla nuž chiitiquiztan, ¿kjažt ančhucqui Yooz quintra chiiñi cjeejo? ³⁷ Wejrqui wejt Yooz Epiž mantita obranaca ana paayiñ cjitasaž niqi, wejtquiz criiz ana waquiziča. ³⁸ Pero wejt Yooz Epiž mantita obranaca paayiñča. Jalla nižtiquiztan wejtquin criya. Weriž chiitiquiztan anača wejtquiz criyačhaj niqi, weriž paata obranacquiztan mekaž wejtquiz criyalla. Wejtquin criyaquiz niqi, ančhucqui intintazaquičha, wejtta Yooz Ejpžtan tsjiikazza, jalla nii. Wejt Yooz Ejpqui wejt kuzquiz željča, nižaza wejrqui wejt Yooz Ejpž kuzquiz želuča. —Jalla nuž chiichiča Jesusaqui.

³⁹ Nekztanaqui wilta Jesusa preso chjitz pecatča. Pero Jesusaqui ninacžquiztan atipassiča.

⁴⁰ Jalla nekztanaqui Jesusaqui Jordán puž tuuna ojkchiča. Jakziquin Juanqui primero bautistčhaja, jalla nicju želatča. ⁴¹ Walja žoñinacaqui nižtan zali ojkchiča. Ninacaqui tuž cjichiča:

—Chekapan, tjapa Juanž chiita tiiž puntuquiztan werarapanča. Ana čjul milajru paachi cjenami, Juanqui tiiž puntuquiztan werarapan chiiñitakalala.

⁴² Jalla nicju želan walja nekz željñi žoñinacaqui Jesusižquiz criichiča.

11

LAZARO TICZIČHA

¹ Tsjii laa žoñi želatča, Lázaro cjita. Betania wajtchiz žoñitača. María, nižaza naaža cullaqui, Marta, jalla nii pucultanaqui Betania wajtchizzakaztača. ² Mariiqui nii laa Lazaruž cullaquitača. Nižaza Mariiqui Jesusa Jilirž kjojchquiz zuma ulurchiz asiiti alžinchintača. Nekztan naaža persun ach charžtan Jesusiž kjojchanaca chjužinčintača. ³ Jalla nuž nii pucultana maatakanacaqui Jesusižquiz mazni cuchanžquichiča, tuž cjan:

—Wejt Jiliri, amiž pecta k'aachita amigo laa cjichiča.

⁴ Jesusaqui nii mazta nonžcu, cjichiča:

—Niž laacjitiquiztan ana ticznaquičha. Antiz niž laacjitiquiztan Yooz azi tjeežtaž cjequičha. Nižaza Yoozqui honorchiz cjequičha. Nižaza Yooz Majchqui honorchiz zakaz cjequičha.

⁵ Jesusaqui Martaquiz, naaža cullaqui Mariaquiz, nižaza ninacž jila Lazaružquiz, jalla ninacžquiz ančaž k'aachichiča. ⁶ Jalla nuž cjenami Lazaruž laa quintu nonžcu, Jesusaqui iya puc majžtan kamchiča, jakziquin kamatčhaja, jalla nicju. ⁷ Jalla nii puc majquiztan niž tjaajintanacžquiz cjichiča:

—Wiltaž Judea yokquin okla.

⁸Nekztanaqui niiz tjaajintanaquai cjichiča:

—Tjaajiñi Maestro, ažk tsjii kjaž majkaz nekzta žoñinacaqui am maztan čhajcz pecatla, conzjapaqui. ¿Wilta am nicju ojcz pecya?

⁹Jesusaqui ninacžquiz tuž kjaaziča:

—Tsji noojiqui tuncapan orchizza, majiñqui. Jakzilat kjanquiz ojčhaja, anaž ezasača. Jalla nižta iratača wejt kjanquiz ojčñi žoñinacaqui. Ima niž ticz ora irantižcan, walikaz cjequiča. ¹⁰Jakzilat ween zumchiquiz ojčhaja, jalla niiqui ezasača, kjanaž ana želanaqui. Jalla nižtača ana wejt kjanquiz ojčñi žoñinacaqui. Ana Yooz kuzcama kamtiquiztan anawalquiz tjojtšnasača.

¹¹Nekztanaqui Jesusaqui ninacžquiz cjichiča:

—Učhum Lázaro amiguqui tjačha. Pero wejrqui Lázaro tjažil wajtskatača.

¹²Jalla nekztanaqui niiz tjaajintanaquai cjichiča:

—Jiliri, tjačhaj niiqui, nuž cjenaqui upallat cjissani; žetaquiž, jaz.

¹³Niiz tjaajintanaquai tsjii kjutñi intintazziča. Jesusaqui Lázaro ticz puntuquiztan chichiča. Niiz tjaajintanaquai ultimu tjaž puntuquiztan intintazziča. ¹⁴Jalla nižtiquiztan Jesusaqui kjanapacha chiichiča tuž cjican:

—Lazaruqui ticziča. ¹⁵Ana nicju željchiž cjen wejrqui cuntintučha. Jalla nuž cjenča ančhucaltajapaqui waliqui, wejtquiz juc'anti criichi cjisjapa. Jazic nii cheriž ojkla.

¹⁶Nekztanqui Tomasaqui, niiz mazinacžquiz cjichiča:

—Učhumnac zakaz ojkla, tiižtan chica ticzñi.

Tomasaqui “Pacha” cjita žoñizakaztača.

JESUSAČHA JACATATSKATŇIQUI

¹⁷Betania watja irantižcu, Jesusaqui zizziča, Lazaruž ticžtaqui nižaza tjattaqui pajkpic tjuñitača. ¹⁸Betania watjaqui Jerusalén wajtquiztan pizc kilómetro jilallatača. ¹⁹Jalla nii žcati želan walja žoñinacaqui Martaquiz nižaza Mariyaquiz kuzñi tjonzitača, ninacž jila ticziž cjen. ²⁰Martiqui Jesusaž waj irantižquiñi quintu nonžcu, Jesusižquin zali ojčchinča. Mariiqui kjuyquin eclichintača. ²¹Jesusižtan zalžcu, Martiqui paljajchinča, tuž cjican:

—Wejt Jiliri, am tekz željtasaz niiqui, wejt jilaqui ana ticzi cjitasacha. ²²Jalla nuž cjenami wejrqui zizuča, čjulu amiž Yoozquiztan mayiztami tjaataž cjequiča. —Jalla nuž Jesusižquiz chiichinča Martiqui.

²³Jesusaqui naaquiz cjichiča:

—Am jilaqui jacatataquiča.

²⁴Martiqui cjichinča:

—Wejrqui zizuča, tii muntu tucuzinžtan, jacatatz tjuñquiziqui jacatataquiča.

²⁵Nekztan Jesusaqui naaquiz cjichiča:

—Wejrtča jacatatskatiñtqui, nižaza arajpach žeti tjayiñtqui. Jakzilat wejtquiz criyačhaja, ticzi cjenami, wilta žetaquiča. ²⁶Nižaza jakzilta žejtñi žoñimi wejtquiz criyačhaja, jalla niiqui anaž wira ultimu ticznasača. Arajpachquin wiñaya žetaquiča. ¿Jalla nii crii amya?

²⁷Naaqui tuž kjaazinča:

—Criyuča, wejt Jiliri. Nižaza criyuča, amqui Cristumča; nižaza Yooz Maatimča tii muntuquiz tjonchiqui. Jalla niiqui criyuča.

MARIAQUI JESUSIŽTAN ZALI ULANCHINČHA

²⁸Jalla nuž chiižcu, Martiqui naža Marii cullaqui kjawzñi ojčchinča. Nekztan Mariaquiz jamazit chiichinča, tuž cjican:

—Tjaajiñi Maestruqui tekz tjonchičha. Am kjawžca cjiča.

²⁹Jalla nuž nonžcu Mariiqui apura žaazinča. Jesusižquin zali ojčchinča. ³⁰Jesusaqui imaž watja irantižcatča, jakziquin Marti nižtan zalčhaja, jalla niiranž želatča. ³¹Lázaro jilaž ticziž cjen, Mariaquiz kuzcan žoñinaca kjuyquin želatča. Jalla ninacaqui María apura žažcu ulanñi cheržcu wirquizpacha apziča. Ninacaqui cjichiča, “Lázaro jilž sipulturquin kayit ojčhani” cjican.

³²Jesusižtan zalžcu Mariiqui niiz yujcquiz quillzinča, tuž cjican:

—Wejt jiliri, tekzim cjitčhaj amqui, wejt jilaqui anaž ticzi cjitasača.

³³Jesusaqui naa Maria kaañi cheržcu, nižaza naatan tjonñi judío žoñinaca kaañi zakaž cheržcu, persun kuzquiz ancha sint'ichiča, nižaza ancha llaquita cjissiča. ³⁴Jalla nekztan pewciča, tuž cjican:

—¿Jakziquin tjatchinčhuctaya?

Ninacaqui cjichiča:

—Jiliri, niž cheržinžcalla.

³⁵Nekztanaqui Jesusaqui kaachiča. ³⁶Jalla nuž cheržcu žoñinacaqui cjichiča:

—Cherzna. Lázaro jila anchaž k'aachichiča.

³⁷Yekjapa ninacazti cjichiča:

—Tiiqui zur žoñž čhujquiqi čhjetinčiča. ¿Anaj tiic Lázaro jila čhjetnasaya, ana ticzi cjisjapaya?

LAZARO JACATATSKATTA

³⁸Jalla nekztanaqui Jesusaqui ancha kuzquiz sint'ican, sipulturquin macjatchiča. Sipulturaqui pajk mazquiz pjetatača. Nižaza pajk maztan pjucžtatača, nii sipultur zana.

³⁹Jesusaqui nekztan cjichiča:

—Nii maz cjewžna.

Martiqui, nii ticzi jilž cullaquiqui, cjichinča:

—Wejt jiliri, pajkpic tjuñi tiž ticztaqui. Jalla nižtiqiztan tiiqui chjonanchižlani.

⁴⁰Nekztanaqui Jesusaqui naaquiz cjichiča:

—Amqui wejtquiz criyaquiz niiqui, Yooz azi tjeežtam cheraquiča. ¿Anaj werj nuž amquiz čiichinpanejo?

⁴¹Jalla nekztanaqui nii sipultura mazqui cjewžtatača. Nekztanaqui Jesusaqui arajpach kjutñi cheržcu, tuž cjichiča:

—Yooz Ejp, weriž mayizta nonžñiž cjen gracias amquin cjiwča. ⁴²Weriž mayiztaqui nonžnampañča amqui. Jalla nii zizuča. Tekz tsijtchi žoñinacžtajapa nuž chiyučha, amča wejr cuchanžquichi, jalla nii criyajo.

⁴³Jalla nuž mayizicu, Jesusaqui alto tawkžtan mantichiča tuž cjican:

—Lázaro, nekztan ulanžca, ticchuc tjona.

⁴⁴Nii ticziqui ulanžquichiča, kjarami kjojchami jweržintapacha, nižaza niž yujcmi tsjii pañžtan ch'okžinta. Nekztanaqui Jesusaqui nekž žejlñi žoñinacžquiz mantichiča:

—Nii jweržina. Nekztan ojklajaj cje.

JESUSA CONZJAPA KAZIČHA

⁴⁵Jalla nižtiqiztan muzpa judío žoñinacaqui Jesusižquin criichiča. Ninacaqui Mari-
aquiz cumpantižcu Jesusiž paata milajru cherchiča. ⁴⁶Yekjap nekž žejlñi žoñinacazti
fariseo žoñinacžquin mazñi ojkičiča. Nicju tjapa Jesusiž paatanaca quint'ižquichiča.

⁴⁷Jalla nuž nonžcu fariseo partir žoñinacami timplu jilirinacami tjapa jilirinaca ajc-
skatchiča. Nekztan jilirinacžquiz pewciča, tuž cjican:

—Nii žoñiqui anchaž milajrunaca paača. ¿Učhumnacqui kjaža cjeequi nii žoñžtan?

⁴⁸Jalla nužkaž milajrunaca tira paañižlaj niiqui, tjapa žoñinacaqui nižžquincama cri-
ačhani. Jalla nuž cjenaquiqi roman jilirinacaqui zultatunaca cuchanžcačhani, učhum timplu
pajljapani, nižaza učhum naciona akzjapani.

⁴⁹Nii wataquiqi Caifás cjitaquiqi uchtatača timplu chawc jiliri. Jalla niiqui paljaychiča,
tuž cjican:

—Ančhucquiqi ana zizñi žoñinacaztakaz, ¿kjažtatajo? ⁵⁰Učhum wajtchiz žoñinacžtajapa
nii Jesusac ticstanča, tjapa učhumnaca ticz cjenquiztanpacha. Jalla nuž waquiziča.
Tjapa tii naciona akžinasaz niiqui, jalla niž ana wali cjesača. Nuž ana waquiziča.

⁵¹Nii timplu chawc jiliričiqi anača persun kuzquiztan čiichiqui. Timplu chawc jiliriž
cjen, Yoozza nuž čiikatchi. Jalla nuž čiican, Jesusiž puntu mazinčiča, Jesusaqui nii waj-
tchiz žoñinacžtajapa ticznaquiča. ⁵²Anazaž nii wajtchiz žoñinacžtajapakaz ticznaquiča.
Tjapa žoñinacžtajapa ticznaquiča. Yooz partiquiz kamñi žoñinacaqui tjapa kjutñi tii

muntuquiz wichančiha. Jalla ninacaqui Jesusaqui tjapa nacionquiztan ricujaquiča. Tsjii Yooz jamillajapa ricujaquiča. ⁵³Jalla nuž palt'izcu nii noojtanpacha judío jilirinacaqui Jesusa conzjapa kazzičha.

⁵⁴Jalla nižtiquiztan Jesusaqui chjojzacuñ ana kjanacama ojklaychiča Judea cjita yokquiz. Jerusalén žcati yokquiztan ojkičiča Efraín wajtquin. Efraín watjaqui ch'ekti yok žcatitača. Jalla nicju niž tjaajintanacžtan kamchiča.

⁵⁵Judío žoñinacž pascua pijjzta wajillatača. Jalla nižtiquiztan walja žoñinacaqui jochinacquiztanami zkolta watjanacquiztanami Jerusalén watja ojkičiča ima pascua pijjzta tjonan. Ajunz cuzturumpi payi ojkičiča. Ana nii cuzturumpi paaquič niiqui, ana pascua pijjzta paasača. ⁵⁶Nii tjonchi žoñinacaqui Jesusa kjuratča. Timpluquin tsijtchi žejlcan ninacpora Jesusiž puntu pewcsassiča, tuž cjican:

—¿Am jaknužum tantii? ¿Tii pijjztiquiz Jesusac tjonasaya?

⁵⁷Nižaza fariseo partir žoñinacami timplu jilirinacami ordena tjaachiča, jequit Jesusa cheračhaja, jalla niiqui ninacžquiz maztanča, Jesusa preso tanta cjisjapa.

12

ASIITI TJAJLŽINTA QUINTU

¹Pascua pijjzta wajilla sojta tjuñiž cjen Jesusaqui Betania watja ojkičiča, Lazaruž kjuya. Niiž tuquiqui Jesusaqui ticziquiztan nii Lázaró jila jacatatskatchitača. ²Jalla nicju Jesusižquiz rispitan zuma čheri tjaczinčiča. Martiqui čheri atintichinča. Lazaruzti mizquiz želatča, Jesusižtan čica lujlcan nii parti žoñinacžtanpacha. ³Jalla nuž lulan Mariiqui medio litro zuma ulurchiz asiiti zjijcchinča. Nii asiitiqui zuma legal nardo cjita asiititača, wali preciuchiztača. Jalla nii asiitižtan Jesusiž kjojchquiz alžcu tjajlžinčinča. Nekztan naaža persun ach charžtan chjujžinčinča. Walja zuma ulurchiztača. Tjapa nii kjuyquiziqui nii zuma ulura chjijpsitača. ⁴Jalla nuž asiiti alžinni čeržcu, Judas Iscariote cjita Simonž majchqui chutchiča. Jalla niiqui Jesusiž tjaajinta žoñinacž partiquiztantača. Nižaza niipacha niiž wiruñ Jesusiž quintra tarasunaž paaquičha. Jalla nii Judasqui naa Mariaquiz paljaychiča, tuž cjican:

⁵—¿Kjažtiquiztan tii aceite ana 300 paazuñ tuytata, pori žoñinacžquiz yanapzjapajo?

⁶Judaszi anaž porinaca importayatča. Tjañi zaañitača. Niiž kjarquiztača paaz pulsaqui. Nižaza nii užta paaznacquiztan tjangñitača. Jalla nižtiquiztan nuž chiichiča. ⁷Jalla nekztanaqui Jesusaqui Judasquiz cjichiča:

—Ana naaquiz nuž cjee. Ima wejt ticz tjuñi tjonan, naaqui wejttajapa tii aceite čjojchinča, wejr zuma tjatta cjisjapa. ⁸Tii muntuquiz porisanacac panž žejlča. Wejrzi ančucatan ana tira želača, tii muntuquiz.

LAZARUZAKAZ CONZ PEČČHA

⁹Walja judío žoñinacaqui Jesusiž quinto zizziča, Betania wajtquin žejlñi, jalla nii. Jalla nekztan nicju ojkičiča, Jesusa cheržni, nižaza Lázaró cheržni. Jesusaqui Lázaró ticziquiztan jacatatskatchiča. ¹⁰Jalla nuž Lázaró jacatatskatta quinto nonžcu timplu jilirinacaqui Lazaruzakaz conz kazziča. ¹¹Jalla nii Lazaruž jacatattaž cjen, walja judío žoñinacaqui nii jilirinacž chiitanaca ana cazziča. Nekztan zarakžcu, Jesusižquiz apoychiča. Nižaza niižquin criichiča.

JERUSALEN WAJTQUIN LUZTA QUINTU

¹²Walja žoñinacaqui Jerusalén watja tjonžcu, nekz želatča pascua pijjzta paazjapa. Jakatažquiqui žoñinacaqui zizziča, Jesusaqui wajtquin wajillaž irantižquičha, jalla nii. ¹³Jalla nekztan čjañinacžtanpacha ramuza cjita munti itsa kjajpchiča. Jalla nuž nii ramuz itsanac manžcu, wajtž tjija Jesusa risiwi ulančiča, tuž kjawan:

—¡Yoozqui honorchiz cjila! ¡Yooz jilirž tjuuquiz tjonñi žoñi rispittaj cjila! ¡Israel chawjc jiliri rispittaj cjila!

¹⁴Jesusaqui tsjii aznu cuncicžcu, yawchiča, jaknužt Yooz tawk liwruquiz cjjirtčhaja, jalla nuž.

¹⁵ Cjijrta Yooz takuqui tuž cjiča:

—Sión wajtchiz žoñinaca, anaž eksna. Chertzna. Aznuquiz yawchi am chawjc jiliriž tjonča.

¹⁶ Jalla nuž watan nii ora niiz tjaajintanacaqui anaž intintazatča, kjažtiquiztan nižta wat, jalla nii. Jesusa arajpacha ojktan, jalla nekztan ninacaqui intintazzi cjsiča. Jalla nii ora cjuñziča, tuquitan cjiirta Yooz takuqui tjapa nii watchinaca mazinčiča, nii. Nii cjiirtanac jaru, nužcama watchiča.

¹⁷ Niiz tuquiqui Jesusaqui Lázaro ticziqiztan jacatatskatchiča. Nekztan kjawžcu sipulturquiztan ulanskatžquichiča. Jalla nii cherni žoñinacaqui parti žoñinacžquiz walja parličiča tjapa nii milajru paatiquiztan.

¹⁸ Jalla nižtiquiztan Jesusaž paata milajru zizcu, walja žoñinacaqui Jesusižquin zali ojkičiča. ¹⁹ Jalla nuž cheržcu fariseo žoñinacaqui ninacpora tuž cjichiča:

—Wejrnacqui jazicž cheruča. Tjapa žoñinacaqui niizžquin ojkszpanž cjskalala. Nižaza wejrnacqui anaž čjulumi kjaž cjiyi atchuca cjesaž, jaz.

GRIEGO WAJTCHIZ ŽOÑINACA

²⁰ Nii pjijzta ojkiči žoñinacžporquiz tsjii kjaž griego wajtchiz žoñinaca želatča. Ninacaqui Jerusalén watja ojkhizakazza, Yooz rispiti. ²¹ Ninacaqui Felipižquin tjončiča. Felipiqui Betsaida wajtchiztača, nižaza Galilea yokchiztača. Felipižquiz rocchiča tuž cjan:

—Señor, wejrnacqui Jesusižtan zalz pecuča.

²² Nekztanaqui Felipiqui Andrežquiz mazni ojkičiča. Nekztanaqui pucultanaqui Jesusižquiz mazni ojkičiča. ²³ Jalla nuž maztiquiztan Jesusaqui cjichiča:

—Wejrqui tsewtan cuchanžquita Yooz Žoñiča. Jaziqui wejt ticz ora wajiča. Jalla nekztanaqui wejrqui honorchiz cječa. ²⁴ Ančhucacquiz weraral chiyuča. Tsjii čjacta trigo semillaqui yokquiz tjažta, katča. Jalla nižta čjacta cjen, ew zkala jecža, nižaza pookča. Ana nižta čjacta cjequiz niiqui, nužquikaz žejlča semillaqui. ²⁵ Jalla nižta iratača tii chiitaqui. Jakziltat persun kuzcamakaz kamz pecčhaja, jalla niiqui ultim zuma kamaña pertaquiča. Pero jakziltat tii muntuquiz žejlcan persun kuzcama ana kamz pecčhaja, nižaza Yooz kuzcama kamz pecčhaja, jalla niiqui wiñayjapa zuma kamañchiz cjequiča. ²⁶ Jakziltat wejtquiz sirwachaja, jalla niiqui wejtta chica ojklaysa čjul sufrizquiztanami. Nekztan jakziquin wejr želačhaja, jalla nicju wejtta chica wejt sirwiñinaca zakaz cjequiča. Nižaza jakziltat wejtquiz sirwachaja, jalla niizžquiz wejt Yooz Ejpqui honoradž tjaaquiča.

JESUSIŽ TICZ MAZINTA

²⁷ Anziqui wejt kuzqui ancha turwaysiča. ¿Kjaž cjisnaqui? Yooz Ejp, tii sufrisquiztanž liwriyalla. ¿Nuž cjis wali cjesaya? Anača. Wejrqui tii muntuquiz tjonchinpanča, sufrisjapaqui. ²⁸ Yooz Ejp, am munañpaj cjila; ampacha rispittaj cjila. —Nuž cjichiča Jesusaqui. Jalla nii orapacha arajpachquiztan tsjii joraqui paljayžquichiča, tuž cjan:

—Wejrqui rispittiča, nižaza rispittapan cječa, amiž cjen.

²⁹ Nekž žejlni žoñinacaqui jalla nii chiñi jora nonžcu, cjichiča:

—Tsjii jorjorni želatča —nuž cjichiča.

Yekjapanacaqui tuž cjichiča:

—Tsjii anjilaž paljayžquichila.

³⁰ Jalla nekztanaqui Jesusaqui cjichiča:

—Anaž wejtajapa nii jora chižquichiča, antiz ančhucaltajapača. ³¹ Weriz ticztaž cjen tii muntuquiz žejlni žoñinacaqui pjalžtaž cjequiča. Nižaza tii muntuquiz mantiñi diablucui atiptaž cjequiča, chjatkattaž cjequiča. ³² Yooz Žoñiča wejrqui. Jaziqui tii yokquiztan cruzquiz waytital cječa. Nekztan tjapa wejt partir žoñinacžquiz wejtquin macjatskatača, wejtquin criizjapa.

³³ Jalla nuž chiican Jesusaqui jaknužt ticznačhaja, jalla nii chiichiča. ³⁴ Nekž žejlni žoñinacaqui tuž cjichiča:

—Učhumnacqui učhum liiquiztan zizziča, Cristuqui wiñaya žetaquiča. ¿Kjaž amqui chiyasajo, Yooz Žoñi cruzquiz waytita cjequiča, cjicanajo? ¿Ject tii Yooz Žoñejo?

³⁵Jalla nektanaqui Jesusaqui cjichiča:

—Wejrqui tsjii upacamakal ančhucatan želača Yooz kamaña tjeežcan, tsjii kjanažtakaz. Jalla nuž wejt kjana želan, ančhucqui zuma kamañchiz kama. Zumchi cjis wajillača. Nii zumchi cjen, ana tsucaquiča. Jakziltat anawal zumchiquiz kamčhaja, jalla niiqui jakzitchuc ojkčhaja, jalla nii ana zizza. ³⁶Jaziqui tsjii kjanažtakaz weriž želan, wejtquiz criya, zuma Yooz kamaña tjeežñinaca cjisjapa.

Jalla nuž chiižcu Jesusaqui ojkchiča. Nektan ninacžquiztan čhjojziča.

ISAIAS CJJRITA TAKU CUMPLISSICHA

³⁷Ninacž cheran walja milajrunaca paachiča Jesusaqui. Jalla nuž paachiž cjenami partu žoñinacaqui ana nižquin criichiča. ³⁸Jalla nuž ana criitiquiztan Isaías cjita profetž takunaca cumplissicHA. Isaías cjita Yooz cuntiquiztan chiiñi profetaqui tuž cjichiča:

“Yooz Jiliri, ¿ject wejtnacž chiita taku crijo? Nižaza am azi tjeežnan, žoñinacaqui anapaž intintazza”.

³⁹¿Kjažt žoñinacaqui criyasajo? Isaiasqui tuž cjichiča:

⁴⁰“Yoozqui tii žoñinaca zur žoñižtakaz cjiskatchiča, ana cherñi žoñinacžtakaz cjeajo. Nižaza chojru kuzziz cjiskatchiča, ana intintazñi kuzziz cjeajo. Jalla nuž cjen ana wejtquin macjatžcaquiča, liwriita cjeajo”.

Nuž cjjjrchiča Isaiasqui, ⁴¹tuquitan Jesusaž tjeežta honora puntu zizcu.

⁴²Jila parti ana criichiž cjenami, muzpa žoñinacaqui Jesusižquiz criichiča, nižaza jilirinacami. Pero fariseo žoñinaca ekskcu ana kjanacama cjiicjiichiča. Jamazit criichiča, ana ajcz kjuyquiztan chjatkatta cjeajo. ⁴³Žoñinacž rispitta cjis pecatča, Yoozquiztan cjen juc'anti. Jalla nižtiquiztan jamazit criichiča Jesusižquiz.

JESUSIŽ CHIITA TAKU

⁴⁴Jalla nektanaqui Jesusaqui altu joržtan chiichiča tuž cjican:

—Jakziltat wejtquiz criičhaja, jalla niiqui wejr cuchanžquiñižquiz nužuzakaz criiča.

⁴⁵Nižaza jakziltat wejr cherčhaja, jalla niiqui wejr cuchanžquiñižquiz nužuzakaz cherča.

⁴⁶Wejrqui tii muntuquiz tjonchinča, Yooz kamaña tjeežjapa, tsjii kjanažtakaz. Jakziltat wejtquiz criičhaja, jalla niiqui anawal zumchiquiz ana tira kamaquiča. ⁴⁷Jakziltat weriž chiita nonžcu ana catokačhaja, jalla niž quintra tii ora anal chiyuča. Wejrqui žoñinacž quintra chiižjapa ana tjonchinča. Antiz žoñinaca liwriizjapa tjonchinča.

⁴⁸Jakziltat wejtquiz ana criičhaja, nižaza werj ana cherz pecčhaja, nižaza weriž chiita taku ana catokčhaja, jalla niiča persun quintra cjiicjiiniqui. Pjalz tjuñquiziqui weriž chiita taku ana catoktiquiztan jalla nižtiquiztan Yooz Ejpqui ultimquiz ninaca casticaquiča.

⁴⁹Wejrqui anal persun kuzquiztan chiiñča. Antiz wejr cuchanžquiñi Yooz Ejpž mantita jaru chiiñča, nižaza niž mantitacama tjaajniñča. ⁵⁰Wejt Yooz Epiž mantitacama kamzqui arajpachquin Yooztan wiñaya kamzjapapanča. Jaziqui weriž chiitaqui Yooz Epiž mantitacama chiičinča.

13

JESUSAQUI PIYUNAŽTAKAZ KJOJCHANACA AWJZIČHA

¹Ima pascua pijjzta tjonan, Jesusaqui zizziča niž ticz ora wajitača, jalla nii. Nižaza zizziča, tii muntu eccu niž Ejpžquinž okaquiča, nii. Tii muntuquiz žejlcan Jesusaqui niž pecta mazinaca walja k'aachichiča, ultim werarapan. Ticzcama k'aachichiča.

²Pascua pijjzta paacan, Jesusaqui niž tjaajintanacžtan čheri lujlchiča. Judas Iscariote cjita Simonž majch chicapacha nezk želatča. Judas kuzqui diabluž mantuquiz cjiskatchiča. Diabluž mantitaž cjen Judasqui tarzuna paaz pinsichiča, Jesusa tankatzjapa. ³Jesusaqui zizziča, Yooz Ejpqui tjapa mantiznaca niž kjarquiz tjaachiča. Nižaza niiqui Yooz Ejpžquiztan tjonchiča, nižaza Yooz Ejpžquin quepaquiča. Jalla nii zizziča Jesusaqui. ⁴Jalla nuž zizziž cjenami, piyunažtakaz cjissiča. Misquiztan tsijtscu, niž juntuñta zquiti chjojksiča. Nektanaqui toalla aptižcu, nižtan tsjaasiča. ⁵Jalla

nektzanaqui tsjii purinquiz kjaz alžcu, niiz tjaajintanacž kjojcha awjžiñi kallantichiča. Nekztan nii tsjaazta toallžtan kjojchanaca chjujžinčiča.

⁶ Nižaza Jesusaqui Simón Pedro cjita žoñžquiz niiz kjojcha awjžiñi macjatchiča. Nekztan Pedruqui Jesusižquiz cjichiča:

—Wejt Jiliri, žamqui wejt kjojcha awjžinz pecya? Ana wejt kjojcha awjžinz waquiziča.

⁷ Jalla nuž chiitiquiztan Jesusaqui tuž kjaaziča:

—Tii weriž paataqui amqui ana intintazza anziqiu. Tii jarquinam intintazaquiča.

⁸ Pero Pedruqui cjichiča:

—Wejt Jiliri, amqui wejt kjojcha anapanim awjžinasაჩა.

Jesusaqui niizquiz kjaaziča, tuž cjican:

—Wejrqui am kjojcha anal awjžinaž niiqui, anam wejt partiquiz cjesაჩა.

⁹ Jalla nektzanaqui Simón Pedro cjitaqui tuž cjichiča:

—Wejt Jiliri, ana wejt kjojcha alajakaz awjnasača, wejt kjarami achami awjžinalla.

¹⁰ Jesusaqui niizquiz tuž cjichiča:

—Tsjii ajunta žoñiqui anaž wilta wilta ajunz pecča, antiz kjojchakaz ajunz pecča. Nekztan limpuž niiqui tjappacha. Ančhucqui limpuča, pero tsjiiqui ana limpuča ančhucqui.

¹¹ Jesusaqui zizziča, jakzilat tarsuna paazcu nii tankatačhaja, nii. Jalla nižtiquiztan nuž chiičiča Jesusaqui, “Tsjiiqui ana limpuča ančhucqui” cjicanaqui.

¹² Nekztan Jesusaqui ninacž kjojchanaca awjawjžiñžcu, niiz juntunža chjojka zquiti aptichiča. Zquiti kujžcu wilta misquiz julziča. Nekztan ninacžquiz cjichiča:

—ŽTii weriž paata ančhucqui intintazziñčuckaya? ¹³ Ančhucqui wejr “Tjaajiñi Maestruž” cjiča, nižaza “Jiliriž” cjiča. Jalla nužupanča wejrqui. Jalla nižtiquiztan nužpan chiiž waquiziča. ¹⁴ Wejrčha werera ančhucua Jiliritqui nižaza Tjaajiñi Maestrutqui. Jaziqui wejrqui ančhucua kjojcha ajunžinčinča. Jalla nižta irata ančhucmi piyunanacažtakaz, porapat yanaparassa, nižta kjojchanaca ajunz tjepi. ¹⁵ Jazic nižta paachinča, ančhuc nižtapacha paajo. ¹⁶ Ančhucuaquiz ultim weraral chiyučha. Tsjii piyunaqui niiz jiliržquiztan anača juc'anti Nižaza tsjii cuchanžquitaqui niiz cuchanžquinižquiztan anača juc'anti. ¹⁷ Ančhucqui tii puntu intintazzaj niiqui, jalla nii jaru kamz waquiziča. Nekztan cuntintuž cjequičha ančhucqui.

¹⁸ Wejrqui weriž illžtanaca pajuča. Nižaza tsjiizuñ pajuča. Niiž puntuquiztan cjižrta Yooz takuqui tuž cjiča: “Tsjii wejttan čica lujlñiqui wejt quintraž cjisnaquiča”. Jalla nii cjižrta Yooz takuqui cumplisnaquiča. Tjapa ančhucua puntuquiztan anal chiyučha.

¹⁹ Pero anziqiu ima tankatan ančhucuaquiz chiyučha jaknužt wejr tanta cječhaja, nii puntu kjanzt'uča. Jalla nižtiquiztan wejr tantanaqui, ančhucqui wejtquiz criyaquiča, wejrčha Yoozquiztan cuchanžquitaqui, jalla nii. ²⁰ Ančhucuaquiz weraral chiyučha. Jakzilat weriž cuchanžquita žoñinaca risiwčhaja, jalla niiqui wejr zakaz risiwčha. Nižaza jakzilat wejr risiwčhaja, jalla niiqui wejr cuchanžquinižquiz risiwtažakaz cjequičha.

JESUSAQUI TARAZUNTAŽ CJEQUIČHA

²¹ Jalla nuž chiižcu Jesusaqui persun kuzquiz ancha llaquita sint'ichiča. Jalla nekztan tuž kjanapacha cjichiča:

—Ančhucuaquiz weraral chiyučha. Tsjii ančhucuaquiztan wejr tankataquiča.

²² Jalla nuž chiitiquiztan niiz tjaajintanacaqui porapat chersassiča, kuzquiz pinsican, “ŽJakzilitžjapa chiičhaja?” jalla nii. ²³ Tsjii ancha k'aayi tjaajinta žoñi Jesusiž latuquiz žcati julzi želatča. ²⁴ Jalla nekztan Simón Pedruqui nii žcati žejlñižquiz kjaržtan paljayčiča. “ŽJecžquiztanpan chii? Maznalla”, cjicanaqui. ²⁵ Jalla nižtiquiztan nii žcati žejlñi žoñiqui Jesusižquiz pewcziča tuž cjican:

—Wejt Jiliri, žject am tankatñi žoñiqui?

²⁶ Jesusaqui tuž kjaaziča:

—Jecžquizkat wejrqui čher mazquiquiz t'awžcu tii t'anta tjaačhaja, jalla niiz cjequičha niiqui.

Jalla nekztanaqui nii t'anta t'awžcu, Judas Iscariotiquiz tjaachiča. Niiqui Simonž majchtača. ²⁷Jalla nii t'awžta t'anta tanžtanaqui, Satanás cjita diabluqui Judas kuzquiz luzziča. Nekztanaqui Jesusaqui Judasquiz paljaychiča, tuž cjan:

—Čjululum paachaja, apura paa.

²⁸Nii parti mizquiz julzi žoñinacaqui ana intintichiča, nii Jesusiž chiita. ²⁹Yekjapanacaqui tantiyatča, jalla tuž: Judas paaz pulsa tanzñiž cjen, Jesusaqui niižquiz mantichižlani pjižta paazjapa čjulunaca kjayžjapani. Yekjapanacazti zakaz tantiyatča, jalla tuž: Judas paaz pulsa tanzñiž cjen, Jesusaqui mantichižlani, pori žoñinacžquiz paaz onanzjapani. ³⁰Judasqui nii t'anta tanžcu nii orapacha ulanchiča. Nii oraqui weentača.

EW MANTITAQUI

³¹Jalla nuž Judas ulantanaqui, Jesusaqui cjichiča:

—Wejrtča Yooz cuchanžquita Žoñtqui. Jaziqui wejrqui wejt Yooz tjaata kamaña tjeeznuča, honorchiz cjisjapa. Nižaza weriž cjen Yooz Ejpqui honorchiz cjequiča. ³²Jalla nižtiquiztan Yooz Ejpqui wejtquiz zakaz honorchiz cjiskataquiča. Jalla niiqui wajillaž wataquiča. ³³Weriž pecta jilanaca, tsjii upacamakaz ančucatan želača. Nekztan ančucquic wejr kjuraquiča. Pero jaknužt tuquiqui žoñinacžquiz chiitučhaja, jalla nižt-pachal anziqiu ančucaquiz tuž chiyučha: Jakziqunt wejr okačhaja, jalla nicju ančucquic ana oki atasacha. ³⁴Wejrqui tsjii ew mantita ortina ančucaquiz tjaa-uča: “Porapat zuma munazizpanča, jalla nii. Jaknužt wejrqui ančucatan zuma munazitučhaja, jalla nižta ančucquic porapat zuma munazaquiča”. ³⁵Ančucaž nii ortina mantita jaruž kaman, tjapa žoñinacaqui zizaquiča, ančucča weriž tjaajinta žoñinacapan.

PEDRUQUI K'OTAQUIČHA

³⁶Jalla nekztanaqui Simón Pedruqui niižquiz cjichiča:

—Wejt Jiliri, ¿am jakzim okaquiya?

Jesusaqui niižquiz kjaaziča, tuž cjan:

—Jakziqunt wejr okačhaja, jalla nicju anaž apžni atasacha anziqiu. Tii jarquinaqui amqui wejtquin tjonaquiča.

³⁷Pedruqui cjichizakazza:

—Wejt Jiliri, ¿kjažtiquiztan anzič ana am apžni atasajo? Anzimi amquiztanami weril ticznasacha.

³⁸Jesusaqui tuž kjaaziča:

—¿Wejtquiztan ticznasaya? Ultim weraral amquiz cjiwča: Ima quer wallpaž kjawan, amqui čhjep wilta wejr ana pajñim toscara chiyaučiča.

14

ARAJPACHA OJKZ PUNTU

¹Wejt tjaajinta žoñinaca, Yooz Ejpžquin criyiñčucča nižaza wejtquiz zakaz criya. Ana turwayzi kuzziz cjee. ²Wejt Ejpž arajpach kjuyquin wacchi campu žejlča, kamzjapa. Ana nižta žejltasaž niiqui wejrqui ančucaquiz maztasacha. Jaziqui wejrqui okača ančucaltajapa campu tjaczquizjapa. ³Jalla nuž campu tjaczni ojkžcu, witalt quejpžcača ančuc chjichi, wejtjan kamzjapa. Jakziqunt wejr želačhaja, jalla nicju ančuc zakaz želaquiča, weriž chjichtaž cjen. ⁴Ančucquic jakziqunt wejr okačhaja, niiqui zizza. Nižaza wejt ojkz jicz zizza.

⁵Nekztanaqui Tomasqui cjichiča:

—Wejt Jiliri, jakziquinam am okačhaja, anal zizuča wejrnacqui. ¿Kjažt am ojkz jicz zizasaya?

⁶Jesusaqui niižquiz tuž kjaaziča:

—Wejrtča jicz cuntitqui, arajpachquin irantizjapaqui. Nižaza wejrtča werara-pankaztqui. Weriž cjen werar Yooz kamaña zizasacha. Nižaza wejrtča žeti tjaajintqui, Yooztan winaya kamzjapa. Weriž cjenpankaz Yooz Ejpžquin iranti atasacha. ⁷Ančucquic

wejr ultimu pajtasaz niiqui, ančhucqui wejt Yooz Ejp zakaz pajtasacha. Jaztanpacha weriž cjen ančhucqui wejt Yooz Ejp pajča, nižaza weriž cjen ančhucqui Yooz Ejp cherča.

⁸Nekztanaqui Felipiqui cjichiča:

—Wejt Jiliri, Yooz Ejp cherkatalla, nužquiz niimi bastakal cjeeča.

⁹Jesusaqui tuž kjaaziča:

—Felipe, ančhucatan ažkpacha željchinzala. ¿Anapanim wejr pajjo? Jakziltat wejr cherčhaja, nižaza Yooz Ejp cherča. ¿Kjažt am nuž cjeejo, “Yooz Ejp cherkata”, cjicanajo?

¹⁰Wejrmi Yooz Ejpni tsjii kuzzizza. ¿Jalla nii anam crii amya? Weriž ančhucaquiz chiitaqui anaž persun kuzquiztan chiyučha, antiz Yooz Ejpž cuntiquiztan chiyučha. Yooz Ejpqui wejt kuzquiz željča. Jalla nižtiquiztan niiz cjen obranacal paa-uča. ¹¹Wejrmi Yooz Ejpni tsjii kuzzizza. Jalla nii criyaquičha, jaziqui. Weriž chiitiquiztan ana criyasaž niiqui, weriž paata obranaca cherčzu mekaz criyalla. ¹²Werarapan ančhucaquiz chiyučha. Jakziltat wejtquiz criican tjapa kuzziz cječhaja, jalla niiqui weriž paata obranaca irataž zakaz paaquičha, nižaza weriž paata obranacuztan juc'ant pajk obranaca paaquičha, weriž Yooz Ejpžquin ojktiquiztan. ¹³Wejtquiz tjapa kuzziz cjen, ančhucqui čjul mayiztami Yooz Ejpžquiztan mayačhaj niiqui, jalla nii mayiztiquiztan wejrkal čjulumi tjaa-ača. Jalla nuž tjaa-ača, weriž cjen Yooz Ejp juc'ant honorchiz cjsjapa. Werjtča Yooz Majchqui. ¹⁴Ančhucqui wejtquiz tjapa kuzziz cjen čjul mayiztami mayačhaja, jalla nii mayiztiquiztan wejr tjaa-ača.

ESPIRITU SANTUŽ PUNTU

¹⁵Ančhucqui wejtan tjapa kuztan munazaquič niiqui, weriž tjaata ortinanaca cazaquičha. ¹⁶Wejrqui Yoozquiztan mayača, tsjii tjurt'iziñi cuchanžquizjapa. Nii tjurt'iziñiqui ančhuca kuzquiz wiñayaž kamaquičha. Yooz Espiritu Santučha niiqui. ¹⁷Nii tjurt'iziñiqui werara intintazkataquičha. Ana criichi žoñinacž kuzquiz anaž luzasača. Ninacaqui nii tjurt'iziñi ana cherasača, nižaza ana pajasacha. Nii tjurt'iziñiqui ančhuca kuzquiz željča. Jalla nižtiquiztan nii pajča ančhucqui. Nižaza wiñaya ančhuca kuzquizpacha želaquičha. ¹⁸Wejrqui ančhuc anal ecača maa ejp wajchallažtakaz. Ančhucaquin wilta tjonača. ¹⁹Tsjii upacamakaz, nekztan ana criichi žoñinacaqui ana iya wejr cheraquičha. Anchuczi wejr wilta cheraquičha. Nižaza jacatatžcu wiñayjapa žetača. Weriž žejtchiz cjen, ančhuc zakaz wiñaya žetaquičha Yooztan kamcan. ²⁰Jacatatžtanaqui ančhucqui zizaquicha, wejrqui wejt Yooz Ejpžtan tsjii kuzzizza. Nižaza ančhucqui wejtan tsjii kuzzizza. Nižaza wejrqui ančhucatan tsjii kuzzizza. ²¹Jakziltat weriž mantita ortinanaca catokčhaja, nižaza cumpličhaja, jalla niiqui ultimuz wejtšanž munaziča. Nižaza jakziltat wejtšan munazičhaja, jalla nižtan zakaz wejt Yooz Ejpqui munaziča. Nižaza wejrzakal nižtan munazuča. Nižaza wejrqui nii žoñžquiz kjanacama wejt puntu zizkatača.

²²Nekztan Judas (anača Iscariotiqui) tuž pewczičha:

—Wejt Jiliri, ¿kjažtiquiztan amqui wejtnacaquikaz pajkataquiya, am puntuquiztan zuma zizjapaya? Nižaza ¿kjažtiquiztan parti žoñinacžquin am persuna ana pajkataquiya? ¿Kjažtiquiztan nuž cjeejo?

²³Jesusaqui tuž kjaaziča:

—Jakziltat wejtšanpan munazičhaja, jalla niiqui weriž chiita taku cazza, nižaza wejt Yooz Ejpqui nižtan munaziča, nižaza wejrnacqui nižquin tjonučha, niž kuzquiz kamzjapa. ²⁴Jakziltat wejtšan ana munazičhaja, jalla niiqui weriž chiita taku ana cazza. Weriž chiita takuqui anača wejt persun kuzquiztan. Antiz wejr cuchanžquični Yooz Ejpž kuzquiztanpanča weriž chiita takuqui.

²⁵Ančhucatan iya željcan ančhucaquiz tii puntunaca chiyučha. ²⁶Wejt wiruñ weriž cjen Yooz Ejpqui tsjii tjurt'iziñi cuchanžcaquičha. Yooz Espiritu Santučha nii tjurt'iziñiqui. Jalla niiqui wejt cuntiquiztanž cjequičha. Niiqui ančhucaquiz tjapa Yooz puntunaca tjaajnaquičha, nižaza tjapa weriž chiita takunaca cjuñkataquičha.

²⁷Wejrqui ančhuca kuznaca jeejzkatučha. Ančhuca kuznaca jeejzkatžcuqui okača. Žoñinacaqui anapanž žoñž kuz nižta jeejzkatasača. Ančhuca kuznacaqui anača turwaysi cjee, nižaza anača eksna. ²⁸Ančhucqui weriž chiita nonzinčhucča: Okača,

nižazal ančhucaquiz wital tjonča, jalla nii. Ančhucqui wejttan zuma munaztasaz niiqui, chipchiž cjitasača, nii weriž chiitaž cjen. Wejrqui wejt Yooz Ejpžquin okača. Wejt Yooz Ejpqui wejtquiztan juc'antiča. ²⁹Ima ojkan ančhucaquiz anziqiu mazinčinča, jalla nuž wattan wejtquiz tjapa kuztan criyajo.

³⁰Tii muntuquiz žejlñi žoñinacaž mantiñiqui tjonča. Jalla nii anawal mantiñi diablucqui Judasquiz cuchanžquičha, wejr tankatzjapa. Jalla nižtiquiztan tsjii upacamakaz ančhucatan parluča. Pero nii anawal mantiñiqui wejtquiztan anača juc'ant azzizqui. Jazic niiqui wejr anaž mantasača. ³¹Wejrqui wejt Yooz Epiž mantitacama okača. Jalla nižtiquiztan tii muntuquiz žejlñi žoñinacaqui zizaquičha, wejrqui Yooz Ejpžtan zuma munaziča, jalla nii. Jaziqiu žaažna. Tekžtan ojkla.

15

UWAS MUNTI PUNTU

¹Wejrtča chekan litjuntqu, tsjii zuma uwas muntižtakaz. Wejt Yooz Ejpqui nii munti cwitiñičha. ²Nii uwas muntiquiztan skoz uwas piz itzanacaž pajkča. Jakzilta uwas piz itzat ana čherchiz pajkčhaja, nii ana čherñi itzaqui c'utžtaž cjequičha. Nižaza nii munti cwitiñiqui čherñi itzanaca zumpachaž azquichaquičha, juc'ant čheri pookajo. Yooz Ejpča nii munti cwitiñiqui. ³Weriž čhiitiquiztan ančhucqui zuma kuzziz cjissinčhucča. ⁴Nižaza wejrqui ančhucatan tsjii kuzziztča. Jalla niža ančhucqui wejttan tsjii kuzziz cje. Tsjii muntiquiztan ojknii piz itzaqui nii muntiquiztan apakta cjequiz niiqui, ana čherchiz cjisnasača. Antiz nii zuma muntiquiz pajknii itzanacakaz čherasača. Jalla niža nii munti itzanaca irataž ančhucqui. Ančhucqui wejttan ana tsjii kuzziz cječaj niiqui, ana zuma kami atasacha. Antiz wejttan tsjii kuzziz cječaj niiqui, nekzipanž zuma kamaña nižaza zuma obranaca tjeeznasača.

⁵Wejrtča nii zuma uwas muntižtakaztqui. Ančhuczti nii uwas piz pajknii itzanacažtakazza. Jakziltat wejttan ultimu tsjii kuzzižlaj niiqui, nižaza wejrmi nižtan tsjii kuzziz cjesaž niiqui, jalla niičha ancha zuma kamaña nižaza zuma obranaca tjeezniiqui. Jakziltat wejttan ana tsjii kuzzižlaj niiqui, Yooz yujcquiz ana čjul zum obranacami tjeeznasača. ⁶Jakziltat wejttan ana tsjii kuzzižlaj niiqui, Yoozquiztan čjatkattaž cjequičha. Nekztanaqui ana zuma kamañchiz cjen kjoñchi itsanacažtakaz cjequičha. Jalla nižtiquiztan nii kjoñchi itsanacažtakaz ricujtaž cjequičha ujquin ujjjapa.

⁷Ančhucqui wejttan tsjii kuzzižlaj niiqui, nižaza weriž tjaajinta takunaca catokaquiz niiqui, nekztan wejtquiztan čjulumiž mayasača. Nekztanaqui amiž mayiztquiztan tjaataž cjequičha. ⁸Ančhucqui walja zuma obranaca tjeezniž cjen, Yooz Ejpqui honorchiz cjequičha. Nižaza ančhuca zuma obranacchiz cjen ančhucqui weriž tjaajinta žoñinacčhucča, jalla nii kjanapachaž tjeeznaquičha. ⁹Jaknužt wejt Yooz Ejpqui wejttan zuma munazičhaja, jalla nižtapacha wejr ančhucatan zuma munazučha. Weriž ančhucatan munazniž cjen, jalla niipanž cjuñzna. ¹⁰Ančhucqui weriž mantita ortinanaca cumplaquičha. Jalla nekztan wejrqui ančhucatan tirapan munaziñil cjeeča. Wejrqui wejt Yooz Epiž mantita ortinanaca cazzinča. Jalla nižtiquiztan niiqui wejttan tirapanž munaziča. Jalla niža irata ančhucatan wejttan cjequičha.

¹¹Jalla nii puntunaca ančhucaquiz chiyučha, wejttan chica cuntintuž cjisjapa, nižaza ančhuca kuznacami ancha cuntintu cjisjapa. ¹²Weriž mantita ortinaqui tužučha, jaknužt wejr amtan zuma munazitučhaja, jalla niža irata ančhucqui porapat munazaquičha. ¹³Jakziltat persunpacha niž mazinacž laycu ticžaja, jalla niiqui, ancha munaziñi kuz tjeeža. Jalla niža žoñžquiztan anaž juc'anti munaziñi kuzziz žoñic želasača. ¹⁴Ančhucqui weriž mantitacama kamaquiz niiqui, nekzipanča ančhucqui wejttan munaziñiqui. ¹⁵Tekztan najwcchuc anal ančhucaquiz “wejt piyunanacača” cjian cjesača. Tsjii piyunaqui čjulul patruna paačhaja, ana zizza. Wejrqui tjapa wejt Yooz Epiž čhiitaqui ančhucaquiz zizkatchinča. Jalla nižtiquiztan tekztan najwcchuc ančhucaquiz “wejt mazinacapanča” cjeeča. ¹⁶Ančhucqui ana wejr illzinčhucča. Wejrzi ančhuc illzinča, nižaza apóstol puestuquiz utchinča, Yooz taku parli okajo, nižaza walja žoñinaca wejtquiz criiskatajo.

Nižaza nii wejtquiz criichi žoñinacaqui wejtquiz tiraž tjurt'acuiča. Wejtquiz kuzziz cjen, čjul mayiztami Yooz Ejpžquiztan mayačhaja, jalla nii mayiztaqui tjaataž cjequiča.

¹⁷ Wilta ančhucaquiz mantuča:
Porapat zuma munazaquičha.

CRIICHI ŽOÑINACAQUI CHJAAWJKATTA CJEQUIČHA

¹⁸ Ana criichi žoñinacaž ančhucatan chjaawjkatan, cjuñzna, jalla nižta ninacaqui wejttan chjaawjkatchičha. ¹⁹ Ana criichi žoñinacž partiraž cjitasaž niiqui, ančhucqui ninacžquiz munazita cjitasača. Pero wejrqui ančhuc illzinča. Jalla nižtiquiztan anača ana criichi žoñinacž partira ančhucqui. Nižaza nižtiquiztan ančhucqui ana criichi žoñinacžquiz ana munazita cjequiča, nižaza chjaawjtaž cjequiča. ²⁰ Weriž chiitac cjuñzna. Wejrqui cjichinča, “Tsjii piyunaqui niž patrunžquiztan anača juc'anti”. Ana criichi žoñinacaqui wejtquiz sufriskatchičha. Nižaza ninacaqui ančhucaquiz zakaz sufriskataquičha. Weriž tjaajinta taku ana catokhiča. Jaziqui ančhucaž tjaajinta taku ana zakaz catokaquičha. ²¹ Pero ana criichi žoñinacaqui ančhuca quintra cjequiča, ančhucaž wejtquiz kuzziz cjen. Nii quintranacaqui wejr cučanžquini anaž pajča. Jalla nižtiquiztan ančhucaquiz quintraža.

²² Wejrqui ninacžquiz Yooz taku mazni ana tjontasaž niiqui, ninacaqui ana nii pajk ujchiz cjitasača. Pero wejrqui wejt puntuquiztan kjanapacha ninacžquiz čiičinča. Jalla nižtiquiztan ninacaqui ana čjulumi chiyi atasacha, casticz tjuñquiziqui. Nižaza ninacžquiziqui anaž pertunac želasacha. ²³ Jakziltat wejtquiz chjaawjkatchaja, jalla niiqui wejt Yooz Ejpžquiz zakaz chjaawjkatcha. ²⁴ Wejrqui ninacž yujcquiz walja milajru obranaca paachinča, jakzilta wali žoñžquiztanami juc'anti. Pero anapanča wejtquiz criiz pecchiča. Jaziqui pajk ujchiz cjissičha. Jalla nižta obranaca anal paatasaz niiqui, ninacaqui ana nii pajk ujchiz cjitasača. Pero nižta obranaca paachinča. Nižaza ninacaqui weriž paata milajrunaca cherchiča. Jalla nuž cheržcumi, wejtquizimi wejt Yooz Ejpžquizimi chjaawjchipanča. ²⁵ Jalla nuž ninacaž chjaawjtaqui cjiirta Yooz taku cumplissičha. Ninacž liiquizpacha cjiirta Yooz takuqui, tuž cjiča: “Wejtquiz chjaawjchiča ana čjul razunžtan”.

²⁶ Wejrqui Yooz Ejpžquiztan ančhucaquiz Yooz Espiritu Santo cučanžcača. Jalla nii Yooz Ejpžquiztan tjonchi Espiritu Santuqui wejt puntuquiztan weraraž intintazkataquičha, nižaza ančhucaltajapa tjurt'izinaquičha. Jalla nii Espiritu Santuqui tjonžcu wejt puntuquiztan zizkataquičha. ²⁷ Primirquiztanpacha ančhucqui wejttan chica ojklaychinčhupanča. Jalla nižtiquiztan ančhuczakaz wejt puntuquiztan zizkataquičha.

16

PRUEBANACAŽ TJONAQUIČHA

¹ Tjapa weriž čiiitanacaqui ančhucaquiz čiičinča, čjul sufrisquiztanami tirapan wejtquin kuzziz cjisjapa, nižaza ana wejtquiztan zarakzjapa. ² Jazta timpuquiz ančhucqui ajcz kjuyanacquiztan čjatkattaž cjequiča. Nižaza tsjii sufris ora tjonaquičha. Jalla nii oraqi jecmit ančhuc conačhaja, jalla nii conni žoñiqui cjequiča, “Wejrtča Yooz sirwintqui. Jalla nižtiquiztan nii žoñi conchinča”, nuž cjequiča. ³ Nii ančhuc conni žoñinacami wejtquizimi wejt Yooz Ejpžquizimi anapan pajča. Jalla nižtiquiztan ančhuc conasača. ⁴ Tjapa weriž čiiitanacaqui ančhucaquiz čiičinča, ančhucaquiz yanapzjapa. Nii sufris ora tjontanaqui jalla tii weriž čiiitanaca cjuñznaquičha. Primirquiztanpacha tii sufris puntuquiztan ančhucaquiz kjanacama ana čiičinča. Ančhucatan kamiñtača. Jalla nižtiquiztan tii sufris puntu ana čiiž pecchintača.

ESPIRITU SANTUŽ PUNTU

⁵ Pero anz wajilla wejr cučanžquinižquin okača. Ančhucaquiztan anaž jakziltami wejr pewčza, “Jazit okačhaja?” jalla nii. ⁶ Ančhucqui ancha llaquita cjissinčhucča, jalla nuž weriž čiiiniž cjen. ⁷ Pero wejrqui werara takunaca chiyučha. Weriž ojktanaqui waliž cjequiča ančhucaltaqui. Wejrqui anal okasaž niiqui, tjurt'iziñi Espiritu Santuqui anaž tjonasača. Pero wejr ojžcuqui nii Tjurt'iziñi cučanžcača. ⁸ Jalla

niiqui tjonžcuqui, ana criichi žoñinacž kuzquiz ninacž persun uj tantiyaskataquiča. Nižaza Yooziž mantita kamañ puntu tantiyaskataquiča, nižaza nii Espiritu Santuqui Yooz casticz puntu tantiyaskataquiča. ⁹ Espiritu Santuqui ana criichi žoñinacž kuzquiz persun uj tantiyaskataquiča, wejtquiz ana criichiž cjen. ¹⁰ Nižaza nii Espiritu Santuqui ana criichi žoñinacž kuzquiz Yooziž mantita kamañ puntu tantiyaskataquiča, weriž Yooz Ejpžquin ojkchiž cjen. Jalla nižtiquiztan ančhuc zakaz wejr ana iya cheraquiča. ¹¹ Tii muntuquiz mantiñi diabluqui Yooziž yatisinžtača, ana walipanča, nii. Jazic niiqui castictaž cjequiča ultim juyzuquiz. Jalla nižtiquiztan Espiritu Santuqui ana criichi žoñinacžquiz Yooz casticz puntu tantiyaskataquiča.

¹² Iya juc'anti kjažumi ančhucaquiz chiižinznaca žejlča wejttaqui. Pero anziqui ančhucqui anaž nii intintazasača. ¹³ Werar intintazkatñi Espiritu Santuqui tjonžcu, ančhucaquiz tjaajnaquiča tjapa weraranaca. Anaž persun kuzquiztan tjaajnaquiča, antiz Yoozquiztan nonžtanaca tjaajnaquiča. Nižaza tekztan najwchuc čhjulul wat-ačhaja, jalla nii zakaz tjaajnaquiča. ¹⁴ Espiritu Santuqui wejt puntuquiztan ančhucaquiz tjaajnaquiča. Jalla nuž tjaajniž cjen wejrqui honorchiz cjeeča. ¹⁵ Tjapa Yooz Epiž chiitaqui wejrpankazza chiiñtqui. Tsjikaztča wejrnacqui. Jalla nižtiquiztan wejrqui chiichinča, Espiritu Santuqui wejt puntuquiztan ančhucaquiz tjaajnaquiča, nii.

CUNTINTUŽ CJEQUIČHA

¹⁶ Upaquižtancama ančhucqui wejr ana cheraquiča. Nekztanaqui tsjii kjaž majquiztan wejr wilta cheraquiča.

¹⁷ Nekztanaqui yekjap tjaajintanacaqui porapat pewcassičha, tuž cjican:

— ĽKjažt cjii tjejo, tuž cjicanajo? “Upaquižtancama ančhucqui wejr ana cheraquiča. Nekztanaqui tsjii kjaž majquiztan wejr wilta cheraquiča”. Nižaza tiiqui “Wejrqui Yooz Ejpžquin okača”, cjiča. Jalla nuž cjican, Ľkjažt cjii teejo? Ľčhjul puntut chii teejo?

¹⁸ Ninacaqui cjichizakazza:

— “Upaquižtancama” chiičanaqui, Ľkjažt cjii teejo? Anača intintazzuca tiíž chiitaqui.

¹⁹ Jesusaqui persun kuzquiz zizatča, ninacaqui nižquin tsjii pewcz pecatča, jalla nii. Jalla nekztanaqui Jesusaqui ninacžquiz tuž cjichiča:

— Wejrqui chiichinča, tuž cjican: “Upaquižtancama ančhucqui wejr ana cheraquiča, nekztanaqui tsjii kjaž majquiztan wejr wilta cheraquiča”. Jalla nuž chiican, Ľkjažt cjii? ĽJalla niičha ziz pecya? ²⁰ Ultim weraral ančhucaquiz cjiwča. Ančhucqui llaquita cjequiča, nižaza kaaquiča. Ana criichi žoñinaczi cuntintuž cjequiča. Ančhucqui llaquita kuzviz cjenami, tsjii kjaž majquiztan anča chipchipcan cuntintuzakaz cjisnaquiča.

²¹ Nonžna. Majtz ora irantižcan tsjaa maatak žonqui janchinaca walja mizkatiñča. Nekztan wawa majtžcuqui, naa maatak žonqui wawchiz cjen ana janchi mizkattami cjuñiñča. Wawchiz cjen, anča cuntintučha naaqui. ²² Jalla nižta irataž ančhucqui anziqui llaquita kuzzizza. Pero wejrqui am wilta cherača. Jalla nii oraqui ančhuca kuznaca cuntintuž cjequiča. Nižaza nii ančhuca cuntintu cjis kuzqui anaž jecmi wilta nižta llaquita cjskatasacha.

²³ Nii orquiztan najwchuc ančhucqui zizni cjsicu wejr anaž iya pewcnaquiča. Ančhucaquiz weraral chiyučha. Wejtquiz tjapa kuztan cjen, ančhucqui Yooz Ejpžquiztan čhjulumi mayačhaja, jalla nekztan weriž cjen nii mayiztaqui tjaataž cjequiča. ²⁴ Tii oracama ančhucqui anaž čhjulumi maychinčhucča wejt tjuuquiz. Mayiza, nekztanaqui tjaataž cjequiča, ančhuca kuz juc'anti cuntintu cjisjapa.

JESUSIŽ CHIITANACA

²⁵ Tii oracama wejrqui ančhucaquiz ch'aman intintazzuc takunaca chiichinča. Tsjii tjuñiqui tjonča. Jalla nii tjuñiquiztan nižta ch'aman intintazzuc takunacami anal iya chiy-ača. Antiz Yooz Ejpž puntuquiztan jalla niil kjanacama chiy-ača. ²⁶ Nii oraqui ančhucqui wejt tjuuquiz čhjulquiztanamiž mayizaquiča. Nekztan wejrqui ančhucaltajapa anal iya maynača wejt Yooz Ejpžquiztanqui. ²⁷ Ančhucqui wejttn munazichinčhucča. Nižaza wejtquiz criichinčhucča, wejrqui Yooz Ejpžquiztan tjonchi, jalla nii. Jalla nižtiquiztan

Yooz Ejp̄pacha ančhucatan munaziča. ²⁸Wejrqui Yooz Ejp̄quiztan tii muntuquiz tjonch-
inča. Nižaza tii muntuquiztan, wejt Yooz Ejp̄quin quepača.

²⁹Jalla nekztanaqui niiz tjaajintanaqui cjichiča:

—Jaziqui ultimu kjanacama chiichamča, ana ch'aman intintazzuc takunacžtan.

³⁰Jaziqui zizuča, amqui tjapa čhjulumi zizñampanča, nii. Ampankam wejtnaca kuzmi
zizza. Jalla nižtiquiztan wejrnacqui anal iya pewcnasača. Nižaza wejrnacqui ultim
chekpacha criyuča, amqui Yooz Ejp̄quiztan tjonchamča, jalla nii.

³¹Jesusaqui ninacžquiz tuž kjaaziča:

—Jaziqui ančhucqui ultim chekpacha criichinčhucjo? ³²Tsjii ora wajiča. Anzpachača
nii oraqui. Nii oraqui ančhucqui wichanziž cjequiča, nižaza zina zina wichanziž
cjequiča. Wejrqui zinalla ectal cjeeča. Pero wejr zina ecta cjenami, wejrqui ana
zina cjeeča. Wejt Yooz Ejp̄z wejtta chica cjequiča. ³³Jaziqui tjappacha tii takunaca
ančucaquiz chiichinča, wejtquiz kuzziz cjen, cuntintu cjisjapa. Tii muntuquiz željcan
ančhucqui supraquiča. Walja tjup kuzzizpan cjee. Wejrqui tjapa liju atipchinča.

17

JESUSIŽ YOOZ EJP̄ZTAN PARLITA

¹Jalla nuž chiižcu Jesusaqui tsewcchuc arajpach kjutni cherziča. Nekztan Yooz Ejp̄ztan
parlichiča, tuž cjan:

—Yooz Tatay. Wejt sufris ora tjonča. Wejrtča am Majchtqui. Wejtquiz honorchiz
cjiskatala. Nekztan wejrqui amquiz juc'ant honorchiz cjiskatača. ²Tjapa žoñinaca
mantizjapa, jalla nii poder wejtquiz tjaachamča. Jakziltami amqui wejtquiz intrijčahaja
wejt parti cjisjapa, jalla ninacžquiz arajpachquin wiñaya kamkatača wejrqui. ³Amča
zinta werara Yoozqui. Nižaza wejrtča Jesucristutqui; amiž cuchanžquita Žoñtča.
Wejt parti žoñinacaqui amquizimi wejtquizimi pajča. Jalla nižtiquiztan arajpachquin
učumtan wiñaya kamaquiča.

⁴Tii muntuquiz kamcan amquiz honorchiz cjiskatchinča. Nižaza amiž mantita
obranaca žerzinča. ⁵Jaziqui, Yooz Tatay, amquin wilta quejpcu, arajpachquin amtan
chica želaquiča. Nekztan wejtquiz honorchiz cjiskatala. Ima tii muntu želan, wejrqui
amtan chica honorchiztala. Jalla nižta tuquita honorchiz irata wilta wejtquiz honorchiz
cjiskatala.

⁶Amqui žoñinaca illzamča, wejt partiquiz cjisjapa. Jalla nii žoñinacžquiz intin-
tazkatchinča am puntuquiztan. Ninacaqui amtača. Nižaza wejt parti cjisjapa wejtquiz
tjaachamča. Nižaza ninacaqui am takunac jaru kamča. ⁷Jaziqui wejt partir žoñinacaqui
zizza, tjapa weriž chiitaqui amquiztan tjonñicamača, jalla nii. ⁸Amiž chiita takunacacama
ninacžquiz tjaajinchinča. Jalla nekztan ninacaqui weriž tjaajinta catokchiča. Nižaza
weriž tjaajinta žoñinacača zizñipanqui, wejrqui amquiztan tjonchinča, jalla nii. Nižaza
criichipanča, amqui tii muntuquiz wejr cuchanžquichamča, nii.

⁹Jaziqui ninacžtajapa amquiz mayizuča. Ana criichi žoñinacžtajapa anal mayizuča.
Antiz wejt partir žoñinacžtajapakaz mayizuča, amiž illniž cjen. ¹⁰Amtača tjapa wejt
partir žoñinacaqui. Nižaza wejttača ninacaqui. Jalla ninacaž cjen wejrqui honorchizza.

¹¹Wajilla ana iya tii muntuquiz kamača. Nii wejt partir žoñinacaž eclaquiča. Tii
muntuquiz tira želaquiča ninacaqui. Wejrzi amquin quejpcča. Zuma arajpach Yooz
Tatay, tii žoñinaca wejtquiz tjaachamča. Jaziqui am aztan tinaca tirapan cwitalla, tsjii
kuzziz cjeajo, jaknužt učumqui tsjii kuzzizlaja, jalla nižta. ¹²Tii muntuquiz tinacžtan
kamcan, tii žoñinaca cwitichinča, am aztan. Nižaza tinacžquiztan tsijtsinčinča
čhjulquiztanami ana kjaž cjisnajo. Tsjiiqui pertissipanča. Jalla nuž pertisjapa nii Judas
Iscariotiqui željtkalča. Jalla nuž cjen tuquita cjiirta Yooz taku cumplissiča.

¹³Anziqui wejrqui amquin quejpcča. Iya tsjii zkolucžtan tii muntuquiz kamcan
wejrqui tinacžquiz chiižinuča, wejtquiz criichi žoñinacaž wejržtapacha cuntintu cjeajo.

¹⁴Wejrqui tinacžquiz am taku tjaajinchinča. Jaknužt wejrqui ana criichi žoñinacž
partiquiz ana želatučahaja, jalla nižta irata wejtquiz criichi žoñinacaqui ana željča

ana criichi žoñinacž partiquiz. Jalla nižtiquiztan ana criichi žoñinacaqui ninacžquiz chjaawjčha. ¹⁵ Amquiztan ana mayizučha, wejt žoñinacaž tii muntuquiztan chjichtaž cjisjapa. Antiz amquiztan mayizučha, ana wal diablužquiztan wejt žoñinaca tsijtsinta cjisjapa. ¹⁶ Jaknužt wejrqui ana criichi žoñinacž partiquiz ana želatučhaja, jalla nižta irata wejt žoñinacaqui ana žejlčha, ana criichi žoñinacž partiquiz. ¹⁷ Amiž chiitaqui ultim weraračha. Am takuž cjen wejtquiz criichi žoñinaca zuma kamañchiz cjiskata. Čhjul ana zuma kamañquiztanami zarakskata. ¹⁸ Jaknužt amqui tii muntuquiz žejlñi žoñinacž kjutñi wejr cuchanžquičhaja, jalla nižaza wejrqui tii muntuquiz žejlñi žoñinacž kjutñi wejt žoñinaca cuchnučha. ¹⁹ Wejtquiz criichi žoñinacžtajapa ancha kuztančha wejrqui ticzjapa. Nižaza am werar tawk jaru kamtiquiztan tii žoñinaca t'akžinučha amta cjeajajo.

²⁰ Wejrqui tii tekžta žoñinacžtajapa alaja anal mayizučha, antiz tjapa wejtquiz anzimi wiruñami criichi žoñinacžtajapa mayizučha. Tii tekžta žoñinacaž Yooz taku paljaytiquiztan yekjapanacaqui wejtquiz criyaquičha. Jalla ninacžtajapa zakaz mayizučha. ²¹ Jalla tjapa ninacžtajapa mayizučha tsjii kuzziz cjisjapa. Yooz Tatay, amqui wejtтан tsjii kuzzizza. Nižaza wejrqui amtan tsjii kuzziztčha. Jalla nižta irata ninacaqui učhumnacaquiz tsjii kuzziz cjila. Jalla nuž mayizučha, tii muntuquiz žejlñi žoñinaca criyajo, am wejr cuchanžquičhi, jalla nii. ²² Amiž wejtquiz tjaata arajpach kamaña, jalla nii kamaña ninacžquiz cjiskatchinzakazza, tsjii kuzziz cjeajajo, jaknuž učhumni tsjii kuzzizzalaja, jalla nižta. ²³ Jaknužt amqui wejtтан žejlčhaja, jalla nižtačha wejrqui ninacžtan želačha, ninaca tsjii kuzzizpan cjeajajo. Jalla nižtiquiztan žoñinacaqui zizaquičha, amqui wejr cuchanžquičhičha, jalla nii. Nižaza žoñinacaqui zakaz zizaquičha, amqui ninacžtan munazičha, jaknužt amqui wejtтан munazičhaja, jalla nižta.

²⁴ Yooz Tatay, amqui wejtquiz tii žoñinaca tjaachamčha, wejtquiz criyajo. Jalla tinacaqui wejtтан chica kamñijapa pecučha, jakziquin wejr želačhaja, jalla nicju. Jalla nuž juntu žejlcan tinacaqui wejt arajpach kamaña kjana cheraquičha. Ima tii muntu želan, wejtтан munaziñiž cjen amqui wejtquiz nii arajpach kamaña tjaachamčha. Jalla nii kamaña cheraquičha wejt partir žoñinacaqui. ²⁵ Ultim lijitum Tatayi ana criichi žoñinacaqui am anaž pajčha. Wejrzi am pajučha. Nižaza jalla tinacaqui zizza, amqui wejr cuchanžquičhamčha, jalla nii. ²⁶ Am puntuquiztan tinacžquiz zumpacha intintazkatchinčha. Nižaza wejrqui tiral intintazkatučha, ninacž zuma munazizjapa, jaknužt učhumni zuma munazičhaja, jalla nižta. Nižaza am puntuquiztan ninacžquiz intintazkatučha, wejr ninacžtan tsjii kuzziz cjisjapa.

18

JESUSAQUI TARAZUNTAČHA

¹ Jesusaqui nuž chiižcu niž tjaajintanacžtan ojkičha. Cedron cjeta k'awž tsjii latuquin ojkičha. Jalla nicju ch'ojñi muntinaca želatčha. Nijcchuc luzzičha. ² Jesusaqui nii yokquin kjaž wilta ajcžñipantakalčha niž tjaajintanacžtan. Tarazunñi Judasqui nii yoka pajchičha. ³ Jalla nicju Judasqui zultatunacami, nižaza timplu wijilñi zultatunacami, jalla ninaca chjitchičha. Timplu jilirinacami, fariseo žoñinacami jalla ninacačha nii timplu wijilñi zultatunaca cuchanchiqui. Ninacaqui irantichičha michanacžtan teyanacžtan pajk cuchillunacžtan, nižaza wajtz carotinacžtan. Jalla nižtanacžtan irantichičha. ⁴ Jesusaqui čhjulul watačhaja, jalla nii tjapa zizatčha. Nii tjonchi žoñinacžquiz macjatžcu, pewczičha, tuž cjican:

— ¿Jectčha kjur ančhucjo?

⁵ Jalla ninacaqui kjaazičha, tuž cjican:

— Wejrnacqui kjuručha Jesusa, nii Nazaret wajtchiz žoñi.

Jesusaqui tuž kjaazičha:

— Wejrtčha niitqui.

Judas, nii tarazuñi žoñiqui ninacžtan chica tsijtchi želatčha. ⁶ Jesusaž “Wejrtčha niitqui” cjitiquiztan nii tanñi žoñinacaqui wir kjutñi atžcu porapat tewksarascu yokquiz tojtassičha. ⁷ Jesusaqui wilta pewczičha:

—¿Jectpan ančhuc kjurjo? —cjican.

Ninacaqui wilta kjaazičha, tuž cjican:

—Wejrnacqui kjuručha Jesusa, nii Nazaret wajtchiz žoñi.

⁸Jesusaqui nektan zakaz cjichičha:

—Wejrtčha cjichinsala. Ančhucqui wejr kjurčha. Jaziqui tii parti žoñinaca cutz-naquičha.

⁹Jalla nektan Jesusaž tuqui chiita taku cumplissičha. Tuquiqui Jesusačha chiichiqui, jalla tuž: “Yooz Epiž wejtkuiz tjaata žoñinacaqui ana tsjiimi pertichinčha”. ¹⁰Simón Pedruqui pajk cuchillchiztačha. Jalla nii cuchillu jwescu, Pedruqui timplu jilirž piyunž žew cjuñi pootžcu chjajtžinchičha. Jalla nii cjuñi chjajtžinta žoñiqui Malco cjitatačha.

¹¹Nekztanaqui Jesusaqui Pedružkuiz cjichičha:

—Am cuchillu cuchillž žejlžkuiz quijtžna. Wejt Yooz Ejpž pinsita kuz jaru wejtlaqui sufristančha. ¿Anaj wejr tii sufrasajo?

JESUSAQUI CHJICHTAČHA

¹²Jalla nektanaqui zultatunacami, zultatž comandantimi, nižaza judío timplu wijilñi zultatunacami, jalla ninacaqui Jesusa tanžcu kjara jweržinchičha. ¹³Nekztan Anás cjita jilirž kjuykuiz chjtchičha. Anasqui Caifás ajmuž ejptačha. Jalla nii wata Caifasqui timplu chawjc jiliritačha. ¹⁴Nii Caifasqui tuquiqui tuž cjitkalčha: “Učhumnacaltajapa tsjii žoñi ticstančha, tjapa žoñinaca ana conta cjeyajo”.

¹⁵Jesusa chjichan, Simón Pedružtan tsjii tjaajinta žoñžtan Jesusa apzičha. Nii tsjii Jesusiž tjaajinta žoñiqui timplu jilirž pajtatačha. Jalla nižtikuiztan Jesusižkuiz apžcu nii timplu jilirž patiuquin luzzičha. ¹⁶Pedruqui ana pajtaž cjen zancu eclichičha. Nekztan nii tsjii luzzi tjaajinta žoñiqui ulanžquichičha, naa ulanz zanquiz cwitiñi žonaquin paljayzjapa. Jalla nuž paljayžcu patiuquiz Pedro luzkatchičha. ¹⁷Nekztan naa cwitiñi žonquiqui Pedružkuiz pewczinčha, tuž cjican:

—¿Anaj am zakaz nii žoñžtan chica ojklajñamtajo?

Nekztan Pedruqui chiichičha:

—Anaž wejr, —cjican.

¹⁸Ch'uñuriž cjen piyunanacami timplu zultatunacami uj taazičha carpunžtan. Nekztan nii uj parazkuiz tsijtchi kutnatčha. Ninacžtan chica Pedruqui tsijtchi zakaz želatčha, kutuncan.

TIMPLU CHAWJC JILIRŽQUIN APANTITA

¹⁹Jalla nektanaqui timplu chawjc jiliriqui Jesusa pecunchičha, niž tjaajinta žoñinacž puntuquiztanami nižaza niž persun tjaajintami. ²⁰Jesusaqui nižkuiz kjaazičha, tuž cjican:

—Tjapa žoñinacž yujcquiz tjaajinchinčha. Učhum ajcz kjuyquizimi timpluquizimi tjaajinchinčha. Timpluquiz tjapa žoñinaca ajczñičha. Ana chjozaka tjaajinchinčha. ²¹¿Kjažtikuiztan nuž wejr pecunjo? Werič tjaajinta nonžni žoñinacžkuiz pewczna, čjulut tjaajintučhaja, jalla nii. Jalla ninacaqui werič tjaajintanaca zizza.

²²Jalla nuž chittan, tsjii nekc tsijtchi žejlñi zultatuqui Jesusa yujcquiz kjaržtan tsjajpchičha, tuž cjican:

—¿Jalla nuž timplu jiliržkuiz kjaazkaya?

²³Jesusaqui nii zultatžkuiz kjaazičha, tuž cjican:

—Wejr ana zuma chiituchaj niiqui, ¿jaknužt cjican ana zuma chiichintajo? Zumal chiyučha. ¿Kjažtikuiztan am wejr tsjajpjo?

²⁴Jalla nektanaqui Jesusa kjara jweržintapacha cuchanchičha Caifás timplu chawjc jiliržquin.

PEDRUQUI K'OTCHIČHA

²⁵Jalla nii oraqui Simón Pedruqui tsijtchi želatčha nii ujquiz kutuncan. Tsjii tsjii nekc žejlñi žoñiqui Pedružkuiz cjichičha:

—Amqui nii žoñžtan chica ojklajñamčha, ¿ana jaa?

Pedruqui toscara chiichičha:

—Anačha wejrqui, —cjican.

²⁶ Jalla nekztanaqui tsjii timplu jilirž piyunaqui Pedružquiz pewczizakazza. Nii piyunaqui nii cjuñi chjajtžinta piyunž familiatačha. Jalla tuž cjican pewczičha:

—Nii munti yokquin nii žoñžtan chica am cherchinla, ¿ana jaa?

²⁷ Pedruqui wilta toscara chiichičha. Jalla nuž wilta toscara chiyan, nii orapacha tsjii querwallpi jora kjawchičha.

PILATUŽQUIN CHJICHTA

²⁸ Jalla nekztanaqui Caifás cjita žoñžquiztan Jesusaqui chjichtačha pajk mantiñiž kjuyquin. Waj kjantatitačha. Nii judío žoñinacapacha nii pajk mantiñiž kjuyquin ana luzzičha, ninacž cuzturumpi cjen. Jalla nuž luztasaz niiqui, pascua pjijzta čhjeri ana lujltasačha. ²⁹ Jalla nižtiquiztan Pilatuqui ninacžquiz paljavi ulanžquichičha, tuž cjican:

—Ančhucqui, ¿čhjul ujš tii žoñž quintra jwes pecya?

³⁰ Žoñinacaqui tuž kjaazičha:

—Tii žoñiqui ana čhjul pajk ujnacami paatasaz niiqui, anal wejrnacqui tii intirjitasacha.

³¹ Nekztanaqui Pilatuqui ninacžquiz cjichičha:

—Ančhuckaz chjicha, ančhuca lii jaruž justicia paažca.

Nii žoñinacaqui kjaazičha, tuž cjican:

—Wejtnacalta žoñi conzqui lii quintračha.

³² Niž tuquiqui Jesusaqui chiitkalčha, persun ticz puntuquiztan, jaknužt ticznačhaja, jalla nii. Nižaza niž chiitaku cumplisnaquičha. ³³ Pilatuqui wilta niž kjuyquin luzquichičha. Jesusa kjawžcu, nižquiz pewczičha, tuž cjican:

—¿Judío žoñinacž chawc jilirimkaya?

³⁴ Jesusaqui nižquiz kjaazičha, tuž cjican:

—¿Amqui jalla nuž persun kuzquiztan wejr pewczya? Už ¿yekja žoñinaca amquiz nuž pewczna cjichi jaa?

³⁵ Pilatuqui tuž kjaazičha:

—Wejrqui judío žoñt, ¿jaa? Am persun wajtchiz žoñinacami nižaza am persun timplu jilirinacami, jalla nii žoñinacačha wejtquin am intirjichiui. ¿Čhjul uj paachamt, amjo?

³⁶ Jesusaqui nekztan cjichičha:

—Wejtla mantizqui anačha tii muntuquiztan. Tii muntuquiztan wejtla mantiz cjesaž niiqui, wejt piyunanaca kichaskatasacha wejt quintra žoñinacžquiz, ana wejr intirjita cjisjapa. Pero wejtla mantizqui anačha tii muntuquiztanaqui.

³⁷ Nekztan Pilatuqui cjichičha:

—¿Nižtaqui amčhalani mantiñi jilirinqui?

Jesusaqui cjichičha:

—Jesalla, wejr mantiñi jilirtchiya, am chiičha jalla nuž. Tii muntuquiz tjonžcu nassinčha, werara puntu tjaajinzjapa. Jakziltat nii werara tjaajinta jaru kamčhaja, jalla niiqui weriž chiita taku nonža.

³⁸ Jalla nuž chiitiquiztan Pilatuqui cjichičha:

—Werara puntuqui, ¿čhjulut neejo?

Jalla nuž pewczcu Pilatuqui wilta ulanchičha judío žoñinacžquin parli. Ninacžquiz cjichičha:

—Wejrqui tii žoñžquiz ana čhjul ujmi jwesi atučha. ³⁹ Pascu pjijztiquiz ančhucalta tsjii custurumpi žejlčha, wejtla tsjii preso tanta žoñi cutzqui. ¿Tii judío wajtchiz chawc jiliri cutznaquiya? ¿Jalla nuž cutskatz pecya?

⁴⁰ Judío žoñinacaqui kjawchičha:

—¡Tii žoñi ana cutzna! ¡Barrabás cutzna! —cjican. Barrabasqui tsjii anawal tjañi žoñitačha.

¹ Jalla nekztanaqui Pilatuqui wilta kjuylchuc Jesusa majcchiča. Nekztanaqui Jesusižquiz wjajtajō mantichiča. ² Nekztan zultatunacaqui ch'apquiztan tsjii pillužtakaz paachiča. Jalla nii paatižtan Jesusiž achquiz tewžinchiča. Nižaza jilirž murat zquiti tjutziča. ³ Jalla nuž paažcu niižquin macjatchiča,

—¡Viva, judío žoñinacž chawjc jiliri! —cjican.

Nižaza Jesusiž yujcquiz kjaržtan tsjajpchiča.

⁴ Nekztan Pilatuqui judío žoñinacžquin wilta ulanžquichiča. Nekztan ninacžquiz cjichiča:

—Cherzna. Ančhucaž intirjita žoñi ticju jwescača, ančhuc zumpacha intintazajo. Wejrqui tii žoñžquiz anal čhjul ujmi jwesi atuča.

⁵ Jalla nekztan Jesusaqui ulanzkatžquichiča. Ch'apquiztan paataqui achquiz tewžinta, nižaza jilirž murat zquiti tjutžta. Nekztanaqui Pilatuqui ninacžquiz cjichiča:

—Tiiča ančhucaž intirjita žoñiqui.

⁶ Timplu jilirinacami, nižaza timplu wijilni zultatunacami nii cheržcu, alto joržtan jjawcan, čhiichiča:

—¡Cruzquizkaz ch'awczna! ¡Cruzquizkaz ch'awczna! —cjican.

Pilatuqui ninacžquiz cjichiča:

—Way, nižtacž chjicha ančhucqui, nižaza cruzquiz ch'awczca. Pero wejrqui ana čhjul ujmi tiižquiz jwesi atchinča.

⁷ Nekz žejlñi judionacaqui tuž kjaaziča:

—Wejrnacqui lichiztča. Wejtnaca lli jaru tii žoñic ticstanča, tiiqui “Wejrtča Yooz Majch” cjican ojklaychiž cjen.

⁸ Jalla nii čhiita taku nonžcu, Pilatuqui tsjan eksiča Jesusižquiztan. ⁹ Jalla nižtiquiztan Pilatuqui niž kjuya wilta luzziča Jesusižquin pewczjapa. Jalla tuž pewcziča:

—¿Jakziquiztan žoñipant amya?

Jesusazti ana čhjulumi kjaaziča.

¹⁰ Jalla nižtiquiztan Pilatuqui niižquiz wilta paljaychiča, tuž cjican:

—¿Kjažtiquiztan am ana wejtzquiz kjaazjo? Wejrqui mantasača, am cutzjapa. Nižaza mantasača cruzquiz ch'awczjapa, ¿Jalla nii ana ziz amjo?

¹¹ Jesusaqui niižquiz kjaaziča, tuž cjican:

—Yoozqui amquiz mantiz poder ana tjaatasaj niiqui, amtaqui mantiz poder ana žejl-tasača. Yooz amquiz mantiz poder tjaachiž cjenkaz wejr mantasača. Jalla nižtiquiztan jecčhalaj amquiz wejr intirjichi, jalla ninacača amquiztan juc'ant ujchizqui.

¹² Jalla nuž nonžcu Pilatuqui Jesusa ančaž jaknužumi cutz pecatča pero nii judío žoñinacazti kjawžcan čhiichiča, tuž cjican:

—Tii žoñi cutznaquič žiiqui, am zakaz César tsjan chawjc jilirž quintra paaquiča. Jakziltat “Wejrtča chawjc jiliritqui” cjican chečhaj niiqui, César chawjc jilirž quintraž paača.

¹³ Pilatuqui jalla nuž nonžcu, zultatu mantichiča, Jesusa zancchuc jwescajo. Zancchuc jwesquichiča Gabata cjita patiuquin. Gabata tuž cjiča, maznacžtan curta, jalla nii. Jalla nicju Pilatuqui jusjiiz julzquiz julziča. ¹⁴ Jalla nii tjuñiqui tjacz tjuñitača jaka pascua pijžtaž cjen. Nižaza taypurutača. Nekztanaqui Pilatuqui nii judío žoñinacžquiz cjichiča:

—Tiiča ančhuca chawjc jiliri.

¹⁵ Ninacaqui kjawchiča, tuž cjican:

—¡Ticžla tiiqui! ¡Ticžla tiiqui! ¡Cruzquiz ch'awczla!

Nekztan Pilatuqui ninacžquiz cjichiča:

—¿Kjažt ančhuca tsjan chawjc jiliri ch'awcznas?

Nii timplu jilirinacaqui tuž kjaaziča:

—Wejtnacaltauqui zinta tsjan chawjc jiliri žejlča, César cjitača.

¹⁶ Jalla nekztanaqui Pilatuqui ninacž kuzcama Jesusa intirjichiča cruzquiz ch'awta cisjapa.

CRUZQUIZ CH'AWCTAČHA

¹⁷Jalla nekztanaqui Jesusaqui chjichtatača. Persuna cruza kuzi ojkkatchičha Ach Tsijj cjeta tjuuchiz yokquin. Nii yokaqui hebreo tawkquiz Gólgota cjitatača. ¹⁸Jalla nicju cruzquiz ch'awctatača, nižaza nižtan chica tsjii pucultan žoñinaca yekja cruzanacquiz ch'awctazakatača, Jesusiž porap kjuttan, Jesusazi ninacž taypiquiz. ¹⁹Nižaza Pilatuqui tsjii letrero paakatchičha, tuž cjican: “Jesusa Nazaret wajtchiz žoñi. Judionacž tsjan chawjc jiliri”. Jalla nii paažcu Jesusiž ach juntuñ cruzquiz ch'awcžinchiča. ²⁰Chawc wajt žcati Jesusaqui cruzquiz ch'awctatača. Jalla nižtiquiztan walja judío žoñinacaqui niž letrero liichiča. Nii letreruqui čhjep tawkquiztan cjjirtatača, hebreo tawkquiztanami, griego tawkquiztanami, nižaza latin tawkquiztanami. ²¹Nii letrero cheržcu timplu jilirinacaqui Pilatuqui cjičiča:

—Ana cjjira, “Judionacž tsjan chawjc jiliri” cjicanaqui. Antiz cjjira, “Tii žoñiqui cjiča, ‘Wejrtča judionacž tsjan chawjc jiliritqui’”. Jalla nuž cjjira.

²²Pilatuqui tuž kjaaziča:

—Jaknužt cjjirchinžlaja, nužupanikaz cjequiča.

²³Zultatunacaqui Jesusa cruzquiz ch'awcžcu niž zqiti ricujchiča. Nižaza pajkpic partiquiz tojziča, nii pajkpaltan zultatunacaqui. Tsjii pajk tol zqitiqui ana ch'ucuchiz watzatača, tsewchuc kozzuc pakjipacha. ²⁴Jalla nižtiquiztan nii zultatunacaqui porapat kazasiča, tuž cjican:

—Anačhum wjajrla. Antiz surtiila. Tii zqitiqui jecžquizkat surti cayačhani nižtaž cjequiča.

Jalla nuž paatan cjjirta Yooz takuqui cumplissiča. Cjjirta Yooz taku tuž cjiča: “Ninacžpora wejť zqiti tojziča, nižaza parti zquitiztan surtiyassiča”. Jalla nuž paachiča nii zultatunacaqui.

²⁵Jalla nekz Jesusiž cruz žcati tsijtsiñ želatča, Jesusiž maa; nižaza niž maa cullaqui; nižaza María (Cleofas tjuntača); nižaza María Magdalena; nii pajkpaltan želatča.

²⁶Jesusaqui niž maa cherchiča. Nižaza niž pecta tjaajinta žoñi naaža žcati tsijtchi želatča. Jalla nuž cheržcu Jesusaqui niž maaquiz cjičiča:

—Maataka, tiiča am maati cunta.

²⁷Nekztanaqui nii tjaajinta žoñžquiz cjichizakazza:

—Taača am maaqui.

Jalla nekztanpacha nii tjaajinta žoñiqui Jesusiž maa ricujžcu persun kjuya chjitchičha.

JESUSAQUI TICZA

²⁸Jalla nekztanaqui Jesusaqui zizziča, tjapa Yooz Epiž tjaata langznaca liwž žeržtapan-tača, jalla nii. Nekztan cjičiča:

—Kjaz kjaral paznuča.

Jalla nuž cjican, cjjirta Yooz takuqui cumplissiča.

²⁹Jalla nekzi tsjii ojch želatča jar vinchiz. Jalla nekztanaqui kjaz ch'umñi esponja t'awziča nii vinquiz. Nekztan hisopo cjeta munti parquiz chjapžcu, Jesusiž atquin ch'ižinchiča. ³⁰Jesusaqui nii jar vinu licžcu, nekztan cjičiča:

—Tjapaž cumplissay. —Jalla nuž chiižcu Jesusaqui acha colžcu ticziča.

³¹Pascua pijjzta tjacz tjuñitača. Niž jakatažu jeež tjuñitača, nižaza chawc pijjzti tjuñitača. Jalla nižtiquiztan judío žoñinacaqui nii cruzquiz ticziž curpunaca anaž nuž tsji-jptapacha čhjelinz pecatča. Jalla nižtiquiztan nii judionacaqui Pilatužquin maychiča, cruzquiz ch'awcta žoñinacž lis tsjii kjolkjolžinajo, apura ticskatsjapa. Nekztan ticžtan cruzquiztan apakznasača. ³²Nekztan Pilatuqui zultatunaca mantichiča, nii cruzquiz ch'awctanacž lis kjolžjapa. Primir tjañž lismi kjolžinchiča. Nižaza tsjii tjañž lismi kjolžinchičakazza. ³³Nekztanaqui Jesusižquiz macjatžcu, nii zultatunacaqui cherziča, ticzi, jalla nii. Jalla nižtiquiztan niž lismi ana kjolkjolžinchiča.

³⁴Pero tsjii zultatuqui Jesusiž ch'ill kjuttan chjapžinchiča pajk cuchillžtan. Jalla nuž chjaptan ljocmi kjazmi lewchiča. ³⁵Wejrpacha jalla nii cherchinča. Jalla nižtiquiztan werera ticlarchinča nii puntuquiztan, ančhuczakaz criyajo. Weriž ticlarta takuqui

werarapanča. ³⁶ Jalla tii watchi puntunacquiztan cjjirta Yooz takuqui cumplissičha. Cjjirta Yooz takuqui jalla tuž cjiča: “Anaž jakzilta niiž tsjijmi kjoltaž cjequiča”. ³⁷ Nižaza tsjii cjjirta Yooz takuqui tuž cjiča: “Ninacaqui ninacaž chjapta žoñiqui cheraquiča”.

JESUSAQUI TJATŽTAČHA

³⁸ Jalla nekztanaqui tsjii Arimatea wajtchiz žoñiqui, José cjita, Pilatužquin mayi ojkičiča. Josequi Jesusiž curpu mayčiča tjatzjapa. Josequi chjozaka Jesusiž chiita tjaajintanaca catokchiča, ana jeczquizimi mazcu. Parti judío jilirinacžquiztan eksiča. Jalla nuž maytan Pilatuqui permiso tjaachiča. Jalla nekztanaqui Josequi ojkičiča Jesusiž curpu chjichi. ³⁹ Nižaza Nicodemo cjita žoñiqui Jesusiž curpu tjaczni tjonchiča. Jalla nuž Jesusiž curpu tjaczjapa zjjcchiča, tsjii quintala zuma ulurchiz mirržtan aloestan t'ajžta. Niiž tuquiqui Nicodemuqui Jesusižquin ween tjonzitača. ⁴⁰ Josežtan Nicodemžtan Jesusiž curpu tjaczča. Nižaza nii mirržtan aloestan jalla ninacžtan zuma pañunacžtan Jesusiž curpu capziča, jaknužutajlaj nii judío žoñinacž cuzturumpi, jalla nuž. ⁴¹ Jesusiž cruzquiz ch'awcta yokquin muntinaca želatča. Nii muntinac yokquiz tsjii ew sepulturu želatča, ana jec ticizimi tjatžtatača nii ew sepulturquiz. ⁴² Judionacž jeejz tjuñimi pascua pjijzta tjuñimi wajillatača. Pero nii ew sepulturuqui žcatillatača. Jalla nižtiquiztan nii sepulturquin Jesusiž curpu tjatchičha.

20

JESUSAQUI JACATATCHIČHA

¹ Semana kalltiznan nii tuming wenz chawjc kjantati María Magdalena sepulturquin ojkinča. Nekztan cherchinča sepultura pjucžta maz, cjetžtatača. ² Jalla nekztan María Magdalenqui zati pariju ojkinča, Simón Pedružquin, nižaza nii Jesusiž pecta tjaajinta zoñžquin. (Jalla niiča tii liwru cjjirni Juan cjitaqui.) Jalla naa Mariiqui ninacžquiz paljaychinča, tuž cjican:

—Jesús Jilirž curpu sepulturquiztan chjichtača. Nižaza jakziquin chjichcu tjatžtakazlani anača zizzuca.

³ Jalla nekztanaqui Pedružtan nii tsjii pecta tjaajinta zoñžtan ulanžcu sepultura cherzni ojkičiča. ⁴ Ninacac pucultanuntu zatatača. Nii tsjiiqui tsjan apura zajtčiča Pedružquiztan. Jalla nuž zajtžcu Pedruž tuqui sepulturquin irantichiča. ⁵ Irantižcu sepulturquiz colžcu chercherziča, nii Jesusiž curpu tejlžta pañunaca nezkizak cherziča. Pero ana luzziča. ⁶ Niiž wiruñ Simón Pedruqui irantichizakazza. Jalla niiqui sepulturquiz luzziča. Nižaza niiqui Jesusiž curpu tejlžta pañunaca cherziča. ⁷ Jesusiž acha jeržinta pañu morokpachalla tsjii latu nonžtatača. Parti pañunacžtan anatačauntu. ⁸ Jalla nekztanaqui nii tuqui irantiñi žoñiqui sepulturquiz luzzizakazza. Jalla nii pañunaca cheržcu, criichiča, Jesusa jacatatchi, jalla nii. ⁹ Cjjirta Yooz takuqui Jesusaž ticziquiztan jacatatz puntuquiztan chiiča. Pero Jesusiž tjaajintanacaqui nii cjjirta Yooz taku imaż intintazatača. ¹⁰ Jalla nekztanaqui Pedružtan Juanžtan, jalla nii pucultanaqui kjuya quejpchiča.

MARIA MAGDALENAŽ QUINTU

¹¹ Maria Magdalena cjitiqiu sepultur zancu želatča, kaacan. Jalla nuž kaacan sepultur kjutni colžcu cherzinča. ¹² Nekz sepulturquiz pucultan anjilanaca chiw zquti cutchi želatča. Jakziquiz Jesusa tjatžtatažlaja, jalla nekz julzi želatča. Tsjiiqui ach kjuttantača, tsjiiqui kjojch kjuttantača. ¹³ Nii anjilanacaqui naaquiz pewczičha:

—Cullacalla, ¿kjažtiquiztan am kaa? —cjican.

Naaqui tuž kjaaziča:

—Wejt Jilirž curpu chjitchičha. Jakziquin chjitztakazlani, anal zizi atuča.

¹⁴ Jalla nuž chiižcu, kjutzquichinča. Jalla nuž kjutžcu Jesusa tsjitsi cherziñča. Pero Jesusa ana pajchinča nii ratu. ¹⁵ Nekztan Jesusaqui naaquiz pewczičha, tuž cjican:

—Cullacalla, ¿kjažtiquiztan am kaa? ¿Jequim kjurya?

Mariiqui persun kuzquiz pinsichinča: “Munti yoka cwitiñi žoñiž caa”, cjican. Jalla nižtiquiztan nižquiz cjichinča:

—Señor, amqui Jesusiž curpu chjitchamžlaj niiqui, maznalla, jakziquin nii curpu cjichamta. Nekztan wejrqui niž curpu chjichasača.

¹⁶Jesusaqui nekztan naaquiz cjichiča:

—¡María!

Mariiqui nuž chiiñi nonžcu zumpacha kjutzinča. Nekztan Jesusižquiz chiichinča:

—¡Raboni! —cjican. Nii takuqui hebreo tawkquiz “Maestro” cjiča.

¹⁷Nekztanaqui Jesusaqui naaquiz cjichiča:

—Wejr cutzna. Wejrqui imazil Yooz Ejpžquin okuča. Jaziqui mazñi okaquiča weriž tjaajinta jilanacžquin. Tuž cjican maznaquiča: “Wejrqui Yooz Ejpžquin okača. Jalla niiqui wejt Ejpča, nižaza ančuca Ejpzakazza. Nižaza niiča wejt Yoozqui, nižaza ančuca Yoozqui”.

¹⁸Jalla nekztanaqui María Magdalenqui Jesusiž tjaajintanacžquin mazñi ojkchinča, tuž cjican:

—Jesusa Jiliri cherchinča.

Nekztan ninacžquin Jesusiž chiitanaca mazzinča.

JESUSAQUI WILTA PARIZIČIČHA

¹⁹Tumincuqui jalla nii nooj ween niž tjaajintanacaqui tsjii kjuyquiz želatča. Kjuya zuma chawjcchitača, quintra žoñinaca eksku. Jalla nuž cjen Jesusaqui tsijtsi ninacž taypiquiz parizichiča. Nekztan ninacžquiz tsaanchiča, tuž cjican:

—Ančhucqui walikaz cjee.

²⁰Jalla nuž tsaanžcu, Jesusaqui ninacžquiz tjeezicha niž pjetta kjaranacaž, nižaza niž chjapta ch'illa. Jalla nekztanaqui ninacaqui Jesús Jiliri cheržcu, ancha chipchi cuntintutača. ²¹Jalla nekztanaqui Jesusaqui wilta ninacžquiz tuž chiichiča:

—Walikaz cjee. Jaknužt Yooz Ejpqui wejr cuchanžquichiča, jalla nižta zakaz wejrqui ančucaquiz cuchanžcača.

²²Jalla nuž chiican, Jesusaqui ninacž kjutñiž pjuziča, tuž cjican:

—Ančhucqui, Yooz Espíritu Santuž tanzna. ²³Jakzilta žoñž ujnaca ančhucqui pertunaquiž niiqui, Yooz Epiž pertuntaž cjequiča. Nižaza jakzilta žoñž ujnaca ančhucqui ana pertunaquiž niiqui, ana pertuntaž cjequiča.

WILTA PARIZIČIČHA, TOMAS ŽELAN

²⁴Nii oraqui nii tuncapan illzta žoñinacžquiztan tsjiiqui ana želatča, Tomás cjita. Niiž tsjii tjuuqui “Pacha” cjitatača. Jesusa tjonz, nii ora ana želatča. ²⁵Wiruñauqui parti tuncapan tjaajintanacaqui Tomasquiz quint'ichiča, tuž cjican:

—Jesús Jiliri wejrnac cherchinča.

Pero Tomaszi tuž cjichiča:

—Anal criyasača. Wejrqui Jesusiž clawžtan pjetta kjarami ana cheraž niiqui, nižaza nii pjetquiz ana wejt kjar loc'ana chjapznaž niiqui, nižaza niž ch'ill pjetquiz wejt kjarana chjapznaž niiqui, jalla nižtiquiztan anal criyasača.

²⁶Quinsakal tjuñquiztan nii tjaajintanacaqui wilta kjuyquin želatča, Tomastanpacha. Kjuy chajwcchiž cjenami, Jesusaqui ninacž taypiquiz tsijtsi parizichiča. Nekztan ninacžquiz tsaanchiča, tuž cjican:

—Ančhucqui walikaz cjee.

²⁷Jalla nekztanaqui Tomasquiz paljayičiča, tuž cjican:

—Wejt kjarana chernac. Am kjar loc'ana tekz chjapzna. Nižaza am kjarana zjjica, wejt ch'illquiz chjapzna. Anapan tira ana criiñi kuzziz cjee. Antiz criya, wejtquiz kuzziz cjee.

²⁸Tomasqui tuž kjaaziča:

—¡Wejt Jiliri! ¡Wejt Yooz!

²⁹Jesusaqui nekztan nižquiz cjichiča:

—Jaziqui Tomás, amqui wejr cheržcu criichamča. Ana wejr cheržcu criichinacaqui, juc'ant waliz cjequiča.

³⁰ Jesusaqui niiz tjaajintanacaž cheran walja milajrunaca paachiča. Parti milajrunacakaz tii libruquiz cjiirtatača. ³¹Jalla tekz cjiirta milajrunacaqui wejrqui cjiirchinča ančhucqui criyajo, Jesusaqui Cristučha, nižaza Yooz Majchča, jalla nii. Nižaza cjiirchinča, ančhuc Cristužquin kuzziz cjsjapa, arajpachquin wiñaya kamzjapa.

21

JESUSAQUI WILTA PARIZIČIČHA

¹Niiz wiruñ Jesusaqui niiz tjaajintanacžquiz wilta parizichiča, Tiberias kot atquin. Jalla tuž wachiča. ²Nez želatča, Simón Pedružtan, “Pacha” cjita Tomastan, Caná de Galilea wajtchiz Natanaelžtan, Zebedeož majchnacžtan, nižaza tsjii pucultan iya tjaajintanacžtan. Jalla ninaca juntu želatča. ³Nekztan Simón Pedruqui cjichiča:

—Wejrqui ch'iz tani okučha.

Nii partinacaqui cjichiča:

—Wejrnacmi amtan chical okača.

Jalla nekztan kotquin ojkičiča. Nicju tsjii warcuquin luzziča. Pakara langzcanami ana čhjul ch'izmi tani atčiča. ⁴Kjanžcanalla, Jesusaqui kot atquin parizizquichiča. Nii tjaajintanacaqui ana zizatča, nii Jesusažlaj, jalla nii. ⁵Nekztanaqui Jesusaqui ninacžquiz cjichiča:

—Jilanaca, ¿ana čhjul ch'izmi tanchinčuckaya?

Ninacaqui kjaaziča:

—Ana čhjul, —cjan.

⁶Nekztanaqui Jesusaqui ninacžquiz cjichiča:

—Nii warcuž žew latuquiz ch'iz tanz tjojtzna. Jalla nezk ch'iznaca tanznaquiča.

Jalla nuž tjojtziqiztan wacchi ch'iznaca tanzičha. Wacchi ch'iznaca tanchiž cjen, wirataž ana warcuquin joozuca. ⁷Nii Jesusaž ancha k'aachita žoñiqui Pedružquiz cjichiča:

—Niiča Jesús Jiliriqiu.

Nuž čhiitiqiztan nii orapachalla Pedruqui niiz chjojka zquiti cutžcu, kot kjazquin luzziča, kjaz juntuñ narcan Jesusižquin ojkičjapa. Warcuquiz langzcan, ana zquitchiztača, calzunsillo alaja. ⁸Parti tjaajintanacaqui warcuquiz ojkičiča ch'iz tanzquiz ch'iznaca joočan. Nii ch'iz tanzqui ch'iznacžtan chjiipachatača. Nii joočan kot atquin macjatžquichiča. Ninacaqui kot atquiztan patac metruž jalla nužquinkaztača. ⁹Nekztanaqui kot atquin irantižcu, warcuquiztan ulanchičha. Nižaza uj paraza cherchiča, ch'iz tjucta. Nižaza t'anta želatča. ¹⁰Nekztanaqui Jesusaqui ninacžquiz cjichiča:

—Tsji kjaž ančhucadž tanta ch'iznaca zjičja.

¹¹Jalla nuž maytiqiztan Simón Pedruqui warcuquiz luzcu nii ch'iznaca kot atquin joožquichiča. Nii ch'iz tanzqui pajk ch'iznacžtan chjiipitača, patac pjijska tunca quinsani ch'iznacchiztača. Jalla nuž wacchi tanchiž cjenami, nii ch'iz tanzqui ana wjajrziča. ¹²Jesusaqui ninacžquiz cjichiča:

—Picha. Čhjeriž lujl-lay.

Ana ultim pajžcumi anaž jecmi nii tjaajintanacžquiztan pewczni atadža, “¿Ject amya?” cjanacaqui. Ninacaqui “Jesús Jilirižlani” nuž kuzquiz pinsichiča. ¹³Jalla nekztanaqui Jesusaqui ninacžquin žcatžinžquichiča. T'anta tanžcu, ninacžquiz tjaachiča, nižaza ch'iz zakaz ninacžquiz tjaachiča.

¹⁴Ticziqiztan jacatatžcu, tii čhjep wiltiquiziqui Jesusaqui niiz tjaajintanacžquiz parizichiča.

SIMON PEDRUŽQUIZ CHIČIČHA

¹⁵Jalla nuž čhjeri lujltiqiztan, Jesusaqui Simón Pedružquiz pewczičha, tuž cjan

—Simón, Jonás maati, ¿amqui tii žoñinacžquiztan wejttan juc'anti munazkaya?

Pedruqui tuž kjaaziča:

—Jesalla, wej Jiliri. Amqui zizza, wejr am pecučha, jalla nii.

Nekztan Jesusaqui niizquiz cjichiča:

—Wejt žoñinacžquiz arajpach čhjeri tja. Ninacača uuzanacžtakazqui.

¹⁶Nekztan Jesusaqui Pedružquiz wilta pewcziča, tuž cjan:

—Simón, Jonás maati, ¿amqui wejttan zuma munazkaya?

Pedruqui tuž kjaaziča:

—Jesalla, wejt Jiliri. Amqui zizza, wejr am pecučha, jalla nii.

Jesusaqui niížquiz cjichiča:

—Wejt žoñinaca cwita. Ninacača uuzanacažtakazqui.

¹⁷Nekztanaqui Jesusaqui čhjep wiltiquiziqui Pedružquiz pewcziča:

—Simón, Jonás maati, ¿amqui wejr peckaya? —cjan.

Pedruqui jalla nuž čhjep wilta pewcztiquiztan llaquita cjissiča. Jalla nekztanaqui Pedruqui tuž kjaaziča:

—Wejt Jiliri, amqui tjapa zizñampanča. Amqui zizza, wejr am pecučha, jalla nii.

Nekztan Jesusaqui niížquiz cjichiča:

—Wejt žoñinacžquiz arajpach čhjeri tjaa. ¹⁸Ultim weraral amquiz chiyučha. Amqui tjowa cjicanaqui zquiti kujtžcu jakziquinam ojzk pecčhaja, ojknāmtača. Pero chawčcuzti, amqui kjaram waaznaquiča. Yekja žoñiqui am zquiti tjtuznaquiča, nižaza ana amiž ojzk pecta, jalla nijcchuc chjichta cjequiča.

¹⁹Jalla nuž chiižcu, Jesusaqui mazinchiča, jaknužt Pedro ticstančhalaja, nižaza jaknužt Pedruž cjen Yoozquin honora tjaataž cječhaja, jalla nii. Nekztan nuž chiižcu, Jesusaqui Pedružquiz tuž cjichiča:

—Wejt kamañquizka kama.

TJAAJINTA K'AYI ŽOŇI

²⁰Nekztanaqui Pedruqui wir kjutñi kjutžcu, Jesusiž tjaajinta k'ayi žoñž kjutñi cherziča. Nii tjaajinta k'ayi žoñiqui pascu pjijztiquiz čhjeri lulan, Jesusiž latuquiz želatča. Niiqui Jesusižquiz pewczitača, tuž cjan: “Wejt Jiliri, ¿ject am tankataquiya?” ²¹Jalla nii tjaajinta žoñž kjutñi cheržcu, Pedruqui Jesusižquiz pewcziča, tuž cjicha:

—Wejt Jiliri, ¿tii žoñžquiz čhjulut wataquiya?

²²Jesusaqui Pedružquiz tuž kjaaziča:

—Wejt tjonzcama tii žoñž žejtz munaž niiqui, ¿čhjulut amquiz importiya? Wejt kamañquizka kama amqui.

²³Jalla nuž Jesusaž chiiitiquiztan, tii quintu ojkičiča, nii tjaajinta k'ayi žoñiqui ana ticznaquiča, jalla nii. Pero Jesusaqui ana nižta chiiichiča, “Amqui ana ticznaquiča” cjan. Pero Jesusaqui cjichiča, “Wejt tjonzcama tii žoñž žejtz munaž niiqui, ¿čhjulut amquiz importiya?” Jalla nužkaz cjichiča.

²⁴Wejrpachača nii tjaajinta k'ayi žoñiqui. Wejrqui tii cartiquiz cjjrtanaca maznuča. Nižaza tii liwruquiz cjjruča. Nižaza criichi žoñinacaqui zizza, weriž mazta taku werarapanča.

²⁵Nižaza iya juc'anti Jesusaž paatanaca žejlča. Tjapa niíž paatanaca cjjrta cjesaž niiqui, nii cjjrta liwrunaca tjapa tii muntuquiz chjijpsnasača. Nižaza iya juc'anti želaquiča. Nužkazza. Amén.

LOS HECHOS DE LOS APOSTOLES

¹ Zuma Teófilo, tuqui wejrqui tsjii libro cjiyrchinča tjapa Jesucristuž puntuquiztan. Jesusiž ojklaytanacami tjaajintanacami cjiyrchinča, nasta tjuñquiztan, ² arajpacha quejpsquiz tjuñicama. Ima arajpacha quejžcan Jesusižtan Espiritu Santužtan apostolonacžquin mantichiča, jaknužt kamz waquizichaja, jalla nii. ³ Jesusaqui ticziquiztan jacatatzcu tii yokquiz iya pusi tunc tjuñi žejlchiča niiž apostolonacžquiz persuna tjon tjonzjapa. Tjon tjonžcan, kjanapacha tjeeziča, “Jacatatchinča”, cjican. Nižaza jaknužt Yooz mantuquiz kamz waquizichaja, jalla nii tjaajinchiča.

⁴ Tsjii nooj niiž apostolonacžtan juntjapžcu, Jesusaqui ninacžquiz chiižinchiča, tuž cjican:

—Anača tii Jerusalén wajtquiztan ulnaquiča. Tekziča tjewznaquiča ančucqui, wejt Yooz Epiž chiita taku cumpliscama. Niiqui Espiritu Santo cuchanzcaquiča; jalla niicamaž tjewznaquiča. Tuquitan wejrqui anchucaquiz nii puntu paljaychinpantača. ⁵ Juan Bautistaqui kjaztan bautissipanča. Anziqii tsjii kjaž majquiztan ančucqui Espiritu Santužtan bautistaž cjequiča. —Nuž cjichiča Jesusaqui.

JESUCRISTUQUI ARAJPACHQUIN QUEJPCHIČA

⁶ Apostolonacaqui Jesusižtan juntjapsi cjen, pewcziča, tuž cjican:

—Wejt Jiliri, žanzpacha amqui tii Israel wajtchiz žoñinaca ninacž quintranacžquiztan liwriyaquiya? ¿Tii žoñinaca persuna mantisjapaya?

⁷ Nekztanaqui Jesusaqui ninacžquiz kjaaziča, tuž cjican:

—Yooz Ejjpankazza timpunacaqui mantiñiqui, čjulorat tii tii watačhaja, jalla nii. Nižaza Yoozquii ančucaquiz ana zikatz munča, čjulorat tii Israel žoñinaca liwriita cječhaja, jalla nii. ⁸ Pero Espiritu Santuž ančuca kuzquiz luztan, ančucqui tjuj kuzziz cjequiča. Jalla nekztan ančucqui wejt puntuquiztan paljayñi ojklayaquiča Jerusalén wajt yokaran, nižaza Judea yokaran, nižaza Samaria yokaran, nižaza tjapa kjutñi. —Jalla nuž cjichiča Jesusaqui.

⁹ Nekztan apostolonacaž cheran Jesusaqui ninacž taypiquiztan tsewcchuc waytissiča. Yooz Epiž chjichtatača arajpacha. Nužquiz tsjir taypiquiz katchiča Jesusaqui. Ana iya tjenchiča. ¹⁰ Nekztanaqui tsewcchuc cheksnan, pucultan chiw zquitchiz žoñinacažtakaz jecžquichiča ninacž žcati. ¹¹ Nii pucultan anjilanaquii tuž cjichiča:

—Galilea žoñinaca, ¿kjažtiquiztan ančucqui tsewcchuc chekžqui? Jesusaqui ančucaquiztan arajpacha chjichtača. Pero tsjii nooj nii Jesusapacha wilta tii muntuquiz quejžcaquiča, jaknužt tsjir taypiquiz katchaja, jalla nuž tsjir taypiquizzakaz jecžcaquiča. Nuž tjonaquiča. —Nuž cjichiča anjilanaquii.

MATIASQUI ILLZTA APOSTOL CJISSIČA

¹² Jalla nekztanaqui apostolonacaqui Olivos cjita curullquiztan chjiwžquiču, Jerusalén watja quejpchiča. Jerusalén watjaqui nii curullquiztan žcatitača, jeejz tjuñquiz jaknužt judiuž lii jaru ojkw waquizichaja, jalla nužullquin ojktatača. ¹³ Jerusalén watja irantižcu apostolonacaqui alujta kjuya luzziča; tsewcta altu pisuquin alujtatača. Nii apostolonacaqui tinacatača: Pedrotača, Jacobotača, Juantača, Andrestača, Felipitača, Tomastača, Bartolomitača, Mateotača, Jacobo cjita Alfeož majchtača, Simonatača (niiqui cananista cjita partir žoñitača), nižaza Judas cjita Jacobož majchtača. Jalla ninacatača apostolonacaqui. ¹⁴ Tjapa ninacaqui tsjii kuzziz Yoozquin mayizizjapa ajcajczñipantača. Ninacžtan chica želatča Jesusiž lajknacžtan, Jesusiž maatan, nižaza yekja maatakanacžtan. Tjappacha Yoozquin mayizican želatča.

¹⁵ Tsjii noojiqui jalla nuž chicapacha želan Pedruqui tsjitsiča, nii Yoozquin criichi žoñinacž taypiquiz. Nii oraqui tsjii patac paatuncani nužquintakalča nii criichi žoñinacaqui. Pedruqui ninacžquiz cjichiča:

¹⁶—Jilanaca, cullaquinaca, Judasqui Jesusa tanñi žoñinaca irpichiča. Tuquitan jalla nii Judas puntuquiztan Espiritu Santuqui Davidžquiz mazinčiča, Yooz tawk liwruquiz cjiřta cjisjapa. Nižaza nii Espiritu Santuž mazintaqui cumplispantača. Jaziqi cumplis-sičha. ¹⁷Judasqui učhum partiquiztantača. Nižaza Yoozta langžniquiz uchtatača. ¹⁸Nii anawali paañi Judasqui Jesusa tarasunta paaztan tsjii yoka kjayčiča. Nekztan, kozzuc achchiz tjojtscu, walu pjatsi ticziča. ¹⁹Tjapa Jerusalén wajtchiz žoñinacaqui nii Judas quintu zizza. Jalla nii quintu nonžcu, Judas kjayta yoka tjuuskatchičha, Acéldama cjian. Acéldama tjuuqui ninacž tawkquiztan “Ljoc Yoka” cjiča. ²⁰Judas puntuquiztan Salmos cjita liwruquiz tuž cjiřtača: “Niiž kjuyaqui jaytitaj cjila. Nižaza ana jecmi nii kjuyquiz kamla”. Salmos cjita liwruquiz tuž zakaz cjiřtača: “Niiž puestuquiz yekja uchtaj cjila”.

²¹Pedruqui tira chiichiča, tuž cjian:

—Jalla nii Yooz takuž cjen učhumnacquiztan tsjiiqui illza, Judas puesto tanzñijapa. Jaziqi nii puesto tanzñi žoñiqui tjapa wejrnačaz Jesusižtan ojklayta timpu cumpant'ichi žoñinacžquiztan illzta cjistanča. ²²Juanž bautis timpu jalla nijctanpacha Jesusa arajpacha ojkcama, jalla nii timpu cumpant'ichi žoñinacžquiztan nii žoñiqui illzta cjistanča. Nekztan nii žoñiqui wejtnacatan chicapacha cjequiča, Jesusaž jacatatta puntu paljayzjapa. —Nuž cjičiča Pedruqui.

²³Nekztanaqui pucultan žoñi illsiča, tsjiiqui Judas puesto tanzñijapa. Tsjiiqui José cji-tatača, nižaza Josiqui Barsabás cjitazakaztača. Nižaza Josiqui Justo tjuuchizzakaztača. Tsjiizuñqui Matías cjitatača. ²⁴Nekztan nii ajczñi žoñinacaqui mayizichiča, tuž cjian:

—Jesús Jiliri, amqui tjapa žoñinacž kuz zizza. Jaziqi tii pucultiquiztan amiž illzta apóstol tjeeznalla. ²⁵Niiqui Judas puestuquiz uchtaž cjequiča, amquin sirwiñž ojklayzjapa. Judasqui nii puestuqui pertičičha anawali uj paažcu. Jaziqi infiernuquin ojkičiča. Jalla nuž niižtaqui waquizichiča. —Jalla nuž mayizichiča.

²⁶Nekztanaqui ject Jesusiž illzta, jalla nii zizjapa, zurtiasičha, nii pucultiquiztan jakzilitižquiz nii zurti cayačhaja, jalla nii. Jalla nuž zurtiascu, nii zurtiqui Matiasquiz cayčiča. Jalla nekztan Matiasqui nii parti tuncaman illzta apostolonacžtan juntu cjišsiča. Lijitum apóstol nužquiz cjišsiča.

2

YOOZ ESPIRITU SANTUQUI TJONČHA

¹Pentecostés cjita pijjsta tjuñquiz tjapa Jerusalén žejlñi criichi žoñinacaqui juntassičha tsjii kjuyquizkaz. ²Tiripintit tsewtan tsjii chawc tjamž joražtakaz nonziča. Tjapa nii kjuya zmali kjaazkatchičha. ³Jalla nekztanaqui uj lastakaz jecžquichiča zapa mayni ninacž juntuñcama t'akžta, yekja yekja. Jalla nuž zapa maynižquiz nii ujnacaqui želatča. ⁴Jalla nuž tjonžcu Espiritu Santuqui tjapa ninacžquiz luzziča. Nekztan ninacaqui parijunaca yekja yekja taku chiichičiča, jaknužt nii Espiritu Santuž chiikatčhaja, jalla nii.

⁵Nii timpunacaqui Jerusalén wajtquin wacchi judío žoñinaca kamñi želatča, ninacž cuzturumpi jarupan paañi. Nii judío žoñinacaqui tjapa kjuttan ajczquichitača. ⁶Jalla nii suyniñi jora nonžcu, žoñinacaqui juntassičha. Zapa mayni nii žoñinacaqui persun taku nonziča. Nekztan ana tantiichuca, čhjulut watačhaja, nii. ⁷Jalla nižtiquiztan ninaca ancha kuz turwaysi cjišsiča. Ispantichi ninacpora parlasiča, tuž cjian:

—¿Tjapa nižta chiichiiñinacaqui anaj Galilea wajtchiz žoñinacajo? ⁸Zapa mayni učhum persun takuž nonža. ¿Jaknužupan teejo? —Jalla nuž cjičiča.

⁹Nekž želatča Partia žoñinaca, nižaza Media žoñinaca, nižaza Elam žoñinaca, nižaza Mesopotamia žoñinaca, nižaza Judea žoñinaca, nižaza Capadocia žoñinaca, nižaza Ponto žoñinaca, nižaza Asia yokchiz žoñinaca, ¹⁰nižaza Frigia žoñinaca, nižaza Panfilia žoñinaca, nižaza Egipto žoñinaca, nižaza Africa žoñinaca, nii Afric yokaqui Cirene yokž nawjktuñtan. Nižaza Roma wajtquiztan tjonñi žoñinaca želatča. Yekjapanacaqui judío maa ejpchiz žoñinacatača. Yekjapanacaqui ana judío maa ejpchiz cjenami judionacž cuzturumpi

paañi žoñinacapantača. ¹¹ Nižaza želatča Creta wajtchiz žoñinaca, nižaza Arabia žoñinaca. Nii žoñinacaqui parlasiča, tuž cjan:

—Wacchi watjanacchiz žoñinacala učumtanaqui. Pero zapa mayni učum persun takunacaž nonžla. ¡Nii tjapa takunacžtan chiiñinacaqui Yooziž ispanrichuca paatanaca quint'ila!

¹² Jalla nuž chiihiiñi nonžcu tjappacha ispanrichiča. Kuz turwaysi cjisiča. Nekztan pewcsasiča, tuž cjan:

—Nii puntuquiztanac, ĺkjažt cjeejo?

¹³ Yekjapanacaqui iñarchiča, tuž cjan:

—Aaaa, ninacaqui licchikazza.

PEDRUQUI ŽOÑINACŽQUIZ PALJAYCHIČHA

¹⁴ Nekzpacha tsijtsi želatča nii tuncapan illzta apostolonaca. Jaziqui Pedruqui altu joržtan paljaychiča, tuž cjan:

—Judea yokquiz kamñi žoñinaca, nižaza Jerusalén wajtquiz željñi žoñinaca, wejt taku zumpachaž nonžna. Čjuluzlaja, jalla niil kjanzt'ača. ¹⁵ Ančhucqui “Tii žoñinaca licchikaz” cjan pinsiča. Pero tii žoñinacaqui anača licchi. Anzic wenzlakača. ¹⁶ Anziqui Joelž cjiřta Yooz taku cumplissa. Nii Joelqui Yooz cuntiquiztan mazinchičha, tuž cjan:

¹⁷ “Yoozqui tuž cjiča, Tii timpu tucuzinžtan wejrqui tii muntuquiz željñi žoñinacžquiz wejt Espiritul tjača. Wejt Espiritu Santuž kuzquiz luzziz cjen, ančhuca maatinacaqui lucmajch cjiñi tjunmata cjiñi wejt takuž parlaquiča. Nižaza Espiritu Santuž cjen tjojowaqui visionanaca cheraquiča. Nižaza chawc chawcwanacaqui wiyquin chjuuznaquiča. ¹⁸ Jalla nii timpuquiz wejt sirwiñinacžquiz luctaka cjiñi maataka cjiñi wejt Espiritu cuchanzčača. Nii Espirituž cjen, ninacaqui wejt takuž parlaquiča. ¹⁹ Tsewc arajpachquinami tii yokquizimi wejrqui ispanrichuca siñalanaca tjeeznača, ljocnaca, ujnaca, tsokchi tsjirinaca, uj žketižtakaz, jalla nuž. ²⁰ Ima Jesucristo Jiliriž tjonan, tjuñiqui zumchi cjisnaquiča. Nižaza jiižmi ljocžtakaz cjisnaquiča. Jalla nižtanaca watan, wajillaž Yooz chawc tjuñiqui tjonaquiča, Yooz wali azi tjeežñi tjuñi. ²¹ Nii timpuquiziqui jakzilat liwriita cjisjapa Yooz Jiliržquin mayižchaja, jalla niiqui liwriitaž cjequiča”.

Jalla nuž cjiřchiča Joelqui.

²² Israel wajtchiz žoñinaca, wejt taku nonžna. Jesusaqui Nazaret wajtchiz žoñitača. Ančhuca watjanacquiz ojklaycan Jesusaqui Yooz aztan ispanrichucanacami, milajrunacami, siñalanacami, jalla ninaca tjeeziča. Nii tjeežta obranaca ančhucqui zizza. Jalla nii obranacaqui kjanapacha tjeeziča, Jesusaqui Yooz Epiž cuchanzčuita žoñipankazza, jalla nii. ²³ Jalla nuž pajk obranaca paachiž cjenami ančhucqui Jesusa conkatchinčhucča. Nekztanaqui ančhucqui uj paañi žoñinacžquiz Jesusa intirjichinčhucča cruzquiz ch'awczjapa. Tuquitanpacha Yooz Ejpqui jalla tižtanaca watzpan zizatča. Nižaza niž muntacama tii watzjapa mantichičha. ²⁴ Ančhucqui Jesusa conkatchinčhucča. Yooz Ejpzi Jesusa jacatatskatchičha. Anawal ticzquiztan liwriichiča. Nii ticzqui Jesusižquiztanaqui anapantača atipchuca. ²⁵ Tuqui ažk watanaca David cjita jiliričiqui Jesusiž puntu cjiřchiča tuž cjan:

“Yooz Jiliri wejtčan chica željñipanča. Jalla nuž wejt kuzquiz Yoozquin zint'iñpanča. Yoozqui wejt žew latuquiz željča, wejr yanapzjapa, nižaza wejr ana čjulquiztanami eksnajo. ²⁶ Jalla nižtquiztan wejt kuzqui wali cuntintučha. Chipchipcan wejt tawčžtan Yoozquin honorall tjaa-uča. Ticz cjenami, Yoozquin kuzziztča, Yooz Ejpqui wejr jacatatskataquiča. ²⁷ Yooz Tata, amqui ticzi žoñinacžtan wejt alma anam ecaquiča. Wejrqui am ligitum sirwiñi žoñtqui. Jaziqui wejt curpuqui anam ecaquiča sipulturquiz mokajo. ²⁸ Nižaza wejtquiz arajpach kamaña tjaajinchamča. Tii muntuquiz amtan chica kamcan ancha cuntintul cjeeča”.

Jalla nuž Jesusiž puntuquiztan cjiřchiča Davidqui.

²⁹ “Jilanaca, učhum David cjita tuquita atchi ejpž puntuquiztan kjanapacha intintiskats pecuča. David jiliriqui ticziča. Nižaza tjattatača. Anzcama niiz sipulturuqui učhum yokquiz žejlča. ³⁰ Davidqui illztatača Yooz taku chiinijapa. Yooz Ejpqui niizquiz juramintužtan compromitkalča tuž cjican: “David, tsjiiqui am majchmaatquiztan (Cristo cjita) pajk jiliri cjequiča. Niiqui mantiz puestuquiz uchtaž cjequiča, tii wajtchiz žoñinaca mantizjapa.” Jalla nuž Yoozqui Davidžquiz compromitchiča. ³¹ Jalla nii zizcu, Davidqui tuquitanpacha Cristuž jacatatz puntuquiztan chiichiča, tuž cjican: “Cristuž almaqui ticzi žoñinacžtan anaž ecta cjequiča. Nižaza Jesucristuž curpumi anaž mokaquiča.” Jalla nuž Cristuž puntuquiztan chiichiča. ³² Jaziqui Yooz Ejpqui nii Jesucristo jacatatskatchiča. Jacatattan, wejrnapachača Jesucristo chercintqui. Jaziqui tisticu cjican, nii puntu weraral chiyasača. ³³ Jesucristuqui jacatatzcu, Yooz Ejpž žew latuquiz walja honorchiz cjissiča, Yooz Ejpžtan chica mantiñi. Nižaza Yooz Epiž tuquita chiita tawk jaru Jesucristuqui Espiritu Santo žoñinacžquiz cuchanžquichiča arajpachquiztan. Nii Espiritu Santuž tjonchiž cjen tii ančhucaž chertanacami nonztanacami watchiča. ³⁴ Davidqui persun puntuquiztan ana chiichiča. Davidča tsewc arajpachquin ana ojckhiqui, Yooztan mantizjapa. Davidpachača tuž cjichiqui:

“Wejt Yooz Ejp Jiliriqui wejt Yooz Majch Jiliržquiz chiichiča: ‘Honorchiz cjisjapa, wejt žew latuquiz julzna wejtčan chica mantizjapa. ³⁵ Tsjii noojiqui am quintra žoñinaca k'ala atipžtaž cjequiča. Am kojch koztan tjecžtažtakaz cjequiča. Jalla nii oracama wejt žew latuquiz julzna’”.

³⁶ “Ančhucqui Jesucristo cruzquiz ch'awcchinčhucča. Pero anziqiu Yooz Ejpqui tii Jesusa tsjan chawc jiliri utchiča žoñinaca liwriizjapa. Jalla nuž intintiñi waquizila tjapa Israel wajtchiz žoñinacaqui. Ultim werarača tii takuqui. —Nuž cjican Pedruqui paljaychiča.

³⁷ Jalla nuž nonžcu nii žoñinacaqui persun kuzquiz ancha zint'ichiča. Jalla nižtiquiztan Pedružquizimi parti apostolonacžquizimi pewcziča, tuž cjican:

—Jilanaca, ĺkjažt cjisnaqui? ĺČhjulut wejrnac paaqui?

³⁸ Nekztanaqui Pedruqui kjaaziča, tuž cjican:

—Ančhucqui persun uj pajžcu, kuz campiya. Nekztanaqui Jesucristuž tjuuquiz bautistaž cjee. Jalla nekztanaqui ančhuca ujnaca pertuntaž cjequiča. Nižaza Yooz Espiritu Santuqui ančhuca kuzquiz nužukaz luzaquiča. ³⁹ Nii compromitta Espiritu Santuqui tjaataž cjequiča ančhucaquizimi ančhuca maatinacžquizimi, ažkquin wajtchiz žoñinacžquizimi, nižaza tjapa učhum Yooz Jiliriz kjawžta žoñinacžquizimi. Jalla ninacžquizimi Yooz Espiritu Santo tjaataž cjequiča. —Jalla nuž kjaaziča Pedruqui.

⁴⁰ Wacchi takunacžtan Pedruqui ninacžquiz chiižinčiča, tuž cjican:

—Liwriita cjis waquiziča, Cristuž quintra uj paañi žoñinacžtan ana casticta cjisjapa.

⁴¹ Jalla nekztanaqui walja žoñinacaqui Pedruž chiita taku tjapa kuztan catokchiča. Jalla nuž catoktiquiztan tjapa ninaca bautistaž cjissiča. Nii noojiqui tsjii čhjep warank žoñinacaqui yapžquichiča parti Yoozquin criichi žoñinacžquin. Jalla nuž mirchiča.

⁴² Tjapa nii criichi žoñinacaqui apostolonacaž tjaajintanacžquiz walja tjapa kuztača. Ninacaqui tsjii kuzzizpan cjissiča. Chica juntasñitača Yoozquin mayizizjapa, nižaza čhjeri lujlzjapa.

CRIICHI ŽOÑINACŽ KAMTA

⁴³ Apostolonacaqui walja milajrunacami siñalanacami paachiča. Jalla nuž paatiquiztan tjapa žoñinacaqui ispantichiča. ⁴⁴ Tjapa Yoozquin criichinacaquiuntu kamchiča. Nižaza tjapa ninacž cusasami tsjiiquiz juntjapñitača, zapa maynižquiz tojunzjapa. ⁴⁵ Parti cusasa tuyžcu, nii paaz tojunñitača, ana želinchiz žoñinacžquiz. ⁴⁶ Zapuru timpluquiz ajcžñipantača Yoozquin sirwizjapa. Nižaza criichi žoñinacž kjuyquiztan kjuya okatča,untu chjeri lujlzjapa. Humilde kuzziz zuma cuntintu lujlñipantača. ⁴⁷ Nižaza Yoozquin honora tjaañipantača. Jalla nuž nii criichinacaž zuma kamtiquiztan parti žoñinacaqui ninaca zuma rispitiñitača. Zapuru žoñinacaqui criichiča, liwriita cjisjapa. Nekztan parti criichi žoñinacžquiz juntassiča. Jaziqui Jesucristo jiliriqui criichi žoñinaca mirkatchiča.

3

ZUCH ŽOŇI ČHJETINTA

¹Tsjii nooŷiqui majňakak ora, Pedružtan Juanžtan pucultan timplu kjutňi yawchiča. Nii oraqui Yoozquin mayiziz oratača. ²Nicju tsjii zuch žoňi želatča. Zucha nassipantača. Zapuru timpluquin chjitzatača. Hermosa cjita timplu zanquiz žejľnitača, timplu luzňi žoňinacžquiztan paaz tomangzjapa. ³Nii zuch žoňiqui Pedružtan Juanžtan timplu luzňi cheržcu, paaz tomangziča. ⁴Nekztanaqui Pedružtan Juanžtan nii zuch žoňž kjutňi cherziča. Nekztanaqui Pedruqui cjichiča:

—Wejtnaca kjutňi cheržca.

⁵Jalla nuž chiitiquiztan nii zuch žoňiqui “Paaz onaá” cjican cherziča. ⁶Pedruqui cjichiča nekztanaqui:

—Anaž wejta paaz žejľča. Antis wejta Jesucristuž azi žejľča, jalla niižtan yanapasača. Jesucristo cjita Nazaret wajtchiz žoňž aztan amquiz cjiwča, tsijtsna. Oka.

⁷Nižaza Pedruqui nii zuch žoňž žew kjarcu tanžcu, tsijtskatchiča. Nii tsijtskatan nii orapacha niž kjojchanacaqui tsijtsňi cjissiča. ⁸Jalla nekztanaqui nii zuch žoňiqui layžcu tsijtsiča, nižaza ojklayňi cjissiča. Nekztanaqui Pedružtan Juanžtan chica timplu luzziča, ojkan, laylaycan, nižaza Yooz tjuu alawazcan. ⁹Tjapa timpluquiz žejľni žoňinacaqui nii zuch žoňi ojklayňi cherchiča, nižaza Yooz tjuu alawazňi nonziča. ¹⁰Nekž žejľni žoňinacaqui nii žoňi pajchiča. Nii žoňipacha zapuru Hermosa cjita timplu zanquiz žejľnitača, paaz tomtomangžcan. Nii čhjetinta žoňi cheržcu ispantichi cjissiča.

PEDRUŽ PALJAYTA

¹¹Nii čhjetinta žoňiqui Pedružquiztan Juanžquiztan anaž eclawc cjetča. Ninaca Portal de Salomón cjita timplu kjuyquiz želatča. Jalla nijcchuc tjapa nii timpluquiz žejľni žoňinacaqui zati pariju juntassiča. Ispantichiča. ¹²Nekztanaqui Pedruqui nii juntasquini žoňinaca cheržcu, ninacžquiz paljaychiča, tuž cjican:

—Israel wajtquiz žoňinaca, žkjažtiquiztan ančhucqui ispantiya? Žkjažtiquiztan ančhucqui wejnaca chekžjo? Wejrnacpacha anača tii žoňi čhjetinchintqui. Anal wejtnaca aztan ojklayskati atchinča. Nižaza wejrnacaž persuna zuma kamtiquiztan anal tii žoňi čhjetinchinča. ¹³Antiz Yoozkaz tii žoňi čhjetinchiqui. Nii Yoozqui učhum tuquita ejpnacž Yoozza, Abraham, Isaac, Jacobo, ninacž Yoozza. Jalla nii Yoozpacha niž Majch Jesusižquiz pajk honorchiz cjiskatchiča. Nii Jesusaž cjen, tii žoňic žejtchiča. Ančhuczti jilirinacžquiz nii Jesusa intirjichinčhucča. Nekztanaqui Pilatuž cutz tantiižtan, ančhucqui ana cutskatz pecchinčhucča. “Tiiqui anapanča Yooziž cuchanžquitaqui” cjican chiichinčhucča. ¹⁴Jesusaqui ana čhjul ujchizza. Yooz Ejpž kuzcama kamňiča. Nii Jesusa cuts cjenpacha, ančhucqui tsjii pajk ujchiz žoňi cutskatz pecchinčhucča. ¹⁵Jalla nuž nii žeti tjaaňi Jesucristo conchinčhucča ančhucqui. Yooz Ejpzi Jesusa ticztiquiztan jacatatskatchiča. Jalla nii puntuquiztanaqui wejrnacpachača cherchintqui. Jaziqui nii puntu zuma werara chiyasača. ¹⁶Tii Jesucristuča azzizqui. Jesucristužquiz tjapa kuztan cjican, wejrnacqui Jesucristuž aztan tii ančhucraž pajta žoňi čhjetinchinča. Jesucristužquin tjapa kuzziz cjen tii žoňiqui zumpacha žejtchiča. Jalla nuž ančhucqui tjappachaž cheržcu, nayaquiča.

¹⁷Jaziqui jilanaca, ančhucmi ančhucja jilirinacami Jesusa conchinčhucča. Jalla nii ora ančhucqui čhjulut paatčhaja anaž zizatča. ¹⁸Jalla nuž cjenami Yoozqui niž persun taku cumpliskatchiča. Tuquiqui Yoozqui tjapa niž taku chiiňi profetanacžquiz chiikatchiča, tuž cjican, “Yooz cuchanžquita Cristuqui sufristanča”. Nii takuqui complissiča. ¹⁹Jaziqui ančhucqui Yoozquin kuzziz cjee, persun uj pajžcu. Yoozquin quejžca, ančhucja ujnaca pertunta cjisjapa. Jalla nekztanaqui Yooz Jiliriqui ančhucja kuznaca cuntintu cjiskataquiča. ²⁰Nižaza Yooz Jiliriqui wilta cuchanžquiča Jesucristo ančhucalta uchta liwriiňiqui. ²¹Ima Jesucristuž wilta tjonan Yooz Ejpqi tjappacha azquichaquiča, jaknužt tuquita zuma kuzziz Yooz taku chiiňi žoňinacaž mazinčhaja, jalla niicama cumpliskataquiča. Jalla nii cumplis oracama Jesucristužlaqui tsewc

arajpachquin kamspanča. ²² Moisesqui učhum tuquita ejpnacžquiz cjichiča: “Yooz Jiliriqui ančhucaquiz tsjii Yooz taku chiini profeta cuchanžcaquiča. Nii žoņiqui ančhuca wajtchiz žoņinacžquiztanpacha ulnaquiča. Jaknužt Yooz Ejpqui wejr cuchanžquitčhaja, jalla nužuzakaz tsjii cuchanžcaquiča. Ančhucqui nii Yooz Epiž cuchanžquita žoņž taku tjapa kuztan nonžna, čhjulut chiyačhaja, jalla nii. ²³ Jakziltat ana niž taku nonznawk cječhaj niiqui, Israel wajtchiz žoņinacžquiztan pjaltaž cjequiča. Nižaza walja castictaž cjequiča”. Nuž cjiča Moisesqui. ²⁴ Nižaza tii timpu puntuquiztan tjapa Yooz taku chiini profetanacaqui parlichipanča Samuelžquiztanpacha jecchuc. ²⁵ Nii profetanacž taku Yooz Ejpqui ančhucaltajapa chiikatchiča. Ančhucaltazakaz Yooz Ejpqui tsjii zuma taku tjaachiča učhum tuquita ejpnacžquiz. Jalla tuž cjan, Yoozqui Abrahamžquiz taku tjaachiča: “Am ajcchmaatiž cjen, tjapa tii muntuquiz žejlņi žoņinacžtajapa favoral paa-ača wejrqui”. ²⁶ Yooz Ejpqui niž Majch jacatatskatžcu, ančhucaquiz primira cuchanžquichiča, favora paacan. Jazic tjapa ančhuc anawali paaznaca apatatspanča.

4

PEDRUŽTAN JUANŽTAN

¹ Pedružtan Juanžtan jalla nuž parlan, timplu jilirinacaqui, timplu zultatž jiliržtan saduceo parti žoņinacžtan tjonchiča. ² Pedružtan Juanžtan žoņinaca tjaajnatcha, tuž cjan:

—Jesusaqui ticziquiztan jacatatchiča. Jalla nuž kjanapacha tjeeža, tjapa ticzi žoņinacaqui jacatataquiča, jalla nuž. —Jalla niža chiitiquiztan ancha žawjchiča nii jilirinacaqui. ³ Jalla nekztanaqui Pedružtan Juanžtan preso chjitžtatača. Nižaza carsilquiz majctatača, jakatažcama. Nii oraqui zeziqeyatača. ⁴ Jalla nuž Pedružtan Juanžtan Yooz puntu chiichiichiz cjen, tama nonžni žoņinacaqui tjapa kuztan Yoozquin criichiča. Luctak criichi žoņinacakaz tsjii pjijaska warankatača.

⁵ Jakatažquiqui Jerusalén wajtquin ajczitača wajt jilirinacami, timplu jilirinacami lii tjaajiņinacami. ⁶ Nii oraqui timplu chawc jiliritača Anasqui. Niimi ajczitača, nižaza Caifastan, Juanžtan, Alejandružtan. Nižaza tjapa timplu chawc jilirinacž femillanacami ajczitača. ⁷ Jalla nuž ajcziz cjen Pedružtan Juanžtan zjijckatchiča. Nekztanaqui nii jilirinacž taypiquiz apantiskatžcu pewcziča, tuž cjan:

—Ančhucqui, žakzilta jiliriz mantitaž cjen niža ančhuc paajo?

⁸ Jalla nekztanaqui Espiritu Santuqui Pedružquiz tuž chiikatchiča:

—Israel wajtchiz jilirinaca, timplu jilirinaca, ⁹ wejrnacqui ančhucaž yujcquiz zjijcetača, tsjii wali paata zumpacha zizajo. Jaknužt tii zuch žoņi žejtchižlaja, jalla nii ziz pecaquiz niiqui, niil quint'asača. ¹⁰ Wejrnacqui ančhuca yujcquiz weraral chiyača, ančhuc nii quintu zumpacha zizajo; nižaza tjapa Israel wajtchiz žoņinaca zumpacha zizajo. Jesucristuž aztan tii žoņi čhjetinta žejlča tjapa ančhuca yujcquiz tsijtchi. Ančhucqui nii Nazaret wajtchiz Jesucristo cruzquiz ch'awcchinčhucča. Nekztanaqui Yoozqui niipacha ticziquiztan jacatatskatchiča. ¹¹ Ančhucqui kjuy pirkiņinacaztakaz nii zuma maz tjojtchiča, “Ana cusa” cjan. Jalla nii tjojtta mazqui Jesusapanča. Nii tjojtta maztzi ancha cusala, esquinquin nonžta maz irata cjissiča. Yoozqui cjichiča, “Tii mazza tsjan juc'ant chekanaqui”. ¹² Jesucristupankazza Liwriiņiqui. Yooz Ejpqui anaž iya jakziltami utchiča liwriiņi cjisjapa. Tii muntuquiz žejlņi žoņinacžquiztan ana iya liwriiņi žoņi žejlča. Jesucristupankaz učhum liwriiņi atasača.

¹³ Jalla nuž Pedruqui chiichiča Juanžtan. Nii pucultanaqui ana istutiņitača, campuquin kamņi žoņikazza. Jalla nuž cjenami Pedružtan Juanžtan tjuj kuzziz chiichiča, ana ekscan. Jalla nii nayžcu nii jilirinacaqui ispantichiča. Nižaza pajchipan cjissiča, nii pucultanaqui Jesusiztan chica ojklachitača, jalla nii. ¹⁴ Nekz chica nii čhjetinta žoņimi tsijtchi želatča. Jalla nižtiquiztan ana čhjul quintrami chii atchiča. ¹⁵ Jalla nekztanaqui nii čhjepultan žoņinaca ajczquiztan ulanskatchiča. Ninacaz ulantan, nii jilirinacaqui ninacpora zmali parlassiča, ¹⁶ tuž cjan:

—¿Ĉjul uĉum tii ŝoĥinacĉtan paaquejo? Tjapa Jerusalaĥn ŝoĥinacaqui tinacaŝ paata milajru zizkalala. Tinacaqui pajk siĥala tjeeziĉa. Anaĉa nicchuca uĉumqui. ¹⁷ Tii chiitaqui ana iya zizta cjisjapa, uĉumqui ninacĉquiz mantiz waquiziĉa, ana iya Jesusiŝ puntu parlajo. “Niŝta parlaquiŝ niiqui, anĉhucqui casticta cjequiĉa” jalla nuŝ chiiŝin zwaquiziĉa.

¹⁸ Nekztanaqui nuŝ parli ŝerŝcu, nii jilirinacaqui Pedruŝtan Juanŝtan kjawziĉa. Nekztan tuŝ chiiŝinchiĉa:

—Jaziqui anĉhucqui anaŝ iya parlaquiĉa nii Jesusiŝ tjuuŝtan. Niŝaza anaŝ jecĉquizimi tjajaŝnaquiĉa Jesusiŝ puntuquiztan. —Jalla nuŝ mantichiĉa.

¹⁹ Jalla nuŝ mantiquiztan Pedruŝtan Juanŝtan kjaaziĉa, tuŝ cjican:

—Anĉhucpachaŝ tantiyasa. ¿Ĉjulut walikaz Yooz yujcuziya? ¿Anĉhucaŝ mantita caz wali cjesaya? uŝ ¿Yooz mantita caz wali cjesaja? ²⁰ Wejrŝnacaqui anal weriŝ chertanacami nonŝtanacami parlis jaytasaĉa. Jalla nuŝ parlispanĉa wejrŝnacu.

²¹ Jalla nekztanaqui nii jilirinacaqui Pedruŝquiz Juanŝquiz zuma ch'aanĉiĉa. Pero niŝtami ninacaqui cutztataĉa. Jalla nuŝquiz nii jilirinacaqui ana castiqui atĉiĉa. Parti ŝoĥinacami Yoozquin alawazziĉa, niŝaza Yoozquin honora tjaaĉiĉa jalla nii milajru paatiquiztan. ²² Nii ĉhjetinta ŝoĥiqui pusi tunc wata jilchiztaĉa.

CRIICHI ŜOĤINACAQUI MAYIZICHIĈA

²³ Nekztanaqui Pedruŝtan Juanŝtan carsilquiztan cutztiquiztan niŝ mazinacĉquin ojkiĉa. Tjapa ninacĉ ojklaytanaca quint'ichiĉa, jaknuŝt nii timplu jilirinacami wajt jilirinacami chiiĉhaja, jalla nii liw quint'ichiĉa. ²⁴ Jalla nuŝ quint'itiquiztan, tjapa ninacaqui tsjii kuzziz Yoozquin mayizichiĉa, tuŝ cjican:

—Yooz Jiliri, tjapa mantiĥi Jiliri. Amqui arajpachami yokami, kot kjazmi, niŝaza tjappacha paachamĉa. ²⁵ Amtan Espiritu Santuŝtan am David cjita sirwiĥi tuŝ ĉi-ikatchamĉa:

“¿Kjaŝtiquiztan Yooz quintra ŝawjĉi ĉiĉiĉi nacionanacĉiz ŝoĥinacaqui? ¿Kjaŝtiquiztan tii muntu ŝoĥinaca ana zuma tantii? ²⁶ Niŝaza tii muntuquiz ĉawc jilirinacaqui Yooz quintra tsijtsa, niŝaza ĉawc jilirinacaqui Yooz Jiliriŝ quintra niŝaza niŝ uĉta Jesucristuŝ quintra parlijjapa juntassa”.

Nuŝ cjican cjijrĉiĉa Davidqui. ²⁷ Jalla tiŝta weraraĉa. Herodestan, Poncio Pilatuŝtan, Israel wajtĉiz ŝoĥinacĉtan, yekja wajtĉiz ŝoĥinacĉtan, jalla tjapa ninacaqui tii wajtquin juntassiĉa wali zuma Jesusiŝ quintra paazjapa. Pero am Majĉ utchamĉa, tsjan ĉawc jiliri cjisjapa. ²⁸ Jalla nuŝ juntascu ninacaqui am kuzquiz pinsitacama cumplissiĉa. Nuŝquiz cjissiĉa. Amiŝ tuquitan pinsita jaru, jalla nuŝpacha watchiĉa. ²⁹ Anziqui, Yooz Jiliri, wejtnaca quintra ch'aanita taku am zizza. Jaziqui wejtnacaquiz, amiŝ mantita ojkiĥi ŝoĥinacĉquiz, zuma tjup kuz tjaaŝcalla, ana ekscan am taku parlajo. ³⁰ Niŝaza am azi tjaaŝcalla, laa ŝoĥinaca ĉhjetinjapa, niŝaza zuma obranacami, niŝaza siĥalanacami, niŝaza milajrunacami paazjapa, am zuma Majĉ aztan. —Jalla nuŝ ĉiĉican Yoozquin mayizichiĉa.

³¹ Jalla nekztanaqui Yoozquin mayiziz ŝerŝtan jakziquin ajczitaŝlaja, jalla nii kjuya ĉhekjinchiĉa. Niŝaza tjapa ninacaqui Espiritu Santuŝ azi tanzĉiĉa ninacĉ kuzquiz. Jalla niŝtiquiztan walja tjurt'iĥi kuzziz Yooz taku parliĉiĉa.

CRIICHI ŜOĤINACĉ KAMTA

³² Tjapa nii wacĉi criĉinacaqui tsjii kuzziztaĉa. Niŝaza ninacĉ pinsamintuqui tsji-ipanikaztaĉa. Jakzilta ŝoĥit cusasanacĉiz ŝelatĉhaja, nii ŝoĥinacaqui ana cusasquiztan chiiŝnitaĉa, “Wejt cusasaŝ tiic” cjicanaqui. Antis tjapa ninacĉ cusasanacaqui tsjiiŝtakaz ŝelatĉa, tjapa criĉi ŝoĥinacĉtajapa. ³³ Nii Jesusiŝ illta apostolonacaqui Jesuŝ Jiliriŝ jacatatp puntuquiztan tirapan paljajniĉa, zuma atipĥi tawkŝtan. Zuma wali azziz tawkŝtan atipĥipantaĉa. Niŝaza Yoozqui ninaca walja yanapĉiĉa. ³⁴ Ninacĉquiztan anaŝ tsjii t'akjir ŝoĥi ŝelatĉa. Jakzilta criĉi ŝoĥiŝlaja yokĉizimi kjuyĉizimi, jalla ninacaqui nii tuyĉcu paaz zjijĉipanikazza. ³⁵ Nii paaz zjijĉcu apostolonacĉquin intirjiĥipanikaztaĉa.

Nižaza ninacaqui nii paazqui chicata tojzñitača ana želinchiz žoñinacžquiz. ³⁶ Nižaza tsjii José cjita levita t'akquiztan žoñi želatča, Chipre cjita isla yokchiz žoñi. Nii José cjita criichi žoñiqui yekja tjuuchizzakaztača Bernabé cjita. Jalla nuž tjuuskatchičha apostolonacaqui. Nii Bernabé tjuuqui tuž cjiča, “Zuma Kuzñi”, jalla nii. ³⁷ Nii Bernabé cjita žoñiqui tsjii yokchiztača. Nekztanaqui nii yoka tuychiča. Nii yoka tuyžcu, paaz zjiččiča. Nekztanaqui apostolonacžquin nii paaz intirjichiča.

5

ANANIAS, NIŽAZA SAFIRA UJ PAACHIČHA

¹ Yekja žoñi želatča, Ananías cjita. Safira cjiti tjunchiztača. Ninacaqui persun yoka tuychizakazza. ² Nii yok tuyta paazqui t'ecžcu, persunaltajapa parti čhojchiča. Partillakaz chjitchičha apostolonacžquin, jalla nužuñ yoka tuychižtakaz. Niiž tjunqui nii t'ecžta paaz zizatča. ³ Jalla nekztanaqui Pedruqui cjichiča:

—Ananías, ¿kjažtiquiztan am kuzquiz Satanás luzzita? ¿Espíritu Santužquiz tižta k'otsjapaqui? Nii yok tuyta paazqui t'ecsamča. ⁴ Ima tuycan nii yokaqui amtapantakaya, ¿ana jaa? Tuyžcu, nii yoka tuyta paazqui amtazakaztaž, ¿ana jaa? ¿Kjažtiquiztan tižta ana wali pinsichamtajo? Amqui Yoozquiz k'otchamča; ana žoñžquiz k'otchamča.

⁵ Pedruž nuž chiitiquiztan, Ananiasqui ticzi tjojsičha. Jalla nižtiquiztan nii quinto nonchi žoñinacaqui ancha eksñi cjissičha. ⁶ Jalla nuž ticstan, tsjii kjažt tjojtowanacaqui macjatchičha, Ananías ticzi curpu murtajzjapa. Nekztan nii tjojtowanacaqui tjati chjitchičha.

⁷ Tsjii čhjep orquiztan, Ananías tjunqui tjonchinča. Naaža lucu ticzi quinto ana zizatča. ⁸ Nekztanaqui Pedruqui naaquiz pewcziča, tuž cjican:

—Wejtquiz maznalla. ¿Ančuca yoka tuyta paaz nužullakazkaya?

Nekztanaqui naaqui kjaaziča, tuž cjican:

—Jesalla, nužullapanča.

⁹ Nekztanaqui Pedruqui naaquiz cjichiča:

—Ančhucqui Yooz Espiritu Santo incallz pecatča. ¿Kjažtiquiztan ančhucqui pucultan nuž kaasjo? Nii zancuž tjonča nii am lucu tjažžquininacaqui. Nižaza anziqiu amzakaz chjichaquiča.

¹⁰ Nii orapacha Pedruž kjojchquiz tjojtžcu ticzinča. Nii tjojtowanacaqui kjuya luzcu naa ticzin cherchiča. Nižaza jwezcu tjati chjitchičha naaža lucž latuquin. ¹¹ Jalla nižtiquiztan tjapa nii iclizziz žoñinacami, nižaza nii quinto nonchi žoñinacami ancha eksñi cjissičha.

MILAJRUNACA PAATA

¹² Nii tjuñinacquiz apostolonacaqui walja siñalanacami milajrunacami paañitača žoñinacaž cheran. Nižaza tjapa criichinacaqui Portal de Salomón cjita kjuyquiz ajczñitača. ¹³ Ana jakzilta ana criichi žoñinacami criichinacžtan mazi pajas, ancha eksnatča. Jalla nuž cjenami žoñinacaqui walja rispitchičha criichinacžquiz. ¹⁴ Nižaza tsjan tsjan žoñinacaqui Yooz Jiliržquin kuzziz cjissičha, luctaka cjiñi maataka cjiñi. Walja žoñinacaqui Yoozquin criichiča. ¹⁵ Nižaza laa žoñinacami callquin jweztatača. Callquin tjaž zquiti chjinžcu, t'apžtatača. Nižaza camillquiz zakaz nonžtatača. Jalla nuž nonžta žejlcan Pedruž tjonz tjewziča, tsjii kjažta čhjetinta cjejajo. Pedruž siwsallamekaj laa žoñinacž juntuñ wat jaa, cjiñitača. ¹⁶ Nižaza nii wajt vicin watjanacquiztan walja žoñinacaqui tjojtjonatča Jerusalenquin. Laanacami zajraž tantanacami zjičc zjičcatča. Nižaza tjapa laa žoñinacaqui čhjetintatača.

PEDRUŽTAN JUANŽTAN CARSILQUIZ CHAWJCTA

¹⁷ Jalla nižtiquiztanaqui timplu chawc jiliriqui saduceo parti žoñinacžtan ancha iñizichiča. ¹⁸ Jalla nuž iñizižcu, apostolonaca preso tanchičha, carsilquiz chawjczjapa. ¹⁹ Jalla nuž carsilquiz chawjctaz cjen ween tsjii Yooz Jilirž anjilaqui tjonchiča. Nižaza carsil zan chawjcz cjetsičha. Cjetžcu, apostolonaca jwessičha tuž cjican:

²⁰—Timpluquin oka. Jalla nicju tsijtsna. Jesucristuž kamaña puntuquiztan tjapa žoñinacžquiz paljayaquiča.

²¹Jalla nii anjilaž čhiita jaru, jakatažuqui wentanalla timplu ojkcichiča. Timpluquin luzcu, tjaajni kallantichiča. Jalla nii orazakaz timplu chawc jiliriqui niizž mazinacžtan parliz kjuyquiz ajcziča. Tjapa Israel wajtchiz jilirinaca kjawziča. Nižaza zultatunaca mantichiča, nii chawjcta apostolonaca zjijcajo. ²²Jalla nuž carsilquin irantižcu, nii cuchanta zultatunacaqui ana čhjulumi wajtchiča. Quejpcu quint'ichiča, ²³tuž cjican:

—Wejrnacqui carsilquin irantižcu, zuma chawjcta zalchinča. Nižaza ichni zultatunacaqui želatča carsil zawnctan. Nekztanaqui carsila cjetžcu, luzzinča. Nii kjuyltanaqui cherassinča anaž zinta pres žoñi želatča.

²⁴Jalla nii quintu nonžcu timplu chawc jilirimi timplu zultatž jilirimi nižaza parti timplu jilirinacami, jalla tjappacha ninacaqui zuma kuz turwayzi cjissiča, ¿Kjažt cjequeo? cjican. ²⁵Jalla nii orazakaz tsjii žoñiqui irantižquichiča, tuž cjican:

—Ančhucaž carsilquiz chawjcta žoñinacaqui timpluquin žoñinacžquiz tjajinča. —Nuž cjican quint'ichiča.

²⁶Nekztanaqui nii guardiñi zultatž jiliriqui ojkcichiča zultatunacžtan. Nekztan apostolonaca zjijcchiča, ana chjojritžcu. “Chjojritžtaž cjesaž niiqui, parti žoñinacaqui wejrnacž maztan čhjacasaka”, jalla nuž pinsichiča nii zultatunacaqui. ²⁷Jalla nuž zjijcžcu, nii parliz kjuyquin tsijtskatchiča chawc jilirinacž yujquiz. Jalla nuž želan nii timplu chawc jiliriqui chiižinchiča, tuž cjican:

²⁸—Wejrnacqui ančhucaquiz ana iya parlij cjichintala. Nižaza nii žoñž puntuquiztanaqui ana iya tjaajnaj cjichintala. Jaziqui, ¿čhju paachinčuctajo? Ančhucqui tjapa tii Jerusalén watja chjijpchinčucča ančhuca tjajintižtan. Nižaza nii žoñi contiquiztan wejrnacaquiz uj tjojtnz pecchinčucča.

²⁹Jalla nekztanaqui Pedružtan parti apostolonacžtan kjaaziča, tuž cjican:

—Primiraqui wejrnacqui Yooz castanča. Niiž jarukaz žoñimi cazasača. ³⁰Ančhucqui cruzquiz ch'awcžcu Jesusa conchinčucča. Nekztan učhum tuquita atchi ejpž Yooz tii Jesusa jacatatskatchiča. ³¹Jacatatskatžcu Yoozqui nii Jesusa pajk honorchiz cjiskatchiča. Niiž žew latuquiza želan, Yooz Ejpqui mantis poder tjaachiča, Jesusa tsjan chawc jiliri cjisjapa. Nižaza Jesusača Liwriiñiqui, tii Israel wajtchiz žoñinaca kuz campiaskatajo, ninacž uj pertunta cjejajo. ³²Jalla tii puntunacquiztan wejrnacqui zizuča. Nižaza tisticu cjican wejrnacqui nii chiyučha Espiritu Santužtanpacha. Yoozqui nii Espiritu Santo tjaača niizž kuzcama kamni žoñinacžquiz. —Nuž cjican cjichiča Pedruqui.

³³Jalla nii nonžcuqui, nii jilirinacaqui apostolonacžjapa ancha žawjchiča. Conz pecatča. ³⁴Pero nii jilirinacžquiztan tsjii Gamaliel cjita fariseo želatča. Nižaza lii tjaajini maestrutača niiqui. Tjapa žoñinacaqui niizžquiz walja rispitiñtača. Jalla nii Gamaliel cjita žoñiqui tsijtsiča. Nuž tsijtsu mantichiča apostolonaca zancu jwescajo tsjii ratu.

³⁵Nekztan parti jilirinacžquiz tuž cjichiča:

—Israel wajtchiz žoñinaca, ančhucqui tii žoñinacžquiztan cwitazaquiča. Anaž čhjulumi paaz waquiziča. ³⁶Ančhucž cjuñzna, tsjii tuquiqui Teudas cjita žoñiqui jeczquichiča. Nii žoñiqui “Wejrtča chekan žoñtqui”, tuž cjican ojklaychiča. Jalla nekztanaqui pajpcic patac žoñinacaqui nii apziča. Pero nii Teudasqui contatača. Nekztanaqui nii apžni žoñinacaqui wichanziča. Nužquiz niizž tjajintaqui tjtantatača.

³⁷Niiž wiruñ censo tjuñinacžquiz tsjii Judas cjita žoñiqui jeczquichiča. Galilea wajtchiztača. Žoñinacaqui nii apzquichiča. Ultimquiziqui contazakaztača. Nekztanaqui niizž apžninaqui wichanzi cjissiča. ³⁸Jalla nižtquiztan nižta wattanaca cjuñžcu, tii žoñinacž quintra anača čhjulumi paa. Ana tinacžquiz mitis waquiziča. Tii žoñinacaqui persun kuzcamakat paachaja, nuž cjenauqui anaž tjurasacha. Orallaž kataquiča. ³⁹Yooz kuzcamat tii žoñinacaqui paachaja, jalla nekziqui tinacaqui anaž tjtanchuca cjesača. Tinacaqui Yooz parti žoñinacžlaja, jalla nii quintra paasaž niiqui, Yooz quintraž cjesača. Jalla nižtquiztan tii žoñinacž quintra anaj paala. —Jalla nuž cjican nii žoñinacžquin chiižinchiča Gamaliel cjita žoñiqui.

⁴⁰ Nižtiquiztanaqui tjapa jilirinacaqui naazi cjissičha. Jalla nektanaqui kjawzičha apostolonaca. Kjawzcu, ninaca wjajtchičha. Nižaza chiižinchičha ana iya parlajo nii Jesusiž puntuquiztan. Nektan ninacaqui cutztatačha. ⁴¹ Jalla nuž cutztan, jilirinacž yujcquiztan ulanchičha. Yoozqui jalla nuž munchičha, Jesusiž laycu sufrichi ninacaqui, jalla nuž. Jalla nuž cjenauqui ancha cuntintutačha apostolonacaqui. ⁴² Nektanaqui zapuru Jesucristuž puntuquiztan tira tjaajnatčha, nižaza tiraž paljayatčha timpluquinami kjuyquinami, “Jesusaqui Yooz cuchanžquita Cristučha” cjiñitačha.

6

PAKALLAK CRIICHI JILANACA ILLZTA

¹ Nii timpluquiz Yoozquin criichinacaqui waljaž yapatčha. Nuž yaptiquiztan tsjii quija žejlchičha. Griego taku chiiñi judionacaqui hebreo taku chiiñi judionacž quintra quijičha, tuž cjican:

—Wejtnaca žew maatakanaca ana cusa atintitačha. Zapuru čhjeri tojzquiz upa čhjeri onantačha.

² Jalla nuž quijtiquiztan nii tuncapan apostolonacaqui tjapa Yoozquin criichinaca kjawzičha. Nektanaqui tjappacha juntjapžcu ninacžquiz cjichičha:

—Wejrnacqui Yooz taku parli apatatsqui anaž waquizičha, čherikaz atintisjapaqui.

³ Jilanaca, pakallak žoñinaca ančhucaquiztan kjurzna. Zuma kuzziz žoñi, nižaza Yooz Espiritu Santuž irpita žoñi, jalla nižaza zuma intintazzi žoñi, nižta žoñinaca kjurzna. Nektan ninacaqui tii čhjeri atintiz puestuquin uchta cjequičha. ⁴ Wejrnacžti Yoozquin mayiziz, nižaza Yooz taku tjaajinz tiral atintačha. Nii langzquiz tiral kuz tjaa-ačha.

⁵ Jalla nii parlita jaru tjappacha asiptichičha. Nektanaqui pakallak zuma žoñinaca illzatačha, čhjeri atintisjapa. Primeruqui Esteban illztatačha. Estebanaqui Yoozquin tjapa kuzziztačha, nižaza Yooz Espiritu Santuž irpita kamñitačha. Nižaza illzatačha Felipižtan, Procoružtan, Nicanoržtan, Timonžtan, Parmenastan, nižaza Nicolastan. Nicolasqui Antioquia wajtchiz žoñitačha. Ima Jesucristužquiz kuzziz cjican Nicolasqui judfo cuzturumpichiztačha, ana judfo žoñi cjenami. ⁶ Jalla nuž illzcu nii pakallak žoñinaca apostolonacžquin chjichtatačha. Nektanaqui apostolonacaqui ninacžta mayizichičha, nižaza ninacž achquiz kjaržtan lanzičha, nii puestuquiz cjejajo.

⁷ Jalla nektanaqui Yooz taku paljajta cjen, Jerusalén wajtquin criichi žoñinacaqui ančaž miratčha. Nižaza wacchi judiuž timplu jilirinacami tjapa kuztan Yooz taku catokchičha.

ESTEBAN PRESO TANTA

⁸ Estebanaqui walja Yooz aztantačha, nižaza Yooziž yanaptatačha. Jalla nižtiquiztan walja milajrunacami siñalanacami paachičha žoñinacaz cheran. ⁹ Tsjii nooj tsjii kjaž judfo cuzturumpi paañi žoñinacaqui Estebanžtan ch'aasi kallantichičha. Nii judfo cuzturumpi paañi žoñinacaqui “Liwriita žoñi” cjitatačha. Ninacžtan, tsjii kjažt Cirene wajtchiz žoñinacžtan, nižaza Alejandria wajtchiz žoñinacžtan, nižaza Cilicia wajtchiz žoñinacžtan, nižaza Asia yokquin kamñi žoñinacžtan, jalla nii žoñinacaqui Estebanžtan ch'aassičha. ¹⁰ Jalla nuž ch'aascan, Estebanžquiz ana atipi atchičha. Estebanqui Espiritu Santuž tjaajinta taku chiiñipantačha. ¹¹ Jalla nižtiquiztan nii quintra žoñinacaqui toscar tisticunacaz taku kjaychičha, tuž chiican k'otajo:

—Tii Estebanqui ana wali tawkžtan Moisés quintrami nižaza Yooz quintrami chiichičha. Wejrnacqui nuž chiyanaqui nonzinpančha. —Jalla nii takunacžtan tisticunacžquiz tjaajičha.

¹² Jalla nektanaqui nii Estebanž quintra žoñinacaqui parti žoñinacžquiz walja žawjkatchičha. Žoñinacami, wajt jilirinacami, nižaza judfo lii tjaajiñi maestrnacami, tjapa ninacaqui žawjchi cjissičha. Nuž žawjchi cjiscu Esteban tanchičha. Nektanaqui Esteban tanžcu, pajk parliz kjuya chjitchičha. ¹³ Nižaza toscar tisticunaca apantižquichičha. Nii toscar tisticunacaqui tuž cjichičha:

—Tii žoñiqui tirapan tii Yooz timplu quintra chiiñiicha, nižaza Yooz lii quintra chiiñiicha. Nužupanž parliñiicha. ¹⁴Nižaza wejrnaquci nonzinča, “Nii Jesús cjita Nazaret wajtchiz žoñiqui tii timplu pajlznaquičha”, nuž cjican tiiqui chiiñiicha. Nižaza tiiqui cjiñiicha, “Nii Jesusaquci Moisés tjaata cuzturumpinaca campiyaquičha”. Nuž cjiñiicha tiiqui.

¹⁵Jalla nektzanaquci tjapa nii julzi jilirinacami Estebanž kjutñi cherziča. Nii oraquci Estebanž yujcquci anjilž yujcžtakaz cherziča.

7

ESTEBANQUI TJURT'ICHIČHA

¹Nektzanaquci timplu chawc jiliriqui Estebanžquiz pewcziča, tuž cjican:

—¿Ultimu nužupanza amya?

²Nektzanaquci Estebanquci kjaaziča, tuž cjican:

—Wejt jilanaca, ejpnaca, jilirinaca, nonžna. Učhum zuma honorchiz Yoozquci učhum tuquita atchi ejp Abraham cjita žoñžquiz persuna tjeeziča. Nii oraquci Abrahamquci Mesopotamia yokquin kamñitača. Imaž Harán yokquin kami okatča. ³Nii oraquci Yoozquci Abrahamžquiz cjichiča: “Am yoka eca, nižaza am parintinacami eca. Jakzi yokquinam okačhaja, jalla nicju am tjaajznača”. ⁴Jalla nižtiquiztan Abrahamquci Caldea yokquiztan ulanchiča, Harán yokquin kami ojkchiča. Nekz kaman Abrahamž ejpquci ticziča. Nekztanaquci tekzi tii učhumž kamz yokquiz Abraham tjonchiča. Yoozza nii irpichiqui. ⁵Jalla tekz kaman, Yoozquci ana čhjul yok irinsami tjaachiča. Abrahamžtajapa persun yoka ana želatča. Jalla nuž cjenami Yoozquci taku ecchiča, tuž cjican: “Tii yoka amtapanž cjequičha. Nižaza am ticžtanaquci tii yokaquci am maatinacaž tanznaquičha”. Jalla nuž cjican Yoozquci Abrahamžquiz taku tjaachiča. Nii oraquci Abraham ana ocjalchiz cjenami, Yoozquci nuž chiihiča. ⁶Nižaza Yoozquci nižžquiz cjichiča, “Wiruñaquci am majchmaatinacaquci yekja yokquin kamaquičha, nacjuñta žoñinacažtakaz. Nekziqui pusi patac wata kamaquičha. Jalla nii yokquin am majchmaatinacaquci yekja žoñž mantakaz paaquičha. Nižaza sufrican kamaquičha”. ⁷Nižaza Yoozquci cjichiča: “Am majchmaatinaca sufriskatchiž cjenauci, wejrquci nii sufriskatñi žoñinaca casticača. Nekztanaquci am majchmaatinacaquci nii yokquiztan ulanžcaquičha. Ulanžcu tii yokquiz wejr sirwaquičha”. ⁸Nižaza Yooz Ejpquci tsjii compromiso paachiča Abrahamžtan. Nii compromis jaru Abrahamquci persun janchiquiz chimpuskatchiča. Nižaza quinsakal tjuñquiztan Isaac majch nastan, Abrahamquci nižž persun majchquiz chimpuchiča. Wiruñaquci Isaacquci nižž majch Jacobžquiz chimpuchiča. Wiruñaquci nižazakaz Jacobquci nižž tuncapan lucmajch maatinacžquiz chimpuchiča. Jacobž lucmajch maatinacžquiztan tjonchiča učhum tuncapan t'akanaca.

⁹Nii Jacobž majchnacaquci učhum tuquita atchi ejpnacatača. Ninacaquci José cjita lajkž quintra iniziñitača. Jalla nižtiquiztan ninacž lajk tuchyča. Nekztanaquci nii tuyta lajkquci Egipto yokquin chjichtača. Pero Yooz Ejpquci Josižtan chicapachatača nii oraquci.

¹⁰Nektzan sufrichi želan Yoozquci José liwriichiča. Nižaza walja zizñi cjisiča. Jalla nuž cjen Faraón chawc jiliriqui Josižtan cuntintutača. Nekztanaquci Faraonquci José utchiča, Egipto wajtchiz žoñinaca mantiñijapa, nižaza Faraonž kjuychiz žoñinaca mantiñijapa.

¹¹Wiruñ tsjii kjaž watquiztan tsjii mach'a žejlchiča, ancha sufrichiča tjapa Egipto yokquin kamñi žoñinacami, nižaza tjapa Canaán yokquin kamñi žoñinacami. Jalla nuž cjen učhum tuquita ejpnacaquci ana čhju lujsmi nii timpunacac wachatča. ¹²Pero Jacobquci tsjii quintu nonchiča, Egipto yokquin trigo žejlchi. Nuž nonžcu nižž majchnaca cuchanchiča. Niiž majchnacaquci učhum tuquita ejpnacatača. Jalla niitača primer ojkaquci Egipto yokquinaquci. ¹³Nektzanaquci pizc wilta ojkžcu, Josequci nižž jilanacžquiz pajkatchiča. Jalla nižtiquiztan Egipto chawc jiliriqui Josiž familia pajchiča. ¹⁴Jalla nektzanaquci Josequci mantichiča nižž ejp Jacobo zjijcajo, nižaza tjapa familianacžtanpacha. Ninacaquci pakallak tunca pjijskani žoñitača. ¹⁵Jalla nektzanaquci Jacobquci kami ojkchiča Egipto yokquin. Nekzi ticziča Jacobquci. Nii yokquin ticzizakazza učhum tuquita atchi ejpnacaquci. ¹⁶Wiruñaquci nii atchi ejpnacž tsjinaca chjichtatača Siquem

cjita yokquin. Nicju tjattatačha Abrahamž kjayta yokquin. Abrahamqui nii Siquem yoka paaztan kjaychičha Hamor cjita maatinacžquiztan.

¹⁷“Tuquitan juramintužtan Yoozqui Abrahamžquiz taku tjaachičha, tuž cjican: “Am majchmaatinacžquiz tii yoka tjaacha”. Nii tjaata taku cumplis ora žcatžinžcan Israel wajtchiz žoñinacaqui waljaž miratčha Egipto yokquinaqui. ¹⁸Nii oranaca Egipto yokquinaqui tsjii chawc jiliriqui mantiz kallantichičha, ana José pajni. ¹⁹Nii jiliriqui učhum wajtchiz žoñž quintra pinsichičha. Nekztan anawal quintra paachičha učhum tuquita atchi ejpnacžquiz. Nii jiliriqui mantichičha, Israel lucmajch maatinaca majttan zawnc uchla, ticzi cjisjapa. ²⁰Jalla nii timpu Moisesqui majttatačha. Ancha c'achja wawatačha niiqui. Yoozqui nii wawžtan wali cuntintutacčha. Niiž maa ejpqui čhjep žiiz kjuyquiz mantiñichičha. ²¹Ana iya nii wawa čhjoj čhjoj atžcu, kjuyquiztan chjitchičha. Nekztanaqui Egipto chawc jilirž persun majtqui nii Moisés wawa wajtchinčha. Jalla nuž wajtžcu, persun maatižtakaz uywazzinčha. ²²Jalla nižtiquiztan Moisesqui tjapa nii Egipto žoñinacž tjaajintanaca zizni cjissičha. Nižaza zuma paatiquiztanami nižaza zuma chiitiquiztanami walja rispittatačha Moisesqui.

²³Niiž pusi tunc watchiz cjican Moisesqui parti Israel žoñinacžquin tsjii tjonžni ojkz pecchičha. ²⁴Jalla nuž tjonžni ojkžcu cherchičha, tsjii Egipto žoñiqui tsjii Israel žoñi wjajtatčha, jalla nii cherchičha. Nii Israel žoñžtan cjatžcu kjitchičha. Nekztan nii Egipto wjajtñi žoñžquiz ayni tjepuncan conchičha. ²⁵Nekztanaqui Moisesqui kuzquiz zizzičha, Yoozqui nii utchičha, Israel žoñinaca Egipto žoñinacž mantuquiztan liwriizjapa, jalla nii. Nižaza Moisesqui pinsichičha, Israel žoñinacaqui nižtakaz zizzičha. Pero nii Israel žoñinacazti ana nižta naazičha, Moisesqui Yooz uchta liwriiñi, jalla nii. ²⁶Jaka tažuqui Moisesqui tsjii pucultan Israel žoñinacžtan ch'aasni zalchičha. Jalla nuž zalžcu, pertunaskats pecchičha, tuž cjican: “Jilanaca, pucultan ančhucqui Israel žoñinacžchucčha. ĴKjažtiquiztan ančhucpora ch'aasjo?” ²⁷Nekztanaqui ana wal uj paañi žoñiqui Moisés tewkzičha, tuž cjican: “ĴJect am jiliri utchejo, wejrnac mantiñijapajo?” ²⁸Zezcu Egipto žoñi conchamčha. ĴJazic wejrzam konz pecjo?” ²⁹Jalla nii nonžcu Moisesqui atipassičha Madián yokquin. Jalla nicju kamchičha nacjuñta žoñi cjenaqui. Nicju tjunatan zalžcu, pucultan ocjalchiz cjissičha, nii yokquin kaman.

³⁰Pusi tunc watquiztan nekztan tsjii ch'ekti yokquintačha Moisesqui, Sinaf cjita cur žcati. Jalla nekž želan, tsjii anjilaqui nižžquin jecžquichičha, tsjii kalu ujžtan taaztažtakaz, nii taypiquiz. ³¹Jalla nii cheržcu, Moisesqui ispanitichičha. Jalla nii uj cheri macjatcan, nonzičha Yooz jilirž jora. Nii joraqui tuž cjichičha: ³²“Wejrqui am tuquita atchi ejpnacž Yooztčha. Abrahamž Yooztčha, nižaza Isaacž Yooztčha, nižaza Jacobž Yooztčha”. Nekztanaqui Moisesqui tsucchi kjarcati kallantichičha. Iya ana cheržni atchičha. ³³Nekztanaqui Yooz Jiliriqui cjichičha: “Am čhjata chjojkn. Tii amiž tečža yokaqui wejt yokačha. ³⁴Wejrqui weriž illžta žoñinacž sufriñi cherchinčha nii Egipto yokquin kamni. Nižaza ninacaž laquizan ninaca kjawni nonzinčha. Jalla nižtiquiztan ninaca liwrii chjijwžquichinčha. Picha, ninaca liwriizjapa am cuchnačha Egipto yokquin”.

³⁵“Tuqui Israel wajtchiz žoñinacaqui Moisesquiz ana rispitchičha. Niižquiz cjichičha: “ĴJect am jiliri utchejo, wejrnaca mantiñijapajo?” Jalla nuž cjenami Yoozqui nii Moisespacha jiliri utchičha, Israel žoñinaca liwriyajo. Israel žoñinaca liwriizjapa, nii taazta kalquiz jecžquichi anjilaqui Moisesquiz yanapaquičha. ³⁶Jalla nekztanaqui Moisesqui učhum tuquita atchi ejpnaca jwessičha nii Egipto yokquiztan. Ima nii yokquiztan ulanskatan milajrunacami Yooz siñalanacami paachičha, nižaza Ljoc cjita kot taypiquiz tjakzičha, jalla nuž milajru paachičha. Nekztan pusi tunc wata ch'ekti yokquin ojklaycan milajrunacami Yooz siñalanacami paachičha. ³⁷Jalla tii Moisespacha Israel wajtchiz žoñinacžquiz cjichičha: “Yoozqui wejr cuchanžquichičha ančhuc liwriizjapa. Jalla nižta irata Yoozqui Israel žoñinacžquiztan yekja liwriiñi profeta cuchanžcaquičha. Jalla niž tjonžtan ančhucqui nižžquiz caza”. Jalla nuž cjichičha Moisesqui. ³⁸Nižaza Moisesqui Israel žoñinacžtan ch'ekti yokquin žejlchičha, Sinaf cjita cur latuquiz. Jalla nekž tsjii anjilžtan parličičha. Nižaza učhum tuquita atchi ejpnacžquiz palt'ižinchičha. Jalla

nižtiqiztan Yooz taku tanzicha, tjurni Yooz taku. Učhumnacaltajapa nii tanzicha. Nižaza učhumnacaquiz nii taku tjaajinčiča.

³⁹ Učhum tuquita ejpnacaqui Moisesquiz ana caz pecchiča. Ana pajz pecatča, Yooziž uchta jiliri, jalla nii. Egipto yokquinpanž quejps pecatča. ⁴⁰ Jalla nekztanaqui učhum tuquita ejpnacaqui Aaronžquiz paljaychiča, tuž cjican: “Yooznaca paažinalla, wejtnaca tucquin chjichñijapa. Nii Moisesaqui wejrnaca ulanskatchiča Egipto yokquiztan. Pero anziqiu anal zizi atuča, čjulukat nižžquiz watčhani. Cunamit curquiztan ana quejpž-cačhani”. ⁴¹ Jalla nekztanaqui nii žoñinacaqui korquiztan tsjii wac chul turu paakatchiča ninacžtajapa, tsjii yooz cjisjapa. Nekztan nii paata yoozquiz wilana conchiča. Nižaza ninacaž paata yoozquiztan ancha cuntintutača. ⁴² Jalla nižtiqiztan Yoozqui ninaca jaytichiča, ninacž persun kuzcamakaz kamajo. Jalla nižtiqiztan persun kuzcama cjičican arajpach tjuñimi, jiižimi, warawaranacami sirwichiča. Jalla nii puntuquiztan Yooz taku chiiñi profetanacaž cjižrta liwruquiz tuž cjižrtatača:

“Israel žoñinaca, ančhucqui pusi tunc wata ch'ekti yokquin kamcan, wilana conch-inčhucča. ¿Wejtquin sirwisjapa nižta paachinčhucjo? ⁴³ Anapanča. Antis Moloc cjita žoñiž paata yoozquin jawkchinčhucča nii wilananaca. Nižaza Renfán cjita warawara yooztakaz cherchinčhucča. Jalla nii warawar yoozquin rispitchinčhucča wilana tjaacan. Nižaza ančhuca tuqui nii žoñiž paata yooznaca chjitskatiñičhuctača. Ančhucpachaž nižta yooznaca paachinčhucqui, nezk sirwisjapa. Jalla nižtiqiztan ančhuc jwesača ančhuca kamz yokquiztan. Jalla nuž jwescu Babilonia cjita yokquiztan nawjctufitan chjichača”.

Jalla nuž Yooz tawk liwruquiz cjižrtatača.

⁴⁴ Ch'ekti yokquin ojklayan učhum tuquita ejpnacaqui zkiz impluchiztača. Yoozqui Moisesquiz nii timplu plano tjeeciča. Nekztanaqui Yooz mantita plan jaru, nii timpluqui paatatača. Nekziqiu Yoozqui sirwitatača. ⁴⁵ Nii zkiz timplu učhum tuquita ejpnacaqui tanzicha irinsažtakaz. Josuež irpita, učhum tuquita ejpnacaqui nii timplu chjitchiča, Canaán yokquin luzcan. Nezk žejlñi žoñinacžquiztan nii yoka tanzicha. Yooz pacha nii žoñinaca chjatkatchiča, učhum tuquita ejpnacžquiz tjaazjapa. Nii yoka tanžcu jalla nezk kamchiča Davidž kamtacama. ⁴⁶ David cjita jiliriqiu Yooziž ancha okžtatača. Jalla nižtiqiztan Davidqui tsjii timplu kjuya kjuyz pecatča Yooz sirwisjapa. Niiž tuquita ejp Jacobqui nii Yooz sirwichizakazza. ⁴⁷ Pero ultimquiziqui Salomón cjita Davidž majch, niiča Yooz timplu cjican kjuychiqui. ⁴⁸ Jalla nuž timplu kjuyta cjenami, werar Yoozqui anaž žoñiž kjuyta kjuyquiz želasacha. Jalla nuž cjichizakazza tsjii Yooz taku chiiñi profet žoñiqui. Yooz puntuquiztan jalla tuž cjižrchiča nii profet žoñiqui:

⁴⁹ “Wejt mantis julza arajpachaqui. Tii yokaqui wejt kjojcha jeežkatzjapažtakazza. ¿Čhjuluzž cheechi kjuya ančhucqui wejtajapa kjuyasajo? Jalla nuž cjiča Yooz Jiliriqiu. ¿Jakziqint wejt jeež yoka žejljo? ⁵⁰ Wejrtča tjappacha paachintqui”.

Jalla nuž Yooz puntuquiztan cjižrtatača.

⁵¹ Nižaza Estebanqui tira chiičiča, tuž cjican:

—Ančhucqui ancha chojru kuzzizčhucpanča, ana Yoozquin kuzzizčhucča. Cjuñchizčhucča pero ana Yooz taku nonzinčhucča. Nižaza ančhucqui Yooz Espiritu Santužquiz anapan caziñčhucča. Tuquita ejpž nižtazakazza ančhucqui. ⁵² Ančhuca tuquita ejpnacaqui Yooz taku chiiñi profetanacžquiz ana rispitchipanča. Antis sufriskatchipanča. Nii profetanacaqui tsjii tsjan zuma žoñiž tjonz mazinchiča. Ančhuca tuquita ejpnacazti ninaca conchiča. Jaziqui nii zuma žoñiqui tjonchiča. Ančhuczi nii žoñi preso tankatchinčhucča, y nižaza conkatchinčhucča. ⁵³ Anjilanaqui ančhucaquiz Yooz lii tjaachiča. Jalla nii tjaata lii ana cazziñčhucča. —Jalla nuž Estebanqui paljaychiča.

ESTEBAN CONTA

⁵⁴ Estebanž chiita taku nonžcu, ancha žawjchiča. Nižaza Estebanž quintra ižke jochiča, ninacaž žawjchi tjeezjapa. ⁵⁵ Estebanži Espiritu Santuž irpitapankaztača. Nekztanaqui Estebanqui arajpach kjutñi cherziča. Nekztan Yoozquiztan walja c'ajžquini

cherchiča. Nižaza Yooz Ejpž žew latuquiz Jesusa tsijtsi cherchizakazza. ⁵⁶ Nekztan Estebanqui cjičiča:

—¡Arajpach kjutni cheržna! Arajpacha cjetzil cheruča. Nižaza Yooz Ejpž žew latuquiz tsijtsi željča Jesusa Yooz Maatiqui.

⁵⁷Ninacazti ana nonžni yujcchiča. Cjuñi chawcziča. Nižaza altu joržtan kjawcan apura zalchiča tanzjapa. ⁵⁸Jalla nuž tanžcu, wajtquiztan jwessiča. Nekztan wajtž tjiiquin, maztan čhajcchiča. Nii maz čhajcni žoñinacaqui tsjii Saulo cjita tjowžquiz ninacž zquiti cwitižinajo ecchiča. ⁵⁹Jalla nuž maztan čhajcan, Estebanqui Yoozquin mayizichiča, tuž cjican:

—Wejt Yooz Jesús Jiliri, wejt animu chjichalla.

⁶⁰Jalla nekztanaqui Estebanqui quillziča. Altu joržtan kjawchiča, tuž cjican:

—Wejt Yooz Jiliri, tii žoñinaca tii ujquiztan pertunalla amqui.

Jalla nuž kjawžcu, ticziča.

8

CRIICHI ŽOÑINACA WICHANZI

¹Nekztanaqui nii Saulo cjita tjowaqui Esteban conzjapaqui tjapa kuztača. Jalla nii noojpacha Yoozquin criichinacž quintra juc'anti juc'anti sufriskati kallantichiča Jerusalén wajtquiz. Jalla nižtquiztanaqui tjapa criichi žoñinacaqui wichanziča tjapa Judea yokaran nižaza Samaria yokaran. Nii Jesusiž apostolonacazti ana wichanziča.

²Tsjii kjažultan Yoozquin zuma sirwiñinacaqui Estebanž curpu tjatziča. Nižaza ancha kaachiča nižquiztan. ³Nekztan nii Saulo cjita žoñiqui criichinacž quintra ancha anawali paachiča. K'ala tjtanz pecchiča. Nižaza kjuyquiztan kjuya ojklaychiča luctaka cjiñi maataka cjiñi tanzjapa, nižaza carsilquiz chawjckatsjapa.

SAMARIA WAJTQUIN YOOZ TAKU PALJAYTA

⁴Jakziqin nii wichanzi criichinacaqui ojektčhaja, jalla nicju liwriñi Yooz taku paljayničača. ⁵Tsjii wichanzi žoñiqui Felipe cjitatača. Jalla nii žoñiqui tsjii Samaria yokquiz željni watja ojkičiča. Jalla nicju Cristuž puntuquiztan paljayi kallantichizakazza. ⁶Jalla nuž paljayan žoñinacaqui walja ajcziča. Tjapa nii žoñinacaqui Felipiž paljaya taku tjapa kuztan nonznatča. Nižaza Felipiž paata milajrunaca cheržcu, niž chiita taku tjapa kuztan catokchiča. ⁷Walja zajraž tanta žoñinacaqui čhjetintatača. Nii laa žoñinacžquiztan zajraqui kjawcan ulanchiča. Nižaza walja zuch žoñimi cojumi čhjetintazakaztača. ⁸Jalla nižtquiztan tjapa nii wajtchiz žoñinacaqui cuntintutača.

⁹Jalla nii wajtquiz tsjii Simón cjita wayt'ir žoñi želatča. Tuquitanpacha wayt'iri ojklayni žoñitača, nii Samaria wajtchiz žoñinaca incallcan.

—Wejrtča chekan žoñtqui —cjican ojklayničača.

¹⁰Jalla niž taku walja nonz pecničača. Nižaza kolta cjiñimi pakji cjiñimi tuž cjiñitača: —Tii žoñiča walja Yooz aztanaqui. Yooztakazza tiiqui. —Nuž cjican cjiñitača.

¹¹Ažk watanaca nii wayt'ir žoñiqui žoñinaca incallžcu, walja cazkatničača. ¹²Jalla nekztanaqui Felipiqui tjonchiča Yooz taku paljayi. Yooz Epiž mantiz puntuquiztan nižaza Jesucristuž puntuquiztan jalla nuž paljayičiča. Jalla nuž paljaytquiztan walja luctaka cjiñi maataka cjiñi tjapa kuztan criichiča Yooz Ejpžquin. Nekztan criitquiztan bautistatača. ¹³Nižaza Simonpachača criichiqui, nižaza bautistatača. Jalla nekztanaqui Felipžquiz cumpanti kallantichiča. Felipiž milajrunaca paan, walja ispantichiča nii Simonaqui.

¹⁴Nekztanaqui Jerusalenquin željni apostolonacaqui quinto nonchiča, Samaria wajtchiz žoñinaca Yooz taku catokchiča, jalla nii. Jalla nuž nonžcu nicju tsjii pucultan cuchanžquichiča, Pedružtan Juanžtan. ¹⁵Jalla nuž irantižcuqui, nii pucultanaqui Samaria wajtchiz criichinacžtajapa Yoozquin mayizichiča, Espiritu Santu tanznajo. ¹⁶Tuquiqui anaž jakziltižquizimi Espiritu Santuqui luztkalča. Jesucristuž tjuužtan alajakaz bautistatakalča. ¹⁷Jalla nekztanaqui Pedružtan Juanžtan ninacž juntuñ kjaržtan lanziča. Jalla nižtquiztan Espiritu Santuqui ninacžquiz luzziča.

¹⁸ Jalla nuž kjaržtan lanztiquiztan Espíritu Santuž luzni cherzcu, Simonaqui paaz tirziča, ¹⁹ tuž cjican:

—Wejtquin zakaz nii am azi tjaalla. Jalla nektanaqui wejrzakaz kjaržtan lanzcu žoñinacžquiz Espíritu Santo luzkatača.

²⁰ Jalla nektanaqui Pedruqui Simonžquiz cjichiča:

—Am paazmi amtanpacha k'ala katžla. Yooz onanta Espíritu Santo anaž kjasasča paaztan. ¿Kjažtiquiztan nižta am pinsejo? ²¹ Amqui tii langzquiz anaž mitisiz waquiziča. Tii Yooztajapa langzquiz anaž amta cjesasča. Yooz yujcquiziqui am kuzqui anača zuma.

²² Jalla nii am anawali pinsisnaca jayta, nižaza apatata. “Wejrqui anawali pinsichinpanča” cjican Yoozquin rocaza, am kuz pinsitanaca pertunta cjisjapa. Nektan cunami pertunta cjis atčhani. ²³ Amqui ana zuma kuzzizzamča. Anawali pinsiskaz am kuzquiz tjonča. Wejrqui am ana wali int'iskatča.

²⁴ Jalla nektanaqui Simonaqui kjaaziča, tuž cjican:

—Wejtajapa Yooz Jiliržquin mayiziñalla, ana čhjulumi tii amiž chiita takunacquiztan wejtquiz watajo.

²⁵ Nektanaqui nii apóstol žoñinacaqui Jesucristo Jilirž puntuquiztan zuma chiichiča, nižaza Yooz taku zuma parličiča. Jalla nektanaqui Samaria yokquiz wacchi kolta watjaran liwriiñi Yooz taku paljayñi ojklayčiča. Jalla nuž ojklayžcu quejpcičiča Jerusalén watja.

FELIPŽTAN ETIOPIA WAJTCHIZ ŽOŇŽTAN

²⁶ Niiž wiruñ tsjii Yooz anjilaqui Felipžquiz cjichiča:

—Žaažna. Jerusalén wajtquiztan warchuc oka, Gaza ojkni jiczquin.

Ch'ekti yoka nuž watča nii jiczqui. ²⁷ Nektanaqui Felipiqui žaažcu, ojkčiča. Nii jiczquiz ojkan tsjii Etiopía wajtchiz žoñžtan zalčiča. Nii žoñiqui eunucutača. Nižaza jilirž cusasanaca cwitiñi žoñitača. Candace cjita žonqui tsjan chawc jiliritača Etiopía wajtquin. Jalla naa chawc jilirž mantuquiztača nii cusasanaca cwitiñi žoñiqui. Nii žoñiqui Jerusalén watja ojkcitača werar Yooz rispitsjapa. ²⁸ Jaziqui persun watja quepi ojkciča. Niiž persun cawall autuquiz julzi želatča, Isaías cjjirta Yooz taku liican. Isaiaštača tuqita Yooz taku chiiñi profetaqui. ²⁹ Jalla nektanaqui Espíritu Santuqui Felipžquiz cjichiča:

—Nii cawall autuquiz macjata.

³⁰ Jalla nuž macjatžcu Felipiqui nonziča, nii žoñiqui Isaías cjjirta Yooz taku liiñi, jalla nii. Jalla nuž nonžcu Felipiqui pewcziča, tuž cjican:

—¿Nii Yooz taku am intintiya?

³¹ Nii žoñiqui kjaaziča, tuž cjican:

—Anaž wejtquiz jec tjaajiñimi žejlča. ¿Jaknužt wejr intintasajo?

Nektanaqui nii žoñiqui Felipe kjawziča, nii autu juntuñ yawzcajo, niižquiz julžinžcajo.

³² Jalla nii cjjirta Yooz taku tuž cjetča:

“Uuzažtakaz coni chjichtaž cjequiča. Uuzaqui ch'ujukaz žejlpanča tsjii čhjipñi žoñžquiziqui, jalla nižta konz oraqui ch'ujuž cjequiča niiqui. Anaž chiyaučiča.

³³ Zuma kamañchiz cjenami ombrawillta cjequiča. Ana čhjul justiciami wataquiča. Niiž majchmaatquiztan, ¿jequit tii puntu watchinaca quint'izjapa želas? Tii muntuquiz niiž kamz wira tucuzinžnaquiča”.

³⁴ Jalla nii liižcu nii jiliriqui Felipžquiz pewcziča tuž cjican:

—¿Jecz puntuquiztan tii profetaž cjjirta chiijo? ¿Niiž persun puntuquiztankaya? už ¿jekja žoñž puntuquiztan, jaa?

³⁵ Jalla nektanaqui Felipiqui nii liita Yooz taku puntuquiztan tjaajñi kallantičiča. Jesucristuž puntuquiztan niiqui chiyatča. Jalla nii zuma liwriiñi taku tjaajziča. ³⁶ Jalla nektanaqui tsjii wijiña macjatcan, nii jiliriqui cjichiča:

—Tekz kjaz žejlča. ¿Anaj tii kjazquiz bautista cjesaya?

³⁷ Felipiqui kjaaziča, tuž cjican:

—Am persun tjapa kuztan criyaquiz niiqui, bautistam cjesasča.

Nii jiliriqúi kjaazičha tuž cjan:

—Jesucristuqúi Yooz Majchčha, jalla nii tjapa kuztan criyučha.

FELIPIQUI YOOZ TAKU KJANZT'ICHIČHA

³⁸ Jalla nektzanaqúi nii cawall autu tsjitskatchičha. Nektzanaqúi pucultan chji-jwžquichičha kjaz kjutñi. Nektzanaqúi Felipiqui nii jiliri bautissičha. ³⁹ Kjazquiztan ulnan, Yooz Espiritu Santuqúi Felipe chjitchičha. Felipiqui ana iya tjenchičha nii jiliržquiz. Jalla nuž cjenami nii jiliriqúi tira ojkchičha cuntintu. ⁴⁰ Felipizti Azoto cjita wajtquin chjichtatačha. Nižaza wajtquiztan watja ojklaycan, liwriiñi Yooz taku paljajñi ojkchičha, Cesarea cjita watja irantiscama.

9

SAULO JESUCRISTUŽTAN ZALCHIČHA

¹ Jalla nuž Felipe ojklayanaqúi Sauluqúi Yoozquin criichi žoñinaca tanzjapa nižaza conzjapa tirapan kuz tjaatčha. Anapanž jaytiz pecatčha. Nektzanaqúi templu chawc jiliri cheržni ojkchičha. ² Nii chawc jiliržquiztan ortina maychičha. Damasco cjita watja ojcz pecatčha. Jalla nicju ajcz kjuyaran ojklaz pecatčha, Yooz jiczquiz luzni žoñinaca kjurjzjapa, criichi luctaka cjiñi maataka cjiñi kjurjzjapa. Nii criichinaca wajtžcu preso tanz pecatčha, Jerusalenquin chjitzjapa. Jalla nižta ojklazjapa ortina maychičha. ³ Ortina jwescu, ojkchičha Damasco cjita wajt kjutñi. Damasco žcatilla cjen, tiripintit tsjii wali pajk kjanaqúi muzpa kjanžquichičha niž muytata. ⁴ Sauluqúi yokquiz tjojsičha. Jalla nuž tjojtžcu tsjii jora nonzičha, tuž cjiñi:

—Saulo, Saulo, žkjažtquiztan am wejt quintramjo?

⁵ Nektzanaqúi Sauluqúi pewczičha, tuž cjan:

—Wejt Jiliri, žject amya?

Nii tsewtan chiiñi joraqúi kjaazičha, tuž cjan:

—Wejrtčha Jesusičha. Amqúi wejt quintram paačha. Nuž paacan, ampacham quintra paačha. Tsjii wacaqúi ar parž quintra llawkžcu, persun janchiž quintraž paačha. Jalla nižta irata am persun quintram paačha.

⁶ Nektzanaqúi Sauluqúi tsuczcu cjatinzka tjonzičha niž curpuqúi. Nektzanaqúi cjichičha:

—Wejt Jiliri, žčhjuulu wejr paajum cjee amya?

Yooz Jiliriqúi cjichičha:

—Žaažna. Watja luzna. Jalla nicju amquiz kjana chiita cjequičha čhjulut paasalaja, jalla nii.

⁷ Saulužtan chicapacha ojklajni žoñinacaqúi ancha tsucchičha. Ninacaqúi nonzizakazza nii jora chiižquini. Pero ana cherchičha jecmi. ⁸ Jalla nektzanaqúi Sauluqúi žaazičha yokquiztan. Jalla nuž žaažcu čhjujquiqui cjetzičha, pero ana wira cheri atchičha. Jalla nižtquiztan Sauluž kjarcu tanžcu Damasco watja chjitchičha nižtan chica ojklajni žoñinacaqúi. ⁹ Jalla nii wajtquin čhjep maj ana cherñi žejlchičha. Nižaza ana čheri lujlñi anaza kjaz licni žejlchičha.

¹⁰ Jalla Damasco wajtquin tsjii Ananías cjita Yoozquin criichi žoñi želatčha. Nii Ananiasquiz Yooz Jiliriqúi jeczquichičha wiiquin, tuž cjan:

—JAnanías!

Jalla niiqúi kjaazičha, tuž cjan:

—Wejt Jiliri, tekzičha wejrqu.

¹¹ Nektzanaqúi Yooz Jiliriqúi cjichičha:

—Žaažna. Sok'o cjita call kjutñi oka. Nektzan Judas kjuyquiz pewczna, tuž cjan: “žSaulo, Tarso wajtchiz žoñi anaj žejlya?” Jalla nuž pewcznaqúičha. Nii Sauluqúi Yoozquin mayzican želaquičha. ¹² Tsjii wiiquin chjuužcan, tižta cherchičha Sauluqúi. Tsjii Ananías cjita žoñiqui nižquiz luzzičha. Jalla nuž luzcu kjaržtan niž juntuñ lanzičha wilta cherajo. Chjuužcan Sauluqúi jalla nuž cherchičha.

¹³ Jalla nuž nonžcu, Ananías cjichičha:

—Wejt Jiliri, tii žoñžquiztan wacchi quintunaca nonchinča. Jerusalén wajtquiz juc'anti anawali paachiča amquin criichinacžquiz. ¹⁴ Anziqiu tekzpacha tjonzizakazza. Timplu chawc jiliriž tjaata ortinchiz tjončiča, tjapa amquin rispitiñ žoñinaca tanžcu preso chjitsjapa.

¹⁵ Pero Jesucristo Jiliriqui cjichiča:

—Oka amqui. Wejrqui tii žoñi illzinča, wejt puntuquiztan parlajo. Yekja nacionchiz žoñinacžquizimi nižaza ninacž jilirinacžquizimi nižaza Israel nacionchiz žoñinacžquizimi, jalla nuž wejt puntuquiztan parlaquiča tiiqui. ¹⁶ Jalla niiqui wejt puntuquiztan parliñiž cjen ancha sufraquiča. Wejrqui nižquiz intintiskatača jalla niž sufris puntuquiztan.

¹⁷ Jalla nekztanaqui Aniasqui ojkchiča jakziquin Saulo želatčhaja, jalla nicju. Saulužquin luzcu, kjaržtan niž juntuñ lanziča, tuž cjan:

—Saulo, jila, amiž jiczquiz tek tjonan Jesusa Jiliriqui amtan zalchiča. Jalla nii Jesusa Jiliriqui wejtquin mantižquičha, am wilta cherkatajo, nižaza Espiritu Santuž am kuzquiz luzajo.

¹⁸ Nii orapacha Sauluž čhjujquiztan ch'iz cjajpažtakaz tjojsičha. Nekztan wilta cherni cjissičha. Nekztanaqui Sauluqui žaaziča, nižaza bautista cjissičha. ¹⁹ Jalla nekztanaqui čhjeri lujlžcu, wilta azi tanzičha. Nekztan tsjii kjaž maj Damasco cjita wajtquin kamchiča Yoozquin criichinacžtan.

SAULUQUI JESUSIŽ PUNTUQUIZTAN PALJAYCHIČHA

²⁰ Jalla nuž kamcan Sauluqui ajcz kjuyanacquiziqui Jesusiž puntuquiztan paljaji kallantichiča tuž cjan:

—Jesusaqui werar Yooz Majchpanča.

²¹ Nii nonžni žoñinacaqui ispantichiča, tuž cjan:

—Tii žoñiqui Jerusalén wajtquin ojklaychiča Jesucristužquin rispitiñ žoñinaca tani. Tekzizakaz tjončiča Jesucristužquin criichinaca tanažlani. Nižaza preso chjichažlani, timplu jilirinacžquin intirijzjapa. Jalla nii žoñipanča, žana jaa?

²² Pero Sauluzti juc'anti tjup kuzziz Yooz taku parličičha. Juc'anti juc'anti atipni takunacžtan parličičha. Zuma kjana intintiskatchičha, Jesusa Yooziž cuchanžquita Cristučha, jalla nii. Jalla nuž intintiskatan, nii Damasco wajtquin kamni judionacami kuz inakaz turwaysi quirchiča.

SAULUQUI ATIPCHIČHA

²³ Tsjii kjaž majquiztan nii žejlñi judio žoñinacaqui palt'ichiča Saulo conzjapa. ²⁴ Nii žoñinacž conz palt'ita zizziča Sauluqui. Majiñami weenami wajtž zana tjewsnatča, čhjulatorat wajtquiztan ulnačhaja, jalla nii ora Saulo conzjapa. ²⁵ Pero tsjii ween nii wajtchiz criichinacaqui tsjii pajk canastiquiz yaažcu, Saulo chjijunžquichiča. Tsjii pajk alto murallaž muyuntitatača nii watjaqui. Jalla nii juntuñ chjijunchičha zawncchuc. Jalla nuž atipassičha Sauluqui.

SAULUQUI JERUSALENQUIN QUEJPCHIČHA

²⁶ Sauluqui Jerusalén watja quejžpcu Yoozquin criichi žoñinacžtan ajcz pecatča. Nii criichinacžti Saulužtan ajcz ekiča. “Ana ultimu Yoozquin criichižcaa” cjan kuzquiz pinsičičha. ²⁷ Jalla nuž cjenami Bernabé cjita jilaqui Saulo chjitchičha, apostolonacžtan zalzjapa. Nekztanaqui Bernabequi apostolonacžquin mazziča, jaknužt Saulo jiczquiz ojkan Jesucristo Jiliržtan zaltčhaja, jalla nii. Nižaza jaknužt Jesucristo Jiliriqui Saulužquiz paljaychičhalaja, nii mazni. Nižaza jaknužt Damascuquin Sauluqui Jesucristo puntuquiztan tjup kuzziz parličhaja, jalla nii mazzizakazza. ²⁸ Nekztanaqui Sauluqui Jerusalén wajtquin ojklaychiča; nižaza hermanonacžtan kamchiča. ²⁹ Jalla nuž žejlcan Sauluqui Jesucristuž puntuquiztan tjup kuzziz paljaychiča. Nižaza griego taku chiiñi judionacžtan ch'aascan parličičha. Nii žoñinacaqui Saulo conz pecatča. ³⁰ Jalla nii quintu zizcu, nii parti criichinacaqui Saulo chjitchičha Cesarea cjita wajtquin. Jalla niwjtcan Tarso cjita watja cuchanchičha.

³¹Jalla nektanaqui nii timpuqui walikaz želatča iclizanacami, Judea yokquin žejlñi iclizanacami, Galilea yokquin žejlñi iclizanacami, Samaria yokquin žejlñi iclizanacami. Jalla nuž tjappacha walipantača. Yoozquin criichinacami Yooz Jiliri walja tjapa kuzziz cjisnatča. Rispitñi kuzziztača. Nižaza Espiritu Santuqui ninaca kuzñitača, cuntintu kamajo. Jalla nižtiquiztan walja yapchiča Yoozquin criichinacaqui.

ENEAS ČHJETINTA

³²Nižaza Pedruqui criichi žoñžquiztan žoñi tjontjonžcan ojklayatča. Nižaza Lida wajtchiz Yooz parti žoñinacžquiz tjonžni ojkchiča. ³³Jalla nicju Eneas cjita žoñžtan zalchiča. Eneasqui quinsakal wata laa zuchu želatča, tjajz ajpžquiz želatča.

³⁴Nekztanaqui Pedruqui niižquiz cjichiča:

—Eneas, Jesucristuqui am čhetnaquiča. Žaažna. Am tjajz zquiti zumpacha chjinžna.

Nii orapacha Eneasqui žaaziča. ³⁵Nekztanaqui nii Lida wajtquiz kamñi žoñinacami nižaza Sarón wajtquiz kamñi žoñinacami nii zuch žoñi čhetinta cherchiča. Nekztanaqui niiž tuqita ejpnacž cuzturumpinaca eccu, Yooz Ejp Jiliržquin criichiča. Nižaza Yooz kamañchiz cjissiča.

DORCAS CJITI ŽON JACATATSKATTA

³⁶Jalla nii timpuzakaz Jope cjita wajtquin tsjaa Yoozquin criichi žon želatča, Tabita cjiti. Griego tawkquiz Dorcas cjiti tjuuchiztača. Naa maatak žon zuma paatanaca paacan zuma kamiñpantača, nižaza t'akjir žoñinaca okzniñtača. ³⁷Jalla nii timpu Dorcas cjiti žonqui laa cjiscu, ticzinča. Ima tјatcan naaža curpu awjžcu, tsjii kjuyquiz tsewcta pisuquin chjichtatača. ³⁸Jope watjaqui Lida žcatillatača. Jalla nii Lida wajtquin Pedruqui želatča. Jalla nuž ziccu nii Jope wajtchiz hermanonacaqui pucultan žoñinaca cuchanchiča Pedružquin rocajo, tuž cjican:

—Apuraj tjonla, ana enenžcu.

³⁹Nekztanaqui Pedruqui tsijtscu ninacžtan ojkchiča. Jalla nicju irantižcu nektan Pedruqui chjichtatača, Dorcas curpu majcžta kjuyquin. Nii kjuyquin Pedružtan chica žejlcan žew maatakanacaqui kaatča. Nižaza ninacaqui Pedružquiz tjeeziča Dorcas paata zquitinaca, nii. ⁴⁰Jalla nektanaqui Pedruqui tjappacha nii parti žoñinaca ulanskatchiča. Ninacaž ulantiquiztan quillžcu Yoozquin mayizichiča. Naa ticzin žona curpu kјutñi cheržcu chiichiča, tuž cjican:

—Tabita, žaažna.

Jalla nižtiquiztanaqui naa ticzin žonqui čhjujquic cjetzinča. Nekztanaqui Pedro cheržcu, julzinča. ⁴¹Pedruqui naaža kjarcu tanziča, nektan tsijtskatchiča. Nuž tsijtskatzcu Pedruqui parti jilanacami nižaza žew maatakanacami kjawziča. Nekztan Dorcas žejtchin tjeeziča. ⁴²Tjapa nii Jope wajtchiz žoñinacaqui nii quintu zizziča. Jalla nižtiquiztan walja Yoozquin criichiča. ⁴³Pedruqui tsjii kjaž maj nii wajtquiz kamchiča, Simón cjita žoñž kjuyquiz. Nii Simonaqui zkizinaca koñž langzñitača.

10

PEDRUŽTAN CORNELIUŽTAN

¹Cesarea wajtquiz tsjii Cornelio cjita žoñi želatča. Niiqui zultatž jiliritača, Italian cjita regimientoquiztan. ²Jalla nii jiliriqui niiž familianacžtanpacha arajpach Yooz rispitñitača. Nižaza Yoozquin mayiziñitača. Nižaza pori judío žoñinacžquiz walja paaztan yanapt'iichiča. ³Tsjii noojiqui majñakak ora chjuužtažokaz tsjii Yooz anjila cherziča, kjanapacha. Nii anjilaqui niižquin tjonžquichiča tuž cjican:

—¡Cornelio!

⁴Corneliuzti tsucchi anjilž kјutñi cherziča. Nekztan pewcziča:

—Wejt Jiliri, žčhjulutaya? —cjican.

Nekztanaqui nii anjilaqui kjaaziča, tuž cjican:

—Amqui Yooz Ejpžquin mayiziñamča. Nuž naychiča Yooz Ejpqui. Nižaza am t'akjir žoñinacžquiz yanaptanaca naychiča. Jalla nuž nayžcu, Yooz Ejpqui cuntintuča. Nižaza

am cjuñža. ⁵Jaziqui Jope wajtquin zoñinaca cuchanžca, Simona kjawzjapa. Nii Simonaqui Pedro cjitazakazza. ⁶Pedruqui yekja Simonžtan alujtača. Nii yekja Simonaqui zkizi koñž langñi zoñiča. Niiž kjuya pajk kot žcati žejlča. Nii Pedruž amquiz chiyaquiča, čjulut am paas cječhaja, jalla nii. —Jalla nuž čhičiča nii anjilaqui.

⁷Nii anjilaž ojektanaqui, Corneliuqui pucultan piyananaca kjawziča. Nižaza atintiñi zultatunacžquiztan tsjii zuma cumpliñi zultatu kjawziča. Nii zultatuqui Yoozquin kuzzizakaztača. ⁸Nektanaqui Corneliuqui nii kjawžta zoñinacžquiz tjapa quint'ichiča. Jalla nektan Jope wajtquin cuchančiča.

⁹Niiž jaka tažquii nii čjepultan cuchanta zoñinaca Jope kjutñi ojkčiča. Jope watja žcatiž cjen, nii orauqui Pedruqui kjuy juntuñta patiuquin yawčiča Yoozquin mayizi. Nii orauqui taypurutača. ¹⁰Jaziqui Pedruqui ancha čjeri eecskatača, lujlz pecatiča. Jalla nuž čjeri kisan, Pedruqui nii tsewta patiuquin tsjii chjuužtažokaz cherziča. ¹¹Jalla tuž cherziča: arajpacha cjetzi tsjii pajk mantilažtakaz chjiwžquichiča yokquin. Nii mantilaqui pajkpic punta žcucžintača. ¹²Jalla nii mantilikuiz tjapaman pajkpic kjočhanacchiz animalanacami, zkoranacami, wežlanacami želatča. ¹³Nektanaqui Pedruqui tsjii jora nonziča, tuž cjican:

—Pedru, tsijtsna. Conžna. Lujlzna.

¹⁴Pedruzti kjaaziča, tuž cjican:

—Wejt jiliri, nižta anal paasača. Nii punta animalanaca ana lulasāča. Lii quintrača. Jaziqui nižta anal lulasāča wejrqui.

¹⁵Jalla nuž kjaaztiquiztanaqui nii joraqui wilta čhižquichiča, tuž cjican:

—Yoozqui amquiz čhičiča, “Zumača niiqui, lujlzjapa” cjican. Jalla nii Yooziž čhiita taku anam amqui nicasāča, “Ana zumača lujlzjapa. Lii quintrača” cjicanaqui.

¹⁶Jalla tižta čjep wilta watchiča. Nektanaqui nii mantilaqui arajpach kjutñi waytitača. ¹⁷Nektanaqui Pedruž kuzquiz pinsičiča, tuž cjican: “Nii chjuužtakaz cherta žjaknužt cji? žčjulut Yoozqui wejtquiz intintiskatz pec?” Nii orapacha Simonž kjuya pewcpewciča Corneliuž cuchanžquita zoñinacaqui. Nektanaqui Simonž kjuy zanquin irantichiča. ¹⁸Irantižcu, nii zoñinacaqui altu joržtan pewcziča, tuž cjican:

—žSimón anaj tekz alujya? Simonž tsjii tjuuqui Pedro cjitača.

¹⁹Pedruqui tirapanž pinsatča nii chjuužta puntuquiztan. Jalla nuž pinsan, Espiritu Santuqui niž kuzquiz cjichiča:

—Cheržca, Pedro. Čjepultan zoñinaca am kjurča. ²⁰Tsijtsna. Chjiwžca. Ana paysnakcan ninacžtan oka. Wejrtča ninaca cuchanžquichintqui.

²¹Jalla nektanaqui Pedruqui chjiwžquichiča, nii Corneliuž cuchanžquita zoñinacžtan zali. Ninacžquiz cjichiča:

—Ančhucqui tsjii zoñi kjurča. Wejrtča niitqui. žčjulquin ančhucqui tjonchinčhuc-tay?

²²Nektan ninacaqui kjaaziča, tuž cjican:

—Cornelio cjita zultatž jiliriž cuchanžquita tjonučha wejrnacqui. Niiqui walja rispitta zoñiča. Nižaza niiqui Yooz rispitičiča. Tjapa judfo zoñinacaqui niž zuma kamañ wira quint'iniča. Tsjii Yooz anjilaqui nižquin mantichiča, tuž cjican: “Žoñinaca cuchna, Pedro cjitaqui tekz am kjuyquiz kjawzjapa. Pedruž čhiita taku nonžna amqui”. Jalla nuž Corneliužquiz cjichiča nii Yooz anjilaqui.

²³Nektanaqui Pedruqui kjuyquiz kjawziča atintita cjisjapa. Tsjii arama nezk tja-jžinčiča. Jaka tažquii Pedruqui ninacžtan ojkčiča. Nižaza tsjii kjaž Jope wajtchiz hermanonacaqui nižtan chica ojkčiča.

²⁴Niiž kat tažu Cesarea watja irantichiča, Corneliuž kjuyquin. Jalla nicju Corneliuqui tjewznatča niž parintinacžtan, nižaza tsjii zuma mazinacžtan. Corneliuqui ninaca kjawziča, ninacazakaz Pedruž taku nonzjapa. ²⁵Pedruž kjuyquin luztan Corneliuqui nižtan zalčiča. Nektan Pedruž yujkquiz quillziča, nii amzjapa. ²⁶Pedruzti tsijtskatchiča, tuž cjican:

—Tsijtsna amqui. Wejirmi am irat zoñizakaztča. Anača Yooztakaztča.

²⁷ Jalla pucultan parlican, luzziča. Nii kjuyquin walja ajczi žoñinaca zalchiča. ²⁸ Pedruqui ninacžquiz cjichiča:

—Ančhucqui zizza. Tsjii judío žoñiqui yekja wajtchiz žoñžtan anaž mazi cjisnasača, anaž ninacžtan ajcznasača. Nižaza yekja wajtchiz žoñž kjuyquin anaž tjonznasača. Jalla nuž judiož lii cjiča. Pero Yoozqui wejr intintiskatchiča. Anziqiu čjul žoñimi Yooz partiquiz cjesača, nii. Jalla nižtiquiztan wejrqui anal chiiz waquizuča, “Nii žoñiqui ana Yooz partiquiz cjesača” cjicanaqui. ²⁹ Nekztan amiž kjawžtiquiztan wejrqui ana kjaž chiižcu tjonchinča; judionacž lii quintra cjenami ana nicchinča. Pero ziz pecuča, kjažtiquiztan wejr kjawzinčucta ančhucqui?

³⁰ Jalla nekztanaqui Corneliuqui kjaaziča tuž cjan:

—Ažk pajkpic tjuñi wattan tii majñakak ora wejrqui kjuyquiz želatuča, Yoozquin mayizican, nižaza ayunazcan. Jalla nuž želan, tsjii walja llijñi žquitichiz žoñiqui wejtquiz jecžquichiča. ³¹ Nižaza wejtquiz cjichiča: “Cornelio, Yoozqui am mayizita nonziča. Nižaza amiž t'akjir žoñinacžquiz okztanaca cjuñziča. ³² Jaziqui Jope wajtquin žoñinaca cuchna, Simona zjijcajo. Nižaza niž tsjii tjuuqui Pedro cjitača. Yekja Simonž kjuyquiz alujazi žejlpachača, pajk kot žcati. Nii yekja Simonaqui zkizi koñž langžñi žoñiča. Nii Pedruqui tjonžcu, amtanž parlaquiča”. Jalla nuž wejtquiz chiichiča nii anjlaqui. ³³ Jalla nuž nii chiita tawk jaru, apura cuchanchinča am kjuri. Walim tjonchamča. Jaziqui tekzi tjappacha wejrnacqui Yooz Ejpž yujcquiz žejlča. Jaknužt Yoozqui wejrnacalca amquiz cjitčhaja, jalla nii tjappacha nonz pecasuča wejrnacqui.

PEDRUŽ PALJAYTA TAKUNACA

³⁴ Jalla nekztanaqui Pedruqui paljaji kallantichiča, tuž cjan:

—Jaziqui intintazuča. Ultim weraraž, Yoozqui tii muntuquiz žejlñi žoñinaca anaž yekja yekja illilla. ³⁵ Yoozquin rispitznaquiž niiqui, nižaza Yooz kuczama kamaquiž niiqui, Yoozqui jakzilta čjul wajtchiz žoñžquizimi asiptasača. Anziqiu jalla nuž intintazuča. ³⁶ Yooz Ejpqui Israel žoñinacžquiz amigo pajassiča. Nekztan niž zuma kamañ puntu zikatchiča. Jesucristuž cjen zuma cuntintu kuzziz cjisñi atasacha, jalla nii. Jesucristuča čjulquiztanami chekan Jiliriqui, wali azziz. ³⁷ Ančhucqui zumapanž zizza, jaknužt judío yokquiz watčhaja, jalla nii. Primero Juanqui Yooz taku mazmazziča. Nižaza žoñinaca bautissiča. Nekztanaqui Jesucristuqui niž persun Galilea yokquiz obranaca tjeežñi kallantichiča. ³⁸ Jesusaqui Nazaret wajtchiz žoñitača. Yooz Ejpqui nižquiz walja Espiritu Santuž azi tjaachiča. Jalla nižtiquiztan ojklaychiča, walinaca paacan, nižaza zajraž tanta žoñinaca liwriican. Jalla nuž paachiča, Yooz Ejpžtan nižtan chicapachaž nuž cjen. ³⁹ Tjapa Jesusaž ojklaytanacami paatanacami cheržcu, jalla nii maznasača wejrnacqui, Judea yokaran ojklaytanacami, nižaza Jerusalén watjaran ojklaytanacami. Wiruñauqui Jesusaqui cruzquiz ch'awctiquiztan conta ticziča. ⁴⁰ Jalla nuž contiquiztan čjep majquiztan Yooz Ejpqui Jesusa jacatatskatchiča. Jacatatskatžcu Yoozqui wejtnacaquiz pariziskatchiča. ⁴¹ Jesusaqui parti žoñinacžquiziqui ana parizichiča. Antiz wejtnacaquiz alaja parizichiča. Nižaza jecnacat Yooz Ejp illtčhaja, jalla ninacžquiz parizichiča Jesusaqui. Nižaza wejrnacmi Jesusaž jacatattiquiztan nižtan juntu lulassinča, nižaza kjazmi juntu licassinča. ⁴² Nekztanaqui Yooz Ejpqui tii Jesusapacha wali Juez Jiliržquin utchiča. Juez cjen nii Jesús chawc Jiliriqui žejtñi žoñimi ticzi žoñimi juzjizaquiča. Jalla nii mazmazñijapa wejrnac cuchanžquichiča Jesusaqui. ⁴³ Nižaza tuquitanpacha Yooz taku parliñinacaqui Jesusiž puntuquiztan parlichipanča, tuž cjan: “Jakzilat nii Jesusižquiz tjapa kuztan criyačhaj niiqui ujnacquiztan pertuntaž cjequiča”.

ESPIRITU SANTUŽ LUZTA

⁴⁴ Jalla nuž Pedruž chian, Espiritu Santuqui tjapa niž chiita taku nonžñi žoñinacžquiz luziča. ⁴⁵ Jalla nuž cjen nii Pedružtan tjonči judío žoñinacaqui ispantichi quirchiča, Espiritu Santuqui tjaatazakaztača ana judío žoñinacžquiziqui. ⁴⁶ Espiritu Santo tanžcu, nii žoñinacaqui yekja ana pajta taku chiichiyatča. Nižaza Yoozquin waljaž alawatča. Jalla nižtiquiztan ispantichi cjissiča nii žejlñi judionacaqui. ⁴⁷ Nekztanaqui Pedruqui cjichiča:

—Wejtnacaquiz Espíritu Santo tjaatača. Nižaza tinacžquiz Espíritu Santo tjaataza-kazza. Jaziqui tinaca bautista cjisjapa, ¿jec žoñit atajas?

⁴⁸Jalla nektanaqui Pedruqui mantichiča, Jesucristuž tjuuquiz tinaca bautista cjeajajo. Nektanaqui nii žoñinacaqui Pedružquiz rocchiča tsjii kjaž maj ninacžquiz kamt'ajajo.

11

PEDRUŽ JUDIO ŽOÑINACŽQUIZ MAZTA

¹Nii Judea yokaran žejlñi illzta apostolonacami, jilanacami, jalla ninacaqui quinto nonchiča, yekja wajtchiz žoñinacaqui Yooz taku catokchiča, jalla nii. ²Pedruqui Jerusalén watja quejžžquichiča. Jalla nuž quejptan parti judfo criichinacaqui Pedruž quintra chuchchiča, ³tuž cjican:

—¿Kjažtiquiztan učhum lii quintra amqui yekja wajtchiz žoñinacžquin tjonzñi ojkccham-tajo? ¿Kjažtiquiztan učhum lii quintra ninacžtan lujlchamtajajo?

⁴Nektanaqui Pedruqui nii parti judionacžquiz quint'ichiča, jaknužt watčhaja primerquiztanpacha Corneliuž puntu, jalla nii. Tuž cjican, quint'ichiča:

⁵—Wejrqui Jope wajtquin želatuča. Yoozquin mayizican, tsjii chjuužtažoka cherch-inča, jalla tižta. Tsjii pajk mantilažtakaz tsewctan chjijwžquichiča. Niž pajkpic puntuquiztan žcucžintatača. Jakziqiztažlaj wejrqui, jalla nekz wejr tirichuc irantižquichiča. ⁶Jalla nuž irantižquitanaqui zumpacha cherezinča, čhjulut nii kjuyltan žejl, cjican. Jalla nuž wejrqui cherchinča tjapaman pajkpic kojchchiz animalanaca, k'it animalanacami, zkoranacami, wežlanacami, jalla nuž cherchinča. ⁷Nii orazakaz tsewctan tsjii žoñž joražtakaz nonzinča. Wejtquin chiižquichiča tuž cjican: “Pedro, tsijtsna. Conžna. Nižaza lujlžna”. ⁸Wejrzi kjaazinča, tuž cjican: “Wejt Jiliri, nižta anal paasača. Nii punta animala ana luli atasača, am lii quintrača. Jaziqui nižta anal paasača wejrqui”. ⁹Jalla nuž kjaaztiquiztanaqui nii joraqui wiltazakaz chiižquichiča, tuž cjican: “Yoozqui chiichiča, ‘Zumaž tiiqui lujlžjapa’ cjican. Nii Yooz zuma cjetaqui ana amqui ‘Ana lulasaz’ cjeella. Yooziž chiita taku anam nicz waquiziča, ‘Ana lulasaz’. Lii quintrača’ cjicanaqui”. ¹⁰Jalla nuž čhjep wilta watchiča, nektanaqui nii mantilaqui waytitatača tsewcchucpacha. ¹¹Nektanaqui čhjepultan žoñinacaqui weriž alujta kjuyquiz irantižquichiča. Cesarea wajtquiztan cuchantatača wejr kjuri. ¹²Nižaza Espíritu Santuqui wejr mantichiča ninacžtan ana paysnakcan okajo. Nižaza sojtaltan jilanacaqui wejtta chica ojkičiča. Jalla nicju irantižcu, tjappacha wejrnacqui tsjii žoñž kjuyquiz luzazzinča. ¹³Nižaza nii kjuychiz žoñiqui wejtnacaquiz quint'ichiča, jaknužt niž kjuyquiz tsjii anjila chertčhaja, jalla nii. Nii anjila tsijtsi cherchiquiča. Nižaza nii anjilaqui nižžquiz tuž cjichičiča: “Jope wajtquin žoñinaca cuchanžca, Simona kjawznajo. Niž tsjii tjuuqui Pedro cjetača. ¹⁴Jalla niiqui amquiz chiaquiča, jaknužt ammi nižaza tjapa am familianacami liwriita cječhaja, jalla nuž”. ¹⁵Nektanaqui wejrqui ninacžquiz parli kallantitan, Espíritu Santuqui ninacžquiz luzziča, jaknužt tuquiqui učumnacaquiz lutzčhaja, jalla nuž. ¹⁶Jalla nektanaqui wejrqui Jesusaž niž tuquičiita taku cjuñžinča. Jesucristo Jiliriqui cjichiča, “Juanqui kjaztan bautisñipantača. Ančhucqui antis Espíritu Santužtan bautistaž cjequiča”. ¹⁷Jesucristo Jiliržquiz criičiž cjen Yoozqui učumnacaquiz Espíritu Santo tjaachiča. Nižta iratapacha Yoozqui ninacžquiz Espíritu Santo tjaachiča. Jaziqui wejrqui anal Yooz quintra cjesača. —Nuž quint'ichiča Pedruqui.

¹⁸Jalla nii quinto nonztiquiztan nii Jerusalén wajtchiz criichinacaqui ana iya chutchiča. Nužquiz ch'ujquichiča. Yoozquin alawazziča, tuž cjican:

—Nižazakaz yekja wajtchiz žoñinacaqui persun ujnaca pajžcu, nižaza persun kuznaca campižcu, jalla nektan ninacaqui persun ujnacquiztan pertuntazakaz cjequiča. Nižaza wiñaya Yooztan kamaquiča.

CRIIČI ŽOÑINACA WICHANZI

¹⁹Esteban conžcuqui, yekja Yoozquin criichinaca zakaz walja tanzquin cjsičiča. Jalla nuž cjen criichinacaqui yekja watjanacquin atipassiča. Fenicia, Chipre, Antioquia, jalla

nii yokanac kjutñi wichanziča. Jalla nicju liwriñi Yooz takunaca parličiča. Judío žoñinacžquiz alaja parličiča, ana yekja žoñinacžquiziqui. ²⁰Yekjapa criichi jilanacaqui Chipre yokquiztan nižaza Cirene yokquiztan ojkčiča. Nekztanaqui nii yokanacquiztan Antioquía watja irantichiča. Nekztan Antioquía wajtquin yekjapa criichinacaqui ana judío žoñinacžquiz parličizakazza Liwriñi Jesucristo Jilirž puntu takunacquiztan. ²¹Jesucristo Jilirž aziqui ninacžquiztača. Nižaza nii parlitiquiztanaqui walja žoñinacaqui tuquita cuzturumpinaca jaytižcu, Jesucristo Jiliržquin tjapa kuztan criichiča.

²²Nekztanaqui Jerusalén iclizziz criichinacaqui nii quintu nončiča. Jalla nii quintu nonžcu, Bernabé cjita žoñi cuchanchiča Antioquía watja. ²³Jalla nicju irantižcu, Bernabequi cherčiča, jaknužt Yoozqui nezk željñi criichinacžquiz okztčhaja, jalla nii. Nii criichinacaqui walja cuntintutača. Jaziqui Bernabequi tjappachquiz chiižinčiča, tuž cjan:

—Yoozquin criichinaca, zuma tjapa kuztan Yooz jiczquiz kamaquiča.

²⁴Nižaza Bernabequi wali zuma žoñitača. Niiqui Espiritu Santužtan tsjii kuzziztača. Nižaza Yoozquin tjapa kuzziztača. Jalla nuž zuma kamcan walja žoñinaca Yoozquin macjatskatžquichiča Bernabequi.

²⁵Jalla nekztanaqui Bernabequi Tarso watja ojkčiča Saulo kjuri. Saulo wajtžcu Antioquía chjtichiča. ²⁶Jalla nicju tsjii wata intiru criichinacžtan željčiča. Tama žoñinacžquiz Yooz taku tjajinčiča. Antioquía wajtquiziqui criichinacaqui cristiano tjuuchiz cjissiča. Tuquiqui niža tjuuchiz ana želatča.

²⁷Jalla nii timpuqui tsjii kjažultan Yooz taku parliñi žoñinacaqui Jerusalén wajtquiztan Antioquía ojkčiča. ²⁸Tsjiiqui Agabo cjitatača. Niiqui nii ajcžñi criichinacž taypiz tsijtsiča. Tsijtsican Yooz Espiritu Santuqui nii Agabo chiikatchiča, tuž cjan:

—Tjapa tii yokquiz wali čhjer mach'a želaquiča.

Jalla tiža watchiča, Claudio cjita chawc jiliriž mantiz timpuqui. ²⁹Jalla nižtiquiztan nii Antioquía wajtchiz criichinacaqui acuerdo luzziča Judea wajtchiz jilanacžquin tsjii yanapñi cuchanzjapa. Zapa mayniqui jaknužt onanchucažlaja jalla nuž onanchiča, nii Judea wajtchiz criichi jilanacžquin yanapzjapa. ³⁰Nižaza nii onantanaca apaychiča Judea wajtchiz icliz jilirinacžquin. Bernabežtan Saulužtan nii apayanacaqui chjtichiča.

12

JACOBO CJITA APOSTOL CONTAČHA

¹Jalla nii timpu Herodes cjita chawc jiliriqi yekjap Yoozquin criichi žoñinaca tanchiča.

²Nižaza Herodesqui Jacobo conkatchiča pajk cuchillžtan. Jacobqui Juanž jilatača.

³Jalla nuž contiquiztanaqui judío žoñinacaqui muzpa chipchipčiča. Jalla nuž nayžcu Herodesqui Pedro preso tanchizakazza. Jalla nii oraqui ana liwaturchiz t'anta lujl pjištatača.

⁴Pedro preso tantiquiztan, carsilquiz chawctatača. Carsilquiz pajkpic t'ak zultatunaca wijilñi uchtatača. Zapa t'akaqui pajkpic zultatuchiztača. Pascua pjišta pastanalla Herodesqui Pedro jwes pinsichiča, nii Jerusalén wajtchiz žoñinacžquiz tjeezjapa. ⁵Nuž Pedruqui tirakaz carsilquiz chawcta želatča, zultatuž cwitita. Nii parti Yoozquin criichi jilanaca cullaquinaca nižtajapa walja tjapa kuztan Yoozquin mayizatča.

PEDRO CARSILQUIZTAN LIWRIITA

⁶Jaka tažuqui Herodesqui Pedro jwes pecatča žoñinacžquiz tjeezjapa. Ima jwesan nii ween Pedruqui tjajatča, carinžtan čhejlta pucultan zultatž taypiz. Yekja zultatunacaqui carsil zanquiz wijilatča. ⁷Jalla nii weenpacha tiripintit Yooz anjilaqui tjončiča. Nižaza nii carsil kjuyltan muzpa waljaž kjančiča. Nekztanaqui nii anjilaqui Pedruž latuquiztan lanziča. Nuž lanžcu tjaji wajtskatchiča. Nekztanaqui Pedružquiz paljaychiča:

—Uri žaažna, —cjan.

Jalla nii orapacha Pedruž kjara čhejlta carinaqui jutztoka tjojtšiča. ⁸Nižaza nii anjilaqui cjichiča:

—Cinturuna zumpacha yajkzna. Nižaza am čhjata čhjatzna.

Jalla nuž Pedruž paan, nii anjilaqui cjichiča:

—Am irs irsna. Wejt wirquiz apžca.

⁹Nekztanaqui Pedruqui anjilž wirquizpacha ulanchiča carsilquiztan. Nii ora Pedruqui werara ana werara, ana zuma zizi atchiča. “Chjuuznoka wejrqui” cjan pinsatča. ¹⁰Jalla nekztanaqui primera wijilni zultatu watchiča. Nekztanaqui nii jaru wijilni zultatu watchizakazza. Nekztanaqui carsil zanquin irantichiča. Nekztan carsil jir chawjczqui jutztoka cjetsiča. Jalla nekztanaqui callquinpacha ulanchiča, nižaza ojkchiča. Jalla nuž cjen yekja callquin zina ectača. Anjilaqui nužquiz jutztokaz katchiča. ¹¹Pedruqui nekztan zumpacha naaziča, carsilquiztan liwriita, nii. Nekztanaqui cjichiča:

—Ultim werara liwriitaž wejrqui. Anal chjuuznukalala. Wejt Yooz Ejp Jiliriqui niiz anjila cuchanžquichiča wejr Pedružjapa Herodes kjarquiztan, nižaza nii anawali paaz pecni judfo žoinacž kjarquiztan.

¹²Jalla nuž pinsican, Pedruqui Marfa kjuya ojkchiča. Naa Mariiqui Juanž maatača. Juanž tsjii tjuuqui Marcos cjitazakaztača. Jalla naaža kjuyquin walja Yoozquin criichi žoinacaqui ajczitača, nii ora Yoozquin mayizatča. ¹³Pedruž kjuy patio zana t'okt'okan, tsja tur cullaqui Rode cjiti ulanžquichinča, ject tjonchi, cjan. ¹⁴Pedruž jora čhajzcu, ancha cuntintu zajtchinča partinacžquin mazni, Pedruča tjonchi, cjan. Tjatzintača, nii patio zana cjetzinc. ¹⁵Nii quintu nonžcu, criichi žoinacaqui cjichiča:

—¡Amqui lucuratamčha!

Jalla nuž chiyan, naaqui werarapanča cjichinča. Nii partinacazti cjichiča:

—Anaž nii cjesača. Niiž animužlani anjilažlaj.

¹⁶Pedruzti tira zanquiz t'okžinchiča. Nekztan chawjcz cjetžinchiča. Pedro cheržcu, walja tsucchi cjissiča. ¹⁷Pero Pedruqui kjaržtan siñala utchiča nii ajczi žoinaca ch'uj cjejajo. Jalla nekztanaqui Pedruqui quint'ichiča, jaknužt Yoozqui nii carsilquiztan liwriitčaja, jalla nii. Nižaza cjichiča:

—Ančhucqui nužuzakaz quint'aquiča Jacob jilžquin nižaza parti criichinacžquin. Wejr okaž, —cjichiča.

Jalla nekztanaqui Pedruqui ulanchiča, yekja kjutni ojkzjapa.

¹⁸Tjuñiž tewjctanalla, Pedro ana žejlñi cheržcuqui, nii wijilni zultatunacaqui ancha tsucchiča, nižaza kuz lurwayskatchiča. Pedruqui jaknužt ulantčaja, jalla nii ana wira jaknuž zizi atchiča. ¹⁹Nekztanaqui Herodesqui Pedro kjuri cuchanchiča. Ana wachi atchiča. Jalla nekztanaqui Herodesqui nii wijilni zultatunacžquiz zumpacha pewcpewcziča. Jalla nuž pewc pewcžcu, nii zultatunaca conajo mantichiča. Jalla niiz wiruñ Herodesqui Judea yokquiztan ojkchiča, Cesarea wajtquin želi.

HERODES TICZIČA

²⁰Herodesqui žawjchiča Tiro Sidón wajtchiz žoinacž quontra. Jalla nižtiquiztanaqui ninacaqui acuerdo palt'ichiča Herodes yujcquiz prisintisjapa. Nii Tiro Sidón watjanacchiz žoinacaqui Herodes tjaata čheržtan kamñitakalča. Nižaza tsjii Blasto cjita žoñi želatča. Niiqui Herodes secretariotača. Jalla nii žoinacaqui Blasto cjita secretario roct'ichiča ninacžta favora tjurt'ižinajo, Herodes ana quontra cjejajo. ²¹Herodesqui tsjii tjuñi citchiča ninaca nekzi prisinti cjejajo. Jalla nii cita tjuñquiziqui Herodesqui niiz wali jilir zqiti cujsiča audiencia watzjapa. Jalla nuž zqiti cujtžcu, niiz mantiñi sillquin julziča. Nekztanaqui tsjii kjaž takunaca chiichiča. ²²Jalla nuž chiiitquiztanaqui nii nonžni žoinacaqui kjawi kallantichiča, tuž cjan:

—Tii chiiñi žoñiqui anača ina žoñi. ¡Antis yoozpančha!

²³Jalla nuž kjawtquiztan Herodesqui cuntintutača, nii žoinacaz kjawta taku ana nicz pecatča, “Anača wejrqui Yoozqu” cjanaqui. Ana werar Yooz Ejpžquin honora tjaachiča. Jalla nižtiquiztan nii orapacha Yooz Ejp Jiliriqui niiz anjila cuchanžquichiča, Herodes chawc laa cjsinajo. Jalla nekztanaqui nuž laacijžcu Herodesqui lak'uz liwj mirta ticziča.

²⁴Pero nii liwriini Yooz takuqui tjapa kjutni parlita cjissiča. Nekztanaqui tsjan tsjan žoinacaqui tjapa kuztan nii parlita Yooz taku criichiča.

²⁵ Bernabežtan Saulužtan nii pucultanaqui apayta onantanaca intirjižcu, Jerusalén wajtquiztan Antioquía quejpchicha. Nižaza Juan chjichcu ojkcichicha. Juanqui niiz tsjii tjuuqui Marcos cjtazakaztača.

13

BERNABEŽTAN SAULUŽTAN CUCHANTA

¹ Antioquía wajtchiz Yoozquin criichi žoñinacžquiztan Yooz puntu tjaajiñinaca, nižaza Yooz taku chiiñi profetanaca želatča. Jalla tinacatača: Bernabé, Saulo, Simón (Negro cjtazakaztača), Lucio (Cirene wajtchiz žoñitača), nižaza Manaén (niiqui junto pajkchicha Herodestan. Herodesqui Galilea kjuttan mantiñitača). ² Tsjii nooj Yoozquin alawazjapa ajczitača, nižaza nii ora ayunasatkalča. Jalla nuž cjen Espiritu Santuqui ninacžquiz cjichicha:

—Ančhucqui Bernabé nižaza Saulo yekja t'akžina, weriž munta trabajo paañijapa.

³ Jalla nekztanaqui Yoozquin mayiziccu, nižaza ayunascu, nii Yoozquin criichinacaqui Bernabežtan Saulužtan ninacž juntuñ kjaržtan lanziča. Nekztanaqui nii pucultanaqui cuchanchiča, Yooz trabajo trabajčajo.

BERNABEŽTAN SAULUŽTAN CHIPRE YOKQUIN OJKTA

⁴ Nekztanaqui Espiritu Santuž cuchanžquitan Bernabežtan Saulužtan ojkcichicha Seleucia cjita watja. Jalla nicju warcu zalchiča Chipre cjita yoka ojczjapa. ⁵ Jalla nicju irantižcu Salamina cjita watja luzziča. Jalla nicju judionacž ajcz kjuyanacquiz Yooz taku parli kallantichiča. Juan Marcos ojkcizakazza ninaca yanapi. ⁶ Tjapa nii Chipre cjita yokaran ojklaychiča. Nižtami Pafos cjita watja irantichiča. Jalla nicju tsjii judfo žoñžtan zalchiča. Nii žoñiqui Barjesús cjtatača. Nii žoñiqui laykatalča. Nižaza toscara chiiñitakalča, “Wejrqui Yooz taku chiichiyuča” cjiñitakalča. ⁷ Jalla nii layka žoñiqui chawc jiliri Sergio Paulo cjita nižtan chicatalča. Jalla nii jiliriqui cusa zizñi žoñitača. Nii žoñiqui Yooz taku nonz pecatča. Jalla nižtiquiztan Bernabežtan Saulužtan kjawskati cuchanchiča. ⁸ Nii layka žoñiqui ninacž quintra chiichiča, nii jiliriqui ana Yooz taku nonznajo, nižaza Yoozquin ana kuzziz cjejajo. Nii layka žoñž tsjii tjuuqui Elimas cjtazakaztača. ⁹ Nižaza Sauluž tsjii tjuuqui Pablo cjtazakaztača. Nii Pabluqui Espiritu Santuž irpitapantača. Nii layka žoñž Yooz tawk quintra chiiitiquiztan, Pabluqui nii žoñž kjutñi zumpacha cherziča, ¹⁰ tuž cjan:

—Amqui anawalimča. Incallñamča. Amqui zajriž maaimča. Nižaza Yooz kuz quintramča. Amqui Yooz Ejpž taku tsjii kjutñi intintiskatz pecñampanča. ¿Kjažtiquiztan nižta amjo? ¹¹ Jaziqui Yooz Ejp Jiliriqui am casticaquiča. Zuram cjequiča. Tsjii kjaž maj tii tjuñ sii anam cheraquiča.

Jalla nii orapacha zura cjišiča, zumchiquizpan. Ana zinta cheri atžcu, nii layka žoñiqui tsjii žoñi kjurchiča niž kjarcu tanžcu chjichñijapa. ¹² Jalla nižta cheržcu, nii chawc jiliriqui Yoozquin criichiča. Yooz taku puntu tjaajintiquiztan walja ispantichi quirchiča nii jiliriqui.

ANTIOQUIA OJKTA

¹³ Jalla nekztanaqui Pabluqui niž mazinacžtan warcu zalchiča Pafos wajtquiztan ojczjapa. Nekztan Perge cjita watja irantichiča. Perge watjaqui Panfilia yokquintača. Nekztan Juanqui ninaca ecchiča, Jerusalén watja quejžquichiča. ¹⁴ Nekztanaqui ninacaqui Pergequiztan watchiča Antioquía watja. Antioquía watjaqui Pisidia yokquintača. Jalla nicju tsjii jeejz tjuñquiz luzziča tsjii judionacž ajcz kjuyquiz. Nekztanaqui luzcu, julziča. ¹⁵ Jalla nuž želan cjižta Yooz tawk liwruqui liitatača, Moisés cjižta Yooz takumi, nižaza Yooz cuntiquiztan chiiñi profetanacaž cjižta takumi, jalla nii liitatača. Jalla nuž liižcu ajcz kjuy jilirinacaqui Bernabežquiz Pablužquiz chiyajo nuž cjichicha, tuž cjan:

—Jilanaca, ančhucalta tsjii zuma taku želanaqui, anzpachaž chiya.

¹⁶ Nekztanaqui Pabluqui tsjišiča. Nižaza kjara waytižcu ch'uj cjiskatchiča. Jalla nuž ch'uju želan, paljaychiča tuž cjan:

—Israel wajtchiz žoñinaca, nonžna. Nižaza werar Yooz rispitiñi žoñinaca, nonžna.
¹⁷ Israel wajtchiz žoñinacž Yoozza werar Yoozqui. Jalla nii Yoozqui učum tuquita atchi ejpnaca illziča nižquin sirwajo. Nii timpuquin Egipto yokquin tirapan kamčiča yekja wajtchiz žoñinacažtakaz. Jalla nižta želanami Yoozqui walja mirkatchiča. Wiruñaquí Yooz Ejpqui niž azi tjeezcan jwezquichiča nii yokquiztan. ¹⁸ Pusi tunc watanaca ch'ekti yokaran ojklayan, Yoozqui ninacž anawali kamzquiztan awantichiča. ¹⁹ Nii timpupacha pakallak nacionanacaqui Canaán yokquin žejlñitača. Jalla tjappacha nii yokquiz žejlñinaca tjatančiča Yoozqui, nižaza ninacž yoka tjaachiča učum tuquita atchi ejpnacžquiz, tsjii irinsažtakaz. ²⁰ Nekztanaqui pusi patac pjijska tuncan watanaca juezanaca utchiča učum ejpnacžquiz mantiñijapa, Samuelž timpu irantisquizcama. Samuelqui Yooz cuntiquiztan chiiñi profetatača. ²¹ Jalla nii Samuelž timpuquiz učum ejpnacaqui tsjii pajk jiliri mayčiča ninaca irpiñijapa. Jalla nuž maytiquiztan Yoozqui Saúl illziča ninaca mantiñijapa. Nii Saúlqui Cis majchtača, nižaza Benjamín t'akquiztantača. Nii Saúlqui pusi tunc watajapa mantiñitača. ²² Nekztanaqui Yoozqui niž puestuquiztan Saúl jwessiča. Jalla nekztanaqui nii rey puestuquin David utchiča. Davidž puntuquiztan Yoozpachača tuž cjichiqui: “Wejrqui tii David cjita žoñi nayuča Isaíž majchča. Tii žoñiž cjen ancha cuntintuča. Wejt kuzcamapanikaz kamñipanča tiiqui”. Jalla nuž cjichiča Yoozqui. ²³ Tsjii Davidžquiztan majchmaati ojkniqui Jesusa cjitača. Tuquiqui Yoozqui taku ecchiča Israel wajtchiz žoñinaca liwriizjapa. Jalla nii taku cumplisjapa, Yoozqui tii Jesusa cuchanžquichiča Israel žoñinacžquiz. ²⁴ Ima Jesusaž Yooz langz kalltan, Juanqui tjapa Israel žoñinacžquiz parliñitača, tuž cjican: “Ančhucqui persun ujnaca pajžcu, kuznacaž campiya, nekztan bautistaž cjesača”. ²⁵ Juanž ticz tjuñi žcatžinžcan, Juanqui cjichiča: “Ančhucqui jaknužt wejt puntuquiztan pinsičhaja, niiqui anača niit wejrqui. Wejt wirquin tjonča tsjiiqui, wejtquiztan juc'ant jiliriča. Nii atintizjapa, anal waquizuča, nižaza wejrqui inakaztča.”

²⁶ Jilanaca, Abrahamž majchmaatinaca, nižaza Yooz rispitsñinaca, ančhucqui nonžna. Ančhucaltajapaž tii liwriñi Yooz taku žejlča. ²⁷ Jalla nii Jerusalén wajtquiz kamñi žoñinacami, nižaza niž jilirinacami, jecčhalaja Jesusaqui, nii ana zizatča. Zapa jeež tjuñquiz judionacž ajcz kjuyquin tuquita profetanačž cjiřta taku liiñipanča. Jalla nuž liyanami nii taku anaž intintazñipantača. Nii žoñinacapachača tuquita Yooz taku cumpliskatchiqui, Jesusa conta cjskatchiča, nuž. ²⁸ Nii Jesusižquiz ana čhjul ujmi watchiča, nii conzjapaqui. Jalla nuž cjenami ninacaqui Pilato chawc jiliržquiztan mayčiča, nii Jesusa conzjapa. ²⁹ Nekztanaqui Jesusiž puntuquiztan jaknužt tuquitanpacha Yooz tawk liwruquiz cjiřtatažlaja, jalla tjapa nii cjiřta takunaca cumplisčiča. Nii taku cumplistiquiztan Jesusiž curpu cruzquiztan apakčiča. Nekztanaqui niž curpu tjattatača. ³⁰ Yooz Ejpzi Jesusa ticziquiztan jacatatskatchiča. ³¹ Nekztanaqui tsjii kjaž majquiztan Jesusaqui niž mazinacžquiz tjontjonziča. Niiž mazinacaqui nižtan čica ojkičiča Galilea yokquiztan Jerusalén watja. Nižaza ninacaqui anziqiu žoñinacžquiz niž puntuquiztan tiraž parliča.

³² Jaziqiu Yoozqui učum tuquita atchi ejpnacžquiz taku ecchiča. Wejrncacqui nii cumplista takunaca zjičchinča ančucaquiz mazjapa. Jalla nii zuma mazta ančucaquiz parluča. Yoozqui učum ejpnacžquiz taku ecchiča. ³³ Učumqui nii tuquita atchi ejpnacžquiztan tjončinča. Učumnacalta Yoozqui niž ecta taku cumplisčiča, Jesusa jacatatskatchiqui, nii. Nižaza nižtapacha segundo salmuquiz cjiřtatača tuž cjican: “Amqui wejt maatimča. Tonj tjuñi žejtkatchinča”. ³⁴ Nižaza Yooz Ejpqui niž jacatatz puntuquiztan čiičiča, tuž cjican: “Ticziquiztan am curpu jacatatskatača, ana wira sipulurquiz mojkzjapa”. Jalla nii puntuquiztan čiičiča cjiřta Yooz takuqui, tuž cjican: “Yoozqui Davidžquiz taku ecchiča, jalla nii tawk jaru ančucaquiz zuma favora paasača Yoozqui”. ³⁵ Jalla nužpan čiičiča tsjii salmuquiziqui, tuž cjican: “Am zuma sirwiñiž curpu ana ecta cjesača mokajo”. ³⁶ Jalla nuž werarača. Davidqui niž timpu žejlñi žoñinacžquiz yanapčiča, jaknužt Yooz mantičhaja, jalla niicama. Nekztanaqui Davidqui ticziča niž ejpnaca irata. Nekztan niž ticzi curpu tjattiquiztan mojkčiča. ³⁷ Jesucristuzti Yooziž

jacatatskatchiċha. Niiċ curpuzti ana mojkċhiċha. ³⁸Jilanaca, anċhucqui tuċ ziz waquiziċha. Jesusiċ cjen ujnaca pertuntaċ cjesaċha. Jalla nii zuma taku anċhucquiz parluċha. ³⁹Moisċ mantita lii jaru kamcanami, ana pertunta cjisni atċha. Jesusiċquiz macjatchi cjenaqui jalla niċtakaz tjapa ujnacami pertuntaċ cjesaċha. ⁴⁰Jaziqui anċhucqui cwit'aza, ana nii tuquita cjiirta casticu sufrisjapa. Tuquitan Yooz taku parliċni profetanacaqui cjiirċhiċha, tuċ cjian: ⁴¹“Nonċna, Yooztan quintraċnina, azzucaċ anċhucqui, niċzaa ċhatkatchucaċ anċhucqui.

Wejrqui Yooz Ejptċha. Anċhucqui kamz timpuquiz wali pajk obranaca paachinċha. Jalla nuċ anċhucquiz quint'ichi cjenami anċhucqui ana criyasaċha. Jalla niċtiquiztan ispanċichi cjisna, niċzaa casticta cjequiċha, anċhucqui Yooz quintra tjasninaċha”.

⁴²Nuċ ċhiċzcu Pabluqui niċ mazinacċtan judionacċ ajc kjuyquiztan ulanċhiċha. Yekjap ana judionacċ ejpċhiz ŋoċinaca ŋelatċha. Jalla ninacaqui roċt'azziċha, tuċ cjian:

—Tii jar jeejz tjuċquiz tii puntunacquiztan wejtnacaquiz wilta tjaaznalla.

⁴³Nii ajc kjuyquiz nii cultu ŋerċcu walja judio ŋoċinaca, niċzaa judioċ cuzturumpi paaċinaca, jalla ninacaqui Pabluċtan Bernabeċtan ċhica apziċha. Nii pucultanaqui zuma taku tjaachiċha, tuċ cjian:

—Anċhucqui Yoozquin tjapa kuztanċ cjee. Niċzaa tjurt'iċni kuzziz cjee.

⁴⁴Jalla nii wiruċta jeejz tjuċquiziqui joz tjapa nii wajtċhiz ŋoċinacaqui ajcziċha Yooz taku nonzjapa. ⁴⁵Jalla nuċ ajczi ċherċcu, nii judio ŋoċinacaqui iċnizichiċha. Nekztanaqui Pabluċ quintra ċhiċhiċha, niċ taku ana walkatzjapa. Niċzaa Pablo iċnarchiċha. ⁴⁶Nekztanaqui Pabluċtan Bernabeċtan ana ekscu ċhiċhiċha, tuċ cjian:

—Anċhucqui judio ŋoċinacċhucċha. Niċtiquiztan anċhucquiz primeraqui tii liwriiċni Yooz taku ċhiistanċha. Anċhucċti tii Yooz taku anaċ nonz pecċha. Niċzaa Yooziċ tjaata wiċaya ŋeti anaċ risiww pecċha, jalla nuċ tantiċhinċhucċha anċhucqui. Jalla niċtiquiztan anziqui ana judio ejpċhiz ŋoċinacċquiz tii Yooz taku paljayaċha. ⁴⁷Jalla nuċ mantichiċha Yooz Ejp Jiliriqui, tuċ cjian:

“Wejrqui anċhucquiz utċhinċha, tjapa nacionacquin ŋoċinacċquiz wejt puntu kjanzt'ajo. Anċhucċaċ cjen tjapa kjuttan tii muntuquiz yok tjiiquin kamni ŋoċinacami liwriitaċ cjequiċha”.

⁴⁸Jalla nuċ nonzcu, nii ana judio ejpċhiz ŋoċinacaqui anċa ċhipċhiċha. Niċzaa Yooz tawk puntuquiztan, tuċ ċhichiċha: “Tii Yooz takuqui zumapanċha”. Jakziltat arajpachquin wiċaya kamzjapa Yoozqui illzaja, tjapa ninacaqui nii parlita Yooz taku criichiċha. ⁴⁹Tjapa yokaran Jesucristo Jilirċz puntuqui parlitataċha. ⁵⁰Judio ŋoċinacċti quintra aptazziċha. Nekztan ninacaqui tsjii kjaċ rispitta judio cuzturumpi paaċni maatakanacċtan, niċzaa tsjii kjaċ wali zuma rispitta wajt jilirinacċtan palt'ichiċha. Nii judio ŋoċinacċaċ cjen ninacaqui Pabluċ niċzaa Bernabeċ quintra aptazzizakazza, nii yokquiztan ċhatkatzcama. ⁵¹Jalla niċtiquiztan Pabluċtan Bernabeċtan ninacċ kjoċquiztan zcatċhi pulpu tsajtysiċha. Jalla nii tsajtstaqui tsjii siċnalaċtakaztaċha nii wajtċhiz ŋoċinacċ quintrajapa. Nii yokquiztan ulanċcu, Iconio ċjita watja ojċhiċha. ⁵²Pero nii Yooz taku catokni ŋoċinacaqui anċa cuntintutaċha. Niċzaa Espiritu Santuċ irpitapanċ ċjissiċha.

14

ICONIO WATJA OJKTA

¹Iconio ċjita wajtquin kamcan Pabluċtan Bernabeċtan luzziċha nii judionacċ ajc kjuyquin. Nekztan Jesucristuċ puntuquiztan parlitiquiztan, walja judio ŋoċinacċtan, niċzaa ana judio ŋoċinacċtan, walja ninacaqui Yoozquin criichiċha. ²Pero nii ana criċhi judio ŋoċinacċti ana criiz pecċhipantaċha. Nekztan ninacaqui parti ŋoċinaca Yoozquin criċhinacċ quintra aptazziċha, niċzaa criċhinacċ quintra pinsiskatchiċha, “Nii Yoozquin criċhi ŋoċinacaqui anawalipanċha” ċjanaqui. ³Jalla niċtiquiztan Pabluċtan Bernabeċtan aċk tjuċni kamċhiċha nii wajtquin. Niċzaa zuma tjurt'iċni kuzziz paljayċhiċha. Niċzaa Jesucristo Jilirċzquin tjapa kuzziztaċha. Jalla niċtiquiztan Jesucristuqui azi tjaachiċha, siċnalanacami milajrunacami paajo. Jalla nuċ paatiquiztan kjanapacha tjeċzataċha, Yooz

okzñi takuqui werarača, jalla nii. ⁴Nii wajtchiz žoñinacaqui pizc partiquin t'akziča. Parti žoñinacazti judío žoñinacžquin apuychiča. Parti žoñinacazti apostolonacžquin apuychiča. ⁵Jalla nekztanaqui judío žoñinacaqui parti žoñinacžtan, nižaza nii wajt jilirinacžtan, tsjii parla asiptichiča Pablo Bernabé ch'aanizjapa, nižaza ninaca maztan čhajczjapa. ⁶Pablužtan Bernabežtan jalla nii quintu zizcu, atipassiča. Listra wajt kjutñi ojkchiča. Nižaza Derbe wajt kjutñi ojkchizakazza. Nii pizc watjanacaqui Licaonia cjita yokquintača. ⁷Tjapa nii Licaonia yokaran zuma liwriiñi Yooz taku parličiča.

PABLO MAZTAN ČHAJCTA

⁸Nii Listra wajtquin tsjii zuch žoñi želatča. Majttiquiztanpacha nižtapantača, wira ana ojklayñitača. Jalla nicju julzi želatča. ⁹Nii zuch žoñiqui Pabluž chiita taku nonziča. Nii žoñiqui “Pabluqui wejr čhjetnasaž jaz” cjican pinsičiča. Nižaza Pabluqui niž kuzquiz naychiča, Yoozquin tjapa kuzziz cjeta, jalla nii. ¹⁰Jalla nižtiquiztan Pabluqui nižquiz zuma chekžcu, altu joržtan čhižinčiča, tuž cjican:

—Sok'opacha tsijsna, am persun kjojctan.

Jalla nižta čhiitiquiztanacuqui nii zuch žoñiqui tsjii layzcu tsijsiča, nekztan ojklayi kallantičiča. ¹¹Jalla nii Pabluž paata cheržcu, žoñinacaqui walja kjawi kallantičiča. Licaonia tawkquiztan kjawčiča tuž cjican:

—Yooznacaqui žoñižtakaz tsewtan čhjjwžquičiča učumnacaquiz.

¹²Nii žoñinacaqui cjetča, Bernabequi Júpiter cjita yoozza. Pabluqui parliñipantača, jalla nuž cjen nii žoñinacaqui cjichiča, Pabluqui Mercurio cjita yoozza. ¹³Wajt tjiiquin Júpiter yooz timpluquiz želatča. Nii timplu fabriqueruqui wac turunaca nižaza pjajkjal-lanaca zjijčiča, wajt zanquj, jalla nekz. Nii fabriqueržtan nii wajtchiz žoñinacžtan Pablužquiz Bernabežquiz sirwiz pecatča Yooztakaz. Wac turunacžtan wilana ljokt'iz pecatča. ¹⁴Nekztanaqui Pablužtan Bernabežtan jalla ninacaqui nižta paa-awc cjen naaziča. Jalla nuž naažcu persun zquiti wjajrsiča, anal nii pecuča cjican. Nižaza nii žoñinacž taypiquin kjawcan luzcu, altu joržtan čhičiča, tuž cjican:

¹⁵—Žoñinaca, čkjažtiquiztan wejtnacaltajapa tižta paajo? Wejrnacqui ančuca irata žoñizakaztča. Ančhucqui jalla tižta paaz custurumpinaca jaytiz waquiziča. Inapanikazza tii ančhuc custurumpinacaqui. Werar žejtñi Yoozza tjapa kuztanqui sirwizqui. Jalla nuž cjican ančucaquiz mazñi tjončinča. Nii werar Yoozqui paachiča arajpacha, yokanaca, kotanaca, nižaza tjapa žejlñinaca paachiča. ¹⁶Tuqui timpuqui žoñinacaqui persun kuzcama ojklayñitača. Jalla nuž ojklayan Yoozqui ana kjaž cjinitača. ¹⁷Yoozqui čijñi apayžquiča, zuma zkala pookajo. Nižaza Yooz cjen wali čhjeri žejlča, učumnaca lujlžjapami, nižaza cuntintu kamžjapami. Jalla nuž zumanaca tjaača Yoozqui. Nižtiquiztan žoñinacaqui Yooz pajz waquiziča.

¹⁸Jalla nuž čhiyanami nii wajtchiz žoñinacaqui tira wilana conawkkaz cjetča, Pablužquiz Bernabežquiz sirwizjapa. Ch'aman tii custurumpinacquiztan apatatskatiča. Ultimquiziqui nižtami ana wilana cončiča.

¹⁹Jalla nekztanaqui tsjii kjaž judionacaqui tjončiča Antioquia wajtquiztan, nižaza Iconio wajtquiztan. Jalla nii tjonchi žoñinacaqui nii wajtchiz žoñinacžquiz kazzinčiča Pabluž quintra. Nekztanaqui maztan Pablo muzpa čhajčiča. Nekztan nii čhajčñi žoñinacaqui, “Ticziča” cjican Pablo wajtž tjiya joočiča. ²⁰Wajtž tjiiquin ectaž cjen jalla nekzi cričinacaqui ajcziča Pabluž muytata. Jalla nuž želan, Pabluqui žaaziča. Nekztan wajtquin wilta luziča. Nekztanaqui jaka tažuqui Bernabežtan Pablužtan ojkchiča Derbe cjita wajt kjutñi.

²¹Jalla nicju zuma liwriiñi Yooz taku paljayčiča. Jalla nuž paljayan walja žoñinacaqui Yooz taku cričiča. Nekztanaqui Listra Iconio Antioquia nii watjanac kjutñi neajpčiča. ²²Jalla nii watjanacquin Pablužtan Bernabežtan Yoozquin criči žoñinaca tjurt'iñi kuzziz cjisjapa walja čhižinčiča, tuž cjican:

—Yoozquin kuzzizpankaz tira kamaquiča. Yooz mantuquiz kamčiž cjen, tii muntuquiz ancha sufrispanča učumnacaqui.

²³ Nižaza zapa iclizquin jilirinaca nombrichiča. Nekztanaqui Yoozquin mayizizcu ayunazcu Pabluqui nii nombritanaca Yoozquin cumpjiichiča. Nii nombrita jilirinacaqui Yoozquin tjapa kuzziztača.

PABLUŽTAN BERNABEŽTAN ANTIOQUIA QUEJPCHIČHA

²⁴ Jalla nekztanaqui Pabluqui Bernabežtan Pisidia cjita yokaran watchiča. Nekztanaqui Panfilia cjita yokquin irantichiča. ²⁵ Jalla nicju Perge wajtquin Yooz taku paljaychiča. Nekztanaqui Atalia cjita wajt kjutni ojkičiča. ²⁶ Jalla nicju warcu zalchiča, Antioquia ojczjapa. Tuquiqui ima okan, Antioquia wajtchiz criichinacaqui Pablužtan Bernabežtan, nii pucultan Yoozquin cumpjiichiča Yooz taku paljayajo. Jalla nuž Yooz taku paljayz trabajo žeržcu, Antioquia watja quejpcchiča. ²⁷ Jalla nicju irantižcu, Pabluqui Bernabežtan nii wajtchiz criichinaca juntaskatchiča. Nekztan nii criichinacžquiz quint'ichiča, tjapa Yooz aztan paatanaca. Nižaza quint'ichiča, jaknužt yekja wajtchiz žoñinacaqui Yoozquin criichiča; nižaza Yooz jiczquiz luzziča. ²⁸ Nižaza ažk tjuñinaca Pablužtan Bernabežtan nicju žejlchiča criichinacžtan.

15

JERUSALENQUIN AJCZTA PUNTU

¹ Jalla nii timpuqui tsjii kjaž žoñinacaqui Judeaquiztan Antioquia ojkičiča. Jalla nicju ninacaqui Yoozquin criichinacžquin tjaajni kallantichiča, tuž cjican:

—Moisés mantita cuzturumpinaca paastanča, liwriita cjsjapa.

² Pablužtan Bernabežtan nižta tjaajni žoñinacžtan walja ch'ayi ch'ayi parličiča nii cuzturumpi paaz puntuquiztan. Ultimquiziqui Pablužtan Bernabežtan yekjap criichinacžtan nombrita cjsičiča, Jerusalén watja ojczjapa. Jalla nicju nii parlita puntuquiztan wilta parlaquičiča apostolonacžtan nižaza icliz jilirinacžtan.

³ Jalla nijjapa nii Antioquia criichinacaqui ninaca cuchanchiča. Jalla nuž ojkan, Fenicia yokaran Samaria yokaran watchiča. Jalla nuž wajtcan Pablužtan Bernabežtan quint'ichiča, jaknužt yekja nacionchiz žoñinacaqui ninacž tuqita cuzturumpinaca jaytichaja, nižaza jaknužt Yoozquin kuzziz cjistchaja, jalla nii quint'ichiča. Jalla nii quintu nonžcu žoñinacaqui “Ancha cuzala” cjican cjichiča.

⁴ Pablužtan Bernabežtan Jerusalén watja irantitan, nii wajtchiz criichinacami apostolonacami nii icliz jilirinacami tjapauntu Pablužtan Bernabežtan risiwichiča. Jalla nekztanaqui Pabluqui Bernabežtan quint'ichiča jaknužt ninacaqui Yooz aztan paatčhaja, jalla nii. ⁵ Nekztanaqui yekjap fariseo partiquiztan criichinacaqui tsjitsičiča, tuž cjican:

—Nii yekja nacionchiz criichinacaqui judionacž chimpuz custurumpi jalla nii paastanča. Nižaza Moisés mantita liicama kamla.

⁶ Jalla nekztanaqui apostolonacami icliz jilirinacami ajczičiča jalla nii puntu parlizjapa.

⁷ Jalla nuž ažkpacha ch'ayi ch'ayi parličcu, Pedruqui tsjitsičiča, tuž cjican:

—Jilanaca, ančhucqui tižta zizza. Tuquiqui Yoozqui ančhucquiztan wejr illzipanla, yekja nacionchiz žoñinacžquiz nii zuma liwriini Yooz taku paljayajo, ninaca nii liwriini taku criyajo. ⁸ Nižaza Yooz Ejpqui tjapa žoñinacž kuz zuma zizza. Nii yekja nacionchiz žoñinaca criini kuzziz cjen, Yoozqui ninacžquiz Espiritu Santo luzkatchiča. Jaknužt učhumnacaquiz Espiritu Santo luzkattchaja jalla nužuzakaz. Nižaza Espiritu Santo tjaacan, Yoozqui tjeecičiča, yekja nacionchiz criichinaca persun maati cunta ricujchizakazza, jalla nii. ⁹ Yoozqui ninacžtan učhumnacatan ana pjalpjalzičiča. Yoozquin tjapa kuz cjen ninacaqui kuz campiičiča. Nižaza Yoozqui ninaca pertunchiča, zuma kuzziz cjeajajo.

¹⁰ Jaziqui Yooz Ejpqui nižta munchičiča. Ančhucqui Yooz quintra cjequiči niiqui, casticta cjequičiča. Ančhucqui nii yekja wajtchiz criichinaca učhumcuzturumpi tjuz pecča, tsjii liczi kuzižtakaz. Učhumpachaž nii cuzturumpinaca ana tjapa payi atchiča, nižaza učhum tuqita atchi ejpnacžquiztanpacha ana tjapa payi atchiča. Jaziqui, kjažtiquiztan nižta ninaca paakatž pecjo? ¹¹ Nii cuzturumpi paañiž cjen anaž jakziltami ujnacquiztan liwriita cjesača. Jesucristo Jiliriqui okžni kuzziz cjen žoñinacž laycu ticzičiča. Jalla nižtiquiztan Jesucristužquin criichiz cjen učhumnacami ninacami ujnacquiztan liwriita cjesača.

¹² Jalla nuž Pedruž chiitiquiztan tjappacha ch'uju cjsiŕiŕha. Nekztanaqui Pablužtan Bernabežtan ninaca quint'ichiŕha, jaknužt yekja nacionanacaran ojklaycan Yooz aztan siŕalanacami milajrunacami paatŕhaja, jalla nii. ¹³ Jalla nuž quint'i žeržtan, Jacoboqui cjichiŕha:

—Jilanaca, nonžna. ¹⁴ Simón Pedruqui uŕhumnacaquiz quint'ichiŕha jaknužt tuquiqui Yoozqui persun maati cunta ana judío žoŕinaca ricujchižlaja, jalla nii. ¹⁵ Nižaza Yooz taku parliŕi profetanacž cjiŕta tawk jaruŕha niiqui. Cjiŕta Yooz takuqui tuž cjiŕha:

¹⁶ “Tii wattanaqui quejpžcaŕha. Davidž kjuyquiztan ojknŕi žoŕinacaqui pajlzi kjuyažtakaz žejlŕha. Jaziŕqui Davidž pajlzi kjuyaqui wital kjuyaŕha. Wital waytaŕha, ew žoŕinaca cjsjapa. ¹⁷ Jalla nekztanaqui tjapaman nacionchiz žoŕinacaqui Yooz Ejp Jilirž kamaŕna pecaŕiŕha. Jakzilat Yooz kjawztažlaja, jalla nii žoŕinacaqui Yoozquin tjonacuŕiŕha. ¹⁸ Jalla nuž cjichiŕha Yooz Jiliriqui tuqui timpuquiztanpacha, žoŕinacaž zizajo”.

¹⁹ Jalla nižtiquiztan wejr cjiwŕha. Nii ana judío žoŕinacaqui ana molistis waquiziŕha. Ninacaqui ninacž tuquita cuzturumpinaca jaytichiŕha, Yooz kuzcama kamzjapa. Jalla nuž cjenacuqui ana kjaž cjis waquiziŕha, nii uŕhumn cuzturumpinaca paaz puntuquiztan. ²⁰ Tiikaz uŕhumnqui ninacžquin cjiŕrasaŕha, tuž cjan: “Žoŕiž paata yoozquin wilana jawkta chjizwi anaŕha lujsŕqui. Nižaza anaŕha adulteriuquiz ojklayzŕqui. Nižaza jora zkenzcu conta animal chjizwimi anaŕha lujsŕqui. Nižaza čjul animal ljocmi anaŕha lujsŕqui”. Jalla niikaz cumplistanŕha nii yekja wajtchiz criichinacaqui. ²¹ Tuquitanpacha zapa wajtquiziqui Moisés liiqui parlitataŕha. Nižaza zapa ajc kjuyquiz liitataŕha zapa jeej tjuŕquiziqui.

²² Jalla nekztanaqui apostolonacami icliz jilirinacžtan nižaza tjapa criichinacžtan palt'ichiŕha, tsjii tsjii ninacžquiztan illzjapa. Nekztan Judas illztataŕha, niiz tsjii tjuuqui Barsabás cjitazakaztaŕha. Nižaza Silas illztazakaztaŕha. Jalla nii pucultanaqui walja zuma jilanaca cjitataŕha niiz mazi jilanacžquiztan. Nekztanaqui nii illzta žoŕinacaqui Pablužtan Bernabežtan cuchantataŕha Antioquía wajtquin, nii cuzturumpi paaz parlita puntu mazjapa. ²³ Jalla ninacžtan tsjii carta apaychiŕha. Nii cartiquiz tuž cjichiŕha:

“Wejtnaca jilanaca, wejrnacuqui Jesusiž illzta apostolonactŕha, nižaza icliz jilirinactŕha, nižaza Yoozquin criichinactŕha. Wejrnacuqui ančucaquin tsaanznuŕha. Ančuacuqui ana judío žoŕinacžhucŕha. Antioquía wajtchiz žoŕŕhucŕha, nižaza Siria yokjunn kamiŕiŕha anaŕha, nižaza Cilicia yokjunn kamiŕiŕhuczakazza. ²⁴ Wejrnacuqui tsjii quintu zizzinŕha. Tekztan tsjii kjaž žoŕinacaqui ančucaquin ojtkalŕha, ana jec jiliriz mantita ojkiŕiŕha. Jalla ninacaž čiita taku ančuca kuz turwayskatŕhani. Ninacaqui cjiŕhani, “Judionacž chimpuz cuzturumpi paastanŕha. Nižaza tjapa Moisés liiqui cumplistanŕha”. Jalla nuž čiižcu, paysnakŕni kuzziz cjsiŕinŕhucžlani. ²⁵ Jalla nii quintu zizcu, nii puntuquiztan wejrnacuqui zuma palt'ichinŕha. Nekztanaqui wejrnacuqui kazzinŕha, tsjii pucultan wejtnacuquiztan illzjapa. Nii pucultanaqui illztataŕha ančuca cherezni okajo. Ninacaqui Pablužtan Bernabežtan chica okaquiŕha. Nii Pablo Bernabé, jalla ninacaqui ancha zuma pecta jilanacaŕha. ²⁶ Nii Pablužtan Bernabežtan Jesucristo Jilirž mantita ojklaycan joz conkatchiŕha. ²⁷ Nižtiquiztan wejrnacuqui Judastan nižaza Silžtan cuchanchinŕha, ančuacan tii puntu parlizjapa. Nižaza ančucaquiz tjapa tii puntuquiztan paljayaquiŕha. ²⁸ Wejtnacuquimi Espiritu Santužquizimi walikaztaŕha tinacaqui. Wejrnacuqui ančucaquiz anaž tsjii liczi kuzi tjuz waquizasasaŕha, anaž wejtnac liczi cuzturumpi paakatz waquizasasaŕha. Jalla tiikaz paakatz waquiziŕha. ²⁹ Žoŕiž paata yoozquiz wilana jawkta chjizwi anaŕha lujsŕqui. Nižaza čjul animal ljocmi anaŕha lujsŕqui. Nižaza jora zkenzcu conta animal chjizwimi anaŕha lujsŕqui. Anaŕha adulteriuquiz ojklayzŕqui, luctaka cjiŕimi maataka cjiŕimi. Zuma lucutiŕipan kamsa. Jalla nuž kamaquiz niiqui, walikaz cjequičha ančuacuqui. ¡Zumakaz ojklaya!” Jalla nuž cjiŕrataŕha nii cartacuqui.

³⁰ Nekztanaqui nii cuchanta žoŕinacaqui cartižtan ojkiŕiŕha Antioquía watja. Jalla nicju irantižcu, tjapa nii wajtchiz criichi žoŕinaca juntazziŕha. Nekztan nii carta intirjichiŕha.

³¹ Jalla nii carta liižcu, nii jilanacaqui walja chipchiŕha, nii zuma takunaca cjiŕžquitaž cjen. ³² Nižaza nii Judastan Silžtan Yooz taku paljajniŕtaŕha. Jalla nuž paljaycan walja

žořinacžquiz kuzziča. Nižaza nii criichinacaqui tjurt'iňi kuzziz cjiskatchiča ninacž tawkžtan. ³³Jalla tsjii kjaž tjuňinaca nicju kamchiča, Judastan Silžtan. Nekztanaqui ninaca cuchanžquiňi jilanacžquin quejz pecatča. Jalla nuž peccan parti criichinacaqui cjichiča:

—Yooz Ejpžtan ančhucqui zumakaz okalla.

³⁴Jalla nekztanaqui Judasqui ojkičiča. Ultimquiziqui Silasqui eclis tantiichiča.

³⁵Nižaza Pabluqui Bernabežtan Antioquía wajtquin eclichizakazza. Nekztanaqui parti jilanacžtan Yooz taku walja tjaajnatča ana criiči žořinacžquiz, nižaza liwriiňi Yooz taku paljayatča.

PABLUQUI WILTA YOOZ TAKU PALJAYI OJKČHA

³⁶Jalla niíž wiruň Pabluqui Bernabežquiz paljayičiča, tuž cjan:

—Wiltaž jaziqui ojklalla. Jakzi watjanacquin učhumqui liwriiňi Yooz taku parlitažlaja, jalla nii jilanacžquin tjontjonžquilalla. Jaknužt kamčhaja jalla niičhum cheržquilalla.

³⁷Bernabequi Juan chjitz pecatča. Juanž tsjii tjuuqui Marcos cjitazakaztača. ³⁸Niíž tuquiqui Panfilia wajtquin žejlcan, Marcosaqui Pablužquiztan Bernabežquiztan quepi zarakchiča. Ana iya chica ojklayčičiča Yooz taku parlican. Jaziqui Pabluqui Marcos ana chjitz pecatča. ³⁹Jalla nižtquiztan Pablužtan Bernabežtan ch'aassiča. Nekztanaqui jaljtichiča. Bernabequi Marcos chjitzcu tsjii warcu luzziča Chipre kjutňi ojczjapa. ⁴⁰Pabluzti Silas cjita žoňi illziča niížtan chica ojknijapa. Nii žejlňi jilanacaqui Pablužtan Silžtan Yoozquin cumpjiičičiča, Yooz zuma yanapajo. ⁴¹Nekztan ninaca Siria yok kjutňi ojkičiča. Siria yokaran nižaza Cilicia yokaran ojklayčičiča, iclizquiztan icliza ojklayčičiča, criiči jilanaca tjurt'iňi kuzziz cjeyajo.

16

TIMOTEOQUI PABLO CUMPANT'ICHIČHA

¹Nekztanaqui Pablužtan Silžtan irantižquichiča Derbe Litra cjita watjanacquiz. Jalla nicju tsjii Yoozquin criiči žoňžquiz zalčiča, Timoteo cjita. Niiž maaqui judío žontača, Yoozquin criičiča. Niíž ejpqui griego žoňitača. ²Nižaza Litra wajtchiz criiči žořinacami Timoteo rispitchičiča. Iconio wajtchiz žořinacaqui Timoteo rispitchizakazza. ³Nekztanaqui Pabluqui Timoteo kjutzňi pecatča. Jalla nižtquiztan Pabluqui judionacž cuzturumpi jaru Timoteo chimpuskatchičiča, nii yokaran kamňi judionacaž ana quintra chiyajo. Timoteož ejpqui griego žoňitača, anatača judío. Jalla nuž cjen Timoteoqui ana chimpuchiztača, judionacaž irata. Jalla nii zizziča nii yokaran kamňi judionacaqui. ⁴Nekztanaqui tjapa watjanaca ojklaycan, Pabluqui niíž mazinacžtan Jerusalén parlita quintu mazziča. Apostolonacami Jerusalén icliz jilirinacami, jalla ninacaž chiita taku quint'ichiča tjapa Yoozquin criiči jilanacžquiz. ⁵Jalla nižtquiztanaqui niiran žejlňi criichinacaqui Yoozquin walja tjapa kuzziz cjissiča. Nižaza zapuru Yooz jiczquiz luzatča iya žořinacaqui. Jalla nižtquiztan tsjanž yapatča Yoozquin criiči jilanacaqui.

PABLUŽ CHJUUŽTA

⁶Jalla nekztanaqui Espiritu Santuqui Pablužquizimi niíž mazinacžquizimi atajčiča, ana Asia yokaran Yooz taku parliňi ojklajajo. Jalla nižtquiztan ninacaqui Frigia, nižaza Galacia cjita yokanacaran ojklayčičiča. ⁷Jalla nuž ojklajžcu, Misia cjita lintiquin irantičičiča. Jalla niwjtcan Bitinia yokquin luzquiz pecatača. Jalla nuž pinsan Jesucristužtan Espiritu Santužtan nii yoka luz ana munchičiča. ⁸Jalla nižtquiztan Bitinia yokquin ana luzziča. Antis Misia yokquin watžcu, Troas cjita watja irantičičiča. Jalla nii watjaqui pajk kot tjiiquiz želatča. ⁹Jalla nicju tsjii ween Yoozqui Pablo chjuuzkatchičiča. Chjuuzcan jalla tuž Pabluqui cherčiča, tsjii Macedonia wajtchiz žoňi cherčiča. Tsijtsi želatča. Nižaza rocatča, tuž cjan: “Macedonia yok kjutňi kajkžcalla amqui. Yanapt'alla”. ¹⁰Jalla nuž wiiquin chjuužcuqui Pabluqui tjaczičiča Macedonia ojczjapa. Nižazakaz wejrnacmi tjaczinča Pablužtan ojczjapa. Ultimupanž Yoozqui wejrnaca kjawziča, nawjk ojklajajo liwriiňi taku paljayajo.

PABLUŽTAN SILŽTAN FILIPOS CJITA WAJTQUIN OJKTA

¹¹ Jalla nekztanaqui Troas wajtquin tsjii warcu zalazzinča. Nekz luzcu ojkcchinča. Nii pajk kot taypiquiz tsjii kolta yoka želatča, Samotracia cjita. Jalla nii tirichuc ojkcchinča. Niiž jaka tažuqui Neápolis cjita watja irantichinča. ¹² Jalla nekztan ojkcchinča Filipos cjita watja. Nii watjaqui tuquitanpacha romano cjita wajtchiz žoñinacaž julžtatača. Jalla Macedonia yokquin nii watjaqui tsjan chekan pakjitača yekja watjanacquiztanaqui. Jalla nicju tsjii kjaž maj kamchinča. ¹³ Tsjii jeejz tjuñquiz wajtquiztan ulanchinča, nižaza puj atquin. Jalla nicju žoñinacaqui ajcñitača, Yoozquin mayizi. Jalla nuž žejlcan wejrnacqui julzinča. Nekztanaqui liwriñi Yooz taku palt'ican, nii ajczi maatakanacžquiz paljajchinča. ¹⁴ Tsjaa maatakui Lidia cjititača. Naaqui Tiatira cjita wajtchiz žon-tača. Nižaza naaqui fin murat telanaca tuyañtača. Naa žonqui Yoozquin walja kuz tjaachintača. Jalla nuž cjen, Yoozqui naaža kuzquiz Pabluž čhiita taku catokskatchiča. ¹⁵ Jalla nižtiquiztan naa žonqui bautistatača naaža familianacžtanpacha. Nekztanaqui wejtnacaquiz roct'ichinča, tuž cjan:

—Ančhucqui ultimupan wejrqui Jesucristužquin criichinčataqui cjičhaj niiqui, wejt kjuyquin tjonžcalla alujazjapa. —Nuž roctiquiztan naaža kjuyquiz wejrnacqui alujazzinča.

¹⁶ Tsjii noojiqui wilta Yoozquin mayiziz yokquin ojkan, wejrnacqui tsjaa zajriž tanti turatan zalchinča. Naa turqui ariwiñi zizzintača. Naaqui patrunž manta payiñtača. Jalla nižtiquiztan walja paaz ganiñtača naaža patrunžjapa. ¹⁷ Naa turqui Pablužquiz nižaza wejtnacaquiz apžni kallantichinča. Jalla nuž apžcan kjawiñtača, tuž cjan:

—Tii žoñinacaqui arajpach Yooz sirwiñiča. Nižaza ančhucaquiz liwriñi Yooz taku paljajniča. —Jalla nuž kjawcan čhiichinča.

¹⁸ Zapuru nižta kjawcan wejtnacaquiz apzniñtača. Jalla nižtiquiztan Pabluqui naažajapa tsjii zkoluc žawjznawcž cjetča. Jalla nuž cjen naaža kjutni quejpžcu cherziča. Nižaza naa tanñi zajrižquiz čhiichiča, tuž cjan:

—Zajra, Jesucristuž tjuuquiz am ulna cjiwča taa turaquiztan.

Jalla nii orapacha nii zajraqui naa turaquiztan ulanchiča.

¹⁹ Jalla nižtiquiztan naa tura patrunanacaqui naaža ariwiñiquiztan ana iya paaz gani atchiča. Jalla nuž cjetča nii patrunanacaqui. Jalla nižtiquiztan ninacaqui Pablužtan Silžtan tanchiča. Nekztanaqui pajk plazquin chjitchiča nii wajt pajk jilirinacž yujcquin.

²⁰ Juez jilirinacžquin prisintiskatchiča, tuž cjan:

—Tii judío žoñinacaqui učum žoñinaca aptjapča. ²¹ Nižaza ninacž tsjemat cuzturumpinaca tjaajinča. Jalla nii cuzturumpinaca učumqui anaž catokz waquiziča. Nižaza ana niicama kamz waquiziča. Lii quintrača. Učumnacaqui roman žoñinacčumča.

²² Jalla nuž čhiitiquiztan nii wajtchiz žoñinacaqui Pabluž nižaza Silž quintra tjojtichiča. Nižaza nii juez jilirinacaqui mantichiča, ninacž cujtta zquiti chjojkžinajo, nekztan paržtan wjajtajo. ²³ Jalla nuž walja wjajtžcu, carsilquiz chawjčchiča. Nižaza nii carsila itžni žoñi mantichiča, ninaca zuma wijilajo. ²⁴ Jalla nuž mantitiquiztan, nii carsila itžni žoñiqui ninaca carsil kjuył majčchiča, nawjk c'utžjati. Jalla nekzi pajk mazu madera želatča, niiqui žoñi castics maderapantača. Nii maderquiz ninacž kjojcha majčžinchiča.

²⁵ Jalla nuž cjenami chica arama Pablužtan Silžtanaqui Yoozquin mayizican želatča. Nižaza Yooz wirsu itscan želatča. Jalla nuž mayizan, nuž itsan, nii parti carsilquiz chawjcta žoñinacaqui nonziča. ²⁶ Jalla nekztanaqui tiripintit tsjii tembloraž tjonchi. Nekztan nii carsil yokanacami pirkanacami liwj chekjinskatchiča. Jalla nuž chekjintiquiztanaqui tjapa nii carsil zananacami justokaz cjetsiča. Nižaza nii preso žoñinacž čejlta carinanacami justokaz jersiča. ²⁷ Jalla nižta watžcu, carsil itžni žoñiqui tjaji wajsiča. Nii carsil zananaca cjetsi cheržcu, “Pris žoñinacaqui atipchiž caa” nuž cjan pinsichiča. Jalla nuž pinsiscu, niij pajk cuchillu jwessiča, cuchillžtan persuna conzjapa.

²⁸ Nekztanaqui Pabluqui kjawchiča, tuž cjan:

—Anam persunpacha čhojrichaquiča. Tjapa chawjcta pris žoñinacami tekz žejlča.

²⁹Jalla nekztanaqui nii carsila itzñi žoñiqui micha tjeesnaj cjichiča. Nekztanaqui carsil kjutñi zati pariju luzziča, walja tsucchi chekjincan. Nekztan Pabluž Silž kjojchquiz tuzi t'oksiča. ³⁰Nekztanaqui zancu jwescu, pewcziča, tuž cjican:

—Jilanaca, wejr liwriita cjisjapa, ħčhjulut wejr paaz waquizasaya?

³¹Pablužtan Silžtanaqui kjaaziča, tuž cjican:

—Jesucristo Jiliržquiz tjapa kuztan criya. Jalla nuž cjenauqui liwriita cjequiča am familianacžtanpacha.

³²Jalla nekztanaqui Pablo Silasqui nižquizimi niž kjuy familianacžquizimi Yooz taku paljaychiča. ³³Nii weenpacha nii carsila itzñi žoñiqui ninacž ħhjojri awjžinchiča. Jalla nekztanaqui niimi tjapa familianacami bautista cjissiča. ³⁴Nekztanaqui nii carsila itzñi žoñiqui Pablužtan Silžtan jalla ninaca ħhjtchiča persun kjuya. Niž kjuyquin ħjeri tjaachiča. Nii žoñiqui familianacžtanpacha walja cuntintutača Yoozquin criiču.

³⁵Nii wenziqui juez jilirinacaqui zultat policianaca mantichiča carsilquin, Pablužtan Silžtan cutz ortinžtan cuchanchiča. ³⁶Ninacž carsilquin irantitan, nii carsila itzñi žoñiqui Pablužquiz cjichiča:

—Nii juez jilirinacaqui wejtquin ortina apayžquichiča, ančhuc cutznajo. Nižtiquiztan ančhucqui jazic liwriič okaquiča.

³⁷Pabluži nii zultat policianacžquiz paljaychiča, tuž cjican:

—Wejrnacqui roman parti žoñinacžča. Tjapa tii wajtquiz žejlñinacž yujcquiz wejrnaca wajtchiča, ana wejtnacaquiz zumpacha pewcžu. Nekztanaqui inapacha wejrnac carsilquiz majcchiča. ħJaziqui ančhucqui wejrnaca ħhjojzaka cuts pecya? ħAnaž cjesača! Antiz ninacaj persuna wejrnac tii carsilquiztan jwesi tjonla.

³⁸Nekztanaqui nii policianacaqui ojkcžu nii juez jilirinacžquiz tjapa nii puntuquiztan quint'ichiča. Pablužtan Silžtan roman parti žoñinacquiztan, jalla nii quintu ziczu, ancha tsucchi cjissiča. ³⁹Jalla nižtiquiztan pertuna mayizi ojkcchiča. Nekztanaqui nii jilirinacaqui tjonžcu jwessiča. Nekztan Pablužquizimi Silžquizimi rocchiča, tuž cjican:

—Tii wajtquiztanž ulna.

⁴⁰Jalla nekztanaqui carsilquiztan ulanžcu Pablužtan Silžtan Lidia kjuya ojkcchiča. Jalla nekztanaqui criiči jilanaca ħeržcu, “Tjurt'iñi kuzziz cjee ančhucqui” cjican ħižinchiča. Nekztanaqui ojkcchiča.

17

ŽOÑINACAŽ APTJAPŽTA TESALONICA WAJTQUIN

¹Jalla nekztanaqui wila ojkcchiča, Pablužtan Silžtanaqui. Anfpolis nižaza Apolonia jalla nii yokanaca watchiča. Nekztanaqui Tesalónica cjita pajk watja irantichiča. Jalla nekzi tsjii judionacž ajc kjuya želatča. ²Nii wajtquin Pabluqui nii acj kjuyquin ojkcchiča, niž cuzturumpi jaru. Tsjii ħhjep jeejz tjuñinacquiziqui Pabluqui nii ajcžni žoñinacžquiz paljaychiča, nii tuquitan cjirra Yooz tawk jaru. ³Yooz tawkquiztan tjaajinchiča Jesucristuž puntuquiztan, tuž cjican:

—Jesucristuqui sufrispantača, niž ticzcama. Niž ticziquiztan jacatatspantača. Nii Jesusapachača Yooziž cuchanžquita Cristuqui. Jalla nuž ančhucquiz paljayuča.

⁴Jalla nii paljaytiquiztan yekjap judionacaqui Jesucristužquin criičiča. Nekztanaqui ninacaqui Pablužtan Silžtan juntu cjissiča. Nižaza walja griego parti žoñinacaqui Jesucristužquiz criichizakazza. Tuquiqui Yooz Ejpkaž sirwichiča. Nižaza walja rispitta maatakanacaqui Jesucristužquin criichizakazza. ⁵Jalla nuž cjen ana criiči judionacaqui ancha iñiziñi cjissiča. Nekztanaqui nii ana criičinacaqui yekjap ñejo kuzziz žoñinaca juntjapchiča, Pabluž Silž quintra parlizjapa. Nekztanaqui ninacaqui juc'anti žoñinaca juntichiča. Nii žoñinaca juntižcu, žoñinaca aptjapchiča Pabluž Silž quintra. Nekztanaqui tjapa nii quintra aptjapžni žoñinacaqui Jasonž kjuya ojkcchiča. Jalla nuž ojkcžu, nii kjuya muyuntichiča, Pablo Silas kjurcan. Nii pucultan žoñinaca jwes pecatča, parti žoñinacžquiz intirizjapa. ⁶Pero Jasonž kjuyquiz Pablo Silas ana watchiča. Nižtiquiztanaqui nii quintra žoñinaca Jason tanchiča, nižaza yekjap nekž žejlñi jilanacžtan.

Nekztanaqui nii criichinacaqui chjichtatača wajt jilirinacž yujcquin. Nii jilirinacž yujcquiz želan, nii quintra žoñinacaqui altu joržtan chiichiča, tuž cjan:

—Tii žoñinacaqui jakziquin ojktčhaja, nekž žejlñi žoñinacž kuz turwayskatčha. Jalla tinacaqui tekz tjonchizakazza, ana wal kamaña quejpskatzjapa. ⁷Jasonqui niiž kjuyquiz Pablo Silas alujchitakalča. Nižaza tinacaqui cjiča, yekja chawc jiliri žejlča, Jesusa cjita. Nužkaz cjiča tinacaqui. Jalla nuž cjenauqui niiqui ancha učhum lii quintrača, nižaza učhum roman chawc jilirž quintrača. —Nuž cjan quintra chiichiča.

⁸ Jalla nuž nonžcu, tjapa nii wajtchiz žoñinacami jilirinacami walja žawjchiča.

⁹ Ultimquiziqui Jasonqui niiž mazinacžtanpacha tsjii wali printa tjaachiča, ninaca cutta cjevajo.

PABLUŽTAN SILŽTAN KAMTA BERA CJITA WAJTQUIN

¹⁰ Jalla nii nooj weenpacha criichi jilanacaqui Pablužquiz Silžquiz nii wajtquiztan ulanskatchičha. Nekztan Berea cjita watja ojkičiča. Jalla nicju irantižcu, judionacž ajcz kjuya luzziča. ¹¹ Jalla nii judionacaqui tsjan zuma kuzziztača nii Tesalonic wajtchiz judionacžquiztan. Tjapa kuztan Yooz taku catokñitača. Nižaza zapuru ninacaqui tuqita cjiirta Yooz taku liižcu liižcu zumpacha tantiichiča, nii Pabluž Silas chiita taku, werara ana werara, jalla nii zizjapa. ¹² Jalla nižtiquiztan walja nii judionacaqui Jesucristužquin criichiča. Nižaza walja griego parti žoñinacaqui criichizakazza, rispitta luctakanacami maatakanacami criichizakazza. ¹³ Jalla nekztanaqui nii Tesalónica wajtchiz judionacaqui nonziča, Pabluqui Berea wajtquin Yooz taku paljayñi ojkičiča. Jalla nii quintu zizcu, Berea watja ojkičiča. Jalla nicju ninacaqui žoñinaca žawjwaž zjijcanchičha, Pabluž quintra. ¹⁴ Jalla nuž cjen cjen nii criichi jilanacaqui ana enenskatžcu Pablo cuchanžquichiča pajk kot kjutñi. Silžtan Timoteožtan, jalla ninacazti Berea wajtquiz eclichitača. ¹⁵ Nekztanaqui Pablužtan cumpant'iñi žoñinacaqui Pablo chjitchičha Atenas cjita watja. Jalla nekztanaqui quejžquichiča tii takunacžtan: “Silžtan Timoteožtan, jalla ninacaqui Pablužquin apura irantiz wauquiziča”, cjan.

PABLUŽ KAMTA ATENAS CJITA WAJTQUIN

¹⁶ Nekztan Pabluqui Silas Timoteo tjewsnatčha. Atenas cjita wajtquiz žejlcan, wacchi žoñiž paata yooznaca cherchiča. Nii wajtquiziqui jakzimi žoñiž paata yooznacapanikaz želatčha. Jalla nuž cheržcu niiž kuzquiz ancha sint'ichiča. ¹⁷ Jalla nižtiquiztan Pabluqui judionacž ajcz kjuyquin paljaychiča. Judionacžquizimi Yooz rispitiñi žoñinacžquizimi paljaychiča. Nižaza zapuru pajk plazquin paljaychiča, ojklayñi žoñinacžquiz. ¹⁸ Jalla nii plazquiz tsjii istutiñinaca želatčha. Parti nii istutiñinacaqui Epicúreos t'akquiztantača. Parti nii istutiñinacazti Estoicos cjita t'akquiztantača. Jalla ninacaqui Pablužquiz paljaychiča. Nekztanaqui yekjap istutiñinacazti cjichiča:

—ŽJaknužkat tii žoñic chiichani, waljaž chiča pero? ŽčJulut intintiskatz pecjo?

Yekjap istutiñinacazti cjichiča:

—Niiča yekja yooznacž puntuquiztan paljayñiqui.

Pabluqui Jesusiž puntuquiztan nižaza ticzquiztan jacatatz puntuquiztan chiichiča. Jalla nuž chiitiquiztan nii istutiñinacaqui nižta chiichiča. ¹⁹ Nekztanaqui nii istutiñinacaqui Pablo chjitchičha tsjii Areópago cjita yokquin. Jalla nicju ajczñitača parlizjapa. Nekztan Pablužquiz chiichiča tuž cjan:

—Nawjctan amqui tsjii ew tjaajintanaca zjijcchamčha. Jalla nii ew taku ziz pecučha wejrnacqui. ²⁰ Amqui tsjemat istrañchuc takunaca chiichiča. Kjažt cjii nii takunacaya, jalla nii intintaz pecučha wejrnacqui.

²¹ Nii Atenas wajtchiz žoñinacaqui nižaza nii parti wajtquin kamñi žoñinacaqui čjul ew takunacami nonzkaz pecatčha. Nižaza čjul ew takunacami chiiz kaz pecatčha. Jalla nii ew takunacquizkaz ninacž kuz tjaañitača.

²² Jalla nii Areópago yokquin Pabluqui ninacž taypiquin tsjitsičha. Jalla nuž tsjitscu, tuž cjichiča:

—Atenas wajtchiz žoñinaca, ančhucqui wacchi yooznaca rispitiñchucča, jalla niil cheručha. ²³Tii wajtquiz ojklaycan, wejrqui ančhuc silunaca cherchinča. Nižaza tsjii silquin cherchinča tuž cjjirta: “Tii siluqui ana pajta Yooz sirwizjapača”. Nii ana pajta Yooz ančhucqui rispitiča, ana pajžcupacha. Jalla nii ana pajta Yooz puntuquiztan chiyučha.

²⁴Nii Yoozqui tii muntu paachiča, nižaza tjapa tii muntuquiz žejlñi cusasanaca. Jaziqui arajpachquinami yokquizimiž mantiča. Nii Yoozqui žoñinacž kjuyta timplunacquiz ana kamča. ²⁵Anaž čhjulumi pecča, žoñiž sirwita paataqui. Niipachaž zapa maynižquiz žeti tjaača, nižaza quera atquiztan jeejsjapa tjaača, nižaza tjappacha tjaača žoñinacžquiz.

²⁶Tsjii lucutiñi žoñžquiztan tjapa tii muntuquiz žejlñi žoñinaca tjonkatchičha Yoozqui, tjapa kjutñi tii muntuquiz kamajo. Nižaza žoñinacž žejtz timpumi ticz timpumi, jalla nii Yoozpachaž mantiča. Nižaza jakziquin tsjii žoñiqui kamlaja, jalla niimi zakaz mantiča Yoozqui. ²⁷Jalla nuž mantičiča Yoozqui, žoñinaca nii kjurajo, nižaza wachajo. Ultimupanča Yoozqui učumnacaquiztan anaž ažkquin žejlča. ²⁸Yooziž cjen učumqui žejtča, nižaza ojklayča. Jalla nižtakaz yekjap ančhucquiztan cjjirčiča, tuž cjican: “Yooziž paatača učumqui”. ²⁹Nekztanaqui učumqui Yooz paatiquiztan, učumlaqui anaž pinsis waquiziča, tuž cjican: “Ultim Yoozza žoñiž paataqui, korquiztan, paazquiztan, mazquiztan, jalla nižta žoñiž paataqui”. ³⁰Tuqui timpuqui žoñinacaqui Yooz puntuquiztan ana zumpacha zizziča. Jalla nuž cjen Yoozqui žoñinacž uj awantičičha. Anziqui tjapa tii jazta žoñinacžquiz mantičiča, tuž cjican: “Persun uj pajžcu, kuzza campiya”. ³¹Nekztanaqui Yoozqui tsjii tjuñi utčiča, tjapa tii muntuquiz žejlñi žoñinaca werara pjalzjapa. Tsjii Yooziž illzta žoñiqui tjapa žoñinaca pjalaquičha, Yooz Ejpž cuntiquiztan. Yoozqui nii illzta žoñi ticziquiztan jacatatskatchičha. Jalla nižtiquiztan Yoozqui kjanapacha tjeeziča, nii žoñiqui illztatača pjalnijapa, jalla nii. Jaziqui nižquin cryya. —Nuž paljayčiča Pabluqui.

³²Jalla nii ticziquiztan jacatatchi quinto nonžcu, yekjapanacaqui tjassiča. Yekjapanacazti cjjičičha:

—Tii jarquin tii amiž chiita puntuquiztan wilta nonznačhani.

³³Jalla nekztanaqui Pabluqui ninacžquiztan ojkičiča. ³⁴Yekjapanacazti Pablužquiz apziča, niž taku criižcu. Ninacžquiztan tinaca želatča: Dionisiotača tsjiiqui, nižaza niiqui Areópago cjita t'akquiztantacha. Nižaza Dámaris cjiti tsjaa maatak žonqui criichintača. Nižaza tsjii kjaž iya žoñinacaqui criičičha.

18

PABLUŽ KAMTA CORINTO CJITA WAJTQUIN

¹Wiruñaquí Pabluqui Atenas wajtquiztan ulančiča. Corinto cjita watja ojkičiča. ²Jalla nicju tsjii judío žoñžtan zalčiča. Nii žoñiqui Aquila cjitatača. Ponto yokquiztan tjonchitača. Niiž tuquiqui Claudio cjita chawc jiliriqui mantičiča tjapa judío žoñinaca Roma wajtquiztan ulnajo. Jalla nižtiquiztan Aquilaqui Italia yokquiztan ulanspantača, niž tjunatanpacha, Priscila cjiti. Ninacžquin Pabluqui tjonžñi ojkičiča. ³Pablužtan ninacžtan tsjii oficiuchiztača, tultu kjuya paañitača. Jalla nižtiquiztan Pabluqui ninacžtan kamčiča junto nii tultu kjuya langzjapa. ⁴Zapa jeejz tjuñquiz Pabluqui judionacž acjz kjuya ojknitača. Jalla nicju judionacžquiz Yooz taku paljayñitača, nižaza ana judío žoñinacžquizimi. Zuma razunchiz tawkžtan paljaychipanča ninacaž zumpacha intintazñi cjisnajo.

⁵Nekztan Silžtan Timoteožtan Macedonia yokquiztan irantižquičičha. Nekztanaqui Pabluqui Yooz takupanž paljayatča. Yekja langžñijapa timpu ana želatča. Nižaza Pabluqui judío žoñinacžquiz kjanacama intintiskatchičha, Jesusaqui ninacaž tjewžta Cristučha, jalla nii. ⁶Nii judío žoñinacazti quintra cjsičiča Pablužjapa. Nižaza niž quintra anawalinaca chičičiča. Jalla nižta niž quintra chiitiquiztan Pabluqui niž zquiti tsajtsajtsinčiča, ninacž quintra tsjii siñala cjeajajo. Nižaza cjjičičha:

—Ančhucqui infiernuquinž tjojttaž cjequiča, liwriiñi Yooz taku ana nonzinčucča, nekztan. Jalla nuž castictaž cjen, ana wejtquiz uj tjojtNASAča. Ančhucqui kuzinpan Yooz taku ana criiz pecča. Tonjtan nawjcchuc wejrqui yekja wajtchiz žoñinacžquin okača, ninacžquin liwriiñi Yooz taku paljayžcača.

⁷Nekztanaqui nii ajcz kjuyquiztan ulanžcu tsjii Justo cjita žoñž kjuya ojkcchiča. Nii žoñiqui Yooz sirwiñitača, nižaza ajcz kjuy latuquiz kjuychiztača. Jalla nekz žejlñitača.

⁸Nii ajcz kjuy jiliriqiu Crispo cjitatača. Niiqiu niiž familianacžtanpacha Jesucristužquin criichiča. Nižaza walja Corinto wajtchiz žoñinacaqui Yooz taku nonžcu criichiča. Nekztanaqui bautista cjišiča. ⁹Jalla nekztanaqui tsjii ween Yooz jiliriqiu Pablo chjuuzkatchiča. Nii chjuužtquiztan Yoozqui Pablužquiz cjičiča:

—Ana eksna amqui. Tirapan Yooz taku parla. Yooz taku paljayñi langzquiztan ana jayta. ¹⁰Wejrqui amtan chicapachača. Anaž jakziltami amquiz tani atasacača, ana wali paazjapaqui. Nižaza tii chawc wajtquiz muzpa žoñinacaqui wejtquin criyaquiča.

¹¹Jalla nuž chjuuzcu Pabluqui nii Corinto wajtquiz tsjii wata tirezchiz kamchiča, Yooz taku tjaajincan.

¹²Jalla niiž wiruñ judío žoñinacaqui Pabluž quintra tsjii kuzziz ajcziča. Nekztanaqui Pablo tanžcu, chawc jilirž yujcquin chjitchiča. Galión cjitatača nii Acay yok jiliriqiu.

¹³Jalla nuž chjichcu, nii chawc jiliržquiz cjičiča:

—Tii žoñiqui učumnaca lii quintraž ojklajča. Tiiqiu žoñinacžquiz ana wal tawkžtan intintiskatča, niiž Yooz sirwizjapa. Pero niiž Yooz sirwizquiu učumnaca lii quintrača.

¹⁴Pabluž chiyawc cjen Galión cjita jiliriqiu judionacžquiz paljayčiča, tuž cjian:

—Judío žoñinaca, tii žoñiqui ana wejtnaca lii quintra paachiča. Nižaza ana chawc uj paachiča. Tsjii anawali paatasacača, nekztan ančucaž quijta razuna nonžtasacača. ¹⁵Tii asuntuquiu ančuca takucamakazla; nižaza žoñž tjuu puntuquiztan parlakazla; nižaza ančuca liiquiztankazla. Jaziqiu ančucporož parlasa; nižaza ančucporož kjažmi arreglasa. Wejrqui anal tii ančuca lii puntuquiztan arreglis želuča.

¹⁶Jalla nekztanaqui nii jiliriqiu nii žoñinaca tjirkatchiča niiž oficinquiztan. ¹⁷Nii ajcz kjuya jiliriqiu Sóstenes cjitatača. Jalla niiča quijchiqui. Jalla nuž nii jilirž tjirkattiquiztan, tjapa nii wajtchiz žoñinacaqui nii quijñi žoñžtan kichi tansiča, jalla nekzpacha, nii jilirž yujcquizpacha. Nii Galión cjita jilirizti nuž kichjasanami ana impotičiča.

PABLUQUI ANTIOQUIA QUEJPCHIČHA

¹⁸Nekztanaqui Pabluqui iyapan kamchiča. Nekztan nii criichi jilanacžquiz “Okuča” cjian ulančiča. Nekztanaqui tsjii warcu zali ojkcchiča, Siria yoka ojczjapa. Priscilatan Aquilžtan chica ojkcchiča. Cencrea cjita wajtquiz, ima warcuquiz luzcan, Pabluqui niiž ach chara k'ala murchiča, tsjii compromitta cuzturumpi cumplisjapa. ¹⁹Nekztanaqui warcuquiz ojkcžcu, Efeso cjita watja irantichiča. Jalla nicju Pabluqui Priscilatan Aquilžtan, jalla ninaca ecchiča. Nekztan Pabluqui judionacž ajcz kjuya ojkcchiča. Jalla nicju nii ajczñi judionacžtan parličiča. ²⁰Nekztanaqui nii judionacaqui Pablo roct'ičiča, iya tsjii kjaž majžtan kam'ajo. Pabluzti ana munchiča. ²¹Jalla nekztan ima ninacžquiztan ojkan, Pabluqui cjičiča:

—Jerusalén watja irantistanča, pijjsta paazjapa. Pero Yooz munanaqui wejrqui quejpžcača ančucatan wilta zali.

Jalla nuž chiižcu, warcuquiz luziča. Nekztanaqui Efeso wajtquiztan ojkcchiča. ²²Nekztanaqui Cesarea cjita watja irantižcu, Pabluqui warcuquiztan ulančiča. Jalla nuž ulanžcu Jerusalén watja ojkcchiča, criichi jilanacžquin zaljapa. Nekztan Antioquia wajt kjutñi ojkcchiča. ²³Jalla nekz tsjii kjaž tjuñi kamžcu, wilta ojkcchiča. Galacia nižaza Frigia yokanacaran ojklajčiča. Jalla niiran iclizquiztan icliza ojklajčiča, criichi jilanaca tjurt'iñi kuzziz cjisatjapa.

APOLOS CJITA YOOZ TAKU PALJAYÑI

²⁴Jalla nii timpuqui tsjii judío žoñiqui Efeso cjita watja irantichiča. Apolos cjita tjuychiztača. Niiqiu Alejandria pajk wajtchiz žoñitača. Nižaza niiqiu Yooz taku walja

zuma paljayñitača. Nižaza cjiirta Yooz taku zumaž zizatča. ²⁵Nii Apoložquiz Yooz kamañ puntu walja tjaajintatača. Jaziqui walja tjapa kuztan Yooz taku parliñitača. Juanž bautistakaz cjenami Jesucristuž puntuquiztan walja kjana tjaajinchiča. ²⁶Nekztanaqui Efeso wajtquiz žejlcan, Apolosqui ajcz kjuyquiz tjurt'iñi kuzziz tsijtsiča, Yooz taku paljayzjapa. Niiž paljayta taku nonžcu, Priscilatan Aquilžtan jalla ninacaqui tsjii latu Apolos chjitchiča, Yooz kamaña puntu tsjan kjana tjaajinzjapa. ²⁷Jalla nekztanaqui Apoložquiz Acaya cjita yokaran ojklaz pecatča. Jalla nuž cjen jilanacaqui walja apoychiča, nižaza tsjii carta credencial apaychiča nii yokquin žejlñi jilanacžquiz, ninaca zuma risiwajo. Nii yokchiz jilanacaqui Yooz okzñiž cjen criichiča. Acaya irantiscuqui Apolosqui nii criichi jilanacžquiz zuma tjaajinchiča. ²⁸Nižaza zuma razunquiztan chiican, tjapa žoñinacž yujquiz nii quintra judionacž pinsitanaca tjeeciča, anapan zumaž ninacž razunaqui. Ninaca atipchiča. Nii quintra judío žoñinacaqui ana kjaž cjii atchiča. Cjiirta Yooz tawk jaru intintiskatchiča, Jesusaqui ninacaž tjewzta Cristučha, nižaza Yoozquiztan cuchanžquita Cristučha, jalla nii.

19

PABLUŽ KAMTA EFESO CJITA WAJTQUIN

¹Acayquiztan quejpžcu, Apolosqui Corinto wajtquiz želatča. Pabluzti curunac yoka watžcu, Efeso watja irantichiča. Jalla nicju tsjii kjaž Yoozquin criichi žoñinacžtan zalchiča. ²Jalla nuž zalžcu, Pabluqui pewcziča, tuž cjican:

—¿Ančhuc criiz oraqui Espiritu Santuqui ančhuca kuzquiz luzzikay?

Ninacaqui kjaaziča, tuž cjican:

—Anaž. Nii Espiritu Santo puntuquiztan anawira nonzinča.

³Jalla nižtiquiztanaqui Pabluqui pewcziča, tuž cjican:

—Ančhucqui, ¿chjul bautismo tanzinčhuctaya?

Ninacaqui kjaaziča:

—Juanž bautismo tanzinča —cjican.

⁴Nekztanaqui Pabluqui cjichiča:

—Walikazza. Juanqui kuz campiiñi žoñinacžquiz bautisñitača. Pero nii Juanž wirquin tsjiiqui tjonchiča. Jalla niičha Jesusaqui. Niiqui Yooz Ejpžquiztan cuchanžquita Cristučha. Jalla nižquin criiz waquiziča. Jalla nižtakaz Juanqui žoñinacžquiz chiižñitača.

⁵Jalla nii taku catokžcu, nii žoñinacaqui Jesucristo Jilirž tjuuquiz bautistatača.

⁶Nekztanaqui Pabluqui ninacž juntuñ kjaržtan lančiča. Jalla nuž lanžnan Espiritu Santuž tjonchiča. Jalla nižtiquiztan yekja takunacžtan parli kallantichiča. Nižaza Yooziž zizkatta puntunaca parličičha. ⁷Jalla ninacaqui tsjii tuncapan žoñinacatakalča.

⁸Chjep jiiz Pabluqui jalla nicju kamchiča. Jalla nuž kamcan ajcz kjuya ojknipantača. Nii ajcz kjuyquin zuma tjurt'iñi kuzziz paljayñipantača, Yooz mantita kamañ puntuquiztan intintiskatcan. ⁹Yekjap žoñinacžti wira ana criichipanča. Ninacaqui chojru kuzziz cjissiča. Yooz kamañ quintra parličičha. Jalla nižtiquiztan Pabluqui ninacžquiztan zarakchiča. Nižaza criichi žoñinaca chjitchiča tsjii escuela kjuyquin. Nii escuelaž žoñiqui Tiranno cjita tjuuchiztača. Jalla nicju Pabluqui tjaajinchiča zapuru. ¹⁰Jalla nuž tjaajinacanaqui pizc wata kamchiča. Jalla nižtiquiztan tjapa nii Asia provincia yokquin kamñinacaqui Jesusa Jilirž liwriñi quinto nonchiča. Judío žoñinacami, nižaza ana judío žoñinacami nii quinto nonchiča. ¹¹Nižaza Yooz aztan Pabluqui wali pajk milajrunaca paachiča. ¹²Jalla nižtiquiztan žoñinacaqui pañumi zquitimi Pablužquiz lanskatčičha. Jalla nuž lanskatžcu, nii pañumi zquitimi chjitchiča, laa žoñinacžquin. Jalla nižtiquiztan nii laanacaqui chjetintatača, nižaza nii žoñinaca tanñi zajranacami ulanskatchiča.

¹³Tsjii kjaž judío žoñinacaqui ojklayatča, zajranaca chjatkatcan. Jalla nuž chjatkatcan, nii žoñinacaqui Jesusa Jilirž tjuužtan ojklaz pecatča. Nekztanaqui zajranacžquiz cjichiča:

—Zajranaca, ančhuc ulnaj cjiwča, Pabluž parlita Jesús tjuuquiz.

¹⁴ Jalla nižta paachičha pakallawk judfo jilazullcaqui. Ninacz ejpqui Esceva cjita tjuuchiztačha. Niiqui judiuž timplu chawc jiliritačha. ¹⁵ Nii pakallawk jilazullca nižta paan, tsjii žoñi tanñi zajraqui ninaczquiz cjichičha:

—Jesús pajučha. Nižaza Pablo pajučha. Ančhucqui ¿jectčhuctajo?

¹⁶ Jalla nižtiqiztan nii zajra tanta žoñiqui tsjii layžcu ninaczquiz tanzičha, kijchjapa. Nii zajraž tanta žoñiqui walja azziztačha. Jalla nii aztan ninaca atipchičha. Nižaza k'alapacha čhjojritchpančha. Nižtami chjojrichta ana zquitichiz atipachičha. Nekztan k'ala nii liwrunaca ujkatchičha tjapa žoñinacz čheran. Pjijaska tunc waranka pajk ultimu paaz, nuž valorchiztačha nii liwrunacaqui. ¹⁷ Jalla nekztanaqui tjapa nii Efeso wajtchiz žejlñi žoñinacaqui nii quintu zizzičha, judionacami, ana judionacami. Jalla nekztan walja eksnatčha. Nižaza Jesucristo jilirž tjuu walja alawazzičha.

¹⁸ Nižaza walja criichi žoñinacaqui ninacz tuquita persun uj paatanaca pajžcu, kjanacama mazzičha. ¹⁹ Nižaza yekjap žoñinacaqui ima Yoozquin criican, laykican ojklayñitačha. Jalla ninacaqui ninacz layka ojklaz liwrunaca zjijcchičha. Nekztan k'ala nii liwrunaca ujkatchičha tjapa žoñinacz čheran. Pjijaska tunc waranka pajk ultimu paaz, nuž valorchiztačha nii liwrunacaqui. ²⁰ Jalla nekztan nii criichi žoñinacaqui tjapa kjutñi Yooz taku paljayi ojklaychičha. Nekztan tsjan tsjan žoñinacaqui Yooz taku catokchičha.

²¹ Jalla niiž wiruñ Pabluqui niiž kuzquiz Macedonia nižaza Acaya yokanacquin tjonzpanž tantiichičha. Jalla nuž wattan Jerusalén watja irantispañž tantiichičha. Nižaza Pabluqui cjichičha:

—Jerusalén watja ojčkcuqui, wejtlaqui Roma watja irantistančha.

²² Jalla nižtiqiztanaqui Pabluqui pucultan yanapñinaca cuchanchičha Macedonia. Nii pucultanaqui Timoteotačha, nižaza tsjiiqui Erastotačha. Pabluzti tsjii kjaž majjapa elcichičha Asia yokquin.

ŽOÑINACA APTJAPŽTA EFESO WAJTQUIN

²³ Jalla nii timpuqui walja žoñinaca aptjapzičha, Yooz kamañ jicz puntuquiztan paljaytaž cjen. ²⁴ Nii aptjapñi achaqui Demetrio cjitatačha. Jalla niiqui paazquiztan yooznaca paañitačha. Jalla nuž paatiqiztan walja paaz canchičha, nižaza parti nižta paañinacaqui. Diana cjiti žoñiž paata yooz timplu irata jalla nii paachičha ninacaqui. ²⁵ Nekztan Demetrio cjita žoñiqui tjapa nii yooznaca paañi žoñinaca juntichičha, nižaza nižž langzñi mazinaca juntichizakazza. Nekztanaqui tuž cjichičha:

—Jilanaca, ančhucqui zizza. Tii oficiuquiz langzcan, zuma paaz cančha učhum-nacaqui, zuma kamzjapa. ²⁶ Tii Pabluqui ojklayčha, “Žoñiž paata yooznacaqui anačha ultim yoozqui”, cjican. Jalla nuž chiyan, walja žoñinacaqui niiž taku criičha, tii Efeso wajtquinami, nižaza tjapa tii Asia provincia yokquinami. Niiž taku criičcu, učhum yooznacqiztan zarakchičha. Jalla nii quintu nonchinčhucčha, nižaza cherchinčhucčha. ²⁷ Jalla nižtiqiztan tii učhum langznacaqui anat cusa cjisnačhani. Nižaza učhumž cansmi pertisnačhani. Anziqui tjapa tii Asia provincia yokquin žejlñi žoñinacami nižaza tjapa tii muntuquiz žejlñi žoñinacami naa yooz siñuri sirwiñičha. Pero Pabluzž cjen, Diana cjiti pajk yooz siñuri timplumi ana rispittat cječhani.

²⁸ Jalla nuž Demetriuz čhiita taku nonžcu, walja žawjchi cjissičha. Jalla nuž žawjžcu, kjawchičha tuž cjican:

—¡Viva Diana yooz siñura! ¡Viva tii Efeso wajtchiz yooz! —nuž cjican kjawchičha.

²⁹ Nekztan tjapa nii wajtchiz žoñinacz kuz turwayskatchičha. Nižtiqiztan nii wajtchiz žoñinacaqui Gayžtan Aristarcužtan, jalla ninaca kichi tanzičha. Nii pucultanaqui Macedonia yokquiztan Pabluztan chica ojkhitačha. Jalla nii pucultan tanžcu, pajk parliz kjuya chjitchičha. ³⁰ Nižaza Pabluqui nii kjuya luz pecatčha, žoñinaczquiz paljayzjapa. Criichi žoñinacazti Pablo atajchičha, ana luzkatajo. ³¹ Nižaza yekjap Asia jilirinaca želatčha, Pabluz amigonacatalčha. Jalla ninacaqui tsjii žoñi cuchanzquichičha Pabluzquin rocžinajo, nii parliz kjuyquiz ana luzajo. ³² Tampachquiztan juntazcu žoñinacaqui kjawchičha tjapaman razunanaca chiican. Aptjapziž cjen nekztan nižta kjawchičha žoñinacaqui. Ancha pajk ch'awjwa paatčha. Jila manka žoñinacaqui čhjul puntu ajcztažlaja ana zizzičha. ³³ Yekjap

žoñinacaqui nii ajczta puntu zumpacha intintiskatchiĉha Alejandruĉquiz. Nekztan niiqui tucquin tsjitskatchiĉha, nii judionacĉquiztan tjurt'iĉinajo. Nekztanaqui Alejandruqui kjara waytiĉcu ch'uj cjeej cjichiĉha. Nekztanaqui niiqui tjapa Źoñinacĉ yujcquiz tjurt'iĉiñĉ tawkĉtan chiiz pecatĉha. ³⁴ Parti Źoñinacazti Alejandro judfo Źoñi cjican zizcu, wilta kajachiĉha tsjii pizc ora. Tsjii jorĉtan tuĉ cjican:

—¡Viva Diana yooz siñura! ¡Viva tii Efeso wajtchiz yooz!

³⁵ Jalla nekztanaqui nii wajt secretariuqui Źoñinaca ch'uj cjskatĉcu, paljaychiĉha tuĉ cjican:

—Efeso jilanaca, tii pajk yooz Diana siñura timplu tii Efeso wajtchiz Źoñinacĉquiz cumpjiitaĉha. Niĉaza arajpachquiztan tjojtĉquichinĉha taa yooz siñuriqui. Tsjii maz cheechi tjonĉquichinĉha. ³⁶ Jalla nii puntuquiztanaqui anaĉ jecmi nicasaĉha. Jaziqui ch'ujĉha cjee. Ima zuma tantiyazcan anaĉha ĉjulumi paa. ³⁷ Tii anĉuca zjijta Źoñinacaqui ana ĉjulumi chiichiĉha naa Diana siñurijapaqui, anazaĉ naa quintra ĉjulumi paachiĉha. ³⁸ Demetriuĉtan niĉ langĉni mazinacĉtan quijz pecĉhaj niiqui, nijapa juez jilirinaca Źejlĉha. Nii jilirinacĉquinkaz ojkla, nii quija arreglisjapaqui. ³⁹ Tsjii yekja puntu parliz pecĉhaj niiqui, zumpachaĉ ajczcuĉ parla. ⁴⁰ Tii aptjapzi puntuquiztan uĉhum chiiz razunanacaqui ana Źejlĉha. Jaziqui uĉhum gobiernuqui uĉhumnac quintra uj tjojtNASAĉha, tii nooj aptjapztiquiztan. ⁴¹ Tii parlaqui Źerĉta cjila, —nuĉ cjichiĉha nii secretariuqui.

Nekztanaqui Źoñinaca liwj cuchanchiĉha, persun kjuya okajo.

20

PABLUĉ OJKTA MACEDONIA NIĉAZA GRECIA

¹ Jalla nekztanaqui nii aptjapzta Źoñinacaĉ ojktan, Pabluqui criichi Źoñinaca kjawziĉha, ninacĉquiz tjaajinzjapa. Nekztanaqui Pabluqui “Okaz” cjichiĉha, Macedonia yoka ojkszjapa. ² Jalla nii yokquin ojklaycan, criichi jilanacĉquin zuma tawkĉtan ancha p'ekinchaychiĉha, tjurt'iñi kuzziz cjeয়ো. Nekztanaqui Grecia yoka irantichiĉha. ³ Jalla nicju ĉjĉep jiiz Źejlĉhiĉha. Nekztan warcu zalz pecatĉha, Siria yoka ojkszjapa. Warcu tanawc cjen, Pabluqui quinto zizziĉha, judionacaqui niĉ quintra parlassitaquiĉha, jalla nii. Jalla niĉtiquiztan niĉ warcuquiz ojcz cjitaqui nuĉquiz tijsiĉha. Yokaranpacha ojkiĉha. Nekztan Macedonia yoka irantichiĉha. ⁴ Niĉaza Pabluĉtan chica ojkiĉiqui tinacataĉha: Sopatertaĉha (niiqui Berea wajtchiztaĉha), niĉaza Aristarcutaĉha, niĉaza Segundutaĉha (niiqui Tesalónica wajtchiztaĉha), niĉaza Gayutaĉha (niiqui Derbe wajtchiztaĉha), niĉaza Timoteotaĉha, niĉaza Tiquicutaĉha, niĉaza Trofimutaĉha. (Jalla Tiquicuztan Trofimuĉtan Asia provinciquiztantaĉha). ⁵ Jalla nii jilanacaqui wejtnaca tuqui okjaychiĉha. Jalla nuĉ okjayĉcu Troas cjita wajtquin wejrnac tjewziĉha. ⁶ Wejrnacqui ana liwaturchiz t'anta lujlz pjijsa paztan, Filipo cjita wajtquiztan zarakchinĉha tsjii warcuquiz. Tsjii pjijska tjuñquiztan Troas watja irantichinĉha. Jalla nicju kamchinĉha tsjii simana.

PABLUĉ KAMTA TROAS WAJTQUIN

⁷ Dominguqui wejrnacqui ajczinĉha, Santa Cena paazjapa. Jalla nuĉ ajczcu Pabluqui tjaajinchiĉha criichi jilanacĉquiz. Jaka taĉu zarakz cjen, chica aramacama tjaajinchiĉha. ⁸ Wejrnacqui tsewcta pisuquin ajczintaĉha tsjii kjuyquiz. Kjanzjapa wacchi michanaca tjeestataĉha. ⁹ Niĉaza Eutico cjita tjowa ventanquiz julzi Źelatĉha. Pabluĉ aĉkapacha chiyani, nii tjowaqui ancha tjaji tjonkatchiĉha. Nekztan nii ventanquiztan kossuc tjojt-siĉha, ĉjĉep pisu kjuyquiztan. Ticzi waytitataĉha nii tjowaqui. ¹⁰ Nekztanaqui Pabluqui ĉhjijwĉquichiĉha. Nii tjowĉ juntuñ chutjatĉcu Źcojrziĉha. Nekztanaqui parti jilanacĉquin cjichiĉha:

—Anaĉha tsucaquiĉha. Źejtĉha tiiqui.

¹¹ Jalla nekztanaqui Pabluqui wilta yawwchiĉha tsewcta pisuquin. Nekztan Santa Cena paachiĉha. Jalla nuĉ paaĉcu, Pabluqui tirapan parlichiĉha kjantatscama. Nekztan ojkiĉha. ¹² Partinacazti zuma kuzta eclichiĉha. Nii tjowa vivoĉ cjen, cuntintu nii tjowa ĉjitchiĉha.

¹³Nekztanaqui wejrnacqui warcuquiz okjaychinča Asón yokacama. Pabluzti kjojchuñ ojkz pecatča. Asón wajtquiztan Pablo zakaz warcuquiz ojkz tantiichiča. Jalla nuž cjan kaztatača. ¹⁴Nekztanaqui Asón wajtquin Pabluztan zalzinča. Nekztanaqui Pablui wejtnacatan chica warcuquiz luziča. Nekztanaqui Mitilene kjutñi ojkchinča. ¹⁵Mitilenequiztan ojkcan, jaka tažuqui Quío latuquin watchinča. Kat tažuqui Samos cjita watja irantichinča. Nekztanaqui Trogilio cjita wajtquin jeejsassinča. Niž jaka tažuqui Mileto cjita watja irantichinča. ¹⁶Jalla nuž ojkchinča, Asia yokquin ana wacchi tjuñi žejljapa. Efeso wajtquin ana ojkz pecatča. Antiz Jerusalén watja apura ojkz pecatča Pablui. Jalla nicju irantis pecatča ima Pentecostés tjuñi tjonan. Jaknužquiztanami irantisquizpanž pecatča.

EFESO ICLIZ JILIRINACŽQUIN CHIIŽINTA

¹⁷Mileto wajtquiz žejlcan, Pablui Efeso icliz jilirinaca kjawžquñi cuchanchiča. ¹⁸Jalla nii jilirinacaž tjontan, Pablui ninacžquiz tuž chiižinčiča:

—Weriž Asia yokquiz tjontan, nii tjuñquiztanpacha jaknužt ančucatan chica kam-tučhaja, jalla nii ančucqui zizza. ¹⁹Jalla nuž ančucatan kamcan, humilde kuzziz Yooz Jiliržquiz sirwichinča. Nižaza criichi žoñinacžquiztan wejt kuzquiz sint'itiquiztan anča kaachinča, nižaza anča pruebanacami sufrichinča. ²⁰Tsjan zuma kamañchiz cjisjapa ančucaquiz tjapa zumanaca tjaajinčinča, tjup kuzziz. Plazquinami callquinami tjaajinčinča, nižaza ančuca persun kjuyquiztan kjuya tjaajinčinča. ²¹Nižaza judionacžquizimi ana judionacžquizimi paljaychinča wejrqui, tuž cjan: “Ančucqui persun uj pajžcu, kuznaca campiya. Jesucristo Jiliržquin tjapa kuztan criya”. ²²Anziqwi wejrqui Jerusalén watjal okača. Espiritu Santuž mantal okača. Jalla nicju čjulut watačhaja, anal zizuča. ²³Jalla tii puntikal zizuča. Tjapa watjan weriž ojklayan Espiritu Santuquiw wejtquiz chiichiča, tuž cjan: “Amqui carsilquiz chawctam cjequiča. Nižaza ancham sufraquiča”. ²⁴Pero nii mazintiquiztanaqui wejr anal turwasnuča. Tii muntuquiz žejtjapa anaž importiča wejrqui. Wejt wiraquiw anaž chekanaquiw. Jesucristo Jilirž tjaata apóstol cargo, jalla nii cumplistanča chekanaquiw. Yooziž tjaata kamañ jaru ojklayz pecuča, ticzama. Liwriñi Yooz taku parliz pecuča, Yooz zuma okžniča cjan.

²⁵Yooz mantuquiz kamz puntuquiztan ančucaquiz mazzinča. Anziqwi ančucqui wejtan anaž iya zalaquiča tektan nawjccuc. ²⁶Jalla nižtiquiztan ančucaquiz chiyuča, tuž cjan: Anaž jecmi ančucaquiztan wejtquin uj tjojtasača, tuž cjan: ²⁷“Pablui anaž tjapa Yooziž tjaata taku tjaajinčiča” cjanauquiw. Wejrqui tjapa Yooziž tjaata takunaca ančucaquiz mazzinča. ²⁸Jalla nižtiquiztanaquiw ančucqui persunpachquiz cwitaza, nižaza parti ančuca iclizziz jilanaca cwitaquiča ančucqui. Espiritu Santuquiw ančuc jiliržtakaz utiča Yoozquin criichinaca cwitajo, nižaza Yooz tawk čjjeri tjaajo. Nii criichi jilanacž laycu Jesucristo Yoozquiw niž persun ljoc tawkčiča, cruzquiz ch'awčcu. Jaziquiw criichi žoñinacača Jesucristužtaquiw. ²⁹Tsjii zakal zizuča. Weriž ojktan, yekja žoñinacaquiw ančucaquin tjonaquiča ančuc wichanzjapa, nižaza ančuca icliza akskatjapa. Ninacaquiw uzi tanñi kitižtakaz luzcaquiča. ³⁰Nižaza ančucaquiztan toscara chiiñinaca želaquiča tsjii kjutñi criichi jilanaca chjitzjapa toscar tawkžtan. ³¹Jaziquiw ančucquiw zumpacha cwitaza. Wejrqui čjep wata intiru majiñami weenami zapa mayni ančucaquiz tjaajinčinča. Nižaza ančucaquiz chiichiižincan, anča kaachinča.

³²Jaziquiw jilanaca, ančucqui Yoozquin cumpjyuča. Nižaza Yooz zuma taku zumpachaž catoka. Jalla nuž cjan ančucqui tjurt'iñi kuzziz cjequiča. Nekztan Yoozquiztan irinsa tanznaquiča tjapa Yooziž t'akžta žoñinacžtan. ³³Wejrpachača paazmi zquitimi anapan pecchintquiw jecžquiztanami. ³⁴Antiz wejrčha persun kjaržtan langziñtquiw, čjulut pecatučhaja, jalla niijapa, nižaza wejtan chica ojklayñi žoñinacžjapami. Jalla nii puntuquiztanaquiw ančucquiw zumpachaž zizza. ³⁵Jalla nužupan ančucquiw langz waquiziča, t'akjir žoñinacžquiz yanapzjapa. Jalla nuž kjana tjeezinča persuna langzcan. Nižaza Jesús Jilirž chiita taku cjuñzna. Jalla tuž cjiča nii chiičauquiw: “Onanñi žoñinacaquiw juc'ant cuntintuča tanzñi žoñinacžquiztanaquiw”.

³⁶ Jalla nuž chiižcu, Pabluqui quillziča, tjapa nii željñi hermanonacžtan, Yoozquin mayizizjapa. ³⁷ Jalla nektzanaqui tjapa nii jilanacaqui kaachiča Pabluž ojcz cjen. Pablo žcojzriča, nižaza chjulziča. ³⁸ Pabluqui cjichiča:

—Wejrqui okača, jaziqui anaž iya wejr cheraquiča. —Jalla nižtiquiztan nii jilanacaqui ancha llaquita cjišiča.

Jalla nektzanaqui warcu luzcama chica ojkičiča.

21

PABLUQUI JERUSALEN WATJA OJKCHIČHA

¹ Jilanaca eccu, warcuquiz luzzinča. Nekztan Cos cjita yok tirichuc ojkičinča. Jaka tažuqui Rodas cjita yokquin ojkičinča. Jalla niwjtcan Pátara cjita watja ojkičinča. ² Jalla nii Pátara wajtquiztan tsjii Fenicia kjutñi ojkiči warcu zalchinča. Nekztan nii warcuquiz luzcu ojkičinča. ³ Jalla nuž ojkan Chipre cjita yoka ažkquin cherchinča. Chipre yokaqui zkar latuquintača. Tira ojkičinča Siria yoka irantizcama. Tiro cjita wajtquiz kuzi ecz želan, nekztan Tiro watja luzziča. ⁴ Jalla nicju criichi jilanaca kjurchinča, zalañcama. Nekztanaqui ninacžtan kamchinča tsjii simana. Ninacaqui Espiritu Santuž cjen chiikatchiča Pablužquiz, tuž cjican:

—Amqui anatača ojczqui Jerusalén watja.

⁵ Simanaž wattan, Tiro wajtquiztan ulanchinča. Nižaza tjapa nii wajtchiz criichi žoñinacaqui maatanacžtanami ocjalanacžtanami wejtnacaquiz cumpant'ichiča wajtž tjiya. Jalla nicju tsjii k'ara želatča, kot atquin. Nii k'arquiz quillžcu Yoozquin mayizassinča. ⁶ Nekztanaqui zumpacha kjara tansascu, jaljtassinča “Kjažllami okall” cjican. Nekztanaqui wejrnacqui warcuquiz luzzinča. Ninacazti kjuya quejpciča.

⁷ Nekztanaqui Tiro wajtquiztan zarakchinča, Tolemaida cjita watja irantiscama. Jalla nicju criichi jilanacžquin tsaani ojkičinča. Jalla nektzanaqui tsjii nooj kamchinča nii jilanacžtan. ⁸ Niiž jaka tažuqui Pablužtan wejtnacatan ulanchinča. Nekztan Cesarea cjita watja irantichinča. Jalla nii wajtquiz irantižcu Felipž kjuya ojkičinča. Jalla niitača liwriñi Yooz taku parliñiqui jalla nii oficiuchiztača. Niiž tuqui Jerusalenquin pakallaww jilanaca illtatača, Yooztajapa langzjapa. Tsjiiqui nii Felipitača. Jalla niiž kjuyquin kamchinča. ⁹ Nii Felipiqui pajkpaltan ana zalzi tjunmatanacchiztača. Nižaza ninacaqui Yoozquiztan zizta taku parliñi profetanacatača. ¹⁰ Jalla ninacž kjuyquin tsjii kjaž maj kamžcu, tsjii Agabo cjita žoñiqui tjonchiča Judea cjita yokquiztan. Nii žoñiqui Yooz taku parliñi profetatača. ¹¹ Jalla nii žoñiqui wejrnac tjonžni tjonchiča. Nekztanaqui Pabluž jweranta kojch aptičiča. Nii kojchtan persun kjojcha kjara jwersiča tuž cjican:

—Espiritu Santuqui tuž cjiča: “Jalla nižtapacha Jerusalén wajtquin judío žoñinacaqui tii kojch tuyñi žoñi jwernaquiča. Jalla nuž jweržcu, yekja wajtchiz žoñinacžquiz intirjaquiča”. —Nuž cjičiča Agabo cjita profetaqui.

¹² Jalla nuž nonžcu, wejrnacmi nižaza nii Cesarea wajtchiz criichinacami tjappacha Pablužquiz rocassinča ana Jerusalén watja okajo. ¹³ Pabluži kjaaziča, tuž cjican:

—¿Kjažtiquiztan ančhuc kaajo? ¿Kjažtiquiztan ančhuc wejr llaquizkatjo? Wejrqui Jesucristuž cjen listuča čhejlta cjisjapami nižaza Jerusalén wajtquin ticzjapami.

¹⁴ Jaziqui wejtnaca razunžtan Pabluž taku ana atipi atchinča. Jalla nuž cjen ana tira chiichinča. Tiikazza cjičinča:

—Yooz Jilirž munañpaj cjila.

¹⁵ Jalla nektzanaqui ojczjapa tjaczinča. Nekztan Jerusalén wajt kjutñi ojkičinča. ¹⁶ Nižaza yekjap Yoozquin criichi jilanacaqui wejtnacaquiz cumpant'ichiča. Tsjii ninacžquiztan Mnasón cjita žoñi želatča. Niiqui Chipre cjita wajtchiz žoñitača. Ažk wata Yoozquin criichipantača. Niiž kjuyquin alujazjapatača Jerusalén wajtquin.

PABLUQUI JACOBŽQUIZ TJONZIČHA

¹⁷ Jerusalén watja irantižcu, Yoozquin criichi jilanacaqui wejrnac ancha cuntintu risiwt'ichiča. ¹⁸ Niiž jaka tažu Pabluqui wejtnacatan Jacobžquin tjonžni ojkičiča. Jalla

nicju tjapa nii Jerusalén icliz jilirinacaqui želatĉha. ¹⁹Pabluqui jilanacžquiz tsaanzcu, tjap-pacha niiz ojklayta quint'ichiĉha. Yoozqui Pablužquiz wali pajk obranaca paakatchiĉha ana judfo žoĉinacž yokaran ojklayan. Jalla nii quint'ichiĉha Pabluqui. ²⁰Jalla nii takunaca nonžcuqui, Yooz honora ĉhiĉhiĉha. Nižaza Pablužquiz ĉjichiĉha:

—Jila, walikazza niiqui. Nižaza tekzi tsjii kjaž warank judionacaqui Jesucristužquin criichizakazza. Jalla nii zizzamĉha. Nižaza tjapa ninacaqui ĉjichipanĉha, “Moisés lii jaru ojktanĉha” jalla nii. ²¹Nižaza ninacaqui nonziĉha tii quintu: Amqui yekja yokquin kamĉi judionacžquiz tjaajinĉamĉha, “Moisés mantita lii ana cumplis waquiziĉha”, jalla nii. Nižaza ninacaqui am puntuquiztan tuž nonziĉha: Amqui “Lucmajch wawanaca ana chimputa ĉjis waquiziĉha”, ĉjican tjaajinĉamĉha. Nižaza amqui “Uĉhum judfo cuztur-rumpinac jaru ana paaz waquiziĉha” ĉjican tjaajinĉamĉha. Jalla nuž am puntuquiztan nonziĉha tekz žejlĉi hermanonacaqui. ²²Anziĉi nii hermanonacaqui am tjonĉi zizcu ajcznaquiĉha. Jaziĉi, ĉjaknužum ĉjeequi? ²³Amqui jalla tužum paaĉhaj. Tii Jerusalén wajtquiz pajkpaltan žoĉinaca žejlĉha. Ninacaqui compromitta taku cumplistanĉha. ²⁴Amtan ĉhica ninaca ĉjijiĉha. Nekztan ninacžtan ĉhica am uĉhum cuzturumpi paa. Nižaza ninacž gasto pacna, ninaca persun ach ĉhara k'ala murta ĉjisjapa. Jalla nižtiquiztan tjappacha intintiskataquiĉha, amqui uĉhumnaca cuzturumpi ana quintraĉha, jalla nii. Jalla nuž ĉhiĉhiĉinacaqui toscara ĉjitaž ĉjeequiĉha. Ampachazakazim uĉhum lii jaru paaĉha. Jalla nuž intintaquiĉha tjappachaqui. ²⁵Nižaza wejrnacqui nacjuĉta wajtĉhiz ana judfo criichinacžquiz ĉjirĉhinĉha, tuž ĉjican: “Žoĉiž paata yoozquiz wilana jawkta ĉhjizwi anaĉha lujlsqui. Nižaza jora zkenzcu conta animal ĉhjizwimi anaĉha lujlsqui. Nižaza luctakžtanami maatakžtanami anaĉha adulteriuquiz ojklayzqui”. —Jalla nuž Pablužquiz ĉhiĉhiĉha nii icliz jilirinacaqui.

PABLUQUI PRESO TANTATAĉHA

²⁶Jalla nekztanaqui Pabluqui nii pajkpaltan žoĉinaca ĉhjitchiĉha. Niiž jaka tažuqui ninacžtan ĉhica cuzturumpi paachiĉha. Nekztanaqui timpluquin luzziĉha ĉhjulatorat nii cuzturumpi paaz tjuĉinaca žerznaĉhaja, jalla nii mazjapa. Nii cuzturumpi paaz tjuĉinaca žerztan, Pabluqui persunĉapami ninacžtajapami ofrenda tjaastanĉha. Nii puntu zakaz timpluquin mazĉi luzziĉha.

²⁷Nii pakallawc cuzturumpi paaz tjuĉinaca žeržmayataĉha. Jalla nii ora tsjii kjažt judionacaqui želatĉha Asia provinciquiztan tjonĉi. Ninacaqui Pablo ĉerĉhiĉha timpluquiz žejlĉi. Jalla nuž ĉeržcu, ninacaqui tjapa žoĉinaca aptjapĉhiĉha Pabluž quintra. Nižaza Pablo tanzjapa ĉirĉhiĉha. ²⁸Nekztan kjawĉhiĉha tuž ĉjican:

—Israel wajtĉhiz žoĉinaca. Yanapt'alla. Tiiĉha anawal žoĉiĉi. Tiiĉi tjapa kjutĉi ojklayan, žoĉinacžquiz tjaajinĉha uĉhum naciĉn quintrami, nižaza Moisés lii quintrami, nižaza tii timplu quintrami. Nižaza anziĉi tii timpluquiz ana judfo žoĉinaca ĉhjitchiĉha. Jalla nižtiquiztan tii Yooz timplu quintraž paaĉha. Uĉhum alajakazza tii arajpach Yooz timpluquiz luzpanqui. Ana judfo žoĉinacaqui ana luztanĉha. —Jalla nuž kjawĉhiĉha Pabluž quintra.

²⁹Niiž tuquilla Pabluqui Trófimo ĉjita žoĉžtan želatĉha. Trofimuqui Efeso wajtĉhiz žoĉitaĉha. Niiž pucultan ĉhica ĉeržcu, nii judfo žoĉinacaqui tuž pinsatĉha, Pabluqui timpluquin nii Trófimo ĉhjitchižlani, ĉjican. Jalla nižtiquiztan Pabluž quintra kjawĉhiĉha.

³⁰Tjapa žoĉinacaqui Pabluž quintra žawjĉi tjoĉktichiĉha. Zati pariĉu tjonĉiĉha timplu kjutĉi. Nekztanaqui Pablo tanchiĉha. Timplu kjujltan tanžcu zawncĉhuc jooĉhiĉha. Nekztanaqui nii timplu zanami ĉhawjĉziĉha. ³¹Ninacaqui Pablo conzmayataĉha. Nekztan žoĉinaca walja aptjapzi ĉjen, zultatž jiliržquin maztataĉha. ³²Jalla nii quintu zizcu, walja apura zultatunaca juntassiĉha ninacž sargentunacžtan. Nekztan zati pariĉu ĉirĉhiĉha ĉjakziĉu tama žoĉinaca želatĉhaja, jalla nicju. Nekztanaqui žoĉinacaqui nii zultatunaca sargentunacžtanpacha ĉerĉhiĉha. Nuž ĉeržcu Pablo kiĉtž ĉjen nužquiz apatatchiĉha. ³³Jalla nekztanaqui nii zultatž jiliriĉi macjatžcu Pablo preso tanchiĉha. Nižaza man-tiĉhiĉha, pizc carinžtan ĉhelajo. Nekztanaqui žoĉinacžquiz pewcziĉha:

—ĉJect teejo? ĉĉhulu paachita tii žoĉejo?

³⁴Nii žoñinacazti tjpaman puntunaca chiican kjawchiča. Ancha altu joržtan arnan, nii zultatž jiliriqui ana intintasi atatča. Jalla nižtiquiztan mantichiča, cuartilquin chjicha, cjican. ³⁵Zultatž cuartil guardanacžquiz macjatžcan, zultatunacaqui Pablo waytižcu chjitchiča, ana nii žoñinacžquiz kijchkatžjapa. ³⁶Niiž wirquiz tama žoñinacaqui apzquichiča, kjaw jawi:

—¡Ticzla tiiqui! ¡Panj ticzla! —cjican.

PABLUQUI PERSUNA TJURT'ICHIČHA

³⁷Nekztanaqui Pabluqui cuartilquiz makawc cjen zultatž jiliržquiz paljaychiča, tuž cjican:

—Wejrqui tsjii chiiz pecuča. ¿Wejr chiyasaya?

Nekztanaqui nii zultatž jiliriqui kjaaziča tuž cjican:

—¿Amqui griego taku chiiñam jaa? ³⁸Jaziqui amqui anaž nii anawal egipt wajtchiz žoñimča. Niiqui ažk tjuñinaca gobiernuž quintra žoñinaca tjojtiskatchiča. Ch'ekti yokquin tsjii pajkpic warank guerrillero juntichiča gobierno niž puestuquiztan ch-jatkatžjapa. ¿Ana nii egipto žoñimya?

³⁹Nekztanaqui Pabluqui kjaaziča, tuž cjican:

—Wejrqui judío žoñtča. Cilia cjeta yokquin Tarso cjeta wajtquin nassinča wejrqui. Nii pajk wajtchiz žoñtča wejrqui. Jalla nižtiquiztan tii žoñinacžquiz paljayskatalla. —Nuž permiso maychiča.

⁴⁰Nekztanaqui zultatž jiliriqui permiso tjaachiča, žoñinacžquiz paljayajo. Nekztanaqui Pabluqui tsjitsiča nii gradanac juntuñ. Nižaza kjara waytižcu žoñinaca ch'ujquizkatchiča. Jalla nuž žoñinaca ch'ujquizkatžcu, Pabluqui hebreo tawkquiztan paljaychiča, tuž cjican:

22

¹—Jilanaca, ejpnaca, wejrqui persunal tjurt'ača. Wejt takuž nonžna.

²Jalla nuž hebreo tawkžtan paljayan, walja ch'uj žejlchiča nii žoñinacaqui. Nekztanaqui Pabluqui paljaychiča, tuž cjican:

³—Wejrqui judío žoñtča. Nawjc Cilia cjeta yokquin Tarso cjeta wajtquin nassinča. Pero tekzi tii Jerusalén wajtquiz pajkchinča. Gamaliel cjeta maestruqui wejr tjaajinchiča, učum atchi ejpnacž tuquita lii jarupanča tjaajinchiqi. Nižaza wejrqui tjapa kuztan Yoozquin sirwiñpanča, jaknužt ančhucqui tjapa kuztan učum cuzturumpi jaru paačhaja, jalla nuž. ⁴Tuquiqui wejrqui Yooz jiczquiz ojklayñi žoñinaca taniñtača, conañcama. Nižaza Yoozquin criichi luctaka cjiñimi maataka cjiñimi preso tanžcu, cheliñtača carsilquiz chawjckatžjapa. ⁵Nižaza timplu jilirinacami tjapa wajt jilirinacami zizza, weraral chiyuča, nii. Ninacaqui wejtquiz carta credencial tjaachiča, Damasco wajtquin učum judío jilanacžquiz tjeezjapa. Nekztan nicju ojkcchinča, Yoozquin criichi žoñinaca tanzjapa. Tekzi Jerusalén wajtquiz zjičžcu, castic pecchinča. Jalla tii weriž ojklayta puntuquiztanaqui tii Jerusalén jilirinacaqui kjanacama declarasača.

PABLUQUI JESUCRISTUŽTAN ZALCHIČHA

⁶Carta credencial tanžcu, wejrqui Damasco watjal ojkcchinča. Nižaza taypur ora irantiz cjen, tiripintit arajpachquiztan tsjii wali pajk ispijužtakaz kjanžquichiča wejt muytata. ⁷Wejrqui yokquin tjojtzinča. Jalla nuž tjojtžcu tsjii jora nonziča, tuž cjican: “Saulo, Saulo, ¿kjažtiquiztan am wejt quintramjo?” ⁸Jalla nekztanaqui wejrqui pewczinča, tuž cjican: “Wejt Jiliri, ¿ject amya?” Jalla nekztanaqui wejtquiz kjaaziča, tuž cjican: “Wejrtča Jesuŝitqui. Nazaret wajtchiz žoñtča. Amqui wejt quintram paača”. ⁹Wejtčan chica compant'ini žoñinacaqui walja tsucchiča. Nižaza nii kjanžquini cherchizakazza. Pero nii wejtquiz chiizquini jora ana nonziča. ¹⁰Nekztanaqui wejrqui cjichinča: “Wejt Jiliri, ¿chjulu wejr paajum cjii amya?” Nekztanaqui wejt Yooz jiliriqui kjaaziča, tuž cjican: “Žaažna. Tiraka amqui Damasco watja oka. Jalla nekz amquiz mazinta cjequiča chjulut

paasalaj, jalla nii". ¹¹Jalla nii kjanaž cjen zuranzinča. Jalla nekztanaqui wejt cumpant'ini žoñinacaqui wejt kjarcu tanžcu Damasco watja irantizcama chjitchičha.

¹²Jalla nii wajtquin tsjii Ananías cjita žoñi želatča. Jalla niiqui Moisés lii jaru wajja cumpliñitača. Nižaza tjapa nii Damasco wajtquin kamñi judionacami nii žoñž puntuquiztan "Zumapanča nii žoñiqui" cjiñitača. ¹³Nekztanaqui Ananiasqui wejtquiz tjonžni tjončiča. Jalla nuž tjonžcu wejt latuquiz tsijtsičha. Nekztan wejtquiz cjichiča: "Saulo jila, wilta cherñim cjequičha". Jalla nii orapacha wejrqui cherñi cjissinča. Nekztan Ananías kjutñi cherzinča. ¹⁴Jalla nekztanaqui Ananiasqui wejtquiz cjichiča: "Tuquitapanča učhum ejpnacž Yoozqui am illziča, niiz pinsita zizajo, nižaza niiz anča zuma Majch cherajo, nižaza niiz jora nonžnajo. ¹⁵Nižaza amqui niiz puntuquiztan paljayaquičha tjapa tii muntuquiz žejlñi žoñinacžquiz. Nižaza ninacžquiz amiž chertanaca, nižaza amiž nonztanaca declaraquičha. ¹⁶Jaziqui apura žaažna, Yooz Jiliržquin tjapa kuztan cjee, am ujnaca pertunta cjisjapa. Nižaza bautista cjee".

¹⁷Wiruñaquí Jerusalén watja quejpcinča. Jalla nuž quejpcu, timpluquin ojkchinča Yoozquin mayizizjapa. Jalla nuž mayizican Yoozqui tsjii chjuužtažokaz wejt kuzquiz tjonskatchičha. ¹⁸Nekztan Yooz Jiliri cherchinča. Nižaza Yooz Jiliriqui wejtquiz cjichiča: "Tii Jerusalén wajtquiztan apura ulna. Amiž wejt puntuquiztan chiita takunaca anaž nonz pečča". ¹⁹Nekztanaqui wejrqui cjichinča: "Wejt Jiliri, ninacaqui zizza weriž ojklayanacaqui. Tjapa ajcz kjuyaran ojklayiñtača, amquin criichinaca kjurcan. Jalla nii criichinaca wachtiquiztan, wejrqui ninaca wjajtkatchinča. ²⁰Nižaza am puntu declarñi Esteban conan, wejrqui nicju tsijtsi želatuča. Nižaza wejt kuzmi tjapa kuztača nii conan. Nižaza nii conñi žoñinacž zquitinaca cwitichinča". ²¹Pero Yooz Jiliriqui wejtquiz chiižinčinča, tuž cjican: "Oka amqui. Ažkquin nacjuñta wajtchiz žoñinacžquin am cuchnača".

PABLUŽTAN COMANDANTI JILIRŽTAN

²²Jalla niicama žoñinacaqui Pabluž paljayta taku nonziča. Nekztanaqui kjawi kallantichičha, tuž cjican:

—¡Ticzla tii žoñiqui! ¡Ana žejtz waquizičha!

²³Jalla nuž tirapan kjawcan, persun zquitinaca wewcwewcžinčinča, polvo žketinchizakazza. ²⁴Jalla nižtiquiztan zultatž jiliriqui mantichičha, Pablo cuartelquin majkžnajo. Nižaza mantichičha, Pablo wjajtcu mazkatzjapa, "¿Kjažtquiztan nii žoñinacaqui niž quintra nižta kjaw?" jalla nii puntuquiztan zizjapa. ²⁵Pablo wjajtzjapa čejlžtaž cjen, Pabluqui nekž žejlñi tenientžquiz paljayčičha, tuž cjican:

—Ima zumpacha zizcan, ¿tsjii roman žoñi wjajtz waquiziya? Anapaž waquizičha.

²⁶Jalla nii taku nonžcu, nii tenientiqui niž comandantižquiz ojkčičha, nii puntu mazjapa. Jalla nekztanaqui tuž cjichiča:

—Tii žoñiqui roman žoñipanžača. Anaž čhjulumi nižtaqui kjaž cjila.

²⁷Nekztanaqui nii comandante jiliriqui Pablužquin macjatžquičičha. Nekztan pewcwčičha, tuž cjican:

—¿Roman žoñim panj amya?

Pabluqui kjaaziča, tuž cjican:

—Jesalla.

²⁸Nekztan nii comandantiqui cjichiča:

—Wacchi paaz wejrqui pacchinpanča roman wajtchiz žoñi cjisjapaqui.

Nekztan Pabluqui kjaaziča, tuž cjican:

—Wejrqui nastiquiztanpacha roman wajtchiz žoñičha.

²⁹Jalla nuž Pabluž taku nonžcu, nii Pablo wjajtajo mantita zultatunacaqui nužquiz wir kjutñi atziča. Nižaza Pablo roman žoñi zizcu, nii comandantiqui nii wjajtzjapa čejlchiž cjen, tsucchi quirchičha.

PABLUQUI JUDIO JILIRINACŽQUIZ PRISINTISKATCHIČHA

³⁰Niiz jaka tažuqui nii comandantiqui ancha ziz pecatĉha Pabluž puntuquiztan. Ultimu, ĉkjažtiquiztan nii judío žoñinacaqui Pablo conkatz pecatjo? Jalla nekztan Pablo ĉejlta carina apakžinčiĉha. Nižaza timplu chawc jilirinacami wajt jilirinacami juntjapznajo mantichiĉha. Jalla nuž juntjapztiquiztan nii comandantiqui Pablo ninacž yujcquin prisintisjapa ĉjitchiĉha.

23

¹Nekztanaqui Pabluqui nii ajczi jilirinacž kjutñi ĉerziĉha. Jalla nuž ĉeržcu, tuž ĉjichiĉha:

—Jilanaca, wejt kuzquiz zizuĉha, tii noojcama wejrqui Yooz yujcquiziqui walika kamĉinĉha, nii.

²Nuž ĉhiitiquiztan, Ananías ĉjita chawc jiliriqui Pabluž žcati žejlñi žoñžquiz mantichiĉha Pabluž atquiz kijchnajo.

³Pabluzti kjaaziĉha, tuž ĉjican:

—Pizc kuzziz žoñi, Yoozqui am casticaquiĉha. Amqui tekz julzamĉha, uĉhum lii jaru wejr jusjizjapa. Jaziqui, ĉkjažtiquiztan amqui uĉhum lii quintra wejr kijchnajo mantichamtajo?

⁴Jalla nii žejlñi žoñinacaqui kjaaziĉha, tuž ĉjican:

—ĉJalla nuž Yooz chawc jiliriqui ĉhayskazkaya?

⁵Nekztan Pabluqui ĉjichiĉha:

—Jilanaca, anal wejrqui zizatuĉha tiiqui Yooz chawc jilirižlaja, jalla nii. ĉjirta Yooz takuqui tuž ĉjiĉha: “Tsjii wajt jiliriž quintraqui anaĉha ĉhiizqui”.

⁶Jalla nekztanaqui Pabluqui naaziĉha, parti ajczñi žoñinacaqui saduceo partiquiztantaĉha, nižaza parti ajczñi žoñinacazti fariseo partiquiztantaĉha. Jalla nižtiquiztan altu joržtan nii žoñinacžquiz paljayĉiĉha, tuž ĉjican:

—Jilanaca, fariseo parti žoñtĉha wejrqui. Wejt familiaqui fariseo partizakazza. Tsjii noojiqui ticzi žoñinacaqui jacatataquiĉha. Jalla nii tjuñi wejrzakal tjewznuĉha. Jalla nii puntuquiztan anĉhucqui wejr jusjiĉha.

⁷Jalla nuž ĉhiitiquiztan fariseo partinacžtan saduceo partinacžtan porapat aptjapziĉha. Nekztanaqui nii ajczñi žoñinacaqui t'akziĉha. ⁸Nii saduceo žoñinacazti ĉjiñitaĉha, “Ticziquiztanaqui anaž wira jacatatašaĉha. Nižaza anaž anjilanacami zajranacami želasaĉha”, nuž ĉjiñitaĉha. Nii fariseo žoñinacazti jacatatz puntumi anjilanacž puntumi, zajranacž puntumi, tjapa nii puntunaca criñitaĉha. ⁹Jalla nižtiquiztan altu joržtan ĉh'aasi kallantichiĉha. Nekztan tsjii kjaž lii tjaajiñi maestronacaqui tsjitsiĉha. Ninacaqui fariseo partiquiztantaĉha. Ninacaqui paljayĉiĉha tuž ĉjican:

—Tii žoñžquiz ana ĉhjul ujmi wachuĉha wejrnacqui. Cunamit tsjii anjilaĉha Pablužquiz ĉhiizinchini, už ispiritužlaj tiižquiz ĉhiizinchi.

¹⁰Juc'ant juc'ant ĉh'aascan aptjapsiĉha. Jalla nuž ĉjen comandante jiliriqui eksnatĉha Pablo ĉhjojritžta ĉjeĉhaj, jalla nii. Nekztan nii comandantiqui zultatunacžquiz mantichiĉha nii judionacž taypiquiztan Pablo jwescu wilta cuartilquin ĉjichajo.

¹¹Niiz jaka zežtažu nii arama Yooz Jiliriqui Pablužquiz ječžquichiĉha, tuž ĉjican:

—Pablo, tjup kuzziz ĉjee. Jaknuž tii Jerusalén wajtquiz wejt puntuquiztan paljayĉhamžlaja, nižaza Rom wajtquin wejt puntuquiztan paljaystanĉha.

PABLO CONZ KAZTA

¹²Jalla niiz jaka tažuqui tsjii kjaž judío žoñinacaqui Pablo conzjapa juramentužtan tsjii acuerduquiz asiptassiĉha. “Pablo ana ticznaquiž niiqui, wejrnac contal ĉjeeĉha”. Nuž ĉjican asiptassiĉha. Nižaza ninacaqui palt'assiĉha ninacpora, tuž ĉjican:

—Anaž ĉhjul ĉherimi lujls, Pablo conañcama, —jalla nii.

¹³Jalla nii parla asiptiñi žoñinacaqui pusi tunc jilataĉha. ¹⁴Nižaza ninacaqui mazñi ojkiĉiĉha timplu chawc jilirinacžquinami nižaza wajt jilirinacžquinami. Ninacžquiz mazziĉha tuž ĉjican:

—Tsjii acuerduquiz asiptassinĉha tuž ĉjican: “Pablo ana ticznaquiž niiqui, wejrnac contal ĉjeeĉha”. Nižaza palt'assinĉha wejrnacpora, tuž ĉjican: “Anaž jecmi ĉhjul

čhjerimi lujls, Pablo conañcama”, jalla nii. ¹⁵Jaziqui ančhucqui parti jilirinacžtanami nii comandante jiliržquiztan nii Pablo mayaquiča, tuž cjican: “Wilta Pablo cuchanžcalla wejrnacaquin. Wejrnacqui Pabluž puntuquiztan tsjan zumpacha intintiz pecasuča”. Jalla nuž cjican Pablo mayaquiča. Wejrnacqui listuž cjeeča Pablo conzjapa. Ima ančhucquiz irantžčan, wejrnacqui nii Pablo conača. —Jalla nuž cjichiča.

¹⁶Jalla nekztanaqui Pabluž cullaca majchqui Pablo conz puntuquiztan nonziča. Jalla nii nonžcuqui cuartilquin ojkcichiča Pablužquiz mazni. ¹⁷Nekztanaqui Pabluqui tsjii zultatž teniente kjawziča, tuž cjican:

—Tii tjowa chjicha comandantižquin. Tiiqui quintuchizza.

¹⁸Nekztanaqui nii teniente nii tjowa chjitchiča tuž cjican:

—Nii Pablo prisita žoñiqui wejr kjawziča. Nekztan wejtquiz chiichiča tii tjowa amquin chjichajo. Tiiqui amquiz quint'iz pecča.

¹⁹Nekztan nii comandantiqui kjarcu tanžcu nii tjowa tsjii latu chjitchiča. Jalla nekztan pewcziča, tuž cjican:

—¿Čhjulum amqui wejtquiz chiiz pecya?

²⁰Jalla nekztanaqui tjowaqui kjaaziča tuž cjican:

—Judfo žoñinacaqui tsjii acuerduquiz asiptassiča. Jaka wenz amquiztan mayaquiča Pablo chjitzjapa judfo jilirinacž yujcquin. Jalla tuž mañžtan mayaquiča, “Wejrnacqui Pabluž puntuquiztan tsjan zumpacha intintiz pecasuča”. Jalla nuž cjican mayaquiča.

²¹Amzti ana ninacžquiz juyzu paaz waquiziča. Tsjii pusi tunc jil žoñinacaqui juramentužtan tsjii acuerduquiz asiptassiča, tuž cjican: “Pablo ana ticznaquiz niiqui, wejrnac contal cjeeča”. Nižaza ninacpora palt'assiča, tuž cjican: “Anača čhjeri lujls Pablo conañcama”. Nii žoñinacaqui čhojziž tjewža Pablo irantisquizcama. Anzpacha listuča, amiž asiptita takukaz tjewža.

²²Jalla nii quintu nonžcu nii comandantiqui nii tjowa cuchanchiča. Nižaza mantichiča:

—Anaž jecžquizimi amiž quint'itaqui chiichiyaquiča, —jalla nuž cjican cuchanchiča.

PABLUQUI FELIX CJITA JILIRŽQUIN CUCHANTA

²³Jalla nekztanaqui nii comandantiqui pucultan teniente kjawziča. Jalla nuž kjawžcu tsjii ortina mantichiča, tuž cjican:

—Zultatunaca tuž tjaczna, paa patac zultatu kjojchiñ ojknijapa, nižaza pakallaw tunca zultatu cawallquiz yawchi ojknijapa, nižaza paa patac zultatu lanzižtan ojknijapa. Ispir ora listu tjaczta cjequiča Cesarea watja ojczjapa. ²⁴Nižaza tsjii cawallu tjaczinaquiča Pablo yawchi chjitzjapa. Nižaza Pablo chjichaquiča ana čhjulu kjaž cjičcu. Nekztanaqui Félix cjita chawc jiliržquiz intirjaquiča. —Jalla nuž mantichiča nii comandantiqui.

²⁵Nižaza nii Pablo chjichni zultatunacžtan tsjii carta apaychiča, tuž cjican:

²⁶“Al señor excelentísimo chawc jiliri Félix: Wejrqui amquin tsaanuča; Claudio Lisias wejrtča. ²⁷Judfo žoñinacaqui tii žoñi preso tanchiča. Nižaza conz cjichitakalča. Jalla tiiqui roman žoñiča. Jalla nii zizcu, wejrqui zultatunacžtan ojkcichinča, tii liwrii. Wejr irantan, judfo žoñinacaqui tii conzmayatača. ²⁸Wejrqui ziz pecatuča, ultimu kjažtiquiztan nii judfo žoñinacaqui tii conkatz pecatjo, jalla nii. Nižtiquiztan judfo jilirinacž yujcquin chjitchinča. ²⁹Nekztanaqui zizzinča nii judionacž lii puntuquiztankaz tii quintra uj tjojtunchiča. Anaž conz razunami nižaza ana carsilquiz chawjcz razunami želatča tii judionacžquiztanaqui. ³⁰Jalla nekztanaqui nii judfo žoñinacaqui tsjii acuerduquiz asiptassitakalča tii Pablo conzjapa. Jalla nii zizcu, nekztan wejrqui amquin apura cuchanžcuča. Nižaza niižta quintra žoñinacžquiz mantichinča, am yujcquiz parlajo, čhjul puntuquiztan quintra aptazaja, jalla nii. Jalla nužukazza”.

³¹Jalla nekztanaqui ortin jaru zultatunacaqui ween Pablo chjitchiča, Antípatris cjita watjacama. ³²Niiž jaka tažuqui kjojchiñ ojknii zultatunacaqui cuartilquin quejpžquichiča. Cawallquiz ojknii zultatunacakaz tira Pablužtan ojkcichiča. ³³Cesarea watja irantižcu, carta tjaachiča chawc jiliržquiz. Nižaza nii jiliržquiz Pablo intirjichiča. ³⁴Carta liižcu, nii

chawc jiliriqúi Pablo pewcziċha, jakzi wajtchiz ŷoñitaķlaja, jalla nii. Cilicia wajtchiz ŷoñi, nii zizcu, ³⁵tuķ cjiċhiċha:

—Am quintra aptaķni ŷoñinacaķ tjonchiķ cjen, am puntuquiztanaqui wejrqui atintaċha. Nekztanaqui nii jiliriqúi mantichiċha Herodes pajk kjuyquiz Pablo zuma wijilta ŷelajo.

24

PABLUQUI FELIX YUJCQUIZ PRISINTIĊHIĊHA

¹Nekztan pjijska tjuñquiztan, Ananías cjita timplu chawc jiliriqúi Cesarea watja iran-tiċhiċha Jerusalén wajt jilirinacķtanami niķaza tsjii Tértulo cjita tjurt'iķiñi awjatķtan. Jalla ninacaqui chawc jilirķ yujcquin prisintichiċha Pabluķ quintra chawc uj tjojtunķjapa. ²Tsjii audiencia cjetķtanaqui jilirķ yujcquiz Pablo chjichtataċha. Nekztan nii Tértulo tjurt'iķiñi awjatuqui Pabluķ quintra chii kallantichiċha tuķ cjican:

—Wejt excelentísimo chawc jiliri: Walikazza wejt watjaqui, niķaza cuntintu kamasuċha. Sparaquiċha amquin. Am walja zizniķ cjen zuma irpiñamċha wejtnacaquiz. Ċhjul necesidad ŷejlċhaja, jalla nii atintichamċha. ³Tjapa watjanacquin amiķ uchta obranacquistan ancha sparaquiķ cjiwċha, zuma excelentísimo Félix. Niķaza tjapa ŷoñinacaqui nuķ amquiz sparaquiċha cjiñipanċha. ⁴Wejrqui am ana ancha molistis pecuċha, tii puntuquiztankaz am atintalla. Niķaza tsjii ratu wejt taku nonķnalla. ⁵Nuc aķka kamcan, wejrnacqui zizzinċha, tii ŷoñiqui wira anawalipanċha. Niķaza tjapa kjutñi judfo ŷoñinacaķ aptjapċha, t'aka t'aka. Niķaza tiiqui walja achāċha nii nazaren cjita t'akquiztan. ⁶Niķaza wejtnaca timpluquin yekja wajtchiz ŷoñi luskatz yanchiċha. Jalla niķta anawalipanċha. Jalla niķtiquiztan wejrnacqui tii preso tanchinċha. Niķaza wejtnac lii jaru tii ŷoñi casticskatz pecatuċha. ⁷Nii Lisias cjita comandantizti fuerziķcu wejtnacaquiz mitissiċha. Tama zultatunacķtan tii kjañchiċha. ⁸Nekztanaqui nii comandantiqui wejrnacqui tii ŷoñiķ uj tjeeķjapa tekzi am yujcquiz tjonkatċha. Jazic amza tii pewcķna. Jalla nekztanaqui tiiķquiztanpacha zizaquiċha wejrnaca ultim werara chiichinċha, wejtnacaķ tjojunta uj puntuquiztan zumpacha zizaquiċha. Tii ŷoñiqui walja ujchizza.

⁹Nii ŷejlñi judfo ŷoñinacaqui cjiċhizakazza:

—Tiiķ chiita takunaca weraraċha.

¹⁰Nekztanaqui nii chawc jiliriqúi kjara waytiķcu Pablo chiikatchiċha. Jalla nuķ cjen Pablo paljaychiċha, tuķ cjican:

—Nuc aķk wata tekz tii nacionquiz amqui jiliri tsijtsamċha. Jaziquiz wejrqui ancha cuntintuċha am yujcquiz tjurt'izjapaqui wejt puntuquiztan. ¹¹Ampacham wejt puntuquiztan averiguasaċha. Tuncapan tjuñikaz weriķ irantisquitaqui, nii Jerusalén wajtquin Yoozquin sirwizjapa tjonchintaċha. ¹²Anaķ jec ŷoñimi wejr ŷoñtan ch'assñi cherchiqui, niķaza wejrqui ana ŷoñinaca aptjapchinċha, Jerusalén wajtquizimi. ¹³Tii wejt quintra ŷoñinacaqui anaķ ċhjul ujmi amquiz tjeeķni atċha. ¹⁴Jalla tiiċha ultim weraraqui. Wejrqui wejtnac ejpnacķ Yooz pacha sirwuċha Yooziķ tjeeķta kamaña jaru. Jalla nii Yooz kamañaqui yekjaķ t'aka cjiċha tinacaqui. Niķaza wejrqui criyuċha tjapa Moisés cjiķrta liimi, niķaza tjapa profetķ cjiķrta Yooz takunacami. ¹⁵Niķaza criyuċha Yoozqui ticziquiztan jacatatskataquiċha zuma kamñi ŷoñimi ana zuma kamñi ŷoñimi. Jalla nii jacatatz tjuñi tjewznuċha, tinacami niķazakaķ tjewķa. ¹⁶Jalla nuķ tjewķcan, Yooz yujcquizimi ŷoñiķ yujcquizimi wejt kuz zuma iwj't'ican persunpacha cwitasuċha, ana ujchiz cjisjapa.

¹⁷Tsjii kjaķ watanaca yekja nacionaran wejr cjklajķquichinċha. Jalla nuķ ojklajķcu wejrqui wejt persun yoka quejpcchinċha, limosnami ofrendanacami timpluquin uchjapa.

¹⁸Jalla nuķ paan, tsjii kjaķ Asia provinciaquiztan tjonchi judionacaqui wejttaan zalchiċha. Timpluquin ŷejlċhinċha judfoķ cuzturumpi jaru paacan. Timpluquin ŷoñinacaqui anatāċha wacchi, niķaza anataċha ċhjulumi aptazi. ¹⁹Jalla nii Asiaquiztan tjonchi judionacaqui jalla ninacķla tekzi qui am yujcquiz prisintisquizlani wejt quintraqui, ċhjul uj paatuċhaja, jalla nii. Ninacaqui tsjii uj tjeeķnaċhaj niiqui, tekz am yujcquiz tjeeķla. ²⁰Jalla nii ana atchucaķlaj niiqui, tii ŷejlñi ŷoñinacaj weriķ paata uj kjanacama chiilalla. Wejr judfo jilirinacķ yujcquiz ŷelan, uj paachinķlaj niiqui kjanaj chiilalla. ²¹Judfo jilirinacķ yujcquiz

žejlcan, tiikaz altu joržtan chiichinča: “Ticziquiztan jacatatz tjuñi tjewznuča. Jalla nižtiquiztan tonj ančhucqui wejr jusjiča”. Jalla niikazza weriž chiitaqui. —Nuž cjican Pabluqui chiichiča.

²²Jalla nuž nonžcu, Félix chawc jiliriqui nii cjetžta audiencia nužquiz suspintiskatchiča. Nii jiliriqui Yooz jicz puntuquiztan zuma zizziča. Jalla nižtiquiztan Pabluž quintra žoñinacžquiziqui ana juyzu paachiča. Nekztan cjichiča:

—Čhjulorat Lisias comandante tjonačhaja, jalla nekztanž tii ančuca quijaqui wilta atintita cjequiča. Nii nooj azquitžta cjequiča.

²³Nekztanaqui Félix chawc jiliriqui teniente capitanžquin mantichiča Pablo tira kjuyquiz chawjcta cwitajo. Pero Pabluž amigonacžquiz permiso tjaachiča, Pablo atintizjapa.

²⁴Tsjii kjaž majquiztan Félix chawc jiliriqui Drusila cjiti tjunatan tjonžquichiča Pabluž taku nonzjapa. Jalla naaqui judioquiztan žontača. Nekztanaqui Pablo kjawzñi mantichiča. Niiž yujcquiz prisintižcu, Pabluqui Jesucristužquin kuzziz puntuquiztan paljajychiča. ²⁵Nii jiliriz nonznan, Pabluqui parličiča tii čhjep puntuquiztan: Yooz zuma kamaña puntuquiztan, nižaza persun kuz zuma irpiz puntuquiztan, nižaza Yooz casticž tjuñi puntuquiztan. Jalla nii parlita nonžcu Félix chawc jiliriqui muzpa tsucchiča. Nekztanaqui cjichiča:

—Oka amqui. Wejttaž timpu želan, wilta am kjawznača.

²⁶Félix chawc jiliriqui “paaz pac jaa” cjican jalla nuž Pablužquiztan pecatča. Paaz pac-tiquiztan Pabluqui cuchtaž cjitasača. Jalla nižtiquiztan nii jiliriqui kjaž wilta Pablo kjaw kjawatča, “Cunamiž paaz pacasa jaa” cjican. Pablo kjawžcu, nižtan parličiča. ²⁷Félix jiliriqui judionacž kuz wali cjiskats pecatča. Jalla nižtiquiztan Pablo preso ecchiča. Pizc wata nuž watchiča. Jalla nekztanaqui Félix chawc jiliriqui niiž puestuquiztan ulanchiča. Nii puestuquiz tsjiizuñ luzziča, Porcio Festo cjita tjuuchiztača.

25

PABLUQUI FESTUŽ YUJCQUIZ PRISINTIČIČA

¹Festuqui chawc jiliriz puestuquiz luzcu, niiž čhjep majquiztan Cesarea wajtquiztan Jerusalén watja ojkičiča. ²Jalla nicju timplu chawc jilirinacami walja acha wajt jilirinacami, jalla ninacaqui Pabluž quintra quijchiča. ³Nižaza rocchiča:

—Tsjii favora paalla —cjican. —Tii Jerusalén watja Pablo cuchanžcalla.

Nii oraqui ninacž kuzquiz pinsichiča, Pablo jiczquiz tjonan conzjapa. ⁴Nekztanaqui Festo chawc jiliriqui kjaaziča, tuž cjican:

—Pabluqui Cesarea wajtquin preso žejlča. Tsjii kjaž majquiztan wejrpachal quepača nicju. ⁵Jaziqui ančuca jilirinacaqui wejtta chica Cesarea ojkla. Jalla nicju nii žoñiqui ujchizpanžlaj niiqui, jalla niiž uj tjeezpanikazza ančhucalaqui.

⁶Nii Festo jiliriqui quinsakal tjuñižlaj už tunca tjuñižlaj, jalla nuž žejlčiča Jerusalén wajtquiz. Jalla nekztanaqui Cesarea watja quejpchiča. Niiž jaka tažuqui niiž jusjiz oficinquiz luzziča. Jalla nekztan Pablo zjijcajo mantichiča. ⁷Pablo zjijctiquiztan Jerusalén wajtquiztan tjonchi judionacaqui jusjiz oficinquiz luzzizakazza. Pabluž muytata tsijtsu, wali chawc ujnaca tjojtunchiča. Pero ana čjul uj tjeezñi atchiča. ⁸Jalla nekztanaqui Pabluqui persuna tjurt'ican takunaca chiichiča, tuž cjican:

—Wejrqui ana čjul ujmi paachinpanča, ana judionacž lii quintrami, nižaza ana timplu quintrami, nižaza ana roman chawc jiliriz quintrami. Anapan uj paachinča.

⁹Nekztanaqui Festo jiliriqui judionacž kuz wali cjiskatzjapa tsjii favora paaz pecatča. Jalla nižtiquiztan Pablužquiz pewcziča, tuž cjican:

—¿Jerusalén watjam okasaya? Jalla nicju am quintra quijta puntuquiztan atintasača.

¹⁰Jalla nižtiquiztan Pabluqui kjaaziča, tuž cjican:

—Roman chawc jiliriz jusjiz oficinquiz želuča. Tekzpacha wejrqui jusjita cjistanča. Amqui zumpacham zizza wejt puntuquiztan. Wejrqui ana čjul ujmi paachinča tii judionacž quintrami. ¹¹Jaziqui wejrqui ujchizpančhalaj niiqui, casticta cjis anal jiwjatuča.

Nižaza uj paachiž cjen ticz waquizichaj niiqui, ticzmi anal jiwjatučha. Pero wejt quintra tjojtunta ujnacami ultimu ana tjeezkattačha. Nižtiquiztan anaž nii judionacž kjarquiz wejr intirjita cjesačha. Jaziqui roman chawc jiliržquinpan watz mayučha wejt puntuquiztan zumpacha arreglita cjisjapa.

¹² Jalla nekztanaqui Festo jiliriqui niiž tantiiñinacžtan palt'ichičha. Jalla nuž palt'izcu, Pablužquiz chiichičha, tuž cjican:

—Amqui roman chawc jiliržquin watz maychamčha. Jaziqui jalla nii jiliržquinpanikam watačhani.

PABLUQUI AGRIPŽ YUJCQUIZ PRISINTIČIČHA

¹³ Jalla tsjii kjaž majquiztan tsjii Agripa cjita chawc jiliriqui Cesarea watja tjonchičha Berenice cjiti tjunatan. Jalla ninacaqui tjonchičha Festo tsaanzjapa. ¹⁴ Jalla nicju tsjii kjaž maj kaman Festo jiliriqui ninacžquiz quint'ichičha Pabluž puntuquiztan, tuž cjican:

—Tekz tsjii pres žoñi žejlčha, Félix jiliržquiztanpacha. ¹⁵ Wejrqui Jerusalén wajtquiz želan, timplu jilirinacami wajt jilirinacami jalla ninacaqui tii žoñž quintra quijchičha. Ninacaqui wejtquiz tii žoñi conkatz pecatčha. ¹⁶ Jalla nižtiquiztan wejrqui kjaazinčha tuž cjican: “Romanž liiqui tuž cjičha: Quijta žoñžtan quijñi žoñžtan pucultan declarskatzpanikazza, čhjulat watčhaja, jalla nii. Nekztan nii quijta žoñi qui persun takunacžtan tjurt'asačha werarquiztanaqui. Nekztan chawc ujchizlaj niiqui, contaž cjesačha”. ¹⁷ Jalla nižtiquiztan ninacaž tiwc tjonchiž cjen, ana timpu pertižcu, niiž jaka tažuqui quija atintichinčha wejt jusjiz oficinquiz. Nii quijta žoñi zjijcajo mantižcu zuma atintichinčha.

¹⁸ Nii quijñi žoñinacaqui prisintichizakazza. Wejrqui pinsichintačha, ninacac chawc ujpán nii žoñžquiz tjeeznaa, cjican. Ultimu ninacazti ana čhjul chawc ujmi tjeezkati atchičha. ¹⁹ Nii žoñž quintra chiichičha religión puntuquiztankaz. Tsjii Jesusa cjita žoñi qui ticzičha. Pabluzti “Žejtčha niiqui” cjiñitakalčha. ²⁰ Wejrqui nižta quija atintizjapa anal zuma zizatučha. Jalla nižtiquiztan Pablužquiz pewczinčha, tuž cjican: “Jerusalén watja okasay? Jalla nicju tii am quintra quij puntuquiztan atintasačha”. Jalla nuž chiichinčha wejrqui. ²¹ Jalla nekztanaqui niiqui maychičha roman chawc jiliržquin watzjapa. Jalla nižtiquiztan Augusto cjita chawc jiliržquin watajo mantichinčha. Nižaza tirapan preso želajo mantichinčha, čhjulorat chawc jiliržquin mantichuca cječhaja, jalla niicama.

²² Jalla nekztanaqui Agripa jiliriqui Festo jiliržquiz cjichičha:

—Wejržakal nii žoñž razuna nonz pecučha.

Festo jiliriqui kjaazičha, tuž cjican:

—Jakapacham nonznaquičha.

²³ Niiž jaka tažuqui Agripa cjita jiliriqui Berenice cjiti tjunatan pajk audiencia kjuyquin luzquichičha, ancha zuma honorchiz. Zultatž jilirinacžtanami wajt jilirinacžtanami luzzizakazza. Nekztanaqui Festo jiliriqui Pablo zjijcajo mantichičha. ²⁴ Pablo zjijctiquiztan Festo jiliriqui tuž paljaychičha:

—Agripa chawc jiliri, nižaza tekz ajczi zuma žoñinaca. Tekzičha tii žoñi qui. Walja judionacaqui tii žoñž quintra chiichičha Jerusalén wajtquinami tii Cesarea wajtquizimi. Jalla ninacaqui wejr rocrochčičha tii žoñi conzjapa, “Tii žoñi qui ana žejtz waquizičha” cjican.

²⁵ Wejrčhaja tii zuma pewc pewczcu, anapan čhjul uj wači atchinčha, ticzkatajo. Nižaza tii qui roman chawc jiliržquin watz maychičha jusjita cjejajo. Jalla nuž maytiquiztan tantiižcu, watajo mantichinčha. ²⁶ Wejrqui roman chawc jiliržquin ččhjul puntut tii žoñž puntuquiztanaqui cjiyras? Anal zizučha. Jalla nižtiquiztan am yujcquiz prisintiskatučha, señor Agripa, wejt chawc jiliri. Nižaza tjapa ančhucquiz prisintiskatučha. Jaziqui ančhucqui tii žoñi zumpachaž pewczina. Nekztan wejrqui aptačhani čhjul puntut cjiyras, nii. ²⁷ Tii pres žoñž quintra puntuquiztan kjanapacha cjiyrz waquizičha. Ana nižta cjiyraquiz niiqui, anapal cuchñi atasacha. —Jalla nuž paljaychičha Festo jiliriqui.

26

PABLUQUI TJURT'IŇI TAKUNACA WILTA CHIICHIČHA

¹ Jalla nekztanaqui Agripa jiliriqui Pablužquiz tuž cjichičha:

—Amqui am persunquiztan zuma tjurt'iz taku chiya.

Jalla nektzanaqui Pabluqui kjara chjinžcu paljayi kallantichiča, tuž cjican:

²—Excelentísimo Agripa, chawc jiliri, ancha cuntintuča wejrqui, am yujcquiz wejt puntunaca werara chiizjapa. Judío žoñinacaqui wejt quintra ujnaca tjojtunchiča. Jaknižlaj nii werara chiyasača. ³Amqui tjappacha učum judionacž caturumpinaca zumam zizza. Nižaza učumpora čjul puntu ch'aasaj, nii ch'aastanacami zizza amqui. Jalla nižtquiztanaqui wejrqui ancha cuntintuča, am yujcquiz tjurt'izjapaqui. Zuma pasinsistanž nonžnalla.

⁴Tjapa judionacaqui weriž kamta zizza. Wejt yokquiz ojklaytami nižaza Jerusalén wajtquiz ojklaytami jaknuž ocjalquiztanpacha kamiñtažlaja, nii zizza tjapa judionacaqui. Ninacžtan kamiñtača. ⁵Tjowanstiquiztanpacha fariseo t'akquiz žejlchinča. Nii fariseo t'akaqui učum judionacž lii jarupan walja estricto kamiñiča yekja judionacž t'akanacqiztan cjenami. Jalla nii ažktan zizza nii wejt quintra judionacaqui. Jaziqui ninacakaj declarla, declarz pecčhaj niiqui. ⁶Tuquiqui Yoozqui učum tuquita ejpnacžquiz taku ecchiča, ticziquiztan jacatatz puntu, jalla nii. Jalla nii jacatatzpan tjewznuča. Jalla nuž weriž tjewztiquiztan, judionacaqui wejt quintra quijchiča. ⁷Pero Israel wajtquiziqui wejtnc tuncapan t'akanacaqui Yooziž ecta taku cumplis zakaz tjewža. Jalla nižtquiztan Yoozquin rispitičiča, nižaza majiñami weenami nižžquin sirwiča. Wejt chawc jiliri, jalla niipan tjewžniž cjen judionacaqui wejt quintra tjojkichiča. ⁸Ančucmi zakaz criičani, Yoozqui ticziquiztan žoñinaca jacatatzquiča, nii.

⁹Tuquiqui wejrqui pinsiñtača, nii Nazaret wajtchiz Jesusižquin criichi žoñinacž quintra čjul anawalinacami paaz waquiziča. ¹⁰Jalla nuž wejrqui criichinacž quintra anawalinaca paachinča Jerusalén wajtquin. Učum timplu jilirinacž mantita jaru walja criichinaca carsilquiz chawjskatchinča. Nižaza criichinaca conajo, wejr zakal taku utchinča. ¹¹Nižaza kjaž wilta criichi žoñinaca sufriskatchinča, Jesucristuž quintra chiikatžjapa, nižaza Jesucristužquiztan quejpskatžjapa. Wejrqui nižtapacha paachinča judionacž ajcz kjuyquizimi. Nižaza walja žawjwiñtača nii criichinacž kjutñi. Jalla nuž žawjžcu wejrqui criichinaca tani ojklayiñtača yekja watjaranami.

¹²Jalla nijapa Damasco watja ojkichinča, timplu chawc jilirinacž mantita jaru. Nižaza ninacaqui wejtquiz carta credencial tjaachiča, nii criichi žoñinaca tanzjapa. ¹³Jiczquiz okan, taypur ora tiripintit arajpachquiztan tsjii wali pajk ispijužtakaz kjanžquichiča, tjuñ siiquiztan juc'anti. Wejt muytatami wejt cumpant'iñi žoñinacž muytatami kjanchiča.

¹⁴Niž cjen, wejrnacqui yokquiz tsucaña tjojtsinča. Nektzanaqui wejrqui tsjii jora nonzinča. Hebreo tawkuiztan wejtquiz paljayžquichiča, tuž cjican: “Saulo, Saulo, žkjažtiquiztan am wejt quintramjo? Ampacha persun quintra paača. Tsjii wacaqui ar parž quintra llawkžcu, persun janchiž quintra paača, jalla niža irata am persun quintra paača”. Jalla nuž paljayžquichiča nii tsewctan chiiñi joraqui. ¹⁵Nektzanaqui wejrqui pewczinča, tuž cjican: “Wejt Jiliri, žject amya?” Nektzan Yooz Jiliriqui wejtquiz cjichiča: “Wejrtča Jesuitqui. Amqui wejt quintram paača. Wejrtča niitqui. ¹⁶Žaažna. Tsijtsna. Amqui wejr sirwaquiča. Nižaza tii amiž chertanacami declaraquiča muzpa žoñinacžquiziqui. Wíruñaqui iyam cheraquiča wejt puntuquiztan. Jalla nektzan tjapa wejt puntuquiztan parlaquiča. Jalla nižtajapa am illzinča. Jalla nuž cjen amquiz pariscuča. ¹⁷Jaziqui am cuchnača ana judío žoñinacžquin wejt puntuquiztan parližcajo. Nektzanaqui amiž parlan, wejrqui am cwitača, judionacžquiztanami, nižaza nacjuñta žoñinacžquiztanami. ¹⁸Nacjuñta žoñinacžquiz am cuchnača, wejt puntuquiztan parlajo. Jalla nuž amiž parlitiquiztan nii žoñinacž kuzqui cjetžintaž cjequiča wejt puntu intintazajo, nižaza ana zumchiquiz kamajo, antiz zuma kamañquiz kamzjapa. Nižaza amiž parlitiquiztan ninacaqui liwriita cjequiča, Satanás cjita diabluž mantita jaru ana ojklajajo, antiz Yooz mantita jaru ojklajajo. Nižaza wejtquin criyaquiča, ninacž ujnaca pertunta cjisjapa, nižaza Yooz kamaña tanzjapa parti Yooz illzta žoñinacžtan”.

¹⁹Nektzanaqui, Agripa chawc jiliri, nii arajpachquiztan paljayta takunaca catokchinča, nii jaru kamzjapa. ²⁰Primiraqui Damasco wajtquin žejlñi žoñinacžquiz liwriiñi Yooz taku

parli kallantichinča. Nekztanaqui Jerusalén wajtquin nii Yooz taku parlichinzakazza. Niiž jaru Judea yokaran parlichinča. Niiž jaru nacjuñta žoñinacžquin Yooz taku parlichinča. Judío žoñinacžquizimi ana judío žoñinacžquizimi tjappachquiz parlichinča, ninacž kuznaca campiyajo, Yooz sirwiz quejpnajo, nižaza Yoozquin quejptiquiztan zuma kamaña tjeežnajo. ²¹Jalla nižta Yooz takunaca parlitiquiztan judío žoñinacaqui wejr preso tanchiča timpluquiz, wejr conajo. ²²Anzcama Yoozqui wejr yanapča. Jalla nižtiquiztan wejrqui tjurt'iñi kuzziz tii zuma Yooz taku paruča humilde žoñinacžquizimi pajk jilirinacžquizimi. Tuquitan Yooz taku parliñi profetž chiita tawk jaru nižaza Moisés chiita tawk jaru, jalla niicama paruča. Jalla ninacaqui mazinčiča, tuž cjan: ²³“Cristuqui sufristanča ticzcama. Nekztan ticziquiztan jacatatstanča. Jalla niiqui primer ticziquiztan jacatatchi žoñiča. Jalla nii Jesucristuž cjen tii zuma liwriñi Yooz takuqui parlitapantača učum wajtchiz žoñinacžquizimi yekja wajtchiz žoñinacžquizimi”. Jalla nii liwriñi taku zaka wejr paruča.

PABLUQUI AGRIPŽQUIZ CHIIŽINCHIČA

²⁴Pablo jalla nuž tjurt'iñi taku paljayan, Festo jiliriqui altu tawkžtan cjichiča:

—Pablo, ¡lucuratažtakazza amqui! Zmali istutižcu, jalla nižtiquiztan lucurata cjissamčalani amqui.

²⁵Pabluqui kjaaziča, tuz cjan:

—Festo, zuma chawc jiliri. ¡Wejrqui anača lucuratqui! Antiz weriž paljaya takunacača razunaqui, nižaza werarača. ²⁶Tezkimi Agripa chawc jilirimi željča. Niimi zumaž tii puntuquiztan zizza. Jalla nižtiquiztan wejrqui tjup kuztan tiiž yujcquiz chiižinuča. Tii Agripa chawc jiliriqui tjapa weriž paljaya puntunacaqui zizzipanča. Nižaza tii puntunacaqui watchiča tjapa žoñinacaž zizan, anača tsjii chjojzak watchi quinto. ²⁷Señor Agripa, chawc jiliri, ¿profetaž parlita takum criya? Amqui criiž caa kal cjiwchiya.

²⁸Agripa chawc jiliriqui Pablužquiz kjaaziča, tuž cjan:

—¿Tsji koluc takunacžtankam wejr cristiano cjiskatz pecya?

²⁹Nekztanaqui Pabluqui cjichiča:

—Tsji kjaž takunacžtan už wacchi takunacžtan wejrqui ančhuc tuž cristiano cjiskatz pecuča. Ammi nižaza tjapa tonj nonžni žoñinacami wejr irataj cjsla. Jalla nuž Yooz munañpaj cjeequi. Wejr irata Yoozquin criichej cjsla, pero ana tižta carinžtan mokta.

³⁰Jalla nuž Pabluž chiitan, tjappacha nii julzi željñi jilirinacaqui tsjitsiča, Agripa chawc jilirimi, nižaza Festo jilirimi, nižaza Berenice cjiti tjunmi. ³¹Nekztanaqui ninacaqui Pabluž puntuquiztan parlizjapa tsjii latu ojkičiča ninaccama palt'i. Jalla nekztanaqui ninaccama kazziča:

—Tii žoñiqui ana čjul ujmi paachiča, conkatajo. Anaž conta cjesača. Nižaza anaž carsilquizimi chawjcta cjesača.

³²Nižaza Agripa chawc jiliriqui Festo jiliržquiz cjichiča:

—Tii žoñiqui ana roman jiliržquin watz maytasaj niiqui, cuttaž cjitasača.

27

PABLUŽ QUIJAQUI ROMA TJATŽTAČA

¹Jalla nekztanaqui nii jilirinacaqui tantiichiča, Pabluž quija roman chawc jiliržquin tjatzjapa. Jalla nižtiquiztan Pablumi parti presonacami intirjitatača tsjii Julio cjita capitanžquiz, Italia watja chjitzjapa. Nii capitanaqui Augusto cjita batalionquiztan jiliritača. Wejrqui Pablužquiz cumpant'ichinča. ²Adramitio cjita wajtquiz tsjii warcu želatča. Nii oraqui nii warcuqui ojzcpachatača Asia kjutñi. Jalla nuž cjen nii warcuquiz luzzinča. Nižaza wejtnacatan Aristarco cjita žoñitača. Niiqui Tesalónica wajtchiz žoñitača. Tesalónica watjaqui Macedonia yokquintača. ³Jaka tažucu Sidón cjita wajtquin irantichinča. Jalla nicju Julio capitanaqui Pablužquiz tsjii favora paachiča, Pablužquiz permiso tjaachiča niiž mazinacžquin tjonznajo atintita cjisjapa. ⁴Nekztanaqui Sidón wajtquiztan ulanžcu Chipre cjita zkolta yoka watchinča. Zkar latu watchinča tjamiž

cjen. ⁵Jalla nekztanaqui Cilicia nižaza Panfiliaž niiž waruñ chawc kota kajkchinča Mira cjita watjacama. Mira watjaqui Licia cjita yokquintača.

⁶Jalla nicju zultatž capitanaqui tsjii Italia ojkñi warcu zalchiča. Nii warcuqui Alejandría wajtquiztan ulnatča. Jalla nii warcuquiz capitanaqui wejrnac luzkatchiča tira ojkzjapa. ⁷Nekztanaqui tsjii kjaž maj ojkchinča zumat. Ancha tjamiž cjen ch'aman irantichinča Gnido cjita yokž wartuñtan žcati. Nižaza nii ancha tjamiž cjen Salmón cjita yok žcati watchinča. Nekztanaqui Creta yok žcati irantican tajachuc muytižcu ojkchinča. ⁸Tjamiž cjen, ch'aman ojkcan Creta cjita yok žcati ojkchinča. Nižtami wejrnacqui irantichinča Buenos Puertos cjita watja, Lasea wajtž žcati.

⁹Jalla nicju irantizjapaqui walja timpuqui pertitača. Auti timpu irantisquiz cjen, tjamiqui tirapan tjamchiča. Jalla nižtiquiztan anawaliča chawc kotquiz ojkzqui. Jalla nižtiquiztan Pabluqui chiižinchiča, ¹⁰tuž cjican:

—Jilanaca, wilta ojkzqui anawaliž cjequiča. Warcumi cargami pertisnačhani nižaza učummiž ticznasacha.

¹¹Nii zultatž capitanažti Pabluž čiiita ana cazziča. Warcuchiz tuyñumi, nižaza warcuž capitanami, jalla ninacž takukaz nonziča. ¹²Nii wajtquiz auti timpu watzjapa, warcužtaqui anatača cuza. Jalla nižtiquiztan jos tjappacha ninacaqui pinsatča nawjctan ojkz tsjan cusa, nii. Fenice cjita wajtquin irantis pecatča jaknužumi. Fenice watjaqui Creta yokquinzakaztača. Nii wajtquiztan cheržtaqui pajk kota tjenča warutuñtan, užatuñtan. Jalla nicjuñtača waliqui auti timpu watzqui.

PAJK KOTQUIZ ANAWALI WATCHIČHA

¹³Jalla nekztanaqui warutan zuma queržcan ninacaqui pinsichiča, tira ojkzjapa. Jalla nekztan ninacaqui zarakchiča. Creta yok tjiyaranpan ojkchiča. ¹⁴Tsjii kjaž majquiztan tsjii walja pjursanti tjamiqui tjonchiča užatan tuwantan cheechi. ¹⁵Nekztanaqui tjamiqui warcu chjitchiča chawc kot mor kjutñi. Tjamž kjutñiqui anataž wira ojkchucu. Jalla nižtiquiztan jakzichuckat tjamiqui učum chjichačhani, jalla nicjupankaz okačhani. ¹⁶Jalla nekztanaqui Clauda cjita kolta yokž waruñ watchinča. Jalla nicjuñ watan tjamiqui anatača ancha pjursanti. Tsjii kolta warcuqui pajk warcuž wirquiz mojkžtatača. Ana ancha tjamiž cjen nii kolta warcuqui pajk warcuquiz tewziča ch'aman. ¹⁷Jalla nuž tewžcu, nii pajk warcu kojchnacžtan zumpacha t'ejžtatača, ana cjacsnažo. Jalla niiran yok pjila želatča Sirte cjita. Tjamiž cjen nii yok pjilquiz julz eksnatča. Jalla nižtiquiztan nii pajk pañuz cherchi pajk tultu apakchiča warcu tsewctan. Nekztanaqui tjamžquiz warcu chjitskatchiča. ¹⁸Niiž jaka tažuqui nii tjam queraqui tira walja pjursantitača. Jalla nižtiquiztan nii warcuquiz žejlñi kuzinacaqui pajk kotquiz tjojtatača. ¹⁹Jalla niipa tažuqui warcuž cusasanaca kot kjazquiz tjojtchinča wejtnaca kjaržtan. ²⁰Tsjii kjaž majquiztan ancha ch'orawitača. Jalla nuž ch'orawiž cjen anaž tjuñimi warawarami tjenatča. Nižaza nuž ch'orawiž cjen wejrnacqui “Ticznachani. Anaž jaknužumi liwriyasacha”, nuž cjican chiičinča.

²¹Tsjii kjaž maj ana čjjeri lujlchi cjen Pabluqui ninacž taypiquiz tsjitsiča, tuž cjican:

—Jilanaca, anatača učumqui Cretquiztan ulansquiz, wejt taku cazpantača ančucalacauqui. Nižaza anaž carginacami pertitasacha, nižaza učumqui anaž tiža sufritasacha. ²²Anziqiu ančucquiqi tjuj kuzziz cjisna, anača llaquiza. Tii warcuž katanami, anaž jakžiltami ticznaquiča. ²³Wejrqui Yooz sirwuča, nižaza Yooz partitča. Zez ween Yoozquiqi tsjii anjila wejtquiz chuchanzquichiča. Nii anjilaquiqi wejtquiz jeczquichiča, ²⁴tuž cjican: “Pablo, ana eksna amqui. Roman chawc jilirž yujcquiqi prisintistanča amqui. Jaziqiu amiž cjen tjapa amtan chica ojkñi žoñinaca žetaquiča”. ²⁵Jilanaca, anača llaquiza. Wejrqui Yoozquin tjapa kuztanča. Jaknuž nii anjilaquiqi chiičhaja, jalla niicamaž cumplisnaquiča. ²⁶Kot taypiquiz tsjii kolta yoka žejlča. Jalla nii yoka irantiž cjen warcuqui yokquiz čjajakžcu, tsjitsnaquiča kjazquizpacha. —Jalla nuž paljajchiča Pabluqui.

²⁷Jalla nekztanaqui pizc simana ojktiquiztan, Adria cjita kot kjazquiz želan, tjamiqui warcu chjichatča. Jalla nii ween chica arama warcu joojooñinacaqui pinsichiča, yokquin

irantičhani, cjan. ²⁸ Jalla nižtiquiztan kjazquiztan kozzuc yokquin tupžcu, zizziča quinsa tunc sojtan metro. Nižaza tsjii kjažtapacha ojkžcu wilta tupzizakazza. Jalla nuž tupžcu, zizziča paatunc pakallakun metro. ²⁹ Kjaz kosten maz akji želačhani cjan pinsičiča. Nekztan warcu wirquiztan tsjii pajkpic pajk jirunaca quijtsiča ana nii maz ajkquin čhjakajo. Ekscan tjuñi tjewks tjewznatča. ³⁰ Jalla nuž tjewžcan, nii warcu joojooñinacaqui pinsičiča, warcuquiztan atipasjapa. Jalla nuž pinsižcu, nii tewžta kolta warcu kjazquiz chjijwnatča. Jalla nuž chjijuncan nii pajk jirunaca quijtžtažokaž cjetča nii warcuž yujcquiztan. ³¹ Jalla nuž cheržcu, Pabluqui zultatž capitanžquiz paljayčiča nižaza zultatunacžquizimi, tuž cjan:

—Nii warcu joojooñinacaqui ana tii warcuquiz eclaquiči niiqui, ančhucqui ticznasača.

³² Nuž nonžcuqui zultatunacaqui nii kolta warcu mojka kojchnaca pootžinčiča kolta warcu kjazquin tjojtsnajo.

³³ Jalla nii kjantati Pabluqui taku tjaachiča čhjeri lulajo, tuž cjan:

—Pizc simana tjontača ančhucmi kuz turwayzi ana tjačhi nižaza ana lujlchi.

³⁴ Nižtiquiztan ančhucqui čhjulullamekaz lujlnalla, azi tanzjapa. Anaž jecmi wira apt'isnasača. Nižaza ana zinta čhjojricta cjequičha.

³⁵ Jalla nuž čhižcu Pabluqui tsjii t'anta tanzičha. Nižaza Yooz Ejpžquin sparaquič cjičiča tjapa nii žejlñi žoñinacž yujcquiz. Jalla nekztanaqui nii t'anta kjolžcu lujlchiča.

³⁶ Jalla nižtiquiztan tjapa nii žoñinacaqui lujlsquin kuzziz cjissiča. Nekztan lujlchizakazza.

³⁷ Nii warcuquiz paa patac pakallawc tunca sojtan žoñinacatača. ³⁸ Jaknužt zapa mayni pecčhaja jalla nuž lujlčiča. Jalla nuž lujlžcu nii parti trig kuzinaca kjaz kotquin tjojtčiča nii warcu cježu cjejajo.

WARCU KJAZQUIZ KATCHIČHA

³⁹ Tjuñi tjewktanalla, warcu joojooñinacaqui nii yoka cheržcu ana pajatča. Pero tsjii puj atquin pjila inžta k'ar yoka želatča. Nii yokquin warcu tsijtskatz pecatča. ⁴⁰ Jalla nekztanaqui nii pajk quijtžta jirunacžquiz mojka kojchmi pootčiča. Kjazquizpacha cutziča. Nižaza kochnaca jweržcu, warcu irpiñi maderanaca cutsiča. Nekztan pajk tultu, warcu juntuñ tucquin tsjijpsičha tjami tanzjapa. Jalla nižtiquiztan warcuqui puju inžta yoka žcatžinčiča. ⁴¹ Jalla nuž žcatžincan, pizc curinti ojkñi kjaz jalla nekz cjissiča. Jalla nižtiquiztan nii warcuqui kjaz koztan yokquiz quijtsiča. Warcu tucquiztanaqui pijlquiz luzzitača. Ana jaknužquin kissičha. Nižaza warcu wirquiztanaqui kjaz ljojkičaž warcu kjolatča. ⁴² Jalla nuž cjen preso itžni zultatunacaqui preso žoñinaca conz pecatča, ana atipskatzjapa kjazquiz naran. ⁴³ Zultatž capitanazti Pablo liwriiz pecatča. Jalla nižtiquiztan presonaca conawc cjen atajičičha. Nekztan mantičičha, tuž cjan:

—Kjazquiz narñi zizñi žoñinaca, ančhucqui primiraqui kjazquiz luzna, yokquin irantizjapa. ⁴⁴ Parti žoñinaca, ančhucqui tabla tanžcu kjazquiz zakaz luzna. —Jalla nuž mantičičha nii capitanauqui.

Jalla nuž tjappacha yokquin irantičičha. Ana zinta ticziča.

28

PABLUŽ MALTA YOKQUIN KAMTA

¹ Jalla nuž yokquin ulanžcu, nii kolta yokž tjuu zizzinča Malta cjitatakālča. ² Jalla nii yokquin žejlñi žoñinacaqui wejrnaca ancha wali atintičičha. Nižaza tsjii pajk uj taazinchičha wejrnac kutnajo. Chjiniž cjen zaquič cjen wejtnacaltajapa uj taazinchičha. ³ Nekztanaqui Pabluqui kjoñ žup aptičičha. Nii žup ujquin tjojtan, tsjii zkoraqui uj kjakiž cjen ulanžquičičha Pabluž kjarquin ch'atzi chejchipacha. ⁴ Jalla nuž cheržcu nii yokchiz žoñinacaqui tuž cjejassičha:

—Tii žoñiqui žoñi conñižlani. Kot kjazquiztan liwriitaž cjenami Yoozqui anat munčhani, tiž žejtzi.

⁵ Pabluqui kjarquiztan zkora tsajttsajtsičha ujquiz. Zkoraž ch'attaž cjenami anapan kjaž cjissiča Pabluqui. ⁶ Tjapa nii žoñinacaqui Pabluž kjarat tjuwačhani cjan chekznatča. Nižaza tsjii ratuquiztan ticzit cjee tiiqui, jalla nuž pinsatča nii žoñinacaqui. Jalla nuž

ažk tjewžcu, Pablo ana kjaž cjissi cherziča. Jalla nižtiquiztan pinsita campiižcu, nii žoñinacaqui cjichiča:

—Tii Pabluqui cheka Yoozalani —cjican.

⁷Ulanda yok žcati nii yokchiz jilirž yokanaca želatča. Nii jiliriqi Publio cjitatača. Jalla niiqui wejnaca zuma risiwchiča. Čhjep maj wejrnac zuma atintichiča. ⁸Publiož ejpqui laa želatča, tsjii ch'ujlñi conžtan, nižaza jawžtan. Pabluqui nižquin tjonžni ojkičiča. Nekztanaqui Pabluqui nii laa žoñžta Yoozquin mayizichiča, čhjetinzjapa. Nekztanaqui niž juntun kjaržtan lanžcu, čhjetinchiča. ⁹Jalla nižtiquiztan parti nii yokquiz žejlñi laanacaqui tjonchizakazza, jalla ninacami čhjetintatača. ¹⁰Nuž čhjetintiquiztan nii žoñinacaqui wejtnacquiz walja rispitchiča. Čhjep jizquiztan wilita tsjii warcuquiz luzzinča. Ima nii warcu luzan, nii žoñinacaqui walja zuma žaka cjižinchiča, wejrnaca ojzjapa.

PABLUQUI ROMA WAJTQUIN IRANTICHIČHA

¹¹Warcuqui nii yokquiz auti timpu watchiča. Alejandría wajtquiztan tjonchitača. Nii warcuž tucquin pizc yooznacchiztača. Cástor y Pólux cjitatača nii pizc yooznacaqui. ¹²Nekztanaqui warcuquiz ojkan, Siracusa wajtquin irantichinča. Jalla nicju čhjep maj kamchinča. ¹³Jalla nekztan warcuquiztan tira ojkičinča. Nekztan yok žcatiran ojkan, Regio cjita wajtquin irantichinča. Niiž jaka tažuqui wartan queržquichiča. Jalla nuž queržcan pucmajquiz irantichinča Puteoli wajtquin. ¹⁴Jalla nicju tsjii kjažultan Yoozquin criichi jilanacžtan zalchinča. Jalla ninacaqui wejtnacaquiz invitchiča ninacžtan tsjii simana kamajo. Jalla nekztanaqui Roma wajt kjutñi zarakchinča. ¹⁵Roma wajtchiz Yoozquin criichi jilanacaqui wejtnacaž tjonz quintu zizzitakalča. Jalla nekztan wejtnacatan zali ulanžquichiča. Jalla ninacaž nuž zalzquichiquiztan, Pabluqui Yoozquin sparaquiči cjichiča. Nižaza juc'ant tjup kuzziz cjissiča. Wejrnacqui ninacžtan zalchinča Foro de Apio cjita yokquin, nižaza Tres Tabernas cjitazakaztača. ¹⁶Jalla nekztanaqui Rom watja irantitanaqui nii capitanaqui preso žoñinaca intirjichiča roman zultatž jiliržquiz. Pero nii capitanaqui Pablo kamkatchiča jejkquin tsjii guardiñi zultatžtan.

PABLUŽ KAMTA ROMA WAJTQUIN

¹⁷Čhjep majquiztan nuž irantižcu, Pabluqui kjawzkatčiča Roma žejlñi judío jilirinaca. Jalla nuž Pablužquin tjontan, Pabluqui ninacžquin paljaychiča, tuž cjican:

—Jilanaca, wejrqui roman zultatžquiz preso intirjitatača Jerusalén wajtquin, ana čhjulumi judionacž quintra paachi cjenami. Nižaza ana čhjulumi učum tuquita ejpnacž cuzturumpi quintra paachi cjenami. ¹⁸Wejr zumpacha pecunžcu, ninacaqui wejr cuts pecatča. Wejt quintra ana čhjul ujmi watchiča, wejr conzjapaqui. ¹⁹Judío partinacazti ana munchiča. Jalla niztiquiztan roman chawc jiliržquin wejt quija tjatznajo maychinča. Jalla nuž cjenami, wejrqui wejt wajtchiz žoñinacž quintra ana čhjul uj tjeeskatz pecuča. ²⁰Jalla nižtiquiztan ančhuc kjawzkatuča ančhuca cherzjapa, nižaza ančhucatan parlizjapa. Učhumqui Israel wajtchiz žoñinacčhumča. Jalla učhumqui Yooziž cuchanžquita žoñi tjewža. Jalla nii tjewžta žoñi sirwiñiž cjen wejrqui tii carinžtan čhejlta želuča.

²¹Jalla nekztanaqui nii judionacaqui cjichiča:

—Wejrnacqui am puntuquiztan ana čhjul cartami risiwchinča Judea wajtquiztan. Nižaza nii nawjtan tjonchi judío jilanacami anaž am quintra chiiča. ²²Wejrnacqui amiž pinsita takunaca nonz pecuča. Tjapa wajtquizimi tii ew yekja t'akž quintra chiiča. Jalla nuž zizuča.

²³Jalla nekztanaqui tsjii tjuñi citčiča. Jalla nii citta tjuñquiziqui walja žoñinacaqui tjonchiča jakziquin Pablo alujassi želatčhaja, jalla nicju. Jalla nuž žoñinacž tjonžcu Pabluqui ninacžquiz paljaychiča wenstanpacha zezicama Yooz mantita kamañ puntuquiztan. Pabluqui ninaca zumpacha intintiskatz pecatča Jesucristuž puntuquiztan. Moisés liiquiztanami nižaza profetanacaž cjižrta liwrnacžquiztanami punta punta chižinchiča, ninaca zuma intintazajo Jesuž puntuquiztan. ²⁴Yekjapanacaqui Pabluž nuž

chiita takunaca catokchiča. Yekjapanacazti niiž takunaca ana nonziča. ²⁵Jalla ninacpora Jesucristuž puntuquiztan ch'aascan, nužquiz ninacaqui wichanzi kallantichiča. Ima okan, Pabluqui cjichiča:

—Espíritu Santuqui Isafas cjita profetžquiz paljaychiča učhum tuquita ejpnacžjapa. Ančuca puntuquiztan werarapan chiichiča, tuž cjican:

²⁶“Oka, tii žoñinacžquiz paljayžca, tuž cjican: Ančhucqui nonznēeka nonznaquiča, pero ana intintazasača. Nižaza chekznēeka chekznaquiča, pero ana cumprint-asasača. ²⁷Jalla nuž cjequiča. Tii žoñinacž kuznacaqui walja tjupiča, ana Yooz taku intintizjapa. Nižaza oñižtakazza ninacaqui, Yooz taku ana nonzjapa. Nižaza zuražtakazza Yooz paatanaca ana chertzjapaqui. Jalla nižtakaz žejlča ana intintiñi kuzziz cjisjapa. Nižaza ana wejtquin cut'iscaquiča, liwriita cjisjapa”.

²⁸'Jalla tekztan nawjcchuc tii liwriiñi Yooz takuqui parlitaž cjequiča ana judío žoñinacžquin. Jalla nii ziza ančhucqui. Nii yekja wajtchiz žoñinacaqui tii liwriiñi Yooz taku nonznaquiča.

²⁹Jalla nuž Pabluž chiitiquiztan, judionacaqui ojkchiča, ninacpora ancha ch'aascan.

³⁰Pabluqui pizc wata intiru nii aquilta kjuyquiz kamchiča. Jakzilta niižquin tjonzñi žoñimi zuma risiwñipanikaztača. ³¹Jalla ninacžquin parličiča Yooz mantita kamañ puntuquiztan, nižaza Jesucristo Jilirž puntuquiztan. Tjapa kuztan kjana tjaajnatča. Nižaza anaž jecmi Pablo atajchiča, Yooz taku ana paljayajo.

LA CARTA DEL APOSTOL SAN PABLO A LOS ROMANOS

¹ Wejr Pabluqui ančhucaquin tii cartal cjiyržčuča. Jesucristuž mantitacama okiñ žoñtča. Yooz Ejpqui wejr kjawžcu apóstol puestuquin utchiča, liwriiñi Yooz taku parlajo.

² Tuquitanpacha Yoozqui tsjii liwriiñi žoñi cuchanžquiz compromitchičha. Jalla nii compromittaquí Yooz cuntiquiztan chiiñi profetanacaqui mazinchičha zuma Yooz tawk libruquiz. ³ Nii liwriiñi žoñiqui Jesucristo Jiliričha. Yooz Majččha niiqui. Jesucristuqui žoñi cjcanaqui Davidž majch maatinacquiztan tjonñitača. ⁴ Nižaza Jesucristuqui ticziquiztan jacatatchičha; nižaza zuma Yooz Espirituchizza. Jalla nii kjanapacha tjeeža, niičha walja azziz Yooz Majčqui, nii. Jesucristo Yooz Majččha učum Jiliriqui. ⁵ Jesucristuž cjen wejrqui zuma Yooz kamaña tanzinča. Nižaza Jesucristuž cjen Yooz Ejpqui wejr apóstol puestuquiz utchiča, tjapa wajtchiz žoñinaca Jesucristužquin kuzziz cjeajo, nižaza nižquiz cazajo. Jalla nuž apóstol kamañquiz kamcan, Jesucristužtajapa langznuča. ⁶ Ančhuc zakaz Jesucristužquiz kuzziz cjissinčhucča. Yooz Epiž ančhuc kuzquiz kjawžtan Jesucristuž partiquiz cjissinčhucča.

⁷ Wejrqui tjapa ančhucaquin cjiyržčuča, Roma wajtquin žejlñi žoñinacčhucča. Yooz k'ayi žoñinacž cjen, Yoozqui ančhucaquiz kjawziča, Yooz zuma kamañchiz cjeajo. Učum Yooz Ejpmi, nižaza Jesucristo Jilirimi ančhucaquiz zumaj yanapt'ila; nižaza cuntintu kuzziz cjiskatla.

PABLO ROMA WAJTQUIN TJONZ PECČHA

⁸ Jaziqui ančhucž zuma kamtiquiztan Yooz Ejpžquin ancha gracias cjican chiyučha. Tjapa wajtchiz žoñinacaqui ančhuc puntu chiiča, ančhucqui ancha Jesucristužquin kuzzizza, nii. Jesucristuž cjen Yoozquin gracias cjican chiyučha. ⁹ Wejrqui tjapa kuz Yooz sirwuča, Yooz Majch liwriiñi puntu parlican. Jaziqui Yooz zizza, oracionžtan ančhucaquiz tirapan yanapuča, nii. ¹⁰ Nižaza Yoozquin mayizuča. Yooz munan, ultimu ančhucaquin jaknužquiztanami tjonzquiz atučhani. Ažka ančhucaquin tjonzquiz pecatuča. ¹¹ Ančhucatan ancha zalz pecučha, Yooz kamañquiz ančhucaquiz tsjan zuma kami yanapzjapa, nižaza Yooz tjup kuzzizpan cjiñi yanapzjapa. ¹² Ančhucmi wejrmi Jesucristužquinkaz kuzzizčhumča. Jalla nižtiquiztan zalžcu porapat chiižinascu, Yoozquin juc'ant kuzziz cjesača učumqui.

¹³ Jilanaca, cullaquinaca, ančhucaquiz zizkatz pecučha, kjaž wiltami wejrqui ančhucaquin tjonz pecatuča. Pero tii orcama ana atchinča. Ančhucaquin tjonz pecatuča, Rom wajtquiz zakaz Yooztajapa obranaca payi. Rom wajtquizimi, nižaza yekja watjanacquizimi Jesucristužtajapa langz pecučha, žoñinaca nižquin kuzziz cjeajo. ¹⁴ Wejrqui liwriiñi Jesucristuž puntu parlistanča, k'ar žoñinacžquizimi campuquiz žejlñi žoñinacžquizimi, zizñi žoñinacžquizimi, ana zizñi žoñinacžquizimi. Jalla tjapa žoñinacžquizimi liwriiñi Jesucristuž puntu parlistanča. ¹⁵ Jalla nižtiquiztan wejrqui ančhucaquiz zakaz nii puntu parliz anchal pecučha.

ANCHA AZZIZZA LIWRIIÑI TAKUQUI

¹⁶ Jakziltat liwriiñi Yooz taku catokačhaj niiqui, liwriita cjequiča. Tuquiqui judfo žoñinacžquiz nii liwriiz puntu parlitatača. Nekztan yekja wajtchiz žoñinacžquiz parlitazakaztača. Jakziltat nii liwriiz puntu catokačhaja, jalla niiqui liwriitaž cjequiča. Nižta azzizza liwriiñi Yooz takuqui. Jalla nižtiquiztan nii Yooz taku parlizjapa anal azučha; nii ancha zuma taku parlizjapa ancha jutztaznuča. ¹⁷ Liwriiñi takuqui tuž cjiča; Yoozqui ancha zumača; nižaza žoñinacžquiz nižta zuma nižaza ana ujchiz cjiskatasača. Jalla nuž cjiča nii liwriiñi Yooz takuqui. Jaknužt žoñinaca Yooz yujcquiz ana ujchiz, nižaza zuma cječhaja, jalla nii zizkatučha, nii liwriiñi taku chiican. Jesucristužquiz kuzziz cjen, jalla nii alajakaz Yooz yujcquiz ana ujchiz, nižaza zuma kuzziz cjesača. Cjirta Yooz takuqui tuž

cjiĉha: “Jakziltat Yoozquin kuzziz cjeĉhaja, jalla niiĉha Yooz yujcquiz ana ujchizqui, niĉaza zuma kuzzizqui. Nekztan Yooztan wiĉaya kamaquiĉha”.

YOOZ JAYTIŽCU ŽOŃINACAQUI UJPAN PAAĈHA

¹⁸ Arajpachquiztan Yooz casticuqui tjonĉha tjapa ana Yooz kuzcama kamĉinacĉ quintra, niĉaza anawali paaĉinacĉ quintra. Jalla nii anazum kamaĉhiz Źoĉinacaqui anawali paaznacapan pecĉha, Yooz zuma kamaĉa anaĉ importiĉha. Nekztan Yooz kuzcama ana kamĉha. Yooz puntu werara zizawc cjen, atajĉha. ¹⁹ Pero ninacĉ kuzquiz Yooz puntu zizasacĉha. Yoozqui Źoĉinacĉquiz kjanapacha tjeeziĉha, niiĉ puntu. ²⁰ Ana Yooz cherĉcumi tii mundo paatiquiztanpacha Yooz puntu zizta cjesacĉha. Niiĉ paatanaca cherĉcu, tjapa Źoĉinacaqui Yooz puntu zizasacĉha, Yoozqui wiĉaya azzizza, niĉaza werar Yoozpankazza, tii mundo paachi Yoozqui. Jalla nii kjana zizta cjesacĉha. Jalla niĉtiquiztan Yooz kuzcama ana kamcanaqui anazuma kamaĉhiz Źoĉinacaqui ana razunchizza. ²¹ Źoĉinacaqui Yooz puntu persun kuznacquiz zizza. Jalla nuĉ zizcumu, Yooz ana rispitiĉha, niĉaza ana ĉjulquiztanami “Gracias, wejt Yooz” cjican chiiĉha. Nekztan Źoĉinacaqui ina kaz pinsitanacĉhiz cjiŹiĉha. Niĉaza ninacĉ chojru kuzziz cjen ana wali zumchiquiztakaz kamĉha. ²² Źoĉinacaqui “Wejrncacĉha ziziĉntqui” cjicanami, zumzuĉtakaz cjiŹiĉha. ²³ Ancha zumapankazza Yoozqui. Pero Źoĉinacaqui nii wiĉaya Źejtĉni Yoozquiz rispitz jaytichiĉha. Nekztan Źoĉinacaqui Źoĉiĉ paata yoozquizkaz rispitiĉni cjiŹiĉha. Nii Źoĉiĉ paata yooz-nacaqui ticzĉni curpuchiz Źoĉinacĉ irata paataĉha, niĉaza weĉlanacĉ irata paataĉha, niĉaza pajkpic kjojchiz animalanacĉ irata paataĉha, niĉaza zkoranacĉ irata paataĉha. Jalla niĉta paatanacquiz rispitiĉha.

²⁴ Jalla niĉtiquiztan Yooz Ejpqui ninacĉquiz jaytichiĉha. Nekztan ninacĉ anazuma pecĉni kuzcama ĉjul ujmi paaĉiĉha. Źoĉinacpora azzucanaca paachiĉha. ²⁵ Ninacaqui Yooz puntuquiztan werar razunanaca criichi ecĉiĉha. Nekztan toscar razunanaca criichiĉha. Jalla nekztan ninacaqui Yoozquin ana rispitiĉha. Yooziĉ paata obranacquizkaz rispitiĉha, niĉaza sirwichiĉha. Pero Yoozqui tjappacha paachiĉha. Jalla nii tjapa paaĉi Yoozqui wiĉaya honorchizza. Jalla nuĉoj cjila. Amén.

²⁶ Jalla niĉta anawali kuzziz cjen Yoozqui ninaca jaytichiĉha, ninacĉ anazum kuzcama azzucanaca paajo. Jalla nuĉ azzucanaca paacan maatakanacaqui porapat Źelasiĉha, jaknuĉt lucutiĉni Źelas, jalla niĉta. ²⁷ Luctakanacaqui niĉaza porapat ana wali Źelasiĉha, jaknuĉt lucutiĉni Źelas, jalla niĉta. Ninacpora ancha peccu, azzuca ujnaca paachiĉha. Ancha akĉi ujnacquiz tjoĉsiĉha. Jalla niĉtiquiztan ninacĉ persun curpuquizpacha casticu sufriĉha, nii ana wali paatiquiztan. Niĉaza niĉta sufriŹ waquiziĉha ninacaqui.

²⁸ Werar Yooz zizucataĉha, pero ninacaqui Yooz ana pajz pecatĉha. Jalla niĉtiquiztan Yoozqui ninaca jaytichiĉha, ninaca ana zuma pinsiĉni kuzziz cjisjapa, niĉaza ana zuma cjujchi kamaĉhiz cjisjapa. ²⁹ Ninacĉ kuzquiz walja tjapaman ana zumanaca Źelatĉha, ĉjijpipacha. Jalla tiĉta ana zumanaca Źelatĉha; ana Yooz kuzcama kamz, adulteriuquiz ojklaz, Źoĉĉ quintra ana wali paaz, yekja Źoĉĉquiztan zmaz, niĉaza tjapa ana walimi paaz pecĉni kuz Źelatĉha. Niĉaza ninacĉ kuznaca tiĉtaĉha: iniziĉni kuz, Źoĉi coĉi kuz, Źoĉĉtan quija ojklaz kuz, incallĉni kuz, ana wal paaz pecĉni kuz, niĉaza ana wal quintu jooĉoĉni kuz. Jalla niĉta anawali kuzziz Źoĉi Źejlĉha. ³⁰ Ninacaqui Źoĉĉ quintra chiiĉninacaĉha. Yooz quintra ĉjaawjkatĉiĉha. Niĉaza Źoĉi inarĉiĉha, niĉaza mitarazi kuzzizza, persunpacha honora waytisĉiĉha. Niĉaza ana zuma paazjapa tantiĉiĉha, niĉaza maa ejp ana caziĉha. ³¹ Niĉaza Yooz puntu ana intintiz pecĉiĉha, niĉaza chiiĉcupacha niiĉ taku ana cumpliĉiĉha. Niĉaza ana jec Źoĉĉtanami munaziĉiĉha. Niĉaza ana pertunĉiĉha. Niĉaza ana jec Źoĉĉquizimi okzĉni kuzzizza. ³² Yoozqui mantichiĉha, jalla niĉta Źoĉinacaqui ticzpan waquiziĉha. Jalla nuĉ Yooz mantita zizcumipacha, nii ana wali Źoĉinacaqui niĉta ana wali paazkaz pecĉiĉha, niĉaza yekjaĉ niĉta ana wali paanami, “Walikazza” cjiĉiĉha.

2

YOOZZA LIJITUMA PJALZŃIQUI

¹ Jakzilta Źoĉit tsjii uj paachi Źoĉĉquiztan “Yooz nii casticla” cjican chiiĉhaja, jalla nii Źoĉiĉqui ana niĉta ujpacha paaz waquiziĉha. Jalla niĉta ujpacha paquiziĉ niiqui, persun

casticu chiiċha. Niżaza Yooz yujcquiziqui anaž razunchiz cjesaċha niiž persun paata ujquiztan. ² Yoozqui uj paañinaca ligituma pjalznaquiċha, casticjzapa. Jalla nii uċhum zizza. ³ Jequit yekja uj paañi žoñž quintra chiiċhaja, niżaza niža użzakaz persuna paaċhaja, jalla niiqui anapanž atipasaċha Yoozquiztan. Panž castictazakaz cjequiċha. Uj paažcu, anapan pinsa, “Ana Yooziž casticta cjeeka” cjican. ⁴ Jalla niža pinsiñi žoñinacaqui Yooz puntu ana zuma intintiċha. Yoozqui ancha zumaċha, niżaza tsjan juc'anti okzñi kuzzizza, niżaza tsjan juc'anti pasinsis kuzzizza. Jalla nii werar razunaċha. Pero jalla niža kuzziz cjen, Yoozqui žoñinacžquiz persun uj sint'iskatz pecċha. Nuž sint'iskatzcu ujnaca paazqui eca. Jalla nuž pecċha Yoozqui. Jalla nii zizza anċhuc, ħana jaa? ⁵ Anċhucqui ana persun uj sint'iñiž cjen, niżaza chojru kuzziz cjen, juc'anti castictaž cjequiċha Yooziž ultimu pjalz tjuñquiziqui. Jalla nii tjuñquiziqui Yoozqui žoñinacž paata ujnaca jeeznaquiċha; nekztan ultimuž casticaquiċha. ⁶ Jalla nii tjuñquiziqui Yoozqui tjapa žoñinaca pjalznaquiċha ninacaž paatiquiztan jama. ⁷ Jequit pasinsis kuzziz zuma kamañchiz kamċhaja, jalla ninacaqui Yooztan wiñaya kamaquiċha. Jalla nii zuma kamñinacaqui Yooziž tjaata honorchiz cjis pecċha, niżaza Yooziž rispitta cjis pecċha, niżaza Yooztan wiñaya kamz pecċha. ⁸ Pero yekjapanacaqui persun kuzcamakaz kamz pecċha, werar Yooz kamaña anaž pecċha. Anawalinacž mantuquizpanž žejlċha. Jalla ninacž quintra Yoozqui juc'anti žawjžcu casticaquiċha. ⁹ Tjapa anawali paañinacžtami sufris želaquiċha, niżaza wali llaqui želaquiċha. Anawali paañi judío žoñinacaqui juc'anti sufraquiċha. Pero tjapa anawali paañi žoñinacaqui zakaz sufraquiċha, infiernuquinaqui. ¹⁰ Tjapa zuma kamñinacžti Yooziž tjaata honorchiz cjequiċha, niżaza Yooziž rispittaž cjequiċha, niżaza llan kuzziz cuntintu cjequiċha. Nii zuma kamñi judío žoñinacaqui juc'ant waliž cjequiċha. Pero tjapa zuma kamñi žoñinacaqui zakaz waliž cjequiċha, arajpachquinaqui.

¹¹ Yoozqui žoñinaca ana illillžcu ligituma pjalznaquiċha. ¹² Yekjapanacaqui Moisés lii ana zizza. Jalla nižtiquiztan Yoozqui nii lii jaru ana casticaquiċha; persun uj paatiquiztanjama casticaquiċha. Yekjapanacaqui Moisés lii zizza. Jalla nižtiquiztan Yoozqui nii lii ana cumplitiquiztan jama casticaquiċha. ¹³ Jakzilta žoñinacat Moisés lii nonžcu, ana nii lii jaru kamċhaja, jalla niiqui Yooz yujcquiziqui tira ujchizza. Pero jakzilta žoñinacat Moisés lii zazzaja, jalla niiqui Yooz yujcquiziqui ana ujchizza. ¹⁴ Ana judío žoñinacaqui Moisés lii ana zizza. Jalla nuž ana zizcumi, ninapacha persun kuzquiz zuma paaz zint'asaċha, jaknužt Moisés lii zuma paaz mantiċhaja, jalla nuž. Nekztan nii kuzquiz zint'ita jaru zuma kamcan, ninacžtaqui liižtakazza nii kuzquiz zint'itaqui. ¹⁵ Jalla nuž zuma kamcan kjanapacha tjeeža, Yoozqui ninacž kuzquizpacha niiž mantitanaca zizkatcha, nii. Nii Yooziž zizkattacama ana kamtiquiztan casticta cjequiċha. Niżaza nii zizkattacama kamchižlaja, nekztan ana casticta cjequiċha. Yooz pjalz tjuñquiziqui ninacaž kamtanacqiztan jama pjaltaž cjequiċha. ¹⁶ Yoozqui Jesucristužquiz žoñinaca pjalzkataquiċha, chjojkaza paatiquiztanami, niżaza pinsitaquiztanami. Wejrqui niipan chiichinċha liwriñi Yooz puntu parlican.

JUDIO ŽOÑINACAQUI MOISES LIICHIZZA

¹⁷ Yekjap anċhucquiztan judío žoñinacċhucċha. Anċhucqui Moisés liichiz cjen “Walikaztċha wejrqui” cjiñċhucċha. Niżaza mitarazi kuzziz cjiñċhucċha, “Werar Yoozza wejt Yoozqui”, cjicanaqui. ¹⁸ Anċhucqui jaknužt Yooz munċhaja, jalla nii zizza. Anċhucqui Moisés lii tjaajintaž cjen Yooz zuma kamaña panž zizza. ¹⁹ Yooz puntu ana zizñi žoñinaca želan, anċhucqui cjiċha, “Nii zuražtakaz žoñinacžquiz tjaajznasak” cjican. Niżaza ana wal zumchiquiztakaz kamñi žoñinaca želan, anċhucqui cjiċha, “Nii ana wal kamñi žoñinacžquiz Yooz zuma kamaña tjaajznasak” kaž cjiċha; “Werjtċha ninacžtaqui kjanažtakaz” cjican. ²⁰ Niżaza anċhucqui cjiċha: “Zumzu kamñi žoñinacžquiz Yooz kamaña sok'o tjaajznasak, ana tsjii kjutñi kamajo”, kaž cjiċha. Niżaza anċhucqui cjiċha: “Yooz puntu koloculla zizñi žoñinacžquiz tjaajznasak”, kaž cjiċha. Yooz puntu razunanacaqui Moisés liiquiz kjana žejlċha. Jakziltat Moisés lii zuma zizaja, niiqui Yooz puntuquiztan zuma zizñi zizñi cjequiċha. ²¹ Jaziqui anċhucqui yekjžquiz tjaajznasaž niiqui, ħkjažtiquiztan amiž tjaajinta jaru ana kamjo? Niżaza yekjap anċhucquiztan chiižiniñċhucċha, tuž cjican: “Anaċha tjañi zaazqui”. Jalla nuž chiižcu, ħkjažtiquiztan anċhucpacha tjañi zaajo?

²² Nižaza ančhucqui cjiñčhucčha; “Anačha adulteriuquiz ojklayzqui”. Jalla nuž chiižcu, ĵkjažtiquiztan ančhucpacha adulteriuquiz ojklajyo? Ančhucqui žoñiž paata yooznaca chjaawjčha. Jaziqui, ĵkjažtiquiztan ančhucqui timplu cusasanaca cjižjo? ²³ Ančhucqui mit kuzziz cjiñčhucčha: “Wejrnacqui Moisés liichiztčha”. Jalla nuž chiižcu, ĵkjažtiquiztan ančhucqui nii lii ana cazjo? Ančhucqui nižta ana cazziž cjen Yoozquiz ana rispitičha. ²⁴ Cjijrta Yooz takuqui razunapanž chiičha. Yooz takuqui tuž cjičha: “Ančhucaž uj paachiž cjen yekja wajtchiz žoñinacaku ultim werar Yooz quintraž chiičha”.

²⁵ Tsji chiižinučha. Ančhuc judío jilanacaku Moisés lii jaru janchiquiz chimputa cjissinčhucčha. Moisés lii jaru kamchiž cječhaj niiqui, ančhucžtaqui nii chimputa walčha. Pero Moisés lii jaru ana kamchiž cječhaj niiqui, nii chimputaqui anaž walčha. ²⁶ Jaziqui tsji ana chimputa žoñiqui Moisés lii jaru kamchi cječhaja, jalla niiqui Yooz yujcquiziqui chimputažtakaz cjequičha, niž janchiquiz ana chimputa cjenami. ²⁷ Nižaza jakzilta ana chimputa žoñit Moisés lii jaru kamchi cječhaja, jalla niiqui ančhuca uj tjeeža. Ančhucqui chimputaž cjenami nižaza Moisés cjijrta liichiz cjenami, jalla nii lii ana cazza. ²⁸ Jakziltat juntuñkaz lii jaru paačhaja, jalla niiqui anačha ultimu Yooz maatiqui. Nižaza jakziltat janchiquiz alaja chimputa cječhaja, jalla niiqui anačha ultimu Yooz maatiqui. ²⁹ Pero jakziltat tjapa kuztan Yooz kuzcama kamčhaja, jalla niičha ultimu Yooz maatiqui. Nižaza niiqui persun kuzquiz ultimu Yooziž chimputačha. Tsji cjijrta lii jaru juntuñkaz kamz anačha chekanaqui. Žoñž kuzquiztančha kamz chekanaqui, lijituma Yoozquin kuzziz, už ana lijituma Yoozquin kuzziz, nii. Jalla nižta lijitum kuzziz žoñiqui Yooziž tjaata honorchizza. Žoñiž tjaata honora anaž importičha.

3

¹ Yooz yujcquiziqui judío žoñinacaku yekja wajtchiz žoñinacžquiztan tsjan walasaž niiqui, ĵčhjuljapat waljo? Nižaza janchiquiz chimputaqui, ĵčhjuljapat waljo? ² Judío wajtchiz žoñinacaž cjican, zuma walčha. Tužučha primer razunaqui. Judío žoñinacžquiz Yoozqui niž cjijrta taku cumpjičičha. ³ Nii Yooziž tjaata lii jaru yekjap judío žoñinacaku ana lijituma kamchičha. Jalla nuž ana lijituma kamchiž cjen, ninacaž compromitta taku ana cumplissičha. Jalla nuž cjenami Yoozqui niž persun compromitta taku cumpličha. ⁴ Nužupančha. Yoozqui taku chiižcu panž cumpličha, tjapa žoñinacaž chiita taku ana complichiz cjenami. Cjijrta Yooz takuqui tuž cjičha:

“Yooz, amiž chiitaqui lijitumačha. Jalla nii ziztaj cjila. Žoñinacaž am quintra uj tjojtunchiž cjenami amqui lijitumapankaz tjeežtaj cjila”.

⁵ Žoñinacaž toscara chiitaqui juc'ant tjeeža, Yoozza lijitumaqui, nii. Jaziqui, ĵkjaž cjeequi? Yoozqui nii toscara chiiñi žoñinaca ana casticž waquizičha. ĵNuž chiyasajo? ⁶ Anapančha. Yoozqui lijitumapančha. Nižaza Yoozqui uj paañi žoñinaca ana casticaquiž niiqui, inakaz jusjasacha.

⁷ Yekjapanacaku tuž cjiñičha: “Wejt toscara chiitaqui, Yooz lijitumaž, nii tjeeznaquiž niiqui, ĵkjažtiquiztan wejrqiu casticta cjesajo? Weriž toscar chiitiquiztan Yoozqui juc'anti rispitta cjesačha”. ĵJalla nuž pinsichinčhucjo? Jalla nii razunaqui ancha zumzučha.

⁸ Nižaza yekjapanacaku cjiñičha: “Anazuma paatiquiztan zuma paaznaca tsjan kjana tjeežta cjesačha. Nekztan nii anazumanaca paaz waquizičha”. Nižaza cjiñičha: “Pablo zakaz nuž tjaajñičha”. Jalla nuž cjican, yekjap žoñinacaku wejtnac quintra chiičha, wejrnacaž ana rispitta cjejajo. Jalla nižta chiiñi žoñinacaku casticta cjis waquizičha.

TJAPA ŽOÑINACAQUI UJ PAAČHA

⁹ Nekztan, ĵkjaž cji? ĵUčhum judío žoñinacaku parti žoñinacžquiztan tsjan wali žoñinacajo? Anapanž cjesačha. Wejrqiu kjanapacha tjeezinčha, judío wajtchiz žoñinacami nižaza yekja wajtchiz žoñinacami tjappacha už mantuquiz žejlčha, nii. Tjapa žoñinacami uj paazquin kuz tjačha. ¹⁰ Jalla nižtapacha cjijrta Yooz takuqui cjičha:

“Anaž jec lijitum kamañchiz žoñimi žejlčha, ana zintallami. ¹¹ Anaž jec Yooz kamaña intintiñimi žejlčha, anaž jecmi Yoozta kamzquin kuz tjačha. ¹² Tjapa žoñinacaku

Yoozquiztan tsjii kjutñi zarakčha, nižaza ana zum kuzziz cjissa. Anaž jakziltami zuma paañic žejlčha, ana zinta. ¹³ Ninacž joranacquiztan anazuma chiitanaca ulančha, ticzinacž sipultura cjetžtažokaz. Chiican, žoñinaca incallčha. Zkorž atquiz žejlñi venenožtakazza ninacaž atquiztan chiitaqui. ¹⁴ Ninacaž chiitaqui žoñž quintrapancha, nižaza žoñžtan chjaawjkatčha. ¹⁵ Ninacž kojochaqui apura zajtčha, žoñi conzjapa. ¹⁶ Ninacaqui žoñi akz pecčha, nižaza žoñžquiz llaquit kuzziz cjiskatčha. ¹⁷ Nižaza llan kuzziz kamaña anapan zizza. ¹⁸ Nižaza werar Yooz rispits puntuquiztan anaž pinsičha”.

¹⁹ Jakziltat tuquita Moisés lii mantuquiz žejlčhaja, jalla niiqui nii lii jaru kamstančha. Pero tjapa nii liichiz žoñinacaqui ana nii lii jaru kamčha. Jalla nižtiquiztan ch'uju cjissičha. Ana chiyasačha, “Wejrqui ana ujchiztčha” cjicanaqui. Tjapa žoñinacaqui, jaknužt kamčhaja, jalla nii cuenta Yoozquin tjaastančha. Tjapa žoñinacaqui Yooziž casticta cjis waquizičha. ²⁰ Anaž jakziltami Moisés lii jaru zumpacha litituma kamčha. Jalla nižtiquiztan Yooz yujcquiziqui anaž jakziltami ana ujchizza. Moisés lii ziccumi uj paaspančha. Jalla nižtiquiztan nii lii jaru ana kamtiquiztan tjapa žoñinacaqui zizza, panž ujchizza, nii.

¿ŽOÑINACAQUI, JAKNUŽT ANA UJCHIZ CJESAJO?

²¹ Moisés liiquiztan Yoozqui yekjat lii jaru žoñinacžquiz ana ujchiz nižaza zuma cjiskatčha. Pero nii puntu Moisés liimi nižaza profetanacaž cjiirta takumi zakaz chiičha. ²² Jaknužt žoñinacaqui ana ujchiz cjesajo? Jalla tužučha. Jakziltat Jesucristužquiz kuz tjaachaja, jalla niiqui Yooz yujcquiziqui ana ujchiz nižaza zuma cjequičha. Yoozqui žoñinaca ana illilla. ²³ Tjapa žoñinacaqui tsjii pariju ujchizza. Jalla nižta ujchiz cjenauqui Yoozqui ana jecžquizimi honorchiz cjiskatasachha. ²⁴ Pero Jesucristuqui ujchiz žoñinacžta persun wiržtan pacchičha, ninaca ana casticta cjejajo, nižaza Yooz yujcquiz zuma cjejajo. Yoozqui Jesucristo cuhanžquichiž cjen žoñinacžquiz pajk favora paachičha. Jalla nuž cjen Yoozqui inat žoñinaca liwriyasachha, ninaca ana čhulu paažcu. ²⁵ Yooz Ejpqui Jesucristo cuhanžquichičha ujchiz žoñinacž laycu ticzjapa. Niiž ticziž cjen jakziltat Jesucristužquin kuz tjaachaja, jalla niiqui persun ujquiztan ana castictaž cjequičha. Tuquitan ima Jesucristuž ticznana Yoozqui niižquin kuzziz žoñinacžtajapa pasinsis kuzziztačha; ninaca ana casticchičha. Pero Yoozqui uj paañinaca casticstančha. Jalla nuž cjenami Jesucristuž cjen Yoozqui ujchiz žoñinaca pertunasachha. Jalla nižtiquiztan Jesucristo cuhanžquichiž cjen Yoozqui, persun kuz zuma lititumaž, jalla nii tjeezičha. ²⁶ Uj paañi žoñinaca ana castictaž cjenami, Yoozqui lititumačha. Uj paañi žoñinacaqui Jesucristuž ticziž cjen ana castictačha. Jakziltat Jesucristužquin kuz tjaachaja, jalla niiqui Yooz yujcquiziqui zuma cjissa, ana ujchiz, Jesucristuž cjen.

²⁷ Jaziqui žoñinacaqui anapanž mitarazi kuzziz cjis waquizičha, “Yooz yujcquin walikaztčha wejrqui” cjicanaqui. ¿Kjažtiquiztan mit kuzziz ana nuž chiyas? Anaž jecmi Moisés lii jaru zuma kamchucaqui. Jalla nižtiquiztan ana lii jaru kamchiž cjen tjapa žoñinacaqui Yooz yujcquiz ujchizza. Jesucristužquin kuz tjaachiquiztan, jalla nužquikaz Yooz yujcquiz zuma cjesachha, ana ujchiz. Jalla nižtiquiztan žoñinaca ana mitaraz kuzziz cjis waquizičha. ²⁸ Wejrqui kjanapacha tjaajinchinčha, Jesucristužquin kuz tjaachiž cjen Yooz yujcquiz ana ujchiz nižaza zuma cjesachha, jalla nii. Moisés lii jaru kamchiž cjen Yooz yujcquiz anapančha zuma kuzziz cjichuca.

²⁹ ¿Yoozqui judfo žoñinacž Yooz alaja cjesajo? Anapančha. Yoozqui parti žoñinacž Yoozakazza. ³⁰ Zinta Yoozqui žejlčha. Jalla niiž yujcquiziqui chimputa judfo žoñinacami ana chimputa yekja wajtchiz žoñinacami Jesucristužquin kuz tjaachiž cjenkaz zuma cjesachha, ana ujchiz. ³¹ Jalla nižtiquiztan nuž tjaajincan wejrqui, “Moisés liiqui anaž walčha”, ¿nuž cjan tjaajnojo? Anazal nižta tjaajnučha. Liiqui panž walčha, cjiwčha.

¹ Wejrnacqui Abrahamž majch maatinacquiztan tjoniňčumča. Tuquita atchi Abraham ejpž puntuquiztan, ¿kjaž cjii? ² Abrahamqui Moisés lii jaru kamtasaž niiqui Yooz yujcquiz ana ujchiz cjitasacha. Nižaza “Wejrtča Yooz yujcquiz zumtqui” cjican chii attasacha. Pero ana nuž chii atatča Yooz yujcquiziqui. ³ Cjijrta Yooz takuqui tuž cjiča: “Abrahamqui Yoozquin kuz tjaachiča. Jalla nižta kuz tjaatiquiztan Yooz yujcquiz zumaž cjissiča, ana ujchiz”. ⁴ Tsjii zakal chiyuča. Jakzilat langznačhaja, jalla niiqui paca tanznaquiča. Nii pactaqui anača onanta, pero langztiquiztan nižta pacta cjis waquiziča. ⁵ Pero jakzilta ujchiz žoñinacat ana čhulu paažcu, Yoozquin kuz tjaachaja, jalla niž kuz tjaatiquiztankazza Yooz yujcquiz ana ujchiz, nižaza zuma kuzziz. Ujchiz cjicanpacha kuz tjaatiquiztan Yoozqui cjiča, “Nii žoňž uj pertunuča. Wejt yujcquiz ana ujchizza”. ⁶ Ana čhulu paažcu nii kuz tjaaňi žoňiqui ana ujchiz cjissa. Jalla nižta kuz tjaaňi žoňiž puntu David cjita tuquita ejpqui ⁷ tuž cjichiča:

“Jakzilta žoñinacž ujnacat Yooziž pertunta cječhaja, nižaza ninacž ujnacat Yooziž ana iya tjeežta cječhaja cuntintuž cjila.

⁸ Nižaza jakzilta žoñinacat ujnacquiztan Yooz Jiliriž ana casticta cječhaja, jalla nii žoňiqui cuntintuž cjila”.

⁹ Nii Davidž chiitaqui ¿jec žoňž puntuquiztantajo? ¿Chimputa žoñinacž puntuquiztan alajakazkaya? ¿Už yekja wajchiz ana chimputa žoñinacž puntuquiztan jaa? Wejrqui cjiwča pizequiztanpachača. Abrahamqui Yoozquin kuz tjaachiž cjen Yooz yujcquiz ana ujchiz cjissiča. ¹⁰ ¿Čhjulorquiztanpacha ana ujchiz cjissitaya? ¿Ima chimpuchiz cjen? už ¿chimpuchiz cjen jaa? Wejrqui cjiwča, anača chimpuchiz cjen Yooz yujcquiz ana ujchiz cjissiqui, pero ima chimpuchiz cjen. ¹¹⁻¹² Ima chimputa cjican Abrahamqui Yoozquin tjapa kuz tjaachiča. Jalla nižtiquiztan Yooz yujcquiz ana ujchiz nižaza zuma cjissiča. Jalla niž wiruň Yoozqui nii chimputa lii mantichiča tjeezjapa kuz tjaachiž cjen Yooz yujcquiz ana ujchizza, zuma kuzzizza, jalla nii tjeezjapa. Jalla nižtiquiztan Abrahamqui tjapa Yoozquin kuz tjaaňinacžta ejpžtakazza, ana chimputa žoñinacžtami, nižaza chimputa žoñinacžtami. Jalla nuž pinsichiča Yoozqui. Jakzilat kuz tjaachiž cjen Yooz yujcquiz ana ujchiz, nižaza zuma kuzziz cjisnačhaja, jalla ninacaqui Abrahamž ultim majchmaatinaca cjequiča. Učhum Abraham ejpqui ima chimputa cjican Yoozquin kuz tjaachiča. Jakzilta chimputa žoñinacat Abrahamžtapacha Yoozquin kuz tjaachaja, jalla ninacaqui Abrahamž ultim majchmaatinaca cjequiča. Chimputakaz ana walča, Yooz yujcquiz zuma cjejajo.

YOOZIŽ TJAATA TAKU

¹³ Yoozqui Abrahamžquizimi niž majchmaatinacžquizimi compromitan taku tjaachiča, tii muntuquiz cuntintuž cjequiča, jalla nii. Abrahamž lii jaru kamtiquiztan Yoozqui ana nižta taku tjaachiča. Pero Yoozquin kuz tjaachiž cjen nižaza zuma kuzziz cjen, Yoozqui nižta taku tjaachipanča. ¹⁴ Moisés liichiz kamňi žoñinacaqui tii muntu irinsa tanznačhaj niiqui, jalla nižtiquiztan Yoozquin kuz tjaazqui inakazza. Nižaza Yooziž tjaata taku anaž walkatča. Pero anača nižta. Anaž jecmi nii lii jaru zuma kamasacha. ¹⁵ Jaziqui lii jaru ana kamtiquiztan žoñinacaqui casticta cjistanča. Lii ana žejltasacha, nektan lii quintra ana kamtasacha.

¹⁶ Jalla nižtiquiztan Yoozquin kuz tjaatiquiztankaz Yooz yujcquiz ana ujchiz, nižaza zuma kuzziz cjesacha. Nižaza Yoozqui žoñinacžquiz okziž cjen žoñinaca ana ujchiz cjiskatča. Jalla nii wali pajk favora paachiča Yoozqui. Jalla nuž cjen Yooziž tjaata takuqui tirapanž walča tjapa Abrahamž majchmaatinacžtaqui, Moisés liichiz žoñinacžtami, ana Moisés liichiz žoñinacžtami. Yooziž tjaata takuqui walča tjapa Abrahamžtapacha Yoozquin kuz tjaachinacžtaqui. Abrahamqui tjapa učhum Yoozquin kuz tjaachi žoñinacž ejpžtakazza.

¹⁷ Jalla nužupanž cjiirta Yooz takuqui chiiča, tuž cjican: “Amqui wacchi nacionchiz žoñinacž epim cjequiča”. Jalla nižtiquiztan Abrahamqui učhum ejpžtakazza, Yooz yujcquiziqui. Abrahammi učhumnacami nii zinta Yoozquin kuz tjaachinčumča. Nii zinta Yoozqui ticzinacami jacatatskatča, nižaza ana žejlñinaca žejlzkatča.

¹⁸ Abrahamžquiz Yoozqui cjichiča: “Amqui wacchi nacionchiz žoñinacž epim cjequičha”. Jalla nii puntuquiztan zakaz Yoozqui Abrahamžquiz cjichiča: “Jalla nuž amqui wacchi majchmaatinacchiz cjequičha”. Yooz taku criichiž cjen Abrahamqui wacchi majchmaatinaca tjew tjewziča, chawcwacama. Tsjii žoñinacž “Amiž tjaata Yooz taku ana cumplita cjesača” nuž chiini cjenami Abrahamzti tira tjewziča, Yooz taku cumplispanž cjan. ¹⁹ Abrahamqui jos patac watchiz cjen ticz orquiztača. Ana majchizpan cjichucatača. Nižaza niž maatakaqui ana zinta majtchucatača. Jalla nuž pucultan ana majtchuca cjicanami, Abrahamqui Yoozquin anača upa kuzziz. ²⁰ Nižaza ana kuz turwayskatchiča. Yooziž compromitta taku cumplis ora tirapan tjewziča, cumpliscama. Tirapantača Yoozquin kuzziz. Nižaza Yooz honora waytican, juc'anti Yoozquin kuzziz cjissiča. ²¹ Abrahamqui zizziča, Yoozqui niž compromitta taku ultimupan cumpli atasača. Jaziqui tirapan tjewznatača, ana kuz paysnakžcu. ²² Jalla nižtiquiztan nižta Yoozquin kuz tjaatiquiztan Abrahamqui Yooz yujcquiz ana ujchiz cjissiča, nižaza ancha zuma kuzziz. ²³ Jalla nuž Yooz tawk liwruquiz cjiirtatača. Nii cjiirtaqui anatača Abrahamž cjen alajakaz, ²⁴ učumnacaltajapa zakaz cjiirtatača. Jakzilat Yoozquin kuz tjaachaj niiqui, Yooz yujcquiz ana ujchiz cjisnasača. Nii Yoozqui učum Jesucristo Jiliri ticziquiztan jacatatchiča. ²⁵ Jesucristuqui učum ujquiztan contatača; nižaza niž jacatatchiž cjen učumqui Yooz yujcquiz ana ujchiz nižaza zuma cjissinčumča, nižquin kuz tjaachiž cjen.

5

YOOZQUIN KUZZIZ ŽOÑINACA

¹ Jalla nižtiquiztan Yooz yujcquiz ana ujchiz, nižaza zuma kuzziz cjen, Yoozqui anača učum quintra. Jesucristo Jiliriž cjen, nižaza nižquiz kuzziz cjen učumtan Yooztan walikazza. ² Jesucristužquin kuzziz cjen učumqui Yooz partiquiz luzzinčumča. Jalla nii partiquiz učumnacaqui panž žejlča. Jalla nuž žejlcan cuntintuž tjewža, Yooziž tjaata honora tanz ora, Yooztan honorchiz cjisjapa. ³ Nii Yooz zumanaca tjewžcan, učumqui cuntintučumča. Nižaza sufris želanaqui cuntintuzakazza. Sufrisquiztan pasinz kuzziz cjissa. Jalla niiqui učumqui zizza. ⁴ Nižaza pasinz kuzziz žejltiquiztan Yoozquin tjurt'ini kuzzizpan yatisinsa. Jalla nekztan zumquin yatisinžcu, Yooz honora tjaaz ora tjewža. ⁵ Yoozqui niž Espiritu Santo učumnaca kuzquiz luzkatchiča. Nii Espiritu Santuqui učum kuzquiz luzcu, Yooz ancha zuma munaziñi kuz učumquiz intintiskatcha. Jalla nižtiquiztan Yooziž tjaata honora tjewžcan učumqui zizza, ultimquiziqui panž tanznaquičha, nii. Ana inakaz tjewznaquičha.

⁶ Učumpacha ujquiztan anatača liwrižcu. Jalla nižtiquiztan Yooziž pinsita timpuquiz Cristuqui ujchiz žoñinacž laycu ticziča. ⁷ Anaž jakzilta žoñimi tsjii žoñtjajapa pjasila ticznasača, zuma žoñi cjenami. Cunamit tsjii ancha zuma kuzziz žoñtjajapa ticz pecachani. ⁸ Yoozti niž zuma okziñi kuz tjeziča, jalla tižta. Učumnaca ujchiz cjenami Yoozqui niž Majch Jesucristo cuchanžquichiča, učumnacaltajapa ticzjapa. ⁹ Jalla nižtiquiztan Yooz Majch ticziž cjen anziqiu učumqui Yooz Ejpž yujcquiz ana ujchizza, nižaza zuma kuzzizza. Jalla niic zuma razunača. Jaziqui učumqui zuma kuzzizza. Jalla nižtiquiztan tiizakaz zuma razunača: Jesucristuž ticziž cjen učumqui ultim casticz tjuñquiziqui liwriitaž cjequičha Yooz casticzquiztan. ¹⁰ Tuquitan učumnacaqui Yooz quinratača. Jalla nuž Yooz quintra želanami, Yoozqui niž Majch cuchanžquichiča, žoñinacž laycu ticzjapa, žoñinacž pertunta cjejajo. Jalla niiqui razunača. Nižaza anziqiu učumqui Yooz pertuntača. Jalla nižtiquiztan učumtan Yooztan walikazza. Nižaza Yooz Majch jacatattiquiztan učumqui ultimquiziqui tjapa anawalinacquiztan liwriitapanž cjequičha, Yooztan wiñaya kamzjapa. Jalla niiqui zuma razunazakazza. ¹¹ Ultimquiziqui liwriitaž cjequičha. Nižaza anzimi liwriitazakaz učumqui. Jalla nižtiquiztan učumqui Yooztan tsjii kuzziz cjan, cuntintučha, Jesucristo Jiliriž cjen. Jesucristuž cjen učumqui Yooziž pertunta cjissiča. Jalla nižtiquiztan učumtan Yooztan walikazza.

ADANŽTAN JESUCRISTUŽTAN

¹² Tsjiilla cjesača. Tsjii žoñiž cjen uj žejlča tii muntuquiz. Nižaza nii ujquiztan ticz žejlča. Nižaza tjapa žoñinacami uj paača. Jalla nuž uj paačzu, ticža. ¹³ Moisés liiž tuquiqui uj paazqui želatča tii muntuquiz. Pero ana liichizlaj niiqui, žoñinacaqui nii lii quintra paata ujquiztan ana castictatača. ¹⁴ Adanž timpuquiztanpacha Moisés timpucama žoñinacaqui ticziča uj paatiquiztan. Jaknužt Adán primera uj paatčhaja, jalla nii ujpacha ana paachiča parti žoñinacaqui. Jalla nuž cjenami yekja ujnaca paachiča. Adanqui tjonni Jesucristužtakaz tjapa tii muntuquiz žejlñi žoñinacžquiz contajichiča. Jalla nii puntuquiztan Adanžtan Jesucristužtan cassa.

¹⁵ Pero tii puntuquiztan anaž cassa. Adanž uj paatiquiztan anawalinaca žejlča. Cristuž ticztiquiztannti zumanaca žejlča. Tsjii žoñiqui uj paachiž cjen tjapa žoñinacžquiz ticstatča. Jalla niičha Adanqui. Nižaza tsjii žoñiž cjenkaz walja žoñinacaqui ujquiztan liwriitača. Jalla niičha Jesucristuqui. Jesucristuž cjen Yoozqui žoñinaca okziča. Žoñinacaž ana okža cjichuca cjenami, Yoozqui žoñinacžquiz okziča. Jalla nuž okztiquiztan Yoozqui Jesucristuž cjen žoñinaca liwriichiča niiz yujcquiz ujchiz ana cjisjapa. Nužupanča. ¹⁶ Adanž uj paatižtan Jesucristuž liwriiñižtan anaž cassa. Punta puntaž žoñinacžquiz contajiča. Adanž zinta ujquiztan tjapa žoñinacaqui pjalžtača, casticta cjisjapa. Pero Jesucristuž liwriitiquiztan walja žoñinacaqui Yooz yujcquiz ana ujchiz nižaza zuma cjissa, walja ujnaca paachiž cjenami. Jesucristuž cjenkaz niža cjissa. ¹⁷ Tsjii žoñiž ujquiztan tjapa žoñinacaqui ticstanča. Jalla niic razunača. Tiiqui tsjan zuma razunača. Jakziltat Jesucristuž cjen ujquiztan liwriita cječhaja, jalla niiqui Yooz yujcquiz ana ujchiz cjequičha. Nižaza ujquiztan ticziž cjenpacha, Yooztan wiñaya kamaquičha. Nižaza honorchiz cjequičha.

¹⁸ Jaziqi tsjii žoñiž ujquiztan tjapa žoñinacaqui pjalžtača casticta cjisjapa. Nižaza tsjii žoñiž ticztiquiztan tjapa žoñinacaqui ninacž ujquiztan pertunta cjesača, ninacž ujquiztan ana casticta cjejajo, nižaza Yooztan wiñaya kamajo. ¹⁹ Yooz mantita ana cumplichiz cjen Adanqui tjapa žoñinacžquiz ujchiz cjiskatča. Jesucristuži Yooz kuz cumplichiz cjen walja žoñinacžquiz Yooz yujcquiz ana ujchiz, nižaza zuma cjiskatča.

²⁰ Yoozqui Moisesquiz tsjii lii tjaachiča, žoñinacžquiz persun ujnaca kjanapacha tjeezjapa. Nii lii zizcuqui žoñinacaqui lii quintra juc'anti uj paachiča. Jalla nuž juc'anti uj paachiž cjenami, Yoozqui niiz okžni kuz žoñinacžquiz juc'anti tjeezičha Jesucristuž cjen. ²¹ Uj paačzu žoñinacaqui ticstanča, nižaza casticta cjistanča. Pero žoñinacaž ujnacquiztan infiernuquin castictaž cjenpacha Yoozqui žoñinaca liwriichiča Jesucristo Jiliriž cjen. Žoñinacaqui Jesucristuž cjen Yooz yujcquiz ana ujchiz, nižaza zuma cjisnasacha, Yooztan wiñaya kamzjapa.

6

EW KAMAÑA PUNTU

¹ Uj puntuquiztan yekjapanacaqui chiiñičha. Učhumqui tira uj paaz waquiziča, Yooz okžni kuz juc'anti tjeezča cjisjapa. ² Pero wejr cjiwčha, anapanž uj paaz waquiziča. Tuquitan ticzi žoñinacžtakaztača učhumqui, anazum kamañchiz kamcan. Pero učhumž tuquitan anazuma uj paañi kamañquiztan jaytichinčhumčha. Jalla nižtiquiztan uj paañi kamañchiz anapanž kamz waquiziča. ³ Tjapa učhumnacaqui, Jesucristužtan tsjii kuzziz cjissinčhumčha. Bautistaž cjen nekz tjeezinčhumčha. Jesucristuqui ticžcu, tjtztatača. Jalla niža irata učhumqui anazum uj paaznaca tjtaz waquiziča. Jalla nii učhumnacaqui panž zizza. ⁴ Bautista cjiscu, nižaza Jesucristužtan tsjii kuzziz cjiscu, učhumnacaqui uj paañi kamañquiztan jaytichinčhumčha. Nekztan zuma ew kamañchiz cjissinčhumčha. Yooz Ejpqui persun aztan Jesucristo ticziquiztan jacatatskatchičha. Jalla niža irata Yoozqui učhumnaca anazuma kamañquiztan liwriichiča, zuma ew kamañchiz cjejajo.

⁵ Jakziltat Jesucristužtan tsjii kuzziz cječhaja, jalla niiqui Jesucristužtan ticziča, anazum uj paañi kamañquiztan liwriita cjisjapa. Nižaza jakziltat Jesucristužtan tsjii kuzziz cječhaja, jalla niiqui Jesucristužtan jacatatchičha, ew zuma kamañchiz cjisjapa. ⁶ Jaknužt Jesucristuqui cruzquiz ch'awcta ticzižlaja, jalla niža irata učhumqui ticzižtakaz cjissičha

uj paaz pecñi kuzquiztan. Jalla nižtiquiztan učhum anazum uj paaz pecñi kuzqui nužquiz ana azziz cjisñi. Nižaza nii uj paaz pecñi kuzqui ana iya mantasača učhum kuzquizpacha. Jalla nii učhumqui panž zizza. ⁷Jakziltat uj paaz pecñi kuzquiztan ticzi cječhaja, jalla niiqui uj paañi kamañquiztan liwriita cjequiča. ⁸Nižaza jakziltat Jesucristužtan tsjii kuzziz cjisñi cjen uj paañi kamañquiztan liwriita cječhaja, jalla niiqui ew kamañchiz cjequiča, Jesucristužtakaz. Nižaza Jesucristužtan chica kamaquiča. Jalla nii razuna criichinčhumča. ⁹Jesucristuqui ticziquiztan jacatatchiča. Jalla nižtiquiztan ana wilta ticznaquiča, nižtaqui ana iya ticz žejlča. ¹⁰Jesucristuqui žoñinacž ujquiztan ticziča, tsjii wilta. Ana wilta ticznaquiča. Jaziqui žejtča, nižaza Yooztajapa kamča. ¹¹Jalla nižtiquiztan ančhucqui cjuñzna, uj paañi kamañquiz liwriitaž, nii. Jaziqui Jesucristo Jiliriz cjen Yooztajapa ew kamañchiz kamla.

¹²Uj paaz pecñi kuzqui ana mantiskata, anazumanaca paajo. ¹³Nii uj paaz pecñi kuzqui curpu mantis pecčhaj niiqui, panž ewjasa. Pero ančuca curpu zuma paazjapa, nižaza Yooz sirwizjapa kuz tjaa. Ančhucqui anazum uj paañi kamañquiztan liwriita cjisicu ew zuma kamañchiz cjisinčhucča. Jalla nižtiquiztan ančhucqui Yooz kuzcama kamajo Yooz mantuquiz cjee, tjapa curpumi, nižaza kuzmi. ¹⁴Ančhucqui anača iya Moisés lii mantuquiz. Okzñi Yooz mantuquizza ančhucqui. Jalla nižtiquiztan nii uj paaz pecñi kuzqui ana mantiskata.

YOOZ MANTUQUIZPANKAZ CJEE

¹⁵¿Kjaž cjesajo? Moisés lii mantuquiz ana žejlcan, nižaza okzñi Yooz mantuquiz žejlcan, ¿uj paañi kamañchiz želasajo? Anapanž cjesača. ¹⁶Jakziltat tsjii žoñž mantuquiz žejlčhaja, jalla nii patrunž mantitanaca caspanikazza. Jalla nižta irata jakziltat uj paaz pecñi kuz mantuquiz žejlčhaja, ujnaca paasača; jalla nekztan Yooziž castictaž cjequiča. Nižaza jakziltat Yooz mantuquiz žejlčhaja, jalla niiqui Yooz kuzcama cumplis waquiziča. Jalla nekztan tsjan tsjan zuma kamañchiz cjequiča. ¿Nii ana ziz ančhucqui? ¹⁷Tuquiqui ančhucqui uj paaz pecñi kuz mantuquiz žejlñitača. Nekztan Yooz puntu zuma werar razunanacaqui ančucaquiz tjaa jintatača. Jaziqui jalla nii tjaa jintanac jaru tjapa kuztan kamča. Jalla nižta ančuca zuma kamañchiz cjen Yoozquin gracias cjican chiyučha. ¹⁸Jalla nižtiquiztan nii uj paazquiztan liwriitača ančhucqui. Nižaza zumanaca paazjapa tjapa kuz tjaa chinčhucča. Yooz manta paaz cjisinčhucča. ¹⁹Žoñž wirquiztan punta punta chiyučha, Yooz puntu tintintazkatzjapa. Ana nižta chiitasaz niiqui, ančhucqui anaž tintintazasača. Tuquiqui ančhucqui uj paaz pecñi kuz mantuquiz želatča, ujnaca paacan. Jalla nuž žejlcan juc'anti juc'anti uj paachinčhuctača. Jazizti Yooz mantuquiz tsjan tjapa kuztan žela, tsjan zumanaca paazjapa. Jalla nuž žejlcan Yooztakaz tsjan tsjan zuma kuzziz cjisnaquiča.

²⁰Tuquiqui ančhucqui uj paaz pecñi kuz mantuquiz žejlcan, zumanaca paazjapa ana impörtičha. ²¹Jalla nuž kamcan, ančhucaltajapa ¿čhjul walitajo? Jaziqui ančucaž tuquita paatanacquiztan ančhucaltaqui azipanča. Jalla nižta anazum kamchi žoñinacaqui wiñay-japa Yooziž castictapanž cjequiča. ²²Pero ančhuczi nii anazum uj paañi kamañquiztan liwriitača. Yooz mantuquiz cjisinčhucča. Jalla nižtiquiztan ančhucqui tsjan tsjan zuma kamañchizza. Nižaza Yooztan wiñayaž kamaquiča. ²³Jakziltat anazum uj paañi kamañquiz kamčhaja, jalla niiqui Yooziž castictaž cjistanča. Nuž waquiziča. Pero Yoozqui žoñinacžtajapa tsjii pajk favora paachiča, žoñinacaž ana waquizan. Nužkaz paachiča niž zuma okzñi kuzziz cjen. Jaziqui jakziltat Yooziž liwriita cječhaja, jalla niiqui Jesucristo Jiliriz cjen Yooztan wiñayaž kamaquiča.

7

LII PUNTU

¹Moisés lii zizñi jilanaca, cullaquinaca, ančhucqui zizza, ima ticzcan, žoñinacaqui Moisés lii mantuquiz žejlča. ²Nižaza tsjaa maataquui zalz kamz lii mantuquiz žejlča, naaža lucu ticzcama. Naaža lucuž ticznaquiz niiqui, nekztan naaqui nii lucutiñi kamañ liiquiztan liwriitača. ³Jaziqui naaža persun lucu žetan, naaqui yekja luctakžtan želaquiz

niiqui, jalla naaqui adulterio paača. Naaža lucu ticznaquič niiqui, jalla nekc lucutiñ kamañ liiquiztan liwriitača. Jalla nižtiquiztan yekja lucžtan zalžnanami, anaž adulterio cjesača.

⁴Wejt jilanaca, cullaquinaca, jalla nižta iratača Moisés lii puntuquiztanaqui. Jesucristuqui ančuca ujnacquiztan ticziča. Niiž cjen ančhucqui Yooz yujcquiz ana ujchizza, zuma kuzzizza. Moisés lii mantuquiz žejlcan, anapan zuma kuzziz cjisñi atchucatača. Jaziqui ančhucqui ticzi žoñižtakazza nii lii puntuquiztan. Jalla nižtiquiztan yekjaž mantuquiz žejlča, Jesucristuž mantuquiz, tsjii yekja lucžtan zalzižtakaz. Jesucristuqui ticziquiztan jacatatchiča, ančucaž Yooztajapa zumanaca paajo. ⁵Tuquiqui učhum persun kuzcama kamcan, učhum uj paaz pecni kuzqui učhumnacaquiz mantiñitača, ujnaca paajo. Jalla nižta ujnaca paatiquiztan infieruquin Yooziž casticta cjichucatača. Moisés liiquiz "Anača uj paazqu" cjican cjenami učhum uj paaz pecni kuzqui juc'anti uj paazquin učhum chjitchiča. ⁶Ima Jesucristužquin kuz tjaacan, jalla nižta kamchinčumča. Pero jaziqui učhumqui Moisés liiquiztan liwriitača. Tuqita nii liiž mantuquiz učhum želatča, preso tanta žoñižtakaz. Anziqiu Espiritu Santuž mantuquiz žejlča. Niiqui učhumnacaquiz ew kamaña tjaachiča.

¿JECT WEJR YANAPASAJO, ZUMA PAAZJAJAJO?

⁷Jaziqui ¿kjažu cjeequi? ¿Moisés liiqui anawalejo? Anapanž cjesača. Moisés lii mantuquiz ana kamtasaz niiqui, wejrqui wejt ujnaca anal pajkattasača. Moisés liiquiz "Anača zmazñi kuzziz cjee" cjiča. Nekztan wejt zmazñi kuz zuma pajchinča. ⁸Moisés liiquiz nižta mantita cjen, wejt uj paaz pecni kuzqui tjapamana zmaz pinsichiča. Nii lii quintra ancha paaz pecatča. Pero nii liiqui ana žejltsazaž niiqui, jalla nižtiquiztan nii zmazqui anaž pajta cjitasakalča. ⁹Ima Moisés lii pajcan, cuntintul kamchinča. Nekztan Moisés lii mantitanaca pajtiquiztan wejt ujnaca pajchinča, nižaza juc'anti uj paachinča. Jalla nižtiquiztan persun kuzquiz weriž paata uj zint'ican, llaquita žejlchintača. Wejt persun uj paatiquiztan Yooz castictal cjis waquizuča. ¹⁰Wejrqui Moisés lii jaru zumpacha kamtučhaja, jalla nekztan Yooztan cuntintu kamtasacha. Pero nii Moisés lii jaru ana zuma kami atchinča. Jalla nižtiquiztan nii liiž cjen wejtquiz tjeežtača, wejr castictal cjis waquizuča, jalla nii. ¹¹Moisés liiquiz mantitanaca žejlča. Nii mantitanacaqui zizcuqui wejt uj paaz pecni kuzqui juc'ant uj paaz pecchiča. Anapan nii lii jaru kami atuča. Incalla cjissinča. Nii lii jaru ana kamtiquiztan, Yooz casticta cjichucatača.

¹²Moisés liiqui Yooziž mantitatača. Jalla nižtiquiztan ancha zumača nii liiqui. Nižaza nii liiquiz mantitami ancha zumapanča, nižaza Yooz kuzcamača, nižaza wejtta waliča.

¹³Nii liiqui wejtta wali zumažlaj niiqui, ¿kjažtiquiztan nii liiž cjen Yooz casticta cjis waquizasajo? Nii liiqui zumača. Pero nii zuma lii zizcuqui, wejt uj paaz pecni kuzqui juc'anti ana wal uj paaz pecchiča. Jalla nekztan wejt quintra Yooz casticž žejlča. Jalla nižtiquiztan tjeežtača, wejt uj paaz pecni kuzqui ana zumapanča, nii. Nižaza Moisés lii quintra paatiquiztan tsjan juc'ant anazumaž cjissa wejt uj paaz pecni kuzqui.

¹⁴Učhumqui zizza, Moisés liiqui Yooz Espiritu Santuž kuzcamača. Wejrzi persun kuzcama kamz pecuča. Jalla nižta kamcan wejt uj paaz pecni kuz mantuquiz želuča.

¹⁵¿Kjažtiquiztan nižta ana zuma paatojo? Anal tintazuča. Jesucristužquin kuz tjaazcu, jalla nekztanpacha zuma paaz pecni kuzziz cjissinča. Jalla nižta kuzziz cjenami, uj paaz pecni kuzzizpanča. Zuma paaz pecumi, anal zuma payi atuča. Ana pecta uj paaznaca, jalla niikal wilta wilta paa-uča. ¹⁶Jalla nižta paachiž cjenauqui, wejrqui pajuča, Moisés liiqui zumača, jalla nii. ¹⁷Ana zuma paacanami wejt kuzquiz zuma paaz pecuča. Jalla nižtiquiztan wejrpacha nii anazuma paatanaca anal iyal paaz pecuča. Pero wejt uj paaz pecni kuzqui nii ana zuma paatanaca paakatča. ¹⁸Wejt uj paaz pecni kuzqui ana zumapanča. Yooz aztankaz zuma payi atasacha. Wejrqui zuma paaz pecanami, wejt persun aztan nii zuma paazqui anal atuča. Weriž kamtiquiztan nii razuna zizñi cjissinča. ¹⁹Wejrqui weriž zuma paaz pectanacaqui anal paa-uča. Antiz weriž ana paaz pectanacaqui, nii ana zumanacal paa-uča. ²⁰Jalla nižta ana weriž pectanaca paacan, wejrpacha ana nižta paa-uča. Pero wejt uj paaz pecni kuzqui nižta anazuma paakatča.

²¹Jalla nižtiquiztan wejtquiz nižtapan žejlča. Zuma paaz pecanami, wejt uj paaz pecni kuzkaz mantiz pecča. ²²Wejt kuzquizpacha Yooz kuzcamapan paaz ancha pecuča. ²³Jalla nuž cjenami uj paaz pecni kuzziztča. Wejt curpu mantiz pecča. Jalla nižtiquiztan wejt uj paaz pecni kuzqui wejt zuma paaz pecni kuz quintrača. Wejrqui anazuma paacan wejt uj paaz pecni kuz mantuquiz želuča. Nižaza nii uj paaz pecni kuzqui wejt curpu mantiča. Weriž kamtiquiztan nii razuna zizni cjissinča.

²⁴Ana waliča wejrqui. Jalla nižtiquiztan ¿jequit tii ana zuma paañi curpuquiztan wejr liwriyaquiya? ¿Tii casticzkatni curpuquiztanya? ²⁵Yoozquin gracias cjican, chiyuča, učhum Jesucristo Jiliriča wejt liwriñiqui. Wejrpacha tjapa wejt zuma paaz pecni kuztan Yooz kuzcama kamuča, wejt uj paaz pecni kuz uj paaz pecanami.

8

ESPIRITU SANTO KUZQUIZ ŽEJLČA

¹Jesucristuž partiquiz žejlñi žoñinacaqui ana Yooziž casticta cjequiča. Ninacaqui Yooz Espiritu Santuž kuzcama kamča; uj paaz pecni kuzcama ana kamča. ²Jesucristuž cjen wejrqui Espiritu Santuž mantuquiz želuča. Espiritu Santuž cjen ew kamañchiz kamuča. Nii Espiritu Santuqui uj paaz pecni kuz mantuquiztan wejr liwriichiča. Uj paaz pecni kuz mantuquiz tira žejltasaž niiqui, Yooziž wiñaya casticta cjitasacha. ³Žoñinacaž uj paaz pecni kuz mantuquiz žejlan, Moisés lii jaru ana kami atchiča. Jalla nižtiquiztan Yoozqui niž persun Majch cuchanžquichiča. Ujchiz žoñižtakaz curpuchiz kamchiča. Pero ana ujchizza niiqui. Žoñž curpuchiz cjican, ujchiz žoñinacž laycu ticziča. Jalla nuž cjen Jesucristuqui ujchiz žoñinacž cuntiquiztan casticta cjissiča, Jesucristužquin kuzziz žoñinaca ana casticta cjeajo. ⁴Moisés liiquiz Yooz kuzcama kamzqui mantitača. Jakziltat uj paaz pecni kuz mantuquiz kamčhaja, jalla niiqui Yooz kuzcama ana kamča, nižaza Moisés liicama ana kamča. Pero jakziltat Yooz Espiritu Santuž mantuquiz kamčhaja, jalla niiqui Yooz kuzcama kamča.

⁵Jakziltat persun uj paaz pecni kuzcama kamčhaja, jalla niiqui persun pinsitanacžquizkaz kuz tjaača. Pero jakziltat Espiritu Santuž kuzcama kamčhaja, jalla niiqui Yooz Espiritu Santuž pinsitanacžquiz kuz tjaača. ⁶Jakziltat uj paaz pecni kuz pinsitanacžquiz kuz tjaačhaj niiqui, Yooziz wiñaya castictaž cjequiča. Pero jakziltat Espiritu Santuž pinsitanacžquiz kuz tjaačhaj niiqui, Yooz kamañchiz kamaquiča, nižaza Yooztan nižtan walikaz cjequiča. ⁷Jakziltat persun anazum kuzcamakaz kamz pečhaja, jalla niiqui Yooz quintrača. Yooz kuzcama anapanž kamz pecča, nižaza anapanž atča. ⁸Jakziltat persun kuzcamakaz kamz pečhaja, jalla nuž kamtiquiztan Yoozqui anapanča cuntintu.

⁹Ančhuczi persun kuzcamakaz anaž kamča. Yooz Espiritu Santuž ančuca kuznacquiz žejlchiž cjen, ančhucqui Espiritu Santuž kuzcama kamča. Jakziltat ana Jesucristuž Espirituchizlaja, anača Jesucristuž partichiz žoñiqui. ¹⁰Jesucristuž ančuca kuznacquiz žejlchiž cjen Yooz yujcquiz ana ujchizčhucča, nizaza zuma kuzzizčhucča. Nižaza ančuca animunacaqui ew zuma kamañchizza. Uj paachiž cjen ančuca curpunacaqui ticznaquiča. Jalla nuž cjenami ančuca animunacaqui Yooztan wiñaya kamča. ¹¹Yooz Ejpqui niž Espiritu Santuž cjen Jesucristo ticziquiztan jacatatskatchiča. Nii Yooz Espiritu Santuqui ančuca kuzquiz žejlča. Jalla nižtiquiztan Yooz Ejpqui niž Espiritu Santuž cjen ančuca ticzi curpunaca zakaz jacatatskataquiča.

¹²Jilanaca, cullaquinaca, tsjii mantuquiz kamspanča učhumqui. Anača uj paaz pecni kuz mantuquiz kamzqui, persun kuzcamakaz paazjapa. Pero Yooz Espiritu Santuž mantuquiz kamsa. ¹³Jakziltat persun kuzcamakaz kamchiž cječhaja, jalla niiqui Yooziž wiñaya castictaž cjequiča. Pero jakziltat Espiritu Santuž mantuquiz žejlčhaja, jalla niiqui uj paaznaca jaytiča. Jalla nuž ujnaca jaytichiž cjen, Yooz kamañchiz kamaquiča.

¹⁴Jakziltat Yooz Espiritu Santuž irpita cječhaja, jalla niiqui Yooz maatiča. ¹⁵Ančhucqui Yooz maatinacčhucča. Jaziqui Espiritu Santuqui ančuca kuznacquiz luzziž cjen, ana Yoozquiztan eksni kuzzizza. Espiritu Santuž cjen, “Učhum Yooz Tata”, ¹⁶jalla nuž cjican

u'chum kuznacaqui chii'cha. Nižaza kuzquiz sint'iskat'cha, u'chum'cha Yooz maatinacaqui, jalla nii. ¹⁷ Nižaza Yooz maatinacaž cjen Yooziž tjaata zuma irinsa tanznaqui'cha, jalla nii irinsa'cha Yooztan wiñaya kamzqui, Jesucristužtan chicha. Tii muntuquiz kamcan Jesucristuqui sufrichi'cha. U'chumqui Jesucristužquiz sirwichiž cjen zakaz sufraquiž niiqui, nekztan arajpachquin nižtan chica honorchiz cjequi'cha.

¹⁸ Tii timpuquiz sufrisnacaqui ana'cha ancha. Cjuñzna, Yooziž tjaata honora'cha ancha zuma. Jalla nuž cjuñznu'cha wejrqui. Jesucristuž tjonz tjuñquiziqui u'chumnacaqui zuma honorchiz cjequi'cha. Jalla nii tjeežtaž cjequi'cha. ¹⁹ Tjapa tii muntuquiz žejlñinacaqui ancaž tjewža, Yooz maatinacž honora tjeez tjuñi. ²⁰ Adanž uj paatiquiztan tjapa tii muntuquiz čhjultakimi inakaz cjissi'cha. Yooz munan jalla nuž cjissi'cha. Ana'cha juytokaz inakaz cjissi'cha. Pero tsjii noojiqui tii muntumi tii muntuquiz žejlñinacami anawalinacquiztan liwriitaž cjequi'cha. Jalla nii tjuñi tjewža. ²¹ Jalla nii noojiqui tii muntumi tii muntuquiz žejlñinacami tjapa ana walinacquiztanami liwriitaž cjequi'cha. Ticzmi anawali watñinacami ana želaqui'cha. Liwriitiquiztan tii muntumi tii muntuquiz žejlñinacami liwž zumacama cjiskattaž cjequi'cha, jaknužt Yooz maatinacaqui zumapan cjiskattaž cje'chaja, jalla nižta irata. ²² Adanž timpuquiztanpacha tii timpucama tjapa tii muntuquiz žejlñinacaqui sufri'cha jaknužt tsjaa ic maataka majtz ora sufri'chaja, jalla nižta ancha ayincan žejl'cha. ²³ U'chum kuzquiz zakaz ancha sufri'cha, Espiritu Santuchiz cjenami. Nii Espiritu Santuqui tsjii zuma adelanto u'chum kuzquiz žejl'cha. Jalla nuž cjen u'chumqui ancha tjewža, juc'ant tsjan zuma kamañchiz cjisjapa. U'chumqui Yooz maatinacaž cjitiquiztan nii zuma kamañchiz cjisnaqui'cha. Nižaza u'chum Yooz maatinaca cjan, ew curpuchiz cjisnaqui'cha. ²⁴ Jalla nuž u'chumnacaqui tjewža liwriitaž cjen. Čhjulunacat chert'chaja, jalla nii chertanaca ana tjewža cjequi'cha. Ľjec žoñit chertanaca tjewznasajo? ²⁵ U'chumnacaqui ana chertanaca tjewža. Yoozquiztan tjonñi zumanaca tjewža. Jalla nižtiquiztan pasinziz kuztan tjewstan'cha.

²⁶ Jaknužt u'chum zuma tjewzqui sufris awantizjapa yanap'chaja, jalla nižta irata Yooz Espiritu Santuqui u'chum yanap'cha tjurt'iñi kuzziz cjisjapa. U'chumqui Yoozquiztan jaknužt mayiziz waquzičhaja, ana zizza. Jalla nižtiquiztan Yooz Espiritu Santupacha u'chumnacalta ancha mayižinñi'cha, nižaza niipachaž ancha sint'i'cha u'chumnacalta. Nii Espiritu Santuž mayižintauqui žoñž tawkžtan ana chiita cjesa'cha. ²⁷ Espiritu Santuqui criichi žoñinacžta mayižinñi'cha Yooz Ejpž kuzcamakaz. Jalla nuž mayižinan kuzquiz zizñi Yooz Ejpqui nii Espiritu Santuž kuzquiz pinsitanaca zizza. Jalla nižtiquiztan Yooz Ejpqui Yooz Espiritu Santuž u'chumnacalta mayižintanaca zizza.

YOOZ EJPQUI NIŽ MAATINACŽTAN ANCHA MUNAZIČHA

²⁸ Yoozqui niž pinsitacama žoñinaca kjawzi'cha, niž maati cjiskatajo. Jalla nii kjawža žoñinacaqui Yooztan zuma munazi'cha. Jalla nii munazita žoñinacžta Yoozqui čhjulu cjenami manti'cha ninacžta zuma cjisjapa. U'chumqui nii zizza. ²⁹ Yoozqui tuquitanpacha zizzi'cha, jecnacat niž maatinaca cjisna'chaja, jalla nii. Nižaza tuquitanpacha Yoozqui niž maatinaca utchi'cha, niž zinta Majch irata cjisjapa, jalla nižta zuma cjisjapa. Jalla nuž Yoozqui pinsichi'cha, niž zinta Majchqui jilir jila cjisjapa, tjapa Yoozquin criichi žoñinacžquiztan juc'ant honorchiz cjisjapa. ³⁰ Yooz Ejpqui jecnacat niž maatinaca cjisna'chaja, nii pinsichi'cha. Ninaca kjawzizakazza. Nižaza Yoozqui jecnacat kjawžt'chaja, jalla ninaca ana ujchiz cjiskat'cha. Nižaza Yoozqui jecnacat ana ujchiz cjist'chaja, jalla ninaca juc'ant zuma kamañchiz cjiskat'cha.

³¹ Tjapa nii puntuiztan u'chumqui, Ľkjaž iya cjequejo? Yoozqui u'chumnacaltajapapan'cha. Jalla nižtiquiztan Ľject u'chum atipasajo? Anaž čhjulumi. ³² Yoozqui niž zinta Majch ana chjojchi'cha, antiz u'chumnacaltajapa utchi'cha, u'chum laycu ticzjapa. Jalla nuž niž zinta Majch utchiž cjen u'chumnacaquiz tjapa niž zumanaca zakaz tjaaqui'cha, juc'ant zuma kamañchiz kamajo. ³³ Nižaza Yooz illta žoñinacžjapa anaž jecmi uj tjojnasa'cha. Yoozpacha ninaca ana ujchiz cjiskatchi'cha. ³⁴ Jalla nižtiquiztan Ľject Yooz illta žoñinacžquiz "Casticta cjistan'cha" cjican chiyasajo? Anaž jecmi. Jesucristu'cha ninacž laycu ticziqui. Nekztan ticziquiztan jacatatchi'cha. Anziqui Yooz

Ejpž žew kjarquiz žejlča, tjapa mantican. Jalla nii Jesucristupachača uĥumnacalta tjurt'ižinniĥi. ³⁵ Ćhjulunacaž watanami Jesucristuqui uĥumnacatan munaziĥa: sufris watanami, llaquinaca watanami, ĥjaawjkatñi watanami, mach'a watanami, ana zquiti žejlž watanami, ana waliž tjonanami, ana wali ticz watanami, ĥhjulunacaž watanami Jesucristuqui uĥumnacatan munaziĥa. ³⁶ Cjijrta Yooz takuqui tuž cjiĥa:

“Yooz partiquiz žejlĥiž cjen uĥumnacaqui sufrican sufrican zapuru ticzmayažtakaz žejlča. Uĥum quintra žoñinacaqui tantiiĥa, criichi žoñinacaž contaj cjila, cjican. Conz uuzanacažtakaz uĥumnacaquiz nayĥa”.

³⁷ Pero ĥhjulunacaž watanami Jesucristuqui uĥumnacatan panž munaziĥa. Nižaza ĥhjulunacaž watanami uĥumnacaqui Jesucristuž cjen tjapa nii anawalinacžquiztan atipaquiĥa. ³⁸ Anaž ĥhjulumi Yooz uĥumnacatan ana munazizkati atasacĥa: anaž ticzmi, anaž žetimi, anaž anjilanacami, anaž mantinñinacami, anaž poderchiznacami, anaž anztan žejlñinacami, anaž jaztan žejlñinacami, ³⁹ anaž tsewcta poderanacami, anaž tii yokquiz žejlñi poderanacami, anaž ĥhjul paatanacami Yooz uĥumnacatan ana munazizkati atasacĥa. Yoozqui uĥumnacatan panž munaziĥa, uĥumnacatan Jesucristo Jiliržtan tsjii kuzziz cjen.

9

JUDIO WAJTCHIZ ŽOÑINACA

¹ Tsjilla cjesacĥa. Jalla tii puntuquiztan wejrqui zuma razunapal cjiwĥa. Jesucristužquiz kuzziz cjen razunal chiyuĥa, anal toscara chiyuĥa. Espiritu Santuqui wejt kuz zizza. Lijituma cjiwĥa. ² Anĥa llaquizuĥa, nižaza wejt kuzquiz anĥal cjuñžuĥa wejt judío wajtchiz žoñinacžquiz. ³ Wejt judío žoñinacaqui Jesucristuž partiquiz cjskat-tasaž niĥi, wejrqui Jesucristužquiztan t'akžtacama cjis pectasaĥa. Nižaza wejrqui ninacž laycu infiernuquin castictacama cjtasaĥa. Ninacaqui wejt parti žoñinacaĥa. ⁴ Israel majchmaatinacquiztan tjonĥiž cjen, ninacaqui Yooz illzta žoñinacaĥa. Yoozqui judío žoñinacžquiz persun honora tjeeziĥa. Nižaza Yoozqui judío žoñinacžtan acuerdunacquiz luzziĥa. Nižaza Yoozqui Moisesquiz lii tjaacĥiĥa ninacžtajapa. Nižaza Yoozqui, jaknužt niizquiz sirwiz waquizicĥaja, jalla nii cuzturumpinaca ninacžquiz tjaacĥiĥa. Nižaza tuqui timpuquiz Yoozqui ninacžquiz takunaca tjaacĥiĥa, jaztanaqui tsjii Liwriiñi tjonaquiĥa, nii. ⁵ Uĥum judío žoñinacž tuquita atĥi ejpnacaqui Yooziž illztataĥa. Jaziqui uĥum judío žoñinacž majchmaatinacquiztan tjonñitaĥa Cristuqui. Nekztan žoñž curpuchiz cjsiĥiĥa. Cristuĥa tjapa mantiñi Yoozpachaqui. Nižaza wiñaya honorchiz cjila. Nužoj cjila. Amén.

⁶ Tjapa Israel cjita tuquita ejpž majchmaatinacaqui anaĥa ultim lijitum Israel wajtchiz žoñinaca, nižaza anaĥa Yooz wajtchiz žoñinaca. Tjapa judío žoñinacami ana Yooz maatinacaž cjenami, Yooz takuqui cumplsiĥa. ⁷ Nižaza tjapa Abrahamž majchmaatinacaqui anaĥa ultim lijitum Abrahamž familiaqui. Cjijrta Yooz takuqui Abrahamž puntuquiztan tuž cjiĥa: “Am ultim majchmaatinacaqui am majch Isaacžquiztan okaquiĥa”. ⁸⁻⁹ Jaziqui wejrqui cjiwĥa, tjapa Abrahamžquiztan ojĥñi majchmaatinacaqui anaĥa ultim Yooz maatinaca, nii. Yoozqui Abrahamžquiz taku tjaacĥiĥa, tuž cjican: “Weriž ĥiita timpuquiz quejpžcacĥa, wejt taku cumplizjapa. Jalla nii weriž quejpžquizcama am Sara cjiti tjunqui tsjii majch mataquiĥa”. Nekztan Abrahamqui nii taku catokĥiĥa. Nižaza Yoozqui tjapa niiz taku catokñi žoñinacžquiz nayĥa, ninacaqui ultim lijituma Abrahamž majchmaatinacaĥa, nii.

¹⁰ Tsjilla cjesacĥa nii puntuquiztan. Uĥum Isaac tuquita atĥi ejpqui Rebeca cjiti tjunchizza. Nii lucutiñiĥi pucultan majchnacchiztaĥa. ¹¹⁻¹³ Nii pucultan ocjalaz ima matan, nižaza ima zuma ana zuma paan, Yoozqui Rebecaquiz cjichiĥa, tuž cjican: “Am jilir majchqui niiz majchmaatinacžtanpacha niiz lajkžquiz piyunanaca cjequiĥa niiz lajkž majchmaatinacžquizpacha”. Nižaza cjijrta Yooz takuqui tuž cjiĥa: “Jacob pecĥinĥa. Esau ana pecĥinĥa”. Jaknužt Yooz pinsitĥaja, jalla nuž illziĥa. Paatanacquiztan jama ana illziĥa Yoozqui. Pero niiz pectacama illziĥa, nižaza kjawziĥa niiz partiquiz cjisjapa.

¹⁴Jalla nii puntuquiztan ¿kjaž iya cjequejo? ¿Yooz ana litituma paajo? Anaž cjesača. Yoozqui litituma panž paacha. ¹⁵Yoozqui Moisesquiz cjichiča, tuž cjan: “Wejt munañpacama wejt okžni kuz tjeeznuča, nižaza wejt munañpacama favora paaznuča”. ¹⁶Ana žoñž munañpacama, nižaza ana žoñž langžtacama Yoozqui okža. Pero Yoozqui persun kuz munañpacama okža. ¹⁷Cjijrta Yooz takuqui tuž cjiča: Yoozqui Egipto nación chawc jiliržquiz cjichiča: “Wejrqui am utchinča chawc jiliri cjisjapa. Jalla nuž am utchinča, am quintra wejt azi tjeezjapa, nižaza tjapa tii žoñinacžquiz weriž paata quintu mazta cjisjapa”. Jalla nuž cjichiča Yoozqui. ¹⁸Yoozqui persun kuz munañpacama okža, nižaza persun kuz munañpacama žoñinacž kuz chojruzakaz cjiskatča. Jalla nižta kjanapachača.

¹⁹Cunamit tsjiiqui cječhani, tuž cjan:

—Jalla nižta cjen, ¿kjažtiquiztan Yoozqui žoñinacž ujquiztan casticaquejo? ¿Jec žoñit Yooz pinsita quintra kamasajo?

²⁰Jalla nižta chiiñžquiz pewcznača, ¿ject amjo Yooz quintra ch'aazjapajo? ¿Tsjii ojchqui niž paañžquiz chuchasajo, “¿Kjažtiquiztan wejr nižta paajo?” cjanajo? ²¹Tsjii ojch paañiqui čhjulumi paasača ljocquiztanaqui. Ljocquiztan paasača tsjii anča c'achja ojchlla pjijztanacžquiz joojoota cjisjapa. Nižaza ana zuma cheechi ojch paasača, zapuru joojoota cjisjapa.

²²Jalla nižta iratača Yoozqui. Yoozqui tsjii žoñinaca utchiča, casticta cjisjapa. Jalla nuž utchiča, niž azi tjeezjapa, nižaza niž uj quintra žawjz tjeezjapa. Jalla nuž tjeezni peccanami Yoozqui pasinziz kuztan nii ana wal žoñinaca awantiča, casticz tjuñicama. ²³Nižaza Yoozqui yekjap žoñinaca utchiča, niž okžta cjisjapa. Tuquitanpacha nii žoñinaca tjacziča, arajpachquin zuma honorchiz cjisjapa. Nižaza Yoozqui nii žoñinacžtan okžni kuztan žejlča, niž juc'ant okžni kuz tjeezjapa. ²⁴Učhum zakaz Yoozqui kjawziča, niž okžta žoñinaca cjisjapa. Judío wajtchiz žoñinacami ana judío wajtchiz žoñinacami, tjapa učhumqui Yooz okžta žoñinacčhumča. ²⁵Jalla nii puntuzakaz Yoozqui Oseas cjijrta liwruquiz tuž cjiča:

“Ana Yooziž illzta žoñinacaqui Yooziž illzta žoñinaca cjequiča. Nižaza tuqui ana pecta žoñinacaqui anziqui Yooziž pecta cjequiča”.

²⁶Nižaza tuquiqui judío žoñinacaqui cjichiča: “Ančhucča anaž Yooz wajtchiz žoñinacaqui”. Pero tii timpuquiz nii iñarta žoñinacaqui “zejtñi Yooz maatinacaž cjequiča”.

²⁷Israel žoñinacž puntuquiztan Isafas profetaqui tuž cjichiča: “Israelž majchmaatinacaqui anča tama želaquiča, kot at pjilažtakaz, jalla nižta miraquiča. Jalla nuž mirchi cjenami, tsjii kjaž žoñinacakaz liwriitaž cjequiča. ²⁸Yooz Jiliriqui tii muntuquiz žejlñi žoñinacžquiz niž čhiita taku cumplaquiča, panž apura cumplaquiča”. ²⁹Jalla nii puntuzakaz Isafas profetaqui mazinchiča tuž cjan:

“Walja azziz Yooz Jiliriqui tsjii učhum majchmaatinaca ana liwriitasaz niiqui, tjappacha ticztasača Sodoma wajtchiz žoñinacažtakaz, nižaza Gomorra wajtchiz žoñinacažtakaz”.

JUDIO ŽOÑINACAQUI UJQUIZ TJOJ TSA

³⁰¿Kjaž cjequejo nekztanaajo? Tuquiqui ana judío žoñinacaqui ana importichiča Yooz yujcquiz ana ujhiz cjisjapa. Jaziqui Jesucristužquin kuz tjaachiž cjen Yooz yujcquiz ana ujhiz cjissiča. ³¹Nižaza judío žoñinacaqui Moisés lii jaru kamz pecatča, Yooz yujcquiz ana ujhiz cjisjapa. Pero nii lii jaru ana zumpacha kami atchiča. ³²¿Kjažtiquiztan Yooz yujcquiz ana ujhiz cjisni atatjo? Ninaca persunpacha lii jaru kamtiquiztan Yooz yujcquiz zuma cjis pecchiča. Pero ana atchiča. Nižaza nii lii jaru kamz peccan, juc'ant ujhiz cjissiča, Jesucristužquin ana kuz tjaachiž cjen. Jaknužt tsjii mazquiz tejžcu tjojtšaja, jalla nižta irata Jesucristužquiztan ujquiz tjojtšiča. ³³Jalla nužpacha cjijrta Yooz takuqui cjiča: “Žoñinaca nonžna; wejrqui Sión cjita wajtquiz tsjii utča. Jalla nižquiztan žoñinaca ujquiz tjojtšnaquiča. Tsjii maztakaz nižquiztan žoñinaca t'eznaquiča. Pero jakziltat nižquiz kuz tjaachaja, jalla niiqui ana inakaz kuz tjaaquiča. Ana incallta cjequiča”.

10

¹ Jilanaca, cullaquinaca, judío žoñinaca liwriitaj cjila, jalla nužuča weriž kuzquiz pectaqui. Nižaza jalla nužuča weriž Yoozquin mayiztaqui. ² Ninacž puntuquiztan wejrqui ticlarača, ninacaqui Yooz sirwiz pecča, nii. Pero Yooz sirwiz puntu ana zuma intintazza. ³ Jaknužt Yoozqui žoñinaca ana ujchiz, nižaza zuma cjskatchaja, jalla nii Yooz pinsita ana zizza. Ninacaqui persun kuzquiz pinsitacamakaz Yooz yujcquiz zuma cjis pecča. Jalla nižtiquiztan Yooz pinsitiquiz ana importichiča; nižaza Yooz taku ana nonža. ⁴ Jesucristuqui Moisés lii nužquiz apatatskatchiča. Jaziqui jakziltat Jesucristužquiz kuz tjaačhaja, jalla niikaz Yooz yujcquiz zuma cjisnaquiča, ana ujchiz.

⁵ Yooz yujcquiz zuma cjis puntuquiztan Moisesqui tuž cjiirčiča: “Jakziltat wejt lii jaru kamčhaja, jalla niiqui Yooztan kamaquiča, lii jaru kamchiž cjen”. Pero žoñinacaqui nuž kami anapan atča. ⁶ Jaziqui Jesucristužquiz kuz tjaachiž cjenkaz Yooz yujcquiz zuma cjesača. Jalla nii puntuquiztan tužuča. Ančhuca kuzquiz ana pinsaquiča, tuž cjican: “¿Ject arajpacha yawasay?” (Jalla nuž cjican, Jesucristo chjiwkwatz pecča.) Ana čjul žoñimi nižta paasača. ⁷ Nižaza ančhuca kuzquiz ana pinsaquiča, tuž cjican: “¿Ject ticzi žoñinacžquin okaqui?” (Jalla nuž cjican, Jesucristo ticziquiztan jacatatskatz pecča.) Ana čjul žoñimi nižta paasača. ⁸ Pero čjul žoñimi Yoozquin kuz tjaachiž cjen Yooz yujcquiz zuma cjisnasača. Yooz yujcquiz zuma cjisqui jalla tužuča. Liwriiñi taku ančhucalta žejlča, Yoozquin kuzziz cjisjapa. Nii taku ančhuca atžtan parlasača, nižaza ančhuca kuztan catokasača. Jalla nii liwriiñi takuqui tužuča: Jesucristužquiz kuz tjaaquiž niiqui, liwriita cjequiča, nii. Jalla niipacha wejrnacqui paljayuča. ⁹ Ančhucqui ticlarstanča, Jiliripanča Jesucristuqui, cjicanaqui. Nižaza ančhuca kuzquiz criistanča, Yoozqui Jesucristo ticziquiztan jacatatchiča, jalla nii. Jalla nekztan liwriita cjequiča. ¹⁰ Žoñinacaqui tjapa kuztan criistanča, nekztan Yooz yujcquiz zuma cjequiča, ana ujchiz. Nižaza persun tawkžtan “Jesucristužquiz kuz tjaa-uča” cjican ticlarstanča, nekztan liwriita cjequiča.

¹¹ Cjiirta Yooz takuqui tuž cjiča: “Jakziltat Yoozquin kuz tjaačhaja, jalla niiqui ana inakaz kuz tjaaquiča”. ¹² Judío žoñinacžtanami yekja wajtchiz žoñinacžtanami Yooz yujcquiziqui tsjii parijukazza. Yooz Jiliriča tjapa žoñinacžta Jiliriqui. Jakziltat liwriita cjisjapa Yoozquiz mayizičhaja, jalla nižquiz Yoozqui okznaquiča; nižaza liwriyaquiča. ¹³ Jalla nužpacha cjiirta Yooz takuqui cjiča: “Jakziltat Yooz Jiliržquiz mayizičhaja, jalla niiqui liwriita cjequiča”. ¹⁴ Pero žoñinacaqui Yoozquin ana criyaquiž niiqui, ¿kjažt nii žoñinacaqui Yoozquin mayizasajo? Nižaza Yooz puntuquiztan ana nonzitažlaj niiqui, ¿kjažt Yoozquiz cryasajo? Nižaza Yooz puntu paljayñi žoñi ana želaquiž niiqui, ¿kjažt nonžni cjesajo? ¹⁵ Nižaza Yooz puntu paljayñi žoñinaca ana cuchanžquitažlaj niiqui, ¿kjažt Yooz puntu paljayta cjesajo? Cjiirta Yooz takuqui tuž cjiča: “Ancha zumača Yooz puntu paljayñi žoñinacaqui. Paljayta Yooz taku catokžcu, Yooztan žoñinacžtan wali cjskatasacha”.

¹⁶ Pero wacchi žoñinacaqui paljayta Yooz taku ana juyzu paacha. Jalla nužupan Isaiasqui cjichiča: “Yooz Jiliri, ¿ject wejrnacž paljayta takunaca criijo? Tsjii kjažukazza criichiqui”. ¹⁷ Jaziqui Jesucristuž puntu paljaytažlaja, nii puntu nonžta cjesača. Nižaza Jesucristuž puntu nonžcu, žoñinacaqui nižquin kuz tjaasača.

¹⁸ Wejr pewcznuča, ¿Judío žoñinacaqui ana nonzejo? Nonzipanča. Yooz takuqui cjiča:

“Tjapa kjutñi tii yokchiz žoñinacžquiziqui nii liwriiñi taku mazmaztača. Nižaza tjapa tii muntuquiz žejlñi žoñinacaqui nii taku nonža”.

¹⁹ Tsjižtan wilta pewcznuča, ¿Israel wajtchiz žoñinacaqui ana intintazzikaya? Tuquiqui judío žoñinacž puntuquiztan Moisesqui cjichiča:

“Yoozqui ančhucaquiz iniziskataquiča, yekja wajtchiz žoñinacžquiztan. Nižaza Yoozqui ančhucaquiz žawjkataquiča tuqita ana Yooz pajñi wajtchiz žoñinacžquiztan”.

²⁰ Nekztanaqui Isaiasqui ana eksu, tuž chiichiča:

“Ana werar Yooz pecñinacaqui ultimquiziqui Yooz pajchiča. Nižaza Yoozqui persunpacha tjeeziča tuqita ana nižquiz pecñinacžquiz”.

²¹Yooz Ejpqui Israel wajtchiz žoñinacž puntuquiztan tuž cjiča:

“Zita zita wejrqui ančhuc kjawznatuča wejtquin tjonajo. Ančhuczti anaž wejt kjawžta cazza, antiz wejt quintrakazza”.

11

CRIICHI JUDIO ŽOÑINACA ŽEJLČHA

¹Jalla nižtiquiztan wejrqui pewcznuča, ¿Yoozqui niž tuqita illzta žoñinaca ch-jatkatjo? Anapanž cjesača. Wejrpacha Israel wajtchiztča, Abrahamž majchmaatitča, nižaza Benjaminž parti žoñtča. ²Tuquitanpacha Yoozqui Israel žoñinaca illziča. Jalla nižtiquiztan anaž chjatkatasacha. ¿Jalla Elías puntuquiztan ana cjuñjo? Elías puntuquiztan cjjirta Yooz takuqui tuž cjiča: Elíasqui Israel žoñinacž ujnaca Yoozquiz tjeeziča, tuž cjičan: ³“Yooz Jiliri, ninacaqui amiž cuchanžquita profetanaca conchiča. Nižaza am sirwiz altaranaca pajlchiča. Wejrqui am sirwiñi zinalla želuča. Ninacaqui wejr zakaz konz pecča”. Jalla nuž cjichiča Elíasqui. ⁴Nekztan Yoozqui Elíasquiz tuž kjaaziča: “Wejtajapa pakallawk warank žoñinaca čhjetzinča. Ninacaqui Baal cjita žoñiž paata yooz yujcquiz anapan quillziča”. ⁵Jalla nižta irata tii timpuquiz zakaz tsjii kjaž judfo žoñinacaqui Yooz partiquiz žejlča. Yoozqui ninacžquiz okžcu, illziča. ⁶Nii criichi judfo žoñinacaqui Yooziž okziž cjenkaz illztača. Jalla nižtiquiztan ana ninacaž kamtiquiztan illztača. Ninacaž kamtiquiztan illzta cjitasaž niiqui, Yooz okzqui inakaz cjitasača.

⁷¿Jazic kjaž cji? Israel wajtchiz žoñinacaqui ujquiztan liwriita cjis pecatča. Pero ana liwriitatača. Yooziž illztanacaqui ninaca alajakaz liwriitatača. Parti Israel žoñinacazti chojru kuzziz cjissiča. ⁸Jalla nii chojru kuzziz žoñinacž puntuquiztan cjjirta Yooz takuqui tuž cjiča:

“Yoozqui Israel žoñinacžquiz niž puntu ana intintiñi kuzziz cjiskatchiča. Jalla nižtiquiztan ninacaqui Yooz puntu chercanpacha ana chernižtakaz cjiskatchiča, nižaza Yooz puntu nonzcanpacha ana nonžnižtakaz cjiskatchiča. Anzta tii timpucamaž nižta žejlča”.

⁹Nižaza Davidqui Yooz tawkw liwruquiz tuž cjjirchiča:

“Yoozquin ana kuzziz žoñinaca žejlča. Yooziž tjaatanacaqui ninacžquiz ujquiz tjojtskatla. Tsjii trampažtakaz cjila, ujquiz tjojtskatzjapa. Nižaza ninaca t'ezinla, ninacž uj paatiquiztan jama casticta cjisjapa. ¹⁰Zur žoñinacažtakaz žejlcan Yooz puntu ana cherni cjiča. Nižaza ninacž tajqui chutunzižtakaz cjila, ana walinacaž tjonchiž cjen”.

YEKJA WAJTCHIZ ŽOÑINACŽ PUNTU

¹¹Jalla nižtiquiztan wejrqui pewcznuča, Israel wajtchiz žoñinacaqui ujquiz tjojtsiž cjen, ¿wiñaya chjatkatta cjesajo? Anapanž cjesača. Israel wajtchiz žoñinacž liwriiñi tawkuiz ana juyzu paachiž cjen, nii liwriiñi takuqui yekja wajtchiz žoñinacžquiz paljaytača, Israel žoñinacžquiz p'ekinchayzjapa, Yoozquin kuz tjaajo. ¹²Israel žoñinacž liwriiñi taku ana juyzu paachiž cjen parti žoñinacžtajapa zuma cjissiča. Nižaza ninacaž Yoozquiztan jaytitiquiztan yekja wajtchiz žoñinacžtajapa wali cjissiča. Jalla nižtiquiztan Israel žoñinaca wilta Yooz partiquiz cjisnan tsjan juc'ant zumaž cjisnaquiča yekja wajtchiz žoñinacžtajapa.

¹³Anziqiu ančhuc yekja wajtchiz žoñinacžquiz chiyuča. Wejrqui yekja wajtchiz žoñinacžquiz cuchanžquita apostoltča. Jalla nižtiquiztan wejt apóstol kamaña anchal importayuča, ¹⁴wejt judfo sarchiz žoñinaca p'ekinchayzjapa, nižaza tsjii kjažu liwriita cjisjapa. ¹⁵Judfo žoñinacž chjatkattaž cjen yekja wajtchiz žoñinacaqui pertunta cjissiča, Yooztan wali cjisjapa. Jalla nižtiquiztan nii judfo žoñinacž wilta Yooz partiquiz risiwa cjis cjen, žoñinacaqui ticziquiztan jacatatchi cjisnaquiča. ¹⁶Judfo žoñinacž tuqita atchi ejpnacaqui Yooz partiquiz želatča. Jalla nižtiquiztan tsjii tjonñi timpuquiz judfo žoñinacaqui Yooz partiquiz wilta cjisnaquiča. Jaknužt primir paata t'antaqui zumažlaja,

jalla nekztan tjapa nii t'anti mazaqui zuma zakazza. Nižaza tsjii munti sep'aqui zumažlaj niiqui, nii tsijtñi muntiqui zuma zakazza.

¹⁷ Tsjii judío žoñinacaqui munti itzanacažtakaz ts'ojrtača. Nižaza ančhuc yekja wajtchiz žoñinacaqui tsjii ana pecta munti itzažtakazza. Pero ančhucqui judío žoñinacž cjenpacha apjattača, nii zuma muntiz cjen wali zakaz cjejajo. Nii zuma muntiqui Yooz partičha. ¹⁸ Ančhucqui jalla nuž apjattiquiztan, anaž judío žoñinaca inaraquičha. Jakziltat inaračhaja, jalla niiqui tuž cjuñz waquiziča, ančhucqui nii sep'až cjen žetiñčhucča. Ana ančhucacž cjen nii sep'a žejtča. Nii sep'ača judío žoñinacaqui. Cristučha tsjii judío žoñiqui. Jalla niiz cjen ančhucqui ew žeti tanzinčhucča.

¹⁹ Yekjapanacaqui cunamit cječhani, “Nii itsanacaqui ts'ojrtača wejrnaca apjatža cjisjapa”. ²⁰ Razunaž niiqui. Ana Yoozquin kuz tjaachiž cjen judío žoñinacaqui chjatkattača. Ančhuczi Yoozquin kuz tjaachiž cjen jalla nii alajakaz Yooz partiquiz žejlča. Jalla nižtquiztan anača mitarazi kuzuz cjeella. Antiz humilde kuzuz cjee, Yooz rispitan. ²¹ Yoozqui ana kuz tjaañi judío žoñinacžjapa quintra cjissižlaj niiqui, ančhucajapa zakaz quintra cjisnaquičha ana niizquiz kuzuzlaj niiqui. ²² Yooza okzñimi nižaza casticñimi, jalla niž tantiya. Yoozquiztan zarakñi žoñinacžjapa casticñipanča. Nižaza nižquin kuz tjaañinacžjapa okzñipanča. Ančhucqui tira Yoozquin kuzuzlaj niiqui, nekztan Yoozqui ančhuc tira okznaquičha. Ančhucqui ana tira Yoozquin kuzuzlaj niiqui, nekztan Yoozqui ančhucacž zakaz chjatkataquičha. ²³ Nii chjatkatta judío žoñinacaqui wilta Yoozquin kuz tjaaquiz niiqui, wilta Yoozqui ninaca ricujaquičha. Yoozqui ricujzmi atča, Yooz partiquiz cjisjapa. ²⁴ Ančhucqui yekja wajtchiz žoñinacača, ana pecta munti itzanacažtakaz. Ana Yooz partiquiz želan Yoozqui ančhuc niž partiquiz apjatčičha, yekja wajtchiz žoñinacž cjenami. Jalla nižta watan, judío žoñinacaqui Yooz partiquiz wilta apjatžqui tsjan jasilača, tuquiqui Yooz partiquiz žejlčič cjen.

JUDIO ŽOÑINACAQUI YOOZQUIN KUZ TJAAQUIČHA

²⁵ Jilanaca, cullaquinaca, tsjii tuquita ana zizta taku ančhucacžiz zizkatz pecučha, ana mitaraz kuzuz cjisjapa, “Wejrnacqui ziziñ žoñtča” cjecanaqui. Jalla tuž zizkatz pecučha: Yoozqui yekja wajtchiz žoñinacžquiz niž partiquiz cjiskatz pecča. Jakziltanacžquiz Yoozqui niž partiquiz luzkatz pecčhaja, jalla ninacaqui luzaquičha. Tjapa nii Yooziž pecta žoñinaca Yooz partiquiz luzcama, jalla niicama Israel žoñinacaqui chojru ana intintiñi kuzuz cjequičha. ²⁶ Jalla nekztanaqui tjapa nii timpuquiz žejlñi Israel žoñinacaqui liwriita cjequičha. Jalla nuž cjiirta Yooz takuquičha:

“Sión wajtquiztan tsjii Liwriiñiqui tjonauquičha. Jacobž majchmaatinacquiztan ana zum kamañanaca jaytiskataquičha. ²⁷ Jalla nekztanaqui wejrqui ninacžtan compromi-tača, ninacž ujnaca pertunača, nii”.

²⁸ Tii timpuquiziqui Israel žoñinacaqui Yooz liwriiñi tawk quintrača, nižaza Yooz quintrača, ančhucalta wali cjisjapa. Jalla ninaca Yooz quintraž cjenami Yoozqui ninacžtan munaziča, ninacž tuquita atchi ejpnaca illziž cjen. ²⁹ Yoozqui tjaacanpacha anaž niž tjaataqui kjañasača. Nižaza Yoozqui illžcupacha, ana chjatkatasacha. ³⁰ Tuquiqui ančhucqui Yooz ana cazziñčhucča. Anziqui ančhucqui Yooziž pertuntača, ninacaž ana Yooz cazziž cjen. ³¹ Tii timpuquiziqui Israel žoñinacaqui Yooz ana cazza. Jalla nuž cjenami tii jarquin ninacaqui Yooziž pertuntaž cjequičha, jaknužt ančhucqui pertunta cjistčhaja, jalla nižta. Jalla nižta Yoozqui niž okzñi kuz tjeeznaquičha. ³² Yoozqui tsjii pariju tjapa žoñinacž ujnaca tjeeziča, nižquiz ana cazta, jalla nii. Jalla nuž tjeeziča tjapa žoñinacžquiz tsjii pariju niž okzñi kuz tjeezjapa.

³³ Ancha juc'anti zumača Yoozqui! Ancha zuma pinsitanacchizza. Nižaza Yoozqui tjapa intintazza. Nižaza Yooziž pinsitanaca anaž jecmi zuma intintasača. Yooz pjalan anaž jecmi nižquiz mitisasača. ³⁴ ¿Ject Yooz Jilirž pinsitanaca intintasajo? ¿Ject Yooz Jiliržquiz tjaajnasajo? ³⁵ ¿Ject Yooz Jiliržquiz ayñi cjisjapa tjaasajo? Anaž jecmi. ³⁶ Tjapa Yoozquiztan tjonča. Nižaza tjapa niž cjen žejlča. Nižaza tjapa nižtacamacha. Yoozqui wiñaya honorchiz cjila. Jalla nužoj cjila. Amén.

12

YOOZ KUZCAMA KAMZ PUNTU

¹Jilanaca, cullaquinaca, Yooz ančhuc okziž cjen ančhucaquiz chiižinuča, ančhuca persun curpu Yoozquin tjaa, tsjii žejtñi wilanažtakaz. Ančhuca persun curpu Yooztajapakaz cjee, ana zinta uj paacan. Nuž cjen Yoozqui cuntintuž cjequiča. Jalla nižtača Yooz ultim litituma sirwizqui. ²Jaknužt tii muntuquiz ana criichi žoñinaca kamčhaja, jalla nižta ančhucqui ana kama. Antiz ančhucac pinsitanacaž campiita cjee, Yooz pinsitanacaž irata cjeয়ো. Tjapa ančhuca kamaña zuma cjee. Jalla nekztan Yooz kuz zizñiž cjisnaquiča. Yooz kuzqui zumapanča, nižaza Yooz kuzcama kamzqui Yoozquiz cuntintu cjisnatča, nižaza Yooz kuzcama kamcan ančhucqui zumapan cjequiča.

³Yoozqui wejr okžcu apóstol puestuquiz wejr utchiča. Jalla nižtiquiztan tjapa ančhucaquiz chiižinuča, persun puntuquiztan anača pinzizqui, “Wejrqui tsjan zumtča” cjecanaqui. Jalla nuž pinziz anaž waquiziča. Antiz zapa mayni persun kamañ puntuquiztan zuma razunchiz pinziz waquiziča. Cjuñzna, Yoozqui zapa maynižquiz tsjii kamaña tjaachiča, Yoozquin kuzziz cjtiquiztan jama. Jaziqi ana mitarazi kuzziz cjee. ⁴Tsjii curpuquiz wacchi partinaca žejlča. Punta punta žejlča, cherni, nonžni, lanzni jalla nižta. ⁵Jalla nižta irata Cristuž partiquiz žejlča. Učhumqui tamaž cjen tsjii pariju Cristuž partiquizkaz žejlča, tsjii curpužtakazza. Cristuž partiquiz žejlcan, učumnacaqui tsjii kuzziz uniru žejlča.

⁶Yoozqui zapa maynižquiz yekja yekja kamaña tjaachiča, jaknužt munčhaja, jalla nuž. Jalla nii tjaata kamañ jaru kama. Yooziž tjaata taku parliñi kamañchižlaj niiqui, jalla nii kamañquiz zuma kama, Yoozquiz tjapa kuzquiztan jama. ⁷Iclizquiz yanapñi kamañchižlaj niiqui, zuma yanapz waquiziča. Yooz puntu tjaajiñi kamañchižlaj niiqui, zumapan tjaajinz waquiziča. ⁸Yoozquin kamzjapa p'ekinchayñi kamañchižlaj niiqui, zumapan p'ekinchayz waquiziča. Yoozquin cusasanaca tjaañi kamañchižlaj niiqui, tjapa kuztan tjaaz waquiziča. Icliza irpiñi kamañchižlaj niiqui, zumapan irpiz waquiziča. T'akjir žoñinacžquin okžni kamañchižlaj niiqui, zuma cuntintu yanapz waquiziča.

ZUMAPAN KAMAQUIČHA

⁹Tjapa kuztan porapat lititum zuma munaziñi cjee. Ana zuma paaznaca anapan peca. Pero zuma paaznaca tjapa kuztanpan paa. ¹⁰Porapat oksaspanča. Zuma kuztan parti hermanonacžquiz rispitaquiča, anača tsjiiž rispitskaz tjewzqui.

¹¹Ana jayrazñi kuzziz cjee, pero c'unchi kuzziz cjee Yooz sirwizjapa. Nižaza tjapa kuztanpan Yooz sirwa.

¹²Arapach zumanaca tjewžcan, cuntintuž kama. Llaquinacaž tjonanami pasinziz kuzziz kama. Yoozquin parlicanpan žela.

¹³Criichi žoñinacaž t'akjiri želan, panž yanapa. Tjonžñinaca tjonan, panž kjawžna.

¹⁴Ančhuca quintra žoñinacžtajapa Yoozquiztan mayižinaquiča, ninaca zuma cjisjapa. Anaž quintra chiichiyaquiča. Antiz mayižinaquiča.

¹⁵Cuntintu žejlñi žoñinacžtan cuntintuza cjee. Kaañi žoñinacžtan chicazaž kaazna.

¹⁶Porapat zuma munazican kama. Anača mitarazi kuzziz tucquin cjis pecsqui. Pero humilde kuzziz wirquin cjian cuntintuž cjee. Anača “Wejrqui zuma ziziñ žoñičha” cjee.

¹⁷Tsjiiqui ančhuca quintra paachiž cjen, ančhucqui anača nižtapacha quintra tjepunzqui. Zumapanž paazjapa tjapa kuz tjaa. ¹⁸Nižaza ančhucqui tjapa žoñinacžtan zuma kama, attacama. ¹⁹Pecta jilanaca, cullaquinaca, ančhucpacha anača quintra tanassa. Yoozpachaž ančhuca quintranaca casticaquiča. Jalla nuž cjjirta Yooz takuqui cjiča: “Yooz Jiliriqui tuž cjiča, ‘Wejrtča quintra žoñinaca castiquiñtqui. Wejr casticača’ ”.

²⁰Nižaza Yooz takuqui cjiča: “Ančhuca quintra žoñinacaž čheri eecziž cjen, čheri ona. Nižaza kjaz kjara passiž cjen, kjaz ona. Jalla nuž paažcuqui nii žoñinacžquiz azkataquiča”.

²¹Tsjii žoñiqui ančhuca quintra paasača. Ančhuccti ana nižtapacha tjepna. Pero nii quintra žoñižquiz zumžtanž paacan jalla nuž atipa.

13

¹ Tjapa žoñinacaqui gobiernuž mantitanaca caz waquiziča. Yoozqui mantiz poder tjaača tižquizimi nižquizimi. Yoozqui jilirinacžquiz poder tjaačiča mantizjapa. ² Jalla nižtiquiztan jakziltat jilirž quintra cječhaja, jalla niiqui Yooziž utžta žoñž quintrača. Nižaza nii quintra žoñinacaqui casticta cjequiča. ³ Zuma paañi žoñinacaqui anáž jilirinacžquiz eksnasača. Antiz ana zuma paañi žoñinacaqui jilirinacžquiz eksnasača. ĆAnčhucqui jilirinacžquiz ana ekskan kamz pecya? Zumapan kama. Nekztan nii jilirinacaqui ančhucquiz walikaz cjican cjequiča. ⁴ Jilirinacaqui zizcumi ana zizcumi Yooz sirwiča, ančhucalta wali žejlzjapa. Pero ančhucqui ana zuma paaquiz niiqui, eksnasača. Jilirinacaqui casticz poderchizza, anača inakaz nii mantiz pustu tanža. Ninacaqui Yooz sirwiča, nižaza Yooz cuntiquiztan ana zuma paañi žoñinaca castičha. ⁵ Jalla nižtiquiztan jilirinacž mantuquiz cjee, Yooz ana casticta cjisjapa, nižaza jilirinacžquiz tjapa kuztan cazpanča. ⁶ Jalla nijapa zakaz ančhucqui impuestonaca pjojz waquiziča. Mantiñi gobiernuqui Yooz sirwican impuestonaca packatča.

⁷ Tjapa jilirinacžtan zumapan cjee. Tsjii tasa tjaašlaj niiqui, panž tjaa. Tsjii impuesto pacz waquiziž niiqui, panž paca. Jakziltižquiz rispitz waquiziž niiqui, nižquiz panž rispita. Jakziltižquiz honora waytižinz waquiziž niiqui, nižquiz honora waytižina. ⁸ Ana jecžtanami kajchiz žela. Pero porapat zuma munaziz waquiziča. Jakziltat žoñinacžtan zuma munazačhaja, jalla niiqui Yooz mantitanacaž cumpliča. ⁹ Yooz mantita ortinanacaqui tuž cjiča: “Anača adulteriuquiz žejlzqui. Anača žoñi conzqui. Anača tjañi zaazqui. Anača toscara chizqui. Anača yekja žoñžta cusasa zmazqui”. Jalla nii mantita ortinanacami nižaza tjapa mantitanacami cumplitaž cjequiča, tuž kamcan: “Jaknužta am persun kuztan zuma munazičhaja, jalla nuž žoñinacžtan zuma munaziz waquiziča”. ¹⁰ Jakziltat nižta zuma munazičhaja, jalla niiqui žoñinacž quintra anapan paaquičha. Jalla nižtiquiztan zuma munazican Yooz mantita ortinanaca cumpliča.

¹¹ Jalla nuž kamcan, tii timpu naya. Nii nii žela. Tuquiqui Jesucristužquiz kuz tjaachinčhumča. Anziqui ultimu liwriiz tjuñiqui tsjan žcatžinžquičha. ¹² Tii kamz timpuquij waj tucuzinzaquičha. Nižaza Jesucristuž tjonz tjuñi žcatžinžquičha. Jalla nižtiquiztan ana zuma paaz kamañquiztan zarakzpan waquiziča. Zuma paaz kamañchiz kamz waquiziča, tsjii zuma armichiz zultatuztakaz. ¹³ Zuma kamcan zuma žoñižta ojklaya, kjanquiztakaz ojklaycan. Anaž pijstanaca paacan, kama. Nižaza ana licchi kama. Nižaza ana adulteriuquiz žejlcan kama. Nižaza ana zuma kamañchiz ana kama. Nižaza žoñinacžtan ch'aascan ana kama. Nižaza žoñinacžtan inišican ana kama. ¹⁴ Tsjii zuma armichiz zultatuztakaz Jesucristo Jilirž kuzcama kama. Uj paaz pecñi kuz pinsitanacžquiz ana kuz tjaa, nii jaru kamzjapa.

14

CRIICHI ŽOÑINACAQUI PUNTA PUNTA PINSACQUIČHA

¹ Tsjii llajlli kuzziz criichi žoñiqui želan, nižquiz zuma risiwaquičha, pero nižtan ana payznakkatñi puntunaca ch'aas waquiziča. ² Tsjii criichi žoñiqui tantiiča, čjulumiž lulasacha, nii. Yekja criichi žoñiqui tantiiča, chjizwi ana lulasacha, nii. ³ Nii čjulumi lujlñi žoñiqui nii yekja žoñžquiz ana inarz waquiziča. Nižaza nii ana chjizwi lujlñi žoñiqui nii čjulumi lujlñi žoñžquiz anaž uj tjojtunz waquiziča. Yoozqui nii čjulumi lujlñiqui risiwchiča, nižquiz kuzziz cjen. ⁴ Jalla nižtiquiztan nii Yooz sirwiñi žoñžquiz ana uj tjojtunz waquiziča. Niž persun Yooz Patrunaqui niž uj jwesnaquičha, ana zuma paachižlaj niiqui. Yoozquiz kuzziz cjenaqui ultimquiziqui walikaz cjesača. Yooz Patrunaqui nii žoñžquiz wali cjiskatz atča niž aztanaqui.

⁵ Tsjii puntuztan chiižinuča. Tsjii criichi žoñiqui “Tsjii tjuñinacaqui chawc tjuñinacača” cjiča. Yekja criichi žoñizti cjiča, “Tsjii parijuča tjuñinacaqui”. Zapa mayni persun kuzquiz zumpacha tantiižcuqui, jalla nii tantiita jaru kama. ⁶ Tsjii criichi žoñiqui tsjii chawc tjuñi wartaquiz niiqui, Yooz honora waytita cjisjapa wartiyaquičha. Tsjii criichi žoñizti nii tjuñi ana wartčhaja, jalla niiqui Yooz honora waytita cjisjapa nižta ana wartča.

Nižaza tsjii čhjulumi lujlñi žoñiqui Yoozquin gracias cjižcu jalla nuž lulaquizñi niiqui, Yooz honora waytita cjisjapa lulaquičha. Nižaza yekja criichi žoñiqui ana chjizwi lulaquizñi niiqui, Yooz honora waytita cjisjapa ana lujlčha. Nižaza ana lujlchiž cjen niiqui Yoozquin gracias cjican chiiz waquizičha.

⁷Anaž žoñinacaqui inakaz kamčha, nižaza anaž inakaz ticža. ⁸Učhumqui tii muntuquiz kamcan Yooz Jiliržtajapapanž kamčha. Nižaza ticžcan Yooz Jiliržtajapapanž ticža. Jalla nižtiquiztan žejtcanami ticžcanami Yooz Jiliržtajapapančhumčha. ⁹Jalla nijjapa Jesucristuqui ticzičha, nižaza jacatatchičha, žejtñi žoñžtami, ticzi žoñžtami tjapa žoñinacžta Jiliri cjisjapa.

¹⁰Jalla nižtiquiztan žkjažtiquiztan am criichi jilžquiz uj tjojtunjo? Nižaza žkjažtiquiztan am jilž quintra iñarjo? Tjapa učhumqui Yooz yujcquiz prisintistančha, niž pjalžtaž cjisjapa. ¹¹Cjijrta Yooz takuqui tuž cjičha:

“Yoozqui ultimapanž cjičha, ‘Wejt yujcquiz zapa mayni žoñiqui quillznaquičha. Nižaza zapa mayniqui wejtquin rispitaquičha; nižaza wejt honora chiyaquičha’”.

¹²Jalla nižtiquiztan tjapa učhumqui Yoozqui quinta tjaastančha.

UJQUIZ ANA TJOJTSKATA

¹³Jalla nižtiquiztan učhumqui porapat ana iya ujnaca tjojtনারs waquizičha. Pero tjapa učhumqui tuž tantiiz waquizičha, yekja jilžquiz anapanž ujuiz tjojtskatz munzqui.

¹⁴Čhjul kusasami tsjii criichi žoñžquiz ana ujchiz cjiskatasachha. Jalla nii razuna zizučha, Jesucristo Jiliržquiz kuzziz cjen. Jalla niic nužupančha. Jakziltat “Tii cusasaqui ujchiz cjiskatačha” cjican tantiyačhaja, jalla nižquiz nii cusasaqui ujchiz cjiskatasachha. ¹⁵Ančhuca lujltiquiztan tsjii criichi žoñž kuz payznakaquizñi niiqui, nii čheriqui anaž lujlž waquizičha. Jalla nii čheri tira lulaquizñi niiqui, amqui nii payznakatñi žoñžtan ana zuma munazičha. Yekja criichi žoñžquiz ana ujuiz tjojtskata, castica cjeajajo. Jesucristuqui nižtajapa zakaz ticzičha. ¹⁶Tsjii žoñžtaqui čhjululu lujlžmi walikaz cjesačha. Pero nii lujltaž cjen parti žoñinacaqui, “Ana zuma kamañchizza nii criichi žoñiqui” cječhaj niiqui, nekžtan ana lujlž waquizičha. ¹⁷Yooz mantuquiz kamcan, čherimi licžmi ana importičha. Pero Espiritu Santuž cjen ana ujchiz cjee; nižaza Yooztan ančhucatan walikaz cjee; nižaza cuntintu kuzziz cjee. Jalla nužučha chekan zuma kamañaqui. ¹⁸Jakziltat jalla nuž kamcan Cristužquiz sirwachaja, jalla niž cjen Yoozqui cuntintuž cjequičha. Nižaza parti žoñinacaqui “Nii žoñiqui walikaz kamčha” cjican chiyaquičha.

¹⁹Učhumnacžtan parti žoñinacžtan zumapanž kamzjapa kuz tjaa. Nižaza parti criichinacžquiz juc'ant zuma kamañchiz cjeajajo, jalla nii kamzquiz kuz tjaa. ²⁰Ančhucaž čhjulumi lujltiquiztan anačha yekja criichi žoñžquiz Yooz zuma kamañquiztan jaytiskatzqui. Ana čhjul čherimi ujchiz cjiskatasachha. Pero nuž čhjulumi lujlžcu yekja criichi žoñžquiz ujuiz tjojtskataquizñi niiqui, jalla nižtiquiztan anaž čhjulumi lujlž waquizičha. ²¹Tsjii criichi žoñiqui ančhucaž chjizwi lujltiquiztan, nižaza vinu lictiquiztan, nižaza čhjulumi paatiquiztan ujuiz tjojtskatasadž niiqui, jalla nižtanaca paazqui ana waquizičha. ²²Jesucristužquiz tjapa kuzziz cjen čhjululu kamañchizlaja, jalla nii kamañ jaru Yooz yujcquiz kamz waquizičha. Yoozquizkaz quinta tjaastančha. Jalla nuž zuma kamcan persun kuzquiz uj ana sint'aquičha. Persun kuzquiz ana zinta uj sint'ican zuma kamaquizñi niiqui cuntintuž cjequičha. ²³Pero jakziltat paysnakñi kuztan lujlčhaja, jalla nii paysnakžcu lujltiquiztan persun kuzquiz uj sint'aquičha, “Ujžcaa nii lujlžqui” cjican. Yoozquin ana tjapa kuztanžlaj niiqui, čhjulumi ujž cjesačha. Yoozquin kuzzizpan cjee.

15

PORAPAT YANAPARASQUIČHA

¹Yekjap učhumqui tjapa kuztanpan Yoozquinčha. Yekjapanacaqui Yooztan kamcan llajlla kuzizza. Učhum kuzquiz pecta jarukaz anaž kamz waquizičha. Nii llajlla kuzziz criichi žoñinacadž pinsitanaca panž cjuñžna, zuma kami yanapajo. ²Zapa mayni criichi žoñiqui parti criichi žoñinacžtajapa kamz waquizičha, ninaca tsjan zuma kamañchiz cjisjapa. ³Jesucristuqui nižta kamchičha, anačha persun kuz wali cjisjapa kamchiqui. Cjijrta

Yooz takuqui Jesucristuž puntuquiztan tuž cjiča: “Yooz quintra iñarñi žoñinacaqui wejt quintra iñarchiča”. ⁴ Yooz takuqui učumnacalta cijrtkalča, učumnacaquiz tjaajinzjapa. Jalla tuž učumnacaquiz tjaajinča, zuma tjurt'iñi kuztan, pasinsis kuztan, nižaza p'ekinchayta kuztan, Yoozquin arajpachquin ojzk tjewzjapa. ⁵ Yoozqui učumnacžtan pasinsis kuzzizza; nižaza učumnacaquiz p'ekinchayča. Nii Yoozpacha učumnacaquiz yanapt'ila, tsjii kuzziz cjeajo, nižaza zuma kamažo Jesucristuž munañpacama. ⁶ Jalla nuž tsjii kuzziz kamcan, učumqui tsjii kuzziz Yooz honora waytaquiča. Yoozqui učum Jesucristo Jilirž Ejpča. Jalla niž honora waytaquiča.

CRISTUŽ PUNTU

⁷ Jalla nižtiqiztan tsjiimi tsjiimi zumaž risiwžcu munazaquiča, jaknužt Cristuqui učumnacatan zuma munazičhaja, jalla nuž, Yooz honora waytita cjisjapa. ⁸ Ančucaquiz cjiwča. Jesucristuqui judfo žoñinaca liwrii nižaza yanapñi tjonchiča. Nuž tjontiquiztan Yooz niž taku litituma cumpliñipan, jalla nii tjeeziča. Yoozqui tuquitanpacha judfo žoñinacž atchi ejpnacžquiz taku tjaachiča. Jalla nii taku cumplichiča, Jesucristuž tjonchiž cjen. ⁹ Nižaza Jesucristuqui tjonchiča, yekja wajtchiz žoñinacžquiz Yooz honora waytiskatzjapa. Yooz ancha okzñi kuzziz cjen niž honora waytitača. Jalla nužupan cijrta Yooz takuqui chiiča, tuž cjan:

“Jalla nižtiqiztan wejrqui yekja nacionchiz žoñinacžtan žejlcan, am honora waytača. Nižaza am honora waytican, itsnača”.

¹⁰ Yooz tawk liwruquiz tuž cijrtazakazza:

“Yekja nacionchiz žoñinaca, Yooz parti žoñinacžtan chica cuntintuž cjee”.

¹¹ Yooz tawk liwruquiz tuž cijrtazakazza:

“Yekja nacionchiz žoñinaca, tjapa ančhucqui Yooz Jilirž honora wayta. Tjapa žoñinacaqui Yooz zuma paatanacquitant nižquin honora tjaala”.

¹² Nižaza Yooz tawk liwruquiz Isaiasqui tuž cijrchiča:

“Isaž majchmaatinacquitant tsjiiqui tjonachiča. Jalla nii tjonžcu yekja nacionchiz žoñinacaž mantaquiča. Nižaza niž cjen ninacaqui liwriiñiž tjewznaquiča”.

¹³ Yoozza liwriiñi tjewzkatñiqui. Nii Yoozqui ančuca kuz ancha cuntintu cjisjkatla. Nižaza Jesucristužquiz kuzziz cjen walikaz cjisjkatla. Nekztan ančhucqui Yooz Espiritu Santuž aztan zumpacha liwriiñiž ancha tjewznasača.

¹⁴ Wejt jilanaca, cullaquinaca, ančhucqui ancha zuma kamañchizza, nižaza Yooz puntu zuma zizza, nižaza tsjiižquizimi tsjiižquizimi Yooz puntu zuma intintiskatča. Jalla nužupanča ančuca kuzqui. Jalla niiqui zumpachal zizuča. ¹⁵ Jalla nuž cjenami ana jiwjatžcu tsjii kjaž puntunaca cijržcuča, ančucaquiz cjuñkatzjapa. Yoozqui wejtquiz fava paacan apóstol puestuquiz utchiča, tii puestuquiz Jesucristo sirwizjapa. Jalla nižtiqiztan ančucaquiz cijržcuča. ¹⁶ Jesucristo sirwican, yekja wajtchiz žoñinacžquiz liwriiñi Yooz taku paljajuča. Jalla nuž Yooztajapa langznuča, nii yekja wajtchiz žoñinaca Yoozquin kuz tjaajo. Ninaca tsjii zuma ofrendažtakaz Yoozquiz prisintis pecuča. Nižaza Espiritu Santuž ninacžquiz zuma kamañchiz cjskatchiž cjen, Yoozqui ninacžquiztan cuntintuž cjequiča.

¹⁷ Jesucristo sirwican wejt Yooztajapa langžtiqiztan cuntintuča wejrqui, tama žoñinaca nižquin kuz tjaachiž cjen. ¹⁸ Jesucristuž puntuquiztankaz wejrqui chiiz pecuča. Jesucristuqui wejtquiz wacchi zuma obranaca paakatchiča, yekja wajtchiz žoñinaca nižquin kuz tjaakatzjapa. Jesucristuž cjen, wejrqui milajru paatanacami Yooz puntu chiitanacami nii yekja wajtchiz žoñinaca Yooz kuzcama cakatchinča. ¹⁹ Espiritu Santuž aztan ninaca cakatchinča wacchi milajrunaca paacan. Jalla nuž paacan, nižaza tjapa Jesucristuž puntuquiztan parlican, wejrqui tjapa kjetñi ojklaychinča, Jerusalenquiztan Ilirico yokaran. ²⁰ Wejrqui kuzquiz tantiichinča, jakziquin Yooz puntu parlitažlaja, jalla nicju ana ojzk pecchinča. Pero jakziquin Jesucristuž puntu ana parlitažlaja, jalla nicjuñ liwriiñi Jesucristuž puntuquiztan parlican ojklayača, yekja žoñ iclizanaca ana mitiscu.

²¹ Cijrta Yooz takuqui tuž cjiča:

“Tuquiqui Yooz puntu ana nonziča. Jaziqui nii žoñinacaqui Yooz puntu nonžcu catokaquičha. Nižaza ninacaqui Yooz puntu intintazaquičha”.

PABLUQUI ROMA CJITA WAJTQUIN OJKZ PECČHA

²² Jalla nuž ojklaycan wejrqui ančhucaquiz ana tjonžni atchinča. Walja tjonz pecaytuča, pero anal atchinča. ²³ Ažk watanacquiztanpacha wejrqui ančhucatan zalz pecaytuča. Anziqiu tii yokaran ojklayzqui žerzinča. ²⁴ Jalla nižtiquiztan ančhucaquin ojz cjisnuča; España ojkan tjonznača. Tsjii kjaž maj ančhucatan cuntintu kaman, ančhucui wejr yanapasača, wila jiczquiz ojczjapa España irantajo. ²⁵ Pero anzpacha wejrqui Jerusalén watja okača, ofrendanaca chjichača nicju žejlñi criichinaca yanapzjapa. ²⁶ Macedonia wajtchiz žoñinacami Acaya wajtchiz žoñinacami kazziča ofrendanaca utzjapa, Jerusalén pori criichinaczquiz yanapzjapa. ²⁷ Jalla nuž ofrendanaca tjaaz puntuquiztan ninacapačača “Waliča niiqui” cjichiui. Nižaza ninacaqui judfo žoñinaczquiz kajažtakazza. Judfo žoñinacaqui ninaczquiz Yooz zuma tjaajintanaca tojunčiča, ninaca liwriita cjisjapa. Jalla nižtiquiztan nii yekja wajtchiz žoñinacaqui judfo wajtchiz žoñinaczquiz ninacz cusananaca tojunz waquiziča. ²⁸ Primiraqui tii ojz cumplistanča ofrendanaca intirjizjapa. Jalla nuž ojkažu ančhucaquiz tjonznača, España ojkan. ²⁹ Nekztan liwriiñi Jesucristuž puntuquiztan zumpacha ančhucatan parliz pecuča. Jalla nekztanaqui Jesucristuž cjen wejtquizimi ančhucaquizimi wali cjequičha. Nužupanž cjequičha.

³⁰ Jilanaca, cullaquinaca, ančhucaquiz rocuča učhum Jesucristo Jiliriz cjen, nižaza munaziñi kuz cjiskatñi Espiritu Santuž cjen, oracionžtan yanapalla. Wejrqui ancha Yoozquiztan mayučha, ³¹ Judea wajtchiz quintra žoñinaczquiztan anapan tanta cjisjapa. Nižaza oracionžtan yanapalla, tii weriz chjitžta ofrendanaca wali risiwta cjisjapa. Pecučha, judfo criichi žoñinacaqui tii ofrendanaca zuma risiwčhaja, nii. ³² Jalla nuž zuma wataquiz niiqui, ančhucaquin tjonžcača Yooz munan. Wejr cuntintu irantižquizjapa, mayižinaquičha. Nižaza ančhucatan tjonžcu porapat cuntintu kuzziz yanapasajapa mayižinaquičha. Jalla nijjapa oracionžtan yanapalla. ³³ Yoozqui ančhuc walikaj cjiskatla. Jalla nužoj cjila. Amén.

16

PABLUŽ TSAANTANACA

¹ Tsjaa criichi cullaquiqui žejlča, Febe cjiti, jalla naa cullaquiqui ancha zumča cjiwča. Naaqui Cenrea iclizquiz Yooztajapa sirwiča. ² Yooz Jiliriz cjen naa cullaqui zuma risiwaquičha. Jalla nuž waquiziča Jesucristužquiz kuzziz jilanacaqui. Jalla naa cullaquiz yanapaquičha chjulu pecanami. Naaqui wacchi criichi žoñinaczquiz yanapchinča, nižaza wejtquizimi.

³ Priscilaquizimi Aquilžquizimi tsaanžinalla. Ninacaqui Jesucristužquin sirwiñi mazinacača. ⁴ Wejr ticznawc cjen ninacaqui wejr liwriiskatchičha. Jalla nuž liwriiskatcan ninacaqui joz ticzizakazza. Jalla nižtiquiztan ninacz cjen Yoozquin gracias cjican chiyučha. Nižaza tjapa nacjuñta jilanacaqui ninacz cjen Yoozquin gracias cjiča. ⁵ Nižaza Priscila Aquilž kjuyquiz ajcñi jilanaczquiz tsaanžinaquičha. Nižaza weriz pecta Epeneto tsaanžinaquičha. Acaya wajtchiz žoñinaczquiztan primirpacha niiqui Cristužquin kuz tjaachiča. ⁶ Nižaza Mariaquiz tsaanžinaquičha. Naaqui ančhucatan žejlcan ancha langzinča. ⁷ Nižaza wejt wajtchiz žoñinaczquiz, Andrónico, nižaza Junias, tsaanžinaquičha. Ninacaqui wejtan chica carsilquiz žejlchi compañerunacatača. Apostolunacazak ninaca rispitcha. Weriz ima Jesucristužquiz kuz tjaan, ninacaqui Jesucristužquiz kuz tjaachiča.

⁸ Nižaza Ampliasquiz tsaanžinaquičha. Jalla niiča weriz pecta maziui. Niiqui Jesucristo Jiliržquin kuz tjaachizakazza. ⁹ Nižaza Urbanžquiz tsaanžinaquičha. Niiqui Jesucristužquiz sirwiñi maziča. Nižaza weriz pecta Estaquizquiz tsaanžinaquičha. ¹⁰ Nižaza Apelesquiz tsaanžinaquičha. Jalla niiqui Jesucristužquiz kuz tjaazcu, Yooz kamaña pankaz kamča. Nižaza Aristóbuluž kjuychiz žoñinaczquiz tsaanžinaquičha. ¹¹ Wejt wajtchiz žonžquiz, Herodión, tsaanžinaquičha. Nižaza Narcisož kjuychiz Yoozquin criichi

žoñinacžquiz tsaanžinaquiča. ¹² Nižaza Trifenaquiz, nižaza Trifosaquiz tsaanžinaquiča. Ninacaqui Yooz Jiliržtajapa sirwiča. Nižaza učhum pecta Persidaquiz tsaanžinaquiča. Naaqui Jesucristo Jiliržtajapa juc'anti langzinča. ¹³ Nižaza Rufžquiz tsaanžinaquiča. Niiqui Jesucristužquiz tjapa kuz tjaažcu, parti hermanonacžquiz rispitta cjišsiča. Nižaza niiž maaquiz tsaanžinaquiča. Naaqui wejt maa cuntitača. ¹⁴ Nižaza tsaanžinaquiča tinacžquiz, Asincritužquiz, Flegontizquiz, Hermasquiz, Patrobasquiz, Hermesquiz, nižaza ninacžtan chica kamñi jilanacžquiz. ¹⁵ Nižaza tsaanžinaquiča Filologužquiz, nižaza Juliaquiz, nižaza Nereožquiz, nižaza niiž cullacaquiz, nižaza Olimpasquiz, nižaza tjapa ninacžtan kamñi criichi žoñinacžquiz.

¹⁶ Nižaza porapat zuma tsaanassaquiča, tjapa kuztan. Nižaza tjapa Jesucristužquiz kuz tjaañi žoñinacaqui ančhucaquiz tsaanž apayžquiča.

¹⁷ Jilanaca, cullaquinaca, ančhucaquiz rocuča, zumapanž ančhucqui cwitazaquiča, nii t'akt'aksñi žoñinacžquiztan. Nižaza zumpacha cwitazaquiča tsjii kjutñi tjaajini žoñinacžquiztan. Nii žoñinacaqui, jaknužt ančhucaquiz Yooz puntu tjaajinta cječhaja, jalla nii tjaajinta quintra tjaajinča. Ninacžquiztan ančhucqui zaraka. ¹⁸ Ninacaqui Jesucristužtajapa ultimu ana sirwiča. Antiz ninacaqui persun kuzcamaž sirwiča. Ninacaqui humilde criichinacžquiz incallča, zuma chican, žoñinacž kuz wali cjisjapa. ¹⁹ Tjapa žoñinacaqui ančhuca puntu zizza, jaknužt ančhucqui Yoozquin cazzaja, jalla nii. Jalla nižtiquiztan wejrqui chipznuča. Nižaza zumanaca paazjapa zizñi zizñi cjee. Ana zumanaca paachucaž cjen, ana mitisa. ²⁰ Jalla nuž zuma kaman, Yoozqui ančhucaltajapa Satanás diablužquiz tječžcu, atipaquiča. Yooza ančhuc walikaz cjskatñi. Nižaza učhum Jesucristo Jiliriqui ančhucaquiz yanapt'ila. Amén.

²¹ Timoteuqui ančhucaquin tsaanž apayžquiča. Niiqui wejt compañeruča, wejr Yooztajapa langznan. Nižaza wejt wajtchiz žoñinaca, Lucio, Jasón, Sospater, jalla ninacaqui ančhucaquin tsaanž zakaz apayžquiča.

²² Nižaza wejrqui, Tercio cjita žoñtča ančhucaquin tsaanž zakaz apayžcuča, Jesucristo Jilirž tjuuquiz. Wejrqui Pabluž chiitiquiztan tii cartal cjiiruča.

²³ Nižaza Gayuqui ančhucaquin tsaanž apayžquiča. Niiž kjuyquiz alujazjapa. Nižaza Erastuqui ančhucaquin tsaanž apayžquiča. Jalla niiča wajt paaz tanzñi tesoreruqui. Nižaza učhum jila Cuarto cjitaqui ančhucaquin zakaz tsaanž apayžquiča.

²⁴ Učhum Jesucristo Jiliriqui tjapa ančhucaquiz zumaj yanapt'ila. Jalla nužoj cjila. Amén.

ŽERZ TAKUNACA

²⁵ Ima žerzcan Yooz honora waytuča. Yoozqui ančhuc tjurt'iñi kuzziz cjisnasača. Nii liwriñi Yooz puntumi, Jesucristuž puntumi parluča. Jalla nii parlita puntunacaqui Yoozqui ančhucaquiz zizkatchiča. Tuquitan nii puntunaca ana ziztača. ²⁶ Tii timpuquizkaz Yoozqui nii puntunaca zizkatchiča. Nižaza profetanacaqui nii puntunaca cjiirchiča Yooz tawk liwruquiz. Tii timpuquiz wiñay žejtñi Yoozqui mantichiča, tjapa žoñinacžquiz nii puntunaca zizajo. Jalla nuž mantichiča, žoñinaca Jesucristužquiz kuz tjaajo, nižaza casajo.

²⁷ Yoozkazza zizñi zizñiqui. Jesucristuž cjen Yooz honoraqui wiñaya waytitaj cjila. Jalla nužoj cjila. Amén.

PRIMERA CARTA DEL APOSTOL SAN PABLO A LOS CORINTIOS

¹ Wejrqui Pablut'cha. Jesucristuž cuchanžquita apostolt'cha. Jalla nuž Yoozqui munchi'cha, wejr apóstol puestuquiz uchi. Wejrqui Sóstenes cjita jilžtan tii cartal cjiiržču'cha ančhuc criichi žoñinacžquin. ² Ančhucqui Corinto wajtchiz criichi jilanacžhuc'cha. Werar Yooz iclizziz žoñinacžhuc'cha. Jesucristuž cjen Yoozqui ančhuc t'akzi'cha niž zuma kamañchiz cjisjapa. Jalla nijapaqui Yoozqui ančhuc kjawzi'cha. Nižaza Yoozqui tjapa criichi žoñinaca kjawzi'cha niž zuma kamañchiz cjisjapa. Ančhucatan parti criichi žoñinacžtan Jesucristo Jiliržquin sirwi'cha. Jesucristo Jilirž mantuquizza ninacami, nižaza učummi. ³ Učhum Yooz Ejpžtan Jesucristo Jiliržtan, ančhucquiz zumaj yanapla. Nižaza ančhucžtajapa walikaj kamkatla.

YOOZQUI ŽOÑINACŽQUIZ YANAPCHIČHA

⁴ Jesucristuž cjen Yoozqui ančhucquiz ancha okzi'cha. Ančhucadž okžtaž cjen tirapan Yoozquin gracias cjican chiyu'cha. ⁵ Jesucristuž cjen Yoozqui ančhucquiz zumpacha yanapchi'cha, Yooz puntu zuma zizajo, nižaza Yooz taku zuma paljayajo. ⁶ Wejrnacadž Jesucristuž puntuquiztan paljaytan ančhucqui persun kuzquiz zumpacha catokchinčhuc'cha. ⁷ Jalla nižtiquiztan ančhucqui tjapaman Yooziž tjaata kamañchizza. Jalla nuž kamcan, Jesucristo Jilirž tjonz tjuñi tjewža ančhucqui. ⁸ Jesucristo Jiliripacha ančhucquiz tjurt'ini kuzziz cjisakatu'cha niž tjonz tjuñicama. Tjurt'ini kuzziz tjewznan, Jesucristo Jilirž tjonz tjuñiquiziqui ančhuc quintranaž jecmi kjaž cjesa'cha. Yoozqui ančhuc ujnaca pertunchi'cha Jesucristuž cjen. ⁹ Nižaza ančhuc kjawzi'cha niž Majch Jesucristo Jiliržtan tsjii kuzziz cjeajo. Nižaza Yoozza niž kjawžta taku cumpliñiqui. Niž tawkcama ančhucquiz cwitaquičha Jesucristuž tjonz tjuñicama.

T'AKA T'AKA CH'AASSIČHA

¹⁰ Jilanaca cullaquinaca, učhum Jesucristo Jilirž tjuuquiz ančhucquiz rocu'cha, porapat tsjii kuzziz cjeajo, nižaza ana pjali cjeajo. Tsjii kuzziz cjen tsjii pinsamintuchiz cjis waquizi'cha. ¹¹ Wejt jilanaca cullaquinaca, tsjii kjaž žoñinacaqui Cloé famill žoñinacžquiztan wejtquiz quint'ichi'cha, ančhucpora ch'aasiñchucquičha, jalla nii. ¹² Ch'aascan, t'aka t'aka chiichiiñchucquičha, tuž cjican: “Wejrt'cha Pabluž t'akquiztanqui”. Tsjiizti cjiñizakazquičha: “Wejrt'cha Apolos t'akquiztanqui”. Tsjiizti cjiñizakazquičha: “Wejrt'cha Pedruž t'akquiztanqui”. Yekjapanacazti cjiñizakazquičha: “Wejrt'cha Cristuž t'akquiztanqui”. Jalla nužupan ančhucqui ch'aasiñchucquičha.

¹³ Nonžna ančhucqui. Cristuqui ana'cha t'aka t'aka. Ančhuc laycu wejrqui ana'cha cruzquiz ch'awctaqui. Nižaza wejt tjuuquiz ana'cha bautistaqui, wejt t'akquiz cjisjapa. ¹⁴ Crispo, nižaza Gayo, jalla ninaca bautissin'cha. Walizat ana iya bautistu'chaja. Jalla nižtiquiztan Yoozquin gracias cjican chiyu'cha. ¹⁵ Nižaza wejt tjuu ana waytas'a'cha, “Pabluqui wejr bautissin'cha”, cjicanaqui. ¹⁶ Aaa, tsjiilla wejr tjatzin'cha; Estéfanas familia zakaz bautissin'cha. Anal iya jec bautistac cjuñu'cha. ¹⁷ Cristuqui ana'cha wejr bautisajo mantizquichi. Antis liwriñi Yooz taku paljayajo mantizquichi'cha. Jalla nuž Yooz taku paljaycan wejrqui ana'cha chawjc takunaca chiichintqui. Chawjc takunaca chiitasadž niiqui, wejtquiz kuz tjaatas'a'cha. Jalla nižtiquiztan ančhucqui anaž učhum laycu conta Jesucristužquiz tjapa kuztan cjitas'a'cha. Nižaza Jesucristužquin tjapa kuz ana criitas'a'cha.

JESUCRISTO CRUZQUIZ CH'AWCTA PUNTU

¹⁸ Jesucristuqui cruzquiz ch'awctata'cha. Jalla nii puntu paljaytquiztan infiernuquin ojkñi žoñinacaqui zumzu takunacážtakaz nay'cha. Liwriita, arajpachquin ojkñi žoñinacazti Yooz takupanž nay'cha. Nii Yooz taku paljaytaž cjen, Yoozqui niž azi tježa. ¹⁹ Cjiirta Yooz takuqui tuž cji'cha:

“Yoozqui tjeeznaquičha, ana criichi žoñinacadž ziztaqui inakazza, jalla nii. Nižaza Yoozqui tjeeznaquičha, ana criichi žoñinacadž intintitaqui tsjii kjutni'cha, jalla nii”.

²⁰ Nonžna. Chawjc taku chiiñi žoñinacami, judfo cuzturumpinac puntu tjaajiñi žoñinacami, nižaza partir puntu parliñi žoñinacami, jalla ninacaqui inakazza; Yooz puntuquiztan ana zizñinacača. Jalla nuž tjeeziča Yoozqui; ninacž takunacami pinsitanacami zumzukazza. ²¹ Tii muntuquiz žejlñi žoñinacaqui persun kuzquiz pinsinan anapan Yooz pajasača. Jalla nuž Yoozqui munchiča. ¿Jaknužž žoñinacaqui Yooz pajasajo? Jalla tižtača. Wejrnacqui Jesucristuž puntuquiztan paljajuča. Nii paljajta taku catokžcu žoñinacaqui werar Yooz pajasača. Nižaza liwriita cjesača. Ana criichi žoñinacaqui nii liwriiñi taku zumzu takužtakaz nayča. Jalla nuž ninacaž zumzu taku nayanami, Yoozqui muncha, paljajta Yooz taku criičcu, žoñinacaqui liwriita cjequiča, nii.

²² Judfo wajtchiz ana criichi žoñinacaqui milajrunacakaz pecča. Griego wajtchiz ana criichi žoñinacazti ninacž pinsita jarukaz liwriita cjis pecča. ²³ Ana walipanča nižta kuzziz žoñinacaqui. Jesucristuqui ticziča, žoñinaca ujquiztan liwriizjapa. Jalla nii Jesucristuž puntuquiztan wejrnacqui paljajuča, žoñinaca liwriita cjeajajo. Pero wejrnacaž Jesucristuž ticžta puntu paljaytiquiztan, Judfo wajtchiz žoñinacaqui ana criiz pecča, “¿Kjažt niičha liwriiñi cjesajo?” cjicanaqui. Parti žoñinacazti wejrnacaž paljajta takunaca nonžcu zumzu takužtakaz nayča. Pero lijitum liwriiñi takupanča. ²⁴ Jakzilta Judfo wajtchiz žoñinacami yekja wajtchiz žoñinacami Yooziž kjawžta nonžaja, jalla ninacaqui Jesucristuž puntu takunaca zumaž nayča. Nižaza Yooz taku nayča, walja zizñiž taku, nii. Nižaza Jesucristuž cjen liwriiñi Yooz aziž pajcha nii Yooziž kjawžta nonžni žoñinacaqui. ²⁵ Ana criichi žoñinacazti Yooz taku zumzu takužtakaz nayča. Pero Yooz takuqui tsjan zumača tjapa zizñi žoñinacž tawkquiztanami. Nižaza Yoozqui žoñinaca ujquiztan liwriizjapa juc'ant azzizza čhjul žoñinacžquiztanami. Cruzquiz ch'awctaž cjen Cristo ana azziztakaz nayča ana criichi žoñinacaqui. Pero cruzquiz ch'awctiquiztan Cristuqui žoñinaca ujquiztan liwriyasača. Ana criichi žoñinacaqui persun aztan anaž liwriyasača. Cristupankazza liwriiñi azzizza.

YOOZIŽ KJAWŽTA ŽOÑINACA

²⁶ Jilanaca, cullaquinaca, ančhucž cjuñzna. Yoozqui ančhuc kjawziča. Jalla nii kjawžta oraqui jila parti ančhucquiztan ana zizñi žoñinacatača tii muntuquiz žejlñi žoñinacž yujcquiziqui. Nižaza ana mantiñi žoñinacatača. Nižaza zuma rispitta familianacquiztan anatača jila parti ančhucqui. ²⁷ Yoozqui ančhuc illziča ana zizñi žoñinaca cjenami. Nuž muncha ana criichi zizñi žoñinaca azkatsjapa ultimquiziqui. Nižaza Yoozqui ančhuc illziča ana mantiñi žoñinaca cjenami. Nuž muncha ana criichi mantiñi žoñinaca azkatsjapa. ²⁸ Nižaza Yoozqui ana rispitta nižaza iñarta žoñinaca illziča, liwriizjapa. Nii žoñinacž puntuquiztan tii muntuquiz ana criichi žoñinacaqui cjiñiča, “Ana čhjuljapa sirwiča”, cjican cjiñiča. Pero ultimquiziqui iñarta žoñinacaž liwriitiquiztan ana criichi rispitta žoñinacaqui inakaz cjiskattaž cjequiča. ²⁹ Jalla nuž Yoozqui žoñinaca illz munchiča, niiž yujcquiz anaž jecmi mitarasi kuzziz cjeajajo. ³⁰ Yoozqui Jesucristuž cjen ančhucquiz tsjii ew kamañchiz cjiskatchiča. Nižaza Jesucristuqui učhumnacaquiz Yooz zuma pinsitanaca tjeeziča. Jesucristuž cjen učhumqui zuma cjissiča Yooz yujcquiziqui. Nižaza Jesucristuž cjen učhumqui Yooz kuzcama kamča. Nižaza ultimquiziqui tjapa ana walinacquiztanami liwriitaž cjequiča učhumqui. Jalla nužučha Yooz zuma pinsitanacaqui učhumnacaltajapaqui. ³¹ Jalla nižtiquiztan cjiirta Yooz takuqui tuž cjiča: “Jakzilat honora waytiz pecčhaja, persunpachquiziqui honora anaj waytila, antis mañtiñi Yoozquizkaz honoraj waytila”.

2

YOOZ TAKU PALJAYZ PUNTU

¹ Jilanaca, cullaquinaca, wejrci ančhucquiz liwriiñi Yooz taku paljayi tjonchinča. Jalla nuž paljaycan ana chawjc tawkžtan paljaychinča, tsjii walja zizñi žoñižtakazzi. ² Ančhucatan želan, Jesucristuž puntuquiztan nižaza Jesucristuž ticžta puntuquiztan jalla niipanikazza weriž paljajtaqui. Jalla nuž wejrci persun kuzquiz tantiichinča, ima ančhucquiz tjoncan. ³ Ančhucatan žejlcan, wejrci humilde kuzziztača, nižaza

Yooz eksñi kuzziztača. ⁴ Ančucaquiz Yooz taku paljaycan ana chawjc tawkžtan atips pequiñtača, tsjii walja zizñi žoñižtakaz. Pero paljayan, Espiritu Santuča niiz aztan ančuca kuznaca atipchiqui, Jesucristužquin criyajo. ⁵ Yooz aziž tježtiqiztan ančucaquiz criiskatz pecatuča. Ana chawjc taku paljaytiqiztan ančucaquiz criiskatz pecatuča.

YOOZ PUNTUQUIZTAN INTINTAZ PUNTU

⁶ Pero tsjii tsjii Yooz puntunacaqui ch'amača intintazqui. Jalla nii puntunacazakaz tjaajinz pecuča. Pero walja Yooz kuzcama kamñi criichi žoñinacakaz nii puntunaca intintazasača. Jalla nii Yooz puntunacaqui anaž tii muntuquiz kamñi žoñinacž kuzquiz pinsitiqiztan tjonča. Nižaza anaž tii muntuquiz mantiñi jilirnacžquiztan tjonča. Jalla ninacaqui kataquiča, ninacaž pinsitanacžtanpacha. ⁷ Ima tii muntu paacan Yoozqui persun kuzquiz pinsičiča, jaknužt žoñinaca liwriyačhaja, jalla nii. Ažk watanaca Yoozqui nii liwriñi puntu ana kjanapacha intintazkatchiča žoñinacžquiz. Jaziqui tii timpuquizkaz Yoozqui intintazkatchiča, učum niiztan wiñaya kamzjapa. Yoozpachača liwriñi puntuquiztan tjaajinchiqui wejtquiziqui. Jalla nii tjaajinta kjanzt'uča. ⁸ Tii timpuquiz mantiñi žoñinacžquiztan anaž jecmi liwriñi Yooz pinsita intintazziča. Intintaztasaz niiqui zuma honorchiz Jesucristo Jiliri anaž cruzquiz ch'awctasača ninacaqui. ⁹ Cjijrta Yooz takuqui tuž cjiča:

“Yoozqui zumanaca tjaczinčiča niizquin sirwiñi žoñinacžtajapa. Nii Yooz tjaczinta zumanacača anaž jecmi cherchi, nižaza anaž jecmi nonzi, nižaza anaž jecmi persun kuzquiz tantiyi atchiqui”.

¹⁰ Anzimi Yoozqui niiz zumanaca Espiritu Santuž cjen učumnacaquiz intintazkatchiča. Espiritu Santuqui Yooz puntuquiztan zumpacha intintazza, tjapa Yooz puntumi. Jalla nižtiqiztan učumnacaquiz intintazkatasacha.

¹¹ Žoñinacaqui persun kuzquiz persun pinsitanacami zizza. Yekja žoñiqui ultimu ana zizza. Jalla nižta irata Yooz Espiritu Santuqui Yooz Ejpž pinsitanacami zizza. Ana čjul žoñimi Yooz pinsitanaca zizi atasacha, ¹² Yoozqui učum kuznacquiz niiz persun Espiritu Santo luzkatchiča, niiz persun pinsita intintazkatajo. Ana criichi žoñž kuzqui Yooz pinsitanaca anapan intintazkati atasacha. Jalla nižta kuz učumnacaltauqui ana žejlča. ¹³ Wejrnacqui Yooz puntu intintazcu, ančucaquiz Yooz pinsitanaca tjaajinchinča. Žoñiž tjaajinta jaru nižaza zizñi žoñž chawjc tawk jaru anal tjaajnuča. Pero Yooz Espiritu Santuž tjaajinta jaru, jalla niil tjaajnuča. Jaziqui Yooz pinsitanaca tjaajnuča Espiritu Santuž irpita criichinacžquin.

¹⁴ Jakzilta žoñit ana Yooz Espiritu Santuž irpitažlaj niiqui, Espiritu Santuž tjaajintanaca anaž catokča. Zumzu tjaajintanacaztakaz nayča. Jalla nižtiqiztan ana Espiritu Santuchiz žoñinacaqui anapanž Yooz tjaajintanaca intintazasača. Yooz Espiritu Santuž irpita žoñinacapankaz Yooz puntu tjaajintanaca intintazasača. ¹⁵ Espiritu Santuž irpita žoñinacaqui tjapa tjaajintanaca tantiyasača, Yoozquiztan tjonñi taku cjicu, už žoñžquiztan tjonñi taku cjicu, jalla nii. ¿Pero ana Espiritu Santuž irpita žoñinacaqui Espiritu Santuž irpita žoñž taku ana tantiyasača, nižaza criichi žoñinacžquiz Yooz puntu ana tjaajnasacha? ¿Kjažtiqiztan nižta cjesajo? ¹⁶ Yoozqui niiz Espiritu Santuž cjen učumnacaquiz Cristuž pinsitanaca tjaajža. Jaziqui zizza. Cjijrta Yooz takuqui, tuž cjiča: “Anaž jecmi persun kuzquiztan Yooz pinsitanaca zizasacha. Jaziqui anaž jecmi Yoozquiz tjaajnasacha”.

3

ANA CRIICHI ŽOÑINACAZTAKAZ ANAČHA KAMZQUI

¹ Jilanaca, cullaquinaca, wejrqui ančucaquiz tjapa Yooz puntu imazil tjaajžni atuča. Ančhucqui imazi zuma intintazasača. Cristužquiz criichi cjenami Yooz Espiritu Santuž tjaajinta jaru ana zuma kamiñčuča. Persun kuzcama kamiñčuča, kolta ocjalanacaztakaz. ² Jalla nižtiqiztan wejrqui Cristuž puntuquiztan tsjii kjaž tjaajintanacakaz ančucaquiz tjaajinchinča. Jaknužt tsjii wawaqui lichi licča, nižaza anaž čjjeriqui luli atča, jalla nižta irataž ančhucqui. Imazi Yooz tawk čjjeri intintazasača. Imaziča Yooz

tawk čhjeri lujlžquinaqui ančhucqui. ³ ¿Kjažtiquiztan nižtajo? Ančhucča ana criichi žoñinacažtakazqui. Ančhucpora quintras pequiñčhucča, nižaza ch'aas pequiñčhucča, nižaza pjali cjcjiz pequiñčhucča. Jalla nuž anawali kamcan iyaziča Yoozquin zuma sirwiñinacčhucqui. Nuž anawali kamcan, ana criichi žoñinacažtakazza. ⁴ Yekjapanacaqui ančhucquiztan cjiča, “Wejrqui Pabluž t'akquiztanča”. Yekjapanacazti cjiča, “Wejrqui Apolos t'akquiztanča”. Jalla nuž čhiichiican ana criichi žoñinacažtakaz kamča.

YOOZ TAKU TJAAJIÑINACŽ PUNTU

⁵ ¿Ject Apolosjo? ¿Ject Pablojo? Wejrnacaž Yooz taku paljaychiž cjen ančhucqui Jesucristužquin criichinčhucča. Wejrnacqui Yoozquin sirwiñkaztča. Yoozqui zapa mayniž wejtnacaquiz sirwiz langz tjaachiča. ⁶ Jalla nižtiquiztan Yooz taku paljaychinča, tsjii zkal čhjaqui kalltažokazzi. Wiruñaquí Apolosqui ančhucquiz iya Yooz taku paljaychizakazza, jaknužt zkalquiz kjaztan jawiyaz, jalla nižta. Ultimquiziqui Yoozpachača zuma kamañchiz ančhucquiz cjskatchiqui, tsjii zuma zkalažtakaz. ⁷ Jalla nižtiquiztan nii čhjacñimi nii jawiñimi anaž čhjulumi. Yoozpanča chekanaqui. Yoozqui žoñinacž kuzquiz langža, tsjii čhjecta žkalažtakaz zuma pakzjapa. ⁸ Čhjacñimi jawiñimi tsjiikazza ninacaqui. Yoozqui zapa maynižquiz pacaquiča niiž langztiquiztan jama. ⁹ Wejrnacqui Yooztajapa langžni mazinactča. Ančhucqui Yooz langžta yok cuntičhucča. Nižaza ančhucqui Yooz kjuyta kjuya cuntičhucča.

YOOZTAJAPA LANGZ PUNTU

¹⁰ Yoozqui niiž kuzcama wejr apóstol puestuquiz utchiča. Jalla nekztan Yooz taku paljaychinča, žoñinaca Jesucristužquin criyajo. Wejrqui kjuya kjuyñi maestružtakaztča. Yooz kjuy simintu langzinča. Nekztan Yooziž tjaata langzquiztan jama yekjapaqui Yooz kjuya pirkichiča. Weriž kalltita kjuy simint juntuñ jakziltat pirkačhaja, zumpachaž pirkiz waquiziča. ¹¹ Wejrqui Jesucristuž puntuquiztanpankaz tjaajinčinča. Jalla nii tjaajintaqui Yooz kjuy simintužtakazza. Tsjemat simintuqui anača Yooz kjuyjapaqui. ¹² Nii Yooz kjuy simint juntuñ punta punta pirkitamiz cjesača. Koržtan, paaztan, zuma maznacžtan, jalla ninacžtan pirkitaž cjesača. Nižaza pirkitaž zakaz cjesača tabližtan, cañžtan, pjitžtan jalla ninacžtan. ¹³ Pero zapa mayniž langžtaqui kjanapacha tjeežtaž cjequiča Yooz pjalz tjuñquiziqui. Yoozqui ujžtanžtakaz tankataquiča. Nii ujžtan zapa mayniž langžta yatizinskataquiča, zuma langžta, ana zuma langžta, jalla nii. ¹⁴ Jakziltiž langžtat ujžtan tankattiquiztan tjuračhaja, jalla niiqui zuma pactaž cjequiča. ¹⁵ Jakziltiž langžtat ujsnačhaja, jalla niiqui ana pactaž cjequiča. Pero nii žoñž wirakaz infiernuquiztan liwriita cjequiča, niiž langžta pertissi cjenami.

CRIICHI ŽOÑINACAQUI YOOZ TIMPLU CUNTAČHA

¹⁶ Ančhucqui Yooz timplu cuntača. Yooz Espiritu Santuqui ančhuc kuznacquiz kamča. ¿Jalla nii ana ziz ančhucjo? ¹⁷ Yooz timpluqui Yooztajapanča. Ančhucpachača Yooz timplučhucqui. Jalla nižtiquiztan jakziltat ančhuc akačhaja, nii ančhuc akñi žoñiqui zakaz akta cjequiča; Yooziž castictaž cjequiča.

ANA CRIICHI ŽOÑINACŽ ZIZTAQUI

¹⁸ Ančhucqui anaž jecžquizmi incallskata. Jakziltat ančhucquiztan žoñinacž tjaajintanaca zuma zizñižlaja, jalla niiqui nii tjaajintanacžquiz anača kuz tjaazqui. Pero Yooz puntuquiztan tjaajintanacžquizkaz kuz tjaaz waquiziča, nekztan lititum zizni žoñi cjequiča. ¹⁹ Žoñž kuzquiztan ziztaqui zumzu ziztažtakazza Yooz yujcquiziqui. Cjijrta Yooz takuqui tuž cjiča: “Jakzilta žoñit žoñiž pinsita jarukaz kamčhaj niiqui, jalla nižta kamtiquiztan Yooziž tantaž cjequiča, casticta cjisjapa”. ²⁰ Nižaza cjijrta Yooz takuqui, tuž cjiča: “Tjapa ana criichi žoñinacž pinsitanaca inakazza. Jalla nii zizza Yooz Jiliriqui”. ²¹ Jaziqui anača žoñž kuzquiztan tjaajintaqui kuzquiz sint'izqui, “Jalla nii žoñiqui zumaž tjaajinča”, cjicanaqui. Yoozqui tjapa ančhucquiz tjapa zumanaca tjaacha. ²² Tjappachača ančhucaltaqui, Pablumi, Apolosmi, Pedrumi, tii muntuquiz žejlñimi, žetimi, ticzmi, tii anza žejlñimi, tii jazta žejlñimi, tjappacha ančhucaltača,

Yoozquin sirwiz yanapzjapa. ²³ Nižaza ančhucča Cristužtjapaqui. Nižaza Cristučha Yooz Ejpžtajapaqui.

4

YOOZ SIRWIZ PUNTU

¹ Wejrnacqui Yooz sirwiñi žoñinacakaztčha. Wejrnacaž Yooz sirwan, Yoozqui wejtnacaquiz niiž tuqita chjojzaka pinsitanaca tjaajinchičha, parti žoñinacžquiz tjaajnajo. Jalla nuž ančhucqui wejtnaca puntuquiztan pinsiz waquizičha. ² Jakziltižquiz Yoozqui tjaajinčhaja, jalla nii tjaajintacama parti žoñinacžquiz tjaajinstančha nii žoñiqui. Jalla nužupan waquizičha. ³ Weriž tjaajintaqui yatisinžtaž cjequičha. Pero ančhucqui weriž tjaajinta yatisinžnaquiz niiqui, čhjul žoñimi weriž tjaajinta yatisinžnaquiz niiqui, wejtquiz anaž importičha. Werjpachami ultimu ana yatisinžnasačha. Yoozkazza ultimu yatisin-skatñiqui. ⁴ Wejrqui persun kuzquiz ana čhjul uj wachučhaj niimi, Yooz yujcquiziqui cunamižlani wejr ujchiztni. Ultimquiziqui Yooz Jiliriqui wejr yatisinskataquičha. ⁵ Jalla nižtiquiztan ančhucqui Yooztakaz anaž yekjapanacžquiz tantiiz waquizičha, ima pjalz tjuñi tjonanaqui, nižaza ima Jesucristo Jiliriz tjonanaqui. Ultimquiziqui Jesucristo Jiliriqui chjojta anawalinaca kjanapacha tjeeznaquičha. Nižaza tjapa žoñinacž kuzquiz pinsitanaca tjeeznaquičha, zumpacha pjalzjapa. Jakziltami zuma litjuma ulnačhaja, jalla niiqui honorchiz cjequičha; Yooziž tjaata honoržtan.

MITARAZI KUZIZ ŽOÑINACA

⁶ Jilanaca, cullaquinaca, Apolužtan wejtjan jalla nii wejtnaca puntuquiztan chiyučha, ančhucaquiz tjaajnajo. Wejtnacaž tjaajintami nižaza kamtami Yooz tawk jaručha. Jalla nuž nayžcu, ančhucmi Yooz tawk jaru kamñi kuzziz cjee. Anačha mitarazi kuzziz cjiicjiisiqui, “Wejt Yooz taku tjaajiñiqui juc'ant zumačha; am Yooz taku tjaajiñiqui anal pecučha”, cjicanaqui. ⁷ Ject ančhuca t'aka parti žoñinacžquiztan tucquin uchjo? Ančhuca t'akaž juc'ant waližlaj niiqui, Yoozpankaz juc'ant wali cjiskatchičha. Ančhucqui anačha persunpacha wali cjisnasačha. Jalla nižtiquiztan anačha atinaru kuzziz chiichiziqui, “Juc'ant waličha wejt t'akaqui”, cjicanaqui.

⁸ Ančhucqui wejrnac wirquin ecchinčhucjo? Ančhucqui tjapa Yooz puntunaca zizjo? Ančhucqui wali chawjc jilirinacažtakaz ančhucqui kuzquiz sint'ejo? Wejrnac wirquin ecchinčhucjo? Ultimquiziqui ančhucqui anačha nižta. Jalla nižta cjenauqui walipanž cjesačha. Neesaj wejrnacmi ančhuca partiquiz cjiwčhani, ančhucatan chica jilirinaca cjisjapa. ⁹ Ančhucqui nayčha, Yoozqui wejrnac apostolonaca wirquin ectačha, conta cjisjapa utžta žoñižtakaz, jalla nii. Žoñinacami anjilanacami nižaza tjapa tii muntuquiz žejlñinacami wejtnacaquiz chekža. Ana wali žoñinacažtakaz wejtnacaquiz chekža. ¹⁰ Wejrnacaž Jesucristuž puntuquiztan paljayan ana criichi žoñinacaqui cjiñičha, “Zumzu žoñinacčhucča”. Nuž cjicanž wejtnacaquiz iñarčha. Ančhuczi persun puntuquiztan pinsiñčhucča, “Cristuž cjen zuma zizñi žoñinactčha wejrnacqui”, cjicanaqui. Wejrnac apostolanacaqui humilde kuzziztčha. Ančhuczi persun puntuquiztan pinsiñčhucča, “Tjup kuzziztčha”, cjicanaqui. Wejrnacqui iñartačha. Ančhuczi rispitta žoñižtakazza. Ultimquiziqui ančhucqui anačha nižta. ¹¹ Anzcama wejrnac apostolanacaqui ancha sufručha čherquiztanami kjazquiztanami, nižaza zquitquiztanami. Nižaza wejrnacqui kichtačha. Nižaza anačha wejrnacqui žejlž kjuychiztqui. ¹² Nižaza persun kjaržtan očačnaca langznučha. Žoñinacaž wejtnacaquiz iñarunami zuma tawkžtan kjaaznučha. Nižaza žoñinacaž wejtnacaquiz ana wali paanami, zuma tjurt'iñi kuzziz awantučha. ¹³ Žoñinacaqui wejtnaca puntuquiztan quintra chiičha. Jalla nuž quintra chiyunami, wejrnacqui zuma pazinziz kuzziz chiižinučha. Nižaza žoñinacaqui wejtnacaquiz tsjii cjujchi irataž cherčha, nižaza wirquinpanž tewjčza tsjii juc'ant ana zuma kamñi žoñižtakaz. Jalla nuž wejtnacaquiz watčha.

¹⁴ Jalla nuž cjiyržcučha ana ančhuc azkatzjapa, antiz ančhucaquiz chiižinžcučha wejt k'ayi maatinacaž cjen. ¹⁵ Weriž Jesucristuž puntuquiztan paljaytiquiztan, ančhucqui Jesucristužquin criichinčhucča. Jaziqui wejrqui ančhuca ejp cuntitčha. Kjažtamit

ančhucaquiz wacchi tjaajñinaca, nižaza irpiñinaca želačhani, tsjii ejpchizčuckazza. ¹⁶Jalla nižtiqiztan jaknužt wejr zuma kamučhaja, jalla nižta ančhucqui zuma kamz waquiziča.

¹⁷Jalla nižtiqiztan wejt k'ayi Timoteo cuchanžcuča, ančhucaquiz cjuñkatzjapa, jaknužt wejrqui Jesucristo sirwican kamtučhaja, jalla nii. Nižaza tjapa kjutñi tjapa iclizziz žoñinacžquizimi tjaajnučha, jaknužt žoñinacžlaqui Cristuž kamañchiz kamzłaja, jalla nii. Jalla nuž Timoteoqui ančhucaquiz cjuñkataquičha. Timoteoqui zuma cumpliñi žoñičha. Timoteoqui weriž cjen Jesucristužquin criiichiča. ¹⁸Yekjapanacaqui ančhucaquiztan mitarazi kuzziz cjissinčhucča. Tuz pinsichinčhucča, “Pabluqui anapanž tjonžni tjonasaka”, cjican. ¹⁹Yooz munan, wejrqui wajillaž tjonacha. Nekztan wejrqui nii mitarazi kuzziz žoñinacaž langžta obra pajača, nižaza jaknižta kamañchizłaja, jalla nii. Nii žoñinacaž čhiitami wejtquiz anaž impotiča. ²⁰Yooz mantuquiz kamcan, Yooz aztan zuma kamstančha. Jalla niičha chekanaqui; čhiita takunacakaza anaž chekanaqui. ²¹¿Jaknužt ančhuc pecjo? ¿Ančhuc casticjžapa, wejrqui tjonz waquiziya? ¿Už humilde kuzziz k'ayachtican tjonz waquiza ja? ¿Weriž tjontanaqui kjaž cjiñiž pec ančhucjo?

5

ANA WALI KAMTA QUINTU

¹Jılanaca, cullaquinaca, wejtquin tsjii ana wal quinto tjonchiča, ančhucaquiztan tsjiiqui niíž wiri maa persun tjun tjacsiquičha. Jalla niiqui juc'ant anawaliča. Ana criiči žoñinacami ana nuž paača. ²Jalla nuž cjenami ančhucqui tirapan mitarazi kuzzizčhucča. Pero ančhucalaqui llaquit kuzziz cjis waquiziča. Jalla nižta ana wali paañi žoñiqui ančhucaquiztan jaytitaj cjila. ³Wejrqui ančhucatan ana čica želuča. Jalla nuž cjenami, kuzquiz llaquita sint'ižcuča. Nuž sint'ižcu wejrqui nii uj paañi žoñiž puntuquiztan tantiichinča, ana wali paača, jalla niiqui. ⁴Ančhuczi wejt llaquita kuz cjuñžcan, Jesucristo Jilirž tjuuquiz ajcnaquičha nii uj paañi žoñž puntu tantiizjapa. Jalla nuž ajcžcu, Jesucristo Jiliriqui niíž aztan ančhucatan čicaž cjequičha. ⁵Nekztanaqui ančhucqui nii uj paañiqui Satanasquiz intirjaquičha, niíž curpu t'akjisajo. Niiž curpu t'akjistiquiztan cunamit niíž kuzqui azquichta cječhani. Jalla nekztanaqui Jesucristuž tjontanaqui niíž animuquili liwriita cječhani.

⁶Ančhuca mita kuzziz cjisqui anawaliča. Jalla tii čhiita taku cjuñžna, “Koloculla liwraturaqui tjapa t'anti maza t'amcha”. Jalla nižta iratača nii anawal žoñiqui ančhucatan čica kamcan parti žoñinacžquiz anawali cjiskatasacha. ⁷Tjapa ančhuca anawali kamañanaca eca, zuma kamañchizpan cjisjapa. Jesucristuqui učum cuntiquiztan tsjii wilanažtakaz ticziča, učum ujquiztan ana casticta cjeyajo. Jalla nižtiqiztan ančhucqui ana ujchizza Yooz yujcquiziqui. Tsjii zuma t'anti maza cuntičhucča. ⁸Jaknužt pascua pjijsta paañinaca zuma kamañchiz cjis pecčhaja, jalla nižta irata učumqui zuma kuzziz cjis waquiziča, nižaza Yooz kuzcama litituma kamz waquiziča. Anazuma kuzziz, nižaza anazuma kamañchiz, jalla nižta kamz ana waquiziča.

⁹Tuquiqui cartiquiz cjiyržquichinča tuž cjican: “Adulterio paañinacžquiztan jaytaquičha, nižaza nižta paañinacžtan anaž cumpant'iz waquiziča”. ¹⁰Jalla nuž cjiyržcu wejrqui ultimupan anal cjiwčha, tjapa ana criiči adulterio paañinacžtan ana želajo. Ana criiči žoñinacaqui anawaliž paača, adulteriuquiz ojklayča, nižaza cusanačžquiz kuz tjača, nižaza tjañi zaača, nižaza žoñiž paata yooznaca sirwiča. Tii muntuquiz nižta anawali paañi žoñinaca panž žejlča. ¹¹Yekjapanacazi “Yoozquin criyuča” cjican, anawali paača; adulteriuquiz ojklayča, nižaza cusanačžquiz kuz tjača, nižaza žoñiž paata yooznaca sirwiča, nižaza anawal takunaca joojooča, nižaza licča, nižaza tjañi zaača. Jalla nižta anawali paacan jakziltat Yoozquin criyuča” cječhaj niiqui, jalla nižta žoñinacžtan ana ojklayaquičha. Nižaza anača nižta paañinacžtanaqui čherimi lujsqui. Panž ana cumpant'aquičha.

¹² Wejrqui ana criichi zoñinaca anačha wejtlaqui tantiistanqui. Antiz učhumqui icliz zoñinaca tantiistančha, ujchiz ana ujchiz, jalla nii. ¹³ Nii uj paañi zoñi jaytitaj cjila. Pero Yoozqui nii ana criichi zoñinaca tantiyaquičha, casticzjapa.

6

QUIJZ PUNTU

¹ Jakziltat tsjii jilž quintra quijačhaja, jalla niiqui ana criichi juez yujcquiziqui anaž quijz waquizičha. Pero criichi jilanacžquin quijspančha. ² Jesucristuž tjontan criichi jilanaquaci tjapa ana criichi zoñinacž puntu jusjisaquičha. ¿Nii ana ziz ančhucjo? ¿Tjapa ana criichi zoñinacž puntu jusjisaquiž niiqui, kjažt tsjii quija ana azquichi atasajo? ³ Criichi zoñinacaqui anjilanacž puntu zakaz jusjisaquičha. ¿Nii ana ziz ančhucjo? Jaziqui anjilanačž puntu jusjisaquiž niiqui, ¿kjažt tii muntuquiz žejlñi quija ana azquichi atasajo? ⁴ Ančhucaquiz quijanaca želaquiž niiqui, ¿kjažt ančhucqui ana criichi zoñžquin quijjo? Criichinacžquitzanaqui anaž čjulumi ninacaqui. ⁵ Jalla nuž tii puntuquiztan chiižinučha ančhuc azajo. Ančhucaquiz quijanacačha anaž cjichuca. ¿Tsjii quija želan, ančhucaquiztan anaj azquichi atñi zoñi žejl, kjažtatajo? ⁶ Ana criichi jilirž yujcquiz quijas, ¿kjažtatajo?

⁷ Quija želanaqui, kjanapacha tjeeža, ančhucaquiz ana waličha, jalla nii. Nii criichi jilaž uj paatiquiztanaqui nuž pasinza paachucakazza. Nižaza awantichucakazza. ⁸ Pero ančhucpachačha persun criichi jilanačž quintra payiñchucqui, ana walinaca paacan nižaza tjañi zaacan, jalla nuž.

ARAJPACHQUIN KAMZ PUNTU

⁹ Ana wali kamañchiz zoñinacaqui anaž arajpach wajtquin Yooztan chica kamasacha. ¿Jalla nii ana ziz ančhucjo? Jaziqui ančhucqui anačha incallta cjisqui. Arajpachquin anaž okaquičha tii zoñinacaqui: adulteriuquiz ojklayñinaca, nižaza zoñiž paata yooz sirwiñinaca, nižaza pampa cjicjiñi zultirunaca, nižaza luctakpora tsjii luctakžtan tsjii maatakžtantakaz cjeyasñinaca. ¹⁰ Nižaza tjañinaca, nižaza cusasanacquin kuz tjaañinaca, nižaza licchinaca, nižaza quintra chiičhiñinaca, nižaza zoñinacžquiztan kjañž pecñinaca. Jalla tjapa nižta zoñinacaqui arajpachquin anapan okasačha Yooztan wiñaya kamzjapa. ¹¹ Ima Yoozquin criicanaqui yekjap ančhucqui nižtatačha. Anziqui Jesucristo Jilirž cjen, nižaza Yooz Espíritu Santuž cjen ančhuca ujnacaqui pertuntačha. Jalla nižtiquiztan ančhucqui Yooz partiquiz cjissičha, nižaza Yooz yujcquiziqui walikaz ana ujchiz cjissičha ančhuca ujquiztan liwriita.

YOOZTAJAPAČHA UČHUMQUI

¹² Jilana, cullaquinaca, tsjiilla cjesačha. Yekjapa ančhucqui chiičhani, criichi zoñiqui liwriitaž cjen čjulu paazmi paasačha. Pero čjulu paazmi zuma kamañchiz kamzjapa anaž yanapčha. Čjulu paazmi paasačha, pero čjul paazami ana wejt kuz atipskatz pecučha. ¹³ Tužučha razunaqui. Čjheriqui pjuchjapačha. Nižaza pjuchqui čjherijapačha. Ultimquiziqui Yoozqui piscpacha liwj tucuziñzkataquičha. Tužuzakazza razunaqui, učhum persun curpuqui anačha adulterio paazjapaqui. Antiz učhum curpuqui Jesucristo Jiliržquiz sirwiñijapačha. Nižaza Jesucristo Jiliričha učhum curpuž mantiñiqui. ¹⁴ Yooz Ejpqui Jesucristo Jiliri jacatatskatchičha. Nižaza Yoozqui niž persun aztan učhum curpunaca jacatatskataquičha.

¹⁵ Učhum curpunacaqui Jesucristužtajapačha. ¿Jalla nii ana ziz ančhucjo? Jalla nitziquiztan ¿kjažt criichi zoñiž curpuqui putirii maatakžquin tjaata cjesajo? Anapanž cjichuca. ¹⁶ Jakzilta zoñit putirii maatakžtan adulterio paačhaj niiqui, nuž pucultan tsjii curpuchiztakaz cjissa. Cjijrta Yooz takuqui tuž cjičha: “Luctakžtan maatakžtan lucutiñi cjequiz niiqui, tsjii curpuchiztakaz cjisnaquičha”. ¿Jalla nii Yooz taku ana ziz ančhucjo? ¹⁷ Nižaza jakzilta zoñit persun kuz Jesucristo Jiliržquin tjaquiz niiqui, nuž pucultan tsjii kuzziz cjissa.

¹⁸ Adulterio cjiçisqui anapanž pecalla. Jalla nižta paaquiz̄ niiqui, persunažtajapa quintraž paaçha. Parti paata ujnacaqui, anaž nii adulterio ujžtapachaqui. ¹⁹ Ançhuca curpuqui Yooziž tjaata Espiritu Santuž kjuya timpluça. Jalla nižtiquiztan Espiritu Santuqui ançhucaquizpacha žejlça. ¿Jalla nii ana ziz ançhucjo? Ançhucqui patrunchizpançha. ²⁰ Yoozqui ançhuc kjaychiça, wali preciužtan, Jesucristuž ljocžtan. Jalla nižtiquiztan ançhuca curpuquiztanami kuzquiztanami Yooztajapa honora waytiz waquiziça. Jalla nuž pizcpacha Yooztajapapançha. Jilanaca, anaçha uj paazqui.

7

ZALZ PUNTU

¹ Jaziqui amiž cjiirra pewcžtanacquiz kjaaznasaçha. Jaziqui tii chiižinuçha. Ana zalzqui walikazza. ² Jalla nuž cjenami tii timpuquiz zalz waquiziça, ana adulterio ujquiz tjojtšjapa. Jalla nižtiquiztan zapa luctaka tsjaa maatakžtan zalz waquiziça. Nižaza zapa maataka tsjii luctakžtan zalz waquiziça. ³ Tsjii lucuqui zuma lucužta cjispançha persun maatakžtanaqui. Nižaza tsjaa tjunqui zuma tjunažta cjispançha persun luctakžtanaqui. ⁴ Tjuna curpuqui persun lucžtajapapançha. Nižaza lucž curpuqui persun tjunaltajapapançha. ⁵ Nižaza porapat lucutiñi curpu tjaa-asauquiça. Porapat tsjii acuerduquiz luzasaquiz̄ niiqui, tsjii kjažtallaž nicasasaçha, Yoozquin mayiziquin kuz tjaazjapa. Nii acuerduquiz luzta timpu wattan, nii lucutiñi qui ana iya nicz waquiziça. Tira nicaquiz̄ niiqui persun curpu ana ewjazñi ataçhani, nekžtan Satanás diabluqui nii ana ewjazñi attiquiztan nižaza nictiquiztan adulteriuquiz tjojtškatasaçha.

⁶ Nekžtan jalla tuž chiižinuçha, pero anal ultimu mantuça. ⁷ Wejrqui ana zalzniñça. Jalla nižta kamñiž cjiçhaj tjapa ançhucqui, jalla nižtal pecuça wejrqui. Pero Yoozqui zalz kamaña, nižaza ana zalz kamaña tjaaçha. Jalla nižtiquiztan zapa mayni niž persun Yooziž tjaata kamañ jaru kamstançha. Jalla niiqui walikazza.

⁸ Zultiržquizimi, žew luctakžquizimi žew maatakžquizimi tuž chiižinuçha ançhucaquiz. Wejr irataž cjiçhaj ançhucqui, ana zalzñi. Jalla niiqui waliž cjesaça. ⁹ Anchapanž zalz pecçhaj niiqui, zalzna cjichucaça. Ana zalzcanpacha nižaza ancha maataka peccan želasaž niiqui, ujquiz tjojtznasaçha. Jalla nuž cjenaqui zalzla cjichucapanikazza.

JALJTIZ PUNTU

¹⁰⁻¹¹ Zali žoñinaca, ançhucaquiz wejr mantuça, jalla tuž. Tsjaa tjunqui naaža persun luctakžtan ana jaljtiz waquiziça. Nižaza tsjii lucuqui niž persun tjunatan ana jaljtiz waquiziça. Jaljtaquiz̄ niiqui, ana iya yejkžtan zalznasaçha. Pero nii lucutiñ žoñiqui porapat pertunas waquiziça. Jalla tii mantitaqui anaçha weriž mantitakazzi, Yooz Jiliriz mantitapançha.

¹² Parti žoñinacžquiz chiižinuçha, tii chiižintaqui ana Yooziž mantitaça. Tsjii criichi žoñiqui ana Yoozquin criichiñ tjunchizlaj niiqui, nižaza naa tjunqui lucutiñipan kamz pecçhaj niiqui, nii criichi lucuqui ana jaljtiz waquiziça. ¹³ Nižaza tsjii criichi maatakaqui ana criichi lucchizlaj niiqui, nižaza naaža lucuqui lucutiñipan kamz pecçhaj niiqui, naa criichiñ tjunqui ana jaljtiz waquiziça. ¹⁴ Naaža cjen Yoozqui naaža ana criichi lucu cwitiça. Nižaza Yoozqui ana criichiñ tjun cwitiça naaža Yoozquin criichi lucchiz cjen. Ana nižta cjequiz̄ niiqui, nii lucutiñ maatinacaqui ana criichi žoñinacž maatinacažtakaz cjesaça. Pero Yoozqui nii lucutiñ maatinaca cwitiça. ¹⁵ Pero tsjii ana Yoozquin criichi lucumi už tjunmi jaljtizpanž pecçhaj niiqui, tsjiikaj jaljtila cjichucaça. Jalla nižta wataquiz̄ niiqui nii Yoozquin criichi lucu cjicu už tjun cjicu jaljtasaça, porapat zuma kamasajo, ana wali kamchuca cjenaqui. Yoozqui učhum criichinaca kjawzicha, zuma kamajo. ¹⁶ ¿Criichi lucuqui niž ana criichiñ tjun ultimu Yoozquin criiskatasajo? Ana zizzucaça. ¿Nižaza criichiñ tjunqui naaža ana criichi lucu ultimu Yoozquin criiskatasajo? Ana zizzucaça.

YOOZIŽ TJAATA KAMAÑ JARU KAMZ WAQUIZIÇA

¹⁷ Zapa mayniqui Yooziž tjaata kamañ jaru kjažtachichimi kamz waquiziça. Yooziž kjawžtaž cjen tsjii wira kamchinçhucça. Jalla nii wira ana Yooz quintražlaj niiqui,

nižta kamzquiz cjesača. Jalla nužupan mantuča tjapa iclizziz žoñinacžquin. ¹⁸ Criiz oraqui jakziltat judfo žoñž chimputažlaj niiqui, chimputa žela. Nižaza criiz oraqui jakziltat ana chimputažlaj niiqui, ana chimpuskata. ¹⁹ Chimputamani ana chimputamani anaž importiča. Yooz mantitacama kamzqui, jalla niiča importaqui. ²⁰ Yoozquin criižcuqui čjul žoñimi čjul kamañchizlaja, jalla nii kamañquiz cuntintu žejlkazza. ²¹ Criiz oraqui žoñž mantuquiz žejlcunami, amqui ana kuz turwayskataquiča. Nekztan, jalla nii žoñž mantuquiztan liwriita cjesaž niiqui, pan ulnaquiča, liwrii cjisjapa. ²² Jakzilta criichi žoñit žoñž mantuquizlaj niiqui, nii žoñž mantuquiz tira žejlcunami, cjuñzna, Jesucristo Jiliriz liwriitača, nii. Nižaza jakzilta criichi žoñit žoñž mantuquiz ana žejlčhaja, tii cjuñzna, Jesucristuž mantuquiz žejlča, nii. ²³ Yoozqui ančhuc kjayčiča wali jila preciužtan. Cristuž ljokča nii preciuqui. Jalla nižtiquiztan žoñž mantuquiz anača cjskatsqui. ²⁴ Yoozquin criižcuqui čjul žoñimi čjul kamañchizlaja, jalla nii kamañquiz žejlz waquiziča. Kjažtachichimi cuntintu cjequiča Yooztan chica kamchiž cjen.

ZALZ PUNTU

²⁵ Yoozqui wejtquiz ana taku tjaachiča zultirunacž puntuquiztan. Pero, wejrqui tuž chiižinuča. Nižaza cjuñzna, Yoozqui wejtquiz apóstol kamaña cumpjiičiča. Nižaza nii apóstol kamañ jaru panž kamuča. Wejrqui Yooziž illtitiča nižquin sirwizjapa. Jalla nižtiquiztan weriž chiižinta tawkquiz kuz tjaaž waquiziča. ²⁶ Tuž chiižinuča. Tii timpuquiz kamzqui ch'amača criichi žoñinacžtajapaqui. Jalla nižtiquiztan čjul kamañchizlaja, jalla nii kamañquiz žejlz waquiziča. Zalzižlaja, zalzi žela; ana zalzižlaja, ana zalz waquiziča. ²⁷ Jakziltat tjunchiz cječhaja, anaž persun maatakžtan jaljtiz waquiziča. Nižaza ana zalzi žoñiqui maataka kjurz ana waquiziča. ²⁸ Pero jakziltat zalznačhaja, jalla nii zalžtaqui anača ujqui. Nižaza jakzilta turt zalznačhaja, jalla nii zalžtaqui anača ujqui. Tii ch'ama kamz timpuquiz zalžnacžquiz juc'ant llaquinaca cjequiča. Wejrqui anaj nižta llaquita kamjaa ančhuc cjiwčhiya.

²⁹ Jilanaca, cullaquinaca, tii walja ch'ama kamz timpuqui ana ažka tjuraquiča. Jalla nižtiquiztan tekztan nawjčhuc tjunchiz žoñinacaqui anaž tjunaquiz juc'anti kuz tjaaquiča. Antiz Yoozquin juc'anti kuz tjaaquiča. ³⁰ Nižaza llaquita žejlñi žoñinacaqui anaž anča llaquisaquiča. Yooztan kamchiž cjen cuntintu cjequiča. Nižaza čjulquiztan chipšni žoñinacaqui anaž juc'anti kuz tjaaquiča chipchipsquiziqui. Yoozquin juc'anti kuz tjaaquiča. Nižaza cusasanaca kjayñi žoñinacaqui anaž juc'anti kuz tjaaquiča kjayta cusasanacquiz. ³¹ Tii muntumi nižaza tii muntuquiz žejlñimi tucuzinžnaquiča. Jalla nižtiquiztan jakziltat tii muntuquiz želinchiz cječhaja, anaž nii želinchizquiz kuz tjaaquiča. Antiz Yoozquin juc'anti kuz tjaaquiča.

³² Ančhucqui tii muntu kamcan kuz turwayzquiztanaqui liwriitakaj cjeejal cjiwčhiya. Ana zalžni žoñinacaqui Yooz kamañquizkaz kuz tjaašanča; Yooz kuz cuntintu cjskatz pecča. ³³ Zalžni žoñinacazti Yoozquin sirwicanami tii muntu kamañquiz kuz tjaača, persun tjun cuntintu cjisjapa. ³⁴ Nižaza zalzi maatakž kamañžtan zultir maatakž kamañžtan anača tsjiikaz. Ana zalzi maatakqui Yooz kamañquizkaz kuz tjaača. Curpumi kuzmi Yoozquin sirwizquin tjapa kuz tjaača. Pero zalzi maatakazti Yoozquin sirwicanami tii muntu kamañquiz kuz tjaača, persun lucu cuntintu cjisjapa.

³⁵ Tii weriž chiižintaqui ančhucalta wali cjisjapača, anaž ančuca atajzjapa. Nižaza tii weriž chiižintaqui ančucaquiz zuma kami yanapzjapača, nižaza Yoozquinpankaz tjapa kuz tjayi yanapzjapa.

³⁶ Tsjiilla cjesača, zalz puntuquiztan zakaz. Jakzilta žoñžtat tsjaa majt želačhaja, zalz irarquiz tjonchiñ, nižaza anča zalz pecchiñ. Ana chajalztiquiztan niž kuz turwayskatčhaj niiqui, tuž chiižinuča. Niž tur chjalz wali tantiižcu, chjalznasača. Nii chjalzqui anača ujqui. ³⁷ Tii puntu iyal chiižinuča. Naa tura ejpqui ana chjalz pecčhaj niiqui, ana chjalzuača. Walikaz cjesača. Naa turaž cjen, ana jarita cjesaž niiqui, nižaza niž persun kuzquiz ana chjalz pinsitacamažlaj niiqui, ana chjalzuač cjesača. Jalla nii ana chjalzqui waliž cjesača. ³⁸ Jaziqui nii chjalzni žoñiqui walikaz paača. Pero nii ana chjalzni žoñizti juc'ant walikaz paača.

³⁹ Zalñi maatakaqui persun lucžtan kamaquiča, čhjlorat ticznačhaja, jalla niicama. Jalla niiqui liy jaručha. Jalla nuž lucu ticzi cjenauqui naa žew žonqui yekja lucžtan zalznasača, pero Yoozquin criichi žoñizakaz cjesača. ⁴⁰ Pero naa žew žon ana zalznaquiči niiqui, juc'ant cuntintu cjequičha. Jalla nuž pinsučha wejrqui. Nižaza Yooz Espiritu Santučha wejt kuzquiziqui, weriž pinsita zuma cjisjapa.

8

ŽOÑIŽ PAATA YOOZNACQUIN TJAATA ČHJERI PUNTU

¹ Tsjilla cjesača, žoñiž paata yooznacquin tjaata čhjeri puntuquiztan. Ančhucqui cjiča: “Tjapa wejrnacqui nii puntuquiztan zizuča”. Pero wejr cjiwča, jakziltat “Wejrtča ziziñtqui”, cječhaj niiqui, mit kuzziz cječhani. Nižaza jakziltat zuma munaziñi kuzziz cječhaj niiqui, parti criichi žoñinacažquiz yanapstanča zuma kamañchiz cjeajo. ² Jakziltat persun kuzquiz pinsican: “Ultim weraral zizuča”, cjian cječhaja, jalla niiqui ana zuma zizza. Anapanž ultim werara zizasača. ³ Jakziltat Yoozquin tjapa kuz tjaachaja, Yoozqui nii žoñi pajča niiž maati cunta.

⁴ Jaziqui nii žoñiž paata yooznacquin tjaata čhjeri puntuquiztan, tuž cjiwča. Žoñiž paata yooznacaqui anapanča ultim Yoozqui. Nižtiquiztan anača čhjulumi. Werar Yoozqui zintallapanikaz žejlča. ⁵ Tii muntuquiz žejlñi žoñinacž yooznacaqui wacchiča. Ana criichi žoñinacaqui tii yokquiz žejlñimi nižaza tsewc arajpachquin žejlñimi cjiča, “Niiča Yoozkaz”, nižaza “Niiča učhum Jiliriqui”, panž cjiča. ⁶ Učhumnacalta tsjii werar Yoozkaz žejlča. Tsjii Yooz Ejp žejlča. Niiqui tjapa žejlñinaca paachiča. Nižaza učhumnacaqui nižtajapača. Nižaza tsjii Jesucristo Jilirikaz žejlča. Niiž cjen tjapa žejlñinaca žejlča, nižaza niiž cjen učhumnacaltaqui ew žejt kamaña žejlča.

⁷ Žoñiž paata yooznac puntuquiztan yekjap criichi žoñinacaqui ana zuma intintiča. Tuqita yekjapanacaqui ančhucquiztan žoñiž paata yooznaca sirwiñitača. Jalla nižtiquiztan anziqiu yooznacquiz tjaata čhjeri lujlcan, nii paata yooznacquin pinsiča, nižaza persun kuzquiz sint'iča. Jalla nižtiquiztan nii čhjeri lujlchiž cjen ultim Yooz quintra uj paača. ⁸ Yooz yujquiziqui čhjeri lujlchi cjenami ana čhjeri lujlchi cjenami anaž impertiča. Jakziltat čjul čherimi lujlčhaj niiqui, nii čherquiztan anaž tsjan Yoozquin kuzziz cjesača. Nižaza jakziltat ana tjpaman čhjeri lujlčhaj niiqui, nii ana tjpaman čhjeri lujltiquiztan ana upa Yoozquin kuzziz cjesača. ⁹ Pero žoñiž paata yooznacquin tjaata čhjeri lujlquiztan cwitazaquičha, ana tsjii ana zuma intintiñi criichi jila ujquiz tjojtskatzjapa. ¹⁰ Ančhucqui zizza, žoñiž paata yoozqui anača čjulmi, jalla nii. Nižaza ančhucqui žoñiž paata yooznacquin ana sint'iča. Pero yekjap jilanacazti tirapan žoñiž paata yoozquin kuzquiz sint'iskatča, ultimu Yoozquin criichi cjanami. Jaziqui yekjap ančhucquiztan žoñiž paata yooz timpluquiz čhjeri lulasača. Pero tsjii jilaqui ančhuc cheržcu lujl zakaz pecasača, aunquimi nii žoñiž paata yoozquin sint'icanami. Jalla nižtiquiztan nii žoñiž paata yoozquin sint'iñi jilaqui ultim Yooz quintra uj paasača, nii žoñiž paata yoozquin tjaata čhjeri lujlžcu. ¹¹ Jaziqui ančhucadž lujltiquiztan nii criichi jilaqui werar Yoozquiztan zarakskatča. Jesucristuqui nii jilž laycu ticziča, jalla. ¹² Pero ančhucqui nii jilž kuz ana wali cjiskatča. Jaziqui nii jilž quintrami uj paača, nižaza Cristuž quintrami uj paača. ¹³ Jalla nižtiquiztan žoñiž paata yoozquin tjaata čhjeri lujlchiž cjen wejt jila ujquiz tjojtskatasadž niiqui, anapan nii čhjeri lujlž pecučha. Wejrqui anapan yekja jila ujquiz tjojtskatz pecučha.

9

PABLUŽ KAMAÑA PUNTU

¹ Wejrqui liwriičha. Jalla nižtiquiztan čhjulu paazmi paasača. Wejrqui Jesucristuž cuchanžquita apostoltča. Nižaza wejrqui persun čhjujčžtan učhum Jesucristo Jiliri cherchinča. Nižaza weriž Yooz taku paljaytquiztan, ančhucqui Jesucristo Jiliržquin criichinčhucča. Jaziqui ančhucqui wejt obra cuntača Yooztajapaqui. ² Cunamit yekjapanaca wejr ana apóstol pajčhani. Ančhuczti wejr apóstol pajstanča. Ančhucadž

Jesucristužquin criichiž cjen, wejrqui kjanapacha tjeeztitčha, ultim werara apóstol, jalla nii.

³Wejt quintra chiihinacžquiz kjaaznučha, tuž cjan: Wejrtčha ligitum apostoltqui. ⁴Jalla nižtiquiztan criichi žoñinacaz tjaata čherimi nižaza čjul tjaatami tanznasachha. ⁵Nižaza apóstol kamañquiz ojklaycan criichiñ tjun chjichasachha. Jalla nižta chjichñičha parti apostolanacaqui, nižaza Jesucristo Jilirž persun lajknacami, nižaza Pedrumi. ⁶Wejttan Bernabežtan Yooz taku paljaycan tirapan langznučha, persuna mantinzjapa. Jalla nuž cjenami, tii mantinzjapa langzqui jaytasachha, ančhucqui wejr mantinžinajo.

YOOZ TAKU PALJAYŇI ŽOŇŽ PUNTU

⁷Tsjiilla cjesachha nii puntuquiztan. Zultatunacaqui anaž sirwičha, persuna mantincan. Nižaza zkala langzñi žoñiqui zkal čherquiztan lulasachha. Nižaza uza ichñi žoñiqui uzi lichiz licasachha. Jalla nužupančha tii muntuquiziqui. ⁸Anachha wejt kuzquiztankaz tii chiitaqui. Jalla nuzupanž chiičha Moisés cjiyrta Yooz takuqui. ⁹Nii Moisés cjiyrta liiquiziqui tuž cjičha: “Tsjii zkala jojñi wacaqui anaž ñujcz waquizičha”. Yoozqui jalla nuž cjan chiičičha anachha wacžtajapa, ¹⁰antiz wejrnacaltajapachha. Niijapa nii Yooz taku cjiyrtačha. Zkal yoka kjullñi žoñimi, nižaza zkala jojñi žoñimi tjewznačha zkalquiztan tsjižžtan tanzjapa. ¹¹Jaziqui wejrnacqui ančhucaquiz Yooz taku paljaychinčha, zkala čhjaczhižtakaz. Jalla nižtiquiztan wejrnacalaqui ančhucaquiztan mantinzjapa tanzñi cjičhua, zkala langzñi žoñižtakaz.

¹²Yekja Yooz taku tjaajñi žoñinacaqui ančhucaquiztan mantinzjapa tanchipančha. Wejrnacalaqui ančhucaquiztan juc'anti tanzuca. Wejrnacžti anapan wira mantinz exijcan kamiñčha. Wejrnacqui persuna langztiquiztan mantincan kamiñčha. Čhjulumi awantučha liwriñi Cristuž taku catokz ana atajta cjejajo. ¹³Timpluquiz langzñi žoñinacaqui timpluquiztan mantiñičha. Nižaza timplu altarquiz wilana jawkñi žoñinacaqui wilana jawkta chjizwiquiztan mantiñitachha. Jalla nii ančhucqui zizza. ¹⁴Jalla nižtapacha Jesucristo Jiliriqui mantichičha, jakziltat liwriñi Yooz taku paljayačhaja, jalla niiqui nii Yooz taku paljayz langzquiztan mantinasachha.

PABLUQUI YOOZ TAKU PALJAYČHA, PERSUNA MANTINCAN

¹⁵Wejrqui anapan mantinz exijcan kamiñčha. Nižaza anziqui anal ančhucaquin cji-jržčučha wejr mantinskatzjapa. Ana jakziltižquizimi mantinskatz pecučha. Wejrqui ima žoñžquiz mantinskatzcan ticzkal pecasachha. Tii persuna mantinz honora ana wejtquiztan kjañkatz pecučha.

¹⁶Yooz taku paljaycan wejrqui anal mit kuzziz cjesachha. Yoozqui wejtquiz nii kamaña tjaachičha. Jalla nižtiquiztan Yooz taku paljaystančha. Liwriñi Yooz taku ana paljaysaž niiqui, wejrqui castictal cjesachha. ¹⁷Nižaza wejrqui persun kuzcamakaz Yooz taku paljaytasaz niiqui tsjii pacz tjewztasachha, weriž Yoozquiz yanaptiquiztan. Pero anachha wejt kuzcama tii puestuquin kamučha. Yoozqui tii Yooz taku paljayz kamaña wejtquiz tjaachičha. Jalla nižtiquiztan Yooz taku paljaystanpančha wejrqui. ¹⁸Nižaza liwriñi Cristuž taku paljaycan ana jeczquiztanami cobriñčha, wejr mantinžinajo. Antiz persunpacha mantinučha. Jalla nižta ojklayžcu ancha cuntintučha. Jalla ničha wejt kuzquiz pactažtakazqui.

¹⁹Cristuž cjen wejrqui liwriitačha. Jaziqui žoñž kuzquiz pinsita jaru ana kamučha. Jalla nuž liwriitaž cjenami, wejrqui tjapa žoñž kuz jaru paasachha, walja žoñinaca Cristužquin kuzziz cjiskatzjapa. ²⁰Judío žoñinacžtan kamcan, judío žoñinacž cuzturumpi paa-učha, ninaca Cristužquin kuzziz cjiskatzjapa. Nižaza, Moisés liy jaru kamñi žoñinacžtan kamcan, Moisés liy paa-učha, ninaca Cristužquin kuzziz cjiskatzjapa. Ultimquiziqui anal nii Moisés liy mantuquiz kamučha. ²¹Nižaza ana Moisés liy jaru kamñi žoñinacžtan kamcan, wejrqui zakal Moisés liy jaru ana kamučha, nii žoñinaca Cristužquin kuzziz cjiskatzjapa. Ultimquiziqui wejrqui werar Yooz liy jaru kamučha, nižaza Cristuž liy jaru kamučha. ²²Nižaza čjulquizimi kuz sint'iskatñi žoñinacžtan kamcan, wejrqui nižtakaz kuz sin'tiskattažokaz cjiñčha, nii žoñinaca Cristužquin kuzziz cjiskatzjapa. Jalla nižta

punta punta kamuča, jaknužumi žoñinaca liwriita cjeayo. ²³ Jalla nižta punta punta kamucha, žoñinacžquiz liwriiñi Yooz taku criiskatzjapa. Nižaza jalla nižta kamucha, persunpacha Yoozquiztan zumanaca tanzjapazakaz.

²⁴ Tsjiiilla cjesača. Ančhucqui tuž zizza. Tsjii zajtrñiquiz tjapa zajtrñi žoñinacžquiztan tsjiillapankaz ganča. Jalla nuž cjuñzcu ančhucqui Yooz jiczquiz tjapa kuztan zajtz waquiziča, premio ganzjapa. ²⁵ Tjapa piluta uziñinacaqui walja istutičiča ima canchiquiz luzcan. Nižaza ana walinacquiztan jaytissa tsjan cusa uzinzjapa. Jalla nižta paača, tsjii chjañquiztan paata royti pillu ganzjapa. Nii premiuqui tsjii upacamakaz tjurča. Ančhuczi Yooz jiczquiz zajtča, tsjii wiñaya tjurñi premio ganzjapa. Jalla nii premiuqui cjiča, Yooztan wiñaya kamz, jalla nii. ²⁶ Wejrqui anal inapampa Yooz jiczquiz zajt zajtcan kamuča. Tsjii pucultan boxsijasñi žoñinacaqui anaž tsjii kjutñi čhajcz pecča. Antiz panž čhajcza tsjiizuñž ujycjin. Wejrqui jalla nižtažakaz anal inapampa kamuča. Antiz liwriiñi Yooz takucama kamuča. ²⁷ Wejrqui persun kuzquizpacha ewjasuča čjul anawalinacami paazquiztan. Wejrqui jalla nuž paa-uča, Yooz wejr ana wirquin tjewcznajo. Yekjapanacžquiz zuma tjaajinžcu wejrqui anal wirquin tjewczta cjis pecuča, wejr ana zuma kamchinž cjen.

10

TUQUITA EJPNAČŽ KAMTA PUNTU

¹ Tsjiiilla cjesača. Wejrqui ančucaquiz tuž zizkatz pecuča. Egipto yokquiztan ulanžquichi tuquita ejpnacaqui tsjir koztan kamatča. Moisés irpita kamatča. Nižaza Moisesqui tjapa ninaca Ljoc Kota tjakchiča. ² Jalla nuž irpitaž cjen, nižaza Ljoc Kota tjaktaž cjen, nii žoñinacaqui Mojestan tsjii kuzziztača. Jalla nižtiquiztan tjapa ninacaqui Moisés irpiñi bautistažtakaztača. ³ Nižaza tjapa ninacaqui Yooz tjaata čjheri lujlchiča. ⁴ Nižaza tjapa ninacaqui tsjii pajk maz ajkquiztan Yooz tjaata kjaz licchiča, curpu mantinzjapa, nižaza ninacž kuz wali mantinzjapa. Nižaza ninacž kuz wali mantinzjapa Cristutača mazquiztan ulanñi kjaztakaz. Jalla nii Cristuqui chicapacha cumpañ'atča ninacaž jiczquiz okan. ⁵ Jalla nuž Cristuž cumpañ'ita cjenami, jila parti nii žoñinacaqui anapan Yoozquin kuzziztača. Jalla nižtiquiztan Yoozqui anatača cuntintu; ninacž quintra žawjchiča. Jalla nižtiquiztan nii žoñinacaqui ch'ekti yokquin ticziča.

⁶ Jalla nii tuquita kamtaqui cjiirtatača učumnaca cjuñajo, nižaza nižta ana walinaca tuquitažtapacha ana paajo. ⁷ Jaknužt yekjapa tuquita ejpnaca žoñiž paata yooznacquin sirwitčhaja, jalla nižtapachaqui anapanž kamz waquiziča ančhucqui. Nii tuquita ejpnacž puntuquiztan cjiirta Yooz takuqui, tuz cjiča: “Nii žoñinacaqui čjheri lujlžcu licžcu tsajts pijjsta payi waquintichiča.” Jalla nižta irata kamz anaž waquiziča. ⁸ Nižaza yekjap tuquita ejpnacaqui adulterio paachiča. Jalla nižtiquiztan ticziča 23,000 žoñinacaqui tsjii noojkaz. Jalla nii cjuñzna. Adulterio anača paazqui. ⁹ Nižaza yekjap tuquita ejpnacaqui: “Yooza pazinziz kuzzizqui”, cjičiča. Jalla nekztan juc'anti anawalinaca paapatča. Ultimquiziqui Yooz Ejpqui ninaca casticchiča. Jalla nii castictiquiztan walja žoñinacaqui ticziča, zkoranacaž č'h'atta. Jalla nii cjuñzna. Anača uj paazqui: “Yooza pazinziz kuzzizqui”, cjičanaqui. ¹⁰ Nižaza yekjap tuquita ejpnacaqui Yooz quintra chutchiča. Jalla nižtiquiztan Yoozqui anjila cuchanžquichiča ninaca conzjapa. Jalla nii cjuñzcu, ančhucqui Yooz quintra chuch anaž waquiziča.

¹¹ Tjapa tuquita ejpnacaž kamtaqui Yooz tawk libruquiz cjiirtatača učumnacaquiz chiižinzjapa ana nižta paajo. Tii muntu tucuzinz žcatžinžquiči. Jalla nižtiquiztan tuquita ejpnacaž kamta quintunaca zumpacha cjuñž waquiziča, ana nižta kamzjapa. ¹² Jalla tuž cjiwča. Jakzilzat persun kuzquiz “walikaztča wejrqui” cjan pinsičhaja, jalla niiqui panž cwitazaquiči, ana ujquiz tjojtsjapa. ¹³ Čjul pruebanacquizimi ančhuc sufričhaja, jalla nižta pruebanacquiz zakaz tsjii tsjii criichi žoñinacaqui sufriči. Čjul pruebanacaž sufriskatta cjenami Yoozqui anchucaquiztan nii pruebanaca ana atipskataquiči. Antiz ultimquiziqui Yoozqui čjul pruebanacquiztan anchucaquiz atipskataquiči, ančhuc

ana čhjul ujqiz tjojtšjapa, nižaza tjurt'iñi kuzziz awantizjapa. Učhum Yoozza zuma yanapñiqui, učhumnacaž tjapa pruebanaca tjurt'iñi kuzziz watajo.

ŽOŃIŽ PAATA YOOZNACQUIZTAN ZARAKA

¹⁴ Weriz pecta jilanaca, cullaquinaca, žoñiž paata yooznacquiztan zaraka. Anapanž ninacžquiz sirwa. ¹⁵ Ančhucča zizñi žoñinacaqui. Ančhucpacha tii weriz chiita taku yatisinznasacha, werara ana werara, jalla nii. ¹⁶ Cristuqui učhum laycu ticziča. Jalla nii cjuñznajo Cristuqui cuzturumpi mantichiča, uwas kjaz liczmi, nižaza t'anta lujlžmi. Nii uwas kjazza Cristuž ljoc cuntaqui. Nižaza nii t'antača Cristuž curpu cuntaqui. Nii Cristuž mantita cuzturumpi paacan Yoozquin gracias cjican chiiča. Nii uwas kjaz liccan Cristužtan tsjii kuzziz cjican tjeeža. Nižaza nii tojža t'anta lujlcan Cristužtan tsjii kuzziz cjican tjeeža. ¹⁷ Tsjii t'anta žejlča, aunquimi t'unapacha kjolžtami. Nižtakazza učhummi. Walja tama criichinaca želanami, tsjii curpuchiztakazza. Tsjii t'antiquiztan tjappacha lujlča, jalla nuž tjeeža, tsjii kuzzizza tjappacha, cjicanaqui.

¹⁸ Israel žoñinacžquiztan tii puntu cjuñzna. Jakziltat Yooz altarquin wilana jawkčhaja, jalla niiqui wilanquiztan lujlcan nii altarž Yooztan tsjii kuzziz cjican tjeeža. ¹⁹ Nonižna, žoñiž paata yoozqui anaž čhjulumi. Nižaza žoñiž paata yoozquin tjaata chjizwimi anaž čhjulumi, chjizwikazza. ²⁰ Pero jakzilta ana Yoozquin criichi žoñit wilana jawkčhaja, jalla niiqui zajranacžquin wilana onanča, anapanž werar Yoozquin onanča. Jalla nižtiquiztan ančhucqui anaž ninacžtan cumpañt'iz waquiziča. Cumpañt'aquiz niiqui zajranacžquiz kuzziz cjican tjeeža. ²¹ Anaž jakziltami Cristo Jilirž wasumi nižaza zajranacž wasumi tanznasacha. Nižaza anaž jakziltami Cristo Jilirž t'antami nižaza zajranacž čherimi tanznasacha. Anača nižta kuzziz cjichuca. Antiz tsjii Yoozquizpanikaz kuzziz cjesača. ²² Jakziltat zajranacž cuzturumpiquiz mitisaquiz niiqui, jalla nii žoñž quintra werar Yoozqui žawjwaquičha. Jalla nižtiquiztan ančhucqui nuž paaquiz niiqui, castictaž cjequičha. Ančhucqui anača Yoozquiztan juc'anti azziz jalla.

ŽOŃIŽ PAATA YOOZNACŽQUIZ ANA MITISA

²³ Jalla tuž weraracha. Tsjii criichi žoñiqui liwriitača. Jalla nižtiquiztan čhjulumi paasacha. Pero tjapa paataqui juc'ant Yoozquin kuzziz cjsjapa anaž yanapča. Nižaza čhjul paatami anaž parti criichinacžquinami yanapča zuma kamañchiz kamajo. ²⁴ Parti criichinacaž zuma kamañchiz cjsjapača kuz tjazqu. Anača persun kamañjapakaz kuz tjazqu.

²⁵⁻²⁶ Cjijrta Yooz takuqui tuž cjiča: “Tjapa tii muntuqui Yooz Jiliržtacamača, nižaza tjapa tii muntuquiz žejlñinacaqui Yooz Jiliržtacamača”. Jalla nižtiquiztan mercatquiz kjayta čherimi lulasača. Anaž persun kuz turwayskataquičha tuž pinsican, tii čherižlan žoñiž paata yoozquiz tjaata čheri, už žoñiž paata yoozquiz ana tjaata čherižlaj, jalla nii.

²⁷ Nižaza ana werar Yoozquin criichi žoñiqui čheri lujlžjapa am impitasaž niiqui, okasača, ojz pecasaž niiqui. Jalla nuž okaquiz niiqui, čhjul onanta čherimi lujlžnacuča anaž persun kuz turwayskatcan. ²⁸⁻²⁹ Pero tsjiiqui amquiz maznačhani, tuž cjican: “Tii čheriqui žoñiž paata yoozquiz tjaata čheričha. Jalla nii čheri ana lujlž waquiziča”. Jalla nuz cjenauki amlaqui anača nii čheriqui lujlsinsqui, nii mazñi žoñž sint'iñi kuz anawali cjskatzjapa, nižaza niiž kuz ana turwayskatzjapa. Am persun kuzqui walikaz cječhani, ana turwayta. Jalla nuž cjenami amqui nii čheri lulasaž niiqui, am jilž kuz turwayskatasacha.

Jalla nii weriz chiižintiquiztan yekjap ančhucquiztan wejtquiz pewcznačhani, tuž cjican: “¿Kjažtiquiztan amqui nižta chiižinjo? Tsjii žoñiž sint'iñi kuzziz cjenami, čhjulumi paaz atučha, Cristuqui wejr liwriičičha. ³⁰ Ima čhjul čherimi lujlcan Yoozquin gracias cjican chiyučha. Jaziqui, ¿kjažtiquiztan weriz lujltiquiztan žoñej wejtquin uj tjojtunjo?” Nuž cjican, wejtquiz chiyučhani. ³¹ Ančhucquiz tuž kjaaznuča. Čheri lujlžmi, čhjulumi paazmi Yooztajapa honora waytiz waquiziča. ³² Ančhucqui anaž jec žoñimi ujqiz tjojt-skata, judfo žoñinacami, ana judfo žoñinacami, nižaza Yooz iclizziz žoñinacami. ³³ Wejrzi

kjažllami tjapa žoñinacžquiz yanapučha zuma kamañchiz kamajo. Anal wejtjapakaz ojklayučha. Antiz parti žoñinacžtajapa ojklayučha, ninaca ujquiztan liwriita cjeajajo.

11

¹ Wejrqui jaknužt Jesucristuqui kamčhaja, jalla nižtazakal kamučha. Nižaza jaknužt wejr kamučhaja, jalla nižtazakaz kama ančhucqui.

ACHA CH'OKCHI CUZTURUMPI PUNTU

² Jilanaca cullaquinaca, ančhucqui tjapa weriž tjaajintanaca cjuñčha, nižaza weriž tjaajintacama kamiñchucčha. Jalla nižtiquiztan ančhucaquin felicitučha. Ultimu anačha wejť kuzquiztan nii tjaajintaqui, antiz, wejťquiz tjaajintatačha.

³ Jilanaca, cullaquinaca, persun luctakž mantuquiz žejlčha maatakanacaqui. Nižaza zapa luctak žoñiqui Cristuž mantuquiz žejlčha. Nižaza Cristuqui Yooz Ejpž mantuquiz žejlčha. Jalla nii puntuquiztan ančhucaquin intintiskatz pecučha. ⁴ Iclizquiz ajčzcu luctak žoñinacaqui pañžtan acha ch'okchi anapanž cjesačha, Yoozquin mayizicanami, nižaza Yooziž tjaata taku tjaajincanami. Acha ch'okchižlaj niiqui, persunjapa ombrawillaž cjesačha. ⁵ Nižaza iclizquiz ajčzcu, criichi maatakanacaqui panžtan acha ch'okchi panž cjesačha, Yoozquin mayizicanami, nižaza Yooziž tjaata taku tjaajincanami. Acha ana ch'okchinžlaj niiqui, persunjapa ombrawillaž cjesačha. Acha ana ch'okchinžlaj niiqui ach chara k'ala murtaž cjes, nižtažtakaz cjesačha. ⁶ Iclizquiz ajčzcu, jakzilta maatakat ana acha ch'okchinžlaj niiqui, naaža persun ach chara k'ala murtaž cjila. Nekztan naaqui acha ch'okznasačha. Naaža ach chara k'ala murtaž cjen ombrawillaž cjesačha. Jalla nižtiquiztan maatakaqui acha ch'okchinpanž cjis waquizičha. ⁷ Yoozqui niž kuzcama luctak žoñi paachičha niž irata cjeajajo. Jalla nižtiquiztan luctak žoñiž cjen Yooztajapa honoraqui tjeeztačha. Nižaza maatakaž cjen luctakž honoraqui tjeeztačha, jalla nižtiquiztan criichi luctakaqui iclizquiz ajčzcu anapan acha ch'okchi cjis waquizičha. ⁸ Tuquita timpuqui Yoozqui luctaka paachičha, nekztan luctakžquiztan maataka paachičha. Luctakaqui ana maatačquiztan paatačha. ⁹ Nižaza maatakaqui luctakžtajapa paatačha. Luctakaqui anačha maatačžtajapa paataqui. ¹⁰ Jalla nižtiquiztan maatakanacaqui acha ch'okz waquizičha, luctakž mantuquiz cjan tjeezjapa, anjilanacaž cjen. ¹¹⁻¹² Pero tii tantiya. Cristian kamañchiz cjen luctakanacami nižaza maatakanacami tsjiikazza. Yoozqui luctakžquiztan maataka paachičha. Nižaza luctakaqui maatakaž majtniž cjen žejlčha. Pero tjappachaqui Yooziž cjen žejlčha. Jalla nižtiquiztan ana maataka žejlčhaja luctakaqui ana žejltasačha. Nižaza ana luctaka žejlčhaja maatakaqui ana žejltasačha. Nižaza anaj Yooz muntčhaja, anapanž čhjulumi žejltasačha.

¹³ Ančhucpacha tantiya. Yoozquin mayizican maatakaqui acha ch'okchinžlaj niiqui, žwali cjesaya? už žanawali cjesaj? Acha ch'okchi walipankazza maatačžtaqui. ¹⁴ Nižaza luctakaqui lajch charchizlaj niiqui persunjapa ombrawillaž cjesačha. Jalla nužučha tii wirquiz kamañqu. Tjapa žoñinacaqui persun kuzquiztan nuž zizza. ¹⁵ Nižaza maatakanacaqui pajk charchizlaj niiqui ninacžquizpacha honoraž cjesačha. Pajk charchizqui acha ch'okchi cuntačha. Jalla nižtiquiztan pajk charchiz cjisqui walikazza maatačžtaqui. ¹⁶ Jakziltat nii puntu ch'aas pecčhaja, jalla niiqui ziz waquizičha tužu. Wejrncacqui nii cuzturumpi pajpzančha. Nižaza tjapa Yooz iclizziz žoñinacaqui nii cuzturumpi jaru paaspančha.

SANTA CENA PAAZ PUNTU

¹⁷ Tsjiižtan zakal chiižinučha. Wejrqui ančhucaquiz zumpacha ewjtis waquizičha. Santa Cena paažcu ančhucqui koluculla akžta kamañchiz ulančha tsjan zuma kamañchiz cjenpacha. ¹⁸ Iclizquiz ajccan, ančhucqui t'aka t'aka cjiicjiiñchucquičha. Nii quinto wejťquiz irantižquichičha. Cunamit nižtapan cjiicjiichani. ¹⁹ Pero jalla nižta t'aka t'aka cjitiquiztan, kjanapacha tjeeža, jecnatat lijitum cristian kamañchiz criichinaca, nii. Jalla nižtiquiztan t'aka t'aka cjiichuca cječhani. ²⁰⁻²¹ Ančhucqui Santa Cena cuzturumpi paazjapa chjeri luli ajcjinčhucquičha. Nekztan chjeri lujlcan zapa mayni ančhucaquiztan persun čjeri lujlskaz cjiisinčhucquičha, ana tojunžcu. Jalla nižtiquiztan koluculla čherchiz žoñinacazti čjeri eecznaz žejlchiquičha. Partizti chjeki čjeri lujlchi žejlchiquičha, nižaza

yekjapazti mallzilla žejlchiquičha. Ana wali paachinčhucčha. Jalla nižtiquiztan anačha Jesucristo Jiliriž mantita Santa Cena cjichuca cjequičha. ²² ¿Ančhuczti lujljzapa liczjapa, ana kjuychizchuc, kjažtatajo? Nižta ana wali paacan, ančhuqui tjeeža, ančhucaquiz Yooz iclizziz žoñinaca anaž impotičha, nii. Nižaza pori criichinacaqui azkatčha ana želinchiz cjenauqui. ¿Wejr ančhucaquiz kjažt cjes? ¿Wejr ančhucaquiz “Walikaz” chiyasaya? Anapan nižta chiyasačha.

²³ Jesucristo Jiliripachačha wejtquiz mantichiqui Santa Cena cuzturumpi paajo. Jalla nii tjaajintacama ančhucaquiz zakal tjaajinchinčha. Ima Jesucristo Jiliriž intirjita cjen, jalla nii weenpacha tsjii t'anta tanzičha niž persun kjaržtan. ²⁴ Jalla nekztanaqui Yooz Ejpžquin gracias cjan cjichičha. Nekztanaqui t'anta kjolžcu, tojunchičha, tuž cjan: “Tii t'antaqui wejt curpu ctačha. Wejrqui žoñž curpuchiz cjen ančhuc laycul ticznačha. Weriž ticžta cjuñzjapa tii cuzturumpi wilta wilta paaquičha”. ²⁵ Nekztan čhjeri lujlžcu nižtapacha Jesucristuqui niž persun kjaržtan tsjii wasu tanzičha, tuž cjan: “Tii wasquiz uwas kjazqui wejt ljoc cuntačha. Wejt ljoc cjen ew acta tjulžtaž cjequičha. Čhjulator tii cuzturumpi paačhaj niiqui, wejtquiz cjuñž waquizičha”. Nuž mantichičha Jesucristuqui. ²⁶ Čhjulator tii Santa Cena cuzturumpi paachaj niiqui, ančhucqui tjeeža Jesucristo ticzičha ančhuc laycu, jalla nii. Jalla nii cuzturumpi paaz waquizičha, Jesucristo Jiliriž tjonzcama.

²⁷ Jalla nižtiquiztan jakziltat nii Santa Cena cuzturumpi ana zuma paaquiz niiqui, Jesucristo Jiliriž ombrawillaž cjequičha. Nižaza Jesucristo Jiliriž quintra uj paaquičha; niž curpuquizimi niž ljocquizimi inartažokaž cjequičha. ²⁸ Ima Santa Cena paacan, zapa mayni persun kuzquiz amayt'asaquičha, kjažtiquiztan Santa Cena cuzturumpi paa, jalla nii. Nekztan Santa Cena cuzturumpi paasačha. ²⁹ Nižaza Santa Cena paacan, Jesucristuž učhum laycu ticžta, jalla niičha zapa mayni persun kuzquiz waljapanž cjuñž waquizičha. Santa Cena paacan Jesucristo ana cjuñž cjequiz niiqui, persun casticujapa cjequičha. ³⁰ Santa Cena cuzturumpi ana wali paatiquiztan, walja ančhucaquiztan laa žejlčha, nižaza ana wali žejlčha, nižaza yekjapanacaqui ticzičha. ³¹ Ima Santa Cena cuzturumpi paacan učhumnapacha zapa mayni persun kuzquiz zuma amayt'as waquizičha. Nekztan pertuna mayiziz waquizičha. Nekztan Jesucristo Jiliriž anaž casticta cjequičha. ³² Jesucristo Jiliriqui učhum casticaquiz niiqui, azquichjapa panž casticčha, zuma kamañquin cjisnajo. Nekztan ana criichi žoñinacžtan chica ana wiñaya casticta cjequičha.

³³ Wejt jilanaca, cullaquinaca, čhjeri lujljzapami nižaza Santa Cena paazjapami ajcžcu, zapa mayni tjewz waquizičha parti criichi žoñinacaž zumpacha ajczquiscama. ³⁴ Jakziltat čhjeri eeskatčhaja, persun kjuyquin zumpacha lujlznauquičha, ima iclizquin ojkan. Nekztan lujlžcu ajczquin okaquičha, Santa Cena zuma paazjapa. Jakziltat Santa Cena ana zuma paaquiz niiqui, Yoozqui nii žoñi casticaquičha. Nužulkaza nii puntuqui. Yekja puntunacaqui wejr azquichačha, ančhucaquin cheržni quejžcu.

12

ESPIRITU SANTUŽ TJAATA KAMAÑANACA PUNTU

¹ Tsjii zakaz chiižinučha, Espiritu Santuž tjaata kamañanaca puntuquiztan. Jalla nii ančhucaquiz zuma intintiskatz pecučha.

² Tuquiqui ima ančhucaž Yoozquin criican ančhucqui ana criični žoñž paata yooznacžquiz tsjii kjutni irpitatačha, jalla nižta irpiskatchinčhucčha ančhucqui. Jalla nii ančhucqui zuma zizza. ³ Jakziltat Yooz Espiritu Santuž irpitažlaja, jalla niiqui ana chiyasačha: “Jesusaqui laykjita cjila”, cjicanaqui. Nižaza jakziltat: “Jesusaqui Yooz Jiliričha”, cjan chiyachaja, jalla niiqui Espiritu Santuž irpitaž chiyauquičha. Jalla nuž intintiskatz pecučha.

⁴ Jilanaca, cullaquinaca, criichi žoñinacaqui yekja yekja Espiritu Santuž tjaata kamañanacchizza, nižaza poderanacchizza. Pero tsjii Espiritu Santukaz tjapa nii kamañanacami nižaza poderanacami tjaacha. ⁵ Nižaza criichi žoñinacaqui yekja yekja Yoozquin sirwičha. Pero tsjii Yooz Jiliržquinkaz sirwičha. ⁶ Nižaza criichinacaqui yekja yekja wali obranaca paačha. Pero tsjii Yooz Ejpkaž criichinacžquiz nii obranaca

paakat'cha. ⁷ Jaziqui tjapa criichinacaqui Yooz Espiritu Santuž tjaata kamañchizza, parti criichinacžquiz juc'ant zuma kami yanapzjapa. ⁸ Tižta kamañanacaqui tjaatačha: Espiritu Santuqui yekjap criichinacžquiz zuma pinsita razunanacchiz chiikat'cha. Nižaza Yooz Espiritu Santuqui yekjap criichinacžquiz zizñi zizñi chiikat'cha. ⁹ Nižaza Espiritu Santuqui yekjap criichinacžquiz Yoozquin juc'ant tjapa kuzziz cjiskat'cha, zuma obranaca paazjapa. Nižaza Espiritu Santuqui yekjap criichinacžquiz poder tjaacha laanaca čhjetnajo. Pero Espiritu Santuqui tsjiikazza. ¹⁰ Nižaza Espiritu Santuqui yekjap criichinacžquiz poder tjaacha wali milajrunaca paazjapa. Nižaza Espiritu Santuqui yekjap criichinacžquiz poder tjaacha, Yooziž tjaata takunaca zuma kjanzt'izjapa. Nižaza Espiritu Santuqui yekjap criichinacžquiz zizñi kuz tjaacha, žoñinacaž chiita takunaca zumpacha tantiizjapa, Yoozquiztan tjonchižlan už zajrižquiztan tjonchižlaj, jalla nii. Nižaza Espiritu Santuqui yekjap criichinacžquiz ana pajta taku chiikat'cha. Nižaza nii Espiritu Santupacha yekjap criichinacžquiz zizñi kuz tjaacha, nii ana pajta chiita taku parti criichinacžquiz intintiskatajo. ¹¹ Tsji Espiritu Santukaz tjapa nii yekja yekja poderanaca tjaacha. Jaknužt nii Espiritu Santuqui tjaaz munčhaja, jalla niicama tjapa criichinacžquiz tjaacha.

CRIICHI ŽOÑINACAQUI TSJIKAZZA

¹² Cristužtan nižquin criichi žoñinacžtan tsjii curpuchiz žoñitakazza. Tsjii žoñta žejl'cha, kjarami, lismi, čhjujcquimi, cjuñimi, jalla nižtanaca žejl'cha, pero tsjii žoñikazza. Wacchi cjenami tsjii curpukazza. Jalla nižta iratačha Cristužtan criichinacžtan. ¹³ Criichinacaqui yekja yekja žejl'cha, judionacami, yekja wajtchiz žoñinacami, piyunanacami, ana piyunanacami, jalla nižtanaca žejl'cha. Pero bautistaž cjistanacami Espiritu Santuž cjen nižta criichinaca tsjii žoñž curpu cunta cjissičha. Nižaza Yooz Ejpqui tjapa criichinacž kuzquizimi Espiritu Santo luzkatchičha.

¹⁴ Tsjii žoñtaqui kjarami lismi achami čhjujcquimi cjuñimi jalla nižtanaca žejl'cha. Punta punta žejl'cha tsjii žoñž curpuquiziqui. ¹⁵ Jalla nižta iratačha Cristužtan nižquin criichinacžtan. Jalla nižtiquiztan tjapa Cristužquin criichinacaqui tsjiikazza. Jilanaca, cullaquinaca, nonžna. Tsjii žoñž kjojchaqui ana chiiz waquzičha, tuž cjican: "Wejrqui kjojchakazza, anačha wejr kjarachu; jalla nižtiquiztan anaž tii žoñž curpuquiz želasacha". Jalla nižta chiižcumi, nii kjojchaqui tirapančha nii žoñž curpu partiquizquiči. ¹⁶ Nižaza tsjii žoñž cjuñiqui ana chiiz waquzičha, tuž cjican: "Wejrqui cjuñikazza, anačha wejr čhjujquiqui. Jalla nižtiquiztan anaž tii žoñž curpuquiz želasacha". Jalla nižta chiižcumi, nii cjuñiqui tirapančha nii žoñž curpu partiquizquiči. ¹⁷ ¿Tjapa žoñž curpuquiči čhjujquicamazlaj niiqui, kjažt nonžnasajo? ¿Nižaza tjapa žoñž curpuquiči cjuñicamazlaj niiqui, kjažt mucžnasajo? ¹⁸ Yoozqui žoñž curpuquiz punta punta utchičha, jaknužt munčhaja, jalla nuž. Jalla nižta irata Yoozqui punta punta Espiritu Santuž kamañanacami nižaza poderanacami tjaachičha criichinacžquiz. ¹⁹ Žoñž curpuquiz anaj punta punta žejl'chaja, anaž ultim žoñž curpu cjitasacha. ²⁰ Punta punta želanami, tsjii curpukazza. Jalla nižta irata criichinacaqui punta punta poderanacchizza, nižaza kamañanacchizza, pero tjapa criichinacačha Yooz partiquiz, nižaza tsjiikazza.

²¹ Jalla nižtiquiztan čhjujquiqui kjaržquiz ana chiiz waquzičha, "Amqui anal pecučha", cjicanaqui. Nižaza achauki kjojchquiz ana chiiz waquzičha, "Amqui anal pecučha", cjicanaqui. Nižaza tsjii criichi žoñiqui yekja criichi žoñžquiz ana chiyasacha: "Amqui anal pecučha", cjicanaqui. ²² Žoñž curpuquiči punta puntaž pecčha. Jaziqui žoñž curpuquiz jallc'a partiqui zaka žejl'cha. Nii jallc'a partiqui juc'antiž pecčha. ²³ Nižaza žoñž curpuquiz ana zuma chercherchiznaca žejl'cha. Ninacaqui zquitžtan tjutžtačha zuma chercherchiz cjisjapa. Nižaza žoñž curpuquiz chjojžta partinaca žejl'cha. Ninacaqui zquitžtan tjutžtačha, učum ana azjapa. ²⁴ Zuma chercherchiznaca tsjii zquiti tjutzquiči anaž pecčha. Yoozqui žoñž curpu nižta paachičha. Nižaza Yoozqui žoñž kuz peckatchičha, ana zuma chercherchiznaca tsjii zquitžtan zuma tjutzjapa. Jalla nižta iratačha iclizziz žoñinacaqui. ²⁵ Jalla nižta munchičha Yoozqui, criichi žoñinacaž ana t'aka t'aka cjisjapa. Nižaza Yoozqui nižta munchičha, porapat zuma munaziñi kuzziz yanapasjapa. ²⁶ Tsjii criichi žoñiž sufran,

tjapa criichinacaqui kuzquiz sint'ličha. Nižaza tsjii criichi žoñiž honorchiz cjen, tjapa criichinacaqui nižtan chica chipčha.

CRIICHI ŽOÑINACŽ KAMAÑ PUNTU

²⁷ Jilanaca, cullaquinaca, tjapa Yoozquin criichinacžtan Cristužtanpacha tsjii kuzzizza. Zapa mayni ančhucqui Jesucristuž partiquiz žejlčha. ²⁸ Nižtiquiztan Yooz Ejpqui criichinacžquiz yekja yekja kamañanaca tjaacha, iclizziz žoñinacžquiz yanapzjapa. Primiraqui Yoozqui yekjap criichinacžquiz apóstol kamaña tjaachičha. Niiž jaru Yooziž tjaata taku paljayz kamaña tjaachičha yekjap criichinacžquiz. Niiž jaru Yoozqui niiž taku tjaajinz kamaña tjaachičha yekjap criichinacžquiz. Nižaza Yoozqui milajru paaz poder tjaachičha. Nižaza Yoozqui poder tjaachičha laanaca čhjetnajo. Nižaza Yoozqui icliz langzquiz yanapz kamaña tjaachičha. Nižaza Yoozqui kamaña tjaachičha iclizziz žoñinacžquiz irpiñijapa. Nižaza Yoozqui poder tjaachičha, ana pajta takunaca chiichiyajo. ²⁹ Anačha tjapa ančhucqui apóstol kamañchizqui. Nižaza anačha tjapa ančhucqui Yooziž tjaata taku paljayz kamañchizqui. Nižaza anačha tjapa ančhucqui Yooz taku tjaajinz kamañchizqui. Nižaza anačha tjapa ančhucqui milajru paaz poderchizqui. ³⁰ Nižaza anačha tjapa ančhucqui laanaca čhjetinz poderchizqui. Nižaza anačha tjapa ančhucqui ana pajta takunaca chiiz poderchizqui. Nižaza anačha tjapa ančhucqui nii ana pajta chiita takunaca intintiskatz poderchizqui. ³¹ Ultim zuma kamañquiz kuz tjaa ančhucqui. Nižaza wejrqui ančhucquiz nii juc'ant zuma kamañal tjaajnučha.

13

ZUMA MUNAZIZ KAMAÑAQUI JUC'ANT ZUMAČHA

¹ Jalla tužučha juc'ant zuma kamañauqui. Zuma munaziz kamañauqui juc'ant zumačha tjapa kamañanacquiztanaqui. Tsjii žoñiqui ana pajta žoñž takunacami nižaza anjilž takunacami chiyasačha. Jalla nižta chiichiz cjenami ana zuma munaziñi kuzziz cječhaj niiqui, jalla nii žoñiqui inapachaž chiyaquičha. Ina takukazza nii žoñž takuqui. Tsjii ina wjajtta cazažtakaz cjesačha. ² Nižaza tsjii žoñiqui Yooziž tjaata takunaca paljayasačha; nižaza tjapa Yooz pinsitanaca ziasačha; nižaza tjapa Yooz puntu ziasačha. Pero ana zuma munaziñi kuzziz cječhaj niiqui, anaž čhjulumi cjequičha Yooz yujcquiziqui. Nižaza tsjii Yoozquin tjapa kuzziz žoñiqui Yoozquiztan mayizichiz cjen, tsjii curumi kiskatasacha. Pero jakziltat ana zuma munaziñi kuzziz cječhaja, jalla niiqui čhjulul parliczumi zizcumi paazcumi anaž čhjulumi cjequičha Yooz yujcquiziqui. ³ Nižaza tsjii žoñiqui tjapa niiž želinchiznaca tojnasaž niiqui, nižaza Cristuž cjen persun curpumiž ujta cjisjapa intirjasaž niiqui, pero ana zuma munaziñi kuzziz cječhaja, jalla niiqui čhjulul paazcumi inakaz cjesačha nii persunaltajapa.

⁴ Zuma munaziñi kuzziz žoñiqui tižta kuzzizza. Pazinziz kuzzizza, nižaza okzñi kuzzizza, nižaza ana inžiñi kuzzizza, nižaza ana persun kamaña alawasñi kuzzizza, nižaza ana mit kuzzizza. ⁵ Nižaza ana atinar kuzzizza, nižaza zuma munaziñi kuzziz žoñiqui ana malcriat kuzzizza. Nižaza persun kuzcamakaz anaž kamz pecčha. Nižaza ana žawjñi kuzzizza. Nižaza ana anawal ayñi tjepuns kuzzizza. ⁶ Nižaza tsjii jilaž ujquiz tjojtsi cjenauqui, anaž chipasačha zuma munaziñi kuzziz žoñiqui. Antiz tsjii jilaž zuma paachi cjenauqui, nekztan chipsnasačha. ⁷ Čhjul pruebanaca tjonanami zuma munaziñi kuzziz žoñiqui awantičha. Nižaza zuma munaziñi kuzziz žoñiqui parti criichinacž puntuquiztan persun kuzquiz cjičha; “Zuma kuzzizlan”, cjan. Nižaza zuma munaziñi kuzziz žoñiqui parti criichinacž puntuquiztan persun kuzquiz: “Zuma kamačhan”, cjičha. Nižaza čhjul pruebanacaž tjonanami Yoozquin tjurt'iñi kuzziz cjequičha zuma munaziñi kuzziz žoñiqui.

⁸ Nii zuma munaziz kamañauqui anawira tucuzinzaquičha. Nii Yooziž tjaata taku paljayz kamañauqui tucuzinzaquičha; nižaza nii ana pajta taku chiiz kamañauqui zakaz tucuzinzaquičha. Nižaza nii Yooz puntu zumpacha zizta paljayz kamañauqui panž tucuzinzaquičha. ⁹ Tii muntuquiz žejlcanaqui Yooz puntuquiztan anapanž tjappacha zizi atasacha. Nižaza Yooz puntuquiztan anapanž tjappacha intintiskati atasacha. ¹⁰ Wiruñauqui

Yooztan kamcanaqui Yooz puntu tjappacha zizaquiċha. Jalla nii timpuqui Yooz puntu tjajinz kamañanacaqui kataquiċha.

¹¹ Jalla tižta irataċha Yooz puntu zizqui. Žoñiqui kolta uza cjicanaqui, ocjal chiichiiz chiiñiċha, nižaza ocjal pinsi pinsiñiċha, nižaza ocjalž pinsamintuchiz tantiñiċha. Jalla nižta žejltaċha ocjala cjicanaqui. Jazizti pajk žoñi cjiscuqui, ocjalažtakaz chiichiiznacami, pinsiznacami jaytitaċha. Jalla nižta irataž Yooz puntunaca zizqui. ¹² Zur ispijquiz persun yujqui ana zuma kjanaž tjenċha. Jalla nižta irataċha anziqui Yooz puntunaca zizqui, ana kjana. Wiruñauqui Yooztan kamcan zuma kjanaž zizaquiċha Yooz puntuqui. Anziqui anaž tjappacha zizzuca Yooz puntuqui. Wiruñauqui Yooztan kamcan tjapa Yooz puntunaca zizaquiċha, jaknužt Yoozqui učhum puntuquiztan zumpacha zizzaja, jalla nižta. ¹³ Ultimquiziqui criichi žoñinacaqui Yoozquin tjapa kuzziz wiñaya cjequiċha. Nižaza criichinacaqui Yoozquiztan zumanaca niž jaru niž jaru tjewznaquiċha. Nižaza criichinacaqui zuma munaziñi kuzziz wiñaya cjequiċha. Pero tsjiċha chekan waliqui, zuma munaziñi kuz, jalla nii.

14

YOOZ TAKU PALJAYZ KAMAÑA PUNTU

¹ Jalla nižtiquiztan zuma munaziz kamañquiz kuz tjaa. Jalla nii kamañaċha juc'ant chekanaqui. Nižaza Yooz Espiritu Santuž tjaata kamañanacquiz kuz tjaa. Yooz taku paljayz kamañquiz juc'anti kuz tjaa. ² Nii anaž pajta taku chiiž kamañaqui anaċha chekanaqui. Nii kamañchiz žoñiqui Yoozquizkaz chiiċha. Anaž žoñžquiziqui chiiċha. Jalla nuž ana pajta taku chiyan parti žoñinacaqui anaž intintazi atċha. Espiritu Santuqui ana zizta chjojžta taku paljayzkatċha nii ana pajta taku chiiñi žoñžquiz. ³ Pero nii Yooz taku paljayñi žoñiqui parti criichinacžquiz paljayċha, juc'ant zuma kamajo, nižaza Yoozquin tjurt'iñi kuzziz cjejajo, nižaza kuzta cjejajo. ⁴ Nii ana pajta taku chiiñi žoñiqui persunapakaz yanapċha Yoozquin juc'anti kuzziz cjisjapa. Nii Yooz taku paljayñi žoñizti parti criichinacžquiz yanapċha Yoozquin juc'anti kuzziz cjejajo.

⁵ Wejrqui anċhucaquiz cjiwċha, tjapa anċhucqui ana pajta taku chiichiñi cjiċhaja. Pero juc'ant chekanaqui, Yooz takunaca paljayñiž cjiċhaja, jalla nižta anchal pecuċha. Nii Yooz takunaca paljayz kamañchiz žoñiċha juc'ant chekanaqui nii ana pajta taku chiichiiz kamañchiz žoñžquiztanaqui. Jalla nižtiquiztan ana pajta taku chiichižcu, parti criichinacžquiz intintiskatz waquiziċha Yoozquin juc'anti kuzziz cjejajo.

ANA PAJTA TAWKŽTAN PALJAYZ KAMAÑA PUNTU

⁶ Jilanaca, cullaquinaca, anċhucaquiz tjonžcu ana pajta tawkžtan paljayaž niiqui, nii paljayaqui inakaz cjequiċha anċhucaquiz. Ana yanapasāċha tsjan zuma kamañchiz cjejajo. Anċhucaquiz yanapzjapa, wejtlaqui kjanapacha paljaystanċha, tsjii Yooziž tjaata ew takumi, tsjii Yooz puntu zizta takumi, tsjii Yooziž intintiskatta takumi, tsjii Yooz puntu catokta takumi, jalla nii. Nekztan anċhucqui yanaptaž cjequiċha, Yoozquin juc'anti kuzziz cjisjapa.

⁷ Tsjii pincallu pjujñi žoñiqui ċhjakċhakaquiz niiqui, nii pjuta wirsu ana pajta cjequiċha. Nižaza pincallu pjujñinacami quitara icñinacami ċhjul musicunacami tsjii wirsu ana kjanapacha tejlznaquiz niiqui, parti žoñinacazi ċhjul wirsut pjujċhaja, icċhaja, anaž tantiyi ataquiċha. Jalla nižta irataċha ana pajta tawkžtan chiiquzi. ⁸ Tsjii quira zalzjapa trompetaż ana zuma claro tjawunaquiz niiqui, jalla nuž ana zuma tjawuntiquiztan zultatunacaqui anaž listu tjacz cjequiċha nii quirajapaqui. ⁹ Jalla nižta irata zakaz anċhucaquiz watċha. Tsjii criichi žoñiqui ana intintazuc takuž paljayaquiz niiqui, anċhucqui ana intintichiz cjequiċha, ċhjulut chiiċhaja, jalla nii. Jakziltat ana intintazuc takuž chiiċhaj niiqui, inakaz chiiċha. ¹⁰ Tii muntuquiz tjapaman takunacapanž žejlž, jaz. Nižaza zapa takuqui intintitaž cjesaċha jakziltižquizimi. ¹¹ Pero wejrqui tsjii chiiita taku anal intintasaž niiqui, niwjtanaqui yekja wajtchiz žoñižtakatċha nii chiiñi žoñžquiztanaqui. Nižaza nii yekja taku chiiñi žoñiqui wejtquiztan yekja wajtchiz žoñižtakazza. ¹² Anċhucaquiz

nižtazakazza. Ančhucqui Espíritu Santuž tjaata kamañanacami ancha tanz pequiñchuc-
 čha. Jalla nižtiquiztan ančhucqui tsjan chekan kamañanacquiz kuz tjaaz waquizičha, parti
 criichinacáž Yoozquin juc'anti kuzziz cjeayo.

¹³Jalla nižtiquiztan jakzilat ana pajta taku chiyačhaja, Yoozquin mayiziz waquizičha,
 niž čhiita taku zuma intintiskatzjapa parti criichinacážquiz. ¹⁴Nižaza wejrqui ana pajta
 tawkžtan Yoozquin mayizaž niiqui, wejt animukaz mayaquičha. Wejt kuzpacha anaž
 intintičha. Jalla nižtiquiztan inakazza wejt kuzqui. Ana čhjul provechumi jwesasačha.
¹⁵¿Jalla nuž cjenauki kjažt cjes wejrqui? Kuztanami animužtanami Yoozquin mayiziz
 waquizičha. Nižaza kuztanami animužtanami Yooz wirsu its waquizičha. ¹⁶Animukaz ana
 pajta tawkžtan Yoozquin gracias cjican chiyasačha. Pero jalla nuž chiyan parti nonžni
 žoñinacauki anaž intintazi atasacha. Jaziqui: “Amén. Jalla nužoj cjila”, cjican ana kjaazni
 atasacha. ¹⁷Ana pajta čhiita orasunaqui walikaz cjesačha, Yoozquin gracias cjicanaqui.
 Pero nii orasunaqui parti criichinacážquiziqui anaž yanapčha, Yoozquin juc'anti kuzziz
 cjeayo. ¹⁸Wejrqui ana pajta tawkžtan juc'anti chiyučha tjapa ančhucacuztan. Jalla
 nižtiquiztan Yoozquin gracias cjican chiyučha. ¹⁹Jalla nuž cjenami parti criichinacžtan
 ajcžcu, wejrqui nii parti criichinacážquiz tjaajinz pecučha. Jaziqui ana pajta tawkžtan
 anal čhiiz pecučha. Jalla nuž chiyan parti criichinacauki anaž tantiyi atasacha. Jalla
 nižtiquiztan iclizziz žoñinacžtan ajcžcu pjijska intintita takunaca čhiiz pecučha, tunca
 waranka ana pajta takunacuztan.

²⁰Jilanaca, cullaquinaca, pruebaž tjonan, anapan uj paa. Antiz zuma pinsiniž cjee.
²¹Cjijrta Yooz takuqui, tuž cjičha: “Wejrqui yekja wajtchiz žoñinacážquiz paljayskatačha.
 Ninacaqui ana intintazzuc tawkžtan tii wajtchiz žoñinacážquiz paljayaquičha. Nižta ana
 pajta taku nonžcanami tii wajtchiz žoñinacauki anaž wejtquin kuzziz cjequičha. Jalla
 nuž cjičha Yooz Jiliriqui”. ²²Ana pajta takunaca paljajanaqui jalla nii čhiita takuqui
 žiñalažtakaz cjequičha, ana criichi žoñinacážquiziqui. Nii ana intintazzuc takunacaqui
 anačha criichi žoñinacžtajapa. Yooziž tjaata takuž jalla niičha criichi žoñinacžtajapaqui.
 Nii takuqui anačha ana Yoozquin criichi žoñinacžtajapaqui. ²³Tjapa criichi žoñinacžtan
 ajcžiž cjen tsjii ana criichinacauki luzasačha. Nekztan, ana pajta takunacakaz čhiini
 nonžnaquič niiqui, ninacaqui criichi žoñinacážquiz chersnaquičha lucurat žoñinacžtakaz.
²⁴Pero criichinacauki Yooziž tjaata takunacakaz paljayaquič niiqui, nekztan nii ana criichi
 žoñinacauki persun kuzquiz sint'auquičha. Yooz taku paljaytaž cjen, nii ana criichi
 žoñinacž ujnaca tjeēžtaž cjequičha. Nii criichinacž čhiita takunaca nonžcu persun kuzquiz
 amay'tasaquičha, nekztan persun ana zuma kamtaž pajaquičha. ²⁵Jalla nuž ninacáž
 chjojzaca uj paatanacaqui tjeēžtaž cjequičha. Jalla nižtiquiztan quillžcu, werar Yoozquin
 macjatasačha, nižžquin sirwizjapa. Nekztan chiyaquičha; “Yoozqui ančhucatančha”,
 cjicanaqui.

CULTO PAAZ PUNTU

²⁶Jilanaca, cullaquinaca, iclizziz žoñinacžtan ajcžcan, jalla tuž waquizičha. Yek-
 japanacaqui Yooz wirsu tjaajnasačha. Yekjapanacazti tsjii zuma taku tjaajnasačha.
 Yekjapanacazti tsjii Yooziž tjaata taku intintiskatasacha. Yekjapanacazti ana pajta taku
 paljajasačha. Yekjapanacazti nii ana pajta čhiita taku zumpacha intintiskatasacha. Jalla
 niiqui walikazza. Pero tjapa čhiita takunacaqui criichinacážquiz yanap waquizičha,
 Yoozquin juc'anti kuzziz cjeayo. ²⁷Nii ana pajta taku paljayni žoñiqui tsjii pucultan
 čhjepultanž nuž cjesačha. Nižaza niž jaru niž jaru turnasasačha. Nižaza ninacž čhiita
 taku intintiskatta cjis waquizičha. ²⁸Intintiskatni žoñi ana želaquič niiqui, nekztan ana
 pajta takunaca ana čhiiz waquizičha. Pero nii ana pajta taku čhiini žoñinacauki persun
 kuzquiz paljajasačha, Yoozquinami. ²⁹Nižaza nii Yooz takunaca paljayni žoñinacauki tsjii
 pucultan čhjepultanž nuž cjesačha. Parti criichinacauki ninacž čhiita taku zumpacha
 tantiyaquičha, werara ana werara paljayni, jalla nii. ³⁰Yoozqui tsjii julzi žoñžquiz
 taku tjaaqiž niiqui, nekztan nii ora čhiiniqu nužquiz apatatasacha, niž čhiizquiztan.
³¹Jilanaca, cullaquinaca, paljayni žoñinacauki niž jaru niž jaru paljayz waquizičha, parti
 criichinacáž Yooz taku zumpacha zizajo, nižaza juc'anti Yoozquin kuzziz pek'inchayta

cjeyajo. ³²Nii Yooz taku paljayñi žoñinacaqui persun kuzquiz zuma ewjas waquiziča, niiž jaru niiž jaru paljayzjapa. ³³Iclizquiziqui Yoozqui anaž tsjiiza tsjiiza arañi pecča. Iclizziz žoñinacžtan ajcžcu zuma lijituma Yoozquin rispita. Zuma walikaz ajcz waquiziča. Jalla nuž pecča Yoozqui.

Jalla tuž criichi žoñinacaqui ajczñipanča tjapa wajtquiziqui. ³⁴Nižaza iclizquiziqui maatak criichinacaqui ch'ujupanž želasača, anaž chiiz waquiziča. Nižaza maatak criichinacaqui luctakž mantuquiz cjistanča. Jalla nuž cjiča cjiirta Yooz takuqui. ³⁵Maatakaqui tsjii puntu ana zuma intintičhaj niiqui, kjuyquin persun luctakžquiz pewcz-naquiča zuma intintizjapa. Nii ajcztiquizpacha ana pewcznaquiča, criichinacžtajapa ana ombrawillta cjeyajo.

³⁶Ančhucqui nii tjajinta jaru kamz waquiziča. Yooz takuqui ančhucquiztan anaž kalltiča. Nižaza anača ančhuc alajquizkaz Yoozqui taku tjaachiqui. Weriz tjajintacama kamača tjapa iclizziz žoñinacaqui. ³⁷Jakziltat Yooz taku paljayz kamañchiz cječhaja, nižaza jakziltat Espiritu Santuž tjaata kamañchiz cječhaja, jalla ninacžlaqui tii weriz cjiirta taku pajstanča. Jalla tii takučha Yooz Jilirž mantitaqui. ³⁸Jakziltat tii weriz cjiirta taku ana pajz pecčhaj niiqui, parti criichinacaqui nii žoñžquiz anaž pajaquiča. Nii žoñiiqui anapanž Espiritu Santuž tjaata kamañchiziqui.

³⁹Wejt jilanaca, cullaquinaca, tužučha chekanaqui. Yooz takunaca paljayz kamañquiz kuz tjaa. Pero tsjii žoñiiqui ana pajta tawkžtan chiyaquiz niiqui, jalla nii chiiñi žoñžquiz anaž atajz waquiziča. ⁴⁰Jilanaca, cullaquinaca, iclizquiziqui zuma jurmali cultu paaz waquiziča, nižaza ajcztiquiz paljayñinacaqui niiž jaru niiž jaru chiiz waquiziča.

15

JESUCRISTUŽ JACATATA PUNTU

¹Jilanaca, cullaquinaca, weriz tjajinta takunaca cjuñskatz pecučha. Wejrqui werar liwriñi Yooz taku tjajinčinča. Nižaza weriz tjajintanaca nonžcu ančhucqui catokchinčučha; nižaza nii tjajintacama kamzjapa tjup kuzzizčučča. ²Nižaza liwriñi Yooz taku tiraž catokaquiz niiqui, nii liwriñi Yooz takuž cjen ančhucqui tsjan tsjan ujnacquiztan liwriita cjequiča, tsjan zuma kamzjapa. Juñta kuzquizkaz catokchižlaj niiqui, nii juntuñallakaz catoktiquiztan ultimu ana liwriitaž cjequiča.

³Wejrqui ančhucquiz juc'ant chekan takunaca tjajinčinča. Tuquiqui wejtquiz zakaz nii zuma takunacaqui tjajintatača. Jalla tužučha nii tjajinta takunacaqui. Jesucristuqui učhum uj laycu ticziča. Jaknužt Yooz tawk liwruquiz cjiirtatažlaja, jalla nii cjiirta jaru cumplissičha. ⁴Nektzanaqui Jesusiž curpuqui tjažtatača. Nektzanaqui nuž tjažtquiztan čhjep majquiztan ticziquiztan jacatatchičha. Jaknužt Yooz tawk liwruquiz tuquitan cjiirtatažlaja, jalla nii jaru cumplissičha. ⁵Jacatažcu Jesucristuqui Pedružquiz parizichiča. Nektzanaqui niiž illzta apostolanacžquiz parizichizakazza. ⁶Nektzanaqui niiž wiruñ pjijaska patac jilanac ajczquiz parizichizakazza. Jila parti ninacaqui tira žejtča, tsjii kjažta žoñinacakaz ticziqui. ⁷Niiž wiruñ Jacobžquiz parizichizakazza. Nektzanaqui tjapa niiž illzta apostolanacžquiz parizichizakazza.

⁸Ultimquiziqui wejtquiz zakaz parizichiča. Wejrqui parti apostolanacžquiztan wirwirilla Yooz partiqui luzzinča. ⁹Wejrqui parti apostolanacžquiztan ana ancha waquizuča. Tuquiqui wejrqui Yoozquin criichinacž quintra ojklayiñtača. Jalla nižtquiztan anatača Cristuž apóstol cjita cjichuca. ¹⁰Yooz wejtquiz okžniž cjen, wejrqui apóstol kamañquiz uchtitča. Pero ana ina Yoozqui wejr utchiča. Wejrqui apóstol kamañquiz juc'anti jilacami langzinča nii parti apostolanacžquiztan. Nii langztquiztan wejrqui ana honorchiz cjichucača, Yooza honorchiziqui. Yoozqui wejtquiz wali yanapchiča, apóstol kamañquiz zuma cumplisjapa. ¹¹Nužulkazza nii puntuqui. Chekpachača wejrnaqui ančhucquiz liwriñi Yooz taku paljaychintqui. Jaziqui ančhucqui nii liwriñi taku tjapa kuztan catokchinčučča.

ŽOÑINACAQUI JACATATAQUIČHA

¹² Jaziqui wejrnacqui tjaajinchinča, Jesucristuqui ticziquiztan jacatatchi, jalla nii. Yekjap ančhuczti chiiñiča: “Žoñinacauqui ticzču ana jacatatasacha”. ¿Kjažta nižta cjesajo? ¹³ Ticziquiztan ana jacatattasaž niiqui, Jesucristuqui anapaj jacatatchi cječhani. ¹⁴ Nižaza Jesucristo ana jacatatchižlaj niiqui, jalla nižtiqiztan wejrnacaz paljayta liwriiñi taku nuž cjenauqui inapankat cječhani. Nižaza ančuca Cristužquin criichi kamañauqui inapanzakat cječhani. ¹⁵ Wejrnacqui “Yoozqui Cristo jacatatskatchiča” jalla nuž cjiwchiya. Ana jacatatchižlaj niiqui, wejrnacqui toscar tisticužtakazlani Yooz puntuquiztanani. Ticzi žoñinacauqui ana jacatattasaž niiqui, Yoozqui Jesucristo anapaj jacatatskatchi cječhani. ¹⁶ Ticzi žoñinacauqui ana jacatattasaž niiqui, Jesucristupacha anapaj jacatatchi cječhani. ¹⁷ Nižaza Jesucristuqui anapan jacatatchižlaj niiqui, ančucaž nižžquin tjapa kuztan criitaqui inapankat cječhani. Ančuca ujquiztan anapan liwriita cječhani. ¹⁸ Nižaza Jesucristužquin criichi ticzi žoñinacauqui ninacž ujchiz cjen casticta cječhani. ¹⁹ Jesucristužquin criichinacauqui ultim liwriiz ora tjewža. Nii tjewzqui inakazlaj niiqui, učhumqui ana criichi žoñinacžquiztan juc'anti incalltaž cječhani.

²⁰ Pero ultim werara Jesucristuqui ticziquiztan jacatatchipanča. Jalla niiča primir ticziquiztan jacatatchi žoñiqui, primira pookchi zkala ricujtažtakazza. ²¹ Primirquiztanpacha tsjii žoñiž uj paachiž cjen, tjapa žoñinacauqui ticstanča. Jalla nižtakaz tsjii žoñiž cjen tjapa Jesucristužquin criichi žoñinacauqui jacatataquiča, Yooztan wiñaya kamzjapa. ²² Adán cjita žoñiž cjen tjappachaž ticža, jalla nižtakaz Jesucristo cjita žoñiž cjen tjapa nižžquin criichi žoñinacauqui jacatatskatta cjequiča. ²³ Nižaza tjapa criichinacauqui jaknužt Yooz munčhaja, jalla niicama jacatatskatta cjequiča. Jesucristo, niiča primiraqui. Nekztan Jesucristuž tjonz tjuñquiziqui niž parti žoñinacauqui jacatataquiča. ²⁴ Jalla niž wiruñ niž parti žoñinacaz jacatattiquiztan, tii muntuquiz tucuzinzaquiča. Nekztan tjapa Jesucristuž quintra jilirinacami, nižaza niž quintra mantiñinacami, nižaza niž quintra azzinacami, jalla tjappacha liwjtjatantaž cjequiča. Jalla nekztanaqui tjapa mantizqui Yooz Ejpžquin intirjitaž cjequiča. ²⁵ Pero anziqiu Cristuqui tira mantistanča niž quintrarionaca liwjtatipsama. Niiž quintranaca tjewcžtažokaz cjequiča. ²⁶ Ultimquiziqui ticzqui atiptaž zakaz cjequiča. Ticzqui ana iya želaquiča. ²⁷ Yoozqui Cristo utchiča tjappacha mantizjapa. Yooz Ejpkazza ana Cristuž mantuquiz žejliča. Jalla nii puntu kjanacha. Tjapa nekztanaqui Cristuž mantuquiz žejliča. ²⁸ Yoozqui Jesucristo utchiča, tjappacha mantizjapa. Ultimquiziqui Jesucristo Yooz Majchqui tjapa tii muntuquiz žejlñinacami atipžču, niipachaž Yooz Ejpž mantuquiz cjequiča. Yooz Ejpča wiñaya juc'ant chekanaqui cjequiča, tjappachquiztanaqui.

²⁹ Tsjiilla cjesača, jacatatz puntuzakaz. Ančhucaltaž tsjii cuzturumpi žejliča, criichi žoñiqui ima bautistan, ticziž cjen, žejtñi criichi žoñiqui nii ticzi criichiž cuntiquiztan bautismo tanzñiča. Ticziquiztan ana jacatatchi cječhaja, ¿Kjažtiqiztan nižta paa ančhucjo? ¿Čhjuljapa bautismo tanžjo? ¿Ticzi žoñiž cuntiquiztanajo?

³⁰ Nižaza ticziquiztan ana jacatatchi cječhaj niiqui, ¿Kjažtiqiztan wejrnacqui zapuru sufrican Yooz taku paljayz kamañquiz tira ojklajojo? ³¹ Apóstol kamañquiz ojklayan ančhucqui Jesucristo Jiliržžquin criichinčhucča. Jalla nuž cjen cuntintuž wejrqui. Jalla nuž chiičan werar razunal chiyuča. Nižaza zapuru wejrqui ticz llaquizican želuča, apóstol kamañquiz ojklayan. Jilanaca, jalla nuž chiičan, werar razunal chiyuča. ³² Wejrqui Efeso cjita wajtquin preso cjicanaqui anawal q'uit animalancžtan kichjaskattatača. Ticziquiztan anažlaja jacatatiñi niiqui, weriž nuž sufritaqui inakat cječhani. Ana criichi žoñiž pinsita jaru inapankazza weriž sufritaqui. Ninacauqui tuž cjiñiča: “Lujlžla, licžla, jaka kat učhumqui ticznačan”, jalla nuž cjiñiča ana criichi žoñinacauqui. Ticziquiztan ana jacatattasaž niiqui, nuž cjiñi žoñinacauqui zuma razunchiztakat chiičhani. Pero ultimo žoñinacauqui jacatataquiča.

³³ Jaziqui ančhucqui anaž incallskata. Ana zuma kamañchiz mazinacchizčhucčhalaj niiqui, ančhucqui zuma kamañquiztan tsjii kjutñi chjichtaž cjesača. ³⁴ Ančhucqui zuma lijitum razunanacchiz cjisna; nižaza lijituma cjee; anaž uj paa. Yekjap ančhucqui Yooz puntunaca ana zuma zizza. Jalla nii ančucaquiz chiižinuča, ančhuc azajo.

JACATATCHI ŽOŇINACŽ CURPU PUNTU

³⁵ Cunamiť tsjii žoňiqui pewcznačan, tuž cĵican: “Ĵaknužť ticzi žoňinaca jacatataquejo? ĴĴhjuľuž cherchi curpuchiz cjequejo?” ³⁶ Zumzu pewczňi pewczičha. Semilla Ĵhjaczcu, nii Ĵhjacta semillaqui ana katchi cjequiz niiqui, ew zkala ana jecznasacĵha. ³⁷ Nii Ĵhjacta semillaqui anaž ew zkalapacha cjesacĵha. Nii Ĵhjacta semillaqui semillakazza, trigo cjenami, yekja cjenami, semillakazza, anaž ew zkalapacha cjesacĵha. ³⁸ Semilla Ĵhjactiquiztan jaknužť Yoozqui munĴhaja, jalla nižta ew zkala ulanskatĴha. Ĵhjacta semillquiztan jama, punta puntaž ew zkala ulanĴha. Tjapa zkalanacaqui anaĴha tsjiikaz. Punta punta žejľičha. ³⁹ Jalla nižta irataĴha tii muntuquiz žejľňi curpuqui. Žoňinacž curpuqui yekjaĴha. Ch'iznacž curpuqui yekjaĴha. ⁴⁰ Nižaza arajpachquin žejľňinacž curpuqui yekjaĴha. Nižaza yokquiz žejľňinacž curpuqui yekjaĴha. Arajpach curpuqui tsjemata cheechi tjeeža yokquiz žejľňi curpuquiztan. ⁴¹ Tjuň kjanaqui tsjemataĴha jiiž kjanquiztan. Nižaza tsjematazakazza warawarž kjanquiztan. Nižaza tsjii warawarž kjanaqui tsjematazakazza yekja warawarž kjanquiztanaqui. ⁴² Jalla nižta irataĴha jacatatzqui. Ticzi curpuqui tsjemataĴha jacatatchi curpuquiztan. Nii ticzi curpuqui tĵatža, nižazaž mojkĴha. Nii jacatatchi curpuťti ana ticznasacĵha, nižaza ana mokasacĵha. ⁴³ Nii ticzi curpuqui ana honorchizza. Nii jacatatchi curpuťti zuma honorchizza. Nii ticzi curpuqui ana azzizza. Jacatatchi curpuťti walja azzizza. ⁴⁴ Nižaza ticzcuca curpuqui tii muntuquiz kamzjapa curpukazza. Jacatatchi curpuqui tsjemataĴha, wiňaya kamzjapa. Tii muntuquiz kamcan, žoňinacaqui curpuchizza. Nižta zakaz jacatatzcu curpuchiz zakaz cjequičha, wiňaya kamzjapa.

⁴⁵ Cĵjrta Yooz takuqui tuž cĵičha: “Tuquita žoňiqui Adán cĵitataĴha, nižaza žejťňi curpuchiztaĴha, tjapa niiž majch maatinacžtjapaqui”. Cristuqui Adanžtjapachazakazza. Jalla niiqui wiňaya žetiž tĵaacĵha, tjapa niižquin criichi žoňinacžtjapaqui. Yooztan kamz, jalla niiĴha wiňaya žetiqui. ⁴⁶ Tii muntuquiz žoňinacaqui kamĴha žejťňi curpuchiz. Wiruňaquí jacatatzcuqui žoňinacaqui wiňaya žejťňi curpuchiz cjequičha. ⁴⁷ Tuquita žoňiqui yok pĵilquiztan paataĴha. Wiruňta žoňiqui, Jesucristo Jiliriqui, arajpachquiztan tjonĴičha. ⁴⁸ Tii yokquiz kamňi žoňinacž curpuqui Adanž curpu irataĴha. Nižaza Yooztan arajpachquin kamňi criichinacž curpuqui Jesucristužť jacatatchi curpu irataĴha. ⁴⁹ UĴhumnacaqui Adán irata curpuchizza. Pero jacatatzcu Jesucristo irata kamaquičha, ew curpuchiz.

⁵⁰ Jilanaca, cullaquinaca, jalla tii puntu tĵaajnuĴha, anĴhucaquiz zizkatzjapa. Janchichiz nižaza ľjokchiz curpuqui arajpach wajtquin ana luzasacĵha. Nižaza tii mojkňi curpuqui anaž wiňaya žetasacĵha arajpachquin. ⁵¹ Tsjii zakaz anĴhucaquiz zizkatz pecuĴha. Tjapa criichinacaqui anaž ticznaquičha. Pero tsjii ratullakaz curpunacaqui campiižintaž cjequičha. ⁵² Tsjii Ĵhjjuqqui jaknužť ch'ipquinižľaja, jalla nuž tsjii ratulla curpu campiižintaž cjequičha. Arajpach anĵilaž trompeta tĵawžtan, curpunacaqui campiižintaž cjequičha. Nii trompeta tĵawžtan, ticzi žoňinacaqui jacatatskattaž cjequičha, ana iya ticzjapa. Nižaza žejťňi žoňinacž curpunacazakaz campiižintaž cjequičha. ⁵³ Tii yokquiz žejľňi curpuqui anaž wiňaya tĵurňi cjesacĵha. Jalla nižťiquiztan uĴhumqui ew curpuž tanstanĴha wiňaya žejťjapa. Nižaza uĴhum ticzňi curpuqui anaž wiňaya tĵurňi cjesacĵha. Jalla nižťiquiztan uĴhumqui ana ticzňi curpu tanstanĴha. ⁵⁴ UĴhumnacaqui ew wiňaya žejťňi curpuchiz cjequičha, nižaza ana ticzňi curpuchiz. Jalla nuž wattan Yooz takuqui cumplissi cjequičha. Yooz takuqui tuž cĵičha: “Ticzqui atipžtaž cjequičha. Jalla nižťiquiztan ana iya ticz želaquičha. ⁵⁵ Nižaza ticzqui anapanž iya atipaquičha”. Ticzqui anaž iya žoňinacžquiz llaquita cĵiskataquičha. ⁵⁶ UĴchiz cĵen ticz žejľičha. Nižaza ticzqui žoňinacžquiz llaquita cĵiskatĴha. Nižaza tuquita cĵjrta ľiiqui žoňinacžquin persun ujnaca tjeeža. ⁵⁷ Wejrqui Yoozquin ancha gracias cĵican tĵaa-uĴha. Jesucristo Jilirž cĵen uĴhumqui ticzquiztan atipaquičha.

⁵⁸ Jalla nižťiquiztan, weriž pecta jilanaca, Yoozquin tĵurt'ľni kuzziz cĵee, nižaza Yoozquin tĵup kuzziz cĵee, nižaza Jesucristo Jilirž tĵaata kamaňquin juc'anti juc'anti kuz tĵaa. AnĴhucqui zizza, Jesucristo Jiliržtjapa langzqui anaĴha inaqui.

16

CRIICHINACŽTAJAPA PAAZ JUNTIZ PUNTU

¹ Tsjii zakal chiižinuča, criichinacžtajapa paaz juntiz puntuquiztan. Jaknužt Galacia provinciquin wejrqui tjapa iclizziz žoñinacžquiz chiižinčinčhalaja, jalla nižta irata ančucaquiz chiižinuča, paaz juntantiz waquiziča, pori criichinacžquiz yanapzjapa, jalla nii. ² Zapa siman tumincuqui ančucqui ančucaž cantiquiztan jama t'akz waquiziča. Jalla nuž t'akžcu chjojwaquičha wejt tjonzcama. Nekztan weriž tjonatan, ana žoñ žoñžquiztan apura ojklaycan paaz juntantichuca. Ančucaž t'akzta paazqui listupachakaz cjequičha. ³ Nižaza ančucqui tsjii kjaž jilanaca illz waquiziča, nii juntantita paaz chjichñijapa Jerusalén wajtchiz criichinacžquiz. Nižaza ančucqui nii illzta jilanacžquiz tsjii carta credencialž tjaquičha. Nekztanaqui wejr tjonžcu, wejrpachal ninaca cuchanžcača Jerusalén watja. ⁴ Wejr ojkchuca cjequič niiqui wejttan chicaž okaquičha ninacaqui.

TSJII KJAŽT PUNTUNACA

⁵ Ima tjoncan, wejrqui Macedonia yokaran ojklayasaj cjiwča. Wiruñaquí Corinto irantasaž cjiwča, ančucaquiz tjonzjapa. ⁶ Irantižcu tsjii kjaž maj kamačhan, uz cunamit nicju sac timpu watačhani. Nekztanaqui ančucqui wejt ojklazjapa yanapasacha, jakzi ojkz cjenami, jalla nii. ⁷ Wejrqui tsjii upacama watcankaz ana tjonz pecučha. Antiz tsjii kjaž maj ančucatan kamz pecučha, Yooz Jiliriz munan. ⁸ Pero Efes wajtquin kamača Pentecostes tjuñicama. ⁹ Tii Efes wajtquiz ancha Yooztajapa langz žejlča. Nižaza zumpachapan langznan, walja žoñinacaqui criyačhani. Nižaza walja Yooztajapa langžni quintra žoñinaca žejlča.

¹⁰ Timoteož irantižquitan, ančucqui Timoteož kuz cuntintupanž cjskataquičha. Niiqui Yooz Jiliržtajapa langža, wejr irata. ¹¹ Jalla nižtiquiztan anaž jecmi ančucaquiztan nii Timoteo iñarasača. Antiz ančucqui juc'antiž yanapaquičha, nii zuma cuntintu tira ojklayajo. Nižaza nii yanapaquičha, wejr chertzni quejžcajo. Tekzi wejrqui Timoteo tjewznuča parti criichi jilanacžtan.

¹² Apolos jilž puntuquiztan tiil maznuča. Wejrqui ancha niižquiz rocchinča, yekjap jilanacžquiz cumpañt'ajo, ančucaquin chertzni. Parti jilanacžtan ojkz cjen Apoluqui ana okawk cjichiča. Wiruñ niiqui ančuc chertzni okačhani, atchucaž cjen.

¹³ Ančucqui persun kamaña cwitaza. Yoozquin tjurt'iñi kuzziz cjee. Yooz aztan tjup kuzziz cjee. ¹⁴ Čhju lu paacanami zuma munaziñi kuzziz cjee.

¹⁵ Jilanaca, cullaquinaca, ančucqui zizza. Acaya yokquiz Estefanasqui niž jamillanacžtanpacha primera Yoozquin criichiča. Nekztanaqui ninacaqui parti criichi jilanacžquiz yanapzjapa kuz tjaachiča. ¹⁶ Jalla nižta kuzziz žoñinacž tawk jaru kama. Nižaza tjapa nižta criichinacžquiz yanapñinacami, nižaza Yooztajapa langžñinacami rispitaquičha. Nižaza ninacž tawk jaru kama. ¹⁷ Estefanastan Fortunatžtan Acaicužtan jalla ninacaž tjonatan, walja cuntintutača wejrqui. Ančucaž ana wejttanž žejlchucaž cjen, ninacača ančuc cuntiquiztan wejr yanapchiqui. ¹⁸ Wejttan kamcan ninacaqui wejt kuzquiz amtaychiča, jaknužt ančuca kuzquiz amtayčhaja, jalla nižta. Nižta žoñinacaqui, rispittaj cjila.

¹⁹ Asia provinciquin žejlñi jilanacaqui ančucaquin tsaanžquičha. Aquilžtan Priscilatan, nižaza ninacž kjuyquiz ajczni jilanacžtan, jalla tjapa ninacaqui ančuc criichinacžquin tsaanžquičha, Jesucristo Jilirž tjuuquiz. ²⁰ Nižaza tjapa criichi jilanacaqui ančucaquin tsaanžquičha. Nižaza ančucaquiz porapat zuma kuztan tsaanassnaquičha.

²¹ Wejrqui Pablutča. Persun kjaržtan tii weriž tsaanta litraqui cjiiruča.

²² Jakziltat Jesucristo Jiliržquin ana kuzziz cječhaja, nižaza quintra cječhaja, jalla niiqui anawalquiz uchtaž cjequičha. ¡Učhum Jesucristo Jiliri urej tjonla!

²³⁻²⁴ Nižaza Jesucristo Jiliriqui ančucaquiz zuma yanapt'ila. Nižaza wejrqui tjapa ančucaquin k'ayichučha Jesucristuž cjen. Jalla nužoj cjila. Amén.

SEGUNDA CARTA DEL APOSTOL SAN PABLO A LOS CORINTIOS

¹ Wejr Pabluqui Jesucristuž illzta apostoltčha. Yoozqui niž munañpi jaru tii apostol puestuquiz wejr utchičha. Jaziqui tii cartal apayžcučha ančhucaquin Corinto wajtchiz žoñinaca. Wejtta Timoteužtan ančhucaquin tsaanžcučha. Nižaza tjapa Acaya yokquin kamñi žoñinacžquin tsaanžcučha. Ančhucqui Yoozquin criichiž cjen Yooz icliz žoñinacčhucčha. ² Učhum Yooz Ejpžtan Jesucristo Jiliržtan ančhucaquiz yanapt'ila. Nižaza ančhucaquiz walikaj kamkatla.

YOOZ EJP ANCHA OKZŇI NIŽAZA KUZŇI KUZIZ

³ Učhum Jesucristo Jilirž Yooz Ejpžquiz honora waytitaj cjila. Yooz Ejpqui okzñi kuzzizpančha, nižaza sufrita žoñinacžquiz zumpacha kuzñipančha. ⁴ Wejr nacaj sufranami Yooz Ejpqui kuzñipančha, niztapacha wejr nacaj sufrita jilanacžquiz kuzjapa. Nekztanaqui wejr nacqui sufrita jilanacžquiz maznasačha, “Yoozqui amquiz kuznasačha”, cjan. Nižaza wejr nacpacha ninacžquiz kuznasačha. ⁵ Jesucristužquin criichiž cjen Jesucristuž irata ancha sufručha. Nižaza Jesucristučha wejr nacquiz zumpacha kuzñiqui. ⁶ Jaziqui wejr nacqui ančhucaquiz tsjan zuma kuznasačha. Nižaza Yooz taku paljaycan ančhucaltajapa sufručha, ančhuc liwriyta cjisjapa. Nižaza wejr nacqui Yooziž kuztačha. Jaziqui niž tazakaz ančhucaquiz kuznasačha. Nekztan ančhucqui kuzta kuzziz cjen sufrisnaca wataquičha, ana ančhuc kuz turwayskatžcu. Jaziqui ančhucqui wejr nac irata sufrican, pasinziz kuztan awantasačha. ⁷ Ančhucqui tjurt'iñi kuzzizčhucčha. Jalla nužupančha ančhucqui. Ančhucqui wejr nac irata sufričha. Nižaza Yoozqui ančhucaquiz zakaz kuznaquičha. Jalla nužupanž cjequičha.

⁸ Jilanaca, cullaquinaca, tii puntunaca ančhucaquiz zizkatž pecučha. Asia yokaran ojklaycan, ancha sufrichinčha. Jalla nuž sufrican azi upzižtakaz cjisintičha, ticzmayažtakazačha. ⁹ Jalla nižta sufritiqiztan kuzquiz tantiichinčha, ticzucapan, jalla nii. Pero Yoozta ticzinacami jacatatskatñiqui. Jalla nižta sufrichinčha, persun azquizimi nižaza pinsitanacquizimi ana kuzziz cjisjapa, antiz Yoozquin juc'anti kuzziz cjisjapa. ¹⁰ Ultimquiziqui Yoozqui wejr liwriichičha, nii ticzmaya ojklayta pruebanacquiztan. Nižaza wilta nižta prueba tjonauquiz niiqui wilta Yoozqui wejr liwriyaquičha. Yoozquin kuzziz cjan, jalla nužupančha wejt razunaqui. ¹¹ Ančhucqui wejtquiz mayizinalla, wejt pruebanacquiztan liwriita cjisjapa. Jalla nuž ančhucaj ancha mayizintaž cjen liwriital cječha. Jalla nekztan weriž yanaptaž cjen ančhucqui Yoozquin gracias cjan chiyasačha. Jaziqui wejtajapa mayizinalla.

PABLO CORINTO WAJTQUIN OJKZ PECATČHA

¹² Wejrqui ančhucatan, nižaza tjapa žoñinacžtanami Yooz zuma kamañchiz kamchinčha, zuma lijituma. Ana pizc kuzziz kamchinčha. Wejt kuzquiz zizučha anal toscara chiyučha, wereral chiyučha. Jalla nižta zuma kamcan, ana žoñiž pinsita jaru kamchinčha. Okzñi Yoozqui wejtquiz yanapchičha, nižta zuma kamzjapa. Jalla nižta zuma kamtaž cjen cuntintučha wejrqui. ¹³ Weriz cjiirtaqui zuma werara zakazza. Liican, ančhucqui kjanaž intintasačha. Ana incallñi kuztan cjiiržcučha. ¹⁴ Yekjapanacqui ančhucaquiztan wejt kuz pajčha. Wejt kuzqui juc'anti zumpacha pajsspančha ančhucqui. Nekztan Jesucristo Jiliriz tjonz tjuñquiziqui ančhucqui weriž cjen cuntintuž cjesačha, jaknužt wejrqui ančhucaj cjen cuntintul cječha, jalla nižta. ¹⁵ Ančhucatan wejtta walikazza. Jalla nužupančha. Jalla nižtiqiztan weriž ojklaytiquiz ančhucaquin wilta tjonz pecaytučha. Nekztan ančhucqui pizc wilta cuntintu cjisakataž cjitasacha, weriž pizc wilta tjonžtiqiztan. ¹⁶ Primiraqui Macedonia cjita provinciquin ojkan ančhucaquiz tjonz pecaytučha. Nekztan Macedoniquin ojkažu wilta ančhucaquiz tjonz pecaytučha. Jalla nuž ančhucqui wejr yanaptasačha, Judea yokquin irantizjapa. Nužupan tantiizcu ana atchinčha. ¹⁷ Jalla nižtiqiztan yekjap žoñinacqui wejtjapa chiichičha, Pabluqui p'ajpacužtakaz chiichičha,

cjican. Anačha werara ninacž tantiitaqui. Wejrqui ana tantiyiñčha ana criichi žoñižtakaz. Ana criichi žoñinacaqui p'ajpawc razunchiz chiyasačha. ¹⁸ Ljítum Yoozqui zizza, wejrqui anačha p'ajpacužtakaz chiichintqui, nii ¹⁹ Silvanužtan, Timoteužtan, wejtjan, jalla wejr-nacqui anapan p'ajpawc razunanaca chiichintqui. Ančhucatan kamcan Jesucristo Yooz Majch puntuquiztan ljítuma chiichinčha. Nižaza Jesucristuqui zuma ljítumačha. Niiž chiita taku cumpliñipančha. ²⁰ Nižaza tjapa Yooz taku cumpliñipančha. Jalla nižtiquiztan Jesucristuž cjen Yooz tawkquiztan “Nužoj cjila” cjiñčha. Nuž cjican Yoozquin honora tjaa-učha. ²¹ Nižaza Yoozza wejtnacquizimi ančhucaquizimi Jesucristužquin tjurt'iñi kuzziz cjiskatñiqui. Nižaza Yoozza wejr utchiqui, niž apóstol cjisjapa. ²² Yoozqui nii tjeezičha, nižaza wejtnaca kuzquiz niiž Espiritu Santo luzkatchičha. Jalla nižtiquiztan kjana tjeetztačha, Yooz žoñinacačha wejrnacqui, nii.

UJCHIZ ŽOŇI PERTUNTA

²³ Jilanaca, cullaquinaca, Corinto wajtquin tsjii tjonžni okitačha. Pero ana tjonchinčha, ančhuc ana ujsjapa. Jalla niičha ana wejr tjonñi razunaqui. Yoozqui zizza, weraral cjiwčha wejrqui. ²⁴ Ančhucqui Yooz mantuquiz žejlčha, anaž wejt mantuquiz. Pero ančhucaquiz chiizinačhaj niiqui, yanapz pecučha, ultimu ančhuc juc'anti cuntintuž cjisjapa.

2

¹ Wejrqui tantiichinčha, imazi ančhucaquin wilta tjonžni. Wilta llaquiskatz anal pecatučha. ² Ančhucaquiz llaquiskatasaz niiqui, anaž čhjulumi wejtquiz cuntintu cjiskatasachha. Ančhucčha wejtquiz cuntintu cjiskatñiqui. Jalla nižtiquiztan ančhucaquiz ana wilta llaquiskatz pecatučha. ³ Jaziqui ančhucaquin tjonz cjenpacha tuqui cjižžquichinčha zumpacha ewjt'ican, ančhuc anawalinaca azquichjapa. Nekztan wejrqui ančhucaquin irantižcu, cuntintu cjeečha, ana llaquita. Ančhucčha wejtquiz cuntintu cjiskatñiqui, žana jaa? Weriz cuntintu cjen ančhucqui zakaz cuntintuž cjesačha. Jalla nužupanž cjesačha. ⁴ Tuqui cjižžquican, ančhucajapa ancha kuzquiz sint'iskatchinčha nizaza llaquisinčha, kaazcama. Jalla nuž cjižžquican anal ančhuc llaquiskatz pecatučha, antiz wejt zuma munaziñi kuz tjeez pecaytučha. Ančhucatan ancha munazučha. ⁵ Nii ana wali kamñi žoñiqui ančhucaquiz ancha llaquiskatchičha. Wejtquiz zakaz llaquiskatchičha; pero ančhucaquiz juc'anti. Cunamit anaž tjapa ančhucaquiz llaquiskatchižlani, pero jila partipan ančhucaquiztan. ⁶ Jila parti ančhucqui nii ana wali kamñi žoñi casticchinčucčha, nižaza chjaawjkatchinčucčha. Nužquizkaz cjila. ⁷ Anziqui nižquiz pertunz waquizičha, nižaza nižquiz kuz waquizičha, nii žoñi ana juc'anti upa kuz cjisnajo. ⁸ Jaziqui ančhucaquiz rocučha, nižquiz zuma munaziñi kuz wilta tjeezjapa. ⁹ Tuqui tii puntuquiztan ančhucaquiz cjižžquichinčha, ančhuc zumpacha yanzjapa, tjapa weriz chiizinta cazzi, ana cazzi, jalla nii. ¹⁰ Nii ujchiz žoñiqui ančhucaž pertuntažlaja, jalla niiqui weriz pertuntazakazza. Cristuž yujcquiziqui pertunučha, ančhuc juc'ant zuma cjisjapa. ¹¹ Nii ujchiz žoñi pertunta cjis waquizičha, Satanás diablu ana učumnacaquiz atipskatzjapa. Diabluž ana wal mañanaca zizza uchumqui.

QUINTU ANCHA ZIZ PECCHIČHA PABLUQUI

¹² Troas watja irantichinčha, Cristuž liwriñi taku paljayzjapa. Nekztan Jesucristo Jiliriž-tajapa langznan, muzpa žoñinacaqui Yooz taku nonzičha. ¹³ Pero Tito cjita jilžtan ancha zalz pecaytučha, ančhuc quintu zizjapa. Jalla nižtiquiztan wejt kučhi anatačha cuza. Jalla nižtiquiztan Troas wajtchiz žoñinacžquiztan eccu, Macedonia yokquin ojkcchinčha. ¹⁴ Nicju tjapa ančhucž quintu nonzinčha, walikazza ančhucqui. Yoozquin ancha gracias cjican chiyučha. Yoozpančha anawalinacquiztan wejrnaca atipskatchiqui. Nižaza tjapa kjutñi Yooz Ejpqui Cristuž puntuquiztan paljayta cjiskatčha wejrnacaž cjen. Jaknužt tjapa kjutñi tsjii zuma ulura žkejtčhaja, jalla nižta irata wejrnacaž paljayta liwriñi taku tjapa kjutñiž ojkcčha. ¹⁵ Wejrnacqui zuma inzinzuztakaz Yoozquiz cuntintu cjiskatučha, Cristuž puntu paljaycan. Liwriita žoñinacžquizimi ana liwriita žoñinacžquizimi Cristuž puntu paljayučha. ¹⁶ Nii ana liwriita žoñinacaqui anapan catoktquiztan juc'anti casticta cjequičha. Jalla nižtiquiztan weriz paljaytaqui ana wali chjonanchi žketnižtakazza

ninacžtajapa. Pero nii liwriita žoñinacazti weriž paljayta catoktiquiztan juc'ant zumaž cjequiča. Jalla nižtiquiztan weriž paljaytaqui zuma uluražtakazza ninacžtajapa. Jalla nižtiquiztan jequit Cristuž puntuquiztan paljayni puesto tanzasajo?

YOOZ UCHTA ŽONIČHA PABLUQUI

¹⁷ Wejrqui Cristuž puntu paljaycan anal negocio paa-uča; nižaza Yooz taku anal queručha yekjap žoñinacžtakaz. Wejrzti zuma lijituma paljajuča zuma kuzziz. Yooz uchta apostultča. Cristužtan wejttan tsjii kuzziz cjen, Yooz Ejpqui zizza, liwriiñi Yooz taku lijituma paljajuča.

3

¹ Jalla nuž wejt puntuquiztan chiyanaqui, ančhucqui pinsačhani, wejr persunpacha honora waytiñi, jalla nii. Yekjapanacaqui tsjii carta nombramientužtan ojklajča. Nižta carta nombramientuqui wejtta ana pecza, ančhucquiz prisintizjapa. Nižaza ančhucquiztan nižta carta anal mayasača. ² Ančhucpachača wejt carta nombramiento cuntaqui. Ančhucqui weriž paljaytiquiztan ew kamañchizza. Tjapa žoñinacaqui nii cherasača, nižaza pajasača. ³ Cristuqui ančhucquiz ew kamañchiz cjiskatča, weriž paljajtaž cjen. Jaziqui ančhuc ew kamañuqui tsjii carta nombramientužtakazza. Jalla nii cartaqi anača čjul tintižtanami cjiirtaqui; anača čjul mazquizimi cjiirtaqui. Yooz Espiritu Santuqui ančhuc kuzquiz luzziča, ew kamañchiz cjisjapa. Jaziqui ančhuc ew kamañuqui tsjii carta nombramientužtakazza.

CRISTUŽ LIWRIIŃI TAKU PALJAYZ

⁴ Ančhucča kjana tjeezñiqui, wejrqui lijitum apostoltqui, nii. Jalla nužupan cjiwča. Cristuž cjen nuž chiyasača Yooz yujcquiz. ⁵ Nuž cjan, zakaz cjiwča: Wejrpacha ana čjul walimi paasača Yooztajapa. Čjul Yooztajapa wali paatami Yooz aztanpankaz paatača. Inakaztča wejrqui. Pero Yoozqui wejr illziča, niž apóstol cjisjapa. ⁶ Yoozpacha wejr utčiča niž ew compromisu puntu paljayni ojklajzjapa. Nii ew compromisuqui anača Moisés cjiirta liiquiztan, antiz Espiritu Santužquiztanča. Nii cjiirta lii cjen žoñinaca infiernuquin okaquiča, castictaž cjisjapa. Espiritu Santuž cjen žoñinacaqui arajpachquin okaquiča, Yooztan wiñaya kamzjapa.

⁷ Nii Moises cjiirta liiqui maznacquiz litranacžtan cjiirtatača. Nii cjiirta lii tanžcu, Moises yujcqui walja c'ajčiča. Jalla nuž Moises yujc walja c'ajan, parti Israel žoñinacaqui niž yujc ana cheržni atčiča. Moises yujcqui jalla nuž c'ajniž cjen, zumat zumat upa c'ajčiča. Yoozqui jalla nižta lii tjaachiča, honorchiz cjisjapa, žoñinaca ana liwriiñi cjenami. ⁸ Yoozqui niž ew compromiso juc'ant honorchiz cjiskatčiča. Ew compromisuquiztan Espiritu Santuqui žoñinacžquiz liwriiskatča. ⁹ Nii honorchiz lii ana cumplitiquiztan učhumqui castictajapa cjissinčhumča. Pero ew compromiso catokchiž cjen učhumqui Yooz yujcquiz zuma cjissinčhumča, ana ujhiz. Juc'ant honorchizza nii ew compromisuqui. ¹⁰ Tuquiqui Moisés liiqui honorchiztača. Anza ew compromisuquiztan nii tuqita liiqui anča upa honorchizza, nii anza compromisuqui juc'ant honorchiz cjen. ¹¹ Nii liiqui Cristuž tjonzcama mantizjapakaz tjaatatača. Nekztan ana iya walča. Nii ew compromisuži wiñayaž tjuraquiča. Jalla nižtiquiztan juc'ant honorchiz žejlžtanča.

¹² Jalla nii ew compromiso ut'aytaž cjen wejrnacqui uchtača, wiñaya liwriiñi taku paljayzjapa. Jalla nižtiquiztan tjup kuztan kjanacama chiyučha. ¹³ Nii Moises irata anal paa-uča wejrnacqui. Moisesqui niž c'ajni yujc chjojziča, parti Israel žoñinaca ana chertzjapa, nii yujc c'ajni katzcama. Moises yujcqui ana tira c'ajniča. Nii tuž cjiča, liiqui anaž tira walča, apatatta, jalla nii. ¹⁴ Wejrnacqui liwriiñi puntuquiztan kjanacama chiyučha. Pero Israel žoñinacazti nii puntu ana intintazziča. Chojru kuzzizpantača anzcama ana intintazza. Moises lii liižcu nii liiquizkaz pinsičha. Cristužquin kuz tjaaz ana pinsičha. Pero Cristužquin kuz tjaachiž cjenkaz liwriiñi Yooz puntu intintazni cjesača. ¹⁵ Anzcama Moises lii liicanami ana liwriiñi Yooz puntu intintazasača jila parti judfo žoñinacaqui. ¹⁶ Jesucristo Jiliržquiz kuz tjaazcu, nekztanž liwriiñi Yooz puntu intintazasača. ¹⁷ Jesucristo Jiliriqiu Yooz Espiritužtan tsjii kuzzizza. Nižaza jakziltiž kuzquiz Jesucristuž

Espiritu žejlčhaja, jalla niiqui liwriitapanž cjequiča. ¹⁸Jalla nižtiquiztan liwriitaž cjen, tjapa učumqui Jesucristo Jilirž honoraž tjeeža, tsjii ispijužtakaz. Nižaza učumqui zumat zumat Jesucristuž irata juc'ant zuma cjissa. Nižaza niiz irata juc'ant juc'ant honorchiz cjissa. Jalla nuž učumnacaltajapa cjiskatča Jesucristo Jilirž Espirituqui. Nužupanča Yoozqui učumnacaltajapa.

4

YOOZQUI PABLO UTCHIČHA APOSTOL PUESTUQUIZ

¹Jalla nižtiquiztan anal upa kuzziz cjesača. Yoozqui niiz okzi kuzziz cjen wejr apóstol puestuquiz utčiča. ²Jalla nii puestuquiz kamcan, wejrqui ana wali chjojzaka paaznaca, nižaza azzuca paaznaca ana wirapan paachinča. Nižaza ana wali paaz mañanaca ana wira paachinča. Nižaza Yooz taku anal tsjii kjutni cjiyasača. Antiz kjanacama werarapanikal chiyučha. Yoozza weriž chiitaqui zizniqui. Nižaza weriž chiitiquiztan tjapa žoñinacaqui persun kuzquiz zizasacha, wejrtča ljitum apostoltqui, jalla nii. Nuž cjiwča, ana wali žoñinacaz wejtquiz uj tjojtmanami. ³Weriž paljaytaqui zumzu takužtakazza ana criichi žoñinacžjapaqui. Ninacača infernuquin ojkninacaqui. ⁴Tii muntuquiz mantiñi diabluqui nii ana criichi žoñinacž kuz chojru cjiskatčiča, liwriini taku ana intintajo. Zur žoñižtakaz cjiskatčiča, Cristuž liwriini kjana ana cherajo, nižaza liwriini taku ana catokajo. Nii liwriini takučha ancha zumaqui. Ancha zuma Cristuž puntu chiiča. Jesucristučha Yooz Ejpž kuz tjeežniqui. ⁵Jilanaca, cullaquinaca, nonžna. Wejrqui Jesucristuž puntuquiztankaz paljayučha. Ultim chawjc Jiliripankazza Jesucristuqui. Nuž cjiwča. Jesucristuž honora wayučha; anača wejt persun honora wayučha. Nižaza Jesucristuž mantuquiz ojklaycan wejrqui ančhuca piyunitča, ančhuc yanapzjapa. ⁶Tuqitanpacha Yoozqui mantichiča ween zumchiquiz kjana cjeajajo. Nii Yoozpachača wejt kuzquiz kjanchiqui, liwriini Yooz taku zumpacha intintizjapa, ancha zuma Yoozpan pajzjapa. Jesucristuqui niiz ancha zuma kamañchiz cjen Yooz kuzmi nižaza Yooz honora tjeeziča, učum nii zuma intintajo.

PABLUQUI ANCHA SUFRICHIČHA

⁷Jaknužt zumanaca tsjii ljoc mazquiquiz chjojta cječhaja, jalla nižta irataž Yoozqui liwriini puntu wejtquiz cumpjiichiča žoñinacžquiz paljayajo. Jalla nuž Yoozqui wejr apóstol utčiča, niiz juc'ant zuma azi tjeezjapa. Liwriini aziqui Yoozquiztankaz tjonča, anaž wejtquiztan tjonča. Žoñikazza wejrqui. ⁸Wejtta ancha anawalinaca želanami, ultimquiziqui wejrqui atipača. Wejt kuz turwayskatanami, anaž wejt kuz llajllasa. ⁹Žoñinacaz wejr chjatkatanami, Yoozqui wejr ana zinalla ecča. Wejtquiz ancha sufriskatcanami, žoñinacaqui wejr anaž akasača. ¹⁰⁻¹¹Jesucristužquin sirwican jakziquinami wejr ojklayučhaja, ancha sufručha, ticzmaya cjenami. Jalla nuž sufrican, Jesucristuž cjen tira žetuča; nižtajapa tii curpuquiz kamuča. Jesucristužquin sirwichiž cjen ancha sufručha. “Waj ticznaa; ticznaa” cjiwča. Pero tii ticzni curpchiz žejtcanaqui, Jesucristuž cjen kamuča. ¹²Wejrqui walja sufrisnawal wučha. Wilta wilta ticzmayažtakaztača, Cristuž puntu paljaycan. Pero weriž paljaytiquiztan ančhucqui Cristuž žeti tanchinčhucča.

¹³Yooz takuqui tuž cjiča: “Yoozquin kuzziz cjen, wejrqui chiyučha”. Jalla nižta irata wejrqui Yoozquin kuzzizza, sufrita kamcanami. Jalla nižta kuzziz cjen, chiichiyučha, Cristuž puntu paljaycan. ¹⁴Nuž paljayučha, tuž zizcu: Yoozqui Jesucristo Jiliri jacatatskatchiča, nižaza Jesucristužtan chica wejrmi ančhucmi jacatatskatta cjequiča. Yooz yujcquin chjichtaž cjequiča. Čjulumi sufrican, nii cjužnučha. ¹⁵Tjapa wejtquiz watchinacaqui ančhucaltajapača. Liwriini Yooz taku paljayučha, juc'anti juc'anti žoñinaca Yoozquin kuzziz cjiskatzjapa, nižaza ninaca Yooziž yanapta cjiskatzjapa. Jalla nuž cjen tsjan tsjan žoñinacaqui Yoozquin gracias cjican chiyaučiča, nižaza Yoozqui juc'anti honorchiz cjequiča. Jalla nuž pecučha.

¹⁶Jalla nižtiquiztan wejrqui anal llajllazuča. Kjažtami wejt curpu sufrichani wejt kuz zapuru tsjan tjupi cjissa; juc'anti Yoozquin kuzziztča. ¹⁷Tii wirquiz kamcan sufrisqui tsjii ratužtakazza; nekztan watča. Pero tii muntuquiz sufritiquiztan učumqui

arajpachquin wiñaya honorchiz cjequiča. Ancha sufrižcu, ancha juc'anti honorchiz cjequiča. Arajpachquin ancha zuma kamaquiča. ¹⁸Nužupanž cjequiča, tii muntuquiz žejlñi cusasanacžquiz anača kuz tjaazqui. Antiz arajpach zumanacžquin kuz tjaaz waquiziča. Nekztan arajpachquin ancha honorchiz cjequiča. Cherta cusasanaca wataquiča. Arajpach zumanacazti wiñaya tjuraquiča.

5

PABLUQUI ARAJPACHQUIN OJKZ PECČHA

¹Jalla tuž zizuča wejrqui. Tii žejtñi curpuqui ticziž cjequiž niiqui, Yoozqui ew curpuž tjaaquiča, Yooz paata curpu. Nekztan arajpachquin wiñaya kamača. ²Tii muntuquiz sufricanaqui anchal pasnuča ayincan. Ew arajpach curpu anchal pecuča, nekz kamzjapa. ³Wejt kuzqui nii ew curpuchiz ancha pecča, tsjii ew zqiti cujtz pecas, jalla nižta. Ana curpuchiz anal cjis pecuča. ⁴Tii curpuchiz sufrican, aynuča. Tii curpuqui ticznaquiča. Nižaza tii muntuquiz kamtaqui ana wiñayjapača. Jalla nižtiquiztan ew yekja curpuchiz cjis pecuča. Arajpachquin wiñayjapa kamz pecuča. ⁵Yoozpachača nižtajapa wejr utchiča. Nižaza Yoozza niž Espiritu Santo wejt kuzquiz luzkatchiqui. Jaziqui arajpachquin kamspanča wejrqui.

⁶Jalla nižtiquiztan wejrqui tjup kuzzizpanča. Tii curpuchiz kamcan, arajpachquin Yooztan chica ima žejlča. Pero arajpach wajtchiz žoñtča wejrqui. Jalla niil zizuča. ⁷Tii muntuquiz kamcan, ana Yooz chercan kamuča. Pero ana cherta Yoozquin kuzzizpan kamuča ana niž cheranami. ⁸Jalla nižtiquiztan tjup kuzziz želuča. Tii curpuquiztan ulanžcu, nižaza Yooztan chica arajpachquin kamcan, jalla nii walikaz cjesača. ⁹Jaziqui žejtcanami, ticz cjenami, Yoozquin kuzziztča wejrqui. Weriz kamtiquiztan wejt Yoozquiz cuntintu cjskatzpan pecuča. ¹⁰Tjapa učumnacqui Cristuž yujcquiz prisintistanča, pjalžta cjisjapa. Jaknužt tii muntuquiz kamtčhaja, zuma ana zuma, jalla niit jama pjalžtaž cjequiča. Jalla nuž pjalžtiquiztan zapa maynižquiz arajpach kamaña tjaataž cjequiča.

ŽOÑINACŽTAN YOOZTAN WALIKAZ CJESAČHA

¹¹Jalla nižtiquiztan Jesucristo Jiliri ekscan zuma razunžtan ančhucaquiz chiyučha, zuma kamanchiz kamiñičha, cjican. Toscara anal chiyučha. Wejt kamaña Yooz zizza. Wejr cjiwča, ančhucqui zakaz zizza zuma kamañchiz kamiñičha, jalla nii. ¹²Jalla nuž čhiican, persun honora anal waytiz pecuča. Antiz wejt puntuquiztan ančhucaquiz intintiskatz pecuča, wejtquiztan cuntintu cjisjapa. Jalla nekztanaqui ančhucqui wejt quintra žoñinacžquiz kjaaznasacha, zuma razuna tjaacan, "Pabluqui zuma kamiñičha", cjican. Wejt quintra žoñinacaqui žoñinacžquiztan honorchiz cjis pecča. Ninacžtajapa zuma kuz anaž importayča. Tucquin cjis, jalla niikaz importayča ninacžtaqui. ¹³Wejrzi zuma kuzziz cjis anchal pecuča. Wejt quintra žoñinacaqui cjiñičha "Lucuratača Pabluqui". Jalla nuž chiyanami Yooztajapakal kamuča. Yekjap žoñinacazti cjiñičha, "Zuma razunžtan čhiičha Pabluqui". Ančhucaltajapa zuma razunžtan chiyučha. ¹⁴Jesucristuqui ancha okzñi kuzziz cjen tjapa žoñinacž laycu ticziča. Žoñinacž cuntiquiztan ticziča. Jalla nužupanča wer-araqui. Jalla nuž tjapa kuztan crižcu, wejrqui Jesucristužquin sirwistanča, liwriini taku paljaycan. ¹⁵Jesucristuqui tjapa žoñinacž laycu ticziča, žoñinacž ana persunjapa kamajo, antiz Cristužtajapa kamajo. Jalla nižtiquiztan jakziltat ew kamañchiz kamčhaja, jalla ninacaqui Jesucristužtajapa kamz waquiziča. Jesucristuča ninacž laycu ticziqi, nižaza jacatatchiqui. ¹⁶Jaziqui Jesucristužtajapa kamcan, zizuča, žoñinacž kuzza chekanaqui, nii. Tuquiqui pinsatuča: Žoñinacž cherchi, pajk puesto ocupchi, wajt honora tanchi, jalla nižtanacača chekanaqui, nuž cjican pinsatuča, Cristuž puntuquiztanami. Ana criichi žoñinacž pinsitakaz pinsatuča. Anziqui ana iya nižta pinsučha. ¹⁷Jaziqui tuž cjiwča: jakziltat Cristužtan tsjii kuzziz cjisjaja, jalla niiqui ew kuzzizza, nižaza ew kamañchizza. Tuquita kamaña liwj ecta, ew kamañchizpan kamča.

¹⁸Ew kuzmi nižaza ew kamañami Yooziž tjaatapanča. Cristuž cjen Yoozqui učumnaca pertunchičha, nižtan učumnacatan zuma cjisjapa. Nižaza Yoozqui wejrna utchiča parti žoñinacžquiz Yooz pertunz puntu paljayajo, Cristuž cjen žoñinacžtan Yooztan

zuma cjesača, cjan. ¹⁹ Yooz pertunz puntuqui jalla tužuča. Yoozqui Cristuž cjen tjapa žoñinaca pertunasacha, niižtan ninacžtan zuma cjisjapa. Zoñinaca pertunžcu, ana ujchiz cjiskatča, ana casticta cjisjapa. Nižaza Yoozqui wejrnaacaquiz cumpjiichiča, Yooz pertunz puntu paljayajo. ²⁰ Jalla nižtiquiztan Cristuž cuntiquiztan ojklayuča niiž takunaca paljaycan. Jalla nuž ojklayan Yoozqui weriž cjen ančhucaquiz paljayča. Jaziqui Cristužtajapa ančhucaquiz chiižinuča, Yoozquin kuz tjaalla, niižtan ančhucatan zuma cjisjapa. Jalla nuž chiižinuča. ²¹ Cristuqui ana čjul uj paachiča. Učhum laycu Jesucristuqui Yooz yujcquiz učhum ujnacchiz cjissiča, učhumqui Yooz yujcquiz ana ujchiz nižaza zuma cjisjapa. Jalla nuž cjiskatčiča Yoozqui, niiž pinsitacama.

6

¹ Jilanaca, cullaquinaca, wejrqui Yooztan langznuča, žoñinaca Yoozquin kuz tjaajo. Jaziqui ančhucaquiz chiižinuča, liwriiñi Yooz takuqui anača inapankaz nonzqui, nii. Ancha okzñi kuzziz cjen, Yoozqui ančhucaquiz niiž liwriiñi taku paljaykatčiča. ² Cjijrta Yooz takuqui tuž cjiča: “Wejrtča okzniñtqui, ančhuc liwriita cjisjapa. Jaziqui tii timpuquiz okzñi kuzziz ančhucaž mayizita nonzinča, nižaza tii liwriiz timpuquiz ančhucaquiz yanapchinča”. Jaziqui Yoozpanča okzñi kuzzizqui. Anziqui žoñinaca liwriita cjesača.

³ Wejrqui anal jec žoñžquizimi t'ezinz pecuča, ujquiz tjojtjapa. Jaziqui ana jecmi weriž Yooztajapa trabajta iñarasača. ⁴ Yooztajapa trabajcan, jaknuž watanami, zuma Yooz kamañakaz tjeez pecuča. Yoozquin tjurt'iñi kuz tjeez pecuča, čjul sufrisquiztanami, nižaza čjulquiztan t'akjiri žejlžquiztanami, nižaza čjul ch'ama ojklayzquiztanami. Čjulunacaž watanami tjurt'iñi kuz tjeez pecuča. ⁵ Jilanaca, cullaquinaca, tiža sufrisnaca watchinča: wajjtatača, carsilquiz chawctatača; žoñinacaqui wejtnaca quintra aptichiča; nižaza muzpa ch'ama langznaca watchinča otčañ tjepi; nižaza ana tjaichi kamchinča, nižaza čjerž kjara pascan žejlchinča. Jalla nižta sufrisnaca watchinča, tjurt'iñi kuztan. ⁶ Yooztajapa langzcan, zuma Yooz kamaña tjeez pecuča, zuma lijitum Yooz kamañchiz kamcan, nižaza Yooz puntu zuma zizñi nižaza pasinziz kuzziz kamcan, nižaza okzñi kuzziz kamcan, nižaza Espiritu Santuž aztan kamcan, nižaza zuma lijitum munaziñi kuzziz kamcan, ⁷ nižaza lijitum Yooz taku paljaycan, nižaza Yooz aztan kamcan. Jalla nižta kamcan zuma Yooz kamaña tjeez pecuča. Nižaza Yooztajapa kamcan, Yooz zuma razunžtan ojklayuča, tsjii zuma armichiztakaz. Yooz zuma razuna chiican, wejrqui žoñinacžquiz Yooz taku catokskatuča, nižaza quintra žoñinacžquiz Yooz zuma razunžtan kjaaznuča. ⁸ Yooztajapa kamcan, awizaqui wejrqui zuma rispittäča. Awizaqui ch'aanitzakazza. Awizaqui žoñinacaqui wejt quintra ana waliž parliča. Awizaqui žoñinacaqui wejt puntu zumaž parliča. Wejt puntuquiztan yekjap žoñinacaqui “Niiča tsjii kjutñi irpiñiqui” cjan chiičiča. Jalla nuž cjenami, wejrtča werara chiiñtqui, nižaza irpiñtqui. ⁹ Yekjapanacaqui wejr ana pajz pecča. Jalla nuž cjenami, pajtapanikazza wejrqui. Yekjapanacaqui “Nii Pabluqui ticzla”, cjiñiča. Jalla nuž cjenami tiral žetuča. Wejt Yooz Epiž ujžta cjenami, ana contača wejrqui. ¹⁰ Llaquita kuzziz cjenami, Yoozqui wejt kuzquiz cuntintupan cjiskatča. Poriž cjenami, Yooz taku paljaycan walja žoñinacžquiz ricachužtakaz cjiskatchinča. Ana čjulchiz cjenami, tjapa wejtta žejlča, Yooz maatiž cjen. ¹¹ Corinto wajtchiz jilanaca, cullaquinaca, kjanapacha ančhucaquiz paljayžuča. Ančhucatan zuma munazuča, tjapa kuztan. ¹² Anača juntuñalla kuz ančhucatan munazuča. Yekjapanacazti anaž tjapa kuztan wejtтан munaziz pecčani. ¹³ Pero ančhuczti tjapa kuztan wejtтан zuma munaziñi cjee. Ančhucaquiz chiižinuča, jaknužt tsjii ejp persun ocjalžquiz chiižinčaja, jalla nižta.

YOOZ ŽOÑINACČHUCČHA ANČHUCQUI

¹⁴ Tsjiiļa chiižinuča. Ana criichi žoñnacžtan anaž ancha pajasa, tii muntuquiz kamcan. Yooz kamañchiz žoñiqui Yooz quintra žoñžtan anapan tsjii kuzziz cjesača. Zuma žoñiqui ana zum žoñžtan anapan zuma pajasasacha, tii muntuquiz kamcan. ¹⁵ Jaknužt Cristužtan Satanas diablužtan tsjii kuzzizpan cjesajo? Nižaza jaknužt criichi žoñiqui ana criichi žoñžtan tsjii kuzziz cjesajo? Anapanž tsjii kuzziz cjesača. ¹⁶ Yooz kjuyquiz žoñiž

paata yooznacaqui anapanž juntu cjesača. Nižaza učhumqui žejtři Yooz kjuyčhumča. Yoozpachača tuž cjichiqui: Ninacž kuznacquiz kamača; ninacžtan čica želača. Ninacž Yooz wejr cjeecha, nižaza ninacaqui wejt wajtchiz žoñinacaž cjequiča. ¹⁷ Jalla nižtiquiztan Yooz Jiliriqui tuž zakaz cjiča: Ana criichi žoñinacž kamañquiztan zaraka, nižaza jayta. Ana zum kamañanacchiz anapan kama. Nekztan wejrqui ančhuc zuma risiwača. ¹⁸ Ančhuca ejp cjeeča. Nižaza ančhucqui wejt maatinacaž cjequiča. Jalla nuž cjiča tjapa azziz Yooz Jiliriqui.

7

¹ Munazita jilanaca, cullaquinaca. Yoozqui učhumnacaquiz niíž čhiita takunaca tjaačiča. Jalla nižtiquiztan učhumqui tjapaman ana walinacquiztanami nižaza tjapaman ana zum kamañanacquiztanami jaytistanča, zuma kamañchizpan cjisjapa, curpumi kuzmi zuma cjisjapa. Yoozquin eksčan, nižaza rispitan, tjapa ana walinacquiztan jaytistanča, juc'ant juc'ant walja zuma ligituma cjisjapa, Yooz kamañchizpan cjisjapa.

PABLUŽ CHIITA TAKU CATOKTA

² Wejttan zuma munaziñi cjee, tjapa kuztan. Ana jakziltiž quintra čhjulumi paachinča. Nižaza ana jakziltižquizimi tsjii kjutñi čhjitchinča. Nižaza ana jakziltižquizimi incallchinča, cusasanaca tanzjapa. ³ Jalla nuž čhiican, ančhucaquiz uj tjojtunz ana pecuča. Tjapa kuztan ančhucatan zuma munazuča. Tuqui nuž cjetuča. Anača wejr ančhuca quintraqui. Ticz cjenami, žejtz cjenami tirapan ančhucatan zuma munazuča. ⁴ Wejr cjiwča, ančhucqui tirapan Yoozquin tjurt'iñi kuzziz cjequiča. Ančhucaž cjen anča cuntintuča. Ančhuca honora waytuča. Ančhuca quinto nonžcu zuma kuztaž wejrqui. Anča sufrita cjenami anchal chipuča ančhucaž cjen. ⁵ Macedonia yokquin irantižcu, ana jeežñi atchinča. Tjapa kjutñi walja sufrinaca želatča. Tjapa kjuttan quintranaca želatča. Wejt kuzqui turwaysnatča, “Criichi žoñinacaqui quejpsnaa”, cjichinča. Llaquita kuzziztača wejrqui. ⁶ Pero Yoozqui llaquita žoñinacžquiz kuzñipanča. Yoozqui wejr kuzziča, Tituž tjontiquiztan. ⁷ Nižaza Titžquiztan ančhuca quinto nonžcu, wejrqui zuma kuztatača. Tituqui ančhucaž cjen llaquita cjissitača. Nekztan ančhucaquiz tjonžcu, nižaza ančhucaž zuma kamta cheržcu, kuztatača. Nižaza Tituqui quint'ichiča, ančhucqui wejr anča cherz pecatča, nižaza weriž llaquita cjen ančhucqui llaquitazakaz cjissinčhucča. Nekztan wejtquiz tjurt'ižinčinčhucča. Jalla nii nonžcu juc'anti cuntintu cjissinča. ⁸ Weriž cjiyrta cartaqi ančhuc llaquita cjiskatchiča. Jalla nuž cjenami, anziqiu ana llactazzinča. Pero tuquiqui llactazzinča; nii ančhucaquiz čhiizinta ana cjiyrz pecatuča. Pero ančhuc tsjii upacamakaz llaquiskatchinča. ⁹ Ančhucqui llaquiskattiquiztan anazuma kamznaca ecchinčhucča. Jalla nižtiquiztan wejrqui cuntintuča. Ančhucaž llactatiquiztan wejrqui anatača cuntintu. Antiz ančhucaž anazuma kamznaca ectiquiztan jalla nekztantača wejrqui cuntintu. Ančhucaž anazuma kamtiquiztan Yoozqui ančhucaquiz uj cjuñkatchiča. Jaziqui weriž cjen ančhucqui ana ina llaquissinčhucča. ¹⁰ Yoozqui žoñžquiz uj cjuñkatča kuz campiita cjejajo. Jequit kuz campiičhaja, jalla niiqui liwriita cjesača, zuma kamañchiz cjisjapa. Nižaza liwriita žoñinacaqui cuntintuča. Ana criichi žoñinacaqui ujnaca cjuñžčan nižaza llactazčan ana kuz campiyaquiz niiqui chojru kuzziz cjissa. Ultimu infiernuquin okaquiča. ¹¹ Ančhuczi uj cjuñžcu Yoozquin juc'anti kuzziz cjissinčhucča; oralla kuz campiichinčhucča. Nižaza tjapa kuz tjaachinčhucča ana wali kamznaca azquichjapa. Nii uj paañi žoñž quintra anča žawjchinčhucča. Nižaza nii ujquiztan tsucchinčhucča. Nižaza wejttan anča zalz pecchinčhucča. Nižaza nii uj paañi žoñi anča casticz pecchinčhucča. Nižaza ultimu nii uj paañi žoñi casticchinčhucpanča. Jalla nižtiquiztan ančhucqui kjanapacha tjeezinčhucpanča, zuma kuzzizčhucča, ana tira ujchiz. ¹² Nii uj paata puntuquiztan nonžcu ančhucaquiz c'aripacha cjiyržquichinča. Anatača nii uj paañi žoñžjapakaz cjiyržquichinqui. Nižaza anatača nii quintra uj paažinta žoñžjapakaz cjiyržquichinqui. Antiz ančhucajapakaz cjiyržquichinča, Yooz yujcquiz ančhucaquiz tjeezjapa, ančhucqui wejttan munaziñi kuzzizza, jalla nii. ¹³ Ultimquiziqui tjappacha walikaz cjissiča. Jalla

nižtiquiztan wejrqui cuntintu cjissinča. Ančucaž wilta zuma kamtiquiztan Tituqui wilta llan kuzziz cjissiča. Nižaza Tito cuntintu cjissiz cjen, wejr zakaz juc'ant cuntintu cjissinča. ¹⁴ Wejrqui Titžquiz ančuca honora waytichinča, "Ninacaqui zumača", cjican. Jalla nuž cjican ultimquiziqui ančucaž cjen ana azkatchinča. Ančhucatan žejljan werar razunakaz chiichinča. Nižaza Titžquiz chiita razuna werara zakazza ančuca puntuquiztan. ¹⁵ Tituž tjaajintacama zuma kamchinčhucča. Nižaza Tito zuma risiwchinčhucča, humilde kuztan, nižaza rispitiñi kuztan. Tjapa nižta cjuñžcu Tituqui ančucaquin juc'antiž munaziča. ¹⁶ Ančucaž cjen wejrqui zakaz ancha cuntintutča. Nižaza ančuca puntuquiztan cjiwča, ancha zuma kamañchiz, jalla nii.

8

OFRENDANACA TJAAZ PUNTU

¹ Jaziqui jilanaca, cullaquinaca ančucaquiz tii zizkatz pecuča, jaknužt Macedonia yokquiz žejlñi criichinacaqui Yooz zuma kamaña tjeeziča, jalla nii. ² Nii criichi žoñinacaqui ancha pruebanaca watchiča. Ancha pori cjissiz cjenami ninacaqui ancha cuntintu želatča. Nižaza ricachužtakaz walja ofrendanaca utchiča. ³ Ninacž želinchizquiztan jama utchiča. Wejr cjiwča, jilacama utchiča ninacž persun kuzquiztan. ⁴ Ninacaqui t'akjir criichinacžquin ofrenda tjaaz ancha pecchiča, jaknužt parti criichinacaqui ofrenda tjaatčhaja, jalla nižtapacha. Nižaza wejtquiz ancha rocchiča favora paajo, ninacž ofrenda chjichajo, jalla nii rocchiča. ⁵ Ninacaqui juc'ant zuma paachiča weriž tantiitiquiztanaqui. Tuquiqui Yoozquin tjapa kuz tjaachiča. Nekztan Yooz munañpi jaru wejtquiz kuz tjaachizakazza. ⁶ Jalla nižtiquiztan wejrqui Tito rocchinča, ančucaquin wilta okajo. Tuquiqui Tituqui ofrenda tjaaz puntu ančucaquiz chiižinčiča. Jaziqui Tito wilta rocchinča, ančucaquin wilta okajo, ančuca ofrendanaca cumpliskatzjapa, jaknužt tuqui ančhucqui okžñi kuzquiztan tjaatčhaja, jalla nuž. ⁷ Ančhucqui ancha zumača; ančhucča Yoozquin kuzzizpan, nižaza Yooz puntu zuma zizñi, nižaza zuma tjaajnasacha, nižaza tjapa kuztan zumanaca paayinčhucča, nižaza wejtjan zuma munaziñi kuzzizčhucča. Čhjulquizimi ančhucqui ancha zumača. Jalla nižtiquiztan ančhucqui zuma ofrenda tjaaz zakaz waquizicha, ančuca okžñi kuzquiztan. ⁸ Ančucaquiz anal mantuča, pero zizkatz pecuča, parti žoñinacaqui tjapa kuztan ofrenda utchiča, jalla nii. Jazic ančhucqui walja ofrendanaca tjaaquiž niiqui, ančuca okžñi kuz tjeeznasacha. ⁹ Učhum Jesucristo jilirž ancha okžñi kuz zizza ančhucqui. Jesucristuqui tjappacha nižtacama žejlchiž cjenami, ančucaž cjen pori cjissiča tii muntuquiz kamcan. Jalla nuž pori cjissiča ančhuc ricachužtakaz cjiskatzjapa.

¹⁰ Jalla nižtiquiztan tii ofrenda puntuquiztan ančucaquiz chiižinuča. Waj tsjii wataqui ančhucqui t'akjir criichinacžtajapa ofrenda uch pecatča, nižaza ofrenda uchi kalltichinčhucča. Jalla nižtiquiztan anziqiu nii ofrenda cumpliskatz waquiziča. Jalla niiqui walipanž cjesača. ¹¹ Tuquiqui ančhucqui tjapa kuztan ofrenda uch pecatča. Jalla nuž pectaquu cumpliskatz waquiziča, ančuca želinchizquiztan jama. ¹² Jakziltat tjapa kuztan ofrenda utčhaja, želinchizquiztan jama uch waquiziča. Jalla niiqui Yoozquin cuntintu cjiskatasacha. Jakziltat ana zinta želinchiz cječhaja, jalla niizquiztan Yoozqui ana ofrenda mayča. ¹³ Wejrqui anal pecuča, yekja criichinacžquiz yanaptiquiztanaqui ančhucpacha t'akjiri cjisjapa. ¹⁴ Tuž cjiwča, anziqiu ančhucqui juc'ant želinchizta. Jalla nižtiquiztan nii t'akjir criichi žoñinacžquiz yanapasacha. Wiruñaquu ninacaqui ančucaquiz yanapačhani, ninacž juc'ant želinchizquiztan jama. Jalla nižtiquiztan tsjiikaz cjequiča. ¹⁵ Cjijrta Yooz taku tuž cjiča: "Juc'ant želinchiz žoñiqui anaž čhjetnasacha. Nižaza ana želinchiz žoñiqui ana t'akjiri želasacha".

TITŽ PUNTU

¹⁶ Yoozqui Tito ančucaquiz ancha cjuñžkatchiča, jaknužt wejrqui ančucaquiz cjuñžničha, jalla nižta. Jalla nižtiquiztan Yoozquin gracias cjican chiyuča. ¹⁷ Weriž roctiquiztan Tituqui "iyaw" cjichiča. Pero niipacha ančucaquiz cjuñžiča. Jalla nižtiquiztan persun kuzquiztan ančucaquin tjonžcaquiča. ¹⁸ Titžtan juntu yekja jila

cuchanžcača. Tjapa iclizziz criichinacaqui nii jilž puntu zizza, zuma liwriñi taku parliñi, jalla nii. ¹⁹ Nižaza iclizziz criichinacaqui nii jila utchiča, wejttañ chica ojklajajo, nižaza tii ofrenda Jerusalenquin chjitzjapa. Wejrqui tii ofrenda chjitz pecuča, Yooz honora waytizjapa, nižaza wejt yanapñi kuzziz tjeezjapa. ²⁰ Jalla nuž tii ricujta ofrendaqui ancha tažpachača. Jalla nii paaznaca chjichcan wejrnacqui zuma kjana kamz pecuča, žoñinaca wejtnacaquiz ana uj tjojtñajo, “Pabluqui persunjapa ofrendanacquiztan paaz jwessiča”, cjican. ²¹ Yooz yujcquizimi žoñinacž yujcquizimi wejrnacqui zuma lijituma kamz pecuča.

²² Titžtan nii yekja jilžtan tsjii jilžtan zakaz cuchanžcača. Tii jilaqui wejrnacqui wawczinča, zuma lijitum kuzziz čhjultakquiztanami, jalla nii. Niiqui ančuca puntuquiztan nonžcu, ančucaquin tjonzquin ancha pecchiča. Ančucaž zuma kamtiquiztan nižta kuzzizza. ²³ Titž puntuquiztan tuž cjiwča. Niiqui wejt cumpañeruča. Nižaza wejttañ chica ančucultajapa sirwiča. Nii yekja pucultañ jilanacž puntuquiztan tuž cjiwča, ninacača iclizzizjapan cuchantaqui, nižaza ninacaž cjen Cristuqui ancha honorchizza. ²⁴ Nonžna ančucqui. Tjapa criichinacžquiz ančuca zuma okžñi kuz tjeezna. Jalla nuž tjeeznan criichinacaqui zizaquiča, zuma razunžtan ančucaž kamtiquiztan wejrqui cuntintuča, jalla nii.

9

OFRENDA PUNTU

¹ Tsjižtan zakal chiižinuča Yooz žoñinacžtajapa ofrenda puntuquiztan. Jalla nii puntuquiztan anača ančucaquin tsjii cartami cjiyržquichuca. ² Ančucqui tjapa kuztan tjaaz pequiñchucča. Jalla nii zizuča. Nižaza Macedonia yokquin željñi criichinacžquiz cuntintu cjiwča, ewitanpacha Acaya yokquin željñi criichinacaqui ofrendižtan yanapzjapa listutača, jalla nuž chiyuča. Jalla nuž nonžcu tsjan kuzziz cjsiča ofrenda uchjapa zakaz. ³ Nižaza wejrqui tii čhjepultan jilanaca cuchanžcuča, weriž chiita ančuca puntuquiztan ana toscara cjisjapa, ultimupan ančuca uchta ofrenda tjacžta cjisjapa, jaknužt wejrqui parti criichinacžquiz cjitučajaja, jalla nuž. ⁴ Cunamit yekjap Macedonia criichinacaqui wejttañ chica tjonachani. Ninacžquiz ančuca ofrenda uch puntuquiztan kjaž wiltami chiižinchinča. Jalla nižtiquiztan ančuca ofrenda ana listu tjacztažlaj niiqui, wejtnacaltami ančucaltami aziž cjequiča. ⁵ Ana azi cjisjapa, wejrqui tantiichinča, tii čhjepultan jilanaca rocz waquiziča wejt tuqui ančucaquin tjonznajo. Ninacaqui tjonžcu ančucaž compromitta ofrenda cumpliskataquiča. Jalla nižtiquiztan ančuca ofrenda listu tjacžta cjequiča ima wejt tjonan. Zuma okžñi kuzziz cjen ofrenda uch waquiziča, ana weriž chiižintiquiztankaz.

⁶ Ančucqui tii cjuñzna. Jequit koloculla zkala čhjacačajaja, nižaza koloculla ajznaquiča. Nižaza jequit wacchi čhjacačajaja, nižaza wacchi ajznaquiča. ⁷ Zapa mayni persun kuzquiz tantiiču, ofrenda uchaquiča. Jequit zuma okžñi kuztan ofrenda utčajaja, jalla niižtan munaziča Yoozqui. Ana pizc kuztan uchasača, nižaza ana žoñiz chiižintiquiztankaz uchasača. ⁸ Tiizakaz cjuñzna. Yoozqui ančucaquiz wacchi tjapaman wintizunanaca tjaaznasacha. Jalla nižtiquiztan ančucqui želinchizkaz cjesača. Nižaza ančucqui želinchizquiztan ofrenda tjaasača, tjapaman zuma obranaca yanapzjapa. ⁹ Tii puntuquiztan cjiyrta Yooz takuqui tuž cjiča: Zuma žoñiqui okžñi kuztan pori žoñinacžquiz tjača. Nižaza niiž zuma obranaca watay wata cjuñtaž cjequiča. ¹⁰ Yoozza semilla tjaañiqui čhjaczjapa, nižaza čjjeri tjaañiqui lujljajapa. Jalla nižtiquiztan Yoozqui ančucaquiz želinchiz cjskatakaquiča, juc'anti. Nekztan ančucqui juc'ant ofrenda tjaasača. Ančucaž zuma tjaatiquiztan zuma obranacchiz cjequiča. ¹¹ Yoozqui ančucaquiz tjapaman zuma cusasanacchiz cjskatakaquiča, ančuca okžñi kuztan juc'anti tjaazjapa. Ančucaž uchta ofrenda intirjitiquiztan, nii ofrendižtan yanapta criichinacaqui Yoozquin ancha gracias cjican cjequiča. ¹² Jalla nuž ofrenda tjaacan Yooz sirwiča. Nižaza nii Yooz sirwitiquiztan t'akjir criichinacaqui yanapta cjequiča. Nekztan ninacaqui Yoozquin ancha gracias cjican cjequiča. ¹³ Tii ofrendaqui tjeeža, jaknužt ančucqui Cristuž liwriñi tawj jaru kamčajaja, jalla nii. Nižaza ančucaž

zuma kamtiqiztan Yoozquin ancha honorchiz cjequiča. Ančhucqui okzñi kuztan wali chawc ofrenda tjaaquičha. Ninacžtajapa, nižaza tjapa criichi žoñinacžtajapa ančhucqui zuma okzñi kuzzizčhucča. Jalla nižtiqiztan Yoozqui honorchiz cjequiča. ¹⁴Yoozqui ančhucquiz ancha zuma okzñi kuzziz cjskatchičha. Jalla nižtiqiztan nii yanapta žoñinacaqui ančhucaltajapa Yoozquiztan mayižinaquiča. Nižaza ančhucatan juc'anti zuma munazaquiča. ¹⁵Jilanaca, cullaquinaca. Tiipariž cjužzna. Yoozqui učhumnacaquiz Cristo tjaachiča. Nii Yooziž tjaataqui juc'ant zumača; ana intintazzuča. Yoozquin ancha gracias cjican cjiwča.

10

PABLUQUI CRISTUŽ APOSTOLUČHA

¹Jilanaca, cullaquinaca. Wejr Pabluqui tii cjižrčuča. Jazic nonžna. Cristuqui humilde kuzzizza. Jalla niža kuzziz cjen wejrqui ančhucquiz chiižinčuča. Yekjap žoñinacaqui tuž cjiča: “Ančhucatan žejlcan, Pabluqui humilde kuzziztača. Pero ančhucatan ana žejlcan, c'aripachača”. ²Ančhucatan wilta žejlcan, ana wilta c'ari cjis pecučha. Yekjapanacaqui wejtnacaquiz uj tjojtunča. “Žoñž kuzcamakaz kamča Pabluqui”, jalla nuž cjiñičha. Jalla ninacžtajapa c'ari cjesača. Pero ančhucqui ninacaž irata ana cjee. Ančhucaltajapaqui anal c'ari cjis pecučha. Cristuž apostoltča wejrqui. Pero wejt persun aztan mantiz anal tjeez pecučha. ³Wejrqui žoñi cjanami ana žoñž kuzcamakaz paaučha, nižaza ana žoñinacžtan kichas pecučha. Pero tjapa Yooz quintranacžtan quiražtakaz zalnasača. ⁴Nižaza Yooz quintranacžtan zalžcu, ultim arma anal joojoo-uča. Antiz Yooz aztan anawalinacquiztan atipasača, ninacaž anawal azziz cjenami. ⁵Yooz quintra razunanacami atipasača. Nižaza čhjul mit kuzquiztan pinsita razunanacami atipasača, žoñinaca Yoozquin pajkatjapa. Tjapa žoñinacaž pinsitanacami Cristuž tjaajintanac jaru cjskatz pecučha. ⁶Jalla nižtiqiztan wejrqui listučha tjapa Yooz quintra žoñinaca casticzjapa. Ančhucqui Yooz mantuquizpan cjisna, tjappacha. Weriž tjonztan, jakziltat anaž Yooz mantuqizlaja, jalla niiqui casticta cjequiča. Cristuž apostoltča wejrqui.

⁷Ančhucqui žoñikaz chekža, kjažta tsijtchižlaja nižaza kjažta chiiñižlaja, jalla nii. Jakziltat mit kuzziz “Wejrqui Cristuž partiquiztča” cječhaja, jalla niiqui cjuñž waquiziča, wejrzakatčha Cristuž partiquiz, jalla nii. ⁸Wejt apóstol puesto puntuquiztan cjenamit juc'anti chiyučhani. Jalla nuž cjenami wejrqui anal asasača. Jesucristo jiliriqiu wejtquiz nii apóstol puesto tjaachiča, ančhucalta zuma kamañchiz cjskatzjapa. Wejtta nii poder ana žejlča, ančhuc akzjapa. ⁹Cartanaca cjižrču anal ančhuc tsucunz pecučha. ¹⁰Yekjap quintra žoñinacaqui tuž cjiča: “Pabluž cartanacaqui chawjc jilirž cartanacažtakazza. Pero tekz žejlcan, ana azzizza, nižaza niž razunanaca inakazza”. Nuž cjiñičha yekjapanacaqui. ¹¹Jalla niža cjiñi žoñinacaqui zumpacha intintaz waquiziča. Jaknužž wejrqui cartanacquiz cjižrčquičhaja, jalla niicama paasača ančhucatan žejlcan.

¹²Nii mita kuzziz žoñinacaž irata cjis anal pecučha. Ninacaqui porapat iñarascan ana intintazñi kuz tjeeža. Yooz tawk jarupankaz kamz waquiziča. ¹³Wejrqui persun puntuquiztan anal juc'ant chiyučha. Yoozpachača wejtquiz tii apóstol langz tjaachiqui. Nii langzquiztan jama chiyučha. Nižaza nii Yooziž tjaata langzquiztan jama ančhucquiz tjonzinča, liwriñi Yooz taku paljayzjapa. ¹⁴Ančhucquin ana tjontasaž niiqui, wejrqui Yooziž tjaata langzquiztan jama ana ojktasača. Parti Cristuž liwriñi taku paljayñi žoñinacžquiztan wejrtča primero ančhucquin tjonchintqui. Yekja žoñiž Yooz taku langtquiz ana mitisasača. ¹⁵Yekja žoñiž Yooztajapa langtquiztan anapal cjiwča, “Nii langtzaqui weriž langztača” cjicanaqui. Wejrqui pecučha, ančhucqui juc'anti Yoozquin kuzziz cjeyajo. Jalla nižtiqiztan ančhucaporquiz Yooztajapa juc'anti langz pecučha, Yooz tjaata langzquiztan jama. ¹⁶Jalla nekztanaqui ančhucquiztan nawjkchuc yekja wajtchiz žoñinacžquiz zakaz liwriñi Yooz taku paljayz pecučha. Pero yekja žoñiž Yooztajapa langtquiz anal mitis pecučha.

¹⁷Jakziltat honora waytiz pecčhaja, nižlaqui Yooz honora waytiz waquiziča. ¹⁸Jakziltat persun honora waytican chiiñižlaja, jalla niž puntuquiztan Yoozqui “ana zumača”

cjequiĉha. Jakziltat “Yooz alaja zumapankazza” cjeĉhaja, jalla niiqui Yooziĉ tjaata honorchiz cjequiĉha.

11

PABLUŽTAN ANAZUM TJAAJIŃINACŽTAN

¹ Wejrqui zumzužtakaz tsjii koluc chiyäĉha. Nii zumzužtakaz chiita takunaca nonž-nalla. ² Yoozqui anĉhucajapa tsjii silusiñižtakaz wejtquiz cjiskatĉha. Weriz Yooz taku paljaytiquiztan anĉhucqui Cristužquin kuzziz cjissiĉha. Cristužtan zalz ora wejrqui anĉhuc zuma kamañchiz Cristužquin prisintis pecuĉha, jaknužt tsjaa zuma tur naaža compromitta tjowžquiz prisintita cjeĉhaja, jalla nuž. ³ Wejrqui anĉhuc punctuquiztan turwayznuĉha; cunamit tsjiiqui anĉhucquiz incallskataĉhani, Cristužquin ana tjapa cwr cjisjapani, nižaza Cristužquiztan zarakchi cjisjapani. Anĉhucadž pinsitanacaqui tsjii kjutñiž cjisnaĉhani. Tuquitanpacha nii ana wal zkoraztakaz diablucqui mañužtan Evaquiz incallĉiĉha, cunamit jalla nižta incallta cjisnaĉhani anĉhucqui. ⁴ Wejrqui anĉhucquin tjonchinĉha, werar liwri-ñi takumi nižaza Jesusiž puntuquiztanami paljayzjapa, nižaza tjonchinĉha Espiritu Santuž anĉhuc kuzquiz luzskatzjapa. Jaziqui anĉhucquiz chiižinuĉha. Tsjii žoñinacaqui tsjemat liwriñi taku paljayñiž cjenami, anĉhucqui nii incallñi žoñi zuma risiwiñĉhucquiĉha. Ninacaž tsjemat tjaajintanaca catokiñĉhucquiĉha. Nižaza tsjii žoñinacaqui tsjemat espiritunaca tjaaz pecasaž niiqui, anĉhucqui nižta incallñi žoñi zuma risiwiñĉhucquiĉha. Nuž nonžcu, ispanichinĉha; nižaza llaquita kuzziz cjiskatchinĉha. ⁵ Yekjapnacaqui anĉhucquiztan nii incallñi žoñinacž punctuquiztan pinsiĉha, zuma apostolonacaĉha, jalla nii. Ninacaqui anaĉha werar apostolonacaqui; anaĉha wejtquiztan pajk jiliriĉqui. Jalla nuž cjiwĉha. ⁶ Wejrqui anal altu tawkžtan paljaycan anĉhucatan kamchinĉha. Jalla nuž cjenami wejrqui Yooz puntu zuma zizuĉha. Jalla nii zizñi cjican kjanapacha tjeezinĉha weriz tjapa puntunaca paljaytiquiztan. Tantiya anĉhucqui.

⁷ Wejrqui humilde kuzziz anĉhucatan kamchinĉha, anĉhuc honorchiz cjisjapa. Nižaza ana paaz paca mayžcu, liwriñi Yooz taku anĉhucquiz paljaychinĉha. ¿Jalla nuž anawali paachin wejrjo? ⁸ Yekja iclizziz žoñinacaqui wejtquiz paaz tjaachiĉha. Jalla nii ofrendanaca tanzinĉha, anĉhucquin Yooz taku paljayñi ojkzjapa. ⁹ Anĉhucatan kamcan ana želinchiz cjissinĉha. Pero anĉhucquiztan ana ĉjulumi maychinĉha. Macedoniaquiztan tjonchi jilanacaqui wejtquiz onanchiĉha. Jalla nižtiquiztan anaž ĉjulumi wejtquiz pjaltatĉha. Tuquiqui wejrqui anĉhucquiz ana mayzjapa anĉha cwitassinĉha, anĉhucjapa ana ĉh'ama cjejajo, nižaza jaztanami mayzquiztan cwitasuĉha. ¹⁰ Jaknužt Cristuqui werarapan chiiñitažlaja, jalla niiž cjen nižta werarapan chiyiñzakaztĉha wejrqui. Jalla nižtiquiztan legali cjican, wejrqui cjiwĉha, anaž jec Acay wajtchiz žoñiqui wejt puntuquiztan cjesaĉha, “Pabluqui ana želinchiz cjican, wejtquiztan maychiĉha”, nuž cjicanaqui. Jalla nuž anĉhucquiztan ana ĉjulumi maytiquiztan cuntintutĉha wejrqui. ¹¹ ¿Kjažtiquiztan nižta chiyu wejrjo? ¿Anĉhucatan ana zuma munazojo? Anapanž cjesaĉha. Yooz zizza, wejrqui anĉhucatan munazuĉha, jalla nii. ¹² Wejrqui liwriñi Yooz taku paljayiñĉha, ana paaz paca mayžcuqui. Nižaza tirapan nužullakaz kamaĉha. Nekztan jakziltat paaz ganzjapa Yooz taku paljayĉhaja, jalla niiqui anapanž cjichuca, “Wejrĉha Pabluž irata Yooz taku paljayiñtqui”, nuž cjicanaqui. ¹³ Nii paaz tanzjapa paljayiñnacaqui falso apostolunacaĉha. Nii žoñi incallñinacaqui Cristuž apostolunacažtakaz ojklayñiĉha.

¹⁴ Jalla nužupan tii muntuquiz wataquiĉha. Satanás diablupacha tsjii Yooz anjilažtakaz ojklayĉha. ¹⁵ Nižazakaz Satanásquiz sirwiñi žoñinacaqui werara Yooz sirwiñinacažtakaz ojklayĉha. Jalla nižta puntu nayžcu, ana tsucaquiĉha. Ninacaž nižta ojklaytiquiztan jama casticaž cjequiĉha.

PABLUQUI ANCHA SUFRISNACA WATCHIĉHA

¹⁶ Wiltal cjiwĉha. Jalla nuž chiyanaqui anĉhucqui weriz chiita puntuquiztan anaĉha pinsisqui, “Niiqui zumzu taku chiiĉha” cjicanaqui. Jalla nuž pinsanami, wejr chiyaj cjila tsjii lucurata žoñižtakaz. Wejrqui tsjii koluculla persun honora waytaj cjila. ¹⁷ Jalla nuž ĉhiican wejrqui lucuratu žoñižtakaz chiyäĉha. Anal chiyäĉha Yooz Jilirž ortin jaru, jalla

nuž persuna honora waytican. ¹⁸ Walja žoñinacaqui tii muntuquiz čjulunacquitzanami persun honora waytiča. Jalla nižtiquiztan wejr zakal persun honora koluculla waytača. ¹⁹ Ančhucqui chiiñčucča, “Ziñ žoñinactča wejrnaqui”, cjanaqui. Jalla nuž chichiž cjenami ančhucqui zumzu žoñinacž takunaca cuntintu nonzniiñčucča. ²⁰ Falso žoñinacaqui ninacž mantuquiz ančhuc cjskatz pecča. Nekztan ančhucqui nii žoñinacžquiz zuma cassa. Nižaza tsjii falso žoñinacaqui ančuca cusasanacquitzan paca mayča. Nekztan ančhucqui ninacžquiz zuma tjaača. Nižaza tsjii falso žoñinacaqui persunaltajapa zuma cjisjapa ančhuc mantiča. Nekztan ančhucqui nižquiz zuma cassa. Nižaza tsjii falso žoñiqui ančhuc inarča. Nekztan ančhucqui nižquiz zumakaz awantiča. Nižaza tsjii falso žoñiqui ančuca yujcquiz tsjajpachani. Jalla nižakaz ančhucqui zuma awantačhani. ²¹ Wejrqui ančhucatan kamcan ana niža kamchinča; humilde kuzziz kamchinča. Jalla nižtiquiztan wejrqui azasajo? Anapal azasača. Yekja žoñinacaqui čjulquitzan persun honora waytačaja, jalla nii žoñinacžquitzan juc'antitča wejrqui. Jalla nuž chicanaqui lucuratažtakaz chiyuča. ²² Yekjapanacaqui cjiñiča, “Hebreo sarchiz žoñinactča wejrnaqui”. Wejr zakal cjeeča, “Hebreo sarchiz žoñiča wejrqui”. Nižaza ninacaqui cjiñiča, “Yooz illzta Israel wajtchiz žoñinactča wejrnaqui”. Wejr zakal cjeeča, “Yooz illzta Israel wajtchiz žoñiča wejrqui”. Nižaza ninacaqui cjiñiča, “Abrahamž majchmaatquitzan tjoniñča”. ²³ Ninacaqui cjiñiča, “Cristuž sirwiñtča”. Wejrmi zakal cjeeča, “Cristuž juc'ant zuma sirwiñtča”. Jalla nuž chicanaqui lucuratažtakaz chiyuča. Pero ninacžquitzan juc'anti langzinča Cristužtajapa. Nižaza ninacžquitzan juc'anti wjajttatača. Nižaza ninacžquitzan juc'anti carsilquiz chawctatača. Nižaza tsjii kjaž wilta ticzmaya želaytuča. ²⁴ Pijjska wilta judío žoñinacaqui wejr casticchiča. Jalla nuž casticcan, quinsa tunca llatuncan lazu wjajtta mutchinča. ²⁵ Čhjep wilta wejrqui wjajtz paržtan wjajttatača. Tsjii tunca maztan čhajctatača. Čhjep wilta warcuquiz okan nii warcu julskatchiča. Warcu julskatzču tsjii nooj weentižtan majiñtžtan pajk kot taypiquiz željchinča. ²⁶ Tirapan ojkojkchinča, walja anawalinaca watniž cjenami. Tižta anawalinaca watchinča, anawal pujunaca, anawal tjañinaca, wejt wajtchiz anawal žoñinaca, yekja wajtchiz anawal žoñinaca, chawjc wajtquiz anawal željñinaca, ch'ekti yokquin anawal željñinaca, anawal pajk kotanaca, nižaza anawal falso jilanaca. Jalla nižta anawalinacami watchinča. ²⁷ Nižaza ancha langzinča, nižaza zuma ch'amanaca watchinča, kjaž wilta ana tjaji atchinča, nižaza kjaž wilta čhjerž kjarami kjaz kjarami passinča, kjaž wilta ayunassinča. Nižaza kjaž wilta zakinacquiz ch'unca sufrichinča, zquitž kjara. ²⁸ Tjapa nižtanaca watchiž cjenami, iyakal sufruča. Zapuru tjapa iclizziz žoñinacžtajapakal cjuñznuča, llaquita kuzziz ninaca zuma kamañchiz cjscama. ²⁹ Jakzilat llajllasñi kuzziz cječhaja, wejrqui nižtitan chica zakal llaquisuča. Jakzilat ujqiz tjojskatñi cječhaja, wejrqui nižtjojskatñi žoñž quintra žawjznuča. ³⁰ Wejrqui persun honora waytaž niiqui, weriž sufritanacquitzanami nižaza inallakaz cjitiquiztanami honoral waytača. ³¹ Anal toscara chiyuča. Jesucristo Jilirž Yooz Ejpqui nii zizza. Yooz Ejpqui wiñaya honorchiz cjila. ³² Damasco wajtquin želan, Aretas čjita chawjc mantiñi jiliriqui ulanz zananacquin guardianaca mantichiča, wejr tanzjapa. ³³ Pero criichi jilanacaqui wejr pajk canastiquiz yaažču, pirkiž tsewctan kozzcan tsjii kjuya wintanquitzan wejr chjijunchiča. Jalla nižtiquiztan wejrqui ninacžquitzan atipassinča.

12

¹ Persun honora waytican, anača čjulumi wejttaqui cusaqui. Jalla nuž cjenami tiral wejt puntuquitzan chiyuča. Ančucaquiz tii zakal quint'ača, Yoozqui niž puntunaca cherkatchiča. Nižaza niž puntunaca zizkatchiča. ² Wejrqui Jesucristužquin kuz tjaachinča. Niiž wiruñ ažk tunca pusin watanaca wejrqui arajpach Yooz wajtquin chjichtatača tsjii upacama. Curpužtanpacha chjichtatažlaja, už ana curpužtanpacha chjichtatažlaja, jalla nii anal naychinča. Yooz Ejpka zizza. ³⁻⁴ Pero wejrqui zizuča, nii zuma wajtquin chjichtatača, jalla nii. Curpužtanami ana curpužtanami, jalla nii anal naychinča. Yooz zizza. Jalla nii zuma wajtquin takunaca nonzinča, jalla nii

noniža takunacaqui anača chiichuca žoñž takunacžtan. ⁵ Jalla nii Yooz puntu nonz-tiquiztanami chertiquiztanami honora waytasacha. Wejrqui persun sufrinacqiztan honora zakaz waytasacha. Persunquiztan anal honora waytiz pecuča. ⁶ Wejrqui persun honora waytiz pectasaž niiqui lucuratažtakaz ana chiitasacha. Zuma werar razunžtanpan chiyuča. Jalla nuž cjenami, persun honora anal iya waytača. Weriz chiitanacqiztanami paatanacqiztanami jalla nii jarukaz wejrqui rispitta cjesača. ⁷ Nii Yooz puntu ziztanaca, chertanaca juc'ant zuma cuzača. Jalla nižtiquiztan ana mit kuzziz cjisjapa, Yoozqui wejr laa cjisqatchiča. Wejr tsjii ch'apžtan chjapchižtakaz sufriskatchiča. Yoozqui Satanás diabluzquiz nii laa cjisjapa permitchiča, wejtquiz niža sufriskatzjapa. ⁸ Wejrqui čhjep wilta nii laa puntuquiztan Yooz Jiliržquin mayizichinča, wejt curpu laa žetajo. ⁹ Pero Yooz Ejpzi wejtquiz kjaaziča, tuž cjian: Wejrqui amtan zuma munazuča, jalla nižtiquiztan amquiz yanapača. Am inallakaz cjcanaqui wejt aztan amquiz zuma atñi cjisqatača, nižaza čhjulunacqiztanami amquiz zuma atipñi cjisqatača. Jalla nuž cjichiča Yoozqui.

Jalla nižtiquiztan wejrqui sufrinaca watchiž cjenami, nižaza inallakaz cjenami, cuntintul cjeeča. Nekžtan Cristuž aztan wejt kuzmi curpumi yanaptaž cjequiča. ¹⁰ Cristužtajapa sufricanaqui čhjulu watanami cuntintul cjeeča, inallakaz cjenami, iñarta cjenami, ana želinchiz cjenami, sufriskatta cjenami, ch'amanaca watchiž cjenami, čjulunacaž watanami cuntintul cjeeča. Juc'ant inallakaz cjcanaqui, juc'ant tjupi kuzziztča, Cristuž aztanaqui.

¹¹ Jalla nuž chiican lucuratažtakaz chiichinča. Ančhucpachaž niža wejr chiikatchiča. Ančhucpacha wejt puntuquiztan zumanaca chiiz waquiziča. Yekjap žoñinacaqui chi-iñiča, nii Pablužquiztan juc'ant zuma apostolonactča wejrnacqui, cjian. Jalla niža cjiñinacžquiztan juc'ant zumtča wejrqui, Yooz yujcquiz inakaz cjenami. ¹² Wejrqui ančhucatan žejlcan ultim werar apóstol puestuquiz ojklaychinča, zuma pasinsis kuztan. Ančhucporquiz wacchi milajrunacami, siñalanacami, ispantichucanacami, jalla nižtanaca paachinča. ¹³ Jaknužt parti iclizziz criichinacžtan kamtučhaja, jalla niža irata ančhucatan kamchinča. Jalla nuž kamcan ančhucaquiztan ana čhjulum maychinča, jaknužt parti criichinacžquiztan maytučhaja, jalla niža. Jalla nii ana čhjulum maytiquiztanacqui cunamiž ančhucqui žawjčhani. Jalla nekžtanž pertunalla.

PABLUQUI CORINTO ŽOÑINACŽQUIZ ANCHA CJUŇČHA

¹⁴ Anziqui wejrqui tjacznuča čhjep wiltiquiziqui ančhucaquin tjonzjapa. Tii wilta zakaz ančhucaquiztan ana čhjulum mayacha. Ančhuca cusasa wejtquiz anaž importiča. Antiz ančhuc alaja importayuča. Ocjalanacaqui anaž cusasanaca juntasacha, maa ejpžtaqui. Antiz maa ejpnacaž cusasanaca juntasacha, persun ocjalanacžta. ¹⁵ Jalla nižtiquiztan wejrqui persun gasto gastača ančhuca kuznaca zuma cjisjapa. Wejrqui ančhucaquiz yanapasača ochañcama. Wejrqui ančhucatan juc'ant zuma munaziñi kuzziztča. ¿Ančhucuzti upa wejtan munaziñi kuzzizčuckaya?

¹⁶ Tsjii žoñinacaqui tuž cjiñiča, Pabluqui wejtnacaquiztan ana čhjulu may cjenami, jalla nuž maña paacan wejtnacaquiz incallchiča. Jalla nuž cjiñiča. ¹⁷ Pero wejrqui pewcznuča, ¿Wejrqui cuchanžquita jilanacžquiz ančhuc incallzkatchinjo? Anapanča. ¹⁸ Wejrqui Tito rocchinča ančhucaquiz tjonzcajo. Niižtan chica yekja jila cuchanžquichinča. ¿Nii Titžquiz ančhucqui incallchinčucjo? Niižtan wejtan nuž puculan ančhucatan zumpacha kamchinča, zuma kuztanami nižaza zuma kamcanami.

¹⁹ Ančhucqui cunamit wejt puntuquiztan pinsičhani, Pabluqui persun puntuquiztan tirapankaz tjurt'iča, jalla nii. Jalla niža pinsitaqui anazumača. Weriz pecta jilanaca, cullaquinaca. Yooz yujcquiz Cristuž tjuuquiz chiyuča, ančhuca kuznaca juc'ant zuma cjisjapa. ²⁰ Ančhucaquin tjonžcu, cunamit wejrqui ančhucaquiztan tsjii žoñinacžtan anazuma kamañchiz zalačhani. Jalla nii jiwjatuča. Jalla niža zalaž niiqui, wejrqui ančhucaquiz c'aril cjeeča. Jalla niža c'ari takunacžtan tjonzjapa anaž pecča ančhucqui. Cunamit ančhucaporquiz ch'aaznaca žejlčhani, nižaza iniziñinaca žejlčhani, nižaza čhjaawjkatñinaca žejlčhani, nižaza mitarar kuzziznaca žejlčhani, nižaza ana zum taku joojoñinaca žejlčhani, nižaza žoñž quintra chiichiñinaca žejlčhani, nižaza mit

kuzziz žoñinaca žejlčhani, nižaza kichjasñi kuzziz žoñinaca žejlčhani. Jalla nižtanaca žejlčhani. Jalla nižtiquiztan tii cartal cjijržcuča, ančhucaž ana zuma kamañnacquiztan jaytisjapa. ²¹ Cunamit yekjapanacaqui ana zuma kamañchizlani, nižaza adulteriuquiz ojklaychižlani, nižaza ana walinaca paachižlani. Cunamit yekjapanacaqui ančhucaquiztan uj paayiñchucžlani, nižaza ančhuca ujquiztan ana pertuna mayizichinčhucžlani. Jalla nižtiquiztan ančhucaquin tjonan cunamit wejt Yoozqui ančhucaž anazuma kamchiž cjen wejr azkatačhani. Nižta wataquiž niiqui, llaquita kuzziz cjeeča.

13

ŽERZ TAKUNACA

¹Tiižtan čhjepquiziqui ančhucaquin tjonžcuča. Ima tjoncan tiizakal chiižinuča. Tsjii žoñžquiz uj tjojtnaquiž niiqui, ima casticta cjican, pucultan čhjepultan tisticunacžtan ticlarskataquiča nii uj paañi žoñž puntuquiztan. ²Tuquiqui wejrqui uj paañi žoñnacžquiz chiižinčinča, ujnaca eca, cjican. Nižaza tjapa žoñnacžquizimi nižta chiižinčinča. Jaknužt pizc wiltiquiz tjonžcu ninacžquiz chiižinčinča, jalla nižta tii cartiquiz wilta chiižinžcuča, ančhucatan ana žejlcanami. Wilta tjonžcu, uj paañi žoñinaca panž casticača. ³Jalla nuž castictiquiztan ančhucqui kjanapacha cheraquiča, Cristužtan wejtan tsjii kuzzizza. Jaziqui Cristuqui wejr chiikatchiča. Cristuqui anača inallakaz ančhucaltajapa. Antiz ančhucaporquiz niiž azi tjeeža. ⁴Ina žoñižtakaz cruzquiz ch'awctatača. Pero Yooz Ejpž aztan jacatatchiča. Cristužtakaz inallakaz wejrqui. Pero nižaza Cristužtan kamcan, wejrqui Yooz aztan tjeeznasača ančhucaltajapa.

⁵Ančhucqui persunpacha kuz tantiyasa, Cristužquin tira kuz tjurt'iñi, už ana tjurt'iñi, jalla nii. Persunpacha tantiyasa. Jesucristuqui ančhuca kuznacquizza. ¿Jalla nii ana naazjo? ¿Ančhucqui anaj ultim criichinacajo? ⁶Wejrqui cjiwča, wejrnaqui anača falso criichi žoñi, antiz ultim werar criiñ žoñtča. ¿Nii ana nayjo? ⁷Wejrqui Yoozquin mayizuča, ančhuc ana ujnaca paajo. Jalla nuž mayizuča, wejt zuma razuna ana tjeezjapa, antiz ančhucqui zuma cjisjapa. Wejrqui ana zuma razunchiztakal cjež niiqui, anaž importiča. ⁸Wejrqui werar razun quintra anal paasača čhjulumi. Antiz werar razun jarukaz chiyasača. ⁹Jalla nižtiquiztan wejrqui inallakaz cjicanami cuntintuča, ančhucqui tjup kuzziz cjequiž niiqui. Wejrqui ančhucaltajapa tira Yoozquin mayizuča, ančhuc juc'ant zuma kamañchiz cjisjapa. ¹⁰Wejrqui ančhucatan ana žejlcan, jalla tuž tii cartal cjijržcuča, ančhuc zuma cjisjapa. Wejrqui ančhucaquin tjončača Yooz Jilirž apóstolž aztan. Ančhucaquin tjončača, ana c'aripacha cjisjapa, antiz ančhuc juc'ant zuma kamañchiz cjskatzjapa.

¹¹Jilanaca, cullaquinaca, jalla nuž chiižcu tiizakal chiyuča. Ančhucaquiz zumaj cjila. Ančhuca kamañnacaca zumpacha azquicha. Zuma kamañchiz panž cjisna. Nižaza ančhucqui porapat kuzzasñiž cjee. Tsjii kuzziz cjee. Porapat zuma munaza. Jalla nuž zuma kaman, Yoozqui ančhucatan cjila. Yoozqui anča zuma okžni kuzzizza, nižaza niiča llan kuzziz cjskatñiqui. ¹²Jilanaca, cullaquinaca, porapat zuma tsaanasaquiča. ¹³Tekzta tjapa Yoozquin kuzziz jilanacaqui ančhucaquin tsaanžquiča.

¹⁴Jesucristo Jiliriqui tjapa ančhucaquiz zumanacaj tjaala, nižaza Yooz Ejpqui tjapa ančhucatan zuma munaziñej cjila, nižaza Yooz Espiritu Santuqui tjapa ančhuca kuznacquiz cjila. Jalla nužoj cjila. Amen.

LA CARTA DEL APOSTOL SAN PABLO A LOS GÁLATAS

¹ Wejr Pablut'cha, an'chucaquin tii cartal cjiyr'zcu'cha. Jesucristužtan Yooz Ejpžtan cuchanzquita apóstol žoñt'cha wejrqui, ana'cha žoñiž cuchanzquititqui. Nižaza ana'cha žoñiž uchtitqui tii apóstol puestuquiz. Antiz Jesucristužtan Yooz Ejpžtan wejr tii apóstol puestuquiz utchi'cha. Yooz Ejp'cha Jesucristo ticiziquiztan jacatatskatchiqui. ² Wejrqui tjapa wejttan žejl'ni jilanacžtan an'chucaquin tsaanžcu'cha. An'chucqui Galacia provincinquin icliz žoñinacžhuc'cha. ³ Učhum Yooz Ejpžtan Jesucristo Jiliržtan an'chucaquiz zumaj yanapla, nižaza an'chucaquiz cuntintu kuzziz walikaj kamkatla. ⁴ Tii muntuquiz kamcan, žoñinacaqui ana zuma kamañchiz kam'cha. Nii ana zuma kamañquiztan liwriizjapa, Jesucristuqui ticzi'cha. Nižaza učhum ujnac laycu ticzi'cha Yooz Ejpž munañpi jaru. Jalla nii Yoozza učhum yanapñiqui. ⁵ Yooz Ejpqui wiñaya honorchiz cjila. Jalla nužoj cjila. Amén.

TSJIIKAZ LIWRIIŃI TAKU ŽEJLČHA

⁶ Wejrqui an'chuca puntu nonžcu ispantichin'cha. An'chucqui ratulla Yoozquiztan zarakquičha. Jesucristuž an'chucaquiz okzñiž cjen, Yoozqui an'chuc kjawzi'cha, liwriita cjisjapa. Yoozquiztan zarakcan an'chucqui yekja tsjemat liwriiñi taku catokquičha. ⁷ Pero anaž yekja liwriiñi takuquičha želasa'cha. Tsjii tsjii žoñinacaqui an'chuca kuz turwayskatz pec'cha. Nižaza Jesucristuž liwriiñi taku tsjematquin querz pec'cha. Wejrnacqui an'chucaquiz werar liwriiñi taku paljaychin'cha. Jalla niic an'chucqui zizza. ⁸ Jalla nižtiquiztan jakziltamiž tsjemat liwriiñi taku an'chucaquiz tjaajnasadž niiqui, jalla nii žoñiqui Yooziž castictaj cjila. Wejr mekaj cjila, arajpachquiztan tjonchi anjila mekaj cjila, jakziltami yekja tsjemat liwriiñi taku tjaajnasadž niiqui, castictaj cjila. ⁹ Tuquiqui nižtapan chiichin'cha. Jaziqwi wilta nižtapachal chiyu'cha: Jakziltamiž yekja tsjemat liwriiñi taku an'chucaquiz tjaajnasadž niiqui, jalla niiqui Yooziž castictapaj cjila. An'chucqui werar liwriiñi taku catokchin'chuc'cha. Ana iya žejl'ča. ¹⁰ Jalla nuž c'aripacha chiican, ž'chjulut pecoj wejrjo? Anal pecu'cha "Am'cha zumamqui" cjiñinacaqui. Nižaza anal pecu'cha žoñinacž kuz wali cjiskatzjapa. Jalla nižta pecaquičha niiqui, Jesucristuž mantuquiz sirwiñi ana cjichuca'cha.

PABLUŽ OJKLAYTA QUINTU

¹¹ Jilanaca, cullaquinaca, an'chucaquiz tuž tjaajinz pecu'cha. Werič paljayta liwriiñi takuquičha ana'cha žoñž kuzquiztan pinsita. ¹² Ana jec žoñžquiztanami nii liwriiñi taku nonzin'cha, nižaza anaž jec žoñimi wejtquiz nii liwriiñi taku tjaajinchiqui. Jesucristupacha'cha wejtquiz tjaajinchiqui.

¹³ Tuquiqui wejrqui judío žoñinacž kamañ jaru kamiñta'cha. Jalla nii nonzin'chuc'cha. Tuquiqui Yooz partir žoñinaca tanžcu ninaca walja sufriskatiñta'cha. Yooz icliz žoñinaca k'ala akz pecaytu'cha. ¹⁴ Nižaza wejrqui judío cuzturumpinacž puntu juc'anti zizzin'cha, wejt judío mazinacžquiztan juc'anti. Wejrqui wejt tuquita atchi ejpnacž cuzturumpiquiz tjapa kuztanta'cha. Nii cuzturumpinacž jaru kamzjapa ancha c'unchinta'cha. ¹⁵ Jalla nuž cjenami Yoozqui wejr t'akzi'cha, niž apóstol cjisjapa. Ima werič maaquiztan nasan, Yoozqui wejr t'akzjapa tantiichi'cha. Nižaza Yoozqui wejtquiz ancha okzñiž cjen, wejr kjawzi'cha, liwriita cjisjapa. Čhjulorat wejr kjawz tantiit'chaja, jalla nii ora wejr kjawzi'cha, ¹⁶ niž zinta Majch pajzjapa, nižaza niž apóstol cjisjapa. Nižaza Yoozqui wejr kjawzi'cha, ana judío wajtchiz žoñinacžquin Jesucristuž puntu paljayñi cjisjapa. Jalla nuž Yooztan niž Majchtan pajzcu, ana jecžtanami kazñi ojkcchin'cha. ¹⁷ Nižaza ana Jerusalén watjami ojkcchin'cha, parti apostolanacžtan kazñimi. Ninacaqui wejt tuqui apóstol puestuquin luzzita'cha. Jalla nuž wejt tuqui luzziž cjenami ana ninacžtan kazñi ojkcchin'cha. Antiz Arabia yokquin ojkcchin'cha. Wiruñaqu niwjctan Damasco wajtquin quejppžquichin'cha.

¹⁸ Nekztanaqui čhjep watquiztan Jerusalén ojkcchin'cha, Pedružtan zalzjapa. Jalla nekztan Pedružtan tsjii tunca pijskan tjuñi kamchin'cha. ¹⁹ Jalla nicju kamcan, Jesucristo Jilirž lajk

Jacobo cjeta apostolžtan zalchinča. Ana jakzilta parti apostolonacžtanami zalchinča. ²⁰Yooz yujcquiz žejlcan, anal toscara chiyuča. Tii weriž cjiirtaqui wererarača.

²¹Jerusalén wajtquiztan zarakžcu, Siria yokaran nižaza Cilicia yokaran ojkchinča. ²²Judea yokquin kamñi criichinacžtan ima zalchinča. Nii Cristuž partir žoñinacaqui ima wejr paj-kalča. ²³Ninacaqui wejt puntuquiztan tii quintukaz zizziča: “Nii wejr-nacaž sufriskatta žoñiqui niipachaž Jesucristužquin kuztan criichiQUI. Tuquiqui liwriiñi Jesucristuž puntu k'ala tjetanz pecñitača. AnziQUI niiQUI liwriiñi Jesucristuž puntu paljayla”. Jalla nuž cjetča wejt puntuquiztanaQUI. ²⁴Nii criichinacaQUI Yooztajapa honora waytichiča wejt puntu nonziž cjen.

2

APOSTOLONACAQUI PABLO ZUMA RISIWCHIČHA

¹Nekztan tunca pusin watquiztan wilta Jerusalén watja ojkchinča Bernabežtan. Nižaza Tito chjitchinča. ²Yooz wejtquiz čhiitan, Jerusalén watja ojkchinča. Jalla nicju jaknužt yekja wajtchiz žoñinacžquiz liwriiñi Yooz taku paljaytučhaja, jalla nii mazin pecchinča. PrimiraQUI icliz jilirinacžtan ajčcu ninacžquiz mazinčinča, nekztan parti criichinacžquiz mazinčinča weriž paljayta liwriiñi Yooz taku, jalla nii. Jalla nuž mazinčinča, weriž Yooztajapa langžta ana ina cjisjapa. Nižaza anz weriž Yooztajapa langztaQUI ana ina cjisikat pecuča. Jalla nižtiquiztan weriž paljaytaQUI nii judío criichinacžquiz mazinčinča. ³NinacaQUI wejr zuma risiwchiča. Nižaza TituQUI wejtta chica želatča. Nii TituQUI griego wajtchiz žoñi cjan, ana janchiQUI chimpuchiztača, judío žoñinacž cuzturumpi jaru. Jalla nuž cjenami judío žoñinacž cuzturumpi ana paakatchiča, nii janchiQUI chimpuchizta cuzturumpi, jalla nii. ⁴Pero tsjii kjaž žoñinaca želatča, “Wejrnačča criichinacaQUI” cjiñi. Jalla ninacaQUI anatača ljiitum criichinacaQUI pero. Criichinacžporquiz chjojzaka luzzitača. Jalla nii ana zum žoñinacaQUI awayt'i luzzitača, jaknužt wejrnačču Jesucristužquin kuzziz cjen Moisés liiquiztan liwriita, jalla nii. Ninacakaz Titžquiz judío chimpuchiz cjisikat pecatča. Nižaza ninacaQUI wiltaž wejrnač ninacž lii mantuquiz utz pecatča. ⁵Anapan ninacž munañi jaru cjisatchinča. Wejrnačču pecaytuča, ančhucQUI werar liwriiñi Yooz tawk jaru tirapan kamzjapa, jalla nuž.

⁶Nekž žejlñi pajta jilirinacaQUI ana wejtquiz čhjul ew taku tjaajinčiča. Jiliri cjenami ana jiliri cjenami wejtquiz anal importayuča. Yoozquiz žoñinaca ana illillziča. Yooz yujcquiziQUI tjapa criichinacaQUI tsjii parijuča. ⁷Jalla ninacaQUI wejtquiz ana čhjul ew taku tjaajinčiča. Antiz ninacaQUI wejr pajchiča, Yooziž uchta apóstol, nižaza werar liwriiñi taku paljayñi, jalla nii. WejrQUI uchtača yekja wajtchiz žoñinacžquiz liwriiñi Yooz taku paljayajo, jaknužt YoozQUI Pedro utčhaja, judío wajtchiz žoñinacžquiz liwriiñi taku paljayajo, jalla nižtapacha. ⁸YoozQUI Pedro cuchanchiča, judío žoñinacžquiz liwriiñi taku paljayajo. Jalla nii Yoozpacha wejr cuchanchizakazza, yekja wajtchiz žoñinacžquiz paljayajo. YoozQUI jalla nuž pucultan cuchanchiča nižtajapa langznajo.

⁹Jalla nižtiquiztan Jacobžtan Pedružtan Juanžtan wejr pajchiča, Yooz amt'ita jaru apóstol puestuquiz uchta, jalla nii. Nii čhjepultanaQUI pajta chawc jilirinacatača. Jalla nuž wejr pajžcu, ninacaQUI wejr zuma risiwchiča. BernabeQUI risiwtazakazza. Jalla nižtiquiztan wejtnacatan ninacžtan wali cjiyassinča. Wejrnačču tsjii zuma acuerduquiz kazzassinča, wejrnaca yekja wajtchiz žoñinacžquin paljayi ojkzjapa, nižaza ninaca judío žoñinacžquin paljayi ojkzjapa, jalla nuž. ¹⁰Nižaza ninacaQUI wejtnacaquiz roct'ichiča, pori žoñinacžquin yanapzjapa cjuñznajo. WejrQUI nižtapacha zakaz ancha tantiyuča.

PEDRUŽTAN PABLUŽTAN ANTIOQUIA WAJTQUIN

¹¹Niž wiruñ PedruQUI Antioquia watja ojkchiča. Jalla nicju Pedružquiz zumpacha čhiinčinča, niž yujcquizpacha. Niiž kamtaQUI ana zumquintača. ¹²Antioquia wajtquin irantižcu, PedruQUI nii wajtchiz ana judío žoñinacžtan lujlchiča. Nekztan tsjii kjaž Jacobž partir žoñinacaQUI irantichiča. Jalla ninacaQUI judío cuzturumpinaca exiñitača. Jalla ninacžquiz ekskū, PedruQUI nii ana judío žoñinacžquiztan tsjii latu zarakchiča. ¹³Pedruž nuž zaraktan, parti judío criichinacaQUI nižtapacha zakaz tsjii latu

zarakchiča. Pero ninacaqui kuzquiz zizatča, nižta zarakz ana wali, jalla nii. Bernabemi ninacžtan chica zarakzkattatača. ¹⁴ Jalla nuž zarakžcu ninacaqui werar liwriiñi Yooz tawk jaru ana kamchiča. Jalla ninaca zarakñi cheržcu wejrqui tjapa žoñinacž yujcquiz Pedružquiz zumpacha chiižinčinča, tuž cjican: —Amqui judío žoñimča. Jalla nuž cjenami amqui ana judío žoñižtakaz kamñamča. Amqui judío czturumpinac jaru ana kamñamča. Jalla nižtiquiztan ¿kjažtiquiztan amqui tii ana judío žoñinaca judío žoñinacažtakaz kamkatz pecya? Anapanž zuma niiqui.

JESUCRISTUŽQUIN KUZIZ CJEN ŽOÑINACA LIWRIITAČHA

¹⁵ Wejrnacqui judío žoñinacžquiztan tjoniñča. Yekja wajtchiz žoñinacžquiztanami, Yooz quintra paañi žoñinacžquiztanami anapan tjoniñča. ¹⁶ Jalla nuž tjonñiž cjenami wejrnacqui zizzinča, anaž jakziltami Moisés lii jaru kamchiž cjen Yooz yujcquiz zuma cjisnasača. Yooz yujcquiz zuma cjisjapa, žoñinacaqui Jesucristužquin kuziz cjistanča. Jalla nuž zizzinča. Wejrnac zakaz Jesucristužquin kuz tjaachinča, Yooz yujcquiz zuma cjisjapa. Anaž jakziltami Moisés lii jaru kamchiž cjen Yooz yujcquiz zuma cjisnasača. Jalla nižtiquiztan wejrnac zakaz Moisés lii jaru kamchiž cjen, Yooz yujcquiz anapanž zuma cjisnasača.

¹⁷ Yooz yujcquiz zuma cjisjapa wejrnacqui Jesucristužquin kuz tjaachinča. Jalla nii kuz tjaaz oraqui, wejrnacqui yekja wajtchiz žoñinaca irata persun uj pajstantača, “Wejrnacmi zakaz ujchiztča”, cjicanaqui. ¿Jalla nuž wejrnacaž persun uj pajchiž cjen, Jesucristuqui wejrnac nižta ujchiz cjiskatjo? Anapanž cjesača. ¹⁸ Yooz yujcquiz zuma cjisjapa, Moisés lii ana walča. Jalla nuž wejrqui tjaajinčinča. Anziqui wejrqui wilta chiitasaž niiqui, “Moisés lii jaru kamchiž cjen Yooz yujcquiz zuma cjisnasača” jalla nižtiquiztan wejrqui juc'anti ujchizpan cjitasača. ¹⁹ Moisés lii mantuquiz kaman nii liiqui kjanapacha wejtquiz tjeeziča, wejrqui ujchizpantča, jalla nii. Jalla nižtiquiztan wejt persun uj pajžcu, Jesucristužquin kuz tjaachinča. Jalla nižtiquiztan Moisés lii quiztan liwriitača wejrqui, Yooztajapa kamzjapa. ²⁰ Jesucristuqui wejt ujnac laycu cruzquiz ch'awcta ticziča. Jalla nuž wejt ujnac laycu ticziž cjen, wejrqui niižtan chica ticzižtakaztča. Wejt tuqita ana zuma kamaña jaytichinča, jalla nižtiquiztan ew kamañchizza wejrqui. Pero anača wejt persun kamañchiz antiz Cristuž kamañchiz kamuča. Jaziqui tii muntuquiz žejtcan ew kamañchiz kamuča. Jesucristo Yooz Majchquin kuz tjaatiquiztan Jesucristuqui wejtquiz okziž cjen, wejt ticz cuntiquiztan ticziča. ²¹ Yoozqui žoñinacžquiz okžcu, Jesucristo cuchanžquichiča žoñinaca liwriizjapa. Liwriiñi Yooz taku anal nicz pecuča. Moisés lii jaru kamchiž cjen žoñinacaqui Yooz yujcquiz zuma cjissiž cjitasaž niiqui, Jesucristuqui inapankaz ticztasača. Anapanča nužuqui.

3

LIWRIIZ PUNTU

¹ Galat wajtchiz žoñinaca, ančhucča zumzužtakaz. ¿Jequit ančhuc incallchejo? ¿Jequit werar liwriiñi tawkquiztan ančhuc tsjii kjutñi chjitchejo? Liwriiz puntu paljaycan wejrnacqui Jesucristuž puntuquiztan kjanapacha ančhucacuz tjaajinčinča, Jesucristuqui žoñinacž ujnacquiztan cruzquiz ch'awcta ticziča, jalla nii. ² Tsjii pewcz pecuča. ¿Moisés lii jaru kamchiž cjen, Espiritu Santo ančhucacuz kuzquiz luzzikay? Anapanča. Jesucristužquin kuz tjaatiquiztan, nekztan Espiritu Santuqui ančhucacuz kuzquiz luzziča. Jalla niiqui nužupanča. ³ ¿Kjažtiquiztan anča zumzu ančhucjo? Espiritu Santuž cjen ančhucqui Yooz kamañquiz kami kallantichinčhucča. ¿Persun kuzcama kamcanaqui Yooztajapa tsjan zuma kamasajo? Anapanča. ⁴ ¿Jesucristužquin criezcu ančhucqui inakaz sufrichinčhuc cjes kjažtatajo? Ana inakaz ančhucqui sufrichinčhucžlani. ⁵ Yoozqui ančhucacuz kuzquiz niiž Espiritu Santo luzkatchiča. Nižaza ančhucacuz cheran Yoozqui milajrunaca paachiča. ¿Ančhucacuz Moisés lii jaru kamtiquiztan jalla nižta milajrunaca Yooz paachejo? Anapanča. Ančhucqui Jesucristuž puntuquiztan nonžcu catokchinčhucča. Jaziqui ančhucacuz Jesucristužquin kuz tjaatiquiztan Yoozqui ančhucacuz cheran milajru paachiča.

⁶ Abraham zakaz Yoozquin kuz tjaachitača. Jalla nuž tjaatiquiztan Yooz yujcquiz zuma cjiskattatača. ⁷Jalla nižtiquiztan jakziltat Jesucristužquin kuz tjaachaja, jalla niiqui ultim Abrahamž majchmaatiča. Jalla niic werar razunača. ⁸Yoozqui tuquitanpacha tuž tantiichiča, Jesucristužquin kuz tjaaňi žoňinaca Yooz yujcquiz zuma cjiskattaž cjesača, jalla nuž tantiichiča. Jalla nižtiquiztan tuquitanpacha liwriňi Yooz puntuqui Abrahamžquiz chitatača, tuž cjican: “Amiž cjen tjapa wajtquiztan žoňinaca zumaž cjiskattaž cjequiča”. Jalla nuž cjiča cjiřta Yooz takuqui. ⁹Jalla nižtiquiztan jakziltat Jesucristužquin kuz tjaachaja, jalla niiqui Abrahamžtan zuma cjiskattaž cjesača.

¹⁰Jakzilta žoňinacat Yooz yujcquiz zuma cjisjapa, Moisés liiquiz kuz tjaachaja jalla ninacaqui Yooziž castictaž cjequiča. Cjiřta Yooz takuqui tuž cjiča: “Jakziltat tjapa Moisés liiquiz mantitanac jaru ana zumpacha kamčhaja, jalla ninacaqui Yooziž castictaž cjequiča”. ¹¹Anaž jecmi Moisés lii jaru zumpacha kami atasacha. Jalla nižtiquiztan Moisés liiquiz kuz tjaatiquiztan anaž jecmi Yooz yujcquizi zuma cjisnasacha. Kjanapachača nii razunaqui. Cjiřta Yooz takuqui tuž cjiča: “Jakziltat Yoozquin kuz tjaatiquiztan Yooz yujcquiz zuma cjisnačhaja, jalla niiqui Yooztan kamaquiča”. ¹²Pero Moisés lii jaru kamcan, Yoozquin kuz tjaazqui ana walča. Moisés lii puntuquiztan Yooz takuqui tuž čičha: “Jakziltat Moisés lii jaru kamčhaja, jalla niiqui nii lii jaru kamtiquiztan Yooztan kamaquiča”.

¹³Pero anaž jecmi nii lii jaru zumpacha kamasacha. Jalla nižtiquiztan tjapa žoňinacaqui Yooziž castictaž waquiziča. Pero Jesucristuqui učum liwriičiča, Yooziž ana casticta cjejajo. Jesucristupacha učum cuntiquiztan casticta cjissiča. Cjiřta Yooz takuqui tuž cjiča: “Jakziltat cruzquiz ticznačhaja, jalla niiqui tjeeža, Yooziž castictaž, jalla nii”. ¹⁴Jesucristuqui yekja wajtchiz žoňinacž cuntiquiztan zakaz casticta cjissiča, ninaca Abrahamžtan Yooz yujcquiz zuma cjiskatzjapa. Nižaza Jesucristužquin kuz tjaachiž cjen Yoozqui tjapa učum kuznacquiz niž Espřitu Santo luzkatchiča, niž tuquita čhiita takucama.

MOISES LII PUNTU

¹⁵Jilanaca, cullaquinaca, tsjii puntul čhiyača. Tiiž nonžna. Tsjii zuma legali acuerduquiz luzta, nižaza jiliriž sillta, jalla nii documentuqui ana wira campiyasacha, nižaza ana nekz yapasacha, jiliri sillta jaru. ¹⁶Anziqui tii puntul čhiyača. Yoozqui taku tjaachiča Abrahamžquizimi niž majchquizimi. Yooz takuqui anaž cjiča, “Majchmaatinacžquizimi”, cjicanaqui. Anaž wacchi žoňinacž puntuquiztan čhiča. Antiz tsjii žoňž puntuquiztan tankaz čhičiča. Jalla nii žoňičha Cristuqui. ¹⁷Jalla tuž čhiyuča: Yoozqui Abrahamžquiz taku tjaachiča. Nekztan pusi patac quinsa tuncan watanacquiztan Yoozqui Moisesquiz niž lii tjaachiča. Jalla nii wiruň tjaata liiqui nii tuquita Abrahamžquiz tjaata taku anapanž ana walkatasacha. ¹⁸Moisés lii jaru kamčhiž cjen Yooz zumanaca tanžtaž cjitasaž niiqui, jalla nižtiquiztan Yooziž Abrahamžquiz tjaata taku anaž waltasacha. Pero panž walča. Yoozqui Abrahamžquiz nužukaz taku tjaachiča, žoňinaca liwriizjapa.

¹⁹Jalla nižtiquiztan, čhjuljapat Moisés lii sirwiya? Jalla tužuča. Moisesquiz nii liiqui tjaatatača, žoňinacž ujnaca tjeezjapa. Nižaza nii liiqui walatča, Jesucristuž tjonzcama. Jesucristuqui Abrahamž majchmaatquiztan tjonňiča. Nižaza niž puntuquiztan čhiča nii Yooziž Abrahamžquiz tjaata takuqui. Yoozqui anjilanaca cuchanžquičiča, niž lii Moisesquiz tjaazjapa. Nekztan Moisesqui parti žoňinacžquiz Yooz mantitanaca tjaajinčiča. ²⁰Moisesqui nii liižtan žoňinacžquiz mantičiča, žoňinaca nii lii cumplajo. Pero Yoozqui niž persun tjaata taku cumpličiča. Yooz alaja cumpličiča.

²¹Jalla nižtiquiztan, čkjaž cjii? ČMoisés liiqui Yooziž tjaata tawk quindra cjesaya? Anapanž cjesača. Anaž jecmi Moisés lii jaru zumpacha kamasacha, Yooztan wiňaya kamzjapa. Jalla nii lii jaru žoňinaca kamtasaz niiqui, Yooz yujcquiz zuma cjitasača, nii lii jaru kamtiquiztan. ²²Pero cjiřta Yooz takuqui tuž cjiča: “Tjapa žoňinacaqui uj paachiž cjen castictaž cjequiča”. Jalla nuž cjenami, Jesucristužquin kuz tjaaňi žoňinacaqui Yooziž tjaata taku tanznasacha, ana casticta cjisjapa, Yooztan wiňaya kamzjapa.

²³ Ima Jesucristuž puntuquiztan zizcan učumqui Moisés lii mantuquiz želatčha. Nižaza nuž žejlchinčhumtačha Jesucristužquin kuz tjaazcama. ²⁴ Jalla nižtiquiztan Moisés lii mantuquiz želatčha učumqui, Jesucristuž tjonzcama. Nekztan Jesucristužquin kuz tjaatiquiztan Yooz yujcquiz zuma cjissinčhumčha, nižaza ana ujhiz. ²⁵ Anziqui žoñinacaqui Jesucristuž puntuquiztan zizasachha. Jalla nižtiquiztan učumnacqui Moisés lii mantuquiz žejlžqui žeržtačha.

²⁶ Jesucristužquin kuz tjaatiquiztan tjapa ančhucqui Yooz partiquiz žejlčha, Yooz maati-nacčhucčha. ²⁷ Jakzilat Jesucristužtan tsjii kuzziz cjiscu bautista cječhaja, jalla niiqui Cristuž partiquiz cjišičha. Nižaza ew kamañchiz cjissa. ²⁸ Cristuž partiquiz žejlcan, anaž t'aka t'aka žejlčha. Judío žoñinacami, yekja wajtchiz žoñinacami, žoñž mantuquiz žejlñi žoñinacami, ana žoñž mantuquiz žejlñi žoñinacami, luctakami, maatakami, jalla tjapa žoñinacaqui Jesucristuž partiquiz žejlcan Yooz yujcquiz tsjii parijučha. Nižaza tsjii t'akquizkazza. ²⁹ Nižaza Cristuž partiquiz želaquiz niiqui, ančhucqui Abrahamž ultim lijitum majchmaatinacčhucčha. Nižaza ančhucqui Abrahamž lijitum majch maatinacažljaj niiqui, ančhucqui Yooziž Abrahamžquiz tjaata taku tsjii irinsažtakaz tanznaquičha, Yooz-tan wiñaya kamzjapa.

4

UČHUMNACAQUI YOOZ MAATIČHUMČHA

¹ Nii irinsa puntu tii zakaz chiiz pecučha. Tsjii irinsa tanzñi ocjalaqui žoñi pajkzcama anaž irinsa tanznasachha. Ocjala cjicanaqui nii famillžquiz piyunažtakaz kamčha. Pajkžcu, nekztan tjapa nii famillž cusasanaca nižtacama želaquičha. ² Nii ocjalaqui famillž mantuquiz tjižta žejlčha, nižaza nižž irinsaqui yekja žoñžquiz cwtižinajo cumpjiitačha, irinsa tanz oracama. ³ Jalla nižta iratačha učumnacaqui. Tuquiqui učumqui ocjalažtakaz kamcanaqui žoñiž pinsita jarukaz kamatčha. ⁴ Yooziž pinsita timpu irantižcu Yoozqui nižž Majch cuchanžquichičha. Nekztan tsjaa maatakquiztan majttatačha, nižaza Moisés lii mantuquiz želatčha. ⁵ Jalla nuž Yoozqui nižž persun Majch cuchanžquichičha učumnaca Moisés lii mantuquiztan liwriizjapa, nižaza Yooz maati cunta cjisjapa.

⁶ Ančhucaž Yooz maati cjicanaqui Yoozqui nižž Majch Espíritu Santo ančhuca kuzquiz cuchanžquichičha. Espíritu Santuqui ančhuca kuzquiz Yooz Ejpžquin cjuñzkatčha, “Wejt Tata” cjican. ⁷ Jalla nižtiquiztan Yooz cjen ančhucqui Moisés lii mantuquiz anaž iya žejlčha. Yooz maati cjican, Yooz tjaata irinsa tanznaquičha.

PABLUQUI CRIICHI ŽOÑINACŽQUIZ ANCHA CJUŇČHA

⁸ Tuqui ančhucqui werar Yooz anaž pajatčha. Antiz žoñiž pinsita yooznacž mantuquizkaz želatčha. Nii yooznacaqui anaž ultimu Yoozza, žoñiž pinsitiquiztankazza. ⁹ Anziqui ančhucqui werar Yooz pajčha. Primiraqui Yoozqui ančhuc maati cunta pajčičha. Jalla nuž Yooz maati cunta cjiscu, žkjaž ančhucqui žoñiž pinsita yooznacquin wilta cutasajo? ¿Nii yooznacž mantuquiz wilta cjis pecjo? Nii yooznacaqui ana azzizza; nižaza inakazza. ¹⁰ Ančhucqui tirapan tjuñinacžquizimi jiižnacžquizimi oranacžquizimi watanacžquizimi rispitiñchucčha. Jalla nižta rispitzqui anaž waquizičha. ¹¹ Jalla nuž rispitan wejtla ančhucaquiz tjaajinzqui inapankaj cjičhani. Jalla niil jiwjatučha.

¹² Jilanaca, cullaquinaca, ančhucaquiz rocučha, wejržtapachaž cjisajja, Moisés lii mantuquiztan liwriita, jalla nižta. Wejrqui ančhuc yekja wajtchiz žoñižtakaz cjissinčha judío cuzturumpinaca ana paažcu. Ančhucqui wejr zuma risiwchinčhucčha, ana čjul wejt quintra kjaž cjiscu. ¹³ Ančhucqui zizza, primeraqui wejr laacjichiž cjen ančhucatan kamchinčha. Nižaza ančhucatan kamcan, liwriiñi Yooz puntu paljaychinčha. Jalla nii zizza ančhucqui. ¹⁴ Jalla nii cona laacjitaqui wejttajapa tsjii pruebatačha. Jalla nižta weriž laacjitiquiztan ančhucqui ana wejr inarchinčhucčha, nižaza wejr ana jakjurpayz pecchinčhucčha. Antiz wejr ancha zuma risiwchinčhucčha, tsjii Yooz cuchanžquita anjilažtakaz. Nižaza Jesucristužtakaz wejr zuma risiwchinčhucčha. ¹⁵ Weriž ančhucatan kamchiž cjen ančhucqui zuma cuntintu sint'ichinčhucčha. Jaziqui ančhucaquiz, žkjažt cjisjo? Wejrqui declaručha, ančhucatan kamcan, ančhucqui attasaž niiqui, persun čhujcquimi lecžcu

wejtquiz tjaatasácha. ¹⁶ Wejrqui ančhucaquiz werar razunanaca chiichinča. Jalla nuž chiitiquiztan, žančhucqui wejt quintra cjissinčhucjo?

¹⁷ Nii ana werar razuna chiiñi žoñinacaqui ančhuc ančaž importayča. Jalla nuž importaycan ninacaqui ančhuc ana zuma cjiskatz pecča. Wejtnacaquiztan t'akskatz pecča, ninacž partiquiz cjsjapa, nižaza ninacž honora waytiskatzjapa. ¹⁸ Tsjii žoñiqui yekja žoñžquiz tsjan zuma kamañchiz cjiskatz pecasača. Jalla nuž peccanaqui nii žoñžquiz ancha importayasácha. Jalla nižta importayzqui ancha zumača. Tjapa žoñinacaqui ančhucaquiz nižtaj paala. Anača wejrkaz, ančhucatan kamcanaqui, ančhuc importayz waquiziča. ¹⁹ Zuma jilanaca, cullaquinaca, ančhucaltajapa wilta wejt kuzquiz ancha cjuñuča. Nižaza wejrqui ančhucaltajapa tiral cjuñuča ančucaž Cristuž kamañchiz zuma kamzcama. ²⁰ Wejrqui ančhucatan chical žejlz pecuča. Jalla nuž ančhucatan žejltasaž niiqui, juc'ant zuma carinchiz razuna chiižintasača. Ančuca quintu nonžcu wejrqui kuz turwayskatchinča.

ABRAHAMŽ MAATIŽ PUNTU

²¹ Ančhucqui Moisés lii mantuquiz kamz pecñinaca, žnii lii mantuquiz kamzqui ana intintiya? ²² Cjijrta Yooz takuqui tuž cjiča: Abrahamqui pucultan majchnacchizza. Tsjiiqui Abrahamž mantita piyunaž majttača. Tsjiižti Abrahamž zalžta tjunaž majttača. ²³ Piyunaž majtta majchqui žoñiž pinsita kuzcama majttatača. Tjunaž majtta majchzti Yooz tjaata tawk jaru majttatača. ²⁴ Nii pucultan maatakuiztan tuž cjiča. Yoozqui pizc wilta taku tjaachiča. Tsjiiqui Sinaf cjita curquiz Yoozqui Moisesquiz mantita lii tjaachiča. Jakziltat nii lii mantuquiz žejlčhaja, jalla niiqui nii lii jaru kamstanča. Tsjaa maatakuiztan nii puntu cjiča. Naa maatakaqui Agar cjititača. ²⁵ Agar cjitiquiztan Sinaf curu cjiča. Sinaf curuqui Arabia yokquin žejlča. Sinaf curquiztan Jerusalén watja cjiča. Jerusalén wajtchiz žoñinacami, nižaza tjapa judío žoñinacami Moisés lii mantuquiz žejlča. ²⁶ Učhumzti anaž Moisés lii mantuquiz žejlča. Yooziž liwriitiquiztan ultim arajpach Jerusalén wajtchiz žoñinacčhumča. Jalla nii Jerusalenqui Yooz watjača.

²⁷ Cjijrta Yooz takuqui tuž cjiča:

“Ana majtñi maataka, cuntintuž cjee. Majtz sufris ana pajžcumi, alto tawkžtan Yooztajapa honora waytila. Ecta maatakaqui juc'ant majchmaatinacchiz cjequiča ana ecta maatakuiztan”.

²⁸ Jilanaca, cullaquinaca, jaziqui učhumqui Yooz tjaata tawk jaru Yooz maatinacčhumča, Isaac cjita žoñižtakaz. ²⁹ Abrahamž pucultan majchnacžquiz tižta watchiča. Nii žoñiž kuzquiztan pinsita majttaqui quintratača nii Yooz Espiritu Santuž cjen majtta majchjapa. Anzimi nižta iratazakazza. ³⁰ Cjijrta Yooz takuqui tuž cjiča: “Naa piyuni majchtanpacha chjatkata. Naa piyunaž majtta majchqui anaž irinsa tanznaquiča. Antiz zalžta tjunaž majtta majch, jalla niikaz irinsa tanznaquiča”. ³¹ Jilanaca, cullaquinaca, učhumqui anača naa piyunaž majtta maatinacažtakazqui. Antiz zalžta tjunaž majtta maatinacažtakazčhumča. Učhumqui lijitum Yooz maatinacčhumča.

5

LIWRIIZ PUNTU PALJAYTA

¹ Jesucristuqui učhum liwriichiča, Moisés lii mantuquiz ana iya kamzjapa. Jesucristužquiz tjup kuzziz cjee. Anača nii lii mantuquiz iya kamzqui.

² Wejr Pabluqui ančucaquiz cjiwča, ančhucqui judío chimpu cuzturumpi jaru paaquiči niiqui, jalla nižtiquiztan ančhucaltajapa Cristuqui inakaz cjequiča. ³ Wejrqui tii puntu ticlaruča, jakziltat Yooz yujcquiz ana ujchiz cjsjapa Moisés lii jaru persuna chimpuskatčhaja, jalla niiqui tjapa nii lii mantitanaca cumplistanča. ⁴ Ančhucqui Moisés lii jaru Yooz yujcquiz ana ujchiz cjis pecčhaj niiqui, Cristužquiztan persunpachaž t'aksa. Nižaza liwriiñi Yooz kamañquiztan persunpachaž t'aksa. ⁵ Yooz Espiritu Santuž cjen, nižaza Jesucristužquiz kuz tjaachiž cjen, učhumqui Yooz yujcquiz ana ujchiz nižaza zuma kamañchiz, jalla nii tjapa kuztan tjewža. ⁶ Jesucristuž partiquiz žejlcan žoñinacaqui tsjii parijuča. Judío chimpuchiz cjenami ana judío chimpuchiz cjenami anaž importiča.

Antiz Jesucristužquiz kuz tjaaž importiča. Nižaza kuz tjaažcu zuma munaziñi kuzziz cjis importiča.

⁷ Ančhucqui zumaž kamatčha. Jalla nuž zuma kaman, jject ančhuc atajchejo werar tjaa jintanaca ana cazjapajo? ⁸ Jalla nii atajñiqui anačha Yoozquiztan. Yoozqui ančhuc kjawzičha, liwriita cjisjapa. ⁹ Jaknužt tsjii zkoluc liwatura tjapa t'anti maza t'amkatčhaja, jalla nižta irata zkoluc ana zuma tjaañinacaqui tjapa ančhuc tsjii kjutñi chjichasačha.

¹⁰ Jesucristo Jiliriž cjen wejrqui ančhucaquiztan anal kuz turwayskatučha. Ultimquiziqui jaknužt wejrqui Yoozta kamañ puntu pinsučhaja, jalla nužzakaz ančhucqui Yoozta kamañ puntu pinsaquičha. Nižaza jakziltat ančhuca kuz turwayskatčhaja, jalla niiqui casticta cjequičha, jakziltapirimi.

¹¹ Jilanaca, cullaquinaca, tuquiqui ima Jesucristužquiz kuz tjaacan, wejrqui tjaa jinchinčha, judío chimpuchiz ana želaquič niiqui, Yooz yujquiziqui anapanž zuma želasačha. Jalla nuž tira tjaa jintasaž niiqui, žkjažtquiztan wejt quintra ancha tanjo? Jalla nuž tjaa jintasaž niiqui, Jesucristuž ticz puntuquiztan tjaa jincanpacha ana wejt quintra tanasačha. Pero jalla nižta ana tjaa jinchinčha. ¹² Ančhuca kuz turwayskatñinacaqui persun janchej pootpootžla.

¹³ Jilanaca, cullaquinaca, Yoozqui ančhuc kjawzičha Moisés liiquiztan liwriita cjisjapa. Jalla nuž liwriita cjan, anaž persun kuzcamakaz kamz waquizičha. Antiz zuma munazican porapat yanaparassa. ¹⁴ “Jaknužt persunpachquiz zuma okzaja, jalla nižta irata parti žoñinacžquiz zuma okzpančha”. Jalla nuž kamcan tjapa Moisés liiqui cumplissa. ¹⁵ Pero ančhucqui porapat chjaawjwasaquič niiqui, nižaza porapat ch'aasaquič niiqui, jalla nižtquiztan tsjiimi tsjiimi aksnaquičha.

ESPIRITU SANTUŽ IRPITA KAMZ

¹⁶ Wejrqui cjiwčha, ančhucqui Yooz Espiritu Santuž irpita kama. Nekztan persun ana zum kuzquiz pectanac jaru ana kamaquičha. ¹⁷ Nii ana zum kamañiqui Espiritu Santuž pecta kamañ quintračha. Nižaza Espiritu Santuž pecta kamañiqui nii ana zum kamañ quintračha. Nii picz kamañiqui anačha tsjiikazqui, antiz pisc punta kamañičha, zuma kamaña, ana zuma kamaña, jalla nii. Jalla nižtquiztan nii ana zuma kamaña pecñi kuzqui ančhuc atajčha zuma kamañ jaru ana kamzjapa. ¹⁸ Pero ančhucqui Espiritu Santuž irpitaž cjequič niiqui, anačha lii mantuquiz žejlžqui.

¹⁹ Nii ana zuma kamaña pecñi kuzqui jalla tižta paaz pecčha: adulterio paaz, yekja maatakžtan yekja luctakžtan ana wali paaz, azzucanaca paaz, ²⁰ žoñiž paata yooznacžquiz sirwiz, žoñž quintra laykiz paaz, žoñž quintra chuchas, žoñžtan ch'aas, iniziz, čh-jaawjkatas, persun kuzcamapankaz paaz, t'aka t'aka cjiyas, tsjii partiquiztan tsjii partiquiztan quintras, ²¹ zmaz, žoñi conz, licz, ana wira wali pijjsta paaz, jalla nižta ana zumanaca paaz pecčha nii ana zuma kamaña pecñi kuzqui. Tuquiqui wejrqui ančhucaquiz chiižinčinčha, ana nižta paazjapa. Wilta ančhucaquiz chiižinučha, anapan nižtanaca paaz waquizičha. Jalla nižta paañi žoñinacaqui werar Yooz mantuquiz ana žejlčha.

²² Espiritu Santuž kamañ jaru kamcan, jalla tižtanaca paasa: zuma munaziz, cuntintu cjis, llan kuzziz cjis, pazinziz kuzziz cjis, okzñi kuzziz cjis, zumanaca paaz, litituma kamz, ²³ humilde kuzziz cjis, ana zuma pecñi kuz persun kuzquiz ewjaz. Jalla nii zuma paatanacaqui anapančha lii quintraqui. ²⁴ Nižaza jakziltat Cristuž partiquiz žejlčhaja, jalla ninacaqui nii ana zuma paaz pecñi kuz mantuquiz ana kamz waquizičha. Nii ana zuma pecñi kuzquiztan ticzi žoñižtakazza. Nižaza nii ana zuma pinsitanac jaru ana kamz waquizičha. ²⁵ Učhumqui Espiritu Santuž cjen liwriitažlaja nižaza ew kamañchizlaja, jalla nižtquiztan učhumqui Espiritu Santuž cjen nii zuma kamañ jaru pan kama.

²⁶ Jalla nii zuma kamañ jaru kamcan učhumqui ana mitarazi kuzziz cjistančha. Nižaza ana žawjwa zjjicanñi kuzziz cjistančha. Nižaza anaž porapat zmazastanqui.

¹ Jilanaca, cullaquinaca, yekjap ančhucqui Espíritu Santuž kamañchiz kamiñchucča. Jaziqui ančhucqui tsjii criichi žoñi uj paañipacha cheraquiž niiqui, zuma kuztan chiižinaquiča, nii uj paañi žoñi wilta zuma kamañchiz cjeýajo. Nižaza ančhucqui persun kuzqui zuma cwitaza, ujquiz ana tjojsjapa. ² Pruebanacaž watan, ančhucqui porapat kuzzassa. Jalla nuž kamcan ančhucqui Cristuž lii cumpliča, zuma munaziz, jalla nii. ³ Jakziltat persun puntuquiztan mit kuzziz “Wejrqui zumtča” cjican pinsačhaja, jalla niiqui persunpacha incallča. Anaž zumača niiqui. ⁴ Zapa mayni persun kamtanaca tantiistanča, zuma ana zuma kamta, jalla nii. Jakziltat zuma kamchižlaj niiqui, cuntintuž cjesača, persuna zuma kamañ cjen. Criichi žoñinacaqui yekja žoñž kamaña inaržcu, anaž mitarazi kuzziz cjis waquiziča, “Wejrqui juc'ant zuma kamañchiztča” cjican. ⁵ Ultimquiziqui zapa mayni persun kamañquiztan jama Yooziž tantiitaž cjequiča.

⁶ Yooz puntu tjaajinta žoñiqui persun cusasanacquiztan tjaaz waquiziča Yooz puntu tjaajinacžquiz.

⁷ Ančhucqui persun kuzquizpacha anača incallzqui. Yoozquiztan ana atipasača. Jaknužt tsjii žoñi kamčhaja, jalla niit jama pjalžtaž cjequiča. ⁸ Jakziltat persun kuzcamakaz kamčhaja, jalla niiqui niiz ana zuma kamtiquiztan castictaž cjequiča. Nižaza jakziltat Espíritu Santuž kamañ jaru kamčhaja, jalla niiqui Espíritu Santuž cjen Yooztan wiñayaž kamaquiča. ⁹ Učhumqui zumanaca paazjapa tjurt'ila. Ultimquiziqui pactaž cjequiča, ana jaytasaz niiqui. ¹⁰ Jalla nižtiquiztan čjulora zumanaca payi atchucaž cjequiž niiqui, učhumqui zumaž paala tjapa žoñinacžquizimi. Criichi mazinacžquizimi juc'ant zuma paala.

ŽERZ TAKUNACA

¹¹ Anziqui wejt persun kjaržtan cjjiržcuča. Tii pajk litranaca chera. ¹² Tsjii žoñinacaqui ančhuc judío chimpuchiz cjis Katz pecča. Jalla ninacaqui nuž pecča, parti žoñinacž kuz wali cjis Katzjapa, nižaza parti žoñinacž ninacžjapa ana quintra cjisjapa. Cristuqui cruzquiz ticziča učumnaca liwriizjapa, judiž irata ana chimputa cjenami. ¹³ Pero nii chimputa žoñinacapacha Moisés lii jaru ana zumpacha kamča. Ninacaqui ančhuc chimpuchiz cjis Katz pecča, ančuca janchiquiz chimpuchiz cjen persun incantiñi kuzziz cjisjapa. ¹⁴ Wejrqui anača čjulquiztanami incantiñi kuzziztqui. Jesucristo Jiliriz učhum laycu ticziquiztan, jalla nektankazza wejrqui incantiñi kuzziztqui. Jesucristuž ticziž cjen wejrqui liwriitača. Jalla nižtiquiztan tii muntuquiz žejlñinacaqui anaž wejr ancha importayuča. Ninacžquiztan ticzi žoñižtakaztča wejrqui. ¹⁵ Jesucristuž partiquiz žejlcen, judío chimpuchiz cjisqui anaž importiča, nižaza ana chimpuchiz cjisimi ana zakaz importiča. Ew kamañchiz cjisqui jalla niikaz importiča. ¹⁶ Jakziltat ew lii kamañ jaru kamčhaja, jalla ninacaqui ultim werar Yooz partir žoñinacača. Jalla ninacžtan Yooztan zumaj cjila, nižaza Yoozqui ninacžquiz okžla.

¹⁷ Tekztan nawjčchuc tii puntunacquiztan ana jecmi wejtquiz molestila. Jesucristo Jiliržtajapa kamchiž cjen wejt janchiquiz chjojrínaca zejlča. Nii chjojrínaca kjanapachaž tježa, “Wejrtča Jesucristuž partiquiztqui”, jalla nii. Anzama nii chjojrínacaqui wejt janchiquiz cherčučača.

¹⁸ Jilanaca, cullaquinaca, učhum Jesucristo Jiliriqui ančuca kuznaca walikaj cjis Katla. Jalla nužoj cjila. Amén.

LA CARTA DEL APOSTOL SAN PABLO A LOS EFESIOS

¹ Wejrťcha Pablutqui, anćhucaquin tii cartal cjiŗřcućha. Wejrqui Jesucristuŗ illta apostoltćha Yooz munańpi jaru. Anćhucqui Yooz partir ųońinacćhucćha, Efeso wajtquiz kamńinaca. Niźaza anćhucqui Jesucristuŗquin kuz tjaachi ųońinacćhucćha. ² Ućhum Yooz Ejpmi, ućhum Jesucristo Jilirimi anćhucaquiz zumaj yanapla, niźaza anćhucaquiz cuntintu kuzziz walikaj kamkatla.

YOOZ EJPQUI UĆHUMNACALTAJAPA ZUMA PINSIĆHA

³ Ućhum Jesucristo Jilirŗ Yooz Ejpťtajapa honoral waytućha wejrqui. Ućhum Yooz Ejpqui ućhumnacaquiz ancha zuma favoranaca paachićha, Jesucristuŗ partiquiz cjiskatchiŗ cjen. Ućhumqui arajpach Yooz wajtchiz ųońinacćhumćha. Jalla niŗtiquiztan tјapaman favoranaca ućhumnacaquiz paachićha Yooz Ejpqui. ⁴ Tuquitanpacha ima tii muntu kalltican Yooz Ejpqui Jesucristuŗ cjen ućhumnac illzićha, niŗťtajapa t'acŗta cjisjapa, niźaza niŗ yujcquiz ana ujchiz niźaza zuma cjisjapa. ⁵ Yoozqui niŗ okŗńi kuzziz cjen, tuquitanpacha tantićhićha, ućhumnaca niŗ partiquiz cjisjapa, niŗ maatinacјapa. Jesucristuŗ cjen ućhumqui Yooz maatinacćhumćha. ⁶ Niźaza Yooz Ejpqui niŗ ancha okŗńi kuz tjeezićha, niŗ persun honora waytita cjisjapa. Niŗ k'ayi Majchiŗ cjen ućhumnacaquiz nuŗukaz walja okŗićha Yooz Ejpqui. ⁷ Jesucristuŗ ticziŗ cjen, Yoozqui ućhum liwriićhićha. Jalla nuŗ liwriiŗcu ućhum uјnaca pertunchićha, niŗ zuma okŗńi kuzquiztan. ⁸ Yoozqui ućhumnacaltajapa niŗ okŗńi kuz walja tjeezićha, zuma favoranaca paacan. Jalla nuŗ zuma favoranaca paacan, Yoozqui ućhumnacaquiz tјapa niŗ puntunaca intintazńi cjiskatchićha. ⁹ Niźaza Yoozqui niŗ tuquita chјojta pinsitanaca ućhumnacaquiz zizkatchićha. Niŗ kuzcama pinsita jaru, jalla nuŗ ućhumnacaquiz zizkatchićha. ¹⁰ Yoozqui niŗ pinsita tјuńquiz niŗ persuna pinsitaqui cumpliskataquićha. Jalla niŗ pinsita jaru Yoozqui tјapa arajpachquin ųejlńinacami, niźaza tјapa tii yokquiz ųejlńinacami tјappachaŗ juntјapaquićha, Cristuŗ mantuquiz cjisjapa.

¹¹ Jesucristuŗquin kuzziz cjen wejrnac judío ųońinacaqui t'acŗtaćha. Yoozqui persun kuzcama pinsita jaru nuŗ wejrnac t'acŗićha. Yoozqui tјapa niŗ pinsitacama cumpliskatćha. ¹² Wejrnacqui anćhucŗ tuqui Jesucristo tјewzićha. Wejrnacqui t'acŗta cjissinćha, zuma kamјjapa. Nekztan wejrnaćaŗ zuma kamtiquiztan Yooztajapa juc'anti honora waytitaŗ cјequićha. ¹³ Niźaza anćhucqui werar Yooz taku nonŗcu Jesucristuŗquin kuz tјaachinćhuczakazza. Jalla niŗtiquiztan liwriita cjissinćhuczakazza. Nekztan Cristuŗ partiquiz ųelan, Yoozqui niŗ Espńritu Santo anćhuca kuznacquiz luzkatchićha. Tuquitanpacha Yoozqui niŗ Espńritu Santo cuchanŗquizjapa taku tјaachićha. Niźaza Espńritu Santuqui anćhuca kuzquiz ųejlťiquiztan, anćhuca kuzquiz Yooziŗ chimputapanćha. Nii kјanapacha tjeeŗa, anćhucqui Yooz partir ųońinacćhucćha, jalla nii. ¹⁴ Espńritu Santo ućhumnaca kuzquiz cjen, ućhumqui zizza, ultimpacha arajpach Yooz irinsa tanznaquićha. Čјjulorat tјapa Yooz partir ųońinaca liwriita cјećhaja, jalla nii ora nii irinsa tanznaquićha. Tјapa niŗta zumanaca ućhumnacaltajapa pinsićhićha Yoozqui, niŗťtajapa juc'ant honora waytita cjisjapa.

PABLUŗ MAYIZITA

¹⁵ Jilanaca, cullaquinaca, anćhuqui Jesucristo Jilirŗquin kuzzizpanćha, niźaza parti criićhi ųońinacŗtan zuma munazińi kuzzizpanćha. Jalla niŗta zizcu, ¹⁶ wejrqui anćhucaŗ cjen tirapan Yoozquin sparaquiz ćjiwćha. Niźaza Yoozquin mayizican anćhucaltajapa mayizućha, anćhuc Yooz puntu zuma zizńi cjisjapa. ¹⁷ Ućhum Jesucristo Jilirŗ Yooz Ejpťquinpan mayizućha. Yooz Ejpqui juc'ant chekan honorchizza. Anćhucaltajapa mayizućha, Yooz anćhucaquiz tsјii zizńi kuzziz cjiskatajo, niźaza mayizućha Yooziŗ tjeeŗtanaca intintazńi kuzziz cjiskatajo. Jalla niŗta kuzziz kamaquiz niiqui, juc'anti Yooz puntunaca zizńi cјequićha. ¹⁸ Niźaza juc'anti Yooz puntunaca intintazńi kuzziz cјequićha.

Zuma intintazni cjequiz niiqui, arajpachquin kamz puntu juc'anti zizaquičha. Yoozqui ućhumnaca kjawzičha, arajpachquin kamzjapa. Jalla nicju kamzjapa ućhumqui tjewža. Arajpachquin Yooztan kamzqui juc'ant ancha zuma wali irinsažtakazza. Jalla nii irinsa Yoozqui tjapa niiz partir žoñinacžquiz tjaaquičha. ¹⁹Nižaza wejrqui mayizučha, anćhucqui Yooz aziž puntuquiztan juc'anti intintazjapa. Ućhum Yoozqui juc'ant walja azzizza, ćhjulatakquiztanami. Niiz aztan Yoozqui ućhum kuznaca campiiskatćhičha, ew kamañquiz kamzjapa. Yoozqui niiz jacatatskatni aztan ućhum kuznaca campiichičha. ²⁰Yooz Ejpqui niiz walja azi tjeezičha, Jesucristo ticziquiztan jacatatskatcan. Nižaza niiz aztan tjeezičha arajpachquin niiz žew latuquiz Jesucristo tjułžcan, niiztan chica mantizjapa. ²¹Yoozqui tjappacha Cristuž mantuquiz utćhičha, tjapa jilirinacami, tjapa mantiñinacami, tjapa mantiñi poderchiznacami, tjappacha Cristuž mantuquizcama ućtačha. Tii timpuquiz žejlñinacami, nižaza jazta timpuquiz tjonni mantiñinacami tjappacha Cristuž mantuquiz ućtačha. ²²Yoozqui mantichičha tjappacha Cristuž mantuquiz cjisjapa. Nižaza Yooziž mantiquiztan nii tjapa mantiñi Cristuqui niiz icliz žoñinacžtajapačha. ²³Cristuž partir žoñinacaqui niiztan tsjii kuzziz žejlčha, nižaza tsjii curpuchiztakazza. Tjapa Cristuž partir žoñinacaqui Cristuž kamañchizpankazza. Nižaza Cristuž cjen tjapa ćhjulakimi tii muntuquiz žejlčha.

2

YOOZ OKŽNI KUZIZ CJEN ŽOÑINACAQUI LIWRIITAČHA

¹Jaziqui Yoozqui anćhucaquiz ew kamañchiz cjiskatćhičha. Tuquiqui anćhucqui Yooz yujcquiziqui ticzi žoñinacažtakaz želatčha ujnaca paachiž cjen, nižaza ana walinaca paachiž cjen. ²Jalla nuž ana wali ujnaca paacan, anćhucqui kamačha ućhiz žoñinacž kamañ jaru. Nižaza ana wali paacan, zajranacž jilirž kuzcamakaz kamačha. Jakziltat ana Yooz kuzcama kamačhaja, jalla niiqui zajranacž jilirž kuzcamapankaz kamačha. Nii ana wali zajra jiliriqui žoñinacžquiz ana wal kamañchiz cjiskatćha. ³Tuquiqui ućhumqui ana wal kamañchiz zakaz kamačha, Yooz kuzcama ana kamcan. Ućhumqui persun kuzcamakaz kamačha. Nižaza ućhum ana wali pecni kuz jaru kamačha. Nižaza ućhum ana wali pinsitanacž jaru kamačha. Jalla nižtiquiztan ućhumqui Yooz casticta cjichucapantačha, jaknužt Yoozqui parti ućhiz žoñinaca casticačhaja, jalla nižta. ⁴Jalla nižta ana wali kamanami, Yoozti zuma okžni kuztan ućhumnacaquiz okzičha. Nižaza ućhumnacatan munazičha. ⁵Nuž zuma okžni munaziñi kuzziz cjen, Yoozqui ućhumnacaquiz Cristužtan zuma kamañchiz cjiskatćhičha. Yooz okztiquiztankaz anćhucqui liwriitačha. Tuquiqui uj paachiž cjen, ućhumqui Yooz yujcquiziqui ticzi žoñinacažtakaztačha. ⁶Jaknužt Jesucristuqui ticžcu Yooz aztan sepulturquiztan ulantćhaja, jalla nižta irata ućhumqui Yooz aztan ana wal kamañanacquiztan ulanchinćhumčha. Nekztan Cristužtan tsjii kuzziz cjen Yoozqui ućhumnacaquiz Cristužtan chica honorchiz cjiskatćhičha. ⁷Jalla nuž Yoozqui cjiskatćhičha, wiñayjapa niiz ancha zuma okžni kuz tjeezjapa. Jesucristuž cjen Yoozqui ućhumnacaquiz zuma kuztan munazicha. ⁸Yooz okžni kuzziz cjen, nižaza anćhucaž Jesucristužquin kuz tjaachiž cjen, anćhucqui liwriitačha. Jalla nii liwriitaquui anača anćhucaž cjenaqui. Antiz Yooz cjenpankazza nii liwriitaqui. Jalla niičha anćhucaquiz liwriiz tjaachiqui. ⁹Anćhucaž paata obranacquiztan nii liwriiziqui anaž tjončha. Jalla nižtiquiztan anaž jecmi mit kuzziz cjesačha. ¹⁰Ućhumqui Yooz obranacćhumčha. Jesucristužquin kuz tjaachiž cjen Yoozqui ućhum liwrichičha, zuma kamañchiz cjisjapa. Yoozqui jalla nižta zuma kamañanaca ućhumnalcatajapa tantiižinčhičha, ima niizquiz criiñiž cjen. Jalla nii kamañanaca tantiižinčhičha, ućhum zuma obranaca paazjapa.

TUQUI ANĆHUCQUI ANATAČHA YOOZ ŽOÑINACA

¹¹Anćhucqui jalla tuž cjuñzna. Anćhuqui anača judio žoñinaca. Chimputa judio žoñinacaqui anćhuca puntuquiztanž cjičha, “Ninacaqui janchiquiz ana chimputačha. Jalla nižtiquiztan anaž Yooz partir žoñinaca cjesačha”. Jalla nuž cjiñičha. Nii judionacačha curpuquiz chimputaqui, “Yooz illzta žoñi” cjican tjeezjapa. Žoñiž chimputačha nii judio žoñinacaqui. ¹²Nižaza cjuñzna. Tuquiqui anćhucqui ana Cristo pajiñćhuctačha.

Nižaza Israel wajtchiz žoñinacžquiztan yekčhuctača. Nižaza ančhucqui Yooziž tjaata takunaca anaž pajatča. Ujnacquiztan liwriita cjisjapa ana tjewzñi atatča. Tii muntuquiz kamcan ančhucqui anapan werar Yooz pajatča. ¹³ Pero anziqiu Jesucristužquin kuzziz cjen ančhucqui Yoozquin macjatchinčhucča. Tuquiqui ančhucqui Yoozquiztan ažkquin želatča. Cristuž ticziž cjen, ančhucqui Yoozquin macjatskattača. ¹⁴ Cristuž cjen učumnacatan Yooztan pajaskatchiča. Nekztan zumanskatchiča. Nižaza učumnacatan parti criichi žoñinacžtan zumanskatchizakazza. Cristuquiu judío žoñinacami ana judío žoñinacami tsjii partiquizkaz tjappacha cjiskatchiča, nižquin criichiž cjen. Tuquiqui judío žoñinacaquiu yekja wajtchiz žoñinacžtan quintrapanikaztača. Nižaza yekja t'akapanž nayatča. Pero anziqiu Yooz partiquiz cjian criichi žoñinacaquiu tsjii-ikazza. ¹⁵ Cristuquiu curpuchiz cjian Yooziž mantita lii liwž cumpližcu ticziča. Jaziqui Cristuž ticziž cjen Yoozquiu nii tuquiu timpuquiztan kamchi lii tuct'ayskatchiča, tjapa niž mantitanacžtanpacha. Jalla nekztan Yoozquiu judío criichi žoñinacami ana judío criichi žoñinacami tjappacha tsjii ew partiquiz cjiskatchiča. Nii ew partiquiz žejlcan, judío žoñinacžtan yekja wajtchiz žoñinacžtan ana iya quintrasñi cjesača. ¹⁶ Nižaza cruzquiz ch'awcta ticziž cjen, Jesucristuquiu judío žoñinacžtanami yekja wajtchiz žoñinacžtanami pertunaskatchiča. Jaziqui Jesucristuž cjenkazza nii pucultan quintrasñi žoñinacžtan Yooztan zuma cjiskatchiču. Nižaza nii pucultan quintrasñi žoñinacaquiu tsjii partiquizkaz kamasatča, zuma munazican.

¹⁷ Nižaza Jesucristuž tjonchiž cjen, Yoozquiztan ažkquin žejlñinacžquizimi žcati žejlñinacžquizimi zuma quintunaca paljajtača. Ninacaquiu nii paljajta tjapa kuztan catokaquiuž niiqui, jalla nekztan Yooziž pertunta cjesača. Nižaza ninacžtan Yooztan zumanznaquiča. ¹⁸ Jesucristuž cjen nižaza Yooz Espiritu Santuž cjen judío žoñinacami ana judío žoñinacami, tjapa žoñinacaquiu Yooz Ejpžquin macjatz atča. ¹⁹ Jalla nižtquiztan ančhucqui anača iya yekja žoñinacžhucqui, anača iya Yoozquiztan yekja t'akčhucqui. Antiz Yooz partiquiz kamñi mazinacžhucča parti criichi žoñinacžtan, nižaza ančhucqui Yooz familliquizčhucča. ²⁰ Učhumquiu tsjii pajk kjuyažtakazza Yooztajapaquiu. Nii kjuy simintuquiu apostolonacača, nižaza Yooztajapa chiiñi profetanacača. Nižaza Jesucristupachača juc'ant chekan maz cuntaquiu nii kjuyquiziqui. ²¹ Jesucristuž cjen tjapa criichi žoñinacaquiu arubinacažtakazza nii kjuya pirkitaquiu. Tjapaman criichi žoñinacaž cjenami tsjii Yooztajapa kjuyakaz kjuytača. Jesucristuž yanaptaž cjen nii kjuychiz žoñinacaquiu tsjan tsjan zuma cjiša, Yooztajapa kamcan. ²² Ančhuc zakaz nii kjuy pirkita arubinacažtakazza parti criichi žoñinacžtan. Jalla nuž učhum Yooz kjuyquiz cjišiz cjen, Yoozquiu učhum kuzquiz žejlča niž Espiritu Santužtan.

3

PABLUQUI YOOZ TAKU PALJAYÑI ŽOÑIČHA

¹ Jalla nižtquiztan wejr Pabluquiu ančhucaltajapa mayizuča. Wejrquiu Jesucristo sir-wiñiž cjen tii carsilquiz želuča. Nižaza ančhuc yekja wajtchiz žoñinacžquiz liwriiñi taku paljaytquiztan zakaz carsilquiz želuča wejrquiu. ² Ančhucquiu wejt puntuquiztan zizzinčhucžlani. Yoozquiu tii apóstol puestuquiz wejr utchiča, ančhucquiuž Yooz puntu paljayzjapa, jaknužt Yoozquiu okžñi kuzziz ančhuc liwriiz pecčhaja, jalla nii paljayzjapa. ³ Nižaza ančhucquiu zizzinčhucžlani Yoozquiu niž tuquita pinsita takunaca wejtquiz zizkatchiča, jalla nii. Tuquita anapan ziztatača nii takunacaquiu. Nii wejtquiz zizkatta takunaca tuquiu ančhucquiu tsjii koluculla cjižrčinča. ⁴ Nižaza tii carta liižcu, ančhucquiu tantiyasača, wejrtča Cristuž puntuquiztan zuma intintaziñtquiu, jalla nii. ⁵ Tuquiu timpuquiu Yoozquiu anaž jecžquizimi Cristuž puntuquiztan zuma zizkatchiča. Jazikaz Yoozquiu Cristuž puntu zuma zizkatchiča, niž illzta apostolonacžquizimi, nižaza nižtajapa chiiñi profetanacžquizimi. Niiž Espiritu Santuž cjen nuž zizkatchiča. ⁶ Nii tuquita chjojta puntuquiu jalla tiiča: Cristuž puntu liwriiñi taku catokchiž cjen, čhjuluz cherchi žoñimi Yooziž liwriitaž cjesača. Tsjii irinsažtakaz nii liwriiz tanznasača. Ana judío žoñinacami Cristuž partiquiz zakaz cjisnasača. Nižaza Cristuž partiquiz žejlcanpacha Yooz tjaata taku

tanznasača, liwriita cjisjapa. ⁷Wejrqui nii liwriiñi taku paljayzjapa apóstol puestuquiz uchtača. Jalla nii puestuquiz cjis anal waquizuča. Yoozqui wejr okzcu nužukaz nii puestuquiz wejr utchiča, niiz kuzcama. Yooz poderchiz apóstol kamañ jaru kamuča. ⁸Wejrqui tjapa Yooz partir žoñinacžquiztan upa honorchiz cjis waquizuča. Jalla nuž cjenami Yoozqui wejtquiz apóstol puestu tjaachiča, ana judío žoñinacžquiz Cristuž puntuquiztan ancha zumanaca paljayzjapa. Cristuž puntuquiz ancha zumača. Tjapa nii puntuquiztan ana intintazzuča. ⁹Yoozza tjappacha paachiqui. Jalla nii Yoozqui wejtquiz niiz tuquita chjojta pinsita cumpjiičiča, tjapa žoñinacžquiz kjanzt'izjapa. ¹⁰Jalla nuž watchiča, tjapa poderchiz espiritudacami tjapa mantiñi espiritudacami zizkatzjapa, jaknužt Yoozqui ancha zizñi zizñi pinsichižlaja, nii. Tuquiqui nii arajpachquin žejlñi espiritudacami ana zuma zizziča nii Yooziž pinsita puntuquiz. Anziqui criichi žoñinacž cjen, nii espiritudacami Yooz tuquita pinsitaqui zizziča. ¹¹Tuquitanpacha Yoozqui nuž zizkatz pecchiča. Jaziqui učum Jesucristo Jiliriz cjen Yoozqui niiz pinsitaqui zizkatchiča. ¹²Nižaza Jesucristuž cjen učumqui Yoozquin macjati atasacha, ana ekscañ. Jesucristužquin kuz tjaachiž cjen, učumqui tjup kuztan Yoozquin macjati atasacha. ¹³Jalla nižtiquiztan ančucaquin tuž chiižinžcuča, weriž ančhucaltajapa sufrichiž cjen, ana upa kuzziz cjee. Jalla nuž ančhucaltajapa sufran, ančhucqui juc'ant honorchiz cjequiča.

CRISTUQUI ANCHA ZUMA MUNAZIÑI KUZIZ

¹⁴Nii Yooziž ancha zuma pinsitaqui cjuñzcu, wejrqui učum Jesucristo Jilirž Yooz Ejpžquiztan mayižinuča. Quillžcu, Yoozquiztan mayižinuča. ¹⁵Yooz Ejpžquiztan tjapa Yooz partiquiz žejlñi familianacami tjuuchizza, arajpachquinami yokquizimi. ¹⁶Yooz Ejpžquiztan mayižinuča, ančuca kuznaca tjupi tjurt'ichi cjisjapa. Yoozqui niiz Espiritu Santuž aztanž cjen, ančuca kuznaca tjupi tjurt'ichi cjskatasacha. Yoozqui niiz juc'ant zuma kuzquiztan ančuca kuznaca tjurt'ichi cjskatasacha. ¹⁷Nižaza ančhucaltajapa mayižinuča, Jesucristužquiz juc'ant kuzziz cjeajo. Jalla nuž juc'ant kuzziz cjen, Jesucristuquiz ančuca kuznacquiz juc'anti irpaquiča. Jesucristuž irpita cjen, ančhucqui zuma munaziñi kuzzizpanž kamaquiča, tsjii zuma pookñi zkalažtakaz. ¹⁸Nižaza zuma munaziñi kuzziz kamchiž cjen, ančhucqui Jesucristuž zuma munaziñi kuz juc'antiž pajaquiča. Jalla nuž mayižinuča tjapa criichi žoñinacžtajapa. Wejrqui tuž mayižinuča, tjapa criichi žoñinacami Cristuž zuma munaziñi kuz zumpacha pajla cjiwča. Zmali pakjiž cjes, nižaza palaž cjes, nižaza lajchaž cjes, jalla nižta iratača Cristuž zuma munaziñi kuzqui. ¹⁹Žoñinacami Cristuž zuma munaziñi kuz anaž tjapa paji atča. Jalla nuž cjenami Yoozquiztan mayižinuča criichi žoñinaca Cristuž zuma munaziñi kuz zumpacha pajzapa. Jalla nuž pajtiquiztan, ančhucqui Yooz iratapankaz zuma kamañchiz kamaquiča.

²⁰Jaziqui Yoozqui zuma honorchiz cjila. Yoozqui niiz aztan učum kuznacquiz zuma obranaca trabajča. Učumž mayižitiqiztanami nižaza učumž pinsitiqiztanami juc'anti zuma kamañchiz kami yanapasača učum zuma Yoozqui. ²¹Criichi žoñinacž cjenami, Jesucristuž cjenami, Yoozqui honorchiz cjila. Wiñay wiñaya watay wata honorchiz cjila. Jalla nužoj cjila. Amén.

4

ESPIRITU SANTUŽ CJEN TSJII KUZIZZA UČHUMQUI

¹Jesucristo Jiliržquiz sirwiñiž cjen carsilquiz želuča. Wejrqui ančucaquin chiižinžcuča zuma kamañchiz kamajo, jaknužt Yooz kjawža žoñinaca kamz waquizichaja, jalla nižta. Yooz Ejpqui ančhuc kjawziča nižtajapa kamajo. Jalla tuž kamz waquiziča, ²ana mit kuzziz, nižaza humilde kuzziz, nižaza zuma munaziñi kuzziz, nižaza pasinsichiz kuzziz. Jalla nuž kamz waquiziča. ³Espiritu Santuž cjen, tsjiižtan tsjiižtan zumanskaz waquiziča. Jaziqui tsjii kuzzizpan cjee. Nužquiz tirapan kuz tjaa. ⁴Tjapa criichi žoñinacami Cristuž partiquiz žejlča tsjii curpuchiztakazza. Nižaza tsjii Espiritu Santuchizza. Tjapa ančhucqui Yooz kjawžtiqiztan tsjiikaz tjewža, arajpachquin Yooztan kamz, jalla nii. ⁵Nižaza tjapa ančhucqui tsjii Jesucristo Jilirchizkazza, nižaza tjapa ančhucqui Jesucristužquin kuz tjaachinčhucča. Jalla nižtiqiztan ančhucqui tsjiikazza.

Nižaza tsjii bautismokaz tanzinčhucča. ⁶ Nižaza tjapa učumqui tsjii Yooz Ejpchizza. Učum Yooz Ejpž mantuquiz tjapa criichi žoñinaca žejlča. Nižaza Yooz Ejpqui trabajča tjapa criichi žoñinacž kuzquiz. Nižaza Yooz Ejpqui tjapa criichi žoñinacž kuznacquiz žejlča.

⁷ Tjapa criichi žoñinacžquiz kamañanaca tjaatača, Cristuž pectacama. ⁸ Jalla nii puntuquiztan Yooz taku tuž cjiča:

“Arajpachquin ojkan, wacchi Cristuž atipta presunaca chjitchiča. Nižaza tii muntuquiz žejlñi žoñinacžquiz kamañanaca tjaachiča”.

⁹ Yooz takuqui “Arajpachquin ojkan” ¿kjažt cji? Jalla tuž cjiča: Primeraqui Cristuqui tii muntuquiz chjiwžquichiča. ¹⁰ Jalla nii chjiwžquiniqui Jesucristupachača. Nižaza niipachača arajpach kjutñi ojkhiqui, juc'ant tsewc arajpachquin. (Jalla nuž Jesucristuqui tsewc ojkhičha, Espiritu Santuž cjen criichi žoñinacž kuznacquiz niipacha žejljapa.) ¹¹ Jalla tiža kamañanacchiza criichi žoñinacaqui: apostolonaca kamañchiz, nižaza Yooztajapa paljayñi profetanaca kamañchiz, nižaza liwriñi taku parliñinaca kamañchiz, nižaza icliz irpiñinaca kamañchiz, nižaza Yooz puntu tjaajiñinaca kamañchiz. ¹² Jalla niža kamañanaca tjaachiča Yoozqui, tjapa criichi žoñinaca Yooztajapa zuma kamajo, nižaza Yooztajapa sirwican langznajo, nižaza parti criichi žoñinaca tsjan zuma kamañchiz cjiskatajo. Criichi žoñinacaqui Cristužtan tsjii curpuchiztakazza. ¹³ Nižaza Yooz Ejpqui criichi žoñinacžquiz niža kamañanaca tjaachiča, Yooz irata zuma cjiscama. Jalla niža Yooz irata zuma cjican tjapa criichi žoñinacaqui tsjii kuzzizpankaz cjequiča, Jesucristužquiz tjapa kuz tjaacan, nižaza tjapa Yooz Majch puntunaca intintazcan. Jalla nuž Yooz irata zuma cjican, učumqui tsjii zuma pajk žoñižtakaz cjequiča. Nižaza jaknužt Jesucristuqui zumapanžlaja, jalla niža irata učumqui zumapanž cjequiča. ¹⁴ Jalla niža zuma kamñi intintazñi cjican, učumqui anaž tsjii ocjalžtakaz cjequiča, čjul ew tjaajintiquizimi criizjapaqui. Nižaza učumqui anaž tsjii kjutñi chjichca cjesača. Nižaza učumqui nii ana wal mañuz žoñinacžquiz ana incallskataquiča. Nii ana wal žoñinacaqui čjulumi paača, nižaza chiiča, parti žoñinaca incallzjapa, nižaza tsjii kjutñi chjichjapaqui. ¹⁵ Antiz učumqui zuma munaziñi kuztan werarapan chii waquiziča. Jalla nuž zuma kamcan nižaza zuma chiican, učumqui Cristužtan tsjii kuzzizimi tsjii kamañchizimi juc'anti cjisnaquiča. Cristupankazza učum jilir achaqui. ¹⁶ Učumqui Cristužtan tsjii curpuchiztakazza. Tsjii curpuquiz yekja yekja žejlča. Jalla nuž cjenauqui tsjii curpukazza. Jalla niža iratača Jesucristuž partiquiz žejlñi žoñinacaqui. Yekja yekja želanami, tsjii partiquiz juntjapziča, Jesucristuž cjen. Jesucristuqui učumnaca juntjapchiča, nižaza tsjii kuzziz cjiskatchiča, nižaza ew kamaña tjaachiča. Tjapa criichi žoñinacž zuma kamñiž cjen Cristuž curpuqui tsjan zuma pajktažokazza. Nižaza porapat zuma munaziñi kuzziz kamñiž cjen, tsjan tsjan wali zumaž cjissa.

EW KAMAÑCHIZZA CRIICHI ŽOÑINACAQUI

¹⁷ Jalla nii puntu ančhucaquin chiižinžcuča. Jesucristo Jiliržtan tsjii kuzziz cjican wejrqui ančhucaquin tuž cjiwčha: Ana Yoozquin criichi žoñinacaqui ana zuma kamča. Jalla ninacaqui inapankaz persuna pinsitanacž jaru kamča. Jalla niža irataqui ančhucqui anača kamzqui. ¹⁸ Ana criichi žoñinacaqui ana Yooz puntu intintazñi kuzzizza. Zumchiqui ojklayñi žoñinacača ninacaqui. Ninacž chojru kuzziz cjen, Yooz puntu ana zizza. Jalla nižtiqiztan ana Yooz kamañchizza. ¹⁹ Ninacaqui ana wali paaznacquiztan ana azñiča. Nižaza ana wal kamañquiz kuz tjaachiča. Tjapaman ana walinaca paazjapa pecñipanča. ²⁰ Pero Jesucristuž tjaajintaqui anača niža. Jalla niž tjaajintaqui zizza ančhucqui. ²¹ Ančhucqui Jesucristuž puntuquiztan nonžcu niž tjaajintaqui catokch-inčhucča. Niž tjaajintaqui werarapankazza. ²² Ančuca tuquita ana wal kamaña eca. Ančuca ana wali pecñi kuz jarutača nii kamañaqui. Ana wal kamañchiz kamcan, žoñinacaqui persunpachaž incallča. Ana wal kamaña liw jayta ančhucqui. ²³ Kuznaca liwj campiya, zuma kamañchiz cjisjapa. ²⁴ Nižaza Yooz tjaata ew kamañchizpankaz cjisna. Nii ew kamañaqui Yooz irata zuma kamañača. Nii ew kamañ jaru kamcan, ana uj paaquiča, ligituma zumaž kamaquiča.

²⁵ Jalla nuž kamcan, ana toscar takunaca chiya. Antiz zapa mayni porapat zuma werar takunacžtan parlispänča. Tjapa criichi žoñinacaqui yekja yekja cjenami tsjii curpuchiztakazza.

²⁶ Tsjii žawjz tjonanaqui, uj paazquiztan cuitaza. Ana zita žawjz peczqui. ²⁷ Anača Satanas diabluz jaru ujquiz tjojtskatz peczqui.

²⁸ Jakziltažlaja tjangz pecni kuzziz, nii tjañi zaaz kuz jaytila. Jalla niiqui langz waquiziča persun kjaržtan. Nekztan ganžcu, t'akjir žoñinacžquiz onasača.

²⁹ Ana wal takunacžtan ana chiya. Antiz zuma takunacžtan chiya, parti žoñinaca juc'ant zuma kamañchiz cjisjapa. Jalla nuž chiyan nonžni žoñinacaqui yanapta cjequičha, zuma kamajo. ³⁰ Espiritu Santuqui ančuca kuzquiz žejlcan Yooz chimpupapanča, ultim liwriiz tjuñicama. Jalla nižtiquiztan Yooz Espiritu Santužquiz ana llaquiziskata, ana wali kamcan.

³¹ Čhaawjkatni kuz jayta, nižaza culirazni kuz jayta, nižaza žawjžawjz kuz jayta, nižaza žoñi ararñi kuz jayta, nižaza žoñž quintra ana wali chiiñi kuz jayta, nižaza tjapa ana wali kuznaca jayta. ³² Nižta ana wali kuzziz cjenpacha porapat zuma munaziñi kuzziz cjee. Nižaza porapat zuma okzni kuzziz cjee. Nižaza porapat pertunñi kuzziz cjee. Jaknužt Jesucristuž cjen Yoozqui ančucaquiz pertunčhaja, jalla nižta porapat pertunassaquičha.

5

ZUMA KAMAÑANAC PUNTO

¹ Ančhucqui Yooz partiquiz žejlcan Yooz pecta maatinacača. Jalla nižtiquiztan Yooz irata zuma kamañchiz cjee. Yooz kamañchiz yatekaza. ² Zuma munaziñi kuzziz cjee. Jaknužt učumnacatan Cristo munazičhaja, jalla nižta. Učumnacatan munazican, Cristuqui učum laycu ticziča. Jalla nuž ticžcan Cristuqui niž persun curpu Yoozquin tjaachiča, tsjii zuma ofrendažtakaz, nižaza tsjii zuma wilanažtakaz.

³ Ančhucqui Yooz partiquiz cjanacuqui, anača tsjii adulteriuquiz ojklayz pinsisqui. Nižaza anača čjul anawalinacami pinsisqui. Nižaza anača čjultakimi zmazqui. Nižta anawalinaca anapanž pinsis waquiziča. ⁴ Anača azzuc takunaca chiichiizqui. Nižaza anača ina takunaca chiichiizqui. Nižta nižta chiichiiznacuqui anaž učumnaca chiichiiz waquiziča. Antiz zuma takunacžtan chiichiz waquiziča. Yoozquin sparaquiz cjis waquiziča. ⁵ Ančhucqui tuž zizza. Jakziltat adulteriuquiz ojklayni cječhaja, jalla niiqui anaž arajpach wajtquin luzasača, Cristužtanami Yooz Ejpžtanami chica kamzjapa. Nižaza ana zuma kamñinacami, nižaza zmazñinacami, jalla ninaca zakaz ana arajpach wajtquin luzasača. Ninacuqui Cristuž partiquizimi Yooz partiquizimi anapanž cjesača. Tsjii zmazni žoñiqui, tsjii žoñiž paata yooz rispitiñi žoñi iratača. ⁶ Nižaza ančhucqui ina takunacžtan ana incallskata. Jalla nižta ana wali paañiž cjen Yoozqui nii ana wali paañinaca casticaquičha. Ninacuqui Yooz kuzcama ana kamñičha, antiz Yooz quintra paañičha. ⁷ Jalla nižta ana wali paañi žoñinacžtan chica anača munazizqui.

⁸ Tuquiqui ančhucqui uj paacan ana wal zumchiquizkaz kamatiča. Anziqui Jesucristo Jilirž partiquiz cjan, ančhucqui kjanquiz kamča. Jalla nižtiquiztan zuma kamcan kjanquiz kamni žoñižta cjee. ⁹ Kjanquiz kamcan, ančhucqui zuma kamaquičha, nižaza Yooz kuzcama kamaquičha, nižaza litituma kamaquičha. ¹⁰ Čjul kamaña Jesucristo Jiliriqui jutzazzaja, jalla nii kamañchiz kamzjapa tjapa kuz tjaa. ¹¹ Ana zuma obranaca paazqui ana nekz mitisa. Zumchiquiz ojklayni žoñinacakazza nižtanaca paaz pecniqui. Ninacž obranacaqui ana waliž, jalla nii kjanapacha tjezna ančhucqui. ¹² Zumchiquiz ojklayni žoñinacaqui chjojzaka ana zuma paañičha. Jalla nii paatanac puntoquiztan parlizqui anča azzucača. ¹³ Jalla nižta chjojzaka paatanacuqui kjanapacha tježtažlaj niiqui, tjappacha zizasacha, ana walipan, jalla nii. Werar Yooz kjanacuqui čjul paatanacami tjeezkatasacha, zuma, ana zuma, nii. ¹⁴ Jalla nii puntoquiztan Yooz takuqui tuž cjičan:

“Tjajni žoñinaca, žaazna ančhucqui. Ticziquiztan žažtažokaz cjee. Cristuqui ančuca kuzquiz kjanzt'aquičha, tsjii zuma kjanažtakaz”.

¹⁵Jaziqui ančhucqui amayt'aza, jaknužt kamčhaja, jalla nii. Yooz puntu ana zizñinacaž-takaz ana kamz waquiziča. Antiz Yooz puntu zizñi žoñinaca irata kamspanž waquiziča. ¹⁶Tii timpuquiz kamñinacaqui ana wali paača. Jalla nižtiquiztan tii timpuquiz žejlcan ančhucqui parti žoñinaca yanapa, zuma kamajo. ¹⁷Anača zumzužtakaz cjee. Antiz Jesucristo Jiliriz pecta kuz intintazñiž cjee. ¹⁸Nižaza anača vinžtan licchi cjisqui. Jalla nuž licasaž niiqui, zuma kamañquiztan tsjii kjutñi chjichta cjesača. Antiz ančuca kuztan Espiritu Santužtan tsjii kuzziz cjee. ¹⁹Ančhucqui porapat zuma parlaquiča Yooz tawk salmužtan, nižaza Yooz wirsu itsnacžtan. Yoozquin tjapa kuztan itsnaquiča. Nižaza itscan Yoozquin honora tjaa. ²⁰Čhjulu watanami Yooz Ejpžquin tirapan sparauiz cjequiča, učhum Jesucristo Jiliriz cjen.

CRIICHI FAMILLŽ PUNTU

²¹Jesucristužquin rispitchiž cjen porapatž sirwasaquiča.

²²Maatakanaca, persun luctakž jaru cjee, jaknužt ančhucqui Jesucristo Jilirž jaru kamčhaja, jalla nižta. ²³Maatakaqui luctakž mantuquiz žejlča, jaknužt icliz žoñinacaqui Cristuž mantuquiz žejlčhaja, jalla nižtača. Icliz žoñinacaqui Cristužtan tsjii curpuchizpanča. Nižaza Cristuqui ninacž achača. Cristuqui nižquin criichi žoñinaca liwriičha. ²⁴Jaknužt criichi žoñinacaqui Cristuž mantuquiz žejlčhaja, jalla nižta irata tsjii maatakaqui luctakž mantuquiz cjistanča čhjulu cjenami.

²⁵Luctakanaca, persun maatakžtan zuma munaza. Jaknužt Cristuqui criichi žoñinacžtan zuma munazičhaja, nižaza ninacž laycu ticztčhaja, jalla nižta irata persun maatakžtan zuma munaza. ²⁶Jalla nižta zuma munazican Cristuqui nižquin criichi žoñinacž laycu ticziča, ninaca zuma kamañchiz cjiskatzjapa. Jalla nižta zuma kamañchiz cjisjapa criichi žoñinacaqui kjaztan ajuntažokaz cjissiča, Yooz taku catokžcu. ²⁷Cristuqui nižquin criichi žoñinacžquiz zuma kamañchiz cjiskatchiča, nižquinacž zuma zupankaz ana ujchiz prisintisjapa. Jaknužt tsjii zuma telaqui ana manchichiz, nižaza ana tjot tjotsi, nižaza ana čjul ana walinacchiz žejlčhaja, jalla nižtapan criichi žoñinacaqui Cristuž yujcquiz cjequiča, zumapankaz cjequiča. ²⁸Jalla nižta Cristo irata tsjii luctakaqui persun maatakžquiz zuma munazizpanča. Jaknužt persun curpuquizpacha cuitazñižlaja, jalla nižta persun maataka cuitaz waquiziča. Persun maatakžtan munazican, persunpacha munazitažokazza. ²⁹Anaž jecmi persun curpujapa quintra paasača. Antiz persun curpuquiz cuitazza, nižaza čheriž tjaača. Cristuqui jalla nižta irataž icliz žoñinacžtan cuitičha. ³⁰Učhumqui icliz žoñinacača, nižaza Cristuž curpu cuntača, yekja yekja cjenami. Jalla nižtiquiztan Cristuqui učhumnacatan cuitičha. ³¹Yooz takuqui tuž cjiča: “Tsji luctak žoñiqui persun maa ejpžquiztan zarakaquiča, persun maatakžtan zalzjapa. Persun maatakžtan zalžcu, nii pucultanaqui tsjiikaz cjissa”. ³²Cristužquiz criichi žoñinacaqui Cristužtan lcutjñižtakazza. Jalla nižta cjenaqui ch'amača intintazqui. ³³Pero zapa mayni ančucaquiztan persun maatakžtan zuma munaza, jaknužt persunpachquiz zuma munazaja, jalla nižta. Nižaza maatakaqui persun luctaka rispitsa.

6

¹Criichi maatinaca, persun maa ejpžquiz caspanča. Jalla nuž cascuqui Yooz pecta kuzcamača. ²Yoozqui tuž mantichiča: “Maa ejpžquiz rispitsa”. Nižaza maa ejpžquiz rispitaquiž niiqui Yoozqui compromitchiča, tuž cjan: ³“Maa ejpžquiz rispitaquiž niiqui, ančhucqui waliž kamaquiča, nižaza ažk wata žetaquiča tii yokquiziqui”.

⁴Ejpnaca, ančhucqui maatinacžquiz ana inapankaz žawjwa zjijcna. Ocjalanacaqui ana wali paaquiž niiqui, zumžtan chiižinaquiča zuma kamajo. Nižaza Jesucristo Jiliriz tjaažinta tjaažna.

⁵⁻⁶Piyunanaca, ančuca patrunacžquiz caspanča, rispitan, nižaza eksan, nižaza tjapa kuztan. Anača cherankaz c'unchikaz tuczqui niž kuz wali cjisjapa. Antiz tjapa kuztan nižtajapa langznaquiča. Jaknužt ančhucqui Yooz kuzcama tjapa kuztan Cristužquiz sirwičhaja, jalla nuž ančuca patrunacžquiz sirwasača. ⁷Zuma kuztan langznaquiča, Yooz Jiliržtajapa langztažokaz, ana žoñitajapaqui. ⁸Ančhucqui zizza,

piyunanacami, ana piyunanacami, tjapa žoñinacami Yoozquiztan pactaž cjequiča zuma langztiquiztan jama.

⁹ Patrunanaca, ančhuc zakaz piyunanacžtan zumapan cjee. Ana žawjñi takunacžtan chiichiya. Jalla tuž cjuñzna: ančhucmi, ančhuc piyunanacami, tjappacha arajpach Yooz Patrunž mantuquiz žejlča. Nižaza Yooz Patrunaqui žoñinaca ana illillza.

YOOZQUIN TJURT'IZ PUNTU

¹⁰ Jaziqui jilanaca, cullaquinaca, Yooz wali aztan Jesucristo Jiliržquiz tjurt'iñi kuzziz cjee. ¹¹ Satanás diabluž incallzpanž pecča. Jalla nižtiquiztan tjapa Yooziž tjaata armanacchiz cjee, tjurt'iñi kuzziz cjisjapa. ¹² Učhum wali azziz quintranacaqui anača žoñinacakaz. Antiz ninacaqui ana wal jilir zajranacača, nižaza ana wal poderchiznacacača, nižaza ana wal mantiñinacača. Nižaza tjapa ana wal azziznacacača učhum ultim quintranacaqui. Jalla ninacaqui zumchiquizkaz ojklayñiča, tii timpuquiz ana walinaca mantican. ¹³ Jalla nižtiquiztan Yooz armanaca tanžna, nii ana walinacž quintra tjurt'izjapa tii ana wal timpuquiz. Yooztajapa tjurt'ican tjup kuzziz žela. ¹⁴ Jaziqui tii Yooz armanaca tanžna. Tsjay cinturuna tanžna. Nii cinturuna tanzqui tuž cjiča, werar Yooz tawžžtan tjurt'ichi žejlz, jalla niiča niiqui. Nižaza persun curpu atajñijapa arma tanžna. Nii arma tanzqui tuž cjiča, Yooz kuzcamapankaz kamz, jalla niiča niiqui. ¹⁵ Nižaza jaknužt zultatunacaqui quira zalzjapa zuma zapatu kujtžaja, jalla nuž ančhucqui liwriiñi taku paljayzjapa tjaczpanča. ¹⁶ Nekžtan tii arma tanžna. Tii armača juc'ant chekanaqui, escudo cjita. Jalla nii arma tanzqui tuž cjiča, Jesucristužquin kuzziz kamz, jalla niiča niiqui. Jesucristužquin kuzziz cjen, ana wal diabluž quintra tjurt'aquiča. ¹⁷ Nižaza tii arma žejlča. Yooziž liwriita cjisqui tsjii tjup scarchiztakazza, acha ana chjojritžta cjisjapa. Nižaza Espiritu Santuž pajk cuchillu tanžna. Jalla nii cuchilluqui Yooz takuča. ¹⁸ Espiritu Santuž ančhuc kuzquiz želan, ančhucqui Yoozquin tirapan mayiza, nižquin tjurt'ichi cjisjapa. Jalla nuž tjurt'ichi cjisjapaqui, naynay žela, ana llajlli kuzziz cjee. Nižaza tjapa Yooz partiquiz žejlñi žoñinacžtajapa mayizina. ¹⁹ Nižaza wejtajapa mayizina, Yoozqui wejr niž liwriiñi takunaca chii yanapzjapa. Wejrqui tjup kuztan liwriiñi Yooz taku zumpacha paljayz pecuča. Jalla nuž paljayzjapa wejtajapa mayizina. ²⁰ Yoozqui wejr cuchanžquichiča, niž puntunaca paljayzjapa. Jalla nuž weriž paljaytiquiztan anziqiu wejrqui carsilquiz chawcta želuča. Jalla nižtiquiztan wejtajapa mayizina, liwriiñi takunaca tjup kuztan ticlarzjapa, jaknužt wejrqui chiiž waquizučhaja, jalla nii.

ŽERZ TAKUNACA

²¹ Tíquico jilaqui ančhucquin tjapa wejt puntunaca quint'aquiča, jaknužt želučhaja, nižaza čhjulut paa-učhaja, jalla nii. Tíquico jilaqui pecta jilača, nižaza wejt zuma yanapñiča, Jesucristo Jiliri sirwican. ²² Jaziqui tii jila ančhucquin cuchanžcuča, wejt-naca puntuquiztan mazinžjapa, nižaza ančhuc kuznacquiz zumpacha p'ekinčayzjapa.

²³ Yooz Ejpžtan Jesucristo Jiliržtan ančhucquiz llan kuzziz cjiskatla, nižaza juc'ant zuma munaziñi kuzziz cjiskatla, Jesucristužquin kuz tjaacan. ²⁴ Učhum Jesucristo Jiliržtan zuma munaziñi kuzziz žoñinacžquiz Yoozqui yanapt'izquila. Jalla nužoj cjila. Amén.

LA CARTA DEL APOSTOL SAN PABLO A LOS FILIPENSES

¹ Wejr Pabluqui Timoteo jilžtan ančhucaquin tii cartal cjiyržcuča. Wejrnacqui Jesucristuž manta payiñtča. Jaziqui ančhuc Filipos wajtchiz criichinacžquin cjiyržcuča. Jesucristužquin kuz tjaachiz cjen, ančhucqui Yooz partir žoñinacača. Ančhucaquin tsaanžcuča icliz irpiñinacžquinami, nižaza icliz jilirinacžquinami. ² Učhum Yooz Ejp, nižaza učhum Jesucristo Jiliri ančhucaquiz yanapt'ila. Nižaza ančhucaquiz walikaj kamkatla.

PABLUŽ MAYIZITA

³ Čhjlorat ančhucaquin cjuñžnučhaja, ančhucaž cjen Yoozquin sparaquiz cjian chiyučha. ⁴ Nižaza čhjlorat ančhucaltajapa mayizučhaja, cuntintul mayizučha. ⁵ Učhumqui chicapacha langzinčhumča, žoñinaca Yoozquin kuzziz cjskatzjapa. Ančhucaž criichi tjuñquiztanpacha nižaza anczama Yooztajapa wejtjan chica langzinčhumča. ⁶ Ančhucaž criichi tjuñquiz Yoozqui ančhucaquiz zuma kamañchiz cjskatz kalltichiča. Nižaza Yooz Ejpqui ančhuca zuma kamaña Jesucristuž kamaña irata juc'anti juc'ant cjskataquiča, Jesucristuž tjonz tjuñicama. Jalla nužupanča cjiwča. ⁷ Nii ančhuca puntuquiztan pinsitanacaqui zuma litjumača. Wejrqui persun kuzquiztan ančhucajapa anchal cjuñučha. Yoozqui tjapa ančhucaquizimi wejtquizimi yanapchiča, carsilquiz želanami, nižaza jilirinacž yujcquiz želanami. Jilirinacž yujcquiz liwriñi Yooz tawk favora chiicanpan tjurt'ichinčhumča. Nižaza “Nii liwriñi takuqui werar takupanča” cjian ticlarchinčhumča. Jalla nuž chiyan Yoozqui učhum yanapchiča. ⁸ Jaziqui wejrqui persun kuzquiz ančhucajapa anchal cjuñučha, jaknužt Jesucristuqui ančhucajapa zuma cjuñčhaja, jalla nuž. Yoozqui nuž zizza. ⁹ Jalla nižtquiztan ančhucaltajapa Yoozquin mayizuča, ančhucqui tsjan tsjan zuma munaziñi kuzziz cjsjapa. Nižaza jalla nuž zuma munazan, zakaz mayizučha, ančhucqui Yooz puntu tsjan zizñi cjsjapa, nižaza Yooz puntu tsjan zuma intintazñi kuzziz cjsjapa. ¹⁰ Jalla nuž ančhucqui zuma zizñi nižaza intintazñi kuzziz cjequiz niiqui, zuma kamañanacakaz illznaquiča. Nuž illznaquiz niiqui, Jesucristuž tjonz tjuñquiziqui ančhucqui ana ujchiz zumapan cjequiča. Anaž jecmi ančhuca quintra tsjii ujmi tjojtñasacha. ¹¹ Nižaza ančhucqui Jesucristuž cjen zuma kamañanacakaz tjeeznaučiča Jesucristuž tjonz tjuñquiziqui. Jalla nižtquiztan ančhucaž cjen Yoozqui zuma honorchiz cjequiča. Nižaza “Yooz ancha zumača” cjian Yooz honora chiitaž cjequiča.

KAMAÑAQUI CRISTUŽ CJENPANČHA

¹² Jilanaca, cullaquinaca, ančhucaquin wejt puntuquiztan zizkatz pecučha. Wejtquiz anawali watchinacaž cjen tsjan žoñinacaqui liwriñi Yooz taku nonziča. ¹³ Anziqui pajk jilirž kjuyquiz preso želuča. Jalla nuž želan tjapa wejr cuitiñi zultatunacaqui liwriñi Yooz taku nonziča. Parti žoñinacaqui nonzizakazza. Tjapa ninacaqui zizza, wejrqui Jesucristuž liwriñi puntu paljaychiž cjen, preso želuča. ¹⁴ Nižaza weriž preso željtiquiztan, jila parti criichinacaqui Yooz taku paljayzjapa zumpacha p'ekinchaychiča. Nižaza tjup kuzziz cjsiča Yooz taku paljayzjapa, ana ekscan.

¹⁵ Yekjapanacaqui wejtajapa iniziñi kuztan Cristuž puntu paljayča. Ninacaqui wejtquiztan juc'ant honorchiz cjis pecča. Partizti zuma kuztan Cristuž puntu paljayča. ¹⁶⁻¹⁷ Ninacaqui zuma munaziñi kuzquiztan Yooz taku paljayča. Ninacaqui zizza, wejrqui tekz carsilquiz želuča, liwriñi tawk favora tjurt'ichiž cjen. Yekjapanacaqui ana zuma kuzquiztan persun honora tanzjapa Cristuž puntu paljayča. Ninacaqui pinsiča, ninacž quintu nonžcu wejrqui juc'ant llaquisichucača, jalla nii. ¹⁸ Jalla nuž cjen, wejrqui ¿kjažt cjeesa? Jalla tuž cjiwča: zuma kuztan cjenami, ana zuma kuztan cjenami Crustuž puntuqui paljaytača. Jaknužt paljayta cjenami, wejttaqui walipankaz cjesacha. Jalla nuž cjenauqui wejrqui chipznuča.

¹⁹ Nižaza juc'anti chipznača. Ančucaž wejtjajapa mayiziz cjen, nižaza Jesucristuž Espírituž yanapz cjen, tjapa tii watchinacžquiztan wejrqui walipankal cjeeča. Wejrqui tii carsilquiztan ulnačani. ²⁰ Jalla nuž anchal pecuča, nižaza tjewznuča. Ultimquiziqui wejrqui ana azkattal cjeeča. Pero Cristuž puntul kjana declaruča, zuma tjurt'ichi kuztan. Jaziqui weriž cjen Cristuqui tsjan tsjan honorchiz cjequiča, weriž žetanami, weriž ticznunami. Tuquimi anzimi weriž cjen Cristuqui honorchizpanča. ²¹ Tuž cjiwča. Cristužtajapapankaz žetuča. Wejr ticznaž niiqui, wejtjajapa tsjan cusaž cjequiča, arajpachquin Cristužtan chica žejlcan. ²² Tii curpuchiz tira žetaž niiqui, Cristužtajapapankal langznasača. Jalla nižtiquiztan, žejtzmi ticzmi jakziltat illz waquizas? Anal atasuča. ²³ Tii pizc partiqui ch'amača illzjapa. Tsjii kuzqui ticz pecuča, Cristužtan chica žejljajapa. Jalla niiqui wejtjajapa juc'ant waliž cjesača. ²⁴ Pero ančucaltajapa wejt tira žejtz waquiziča. ²⁵ Jalla nuž wejr ančucaquiztan kuzquiz zint'ican, wejrqui zizuča: tiral žetuča. Ančucatan tiral kamuča, ančucqui Jesucristužquiz juc'ant kuzziz cjisjapa, nižaza juc'ant cuntintu cjisjapa. ²⁶ Nižaza wiruñaquí ančucaquin wilta tjonznača. Jalla nuž weriž tjonz cjen, nižaza Jesucristuž cjen, ančucqui cuntintuž cjequiča.

²⁷ Jilanaca, cullaquinaca, jalla tužuča chekanaqui. Ančuca cristian kamzqui Cristužquiz honorchiz cjskatz waquiziča, Cristuž tjaajinta jaru kama. Jalla nuž kamaquič niiqui, ančuca puntuquiztan zuma quintu okaquiča. Nekztanaqui wejrqui ančucaquin cherzñi tjonznaž niiqui, už ana cherzñi tjoni ataž niiqui, wejrqui ančuca puntuquiztan zuma quintu nonznačani. Ančucqui tsjii kuzziz tjurt'ichi želačani. Nižaza tjapa ančucqui tsjii kuzziz Yooz tawk favora langzcan želačani. ²⁸ Nižaza ančucqui quintra žoñinacžquiztan anaž jaknužumi tsuetsucačani. Anaž ninacž taku kjayačani. Jalla nuž quintu nonžcuqui, cuntintul cjeeča. Nižaza ančucaž nuž kaman, kjanapacha tjeežtaž cjequiča, ančuca quintra žoñinaca infiernuquin Yooziž castictaž cjequiča. Nižaza kjanapacha zakaz tjeežtaž cjequiča, ančucqui ultimu liwriižcu arajpachquin zuma kamañchiz cjequiča. Nii zuma kamaña Yooziž tjaata cjequiča. ²⁹ Yoozqui ančuc illziča, Jesucristužquin kuz tjaazjapami, nižaza Jesucristuž laycu sufrisjapami. ³⁰ Wejr irata ančucqui sufrichinčuča žoñinacaž quintra paan. Tuqui jaknužt wejrqui sufritučaja, jalla nuž cherchinčuča. Anzimi zakaz wejt sufrita quintu nonzinčuča. Ančuc zakaz nižta supraquiča.

2

CRISTUŽ TII MUNTUQUIZ KAMTA PUNTA

¹ Ančucqui Jesucristužquin kuzziz cjen p'ekinchaytaž cjee. Nižaza Jesucristo ančucaquiz okžñiž cjen, ančucqui kuzta cjee. Nižaza Espíritu Santuqui ančuca kuzquiz luzziča. Nižaza ančucqui okžñi kuzzizza. ² Jalla nižtiquiztan ančucqui tsjii kuzziz cjee, porapat zuma munazican, nižaza zuma kamcan. Jalla nuž ančucqui kamaquič niiqui, nekztan wejrqui juc'ant cuntintul cjeeča. ³ Anaž persun kuzcamakaz čjulumi paa. Nižaza anaž čjulumi mit kuztan paa. Antiz humilde kuzziz cjee. Parti criichinacaqui wejtquiztan juc'ant honorchiz waquiziča, jalla nuž cjican pinziz waquiziča. ⁴ Persunaltajapa wali cjisjapa, ančucqui kuz tjajiñčuča. Nižaza parti criichinacžtajapa wali cjisjapa zakaz kuz tjaa.

⁵ Jaknužt Jesucristuqui zuma kuzziz žejltčaja, jalla nižta irata zuma kuzziz cjee. Jesucristuqui zuma kuzziz žejlcan, ana paachiča persunaltajapakaz wali cjisjapa. ⁶ Jesucristuqui Yooz cjicanaqui, arajpachquin žejlñi kamañchizpan želatča. Nii arajpach kamañchiz cjenami ana nii arajpach kamaña jaknužumi tira tanzitača. ⁷ Nii arajpach kamaña ecchiča. Nekztan tii muntuquiz žejlñi kamañchiz cjissiča, žoñinaca sirwizjapa. Nižaza žoñi irata nassiča. ⁸ Žoñž curpuchiz cjican, humilde kuzziz želatča. Yooz manta paacan, Yooz Ejpž kuzcamapan kamatča. Cruzquiz ch'awta ticz cjenami, Yooz Ejpž kuzcamakaz kamatča. Yooz kuzcama kamzquiztan anapan jiwjatchiča. ⁹ Jalla nižtiquiztan Yooz Ejpqui Jesucristužquiz juc'ant zuma honora tjaachiča. Jesucristužquiz tsjan chawc jiliri utčiča, tjappachquiztanami. ¹⁰ Jalla nižtiquiztan tjappachaž nižquiz

quillzcan rispitaquiĉha. Arajpachquin žejlñimi, tii muntuquiz žejlñimi, yok kos žejlñimi, tjappacha Jesucristužquiz rispitaquiĉha. ¹¹ Tjappacha ticlaraquiĉha, tuž cjan:

–Jesucristuqui, werarapan Jilirimĉha amqui. Jalla nuž cjan, Yooz Ejpžquiz zakaz honora tjaata cjequiĉha.

CRIICHI ŽOÑINACAQUI YOOZ ZUMA KAMAÑCHIZZA

¹² Werič pecta jilanaca, cullaquinaca. Werič anĉhucatan želan, anĉhucqui werič čiita taku cassinĉhucpanĉha. Nižaza jaziqui juc'antiž wejt taku casa, anĉhucatan ana želanami. Arajpachquin kamzjapa nižaza ultimu liwriita cjisjapa, ancha kuz tjaa. Nižaza humilde kuzziz cjee Yoozquin eksan. ¹³ Cjuñzna. Yoozqui anĉhuca kuzquiz žejlĉha. Jalla nuž žejlcan, niipachaž niiz kuzcama zuma paaz anĉhucaquiz peckatĉha. Nižaza Yoozpacha nii zuma paaznaca cumplisjapa yanapĉha.

¹⁴ Čjululu paacanami, ana Yooz quintra chucha, nižaza ana payznaka. Pero tjapa zuma kuztan kama. ¹⁵ Jalla nuž zuma kuztan kamtiquiztan, anaž jecmi anĉhuca quintra uj tjojtñasatĉha. Ana wal ujchiz žoñinacžtan kamcanami, anapan ujchiz cjesaĉha, zuma kuztan kamcan. Nekztan anĉhucqui kjanapacha tjeeža, Yooz maatinacĉhucĉha. Zuma kamcan anĉhucqui ana wal žoñinacžquiz Yooz zuma kamaña pajkatĉha, zuma kjanažtakaz. ¹⁶ Nižaza anĉhucqui Yooztan wiñay kamz puntu paljaycan Yooz zuma kamaña pajkatĉha. Jalla nuž anĉhucaž zuma kamtiquiztan wejrqui Jesucristuž tjonz tjuñquiz ancha cuntintul cjeeĉha. Anĉhuca zuma kamañchiz kamtiquiztan werič apóstol puestuquiz Cristužtajapa langžtaqui anaĉha ina. ¹⁷ Anĉhucqui Yoozquin tsjii wilana ofrendažtakaz anĉhuca zuma kamaña tjaaĉha. Anĉhuca ofrenda zuma cumplisjapa, ticznasatĉha wejrqui. Jalla nuž ticzcanami wejrqui cuntintul cjeeĉha. Anĉhucaž cjen Yooz sirwican cuntintuĉha. ¹⁸ Nižaza anĉhucqui werič cjen cuntintu zakaz cjis waquiziĉha. Jaziqui wejttan chica cuntintuž cjee.

¹⁹ Jesucristo Jiliriz munan, wejrqui anĉhucaquin Timoteo jila cuchanžquiz pecuĉha. Nekztan Timoteož quejpžquiztan, anĉhuca puntu wejtquiz maznaquiĉha. Nekztan wejrqui persun kuzquiz zuma cuntintul cjeeĉha. ²⁰ Anaž iya jecmi wejr irata pinsiñi žejlĉha, Timoteokazza. Jalla niĉha anĉhucalta wali cjisjapa kuz tjaañipankaz. ²¹ Parti jilanacaqui persunaltajapa wali cjisjapa kuz tjaaĉha. Jesucristuž kuzcama ana zuma ojklajĉha. ²² Anĉhucqui Timoteo jilž puntu zizza. Niiqui zuma kuz tjeeziĉha. Wejttan chica liwriiñi Yooz taku paljaycan wejr zuma yanapĉiĉha, jaknužt tsjii majch persun ejp yanapĉhaja, jalla nižta irata. ²³ Čjululut wejtquiz carsilquiz wataĉhaja, jalla nii zizcu, wejrqui Timoteo jila cuchanžquiz pecuĉha anĉhucaquin. ²⁴ Nižaza Jesucristo Jiliriz munan, werpacha upaquiztan anĉhuc cheržni tjonz pecuĉha.

²⁵ Tirapan carsilquiz želaž niiqui, Epafrodito jila cuchanžcaĉha. Jalla nuž cuchanžquiz tantiichinĉha. Epafrodito jilaqui wejt herman jilaĉha, nižaza Jesucristužtajapa langžni maziĉha, nižaza wejttan chica tjurt'iñi maziĉha. Anĉhucqui Epafrodito jila wejtquin cuchanžquichinĉhucĉha, wejtquiz yanapzjapa. Wejttan žejlcan, wejr zuma atintichiĉha. ²⁶ Nii jilaž tjapa anĉhucaquiz ancha cjuñtiquiztan wejrqui tantiichinĉha, anĉhucaquin nii cuchanzjapa. Anĉhucqui Epafrodito jila laaquita quinto nonzinĉhucĉha. Epafrodito jilaqui jalla niiz quinto anĉhucaquin irantitiquiztan kuz turwaysi cjisĉiĉha, anĉhuc cjuñžcu. ²⁷ Ultim werara laataĉha, nižaza ticzmayataĉha. Pero Yoozqui niizquiz ancha okžcu ĉhjetinĉiĉha. Yoozqui wejtquizimi okzizakazza. Ana ĉhjetintaž cjitasaž niiqui, wejttaqui juc'ant llaquiz cjitasaĉha. ²⁸ Jalla nižtiquiztan wejrqui tii jila juc'ant cuchanžquiz pecuĉha, anĉhucqui tii jila cheržcu cuntintu cjequiĉha, nižaza wejrzakaz anĉhucaž cuntintu cjen, upa llaquisatĉha. ²⁹ Nii jila zuma cuntintu kuztan risiwaquiĉha, zuma Jesucristo Jilirizquin criichi žoñiĉha niiqui. Jalla nižta jilanacžquiz rispitspanĉha. ³⁰ Tii Epafrodito jilaqui ticzmayapantaĉha, Cristužtajapa sirwican. Jos ticziĉha, anĉhuca cuntiquiztan wejtquiz tii carsilquin atintican. Jalla nižtiquiztan niizquiz zuma risiwaquiĉha.

¹Jilanaca, cullaquinaca, tsjiilla cjesača. Cristuž mantuquiz žejlcan cuntintuž cjee. Tuqui ančhucaquin cartal cjjirchinča, tsjii kjaž puntunacquiztan. Jalla nii puntunacquiztan wital cjjirz pecuča. Wejtta ana molističa nii wilta cjjirzqui. Ančhucaltajapaqui ancha walipanča jalla nii puntunaca wilta cjjirzqui. ²Ančhucqui ana wal žoñinacžquiztan cwitaza. Ana wal pacužtakaza ninacaqui. Ana wali paañinacača ninacaqui. Chimpuchiz cjisjapa žoñinacž curpu pootñiča. ³Učhumqui lititum Yooz partir žoñinacača, nižaza učhum kuznacquiz Yooziž chimputapanča. Yooz Espiritu Santuž učhum kuznacquiz luzziž cjen, Yooz rispitiñčumča. Nižaza Jescristužquin kuz tjaachiž cjen učhumqui cuntintučumča. Učhumqui anača žoñiž pinsita custurumpiquiz kuz tjaachinčumqui, Yooz partira cjisjapaqui. ⁴Ima Jesucristužquiz kuz tjaacan, wejttaqui razunanaca želatča, “Yooz partiquiz želuča” cjisjapaqui. Jakziltat persun razunanacquiztan pinsičhaja, “Wejrqui Yooz partiquiz želuča” cjicanaqui, jalla nižta chiiñi žoñžquiztan wejttaqui juc'anti razunanaca žejlča, “Yooz partiquiz želuča” cjisjapaqui. ⁵Jalla tužuča wejt razunanacaqui: maaž majttiquiztan quinsakal tjuñquiztan persun curpuquiz chimputapantača. Wejrqui Israel wajtchiz žoñtča. Benjamin familliquiztantča. Hebreo tawkchiz žoñtča majttiquiztanpacha. Nižaza wejt maa ejmi hebreo chiiñizakazza. Judío lii puntuquiztan fariseo partir tjaajinta jaru kamiñpantača. ⁶Anča tjapa kuztan judionacž lii jaru kamz pecquiñtača. Jalla nižtiquiztan Jesucristužquin criichi žoñinaca sufriskatiñtača. Judionacž lii jaru kamz puntuquiztan wejrqui zuma cumpliñtača. Anaž jecmi wejt puntuquiztanaqui “Amqui anam judionacž lii jaru kamča” cjican chii atchiča. Wejt kamzqui litituma lii jarupantača. ⁷Tuquiqui tjapa nii puntunacaqui wejtquiztan ancha walñiča. Anziqui tjapa nii puntunacaqui wejtquiztan ana zinta walča, Jesucristuž tjapa walchiž cjen. ⁸Jesucristo wejt Jiliri tsjan zuma pajzpanqui, jalla niikaz wejtquiziqui walča, tjappachquiztan juc'anti. Jalla nižtiquiztan tjapa žoñiž pectanaca wejtquiztan ana zumanacažtakal nayuča. Wejtquiztan anaž iya čhjulumi walča. Jesucristuž partiquiz cjisjapa wejrqui tjapa žoñiž pectanaca ana kuz tjaa-uča. Ninaca ecchinča. Jaziqui ana criiñi žoñiž pectanaca cjujchinacažtakal nayuča Cristuž partiquiz žejljapa, ⁹nižaza Cristužtan tsjii kuzziz cjisjapa. Jesucristupankaz wejtquiztanac walča wejr Yooz yujcquiz ana ujchiz cjisjapa. Wejt persun pinsita jaru kamtasaz niiqui, nižaza judionacž lii jaru kamtasaz niiqui, Yooz yujcquiz tirapan ujchiz cjitasacha. Pero Yooz yujcquiz ana ujchiz cjisjapa, Jesucristužquin ultimpacha kuzziztča wejrqui. Jesucristužquin kuzziz cjen, Yoozqui wejtquiz nayča, ana ujchiz nižaza zuma, jalla nii. ¹⁰Wejrqui pecuča tužu, Cristo tsjan zuma pajz, jalla niiča. Nižaza Jesucristuqui jacatatan, anča aziž tjeeziča. Jalla nižta azziz cjis pecuča. Nižaza jaknužt Jesucristuqui sufritčhaja, jalla nuž sufris zakal pecuča, niž partiquiz cjissiž cjen. Nižaza jaknužt Jesucristuqui ticztčhaja, jalla nižtakaz ticzižtakal žejlz pecuča, ana uj paacan žejljapa. ¹¹Jalla nuž Cristužtajapakaz kamcan, wejrqui ticžu tjewznuča, jacatatzjapa, jalla nii.

YOOZ IRATA ZUMA KAMAÑCHIZ CJIS PECČHA PABLUQUI

¹²Tuž cjiwča. Wejrqui tii muntuquiz žejlcan, Cristužtajapa awisaqui ana zuma kamuča. Imaziča Yooz irata zuma kamañchiz žejlzquinaqui. Jalla nuž cjenami, wejrqui tirapan kuz tjaa-uča, nižaza tjurt'uča, Yooz irata zuma kamañchiz cjisjapa. Jalla nižta wejr cjisjapaqui Jesucristuqui wejr liwriichiča. Nižaza wejr liwriichiča niž mantuquiz cjisjapa. ¹³Jilanaca, cullaquinaca, wejrqui tuž cjiwča, wejrqui imaziča Yooz irata zuma kamanchizqui cjicanaqui. Pero tuž cjiwča, wejt tuquita ana zuma kamaña ecuča. Nižaza anča tjapa kuztan tjurt'uča, juc'ant zuma kamañchiz cjisjapa. ¹⁴Tira tjurt'uča, Yooz irata zuma kamañchiz cjisjapa, nižaza Yoozquiztan tsjii zuma premio ganzjapa. Jesucristuž partiquiz žejlchiž cjen Yoozqui wejr arajpachquin kjawznaquiča. Nekztan juc'ant zuma kamañaž tjaquičha.

¹⁵Tjapa ančhuc Yoozquin kuz tjurt'ichinaca wejr irata cjee. Ančhucaž pinsitaqui tsjii puntu ana wejr iratažlaj niiqui, Yoozqui ančhucaquiz nii puntu zizkataquiča litituma pinzizjapa. ¹⁶Tii zakal cjiwča. Anzcama jaknuž Yoozqui učhumnacaquiz niž kamañ puntuquiztan zizkatčhaja, jalla nii zizkatta kamañ jaru kamstanča.

¹⁷ Jilanaca, cullaquinaca, weriž kamta irataž kama. Nižaza jakzilta criichinacat weriž kamta irata kamčhaja, jalla ninacžquin yatekaza, juc'ant zuma kamañchiz cjisjapa. ¹⁸ Wejrqui kjaž wilta ančhucaquiz chiižinčinča, nižaza ancha kuzquiz zint'ican kaacan, wilta chiižinuča, jalla tuž cjan. Wacchi žoñinacaqui Cristuž quintra žejlča. Cristuž cruzquiz ticiz cjenami, jalla nii liwriiñi ana juyzu paača. ¹⁹ Ultimquiziqui nii ana Cristužquiz juyzu paañi žoñinacaqui Yooziž castictaž cjequiča. Ninacaž persun kuzquiztan pectanaca rispitcha, tsjii yooztakaz. Azzucanaca paacan, mit kuzzizkazza. Nižaza tii muntu yokquiz žejlñi cusasanacžquizkaz pinsiča. ²⁰ Učhumzti arajpach wajtchiz žoñinacžhumča. Učhumqui arajpachquiztan učhum Liwriiñi, Jesucristo Jiliri, tjewža. ²¹ Jesucristuqui wilta tjonžcu učhum ana wal curpunaca tsjemataž tuckataquiča, niiž irata zuma curpuchiz cjisjapa. Niiž persun aztan učumnaca curpu jalla nižta tsjemata tuckataquiča. Nižaza niiž persun aztan čhjultakimi niiž mantuquiz cjskatakaquiča.

4

YOOZQUIN KUZZIZ CJEN CUNTINTUPANŽ CJEE

¹ Weriž pecta jilanaca, cullaquinaca, ančhucaquin ancha tjonz pecučha. Ančucaž cjen, cuntintuž wejrqui, nižaza ančucaž cjen honorchiz cjeeča. Pecta jilanaca, cullaquinaca, Jesucristo Jiliržquin tjurt'ichi kuzziz cjee.

² Evodia cullaca, nižaza Sntique cullaca, ančhucqui Jesucristo Jiliržquin criichiž cjen tsjii kuzziz cjee. ³ Wejt lijitum Cristužquiz sirwiñi mazi, amquiz rocuča, tii pucultan cullaquinacžquiz yanapt'alla, porapat zuma munaziñi kuzziz kamzjapa. Nii pucultan cullaquinacaqui wejtjan chica liwriiñi taku paljaycan langziča. Nižaza nii cullaquinacaqui Clementižtan, nižaza parti wettan chica paljayñi mazinacžtan langziča. Tjapa ninacž tjuunacaqui listitača arajpach žejt liwruquiz.

⁴ Jesucristo Jiliriž cjen cuntintupanž cjee čhjulorami. Wilta cjiwča: cuntintuž cjee. ⁵ Tjapa žoñinacaqui ančhuc zuma kuzziz pajla. Jesucristo Jiliriqi wajillaž tjonaquiča.

⁶ Ana čhjulquiztanami llaquita kuzziz cjee. Antiz čhjulu watanami Yoozquizkaz mayaiza. Yoozquiztan čhjulumu maya, nižaza sparaquiž cjee. ⁷ Jalla nuž kaman, Yoozqui ančhuc kuzquiz cuntintuž cjskatakaquiča. Jaknužt Yoozqui žoñinacž kuzquiz cuntintu cjskatchaja, jalla nii cuntintu cjskattaqui ana intintazasača, žoñiž pinsitiquiziqui. Jesucristužtan tsjii kuzziz cjen ančhuc kuznacaqui cuntintu cjequiča, Yooz cwititiquiz-tanaqui.

ZUMA PINZINACAPANŽ WAQUIZIČHA

⁸ Jilanaca, cullaquinaca, tii zakal cjiwča. Jalla tižta ultim zuma pinzinnaca waquiziča: weraranaca, nižaza rispitsnaca, nižaza Yooz kuzcama kamznaca, nižaza ana uj paaznaca, nižaza tjapa zumapan kamz pecznaca, nižaza zuma quintuchiz cjsinnaca. Jalla nižta zumanaca pinza, nižaza tjapa zuma walinaca pinza.

⁹ Weriž tjaajinta jarumi, nižaza weriž chiita jarumi, jalla nii jarupan kama. Nižaza jaknužt weriž kamta puntuquiztan nonžinčhucčhalaj niiqui, nižaza cherchinčhucčhalaj niiqui, jalla nižta iratapan kama. Jalla nuž zuma kamtiquiztan Yoozqui ančhucatan chicapachaž cjequiča. Nekztan ančhucqui walikaz cjequiča.

PABLUŽQUIN PAAZNACA APAYŽQUITA

¹⁰ Jaziqui ančhucqui wilta wejtquiz cjuñzinčhucča. Jalla nižtiquiztan anča cuntintučha wejrqui, Jesucristo Jiliriž cjen. Jazic wejrqui anal cjis pecučha, wejr tjazikalak, cjanacqui. Antiz ančhucqui yanapz peccanami, ana jaknužumi wejtquiz yanapi atčinčhucča. ¹¹ Wejrqui anal cjiwča, "Ancha t'akjiri želuča", cjanacqui. Wejrqui apren-dichinča, cuntintupankaz žejljapa, čhjulu wejtquiz watanami. ¹² Želinchiz kamcanami, ana želinchiz kamcanami cuntintu želi zizzinča. Čhjulu watanami, čhjerchiz cjanami ana čhjerchiz cjanami, walipankaz želi apren-dichinča. T'akjirižtakaz žejlcanami, ana t'akjiri žejlcanami walipankaz želi apren-dichinča. ¹³ Čhjulu watanami, Jesucristuqui wejtquiz azi tjaañipanča, awantizjapa. Cristuž aztan čhjulumu paachuča. ¹⁴ Jalla

nuž cjenami, ančhucqui walipankaz paachinčhucča, wejtquiz yanapcan, weriž sufrican žejlchiž cjen.

¹⁵ Tuquiqui weriž liwriiñi taku paljayi kalltitan, nižaza Macedonia yokquiztan ulantan, ančhucqui wejtquiz ofrendanacžtan yanapžquichinčhucča. Ančhuca iclizquiztankaz wejtquiz yanapchinčhucča. Wejrqui ančhucaquiz zuma Yooz taku paljaychinča, nižaza ančhucqui wejtquiz cusasanaca tjaacan yanapchinčhucča. Jalla tjapa nii zizza ančhucqui. ¹⁶ Nižaza Tesalónica wajtquiz sufrican želan, ančhucqui ofrendanaca wejtquin apayžquichinčhucča, wilta wilta. ¹⁷ Wejrqui ančhuca ofrendanacquiz anal kuz tjaa-uča. Ančhuca ofrendanacakaz anal pecučha. Pero wejr pecučha, ančhuc arajpachquin juc'ant honorchiz cjisjapa, ančhucaž ofrendanaca tjaatiquiztan. Jalla niil pecučha. ¹⁸ Ančhucaž yanaptiquiztan juc'anti wejtquiz žejlča, ana iyal necesituča. Epafrodito jilaqui ančhucaž apayžquita ofrendanaca wejtquiz intirjichiča. Jalla nižtiquiztan wejtta jilacamača. Jalla nii apayžquita ofrendanacaqui Yoozquiz tsjii zuma ulurchiz inzinzužtakaztača. Nižaza Yooz yujcquiziqui ančhuca ofrendanacaqui tsjii zuma wilanažtakazza. Yoozqui nižtiquiztan cuntintučha. ¹⁹ Čhjularat ančhucqui čhjulunacquiztanami upsi cječhaja, jalla nii oraqi wejt Yoozqui ančhucaquiz juc'anti yanapt'aquiča. Jesucristuž cjen Yoozqui ančhucaquiz yanapt'aquiča, tjapa niižquiz zuma walinaca žejltiquiztanjama. ²⁰ Učhum Yooz Ejpžquiz wiñaya wiñaya honora tjaataj cjila. Jalla nužoj cjila.

²¹ Tsjii cjesača. Tjapa Jesucristužquin criichi jilanacžquin tsaanžinalla. Nižaza tii wejtta chica criichi jilanaqaqui ančhucaquin tsaanžquiča. ²² Tjapa tekžta criichi žoñinacaqui ančhucaquiz tsaanžquiča. Juc'anti ančhucaquiz tsaanžquiča tii Roman chaw jilirž kjuychiz criichi žoñinacaqui.

²³ Učhum Jesucristo Jiliriqui ančhuca kuzquiz zumapaj yanapt'ila. Amén.

LA CARTA DEL APOSTOL SAN PABLO A LOS COLOSENSES

¹Wejrqui Pablutča, ančhucaquin cjiyržcuča. Wejrqui Jesucristuž illzta apostultča, Yooz pectiquiztan. Wejtta Timoteužtan tii carta cjiyržcan ančhucaquin tsaanžcuča. ²Ančhucqui Colosas wajtchiz žoñinacčhucča, nižaza ligitum Yooz parti žoñinacčhucča. Ančhucqui ligitum Jesucristužquin kuzzizčhucča. Jaziqui wejtnac majnacčhucča. Učhum Yooz Ejp ančhucaquin yanapt'ila, nižaza zuma cuntintu kuzziz cjskatla.

PABLUŽ MAYIZITAQUI

³Wejrnacqui čhjulator Yoozquin parlučhaja, učhum Jesucristo Jilirž Yooz Ejpžquin sparaquičha cjiñpanča ančhuca zuma kamčiz cjen. ⁴Ančhucqui Jesucristužquin kuz tjaayinčhucquičha, nižaza parti jilanacžtan zuma munaziñčhucquičha. Jalla nuž zizcu, Yoozquin anča sparaquičž cjičinča. ⁵Jalla nuž zuma kamcan, ančhucqui tjewžquičha, čhjulut Yoozqui arajpachquin ančhucaltajapa zuma panž tjaczaja, jalla nii. Ančhucqui nii Yooz tjacžta kamz puntu zizzinčhucča, werar liwriñi Yooz taku nonžcu. ⁶Nii liwriñi takuqui ančhucaquičž paljaytatačha, nižaza tjapa kjutñi žoñinacžquičž paljaytatačha. Jalla nii taku paljaytiquiztan, tjapa kjutñi žoñinacaqui Yooz zuma kamañchiz cjišičha. Nižaza tjapa kjutñi tsjan tsjan žoñinacaqui liwriñi tawkquičž kuzzizza. Nižaza tsjan tsjan ančhuca wajtchiz žoñinacaqui liwriñi tawkquičž zakaz kuzzizza. Zuma Yooz taku nonztiquiztanpacha tii orcama tsjan tsjan ančhucqui Yoozquin kuzzizčhucča. Nižaza Yooz taku nonžcu zumpacha zizñi cjišinčhucča, Yoozqui žoñinaca anča okzñičha, jalla nii. ⁷Jalla nuž EpafRAS jilaqui ančhucaquin tjaajinchizakazza. Jalla niiqui učhumž pecta jilačha, nižaza niiqui wejtta chica Jesucristo Jiliržtajapa langzičha. Nižaza EpafRAS jilaqui Jesucristužquin sirwiñičha. ⁸EpafRAS jilaqui ančhuca puntu wejtnacaquičž quint'ichičha, jaknužt ančhucqui parti criichinacžtan zuma munazichinčhucžlaja, jalla nii.

⁹Jalla nuž ančhuc zuma kamtiquiztan wejrnacqui ančhucaltajapa Yoozquin mayiziñpanča. Ančhuca puntu nonžcu, Yoozquin mayiziñpanča, tsjan zuma kamajo. Nižaza mayiziñpanča, Yoozqui ančhuc zumpacha zizkatajo, jaknužt niiqui ančhuc zuma kamz munčhaja, jalla nii. Nižaza mayiziñpanča, ančhucqui Yooz kuz zizñi cjisjapa, nižaza Yooz kuz intintazñi cjisjapa. ¹⁰Jalla nuž zizñi nižaza intintazñi cjequičž niiqui, ančhucqui zuma kamaquičha, jaknužt Jesucristo Jilirž partir žoñinacaqui kamstanžlaja, jalla nii. Jalla nuž ančhucaž zuma kamtiquiztan, Yoozqui cuntintuž cjequičha. Nižaza jalla nuž zuma kamcan, ančhucqui tjpaman walinačž paaquičha. Nižaza Yooz puntu juc'ant zuma zizaquičha. ¹¹Jalla nuž ančhucqui zuma kamcan, Yooz aztan kamaquičha, jaknužt Yoozqui zuma tjapa aztančhalaja, jalla nižta aztan. Yooz aztan kamcan, ančhucqui čhjulkiztanami pasinsis kuzziz Yoozquin tjtur'aquičha, nižaza sufricanami cuntintu kuzziz cjequičha. ¹²Nižaza zuma kamcan, ančhucqui Yoozquin sparaquičžpanž cjequičha. Yoozqui ančhuc tjaczičha, arajpachquin irinsa tanzjapa. Yoozqui tjapa criichinacžquin tsjii zuma irinsa tjaaquičha. Nii zuma irinsa ančhucaquičž zakaz tjaata cjequičha. Jaziqui Yoozquin anča sparaquičž cjis waquizičha. ¹³Yoozqui učhum liwriičičha, jalla nižtquiztan učhumqui ana wal Satanás mantuquičž ana iya zejlčha. Yoozqui učhum niž pecta Majch Jesucristuž mantuquičž utčičha. ¹⁴Jesucristuž ticztiquiztan učhumqui Satanás mantuquiztan liwriitačha. Nižaza Jesucristuž ticztiquiztan učhum ujnaca pertuntačha.

JESUCRISTUŽ PUNTUQUIZTAN

¹⁵Tii muntuquičž kamcan Yooz Majchqui ana cherta Yooz Ejpž kuz kjanacama pajkatchičha. Yooz Majchqui tjappachquiztan tsjan jiliričha. ¹⁶Niž cjen tjappacha zejlčha, tjapa arajpachquin žejlñinacami, tjapa yokquičž žejlñinacami, tjapa chertanacami, ana chertanacami, tjapa mantiñinacami, gobiernunacami, jilirinacami, tjapa anjilanacami, tjapa zajranacami, Jesucristo Yooz Majch cjen, tjappacha zejlčha. Nižaza nižtajapa

tjappacha paatacha, niizquiz honora waytizjapa. ¹⁷ Jesucristuqui žejlchiča, primerquiztanpacha, nižaza tjapa žejlñinacž tuquitanpacha. Niiž cjen tjappacha žejlča. ¹⁸ Nižaza Jesucristuqui Yooz partir žoñinaca mantiča. Jaknužt persun žoñž kuz persun curpu mantičhaja, jalla niža irata Jesucristuqui niiz icliz žoñinaca mantiča. Niiž cjen niiz icliz žoñinacaqui Yooz kamañchiz cjsiča. Niiča primera ticžcuqui jacatatchiqui, tjappachquiztan tsjan jiliri uchta cjisjapa. ¹⁹ Yooz Ejpžtan Yooz Majchtan tsjii kamañchizpanča. ²⁰ Nižaza Jesucristuž ticziž cjen, tjappacha pertunta cjesača, yokquiz žejlñinacami, ana yokquiz žejlñinacami. Jalla nuž Yooz Ejpqui munchiča. Jesucristuž cruzquiz ch'awcta ticziž cjen, Yooz Ejpžtan parti žejlñinacžtan zumanskattaž cjesača. Jalla nuž munchiča Yooz Ejpqui.

²¹ Tuquiqui ančhucqui Yoozquiztan yekjatača, nižaza Yooz quinratača ančhuca kuzquiz. Tuqui ančhucqui ana wali pinsiñchuctača, nižaza Yooz quintra ana wali paayiñchuctača. Jalla nuž ana wali kamta cjenami Yoozqui ančhuc pertunchiča, niižtan ančhucatan wali cjisjapa. ²² Jesucristuž cjen Yooz Ejpqui ančhuc pertunchiča. Jesucristuqui ančhuc irata curpuchiz cjan, ančhuca laycu ticziča. Ančhuc laycu ticziča, Yooz yujcquiz ančhuc ana ujchiz Yooz irata zuma kamañchiz prisintiskatzjapa. Jalla nuž Yooz yujcquiz zuma cjan anaż jecmi ančhucaquiz tsjii uj tjojtunz atasacha. ²³ Jalla nuž Yoozatan ančhucatan wali cjisjapa, ultimu chekpacha Jesucristužquiz kuzzizpanča. Nižaza ančhucqui Jesucristužquiz tjurt'iñi kuzziz cjistanča, ana wira jaytistanča. Tii muntuquiz liwriiñi tawk jaru kamñi cjistanča, arajpach zuma kamaña tjewžcan. Nii liwriiñi taku nonzinčhucča. Nižaza nii liwriiñi takuqui tjapa kjutñi tii muntuquiz paljaytatača. Nii taku paljayzjapa, wejr Pabluqui apóstol oficiuquiz uchtača.

PABLUQUI APOSTOL KAMAÑCHIZZA

²⁴ Wejt Yooz tjaata oficio cumplican, ančhucaltajapa sufruča. Jalla nuž sufrican wejrqui cuntintuča. Ančhuc zuma kamañchiz cjisjapa yanapñiž cjen, wejrqui cuntintuča. Nižtami iya sufristanča. Jalla nuž wejt curpužtan sufrican, Cristuž partir žoñinacaltajapa wejt sufrisnaca compližinuča. Cristužquiz kuzziz cjen niža sufruča. Cristuž partir žoñinacaqui Cristuž icliz žoñinacača. ²⁵ Wejrqui Cristuž partir žoñinacžquin sirwizjapa, apóstol oficiuquiz uchtača. Yoozqui ančhucaltajapa nii oficiuquiz wejr utchiča. Wejrqui uchtača Yooz taku zumpacha zizkatzjapa, ²⁶ nižaza Yooz pinsita zizkatzjapa. Jalla nii Yooz pinsitaqui tuquitanpacha chjojtatača. Jalla nižtiquiztan tjapa žoñinacaqui ana zizzucatača. Jazikaz Yoozqui niiz pinsita zizkatchiča niiz partir žoñinacžquiz. ²⁷ Yoozqui niiz partir žoñinacžquiz niiz tuqita chjojta pinsitaqui zizkat munchiča. Nii pinsitaqui ancha zumača ana judío žoñinacžtajapaqui. Jalla tiča nii tuqita chjojta pinsitaqui: Jesucristuqui ančhuca kuzquiz žejlča. Jalla nižtiquiztan ančhucqui Cristužtan arajpachquin ancha zuma kamaquiča. Jalla nii zuma kamaña tjewža ančhucqui.

²⁸ Jesucristuž puntu paljayuča, tjapa žoñinacžquin chiižincan, nižaza tjaajincan. Jalla nuž chiyancan, Yoozqui wejr yanapča zizñi zizñi chiyajo, tjapa Jesucristužquin kuzziz žoñinaca Yooz irata zuma kamañchiz cjejajo. ²⁹ Nižaza apóstol oficiuquiz ojklaycan, ancha langznuča, tjapa Cristuž tjaata aztan langznuča, tjapa jilanaca Yooz irata zuma kamañchiz cjskatzjapa.

2

¹ Jalla nuž ančhucaquin maznuča, weriž ančhucaltajapa langžta zizkatzjapa. Tjapa kuztan langznuča, ančhucaltajapami, nižaza Laodicea cjita wajtchiz žoñinacžtajapami, nižaza tjapa ana wejr cherchi criichinacžtajapami. ² Jalla nuž tjapa aztan langznuča, Yoozquin criichi žoñinacž kuzquiz zumpacha p'ekinchayta cjisjapa, nižaza tsjii kuzziz cjisjapa, nižaza porapat zuma munaziñi kuzziz cjisjapa. Nižaza langznuča, Yooz chjojta pinsita puntu zumpacha intintizkatzjapa. Jalla nuž zumpacha intintazcu, ančhucqui tjurt'iñi kuzziz cjequiča. Jalla nii tuquitan chjojta Yooz pinsitaqui Cristuž puntuča. Wejrqui Cristuž puntu paljaycan langznuča. ³ Cristupankaz Yooz puntu ligituma zizñi

cjiskatasächa, nižaza tjapa Yooz puntu intintazni cjiskatasächa. ⁴ Jalla niil ančucaquiz cjiwčha, ana jakziltami ančucaquiz incallzjapa, tsjii zuma takužtakaz chiican. ⁵ Ančhucatan ana žejlcanami, wejt persun kuzquiz ančucaquiztan anchal cjuñznuča. Wejrqui ančhuca puntu naychinča, tsjii kuzziz kamčha, nižaza Jesucristužquin criičzu tjurt'ichi kuzzizčhucča. Jalla nižta nayčzu wejrqui chipznuča.

⁶ Tuquiqui ančhucqui Jesucristuž puntu tjaajintan tjapa kuztan catokchinčhucča. Nuž catokčzu Jesucristuž mantuquiz cjissinčhucča, niiqui ančhuca jiliri cjisjapa. Jalla nuž Jesucristuž mantuquiz tirapan kama. Nižaza nižquin tsjii kuzziz cjee. ⁷ Nekztan niž puntu tsjan tsjan zizni cjequičha, nižaza nižquin tjurt'ichi kuzziz kamaquičha. Jalla nuž ančhucqui tjaajintatača. Nižaza čhjuulu watanami ančhucqui Yoozquin sparaqizpanž cjis waquizičha.

CRISTUŽ CJEN EW KAMAÑA ŽEJLČHA

⁸ Ančhucqui cwitzazuquičha, tsjii kjutni ana chjichta cjisjapa. Yekjapanacaqui ančhuc incallskatz pecča, zuma razunanacažtakaz chiican, nižaza toscar takunacžtan chiican. Jalla nižta tawkchiz žoñinacaqui Cristuž pinsita jaru anaž chiiča. Pero žoñiž pinsita jarukaz chiiča. Nižaza zajranacž pinsitanac jarukaz chiiča. Jaziqui nižta chiiñi žoñinacžquiztan cwitzazuquičha.

⁹ Cristuquui tii muntuquiz kamcan žoñž curpuchiztača. Nižta curpuchiz cjenami, Cristuquui Yoozpankazza, nižaza Yooz kamañchizpankazza. ¹⁰ Cristužtan tsjii kuzziz cjan ančhucqui Yooz kamañchizpan žejlča. Nižaza Cristuča wali pajk jiliriqiu tjapa mantiñinacžquiztanami, tjapa poderchiznacžquiztanami. ¹¹ Cristužtan tsjii kuzziz cjan, ančhucqui kuzquiz chimpata cjissinčhucča. Žoñiqui ana ančhuc chimpuchiča. Pero Jesucristuquui ančhuca kuz chimpuchiča. Nii kuzquiz chimpataqui tuž cjiča: Yooz partir žoñinacača, jalla nii. Cristuquui niž partir žoñinaca uj paaz pecni kuzquiztan jaytiskatchičha. ¹² Jesucristužquin kuz tjaatiquiztan bautista cjissinčhucča. Bautistaqui tuž cjiča: Jaknužt Cristuž curpu tjažtažlaja, jalla nižta irata ančhuca tuquita ana wal kamaña tjažtazakazza. Nižaza jaknužt Jesucristuquui jacatatčzu Yooz kamaña tanžčhaja, jalla nižta irata zakaz ančhucqui Jesucristužquin kuzziz cjen Yooz kamaña tanzinčhucča. Yoozqui ticzinaca jacatatskatzjapa azzizza. Jalla nii azziz Yoozquin criičzu, Yooz kamaña tanzinčhucča, Yooz kamañchiz kamzjapa. ¹³ Tuquiqui ančhucqui ana curpuquiz chimpatača, judío žoñinacž partira cjisjapa. Ana chimpuchiz cjan, nižaza ujnaca paacan, ticzi žoñinacžtakaztača ančhucqui. Jaziqui Cristužtan tsjii kuzziz cjen Yoozqui ančhucaquiz niž ew kamaña tjaachiča. Nižaza tjapa učhum ujnaca pertunchičha. ¹⁴ Uj paatiquiztan tsjii acta želatča učhum quintra. Jesucristuž učhum laycu ticziž cjen Yoozqui nii acta jurkatchičha, tjapa učhum quintra puntuquiztan. Anulta cjissiča, Jesucristuž cruzquiz ch'awcta ticziž cjen. ¹⁵ Cristuž cruzquiz ch'awcta ticztiquiztan, Yooz Ejpqui atipchiča tjapa anawal jilirinacami nižaza poderchiznacami. Yoozqui nii anawal azziz ispiritunaca ana azziz cjiskatchičha. Kjanapacha azkatchičha, prisu tanta žoñinacžtakaz. Yoozpankazza tjappacha atipchiqui.

ARAJPACH KAMAÑCHIZ CJISPANČHA

¹⁶ Jalla nižtiquiztan anaž jecmi ančhucaquiz uj tjojtasača, tuquita mantinanaca jaru ana kamtiquiztan. Tuquitan Yoozqui puntu puntu mantichiča, lujlz puntu, licz puntu, pjijsta puntu, ew jiiž puntu, jeejz tjuñi puntu, jalla nuž. ¹⁷ Tuquitan Yoozqui tjapa nii puntunaca mantichiča, Yooz kuz koloculla tjeezjapa. Pero Cristupankaz ultim werara Yooz kuz tjeēja. ¹⁸ Ančhucqui Jesucristužquin kuzziz cjen, anaž jecžquizimi ančhucaquiztan arajpach premio kjankataquičha. Yekjap žoñinacaqui mit kuzziz cjenami, ana mit kuzziz tjeēja. Nižaza anjilanacžquiz rispatajo tjaajža. Nuž tjaajni žoñinacaqui anchuc incall pecča, čhjuužta puntunaca ancha paljaycan. Ninacaqui inakaz mit kuzzizza. Ana wal pinsita jarukaz tjaajža. Nuž tjaajincan mit kuzziz cjissa. ¹⁹ Ninacaqui Cristo Jiliržquiz ana tsjii kuzziz tjurt'ichi žejlča. Pero Cristupankazza criichinacž jiliriqiu. Niiž cjen tjapa criichinacaqui tsjan tsjan zuma kamañchiz cjisnasača. Nižaza Cristuž cjen

tjapa criichi žoñinacaqui tsjan tsjii kuzziz cjisnasača. Jaknužt žoñž curpuqui, yekja yekja cjenami, tsjii curpuchizkazza, jalla nižta irata criichi žoñinacaqui, yekja yekja cjenami, tsjii kuzzizkazza.

²⁰ Ančhucqui Jesucristužquin kuzziz cjen, ujchiz žoñinacaž pinsitanacquižtan t'akzinčhucča. Nii ana wal pinsitanacquiž ojklaz cjenpacha, ticzi žoñinacažtakaz katzinčhucča. Jalla nižtiqiztan, ¿kjažtiqiztan ančhucqui ujchiz žoñinacaž pinsita jaru wilta kamjo? ¿Nižaza ninacž lii jaru ojklajjo? ²¹ Ninacž liiqui tuž cjiča: Tiinaca ana kjaržtan tanžla, nižaza tiinaca ana lujl-la, nižaza tinaca ana čhjul lanžla. Jalla nuž cjiča ninacž liiqui. ²² Nii liinacaqui tii muntuquiz žejlñi cusas puntukazza. Nii cusasanacaqui tucuzinzaquičha. Nii liinacaqui žoñiž pinsita mantita jarukazza. ²³ Ninacž liinacaqui zizñi pinsitažtakazza. Pero ultimquiziqui inakazza. Ana azzizza, žoñinaca zuma kamañi yanapajo. Cuzturrumpinaca ijzijcan mantiča, nižaza humilde kuzziztakaz mantiča, nižaza persun curpu sufriskatzjapa mantiča. Jalla nuž mantita liinacaqui zizñi pinsitažtakazza. Pero ultimquiziqui inakazza. Uj paaz pecñi kuz tjonanaqui anaž nižta kuz ewjazi atasacha nii liinacaqui. Jaziqui ančhucqui ninacaž inakaz tjaajintaqui anaž nonznaquičha.

3

¹ Ančhucqui Yooz kamañchizza. Jaknužt Jesucristuqui jacatatžcuqui Yooz kamaña wilta tanzizlaja, jalla nižta irata ančhucqui Yooz kamaña tanzinčhucča. Jalla nižtiqiztan ančhucqui arajpach Yooz kamañquizkaz kuz tjaa. Jalla nicju arajpachquin Cristo žejlča; Yooz Ejpž žew latuquiz julzi žejlča, mantican. ² Ujchiz žoñž kamañquiz ana kuz tjaa. Arajpach kamañquizkaz kuz tjaa. ³ Ančhucqui Jesucristužquin kuz tjaachiž cjen, ančuca tuqita ana wal kamaña ecchinčhucča. Jaziqui ančuca Yooz kamañaqui Yooztajapa žejlča. Ana criichi žoñinacžtajapa ančuca Yooz kamañaqui chjojžtažtakaz žejlča. Ana wira intintazzucača. ⁴ Cristuqui ančucaquiz Yooz kamaña tjaachiča. Jalla nižtiqiztan čhjulorat tjapa žoñinacaqui Jesucristužquiz pajchi cječhaja, jalla nii ora zakaz ninacaqui ančuca Yooz kamaña pajchi cjequičha. Jalla nii oraqui ančhucatan Jesucristužtan honorchiz cjequičha.

TUQUITA KAMAÑ PUNTU, JAZTA KAMAÑ PUNTU

⁵ Jalla nižtiqiztan ančuca tuqita ana wal kamaña liwj jayta. Anaž adulteriuquiz ojklazqui. Anača luctak žoñiqui yekja maatak žonatan ojklazqui. Anača ančuca ana wal paaz pecñi kuz jaru ojklazqui. Anača čhjul ana walimi peczqui. Anača yekja žoñž čhjultakimi zmazqui. Jalla nuž zmaznaquič niiqui, žoñiž paata yoozquiz rispitažokazza. Jalla nii anawali paaznacquižtan liwj jayta. ⁶ Nii ana wali paañi žoñinacžquiz Yoozqui ancha casticu tjaaquičha, Yooz kuzcama ana kamtiqiztan. ⁷ Ančhucqui tuqita ana wal kamañquiz ojklayan, nižtanacaž paa-atča. ⁸ Jaziqui ančhucqui nii ana wal paaznaca liwj eca. Anača žawjchi kuzziz žejlzqui. Anača culirazzi kuzziz žejlzqui. Anača ana wal paaz pecñi kuzziz žejlzqui. Anača žoñž quintra ana wali taku chiizqui. Anača ana wal tawkžtan chii chiican žejlzqui. ⁹ Anača toscar taku chiizqui. Ančhucqui tuqita ana wal kamaña ecchinčhucča. Jalla nižtiqiztan ančhucqui nii ana wal paaznacquiž ana iya ojklaz waquiziča. ¹⁰ Ančhucqui Yooz kamañchiz cjissinčhucča. Yoozpacha ančucaquiz Yooz kamaña tjaachiča. Nižaza ančhucqui Yooz irata zuma kamañchiz tsjan tsjan cjissa, Yooz zumpacha pajañcama. ¹¹ Yooz kamañchiz cjican, tjapa criichi žoñinacaqui Yooz yujcquiziqui tsjiikazza. Tuqita kamañanacaqui anaž walča. Pero Cristo kamañchiz kaz walča. Tsjii griego walja zizñi kamañami anaž walča. Tsjii judío lii jaru kamañami anaž walča. Tsjii curpuquiz chimpata žoñž kamañami anaž walča. Tsjii curpuquiz ana chimpata žoñž kamañami anaž walča. Tsjii k'ar žoñž kamañami anaž walča. Tsjii q'uit žoñž kamañami anaž walča. Tsjii piyunažta žoñž kamañami anaž walča. Tsjii patrun žoñž kamañami anaž walča. Cristuž kamañapankaz walča. Nižaza Cristupankaz tjapa criichi žoñinacž kuzquiz žejlča.

¹² Ančhucqui Yooz illzta žoñinacčhucča. Jalla nižtiqiztan Yooz zuma kamañ jaru kamstanča. Yoozqui ančhucatan zuma munaziča. Yooz partir žoñinaca cjan, jalla tuž kama: Okzñi kuzziz, nižaza zuma kuzziz, nižaza ana mit kuzziz, nižaza humilde kuzziz, nižaza pasinziz kuzziz, nižaza ¹³ porapat pertunasñi kuzziz. Jalla niža kamz waquiziča. Tsjii criichi žoñiqui yekja criichi žoñž quintra quijchi cjesaž niiqui, zuma kuztan pertunz waquiziča, jaknužt Jesucristuqui ančucaquiz pertuntčhaja, jalla nuž. ¹⁴ Jalla tužuča chekanaqui, porapat zuma munazizza, jalla nii. Jalla nuž zuma munazican, zuma kuzziz zuma kamaquiča, Yooz irata zuma kamaña cumplañcama. ¹⁵ Ančhuc criichinacaqui, Cristuž cjen ančhucqui llan kuzziz cjesača. Jaziqui llan kuzziz cjee, porapat zuma munazican zuma kamzjapa. Jalla nuž porapat zuma kamzjapa, Yoozqui ančhuc liwriichiča. Jalla nuž liwriiču, Yoozqui tjapa ančhuc criichinaca tsjii t'akquizkaz cjiskatchiča. Tsjii curpuchiztakazza ančhucqui. Jalla nižtiqiztan ančhucqui Yoozquin ancha sparaqiz cjan, mayiziz waquiziča.

¹⁶ Ančhucqui Cristuž puntu zuma zizcan porapat tjaajsarasaquiča, nižaza Cristuž tawkžtan porapat p'ekinčayrasaquiča. Nižaza ančuca kuzquiz Cristuž taku zumpacha catokz waquiziča. Nižaza Yooz takumi, Yooz wirsumi itsnaquiča, ančuca kuzquiz Yooz ancha cjuñcan. ¹⁷ Ančhucqui Cristuž partir žoñinacčhucča. Jalla nižtiqiztan čjulu paacanami čhiicanami, zuma kamañchiz kamz waquiziča. Nižaza čjulu watanami Jesucristuž cjen Yooz Ejpžquin sparaqiz cjan tjaaz waquiziča.

PORAPAT ZUMA KAMZ PUNTU

¹⁸ Maatakanaca, persun luctakanacž mantuquiz cjee. Jesucristo Jiliržquin kuzziz cjan, jalla nuž waquiziča. ¹⁹ Luctakanaca, persun maatakanacžtan zuma munaziñi cjee. Nižaza anaž persun maatakanaca chjaawj chjaawjwa. ²⁰ Maatinaca, persun maa ejpžquiz casa, čjulu mantanami. Jalla nuž maa ejpž mantita casaquiz niiqui, amiž cjen Jesucristo Jiliriqui cuntintuž cjequiča. ²¹ Ejpna, anaž persun maatinaca žawjwa zjicna, upa kuzñi ana cjisjapa.

²² Piyunanaca, am persun patruna čjulu mantanami caspanča. Anača cherankaz c'unchikaz tuczqui. Pero tjapa kuztan nižtajapa langz waquiziča. Yooz patruna cjuñžcu, zuma langz waquiziča. Anača langzqui ančuca patrunž kuz wali cjiskatzjapakaz. ²³ Čjulu langzcanami tjapa kuztan langznaquiča, Yooz Patrunžtajapa langznaquiča, ana žoñžtajapakaz langznasača. ²⁴ Ančhucqui tuž zizza, Yooz Patrunžquiztan arajpach irinsa tanznaquiča. Ultimu Yooz Patrunaqui ančucaquiz pacaquiča. Nižaza ultimu ančhucqui Jesucristo Patrunžquiz sirwiča. ²⁵ Nižaza jakziltat ana wali paačhaja, jalla niiqui castictaž cjequiča niž ana wali paatiquiztan jama. Yoozqui ana žoñi illillza.

4

¹ Patrunanaca, ančhucqui persun piyunanacžtan zuma litituma cjistanča. Ančhucqui tuž zizza, ančhuc zakazza Patrunchizqui. Jalla niiča arajpach Yoozqui.

² Tjapa criichinaca, ančhucqui mayizicanpan želaquiča. Nižaza Yoozquin mayizican ana tjtazna, Yoozquin sparaqiz cjisjapa. ³ Wejtnacaquiz zakaz mayizican yanapalla, wila Yooz takunaca paljayñi ojklajzjapa. Cristuž puntuquiztan tuqita chjojta taku paljayz pecuča. Jalla nuž paljaytiqiztan wejrqui carsilquiz želuča. ⁴ Mayizican wejtquiz yanapalla, Cristuž puntu kjanapacha paljayzjapa, jaknužt wejrqui kjana paljayz waquizučhaja, jalla nii.

⁵ Ančhucqui ana criichinacžtan kamcan, walja zizñi zizñi ojklayaquiča. Čhjulator Cristuž puntu paljaychucažlaj niiqui, panž paljayaquiča, ana criichinacžquiz nonzkatzjapa. ⁶ Jalla nuž Yooz taku paljaycan zuma tawkžtan čhiyaquiča. Jaknužt yacuqui tsjii lak'a čjherquiz zuma saborchiz paačhaja, jalla nii irata ančuca zuma takunacaqui Cristuž puntunaca zuma saborchiztakaz paaquiča. Jalla nuž zuma takunacžtan paljaycan, ančhucqui zapa maynižquiz jaknužt kjaaz waquizičhaja, jalla niiqui zizaquiča.

⁷ Jilanaca, cullaquinaca, učhum pecta Tíquico jilaqui tjapa wejt puntuquiztan ančhucaquin quint'aquiča. Tiquicuqui wejtquiz ancha zuma yanapñipanča. Yoozquin tjurt'iñi kuzzizza. Nižaza wejttañ chica Yooztajapa sirwichiča. ⁸ Wejt puntuquiztan quint'izjapa ančhucaquin nii cuchanžcuča. Nižaza cuchanžcuča, ančhuca kuzquiz zumpacha p'ekinchayzjapa. ⁹ Niižtan chica Onésimo pecta jila cuchanžcuča. Onésimo jilaqui Yoozquin tjurt'iñi kuzzizzakazza. Nižaza ančhuca wajtchiz žoñiča. Jalla nii pucultanaqui tjapa tekz watchinaca quint'aquiča.

¹⁰ Aristarco jilaqui wejttañ chica carsilquiz chawcta maziča. Niiqui ančhucaquin tsaanžquiča. Nižaza Marcos jilaqui ančhucaquin tsaanžquiča. Marcos jilaqui Barnabež famillžquiztanča. Tuquiqui wejrqui Marcos puntu ančhucaquiz chiičinča. Marcos jilaqui ančhucaquin tjonaužž niiqui, ančhucqui zumaž risiwaquiča. ¹¹ Nižaza Jesusaqui ančhucaquin tsaanžquiča. Jesusaqui Justo cjitazakazza. Niinacakazza judfo criichinac-quiztan wejttañ chica Yooztajapa langžninacaqui, Yooz mantita kamañ puntu paljaycan. Ninacaqui wejtquiz ancha kuzziča. ¹² Nižaza Epafra jilaqui ančhucaquin tsaanžquiča. Epafra jilaqui Jesucristužtajapa sirwiñiča. Jalla niiqui zakaz ančhucaquiztanča. Jalla niiqui tjapa kuztan ančhucaltajapa Yoozquin mayiziñipanča, ančhucqui tjurt'ichi kuzziz cjisjapa, nižaza tjapa kuztan Yooz munaña kamañ jaru kamzjapa. ¹³ Wejrqui Epafra puntuquiztan ticlaruča, niiqui ancha langziča ančhucaltajapami. Nižaza Laodicea wajtchiz criichinacžtajapami, nižaza Hierápolis wajtchiz criichinacžtajapami Epafra jilaqui ancha langziča. ¹⁴ Nižaza Lucas jilaqui Demas jilžtan ančhucaquin tsaanžquiča. Lucas pecta jilaqui kullñi medicuča.

¹⁵ Laodicea wajtchiz criichi jilanacžquin tsaanžinalla. Nižaza Ninfas jilžquiz tsaanžinalla. Nižaza niiž kjuyquiz ajczñi criichinacžquiz tsaanžinalla. ¹⁶ Tjapa ančhucqui tii carta liižcu, Laodicea iclizquin apayžcaquiča, nezk liyajo. Wejrqui tsjii carta cjiyrčinča Laodicea criichi jilanacžquin. Ančhuczakaz nii carta liyaquiča. ¹⁷ Ančhucqui Arquipo jilžquiz chiižinaquiča, tuž cjican: “Jesucristo Jiliriqui am tsjii puestuquiz utchiča, niižquiz sirwizjapa. Nii Jesucristuž tjaata puestuquiz žejlcan, zuma cumplistanča”.

¹⁸ Wejr Pabluqui persun kjaržtan tii tsaañta letra cjiyržcuča. Wejrqui carsilquiz želuča, jalla nii cjuñzna. Yoozqui ančhucaquiz zumaj yanapla. Jalla nužoj cjila. Amén.

PRIMERA CARTA DEL APOSTOL SAN PABLO A LOS TESALONICENSES

¹ Wejr Pabluqui, Silvanužtan, Timoteožtan, tii cartal cjjržcuča ančhuc Tesalónica wajtchiz žoñinacžquin. Nii wajtquiz icliz žoñinacžhucča ančhucqui. Nižaza Yooz Ejpžtan Yooz Majchtan tsjii kuzzizčhucča. Jalla nižtiquiztan učhum Yooz Ejpžtan, nižaza učhum Jesucristo Jilirizžtan ančhucaquiz yanapt'ila. Nižaza zuma cuntintu kuzziz walikaj kamkatla.

JESUCRISTUŽQUIN ANCHA KUZZIZ ŽOÑINACA

² Wejrnacqui tjapa ančhucadž cjen tirapan Yoozquin sparaquiž cjiwča. Yoozquin mayizican ančhucaltajapa wiltan wiltan mayizuča. ³ Učhum Yooz Ejpžquin mayizican, cjuñznuča ančhucadž zuma Yooztajapa trabajtiquiztan. Ančhucqui Jesucristužquin kuzziz cjen Yooztajapa tjapa kuztan trabajčha. Nižaza anchuziñi kuzziz cjen, Yoozquin zuma sirwiča. Nižaza Jesucristo Jilirž tjonz tjuñi tjewzcan, zuma tjurt'iñi kuzzizčhucča. Jalla nuž ančhucaquin cjuñžcu Yooz Ejpžquin sparaquiž cjiwča. ⁴ Jilanaca, cullaquinaca, Yooziž pectanaca, Yoozqui ančhuc illižha. Jalla nuž zizcu, wejrnacqui Yoozquin sparaquiž cjiwča. ⁵ Wejrnacqui ančhucaquin tjonžcu, liwriiñi Yooz taku paljaychinča. Anača žoñž taku alajakaz paljaytaqui; Yooz takupanča paljaytaqui. Yooz Espiritu Santuž aztan paljaychinča. Nižaza werar Yooz tawkquiz tjapa kuz tjurt'ican, Yooz puntu paljaychinča. Nižaza ančhucatan kamcan jaknužt wejrnacqui kamchinžlaja, jalla nii zuma zizza ančhucqui.

⁶ Ančhuczti wejrnaca kamaña irata jalla nižta kamñi žoñi cjissinčhucča. Nižaza Jesucristo Jilirž kamañ irata kamñi žoñi cjissinčhucča. Nižaza ančhucqui wejrnacadž paljayta Yooz taku catoktiquiztan, ancha sufrichinčhucča. Walja sufris cjenami, Espiritu Santuqui ančhucaquiz cuntintu cjskatchiča. Nižaza sufrisqui ančhucaquiz wejtnacaquiz iratazakaz watchiča. ⁷ Jalla nižtiquiztan ančhuca puntuquiztan zuma quintu ulanchiča tjapa criichi žoñinacžquin, Macedonia yokquin žejlñi criichi žoñinacžquinami nižaza Acaya yokquin žejlñi criichi žoñinacžquinami. ⁸ Ančhucadž cjen Yooz takuqui tjapa kjutñi paljaytača. Anača Macedonia yokquikaz nižaza Acaya yokquikaz paljaytaqui. Tjapa kjutñi paljaytača. Nižaza jaknužt ančhucqui Yoozquin kuzziz cjissinčhucžlaja, jalla nii quintu tjapa žoñinacqui zizza. Jaziqiu wejrnacqui ančhuc puntuquiztan anaž iya quint'asača. ⁹ Ninacapacha wejtnacaquiz quint'iñitača jaknužt ančhucqui wejtnacadž paljayta Yooz taku catokchinčhucatažlaja, jalla nii. Ančhucqui žoñiž paata yooznacquižtan zarakchinčhucča, werar žejtñi Yooz sirwizjapa. ¹⁰ Nižaza ančhucqui Yooz Majch araj-pachquiztan tjonz tjuñi tjewža. Yoozqui niiž Majch ticziquiztan jacatatskatchiča. Jalla nii Jesusaqui učhum casticunacquižtan liwriichiča. Jalla nuž quint'iñitača ančhuca puntuquiztan.

2

PABLUŽ YOOZ TAKU PALJAYÑI OJKTA

¹ Jilanaca, cullaquinaca, jalla tuž zizza. Wejrnacqui ana ina ančhucaquiz tjonzinča. ² Ima ančhucaquiz tjoncan Filipos wajtquiz sufrichinča, nižaza wejrqiu inartatača. Jalla nuž sufritaž cjenami Yoozqui wejrnaca yanapchiča, ana ekscañ tjurt'iñi kuzziz Yooz zuma liwriiñi taku paljayajo. Jalla nuž paljaychinča, žoñinacadž wejtnacatan quintra ancha aptazanami. ³ Nižaza wejtnaca paljaytaqui anatača chekachuc, nižaza anatača ana zuma kuzquiztan, nižaza anatača ančhuc incallzjapa. ⁴ Yooz Ejpqui wejrnaca tantiichiča, walikazza. Jalla nižtiquiztan Yoozqui wejtnacaquiz niiž zuma taku cumpjiichiča. Jalla nii Yooz takupan paljayučha wejrnacqui. Anal paljayučha žoñinacž kuz wali cjeajajo kasi. Antiz Yooz kuz wali cjeajajo paljayučha. Yoozqui učhumnaca kuz zizza, nižaza tantiichiča ultimu. ⁵ Ančhucqui tuž zizza, wejrnacqui anača zuma takunaca paljaychinča wejtnaca partiquiz luzkatzjapa, nižaza persunalta čjulumi tanzjapa. Weraral chiyučha. Yoozakaz

wejtnaca puntuquiztanaqui nii zizza. ⁶Cristuqui wejrnac apostolunaca cuchanzquichiča. Jalla nižtiquiztan wejrnacqui ančhucacqui mantiñi cjitasača. Pero ančhuc ana mantichinča, nižaza wejtnaca honora wayt'ižiñi anal pecasuča, ančhucmi yekjanacami. ⁷Antiz wejrnacqui ančhuc zuma cwtican željchinča, jaknužt tsjaa maatak žonqui persun wawa cwtassaja, jalla nuž. ⁸Nižaza ančhuc ancha k'ayachtuča. Jalla nižtiquiztan ančhucacqui Yooz zuma liwriiñi taku paljaychinča. Nižaza ančhucaltajapa čhjulua paazmi listutča wejrnacqui, ticz cjenami. Jalla nuž ančhuc pecñi cjissiñča. ⁹Jilanaca, cullaquinaca, weriž langžta cjuñzna. Majiñami weenami langzinča ochañcama, wejtnaca persun wira mantinsjapa, nižaza ančhucalta ana ch'ama cjejajo. Jalla nuž kamchinča liwriiñi Yooz taku paljaycan.

¹⁰Nižaza ančhucatan zuma kamchinča. Yooz kuzcama kamchinča. Nižaza anaž jecmi wejtnaca quintra čhjul ujmi tjeezñi atasacha. Jalla nii ančhucqui zumpacha zizza. Yooz zakaz nii zizza. ¹¹Ančhucmi zakaz zizza, jaknužt tsjii ejpqui niiž persun maati cwtassaja, jalla nižtapacha wejrnacqui ančhuc cwtassinča. Ančhuc kuzzinča, nižaza p'ekinchaychinča, nižaza chiižinčinča, ančhuc zuma kamajo. ¹²Jaknužt Yoozquin criichi žoñinacaqui zuma kamz waquizičhaja, jalla nuž ančhucqui zuma kamz waquiziča. Yoozqui niižquin criichinaca utchiča nižtan chica mantizjapa, nižaza niižtan chica honorchiz cjsjapa. Jalla nižtiquiztan zuma kamz waquiziča.

¹³Ančhucqui weriž paljayta Yooz taku nonzinčhucča, nižaza catokchinčhucča, tuž cjican: "Tii takuča ultim werar Yooz takuqui. Anača žoñž takukaz". Jalla nuž catoktquiztan tii zuma Yooz takuqui ančhuc kuznaca tsjan tsjan zuma cjiskatča. Jalla nižtiquiztan tirapan Yoozquin sparaquič cjiwča. ¹⁴Jilanaca, calluquinaca, ančhucqui walja sufrinčhucča ančhuc persun wajtchiz žoñinacaž ana wali paañiž cjen. Jalla nižta irata sufrichiča Judea yokquiz željñi criichinacami. Werar Yooz icliz žoñinacaž cjen nižta sufrichiča. Nižaza persun wajtchiz žoñinacaž ana wali paañiž cjen, sufrichiča. Tsjiikaz ančhucacquizimi ninacžquizimi watchiča. ¹⁵Nii Judea yokquiz željñi judionacaqui Jesús Jiliri conchiča. Nižaza niiž tuqui Yooz taku paljayñi žoñinaca conchiča. Nižaza wejrnacqui chjatkatchiča. Nižaza jalla nuž paažcu tjapa žoñinacž quintraz paača. Jalla nuž paatiquiztan Yoozqui ninacž quintraz žawjča. ¹⁶Wejrnacqui liwriiñi Yooz taku paljayz pecatuča ana judío žoñinacžquiz, ninaca liwriita cjejajo. Nii anawali paañi žoñinacazti wejrnac atajchiča. Jalla nižtiquiztan ninacaqui juc'anti persun ujš yapkatča. Jalla nuž ujnaca yapkattiquiztan Yoozqui wiñayaž wali casticu tjonkataquiča ninacžquiz.

PABLUQUI WILTA TJONZ PECČHA

¹⁷Jilanaca, cullaquinaca, tsjii kjažtapacha ančhucacquiztan ojkchinča. Jalla nekztan wejrnacqui ančhuc anchal cjuñznuča. Jalla nižtiquiztan ančhuc ancha cherpzal pecaytuča. ¹⁸Nižaza ančhucacquin irantisquizpan pecaytuča. Wejrnacaž ojkz pecan, Satanasacqui wejrnac atajchiča. Wejrqui wiltan wiltan ojkz cjichintača. Jalla nuž ojkz pectaž cjen, Satanasacqui wejr atajchiča. ¹⁹Jilanaca, cullaquinaca, Jesucristuqui tjonaquiča. Nekztan niiž yujcquiziqui ančhucacž cjen cuntintul cjeeča. Ančhucacž cjen wejrnacqui tjewznača honora tanzjapa. Ančhucacž Yooz taku criichiž cjen, juc'antiž chipznača wejrnacqui. ²⁰Chekan ančhucacqui wejtnacacqui cuntintuž cjiskatča, nižaza wejrnac honorchiz cjiskatča.

3

¹Jalla nuž ančhucacquiztan ojkžcu, ancha ančhuc cjuñchinča. Jalla nekztan Timoteu učhum jila cuchanzquichinča, ančhuc chertzñi. Parti wejrnaczi Atenas wajtquiz ecliz cjichinča. ²Timoteuqui Yoozquin sirwiñiñča, Cristuž liwriiz puntu paljaycan. Jalla nižtiquiztan Timoteuqui cuchanzquichinča ančhuc juc'anti Yoozquin tjurt'iñi kuzziz cjejajo. Nižaza ančhucacqui zumpacha Yoozquin criizjapa p'ekinchajajo, cuchanzquichinča. ³Nižaza Timoteuqui ančhucacquin tjonžquichiča, ančhucac kuz ana turwayta cjsjapa pruebanacaž watchiž cjenami. Ančhucpacha zizza criichinacaqui pruebanacacquiztan sufristanča, jalla nii. ⁴Tuquiqui ančhucatan željcan, wejrnacqui nuž mazinčinča,

uĉhum criichinacžquiz pruebanacaž tjonaquičha, cjican. Jalla nižtapacha weriž chiita taku cumplissičha. ⁵Jalla nuž anĉhucaquiz pruebanacaž watan wejrqui quintu ana zizzi atchinĉha. Jalla nižtiquiztan ana iya awantichinĉha. Nekztan Timoteo cuchanžquichinĉha, anĉhuca Yoozquin criichi kuz, jaknužt kamĉhaja, jalla nii zizjapa. Pinsichinĉha, “Satanás diablut anĉhuc tsjii kjutñi cutiskatžcaa”, cjican pinsichinĉha. Anĉhuc cutiskattasaž niiqui, wejtnaca obra inakaz cjitasaĉha.

⁶Tsjii kjaž majquiztan Timoteuqui quejpžquichiĉha Tesalónica wajtquiztan. Nižaza zuma quintunaca zjjicchiĉha tuž cjican: “Nii Tesalónica wajtchiz criichi žoñinacaqui ancha Yoozquin kuzzizpanĉha, nižaza zumaž munaziĉha. Nižaza ninacami uĉhumnacž zumapanž cjuñkalĉha. Nižaza ninacaqui uĉhumnacatan ancha zalz pecĉha, jaknužt uĉhumqui ninacžtan ancha zalz pecĉhaja, jalla nižtazakazza ninacaqui”. Jalla nuž cjican zuma quintunaca zjjicchiĉha anĉhucaquiztan. ⁷Jilanaca, cullaquinaca, wejrnac zakaz ancha sufrisnacami pruebanacami watučha. Jalla nuž cjenami nii anĉhuca puntu zuma quint'itiquiztan wejtnaca kuzqui zuma cuntintutaĉha. Anĉhucaž Yoozquin tjapa kuzziz cjen, ancha cuntintutĉha. ⁸Jaziqui zizzinĉha, anĉhucqui Yoozquin tjurt'iñi kuzzizpanĉha. Jalla nuž zizcu wejrnacqui tsjii ew žeti tanžtažokazza. ⁹Anĉhucaž cjen Yoozquin ancha sparaquiž cjiwĉha. Nižaza anĉhucaž cjen Yooz yujcquiz ancha cuntintuž wejrnacqui. ¹⁰Nižaza majiñami weenami Yoozquin mayizuĉha anĉhucatan wejtnacatan persunpacha wilta zalzjapa. Nekztan anĉhucaquiz tjaajznasaĉha juc'ant zumpacha Yoozquin kuzziz cjisjapa. Anĉhuca kamaña ĉhjulut pjaltičhaja, jalla nii tjaajznasaĉha.

¹¹Jaziqui uĉhum Yooz Ejpžtan nižaza Jesucristo Jiliržtan, jalla ninacaqui wejrnaca irpijaal cjiwĉha anĉhucaquiz wilta zalzjapa. ¹²Nižaza Jesucristo Jiliriqui anĉhucaquiz juc'anti zuma munaziñi kuzziz cjiskatla, porapatmi nižaza tjapa žoñinacžquizimi. Jaknužt wejrnac anĉhucatan zuma munazituĉhaja, jalla nižta irata. ¹³Jalla nuž zuma kamtiquiztan Yoozqui anĉhuca kuz juc'ant tjurt'iñi cjiskataquičha. Jalla nižtiquiztan anĉhuca kuzqui Yoozquinpanž cjequičha, Yooz Ejpž yujcquiziqui ana ĉhjul ujchiz cjisjapa. Jalla nuž cjequičha uĉhum Jesucristo Jilirž tjonz tjuñquiziqui. Jalla niiqui tjonaquičha niiz partir žoñinacžtanpacha.

4

LUCUTJINI ZUMA KAMZ WAQUIZIČHA

¹Jilanaca, cullaquinaca, jaknužt zuma kamz waquiziĉhaja Yooz cuntintu cjisjapa, jalla nuž tjaajinchinĉha. Nii zuma kamañ jaru kamiñĉhucĉha. Nižaza juc'anti niicama kamquičha. Jalla nijjapa anĉhucaquiz chiižinuĉha, nižaza rocuĉha, Jesucristo Jiliriz cuntiquiztan.

²Tuquiqui anĉhucatan žejlcan, wejrnacqui Jesucristo Jiliriz cuntiquiztan tjaajinchinĉha. Jalla nii tjaajintanaca anĉhucqui zizza. ³Yooztajapapan zuma kamajo, jalla nižtaž kamiñž pecĉha Yoozqui. Jalla nuž kamcan, anaĉha adulteriu paazqui, nižaza anaĉha tsjii luctakaqui yekja maatakžquiz pinzizqui. ⁴Nižaza Yooztajapa kamcan, tjapa criichi žoñiqui ziz waquiziĉha, jaknužt criichinacaqui persun tjunatan zalz waquiziĉhaja, nižaza zalzcu jaknužt zumapanž kamz waquiziĉhaja, jalla nii. ⁵Ana Yoozta kamiñ žoñinacazti persun tjunatan ana zuma kamĉha. Yekja maatakanacžquizpankaz pinsican kamiñĉha. Jalla nižta irata anĉhucqui anaž kamz waquiziĉha. ⁶Anaž jec criichimi yekja jilž maataka kjutñi pinziz waquiziĉha. Nižaza yekja jilž maatakatan adulteriu paaz anaž waquiziĉha. Nižta paaquiz niiqui, jilž quintra uj paaĉha. Jalla nuž ana zuma kamiñinaca casticaquičha Yoozqui. Jalla nuž tuquiqui wejrnacqui anĉhucaquiz chiižinchinĉha. ⁷Yoozqui uĉhumnaca kjawziĉha niiz partiquiz cjisjapa, nižaza zuma kamajo, ana yekja kjutñi cjcjeyajo. ⁸Jalla nii tjaajintaqui anaž žoñž kuzquiztan tjonĉha, Yooz kuzquiztanpan tjonchiĉha. Jalla nižtiquiztan jequit nii tjaajinta taku ana pajĉhaja, niiqui Yooz ana pajĉha. Yoozqui anĉhuca kuzquiz niiz Espiritu Santo luzkatchiĉha anĉhuc zuma kamajo.

⁹ Tsjilla wejr cjiwčha, criichi jilanacžtan zuma munaziz puntuquiztan. Jalla nižta puntuquiztan Yoozqui ančhucaquiz tjaajinčiča porapat zuma munazizjapa. Jalla nižtiquiztan wejrnacqui ančhucaquiz nii puntuquiztan ana ancha cjiirača. ¹⁰ Jalla nuž zuma munaziñčucčha tjapa Macedonia yokquiz kamñi criichinacžtan. Jilanaca, cullaquinaca, wejrnacqui ančhuc chiižinuča, ančhuca kuz juc'anti munaziñi cjisla, jalla nuž cjiwčha. ¹¹ Nižaza ančhucqui zuma llan kuzziz cjee. Yekja žoñž asuntuquiz anapan mitiz waquiziča. Pero persun kamañ wirquiz kuz tjaasa. Nižaza persun kjaržtan langznaquiča. Tuquiqui nuž ančhucaquiz mantichinča. ¹² Jalla nuž ančhuc zuma langztiquiztan ana criichi žoñinacaqui ančhuc rispitaquiča. Nižaza ančhucaquizpacha ana čjulumi pjaltaquiča.

JESUCRISTUQUI WILTA TJONAQUIČHA

¹³ Jilanaca, cullaquinaca, wejrnacqui ančhucaquiz ticzi žoñinacž puntuquiztan tjaajinz pecučha, ana ancha llaquita cjejajo. Ana jacatatz wira tjewžñi žoñinacaqui llaquiziča tsjii ticzi cjenauqi. Ana nižta cjejajo, ančhucaquiz tjaajinz pecučha. ¹⁴ Učhumqui criichinčhumča, Jesucristuqui ticziquiztan jacatatchiča, jalla nii. Nižaza criichinčhumča, Yoozqui Jesucristužquin criichi ticzinaca jacatatskataquiča. Nižaza ninaca Jesucristužtan chica tjonkatta cjequiča.

¹⁵ Nižaza tii Jesucristo Jiliriz tjaajinta taku ančhucaquiz tjaachinča. Jesucristo Jiliriz tjonz tjuñquiziqui primiraqui ticzi criichi jilanacaqui nižtan zalaquiča. Nekztan tii yokquiz žejtchi criichinacaqui tsewcchuc chjitžtakaz cjequiča, Jesucristužtan zalzjapa. ¹⁶ Učhum Jesucristo Jiliripacha tsewc arajpachquiztan chjiwžcaquiča. Nii orapacha criichinaca kjawznaquiča mantiñi joržtan. Nižaza tsjii pajk jilir arc anjilaqui kjawznaquiča. Nižaza Yooz trompeta tjawunznaquiča. Jalla nekztan Cristužquin ticzi criichinacaqui jacatatskattaž cjequiča. ¹⁷ Tii muntuquiz žejtchi criichinacž tuqui jacatatskattaž cjequiča. Nii ticzi criichinacž jacatatskattiquiztan parti criichinacaqui ninacžtan juntupacha chjitžtakaz cjequiča. Nekztan tsewcchuc tsjir taypiquiz Jesucristo Jiliržtan zalaquiča. Jalla nekztanaqui tjapa criichinacaqui tirapanž Jesucristo Jiliržtan wiñaya kamaquiča. ¹⁸ Jalla nii zizcu, nii takunacžtan porapat kuzasnaquiča.

5

¹ Jilanaca, cullaquinaca, čjulorat Jesucristuqui quejpžcačhaja, nižaza ima niž quejžcan čjulut watačhaja, jalla nii pizc puntuquiztan ančhucaquiz ana anchal cjiiruča. ² Ančhucqui nii pizc puntu zumpacha zizza, Jesucristo Jiliriqui tiripintitž tjonžcaquiča. Žoñinacž ana čjulu pinsita, tiripintit tsjii tjañiqui luzza. Jalla nižtaž cjequiča Jesucristo Jiliriz tjonzqui. ³ Ana criichi žoñinacž “Walikal kamok” cjenpan, nižaza cuntintu želan, tiripintit Yoozqui ninacžquiz tsucnaquiča casticž tjuñžtan. Jaknužut tsjaa ic maatak žon tiripintit laaquičhaja majtsjapa, jalla nižtaž tiripintit ana criichi žoñinacaqui castictapanž cjequiča. Nii casticž tjuñquiztan ana atipa ataquiča. ⁴ Jilanaca, cullaquinaca, ana criichinacaqui zumchiquiz kamča. Ančhucžti anaž zumchiquiz kamča. Jalla nižtiquiztan Jesucristuž tjonzqui anaž ančhuc tsucnaquiča tsjii tjañižtakaz. ⁵ Tjapa ančhucqui Yooz zuma kjañ jiczquiz kamiñčhucčha, anaž zumchiquiz kamiñčhucčha. ⁶ Jalla nižtiquiztan Jesucristo Jiliriz tjonz tjuñi ančhucqui listu tjaczi zuma kuzziz tjewznaquiča. Zuma kamcan, listupachaž tjewžna, ana tjahtažokaz. Ana criichi žoñinacaqui ana juyzu paača Jesucristo tjonz tjuñi puntuquiztan. Ana nižta cjee. Jesucristuž tjonz tjuñi zuma listuž tjewžna, tjaji watsi kuzziztakaz. Nižaza zuma kamzjapa persun wira cwitasa. ⁷ Weenqui žoñinacaqui panž tjačha. Nižaza weenqui žoñinacaqui licčha, panž licčha. Jalla nuž paacan, ana iya čjulumi pinsičha. Jalla nižtačha ana criichi žoñinacaqui. Jesucristuž tjonz puntuquiztan ana juyzu paača. ⁸ Ančhucqui ana nižta cjee. Učhumnacaqui Yooz kjan jiczquiz kamiñčhumča. Jalla nižtiquiztan persun kuz zuma Yooz jiczquiz kamzjapa, cwitasa. Yoozquin tjapa kuztan cjee, Yooz ančhuc Satanasquiztan tsjitsinajo. Nižaza criichi žoñinacžtan zuma munaziza. Nižaza ančhucqui liwriiz tjuñi zuma listuž tjewžnaquiča. Jalla nuž kaman armichiztakaz cjequiča. Jalla nižtiquiztan Satanasauqi ančhuc ana atipasača. ⁹ Yoozqui učhumnaca ana utchiča casticta cjisjapa. Pero Yoozqui

učumnaca utchiča, zuma liwriita wira tanzjapa Jesucristo Jilirž cjenaqui. ¹⁰Jesucristuqui učum laycu ticziča, žejtchi criichinacami ticzi criichinacami nižtan chica cuntintu kamajo. ¹¹Jalla nižtiquiztan porapat p'ekinchayrasaquiča, tjurt'iñi kuzziz cjisjapa. Nižaza porapat yanaparsaquiča, zuma kamañchiz kamzjapa. Anziqiu ančhucqui porapat yanapassa. Jalla nuž tirapan porapat yanaparsaquiča.

PABLUŽ CHIIŽINTA TAKUNACA

¹²Jilanaca, cullaquinaca, ančhucatan Yooz taku paljayñi žoñinaca žejlča. Jalla ninacžquiz rispitaquiča. Nižaza ančhuca irpiñinacžquiz rispitaquiča. Nižaza ančhucaquiz zuma tawkžtan chiižini žoñinacžquiz rispitaquiča. Yooz Jilirž uchtaž cjen nii žoñinacž mantuquiz žejlča ančhucqui. Jalla ninacžquiz rispitažo rocuča. ¹³Ančhucqui tjapa nii žoñinacami ancha rispitaquiča ninacaž Yooztajapa langztiquiztan. Ninacžtan zuma munazaquiča. Nižaza ančhucqui porapat zumapanž kamaquiča.

¹⁴Jilanaca, cullaquinaca, ančhucaquiz chiižinžcuča, jayrazñi criichinacžquiz zumpacha trabajzjapa chiižinajo, nižaza ururñi kuzziz criichinaca tjup kuzziz cjeyajo, nižaza llajllasñi kuzziz criichinaca tjurt'iñi kuzziz cjiskatajo. Nižaza tjapa criichinacžtanami pasinziz kuzziz cjee.

¹⁵Tsjii žoñiqui ana wali paatan tsjiizuñaqui ana nižta ayni tjepunz waquiziča. Antiz zuma munaziz waquiziča porapatmi nižaza tjapa žoñinacžtanami.

¹⁶Čhjulu watanami cuntintuž cjee. ¹⁷Yoozquin tirapanž mayiza. ¹⁸Čhjulu watanami Yoozquin sparsaquiča cjee. Jalla nuž ančhucalta Yooz munča ančhucqui Jesucristužquin kuz tjaachiž cjen.

¹⁹Espiritu Santuž obra tjeeznan, ana nii ataja. ²⁰Nižaza Yooz taku paljayñi žoñinaca ana iñara. ²¹Antiz nii paljayñi žoñinacž taku zumpacha tantiya, werar Yooz taku ana werar Yooz taku, jalla nii. Zuma Yooz takuž cjenaqui, kuzquiz nii taku catokaquiča. ²²Ultimu ana werar Yooz taku cjequiz niiqui, nii taku ana catokaquiča. Čhjulu ujmi nižaza anawalinacami anapan paa.

²³Učhum Yoozza cuntintu kuzziz cjiskatñiqui. Jalla nii učhum Yooz ančhucaquiz niiz kuzcamapanakaj kamkatla. Nižaza Yoozqui ančhuca kuzmi, animumi, janchi curpumi zumapaj cwitila ana tsjii uj cjeyajo, Jesucristo Jilirž tjonzcama. ²⁴Yoozqui ančhuc kjawziča niiz partiquiz cjisjapa. Yoozza niž taku panž cumpliñiqui.

²⁵Jilanaca, cullaquinaca, oracionžtan yanapžcalla.

²⁶Tjapa criichi jilanacžquiz zuma tsaanaquiča, jaknužt ančhuca tsaanz cuzturumpi žejlčhaja, jalla nuž.

²⁷Wejrqui ančhucaquiz tjiinuča, tii carta tjapa criichi jilanacžquiz liižinaquiča, jalla nuž.

²⁸Učhum Jesucristo Jiliriqui ančhucaquiz yanapt'ila. Nužukazza tii cartaqui. Amén.

SEGUNDA CARTA DEL APOSTOL SAN PABLO A LOS TESALONICENSES

¹ Wejrnacqui Pablužtan, Silvanužtan, Timoteužtan tii cartal cjiiržcuča ančhuc Tesalónica wajtchiz žoñinacžquin. Nii wajtquiz icliz žoñinacžcucča. Nižaza učumčha Yooz Ejpžquinami Jesucristo Jiliržžquinami kuzzizqui. ² Jalla nižtiqiztan Yooz Ejpžtan nižaza Jesucristo Jiliržtan ančhucaquiz zumaj yanapt'ila. Nižaza walikaj kamkatla. Nižaza zuma contento kuzziz cjiskatla.

CRIICHI ŽOÑINACAQUI SUFRISTANČHA

³ Jilanaca, cullaquinaca, wejrnacqui ančhucaž zuma kamtiqiztan tirapan Yoozquin sparaquiž cjiwčha. Jalla nužupan chiiz waquizučha. Ančhucqui juc'anti juc'anti Yoozquin kuzziz cjissa, nižaza juc'anti juc'anti porapat zuma munaziñi kuzziz cjissa. ⁴ Nižaza ančhucaž zuma kamtiqiztan wejrnacqui ančhuca honora parlučha Yooz icližnacquinami. Ančhucqui walja sufricanami, nižaza žoñinacž chjaawjkatta cjenami awantichinčhucča. Ančhucča pasinziz kuztan Yoozquin tira tjurt'inčhucqui. Nižaza Yoozquinčha tjapa kuztan tira žejlžqui. ⁵ Jaziqui ančhucqui Yooz partirquiz cjen sufriskattačha. Jalla nižta sufritaqui kjanapacha tjeēja, Yooz Ejpqui ančhucjapa tantiichiča, ančhucqui Yooz arajpach wajtquin luzkatž waquizičha, jalla nii.

⁶ Yoozqui nii ančhucaquiz chjaawjkatñi žoñinaca legali casticaquičha. Anziqui ninacaqui ančhucaquiz sufriskatčha. Ultimquiziqui Yoozqui ninacžqui sufriskataquičha. ⁷ Nižaza ančhucaž sufritiqiztan Yoozqui ančhucaquiz jeejskataquičha Jesucristo Jilirž tjonž tjuñquiziqui. Nižaza wejtnacaquiz jeejskataquičha. Tsewc arajpachquiztan Jesucristuqui niž walja azziz anjilanacžtan jecžcaquičha. ⁸ Tsjii ujžtakaz kjakaquičha. Jalla nii uj irata ana Yooz pajñinacž quintra cjequičha. Ninacaqui castictaž cjequičha. Nižaza jakzilat učum Jesucristo Jilirž zuma liwriñi taku ana cazzit cječhaja, jalla ninacami castictaž cjequičha. ⁹ Jalla tjapa nii casticta žoñinacami wiñayaž supraquičha. Yooz yujcquiztanaqui wiñayaž chjatkattaž cjequičha. Arajpachquin Yoozqui niž zuma azi tjeeznaquičha. Pero nii casticta žoñinacaqui Yooz zumanaca anaž cheraquičha. ¹⁰ Jalla nii Jesucristo Jilirž tjonž tjuñquiziqui, Yooz partir žoñinacami nižžquin honora waytazaquičha. Ančhucqui wejrnacž paljayta Yooz taku catokchinčhucča. Nižaza Jesucristuž tjonž cheržcu, Yooz taku catokchinacaqui ispantichi cjequičha. Pero contintuž cjequičha.

¹¹ Wejrnacqui tirapan Yoozquin mayizučha ančhucaltajapa, ančhuc ultimu liwriita cjejajo. Yoozqui ančhucaquiz kjawzičha nižta ultimu liwriita cjejajo. Jaziqui Yoozqui ančhucaquiz liwriita cjis waquizkataquičha. Jalla nuž mayizučha. Yoozqui niž aztan ančhucaž zuma pinsitanacami cumplista cjiskataquičha. Jalla nuž zakaz mayizučha. Nižaza Yoozquin kuzziz cjen, ančhucqui zuma obranaca paačha. Yoozqui niž aztan tjapa ančhuca zuma obranaca cumplista cjiskataquičha. Jalla nuž zakaz mayizučha. ¹² Jalla nekztanaqui ančhucaž zuma kamchiž cjen Jesucristo Jiliriqiu honorchiz cjequičha. Nižaza Jesucristuž cjen ančhucqui honorchiz zakaz cjequičha. Tjapa nižtanaca wataquičha učum Yooz Ejpžtan Jesucristo Jiliržtan učumnacaquiz okžniž cjen, nižaza yanapchiž cjen.

2

ANA WALI PAAÑI ŽOÑŽ PUNTU

¹ Jilanaca, cullaquinaca, učum Jesucristo Jilirž tjontanaqui, učumqui juntjapz-naquičha, nižtan zalžjapa. Jalla nii puntuqiztan ančhucaquiz intintiskatz pecučha. ² Yekjap žoñinacaqui ančhucaquiz incallžkatž pecučha, "Jesucristuqui tjonchikalčha" cjian. Jalla nižta chiita taku nonžcu, anaž ančhucqui tsuca. Nii takunaca ana juyzu paa. Nižaza anaž kuz turwayskata. Ninacaqui cjičha, "Yoozqui Pablužquiz nii taku tjaachiquičha. Nekztan Pablupacha wejtkuiz quint'ichičha, 'Jesucristuqui tjonchikalčha', jalla nii. Nižaza

Pablucui nuž tsjii cartiquiz cjjirchiča". Jalla nuž cjiča nii toscara chiiñi žoñinacaqui. Jalla niža chiita taku nonžcu, ana criyaquiča. ³ Ana jaknužumi nii Jesucristuž tjonz puntuquiztanami incallta cjee. Ima Jesucristuž tjonan, walja žoñinacaqui juc'ant Yooz quintra cjistanča. Nižaza tsjii juc'ant ana wal žoñiqui jecžcaquiča. Wiruñaquui nii žoñiqui wiñaya casticta cjequiča. ⁴ Jalla niiqui čjul yooznacquiztanami juc'ant tucquin cjis pecaquiča. Nižaza ultim werar Yooz quintrami, nižaza žoñiž paata yooz quintrami aptasaquiča. Nižaza tjapa tii muntuquiz amtitanaca quintra aptasaquiča. Nižaza nii ana wal žoñiqui, "Wejrtča chekan Yooztqui" cjequiča. Werar Yooz timpluquinpankaz julznaquiča Yooztakaz.

⁵ Ančhucatan žejlcan, jalla nižtapan paljaychinča. ¿Ana cjuñž ančhucjo? ⁶ Tii zakaz nonža ančhucqui. Nii juc'ant ana wali paañiqui atajtača. Wiruñaquui Yooziž pinsita timpu niiqui parizaquiča. ⁷ Anziqui ana wali paañinaca žejlča. Nižaza ana walinaca paača. Nii ana walinaca paañinaca atajtača, čjul ana walimi ana paajo. Wiruñaquui nii atajñiqui ana iya atajaquiča. Nekztan čjul ana walimi paata cjesača. ⁸ Jalla nii ana atajanaqui nekztan nii juc'ant ana wali paañiqui jecžcaquiča. Nekztanaqui Jesucristo Jiliriqui tjonžcu, persun tawkžtan nii ana wali paañi conaquiča. Nižaza walja aztan tjonžcu nii ana wali paañi liw akznaquiča Jesucristo Jiliriqui. ⁹ Satanás cjita diablucui nii juc'ant ana wali paañi žoñi jecskataquiča. Nižaza Satanás aztan ispantichuc milajrunacami siñalanacami paaquiča žoñinacžquiz incallzjapa. ¹⁰ Niiž ana wal kuzcama kamcan tjapaman milajrunaca paaquiča, nižaza tjapaman takunaca parlaquiča, incallzjapa. Jalla nuž ojklajcan incallaquiča infiernuquin ojki žoñinacžquiz. Jalla nii žoñinacaqui Yooz werar taku ana catokz pecchiča, liwriita cjisjapaqui. ¹¹ Jalla nižtiquiztan Yoozqui ninaca jakjurpaychiča, incallta cjeyajo werar Yooz taku ana criiñž cjen. Nižaza nii ana liwriita žoñinacaqui toscar takupan criyaquiča. ¹² Ninacača ana wali paatanacapankaz jutztasñiqui, jalla nižtiquiztan tjapa nii Yooz taku ana criichi žoñinacaqui casticaž cjequiča.

ILLZTA ŽOÑINACAQUI LIWRIITA CJEQUIČHA

¹³ Yooz k'ayi jilanaca, cullaquinaca, wejrnacqui ančhucaž cjen tirapan Yoozquin sparaquič žistanča. Tuqui timpuquiztanpacha Yoozqui ančhuc illzipanča liwriita cjisjapa. Nižaza ultimupan liwriitaž cjequiča Espiritu Santuž cjen, nižaza werar taku criichiž cjen. Nii Espiritu Santuqui ančhucaquiz anča zuma yanapča, ančhuca kuzultimu zumapankaz cjisjapa. ¹⁴ Jalla nijapa Yoozqui ančhuc kjawziča. Wejrnacaž zuma liwriiñi Yooz taku paljajtaž cjen, Yoozqui ančhuc kjawziča, Jesucristo Jiliržtan ančhucqui zuma honorchiz cjisjapa. ¹⁵ Jaziqui jilanaca, cullaquinaca, tirapan tjurt'iñi kuzziz cjee. Wejrnacqui ančhucaquiz tjaajinchinča, chiita takunacžtanami nižaza cjjirta takunacžtanami. Jalla nii tjaajinta takunaca anapan tjatzna. Nii tjaajinta jaru panž kama. ¹⁶ Učhum Yooz Ejpqui učumnaca okziča, nižaza niiča wiñayjapa cuntintu cjiskatñi. Nižaza učumnaca okžcan, ančhucaquiz tjewskatča, arajpachquin nižtanpan zuma kamz, jalla nii. ¹⁷ Yooz Ejpžtan učhum Jesucristo Jiliržtan, jalla ninacapacha ančhuca kuznaca p'ekinchayaquiča. Nižaza ninacaqui ančhucaquiz juc'ant tjurt'iñi kuzziz cjiskataquiča tjapaman walinaca paajo, nižaza tjapaman wali takunaca parlarjo. Jalla nuž ančhucaltajapa mayizuča.

3

¹ Jilanaca, cullaquinaca, tiicamakal chiižinača. Wejtnacalta Yoozquin mayiza, Yooz taku tjapa kjutñi paljayajo, nižaza mayiza nii paljajta Yooz taku tjapa kuztan catokta cjeyajo. Jalla niža ančhucqui Yooz taku catokchinčucča. ² Nižaza Yoozquin mayiza, ana wal kuzziz žoñinacžquiztan wejrnac tsjitsinajo. Yekjap žoñinacaqui anača Yoozquin kuzziz. ³ Jesucristo Jiliriča cumpliñiqui. Jalla nižtiquiztan niiqui ančhuca tjurt'iñi kuzziz chejlnaquiča, nižaza anawalinacquiztanž zumapanž cwiataquiča. ⁴ Ančhucaž Yooz Jiliržquin kuzziz cjen, wejrnacqui tantiichinča, ančhucqui wejtnacaž mantitacama kamiñchucča, nižaza niicama tira kamcan želaquiča, jalla nii. Jalla nužupan cjequiča.

⁵ Jesucristo Jiliriqúi ančhuca kuz irpila, Yooz irata jilanacžtan zuma munazajo, nižaza Jesucristuž irata pasinziz kuzziz cjeýajo. Jalla nuž mayizučha.

ANA JAYRAZCU LANGZ WAQUIZIČHA

⁶ Jilanaca, cullaquinaca, Jesucristo Jilirž tjuuquiz ančhucaquiz mantučha. Jayrazni jilanacžquiztan zarakaquičha. Jalla ninacaqui wejrnacaž tjaajintacama ana kamčha. ⁷ Jaknužt wejrnacqui kamučhaja, jalla niicama ančhucalaqui kamsa. Wejtnacaž kamaña yatekaza. Wejrnacqui ančhucatan žejlcan walja langzinčha. ⁸ Nižaza kjayžcu t'antami čhjerimi lujlchinčha. Majiñami weenami walja langzničha ochañcama, ančhucalta ana ch'ama cjeýajo. ⁹ Ančhucaltan žejlcanaqui wejrnacqui ančhucaquiztan čhjeri mayiñ cjichuca cjitasačha. Ultimquiz anal maychinčha. Antiz langzinčha, tsjii kamaña tjeezjapa. Jalla niwjctanaqui tsjii zuma kamaña tjeez pecchinčha, ančhucqui nii kamañquiz jaru kamzjapa. Jakziltat lujlz pecčhaja, langz waquizičha. ¹⁰ Ančhucatan žejlcan, chiižinčinčha. “Jakziltat ana langz pecčhaja, jalla niiqui anaž lujlz waquizičha yejkž čhjerquiztan”. ¹¹ Pero tsjii quinto nonzinčha. Yekjap ančhucaquiztan ana langžcu kamñiquičha. Ana langžcu, ana persun luraña paažcu, jayrazcan yekja žoñž asuntunacquiz mitisñiquičha. ¹² Jalla nižta žejlñi žoñnacžquiz mantučha ana nižta cjisjapa. Učhum Jesucristo Jilirž tjuuquiz ninacžquiz chiižinučha, zuma kuzziz nižaza ana mitisñi kuzziz langznaquičha persun wira mantinzjapa, jalla nii.

¹³ Jilanaca, cullaquinaca, zuma paazjapa anaž očhlla. ¹⁴ Jakziltat tii weriž cartiquiz cjijrta taku anapanž catokz pecčhaja, jalla nii zumpacha cheraquičha, jecčhalaj nii. Nižta žoñžquinaqui anapančha tjonzqui, nižaza anapančha niižtan ojklayzqui, nii žoñpacha azajo niiž anawal kamañquiztan. ¹⁵ Anaza niižjapa quintra cjee, antiz nii criichi jilžquiz zuma tawkžtan chiižina.

¹⁶ Jesucristo Jiliričha cuntintu kuzziz cjiskatñiqui. Jalla nii zakaz ančhuca kuz walikaj cjiskatla zapurumi nižaza čhjulu cjenami. Nižaza Jesucristo Jiliriqúi ančhucatan chicapachaj kamla. ¹⁷ Wejrqui Pablutčha. Anziqui tii ančhucaquin tsaanz letranaca persun kjaržtan cjijržcučha. Jalla nužupan zapa cartiquiz wejt firmapan firmučha. ¹⁸ Učhum Jesucristo Jiliriqúi tjapa ančhucaquiz zumaj yanapla. Nužukazza. Amén.

PRIMERA CARTA DEL APOSTOL SAN PABLO A TIMOTEO

¹ Wejrtĉha Pablutqui. Timoteo jila, amquin tii cartal cjjirzcuĉha. Jesucristuž illzta apostultĉha wejrqui. Jalla nii apóstol puestuquin učhum Liwriiñi Yooz Ejpqui Jesucristo Jiliržtanpacha wejr utchiĉha. Jesucristo Jiliriz tjonz tjuñi tjewža učhumqui. ² Timoteo jila, amquin tii cartal cjjirzcuĉha. Weriz Yooz taku paljaytaž cjen amqui tjapa kuztan Yoozquin criĉhamĉha. Jaziqui wejt maati cuntamĉha. Amĉha ligitum criĉhi žoñiqui. Yooz Ejpžtan učhum Jesucristo Jiliržtan amquiz zumaj yanapla, nižaza amquiz okzla, nižaza walikaj kamkatla.

ANA WALI TJAAJIÑINACA TJONAQUIĉHA

³ Tuquiqui ima Macedonia yokquin ojkan wejrqui amquiz rocchinĉha, Efeso wajtquin želajo. Anziqui wilta rocuĉha nicju tiraka želajo. Jalla nicju žejlcan, amqui tsjii žoñinacžquiz chiižinz waquiziĉha. Jalla ninacžquiz amqui mantaquiĉha, Yooz taku ana iya tsjii kjutñi tjaajnajo. ⁴ Nižaza mantaquiĉha žoñiž pinsita quintunacquizimi ana kuz tjaajo. Nižaza tuquita atchi ejpnacž tjuunac puntuquizimi anapanĉha nijcchucqui kuz tjaazqui. Jalla nuž amqui mantaquiĉha. Jalla nižta parlanacaqui panž inakazza, kuznaca turwayskatñi alajaĉha. Nižta parlanacaqui anapanž učumnacaquiz yanapĉha, Yooziž tjaata kamañquiz juc'ant zuma kamajo. Yooz kamañquiz kamcan, Yoozquin kuzziz cjicjiñi, jalla niž walĉha.

⁵ Jalla nuž wejrqui mantuĉha, criĉhi žoñinacž porapat zuma munazajo. Zuma kuzzizpan, nižaza ana ĉjul ujmi cjuñžcu, zuma munaziz waquiziĉha. Nižaza tjapa kuztan Yoozquin criĉcan, jalla nižta kuzziz žoñinacaqui zuma munaziz waquiziĉha. ⁶ Jalla nižta zuma kamañquiztan tsjii žoñinacaqui chekachuc ojkiĉha. Jaziqui parleeka parlis pecñiĉha, ana ĉjulquiz waquiziñi. ⁷ Nižaza walja zizñi Moisés lii tjaajini cjis pecĉha. Ninacazi tjaajinžcupacha, persuna chiita ana intintassa. Nižaza “Tužupanĉha werar razunaqui” cjiscupacha, ana panž niž persuna tjaajintaqui intintazasaĉha.

⁸ Yooziž Moisesquiz tjaata liinacaqui zumaĉha, Yooz kuz jaru ligituma tjaajintaž ni-iqui. ⁹ Nižaza lii puntuqui tužučha: Moisés liinacaqui anataĉha ut'ayta zuma kamñi žoñinacžtajapa. Antiz ana zuma kamñi žoñinacžtajapa ut'aytataĉha. Zuma paaznaca ana juyzu paañi žoñinacžta, nižaza Yooz kuzcama ana kamñi žoñinacžta, nižaza ana Yooz sirwiñinacžta, nižaza uj paañinacžta, nižaza Yooz kamañ jicz ana pecñinacžta, nižaza ana Yooz rispitiñinacžta, nižaza persun maa ejp conñinacžta, nižaza žoñi conñinacžta, ¹⁰ nižaza adulteriuquiz ojklayñi žoñinacžta, nižaza luctakpora ana wali paasñinacžta, nižaza žoñi tanñinacžta, nižaza toscara chiiñinacžta, nižaza toscar juramentužtan chiiñinacžta, nižaza tjapa zuma tjaajintanacž quintra paañinacžta, jalla ninacžta ut'aytataĉha Moisés liinacaqui. ¹¹ Zuma tjaajintanacaqui zuma liwriiñi Yooz tawk jaručha. Yooz takuqui azzizza, žoñinaca liwriižjapa. Walja zuma Yoozqui wejtquiz nii liwriiñi taku zizkatchiĉha, nižaza wejtquiz cumpjiĉiĉha, žoñinacžquiz paljayajo.

JESUCRISTUQUI PABLUŽQUIZ ANCHA OKZIĉHA

¹² Yooz taku paljayajo, Jesucristo Jiliriqui wejtquiz yanapĉiĉha. Jalla nižtiquiztan Jesucristužquin sparaquiz cjiwĉha. Jesucristuqui wejr cumpliñipan cherziĉha. Jalla nižtiquiztan apóstol puestuquiz wejr utchiĉha nii sirwajo. ¹³ Tuquiqui wejrqui Jesucristuž quintra chiiñtaĉha, nižaza niž quintra iñariñtaĉha. Nižaza Jesucristužquin criĉhi žoñinacž quintra payiñtaĉha. Jalla nuž paanami nižaza chiyanami, Yoozqui wejtquiz okziĉha. Ima Jesucristužquin criĉcan, jalla nuž ana wali ojklaychintaĉha ana ultim werara zizcu. Jalla nižtiquiztan Yoozqui wejtquiz ancha okziĉha. ¹⁴ Učhum Yooz Jiliriqui wejtquiz walja zuma okziĉha. Jaziqui Jesucristuž cjen, Yoozquin tjapa kuztan cjissinĉha wejrqui, nižaza Yooztan ancha munaziñi kuzziz cjissinĉha.

¹⁵Jesucristuqui tii muntuquiz tjonchiča, ujchiz žoñinaca liwriyi. Jalla nii takuča ultim razunaqui. Nižaza tjappachaqui nii taku catokz waquiziča. Tjapa ujchiz žoñinacžquiztan wejrtča juc'ant ujchiztqui cjiwča. ¹⁶Jalla nuž cjenami, Yoozqui wejr zumapan okziča, Jesucristuž zuma pasinziz kuz tjeezjapa. Weriz cjen, tjappacha zizaquiča, Jesucristo ancha zuma pasinziz kuzziz, jalla nii. Tjapa ujchiz žoñinacžjapa Jesucristuqui zuma pasinziz kuzziz. Cristužquin criyaquizž niiqui, čjul žoñimi Yooztan wiñaya kamaquiča. ¹⁷Jalla nižtiquiztan tjapa mantiñi Yooz honoraž wiñayjapa waytitaj cjila. Yoozqui wiñaya žejlča, nižaza ana ticznasča, žoñž čhjujquiz anaž cherta cjesača. Tsjillapanikazza Yoozqui, nižaza niipanča juc'ant tjappacha zizñiqui. Jalla nii Yooz honora wiñay wiñaya tirapan waytitaj cjila. Jalla nužoj cjila. Amén.

¹⁸Timoteo jila, wejt maati cuntamča. Zuma zultatužtakaz Yoozquin tjurt'iñi kuzziz cjee. Nižaza Satanás partiranacž quintra cjee. Tuquiqui tsjii criichi jilanacaqui am puntuquiztan Yooziž tjaata taku čiičiča. Nii takunaca cjuñzna. Jalla nii tawk jaru amqui Yooz sirwiz puestuquiz utžtača. Jaziqi amquin tii čiižinuča. ¹⁹Tirapan Yoozquin tjapa kuzziz cjee, nižaza zumapan kama. Zuma kamcan, am kuzquiz ana ujnaca cjuñznaquiča. Yekjapaqui persun kuzquiz ujnaca cjuñžcu, ana juyzu paachiča, nii ujquiztan ana jaytichiča. Jalla nižtiquiztan ninacaqui ana uj tantiyasñi kuzziz cjsiča, nekztan Yooz kamañ jicquiztan zarakčiča. ²⁰Jalla nižta paachiča Himeneužtan nižaza Alejandružtan. Jalla ninaca Satanás kjarquiz intirjichinča, ana Yooz quintra iya čii zizajo.

2

YOOZQUIN MAYIZIZ PUNTU

¹Tsjiižtan cjiwča. Primeraqui čiižinžcuča jalla tuž: Tjapa žoñinacžta Yoozquin mayizaquiča, nižaza zuma kuztan Yooztan parlaquiča, nižaza tjapa žoñinacžtajapa Yoozquiztan roct'ižinaquiča, nižaza Yoozquin sparaquizž cjequiča. Jalla nuž mayiziz waquiziča tjapa žoñinacžtami, ²nižaza tjapa pajk mantiñi jilirinacžtami, nižaza tjapa jilirinacžtami. Jalla nuž mayiziz waquiziča, walikaz kamajo. Jalla nuž kamcan, Yoozquin sirwiñi kuzziz cjee, nižaza nižta kuzziz kamcan jilirinacžquiz rispitñi kuzziz cjee. ³Jalla nižta kamaquizž niiqui, walikazza. Nižaza jalla nižta kamz cjen, učum Liwriñi Yoozqui cuntintuž cjequiča. ⁴Učum Liwriñi Yoozqui tjapa žoñinaca liwriita cjis, jalla nii pecča. Nižaza tjapa žoñinaca werar taku pajñi cjis, jalla nii zakaz pecča. ⁵Tsjii Yoozpanikaz žejlča. Nižaza žoñinacžtajapa tsjii Yoozquiz pjalt'ižini žejlča. Jalla niiča Jesucristuqui. Učum irat žoñi cjis, ⁶tjapa tii muntuquiz žejlñi žoñinacž laycu ticziča. Jalla nuž ticžcu ninacž ujquiztan pacčiča. Yooz pinsita timpu tjonžcu, jalla nekztan nii zuma liwriñi quintuqui žoñinacžquiz paljaytatača. ⁷Jalla nii Jesucristuž žoñinacž laycu ticzi quintu wejrzakaz paljayuča. Nižta paljayajo, Yoozqui wejr apóstol puestuquiz utčiča. Wejr utčiča werar liwriñi Yooz taku tjaajnajo ana judío žoñinacžquin. Ninacžquin Yooz taku paljayiñiča, ninaca Jesucristužquin kuzziz cjejajo. Wejrqui Jesucristužquin criičiž cjen weraral čiyuča. Ana toscaral čiyuča.

⁸Tjapa kjutñi žoñinacaqui Yoozquin mayiziñi cjičhaj cjiwča. Jalla niil pecuča. Zuma kuzziz, nižaza ana žawjchi kuzziz, nižaza ana ch'aazñi kuzziz, nižaza zuma kuztan kjara waytizcu, jalla nuž mayiziñi cjičhaj cjiwča.

MAATAKŽ PUNTU

⁹Nižaza maatakanacami zuma kuzziz cjispanča. Zuma zquitinaca anaž juc'anti cujtzni cjičhaj cjiwča. Anača iziwiri maatakažtakaz cujtzqui. Nižaza anača ricachužtakaz cujtzqui. Anaž ancha ist'asaquiča. Nižaza maatakanacami anača persun ach charquiz ancha quitsnacžiz cjequiča. Nižaza anaž ancha čjul alajanacžiz cjequiča. Nižaza anaž ancha zquitinaca cujt cutaquiča. Jalla nižta zquitinacžquimi nižaza cusasanacquizimi ana kuz tjaa. ¹⁰Antiz zuma kamzquin kuz tjaa. Zuma kamz waquiziča Yoozquin kuzziz criichi maatakanacami. ¹¹Nižaza maatakanacami ch'uju žejlcan tjaajinta takunaca catokspanča, ana čjulu čiižcu. ¹²Nižaza žoñinaca cheran maatakanacami

luctakanacžquiz anaž tjaajinz waquizičha; nižaza anaž mantiz waquizičha. Nižaza maatakanacžlaqui ch'uju žejlcan luctakanacž takunaca nonspančha. ¹³ ¿Kjažtiquiztan nižta cjesajo, maatakanacž puntuquiztanajo? Jalla tužučha niiqui. Tuquiqui Yoozqui Adán paachičha. Nekztan Eva paachičha. ¹⁴ Nižaza Adanžquiz anatačha incallta. Antiz Evaquiztačha incallta. Incallskattiquiztan Evaqui ujqviz tjojtsinčha. ¹⁵ Maatakanacami maatakž kamañquiz kamz waquizičha, maatinaca majtcan. Nižaza Yoozquin kuzziz, nižaza zuma munaziñi kuzziz, nižaza ana ujchiz zuma kamañ kuzziz, nižaza humilde kuzziz, jalla nižta kuzzizpan kamaquič niiqui, liwriita cjequičha maatakanacami.

3

ICLIZ JILIRŽ PUNTU

¹ Jakziltat icliz jilirž puestuquiz luz pecčhaja, jalla niiqui zuma Yooztajapa langz pecničha niiqui. Jalla nii takuqui ultim weraračha. ² Jalla nižtiquiztan jakziltat icliz jilirž puestuquiz luzaja, jalla niiqui zuma kamañchiz žoñi cjispančha. Jalla nižtiquiztan žoñinacaqui niž puntu cjiñičha, “Zuma žoñipancha, ana ujchiz” cjicanaqui. Niiqui tsjaa tjunchizpanikaz cjispančha. Nižaza ewjazñi kuzziz cjispančha. Nižaza zumapan kamañi kuzziz cjispančha. Nižaza zuma kamtiquiztan rispittaž cjispančha. Nižaza tjonzñi žoñinacžquiz kjawzñi kuzziz cjispančha. Nižaza zuma tjaajiñiž kuzziz cjispančha. ³ Nižaza anapan licñi kuzziz cjispančha. Nižaza ana kichjasñi kuzziz cjispančha, antiz pasinziz kuzzizpan cjispančha. Nižaza anapan ch'aazñi kuzziz cjispančha. Nižaza paaz pecni kuzziz anapan cjispančha. ⁴ Nižaza niž kjuychiz žejlñi žoñinaca zuma irpiñi cjispančha. Nižaza niž maatinacami zuma cazñi nižaza walja rispitiñi, jalla nižta kuzziz cjispančha. ⁵ Tsjii icliz jiliriqui niž persun kjuy žoñinaca ana zuma irpiñi atchucažlaj niiqui, jalla nižtiquiztan, žjaknužt Yooz icliz žoñinaca zuma irpasajo? ⁶ Nižaza tsjii icliz jiliriqui anaž uzca criichi žoñi cjesačha. Uzca criichi cjesaž niiqui, mitarazi kuzziz cjisnasasčha, nekztanaqui ujqviz tjojtsnasasčha. Nižaza jaknužt diabluqui niž ujqviztan casticta cječhaja jalla nižta irata nii žoñiqui uj paatiquiztan casticta cjequičha. ⁷ Nižaza icliz jilirinacaqui tjapa žoñinacžquiz rispittaž cjispančha, criichi žoñinacami, ana criichi žoñinacami. Ana criichi žoñinacaqui nižquiz ana rispitaquič niiqui, juc'anti nižžuin jnacaž tjojtnasasčha. Jalla nižtiquiztan diabluqui nii žoñžquiz ujqviz tjojtskatasasčha.

⁸ Jalla nižta zuma kamañchiz kazak cjispančha iclizquiz yanapñi žoñinacaqui. Jalla ninacaqui zuma rispitta kamañchiz cjispančha. Nižaza ninacž chiita taku cumpliñi kuzziz cjispančha. Nižaza anapan licni kuzziz cjispančha. Nižaza paaz pecni kuzziz anapan cjispančha. ⁹ Tuquiqui Jesucristuž puntumi nižaza nižžquin kuzziz puntumi ana tjapa ziztatačha. Anziqui kjanacama paljaytačha. Nii Jesucristuž puntu zuma zizñi kuzziz cjispančha. Nii iclizquiz yanapñi žoñinacaqui ana uj paañi kuzziz cjispančha. ¹⁰ Tsjii žoñiqui iclizquiz yanapz puestuquiz luzasaž niiqui, primeraqu niž persun kamaña zumpacha tantiitaž cjispančha. Nekztan zuma kamañchiz cjequič niiqui, iclizquiz yanapz puestuquiz luzasačha. ¹¹ Jalla nižta zuma kamañchiz cjispančha iclizquiz yanapñi maatakanacami. Nii maatakanacami walja rispitta kamañchiz cjispančha. Nižaza anapan ana wal quinto joojooñi kuzziz cjispančha. Nižaza ewjazñi kuzziz cjispančha. Nižaza tjapa cumpliñi kuzziz cjispančha. ¹² Nižaza iclizquiz yanapñi žoñinacaqui tsjaa tjunchiz alajakaz cjispančha. Nižaza niž persun maatinacami kjuy žoñinacami zumapanž irpiñi cjispančha. ¹³ Jakziltat iclizquiz yanapz puestuquiz zuma cumplačhaja, jalla niiqui zuma honorchiz cjequičha, nižaza juc'ant tjup kuzziz cjisnaquičha, Jesucristužquin criiz puntuquiztan paljayzjapa.

¹⁴⁻¹⁵ Wajilla wejrqui amquin ojcz pecučha. Pero anat uri tjonz atučhani. Jalla nižtiquiztan tii takunaca amquin cijjržučha. Tii takunacaž cjen amqui zizaquičha, jaknužt Yoozquin criichi žoñinacaqui parti Yooz maatinacžtan kamz waquizičhaja, jalla nii. Yooz maatinacačha werar žejtñi Yooz iclizaqu. Yooz icliz žoñinacaqui werar Yooz tawkquizimi tjurt'iñi kuzzizpančha. ¹⁶ Anaž jecmi kjaž cjesačha tii puntuquiztan. Tuquiqui Jesucristuž puntumi, nižaza Yooz kamañ puntumi ana tjapa ziztatačha. Anziqui nii puntunacami kjanacama ziztačha. Tii Jesucristuž puntunacačha chekanaqui. Jesucristuqui učhum

irat curpuchiz tjonchiča tii muntuquiziqui. Jacatattiquiztan Yooz Espiritu Santuqui ticlarchiča niiz puntuquiztan, ligituma Yooz kamañchizza, jalla nii. Nižaza Yooz anjilanaquiqui Jesucristo cherchiča. Nižaza tjapa tii muntuquiz željñi žoñinacžquiz Jesucristuž puntuquiztan paljaytača. Nižaza tjapaman žoñinacaquiqui niizquiz criichiča. Nižaza Jesucristuqui tsewc arajpachquin wilta quejpchičha. Jalla nii puntunacača chekanaquiqui.

4

ZUMA TJAAJINTA TAKUNACA

¹Tsjii puntu cjesača. Yooz Espiritu Santuqui kjanapacha intintazkatchičha jalla tužu: Ima Jesucristuž wilta tjonan, yekjap criichinacaquiqui Yoozquin criižquiztan zarakaquičha. Tsjii kjutñi irpitaž cjequičha incallñi zajranacaž cjen, nižaza nii ana wal zajranacž tjaajintaž cjen. ²Nii zajranacaž mantita žoñinacaquiqui incallñi kuzziz cjican toscar takunaca paljayaquičha. Nižaza ninacž toscar takunaca nonžcu, yekjap werar Yoozquin criichinacaquiqui Yoozquiztan tsjii kjutñi zarakaquičha. Nii zajranacaž mantita žoñinacaquiqui ujquiztan ana sint'iñi kuzziz cjequičha, nižaza ana uj naazñi kuzziz cjequičha. ³Nii ana wal žoñinacaquiqui anapanž lucutjiñi zalzquiqui cjican mantaquičha. Nižaza tsjii čherinaca lujlmi, anapanž lulzquiqui, cjican mantaquičha. Nii incallñi žoñinacaquiqui jalla nuž cjequičha, pero Yoozquiqui nii čheri tjaachiča, žoñinacaž lulajo. Jalla nižtiquiztan Yoozquin criichinacami werar Yooz tawkquiz criichinacami nii čheri lulasača Yoozquin sparaquičž cjižcu. ⁴Tjapa Yooziž tjaata čherinacaquiqui walipankazza. Yoozquin sparaquičž cjižcu lulasača. Anapanča "Lujljzapača anawaliquiqui" cjižquiqui. ⁵Yoozquin sparaquičž cjižcu, nižaza Yooz taku chiižcu, čjul čherimi walipankaz cjesača, lujljzapa. ⁶Jalla nii weriž tjaajinta takunaca criichi žoñinacžquiz tjaajnaquičha amqui. Nekztan amqui Jesucristužtjapa zuma sirwiñim cjequičha. Yooz tawk jaru, nižaza Yooz puntu zuma tjaajintanac jaru zuma kamčamča. Nižaza zuma tjaajnaquičž niiqui, juc'ant zuma kamañchiz cjequičha. ⁷Ana wal quintumi nižaza zumzu žoñinacž quintumi anapan nonznaquičha. Antiz Yooz kuzcamapankaz kamzquinča kuz tjaazquiqui. ⁸Curpu ejercicio paakatzquiqui curpuquizkaz yanapča. Yooz kuzcama kamzquiqui curpuquizimi kuzquizimi tjappachquizpanž yanapča. Nižaza tii muntuquiz kamz žejtzquizimi arajpach muntuquiz kamz žejtzquizimi yanapča. ⁹Jalla werar razunača nii takuquiqui. Jalla nižtiquiztan catokz waquizquiqui. ¹⁰Učhumquiqui žejtñi Yoozquin criichiž cjen tjewznaquičha arajpachquin Yooztan kami ojczjapa. Jalla nuž tjewžcan, učhumquiqui Yoozta ancha langža nižaza sufriča. Jalla nii žejtñi Yoozta ultim werar Liwriñiqui. Nižquin criichinacaquiqui liwriita cjequičha. Nižaza tjapa žoñinacaquiqui liwriita cjesača, nižquiz criyaquičž niiqui.

¹¹Jalla nii puntu tjaajintanaca mantaquičha, nižaza tjaajnaquičha amqui. ¹²Amqui tjowaž cjenami žoñinacžquiz rispitskataquičha, amiž zuma kamtiquiztan. Amqui zumapan kamaquičha, nižaza zumapan chiyaquičha, nižaza žoñinacžtan zuma munazaquičha, nižaza Yoozquin tjapa kuzzizpan cjequičha, nižaza ligitum kamañchiz cjequičha. Nekztan jaknužt amqui zuma kamčhaja, jalla nii cheržcu, parti criichi žoñinacaquiqui am iratapacha zakaz zuma kamasacha. ¹³Nižaza wejt tjonzcama, parti criichi žoñinacžquin Yooz taku liinzinjapa kuz tjaaquičha. Nižaza Yooz taku liižcu parti criichi žoñinacžquin zumpacha chiižinaquičha. Nižaza ninacžquiz tjaajnaquičha. ¹⁴Tuquiqui icliz jilirinacaquiqui kjaržtan am juntuñ lanziča. Nižaza am puntuquiztan tsjii Yooziž tjaata taku chiichiča, "Yooz tjaata kamañchiz cjequičha" cjicanaquiqui. Nekztan jalla nižta Yooz kamañchiz amquiz cjiskatchičha. Amqui nii Yooz kamaña ana cutznaquičha.

¹⁵Jalla nii am kamañ puesto cumplisjapa, tjapa kuz tjaaquičha. Nii kamañ jaru kama. Jalla nižta kamz cjen, amqui juc'ant juc'ant zuma kamaquičha. Nižaza parti criichinacaquiqui am juc'ant zuma kamñiž cjen nayaquičha. ¹⁶Jaziqui am persun kuzquizimi nižaza amiž tjaajintanacquizimi cuitaza, zumapan cjisjapa. Werič chiižintanaca tirapan cjuñzna. Jalla nuž zuma cjuñznaquičž niiqui, ultimquiziqui liwriitam cjequičha. Nižaza amiž tjaajinta catokchi žoñinacaquiqui liwriitaž zakaz cjequičha.

5

ŽEW MAATAKANACŽ PUNTU

¹ Tsjiilla cjesača. Irarchiz ejpnacžquiz ana ancha ujznaquiča. Antiz persun ejpžtakaz zuma tawkžtan chiižinaquiča, niž ana wali paatiquiztan jaytiskatzjapa. Nižaza parti luctak žoñinacžquiz persun jilnacžquiz chiižintažokaz chiižinaquiča. ² Nižaza irarchiz maatakanacžquiz persun maažtakaz zuma rispitchiz razunžtan chiižinaquiča. Nižaza parti maatakanacžquiz persun cullaquinacžquiz chiižintažokaz chiižinaquiča, zuma kuztan. Maatakanacžquiztan zupam pinsaquiča.

³ Nižaza ultim t'akjir žewanacžquiz okznaquiča. ⁴ Tsjaa žew žonqui maatinacchiz nižaza ajlchinacchiz cjesaž niiqui, jalla ninacaqui naa žew maaquiz okz waquiziča. Jakziltat Yoozquin criichižlaj niiqui, persun famillžquiztan žew maatakanacžquiz yanapz waquiziča. Nii žew maatakanacaqui famill ocjalanaca jwesi yanapchizlani. Žew maatakanacžquiz yanapzpanž waquiziča persun familiaqui. Jalla nuž Yooz yujcquiziqui walipanikaz cjequiča. ⁵ Jakzilta t'akjir žew žonmi zinalla žejlčhaj niiqui, jalla naača werar žewqui. Naaqui Yoozquin kuzziz cjenaqui arajpachquin kami ojcz, jalla nii tjewža. Nižta tjewžcan naaqui majiñami weenami Yoozquin ancha mayizinča. ⁶ Jakzilta žew žonmi tii muntuquiz kamzquinkaz kuz tjaachi žejlčhaja, jalla naaqui criichi žoñž cuzturumpi paachi cjenami, ana Yoozquin kuzziz zuma kamča. ⁷ Persun famillž žewnacžquiz okz waquiziča. Jalla nuž mantaquiča amqui, žewanacami ninacž familianacami ana ujchiz cjisjapa. ⁸ Persun famillžquiztan tsjii t'akjiri žejlčhaj niiqui, famillžquiztan mantinta cjis waquiziča. Ana mantintažlaj niiqui, nii famillchiz žoñinacaqui Yooz kuzcama kamz ana cumpliča. Nižaza nižta žoñinacaqui tsjan ana zuma kuzzizza ana criichinacžquiztanami.

⁹ Jakzilta žew maatakanacž tjuumi icliz listiquiz žejlčhaja jalla ninacaqui yanapta cjesača. Nižaza nii žew maatakanacaqui yanapzjapa sojta tunc wata jilchiz cjistanča. Nižaza tsjii luctakžtan panikaz zalsintača naa žewqui. ¹⁰ Nižaza žoñinacaqui naaža zuma kamtiquiztan pajta cjistanča. Nižaza naa žewqui maatinaca zuma irpiñtacha. Nižaza tjonžni žoñinacžquiz zuma atintiñi kuzziz cjispanča. Nižaza criichi žoñinacž kjojcha humilde kuzziz ajwsinintača. Nižaza sufrini žoñinacžquiz zuma yanapni kuzziz cjispanča. Nižaza tjapaman wali paatanacžquiz kuz tjaani cjispanča. Jalla nižta zuma kuzziz žew maatakanacaqui iclizquiztan yanapta cjesača.

¹¹ Ima sojta tunca wachiz cjen žew maatakanacaqui anaž icliz listiquiz apuntita cjesača, yanapta cjisjapa. Listiquiz apuntita cjisjapaqui, žew maatakanacaqui tsjii icliz jilirinacž acuerduquiz luztanča. Tur žew maatakanacaqui wilta zalz pecačhani. Wilta zalaquičž niiqui, nii acuerduquiztan ulanspanča. Jalla nuž ulantiquiztan Cristuž quintražtakaz cjequiča. ¹² Nii primero acuerduquiztan ulantiquiztan ujchiz cjequiča. ¹³ Nižaza turapacha žew maatakanacaqui kjuyquiztan kjuya ojklayasaž niiqui, jayraž cjesača. Nižaza ana wali quinto joojooñiž cjesača. Nižaza yekja žoñž parliquiz mitisni cjesača. Jaziqui ana zuma takunaca chiichiyačhani. Nižta chiichiiziqui inapankazza. Anapan waquiziča. ¹⁴ Jalla nižtiquiztan tur žew maatakanacaqui zalz waquiziča. Zalczu, ocjalchiz cjesača. Nižaza kjuya luraña cwitiñi cjesača. Jalla nižta zuma kamañ quontra žoñinacaqui icliz žoñinacžquiz anaž inarasača. ¹⁵ Yekjap žew maatakanaczi Yoozquiztan zarakchiča, nižaza Satanás diabluž kuzcama ojčča.

¹⁶ Jakzilta criichi luctakami maatakami persun famillžquiztan tsjaa žew žon žejlčhaja, naa žew žon yanapz waquiziča, icliz žoñinacžta ana ch'ama cjejajo. Jalla nižtiquiztan ultim t'akjir chawc žew maatakanacžquiz icliz paažtan yanapta cjesača.

ICLIZ JILIRŽ PUNTU

¹⁷ Jakzilta icliz jilirit zumpacha irpačhaja, parti criichi žoñinacaqui nii jiliržquin zuma honora tjaaz waquiziča, nižaza zuma pacz waquiziča. Nižaza Yooz taku paljayni jiliržquizimi, nižaza Yooz taku tjaajini jiliržquizimi juc'ant honora tjaaz waquiziča, nižaza juc'anti pacz waquiziča. ¹⁸ Tuquitanpacha cijirta Yooz takuqui tuž cjicha: “Tsji trigo

jojñi aznuqui ñujcžtan ana ñucasačha ana lulajo”. Nižaza cjjrta Yooz takuqui tuž cjičha: “Jakziltat langžñižlaja, jalla niiqui pacta cjis waquizičha”.

¹⁹ Nižaza tsjii žoñikaz icliz jiliržquiz uj tjojtNASAž niiqui, jalla nii žoñž chiitaqui anačha nonzqui. Antiz tsjii pucultan čhjepultan tisticu žoñinacaž ujchizpančha cjesaž niiqui, ninacž čhiitaqui nonznaquičha. ²⁰ Nižaza jakzilta icliz jilirit uj paañi žejlčhaja, jalla niižquiz ujsnaquičha parti criichi jilanacž yujcquiz. Jalla nižtiquiztan nii parti žoñinacaqui uj paaz jiwjataquičha. ²¹ Jaziqui Yooz Ejpžtan nižaza Jesucristužtan nižaza Yooziž illzta anjilanacžtan, jalla ninacž yujcquiziqui amquiz mantučha, nii weriž tjaajintanac jaru kamajo, nii. Nižaza jalla nuž kamcan anapančha pjali cjcjisqui. Nižaza tjapa žoñinacžtan tsjii kuzziz cjis pecsa. ²² Nižaza ima icliz jilirž puestuquiz uchan, nii žoñž kuz zumpacha tantižinaquičha. Ana zumpacha tantiyaquiz niiqui, tsjii amiž uchta icliz jiliriqui ujquiz tjojtNASAčha. Nekztan parti žoñinacaqui amquiz zakaz uj tjojtNASAčha. Jaziqui ima uchan zumpacha tantiiz waquizičha. Nižaza am persun kuzquiz cuitasa ana ujquiz tjojtSjapa.

²³ Amiž walu ancha laa laa cjenaqui, anam kjaz alaja licasačha. Tsjii kulla cunta koluc vinulla licnasačha.

²⁴ Yekjap žoñinacaž uj paatanacaqui kjanapacha tjeežta cjiSSa ima casticta cjisnan. Yekjap žoñinacaž uj paatanacazti chjojžta cjesačha, casticž tjuñicama. Nekztan tjeežtaž cjequičha. ²⁵ Jalla nižtapacha yekjap žoñinacaž zuma paatanacaqui kjanapachačha. Yekjap žoñinacaž zuma paatanacazti ana chertačha. Pero anaž tirapan chjojžta cjequičha. Pjalž tjuñquiziqui tjeežtaž cjequičha.

6

¹ Criichi žoñinacžquiz čhižina, tuž cjican: Patrunž mantuquiz kamñi piyunanacaqui persun patrunžquiz rispitle, parti žoñinacaž werar Yooz quintra ana čiyajo, nižaza tjaajinta Yooz taku ana iñarajo. ² Nižaza jakzilta piyunanacat criichi patrunchizlaj niiqui, juc'anti rispitle, ana quintra čhila, nii patrunaž criichiž cjen. Antiz juc'anti nii patrunžta langžinspančha. Am patrunchachačha criichi maziqui. Jalla nižtiquiztan zuma k'ayi jilačha niiqui. Jalla nii puntunaca čhižinaquičha, nižaza tjaajnaquičha.

ANA WALI TJAAJINACŽ PUNTU

³ Tsjii žoñiqui tsjemat pinsita takunacžtan tsjii kjutñi tjaajnačhani. Jalla nižta ana wali tjaajnaquiz niiqui, Jesucristo Jiliriz zuma tjaajintanacquiztan tsjemataž tjaajinčha. Nižaza nii žoñiqui Yooz mantita kamañquiztan tsjemata kamaña tjaajinčha. ⁴ Jalla nižta tjaajini žoñiqui mit kuzzizza. Yooz puntunaca ultim werara ana zizza. Nižaza nižta tjaajini žoñiqui ana wali kuzziz cjen žoñinacžtan ch'aazkaz pecčha. Čjul taku puntuquiztan ch'aazkaz pecčha. Jalla nuž ch'aazcan chjaawjkatas žejlčha, nižaza t'aka t'akaž cjiSSa, nižaza žoñinacaqui quintra čhiyas žejlčha. Nižaza porapat uj tjojtNASA. ⁵ Nižaza nii millk'u kuzziz žoñinacaqui porapat ana tucuziñi ch'aasničha. Ninacaqui Yooz pinsitanacami zuma werar razunanacami ana zizza. Tii muntuquiz wali jiru kamz cjis pinsican, Yooz jiczquin luzza. Nii wali jiru kamzqui, “Jalla nii kamzazza waliqui”, cjian pinsiničha. Jalla nii ana wal pinsitanacchiz žoñinacžtan ana munazaquičha. ⁶ Pero tsjiikaz cjiwčha. Yooz jiczquiz kamzqui ancha waličha, wali jiru kamzquiztan juc'anti. Yoozquinkaz kuzziz cjian žoñinacaqui cuntintu cjequičha. ⁷ Tii muntuquiz nascuqui učhumqui ana čjulchiztačha. Nižta irata ticžcuqui tii muntuquiztan ana čjulchiz okaquičha. ⁸ Jalla nižtiquiztan tii muntuquiz žejlcan, čhjerchizimi zquitchizimi cuntintu cjistančha. ⁹ Jakziltat wali jiru cjis pecčhaja, ujquiz tjojtNASAčha, nižaza ana wal jiczquiz lusasačha. Nekztan zumzu pinsamintuchiz cjesačha. Nižaza persun quintra ana wal kamzquizkaz pecasačha. Nekztan nii ana wal kamtiquiztan tjappacha pertaquičha. Liw akztaž cjisnaquičha nii žoñiqui. ¹⁰ Paazquin kuz tjaazqui tjapaman ana walinacquiz cjisatčha. Paazquin kuz tjaacan yekjap criichi žoñinacaqui Yoozquiztan tsjii kjutñi chjichta cjiSSičha. Nekztan persunpacha wira ancha sufriskatčha.

¹¹ Timoteo jila, amqui Yooz žoñimčha. Jaziqui ana walinacžquiz anapan kuz tjaaquičha. Antiz zuma kamzquin kuz tjaaquičha. Yooz kuzcama kama. Nižaza Yoozquin kuzzizpan cjee. Nižaza zuma munaziñi kuzziz cjee. Nižaza pasinziz kuzziz tjurt'a. Nižaza humilde kuzziz cjee. ¹² Zuma zultatužtakaz Yoozquin tjurt'iñi kuzziz cjee, nižaza Satanás diabluž partiranacž quintra cjee. Nižaza arajpachquin Yooztan wiñaya kamzjapa, kuz tjaaquičha. Arajpachquin wiñaya kamajo Yoozqui am kjawzičha. Nižaza nuž kjawztan, amqui walja žoñinacž yujcquiz tielarchamčha, “Yoozquinkaz kuzziztčha wejrqui” cjan. ¹³ Timoteo jila, Yoozqui tjapa tii muntuquiz žejlñinacžquiz žeti tjaačha. Nižaza Jesucristuqui Poncio Pilatuž yujcquiz Yooz Ejpžquinkaz kuzziztačha. Jaziqui Yooz yujcquizimi Jesucristuž yujcquizimi wejrqui amquin mantučha, ¹⁴ Yooz kamañquizkaz kama, jalla nii. Nekztan žoñinacaqui Yooz kamaña quintra ana čjul chiyasačha, nižaza Yooz kamañaqui zuma-pankaz tjeežta cjequičha, Jesucristo Jiliriž tjonz tjuñicama. ¹⁵ Yooz Epiž pinsita timpuquiz Jesucristuqui wilta tjonaquičha. Yooz Ejpqui zinta zuma Yoozza. Jalla niičha tjappachquiz-tanami chekanaqui. Nižaza Yoozqui tsjan pajk jiliričha čjul jilirinacžquiztanami. Nižaza niičha juc'ant azziz mantiñiqui čjul mantiñinacžquiztanami. ¹⁶ Yoozpankazza wiñay žejtchizqui. Nižaza anaž jec ujchiz žoñimi Yoozquin macjati atasachha juc'ant zuma kjañquiz kamchi, nekztan. Jalla nižtiquiztan anaž jec žoñimi Yooz cherchičha, nižaza ana cherasačha. Yoozqui wiñaya honorchiz cjila. Nižaza wiñaya mantiñej cjila. Jalla nužoj cjila. Amén.

¹⁷ Amqui tii muntuquiz wali jiru kamñi žoñinacžquiz mantaquičha, ancha cusasanacchiz cjenami ana mita kuzziz cjeajo. Anaž wiñaya nižta wali jiru kamasacha. Jalla nižtiquiztan cusasanacchiz anačha kuz tjaaquičha. Antiz Yoozquinkaz kuz tjaa. Nii žejtñi Yooz-pankaz učhumnacaquiz tjapaman wintizunanaca tjaačha, učhumnaca cuntintu kamzjapa. ¹⁸ Nižaza nii wali jiru kamñi žoñinacžquiz mantaquičha tuž kamajo. Ninacaqui zuma obranaca paaz waquizičha. Nekztan zuma obranacaz paachiž cjen ultim werar wali jiruž cjequičha Yooz yujcquinaqui. Nižaza ninacaqui zuma kuztan ninacž cusasanacžtan žoñinacžquiz yanapz waquizičha. Ana zkutu kuzziz cjis waquizičha. ¹⁹ Jalla nuž zuma obranaca paatiquiztan arajpachquin ultim werar cusasanaca juntaquičha. Nuž junti-tiquiztan, ultimupan Yoozqui arajpachquin ninacžquiz zuma kamkataquičha, wiñaya. Jalla nii arajpachquin wiñay kamzquin kuz tjaaž waquizičha. Nii kamzqui juc'ant zumačha. Jalla nuž wali jiru žoñinacžquiz mantaquičha amqui.

²⁰ Timoteo jila, wejrqui amquiz tjapa Yooz puntunacquiztan tjajinčinčha. Jalla nii tjajintanaca zumpacha cjuñzna, nižaza nii jaru kama. Nižaza ina žoñž takunaca ana nonžna. Ana Yooz takunacačha ninacž takunacaqui. Nižaza zuma tjajintanac quintra chiitaqui ana nonžna. Yekjap žoñinacaqui tsjii kjutñi chižcuqui, “Zuma zizta takučha weriž chiitaqui”, cjiñičha. ²¹ Nižaza yekjap criichi žoñinacaqui nii ana wal taku catokžcu Yoozquiztan tsjii kjutñi zarakchičha. Ana zuma kuzziz cjissičha.

Yoozqui am wintijla. Jalla nužoj cjila. Amén.

SEGUNDA CARTA DEL APOSTOL SAN PABLO A TIMOTEO

¹ Wejrtĉha Pablutqui. Yooz muñañpi jaru Jesucristuž illzta apostoltĉha. Yoozqui Jesucristuž cjen žoñinacžquiz taku tjaachiĉha, Jesucristužquin kuz tjaañi žoñinacžquiz wiñaya arajpachquin kamkatzjapa. Jalla nii wiñaya kamz puntuquiztan paljayajo wejrqui apóstol puestuquiz uchtitĉha. ² Timoteo jila, amqui wejt k'ayi maati cuntamĉha. Jalla nektzanaqui tii cartal cjjržcuĉha. Uĉhum Yooz Ejpžtan nižaza uĉhum Jesucristo Jiliržtan, jalla ninacaqui amquin zumaj yanapla, nižaza amquin okžla, nižaza zuma cuntintu kuzziz kamkatla.

TIMOTEOŽQUIZ CHIIŽINTA TAKU

³ Wejrqui majiñami weenami Yoozquin mayizican, am cjuñuĉha. Am cjuñžcu, wejrqui amiž cjen tirapan Yoozquin sparaquiž cjiwĉha. Yoozquin tjapa kuztan ligituma sirwuĉha. Jaknužt wejt tuqita atĉi ejpnaca Yoozquin zuma sirwitĉhaja, jalla nuž Yoozquin sirwuĉha. ⁴ Wejrqui cjuñuĉha, amiž wejtquiztan kaazñiž cjen. Nižaza wilta am cherz anchal pecuĉha. Nekztan cuntintul cjeeĉha. ⁵ Nižaza cjuñuĉha, amqui tjapa kuztan Yoozquin criichamĉha, jalla nii. Primeraqui am Loida cjiti matilliqui Yoozquin kuzziz cjissintaĉha. Nekztan am Eunice cjiti maa Yoozquin kuzziz zakaz cjissintaĉha. Nižazakaz amqui ultimupan Yoozquin kuzziz cjissamĉha.

⁶ Yoozqui amquiz tsjii zuma kamaña tjaachiĉha, weriž am juntuñ kjaržtan lanžtan. Jalla nižtiquiztan amquin chiižinuĉha, nii zuma kamañiqui tira kamajo. ⁷ Yoozqui uĉhumquiz eksñi kuzziz ana cjiskatchiĉha. Antiz tjup kuzziz cjiskatchiĉha, nižaza zuma munaziñi kuzziz cjiskatchiĉha, nižaza zuma pinsiñi kuzziz cjiskatchiĉha. ⁸ Jaziqui amqui anapanim azaquiĉha, uĉhum Jesucristo Jilirž favora paljaycan. Wejrqui Jesucristuž cjen carsilquiz chawjctitĉha. Jalla nuž cjenami amqui ana wejtquiztan azaquiĉha. Amqui Yooz zuma li-wriiñi taku paljayñiž cjen zakam sufriĉha. Nii sufrisquiztan ana jiwjatalla. Yoozqui amquiz azi tjaazcaquiĉha tjurt'izjapa. ⁹ Nii azi tjaañi Yoozza uĉhum liwriichiĉhi. Nekztan uĉhum kjawziĉha nižžquin tjapa kuztan kamzjapa. Yoozqui uĉhum ana kjawziĉha uĉhumnacaž zuma paatiquiztan. Antiz Yoozqui uĉhum kjawziĉha nižž persun kuz munañpi jaru, nižaza nižž persun okžni kuzziz cjen. Ima tii muntu želan Yoozqui tantiichiĉha, Jesucristužquin kuzziz žoñinacžquiz nižž okžni kuz tjeeznaquiĉha, nii. ¹⁰ Jazizti Yoozqui uĉhum Liwriiñi Jesucristuž tjonchiž cjen nižž okžni kuzziz tjeeziĉha. Jesucristuqui ticz liwž atipchiĉha persunaltajapami nižaza nižžquin criichi žoñinacžtajapami. Nižaza liwriiñi Yooz taku paljaytiquiztan, jaknužt žoñinacaqui Yooztan wiñaya kamĉhaja, jalla niiqui kjanzt'itaĉha.

¹¹ Jalla nii zuma quinto paljayajo Yoozqui wejr utchiĉha apóstol puestuquiz. Nižaza wejr utchiĉha ana judío žoñinacžquiz tjaajnajo. ¹² Jalla nižtiquiztanpacha wejrqui ancha sufruĉha tii carsilquiz chawjckatzcama. Jalla nuž cjenami wejrqui anapan azuĉha, werar Yooztan tsjii kuzziz cjen. Werar arajpach Yoozquinpanž kuz tjaachinĉha. Nižaza tuž cjiwĉha, wejt Yoozqui walja azzizza. Jaziqui niiqui weriž cumpjiita wira cuitaquiĉha Jesucristo tjonz tjuñicama. Jalla niičha zuma werar razunaqui.

¹³ Werjqui amquiz zuma tjaajinchinĉha. Jalla nii tjaajintacama amqui tirapan tjapa kuztan kamaquiĉha. Yoozquin kuzzizpan cjequiĉha, nižaza žoñinacžtan zuma munaziñi kuzziz cjequiĉha. Jalla nuž kamaquiĉha Jesucristužtan tsjii kuzziz cjen. ¹⁴ Yoozqui amquin nižž zuma tjaajintanaca tjaachiĉha. Jalla nii zuma taku cuitaquiĉha. Uĉhum kuzquizpachaĉha Espiritu Santuqui. Jalla niiqui amquiz yanapaquiĉha nii Yooz taku zuma ligituma tjaajnajo.

¹⁵ Tjapa nii Asia provinciquiztan tjonchi žoñinacaqui wejr zinalla ecchiĉha. Jalla ninacquiztan Figelo, nižaza Hermógenes, jalla ninacaqui wejr ecchizakazza. Nii zizza amqui. ¹⁶ Onesiforožti ancha wejr kuzziĉha wiltan wiltan. Nižaza weriž carsilquiz chawjctaž cjen ana azziĉha. Jalla nižtiquiztan zuma okžni kuzziz Yooz Jiliriqui nižžquiz

zumaj yanapla, niiž familianacžtanpacha. ¹⁷Roma cjita wajtquiz želan, nii Onesiforo jilaqui wejr ancha kjurchičha zalañcama. ¹⁸Jesucristo Jiliriz pjalz tjuñquiziqui Yooz Jiliriqui nii Onesiforožquin okzñi kuzziz cjequičha. Efeso wajtquin želan, Onesiforoqui jaknužumi criichi žoñinacžquin yanapchičha, jalla nii amqui zuma zizza.

2

JESUCRISTUŽ ZULTATUŽTAKAZ CJISPANČHA

¹Timoteo jila, wejt maati cuntamčha. Tjup kuzziz cjee. Jesucristuqui amquiz yanapaquičha. ²Wejrqui walja žoñinacž želan Yooz taku tjaajinchinčha. Ninacžtanpacha amqui weriž tjaajintanaca nonzamčha. Jalla nii tjaajinta takunaca amqui tjaajnaquičha zuma cumpliñi kuzziz žoñinacžquizimi. Nekztan nii žoñinacaqui yekjanacžquizimi tjaajnasachha.

³Amqui Jesucristužquin sirwiñiž cjen sufraquiz niiqui, nii sufrizquiztan ana jiwjata. Jalla nuž sufrican, Jesucristužquin tjurt'auquičha walja tjup zultatužtakaz. ⁴Jakzilta zultatut servicio militarquiz žejlčhaja, jalla niiqui militar asuntunacquiz tjapa kuz tjaachha. Ana panž civil asuntunacquiz kuz tjaasachha. Niiž comandantiž mantuquiz cjissa, nii comandantiž kuz wali cuntintu cjiskatzjapa. Jaziqui zultat lii jaruž kamčha, anapanž civil lii jaruž kamčha. ⁵Jalla nižta irata jakzilat pelota uzinčhaja, pelot uzinz lii jaru uzintančha. Ana pelot uzinz lii jaru uznaquiz niiqui, anapanž premio ganasachha. ⁶Nižaza jakzilta langžni žoñit zkala langžaja, jalla niiqui primeraž zkal čherquiztan lulasachha. ⁷Jalla nii weriž chiita puntuquiztan tantiya. Jalla nekztan Yooz Jiliriqui tjapa nii puntuquiztan zumpachaž intintiskataquičha.

⁸Nižaza Jesucristuž puntu cjuñzna. Jesucristuqui David cjita tuqita jilirž majchmaatinacquiztan tjonñičha. Jesucristuž ticziquiztan jacatatchi puntu cjuñzna. Jalla nii liwriñi takupacha paljayučha. ⁹Jalla nuž paljaytiquiztan wejrqui carsilquiz chawjcta sufručha, criminal žoñižtakaz. Jalla nuž weriž carsilquiz chawjcta želanami, liwriñi Yooz takuqui anačha chawjcta. Jalla nižtiquiztan Yooz takuqui tirapanž paljajtačha. ¹⁰Jalla nižtiquiztan wejrqui walja sufručha Yooziž illzta žoñinacžquiz juc'ant wali cjiskatzjapa. Sufručha ninacami wejrmi ultim u liwriita cjisjapa. Jesucristužquiz kuzziz cjen ninacami wejrmi wiñayaž liwriita cjequičha, nižaza arajpachquin wiñaya honorchiz cjequičha.

¹¹Jesucristuqui učum laycu ticzičha. Jalla niičha ultim werar razunaqui. Učumqui tuqita ana wal kamañquiztan ticzi žoñinacžtakaz cjissinčhumčha, nii ana wal kamañquiz ana iya kamajo. Jaziqui ew kamañchiz cjissinčhumčha. Jalla nižtiquiztan Jesucristužtan kamčha.

¹²Nižaza Jesucristužquiz sirwiñiž cjen sufračhaj niiqui, tjurt'ichi kuzziz kamz waquizičha. Nekztan tjurt'ichi kuzziz tirapan cjequiz niiqui, učumqui nižtan chica mantaquičha. Učumqui Jesucristužquiz nicaquiz niiqui, niiqui nižaza učum nicaquičha.

¹³Jaziqui učumž Jesucristužquiz criiz ana cumplichiž cjenami, nii Jesucristuqui tirapanž niž ecta taku cumplaquičha. Niiqui persun taku anapanž nicasachha.

YOOZTAJAPA ZUMA LANGZPANČHA

¹⁴Amqui criichi jilanačquiz nii puntu cjuñskataquičha. Nižaza Jesucristo Jilirž tjuuquiz ninačquiz zumpacha chiižinaquičha, jalla tužu: Anaž ch'aazaquičha ina žoñž takunac puntuquiztan. Jalla nuž ch'aazqui anaž čjuljapa sirwičha. Nižaza nii ch'aazta taku nonžni žoñinacaqui Yooz jiczquiz kamzquiztan tsjii kjutni čhjichtaž cjesachha. ¹⁵Amqui Yooztajapa tjapa kuztan langzna, Yooz yujcquiziqui zuma langžni žoñi pajta cjisjapa. Jalla nižtiquiztan Yooz yujcquiz žejlcan amqui ana čjulquiztan azasachha. Nižaza Yooztajapa langžcan, niž werar liwriñi taku legali paljaya. ¹⁶Ina žoñž takunacaqui anačha chiižqu. Jalla nii ina takunaca chiyasaž niiqui, tsjan tsjan tsjii kjutni žoñinacžquiz irpaquičha. ¹⁷Nii ana wal chiižqu zuma kamañanaca ana wali cjiskataquičha, jaknuž tsjii laa cjiñi tjapa curpu ana wali ch'ujlkatčhaja, jalla nižta. Jalla nuž watchičha Himeneožtan Filetužtan, jalla ninačquiz. ¹⁸Jalla ninacaqui werar Yooz tawkquiztan tsjii kjutni tsjemat taku parličičha, "Jacatatz tjuñiqui watchičha", cjican. Jalla nuž chiihtiquiztan yekjap criichinacž

kuznacaqui turwayskatžcu, Yooz jiczquiztan zarakskatchičha. ¹⁹Jalla nuž cjenami Yoozqui nižquin kuzziz žoñinaca yanapčha tjurt'iñi kuzziz cjeayo. Jalla nižtiquiztan Yooz icliz žoñinacaqui tirapan tjuraquičha. Jalla nii puntuquiztan Yooz takuqui tuž cjičha, "Yooz Jiliriqui niž illzta žoñinacaz pajčha". Nižaza, "Tjapa Jesucristužquin kuzziz žoñinacaqui ana wal kamañquiztan zarakstančha". Jalla nužupančha.

²⁰Tsjiilla cjesačha. Tsjii ricach žoñž kjuyquiziqui tjapaman cusasanaca žejlčha, korquiztan paata, nižaza paazquiztan paata, nižaza tabliquiztan paata, nižaza ljocquiztan paata, jalla nižta cusasanaca žejlčha tsjii kjuyquiziqui. Parti cusasaqui zuma visitanaca atintizjapa žejlčha. Parti cusasazti zapuru kamzjapa žejlčha. ²¹Jalla nižta iratačha žoñinacaqui. Yooz Jiliriz atintizjapa, nižaza zuma honorchiz cjisjapa, zuma kamstančha. Nižaza nii ana wali chiiñi žoñinacžquiztan cuitasaquičha. Yooz Jiliržtajapa sirwiñipankaz cjee. Nekztan Yooz Jiliriqui am ocupasačha. Nižaza listu cjesačha čjul wali paazjapami.

²²Tjotjowanacaqui ana wali pinsizcu, ana wali ojklayasačha. Amqui nižta anawali kamzquiztan cuitasaquičha. Yooz kuzcama kamaquičha, nižaza Yoozquinakz kuzziz cjequičha, nižaza zuma munaziñi kuzziz cjequičha, nižaza parti žoñinacžtan zuma kamaquičha. Amtan tjapa Jesucristo Jiliržquin kuzziz žoñinacžtan zuma kamz waquizičha.

²³Nižaza zumzu ana zizñi žoñinacž ch'aaz puntunaca parlanauqui, ana mitisaquičha. Nii ch'aaz puntu parlaquiz niiqui, ultimupan juc'anti aptjapznasačha. Jalla nii zizza amqui.

²⁴Jesucristo Jiliržquin sirwiñi žoñiqui anaž ch'aaz waquizičha. Antiz tjapa žoñinacžtan zuma munaziñi kuzziz kamz waquizičha. Nižaza zuma tjaajiñi kuzziz cjis waquizičha. Nižaza pasinziz kuzziz cjis waquizičha. ²⁵Nižaza Yooz tawk quintra žoñinacžquiz ch-ižinaquičha zuma humilde kuztan. Jalla nuž chiižinan Yoozqui cunamit ninacž kuz campiskatačhani, werar Yooz tawk jaru wilta kamajo. ²⁶Anziqui ninacaqui diabluž kjarquiz žejlčha, tsjii presužtakaz, diabluž mantita jaru ojkljapa. Amiž humilde kuztan chiižintiquiztan Yoozqui cunamit diabluž kjarquiztan ninacžquiz liwriita cjiskatačhani.

3

ANCHA ANA WALI ŽOÑINACA ŽELAQUICHA

¹Jalla tižta zakaz intintazkatz pecučha. Ima Jesucristuž tjonan ch'amaž cjequičha zuma kamzjapa. ²Žoñinacaqui persun kuzcama kamzkaž pecaquičha. Nižaza paazquiz kuz tjaaquičha. Nižaza persun honorchiz cjis pecaquičha. Nižaza mit kuzziz cjequičha. Nižaza Yooz quintra chiiñi cjequičha. Nižaza maa ejpž takunaca ana casñi cjequičha. Nižaza ana jecžquizimi sparaquiz cjiñi cjequičha. Nižaza Yooz kamañ puntu ana rispitaquičha. ³Nižaza ana okzñi kuzziz cjequičha. Nižaza ana jecžtanami zuma kamaquičha. Nižaza žoñinacž quintra takunaca joojowaquičha. Nižaza jaknužt persun kuz pinsičhaja, jalla niicama ojklayñi cjequičha. Nižaza žoñi sufriskatz pecñi kuzziz cjequičha. Nižaza zuma žoñinacž quintran cjequičha. ⁴Nižaza tarasuna paañi kuzziz cjequičha. Nižaza ana eksñiž malcreados cjequičha. Nižaza persun honorchiz cjis pecñi kuzzizkaž cjequičha. Nižaza persun kuzcama kamzquinkaz kuz tjaaquičha. Yooz kuzcama kamzquin anapan kuz tjaaquičha. ⁵Ninacaqui Yoozquin criichiz cutzturumpi jaru ojklayñiž cjenami, ultimquiziqui persun kamañ wira kaz paaquičha, anaž Yooz kamañ jaru cjequičha. Yooz aztan ana kamaquičha zuma kamzjapa. Jalla nižta kamñi žoñinacžtan anačha ancha amigo pajasqui.

⁶Nižaza yekjapanacaqui nii ana wal kamñi žoñinacžquiztan maatakžtan kjuyquiz luz pecčha, nii kjuychiz uj paañi maatakžquiz incallzjapa. Nižta maatakanacaqui uj paazquiztan ana atipasachha. Nižaza juc'ant juc'ant ujchiz cjijsa. Persun kuz ana ewjasñi atčha. Jaziqui nii maatakanacaqui čjul ana wali pinsitanacž jaru ojklayčha. ⁷Zizñi cjis peccu, čjul tjaajintanacami catokčha. Pero anawira werar Yooz taku intintazñi cjis atasachha. ⁸Jalla nižtakaztačha pucultan yatirinacaqui, Janes cjita žoñžtan nižaza Jambres cjita žoñžtan. Jalla ninacaqui Moisés quintra paachičha. Jalla nižta irata nii ana wal kamñinacaqui werar Yooz tawk quintra paačha. Nižaza nii ana wal kamñi žoñinacaqui ana zum pinsamintuchiz tsjii kjutñipan chiiñičha "Yoozquin kuzziztčha" cjicanaqui. Pero

zumpacha tantiita cjequiča. Nekztan ninacž ana zuma kuz kjanapacha tjeeža cjequiča, tjapa žoñinacaž ninacž puntuquiztan werara zizajo. ⁹ Ninacaqui tsjii ratupanikaz ninacž taku walkatasacha. Nekztan žoñinacapačaž ninacž taku zuma tantižcu ninacž ana zuma razunanaca nayaquiča. Jalla niža watchiča Janetan Jambrestan.

PABLUŽ KAMTANAC PUNTU

¹⁰ Amzti weriž tjaajintanaca zumpacha catokchamča, nižaza weriž kamtanacami zumpacha zizzamča, nižaza weriž kuzquiz tantiitanacami, nižaza weriž Yoozquin kuzziz kamtanacami, nižaza weriž zuma pasinziz kuzziz kamtanacami, nižaza weriž zuma mu-naziñi kuzziz kamtanacami, nižaza weriž tjurt'iñi kuzziz kamtanacami, ¹¹ nižaza žoñinacaž wejtquiz chjaajwkatcan kamtanacami, nižaza weriž sufrican kamtanacami. Jalla tjapa weriž kamtanacami zizzamča. Nižaza amqui zumpacha zizza, jaknužt wejtquiz watchaja Antioquia wajtquizimi, Iconio wajtquizimi, Listra wajtquizimi. Jalla nii watjanacquiziqui ancha sufrichinča. Jalla nuž sufrichiž cjenami Yooz Jiliriqui wejr liwriichiča tjapa nii sufrisquiztan. ¹² Jalla niža sufrachiča tjapa criichi žoñinacaqui. Jakzilta criichi žoñinacat Jesucristuž kuzcamapan zuma kamz pecčhaja, jalla niža sufrachiča tjapa ninacaqui. ¹³ Nižaza ana wal kamñi žoñinacami nižaza incallñi žoñinacami tsjan juc'anti ana waliž kamaquiča, žoñinacžquiz incallaquiča, nižaza ninacaqui incallta zakaz cjequiča.

¹⁴ Amzti amiž zizta Yooz tawk jaru kamcan tirapan tjurt'iñi kuzziz cjequiča. Nižaza amqui zizza jecčhalaj amquiz tjaajinchi, jalla nii. Nii tjaajintanaca zumpacha tantižcu, legali Yooz takucamača nii tjaajintanacaqui, jalla nii tantiyazzamča. ¹⁵ Koltallquiztanpacha amqui cjiřta Yooz taku zizzamča. Nii Yooz takuž istutican, amqui liwriñi puntu ancha zizñi cjsamča. Yooz takuqui tjaajža, jaknužt liwriita cječhaja, Jesucristužquiz criichiž cjen, jalla nii. ¹⁶ Tjapa nii cjiřta Yooz takuqui Yoozquiztan-cama ulanchicamača. Jalla nižtiquiztan Yooz takuča zuma tjaajiñipanqui, nižaza uj tjeežñiqui, nižaza zuma Yooz jiczquiz ojklajajo azquichñiqui, nižaza tjapa Yooz kuzcama tjaajiñipanqui. ¹⁷ Jalla nužupanča Yooz takuqui. Yooz taku zumpacha catokžcuqui, Yoozquin kuzziz žoñinacaqui zumpacha zizñi cjsisa Yooz kamañquizkaz zuma kamzjapa. Nižaza Yooz taku catokžcuqui Yoozquin kuzziz žoñinacaqui zumpacha tjaczi cjsisa, tjaapan walinaca paazjapa.

4

PABLUŽ CHIIŽINTA TAKU

¹ Jesucristo Jiliriqui mantizjapa tjonaquiča. Jalla nuž tjonžcu ticzimi žejtñimi pjalz-naquiča. Jalla niž yujcquizimi Yooz Ejpž yujcquizimi am chiižinuča, Yooz taku paljayaquiča amqui. ² Nižaza timpuchiz cjanami ana timpuchiz cjanami tirapan Yooz tawkžtan žoñinacžquiz chiižinaquiča. Nižaza žoñinacžquiz intintiskataquiča Yooz taku werarača, jalla nii. Nižaza uj paañi žoñinacžquiz Yooz tawkžtan ujznaquiča. Nižaza zumpacha amtayaquiča. Jalla nuž chiižincan, zuma pasinziz kuzzizpan tirapan tjaajnaquiča. ³ Tsjii timpuž tjonaquiča. Jalla nii timpuquiz žoñinacaqui zuma Yooz taku tjaajintanaca anaž nonz pecaquiča. Antiz jakzilta tjaajiñit ninacž persun kuz wali cjskatačhaja, jalla nii tjaajiñinaca nonz kaz pecaquiča. Ninacž persun ana wali razun jaru, jalla niža tjaajintanaca pecaquiča. ⁴ Werar Yooz taku anapanž nonz pecaquiča. Ina žoñž parlakaz nonz pecaquiča. ⁵ Amzti zuma werar razunanac jaru tirapan litituma kamaquiča. Sufricanami zuma tjurt'iñi kuzziz cjequiča. Nižaza zuma liwriñi Yooz taku paljazquin kuz tjaaquiča. Nižaza amqui Yooziž tjaata kamaña cumplaquiča.

⁶ Wejrqui tsjii wilanažtakaz contal cjeeča. Wejt ticz tjuñiqui wajillača. ⁷ Zuma zeltatužtakaz wejrqui Yoozquin zuma tjurt'iñi kuzzizpan žejlchinča. Nižaza werjqui wejt apóstol oficio zuma cumplichinča. Nižaza tirapan Yoozquin tjapa kuztan criyuča. ⁸ Jaziqi arajpachquin ojžcu weriž Yooz kuzcama kamtquiztan, tsjii zuma premiužtakaz gansjapa tjewznuča. Jesucristo Jiliriča litituma pjalñiqui. Jalla niñiqui niž pjalz tjuñquiz nii premio wejtquiz tjaaquiča. Anaž wejtquizkaz premio tjaaquiča. Tjapa nižquin

kuzziz žoñinacžquiz premio tjaaquiča. Ninacazakaz niiz tjonz tjuñi ancha tjewža, ancha chertz pecča.

PABLUQUI ZINALLA CARSILQUIZ ŽEJLČHA

⁹Timoteo jila, tsjiillakaz cjesača. Tsjii wiltallami wejr chertzñipan tjonz pecall amqui. Wajilla tjonalla. ¹⁰Demaszi wejr zinalla ecchiča. Tii muntuquiz žejlñi cusasanaca juc'anti pecča. Jalla nekztan wejtquiztan ojkchiča Tesalónica watja ojkzjapa. Nižaza Crescentiqui Galacia yokquin ojkchiča. Nižaza Tituzti Dalmacia yokquin ojkchiča. Jaziqui wejtquin tjonalla. ¹¹Lucaskazza wejttan chicaqui. Jaziqui Marcos kjurznaquiča. Nuž wajtžcumi zjijcaquiča amtan. Marcosqui wejtquiz zuma yanapasača Yooztajapa langzquiztan. ¹²Tíquico wejrqui cuchanchinča Efeso wajtquin. ¹³Amqui tjoncan wejt irs caputi zjijcnaquiča. Wejt irs caputi ecchinča Carpos kjuyquiz Troas wajtquin. Nižaza librunaca zjijcnaquiča. Tsjan chekanac wejt papilanaca zjijcnaquiča.

¹⁴Alejandro, nii cobre jirunaca paañiqui ancha wejt quintra paachiča. Jalla niiz paatiquiztan Yooz Jiliriqui nii casticaquiča. ¹⁵Amqui niizquiztan cuitasaquiča. Niiqui učhum paljayta Yooz taku ancha quintrača.

¹⁶Weriž jilirnacž yujcquiz primera tjurt'iñi tawkžtan chiyan, anaž jecmi wejtquiz tjurt'i yanapchiča. Tjapa wejr zinalla ecchiča. Ninacaz ectiquiztan Yoozqui ninaca anakaj casticla. ¹⁷Yooz Jiliriqui wejtquiz yanapchiča. Nižaza wejtquiz zuma tjup kuzziz cjiskatchiča, jalla nižtiquiztan wejrqui liwriñi Yooz taku tirapankal paljayuča, tjapa ana judío žoñinaca nonznajo. Nižaza wejr konz cjen Yoozqui wejr liwriichiča. ¹⁸Nižaza tjapa ana walnacquiztan wejr liwriyaquiča, nižaza Yoozqui wejr cuitaquiča niiz arajpach wajtquin cjisjapa. Zuma Yoozqui wiñaya wiñaya honorchizkaj cjila. Amén.

¹⁹Tsaanžinalla Priscaquin, nižaza Aquilžquin, nižaza Onesíforuž familianacžquin. ²⁰Erasto cjita jilaqui Corinto wajtquin eclichiča. Trófimo cjita jila jalla nii laa ecchinča Mileto wajtquin. ²¹Ima zac timpu luzan tjonžquizpan pecalla. Nižaza amquin tsaanžquiča Eubulo cjita jilami, nižaza Pudente cjita jilami, nižaza Lino cjita jilami, nižaza Claudia cjiti cullacami, nižaza tjapa criichi jilanacami.

²²Jesucristo Jiliriqui amtan chicaj cjilalla, nižaza tjapa ančucaquiz zumaj wintijla. Amén.

LA CARTA DEL APOSTOL SAN PABLO A TITO

¹Wejrtča Pablutqui, Yooz mantitacama okiñ žoñtča, nižaza Jesucristuž cuchanzquita apostoltča. Jesucristuqui wejr apóstol puestuquiz utchiča criichi žoñinacžquiz Yoozquin juc'ant kuzziz cjskatzjapa, nižaza Yooz kamañ puntu ultim werara zizkatajo, ²nižaza arajpachquin Yooztan wiñaya kamz tjewzkatajo. Yoozqui ana toscara chiyasača. Jalla niiqui arajpachquin wiñaya kamzjapa taku tjaachiča tuqui timpuquiztanpacha. ³Nekztan niž pinsita timpuquiz Yoozqui nii kamz puntuquiztan kjanapacha kjanzt'ichiča paljayta liwriiñi Yooz tawkquiztan. Nii liwriiñi taku paljayajo, učum Liwriiñi Yoozqui wejtquiz mantichiča. Jalla nižtiquiztan wejrtča liwriiñi taku paljayñi kamañchizqui. ⁴Tito jila, jaziqui wejrqui amquin tii cartal cjiyrčuča. Wejt maati cuntamča. Amqui Yoozquin kuz litituma tjaachamča. Jaziqui pucultan učumqui Yoozquin kuzzizčumča. Yooz Ejpžtan nižaza Jesucristo učum Liwriiñižtan, amquiz yanapla, nižaza amquiz okzla, nižaza walikaj kamkatla.

ICLIZ JILIRINACAQUI ZUMA KAMZPANČHA

⁵Creta yokquin wejrqui am ecchinča, criichi žoñinacžquiz juc'ant zuma kamañanacchiz cjskatajo, nižaza weriž mantitacama zapa wajtquiz icliz jilirinaca uchajo. ⁶Icliz jilirinacaqui zuma kamzpanča: Zuma kamañchizlaj niiqui, ana jakziltami čjul ujmi tjeznasača. Icliz jilirinacaqui tsjaa tjunatanpanikaz cjspanča. Nižaza niž maatinacaqui Yoozquin criiñi cjspanča. Nižaza niž maatinacaqui zuma kamañchiz cjspanča, ana malcreado. Nižaza maa ejp cazñi kuzziz cjspanča. ⁷Jakzilta icliz jilirit Yooz icliz cwitiñi puestuquiz uchta cječhaja, jalla niiqui zuma kamañchizkaz cjspanča, jalla nižtiquiztan ana jakziltami nižquiz čjul ujmi tjeznasača. Nižaza ana persun kuzcamakaz pecñi cjspanča. Nižaza ana oralla žawñi kuzziz cjspanča. Nižaza ana licñi kuzziz cjspanča. Nižaza ana kichjasñi kuzziz cjspanča. Nižaza ana ancha paaz pecñi kuzziz cjspanča. ⁸Nižaza čjul tjonžinacžquizimi zuma kjawzñi kuzziz cjspanča. Nižaza zumanacapan pecñi kuzziz cjspanča. Nižaza zuma pinsamintuchiz cjspanča. Nižaza Yooz kuzcamapankaz kamñi kuzziz cjspanča. Nižaza Yoozquin tjapa kuz sirwiñi cjspanča. Nižaza persun kuz zuma ewjazñi cjspanča, čjul uj paaz cjenami. ⁹Nižaza apostoluž tjaajinta jaru ultim werar Yooz tawkquiz tjurt'ichi kuzziz cjspanča. Nižaza werar Yooz taku zuma tjaajincan, criichi žoñinacžquiz p'ekinchayasača, nižaza Yooz tawk quintra chiiñinacžquiz ninacž ana zuma pinsamintunaca tjeznasača.

¹⁰Creta yokquin walja ana zuma žoñinaca žejlča, ana jiliri cazñi. Nižaza ina razunanacaž chiiñiča. Nižaza criichinacžquiz incallča. Nižaza ninacaqui judío cutzturumpinac jaruzakaz kamz pecñiča. Ninacaqui juc'anti nižta ana waliž kamča. ¹¹Nii ana zum žoñinacaqui ana wali tjaajinča, paaz gansjapakaz. Jalla ninacž ana zuma chiiñi ataqui chawjcsinsa, ana nižta tjaajnajo. Ninacaqui ana wali tjaajincan, kjuychiz familianaca intru quejpskatča. Jalla nižta ana wali tjaajinz ana waquziča.

¹²Tsjii Cret wajtchiz žoñiqui ariwiñitača. Nii Cret žoñipacha cjichiča: “Cret wajtchiz žoñinacaqui toscar žoñinacapanča, nižaza malcreado žoñinacača, nižaza walja lujlñi žoñinacača, nižaza jayranacača”. Jalla nuž cjichiča nii Cret žoñiqui. ¹³Jalla nii žoñiqui razuna chiiñiča. Jalla nižtiquiztan Cret wajtchiz anawal criichinacžquiz zumpacha ujnaučiča, Yoozquin tjapa kuzziz werar Yooz tawkquiz tjurt'ajo. ¹⁴Nižaza chiižinaquiča judío quintunaca ana juyzu paajo. Yekjap žoñinacaqui werar Yooz taku anaž catokz pecča. Jaziqui Cret žoñinacžquiz chiižinaquiča nii Yooz tawk quintra žoñinacž mantitanaca ana juyzu paajo.

¹⁵Jakziltat Yooz kuzcama zuma kamčhaja, jalla niiqui čjulu paacanami Yoozquin kuzzizpanča. Pero ana zuma kamañchiz ana criichinacaqui čjulu paacanami ana

Yoozquin kuzzizza, persun pecta kamzquinkaz kuzzizza. Ninacača ana zuma pinsam-intuchizkazqui. Nižaza persun uj paažcumi ana naazniča. ¹⁶Ninacaqui cjiñiča, “Yooz pajuča” cjican. Ultimquiziqui ana zuma kamñiž cjen Yooz quintrapanikaz kamča. Yoozqui ninacaž ana zuma kamtiquiztan anaž jutztaza. Ninacaqui Yooz kuzcama ana cažiñpanča. Nižaza ninacaqui ana čjul zuma paazmi atasacha.

2

ZUMA TJAAJINTA PUNTU

¹Tito jila, amqui zuma tjaajinta jaru tjaajnaquiča, jalla tužu: ²Chawc žoñinacaqui zuma ewjazni kuzziz cjispanča. Nižaza rispitta kamañchiz cjispanča. Nižaza zuma pinsamintuchiz cjispanča. Nižaza Yoozquin tjapa kuzziz cjispanča. Nižaza zuma munaziñi kuzziz cjispanča. Nižaza tjurt'iñi kuzziz cjispanča. ³Jalla niža irata zakaz cjispanča chawc maatakanacami. Zuma kamañchiz cjispanča, jaknužt Yooz yujcquiz zuma kamz waquizičhaja, jalla niža. Nižaza ana čjul ana wal quintumi joojooñi cjispanča. Nižaza ana licni kuzziz cjispanča. Nižaza parti maatakanacžquiz zumanaca tjaajiñipan cjispanča. ⁴Nižaza parti maatakanacžquiz chiižinasacha, persun luctakžtanami maatinacžtanami zuma munaziñi cjisjapa. ⁵Tur maatakanacaqui zuma pinsamintuchiz cjispanča. Nižaza anapanž yekja luctaka pinsispanča. Nižaza kjuya zuma cwitiñi cjispanča. Nižaza okžni kuzziz cjispanča. Nižaza luctakž jaru cjispanča. Jalla niža zuma kamtiquiztan anaž jecmi Yooz tjaajinta tawk quintra chiyasacha. Jalla niža tjaajnaquiča chawc maatakanacaqui.

⁶Nižaza tjowa luctakanacžquiz zakaz chiižinaquiča niža zuma kamañchiz kamajo. Nii tjowa luctakanacaqui ewjazni kuzziz cjispanča, ana čjul uj paazjapa. ⁷Ampacha zumapankaz kamz waquiziča. Jalla nižtiquiztan tjowa luctakanacaqui am zuma kamni cheržcu, niža iratazakaz zuma kamasacha. Nižaza amqui tjaajincanaqui zumapan tjaajnaquiča zuma kuztan, nižaza humilde kuztan. ⁸Jalla nuž amiž zuma tjaajintiquiztan anaž jecmi amquiziqui uj tjojtnasacha, “Ana wali tjaajinchamž amqui” cjicanaqui. Nižaza amiž zuma tjaajintiquiztan quintra žoñinacaqui azkataquiča. Ana čjulumi am quintra uj tjeežni atasacha.

⁹Amqui criichi piyunanacžquiz chiižinaquiča, ninacž patrunž mantita jaru cjejajo. Nižaza čjulu paacanami patrunžquiz cuntintu cjiskatasacha, anapanž chayni kuzziz cjispanča. ¹⁰Nižaza anača tjañi cjispanqui, antiz litumapanž cjispanča, zuma cumpliñi. Jalla niža piyunanacaž kamtiquiztan, žoñinacaqui učum Liwriñi Yooz tjaajinta puntuquiztan “Walipanča” cjican chiyasacha.

¹¹Yoozqui tjapa žoñinalta Jesucristo cuchanžquichiča. Jaziqui jakziltat Jesucristužquiz kuzziz cječhaja liwriita cjesacha. Jalla nuž cuchanžquitaž cjen Yoozqui niž okžni kuzziz tjeeziča. ¹²Nii okžni kuzziz Yoozqui učumnacaquiz tjaajža, Yooz tawk quintra paatanaca ecajo, nižaza ana wal kuzquiztan pectanaca ecjo. Nižaza Yoozqui tjaajža, tii muntuquiz žejlcan persun kuz ewjazpanča čjulu uj paaz cjenami, nižaza čjulu ana wal chiiž cjenami. Nižaza Yooz kuzcama kamspanča. Nižaza Yoozquin tjapa kuz sirwispanča. Jalla nuž tjaajža Yoozqui. ¹³Učum Liwriñi Jesucristuča pajk Yoozqui. Jalla niiqui zuma pajk obra tjeežcan tii muntuquiz wilta tjonaquiča. Jalla niiž tjonz tjuñquiziqui cuntintuž cjequiča tjapa criichinacaqui. Jalla nižtiquiztan zuma kamcan niiž tjonz tjewznaquiča. Jalla niža tjewz waquiziča, jalla nii tjaajža Yoozqui. ¹⁴Nii tjonžni Jesucristuqui učum laycu ticziča, tjapa ana walinacquiztan liwriizjapa. Ana walinacquiztan učum liwriichiča, niiž partir žoñi cjisjatzjapa, nižaza učumnacaquiz tjapan zumanaca paaz ancha pecni kuzziz cjiskatzjapa.

¹⁵Jalla nii tjaajintanaca amqui zakaz tjaajinstanča, zumpacha chiižincan, nižaza p'ekinchaycan. Nižaza nii tjaajintanaca panž mantaquiča žoñinacaž nii tjaajinta jaru kamajo. Jilir puestuchiz cjen niža mantaquiča. Nekžtan amiž tjaajintiquiztanaqui anaj jecmi am iñarla.

3

PABLUŽ CHIIŽINTA TAKUNACA

¹ Criichi žoñinacžquiz cjuñskataquiča jalla tužupan: Ninacžlaqui gobierno mantiñi žoñinacžquizimi jilirinacžquizimi jalla ninacž mantuquiz zuma kamz waquiziča. Nižaza ninacaž mantitanaca caz waquiziča. Nižaza listupan cjispanča zuma obranaca langzjapa. ² Nižaza anaž jakziltižquizimi chjaawjkatasacha. Nižaza ana ch'aasñi kuzziz cjispanča. Nižaza llan kuzziz cjispanča. Nižaza tjapa žoñinacžtan humilde kuzziz cjispanča.

³ Tuquiqui učumqui ana criichi žoñinacazakaztača. Yooz puntuquiztan zumzu ana zizñi kuzziztača. Nižaza ana Yoozquin cazñi kuzziztača. Nižaza tsjii kjutñi cjičjiñchumtača. Nižaza učumqui persun kuzcama ojklayiñchumtača, jaknužt učum ana wal kuz pectčhaja, jalla nuž. Nižaza ana wal kuzziz kamiñchumtača. Nižaza tsjii želinchiz žoñižtakaz cjis pequiñchumtača ana wali zmazñi. Nižaza učum ana wali kamtiquiztan žoñinacaqui učum quintrā žawjñitača. Nižaza žoñinacžtan porapat chjaawjkatñi kuztan ch'aasiñchumtača. ⁴ Jalla nuž učumnacaž ana zuma kaman učum Liwriiñi Yoozqui niž zuma kuzmi nižaza niž okzñi kuzmi tjeeziča. ⁵ Jalla nižta okzñi kuzziz tjeežcu Yoozqui učum liwriichiča. Učumnacaqui tsjii lii jaru kamtiquiztan ana liwriitatača. Pero učum ana zum kuz awjžintaž cjen, nižaza Yooz Espiritu Santuqui učumnac kuznacquiz luzziž cjen, Yoozqui učum liwriichiča. Nekztan ew zuma kamaña tjaachiča. ⁶ Učum Liwriiñi Jesucristuž cjen Yoozqui tjapa učumnacaquiz niž Espiritu Santo ancha zuma kuztan tjaachiča. ⁷ Yooz Ejpqui niž okzñi kuzziz tjeežcu učumnacaquiz nii favora paachiča, niž yujcquiz zumapan cjisjapa. Nižaza Yoozqui učumnacaquiz arajpach irinsa tanzñinaca cjiskatchiča. Nižta irinsa tanzñinacaž cjen učumnacaqui tjewznača Yooztan chica wiñaya kamzjapa.

⁸ Ultim weraracha Yoozquiztan tjaajintaqui. Nižaza zumpacha tjurt'iñi kuztan nii tjaajintanacquiz panž tjurt'aquiča, Yoozquin criichinacaž zuma kamzquin kuz tjaajo. Jalla nii tjaajintaqui ancha zumapanča, tjappach žoñinacžta. Nižaza zumapanž yanapča Yooz kamañquic juc'ant zuma kamzjapa. ⁹ Zumzu ch'aazñinacžquiz ana mitisa, nižaza zarakaquiča nii zumzu ch'aazñinacžquiztan. Nižaza tuquita atchi ejpnacž puntu parlita nonzquiztan zarakaquiča. Nižaza Moisés lii puntuquiztan ch'aasnan jalla nižtanaca nonzquiztan zarakaquiča. Tjapa nii ana wali parlitanacaqui inakazza. Zuma kamañchiz kami anapanž yanapča.

¹⁰ Jakzilta icliz criichinacat pjali t'akačhaja, jalla nii žoñi kjawznaquiča. Nekztan chižinaquiča tsjii wiltami pizc wiltami. Amiž chiižinta anaž nonznacquiž niiqui, iclizquiztan chjatkattaž cjequiča. ¹¹ Niiž ana nonžtiquiztan amqui zizzaquiča, nii žoñiqui ana zuma kuzzizpanča, nižaza tsjii kjutñi chjichta kuzzizpanča, jalla nii. Persunpacha niž uj paata naaznasača. Ancha ujnaca paaz pecñi kuzziz cjen castictaž cjequiča.

¹² Wejrqui amquin Artemas už Tíquico cuchanžcača. Jalla niž irantižquitan, amqui wejtquin uri tjonz pecalla. Wejrqui Nicópolis wajtquin želača. Jalla nicju awti timpu watz tantiichinča. ¹³ Nii tjurt'ižñi Zenas awjatu, nižaza Apolos, jalla nii pucultan žoñinaca zumpacha despachaquiča amqui, ninaca ana čjulumi pjaltizjapa. Nižaza zumpacha žaka cjižinaquiča ninaca ojczjapa. ¹⁴ Nižaza učum criichinacaqui zuma kamznacquiz kuz tjaaz waquiziča. Nekztan t'akjir criichi žoñinacžquiz yanapaquiča. Nižaza wacchi zuma obranaca tjeeznaquiča.

¹⁵ Tjapa wejtan chica kamñi žoñinacaqui amquin tsaanžquiča. Nižaza wejrmi amquin tsaanžcuča. Nižaza amqui wejtnaca k'ayi criichinacžquiz tsaanžinaquiča. Yoozqui amquiž nižaza tjapa neks žejlñi criichi žoñinacžtan zumapaj yanapla. Jalla nužoj cjila. Amén.

LA CARTA DEL APOSTOL SAN PABLO A FILEMON

PABLUQUI FILEMONŽQUIZ CARTA APAYCHIČHA, ONESIMUŽQUIZ ZUMA RISIWAJO

¹ Wejrtčha Pablutqui. Jesucristužquin sirwiñiž cjen carsilquiz chawjctičha. Filemón jila, amqui Yoozquin sirwiñi mazimčha, nižaza pecta jilamčha. Wejttn Timoteo jilžtan amquin tii cartal cjjržcuča. ² Nižaza cjjržcuča am kjuyquiz ajcñi criichi žoñinacžquin. Nižaza cjjržcuča Apia cullacaquin, nižaza Arquipo jilžquin. Arquipuqui zuma zultatuž-takaz tjurt'iñi kuzziz Yoozquin sirwiča. ³ Učhum Yooz Ejpžtan nižaza učhum Jesucristo jiliržtan, ančhucaquiz zumapaj yanapla, nižaza walikaj kamkatla.

FILEMON ANCHA ZUMA TJAPA KUZIZZA

⁴ Yoozquin mayizican am cjuñznuča. Amiž cjen wejrqui tirapan Yoozquin sparaquič cji-wčha. ⁵ Amqui zuma munaziñi kuzziz kamañamčha tjapa criichi jilanacžtan. Nižaza amqui Jesucristužquin tjapa kuzziz criichamčha. Jalla nii am puntu zizcu, Yoozquin sparaquič cjichinčha. ⁶ Ammi parti Jesucristužquin kuzziz žoñinacami Yooz zuma kamañchizza. Jesucristužquin kuzziz cjen učhumnacalta ancha Yooz zumanaca žejlčha. Amiž zuma kamz cjen žoñinacaqui Yooziž tjaata zumanaca puntuquiztan juc'anti intintazñi cjissičha. ⁷ Filemón jila, amiž cjen criichi jilanacž kuznacaqui cuntintu cjiskattačha. Wejrqui zakaz nižaza cuntintu cjissinčha, am zuma munaziñi kuzziz cjen.

PABLUQUI TSJII FAVORA MAYCHIČHA

⁸ Wejrqui Cristuž ilzta apostultčha. Jalla nižtiquiztan wejrqui jaknužt am kamz waquizichaja, jalla nii amquiz mantasačha. ⁹ Pero amquin ana mantačha. Antiz amquiztan tsjii favora mayučha. Wejrtčha chawcalla, nižaza Jesucristužquin sirwiñiž cjen carsilquiz preso želuča. Amtan zuma munazican, amquiz rocz pecučha Onesimužquiz tsjii favora paajo. ¹⁰ Tii carsilquiz žejlcan, wejrqui Onesimužquiz Yooz taku paljaychinčha. Nekztan Onesimuqui Yoozquin criichiž cjen wejt maati cunta cjissičha.

¹¹ Niiž tuquiqui Onesimuqui ana wal kamañquiz luzzitačha. Anziqiu zuma kamañquiz luzzičha. Jaziqui niiqui amtami wejtami walipančha. ¹² Jaziqui wilta amquin cuchanzcuča. Nižaza niiž irantižcu amqui zuma risiwaquičha, jaknužt wejr risiwcham-čha, jalla nuž. ¹³ Tekz wejttn chica eclichaj cjiwčha. Carsilquiz želan Onesimuqui am cuntiquiztan wejtquiz sirwasacha. Wejrqui Yooz taku paljaytiquiztan tii carsilquiz želuča. ¹⁴ Pero amtan ima zumpacha parlican, wejrqui anal Onésimo ecliskatz pecučha. Amquiz anal ancha mantiz pecučha, wejtta tsjii favora paazjapa. Onésimo wejttn chica tira kamasacha. Pero am persun kuzquiztan nuž tantiitaž niil pecučha. ¹⁵ Tsjii timpuqui Onesimuqui amquiztan zarakchičha. Cunamit nižta katčhani, amtan chica tsjii criichi jila watay wata cjisjapa. ¹⁶ Jaziqui anačha piyunakazqui. Antiz Yoozquin criichi k'ayi jilazakazza. Wejrqui niižquin k'ayachuča. Walikazza niiqui. Amzakaz Onesimužquiz k'ayachaquičha am zuma žoñiž cjen, nižaza Yoozquin criichi jilažta cjen.

¹⁷ Nižaza amqui wejtquiz zuma amigumžlaj niiqui nekztan Onésimo zuma risiwaquičha, wejt cunta cjenauqui. ¹⁸ Tuquiqui Onesimuqui amquiz ana wali paachizlaj niiqui, weril respontacha. Nižaza Onesimuqui amquiz čhulu kaja cjenami, wejtquizkam cobraquičha. ¹⁹ Wejrpacha tii litranaca persun kjaržtan cjjržcuča, wejrqui tjapa pacačha. Pero wejr am cjuñskatasacha, weriž cjen amqui Yoozquin criichamčha. ²⁰ Wejt jila, jalla nii favoraž paalla, Yoozquin criichi jilažta. Wejr kuznalla, Cristužquin criichi jilažta.

²¹ Yooz kuzcama kamañamčha. Jaziqui nayučha, amqui tii weriž mayta favorquiztan juc'anti paaquičha, nii. Jalla nužupanž cjequičha. ²² Nižaza wejtta tsjii alujamintu tjacžinalla. Wejrqui ančhuc cherezñi tjonz pecučha. Yooz munan nižaza ančhucaž mayizitaž cjen wejrqui tjonačha, ančhuc cherezñi. Jalla nii ojczjapa tjewznuča.

²³ Epafrasqui amquin tsaanžquičha. Niiqui wejttn chica carsilquiz žejlčha, Jesu-cristužquin sirwiñiž cjen zakaz. ²⁴ Marcustan, Aristarcužtan, Demastan, nižaza Lucastan,

jalla ninacaqui amquin zakaz tsaanžquičha. Ninacačha wejt mazinacaqui, Yooz sirwiñi langzñičha.

²⁵ Učhum Jesucristo Jiliriqui amquiz zumaj yanapla. Jalla nužoj cjila. Amén.

LA CARTA A LOS HEBREOS

YOZ MAJCH PUNTU

¹Tuqui timpuqui Yoozqui niiz puntunaca zizkatchiicha u'chum tuquita atchi ejpnacžquiz. Yoozqui niiz cuntiquiztan chiiñi profetanacžquiz jaknužquiztanami wiltan wiltan niiz taku zizkatchiicha. Nekztan nii profetanacaqui u'chum tuquita atchi ejpnacžquiz parlichicha. ²Anziqui tii timpuquiz Yoozqui niiz Majch cjen u'chumnacaquiz juc'ant zizkatchiicha niiz puntunaca. Yooz Majchta tjapa žejlñinacaqui. Yooz Ejpqui niiz Majch cjen tjappacha paachiicha. Nekztan niiz Majch mantuquiz tjappacha utchiicha. ³Yooz Majchtan Yooz Ejpžtan tsjii kuzzizpanča, jalla nižtiquiztan Yooz Majchkazza Yooz Ejpž juc'ant zuma kuz tjeezñiqui. Nižaza Yooz Majch kjarquiz tii muntu žejlča. Niiž chiitaž cjen tii muntu žejlñipanča. Walja azzizza niiz chiitaqui. Nii Majchpacha u'chum ujnacqiztan ticziča, u'chum pertunta cjisjapa. Jalla nekztan arajpacha ojkičiča. Jalla nicju arajpach Yooz Ejpž žew latuquiz julziča, mantiñijapa.

⁴Nii Yooz Majchqui tjapa anjilancžquiztan tsjan chawc jiliriča. Nižaza tjapa anjilancžquiztan tsjan zuma puesto tanzicha. ⁵Yooz Ejpqui ana jakzilta anjilžquizimi tuž chiichiča:

“Amča wejt Majchqui. Jaziqui amquin wejt kamañal tjaa-uča”.

Jalla nuž cjan, ana jakzilta anjilžquizimi chiichiča. Antiz niiz zinta Majchquiz alajakaz nuž chiichiča. Nižaza Yooz Ejpqui niiz Majch puntuquiztan cjichizakazza:

“Wejrqui niiztajapa niiz Ejp cjeeča. Niiqui wejtajapa wejt Majch cjequiča”.

⁶Wiruñ Yooz Ejpqui niiz zinta Majch tii muntuquiz cuchanžquiz pinsiscu tuž chiichiča: “Tjapa wejt anjilancacaqui wejt Majchquiz rispita”.

⁷Yoozqui anjilancž puntuquiztan tuž chiichiča:

“Wejrqui wejt anjilancaca cuchniñča tsjii apura ojkiñi tjamižtakaz. Nižaza wejrqui wejtquiz sirwiñi anjilancacžquiz cjiskatuča tsjii uj peekstažtakaz”.

⁸Pero niiz Majch puntuquiztan Yooz Ejpqui tuž cjichiča:

“Amča Yoozqui. Am mantiz puestuqui wiñayjapa cjequiča. Am mantizqui litituma-pankazza. ⁹Amqui zuma litituma mantiz pecñampanča. Yooz kuz quintra paañinaca panž chjaawñamča amqui. Wejrtča am Yoozqui. Amquiz juc'ant honorchiz cjiskatchinča, čjul žejlñinacžquiztanami”.

¹⁰Yooz Ejpqui niiz Majch puntuquiztan cjichizakazza:

“Amqui Jilirimča, tuqui timpuquiztanpacha amqui anaž čjulquiztanami tii mundo paachamča. Nižaza am kjaržtan arajpacha paachamča. ¹¹Amqui wiñayjapam želaquiča. Pero nii paata arajpachami yokami tucuzinznacžquiztanami. Tsjel zquitižtakaz tucuzinznacžquiztanami. ¹²Piižta zquitižtakaz tsjii latu ectaž cjequiča. Liwj campiitaž cjequiča. Amzti ana nižta campiyaquiča. Amqui wiñay wiñayjapa cjequiča”.

¹³Yoozqui niiz Majchquiz tuž cjichizakazza:

“Wejt žew latuquiz julzna, am quintranaca kjojchtan tjezczama”.

Jalla nuž Yooz Ejpqui cjichiča niiz Majchquiz. Ana wira tsjii anjilžquiz nuž chiichiča.

¹⁴Tjapa anjilancaca ana cheraña ojklayñiqui, Yooztajapakaz sirwiñiča. Yoozqui ninaca cuchanča, liwriita žoñinacžquiz yanapi.

2

LIWRINI TAKU IMPORTIČHA

¹Jilanaca, cullaquinaca, Yooz puntu tjaajintancžquiz juc'anti kuz tjaaz waquiziča, werar zuma kamañquiztan tsjii kjutni ana chjitzta cjisjapa. ²Tuquiqui anjilancacaqui žoñinacžquiz chiichiča. Jalla nii chiitaqui walñitača. Jakziltat nii chiita jaru ana kamtčhaja, uj paachiča. Nekztan nii uj paañinacaqui ninacž ana zuma paatiquiztan

jama castictapan cjiŝiĉha. ³ Nižaza tii timpuquiziqui zuma liwriiñi takuqui učhum-nacaquiz zumpacha kjanzt'itaĉha. Jalla nii liwriiñi taku ana catokaquiz niiqui, ĵkjaž Yooz castictiquiztan atipasajo? Anapanž nii castictiquiztan atipi atasaĉha. Primeraqui nii liwriiñi takuqui Jesucristo Jiliriž paljaytataĉha. Nekztanaqui Jesucristuž tjaajinta žoñinacaqui nii liwriiñi takupacha učhumnacaquiz litituma paljaychiĉha. ⁴ Jalla nuž paljayan Yoozqui zuma pajk obranacami nižaza ispantichucanacami, nižaza tjpaman milajrunacami paachiĉha. Nižaza Yoozqui criichi žoñinacžquiz niiž munañpacama niiž Espiritu Santuž tjaata kamañanaca tojunchiĉha. Jalla nižta Yoozqui tjeeziĉha, nii liwriiñi takumi lititumaĉha, jalla nii.

JESUCRISTUQUI ŽOÑI CJIŠIĉHA

⁵ Yoozqui niiž wiñayjapa mantiz puestuquiz anjilanaca ana utchiĉha. Jalla nii puntuquiztan cjijržcuĉha. ⁶ Tsjii cjijrta Yooz takuqui tuž cjiĉha:

“Žoñiĉha anaž ĉjulumi. Yooz Ejp, ĵkjažtiquiztan amqui žoñinaca cjuñjo? ĵKjažtiquiztan žoñinacžquiz honorchiz cjiskatjo? ⁷ Tii kjaž watanaca anjilanacaqui žoñžquiztan tsjan jilir puestuquiz žejlĉha. Jalla nuž Yoozqui munchiĉha. Nekztanaqui Yoozqui žoñžquiz juc'ant honorchiz cjiskataquiĉha anjilnacžquiztan. Nižaza juc'ant zuma kamzqui žoñžquiz tjaataž cjequiĉha. ⁸ Yoozqui žoñž mantuquiz tjapa tii muntupacha utĉha”.

Jalla nuž ĉiichiĉha Yooz takuqui. Jaziqui Yoozqui žoñž mantuquiz tjapa tii muntu žejlñinaca utchiĉha. Jalla nižtiquiztan žoñž mantuquiz tjappachapankaz cjequiĉha. Imazipanĉha tjappacha žoñž mantuquiz žejlĉha. ⁹ Pero Jesucristuž puntu naya. Niiqui tsjii kjažtapacha anjilnacžquiztan upa jilir puestuquiz cjiskattataĉha, žoñinacž laycu ticzjapa. Yooz žoñinacžquiz okzñiž cjen Jesucristuqui tjapa žoñinacž laycu ticziĉha. Jalla nuž ticztiquiztan Yoozqui niižquiz juc'ant zuma honora tjaachiĉha; nižaza Jesucristuqui juc'ant zuma kamaña tanzĉha.

¹⁰ Yooz cjen tjappacha žejlĉha, nižaza niižtajapa žejlĉha. Zuma Yoozqui pinsichiĉha, tjapa niiž maatinacaqui pruebanaca watžcu, niižtan chica honorchiz cjequiĉha. Jalla nii pinsichiĉha. Jalla nižtiquiztan Yooz Ejpqui pinsichizakazza, Jesucristuqui sufrinaca watžcu, ancha zuma Liwriiñi cjisnaquiĉha, jalla nii. Jesucristupankazza žoñinaca Liwriiñiqui. Jalla nii liwriiñi pinsitaqui ancha zumaĉha. ¹¹ Jaziqui Jesucristuqui žoñinacžquiz Yooz irata zuma kamañchiz cjiskatasāĉha. Nii zuma kamañchiz cjiskatñimi, nižaza nii zuma kamañchiz cjiskattanacami tsjii Yooz Ejppchizkazza. Jalla nižtiquiztan Yooz Majchqui liwriita žoñinacžquiz “Wejt jilanaca” cjican chiizjapa anaž azza. ¹² Yooz tawk liwruquiz Jesucristuqui tuž cjiĉha:

“Wejrqui wejt jilnacžquiz Yooz puntu ĉiizinaĉha. Yooz partir žoñinacžtan žejlcan Yoozquin honora tjaaĉha”.

¹³ Cristuqui zakaz cjiĉha:

“Wejrtĉha Yoozquinkaz kuzziztqui”.

Wilta zakaz cjiĉha:

“Yoozqui wejtquiz žoñinaca tjaachiĉha, maatinacažtakaz. Yooz Tata, tekz žejlĉha ninacami wejrmi”.

¹⁴ Jesucristuž liwriita žoñinacaqui curpuchizza, nižaza ljocchizza. Jalla nižtiquiztan Jesucristuqui curpuchiz nižaza ljocchiz zakaz cjiŝiĉha. Jalla nižta curpuchiz cjisu, ticziĉha ana wal diablu tjananzjapa. Nii diabluqui konz poderchizza. Pero ticžtiquiztan Jesucristuqui diabluž poder atipchiĉha. ¹⁵ Žoñinacaqui ticz ekskudabluž mantuquizpan žejlĉha. Nii žoñinaca liwriizjapa, Jesucristuqui ticziĉha. ¹⁶ Jesucristuqui tii muntuquiz tjonchiĉha, ana anjilnacžquiz yanapzjapa antiz Abrahamž majchmaatinacžquiz yanapzjapa. Jakziltat Jesucristužquin kuz tjaaĉhaja jalla ninacaqui Abrahamž majchmaatinacažtakazza. ¹⁷ Žoñinaca liwriiñi cjisjapa, Jesucristuqui žoñinaca iratpacha cistanĉha. Jalla nuž žoñinaca irata cjican, Jesucristuqui žoñinacžtajapa zuma lititum palt'iziñi cjiŝiĉha Yooz yujquiziqui. Okzñi kuzzizza učhum palt'iziñiqui. Žoñinacžtajapa palt'iziñi cjican Jesucristuqui Yoozta zuma wilanažtakaz ticziĉha. Jalla nižta ticziĉha, uĉchiz žoñinacž

laycu. ¹⁸ Jesucristupacha sufrichiċha, niżaza diabluiqu Jesucristo yanziċha ujquiz tjojt-skatzjapa. Pero sufrisquiztanami diabluiqu yanžtanami atipchiċha. Jalla nuż tjapa atipžcu Jesucristuqui žoñinacžquiz yanapi atasacċha, ana ujquiz tjojtzkatzjapa.

3

JESUCRISTUQUI MOISESQUIZTAN TSJAN JILIRIĊHA

¹ Yooz kamañchiz jilanaca, cullaquinaca, Yoozqui anċhucaquiz kjawziċha Jesucristužquin kuzziz cjisjapa. Jalla nižtiquiztan arajpach wajtchiz mazinaca cjissinċhucċha. Anċhucqui Jesucristuž kuz zumpacha naya. Jalla niiqui uċhumnacalta tsjan jilir apóstol cuntaċha, Yooz puntu zuma tjaajinchiž cjen. Niżaza uċhumnacalta timpluquiz langžñi pajk jiliri cuntaċha, uċhumnacatan Yooztan zuma cjiskatchiž cjen. ² Tuquiqui Yoozqui Moisés utchiċha tsjii puestuquiz. Moisesqui nii puesto zuma cumplichiċha, Yooz kjuychiz žoñinacžquiz sirwican. Jalla niža irata Yoozqui Jesucristo tsjii puestuquiz utchiċha. Jesucristo zakaz nii puesto zumapan cumplichiċha Yooz kjuychiz žoñinacžtjapa. ³ Tsjii kjuy kjuyñi žoñiqui nii kjuyquiztan tsjan honorchizza. Jalla niža irata Jesucristuqui Moisesquiztan tsjan honorchizza. Jalla nuż waquizichiċha. ⁴ Zapa kjuyaqui tsjii žoñiž kjuytaċha. Pero Yoozza tjappacha paataqui. ⁵ Yooztajapa sirwiñi Moisesqui niiz puestuquiz zuma cumpliñi kamchiċha, tjapa Yooz kjuychiz žoñinaca irpican. Moisesqui Yooz puntunaca tjaajinchiċha. Jalla niža tjaajincan Moisequi Yoozquin sirwichiċha. Wiruñaquii nii Yooz puntunacaqui tsjan kjana tjaajintataċha. ⁶ Jesucristuzti anaċha Yoozquin sirwiñikazza. Antiz Yooz Majchpanċha. Jalla niiqui niiz puestuquiz zuma cumpliñi kamchizakazza, Yooz kjuychiz žoñinacžquiz mantican, tsjii jilir maatižtakaz. Niżaza uċhumnacaċha Yooz kjuychiz žoñinacaqui. Jakziltat tirapan Yoozquin tjurt'ichi kuzzizlaja, jalla niċha ultimu Yooz kjuychiz žoñiqui. Jesucristuqui taku tjaachiċha, Yooz žoñinacaqui arajpachquin nižtan chica kamaquiċha, jalla nii. Jaziqui jakziltat Jesucristuž tjaata takuž cjen chipchi kuzzizlaja, jalla niċha ultimpacha Yooz kjuychiz žoñiqui.

ANA CHOJRU KUZUZ CJEE

⁷ Jalla nii puntuquiztan Yooz Espiritu Santuqui Yooz tawk liwruquiz tuž cjiċha: “Anžtan Yooz kjawžta nonžcu, ⁸ anaž chojru kuzziz cjee. Anċhuca tuquita atchi ejpnacaqui ch'ekti yokquin žejlcan, chojru kuztan Yooz quintra cjissiċha. Chojru kuztan persun kuzcamakaz kamz pecchiċha, Yooz žawjwa zjijquinzjapa. ⁹ Pusi tunc watanaca ninacaqui Yooz pajk obranaca cherchiċha. Jalla nuż cheržcumi, tirapan Yooz žawjwa zjijquinz pecchiċha. Anapan criyatċha. ¹⁰ Jalla nižtiquiztan nii žoñinacž quintra žawjziċha Yoozqui. Ninacž puntuquiztan Yoozqui tuž cjichiċha: ‘Ninacž kuzqui tsjii kjutñipan pinsiċha. Wejt zuma kamaña ana pajz pecċha’. Nuž cjichiċha Yooz Ejpqui. ¹¹ Jalla nižtiquiztan Yoozqui ninacž quintra žawjžcu, tsjii juramentužtan chiižinchiċha, tuž cjican: ‘Anapan wejt famillquiz luzkataċha, wejttaan chica jeejzjapa’ ”.

¹² Jilanaca, cullaquinaca, persun kuzquiz cuitasa, Yoozquin ana criichi kuzziz ana cjisjapa. Anawal kuzziz cjequizñi niiqui, ultim žejtñi Yoozquiztan zarakzkatta cjequičha. ¹³ Tii timpluquizkaz Yoozqui žoñinaca kjawznaquiċha, jaziqui zapurupan porapat p'ekinchayasaquiċha, Yoozquin nonznajo. Anapanž anċhucqui persun uj paažcu incall-skataquiċha, Yooz quintra paažjapa. Jalla niža anawali paažcu chojru kuzziz cjisnasacċha anċhucqui. Nekztan Yooz kjawžta ana nonžñi atasacċha. Anċhucqui jalla niža anazum kuzziz ana cjisjapa, porapat p'ekinchayasaquiċha. ¹⁴ Tuquiqui uċhumqui Jesucristužquin kuz tjaachinċhumċha. Jakziltat tirapan ticzama Jesucristužquin tjurt'ichi kuzziz kamċhaja, jalla niiqui ultimu Cristužtan tsjii kuzzizza.

¹⁵ “Tonjpacha tii Yooz taku nonžna: Anžtan Yooz kjawžta nonžcu, anaž chojru kuztan Yooz quintra cjee. Jaknužt anċhuca tuquita atchi ejpnaca chojru kuztan Yooz quintra želatċhaja, anaž niža cjee”.

¹⁶ Egipto yokquiztan Moisés irpita žoñinacaqui, jalla ninacataċha Yooz quintranacaqui. Yooz taku nonžcupacha ninacataċha chojru kuzzizpan. ¹⁷ Nekztan Yoozqui pusi tunc wata

ninacžtajapa žawjchiča. Ninacaž uj paatiquiztan žawjchiča. Nekztan ninacaqui ch'ekti yokquin walja ticziča. ¹⁸Nižaza Yoozqui tsjii juramentužtan chiižinčiča, “Anapan wejt famillquiz luzkatača ančhucqui wejtтан chica jeejzjapa”, cjan. Jalla ninacača Yooz taku ana cazñinacaqui. ¹⁹Jalla ninacaqui ana criichiž cjen, Yooz wajtquin ana luzi atchiča. Jalla nii kjanapacha intintita cjesača.

4

YOOZ FAMILLQUIZ LUZA, NIIŽTAN JEEJZJAPA

¹Tuquiqui Yooz Ejpqui taku ecchiča tuž cjan, “Jakziltat weriž kjawža nonžaj niiqui, wejtтан chica jeejnaquiča, nižaza liwriita cjesača”. Nii Yooz ecta takuqui tirapan walča. Jaziqui učhumqui persun kuz cuitila. Persun kuz ana cuitaquiž niiqui, ana Yoozтан chica jeejnačhani. ²Učhumnacaquizimi tuquita ejpžquizimi nii zuma liwriini Yooz taku paljaytatača. Pero ninacaqui inakaz nonziča, ana criichiž cjen. ³Učhumqui nii liwriini taku catokžcu criichinčhumča. Jalla nižtiquiztan liwriitaž cjen Yoozтан chica jeejža. Pero ninacž puntuquiztan Yoozqui cjičiča:

“Ninacž quintra žajwžcu, wejrqui tsjii juramentužtan chiichinča, tuž cjan: ‘Ninacaqui wejtтан chica ana jeejnaquiča, anapan wejt famillquiz luzkatača’”.

Yoozqui tii muntu paažcu, nii langz žerziča; sojta tjuñinacakaz langziča. ⁴Pakallak tjuñ puntuquiztan tsjii Yooz takuqui tuž cjiča:

“Pakallak tjuñquiziqui Yoozqui tjapa niž muntu paaz langzquiztan jeejiča”.

⁵Tsjii zakaz Yooz takuqui cjiča:

“Nii uj paañi žoñinacaqui anapan wejtтан chica jeejnasača, wejt famillquiz cjisjapa”.

⁶Nii tuquita ejpnacaqui liwriini taku nonžcu ana Yooz famillquiz cjissiča, Yooz tawk jaru ana kamchiž cjen. Jalla nižtiquiztan anziqiu iya žoñinacaqui Yooz famillquiz cjesača.

⁷Yoozqui anzta timpuqui sitchiča, žoñinaca wilta kjawzjapa. Ažk watanaca nii tuquita ejpnacžquiz chiižcu Yoozqui Davidžquiz chiikatchiča, tuž cjan:

“Anzta žoñinacami, nižaza jazta žoñinacami, Yooz taku nonžcu, ana chojru kuzziz cjee”.

Jalla nii Yooz takuqui tuqitanpacha chiižintača. ⁸Josuequi žoñinacžquin ultimiu jeejskattasaž niiqui, Yoozqui ana chiitasacha, iya timpu želaquiča žoñinacž Yooz famillquiz jeejzjapa. ⁹Jalla nižtiquiztan anzta timpuquizzakaz Yoozquin kuzziz žoñinacaqui Yooz famillquiz luzasača, Yoozтан jeejzjapa. ¹⁰Jakziltat Yooz famillquiz luzzaja, jalla niiqui ch'aman kamznacquitан jeejža, jaknužt Yoozqui niž mundo paaz langztiquiztan jeejžtchaja, jalla nižta. ¹¹Jalla nižtiquiztan učhumnacaqui Yoozquin tjapa kuz tjaaz waquiziča, Yoozтан jeejzjapa, nižaza Yooz famillquiz kamzjapa. Učhum tuquita atchi ejpnacaqui ana criichiž cjen ana Yooz famillquiz luzziča, antiz castictatača. Jalla ana nižta casticta cjisjapa, učhumqui criizpanž waquiziča.

¹²Yooz takuqui žejtñi Yooz azzizza, žoñinacž kuzquiz zuma, ana zuma, jalla nii tjeejzjapa, nižaza cjuñskatzjapa. Nižaza nii Yooz takuqui tsjii porap latu archiz cuchillužtakazza. Pero tsjan ariča. Yooz takuča žoñž animquizimi kuzquizimi uj cjuñskatñiqui. Tsjii žoñž kuzqui parti žoñinacžquiztan chjojta cjesaž niimi, jalla nii kuzquiz Yooz takuqui uj cjuñskatasacha. Nižaza Yooz takuqui žoñž kuzquiz pitsitanacami tantiitanacami kjanapacha tjeeža, zuma ana zuma, jalla nii. ¹³Yoozqui tjappacha paachiča. Jalla nižtiquiztan anaž jakziltami nižquiztan chjojžni atasacha. Ultim pjal tjuñquiziqui tjappacha persun kamañ puntuquiztan, nižaza kjažtat kamtchaja, jalla nii puntunacquitан cuenta tjaastanča. Tjapa žoñinacž kamta puntunacquitан Yoozqui liwž zizza, nižquiztan ana tsjii takumi chjojžni atasacha.

JESUCRISTUČHA UČHUM PALT'IZIŃIQUI

¹⁴Jesucristučha Yooz Maatiqui. Jalla niiča učhum chawjc timplu jiliri cuntača. Nižaza niiqui arajpachquin Yooz yujcquin luzziča, učhumnacaltajapa tsjii wali palt'iziñi cjisjapa. Jalla nižtiquiztan učhumqui Jesucristužquin kuzziz kamcan jalla nii kamzquiz tjurt'ichi kuzziz cjila. ¹⁵Učhumqui Yooz irata zuma kamzjapa panž pjaltiča. Pero Cristuqui zuma okzñi kuztan učhum criichinacžquiz cjuñča, nižaza yanapasacha. Učhum irata

Jesucristuqui pruebanaca watchiĉha. Ana uj paacan tĵapaman pruebanaca watchiĉha. Jalla niŹtiquiztan, Jesucristuqui zuma okzĉni kuztan uĉhumnacaltajapa palt'izinasaĉha. ¹⁶Jalla niŹtiquiztan ĉjul pruebanaca watanami uĉhumnacaqui okzĉni JesucristuŹquin tĵapa kuztan cjee. Yooz yujcquin macjatz ana jiwjataquiĉha, uĉhum ujnaca pertuna mayizizjapa, niŹaza pruebanaca Źelan, Yoozquiztan mayizaquiĉha nii pruebanaca zuma watzjapa.

5

¹ Tĵapa timplu jilirinacaqui ŹoĉinacŹquiztan illztataĉha, ŹoĉinacŹtajapa Yoozquin palt'izinajo. NiŹaza nii timplu jilirinacaqui ŹoĉinacŹ wilananacami Yooz yujcquiz timplu altarquiz nonzĉitaĉha, ŹoĉinacŹ ujnaca pertunta cĵisjapa. NiŹaza ŹoĉinacŹtajapa ninacŹ ofrendanaca Yooz yujcquiz tĵeeŹitaĉha. ² Timplu jilirinacapacha pruebanaca sufrĉiĉha, parti Źoĉinaca irata. NiŹaza uj paaĉha parti Źoĉinaca irata. Jalla niŹtiquiztan nii jilirinacaqui pasinziz kuzziz cjesaĉha ana zizĉi ŹoĉinacŹtajapami, niŹaza tsjii kĵutĉi cĵicĵiĉi ŹoĉinacŹtajapami. ³ Ujchiz zakaz cĵicanaqui nii timplu jilirinacami persun ujnacquiztanami niŹaza parti ŹoĉinacŹ ujnacquiztanami Yoozquin wilana tjaastanĉha, pertunta cĵisjapa.

⁴ NiŹaza anaŹ jakziltami timplu jilirŹ puestuquiz persun kuzcama luzasaĉha. Yoozqui Źoĉinaca kĵawŹa, nii puestuquiz utzjapa. JaknuŹt Yoozqui Aarĉn cĵita Źoĉi utĉhaja, jalla niŹta. ⁵ NiŹaza Cristuqui anaŹ persun kuzcama palt'iziĉi puestuquiz luzziqui. Yoozpankazza nii honorchiz puestuquiz utchiqui. NiŹaza Yoozqui CristuŹ puntuquiztan tuŹ ĉĵiĉiĉha:

“Amĉha wejt persun maatimqui. Amquiz wejt kamaĉal tĵaa-uĉha”.

⁶ CristuŹ puntuquiztan Yoozqui zakaz ĉĵiĉha:

“Amĉha ŹoĉinacŹtajapa palt'iziĉi jiliri qui wiĉay wiĉayajapa. JaknuŹt Melquisedec cĵitaqui zuma palt'iziĉi jiliri uchtataŹlaja, jalla niŹta”.

⁷ Tii muntuquiz kamcan Jesucristuqui Yooz EjpŹtan parlicĉiĉha, niŹaza Yooz EjpŹquin rocĉiĉha, tĵurt'iĉi kuzzizpan kami yanapzjapa. Altu tawkŹtan ĉiican niŹaza kaacan Yoozquin jalla nuŹ mayizichiĉha. Yoozqui Jesucristo liwrii atataĉha, ana cruzquiz ticzjapa. Pero JesucristuŹ ticzquiztan ana liwriitaŹ cĵenami Yooz Ejpqui niŹŹquiz yanapĉiĉha, Yooz kuzcamapankaz kamzjapa. Jesucristuqui Yooz EjpŹquin kuzziz cĵen yanaptataĉha. ⁸ Cristuqui Yooz Majĉ cĵenami sufrĉiĉiĉha. Jalla niŹta tii muntuquiz sufrĉiĉiŹ cĵen Yooz EjpŹ kuzcamapankaz kamĉiĉha. ⁹ Jalla nuŹ tii muntuquiz sufrĉiĉiŹ cĵenami, jalla niĉiĉha Yooz kuzcamapankaz kamĉiĉi. Jalla niŹtiquiztan Źoĉinaca liwriiĉiĉi cĵissiĉha. Jakziltanacat niŹŹquiz cazzaja, jalla tĵapa ninacaqui wiĉayajapa liwriitaŹ cĵequiĉha. ¹⁰ Yooz Ejpqui Cristo utĉiĉha ŹoĉinacŹtajapa liwriiĉi niŹaza palt'iziĉi cĵisjapa. JaknuŹt Melquisedec cĵita Źoĉiĉi palt'iziĉi jiliri uchtataŹlaja, jalla niŹtapacha.

PERSUN KUZ CUITASAKUIĉHA

¹¹ Jalla nii puntuquiztan waljaŹ takunacaŹ Źejlĉha. Pero ch'amaĉha anĉhucaquiz intintiskatzqui. ¹² AŹk watanaca anĉhucqui criichinĉhucĉha. Jaziqui Yooz puntu tĵaajiĉi maestrunaca ĉĵiĉuca cĵiwĉha. Pero wiltakaz anĉhucqui tĵaajinta cĵis pecĉha Yooz tawk pĵasilanaca zizjapa. Anĉhucqui wawanacaŹtakaz lichikaz pecĉha Yooz tawk ĉĵjeri lujlzquiztanaqui. ¹³ Lichten mantinasĉi wawaŹtakazza anĉhucqui. Jaziqui lijitum Yooz kamaĉa ana zuma kamiĉhucĉha. ¹⁴ ĉĵjeri lujlzqui pajk ŹoĉinacŹtaĉha. Jalla niŹta irata ch'aman intintazuc puntunaca zuma criichi ŹoĉinacŹtajapaĉha. Jalla ninacaqui zuma kamĉiŹ cĵen zumpacha tantiyasaĉha kamaĉ puntunaca, zuma, anazuma, jalla nii.

6

¹ Pĵasil Yooz puntunacquiztan zizĉi, cjee. JesucristuŹ puntuquiztan tĵaajintanaca zizzinĉhucĉha. Jalla niŹtiquiztan anĉhucqui nii puntunacquiztan anaŹ iya tĵaajinz pecasaĉha, jalla. Anĉhucqui zizzinĉhucĉaĉha, casticu zĵicĉi paaznaca puntuquiztanami niŹaza kuz campiiiz puntuquiztanami, niŹaza Yoozquin kuz tĵaaz puntuquiztanami, ² niŹaza bautismo puntuquiztanami, niŹaza kĵarŹtan lanz cuzturumpi puntuquiztanami, niŹaza

ticziqiztan jacatatz puntuquiztanami, nižaza ultim pjalz tjuñi puntuquiztanami. Jalla nižtanaca zizzinčhuctača ančhucqui. ³ Yooz munan, iya Yooz puntunaca tjaajnasaca, juc'ant zuma kamañchiz cjisjapa.

⁴ Jakziltat kjanzt'ita Yooz taku catoktčhaja, jalla nuž catokzpacha Yooz quintra quejpsaja, jalla niiqui ana wilta liwriita cjesača. Jakziltat Yooz taku catoktčhaja, jalla niiqui Yooz kamañquiz luzzipanča, nižaza Espiritu Santuqui niž kuzquiz luzziča. ⁵ Nižaza ninacaqui Yooz taku zuma nayžcu catokchiča. Nižaza arajpachquiztan tjonñi azi pajchiča persun kuzquiz. ⁶ Jalla nižta Yooz taku catokchi žoñinacaqui Yooz quintra quepsnaquiz niiqui, anaž wilta kuz campii atasača zumquinaqui. Ninacž kuzqui chojrupan cjišsa. Jalla nižta cjiscu, ninacapacha Jesucristo Yooz Majch wilta cruzquiz ch'awtažokazza, niž quintra žoñinacž yujcquiz cjičjiñiča. ⁷ Tii quintu nonžna. Tsjii yokaqui zkala čhjacža. Jalla nekztan chijñiž tjonča. Jalla nekztan nii zkalaqui zuma čhjeriž tanča. Nižazaž pookča, nii zkala čhjacñi žoñinacžtajapa. Nii yokaqui Yoozqui wintijchiča. ⁸ Pero nii yokaqui ch'apinacchizkaz cjisnasaž niiqui, inakaz cjequiča. Jalla nižtquiztan pjalžta cjequiča, ana zuma. Jalla nekztan ujuin tewjkžnaquiča. Jalla nižtaž nii Yooz taku catokžpacha quejpsni žoñiqui.

YOOZQUIN KUZZIPAN CJEE

⁹ Pecta jilanaca, cullaquinaca, jalla nuž chiižcumu ančuca puntuquiztan anača nižta cjiwčhiya. Ančhucqui liwriita cjiscu ultimpacha ančhucqui zuma Yooz kamañchiz kamaquiča. Jalla niiqui nužupanča. ¹⁰ Yoozqui ancha zumapanča. Ančucaquiztan anaž tjatznasaca, ančucaž zuma kamchiž cjen, nižaza ančucaž Yooztan zuma munaziñi kuzziz cjišsiž cjen. Ančhucqui jalla nižta kamañchiz cjen parti criichi jilanacžquiz sirwihinčhucča Yooztajapaqui. Tuquimi anzimi zakaz ančhucqui nižta zuma kamañchizza. ¹¹ Zapa mayni ančucaquiztan nižta zuma kuzzizpan cjee, juc'ant juc'ant zuma kamañchiz cjisjapa, ticzcama. Ančhucqui tirapan tjewzna, arajpachquin Yooztan zuma kamz, jalla nii. Nižaza nii oracama, juc'ant juc'ant zuma kamañchiz cjee. Jalla niil pecuča. ¹² Ančhucqui ana jayraziñi kuzziz cjee. Antiz zuma Yoozquin kuzziz žoñinacžquiz yatekasa. Nižaza pasnziz kuzziz žoñinacžquiz yatekasa. Nižta kamñi žoñinacaqui Yooz chiita zumanaca tanznaquiča, tsjii irinsažtakaz.

¹³ Yoozqui Abrahamžquiz tsjii zuma taku tjaazcu, persun ahtan juramento paachiča. Niižquiztan tsjan jilir juramento tjaakatñi ana želatča. Jalla nekztan persun ahtan juramento paachiča, ¹⁴ tuž cjan: “Ultimpacha wejrqui amquin zumanacal tjaazcača, nižaza am majchmaatinaca walja mirkatača”. ¹⁵ Abrahamqui Yoozquin kuzzizpan tjewžcu, nii Yooziž tjaata taku tanziča. ¹⁶ Tsjii juramento tjaañi žoñiqui nii juramento tanzni žoñžquiztan tsjan jiliriča. Tsjii juramento paažcu, anaž iya parliz želasača. Jalla nii puntuquiztan žeržtača. ¹⁷ Jaziqiu Yoozqui tsjii juramento paažcu taku tjaachiča. Nekztan Yoozqui nii tjaata taku tanzni žoñinacžquiz kjanapacha tjeez pecchiča, niž tjaata taku panž cumpliskataquiča, jalla nii. Yoozqui niž chiita taku ana campiyasača. ¹⁸ Yoozqui taku tjaachiča, učhumqui nižtan chica kamaquiča, jalla nii. Nekztan juramento paachiča. Jalla nii pizc taku anapan campiyasača tsjii tsjii chiicanaqui. Yoozqui ana toscara chiyasača. Učhumqui Yoozquin macjatčinčhumča, niž cuitita cjisjapa. Učhum cuitiñi Yooza taku cumpliñiqui. Jalla nižtquiztan Yooz taku cumpliz ora tjewžcan p'ekinčhayta kuzzizpan cjesača učhumqui. ¹⁹ Jalla nii cumpliñi Yooziž chiita taku cjuñžcupan učhum kuz tjurt'ichi cjiskatča, ana kuz turwayskatchuca. Nii taku cumpliñi Yoozqui warcu anlažtakaz, učhum kuz tjurt'ichi cjiskatča. Jesucristuž cjen Yoozqui niž tjaata taku cumplaquiča. Jesucristuqui arajpachquinpacha Yooz yujcquiz luzziča. ²⁰ Učhumž tuqui luzziča, učhumnacaltajapa palt'izinjapa. Jesucristuqui zuma palt'iziñi cjišsiča, jaknužt Melquisedec palt'iziñi cjitčhaja, jalla nižta. Jalla nižtquiztan učhumnacaltajapa ultimu palt'iziñi puestuquiz luzziča.

¹ Nii Melquisedec cjita palt'iziñiqui Salem wajt jiliritača, nižaza niiž puestuquiz zinta arajpach Yooziž uchtatača. Melquisedecž timpuquiz Abrahamqui quintra reynacžtan tsjii quira zalchiča, ninacž zultatunacžtanpacha. Nekžtan Abrahamqui liwj atipchiča. Jalla nuž Abrahamž atipžtan Melquisedecqui Abrahamžtan zalchiča. Nekžtanauqui Melquisedecqui Abrahamžtajapa Yoozquin palt'izinchiča, Abrahamžquiz Yooziž yanapta cjisjapa. ² Nekžtan Abrahamqui Melquisedecžquiz tjapa niiž cantiquiztan diezmo tjaachiča. Melquisedec tjuuqui tuž cjiča, Yooz kuzcama zuma mantiñi, jalla nii. Nižaza Salem tjuuqui tuž cjiča, žoñinaca walikaz žejlča, jalla nii. Melquisedecž puntu cjiča, niiž mantichiž cjen, žoñinaca walikaz žejlča. ³ Yooz takuqui anaž čiiča, Melquisedecž maa ejpž puntuquiztanami, niiž atchi ejpnacžquiztanami, niiž majttiquiztanami, niiž ticquiztanami. Jalla nižtiquiztan palt'iziñitača Yooz Majch irata.

⁴ Jaziqui Melquisedecqui pajk jiliriča. Nii naya ančucqui. Učhum tuqita ejp Abrahamqui quira atipžcu Melquisedecžquiz tsjii tunca parti niiž cantiquiztan tjaachiča. Jalla nižtiquiztan Melquisedecqui Abrahamžquiztan juc'ant jiliriča. ⁵ Moisés lii jaru Levi cjita majchmaatquiztan tjoñi žoñinacakaz timplu jilirž puestu tanznasača, žoñinacžtajapa Yoozquin palt'izinjapa. Jalla nii timplu jilirinacaqui parti žoñinacžquiztan ninacž želinchizquiztan diezmo cobriñitača. Aunquimi nii cobrita žoñinacaqui timplu jilirinacž familiatača. Tjapa ninacaqui Abrahamž ejpžquiztan tjoñitača. Jalla nižtiquiztan Melquisedecqui nii timplu jilirinacžquiztan juc'ant jiliriča. ⁶ Melquisedecžti ana Leviž majchmaatquiztan tjoñitača. Pero Abrahamqui niižquiz diezmo tjaachiča. Nižaza Melquisedecqui Abrahamžquiz wintizuna tjaachiča, Yooz Abrahamžquiz taku tjaachiž cjenami. ⁷ Wintizuna tjaani žoñiqui tsjan jiliriča wintizuna tanzni žoñžquiztan. Anaž jakziltami nii razuna nicasača. ⁸ Tii muntuquiz kamcan žoñikazza učhumnacaquiz diezmo cobriñiqui. Žoñinacača ticžñiqui. Pero Melquisedecž puntuquiztanauqui Yooz takuqui niiž ticz puntuquiztan ana čiiča, wiñayjapa žejtjapažtakazza. ⁹ Melquisedecž timpu wattan Leviž majchmaatquiztan tjonñi timplu jilirinacaqui diezmo cobriñitača. Nii cobriñi žoñinacapacha Abrahamž majchmaatquiztan tjonchiča. Jalla nižtiquiztan Abrahamž diezmo Melquisedecžquiz pactiquiztan, ninacazakaz pactažokazza. ¹⁰ Abrahamž curpuquiz niiž majchmaatinaca želatča, ima majttatača. Jalla nižtiquiztan Abrahamž Melquisedecžquiz diezmo pactiquiztan, Leviž majchmaatquiztan tjoñi timplu jilirinacaqui zakaz pactažokazza.

¹¹ Leviž parti timplu jilirinacaqui Israel wajtchiz žoñinacžquiz Moisés lii jaru kamkatchiča. Nižaza nii jilirinacaqui parti žoñinacžta Yoozquin palt'iziñitača. Nii Leviž parti žoñinacaqui Aaronž majchmaatquiztan tjonñitača. Jaziqui ninacaqui parti žoñinacžquiz Yooz yujcquiz zumapankaz cjiskattasaž niiqui, anaž iya palt'iziñi pectasača. Nii wiruñ tjonñi palt'iziñiqui anaž Aaronž majchmaatquiztan tjonñiča. Antiz Melquisedecž partiquiztan tjonchiča. ¹² Palt'iziñi timplu jilirinacaqui campiitaž cjenauqui, lii zakaz campiitaž cjistantača. ¹³ Nii wiruñ tjonñi palt'iziñiqui Jesucristo Jiliriča. Jesucristuqui anača Leviž partiquiztan tjonñiqui. Antiz Judaž majchmaatquiztan tjoñitača. Pero Moisés lii jaru anaž jakziltami Judaž partiquiztan timplu jilirž puestuquiz uchtatača. ¹⁴ Timplu jilirinacž puntuquiztan Moisesqui anaž čjulumi čiičiča Judaž parti žoñinacžquiz. Judaž parti žoñinacaqui anapan timplu jilirž puestuquiz luzasača. Pero kjanapachača Jesucristuqui Judaž partiquiztan tjoñi.

¹⁵ Jalla nižtiquiztan kjanapachazakazza Moisés lii campiitaqui. Melquisedecžtakaz Jesucristuča tsjemat timplu jiliriču, žoñinacžtajapa Yoozquin palt'izinjapa. ¹⁶ Moisés liiqui cjiča, ticžni timplu jilirinacaqui Leviž majchmaatquiztan tjonñi žoñinacapankaz cjequiča. Jesucristuqui anaž nii lii jaru timplu jiliri cjissiča. Antiz niiž wiñayjapa žejtñi kamañquiztan timplu jilirž puestuquiz uchtatača, wiñayjapa žoñinacžtajapa Yoozquin palt'iziñi cjisjapa. ¹⁷ Jesucristuž puntuquiztan Yooz takuqui tuž čiiča:

“Amqui wiñayjapa timplu jiliri cjequiča žoñinacžtajapa palt'iziñi. Melquisedecž partiquiztan cjequiča”.

¹⁸ Tuqita liiqui nužquiz apatatziča. Nii liiqui ana azzizza žoñinaca zumapan kamkatzjapa. Jalla nižtiqiztan ana iya walča. ¹⁹ Nii Moisés lii jaru kamtiqiztan anaž jakziltami Yooz yuc'ant zumapankaz cjskattaž atasacha. Jaziqiu tsjii ew lii žejlča; učumnacaltajapa juc'ant zumača. Nii lii jaru Jesucristuqui Yoozquin palt'iziñi puestuquiz luzziča. Jesucristuž cjen učumquiqui Yoozquin macjatasacha.

²⁰ Yoozqui juramentužtan Jesucristo utchiča palt'iziñi puestuquiz. ²¹ Tuqita palt'iziñi timplu jilirinacaqui ana juramentužtan nombritatača. Pero tii Jesucristo timplu jilirizti juramentužtan nombritača. Yooz takuqui tuž cjiča:

“Yooz jiliriqiu juramentužtan tuž mantichiča: Amqui wiñayjapa timplu jilirim cjequiča žoñinacžtajapa palt'iziñi, Melquisedec partiquiztan. Jalla nuž mantižcu, Yooz kuzquiz pinsitaqui wira ana campiyasacha”.

²² Nii Yooz chiitaž cjenacuqui Jesucristuča tuqita timplu jilirinacžquiztan žoñinacžtajapa juc'ant zuma Yoozquin palt'iziñi. Jalla nižtiqiztan žoñinacaqui wiñaya liwriitapan cjequiča. Nii ew liiqui tuqita liinacquiztan juc'anti zumača. ²³ Nii tuqita timplu jilirinacaqui tamatača. Ninacžquiztan anaž jakziltami wiñaya timplu jilirž puesto tanzñi atchiča. Ninacaqui tjapaž ticža. ²⁴ Pero Jesucristuzti wiñaya žetaquiča. Jalla nižtiqiztan wiñayjapa timplu jiliripanž cjequiča, žoñinacžtajapa Yoozquin palt'iziñijapa. ²⁵ Jalla nižtiqiztan Jesucristuqui ultimupan wiñayjapa žoñinaca liwriyasacha. Jakziltat niž cjen Yoozquin macjataquiči niiqui, wiñayjapa liwriita cjequiča. Nižaza Jesucristuqui wiñaya žejtcan liwriita žoñinacžtajapa tirapan Yoozquin pjalt'izinaquiča.

²⁶ Jalla nižta palt'iziñipanž pecča učumnacaqui. Jalla nii Jesucristuqui Yooz irata zumapankaz kamañchizza. Anaž jakziltami nižquiz tsjii uj tjojtñasacha. Niiqui ana zinta ujchizza. Ujchiz žoñinacžquiztan tsjematača. Arajpachquin Yooztan chica honorchizza. ²⁷ Jesucristuqui parti timplu jilirinaca ana iratača. Nii parti timplu jilirinacaqui zapuru wilanapan tjaañitača, persun ujnacquiztanami parti žoñinacž ujnacquiztanami. Jesucristuqui anapan nižta paasacha, ana ujchizza niiqui. Jesucristuqui tsjii wiltapankaz wilana tjaachiča. Wilana cunta niž persun curpu intirjichiča. ²⁸ Moisés lii jaru ujchiz žoñinacaqui palt'iziñi puestuquiz uchtatača. Nii liinacquiztan wiruñ Yoozqui tsjii juramento paachiča, niž Majch palt'iziñi puestuquiz uchjapa. Nii Majchqui Yooz irata zumapankaz kamañchizza wiñayjapa.

8

EW LII ŽEJLČHA

¹ Weriž chiitanacquiztan jalla tiiča chekanaqui, učumnacaltajapa tsjii zuma palt'iziñi žejlča, Jesucristupacha. Jalla niiqui arajpachquin Yooz Ejpž žew latuquiz julzi žejlča, Yooz Ejpžtan chica mantican. ² Niiča ultim Yooz kjuychiz jiliriqiu, učumnacaltajapa palt'iziñizjapa. Nii ultim Yooz kjuy timpluqui anaž žoñiž paatača. Nižaza anača tii muntuquiz. Antiz Yooz Jilirž arajpach kjuyapankazza. ³ Zapa timplu jiliriqiu niž puestuquiz kamcan, ofrendanacami wilananacami jalla ninaca tjaañiča. Jalla nižtiqiztan Jesucristo zakaz tsjii tjaazjapa necesitča. ⁴ Jesucristuqui tii yokquizkaz kamñi žoñi cjtasaž niiqui, anaž timplu jilirim cjtasača. Tii yokquizpachača Moisés lii jaru timplu jilirinaca panž žejlča. Jalla ninacaqui tirapanž wilana tjaacha Moisés lii jaru. ⁵ Pero ninacaqui ultim Yooz kjuy timpluquiz anaž sirwiča. Arajpachquin žejlča nii ultim Yooz kjuy timpluqui. Jalla nii timplu cunta tii yokquiz tsjii paata timplu žejlča tsjii fotožtakaz. Tuquiqui Moisesqui Yooz cjtacama tsjii zkiz timplu paakatchiča. Ima paakatcan Yoozqui nižquiz mantichiča, tuž cjan: “Sinaí curquin amquiz tjezinča, jaknužt wejt timpluqui paaztančhalaja, jalla nii. Jalla nii jarupankaz timplu kjuya kjuystanča”. Jalla nuž mantichiča Yoozqui. ⁶ Pero Jesucristuzti žoñinacžtajapa tsjan zumaž palt'izinasacha. Jalla niiča tuqita palt'iziñinacž kamañquiztan juc'ant zuma kamañchizqui. Nižaza tuqita liiquiztan tii anzta liiqui učumnacalta tsjan zumača. Jesucristuž cjen tii anzta liiqui žejlča. Nižaza nii liiž jaru tsjii tsjan zuma kamañacuqui compromittača.

⁷Tuqita tjaata liiqui juc'ant zuma cjit'chaj niiqui, anaž iya liiqui pectasača. ⁸Yoozqui tuqita lii jaru kamñi žoñinacžquiz ana zuma naychiča. Jalla nii puntuquiztan Yooz takuqui tuž cjiča:

“Yooz Jiliriqui tuž cjiča: Wiruñta timpuquiztajapa wejrqui tsjii ew lii tjaa-ača Israel wajtchiz žoñinacžquizimi, nižaza Judá wajtchiz žoñinacžquizimi. ⁹Nii ew liiqui tuqita ejpnacžquiz tjaata liiquiztan tsjemataž cjequiča. Tuquiqui wejrqui ninacž tuqita ejpnaca jwessinča Egipto yokquiztan. Nii timpuquizpacha wejt lii ninacžquiz tjaachinča; pero ninacazti wejt lii jaru ana cumplichiča. Jalla nižtiquiztan wejrqui ninaca jaytichinča. Jalla nuž cjiča Yooz Jiliriqui. ¹⁰Wiruñta timpuquiz Israel žoñinacžtajapa tsjii ew lii tjaa-ača, jalla tuž: Jalla nii wiruñta timpuquiz wejrqui žoñinacž kuzquiz wejt lii zizkatača, kuzquiz cjjirtažtakaz. Nekztan wejrpacha ninacž Yooz cjeeča. Nižaza ninacaqui wejt partir žoñinaca cjequiča. ¹¹Jalla nii wiruñta timpuquiz kamñi žoñinacaqui anaž porapat tjajnarasasača, ninacž mazinacžquizimi, nižaza ninacž jilanacžquizimi. Anaž tjajnasasača, “Yooz Jiliržquin paja” cjican. Antiz zapa mayni Yooz Jiliripankaz pajaquiča, tsjii zkoltiquiztanpacha asta pajk žoñicama. ¹²Nižaza ninacž ujnaca pertunača, wejt okžñi kuzziz cjen. Nižaza ninacž ujnacquiztan tjatznača wiñayjapa”.

Jalla nuž cjiča Yooz takuqui. ¹³Yoozqui nii ew lii puntuquiztan chiižcu nii tuqita lii apatatchiča. Nii tuqita liiqui watchiz cjen, inakazza. Wajilla liiwj tjatztaž cjequiča.

9

YOOZ ZKIZ TIMPLU

¹Nii tuqita liiqui cuzturumpinacchizza, Yooz rispitzjapa. Nii cuzturumpinacaqui tii muntuquiz žejlñi Yooz timpluquizkaz paatatača. ²Primeraqui zkiz timplu želatča. Nii timpluquiz pizc kjuya želatča. Tsjii kjuyaqui ‘Yooztajapa T'akžta Kjuya’ cjitatača. Nii kjuyquiziqui tsjii pajk candelabra želatča, nižaza mesa želatča, Yooztajapa t'akžta t'anta nonzjapa. ³C'uchquin tsjii kjuya želatča, ‘Yooztajapa Juc'ant T'akžta Kjuya’ cjitatača. Nii pizc Yooz kjuy taypikuiz tsjii pañ cortina želatča. ⁴C'uchquin tsjii kor altara želatča, incienso ujjjapa. Nižaza tsjii caya želatča, Yooz tjaata lii chjojzjapa. Nii cayaqui kjuyltanami zawnctanami koržtan tjajlžtatača. Nii caj kjuyltan tsjii kor ojch želatča maná cjita čhjerchiz. Nižaza Aaronž wara želatča. Nii waraqui ch'ojna c'ajchiča tsjii žejtñi muntiztakaz. Nižaza nii caj kjuyltan Yooz lii cjjirtanaca želatča. ⁵Nii caj juñtun querubines cjita želatča anjila irata paata. Nii querubinanacaqui wežlaž cherchi kjarchiztača; nii caj juntuñ kjara waazitača. Nižaza nii caj juntuñ ljocžtan tjawkz tabla želatča, jalla niiqui ujnaca pertunta cjisjapatača. Jaziqui nii puntunacquiztan ana iya chiiž pecuča.

⁶Jalla nuž tjacžcu timplu jilirinacaqui zawnccchuc kjuyquiz luzluzñitača, lii jaru cuzturumpinaca paacan. ⁷C'uchquin žejlñi kjuyquiz tsjii watquiz tsjii wilta luzñitača timplu chawjc jiliriqui. Nii alajakaz jalla nekziqui luzasača. Jalla nuž luzcan wilana conta ljoc chjichñitača, persun ujnaca pertunta cjisjapami, nižaza parti žoñinacž ujnaca pertunta cjisjapami. ⁸Jalla nižta liiquiztan Espiritu Santuqui zizkatchiča, ima Moisés lii apatatzcan, nii Yooz kjuy timpluquiz paaz cuzturumpinacaqui walatča, nii. Nižaza jalla nuž walan čhjul žoñimi anapan c'uchquin luztača. ⁹Nii tuqita liiqui Yooz puntunaca chiiča tii timpuquiz kamñi žoñinacžtajapa. Nii lii jaru žoñinacaqui ofrendanacami wilananacami tjaachiča. Jalla nuž tjaachiž cjenami nii žoñinacaqui Yooz yujcquiz ana ujhiz nižaza zuma kuzziz ultiu ana cjskatta cjesača. Ninacaqui tirapan ujhiztača. ¹⁰Jalla nii tuqita cuzturumpinacaqui jalla tižtakaztača: čheri tjaazmi, licz tjaazmi, kjaztan ajunzmi. Jalla nižta cuzturumpinacaqui žoñž curpu zawnctankazza. Jalla nuž cjenami lii campiizcama nii cuzturumpinacaqui walatča.

¹¹Wiruñ nekztan Cristuqui tjonchiča. Jazic niiča Yooz timplu chawjc jiliriqui; Yooz zumanaca tjaažjapa tjonchiča. Timplu chawjc jiliri cjican Yooz kjuyquiz sirwiča. Anaž

tii yokquiz paata Yooz kjuyquiz sirwiča. Antiz arajpachquin Yooz ligitum kjuyquin sirwiča. Jalla niiča ultim Yooz kjuya. Tii yokquiz paata Yooz kjuyquiztan juc'ant zumača. ¹² Cristuqui arajpachquin ultim Yooz kjuyquiz luzziča. Jalla nuž luzcan ana cabranacž ljocmi nižaza ana vac toronacž ljocmi chjitchičha. Antiz persun ljocžtan luzziča, žoñinaca wiñaya liwriita cjisjapa. Jalla nuž persun ljocžtan tsjii wiltakaz luzziča tjapa tižtajapa. ¹³ Tuquita liiqui tužutača: Cabranacž ljocžtanami, vac toronacž ljocžtanami ujchiz žoñinacžquiz tjawkñitača. Nižaza ujta vacanacž kjupžtan ujchiz žoñinacžquiz llump'aczt'iñitača. Jalla nižta cuzturumpinaca zawnctankazza; ana poderchiztača, ana ujchiz cjiskatzjapa. ¹⁴ Cristuž ljocžti ancha juc'anti poderchizza. Nii ljocž cjen žoñinacž kuznacaqui zuma cjiskatasacha. Wiñay žejtñi Espiritu Santuž cjen Cristuqui tsjii zuma wilana cunta persunpacha ticziča. Ana ujchiz cjican, niž ljoc Yoozquin tjaachiča, ujchiz žoñinaca pertunta cjisjapa. Jalla nižtiquiztan Cristuqui žoñinaca liwriyasacha. Cristuž cjen nii liwriita žoñinacaqui ninacž tuquita ana zuma kamañanaca jaytasacha, nižaza zuma kamañchiz Yoozquin sirwasacha.

¹⁵ Jalla nižtiquiztan Jesucristuž cjen Yoozqui ew lii ut'aychiča, žoñinaca ultimu liwriita cjisjapa. Žoñinacaqui primer lii mantuqiz cjican, ujnaca paañitača. Pero Jesucristuqui ticziča, nii paata ujnacquiztan liwriizjapa. Jalla nižtiquiztan jakziltat Yooz kjawžta cječhaja, jalla niiqui Yooz compromitta irinsa tanznaquičha; jalla niiqui wiñayjapa Yooztan chica kamaquičha. ¹⁶ Tsjii žoñiqui testamento paachiž cjen, niž cuzazanaca tanñi žoñinacžquiz ut'ayča. Pero ticžtankaz nii testamentuqui walča. ¹⁷ Nii testamento paañi žoñiqui tira žetan, nii testamentuqui anaž walča. Antiz ticžtan, jalla nekztanž nii testamentuž walasacha. Ticžtankaz niž cuzazanaca tanñi žoñinacaqui ultimu niž cuzazanaca tanznasacha. ¹⁸ Jalla nižtiquiztan tuquita liiqui ut'aytatača, conta animal ljocžtan. ¹⁹ Moisesqui tjapa Yooz mantita liinaca kjanapacha paljayžcu nii liinaca ljocžtan ut'aychiča. Moisesqui tsjii chupic choma tanžcu, hisopo cjita parquiz tjerchiča. Nekztan ljocžtan kjaztan t'ajžcu, jalla nekz nii para ch'ižcu, sucarpayñitača, žoñinacžquizimi, liichiz libruquizimi. ²⁰ Jalla nuž sucarpaycan, Moisesqui tuž cjichiča: Tii ljocqui Yooz mantita liinaca walkatča ančhucaltajapa. ²¹ Jalla nižtazakaz Moisesqui nii ljocžtan Yooz kjuyquizimi, Yoozquin sirwiz cuzazanacquizimi sucarpayñitača. ²² Nii tuquita lii jaru jos tjapa cuzazanaca sucarpayñitača, Yooz yujcquiz zuma cjisjapa. Ljoc ana tjawkžcu ujnaca ana pertunta cjesacha.

JESUCRISTUQUI ŽOÑINACŽ LAYCU TICZIČHA

²³ Tuquita lii jaru nii Yoozquin sirwiz cuzazanacaqui Yooz yujcquiz wali cjisjapa jalla nižta cuzturumpinaca paastantača. Tii yokquiz žejlñi cuzazanacaqui fotožtakazza. Anača arajpachquin ultimu želasacha. Arajpach Yooz zuma kamañchiz cjiskatzjapa, nii animal ljocnacaqui anaž atasacha. ²⁴ Cristuqui persun ljocžtan ana žoñiž paata timpluquiz luzziča. Arajpach Yooz kjuyquizpacha luzziča. Jalla nicju anziqiu niiča učhumnacaltajapa Yoozquin palt'iziñiqui. Tii yokquiz žejlñi timpluqui tsjii fotožtakazza nii werar arajpach Yooz kjuyquiztan. ²⁵ Zapa wata timplu chawjc jiliriqiu animalž ljocžtan Yooz kjuyquin luzñitača. Ana persun ljocžtan luzñitača. Pero Cristuqui tsjii wiltapanikaz wilana cunta cjissiča, ana wilta wilta. ²⁶ Wilta wilta wilana cunta ticztasaž niiqui, tii muntu kalltiquiztanpacha wilta wilta sufrican ticztasacha. Tuquita timpu tucuzinta cjiscu tsjii wiltakaz Jesucristuqui parizquichiča. Nekztan niž ljoc tjawkžcu ticziča, tjapa ujnacquiztan žoñinaca liwriizjapa. ²⁷ Tjapa žoñinacaqui tsjii wilta ticstanča tii yokquiz. Jalla nekztan pjalžta cjequičha, Yooz yujcquiz zuma, anazuma, nii. ²⁸ Jalla nižta irata Jesucristuqui tsjii wilta tii yokquiz ticziča, wacchi ujchiz žoñinacž laycu. Pero wiruñ wilta tii muntuquiz tjonaquičha. Nekztan žoñinacž ujnacquiztan ana ticznaquičha. Antiz nižquiz tjapa kuz tjewžñi žoñinaca ultimu liwriyaquičha.

¹ Moisés liiqui Yooz zumanaca tsjii kolucullakaz tjeeziča. Ana ultimu kjana tjeeziča. Nii liiqui tuž cjíča: Wiruñ tjapa Yooz zumanaca tjonaquiča, jalla nii. Nižaza nii liiqui anaž ultimpacha Yooz yujcquiz zuma cjiskatasäča, Yoozquin macjatñi žoñinacžquiziqui. Nii lii jaru watay wata wilanakaz contača. Jalla nuž paažcumi, žoñinacžquiz anaž ultimpacha Yooz yujcquiz zuma cjiskatta cjesäča. ² Nii lii jaru paacan, žoñinacaqui ultimpacha Yooz yujcquiz zuma cjiskatasäž niiqui, anapanž wilana tira onantasača. Nii wilana tjaañi žoñinacaqui ultimu ana ujchiz cjitasaž niiqui, zumapan cjitasača, nižaza persun kuzquiz ana iya cjuñtasača čjul ujquiztanami. ³ Pero nii wilana tjaaž liiqui watay watapanž ujnaca cjuñkatča. ⁴ Vac toronacž ljocmi cabranacž ljocmi tjaatiquiztanami anapanž ujnacquiztan liwriyasača.

⁵ Jalla nižtiqiztan Cristuqui tii muntuquiz tjonžcu Yooz Ejpžquin tuž cjichiča: “Amqui animal wilananacami ofrendanacami ultimu ana pecasača. Antiz wejttajapa žoñž curpu tjaczinchamča, žoñinacž ujnac laycu ticzjapa. ⁶ Ujta animalanacami uj paatiquiztan tjaata ofrendanacami ultimu am ana cuntintu cjiskatasäča. ⁷ Jalla nižtiqiztan wejrqui cjichinča: Wejt Yooz, tii muntuquiz tjonchinča, am kuzcama paazjapa. Jaknužt wejtu puntuquiztan Yooz tawkw liwruquiz cjiirtažlaja jalla nii cumplizjapa tjonchinča”.

⁸ Jesucristuqui cjichiča, “Yooz Ejpqui anaž pecča nižaza anaž jutztazza jalla tinaca: animal wilananacami, ofrendanacami, nižaza ujta animalanacami, nižaza uj paatiquiztan tjaata ofrendanacami. Tuqita liiqui nižtanaca tjaaž mantichiča. Jalla nuž mantita cjenami, Yoozqui anaž niikaz ultimu pecča”. ⁹ Nekztan Jesucristuqui cjichizakazza: “Yooz Tata, wejrqui tii muntuquiz tjonchinča, am kuzcama kamzjapa”. Jaziqui Jesucristuqui nii tuqita liinaca apatatskatchiča, nii lii cuzturumpinacžtanpacha. Nekztan ew lii ut'aychiča. Nii lii jaru Jesucristuqui wilana cunta intirjitatača. ¹⁰ Yooz kuzcama kamcan Jesucristuqui tsjii wiltakaz persun curpu wilana cunta intirjichiča, žoñinacž ujquiztan ticzjapa. Jalla nižtiqiztan Yoozqui učumnacaquiz zuma kamañchiz cjiskatchiča.

¹¹ Timplu jilirinacaqui zapuru ninacž puestuquiz atintichiča. Zapuru wiltan wiltan wilananaca Yoozquin tjaañitača. Pero nižta wilananacaqui ujnacquiztan anapan žoñinaca liiwriyasača. ¹² Jesucristuzti tsjii wiltakaz persun curpu wilana cunta intirjichiča, žoñinacž ujquiztan ticzjapa. Jalla nuž ticžcu, arajpachquin Yooz Ejpžzew latuquiz julziča, niižtan chica mantiñi cjisjapa. ¹³ Jalla nicju tjewžcan žejlča, niiž quintranaca liwj atiptacama cjisjapa, niiž kjojch koztan tječtažtakaz. ¹⁴ Jalla nuž žoñinacžtajapa tsjii wilta ticžcu, Jesucristuqui Yooz partiquiz žejlñi žoñinacžquiz wiñayjapa Yooz yujcquiz ancha zuma cjiskatchiča. ¹⁵ Nižaza nii puntuquiztan Espiritu Santuqui chiiča, tuž cjan:

¹⁶ “Tuqita lii apatatžcu, wejrqui žoñinacžquiz tsjii ew lii tjaa-ača. Jalla nuž cjíča Yooz Jiliriqui. Wejrqui ninacž kuzquiz wejtu liinaca zizkatača, nižaza intintazkatača”.

¹⁷ Nekztan cjichizakazza:

“Ninacaž paata ujnaca ana iya cjuñznača. Nižaza ninacaž ana wali cjičitanacami liwj tjatznača. ¹⁸ Jalla nižta ujnacquiztan pertuntažlaj niiqui, ana iya čjul wilanami pecasača”.

YOOZQUIN MACJATSPANŽ WAQUIZIČHA

¹⁹ Jilanaca, cullaquinaca, jaziqui Jesucristuž ticziž cjen učumqui ana jiwjatcan Yooz yujcquiz luzasača. ²⁰ Ew kamañchiz kamcanaqui ana jiwjatcan Yooz yujcquiz luzasača. Jalla nii ew kamañquiqui Jesucristuž tjaatača. Persun curpu wilana cunta tjaažcu, Jesucristuqui arajpachquinpacha Yooz yujcquiz luziča, nii c'uchquin žejlñi cortina cjetžtažokaz. ²¹ Jesucristučha Yooz kjuychiz žoñinacžtajapa Yoozquin palt'iziñiqui. Jaziqui učumnacaltajapa palt'izinaquiča. ²² Jalla nižtiqiztan tjapa kuztan Yoozquin macjatž waquiziča. Nižaza Jesucristužquin kuzziz cjen ana jiwjatcan Yoozquin macjatž waquiziča. Jesucristuqui učumnacaž paata ujnaca pertunchiča, učumnac kuzquiz ana iya uj cjuñzjapa. Nižaza učum curpunacaqui tsjii zuma kjaztan awjtažokazza. ²³ Yoozquin macjatžcu Yooz familliquiz luzzinčhumča. Jaziqui ana jiwjatcan tirapan Yoozquin tjurt'ichi kuzziz cjequiča. Nekztan Yooztan chica kamaquiča. Nii Yooztan

kamzqui, jalla nii Yoozqui uĉhumnacaquiz compromitchiĉha. Niżaza nii compromitchi Yoozza taku cumpliñiqui. ²⁴Jalla niżtiquiztan Yooz kamañquiz kamcan porapat zumpacha p'ekinchayasa, zuma munaziñi kuzziz cjisjapa, niżaza zuma obranaca paazjapa. ²⁵Niżaza yekjap criichi žoñinacaqui zapa domingo ana ajcajczñiĉha. Ana niža irata kama. Antiz uĉhumqui porapat zumpacha p'ekinchayasa, zuma kamzjapa. Jesucristuž tjonz tjuñi žcatžinžquiĉha. Jalla niżtiquiztan juc'anti uĉhumqui porapat p'ekinchayastanĉha.

²⁶Werar Yooz taku catokžcupacha nekztan kuzinpan Yooz quintra quepsnaquiž niiqui, ana pertunta cjesaĉha. ²⁷Pero niža cjcjiñinacžquiz Yoozkaz casticaquiĉha. Yoozqui niž quintranaca wiñaya casticaquiĉha infernuquin. ²⁸Jakziltat Moisés lii ana cazzi cjitĉhaja, niżaza pucultan ĉhjepultan testicunaca nii ana caza puntu declartĉhaja, jalla nekztan nii uj paañi žoñiqui ana okžcu conzpanikaztaĉha. ²⁹Jalla niżtiquiztan jakziltat Yooz Majch quintranpan quepsnaĉhaja, niżaza Yooz Majch liwriñi lloc tjawkta puntuquiztan iñaraĉhaja, niżaza okžni Yooz Espiritu Santužquiz žawjwa zijjĉhaja, jalla niža paañinacaqui juc'anti castictaž cjequiĉha, nii Moisés lii quintra paañi žoñinacžquiztan cjen. Jalla niža casticzpan waquiziĉha niža žoñinacžtaqui. ³⁰Uĉhum pajta Yooz Jiliriqui tuž cjichiĉha: “Wejrtĉha castiquiñtqui. Wejrqui žoñinacžquiz casticaĉha, ujnaca paatiquiztan jama”. Jalla nuž cjichiĉha Yooz Jiliriqui. Niżaza Yooz takuqui tuž cjiĉha: “Yooz Jiliriqui niž kjuychiz žoñinacž paatanaca pjalznaquiĉha”. ³¹Jakziltat Yooz quintranpan kamchižlaja, jalla niiqui werar žejtñi Yooziž tantaž cjequiĉha. Jalla nuž Yooz tantaž cjequiž niiqui, nižtanacžquiz ancha ana waliž cjequiĉha.

³²Anĉhucadž Yooz famillquiz luztaž cjuñzna. Paljayta Yooz taku catokžcu, anĉhucqui pasinziz kuztan ancha sufrichinĉhucĉha, quintranaca ancha žejlĉhiž cjen. ³³Yekjap anĉhucqui ch'aanitataĉha, niżaza wjajttataĉha tjapa žoñinacaž cheran. Niżaza yekjap anĉhucja jilanacaž niža sufran, anĉhucqui “Jesalla, wejt jilaĉha niiqui” cjican declarchinĉhucĉha. ³⁴Anĉhucqui tsjii criichi žoñinaca preso tanta cjen okžni kuztan yanapchinĉhucĉha. Niżaza anĉhucadž cusasanaca kjañta cjenami, cuntintu kuzziz žejlĉhinĉhucĉha. Arajpachquin anĉhucaltajapa juc'ant zumanaca žejlĉha, wiñayjapa tjurni. Jalla nii cjuñzcu, anĉhucqui cuntintu kuzziz žejlĉhinĉhucĉha. ³⁵Tjurt'ichi kuzziz cjican, jalla nii zuma kuzquiztan ana jayta. Ticzcama tjurt'ichi kuzziz cjequiž niiqui, Yoozquiztan pacta cjequiĉha juc'ant zumanacžtan. ³⁶Anĉhucqui pasinziz kuzziz cjee, Yooz kuzcama zuma kamzjapa. Jalla nekztan anĉhucqui Yooziž compromitta zumanaca tanznaquiĉha. ³⁷Yooz takuqui tuž cjiĉha:

“Wajilla nii tjonñiqui tjonaquiĉha, anaž ancha ažk katasaĉha. ³⁸Jakziltat wejtquiz kuzziz cjen wejt yujcquiz ana uĉhiz cjeĉhaja, jalla niiqui arajpachquin wejtĉtan chica zumapan kamaquiĉha. Pero jakziltat wejt quintra quepaĉhaja, jalla nii žoñiĉha ana waliqui. Niižtan ancha anal jutztazuĉha”.

³⁹Pero uĉhumnacaĉha anapan Yooz quintra quejpžñiqui. Jalla nuž quejpnasaž niiqui, Yooziž ancha ana waliž castictaž cjequiĉha. Antiz uĉhumĉha tirapan Yoozquin kuzzizqui. Jalla nuž kamcan uĉhum persun animu zumaž ĉhjelinĉha, liwriita cjisjapa.

11

YOOZQUIN KUZUZIZ ŽOÑINACA

¹Yoozquin kuzziz cjen, uĉhumqui ultimupan zizza, Yooz taku cumplitapanž cjequiĉha, jalla nii. Niżaza Yoozquin kuzziz cjen uĉhumqui zizza, anza timpuquiz ana cheržcumi Yooz žejlpanĉha, niżaza Yooz zumanaca ultimupan žejlĉha, nii. ²Uĉhum tuquita atĉhi maa ejpnacaqui Yoozquin kuz tjaachiĉha. Jalla nuž Yoozquin kuzziz cjen Yoozqui ninacž puntuquiztan “Zumaĉha ninacaqui” cjichiĉha.

³Yoozqui tawkžtankaz ĉhiican tii muntu paachiĉha. Yoozquin kuzziz cjen jalla nii zizza, ultim werara jalla nužupan paata, jalla nii. Yoozqui ana chertanacquiztan tii muntuquiz žejlñinaca paachiĉha.

⁴Yoozquin kuzziz cjen Abelqui tsjii zuma ofrenda wilana Yoozquin tjaachiĉha. Cainžquiztan juc'ant zuma ofrenda Yoozquin tjaachiĉha. Abelž Yoozquin kuzziz cjen,

Yoozqui Abelž tjaata ofrenda risiwchiča. Nižaza Abelž puntuquiztan Yoozqui chiichiča “Zumača niiqui” cjican. Abel ticziž cjenami učumqui zizza, niiqui Yoozquin zuma kuzziztača, jalla nii. Jalla nii zizcuqui učumqui Abelž zuma kamaña yatekasa.

⁵ Yoozquin kuzziz cjen Enocqui arajpachquin ana ticzi chjichtatača. Ana iya tii muntuquiz željchiča. Yoozpantača chjitchi. Yooz takuqui Enocž puntuquiztan tuž cjiča: Ima arajpachquin chjichtaž cjen, Yoozqui Enoc zuma kamañquiztan cuntintu cjišiča. Jalla nuž cjiřtača Yooz tawk liwruquiz. ⁶ Jakziltat ana Yoozquin kuzziz cječhaja, jalla nižquiztan Yoozqui anapanž cuntintu cjesača. Jakziltat Yoozquin macjatž pecčhaja, jalla niiqui criistanča, Yoozqui željča, jalla nii. Nižaza criistanča, Yoozqui nižquin macjatž pecni žoñinacžquiz zumanaca tjaaquiča, jalla nii. Jalla nižta criichi žoñžquiztan Yoozqui cuntintuča.

⁷ Nižaza Yoozquin kuzziz cjen Noequi kjaz juyzuquiztan liwriitatača. Ima kjaz juyzu tjonan Yoozqui Noežquiz chiižinčiča, “Kjaz juyzul cuchanzcača”, cjican. Jalla nii Yooz chiižintauqui Noequi catokchiča. Nekztan Yooz chiita jaru tsjii pajk warcu kjuya irata kjuychiča, niž familianacžtanpacha liwriita cjisjapa. Jalla nuž Yoozquin kuzziz cjen Noequi tjeeziča, parti žoñinacaqui ancha ujchizza, jalla nii. Nižaza Yoozquin kuzziz cjen Noequi Yooz zuma kamaña tanchiča, tsjii irinsažtakaz.

⁸ Nižaza Abrahamqui Yoozquin kuzziz cjen, Yooz mantita ana jayrazcu cazziča. Yoozqui Abrahamžquiz cuchanzjapa kjawziča, yekja yokquin okajo. Nižaza Yoozqui Abrahamžquiz tuž cjičiča: “Wiruñ wejrqui amquiz nii yoka tjaača, irinsa cunta”. Yooz mantita jaru ojkičiča. Jakziquin ojktčhaja, jalla nii ana zizatča. Jalla nuž cjenami Abrahamqui Yooz tawk jaru ana jayrazcu ojki želatča. ⁹ Abrahamqui Yoozquin kuzziz cjen Yooz mantitacama nii Yooz tjeeža yokquiz kamchiča. Yekja žoñž yoka cjenami, Yoozqui Abrahamžquiz nii yoka compromitchiča, “Wiruñ tii yoka amta cjequiča”, cjicanaqui. Jalla nii yokquizpacha kamcan, zkiz kjuy tultunacchiz kamniatača Abrahamqui. Jalla nižta zakaz Isaacžtan Jacobžtan zkiz kjuychiz kamniatača. Nii pucultanaqui Abrahamž irata tjewzizakazza Yooziž chiita taku cumpliscama. ¹⁰ Ultimu Abrahamqui arajpach wajtquin ojcz tjewziča, wiñaya tjurñi watja. Yoozqui nii zuma watja pinsichiča, nižaza paachiča. Jalla nii zuma wajtquin ojcz tjewziča Abrahamqui.

¹¹ Nižazakaz Sarqui Yoozquin kuzziz cjen ica cjišiča, chawcwa cjicanpacha. Tsjii majchchiz cjišiča, Yoozquin criichiž cjen. Sarqui tantiichinča, Yoozqui niž compromitta taku panž cumplisnaquiča, nii. ¹² Jalla nižtiquiztan Abrahamqui ticz irarchiz cjenami tsjii majchchiz cjišiča. Jalla nii majchquiztan walja tama mirchiča, walja tama arajpach warawaranacažtakaz nižaza walja tama kot at pjilanacažtakaz, jalla nižta mirchiča. Ancha tamaž cjen, anača kanchuca Abrahamžquiztan tjonni majch maatinaca.

¹³ Tjapa nii žoñinacaqui, Abelžtan Enocžtan, Noežtan, Abrahamžtan, jalla ninacaqui ticziča ima Yooz compromitta taku cumplisan. Jalla nuž cjenami Yoozquin tirapan kuzziztača. Yoozquin kuzziz cjen ninacaqui zizziča, Yoozqui niž taku wiruñtajapa panž cumplaquiča. Jalla nuž kuzquiz zizcu cuntintutača. Tii muntuquiz željcan ninacaqui “Yekja wajtchiz žoñtča”, cjiñitača. ¹⁴ Jalla nižta chiñinacaqui kjanapacha tjeeža, ninacaqui arajpach wajtquin ojcz pecchiča, nii. ¹⁵ Ninacaž ulanzquita yoka cjuñtasaz niiqui, nii yokquin cuttiñi attasača. ¹⁶ Ninacazti tsjan cusa yokaž pecatča, arajpach yokquin irantiz pecatča. Jalla nižtiquiztan Yoozqui anaž azkatča, ninacaž “Wejt Yoozza”, cjican cjenauqui. Yoozqui ninacžtajapa tsjii zuma watja tjacžinčiča.

¹⁷ Nižaza Abrahamqui Yoozquin kuzziz cjen tjapa Yooz mantitanacami cumpliñitača. Yoozqui Abraham yanziča, ultimu Yoozquiz kuzziz, ana ultimu Yoozquiz kuzziz, jalla nii. Jalla nuž yanzjapa Yoozqui Abrahamžquiz mantichiča, niž zinta majch wilana cunta tjaaatzjapa. Nii zinta majchqui Isaac cjitatača. Nekztan Abrahamqui niž zinta majch wilana cunta conijkičiča. Nekztan conzmayatača. Pero Yoozqui nii conz apatatskatchiča, Abrahamž zuma cazni kuz zizcu. Niž tuquiqui Yoozqui Abrahamžquiz cjičiča: ¹⁸ “Isaacž cjen amqui majchmaatinacchiz cjequiča”. Jalla nuž taku tjaači cjenami Abrahamqui niž zinta majch wilana cunta conijkičiča. ¹⁹ Abrahamqui

persun kuzquiz tantiichiċha, Yoozza ticzinacami jacatatskatñiqui, jalla nuż tantiyatċha. Abrahamqui persun kuzquiz persun majch conz cjichipantaċha. Jalla niżtiquiztan Isaac majchqui ticziquiztan jacatatchiżtakaz cjissiċha.

²⁰ Niżaza Isaacqui Yoozquin kuzziz cjen Jacobżtan Esaużtan, jalla ninacżquiz maz-inċiċha, wiruñtajapa ninacżta zumanaca cjequiċha, niżaza Yooz yanapta cjequiċha, jalla nii. ²¹ Niżaza ticz ora Jacobqui Yoozquin kuzziz cjen Joseż maatinacżquiz mazinċiċha, Yoozqui ninacżquiz zumanaca tjaaquiċha, jalla nii. Niżaza Jacobqui atztan tjurt'iżcu Yoozquin rispitchiċha. ²² Niżaza Josequi Yoozquin kuzziz cjen ticz ora mazinċiċha, Israel žoñinacaqui Egipto yokquiztan ulnaquiċha, nii. Niżaza mantichiċha, persun curpu tsjijnaca Egipto yokquiztan chjichajo.

²³ Niżaza Moisés maa ejpqui Yoozquin kuzziz cjen Moisés nastiquiztan ċhjep jiiz chjojziċha. Ninacaqui cherċiċha, ancha c'achja nii wawa, jalla nii. Tuquiqui Egipto chawjc jiliriqui mantichiċha, tjapa Israel lucmajch wawa contaj cjila, nii. Pero Moisés maa ejpqui Yoozquin kuzziz cjen nii chawjc jiliriz mantita ana eksiċha. Moisés wawa ana conchiċha. ²⁴ Nekztan Faraón chawjc jiliriz majtqui nii Moisés wawa uywassinċha. Jalla nuż uywastiquiztan nii wawaqui pajkchiċha. Jalla nekztan pajkżcu Moisesqui Yoozquin kuzziz cjen Faraonż maati cunta cjis anapan pecatċha. ²⁵ Antiz Moisesqui Yooz illzta Israel žoñinacżtanpacha sufriz tantiichiċha, uj paañi žoñinacżtan tsjii ratukaz cuntintu žejlz cjenpacha. ²⁶ Niiż kuzquiz tantiichiċha, "Egipto cusasanacżtan cuntintu kamz cjenpacha, Cristużtajapapankaz sufrasaċha. Jalla nuż sufrichi kamchiż cjen ultimquiziqui juc'ant cusal cjeeċha, ricachu kamzquiztan". Jalla nuż cjan, Moisesqui Yooz compromitta zumanac kjutñi pinsatċha. ²⁷ Niżaza Moisesqui Yoozquin kuzziz cjen Egipto yokquiztan ulanċiċha, chawjc jiliriz žawjta ortina ana eksu. Niiż kuzquiz tantiita jaru tjurt'ichi žejlċiċha, niiz kuztan Yooz cherchiż cjen.

²⁸ Niżaza Moisesqui Yoozquin kuzziz cjen Yooz mantita jaru zapa kjuyquiz pascua wilana conz mantichiċha. Nekztan nii wilan ljocżtan zapa kjuy zanzquiz sucarpayz mantichiċha Israel žoñinacż primer maatinaca ana conta cjisjapa, ticzkatñi anjilżquiz. ²⁹ Nekztan Yoozquin kuzziz cjen Israel žoñinacaqui Mar Rojo cjita pajk kota kajkchiċha, kjoñ yokażtakaz. Nekztan Egipto quintra žoñinacaqui nii kjoñiranpacha nii pajk kota zakaz kakatċha. Jalla nuż taypiquiz kajkżcan tjapa nii Egiptonacaqui kjazquiz ticziċha.

³⁰ Yoozquin kuzziz cjen Israel žoñinacaqui Jericó wajt muytata žejlñi pirkanaca pajlkatchiċha, pakallak tjufni muytata ojklajżcu. ³¹ Niżaza Yoozquin kuzziz cjen Rahabqui ana ticzinċha parti Jericó wajtchiz žoñinacżquiztan. Naaqui Israel wajtchiz awayt'iñinaca zuma risiwchinċha. Jalla niżtiquiztan ana ticzinċha. Tuquiqui putirii žoñtaċha. Nekztan Yoozquin kuz tjaaċhinċha. Pero parti Jericó wajtchiz žoñinacaqui Yooz mantita ana cazzċiċha, werar Yoozquin ana kuz tjaaċhiċha.

³² Yoozquin kuzziz puntuquiztan iya quintunaca žejlċha. Pero timpuż pjaltċiċha. Jalla niżtiquiztan ana chii atasaċha Gedeónż puntu, Baracż puntu, Sansónż puntu, Jeftéz puntu, Davidż puntu, Samuelż puntu, niżaza profetanacż puntu. Jalla nii Yoozquin kuzziz žoñinacż quintunaca žejlċha pero. ³³ Ninacaqui Yoozquin kuzziz cjen quintra žoñinaca atipċiċha, niżaza zuma mantiñi cjissiċha, niżaza Yooz compromitta taku tanziċha, niżaza ana wal leonanacż atanaca chawcżinċiċha. ³⁴ Niżaza ana wal uj asñinaca tjessinċiċha, niżaza atipċiċha, ninaca ana pajk cuchillżtan conta cjisjapa. Niżaza ana azziz žoñinacaqui azziz cjissiċha Yoozquin kuzziz cjen. Niżaza quira zalcan walja azziztaċha, jalla niżtiquiztan quintra žoñinaca tjiranċiċha. ³⁵ Yoozquin kuzziz cjen Yoozqui yekjap maatakanacżtajapa ticzinaca jacatatskatchiċha.

Yoozquin kuzziz cjen yekjap žoñinacazti sufriskattaċha. Pero ninacaqui ana Jesucristo nicċiċha, sufrisquiztan liwriita cjisjapa. Antiz tirapan tjurt'ichiċha, ticz cjenami. Jalla nuż ticziċha, jacatatżcu juc'ant zuma kamañchiz cjisjapa. ³⁶ Yekjap žoñinacaqui Yoozquin kuzziz cjen iñartataċha. Niżaza wjajttataċha. Niżaza carinżtan maktataċha. Niżaza carsilquiz chawctataċha. ³⁷ Niżaza Yoozquin kuzziz cjen yekjap žoñinacaqui maztan ċhajcżcu contataċha. Niżaza yekjapanacaqui taypiquiz pootżcu contataċha.

Yekjapanacaqui sufriskattatača, werar Yoozquiztan quejpskatajo. Pero nii criichi žoñinacaqui ana quejpsiča. Yekjapanacaqui Yoozquin kuzziz cjen cuchillžtan contača. Yekjapanacaqui Yoozquin kuzziz cjen uuzi zkizimi cabra zkizimi kujtžta ojklajchiča. Ana iya zquitchiztača. Nižaza Yoozquin kuzziz cjen yekjap žoñinacaqui t'akjiri kamcan awantichiča; yekjapanacaqui ancha sufrisnaca awantichiča; yekjapanacaqui chjojritž-tapan awantichiča. ³⁸ Ana criichi žoñinacaqui nii Yoozquin kuzziz žoñinacžtan ana kamz waquiziča. Ana criichi žoñinacaqui ana zumapanča. Nii Yoozquin kuzziz žoñinacžti ancha zumača. Jalla nuž cjenami tii muntuquiz sufrican awantichiča, ch'ekti yokaran ojklajcan, curunacaran ojklajcan, maz pjet ajkquiz kamcan, nižaza yok pjetquiz kamcan. ³⁹ Tjapa ninacaqui Yoozquin kuzzizpantača. Jalla nižtiquiztan Yoozqui ninacž puntuquiztan ticlarchiča, “Ninacača wejtquin kuzzizqui” cjicanaqui. Jalla nuž cjenami, Yooziž compromitta taku ninacžtajapa ima cumplissiča. Yooz taku cumplitaqui ana tanziča. ⁴⁰ Učhumnaca cjuñžcu, Yoozqui juc'ant zumanaca pinsichiča. Jalla nižtiquiztan ninacžtanami učhumnacatanami chicapacha, nižaza tjapa Yoozquin kuzziz žoñinacaqui Yooz irata ancha zuma kamañchiz cjequiča.

12

YOOZ KAMAÑCHIZ CJEE

¹ Yoozquin kuzziz žoñinaca, jaziqui wacchi tuquita žoñinacaqui učhumnacaquiz tjeeziča, Yoozquin kuzziz kamaña, jalla nii. Ninacaqui učhumnaca muytatažtakazza. Ninacž zuma kamaña cjuñžla. Jalla nekžtan tjapa anawalinaca paaz jaytila nižaza kuzquiz tjapa anawali pinsiskatñinaca ecla. Nekžtan Yooziž tjaata kamañquiz tjurt'iñi pasinziz kuztan kamla. ² Nižaza učhumqui Jesucristuž kamaña cjuñžla. Niiž cjen učhumqui Yoozquin kuz tjaachinčhumča. Nižaza niiqui učhumnacaquiz juc'ant Yoozquin kuzziz cjskataquiča, ancha zuma Yooz kamañchizkaz cjisjapa. Jesucristuqui cruzquiz ticžcan sufrichiča. Cruzquiz ticžqui azzucatača. Pero Jesucristuqui ana turwayziča nii ticžjapa. Jalla nižtiquiztan arajpachquin Yooz žew latuquiz julzi žejlča, cuntintu. Jalla nuž cuntintu žejl zizcu, nii sufrisnaca awantichiča.

³ Jesusaž kamta cjuñžna. Niiqui ujchiz žoñinacž kjarquiz ancha sufrichiča. Jalla nii Jesusaž kamta cjuñžcu Yooz kamañchiz kamcan anapan ocha, tjup kuzziz cjee. ⁴ Ančhucqui imaziž contača ujchiz žoñinacž ančhucaquiz walja sufriskatanami. ⁵ Yoozqui ančhucaquiz chiižinčiča, niiž maatinacažtakaz. Jalla nii ewjt'iñi chiižinta ana tjažzna. Yooz takuqui tuž ančhucaquiz chiižinča:

“Wejt maati, Yooz Jiliriz ewjt'iñi chiižinta ana chjaya. Nižaza niižquiz casticta cjenami ana llajlla kuzziz cjee. ⁶ Yooz Jiliriqui niiž k'aayi maatinaca ewjt'iča; nižaza persun maatinaca azquichñi casticu tjaaža, wilta zuma cjcijyajo”.

⁷ Jalla nižtiquiztan ančhucqui pasinziz kuztan Yooz azquichñi casticu awanta. Yooz Ejpqui ančhucaquiz irpiča. Tjapa ejpnacaqui persun maatinacapanž ewjt'iča. ¿Tsjii ana nižta ewjt'iñi ejp želasajo? Anaž cjesača. ⁸ Jaknužt Yoozqui tjapa niiž maatinaca ewjt'ičhaja, jalla nižta Yoozqui ančhuc ewjt'izakazza. Ančhucqui ana ewjt'ita cjitasaz niiqui, ana ljitum Yooz maatinaca cjitasacha. Ančhucqui pampan maatinacažtakaz cjitasacha. Ana ultim Yooz famillchiz žoñinaca cjitasacha. ⁹ Ančhuc cjuñžna, ocjala cjicanaqui učhum persun maa ejpqui ewjt'iñitača. Nižaza ninacžquiz rispitchinčhumtača. Jalla nižtiquiztan žoñi paañi Yooz Epiž ewjt'itaqui juc'anti catokz waquiziča, zuma kamañchiz kamzjapa. ¹⁰ Učhum persun maa ejpqui tsjii timpujapakaz učhumnacaquiz ewjt'ichiča, ninacaž tantiitacama. Yooz Ejpzi učhumnacaltajapa ewjt'iñiča, učhum tsjan zuma kamañchiz cjisjapa, niiž irata ancha zuma cjisjapa. ¹¹ Azquichñi casticunacquitžtan učhumqui sufrichumča. Casticz ora llaquita kuzzizčhumča. Pero jakžiltat castictiquiztan tsjan zuma kamañchiz cjissizlaja, jalla niiqui ultimu cuntintu cjisnaquiča. Nižaza zuma kuzziz Yooz kuzcama kamaquiča.

YOOZQUIN TJAPA KUZ CJISPANČHA

¹² Jalla nižtiquiztan ančhucqui wilta azi tanzna, zuma kamzjapa. Kjaranacami owanacami otchižtakazza. Tjup kuzziz cjee, zuma kamzjapa. ¹³ Yooz jiczquiz zuma ojklaya. Jalla nekztan anazuma ojklayñi žoñinaca zuma kamañquiz irpita cjesača. Ančhucaž zuma kamtiqiztan ninacaqui zuma kamañchiz cjisnaquičha.

¹⁴ Nižaza tjapa žoñinacžtan zumapanž kamzjapa tjapa kuz tjaa. Nižaza Yooz irata ancha zuma kamañchiz kamzjapa tjapa kuz tjaa. Ana zuma kamañchiz cjequiz niiqui anaž Yooz Jiliržtan kamasacha. ¹⁵ Yoozqui ančhucaquin yanapz pecča. Nii zuma yanapta ana chjaya. Yoozquiztan anapan zaraka. Ana wal jar muntižtakaz ana cjee. Jalla nuž ana wal muntižtakaz cjequiz niiqui, ančhucacami parti jilanacžtami ana wali kamañchiz cjesača. ¹⁶ Nižaza nii ana zuma kamañchiz Esaúžtakaz ana nižta cjee. Esaúqui adulteriuquiz ojklaychiča, nižaza Yooz kamaña ana importaychiča. Esaúqui jilir majch irinsižtan tsjii lujlz čhjeržtan campiichiča. ¹⁷ Nekztan wiruñ Esaúqui ejpžquiztan jilir majch irinsa tanz pecatča. Niiž ejpqui Jacobžquiz tjaachitaž cjen Esaúžquiz ana tjaas atchiča. Niiž irinsa tjaatapanča. Wiruñ Esaúqui ancha kaacanami, ana jaknužumi irinsa tanzñi atchiča.

¹⁸ Ančhucqui Yoozquin macjatžquichinčhucča. Ančhucqui anača Israel žoñinacžtakaz Sinaf curquin macjatžquichinčhucqui. Nii curquiz žoñinacaqui ojklayča, nižaza lanža. Pero Yoozquin ana lanžñi atasacha. Tuqui timpuqui Israel žoñinacž Sinaf curquin macjatan nii curuqui ujznatča, nižaza tsokchi tsjiržtan weeztatača. Nižaza jorjorñimi lliwjlliwñimi želatča. ¹⁹ Nekz žejlcan trompet jora nonziča. Nižaza Yooz jora nonziča, ninacžquin paljayžquiñi. Nii jora nonžñi žoñinacaqui roct'ichiča, ana iya chiižcajo. ²⁰ Nii joraqui tuž mantichiča: “Jakziltat tii curquiz macjatžcačhaja, maztan čhajc jawi contaž cjequičha, už pajk cuchillžtan contaž cjequičha. Žoñinacami animalanacami nižta macjatžcaquiz niiqui, contaj cjila”. Jalla nuž chiižinžquitiquiztan Israel žoñinacaqui ancha tsucchiča, nižta mantanaqui ana iya awanti atchiča. Jalla nižtiquiztan roct'ichiča, ana iya chiižcajo. ²¹ Ancha ispanchicanacatača nii chertanacaqui. Jalla nižtiquiztan Moisespachača tuž cjichiqui: “Wejrqui anchal tsucuča, nižaza kjarkatuča”.

²² Pero ančhucqui Sinaf curquin ana macjatžquichinčhucča. Ančhuczi arajpach žejtñi Yoozquin macjatchinčhucča, niižquin kuz tjaachiž cjen. Jaziqi ančhucča arajpach Jerusalén wajtchiz žoñinacaqui. Nižaza Sión cjita curquiz macjattažokazza. Nii Sión cjita curuqui cjicha, arajpach Jerusalén watja, jalla nii. Arajpach Yooz wajtquin warank waranka anjilanaca žejlča, Yoozquin rispitzjapa ajcžñi. ²³ Nižaza Yooz wajtquin anjilanacžtan chica Yooz wajtchiz žejlñinacaqui ajcža, Yooz wajtchiz žoñinacžtanpacha. Jalla nii žoñinacž tjuunacaqui arajpach listiquiz cjjirtača. Nižaza ančhucqui Yooz Jiliržquizpacha macjatchinčhucča. Nii Yoozza tjapa pjalñiqui. Nižaza ančhucatan zuma kamañchiz žoñinacž animunacžtan Yooz wajtchizza. Yoozqui ninacžquiz niiž irata ancha zuma kamañchizkaz cjiskatchiča. ²⁴ Nižaza ančhucqui Jesusižquin macjatchinčhucča. Niiča ew acta ut'aychiž cjen žoñinacžta tjurt'ižiniqui. Žoñinacžtajapa ticziča. Nižaza žoñinacž laycu niiž ljocžtan sucarpaytažokaz cjichiča animal ljocžtakaz. Jesusiž ljoc tjawkchiž cjen, žoñinacaqui liwriita cjesača. Abelž ljocqui žoñinaca ana liwriyasača. Jalla nižtiquiztan Jesusiž ljocqui Abelž ljocquiztan tsjan cusača.

²⁵ Jalla nižtiquiztan ančhucqui Yooz chiita taku anaž nicaquičha, panž catokz waquiziča. Tuqui timpuqui Yoozqui Sinaf curquiztan Israel žoñinacžquiz chiiichiča. Nekztan ninacaqui nii chiita taku ana juyzu paachiča. Jalla nižtiquiztan ninacaqui castictatača. Anziqui Yoozqui arajpachquiztan učumnacaquiz chiižinžquičha. Nii chiižinta ana juyzu paaquiz niiqui, panž castictaž cjequičha. Yoozquiztan anapan atipi atasacha.

²⁶ Tuqui timpuqui Yooz joraqui yokanaca chjekinskatchiča. Anziqui cjicha: “Tsjižtan yokanacami arajpachami chjekinskatača”. ²⁷ “Tsjižtan” cjicanaqui Yoozqui zizkatča, Yooz paata yokanacami arajpachanacami liwj kataquičha. Nekztan ana chjekinskattanaca, niičaz želaquičha. ²⁸ Yooz watjaqui ana tjatantaž cjesača, panž želaquičha. Učumča nii wajtchiz žoñinacaqui. Nižaza učumqui Yooztan chica mantaquičha. Jalla nižtiquiztan učumqui Yoozquin gracias cjizpan waquiziča. Nižaza tjapa kuztan, nižaza humilde kuztan Yoozquinž zuma rispita, Yooz tsucchuca azi tjeežñiž cjen, nii cjuñžcu. Jalla nuž

rispitan Yoozqui cuntintu cjequiča. ²⁹ Cjuñzna. Učhum Yoozza tsjii anawalinaca ujnñi ujtakazqui. Jalla niiča anawali žoñinaca casticñiqui.

13

CHIIŽINTANACA

¹ Jilanaca, cullaquinaca, porapat tirapan zuma munaziñi kuzziz cjee. ² Nižaza tjonznì žoñinacžquiz zuma pan kjawžna. Jalla nuž kjawžcuqui yekjap žoñinacaqui anjilanacžquiz atintichiča, ana zizcu.

³ Carsilquiz chawcta jilanaca panž cjuñzna. Ančhucacakaz persun kuzquiz ninacaž chawctiquiztan sint'iz waquiziča. Nižaza sufriskatta jilanacžquiz cjuñzna. Ančhucqui curpuchiz cjicanaqui zakaz sufriskatta cjesača.

⁴ Tjapa ančhucqui lucutjiñi zalžcu, zuma lititumaž cjcijya. Tjunatan zalžcu zuma lititumaž kama, ana yekja maatakžtan ojklayasača. Jakziltat adulteriuquiz ojklayčhaja, jalla niižquiz Yoozqui casticaquiča.

⁵ Ančhucqui anaž paazquin kuz tjaa. Žejlñi cusasanacžtan cuntintukaz cjee. Yoozqui tuž cjichiča: “Wejrqui ančhuc anal jaytača, nižaza anal ečača”. ⁶ Jalla nižtiquiztan učhumqui ana jiwjatcan chiyasača, tuž cjican:

“Yooz Jiliriča wejtquiz yanapñiqui. Žoñinacaž wejtquiz čhjulu paachi cjenami anal eksnasača”.

⁷ Ančhucqui icliz irpiñinaca cjuñzna. Ninacaqui ančhucacžquiz Yooz taku paljaychiča. Jaknužt ninacaqui tjurt'ichi kuzziz ticzičhaja, jalla nii cjuñzna. Ninacaž Yoozquin kuzziz kamta jalla nižta irataž kama.

⁸ Jesucristuqui tuquitanpacha, anzimi, jaztanami tsjii kuzzizpanikazza, jalla niiča ana kuz campiiñiqui. ⁹ Nižaza ančhucqui tjapaman tsjemata tjaajintanacžquiz anaž incallskata. Cjuñzna, Yoozqui ančhucacžquiz yanapaquiča, tjup kuzziz cjisjapa. Jalla niiqui tsjan yanapča, čhjeri lujlz cuzturumpiquiztanaqui. Jakziltat nii čhjeri lujlz cuzturumpinac jaru kamčhaja, jalla ninacžtaqui anaž yanapča juc'ant zuma kamañchiz cjisjapa.

¹⁰ Učhumnacaltaqui anača animal wilana žejlča. Tsjemat wilana žejlča, Jesucristupacha. Tuquita timplu jilirinacaqui anapanča nii wilana lujlchuca. ¹¹ Tuquita lii jaruqui timplu chawjc jiliričiqui conta wilan ljoc chjitchiča c'uchquin žejlñi Yooz kjuyquin, Yoozquin ofrenda tjaazjapa, ujnaca pertunta cjisjapa. Nii wilanž curpunacaqui wajt tjii pampiquin ujnitača. ¹² Jalla nižta irata Jesusaqui wajt tjiuquin ticziča, niiž persun ljoc cjen žoñinacžquiz Yooz anča zuma kamañchiz cjiskatzjapa. ¹³ Ančhucqui ana wal kamaña eccu, Jesucristužquin macjatz waquiziča. Nekztan učhum listuž cjee, sufrizjapa. ¹⁴ Tii muntuquiz kamcan ana wiñaya tjurni wajtchizčhumča. Pero učhumqui arajpach watjaž ojkszjapa anča tjewža. ¹⁵ Jalla nižtiquiztan Jesucristužquin sirwican učhumqui tirapan Yoozquin honora tjaaz waquiziča. Jalla nuž honora tjaacan wilana cuntaž cjequiča. Jazičiqui učhumqui persun atžtan “Yoozqui honorchizkaj cjila”, cjican chiiz waquiziča. ¹⁶ Nižaza ančhucqui zuma paaznaca panž paa. Nižaza parti jilanacžtan ančuca želinchizquiztan jama tojna. Nekztan ančucaž zuma kamtiquiztan cuntintu cjequiča Yoozqui.

¹⁷ Ančhucqui icliz irpiñinaca cazpanča, nižaza ninacž jaru cjee. Ninacaqui ančhuc cuitiñiča. Nižaza nii icliz irpiñinacaqui, jaknužt criichi žoñinaca cuitiñižlaja, jalla nii Yooz yujcquin cuenta tjaastanča. Ančhuc zuma kaman, irpiñinacaqui cuntintuž ančhuc cuitaquiča, ana llaquizcu. Ančhucqui ančuca irpiñinacžquiz llaquiskataquiž niiqui, anapanž cusa cjesača ančhucaltajapaqui.

¹⁸ Wejtnacaltajapa Yoozquiztan mayizina. Wejrnacqui zuma kuztanpan kamuča. Jazičiqui wejtnaca kuzquiz ana zinta uj cjuñuča. Čhjulu paacanami zuma litituma kamz pecuča. ¹⁹ Nižaza wejtnacaltajapa mayizinalla, ančucaquin wilta apura tjonzjapa, ana iya atajta cjisjapa.

²⁰⁻²¹ Yoozza žoñinacž kuznaca walikaz cjiskatñiqi. Jalla niiqui učhum Jesucristo Jiliriž ticziquiztan jacatatskatchičha. Jesucristučha učhum chawjc Awatiriqui uuzanaca itzñiž-takaz. Niiqui persun ljocžtan ew acta ut'aychičha wiñayjapa.

Jalla nižtiquiztan Yoozqui ančhucaquiz zuma kamañchizpankaj cjiskatla, niž kuzcama kamzjapa. Nižaza Jesucristuž cjen Yoozqui učhum yanapla, zuma obranacami paazjapa, nižaza zuma kamzjapa. Ančhucaž zuma kamtiquiztan Yoozqui cuntintu cjequičha. Jaziqiu Jesucristuqui wiñayjapa honorchiz cjila. Jalla nužoj cjila. Amen.

²² Jilanaca, cullaquinaca, ančhucaquiz rocučha, weriž chiižinta taku zuma kuztan nonznaquičha. Tsjii kjaž takunaca tii cartiquiz cjiyrchinčha. ²³ Učhum Timoteo jilaqui carsilquiztan liwriitačha. Jalla nii ančhucaquiz maz pecučha. Timoteoqui tekz waj tjonaquiž niiqui, nižtan wejttan ančhucaquin chertzñi okačha.

²⁴ Tjapa icliz irpiñinacžquin tsaanžinalla. Nižaza tjapa Yoozquin criichi žoñinacžquiz tsaanžinalla. Nižaza Italiaquiztan tjoñi jilanacaqui ančhucaquin tsaanžquičha.

²⁵ Yoozqui tjapa ančhucaquiz zumapanj yanapt'ila. Jalla nužoj cjila. Amén.

LA CARTA DE SANTIAGO

¹ Wejrtča Santiaguqui. Wejrqui Yooz Ejpž, nižaza Jesucristo Jilirž mantitacama okiñ žoñtča. Ančhucqui Israel wajtchiz žoñinacaqui tjapa nacionquin wichanziča. Ančhucaquin saludos apayžčuča tii cartiquiz.

PRUEBANACŽ PUNTU

² Yoozquin criichi jilanaca, cullaquinaca, tii muntuquiz kaman tjapaman pruebanacaž žejliča. Čhjulorami tsjii prueba tjonaquiž niiqui, ancha cuntintuž cjee. ³ Yoozquin tirapan kuzziz cjen, čhjul prueba nacami atipaquiča. Nižaza Yoozquin juc'anti kuzziz cjisnaquiča. Nekztan juc'anti Yoozquin tjurt'iñi kuzziz cjisnaquiča. ⁴ Nižaza tirapan Yoozquin tjurt'aquiž niiqui, Yooz irata ancha zuma kamañchiz cjisnaquiča. Zuma ljitum žoñipan cjisnaquiča.

⁵ Pruebanacaž amquiz tjonaquiž niiqui, nekztan am kuz turwayznaquiž niiqui, Yoozquin juc'anti mayiza, Yooz jicz puntu zuma zizñi cjisjapami, nižaza nii pruebanaca atipzjapami. Yoozqui ancha zumača. Jakziltat mayizaja, jalla nii žoñžquiz Yoozqui zuma yanapasača. Niiž okñi kuzziz cjen, ana ujžcu yanapasača, pruebanaca atipsjapa. ⁶ Yoozquin mayizican tjapa kuztan mayizizpanča. Ana paysnakñi kuzziz mayiziz waquiziča. Paysnakñi kuzziz cjesaž niiqui, tjamiž chjichta kjaz ljojkižtakaz cjesača, awizaqui Yoozquin kuzziz, awizasti ana Yoozquin kuzziz. ⁷⁻⁸ Nii payznakñi žoñiqui pizc kuzziz. Jalla nižtiquiztan pizc kuzziz mayizan, ana nonžta cjesača. Yoozqui nii žoñžquiz ana yanapasača. Nižaza nii pizc kuzziz žoñiqui anaž pinziz waquiziča, “Yoozqui wejtquiz yanapaquiča”, cjicanaqui.

⁹ Jilanaca, cullaquinaca, yekjapa Yoozquin criichi žoñinaca porinacača. Nii žoñiqui Yoozquin criichiž cjen, Yooz maati cjissiča. Nižaza arajpachquin okaquiča, walikaz kamzjapa. Jalla nižtiquiztan cuutintupanž cjis waquiziča. ¹⁰ Jakzilta Yoozquin criichi žoñit ricachuquiztan porilla cjisnasaž niimi, cuntintupankaz cjis waquiziča. Nii žoñiqui tirapan Yooz maatiča. Tsjii pastuqui tsjii pacamakazza zuma pjajkjallchizqui. Nekztan niiž pjajkjallaqui k'alaž choočha. Pjajkjallažtakaz tsjii timpupankaz ricachu cjesača žoñiqui. ¹¹ Tjuñiž kjaki siyanaqui pastu pjajkjallanacaqui k'ala choočha. Nekztan nii pjajkjallanacaqui katča. Anaž iya c'ajča. Nižtazakaz ricach žoñinacaqui tsjii timpukaz ricu kamča. Ricachu kamcan tiripintit porinsnasača.

UJ PAAZ PUNTU, YOOZ PUNTU

¹² Čhjul prueba tjonanami Yoozquin tjurt'iñi kuzziz cjee. Nižta tjurt'aquiž niiqui, cuntintuž cjequiča. Yoozqui nii zuma tjurt'iñi kuzziz žoñinacžquiz ancha zuma kamaña tjaača. Nuž Yoozqui compromitchičha nižtan munazican sirwiñi žoñinacžquin. ¹³ Jakziltat uj paaz pecčhaj niiqui, anapanž Yoozquin culpasača, “Yoozqui wejtquiz ujquin tjojtskatz pecča” cjicanaqui. Yoozqui ana jakzilta žoñimi ujquiz tjojts munča. Nižaza Yoozqui uj paazqui anapanž persuna pecča. ¹⁴ Žoñinacž persun kuzqui ana zuma uj paaz pecča. Nekztan uj paazquin ojčkča. ¹⁵ Čhjulorami žoñinacaqui ana zuma kuzcama kamčhaj niiqui, ujquinpanž chjichtača. Nižaza jakziltami uj paañipan kamčhaj niiqui, wiñaya castictaž cjequiča.

¹⁶ Wejt k'ayi jilanaca, cullaquinaca, ana incalltaž cjee. ¹⁷ Yoozqui zumapanča, nižaza ljitumapanča čhjulquiztanami. Tjappacha zumanacaqui Yoozquiztanž tjonča, tjapa zumanacača tsewcta Yooz Epiž tjaataqui. Yoozqui tjuñimi jiižmi paachiča. Ninacž kjanaku awisac zuma kjanča, awisac tsjirquiz weeztača. Yooztti anača nižta, zumapankazza. Anapan žoñi ujquin tjojtskatz pecča. ¹⁸ Yoozqui zuma kuztan učumnacaquiz niiž maati cjiskatchičha. Yooz werar taku criichiž cjen, učumnacaqui Yooz maatinaca cjissinčhumča. Jalla nižtiquiztan učumnacaqui parti criichi žoñinacž tuqui Yooz maatinaca cjissinčhumča. Jalla nužupanča Yooziž pinsitaqui.

¹⁹ Wejt k'ayi jilanaca, cullaquinaca, nonžna. Yooz taku nonzjapa listu cjee. Ančuca kuzquiz čhjulu chizmi tjonžaja, jalla nii chiizqui zumpacha tantiižcu, chiiz waquiziča. Tiižakaz cjiwča, anača orallac žawjzqui. ²⁰ Oralla žawjni žoñinacaqui parti žoñinacžquiz anaž yanapi atasača Yooz kuzcama kamajo. ²¹ Jaziqiu ančuquu ana zuma kamañanac-quiztan jayta. Ancha uj paaznaca žejlča. Tjapa uj paaznacquiztan jayta. Nekztan humilde kuzziz Yooz tjaajinta taku zumpacha catoka. Nii Yooz takuqu ančučž liwriyasača.

²² Yooz takuqu anača nonžneeka nonzqui, antiz catokspanča, ana persunpachquiz incallta cjeajo. ²³ Yooz taku nonžcu jakzilta žoñit nii Yooz tawkcama ana kamčhaja, jalla niiča ana zuma žoñiqui. Tižtaž nii žoñiqui. Nii žoñiqui ispiwquiz persun yujc cheržcu, ²⁴ ojkča. Nekztan nii cheržta yujc tjažta. Nižtaž nii Yooz taku nonžneeka nonžni žoñiqui. Yooz taku nonžcu, Yooz taku tjažta; ana nii Yooz tawkcama kamča. ²⁵ Yekjap žoñinacazti tjapa kuz nonža Yooz zuma liwriini taku. Kuzquiz chjojča. Nonžcu, ana tjažta, niicamaž kamča. Jalla niiž zuma kamtiquiztan Yoozqui nii žoñžquiz wintissa, tsjan walikaz kamajo.

²⁶ Jakzilta žoñit “Yooz tawkcama zuma kamiñ žoñtča wejrqui” chiičhaj niiqui, niiž atquiztan chiičhiiz cuitazla. Anaž niiž ata cuitasaquičž niiqui, persunpachaž incallča. Inapankaz cjiča, “Yooz tawkcama zuma kamiñ žoñtča wejrqui”. ²⁷ Jakzilta žoñit Yooz tawkcama zuma kamčhaj niiqui, t'akjir wajchallanacami žewallanacami yanapaquiča. Nižaza ujchiz žoñi irata anaž kamasacha. Jalla nii žoñiča Yooz tawkcama zumaž kamñiqui. Jalla nii žoñiča Yooz Ejpž yujcquiziqui ana ujchizqui.

2

JILANACŽQUIZ ANAČHA PJALI PJALI CJISQUI

¹ Wejt jilanaca, cullaquinaca, Jesucristo jiliriča ancha honorchiz Yoozqui. Ančucqui nii Jesucristo Jiliržquiz kuzziz kamcan, tjapa jilanacžtan kuz chicata chjits pecsa. Anača pjali pjali cjisqui. ² Jalla tuž nonžna. Ančucaž ajcizž cjen pucultan žoñinacaqui tjonačhani. Tsjiiqui ricachuča, kor surtjjanacchiz, nižaza ana zuma zquitchiz. Tsjizti porillača, tsjel zquitchiz. ³ Nekztanaqui ančucqui ricachukaz zuma atintačhani, “Tucquin julzna” cjican. Nii porill žoñžquizti, “Nekzillakaz tsjitsna” cjičan, už “Zana latullakaz julzna” cječhaj. ⁴ Nuž cjequičž niiqui, niwjtanaqui pjaliž cjičjiiča. Tjapa jilanacžtan ana chicata kuz chjitča. Ana zuma kuzziz cjen, nižta cjičjiiča ančucqui.

⁵ Nonžna, wejt k'ayi jilanaca, cullaquinaca. Tii muntuquiz Yoozqui pori žoñinaca illižča, niižquin ancha kuzziz cjeajo. Nižaza Yoozqui tsjii taku tjaachiča, tuž cjican: “Wejtquin kuzziz žoñinacaqui wejttn chicaž kamaquiča. Nižaza jilirižtakaz wejttn chicaž mantaquiča”. Jalla nii taku tjaachiča, niižtan zuma munaziñi žoñinacžquiz. Jaziqiu nii Yoozquin kuzziz pori žoñinacaqui nii tjaata taku tanznaquiča. ⁶ Ančuczti pori žoñinaca ana rispitcha. Ricachukaz rispitcha. Pero ricachu žoñinacaqui ančuc juc'anti langkatča. Nižaza jilirinacž yujcquiz ančuc chjitča, multanaca pacajo. ⁷ Nižaza ricachunacaqui Jesucristuž quintra ana zuma chiichiča. Pero zuma Jesucristuž cjen učhumqui cristiano cjita tjuuchizčhumča.

⁸ Jilanaca, cjiirta zuma Yooz takuqu tuž cjiča: “Jaknužt persunpachquiz okzñamžlaja, jalla nižta okzñi kuzziz cjistanča žoñinacžquizimi, ljiitum mazižtakaz”. Niicama kamcanaqui zuma kamsa. ⁹ Pero pjali cjičjiičiñinacazti uj paacha. Yooz tawq quintra paacha. Jalla nii kjanapacha zizkatča Yooz takuqu. ¹⁰ Jakzilta žoñit tsjiillapan Yooz mantia ana cazzaj niiqui, ujchizpanča. Parti mantitanaca cazziž cjenami Yooz lii quintra paachiča. Jaziqiu castictaž waquiziča. ¹¹ Yoozqui tuž mantiča: “Anača adulterio paazqui”. Nižaza nii Yoozpača mantiča: “Anača žoñi conzqui”. Adulterio ana paachi cjenami, jakzilta žoñit žoñi cončhaj niiqui, uj paacha. Yooz lii quintraž paacha. ¹² Yooz takuqu Cristuž puntu zakaz chiča. Cristuča učhum liwriiñiqui. Liwriita žoñinacaqui čhjulu paacanami chiicanami zuma munaziz waquiziča. Jakzilta žoñit ana nuž kamčhaj niiqui, casticta cjequiča. ¹³ Nižaza jakziltat ana okzñi kuzziz kamchižlaj niiqui, casticta cjequiča. Yoozqui niižquiz ana zakaz okznaquiča. Pero jakziltat okzñi kuzziz kamchižlaj niiqui, jujuquiz liwriita cjequiča, ana casticta cjequiča.

YOOZQUIN KUZZIZ KAMZ PUNTU

¹⁴ Wejt jilanaca, cullaquinaca, jakzilta žoñit ana zuma kamčhaja, niiqui inakaz chiičha, “Yoozquin kuzziztčha wejrqui” cjican. Nuž ata alaja chiyan, ana liwriita cjesačha. ¹⁵ Nonžna. Tsjii jila cjicu už tsjaa cullaqui cjicu ana zquitichizlaja, nižaza ana čherchizlaja, jalla nižžquiz yanapz waquizičha. ¹⁶ Nii t'akjir žoñi cherčzu tsjiiqui ančhucacuztan cječhani, “Walika okalla amqui, am curpu anam čh'uñuri naykataquičha; nižaza anam čheri eckataquičha” cjican. Pero ana čhjulumi nii t'akjir žoñžquiz yanapčhaj niiqui, ina chiita tawkžtankaz okža. Nii pori žoñiqui pachpa t'akjirikaz žejlčha. ¹⁷ Pori žoñžquiz ana yanapčhaj niiqui, inapanikazza Yoozquin criitaqui. Nii ana yanapñi žoñiqui ana Yooz kamañchizqui. Inakaz pinsičha, “Yoozquin kuzziz žoñtčha wejrqui” cjicanaqui.

¹⁸ Yekjap žoñinacaqui cječhani, “Tsjiičha Yoozquin kuzzizqui. Tsjiizti zuma kamañanacchizqui”. Pero wejrqui cjiwčha, ana zuma kamčhaj niiqui, ¿jaknužt Yoozquin kuzzizqui tjeeznasajo? Anapanž tjeezñi atasáčha. Zuma kamcan, Yoozquin kuzzizqui tjeeznasáčha. ¹⁹ Zinta Yoozpankaz žejlčha. Ančhucqui nii zinta Yoozquin criičha. Nii walikazza. Pero zajranacami “Zinta Yoozpankaz žejlčha” jalla nuž zakaz zizza. Jalla nuž zizcu, Yooz casticz tjuñi eksñičha. Pero Yoozquin eksñi cjenami ana Yooz mantitacama kamz pecčha nii zajranacaqui. ²⁰ Ana zuma kamcan, jakziltat “Yoozquin kuzziztčha” cjican chiičhaja, jalla niiqui inakaz nižta chiičha. Zumzučha niiqui. Yoozquin kuzziz puntu zizñi cjisjapa, tuž nonžna. ²¹ Abraham, učhum tuquita atchi ejpqui, Yooz mantitacama ojkchičha. Tsjii nooj Yoozqui Abrahamžquiz mantichičha tuž cjican: “Abraham, am zinta majch, Isaac cjiita, wilanažtakaz jawkwaquičha”. Yoozqui nuž mantichiž cjenauqui, Abrahamqui niž kuzquiz nii mantita payitačha. Pero niž majch Yoozquin wilana ljoktawk cjen, Yoozqui Abrahamžquiz atajchičha, nii zinta majch ana conajo. Jalla nuž Yooz mantitacama kamtiquiztan, Abrahamqui Yooz yujcquiziqui ana ujchiz nižaza zuma cjišičha. ²² Abrahamqui Yoozquin kuzziz cjen, Yooz mantitacama zuma kamchičha. Nižaza zuma kamchiž cjen Abrahamqui tjeezičha, Yoozquin kuzzizpančha, nii. Nekztan Yooz mantita caziž cjen, juc'anti Yoozquin kuzziz cjišičha. ²³ Cjijrta Yooz takuqui tuž cjičha: “Yoozquin kuzzizpančha Abrahamqui. Nekztan Yooz yujcquiziqui Abraham ana ujchiz nižaza zuma cjišičha”. Abrahamž kamtiquiztan učhumqui zizza, nii Yooz takučha zuma razunaqui. Nižaza Abrahamqui “Yooz amigo” cjiita tjuuchiztačha.

²⁴ Jaziqui ančhucqui zizza, zuma kamcan, Yooz yujcquiziqui ana ujchiz cjesačha, nii. Ana zuma kamcan, ata alajakaz chiičha, “Yoozquin kuzziztčha” cjicanaqui. Juñta kuzllakaz criyanaqui Yooz yujcquiziqui tira ujchizpanikaz žejlčha. ²⁵ Nii puntuquiztan tsjiillazakaz cjiwčha. Naa Rahab cjiiti putirii maatakž puntuquiztan cjuñžna. Naaža wajtquiziqui pucultan Israel žoñinacaqui cuchanžquitatačha awayt'izjapa. Naa žonqui nii pucultan Yooz partir žoñinaca zuma atintichičha. Nekztan ana conta cjejajo nii žoñinaca yekja jiczquin cuchanchičha. Atipasñi yanapchičha. Jalla nižtiquiztan Yooz yujcquiziqui ana ujchiz cjišičha, nižaza zuma kuzziz, naaž zuma kamchiž cjen. ²⁶ Tsjiillazakaz cjiwčha. Tsjii žoñiqui ticžcu, animu ojkčha, janchi inakazza. Nižtapachaž tsjii ana zuma kamñi žoñiqui ticzižtakaz žejlčha. Ana žejtz wirchizza. Inakaz chiičha, “Yoozquin kuzziztčha” cjicanaqui.

3

ATŽTAN CHIIZ PUNTU

¹ Wejt jilanaca, wacchi žoñinaca anaž tjaajiñi cjis waquizičha. Tjaajiñi žoñinacaqui Yoozquiz cuenta tjaastančha. Nekztan ana zuma tjaajinchižlaja, niiqui yekja žoñžquiztan juc'anti castictaž cjequičha. Nii zizzinčhucčha ančhucqui. ² Tjapa žoñinacaqui ujnaca paáčha. Jakzilta žoñit persun chiiitiquiztan ana ujchizlaja, jalla nii žoñičha ancha zuma-panqui. Persun chiiž zumpacha ewjasaquiz niiqui, jalla nekztan tjapa niž curpuzakaz ewjasñi atasáčha, ana uj paazjapa. ³ Nonžna. Tsjii frenžtan cawalluqui irpita cjesačha, yawchi žoñž pecta jaruqui. ⁴ Nižtakaz žoñinacaqui tsjii kolta tuñžtan pajk warcumi chjitsa, pjursanti tjamiž cjenami. Tsjii warcu joojooñi žoñimi jakzi pecanami tuñžtan nii

warcu chjichasača. Kjažta kolta tuñižtanami pajk warcumi joojowasača. ⁵ Nižtazakaz tsjii kolta ujmi wacchi muntinaca tjarpnasača. Nižtazakaz učhum chiiñi atami kjažta koltalla cjenami, niž čhiitiquiztan ancha mantiz atasacha. ⁶ Tsjii uj peekztažtakazza tii ataquí. Tii ataquí čjul anawalinacami chiyasača. Tii ataž cjen persunpacha ana zuma kamča. Nižaza tii ataž cjen yekja žoñinacžquiz ana zuma kamkatča. Tii atazakaz ajriž jaruqui chiiča. ⁷ Tjapa animalanacami nižaza tjapa wežlanacami žoñž mantuquizpanikaz cjesača. ⁸ Antiz anaž jec žoñimi persun chiiñi ata manti atasacha. Tii ana wal ataquí anaž jaknuž mantichuca. Tii ataquí ana wali chiiž pecñipanča. Tsjii wininožtakazza tii učhum ataquí. ⁹ Učhumqui tii atžtan chiican Yooz Ejpž tjuu aynakiñčhupanča. Yooz Ejpqui žoñi paachiča niž irata kuzziz. Nižaza tii atžtanpacha chiican Yooziž paata žoñinaca laykiñizakazza. ¹⁰ Tii atača zuma ana zuma chiiñiquí. Jilanaca, cullaquinaca, jalla nižta čhiičhiizqui anawalipanča. ¹¹ Tsjii zuma wijiñiquiztan zuma kjaztan nižaza chjonanchi kjaztan anaž lewasača. Anapanž tsjii wijiñiquiz pizc punta kjaz želasača. ¹² Nižtazakaz tsjii tujquin mazk'a kjaztan nižaza ch'uyi kjaztan, jalla nii pizc punta kjaz ana želasača. Nižtazakaz tsjii muntiquiz tsjii punta frutapankaz pookñiča. Pizc punta fruta anaž pookasača. Nižaza tsjii ch'uyi tuquiztan mazk'a kjaz ana cooznasača.

¿JECT YOOZ TAWK JARU KAMŃI ŽOŃI?

¹³ Jaziqui jakziltat Yooz taku zuma zizzaj niiqui, zumaž kamspanča. Nii zizñi žoñiqui humilde kuzziz zuma kamaña tjeez waquiziča. ¹⁴ Jakzilta žoñit anawal iñiziñi kuz tjeezaja, nižaza persunpacha tučquin cjis pecñi kuz tjeezaja, jalla niiqui mit kuzzizpanča. Nižaza nii ana zum žoñiqui “Yooz taku zizintča” cjicanami, Yooz tawk jaru ana kamča. ¹⁵ Nii žoñž kamañaquí anača Yoozquiztanaquí. Antiz žoñžquiztanpankazza. Žoñž kuzquiz pinsitanac jaručha nii kamañaquí. Zajražquiztan tjonča. ¹⁶ Jakzilta žoñit anawal iñiziñi kuzzizlaja, nižaza tučquin cjis pecñi kuzzizlaja, jalla nii žoñiž cjen ch'aasnacami nižaza tjapanan ana wali kamznacami žejlča. Nižaza jakzilta žoñit Yooz Epiž kamañchizlaja, jalla niiqui zumapankaz kamča. ¹⁷ Nižaza niiqui pasinziz kuzziz cjen, žoñinacžtan zuma kamča. Nižaza parti žoñž razunanaca nonža. Nižaza nii zuma kamañchiz žoñiča okžni kuzzizqui. Jalla nii žoñiqui zuma kamañanac jarupanž kamča. Nii žoñiqui ana pjali cjiicjiñi kuzzizza. Antiz zuma kuzzizza. ¹⁸ Jakzilta žoñit pasinziz kuzziz žoñinacžtan kamčhaja, jalla niiqui zuma kamča, nižaza parti žoñinacžquiz zuma kami yanapča.

4

MAYIZIZ PUNTU

¹ ¿Jequiž cjen chjaawjkatas žejljo? ¿Jequiž cjen ch'aas žejljo? Ančhuc ana zuma kuzziz cjen žejlča niiqui. Ančhuca ana zuma pecñi kuzqui mantiz pecča. ² Ančhucaž pectanaca ana žejlča. Nekztan ančhucqui kichassa, žoñi conañcama. Nižaza yekja žoñž cusasa zmassa. Nii zmassa cusasa ana cunsiqui atžcu, nekztan chjaawjkatassa, nižaza kichassa. Ančhucaž pectanaca cuncisčjapaquí, Yoozquiztan ana mayiziñčhucča. Jalla nižtiquiztan ančhucaž pectanaca ana žejlča ančhucalta. ³ Nižaza ana zuma mayizan, ančhucaž mayizitaquí ana nonžtača. ¿Kjaztiquiztan ana nonžtajo? Ančhucqui ana zuma kuzquiztan mayizichinčhucča. Persun kuzcamakaz kamzjapa mayizichinčhucča. Nekztanaquí anapan nonžtatača. ⁴ Yoozquiztan quejpsñi kuzziz jilanaca. Ana nižta cjee. Ujchiz žoñž kamañquiz kuzzizlaj niiqui, Yooz quintrača ančhucqui. ¿Nii ana ziz ančhucjo? Jakzilta žoñit ujchiz žoñž kamañquiz kuzzizlaj niiqui, Yooz quintraž cjisičha nii žoñiqui. ⁵ Anaž inapampa tuquita Yooz cjiirta takuquí tuž cjiča, “Yooz Ejpqui učhum kuzquiz niž Espiritu Santo cuhanžquichiča. Nii Yooz Espiritu Santuquí ancha pecča, učhumqui Yoozquin alaja kuzziz cjisjapa, jalla nii”. ⁶ Ančhucaž Yoozquin juc'anti kuzziz cjisjapa, Yoozqui juc'anti yanapasacha. Nižaza Yooz takuquí cjiča, “Yoozqui humilde kuzziz žoñžquiz yanapñipanča. Pero mita kuzziz žoñž quintrapancha Yoozqui”. ⁷ Jaziqui Yoozquin kuzziz cjee. Niiž mantuquiz cjee. Zajraž ančhuc ujquiz tjojtskatz pecanami, Yoozquin tjurt'ichi kuzziz cjee. Nekztanaquí ančhucaquiztanaquí zarakaquičha nii zajraquí. ⁸ Yoozquin macjata. Nižaza Yoozqui ančhucaquiz macjatžcaquičha. Uj

paaninaca, anchucqui uj paaz eca. Pizc kuzziznaca, Yoozquin tjapa kuzziz cjee. ⁹Nižaza uj paažcuqui, llaquita cjee. Kaacan ančhucaž paata uj paja. Uj paažcuqui, anača chipsqui. Juc'ant llaquizziza. Anača cuntintu cjisqui. ¹⁰Yooz Jilirž yujcquiziqui humilde kuzziz cjee. Nekztan Yoozqui ančhucaquiz honorchiz cjiskataquiča.

ANAČHA JILANACŽ QUINTRA CHIICHIIZQUI

¹¹Jilanaca, cullaquinaca, tsjiižquinami tsjaaquinami anača quintra chiizqui. Nižaza anača quintra chuchqui. Jakziltat jilanacž quintra chiyačhaja, už cullaquinacž quintra chiyačhaja, jalla niiqui Yooz mantita jaru ana kamča. Yooz mantitaqui tuž cjiča, “Porapat zuma munazizza”. Nii mantitacama ana kamaquiž niiqui, nii mantitaqui ana waližtakaz nayaquiča. Nižaza nii Yooz mantita anal pecučha cjiča. ¹²Tsjii pankazza ultim mantiņi taku tjaachiqui. Yoozza niiqui. Jalla niizakazza ultim juezqui. Jaziqui nii Yoozqui žoņinaca arajpachquin chjichasača. Nižaza infiernuquin chjatkatasacha. Jaziqui anchuczti anaž jecmi arajpachquinami infiernuquinami ojkkatasacha. Jaziqui ančhuca jilanaca anača pjalz peczqui.

TII MUNTUQUIZ ŽOŃŽ ŽETI PUNTU

¹³Tsjiilla cjesača. Nonžna. Yekjap žoņinacaqui anchucaquiztan ancha chawjcwama amtiņiča, tuž cjan: “Tonji jakat watja okača. Nii watja irantižcu, cusasa campiyan, paaz cancan zumal kamača tsjii wata intiru”. Nuž cjiņiča. ¹⁴Niža chiižcumu, anapanž zizza nii žoņiqui, jaknužt kamačhaja, čjulut watačhaja, jalla nii. Yoozpankazza tjappacha mantiņi. Ćhjulul iratat ančhuca žejtz? Kuyižtakazza žejtzqui. Tsjii kuyiqui jecžcu tsjii upacamapankaz tjenča. Nekztanž katča. Nižtapachazakazza žoņiqui. Tsjii upacamapankaz tii yokquiz žejtča. ¹⁵Jaziqui tuž chiiž waquiziž, “Yooz munanaqui, žetača. Nekztan Yooz munanaqui langznača, nižaza čjulumi paača, nižaza ojklayača”. Jalla nuž chiiž waquiziča. ¹⁶Antiz yekjapaqui ančhucaquiztan chawjcwama amtiņi kuzziz chiiča, ana tjapa čjulumi zizcu. Jalla niža mit kuzquiztan chiizqui ana walipanča. ¹⁷Jakziltat Yooz kuz zizzaj niiqui, Yooz kuzcama kamz waquiziča. Ana nii Yooz kuzcama kamčhaj niiqui, uj paača.

5

RICACHU ŽONINACŽ PUNTU

¹Ricahunaca, nonžna. Ančhucaquiz ana walinacaž tjonaquiča. Nii zizcu, kjawcan kaacan žejlz waquiziča. ²Ančhuca cusasanacaž mokaquiča. Ančhuca zuma zquitinaca kjuriž lujltaž cjequiča. ³Ančhuca juntjapta korinacami paaznacami inapankaz cjequiča. Ančhucqui ančhuca wacchi paaznaca ana gastichinčhucča, zuma kamtanaca paazjapa. Jaziqui ančhuca ana okžni kuzziz cjen casticta cjequiča. Niža cjenami ančhucqui tira juc'anti paaznaca juntjapča. ⁴Ančhuc ricachu patrunanacaqui ančhuca piyunanaca juc'anti langskatchinčhucča. Ančhuca pastunaca zkalanaca ajzkatchinčhucča, “Cusa pacaz” cjan. Ultimquiziqui koloculla pacchinčhucča. Nii incallta piyunanacaqui ančhuca quintra quijchiča. Yoozpachača nii piyunanacž quijta nonziqui. Jalla Yoozza walja azzizqui. ⁵Ančhuc ricachu patrunanacaqui, tii muntuquiz ancha cusasanacchiz kamiņchucča. Čjulul pectanacami žejlča ančhucaltaqui. Jaziqui tsjii cjew animalažtakaz cjsinčhucča. Žoņiqui cjew animala illza conzjapa. Nižtapacha Yoozqui ančhuc illziča casticta cjisjapaqui. ⁶Ančhucqui ricachu patrunanaca, ana ujchiz žoņinaca kuzinpan casticchinčhucča, conačcama. Nii žoņinacazti anatača ančhuca quintraqui.

PASINZIZ KUZIZ PUNTU

⁷Jilanaca, cullaquinaca, učhum pajk arajpach Jiliriz tjonzcama pasinziz kuzziz cjee. Zkal puntuquiztan cjuņžna. Tsjii zkala čjacchi žoņiqui chijņi tjonz tjewža, primer chijņi, taypi chijņi. Pasinziztan tjewža, ima zkala ajz timpu irantižcan. ⁸Nižtakaz ančhucqui pasinziz kuzziz cjee. Arajpach Jiliriz tjonz tjuņiqui wajillača. Nekztan ana walinacquiztan liwriita cjequiča. Nii cjuņžcan, Yoozquin tira tjurt'ila. ⁹Jilanaca, cullaquinaca, porapat anaž chuchasaquiča. Jakzilta žoņit chuchačhaj niiqui, Yooziž

azquichtaž cjequiča. Nii azquichñi Yoozqui wajillaž tjonaquiča. ¹⁰Jilanaca, tuqita Yooztajapa chiiñi žoñinacaž puntu cjuñzna. Kjažta sufriz cjenami, Yoozquin tjurt'ichiča pasinziz kuztan. Nižtapacha cjee. ¹¹Učhumqui tuž cjiñčhumča, sufriz cjenami, “Yoozquin tjurt'ichi žoñinaca cuntintuž cjequiča”. Tuquiqui Job cjita jila želatča. Niiž quintu zizza učhumqui. Jobqui pasinziz kuztan sufrichiča. Nižaza Yoozquin tirapan tjurt'ichiča. Jalla nii sufriz wattan, Yoozqui niiž zuma pinsita cumplichiča nii Job cjita žoñžtajapa. Nižtapankazza Yoozqui žoñinacžquiziqui, ancha okzñi kuzzizpanča.

¹²Jilanaca, cullaquinaca, tiiča chekanaqui. Anača inapampa Yooz tjuuqui chiichiizqui. Anapanča “Juro por Dios” cjan, chiichiizqui. “Iyaw” cjižcuqui, cumplispanča. “Anača” cjižcuqui, anača cjispanča. Werar chiizpanča, ana Yooziž casticta cjisjapa.

¹³Jakžiltat sufrachaja, jalla niiqui Yoozquin mayiziz waquiziča. Nižaza cuntintu kamñi žoñimi Yooz wirsu itz waquizizča. ¹⁴Nižaza tsjii laa žoñi želan icliz jilirinaca kjawz waquiziča. Nii jilirinacaqui asiitižtan kullcan, Jesucristo Jiliržquiz mayizaquiča, laa žoñi žetajo. ¹⁵Yoozquin tjapa kuztan mayizaquiž niiqui, nii laa žoñi čhjetnaquiča. Jesucristo Jiliriqui nii laa žoñi žaazkataquiča. Nižaza nii laa žoñiqui ujchiz želaquiž niiqui, pertuntaž cjequiča. ¹⁶Jakžiltat žoñž quintra uj paačhaja, jalla niiqui nii uj maztanča, “Am quintra tii uj paachinpantča” cjan. Nekztan Yoozquin porapat mayizaquiča. Nekztan ančhucqui čhjetintaž cjequiča. Yoozqui tsjii zuma žoñiž tjapa kuztan mayizitaqui nonža. Jalla nekztan Yoozqui tjaaquiča nii mayizitacama. ¹⁷Cjuñzna, Elías cjita jilž puntu. Učhum iratača nii jilaqui, žoñikazza. Pero Yoozquin tjapa kuztan mayizichiča, ana chijnajo. Nekztan čhjep wata chicatchiž ana chijinchiča. ¹⁸Wiruñauqui Elías cjita jilaqui wilta mayizichiča, chijñi apayžcajo. Nekztan Yoozqui chijñi apayžquichiča. Chijnan, zkalanacaqui wilta pookchiča.

¹⁹Jilanaca, cullaquinaca, tsjii žoñiqui Yooz jiczquiztan zarakačhani. Nekztan Yooz jiczquiztan zarakchi žoñžquiz tuž paljayz waquiziča, “Ana zarakalla. Yooz jiczquiz cut'iscalla” cjan. ²⁰Nekztan nii zarakchi žoñiqui niiž uj paaznaca ecaquiž niiqui, nižaza Yooz jiczquiz wilta quejpžcaquiž niiqui, jalla niiž wacchi ujnacquiztan pertuntaž cjequiča. Infiermuquin ana okaquiča nii žoñiqui. Jalla nii zizza ančhucqui.

PRIMERA CARTA DEL APOSTOL SAN PEDRO

¹ Wejrtča Pedrutqui, Jesucristuž uchta apostoltqui. Jalla nižtiquiztan ančhucaquin tii cartal cjiyržcuča. Ančhucqui persun wajtquiztan wichanzinčhucča wacchi yekja provincianac kjutni, Ponto, Galacia, Capadocia, Asia, Bitinia, jalla nii provincianacquin ojkchinčhucča. Jakziquint ojektčhaja, jalla nicju kamča; ana persun wajtquiz kamča ančhucqui. ² Yooz Ejpqui ančhuc illziča, niiz partiquiz cjisjapa. Niiz tuqita pinsita jaru ančhuc illziča. Nižaza Espiritu Santuqui ančhucaquiz zuma kamañchiz cjskatchiča, ančhuc Jesucristuž kuzcama kamajo. Jesucristuž ticziž cjen ančhuca ujnacaqui pertuntača. Jaziqui ančhucča Yooz wajtchiz žoñinacaqui. Yoozqui ančhucaquiz zumaj yanapt'ila, nizaza ančhucaquiz walikaj kamkatla.

EW KAMAÑCHIZ PUNTU

³ Učhum Jesucristo Jilirž Yooz Ejpqui honorchizkaj cjila. Yooz Ejpqui zuma okzni kuzziz cjen učumnacaquiz ew kamaña tjaachiča. Jesucristuž ticžcu jacatattiquiztan Yoozqui učumnacaquiz ew kamaña tjaachiča. Ew kamañchiz cjan učumqui tjewža arajpachquin Yooztan chica kamzjapa. ⁴ Nižaza ew kamañchiz cjan učumqui Yooz tjaata irinsa tanzaquičha arajpachquin. Učhum irinsača arajpachquin Yooztan kamzqui. Anaž čjul anawalinacami nekz želasača. Nii Yooz irinsaqui učumnacaltajapa chjojtča. Jalla nižtiquiztan nii irinsaqui anaž jecmi akasača. Tsji ew zquitiqui manchita cjesača. Nižaza tsji c'achja pjajkjallaqui choočha. Ančhuca arajpachquin chjojt irinsaqui ana nižta cjesača. ⁵ Arajpachquin ančhucaltajapa tsji ancha zuma kamzqui tjacžtača. Jesucristuž tjonz tjuñquiziqui nii zuma kamzqui tjeežta nižaza tjaata cjequičha. Pero anziqiu tii muntuquiz želan, nižaza ančhuc Yoozquin kuzziz cjen, Yoozqui niiz aztan ančhuc cuitaquiča.

⁶ Jalla niziqtiztan ančhucqui zuma cuntintu kuzzizčhucča. Pero tii anzta timpuquiz ančhucaltaqui anawalinacaž tjonchiž cjen llaquisaquičha. Tii muntuquiz želan ančhucqui pruebanaca watača. Nuž cjenami Yooz Ejpča ančhuc cuitiñiqui, nižaza liwriñiqui. Jaziqui cuntintuž cjee. ⁷ Ančhuca kuzqui pruebanacžtan yanžtača, ultimu Yoozquin kuzziz, ultimu ana Yoozquin kuzziz, jalla nii tjeežta cjisjapa. Jakziltat pruebanacžquiztan sufranami tirapan Yoozquin tjurt'ichizlaja, jalla nižta kuzziz žoñiqui ancha valorchizza, c'achja kor paazquiztan cjen juc'anti. Čjul c'achjanacami anaž tjurča, akzñipanikazza. Korimi ujquiz t'azinta cjenaqui, jiñipanikazza. Nekztan pjalzniča ana walinaca. Pero zuma pjalzta korimi ana tjurñipanikazza. Yoozquin kuzzizpan žoñinacaqui anača nižtažtakaz. Antiz tjurñipanikazza. Ančhucča Yoozquin lijitum kuzzizqui. Jalla nižtiquiztan Yooz Ejpqui ančhuc zuma risiwaquičha, nižaza honoraž tjaaquičha, Jesucristo wilta tjonz tjuñquiziqui.

⁸ Ančhucqui Jesucristužtan munaziča, kjažta ana cheržcumi. Nižaza ana cheržcumi nižquin kuzzizza. Jalla nižtiquiztan ančhucqui ancha cuntintuž chipža. Žoñ takunacžtan učum cuntintu kuz puntuquiztan ana zuma intintaskati atasacha. Nižta cuntintu kuzqui Yoozpacraž chipskatcha. ⁹ Ančhucqui Yoozquin kuzzizpanča. Jalla nižtiquiztan ancha zuma kamañchizza. Wiñaya Yooztan walikaz kamča.

¹⁰ Yoozqui niiz okzni kuzziz cjen ančhucaquiz yanapča nižtan zuma kamajo. Učumnacaltajapača nii Yooziž yanaptaqui. Jalla nii Yooziž yanaptaqui mazinčiča tuqita profetanacaqui. Nii Yooztajapa chiiñi profetanacaqui Yooztan kamz puntu walja istutičičha nii puntu iya iya zizjapa. Walja kuzquiz pinsičičha tsjan zuma intintajo. ¹¹ Cristuž Espiritu Santuqui profetanacž kuzquiz zizkatchičha, jalla tuž: Yooziž cuchanžquita Cristuqui sufraquičha; nižaza sufrizcu walja honorchiz cjequičha. Jalla nii puntunaca profetanacaqui zizkattatača. Pero tsjan kjana ziz pecatča, ¿čjulorat Cristo tjonajejo, nižaza jaknužt niž tjonz wataquejo? Jalla nii zizjapa ancha pinsatča. ¹² Espiritu

Santuqui tuqita profetanac̄quiz Yooz pinsitanaca zizkatchīcha, ūchumnacaquiz maznajo. Anatācha ninac̄ztajapakaz nii zizkattaqui, antiz ūchumnacaltajapakaz. Jaziqui anzta timpuquizkaz nii tuqita mazintaqui kjanapacha kjanzt'īcha. Liwrīni Yooz taku paljaȳni žōninacācha nii puntunaca kjanzt'īninacaqui. Esp̄ritu Santuqui arajpachquiztan cuchanz̄quitac̄ha, kjanzt'īni žōninaca yanapzjapa. Jalla nii kjanzt'ita puntuquiztanac̄qui arajpachquin žejl̄ni anjilnacami juc'ant intintaz̄ni pec̄cha.

¹³Jalla nii puntunac̄quiztan chiižcu, jalla tuž an̄chucaquin chiižinz pecūcha. Zumpacha tantiya, zuma razunžtan. Ewjt'īni kuzziz cjee. Tjapa kuztan tjewža, Yooz irata zuma kamañchiz cjisjapa. Jalla nižta zuma kamaña an̄chucaquiz tjaaquičha Yoozqui, Jesucristuž tjonz tjuñquiz. ¹⁴An̄chuc̄cha Yooz zuma caz̄ni maatinacaqui. Jaziqui zuma kamañchiz cjee. Ima Yooz maati cjican, tuqita ana wali paaz pec̄ni kuz jaru kamchin̄chuc̄cha. Yooz kamaña ana pajchin̄chuc̄cha. ¹⁵Jaziqui, Yooz maati cjican, nižta ana wali pec̄ni kuz mantuquiz ana cjskata. Anziqui čhjulu paacanami zuma kamañchizkaz cjee, jaknužt an̄chuc̄ kjawz̄ni Yoozqui zuma kamañchizpanžlaja, jalla nižta. ¹⁶Yooz tawk liwruquiz Yooz Ejpqui tuž cjīcha: “Wejrqui zuma kamañchizpankazt̄cha. Jalla nižtiquiztan an̄chuc̄zakaz zuma kamañchiz cjee”.

¹⁷An̄chuc̄qui, Yooz maatinaca cjican, mayizīcha, “Wejt Ejp̄cha” cjican. An̄chuc̄qui, niižquinkaz rispitan, tii muntu yokquiz zuma kamzpan waquizīcha, arajpachquin ojkcama. Yooz Ejpqui ana illill̄cu pjalznaquičha. Zapa mayniqui paatiquiztan jama pjalžta cjequičha. ¹⁸Cjuñzna an̄chuc̄qui. Tuquiqui an̄chuc̄qui tuqita ejpnac̄až tjaajinta kamañchiztācha. Inapankaz kamchin̄chuc̄cha. Jalla nii ana wal̄ni kamañquiztan liwriitācha. Nii liwriiñiž puntuquiztanac̄qui tantiya. Anaž čhjul koržtanami, nižaza anaž paaztanami, nižaza anaž čhjul tucuzīni cusasanac̄žtanami pac̄zcu, liwriitacha an̄chuc̄qui. ¹⁹Antiz Jesucristuž ancha walurchiz ljoc̄žtan liwriitācha. Jesucristuqui conta cjissīcha, walipunt uza wilanažtakaz, zuma llumpaka. Jalla nižta zuma ljoc̄žtan an̄chuc̄qui liwriitācha. ²⁰Ima tii muntu paacan Yoozqui Jesucristo utchīcha, tii muntuquiz žejl̄ni žōninaca liwriizjapa. Anzta timpuquizkaz Jesucristuqui tjonchīcha; an̄chucaltajapa žōni tucchīcha. ²¹Jesucristuž cjen an̄chuc̄qui Yoozquin kuzziz žejl̄cha. Yoozqui Jesucristo ticziquiztan jacatatskatchīcha; nekžtan zuma honorchiz cjskatchīcha, an̄chuc̄ niižquin kuzziz cjisjapa, nižaza arajpachquin kamz tjewz̄ni kuzziz cjisjapa.

²²Jaziqui an̄chuc̄qui lijitum Yooz tawkquiz cassin̄chuc̄cha Esp̄ritu Santuž yanapchiž cjen. Jalla nuž Yooz tawkama kamtiquiztan an̄chuca kuznac̄aqui ana uñchiz cjissīcha Yooz yujc̄quiz. Nižaza parti criich̄ninac̄žtan zuma munazīni kuzziz cjissīcha. Jalla nižtiquiztan tirapan porapat ancha tjapa kuztan zuma munaza. ²³An̄chuc̄qui užca nassi wawažtakaz ew kamañchizza. An̄chuca ew kamañaqui anācha ticzi ejpnac̄žquiztan. Antiz žejt̄ni Yooz Ejpžquiztan̄cha, niiž taku catoktiquiztan. Yooz takūcha ew kamañchiz cjskat̄ni; nižaza Yooz takuqui wiñayjapa tjuraquičha. ²⁴Jalla nii puntuquiztan Yooz takuqui tuž cjīcha:

“Tjapa žōninacaqui pastunac̄ažtakazza. Tjapa žōninac̄až pajk obranacaqui pastunac̄ž pjajkjalat̄takazza. Tsjii timpukaz tjurasac̄ha. Jaknužt pastunacaqui tsjii timpukaz žejl̄chaja, jalla nižta tsjii kjaž watanac̄kaz žōninacaqui kam̄cha; nekžtan ticza. Nižaza pastunac̄ž pjajkjalanaqui ratulla choōcha, jalla nižta irataž žōniž paata pajk obranacaqui anaž tjurasac̄ha. ²⁵Pero Yooz Jilirž takuzti wiñayjapa tjuraquičha”.

Jalla nii Yooz takūcha liwriīni takuqui. Jalla nii liwriīni taku an̄chucaquiz paljaytatācha.

2

¹Jalla nii taku catokžcu zuma kamañchizpan cjee. Tjapaman ana wali paaznaca eca. Nižaza pisc kuzziz cjcj̄snaca eca. Nizaza ana incallz pec̄ni kuzziz cjee. Nižaza ana zmaz̄ni kuzziz cjee. Nižaza anawali chiihīznaca eca. ²An̄chuc̄qui Yooz taku ancha pecz waquizīcha, jaknužt tsjii užca nassi wawaqui piz itz pec̄chaja, jalla nižta Yooz taku pec̄ni kuzziz cjis waquizīcha. Nekžtanac̄qui Yooz taku juc'anti ziz̄ni ziz̄ni kuzziz cjen, juc'ant zuma

kamañchiz cjisnaquiċha. ³Jesucristo Jiliriqui zumapanċha. Jalla nii naazinċhucċha. Jaziqui Yooz taku juc'ant juc'ant zizni cjee.

JESUCRISTUĊHA CHEKAN MAZTAKAZ

⁴Jesucristo Jilirċquiz macjata. Niiċha ew kamaña tjaañiqui. Jesucristuċha žejtñimi, nižaza žejtkatñimi. Jalla niiċha, žejtñi maz cjitaqui. Žoñinaca nii maz ana pecċhiċha. Yoozti nii maz illziċha; nižtajapa ancha walurchizza. ⁵Nii žejtñi maz cjita Jesucristuž cjen, anċhuczakaz Yooz žeti tanzinċhucċha. Jaziqui anċhuczakazza žejtñi maznacažtakaz. Jakužt maznacžtan kjuya pirkiċhaja, jalla nižta Yoozqui anċhucatan niiž kjuya kjuytažokaz cjiċha. Anċhucċha Yooz kjuyċiz žoñinacaqui. Nižaza anċhucqui t'akžtaċha Yooztajapa sirwiñi. Nižaza anċhucqui persun kuznaca Yoozquin tjaaċha ofrendanacažtakaz. Nižaza Jesucristuž cjen Yoozqui anċhucadž jaata kuznaca asiptasaċha. ⁶Jesucristuċha maz cjitaqui. Jalla nii puntuquiztan cjiirta Yooz takuqui tuž cjiċha:

“Wejrqui tsjii simint maz tjułznuċha Sión cjita arajpach wajtquin. Jalla nii mazqui juc'ant chekanċha tjapa parti maznacquiztan. Nii mazqui Yooziž illžtaċha, nižaza Yooztajapa wali walurchizza. Jequit nii walurchiz maz cjita Jesucristužquin kuz tjaaċhaja, jalla ninacaqui anapanž amulasaquiċha. Anapanž inapankaz cjesaċha”.

⁷Maz cjita Jesucristuqui walja walurchizza, anċhuc criichinacžtaqui. Pero ana criichi žoñinacaqui nii maz ana walurchiztakaz nayċha. Cjiirta Yooz takuqui tuž cjiċha:

“Kjuyñi žoñinacaqui tsjii maz ana pecċhiċha. Jalla nii ana pecta mazpacha zuma chekan maz cjissiċha”.

⁸Nižaza cjiirta Yooz takuqui tuž cjiċha:

“Nii maz cjen žoñinacaqui t'ejžcu, ujquiz tjojtsnaquiċha”.

Ana criichi žoñinacaqui Yooz taku ana juyzu paaċha. Nekžtan sufriskattapanž cjequiċha. Jalla nižtajapa Yoozqui ninaca utċiċha.

⁹Pero anċhucžti anaċha nižta. Antiz anċhucqui Yooziž illžtaċha. Jaziqui anċhucċha Yooz maatinacaqui. Yooz Jilirċquiz sirwizjapa, t'akžtaċha. Anċhucċha Yooz wajtċiz žoñinacaqui. Jalla nuž cjisjapa illžtaċha anċhucqui. Nižaza anċhucqui illžtaċha Yooz ispantichuca obranaca paljayzjapa. Anawal zumċiquiz kaman Yoozqui anċhuc kjawziċha, niž ancha zuma jicžquiz lužkatzjapa, niž kjanquiz kamzjapa. ¹⁰Tuquiqui anċhucqui anataċha Yooz watja. Anziċha Yooz wajtċiz žoñinacaqui. Tuquiqui anċhucqui Yooziž ana okžtataċha. Anziċha Yooziž okžtaqui.

JILIRINACŽQUIZ RISPITA

¹¹Pecta jilanaca, cullaquinaca, tii muntuquiz kamcan anċhucqui istrañiñċhucċha. Yooz wajtċiz žoñinacaċha anċhucqui. Jaziqui chiižinžcuċha, anawali pecñi kuz ana juyzu paa. Nii anawali pecznacaqui anċhucqa persun kuz animu quintraċha. ¹²Ana Yooz pajñi žoñinacžtan kamcan, anċhucqui zumapan kama. Ana Yooz pajñi žoñinacaqui anċhucqa quintra chiyachani. Nižaza uj paañinacažtakaz anċhuc nayaċhani. Jalla nižta quintra cjiicjyanami, anċhucqui zuma kamz waquiziċha, ninaca anċhucadž zuma paatanaca chertzjapa. Jalla nuž cheržcuqui ninacaqui Yoozquin honora tjaaquiċha ultim pjalz tjuñquiziqui.

¹³Jilanaca, cullaquinaca, nonžna. Jesucristo Jilirċquiz sirwican tjapa žoñiž nombriti jilirinacžquiz casa. Chawc mantiñi jilirċquiz casa. ¹⁴Nižaza niž cuhanžquita jilirinacžquiz casa. Nii jilirinacaqui cuhanžquitaċha, anawali paañi žoñinaca casticajo, nižaza zuma paañi žoñinacžquiz honora tjajajo. ¹⁵Yoozqui pecċha, anċhuc zuma kamzjapa. Jalla nižta zuma kamcan, anċhucqui zumzu anawali kamañchiz žoñinacžquiz ch'ujuž cjskataquiċha.

¹⁶Yooz liwriita žoñinaca cjicanaqui zuma kama. Pero liwriita cjicanaqui anaċha pinzizqui ana walinaca paaznacžžtan. Antiz zuma kama Yooz piyunažta. ¹⁷Tjapa žoñinacžquiz rispita. Tjapa criichi žoñinacžtan zuma munaza. Yoozquin rispita. Nižaza chawc mantiñi jilirċquiz honora tjaa.

SUFRICAN YOOZQUIN KUZUZ CJEE

¹⁸Piyunanaca, anċhucqui patrunanacž mantuquiz cjee, ninacžquiz rispitan. Zuma kuzuz, nižaza okžni kuzuz patrunchizlaj niiqui, niž mantuquiz cjee. Nižaza ana zuma

patrunchizlaj niiqui, niiž mantuquiz zakaz cjee. ¹⁹ Tsjii piyunaqui zuma langzñi cjenami wjajttaž cječhani. Pero pasinziz kuztan awantiz waquiziča. Jalla nii piyunaqui nuž sufrican cjuñž waquiziča, niiča ultimu Yooz piyunaqui, jalla nii. Jalla nuž sufrizcu zuma kuz tjeeža; nekztan Yooz yujcquiz ancha cuza cjitaž cjequiča. ²⁰ Tii muntuquiz kamcan ančhucqui anawali paatiquiztan castictaž cječhani. Pasinziz kuztan awantaquiči niiqui, ħčjul honorat tjaata cjesajo? Pero zuma paatiquiztan sufriskattaž cjequiči niiqui, nižaza ančhucqui pasinziz kuztan awantaquiči niiqui, Yooz yujcquiz honorchiz cjequiča. ²¹ Jalla nižta pasinziz kuzziz sufraquiči niiqui, kjana tjeeža, Jesucristuž žoñinacčhucča, nii. Yoozqui ančhuc kjawziča, zuma kuz tjeezjapa. Cristuqui ančhuc laycu sufrichizakazza. Cristuqui sufrican ancha pasinziz kuz tjeeziča. Nižta irata ančhucqui sufrican, nižtazakaz pasinziz kuz tjeez waquiziča. ²² Jesucristuqui ana zinta uj paachiča. Nižaza čjul anawal takumi ana chiichipanča. ²³ Cristuqui žoñinacaž ch'aanani cjenami, anapan chjaychiča. Nižaza Cristuqui sufrichi cjenami, anapan žoñi kitz pecchiča. Jalla nižta sufrican Cristuqui zizziča, Yooz Ejpqui nii anazuma žoñinaca legali casticaquiči, jalla nii. Jesucristuqui zizziča, anawali cjičjiñinacaž paatiquiztan jama casticta cjequiča, nii. Nižaza Yooz Ejpqui zuma kuzziz žoninacčquiz honora tjaaquiči. ²⁴ Jesucristupachača persun curpuquiz učhum ujnacquiztan sufrichiqui, cruzquiz ch'awcta. Jalla nuž učhumnacalta laycu ticziča, učhumnaca anawali ujnaca ecajo, nižaza Yooz tjaata zuma kamañchiz cjeajo. Jesucristuqui chjojrichta cjišiči, ančhuc čhjetinta cjisjapa ančhuc ujnacquiztan. ²⁵ Tuquiqui ančhucqui pasta uuzanacažtakaz ojklayatča. Anziqui ančhucqui Arajpach Awatiržquiz quejpcinčhucča, ančhuc kuz niiž cuitita cjisjapa.

3

LUCUTJIŃI KAMZ PUNTU

¹ Maatakanaca, ančhucqui persun luctakž jaru kama. Tsjii luctakanacaqui Yooz taku ana criiča, nižaza Yooz tawk jaru ana kamča. Pero ančhuc criichin maatakanacaqui zuma kamaña tjeez waquiziča. Ančhuc zuma kamaña tjeetziquiztan, ančhuc ana criichi luctakanacaqui Yooz taku criichiž cječhani, ančhuc ana ancha tawkžtan atipchiž cjen. ² Nižaza ančhuc luctakanacaqui criyačhani ančhuc zuma kamtiquiztan, nižaza ančhuc rispitiñi kamtiquiztan. ³ Zawntcan zquiti ist'asnacquiz anača kuz tjaazqui. Persun c'achja chjiččta ach charquiz, nižaza zquiti ist'asnacquiz, nižaza ancha c'achja zquitinacquiz, jalla nižtanacquiz anača kuz tjaasqui. ⁴ Antiz zuma c'achja kamañanacquiz kuz tjaa. Humilde kuzziz, nižaza llan kuzziz cjee. Jalla nižta kamañanacaqui Yooz yujcquiziqui walja walurchizza. Ni zuma c'achja kamañaqi tsjii zuma tjurni walurchiztakazza. ⁵ Tuqui timpuqui Yooz partir maatakanacaqui nižta c'achja kamañchiztača. Nii maatakanacaqui Yoozquin kuzziztača. Nižaza luctakž jaru cjiicjiñitača. ⁶ Jalla nižta Sara cjita cullaquiqui Abraham cjita lučquiz cassinča, nižquiz “wejt jiliri” cjian. Ančhucqui nižta zuma kamañchiz cjequiči niiqui, Sara cullaca maatinacažtakaz cjequiča. Ana čjulquiztanami ančhuc kuz turwayskata.

⁷ Luctakanaca, ančhucquin zakaz chiižinžcuča. Ančhucqui persun maatakanacžtan zuma intintazñi munaziñi kuzziz kamaquiči. Yoozqui pucultan ančhucquiz niž zuma kamaña tjaachiča. Jalla nižtiquiztan jaknužt persun maatakžquiz rispitz waquizichaja, jalla nuž rispitaquiči. Cjuñzna, luctacaqui maatakžquiztan juc'ant azzizza. Persun maatakžtan zuma kamz waquiziča, ančhucž Yoozquiztan mayizitanaca ana ina cjeajo.

SUFRIS PUNTU

⁸ Tsjiižtan zakal cjesača. Tjapa ančhucqui tsjii kuzziz kamaquiči. Nižaza criichinacpora zumaž munazaquiči. Nižaza okzñi kuztan kamaquiči. Nižaza humilde kuztan kamaquiči. ⁹ Tsjiižuñ ančhucquiz anawali paachiž cjen ana nižtapacha anawali tjepnaquiči. Nižaza tsjiižuñ ančhuc quindra ch'aanani, ana nižtapacha niž quindra ch'aaquiči. Antiz niižtajapa Yoozquiztan mayizinaquiči, nii zuma cjskatzjapa. Yoozqui ančhuc kjawziča, zumanaca tanzjapa. Jalla nižtiquiztan ančhuc quindra žoñinacžta-japami Yoozquiztan mayizinaquiči, Yooz wintižta cjisjapa. ¹⁰ Yooz takuqui tuž cjiča:

“Jakziltat zuma kamañchizpan pecĥaja, niŕaza cuntintupan kamz pecĥaja, jalla niiqui persun chiiñi ata ewjt'istanĥa, anawal taku ana chiiŕjapa, niŕaza ana incallñi toscar taku ana chiiŕjapa. ¹¹Niŕaza jakziltat cuntintupan kamz pecĥaja, anawali paaznacquiztan zarakstanĥa; nekztan zumapan paastanĥa. Parti ŕoñinacĥtan wali kamzjapa, jalla niŕtiŕiz kuz tjaastanĥa. ¹²Yooz Jiliriqui zuma kamañchiz ŕoñinaca cuitiĥa. Niŕaza ninacaŕ mayizitanaca nonŕa. Pero Yooz Jiliriqui anawali paañi ŕoñinacĥ quintraĥa.

¹³Anĥucaŕ zuma kamznacquiz kuz tjaachiŕ cjen, ħject anĥuca quintra paasajo? ¹⁴Pero anĥucqui zuma kamcan sufraquiŕ niiqui, cuntintuŕ cjee. Yoozqui anĥucaquiz honora tjaaquiĥa. Nii quintra ŕoñinacĥquizimi ana eksna. Niŕaza anaŕ jecĥquiztanami kuz turwayskata. ¹⁵Cristupankazza ultim Jiliriqui. Jalla niŕtiŕiztan Cristuŕqui anĥucqui rispitanĥa. Niŕaza anĥucqui listu tjaczi ŕela, anĥucaŕ Yooztajapa kamz puntuquiztan chiiŕjapa. Tsjii ŕoñi nii puntu pewcnaquiŕ niiqui, zuma razunŕtan kjaaz waquiziĥa. Humilde kuzziz niŕaza rispitiñi kuzziz kjaaz waquiziĥa. ¹⁶Zumaŕ kamaquiĥa. Nekztan anĥuca kuzquiz anaŕ ĥjul ujmi cjuñznaquiĥa. Cristuŕquin kuzziz zumaŕ kama. Jalla nekztanaqui ŕoñinacaqui anaŕ anĥuca quintra chiyi atasĥa. Ninacaqui anĥuca quintra chiyaquiziŕ niiqui, ultim uzaquiziĥa anĥuca zuma kamtiŕiztan. ¹⁷Anĥucqui walikaz Yooz munañpi jaru kamcan sufraĥaja, wintiŕta cjequiĥa. Ana zuma kamtiŕiztan sufraquiŕ niiqui, jalla niiĥa ana waliqui; anaŕ Yooz munañpi jaruĥa niiqui.

¹⁸Jesucristuqui uĥum ujnac laycu ticziĥa. Jalla niŕtiŕiztan uĥum ujnac laycu ana iya ticz pecĥa. Zuma kamañchiz Cristuqui ana zuma kamañchiz ŕoñinacĥ laycu ticziĥa, ninacĥquiz Yoozquin macjatskatjapa. Curpuchiz cjan contactaĥa pero niŕ animuqui tirapan ŕejtĥa. ¹⁹Niiŕ espiritu animuqui chawctaŕtakaz espiritu animunacĥquin ojkiĥitaĥa Yooz puntu kjanzt'izjapa. ²⁰Jalla nii chawctaŕtakaz espiritu animunacaqui tuquitanpacha Yoozquin ana cassiĥa. Noeŕ kamta timpuquiz Yoozqui pasinziz kuzziz ŕelatĥa nii tuqita anawali ŕoñinacĥtajapa. Jalla nuŕ ŕejlcan Yoozqui Noeŕquiz tsjii pajk kjuyaŕ cherchi warcu kjuykatchiĥa. Nekztan Yoozqui nii warcuquiz tsjii quinsakal ŕoñinaca luzkatchiĥa, wacchi kjazquiztan ŕejtkatzjapa. ²¹Jalla nii kjazqui bautismoŕtakaztaĥa. Anĥuczakaz bautista cjan liwriitaĥa. Ultim bautismuqui anaŕ curpu ajunĥa, antiz ultim bautismuĥa Yoozquin tjapa kuztan cjisqui, ujnacquiztan pertunta cjisjapa, paata ujnacquiztan ana iya cjuñzjapa. Jilanaca, cullaquinaca, Jesucristuŕ jacatatchiŕ cjen uĥumqui liwriita cjesaĥa. ²²Jesucristuqui jacatatchu arajpacha ojkiĥiĥa. Jaziqui nicju Yooz Ejpŕ ŕew latuquiz julzi ŕejlĥa. Nekz ŕejlcan anjilanacami, niŕaza jilirinacami niŕaza poderchiznacami Cristuŕ mantuquiz ŕejlĥa.

4

¹Cristuqui ŕoñiŕ curpuchiz kamcan sufrichiĥa. Jalla niŕtiŕiztan anĥuczakaz sufrisjapa listo cjis waquiziĥa. Anĥucqui Cristuŕquiz kuzziz cjen sufraquiŕ niiqui, niŕŕquin juc'anti macjataquiĥa. Niŕaza uj paaznacquiztan juc'anti zaraquiĥa. ²Jaziqui zuma kamaquiĥa, tii muntuquiz ŕejlcan. Yooz munañpi jaru juc'anti kamaquiĥa; anawali pecñi kuz jaru ana kamaquiĥa. ³Anĥucaquiz cjiwĥa, anĥuca tuqita kamtaqui ana walitaĥa. Nuŕquizkaj cjila nii anawal kamtaqui. Jalla niŕta anawal kamtaqui ana criichi ŕoñinacaqui jutzaza. Anĥucqui zuma zizza nii anawal kamta puntu. Tuquiqui anĥucqui anawal kuz pinziz jaru ojklayatĥa; niŕaza adulteriuquiz ojklayatĥa; niŕaza ĥjul kuz pecta jarumi paatĥa, niŕaza kuz katchi licatĥa, niŕaza ancha pjiŕstanaca paatĥa, niŕaza mazinacĥtan licz pecatĥa. Niŕaza ŕoñiŕ paata yooznacquiz rispitanĥa. Werar Yooz mantita quintraĥa niiqui. ⁴Yoozquin kuzziz cjen, anĥuca kamtaqui anaĥa iya niŕtaqui. Jalla niŕtiŕiztan anĥuca tuqita mazinaca anĥucaquiztan istrañĥa, anĥucaŕ ana iya cumpant'ichiŕ cjen. Nekztan anĥucjapa iñarĥa. ⁵Pero ultim pjalz tjuñquiz ninacaqui persuna anazuma kamtiŕiztan Yoozquin cuenta tjaastanĥa, Yoozqui ticzi ŕoñinacami ŕejtñi ŕoñinacami ultimquiziŕ pjalznaquiĥa, tii yokquiz jaknuŕt kamĥaja, jalla niit jama. Yoozqui listo ŕejlĥa ŕoñinaca pjalzjapa. ⁶Tii muntuquiz ŕejlñi ŕoñinacĥquiz liwriiñi Yooz takuqui paljaytataĥa, ninaca criyajo, niŕaza liwriita cjejajo. ŕoñiŕ curpuchiz cjen

criichinacaqui tjapa žoñinaca irata ticža. Pero ninacž animunacaqui Yooziž arajpachquin kjawžta cjen zumapan kamčha Yooz irat kamañchiz.

⁷Jilanaca, cullaquinaca, tii timpuqui otčha, wajillaž tjappacha čhultakinacami tucuz-inznaquičha. Pero ana kuz turwayzita cjee. Zuma pinsiñi cjee. Nižaza persuna kamz ewjazñi cjee, Yoozquin mayizican. ⁸Jalla tužučha chekanaqui, porapat zuma munaziñi kuzzizpankaz cjee. Zuma munazican, parti žoñinacž ujnac puntuquiztan ana ancha cjuñasačha. ⁹Porapat ančhuca kjuyquiz zumapanž risiwasaquičha, ana paysnakžcu. ¹⁰Yoozqui criichi žoñinacžquiz tjapaman zuma kamañanaca tjaačha. Nii kamañanacchiz porapat yanapasaquičha, juc'ant zuma kuzziz cjisjapa. Nižta pecčha učhum Yooz Jiliriqui. ¹¹Jakziltat paljayz kamañchiz žejlčhaja, panž Yooz taku paljayz waquizičha. Jakziltat yanapñi kamañchiz žejlčhaja, panž Yooz tjaata aztan yanapz waquizičha. Tjapa ančhucqui čhjul kamañchizimi Yooz honora juc'ant waytiskatčha, Jesucristuž cjen. Yoozqui wiñayjapa honorchiz cjila. Nižaza Yoozqui wiñayjapa mantiñej cjila. Jalla nužoj cjila. Amén.

PRUEBANACAŽ TJONANAMI CUNTINTUŽ CJEE

¹²Pecta jilanaca, cullaquinaca, anawal pruebanacaž tjonan ana tsuca. Ančhuc yanz-japakaz tjončha, Yoozquin zuma tjurt'iñi kuzziz, ana tjurt'iñi kuzziz, jalla nii yanzjapa. Nižta pruebanacaqui panž želaquičha. Anaž istraña. ¹³Jaknužt Jesucristuqui sufritčhaja, jalla nižtakaz ančhucqui sufraquičha. Jalla nižtiquiztan nižta pruebanaca tjonchiz cjen, cuntintuž cjee. Nižaza Jesucristuž tjonz tjuñquiz ančhucqui juc'anti cuntintuž cjequičha. Nekztan Jesucristuqui niž aztan niž honora tjeeznaquičha. ¹⁴Cristužquin kuzziz cjen ančhuca quintra ch'aanita cjequičha. Pero ančhucqui cuntintuž cjee. Zuma Yooz Espiritu Santuqui ančhuca kuzquiz žejlčha. Ančhuca quintra žoñinacaqui Cristuž quintra chiičha. Ančhuczi Cristuž honora waytičha. ¹⁵Nonžna ančhucqui. Anačha žoñi conzqui. Anačha tjañi zaazqui. Anačha uj paazqui. Anačha yekja žoñž asuntuquiz mitizizqui. Nižta ana walinaca paaquiz niiqui, sufračhani. Pero nižta ana walinaca anapan paaquičha. ¹⁶Zuma cristiano cjican sufraquiz niiqui, ana azasačha. Antiz Yoozquin panž honora tjeeznaquičha, Cristuž partiquiz žejltiquiztan.

¹⁷Yoozqui niž famillchiz žoñinaca jusjiñi kalltičha, azquichta kamañchiz cjisjapa. Učhumqui tii muntuquiz žejlcan sufraquiz niiqui, žkjažt ana criichi žoñinacžtajapa wataquejo? Ninacaqui Yooz liwriñi taku anapanž cassa. Jalla nižtiquiztan infiernuquin wiñayjapa sufraquičha. ¹⁸Zuma kamañchiz žoñinacaqui ch'aman anawalinacquiztan liwriitačha. Jalla nižtiquiztan ana criichi žoñinacžquiz nižaza uj paañi žoñinacžquiz kjaž cjitat cjequejo? Infiernuquin wiñayjapa sufraquičha. ¹⁹Jalla nižtiquiztan tii muntuquiz kamcan criichi žoñinacaqui Yooz munañpi jaru sufričha. Jalla nižta sufrican Yoozquin kuzzizpan cjee, niž cuitita cjisjapa. Tii muntu paañi Yoozza litituma cuitiñiqui. Ancha zumapančha.

5

CRIICHI ŽOÑINACŽQUIZ CHIIŽINTA TAKU

¹Icliz jilirinaca, ančhucaquin zuma tawkžtan chiižinžcučha. Wejrqui icliz jilirizakaztčha. Persunpacha Jesucristo sufriñi cherchinčha. Nižaza wejrqui parti criichi žoñinacžtan chica honorchiz cjeečha, Jesucristo wilta tjonz tjuñquiz. ²Tjapa ančhucqui Yoozquin criichi žoñinaca zuma cwitaquičha, zuma uuzawawiriztakaz. Tjapa kuztan nižaza zuma kuztan cuitiz waquizičha. Jalla nižta pecčha Yoozqui. Anačha paaz ganz-japakaz iclizziz žoñinaca cuitaquičha, pero Yooz sirwican tjapa kuztan cuitiz waquizičha. ³Anačha tsjii ana zum patrunažtakaz cjiicjisqui, ančhuca icliz žoñinacžtaqui. Antiz parti criichi žoñinacžquiz zuma kamaña tjeezna, ninaca nižta iratapacha zuma kamkatzjapa. ⁴Nekztan chekan jilir Awatiriqui tjonžcu ančhucaquiz zuma honoraž tjaaquičha, zuma premiožtakaz. Tsjii chjañiquiztan paata premiuqui ratulla tucuzinznasačha. Ančhuca honora ana tucuzinznasačha. Ančhucqui Yoozquin criichi žoñinaca zuma cuititiquiztan jalla nižta honora tanznaquičha.

⁵ Ančhucqui tjotjowanaca, icliz jilirinacž jaru cjee. Nižaza tjapa ančhucqui porapat humilde kuztan rispitasajućiča. Yoozqui mita kuzziz žoñinacž quintrača. Pero humilde kuzziz žoñinacžquiz yanapča. ⁶ Jalla nižtiquiztan tjapa azziz Yooz Jilirž mantuquiz humilde kuzziz cjee, nekztan Yoozqui ančhucaquiz honorchiz cjiskataquiča. ⁷ Yoozqui ančhuc cuitiča. Jalla nižtiquiztan čjul llaquinacami nižaza kuz turwayskatñinacami nižquin kuzziz cjee.

⁸ Pinsiñi kuzziz cjee. Nižaza naynay žela. Ančhuc quintra diabluqui ojklayča, anawal leona ajuticanžtakaz. Nii anawal diabluqui ančhucaquiz atipz pecča. Nižaza criichi žoñinaca Yoozquiztan zarakskatz pecča. ⁹ Jalla nižtiquiztan niž quintra tjurtichi žela. Jesucristužquin kuzziz tjurt'ichi žela. Ančhucqui zizza, tii muntuquiz kamcan tjapa criichi jilanacaqui sufristanča. Jalla niža zizcu, Jesucristužquin tjapa kuzziz cjen tjurt'ichi žela. ¹⁰ Ančhuc tsjii zkoloc sufritan, Yoozqui ančhucaquiz yanapaquiča, juc'ant zuma kamañchiz cjisjapa. Nižaza Yoozqui ančhucaquiz tjurt'iñi kuzziz cjiskataquiča, nižaza tjup kuzziz cjiskataquiča, čjul ana walquiztanami atipajo. Nii Yoozza zuma yanapñiqui. Niiqui učhum kjawziča, Jesucristužtan chica arajpachquin kamzjapa, wiñayjapa honorchiz cjisjapa. ¹¹ Nii Yoozqui wiñayjapa honorchizkaj cjila. Wiñayjapa mantiñej cjila. Jalla nužoj cjila. Amén.

¹² Wejrqui ančhucaquin tii kolta cartal Silvanužquiz cjijskatuča. Silvano jilaqui zuma lijitum jilača, cjiwča. Tii cartiquiz ančhucaquin chiižinžcuča, nižaza Yooz lijitum okzñi kuz puntu paljayžcuča. Jalla nii puntunaca zizcu tira tjurt'iñi kuzziz cjee.

¹³ Babilonia wajtquin icliz žoñinacaqui ančhucaquin tsaanžquiča. Ninacaqui Yooz illta žoñinacazakazza. Nižaza Marcos ančhucaquin tsaanžquiča. Marcossa wejt maatižtakaz.

¹⁴ Ančhucqui porapat zuma munaziñi kuztan tsaanasaquiča. Tjapa ančhucqui, Cristuž partiquiz žejlñinaca, walikaj cjila. Jalla nužoj cjila. Amén.

SEGUNDA CARTA DEL APOSTOL SAN PEDRO

¹Wejr Simón Pedruqui ančhucaquin cjiyržcuča. Wejrqui Jesucristuž manta payiñ žoñtča. Niiž uchta apostoltča. Yooztan Jesucristo Liwriiñižtan žoñinacžquiz anaž illilla; legaliz niiqui. Jalla nižtiquiztan ančhucmi wejrmi Jesucristužquin kuzziz cjen Yooziž tjaata kamaña tanzinčhumča. Ancha zumača nii kamañau. ²Yoozquiz nižaza učhum Jesucristo Jiliržquiz juc'ant zuma pajz waquiziča. Nekztan ančhucqui juc'anti Yooziž yanapta cjequiča, nižaza tsjan walikaz kamañučiča Yooziž cjen.

CRIICHI ŽOÑINACŽ KUZ PUNTU

³Yoozqui učhum kjawziča, niižtan chica honorchiz cjisjapa, nižaza nii irata zuma kamañchiz cjisjapa. Jaziqi Yoozqui niž aztan ančhucaquiz yanapča, niž kuzcama zuma kamñi atñijapa. Ančhucqui Yooz puntu zizñi zizñiž cjen Yooz yanaptaqui tanznasača. ⁴Yoozqui niž ancha zuma walurchiz tawkžtan compromitchičiča, učhum yanapzjapa. Nii compromitta taku cumplissičiča. Jaziqi ančhucqui Yooz kuz irataž cjisnaquiča. Nižaza ančhucqui tii muntuquiz željñi ana walinacquiztan atipaučiča. Tii muntuquiz ancha ana walinaca željča žoñinacaž ana zuma pinsiñiž cjen. ⁵Jalla nižtiquiztan ančhucqui Yoozquin tjapa kuztan cjee juc'anti juc'anti zuma cjisjapa. Jesucristužquin kuzziz cjen lijituma zuma kamz waquiziča. Nekztan zuma kamcan, zizñi nižaza intintiñi kuzziz cjis waquiziča. ⁶Nekztan zizñi kuzziz cjican, persun kuzquiz ewjazan, zuma tjurt'iñi kuzziz kamz waquiziča. Nekztan tjurt'iñi kuzziz kamcan, Yooz kuzcamakaz kamz waquiziča. ⁷Nekztan Yooz kuzcamakaz kamcan, criichi žoñinacžquiz okzñi kuzziz cjis waquiziča. Nekztan okzñi kuzziz cjican, tjapa žoñinacžquiz zuma munaziñi kuzziz cjis waquiziča.

⁸Ančhucqui jalla nižta ancha zuma kuzzizčhucčhalaj niiqui, juc'anti juc'anti zumaž cjequiča. Nižaza ančhucaž zuma kamtaqui anaž ina cjequiča. Nižaza ančhucaž Jesucristo Jilirž puntunaca ziztaqui anaž ina cjequiča. Jesucristuž puntunacquiztan zizñi zizñi cjican, walja zuma obranacchiz cjisnaquiča. ⁹Jakzilta žoñit nižta zuma kamañchiz ana željčhaja, jalla niiča tsjii zur žoñižtakaz. Nižaza niiča ana zizñi zoñiqui. Niiž ujnacaqui pertunzqui tjatzača. ¹⁰Ančhucqui, anača nižta cjee. Yoozqui ančhuc illzcu kjawziča. Jalla nii kjawžta zumpachaž catoka. Nižaza niižquinpan kuz tjaaquiča. Jalla nuž zumpachaž kamañiž niiqui, anapanž Yoozquiztan zarakasača. ¹¹Nekztan ančhucaž zuma kamtiquiztan arajpach wajtquin zuma risiwaž cjequiča. Nii arajpach wajtquin Liwriiñi Jesucristo Jiliriqui wiñayjapa mantiča.

¹²Jalla nižtiquiztan wejrqui ančhucaquin tirapan nii puntunaca cjuñzkatača. Ančhucqui nii puntunaca zizza. Nižaza ančhucqui werar Yooz taku catokžcu Yoozquin tjurt'ichi željča. ¹³Jalla nuž cjenami wejrqui tuž tantiichinča. Wejr iya žejtcen, ančhucaquiz cjuñzkatz pecuča, tii chiižintanacžtan. Nii walikaz cjiwča. ¹⁴Učhum Jesucristo Jiliriqui wejtqui zizkatchičiča, wajillaž tii curpu eccu arajpach wajtquin okača, nii. ¹⁵Jalla nižtiquiztan tii puntunacquiztan cjiyrz pecuča. Nekztan weriž ticžtan ančhucqui čjulorami tii puntunaca liyasača, zuma cjuñajo.

JESUCRISTUŽ PUNTUQUIZTAN TJAAJINTA

¹⁶Ančhucaquin tjaajincan, wejrqui učhum Jesucristo Jilirž puntuquiztan tjaajinchinča, jaknužt walja aztan wilita tjonachaja, jalla nii. Jalla nii tjaajintaqui anaž wejt kuzquiztan ulanchičiča. Nii tjaajintaqui anača mañžtan tantiita quintuqui. Antiz wejrqui persun čhujčžtan Jesucristuž honora cherchinča. ¹⁷Wejrqui cherchinča, Yooz Ejpqui Jesucristužquiz zuma honora tjaachiča. Nižaza Yooz Ejpž ispantichuc joraqui chiižquichiča tuž cjican: “Jalla tiiča wejt k'ayi Maatiqui. Tiiž cjen ancha cuntintuča”. ¹⁸Jalla nuž cjiñi taku nonzinča arajpachquiztan tjonñi. Nii oraqui wejrqui Jesucristužtan chica željchinča Yooziž illzta curquin.

¹⁹Jaziqui wejrqui cjiwĉha tuqita Yooztajapa chiiĉni profetĉ takuĉha werar takuqui, nii. Jesucristuĉ tjonzcama nii profetaĉ chiitaqui uĉhumnacaltajapa kjanazt'iĉha tsjii zuma lamparaĉtakaz. Jalla niĉtiquiztan nii profetaĉ chiitiquiz kuz tjaaz waquiziĉha. Nii walikaz cjiwĉha. Wentan kĉantati chawcwa tewcĉcan, anaĉ iya lampara kjaĉni pecasaĉha. Jalla niĉta irata Jesucristuĉ tjonan, profetaĉ chiitanacaqui anaĉ iya pecasaĉha. ²⁰Jalla tii zakaz intintaz waquiziĉha. Nii cĉjirta profetaĉ chiitanacaqui Yooz takuĉha. Jaziqui profetaĉ chiitami ŉoĉĉ kuzquiztankaz ana intintazta cjesaĉha. Yoozpanikazza profetaĉ chiita intintazkatĉniqui. ²¹Profetanacaqui anaĉha persun kuzcama niĉtanaca chiichiqui. Antiz Yooz Espĉritu Santuqui ninacĉquiz Yooz taku chiikatchiĉha.

2

FALSO TJAAJIĉNINACĉ PUNTU

¹Tuqui timpuqui toscara chiiĉni profetanacaqui Israel wajtchiz ŉoĉinacĉquiz jecĉiĉha. Jalla niĉta irata zakaz anĉhucaquiz toscar tjaajinacacqui jecnaquičha. Ninacaqui persuna pinsitaquiztan chĉojzakaĉ tjaajnaquičha, ŉoĉinaca turwayskatzjapa, niĉzaza Yoozquiztan zarakskatzjapa. Jalla nuĉ anawali tjaajinca Jesucristo Jiliri ana pajĉni chiyaquičha. Pero Jesucristuqui ninaca liwriizjapa ticziĉha. Jalla nuĉ anawali tjaajintiquiztan ninacpachaĉ wajilla castictaĉ cjequičha. ²Niĉta anawali tjaajintiquiz walja criichi ŉoĉinacaqui kuz tjaaquičha. Nekztan anazuma kamaquičha. Jalla ninacaĉ anazuma kamtiquiztan ŉoĉinacaqui werar Yooz kamaĉ quintra iĉnaraquičha. ³Ancha paaz paca peccu, nii anawali tjaajinĉ ŉoĉinacaqui toscar tawkĉtan anĉhucaquiz incallaquičha. Nekztan anĉhuca paaz tanznaquičha. Jalla nuĉ cjen ninacaqui ultimupan tantaĉ cjequičha. Tuquitanpacha Yoozqui ninaca utchiĉha casticta cĉisjapa.

⁴Yoozqui uj paachi anĉilanacĉquiz ana pertunchiĉha. Antiz infiernuquin tĉojtchiĉha. Zumchiquiz chawtaĉtakaz nekz chĉojta ŉejlĉha, ultimu pjalz tĉuĉnicama. ⁵Niĉzaza tuqita timpuqui Yoozqui uj paachi ŉoĉinaca ana pertunchiĉha. Antiz kĉaz juyzu mantizquichiĉha nii anazuma kamaĉchiz ŉoĉinaca ticznajo. Noĉ cĉitaqui ŉejtkatchiĉha niĉĉ pakallak familianacĉtan. Noequi nii timpuquiz kamĉni ŉoĉinacĉquiz cĉjichiĉha: "Zuma kamaĉchiz cĉee" cĉican. Pero ŉoĉinacaqui Noĉĉ chiita tawkquiz ana juyzu paachiĉha. ⁶Niĉzaza Yoozqui ana wal Sodoma wajtchiz ŉoĉinacami niĉzaza Gomorra wajtchiz ŉoĉinacami ujĉtan ujchiĉha, kĉup tuczcama. Jalla nuĉ Yoozqui liwĉ tĉatanzjapa mantichiĉha. Jalla nuĉ casticcan Yoozqui wiruĉ tjonĉni anawal kamĉni ŉoĉinacĉquiz chiiĉzin pecchiĉha, "Anaĉha niĉta kamzqui" cĉican. ⁷Nii pizc ujzi watjanacquiztan Lot cĉita ŉoĉiqui alajakaz liwriitaĉha. Jalla niitaĉha zuma kamaĉchizqui. Parti ŉoĉinacaqui tĉapaman ana walinaca paachiĉha. Jalla niĉtiquiztan Lot cĉitaqui nii anawali kamĉni ŉoĉinaca cherĉcu ancha lĉactazniitaĉha. ⁸Nii zuma ŉoĉiqui zapuru niĉĉ kuzquiz ancha zint'iĉnitaĉha, nii parti ŉoĉinacaĉ Yooz lii quintra paachiĉ cjen. Lot cĉita ŉoĉiqui zapuru ninacaĉ anawali paatanaca cherchiĉha, niĉzaza nonziĉha. Jaziqui nii anawali paaĉinacĉtan kamcan, niĉĉ kuzquiz ancha zint'iĉnitaĉha. ⁹Ultimquiziqui Yoozqui Lot jwessiĉha nii wajtquiztan. Yooz Jiliri qui pruebanacĉquiztan zuma kamaĉchiz ŉoĉinaca liwriiĉniĉha. Niĉzaza Yoozza anazuma kamĉinaca pjalzĉniqui, niĉzaza chĉojĉniqui casticĉ tĉuĉnicama.

¹⁰Yoozqui juc'anti casticaquičha jalla tiĉta ŉoĉinaca, persun anawali pecĉni kuzcama kamĉni ŉoĉinacami, niĉzaza jilirinacĉquiz ana rispitiĉnacamami. Jalla niĉta ŉoĉinaca juc'anti castictaĉ cjequičha. Ninacaqui ancha lisuĉha, niĉzaza mit kuztan anawali paaĉiĉha. Ninacaqui poderchiz arajpachquin ŉejlĉinacĉquiz ana eksk u ararĉniĉha. ¹¹Yooz zuma anĉilanacaczi nii poderchiz arajpachquin ŉejlĉinacĉquiz ararzjapa eksa, azziz anĉilanacaĉ cjenami. Niĉzaza zuma anĉilanacaqui Yooz yujcquiziqui nii anawal ŉejlĉinacĉ quintra ana uj tĉojtunz pecĉha.

¹²Jalla nii anawal kamĉni ŉoĉinacaqui animalaĉtakazza ana intintazni kuzziz. Persun kucamakaz ojĉlayniĉha, Yoozquin ana juyzu paaĉni. Q'uit animalanacaqui ŉejlĉha, tanĉta cĉisjapa, niĉzaza conta cĉisjapa. Jalla niĉtaĉ nii ŉoĉinacaqui. Ana zizta puntuquiztan quintra chiiĉha. Anawali kamcan nii anawali kamtiquiztan animalanacaĉtakaz ticznaquičha.

¹³Niĉzaza ninacaqui parti ŉoĉinacĉquiz sufriskatchiĉ cjen, zakaz supraquičha. Niĉzaza

anawal pijjztanacquiz kamcan, “Cuntintutčha wejrnacqui” cjian chiiñičha. Ančhucqui ninacžtan žejlzqui azipančha, nižaza ninacž cumpant'izmi ančhucaltajapa ana waličha. Ninacaqui ančhucaquiz incallz ancha jutzazza, ančhuc criichinacžtan chica žejljajapa. ¹⁴ Nii anawali žoñinacaqui tsjii maataka cheržcu, panž adulterio paaz pecčha. Nižta anawali paaznacquiztan anapan ochñičha. Incallchuc maatakanacžquiz adulterio kjutñi chjichñičha. Jalla nižta žoñinacaqui adulteriuquiz ojklayñi, nižaza paaz tanzñi nižaza čhjul uj paazmi ancha atñipanikazza. Jalla nižta cjiicjiñinacaqui infiernuquin ojknī žoñinacačha. ¹⁵ Yooz jiczquiztan zarakchičha. Nekztan uj paacan ojklayñičha. Tuquitan tsjii anawali profeta želatčha, Balaam cjeta, Beorž majch. Jalla niiqui anawali paatiquiztan paaz ganz pecchičha. Jalla nii Balaam cjetaž iratačha ninaca ojklayñičha. ¹⁶ Tsjii ana chiiñi aznuqui Balaamžquiz ujačha žoñž tawkžtan, Balaam anawali paaz pecchiž cjen. Jalla nižta ujñiž cjen Balaamqui atajatačha niž anawali pinsita jaru ana paazjapa.

¹⁷ Wejr cjiwčha, nii anawali tjaajiñi žoñinacaqui ana kjazziz tujžtakazza. Ancha taku tjaacčha, pero anawira cumpličha. Nižaza ninacačha ana chijñichiz tsjirižtakaz, tjami chjichta tsjirižtakaz. Ninacaqui wiñayjapa casticta cjequičha anawal tsokchi zumchiquiz chjatkatzcu. ¹⁸ Nii anawalinacaqui mitarazzi tawkchiz inapankaz chiiñičha. Anawali paaznaca tjaajincan, nižaza anawali pecznaca tjaajincan užca anawal kamañquiztan zarakchinacžquiz wilta anawal kamañchiz kamkatz pecñičha. ¹⁹ Wejtnac jaru cjee, cjiñičha. Wejtnac jaru cjian, čhjulu paaznacami walikazza cjiñičha. Pero ninacapacha anazum kamañanac jaru cuztumrazzičha. Jakziltat anawal kamañ jaru cuztumrazačhaja, jalla niičha nii anawal kamañ mantuquiz žejlñiqui. ²⁰ Učhum liwriñi Jesucristo Jiliržquin criižcu, yekjap nii anawal tjaajñinacaqui liwriitačhani anawali paatanacquiztanami, nižaza anazuma kamtiquiztanami. Liwriita jciscu wilta anazum kamañquiz mitisačhaja, nižaza anazuma kamaña cuztumrazačhaja, niž tuquita anawal kamañquiztan juč'anti anawaliž cjequičha. ²¹ Ninacaqui Yooz zuma kamaña ana pajtasaz niiqui, ninacžtaqui tsjan cusaž cjitasačha. Pero ninacaqui Yooz zuma tjaajinta catokchičha. Jaziqui Yooz zuma kamaña pajžcu, quejpsičha. Jalla nižtiquiztan ninacžtaqui juč'ant anawira waliž cjequičha. ²² Ninacaqui Yooz tawk jaru ojklaychitačha. Nekztan Yoozquiztan quejpsičha ninacaqui. Jaziqui nii quejpsñi žoñinacaqui pacunacažtakazza. Pacunacaqui jotžcu persun joti lujlža. Nižaza tsjii ajunta cučhiqui wilta ljajzpiquizpacha zumt'ičha. Jalla nižtačha nii anawal tjaajñinacaqui.

3

JESUCRISTUŽ TJONZ PUNTU

¹ Pecta jilanaca, cullaquinaca, jalla tiižtan pizc wilta cartal ančhucaquin cjiiržcučha. Jalla tii pizc cjiirta cartaž cjen ančhucaquiz werar razunžtan pinsiskatz pecučha. ² Tuquitan Yooztajapa chiiñi zuma profetanacaqui Yooz puntu mazinchičha. Nižaza wejrnac apostolonacaqui liwriñi Jesucristo Jiliriz mantitanaca ančhucaquiz tjaajinchinčha. Jaziqui tjapa nii tjaajintanaca cjuñzna.

³ Profetaž mazinta timpuž tjontan žoñinacaqui tjonaquičha. “Yooz puntu tjaajintanaca inapanikazza” cjian burlasaquičha. Nii burlasñi žoñinacaqui persun anawal kuzcama ojklayaquičha, nižaza persun kuzcama kamaquičha. Ančhucqui jalla nii zumpacha ziz waquizičha. ⁴ Ninacaqui pewcznaquičha, tuž cjian: “¿Kjažt cjisit Cristojo tjonaquičha cjetla pero? Učhum tuquita atchi ejpnacaqui kamchičha; nekztan ticzičha. Tii muntu kalltiquiztanpacha tjapa nižtapankaz watčha. Cristuc anaž tjonasačha”. Nuž cjianž chiyaquičha ninacaqui. ⁵ Pero tuquita timpuquiztanpacha arajpachaui Yooz chiiitiquiztanpacha paatačha. Jalla nii Yooz paatami, ninacaqui anaž naaza. Nižaza Yooz mantitiquiztanpacha tii yokaqui kjazquiztan jeczīčha. ⁶ Nižaza kjaz juyzu tjontiquiztan nekztanpachaž tii muntu yoka kjazquiz katžcu pertissičha. ⁷ Tii muntuquiz žejlñi yokami pachanacami ujtžtan ujjajapa chjojta žejlčha. Yooz mantita jaru zakaz nižta wataquičha. Jalla nii ujqui ultimū pjalz tjuñquiz ujaquičha. Nii pjalz tjuñquiz zakaz anazum kamañchiz žoñinaca castictaž cjequičha nii ujqizpacha.

⁸ Pecta jilanaca, cullaquinaca, tiizakaz anaž tjazna. Yooz Jiliržtajapa tsjii noojiqui warank watanaca cuntača. Nižaza warank watanacaqui tsjii nooj cuntača. Yooztajapa timpunacaqui nizača. ⁹ Yekjap žoñinacaqui tuž cjiča, Yooz Jiliriqui niž tjaata taku ana uri cumpliča. Jilanaca, jalla nii chiitaqui anazuma razunača. Antiz Yoozqui ančhucaltajapa pasinziz kuzziz žejlča. Yoozqui anaž jakziltami casticz pecča. Antiz tjapa žoñinaca “ujchizpantča” cjican chiikatz pecča, ninaca liwriita cjisjapa. Jalla nižtiquiztan ana uri tjonča.

¹⁰ Pero Jesucristo Jiliriž tjonz tjuñiqui tiripintiz tjonacuicha, tsjii tjañžtakaz. Jalla nii tjuñquiziqui tii muntu pachanacaqui tsjii tsuchuc jorjorñižtan tucuzinžnacuicha. Tjuñimi jizmi warawarami liwž kataquicha; ujta cjequicha. Nižaza tii muntu yokami tjapa žejlñinacžtan pacha ujžtan tankattaž cjequicha.

¹¹ Jalla nižta liwž tjatantaž cjequicha. Jalla nižtiquiztan ančhucqui Yooz kuzcama juc'anti kamz waquizicha, nižaza Yooz irata zuma kamañchiz cjis waquizicha. Jalla nižta kamañchiz waquizicha ančhucqui. ¹² Yooz tjonz tjuñi tjewžna, nižaza zumapan langžna, Yooz apura tjonzjapa. Nii tjonz tjuñquiziqui tii muntu pachanacami ujžtan tankattaž cjequicha. Nižaza tjuñi jizmi warawarami ujquiz liwž jiñkattaž cjequicha; nekžtan liwž kataquicha. ¹³ Pero učumzti ew arajpachami yokami tjewža, Yooz chiita tawk jaru. Nii ew arajpachquinami yokquinami tjappacha Yooz irata zumacamaž cjequicha. Ana zinta anawaliqui cjequicha.

¹⁴ Pecta jilanaca, cullaquinaca, Yooz tjonz tjuñi tjewžcan, zuma kamañquiz kuz tjaa, niž yujcquiz ana ujchiz cjisjapa. Nekžtan Yoožtan učumnacatan walikaz cjequicha. ¹⁵ Jalla tii cjuñžna. Yooz Jiliriqui ančhucaltajapa pasinziz kuzziz žejlča, ančhuc liwriita cjisjapa. Jalla nii puntuquiztan zakaz Pablo jilaqui ančhucquin cjižrchiča. Yoozqui nižquiz zizñi zizñi nižaza zuma intintazñi kuzziz cjisatchiča. Jalla nii ziztanac jaru učumž pecta Pabluqui ančhucquin cjižrchiča. ¹⁶ Weriž chiita puntunacuiztan Pabluzakaz chiichiča tjapa niž cjižta cartanacuiz. Parti Pabluž cjižrtanacaqui ch'aman intintazzucača. Jalla nižta ch'aman intintazzucanacaqui ana zizñi žoñinacami, nižaza pizc kuzziz žoñinacami tsjii kjuťniž intintazza. Nižaza parti Yooz takunaca zakaz tsjii kjuťniž intintazza. Jalla nuž tsjii kjuťniž intintazcu, ninacaqui ninacžtajapa juc'ant ana zumquiz cjissa; nekžtan castictaž cjequicha.

¹⁷ Pecta jilanaca, cullaquinaca, ima tii muntuquiz tižtanaca watan tii puntunaca ančhucacuiz zizkatchinča. Jaziqui anawali incallñi žoñinacaqui želaquicha. Nii anawali incallñi žoñinacaqui Yooz mantitanaca anapan cassa. Jalla nižtiquiztan ninacžquiztan cuit'aza, ana tsjii kjuťni chjichta cjisjapa. Anawalinac kjuťni chjichta cjequiz niiqui, ančhucqui ana tjurt'iñi kuzziz cjequicha. ¹⁸ Ančhucqui učum liwriiñi Jesucristo Jiliržquiz juc'ant zumaž pajaquicha. Nižaza niž puntu juc'ant zizaquicha. Nižaza juc'ant zuma kamañchiz cjee. Učum Jesucristo Jiliriqui honorchizkaj cjila anztajapami wiñayajapami. Jalla nužoj cjila. Amén.

PRIMERA CARTA DEL APOSTOL SAN JUAN

JESUCRISTUQUI TII MUNTUQUIZ TJONCHIČHA

¹ Wejrqui Jesucristuž puntul ančucaquin cjiřrčučha ančhuc wali cuntintu cjisjapa. Tuqui timpuquiztanpacha Jesucristuqui žejlñipantakalčha, ima tii muntu želan. Tii muntuquiz tjontanaqui wejrnacqui Jesucristužtan kamchinčha; wejtnaca čhjujčtan nii cherchinčha; nižaza niž taku nonzinčha. Jacatattanaqui wilta cherchinzakazza; nižaza wejtnaca kjaržtan nii lanzinčha. Jazimi tirapanž žejtčha Jesucristuqui. Nižaza jakziltat Jesucristuž taku criyačhaja jalla niiqui Yooztan wali cuntintupankaz cjequičha. ² Nii žeti tjaañi Jesucristuqui tjonchičha tii muntuquiz. Nekztan wejrnacqui nii pajchinčha, nižaza cherchinčha. Nekztan wejrnacqui nii Jesucristuž puntuquiztan žoñinacžquizimi, ančucaquizimi paljaychinčha. Tuqui timpuquiztanpacha žejtñipantakalčha nii Jesucristuž puntuquiztan žoñinacžquizimi, kamñitakalčha. Nekztan tii muntuquiz tjonžcu, žoñi tucchičha. ³ Jaziqui nii chertanaca nii nonžtanaca ančucaquin quint'učha, wejtnacatan ančhucatan tsjii kuzziz cjejajo. Wejtnacatan Yooz Ejpžtan nižaza Yooz Majchtan tsjii kuzzizpančha, jalla nižtapacha wejtnacatan ančhucatan cjisjapa. ⁴ Wejrqui tii cartal cjiřrčučha ančucaquin wali cuntintu cjisjapa.

YOOZQUI ZUMA KJANQUIZ KAMČHA

⁵ Jesucristuqui wejtnacaquiz tjaajinchičha. Jaziqui nii tjaajintanaca ančucaquin cjiřrčučha. Yoozqui zuma kjanquiz kamčha. Yoozqui zumapankazza, jalla nuž cjičha nii kjanquiz kamz puntuqui. Nižaza Yoozqui anapanž zumchiquiz kamčha. Yoozqui ana čjul ujchizza, jalla nuž cjičha nii ana zumchiquiz kamz puntuqui. ⁶ Tsjii uj paañi žoñiqui zumchiquiz kamčha. Nuž kamcanaqui “Yooztan wejttanaqui tsjii kuzzizza”, cjičhaj niiqui, toscaraž chiičha nii žoñiqui. Anaž werar Yooz jiczquiz ojklayčha. ⁷ Yekjapazti kjanquiz kamčha; Yoozqui kjanquiz kamčha, jalla nižtapacha. Jakzilta žoñinacat nuž kamčhaj niiqui, Yoozquin criichinacžtan tsjii kuzzizza. Nuž kamcanaqui, tjapa niž ujquiztan pertuntačha, Jesucristuž ticzi cjen.

⁸ Jakzilta žoñit “Ana ujchiztčha”, cjičhaj niiqui, persunpachaž incallčha; toscaraž chiičha. Ana zum kuzzizza nii žoñiqui. ⁹ Pero jakzilta žoñit Yoozquin pertuna mayizaj niiqui, niž ujqui pertuntaž cjequičha. Nižaza ana ujchiz cjequičha. Jalla nuž cjičha Yoozqui. Anaž wira toscara chiyasačha Yoozqui; niž taku cumpliñipankazza. ¹⁰ Yoozqui cjičha, “Tjapa žoñinacami ujchizza”. Jaziqui jakzilta žoñit “Ana ujchiztčha”, cjičhaj niiqui, Yooz toscara chiitažokaž nayčha nii žoñiqui. Nižaza niž kuzquiz Yooz taku anaž catokčha.

2

JESUCRISTUČHA UČHUM TJURT'IŽIŇIQUI

¹ Wejt jilanaca, cullaquinaca, wejrqui tii cartal cjiřrčučha, ančhuc ana uj paajo. Jakziltat uj paačhaj niiqui, Jesucristužquiztan mayizaquičha. Niičha učhum tjurt'ižiniqui. Nekztan Jesucristuqui Yooz Ejpžquin mayizinaquičha. Jesucristuqui ana čjul ujchizza, zumaž kamčha. Jaziqui nii tjurt'ižiniqui zuma mayizinasacha. ² Učhumž uj paatiquiztan Yooz Ejpqui učhum casticž waquizičha. Jesucristuž ticzi nekztan Yooz Ejpqui učhum pertunasacha. Ana ujchiz Jesucristuqui učhum laycu učhumnaca ujquiztan ticzičha. Jaziqui Jesucristužquin tjapa kuztan cjenaqui čjul uj paañi žoñinacami pertunta panikaz cjesačha.

³ Jakzilta žoñit Yooz mantita jaru kamčhaj niiqui, Yooz pajčha. Jalla niičha werarapan. ⁴ Jakzilta žoñit ana Yooz mantita jaru kamčhaj niiqui, anaž chii atasacha “Yooz pajučha”, cjicanaqui. “Yooz pajučha”, cjesaž niiqui, toscaraž chiičha. Anazum kuzzizza nii žoñiqui. ⁵ Jakzilta žoñit Yooz tawk jaru kamčhaj niiqui, Yooztan ancha zuma munaziñi kuzzizza. Yoozquin tjapa kuzzizpančha. Jilanaca, tii zuma cjuñzna. ⁶ Jakzilta žoñit “Yooztan tsjii

kuzziztča wejrqui”, cjičhaj niiqui, zuma kamzpanž waquiziča, Jesucristuqui zumaž kamča, jalla nižta.

EW MANTITA

⁷ Jilanaca, cullaquinaca, wejrqui anal jazta mantita cjižrčuča. Tuqitanpacha tii mantitac zizzinčhucča ančhucqui, porapat zuma munaziz, jalla nii. Tuqitanpacha tii mantitac nonzinčhucča. ⁸ Pero tii mantita cjižrčuča, jazta mantitažtakaz. Jesucristuqui tii mantitacama kamčiča tii muntuquiz. Ančhuczakaz tii mantitacama kamča. Nuž kamcan, zuma munazican, ana zumchiquiz kamča, werar kjanquiz kamča, Yooz takucama. Jalla nužupanča niiqui.

⁹ Jakzilta žoñit “Kjanquiz kamuča”, cjičhaj niiqui, jilanacžtan porapat zuma munaziz waquiziča. Jilanacžtan tira chjaawjkatčhaj niiqui, pachpa zumchiquizpanž kamča. ¹⁰ Jakzilta žoñit jilanacžtan porapat zuma munazaja, jalla niiqui kjanquizpankaz kamča. Jaziqui Yooz jicz cherchucča, ana ujquiz tjojtšjapa. ¹¹ Jakzilta žoñit jilanacžtan chjaawjkatčhaja jalla niiqui zumchiquiz kamča. Jakzitchuc ojkčhaj niiqui, ana zizza. Jaziqui Yooz jicz ana cherchucča; zur žoñitakazza nii žoñiqui.

¹² Jilanaca, cullaquinaca, ančhucquin cjižrčuča. Jesucristuž ticzi nekztan ančuca uj pertunchičha Yoozqui. ¹³ Ejpna, ančucaquin cjižrčuča. Jesucristuqui tuqui timpuquiztanpacha žejlñipantakalča. Nii Jesucristužtan kamča ančhucqui. Tjotjowanaca, turtakanaca, ančhucqui Satanás atipchinčhucča. Jaziqui ančucaquinzakaz cjižrčuča.

Jilanaca, cullaquinaca, ančhucqui Yooz Ejpžtan kamča. Jaziqui ančucaquinzakaz cjižrčuča. ¹⁴ Ejpna, Jesucristuqui tuqui timpuquiztanpacha žejlñipantakalča. Nii Jesucristužtan kamča ančhucqui. Jaziqui ančucaquin cjižrčuča. Tjotjowanaca, turtakanaca, ančuca kuzquiz Yooz taku chjojchiñčhucča. Nekztan Yoozquin tjurt'ini kuzziz cjen, ančhucqui Satanás atipchinčhucča. Jaziqui ančucaquinzakaz cjižrčuča.

¹⁵ Tjappacha ančhucqui, nonžna. Anača tii muntuquiz žejlñi cusasanacžquin kuz tjaazqui. Anača anawali paaznacquiziqui kuz tjaazqui. Jakzilta žoñit anawali paaznacquiz kuz tjačhaj niiqui, anaž Yooz Ejpžquin kuz tjačha. ¹⁶ Tii muntuquiziqui tižta anawali paaznaca žejlča: persun kuzcama kamz pecznaca, persun čhjuquiz čerta pecznaca, tucquin cjis pecznaca. Jalla nižtanaca pecčhaj niiqui, diabluž jaru ojklajča. ¹⁷ Tii muntuquiz žejlñinacaqui liw tucuzaquičha, tjažtaž cjequičha. Nižaza tii muntuquiz žejlñinaca pecznacami tucuzaquičha. Pero Yooz kuzcama ojklajñinacazti Yooztan wiñaya kamaquičha.

WERAR TAWKŽTAN, TOSCAR TAWKŽTAN

¹⁸ Jilanaca, cullaquinaca, tii timpumiž ojtča. Tsjii Jesucristuž quintraqui tjonaquičha, nii quintu zizza ančhucqui. Nižaza anziqiu muzpa Cristuž quintra žoñinacaqui jecža. Nekztan učumqui zizza tii timpuqui ojtča. ¹⁹ Nii quintranacaqui učumquiztan zarakchiča. Anatača učumtan tsjii kuzziz ninacaqui. Učumtan tsjii kuzziz cjitasaž niiqui, tira učumtan kamtasacha. Ninacaž zarakтанаqui, kjanapacha cjišičha, anatača učum tsjii kuzziz ninacaqui. ²⁰ Ančhuczi ana nižtičhucča. Ančuca kuzquizti Yooz Espiritu Santo kamča. Jaziqui ančhucqui tjapa werara zizzinčhucča. ²¹ Werar taku zizniž cjen ančucaquin cjižrčuča. Nižaza Yooz takuqui anaž čhjul toscarami chiiča. ²² ¿Ject toscar žoñejo? Jakziltat “Jesusača ana Yooziž cuchanžquita Cristuqui” cjičhaja, jalla niičha toscara chiiñiqui. Cristuž quintrača ninacaqui. Nii žoñinacaqui Yooz Ejpžquin nižaza Yooz Majchquin ana pajz pecča. ²³ Jakziltat ana Yooz Majchquin pajz pecčhaja, jalla niiqui ana Yooz Ejpžtan kamasacha. Jakziltat “Jesucristuqui werar Yoozza” cjičhaja, jalla niiqui Yooz Majchtan kamča; Yooz Ejpžtan zakaz kamča.

²⁴ Nii tuqui nonžta Yooz taku persun kuzquiz chjojwa ančhucqui. Nii Yooz taku chjojžcu, Yooz Majchtan Yooz Ejpžtan ančhucatan tsjii kuzziz wiñaya kamaquičha. ²⁵ Yooz Majchqui chiichiča, tuž cjan:

—Wiñaya Yooztan kamaquičha ančhucqui.

²⁶ Yekjap žoñinacaqui ančhuc incallz pecča. Jaziqui cjiyržcuča nii puntuquiztan. ²⁷ Jesucristuqui Yooz Espiritu Santo ančuca kuzquiz cuchanžquichiča. Jalla nižtiqiztan nii Espiritu Santuqui ančucaquiz tjaajinča. Jaziqui yekja tjaajini espiritu anaž pecca ančhucqui. Yooz Espiritu Santuž chekan weraraqui tjaajinča. Anaž toscaranaca tjaajnasacha. Cristužtan tsjii kuzziz kama; jalla nuž tjaajinča Espiritu Santuqui. Nižtaqui niž tjaajintacama kama.

²⁸ Jilanaca, cullaquinaca, Cristužtan tsjii kuzziz kama ančhucqui. Nekztan Cristuž tjonanaqui, učhumqui anaž eksnaquiča, nižaza anaž azaquiča. ²⁹ Jesucristuqui zuma kuzzizpanča. Nii zizza ančhucqui. Jakziltažlaj zuma kuzziz niiqui, Yooz maatiča. Jalla niizakaz zizza ančhucqui.

3

YOOZ MAATINACA

¹ Tjappacha ančhucqui nonžna. Yooz Ejpqui učhum zumaž k'ayacht'ičha. Nižaza Yoozqui učhum illziča, niž maati cjisjapa. Yooz maatičhumča učhumqui. Jalla nižtiqiztan učhum kuzqui ana pajča ana Yooz criichinacaqui. Yooz kuzmi anazaž pajča ninacaqui. ² Jilanaca, cullaquinaca, učhumqui Yooz maatičhumča. Wiruñauqui jaknužkačhum cjisnahan, učhumqui ana zizza. Pero Jesucristuž tjonanaqui, nii cheraquiča učhumqui. Nekztanaqui Jesucristuž irata cjisnaquiča učhumqui. Jalla nii tjaajinta zizzinčhumča. ³ Jakziltat Jesucristo tjewžaja, jalla niiqui čjul uj paaznacami ecča, ana ujhiz cjisjapa; Jesucristuqui ana ujhizza, jalla nižtapacha cjisjapa.

⁴ Jakzilta žoñižlaj uj paañi, jalla niiqui Yooz mantitanaca anaž cazza. Uj paazqui Yooz taku quintrača. ⁵ Jesucristuqui tii muntuquiz tjonchiča, žoñinacž uj pampatzjapa. Ana čjul ujhizza niiqui. Jalla nii zizza ančhucqui. ⁶ Jakzilta žoñižlaj Cristužtan tsjii kuzziz, jalla niiqui ana uj paañiča. Uj paañi žoñinacaqui anaž naaza Cristuž puntuquiztanaqui. Nižaza anaž kamča Cristužtanami. ⁷ Jilanaca, cullaquinaca, ana jeczquizimi incallskata ančhucqui. Wali kamñi žoñinacaqui zuma kuzzizza, Cristužtakaz. ⁸ Satanás cjuta diabluqui tuqui timpuquiztanpacha uj paañipankaztakalča. Jaziqui nižaza tira uj paañiča. Nekztan uj paañi žoñinacaqui Satanás diabluž maatinacača. Jesucristuzti tii muntuquiz tjonchiča, Satanás diabluž paatanaca akkatzjapa.

⁹ Yooz maatiqui ana kuzin uj paañiča. ¿Kjažtiqiztan nii ana kuzin uj paañitajo? Yooz maatiča, nekztan kuztan ana uj paapaasacha. Yooz Ejpž kuz cherchi kuzziz kamñiča. Jalla nekztan tjapa kuztan uj ana paasacha. ¹⁰ ¿Jakziltat Yooz maatejo? ¿Jakziltat diabluž maatejo? ¿Jaknužža nii zizas učhumjo? Jalla tuž zizasacha. Jakziltažlaj kuzin uj paañi, jalla niičha ana Yooz Ejpchizqui. Nižaza jakziltažlaj niž jilanacžtan čjaawjkatñi, jalla niičha diabluž maatiqui.

PORAPAT ZUMA MUNAZIZA

¹¹ Porapat zuma munaziza. Tii mantitaqui tuquitanpacha nonzinčhucča. ¹² Tsjii žoñi želatča, Caín cjuta. Jalla nii Cainqui niž lajk conchiča. ¿Kjažtiqiztan conchit niijo? Jalla niž paatanacaqui anawalinacatača; niž lajkž paatanacazti walinacatača. Jalla nekztan niž lajk conchiča. Cainqui diabluž maatitača. Ana nii Cainž kuz cherchi kuzziz cjee ančhucqui.

¹³ Jilanaca, cullaquinaca, tii muntuquiz žejlñi žoñinacž ančhuc čjaajwanaqui, ana istraña, ana upa kuzziz cjee. ¹⁴ Tuquiqui ana zuma munazan, jalla nekztan infiernuquin okaj cjitatakalča učhumqui. Jaziqui Yoozquin criičuqui arajpach watjaž okaquiča; wali cuntintu cjequiča. Jalla nekztan učhumqui Yoozquin criiči jilanacžtan porapat zuma munazizza. Nii zizza učhumqui. Jakziltat ana jilanacžtan porapat zuma munazičhaja, jalla niiqui infiernuquinž okaquiča. ¹⁵ Jakziltat niž jilžtan čjaawjkatčhaja, jalla niiqui žoñi conchiz cjes, jalla nižtaž ninacaqui. Nižaza žoñi conñinacami ana Yooz kuz cherchi kuzzizza. Anaž wiñaya Yooztan kamasacha. ¹⁶ Cristuqui učhum laycu ticziča. Nekztan jaknuž munazizlaja, jalla nii učhumqui zizza. Učhumqui Yooz criiči jilanacžtan zuma munazizpanča, ticzcama. ¹⁷ Tsjii tjapa cusasanacchiz žoñiqui tsjii t'akjir jila cheraquiz

niiqui, okzpančha. Anaž okznasaž niiqui, ¿kjažt Yooz cherchi kuzziz cjesajo? Anapanž Yooz cherchi kuzzizza. ¹⁸ Jilanaca, cullaquinaca, anačha atžtan taku mayaka okzqui. Paatanacžtanaqui okza. Nekz tjeeža učhumž okžtaqui. Niičha werar okzqui.

YOOZQUIZTAN ANA PAYZNAKŽCU MAYAQUIČHA

¹⁹ Jilanaca zuma okzcan, učhumqui zizza, werar Yooz maatičhumpančha, jalla nii. Nekztan llajlla kuzzizlaj niiqui, tjup kuzziz cjee. Yooz yujcquiz Yooz maatinacžhumčha.

²⁰ Yoozza juc'ant chekanaqui učhum kuzquiztan cjenaqui. Yoozqui tjapa učhum kuz zizza, ana walinacami, walinacami, tjappacha. Nii anawalinaca zizcumi, Yoozqui tirakaž učhum okža. ²¹ Jilanaca, cullaquinaca, čhjulatorat učhumž kuz walika cječhaj niiqui, Yoozquiztan ana ekskcu mayasačha. ²² Učhumqui Yooz mantitacama kamtiquiztan, nižaza Yooz kuzcama kamtiquiztan učhumž mayiztac nonžtaž cjequičha. ²³ Yooz mantitanacaqui tužučha: Yooz Majch Jesucristužquin tjapa kuztan cjee. Nekztanaqui jilanacžtan zuma munaza. Jalla nuž mantičičha Yoozqui. ²⁴ Jakziltat nii mantitacama kamčhaja, jalla niiqui Yooztan tsjii kuzzizza. Nižaza Yooztan tsjii kuzzizza nii žoñinacžtan. Yooz tjaata Espiritu Santuqui učhum kuzquiz žejlčha. Jalla nekztan zizza učhumqui, Yooztan učhumtan tsjii kuzziz, jalla nii.

4

ESPIRITU SANTUŽTAN CRISTUŽ QUINTRA ESPIRITUŽTAN

¹ Jilanaca, cullaquinaca, nonžna. Jakziltat “Tii takuqui Yooz takučha”, cjičhaj niiqui, nii žoñiž čhiita taku zumpacha tantiyaquičha, Yooz taku čhiini, ana Yooz taku čhiini, jalla nii. Anačha čhjul takumi pjazila criizqui. Tii muntuquiz muzpa toscara čhiini žoñinaca žejlčha; Yooz taku čhiitažokaž cjičha. ² ¿Jaknužt žoñiž čhiita taku paji atas učhumjo? ¿Yooz Espiritu Santuž čhiikatka? ¿Uz ana Yooz Espiritu Santuž čhiikatja? Jalla tuž paji atasachha učhumqui. Tii muntuquiz Jesucristuqui žoñž curpuchiz kamčičha. Jakziltat nižtapan čhičhaja, jalla niičha Yooz taku čhiiniqui. ³ Nižaza jakziltat Jesucristuqui anačha žoñž curpuchiz kamčiqui, cjican čhičhaja, jalla niičha ana Yooz takucama čhiiniqui. Cristuž quintra espirotuqui nii čhiikatčha. Nii Cristuž quintra espirotuqui tjonaquičha; tuqtian ančhucqui jalla nii nonzinčhucčha. Anziqii tii muntuquiz nižta Cristuž quintra čhiininaca žejlčha.

⁴ Pecta jilanaca, cullaquinaca, ančhucqui Yooz maatinacžhucčha. Nii toscar taku joojooñinacaqui diabluž mantitaž ojklajčha. Ančhuczti Yooz Espiritu Santuž mantitaž ojklajčha. Yooz Espiritu Santuqui juc'anti azzizza nii diablužquiztan cjenaqui. Nekztan ančhucqui nii toscar taku joojooñinaca atipasačha. ⁵ Ninacaqui diabluž maatinacačha. Nii žoñinacaqui ana Yooz takucama čhiiničha, diabluž taku čhiiničha ninacaqui. Nii diabluqui tii muntuquiz ančaž mantičha. Jaziqui Yoozquin ana criiči žoñinacaqui diabluž taku criičha. ⁶ Učhumzti Yooz maatinacžhumčha. Jaziqui werar Yooz takuž čhiyan Yoozquin criiči žoñinacaqui nii werar takuž catokčha. Ana Yoozquin criiči žoñinacaqui nii werar taku anaž catokčha. Nužquiz werar taku čhiini žoñinacami, nižaza toscar taku čhiini žoñinacami pizcpacha pajasačha učhumqui.

YOOZQUI ANCHA MUNAZIŇI KUZIZZA

⁷ Pecta jilanaca, cullaquinaca, Yoozpankazza učhum porapat zuma munazkatñiqui. Jaziqui učhumqui tjappacha porapat zuma munazizpančha. Jakziltat zuma munazičhaja jalla niiqui Yooz maatičha. Nižaza Yooz pajčha. ⁸ Yoozqui ancha munaziñi kuzzizza. Jaziqui jakziltat ana munaziñi kuzzizlaja, jalla niiqui ana Yooz pajčha. ⁹ Yooz Ejpqui tii muntuquiz niiz zinta Majch cuchanžquichičha učhum Yooztan wiñaya kamzjapa, wali cuntintu. Jalla nuž cuchanžquitiquiztan Yoozqui učhumquiz niiz munaziñi kuz tjeezičha. ¹⁰ Yoozqui ultimu zuma munaziñi kuzzizpančha. Yooz Ejpčha učhum k'ayachichiqui. Nekztan niiz Majch cuchanžquichičha. Yooz Majchqui učhum uj laycu ticzičha, učhum ana casticta cjisjapa. Nekztan zuma munaziñi kuzqui jaknužt cječhaja, nii zizza učhumqui.

¹¹ Pecta jilanaca, cullaquinaca, učhumtan ancha munazičha Yooz Ejpqui. Jaziqui učhum nižtakaz porapat zuma munazizpančha. ¹² Anaž jakzilta žoñimi Yooz cherčha. Ana

Yooz cheržcumi zuma munazičhaja, jalla nii žoņiqi Yooztan tsjii kuzzizza. Nižaza Yooz munaziņi kuz, jalla nižta kuzzizza nii žoņiqi. ¹³Yooz Ejpqi niž Espiritu Santo učhumquiz tjaachiča. Jalla nekztan Yooztan učhumtan tsjii kuzzizza, nii zizza učhumqui. ¹⁴Yooz Ejpqi niž Majch cuchanžquichiča žoņinaca liwriizjapa. Nii Yooz Majch cherchinča wejrnacqui. Nekztan ančhucaquiz nii puntu tjaajinchinča. ¹⁵Jakziltat “Yooz Majchča Jesucristuqi”, cjičhaja, jalla niiča Yooztan tsjii kuzzizqui. Nižaza Yoozqui nižtan tsjii kuzzizza.

¹⁶Yoozqui učhumtan anča munaziča, jalla nii zizza učhumqui. Nižaza nii criičha učhumqui. Yoozqui munaziņi kuzzizza. Jaziqi jakziltat munaziņi kuzzizpanžlaja, jalla niiča Yooztan tsjii kuzzizqui. Nižaza Yoozqui ninacžtan tsjii kuzzizza. ¹⁷Nuž kamcan juc'ant juc'ant munaziņi kuzziz cjiša učhumqui, Jesucristuž irat kuzziz cjišcama. Jalla nekztan juyzuquiz ana eksnaquičha učhumqui. ¹⁸Munaziņi kuzziz žoņinacaqui ana Yoozquin eksniča. Zuma munaziņi kuzziz žoņinacaqui anaž čhjulumi eksnasača. Jalziltat eksni kuzzizlaja, jalla niiqui Yooz casticz eksa. Jalla nižtiquiztan anaž zuma munaziņi kuzzizza nii eksni žoņinacaqui.

¹⁹Yoozqui učhumtan zuma munaziča. Jalla nekztanaqui učhumqui Yooztan munaziča. ²⁰Jakziltat “Wejrqi Yooztan zuma munaziņi kuzziztča”, chiičhaja, jalla niiqui niž jilanacžtan ana chjaawjkatņipanča. Niiž jilanacžtan chjaawjkatčhaja, jalla niiqui anaž Yooztan zuma munaziņi kuzzizza. Inapankaz “Wejrqi Yooztan zuma munaziņi kuzziztča” cjiča. Toscana chiiča. Nii žoņinacaqui cherta jilanacžtan anazuma munazičhaja, jalla niiqui žaknužt ana Yooz cheržcu Yooztan munaziņi kuzziz cjesajo? Anapanž cjesača. ²¹Yoozqui učhum mantichiča tuž cjan:

—Jakziltat Yooztan munaziņi kuzzizlaja, jalla niiqui niž jilanacžtanami zuma munaziņi kuzzizkaz cjis waquiziča.

5

UČHUMQUI ANAWALINACA ATIPČHA

¹Jesusača Yooziž cuchanžquita Cristuqi. Jakziltat nii Jesucristužquin criičhaja, jalla niiča Yooz maatiqi. Tjapa Yooz maatinacami Yooz Ejpžtan munaziņi kuzzizza. Nižaza Yooz Ejpžtan munaziņi kuzzizalaj niiqui, Yooz Ejpž maatinacžtan munaziņi kuzzizkazaza. ²Nižaza jakziltat Yooztan munaziņi kuzzizalaja, jalla niiqui Yooz mantitanacaž cazza. Jalla nekztan Yooz maatinacaqui porapat zumaž munaziča. Niiž zizza učhumqui. ³Yooztan munaziņi kuzziz žoņiqi Yooz mantitanaca cazza. Nii Yooz mantitanacaqui anača ch'ama. ⁴Yooz mantita cazcu, Yooz maatinacaqui anawalinaca atipča. Jakzilta žoņit Yoozquin tjapa kuz criičhaja, jalla niiqui anawalinaca atipča. ⁵Žakziltat anawalinaca atipjo? Jakziltažlaj Jesús cjita Yooz Majchquin tjapa kuztan, jalla ninacaž atipča anawalinacaqui.

YOOZ MAJCHČHA JESUCRISTUQUI

⁶Jesucristuqi tii muntuquiz tjontan, kjaztan bautistatača. Jalla nekztan cruzquiz ch'awcta ticziča. Kjaztan bautistaž cjen, jalla niiča tisticuqi, Yooz Majchča Jesucristuqi, cjan. Cruzquiz ch'awcta ljoc tjawkchiča. Jalla nii zakazza tisticuqi, Yooz Majchča Jesucristuqi, cjan. Yooz Espiritu Santuqi tisticuzakazza: Yooz Majchča Jesucristuqi, cjan. Nii Espiritu Santučha werarapan chiiņiqi. ⁷Arajpachquinaqui čhjep tisticunaca žejlča, Yooz Ejp, nižaza Taku cjita tjuuchiz Yooz Majch, nižaza Yooz Espiritu Santo. Nii čhjepultanaqui tsjiikaz chiiča. ⁸Nižaza tii muntuquiziqui čhjep tisticunacazakaz žejlča, Yooz Espiritu Santo, nižaza kjaztan bautis, nižaza cruzquiz ljoc tjawkz. Nii čhjepqui tsjiikaz chiiča: Jesucristučha Yooz Majchqi, cjan. ⁹Žoņž taku weraražlaja niiqui, Yooz taku juc'ant werarača. Werara chiiņi Yooz Ejpqi chiiča, tuž cjan:

—Jesucristučha Wejt Majchqi.

¹⁰Jakziltat Yooz Majchquin criičhaja, jalla niiqui persun kuzquiz zizza, Jesucristučha Yooz Majchqi, nii. Jalla niizakaz Yooz Ejpqi chiiča. Jakziltat Yooz taku ana criičhaja,

jalla niiqui Yooz toscara chiitažokaz nayčha. Yooz takuqui chiičha: Jesucristučha Yooz Majchqui, cjicanaqui. Jalla nii anaž criiz pecčha yekjap žoñinacaqui. Jalla nekztan Yooz toscara chiitažokaz nayčha nii ana criiñinacaqui. ¹¹Nižaza Yoozqui cjičha:

—Wejt Majchqui ančhuca ujquiztan ticzičha. Jalla nekztan ančhucqui wejttañ wiñaya kamaquičha, wali cuntintu.

¹²Jakziltat Yooz Majchtan tsjii kuzziz kamčhaja, jalla niiqui Yooztan wiñaya kamaquičha. Nižaza jakziltat Yooz Majchtan ana tsjii kuzziz kamčhaja, jalla niiqui Yooztan ana wiñaya kamasáčha.

ŽERZ TAKUNACA

¹³Ančhucqui Yooz Majchquin criičha tjapa kuztan. Jalla nekztan Yooztan wiñaya kamaquičha, wali cuntintu. Nii zizjapa, ančhucaquin cjižrčučha wejrqui.

¹⁴⁻¹⁵Učhumqui Yooz kuzcama mayizaquiž niiqui, nonžtaž cjequičha. Učhumž mayizta nonžtaž cjequiž niiqui, tjaataž cjequičha. Jalla nužupančha. Weraraž niiqui.

¹⁶⁻¹⁷Tjapa anawalinacami ujančha. Tsjii jilaqui uj paaquiž niiqui, Yoozquiztan mayizinspančha, pertunta cjeejo. Pero tsjii juč'ant anawal uj paaz kuzzizzalaj niiqui anaž pertunta cjesáčha. Niižta ana Yoozquiztan mayizina, pertunta cjeejuqui. Yekja ujnacami Yoozquiztan mayizinasáčha, pertuntaž cjeyajo.

¹⁸Yooz maatinacami anaž kuzin uj paasačha. Yooz maatinaca walja kjaradž cuitičha Yooz Majchqui. Nii anawal Satanás diabluqui Yooz maati Yooz kjarquiztan ana kjañi atčha. Nii zuma zizza ančhucqui. ¹⁹Yooz maatinacčhumčha učhumqui. Ana Yoozquin criichi žoñinacaqui, tjappacha Satanás diabluž mantuquiz žejlčha. Učhumqui nii zakaz zizza.

²⁰Yooz Majchqui tjonchičha učumnaca zuma intintazkatajo, nižaza werar Yooz pajajo. ¿Ject werar Yoozjo? Jalla niičha Jesucristo Yooz Majchqui. Jaziqi učhumqui nii werar Yooztan tsjii kuzziz cjissinčhumčha. Niižtan kamcan, wiñaya niižtan kamaquičha.

²¹Jilanaca, cullaquinaca, ančhucqui žoñiž paata yooznacquiztan zaraka, ana iya nekj macjata ančhucqui. Jalla nužupančha.

SEGUNDA CARTA DEL APOSTOL SAN JUAN

WERAR TAKU, MUNAZIŃI KUZ

¹Wejrqui Juan cjititĉha. Icliz jiliritĉha wejrqui. Jaziqui tii cartal cjjirzĉuĉha Yooz illzta cullacaquin tjappacha naaĉa maatinacĉquin. Wejrqui anĉhuc werara k'ayachuĉha. Niĉzaza tjapa Yooz taku criichinacaqui anĉhucĉ k'ayachiĉha. ²Uĉhum kuzquiziqui werar Yooz taku Źejlĉha, niĉzaza wiĉaya Źelaquiĉha. ³Niĉzaza zuma munaziĉni kuzziz kaman, Yooz Ejpĉtan niĉzaza Jesucristo Yooz Majchtan uĉhum yanapĉha. Niĉzaza uĉhum okĉcu, llan kuzziz cjiskatĉha.

⁴Yekjap am maatinaca cherchinĉha, Yooz takucama kamĉni. Nuĉupan, mantichiĉha Yoozqui. Nuĉ kamĉni cherĉcu, ancha chipchinĉha wejrqui. ⁵⁻⁶Cullacalla, anziqui am roct'uĉha, porapat zuma munaza. Nii mantitaqui anaĉha anztakaz. Tuquitanpacha uĉhumqui nuĉ mantitapanĉha. Jakziltat zuma munaziĉni kuzzizlaja, jalla niiqui Yooz mantitanacacama kamĉha.

Tuquitanpacha Yooz mantita nonzinĉhucĉha, zuma munaziĉni kuzziz cjee, jalla nii.

INCALLŃI ŹOŃINACA

⁷Tii muntuquiz muzpa Źoĉinacaqui ojklayĉha, Źoĉni incallcan. Ninacaqui anaĉ criĉha, Jesucristuĉ Źoĉĉ curpuchiz kamchiĉha tii muntuquiz, nii. Jalla ninacaĉha incallĉinacaqui. Niĉzaza Cristuĉ quintranacaĉha. ⁸Anĉhucqui nonĉna. Anĉhucqui Yooztajapaĉ langĉa. Nii langĉta cuitaquiĉha, ana pertiznaĉo, arajpachquin zumanaca tanzjapa.

⁹Jakziltat Jesucristuĉ tjaajinta yapzaja, jalla niiqui anaĉ Yooztan tsjii kuzziz kamĉha. Niĉzaza jakziltat Jesucristuĉ tjaajintacama ana kamĉhaja, jalla niiqui anazakazza Yooztan tsjii kuzzizqui. Pero jakziltat Jesucristuĉ tjaajintacama kamĉhaja, jalla niiĉha Yooz Ejpĉtan niĉzaza Yooz Majchtan tsjii kuzzizqui. ¹⁰Jakziltat anĉhucquiza tjonĉcu Cristuĉ tjaajinta ana niicama tjaajinĉhaj niiqui, anaĉ Yooztan tsjii kuzziz nii jilaqui. Anĉhucqui nii Źoĉni ana kjuyquiz kjawznaquiĉha. Anazaĉ tsaanaquiĉha. ¹¹Jakziltat nii anawal Źoĉĉquiz tsaanaĉhaj niiqui, nii Źoĉĉ anawal langz yanaptaĉokaz cjiĉha.

ŹERZ TAKUNACA

¹²Zumsira wacchi takunaca wejttta Źejlĉha. Pero tjappachaqui anal cjjirz pecuĉha. Anĉhucquiza tjonz pecuĉha, uĉhum pora parlizjapa, porapat cuntintu cjisjapa.

¹³Am cullaqui illizakazza Yoozqui. Naaĉa maatinacaqui saludos apayĉquiĉha. Jalla nuĉzakazza.

TERCERA CARTA DEL APOSTOL SAN JUAN

GAYO CJITAQUI ZUMAČHA

¹ Wejrqui Juan cjititčha. Icliz jiliritčha wejrqui. Gayo, amquin cjiyrzčuča. Yooz takucama kamcan, am k'ayachuča.

² Jila, amtal mayizinuča tjappacha walicama cjeajo, nižaza am curpu zuma žejtñi cjeajo. Am kuz walikazza, nii zizuča wejrqui. ³ Yekjap jilanacaqui wejtquiz tjonziča. Am puntu wejtquiz quint'ichiča, tuž cjan:

—Nii Gayuqui werar Yooz takucamaž kamča.

Jalla nuž zizcu ancha chipchinča. ⁴ Wejt jilanacaž werar Yooz takucama kamñipan zizcu, anchal cuntintučha wejrqui. Anaž čjulumi wejr juc'ant cuntintu cjskatñiqui žejlča.

⁵ Jila, walikam am paača, jilanaca yanapcan, ana pajta jilanacami. ⁶ Yekjap amiž yanaptanacaqui iclizquiz mazziča, tuž cjan:

—Nii Gayo cjita jilaqui ancha zumača. Ana pajta jilanacami yanapñipankazza. Nižaza okzñipankazza.

Gayo jila, jalla nužupan amqui tira yanapaquiča. Jilanacaž jiczquin okanami yanapz waquiziča. Jalla niic walikazza; jalla nuž cjenauqui Yooz kuzqui wali cuntintuž cjequiča.

⁷ Nii jilanacaqui Yooz sirwican ojklayñičha. Ninacaqui ana Yooz criichinacžquiztan ana čjul yanapñimi pecniča. ⁸ Jaziqui učumqui nii Yooz sirwiñi jilanaca yanapz waquiziča, ninaca werar Yooz taku parlažo.

DIOTREFES CJITAQUI ANAWALI PAAŃIČHA

⁹ Tuquiqui iclizquin cjiyrchinča. Tsjii žoñiqui weriž cjiyrta anaž nonz pecča. Wejrqui icliz jiliritčha. Pero nii žoñiqui anaž wejr jilirižtaka nayča. Diótrefes cjita tjuuchizza nii žoñiqui. Niikaz jilanaca juc'antiž mantiz pecča. ¹⁰ Wejrqui ančucaquin tjonachaj niiqui, jalla nekztan nii žoñiž anawali paatanaca paljayača ančucaquiz. Nii Diotrefesqui toscananaca parličičha wejtnaca quintra. Iya anawalinaca paachizakazza. Nižaza jilanacaž tjonznunami, ana risiwz pecniča. Yekjap criichinacazti wali quiyas pecča. Nii Diótrefeszi cjiñičha:

—Anapanž nii jilanacžtan zumaž risiwaquiča.

Nižaza zuma risiwñi jilanaca iclizquiztan chjatkatñičha. ¹¹ Jila, jaziqui anača nižta cjisqui. Nii žoñiž paatanaca ana yatekaza. Amzti, walikam paača. Jakziltat walinaca paačhaja, jalla niiqui Yooz cherchi kuzziz kamča. Jakziltat anawalinaca paačhaja, jalla niiqui anaž Yooz pajča, ana Yooz cherchi kuzzizza.

DEMETRIO CJITAQUI WALI PAAČHA

¹² Tjappach žoñinacaqui Demetriuž puntu cjiča:

—Zumača nii Demétrio cjita jilaqui. Niiž paatanacami werar tawk jarupankazza.

Nižaza wejrnacmi chiyučha, Demetriuqui zuma jilača, nii. Ančhucqui zizza, wejrnacqui werar takul chiyiñičha, nii.

¹³ Zumsira wacchi takunacaqui wejta žejlča cjiyrzjapa. Pero tii cartiquiz anal iyal cjiyrz pecučha. ¹⁴ Wajilla amquin tjonzquiz pecučha. Jalla nekztan učumporaž palt'aquiča.

¹⁵ Llan kuzziz cjee. Tekzta jilanacaqui saludos apayžquičha. Nižaza amqui wejtnaca jilanacžquiz tsaanžinaquiča, zapa maynižquiz. Jalla nužukazza.

LA CARTA DEL APOSTOL SAN JUDAS

¹ Wejr Judasqui Jesucristuž manta payiñ žoñtča nižaza Jacobž lajkča. Wejrqui ančhucaquin cjjržcuča. Yooz Ejpqui ančhuc kjawziča, niiž maati cjeajo. Nižaza Yooz Ejpqui ančhucatan zuma munaziča. Nižaza ančhuc anawalinacquiztan cuitiča, Jesucristuž tjoncama. ² Yoozqui ančhucaquiz juc'antej okžla, nižaza juc'ant walikaj kamkatla, nižaza ančhucqui Yooziž ancha munasitaj cjila.

TOSCARA TJAAJIÑINACŽ PUNTU

³ Pecta jilanaca, cullaquinaca, wejrqui ančhucaquin anchal cjuñčinča. Jalla nuž cjuñžcu liwriiñi puntuquiztan ančhucaquin anchal cjjrż pecuča. Ančhucatan wejttan liwriita žoñinacača. Anawal tjaajiñinacž ančhucaquiz incallz pecchiž cjen tii cartal urgente apayžcača, ančhucaquiz chiižinzjapa. Yoozquin kuz tjaaz puntu werara tjaajintatača. Tsjemata tjaajintanacaqui anača werara niiqui. Werar tjaajintanacžquizkaz tjurt'iñi kuzziz cjee. ⁴ Yekjap ana ligitum criichi žoñinacaqui ančhucaquiz jamazit luzziča, ana kjanapacha. Ninacaqui ana wal žoñinacača. Yooz partiquiz luzcu, Yooz okžni kuz tsjii kjutñi intintazza. Ninacaqui cjiñiča, “Yoozqui učhum okzpanča, jaziqui čjul paatami walikazza”. Jalla nuž kamcan učhum Jesucristo Jiliržquiz anapan pajča. Pero criichi žoñinacž pajk Patrunača Jesucristuqui. Yekjat ana iya želasäča. Jaziqui ninacaqui Yooz kamañquiz anapan kamča. Tuquiqui profetanacaqui nižta kamñinacž puntuquiztan cjjrchiča, “Yoozqui ninacžquiz casticaquiča”, jalla nuž cjican.

⁵ Ančhucaž zizziz cjenami, ančhucaquiz zumpacha cjuñkatz pecuča tii puntuquiztan. Tuqui Yooz Jiliriqui Egipto yokquiztan Israel wajtchiz žoñinaca jwessiča. Nekztan jwessiž cjenami ana criichinacžquiz ticzkatchiča. ⁶ Nižaza tii cjuñzna. Yekjap anjilanacaqui Yooziž tjaata puesto ana iya wacaychiz pecchiča, nižaza arajpach puestuquiztan zarakchiča. Jalla nižtiquiztan Yoozqui ninaca presužtakaz čhjelinča. Wiñayjapa zumchiquiz chawc-tažtakaz žejlča Yooz pajk pjalz tjuñicama. ⁷ Nižaza Sodoma wajtquiz žejlñinacami Gomorra wajtquiz žejlñinacami, nižaza žcatinta wajtquiz žejlñinacami jalla nii ana wal anjilanacažtapacha ancha uj paachiča. Ninacaqui adulteriuquiz ojklayčiča. Nižaza tsjemata adulterio paachiča. Jalla nižtiquiztan Yoozqui ninaca casticchiča, wiñaya infiernuquin. Jalla nuž kjanapacha chiichiča, Yoozqui ana walinaca casticspanča, jalla nii.

⁸ Jalla nii Yooz casticz puntu zizcumi, ana zuma tjaajiñi žoñinacaqui chjuužta jaru ojklayča, “Yoozqui nižta wejtquiz tjaajinčiča, tsjii chjuužtiquiz” cjican. Nekztan adulteriuquiz ojklayča, nižaza Yooz Jilirizi mantita anaž cassa, nižaza poderchiz zajranacžquiz ararča. Jalla nuž chjuužta jaru anawali kamča. ⁹ Tsjii pajk arcängel Miguel cjita žejlča, walja poderchiz. Jalla nii anjilaqui diablužtan ch'aassiča Moisés curpu puntuquiztan. Jalla nuž ch'aascan, Miguel anjilaqui diablužquiz ana ararchiča; “Casticta cjee”, cjican. Antiz tiikaz chiichiča, “Yooz Jiliriqui amquiz ujžla”. Jalla nižtakaz chiichiča. ¹⁰ Pero nii ančhucatan kamñi anawali žoñinacaqui ana intintazñi kuzzizza. Poderchiz zajranacž quintra chiican, chjaawjkatča. Animalažtakaz persun kuzcamakaz ojklayniča. Jalla nuž ojklaytiquiztan persunjapa casticu zjjcča.

¹¹ Ninacžtaqui ana wali cjequiča. Cainž irata Yooz kamañquiz ana kamz pecča. Paaz ganz peccu, Balaam irata tsjii kjutñi ojklayča. Nižaza Corež iratažtakazza casticu zjjcča. Korequi Yooz uchta žoñinacž quintra paažcu ticziča. ¹² Ančhucqui Yooztajapa pijjstanaca paača. Ančhucaž cristian pijjsta paan, ninacaqui azipanča ančhucalta. Pijjistiquiz ancha anazuma lujlñi, nižaza licñi, nižaza ana zuma kamñiča. Ninacača Yooz ana rispitiñiqui. Persunjapakaz importiča. Anača yanapchuca, ančhucaž zuma kamajo. Ninacaqui ana chijñichiz tsjirižtakazza, nižaza tjamiž chjichta tsjirižtakaz. Nižaza ninacaqui anazuma

frutchiz muntinacažtakaz. Cajlžta muntinacažtakaz, žejtz wira anapan žejlčha ninacžtaqui. ¹³Tjamiž chjichta kjaz ljojkinacažtakazza. Ninacaž azzucca paatanacaqui kot anazum ch'utunacažtakazza. Nižaza ninacaqui tsjii kjutñi pertissi warawaranacažtakazza. Anawal zumchiquiz wiñayjapa castictaž cjequičha. Casticta cjsjapa, nii anawal tjaajiñinacaqui chjojtačha.

¹⁴Tsjii žoñiqui Enoc cjitatačha. Adanžquiztan pakallak wilta majchmajchquiztan tjonñitačha. Jalla nii Enocqui Yooztajapa chiichičha tuž cjan: “Yooz Jiliri qui warank warank anjilanacžtan tjonaquičha, tjapa žoñinaca pjalzjapa. ¹⁵Jalla nuž pjalžcan Yooz Jiliri qui tjapa anawal žoñinacž ujnaca tjeeznaquičha; tjapa ninacaž anawali paatanaca tjeeznaquičha. Nižaza Yoozqui tjapa niiz quintra anawali chiiitanaca tjeeznaquičha”. Jalla nuž mazinchičha Enoc cjitaqui. ¹⁶Nii anawali žoñinacačha quijakaz pecñinacaqui. Nižaza iñarcan chuchkaz pecñinaca; nižaza ninacaž kuz pecta jaru ojklayñičha. Nižaza mitarazzi takunacžtan chiiñičha. Nižaza žoñinacž kuz wali cjsjapa chiiñičha, nii žoñinacžquiztan cusasanaca ganzjapa.

CRIICHI ŽOÑINACŽQUIZ CHIIŽINTA TAKU

¹⁷⁻¹⁸Pecta jilanaca, cullaquinaca, jalla tii puntuquiztanž cjuñzna. Učhum Jesucristo Jilirž apostolonacaqui ultim timpu puntuquiztan ančhucaquiz mazinchičha, tuž cjan; “Ima tii muntu tucuzinžnan, anawal žoñinacaqui jecžnaquičha, Yooz kamañ puntunacž quintra chiican. Ninacaqui persun anawal pecta kamañ jaru kamaquičha”. Jalla nuž mazinchičha apostolonacaqui. ¹⁹Jalla nižta anawali žoñinacaqui žoñi t'akñičha, nižaza porapat quintra tanaskatñičha. Yooz Espiritu Santuqui ninacž kuzquiz ana žejlčha. Ninacaqui persun kuzcamakaz kamčha.

²⁰Pecta jilanaca, cullaquinaca, Yooz puntunaca tjaajintanacžquiz tjurt'iñi kuzziz cjee. Nižaza Espiritu Santuž aztan Yoozquin mayiza, juc'ant zuma kamañchizpan cjsjapa.

²¹Nižaza zuma kama, Yooz ančhucatan tira zuma munazizjapa. Nižaza učhum Jesucristo Jilirž tjonz tjuñi tjewžna. Nii tjuñquiziqui Jesucristuqui niiz okžni kuzziz cjen arajpachquin Yooztan wiñaya kamañjapa ančhucaquiz cjiskataquičha.

²²Turwayzi kuzziz žoñžquiz zumpacha paljaya, zuma tjaajintanacquiz tjurt'iñi kuzziz cjsjapa. ²³Infiernuquin tjojtšnak cjenpacha kjawžna, liwriita cjsjapa. Nižaza ujchiz žoñinacžquiz okžni kuzziz cjee. Anawal žoñinacžquiz okžcan, persun kuzquiz cuitasaquičha, zuma kamañquiztan tsjii kjutñi ana chjitchta cjsjapa. Ančhucqui ana zuma kamañchiz žoñinacžtan ojklaycan nižta ana zuma kamañchiz cjesačha. Jalla nižtiquiztan anawal žoñinacžquiz okžcan, cuitasa ninacž irata ana cjsjapa.

²⁴⁻²⁵Yoozqui zinta Yoozza. Niičha Jesucristo Jilirž cjen učhum Liwriñiqui. Niičha ancha azzizqui, učhumnaca cuitizjapa, nižaza ančhuc ana ujquiz tjojtžjapa, nižaza niiz yujcquiz ana ujchiz prisintizjapa. Jalla nekz, Yooz yujcquiz žejlcan, ančhucqui ancha cuntintuž cjequičha. Anztajapami wiñayajapami Yoozqui honorchizkaj cjila, nižaza niiz arajpach watjaqui zumapaj cjila, nižaza tjapa azzizkaj cjila, nižaza tjapa mantiñej cjila. Jalla nužoj cjila. Amén.

APOCALIPSIS O REVELACION A SAN JUAN

¹ Yoozqui tii liwruquiz cjiirta puntunaca Jesucristužquiz mazinchiča, Jesucristo niž sirwiñi žoñinacžquiz maznajo. Tii puntunacaqui waji wataquiča. Jesucristuqui niž sirwiñi Juanžquin anjila cuchanžquichiča, tii liwruquiz cjiirtanaca zizta cjeajajo. ² Wejr Juanqui tjapa nii zizta puntunacžquiztan cjiiruča, jaknužt wejr nii zizzinžlaja, jalla nužupan. Jaziqui Yooz takumi nižaza Jesucristuž maztami chiyuča. Nižaza tjapa weriž chertanacami chiyuča. Tjappacha werarapan cjiiruča.

³ Jakziltat žoñinacžquiz tii Yooziž tjaata takunaca liičhaja, jalla niiqui cuntintuž cjequiča. Nižaza jakziltat tii Yooziž tjaata takunaca nonžaja, nižaza niž jaru kamčhaja jalla niiqui zakaz cuntintuž cjequiča. Tii puntunaca cumplis timpunaca žcatžinžquiča.

JUANQUI ICLIZANACŽQUIN CJIJRČHA

⁴ Wejr Juanqui pakallawk Asia yokquin žejlñi iclizanacquin cjiiruča. Yoozqui ančhucaquiz zumpachaj yanapt'ila, nižaza Yoozqui ančhucaquiz walikaj kamkatla. Yoozqui tuquitanpachami anzimi jaztanami wiñayjapa tirapan žejlča. Yooz mantiz julz yujcquiz pakallawk zuma ispiritunaca žejlča. Ninacaqui ančhuc walikaj kamkatla. ⁵ Nižaza Jesucristuqui ančhuc walikaj kamkatla. Jesucristuča ljitum chiiñiqui. Nižaza primir ticziquiztan jacatatchi žoñiča. Nižaza Jesucristupanča tjapa tii muntuquiz žejlñi mantiñi reynacžquiz mantiñiqui. Cristuqui učum ancha okziča. Nekztan učum ujnacquiztan ticziča. Jalla nuž ticžcu, učum liwriičiča, niž ljok tjawkchiž cjen. ⁶ Nekztan Jesucristuqui učum utchiča, nižtan chicapacha mantiñijapa, nižaza Yooz Ejpžquiz rispitiñijapa. Jalla nii Jesucristuqui wiñayjapa honorchiz cjila. Nižaza wiñayjapa mantiñej cjila. Jalla nužoj cjila. Amén.

⁷ Cjuñzna. Tsjii nooj Jesucristuqui tsjir taypiz tjonacquiča. Jalla nuž tjonan tjapa žoñinacaqui nii cheraquiča; Jesucristo quintra paañi žoñinacami nii zakaz cheraquiča. Nekztanaqui tjapa wajtchiz ana criñi žoñinacaqui kaaquiča, ninaca wasticz ora tjonchiž cjen. Jalla nužoj cjila. Amén.

⁸ Yooz Jiliriqui tuž cjiča: “Wejrtča primirquiztan tjappacha kalltichintqui. Nižaza wejrtča tjappacha mantiñtqui. Jaknužt tsjii litraqui “A”quiztan kallantičhaja, nižaza “Z”quin žerzaja, jalla nižtitča wejrqui tjappachtajapa”. Jalla nuž cjiča tjapa aztan mantiñi Yooz Jiliriqui. Niiqui anzimi, tuquitanami, jaztanami žejlča.

⁹ Wejr Juanqui ančhucaquin cjiiržcuča. Wejrqui ančhuca jiltča, Jesucristužquin kuz tjaatiquiztanaqui. Učhumqui Yooz mantuquiz kamchiz cjen, sufriča. Pero čjul sufritam žejlčhaja, Jesucristuqui učumnacquizimi pasinsis kuzziz cjiskatča. Wejrqui kot taypiz kolta yokquiz želuča, Patmos cjita tii yoka. Jalla ticju preso želuča, Yooz taku parlitiquiztan, nižaza Jesucristuž puntuiztan maztiquiztan.

JESUCRISTUŽ CHERTA

¹⁰ Tsjii Yooz tjuñquiziqui Yooz Espiritu Santuqui wejt kuzquiz ancha tjonchiča. Tjonžcu jalla tii watchiča. Tsjii alto jora nonzinča wir kjutñi, trompetž pekz joražtakaz nonzinča. ¹¹ Nii joraqui tuž cjichiča:

—Wejrtča primirquiztan tjappacha kalltichintqui. Nižaza wejrtča tjappacha mantiñtqui. Jaknužt tsjii litraqui “A”quiztan kallantičhaja, nižaza “Z”quin žerzaja, jalla nižtitča wejrqui tjappachtajapaqui”. Jaknužt amqui cheračhaja, jalla nii chertanaca cjiirja. Nekztan nii libro pakallawk iclizanacquin apaya, Efeso iclizquin, nižaza Esmirna iclizquin, nižaza Pérgamo iclizquin, nižaza Tiatira iclizquin, nižaza Sardis iclizquin, nižaza Filadelfia iclizquin, nižaza Laodicea iclizquin. Jalla nii Asia cjita provinciquin žejlñi iclizanacquin nii cjiirtaqui apaya.

¹² Jalla nekztanaqui wir kjutñi kjutzinča chertzjapa, jectpan nižta paljayzqui, nuž cjan. Jalla nuž kjutzcu tsjii pakallawk kor cantilero chertzinča. ¹³ Nii cantiler taypiz tsjii

žoñižtakaz tsjitchi želatča. Niiqui tol zquitchiztača, nižaza quecquiz tsjii pal kor sinturunchiztača. ¹⁴ Nižaza niž ach charami chiwitača, chiw chomažtakaz, nižaza chiw kjatnižtakaz. Niiž čhujcquinacaqui ujžtakaz c'ajatča. ¹⁵ Niiž kjojchanacaqui zuma llijatča jurnuquiz tjiñanta korižtakaz. Niiž joraqui wacchi kjaz pujquiz kjawñižtakaztača. ¹⁶ Niiž žew kjarquiz pakallaw warawaranaca tanzitača. Niiž atquiztan pajk ar cuchillužtakaz ulnatča, porap kjuttan archiz. Niiž yujcqui zmali tjuñižtakaz c'ajatča.

¹⁷ Jalla nii cheržcu, niiž kjojchquiz tjojtsinča, ticzižtakaz. Niizti wejr lanziča žew kjaržtan. Jalla nuž lanžcu tuž cjichiča:

— Wejr ana eksna amqui. Primirquiztanpacha asta wiricama želuča. Wejrtča juc'ant chekanaqui tjappachquiztanami. ¹⁸ Wejrtča žetiñtqui. Wejrqui ticziča. Pero wejtquiz cherzta. Wiñayjapa žetuča. Nižaza wejrqui mantuča ticzmi, nižaza ticz yokami. ¹⁹ Jaziqui cjjiraquiča jaknužum cherčhaja, jalla nii. Cjjiraquiča tii timpu watchinacami, nižaza jazta timpu tjonanami, nii. ²⁰ Wejt žew kjarquiz pakallaw warawaranaca žejlča. Jalla nii cherchamča, nižaza pakallaw cantilerunaca cherchamča. Ninaca tuž cjiča: nii pakallaw warawaranacaqui pakallaw iclzanacz irpiñinacača. Nii pakallaw cantilerunacaqui pakallaw iclzanacača.

2

EFESO ICLIZQUIZ CHIITA TAKUNACA

¹ Efeso icliz irpiñižquin tuž cjjira: “Tsjiiqui žew kjarquiz pakallaw warawara tanža, nižaza pakallaw kor cantiler taypiquiz ojklayča. Jalla niiqui tuž cjiča: ² Ančhucaž paatanacami pajuča. Ančhucqui wejtajapa ancha langža. Nižaza sufrichiž cjenami ančhucqui tjurt'iñi kuzzizza. Nižaza ančhucqui ana zum kamañchiz žoñinaca ana cherz pečča. Nižaza jakzilat 'apostultča wejrqui' cjian ojklayčhaja, jalla ninaca wawczinčhucča ančhucqui, werara ana werara jalla nii. Jalla nižtquiztan jecnat ana werar apóstol ojklayčhaja, jalla nii zizzinčhucča. ³ Wejrqui zizuča, ančhucqui pasinsis kuztan sufriča, wejtquiz criican. Nižaza wejtquiz kuzziz cjen walja awantichinčhucča. Nižaza wejtajapa walja langzinčhucča, ana ocha nayžcu. ⁴ Pero tsjii ujchizta ančhucqui. Jaknužt ančhucqui primero tjapa kuz wejtta ancha munazitčhaja, jalla nižta ana tira munaziča. Anz wejtta upa munaziča. ⁵ Cjuñzna, jaknužt ančhucqui primero ancha zuma munaziñi kuzziz cjistčhaja. Nižaza cjuñzna jaknužt anziqiu upa munaziñi kuzziz cjistčhaja. Jalla nii cjuñzcu, 'ujchizpantča wejrqui' cjis waquiziča. Nekztan wilta ancha zuma munaziñi kuzziz cjee, wilta zuma kamzjapa. Ana wilta zuma munaziñi kuzziz cjequiz niiqui, am cantileruqui kjañtaž cjequiča; nekztan ančhuca icliza tjatanta cjequiča. ⁶ Pero ančhucaltajapa tsjii zuma obra žejlča, ančhucqui ana wal nicolaítas parti žoñinacz quinrajapa chjaawjkatča, jalla nii. Wejrqui ninacz quinrajapa zakal chjaawjkatuča. ⁷ Jakzilat nonžni cjuñchiz cječhaja, nonžla Espiritu Santuž iclizziz žoñinaczquiz chiitaqui. Jakzilat anawalinacquiztan atipačhaja, jalla niižquiz wejrqui permiso tjaa-ača, žeti tjaañi muntiquiztan lulajo. Yooz zuma yokquin žejlča nii zuma muntiqui”.

ESMIRNA ICLIZQUIZ CHIITA TAKUNACA

⁸ Esmirna icliz irpiñižquin tuž cjjira: “Tsjiiqui primirquiztanpacha wiricama žejlča. Jalla niiča juc'ant chekanaqui tjappachquiztanami. Niiqui ticziča, nižaza wilta žejtñi cjisšiča. Jalla niiqui tuž cjiča: ⁹ Wejrqui zizuča, ančhucqui ancha sufriča, nižaza t'akjiri žejlča. Pero ricachužtakaza ančhucqui, Yooz wajtchiz žoñinacz cjian. Judío žoñinacaqui ančhuca quintra ancha anawal takunaca chiiča. Ninacaqui anača ultim werar judionacaqui. Ninacača Satanás diabluž partiquiziqui. ¹⁰ Jaknužt ančhucqui sufračhaja, nuž sufrisquiztan ana tsuca. Cwitasa, diabluqui yekjapanaca ančhucaquiztan carsilquiz chawckataquiča, ančhucaž ujuiz tjojtskatzjapa. Ančhucqui tunca tjuñi intiru ancha sufraquiča. Ticzcama wejtquiz tjurt'iñi kuzziz cjee. Nekztanaqui wejrqui ančhucaquiz wiñayjapa žeti tjaa-ača, tsjii premiužtakaz. ¹¹ Jakzilat nonžni cjuñchiz cječhaja, jalla niiqui nonžla, Espiritu Santuž iclizziz žoñinaczquiz chiitaqui. Jakzilat ana walinacquiztan atipačhaja, jalla niiqui infiernuquin castictiquiztan liwriitaž cjequiča.

Infiernuquin casticzqui curpumi animumi wiñaya sufriča. 'Pizc ticz' cjetača nii infiernuquin sufrisqui”.

PERGAMO ICLIZQUIZ CHIITA TAKUNACA

¹²Pergamum icliz irpiñižquin tuž cjiira: “Tsjiiqui porap kjuttan ar cuchillužtakaz žejlča. Jalla niiqui tuž cjiča: ¹³Wejrqui pajuča, tjapa ančucaž paatami. Jakziquin Satanás diabluqui mantičhaja, jalla nicju ančhuc žejlča. Jalla nižta žejlchiz cjenami tirapanž wejtqui tjurt'iñi kuzzizza. Wejtquin kuz tjaazqui ana jaytiča, anča sufrichiž cjenami. Nii anča sufris timpuquiz tsjiiqui ančhucaquiztan Antipas cjitaqui contataquiča. Antipasqui wejt puntuquiztan tisticu cjicanaqui zuma ticlarñiča, nižaza wejtquiz kuz tjaañipanča. Jakziquin Satanás diabluqui mantičhaja, jalla nicju Antipas contataquiča. ¹⁴Nonžna; tsjii kjaž ujnaca ančhucž quintra tjeeznuča. Yekjap ančhucaquiztan anawal tjaajintanaca catokchinčhucča. Nii tjaajintanacaqui Balaamž cjeta tjaajintažtakazza. Tuquita timpuqui nii Balaamqui Balak cjeta žoñžquič tjaajziča, jaknužt Israel žoñinaca ujquiz tjojskatchucažlaja, jalla nii. Nekztanaqui Balak cjitaqui Israel žoñinaca ujnacquiz tjojskatchiča. Jaziqui Israel žoñinacaqui adulterio paachiča, nižaza žoñiž paata yooznacquiz tjaata čhjeri lujlchiča. Jalla nižta ujnacquiz tjojskatchiča Balak cjitaqui. ¹⁵Nižaza yekjap ančhucaquiztan nicolaítas tjaajintanaca catokchinčhucča. Ninacž tjaajinta quinrajapa chjaawjkatuča. ¹⁶Ančucaž anawali ujnaca paatiquiztan 'ujchizpantča' cjis waquiziča; kuz campiiz waquiziča. Ujnacquiztan ana jaytaquič niiqui, ančhucqui castictaž cjequiča. Wejrqui ančhucaquiz wajilla tjonača, ujchiznacž quintra paazjapa. Wejt atquiztan ulanñi ar cuchillžtan ninacž quintra paa-ača. ¹⁷Jakziltat nonžni cjuñchiz cječhaja, nonžla, Espiritu Santuž icliz žoñinacžquič chiitaqui. Jakziltat anawalinacquiztan atipačhaja, jalla nižžquin ana pajta maná tjaa-ača, lujljzapa. Nižaza nižžquin tsjii chiw maz tjaa-ača. Nižaza chiw mazquič niž ew tjuu cjiirtaž cjequiča. Nii ew tjuuqui ana jakziltami zizza, nii tanzñi žoñikaz zizaquiča”.

TIATIRA ICLIZQUIZ CHIITA TAKUNACA

¹⁸Tiatira icliz irpiñižquin tuž cjiira: “Tsjiiqui žejlča, ujžtakaz c'ajñi čhjujčchiz, nižaza nižž kjočhanacaqui jurnuquiz tjiñanta korižtakazza. Jalla niiča Yooz Majchqui. Niiqui tuž cjiča: ¹⁹Wejrqui ančucaž paatanacami pajuča. Ančhucqui zuma munaziñi kuzzizza, nižaza wejtquiz tjapa kuztan criiča, nižaza wejtquiz tjapa kuztan sirwiča, nižaza pasinsis kuztan sufriča. Ančucaž primir paata obranacquiztan ančucaž anza paata obranaca juc'ant zumača. ²⁰Wejrqui cjiwča, tii ujchizza ančhucqui. Tsjaa anawal maataka žejlča, Jezabel cjiti maatakažtakaz. Naaqui cjiñča, 'Wejrtča Yooz taku parliñtqui'. Jalla nuž cjican, wejtquiz sirwiñinacžquič incallča. Naaža incalltiquiztanaqui criiči žoñinacaqui adulteriuquič ojklayča; nižaza žoñiž paata yooznacquiz tjaata čhjerinaca lujlča. Jalla nuž ana zuma tjaajnan, ančhucqui naaža puntuquiztan ana kjaž cjiñčhucča. Pero nii anawal tjaajintaž quintra chiiz waquiziča. ²¹Wejrqui pasinsis kuz tjewzinča, naaqui 'ujchizpantča' cjican ujnacquiztan jaytizjapa. Pero naaqui uj paaznacquiztan anapan jaytiz pecča; uj paaz pecča. ²²Jalla nižtiquiztan naa sufriskatača. Nižaza jakziltat naatan chica wejt quintra ujnaca paačhaja, jalla ninacazakaz anča sufriskatača. Naaža tjaajinta anawalinaca paazquiztan ana jaytaquič niiqui, panž sufriskattaž cjequiča. ²³Naa irat ana zum kamañchiz žoñinaca conača. Jalla nekztan tjapa iclizanacquiz žejlñi žoñinacaqui naaznaquiča, wejrqui čhjul žoñiž kuzquič pinsitami zizuča. Nižaza paata obranacquiztan jama zapa maynižquič zumanacal tjaa-ača. ²⁴⁻²⁵Parti ančhuc Tiatir criichinacaqui naaža tjaajinta ana catokchinčhucča. Satanás diabluž chjojzaka tjaajintanaca ana mitisñi cjissinčhucča. Ančhucaquič tuž cjiwča, jaknužt ančhucqui wejt tjaajintanaca catokčhaja, jalla nižta tirapan catokaquiča, wejr tjonzcama. Ana iya mantuča. ²⁶Jakziltat anawalinacquiztan atipačhaja, nižaza tii muntu tucuzincama wejt munañpi jarupanž kamčhaja, jalla nižžquič wejrqui mantiz poder tjaacha nacionanacchiz žoñinacžquič mantizjapa. ²⁷Jaknužt wejt Yooz Ejpqui mantiz poder wejtquič tjaatčhaja, jalla nižta irata wejrqui mantiz poder ninacžquič tjaa-ača. Jalla nižtiquiztan ninacaqui anawali paañi žoñinacžquič zuma c'aripacha mantaquiča, tsjii ljoc mazca t'unapacha

kjolsnas, jalla nižta. ²⁸ Nižaza wejrqui ninacžquiz zumanacal tjaa-ača wenzta chaww warawaražtakaz. ²⁹ Jakziltat nonžni cjuñchizlaja, jalla niiqui nonžla, Espiritu Santuž icliz žoñinacžquiz chiitaqui”.

3

SARDIS ICLIZQUIN CHIITA TAKUNACA

¹ Sardis icliz irpiñižquin tuž cjiira: “Tsjiižta pakallaww Yooz ispiritunaca žejlča, nižaza pakallaww warawaranaca žejlča. Jalla niiqui tuž cjiča: Ančucaž paata obranaca pajuča. Žoñinacaqui ančuca puntuquiztan cjiñiča, ‘Zuma kamañchizza’ cjiñiča. Jalla nuž chiichiž cjenami, ultimu ana zum kamañchizza; ticzižtakazza ančucqui. ² Ančucqui ana zuma kamañanaca eca. Zuma kamañquiz tjurt'iñi kuzziz cjee. Tira anawali kamañchizlaj niiqui, castictaž cjequiča. Wejrqui ančuca paata obranaca yatisinzinča, Yooz yujcquiz anawaliča, nii. ³ Cjuñzna ančucqui, tuqui catokta tjaajintanacami, nižaza nonztanacami panž catoka. Jaziqui nii jaru wilta zumapan kama; nižaza ančuca ujnaca paaznacquiztan jayta, ‘ujchizpantča’, cjičan. Ančucqui ana zuma kamañquiztan ana ecaquiz niiqui, castictaž cjequiča. Wejrqui tiripintit tjonacha, tsjii tjañižtakaz. Ana pinsita orquiz tjonacha, ančuc casticjapa. ⁴ Tsjii kjaž ančuc Sardis žoñinacaqui zuma kamañchizza. Ančucča zuma ana ch'izlli zquitichiztakazqui. Jalla nižtiquiztan ančuc zuma žoñinacaqui wejtta chicaž juc'ant zuma kamaquiča zuma chiw limpu zquitichiztakaz. Jalla nuž waquiziča ančucaltaqui. ⁵ Jakziltat anawalinacquiztan atipačhaja, jalla ninacaqui zuma kamañchiz cjequiča zuma chiw limpu zquitichiztakaz. Nižaza ninacž tjuunaca anal akznača žejtñi žoñinacž tjuu apuntita liwruquiztan. Nižaza wejt Yooz Ejpž yujcquiz, nižaza Yooz anjilanacž yujcquiz ninacž puntuquiztan ticlarača, ‘Wejt partiquizza tinacaqui’ cjičanaqui. ⁶ Jakziltažlaja nonžni cjuñchiz, nonžla, Espiritu Santuž icliz žoñinacžquiz chiitaqui”.

FILADELFIA ICLIZQUIZ CHIITA TAKUNACA

⁷ Filadelfia icliz irpiñižquin cjiira: “Tsjiiča juc'ant zumaqui; nižaza lijitumača. Niiča David jilirž mantiz poderchizqui. Nii žoñiqui Yooz partiquiz luzkatasaz niiqui, anaž jecmi nii žoñiž luztiqiz atajasača. Nižaza Yooz partiquiz ana luzkatasaz niiqui, anaž jecmi luzkatasacha. Jalla niiqui tuž cjiča. ⁸ Wejrqui ančucaž paata obranaca pajuča. Ančucaltajapa trabajo tjaacinča wejtta langzjapa. Anaž jecmi ančuc atajasača. Ančucqui ana suti azzizza. Jalla nuž ana zuti azziz cjenami, ančucqui wejt taku tirapanž catokchinčucča, nižaza ančucqui wejt puntuquiztan ana k'otchinčucča, ‘Jesuscristo anal pajuča’ cjičanaqui. ⁹ Nonžna. Yekjap žoñinacaqui cjiñiča, ‘Wejrnačča Yooztajapa judío žoñinacaqui’. Jalla nuž chiican, k'otča. Ultimu ana Yooztajapača nii žoñinacaqui. Pero Satanás diabluž partiquiz kamñi žoñinacača. Nonžna. Wejrqui ančuca yujcquiz ninaca quillskatača, ančucaquiz rispitzjapa. Nižaza wejrqui ninaca zizkatača, ančucatan wejtta zuma munaziz, jalla nii. ¹⁰ Wejt mantita ortin jaru kamcan, ančucqui pasinsis kuztan sufrichinčucča. Jalla nižtiquiztan wejrqui ančuc liwriyača juc'ant sufris timpuquiztanaqui. Nii timpuqui tjonauiča. Nekztan tjapa tii muntuquiz žejlñi žoñinacaqui anča sufraquiča, wawčža cjisjapa. Jalla nii sufris timpuquiztan ančuc liwriyača. ¹¹ Nižaza wejrqui wajillal tjonacha. Yooz tjaajintanaca tirapan catokaquiča. Nekztan Yoozqui ančucaquiz zumanaca tjaaquiča, tsjii zuma premiužtakaz. Ančucqui ana jec žoñžquizimi tsjii kjutñi irpiskataquiča nii zumanaca ana pertisnajo. ¹² Jakziltat anawalinacquiztan atipačhaja, jalla nižquiz uchača Yooz kjuyquiz jiliržtakaz. Nižaza nii žoñinacaqui Yooz kjuychizpan cjequiča. Wejt Yooz Ejpž tjuu nižquiz cjiiržinača, Yooz kjuychiz žoñipan tjeezjapa. Nižaza wejt Yooz Ejpž wajtž tjuu nižquiz cjiiržinača. Wejt Yooz Ejpž wajtž tjuuqui ew Jerusalén cjiča. Yoozqui arajpachquiztan nii watja chjijunžcaquiča. Nižaza wejt ew tjuu nižquiz cjiiržinača, wejt jila cjičan. ¹³ Jakziltažlaj nonžni cjuñchiz niiqui, nonžla, Espiritu Santuž icliz žoñinacžquiz chiitaqui”.

LAODICEA ICLIZQUIN CHIITA TAKUNACA

¹⁴Laodicea icliz irpiñižquin tuž cjjira: “Tsjiiča juc’ant lijitumaqui. Jalla niiqui zuma razunžtanpan lijituma čiiča Yooz puntu. Primirquiztanpacha niíž cjen tjapa Yooz paatanaca paatatača. Jalla niiqui tuž cjiča: ¹⁵Wejrqui ančucaž paata obranaca pajuča. Ančhucqui ana anča wejt quintra paachinčhucča, nižaza ana anča wejtjapa paachinčhucča. Wejrqui pecuča, ančhucqui anča wejt quintra paazjapa, už anča wejtjapa paazjapa, jalla nuž pecuča. ¹⁶Jaziqi ana zumača ančuca kamzqui. Jalla nižta kamtiquiztan ančhuc chjatkatasacha, tsjii ana zuma jottažokaz. ¹⁷Ančhucqui cjinčhucča, ‘Ricachutča wejrnacqui. Jaziqi walikal želuča, ana čhjulumi pecuča’. Jalla nuž cjinčhucča. Jalla nuž čiičičiž cjenami ančhucqui ana naazinčhucča, t’akjirižtakaz ančhucqui, nižaza porižtakaz, zur žoñinacažtakaz, nižaza ana zquitčiz žoñinacžtakazza. Ultimu nižta kamañchizza ančhucqui. ¹⁸Jalla nižtiquiztan wejrqui ančucaquiz chiižinuča, wejtquiz kuzziz cjejajo. Ujquiz tjiñanta korižtakaz jalla nižta c’achja kamaña ančhucqui wejtquiztan mayz waquiziča, ultim ricachu cjisjapa. Nižaza čiw zquitinacažtakaz jalla nižta zuma kamaña wejtquiztan mayz waquiziča, ančuca azzuca ujnaca ana cherta cjisjapa. Nižaza čhjuj kullažtakaz wejtquiztan mayz waquiziča, ančuca ujnacquiztan čhetinta cjisjapa, nižaza ančhuc Yooz puntu intintiñi cjisjapa. ¹⁹Jakziltižtan wejrqui zuma munazičhaja, jalla niížquiz chiižinača. Nižaza zuma ewjt’uča, niíž kamaña azquichta cjejajo. Jalla nižtiquiztan weriž chiižintiquiztan, ančhucqui ‘ujchizpantča’ cjis waquiziča. Nižaza wejtquiz tjapa kuztan cjis waquiziča. ²⁰Nonžna. Wejrqui ančuca kuzquiz macjatčcu, kjawznuča. Jakziltat weriž kjawžta nonžaja, nižaza cazaja, jalla ninacž kuzquiz luzasača, nižaza ninacžtan chica zuma cjeeča. Nižaza ninacaqui wejtтан chica zuma cjequiča. ²¹Jakziltat anawalinacquiztan atipachaja, jalla niížquiz zuma honora tjaa-ača, wejtтан chica mantiñi cjisjapa. Jaknuž wejrqui tjapa anawalinacquiztan atipčcu, wejt Yooz Ejpžtan chica mantiñi cjisjaja, jalla nižta ninacaqui wejtтан chica mantiñi cjequiča. ²²Jakziltazłaja nonžni cjuñchiz, jalla niiqui nonžla, Espiritu Santuž icliz žoñinacžquiz čhiitaqui”.

4

ARAJPACHQUIN CHERTANACA

¹Jalla nekztanaqui wejrqui tsewc kjutñi cherchinča. Arajpachquin tsjii zana cjetzi, cherchinča. Nižaza tsjii jora nonzinča, trompet pekz joražtakaz. Jaknuž primero nonžta jora, jalla nižta irata. Nii joraqui wejtquiz paljayčiča, tuž cjian:

—Tekz tjonžca. Wejrqui amquiz tjeeznača, jaknuž nekztan watačhaja, jalla nii.

²Nii orapacha wejrqui Espiritu Santuž mantiz poderquiz želatuča. Jalla nuž žejlan, arajpachquin tsjii chawc mantiz julz cherchinča. Nižaza nii julzquiz tsjii julzi želatča.

³Nii julzi žejlñi žoñitača c’achja tsjitchiz, c’achja maznacažtakaz c’ajatča, jaspe cornalina nižta maznacažtakaz. Nižaza niíž mantiz julz muytata cumari arco iris cherchinča, esmeralda maztakaz c’ajatča. ⁴Jalla nii chawc mantiz julz muytata paatunc pusin mantiz puestunaca cherchinča, zapa puestuquiz tsjii žoñi julzi želatča. Nižaza ninacatača čiw tol zquiti cutchi; nižaza ninacž achquiz kor pillužtakaz tewžinta. ⁵Nii chawc mantiz julzquiztan liwjlwjiñižtakaz ulanchiča, nižaza nii julzquiztan rayu jorjorñižtakaz joranaca nonzinča. Nii chawc mantiz julz yujcquiz pakallak ujñi teyas pekžtatača. Nii pakallak teyasnacaqui pakallak Yooz ispiritunacača. ⁶Nižaza nii chawc mantiz julz yujcquiz kota želatča, ispijužtakaz c’ajatča.

Nižaza nii chawc mantiz julz muytata pajkpic latuquiztan pajkpic žejtñinaca želatča. Jalla nii žejtñinacaqui yujcquiztan tajquiztan tama čhjujquinacchiztača. ⁷Nii primir žejtñiqui león animalažtakaztača. Tsjii žejtñižti wac turužtakaztača. Tsjii žejtñižti žoñž yujcchiztača. Tsjii žejtñižti layñi aquilažtakaztača. ⁸Nii pajkpic žejtñinacaqui zapa mayni sojta wežlaž kjaražtakaztača, nižaza tjapa kjuttan čhjujquinacchiztača. Majiñami weenami tirapan Yooz wirzu tuž itscan želatča:

“Juc'ant zuma, juc'ant zuma, juc'ant zuma, Jalla nižtapanča tjapa azziz Yooz Jiliriqiu. Yooz Jiliriqiu tuquitanami, anzimi, jaztanami žejlča”.

Jalla nuž itsičha.

⁹Nii žejtñinacaqui chawc mantiz julzquiz julzita mantiñizquiz honora tjaachiča, nižaza nižquiz rispitchičha, nižaza nižquiz gracias tjaachiča. Wiñayjapača nii chawc mantiñiqui. ¹⁰Čhjlorat žejtñinacaqui nižta paatčhaja, nekztan nii paatunc pusin jilirinacaqui mantiñiz yujcquiz quillziča, nižaza nižquiz rispitchičha. Nii chawc mantiz julzñiqui wiñayjapa wiñayača. Jalla niž yujcquiz nii tuncapan pusin jilirinacaqui ninacz kor pillužtakaz nonžinchiča, tuž itsñi cjan:

¹¹“Učhum Yooz Jiliri, amqui honorchizkaj cjila. Nižaza amqui rispittaj cjila. Nižaza amča tjapa azzizqui. Jalla nii pajtaj cjila. Amqui tjapa žejlñinaca paachamča. Amiž munaŋpa jaru tjapa žejlñinacaqui paatača, nižaza žejlča”.

5

TJUUŽTA LIWRU CJETŃIQUI

¹Nižaza nii julzi žejlñi mantiñiz žew kjarquiz tsjii liwru tjuužta želatča. Nii tjuužta liwruqui porap latu cjjrztatača. Nižaza nii liwruqui pakallak estampillžtan zcatžtatača. Jalla nuž cherchinča. ²Nektanaqui cherchinča, tsjii walja azziz anjila. Jalla nii anjilaqui altu joržtan pewcznatča, tuž cjan:

—Jequit waquizas tii tjuužta liwru cjetzjapa? ¿Nižaza tii zcatžta estampillanaca wjajrznas? —Jalla nuž pewcznatča.

³Arajpachquinami tii muntuquizimi, tii muntu koztanami anaž jecmi cjetz waquizičha, nii liwruquiz cjjrtanaca chertzjapa. ⁴Jalla nuž cjetz waquiziñi ana žejlchiz cjen, wejrqui kaacan ancha llaquizatuča. ⁵Jalla nektanaqui tsjii jiliriqiu wejtquiz paljaychiča, tuž cjan:

—Ana iya kaa. Tsjiiqui nii tjuužta liwru cjetñi waquizichiča. Niiqui Judá cjita žoñiz majchmaatiquiztan tjonničha. Juc'ant azziz cjen, León cjitača. Nižaza niiqui Davidž majchmaatiquiztan tjonničha. Jalla niiqui tjappacha atipchiž cjen nii liwru cjetz waquizičha, nižaza nii liwruž estampillanaca wjajržni.

⁶Nektanaqui tižtanaca cherchinča. Nii chawc mantiz julztan, nii žejtñinacztan, nii jilirinacztan, jalla ninacz taypiz tsjii Uuzažtakaz tsjtchi cherchinča. Wilana jawkta Uuzažtakaz, jalla nii cherchinča. Nižaza nii Uuzaqui pakallak wajranacchiztača, nižaza pakallak čhjucquinacchiztača. Niiž pakallak čhjucquinacaqui pakallak Yooz ispiritunacča. Jalla nii Yooz ispiritunacaqui tjapa kjutñi tii muntuquiz cuchantača. ⁷Jalla nii Uuzaqui tjuužta liwru tanzičha, julzi mantiñiz žew kjarquiztan. ⁸Nii liwru tanžtan nii pajkpic žejtñinacami nižaza nii paatunc pusin jilirinacami nii Uuzažtakaz chawc jilirž yujcquiz quillziča. Zapa mayni nii jilirinacaqui pajk guitaražtakaz arpa cjita tanzitača. Nižaza kor chuwanaca chjichatča insinsuchiz chjijpi. Nii insinsuchiz chuwanacaqui Yoozquin criichinacz oracionanaca cjetča. ⁹Ninacaqui ew wirsu itsatča, tuž cjan:

“Amqui waquizichamča nii tjuužta liwru cjetñijapa, nižaza nii liwruquiz zcatžta estampilla wjajržñijapa. Amqui contatača. Ticizž cjen am ljokžtan Yooztajapa sirwiñi žoñinaca liwriichamča. Amiž liwriita žoñinacača tjapa zarchiz žoñinacami, nižaza tjapaman takunacchiz žoñinacami, nižaza tjapaman watjanacchizimi, nižaza tjapaman nacionacchizimi. ¹⁰Amqui amiž liwriita žoñinaca mantiñijapa utchamča. Nižaza amqui nii žoñinaca Yooztajapa sirwiñijapa utchamča, Amiž liwriita žoñinacaqui tii yokquiz mantaquičha”.

Jalla nuž cjichiča nii itsñinacaqui.

¹¹Jalla nektanaqui nonžinča wacchi anjilanacz jora. Nižaza cherchinča mantiz julz muytata, nižaza žejtñinacz muytata, nižaza jilirinacz muytata, jalla ninacz muytata muzpa waranka waranka waranka anjilanaca želatča. ¹²Nii anjilanacaqui altu joržtan cjichiča: “Nii conta Uuzaqui waquizičha, mantiz poder tanzjapa, nižaza tjapa zuma cusasanaca tanzjapa, nižaza tjapa zizjapa, nižaza tjapa azziz cjisjapa. Nižaza nii waquizičha

honora tanzjapa, niżaza rispitta cjisjapa, niżaza honora waytiżinta cjisjapa. Jalla nużoj cjila. Nuż waquiziċha nii conta Uuzaqui”.

¹³Nekztan tjapa arajpachquin žejlñinacžtan, niżaza tjapa tii muntuquiz žejlñinacžtan, niżaza tjapa tii yok koztan žejlñinacžtan, niżaza tjapa kotquiz žejlñinacžtan, jalla nuż tjappacha niiž puntu cjichiċha:

“Nii chawc mantiñižquizimi nii Uuzižquizimi wiñayjapa honora waytižintaj cjila; niżaza nii pucultižquiz wiñayjapa honorchiz cjila; niżaza wiñayjapa rispittaj cjila; niżaza tjapa azziz cjila watay wata”.

¹⁴Nekztan nii pajkpic žejtñinacaqui cjetċha:

—Jalla nużoj cjila. Amén.

Niżaza nii paatunc pusin jilirinacaqui quillžcu nii watay wata žejtñižquiz rispitchiċha.

6

ESTAMPILLANACA WJAJRTA CHERCHINĊHA

¹Nekztanaqui wejrqui cherchinċha, jalla tužu: Uuzažtakaz žoñiqui tsjii estampilla wjajrziċha. Niżaza nonzinċha tsjii žejtñiqui jorjorñižtakaz joržtan kjawchiċha:

—Pichay. Cheržca.

²Nekztan wejrqui cherchinċha, jalla tužu: Tsjii chiw cawallu tjonchiċha. Nii cawallž juñtuñ yawchi žoñiqui flech arcu armichiz tanchiċha. Niižquiz tsjii atipz poder tjaataċha, tsjii coronažtakaz. Jalla nižtiqiztan atipñi ulanchiċha, tirapan atipzjapa.

³Nekztanaqui nii Uuzažtakazqui segunda estampilla wjajrziċha. Jalla nuż wjajrtan, segundo žejtñiqui cjichiċha:

—Pichay. Cheržca.

⁴Nekztan yekja cawalluqui ulanchiċha, ljok cawallu. Nii cawallž juñtun yawchi žoñiqui poder tjaataċha, žoñinacpora kichanasjapa, niżaza porapat conasjapa. Niižquiz tsjii pajk cuchillu tjaataċha.

⁵Nekztanaqui nii Uuzažtakazqui tercer estampilla wjajrziċha. Jalla nuż wjajrtan, nonzinċha tercer žejtñiqui tuž cjican:

—Pichay. Cheržca.

Nekztan cherchinċha tsok cawallu. Niżaza nii cawallž juñtun yawchi žoñiqui balanci-chiztaċha niiž kjarquiz. ⁶Nekztanaqui žejtñinacž taypiquiz tsjii jora nonzinċha. Nii joraqui tuž cjichiċha:

—Pajk paaztan tsjii kilo trigo kjayasaċha. Niżaza pajk paaztan ċhjep kilo siwatu kjayasaċha. Aceitimi vinumi tira želaquiċha.

⁷Nekztanaqui nii Uuzažtakazqui cuarto estampilla wjajrziċha. Jalla nuż wjajrtan nonzinċha cuarto žejtñiqui tuž cjican:

—Pichay. Cheržca.

⁸Jalla nekztanaqui wejrqui cherchinċha, tsjii k'ill cawallu želatċha, yawchi žoñichiz. Jalla nii yawchi žoñiqui Ticz cjitataċha. Niiž wiruñ Ticz Yoka cjita apziċha. Ninacžquiz poder tjaataċha, cuarta parte tii muntuquiz žejlñi žoñinaca conzjapa. Ninacaqui žoñinaca conaquiċha pajk cuchillžtan, mach'anacžtan, conanacžtan, niżaza anawal animalanacžtan.

⁹Jalla nekztanaqui nii Uuzažtakazqui quinta estampilla wjajrziċha. Jalla nuż wjajrtan wejrqui cherchinċha arajpach altarž koztan almanaca želatċha. Nii almanacž curpunacaqui Yooz taku parlitiquiztan contataċha. Ninacaqui tii muntuquiz kamcan Yooz puntu ticlarchiċha. Jalla nižtiqiztan contataċha. ¹⁰Nii almanacaqui altu joržtan kjawcan tuž cjichiċha:

—Zuma lijitum Jiliri. Ampanċha taku cumpliñiqui. Jaziqi ħċhjulorcamat žoñinaca pajlznaquiya? ħċhjulorcamat wejrnac conñi žoñinaca casticaquiya? —Jalla nuż cjichiċha nii almanacaqui.

¹¹Jalla nektanaqui almanacaqui chiw tol zquiti tjaatača. Nižaza ninacžquiz cjetača, tsjii kjaž tjuňikaz jeejnaquiča. Primuruqui iya Cristužquiz sirwiñinacaqui conta cjis-tanča, jaknužt tuquiqui almanacž curpunaca contažlaja, jalla nižta. Nii contanaca pojkcama, almanacaqui jeejnaquiča.

¹²Jalla nektanaqui nii Uuzažtakazqui sexta estampilla wjajrziča. Jalla nuž wja-jrtan, wejrqui cherchinča, yoka ancha chekjinskatača. Nižaza tjuñimi tsokchi cjissiča, lut zquitižtakaz. Nižaza jiizmi ljok cjissiča. ¹³Nižaza warawaranacami yokquin tjojtquichiča, jaknužt pjursant tjamiqi higo frutanaca tjojtskatčaja, jalla nižta. ¹⁴Nektanaqui pachaqui katchiča tjuužta papilažtakaz. Nižaza tii muntuquiz tjapa curunacami tjapa kot taypiquiz žejlñi yokanacami kizkattatača. ¹⁵Nektanaqui tii muntuquiz mantiñinacami, jilirinacami, zultatž jilirinacami, ricachunacami, azziz žoñinacami, mantita žoñinacami, ana mantita žoñinacami, tjappacha chjojziča pajk maz pjetanacquizimi, nižaza cur akjinacquizimi. ¹⁶Jalla ninacaqui kjawchiča, tuž cjan:

—Curunaca, maznaca, wejtnaca juntuñ tjojtča. Wejrnac chjojzna, julzi mantiñiž yujcquiztan. Nižaza wejrnac chjojzna nii žawjchi Uuzažtakazquiztan, ana casticta cjisjapa.

¹⁷Ultim casticz tjuñi tjonča. ¿Ject Yoozquiztan atipas? —Jalla nuž kjawchiča ninacaqui.

7

144,000 ŽOÑINACA CHIMPUTA

¹Jalla nektanaqui wejrqui cherchinča, pajkpic anjilanacaqui tii muntuž pajkpic latuquiztan tsijtsi želatča. Jalla nuž žejlcan pajkpic puntu tjaminacaqui atajatča, ana zinta tjamzjapa yokquizimi kotquizimi muntinacquizimi. ²Nektanaqui tsjii anjila cherchinča, tuwanchuctan tjonñi. Nii anjilaqui žejtñi Yooz mantita ortinžtan tjonchiča. Jalla nižtiquiztan nii anjilaqui altu joržtan kjawcan paljaychiča pajkpic anjilanacžquiz. Nii pajkpic anjilanacaqui poder tjaatatača, yokami kotami anawali cjiskatzjapa. ³Jalla nižtiquiztan nii Yooz tjaata ortinžtan anjilaqui ninacžquiz cjichiča:

—Yokami, kotami, muntinacami ana anawali cjiskata, učum Yooz sirwiñinaca chimputa cjisama. Yooz sirwiñinacaqui ninacž yujc ayquiz chimputa cjequiča.

⁴Nektanaqui nonzinča patac pusi tuncan pusin waranka žoñinaca chimputatača, tjapa Israelž familianacquiztan. ⁵Tuncapan waranka Judáž familiaquiztan chimputatača. Tuncapan waranka Rubénž familiaquiztan chimputatača. Tuncapan waranka Gadž familiaquiztan chimputatača. ⁶Tuncapan waranka Aserž familiaquiztan chimputatača. Tuncapan waranka Neftalíž familiaquiztan chimputatača. Tuncapan waranka Manasés familiaquiztan chimputatača. ⁷Tuncapan waranka Simeónž familiaquiztan chimputatača. Tuncapan waranka Levíž familiaquiztan chimputatača. Tuncapan waranka Isacarž familiaquiztan chimputatača. ⁸Tuncapan waranka Zabulónž familiaquiztan chimputatača. Tuncapan waranka Josézž familiaquiztan chimputatača. Tuncapan waranka Benjamínž familiaquiztan chimputatača.

CHIW ZQUITCHIZ ŽOÑINACA

⁹Jalla nektanaqui cherchinča, muzpa tama žoñinacaqui chawc mantiz puesto yujc-quizimi, nažaza Uuzažtakaz žoñž yujcquizimi želatča. Nii žoñinacaqui tjapa nacionanac-quiztantača, nižaza tjpaman zarchiz žoñinacžquiztantača, nižaza tjpaman watjanac-quiztantača, nižaza tjpaman takunacchiz žoñinacžquiztantača. Muzpa tamatača, jalla nižtiquiztan ana wira kanchucatača. Jalla nii žoñinacaqui chiw tol zquiti cutchi-camatača. Nižaza ninacž kjarquiz munti itzanaca tanziča, čhjanžtanpacha. ¹⁰Jalla nii žoñinacaqui altu joržtan tuž chiyatča:

“Učum Yoozkazza Liwriñiqui. Niiča chawc mantiz puestuquiz julžñiqui. Nižaza nii Uuzažtakaz žoñžakazza Liwriñiqui”.

¹¹Nižaza chawc mantiz puesto muytatami, jilirnacž muytatami, pajkpic žejtñinacž muytatami, jalla ninacž muytata tjapa anjilanacaqui tsijtchi želatča. Ninaca zakaz chawc mantiz puestuž yujcquiz yokquiz puct'ichi Yooz rispitatča. ¹²Nii anjilanacaqui Yooz rispitan tuž cjichiča:

“Jalla nužoj cjila. Učhum Yooztajapa watay wata honora waytižintaj cjila, nižaza wiñaya rispittaj cjila. Učhum Yoozza zizñi zizñipanqui. Niižquiz wiñaya gracias cjila. Nižaza niižquiz honora waytižintaj cjila. Učhum Yoozqui wiñayjapa tjapa azziz cjila, nizaza poderchiz. Jalla nužoj cjila. Amén”.

¹³Jalla nekztanaqui tsjii jiliri qui wejr pewcziča, tuž cjican:

—¿Jecnacat tii chiw zquti kujtchinacaya? Nižaza ¿jakziquiztan tjonchi ninacataya?

¹⁴Wejrqui niižquiz kjaazinča, tuž cjican:

—Jiliri, anal zizuča.

Nekztan niiqui cjichiča:

—Tinacaqui juc'ant sufris timpu watchiča. Nižaza tinacaqui ujnacquiztan liwriitača, Jesucristo Uuzažtakaz cjen. Cristuž ticziž cjen, jalla nižtiquiztan tinacaqui chiw ajunta zquitchizza. ¹⁵Jalla nižtiquiztan tinacaqui Yooz mantiz puestu yujcquiz žejlča. Tinacača majiñami weenami Yooz kjuyquiz sirwiñinacaqui. Nižaza nii chawc mantiz puestuquiz julñi qui tinaca cwiťaquiča. Niižtan tinacžtan watay wata chica želaquiča. ¹⁶Tinacaqui ana iya čheri eeskataquiča, nižaza anaž iya kjaz kjara pasnaquiča. Nižaza sii kjakimi ana tinaca laacjiskataquiča, nižaza čjul kjakimi. ¹⁷Jesucristuča mantiz puestu žcatipacha žejlñi qui. Jalla nii Uuzažtakaz Jesucristuqui tinacž awatiri cjequiča. Nižaza Jesucristuqui tinacžquiz zuma kamañchizpan irpaquiča, jaknužt zuma awatiriqui niž uuzanaca zuma jalzurquiz kjaz liquinčhaja, jalla nižta. Nižaza Yoozpacha tjapa tinacž kaaj chjužinaquiča.

8

SEPTIMA ESTAMPILLA WJAJRTA

¹Jalla nekztanaqui Uuzažtakaz Cristuqui séptima estampilla wjajrziča. Jalla nuž wjajrtan, tsjii media ora tjapa ch'uju žejlchiča arajpachquin. ²Nekztan cherchinča, pakallawc anjilanaca želatča. Nii anjilanacaqui Yooz yujcquiz tsijtñitača. Jalla ninacžquiz pakallawc trompet pekz tjaatatača. ³Nekztanaqui tsjii anjilaqui tjonžcu, altar yujcquiz tsijtsiča, tsjii kor insinsarchiz. Jalla nekztanaqui niižquiz wacchi insinsunaca tjaatatača, criichinacž oracionanacžtan t'ajzjapa. T'ajžta insinsužtan oracionanacžtan kor altarquiz nonžtatača chawc mantiz puestu yujcquiz. ⁴Nii Yooz anjilž kjarquiztan criichinacž oracionanacžtan insinsužtan t'ajžta žketi waytichiča Yooz yujcquiz. ⁵Jalla nekztanaqui nii anjilaqui insinsaru tanžcu, altarquiz uj parazižtan chjiipziča. Nekztan nii uj parazižtan chjiipi insinsaru tii muntu yokquiz tjojtchiča. Jalla nižtiquiztan ancha pjursanti liwliwjičiča, nižaza ancha pjursanti jorjorčiča, nižaza yoka chekjinčiča.

TROMPETCHIZ ANJILANACA

⁶Jalla nuž watžcu pakallawc trompetchiz anjilanacaqui tjacziča trompetanaca tjawunžjapa.

⁷Primir anjilaqui niiž trompet pekz tjawunchiča. Jalla nuž tjawunžcu caranuz chijñižtan ujžtan, nižaza ljokžtan t'ajžta tii muntu yokquiz cutzinčiča. Jalla nižtiquiztan tercer parti tii muntu yoka ujsiča, nižaza tercer parti muntinaca ujsiča, nižaza tercer parti pastunacami ujsiča.

⁸Nekztan segundo anjilaqui trompet pekz tjawunchiča. Jalla nuž tjawunžcu uj peksi pajk curužtakaz pajk kotquin tjojtchiča. Nekztanaqui tercer parti kot kjazqui ljok cjišsiča. ⁹Nekztan tercer parti kotquiz žejlñi animalanacaqui ticziča, nižaza tercer parti kotquiz ojklayñi warcunacaqui akžtatača.

¹⁰Tercer anjilaqui trompet peks tjawunchiča. Jalla nuž tjawunžcu pajk warawara arajpachquiztan tjojtšiča, uj peksi teyažtakaz. Nii warawaraqui tjojtšiča tercer parti pu-junacquizimi, nižaza tercer parti tujnacquizimi nižaza wijiñanacquizimi. ¹¹Nii warawaraž tjuuqui Ajenjo cjitača. Ajenjo cjitača tsjii jar muntiqui. Jalla nii warawaraž tjojttiquiztan tercer parti kjazqui ajenjožtakaz jaru cjišsiča. Nii jar kjaz cjen walja žoñinacaqui ticziča.

¹² Cuarto anjilaqui trompet pekz tjawunchiċha. Jalla nii tjawunċu tercer parti tjuñimi jiiżmi warawarami zumċi cjiŝsiċha. Nekztanaqui tercer parti majiñaqui ana kjanċhiċha, niżaza tercer parti weenami ana kjanċhizakazza.

¹³ Jalla nekztanaqui wejrqui cherċhinċha, niżaza nonzinċha, tsjii anjilaqui tseewc arajpach taypiquiz laycan altu jorżtan ċhiċhiċha, tuż cċjan:

—Muntu yokquiz žejlñi žoñinacżtajapa ana wali, ana wali, ana wali cċisnaquiċha. Ċhjep parti anjilanacaqui trompet pekz tjawunzmayaćha. Jalla ninacaż tjawnan juc'ant ana wali cċisnaquiċha.

9

QUINTO ANJILAQUI

¹ Jalla nekztanaqui quinto anjilaqui trompet pekz tjawunchiċha. Jalla nuż tjawun-tiquiztan tsjii warawarażtakaz cherċhinċha arajpachquiztan tii yokquiz tjojtŝi. Jalla nii warawarażta anawal jilirżquiz poder tjaataċha, anawal koz tuj cjetzjapa. ² Jalla nekztanaqui nii anawal jiliriqui koz tuj cjetziċha. Jalla nuż cjetżtiquiztan jurnu žketiżtakaz ulanċhiċha. Jalla nii koz tuj žketiqui tjuñimi pachami zumċi cċjŝkatchiċha. ³ Jalla nii žketquiztan langosta animalanaca ulanċhiċha tii yokquiz laylayzjapa. Jalla nii animalañacżquiz anawali paazjapa poder tjaatataċha, jaknużt tsjii yek'achunca ana wali yek'antiċhaja, jalla niżta cċisjapa. ⁴ Niżaza nii animalanacaqui mantitataċha, anaċha yokquiz žejlñi pastunacżquizimi tjapa ch'ojña pajkñinacżquizimi anawali paajo. Pero yujc ayquiz ana Yooz chimputa žoñinacżquiz ana wali paasaċha. ⁵ Pjijska jiizcama nii anawali paañi animalanacaqui ana chimputa žoñinacżquiz sufriskatzjapa niżta poder tjaatataċha. Sufriskatcanami ticzkatta poder ana tjaatataċha. Jalla nuż sufriskatan, nii žoñinacaqui anċha ayinċhiċha, jaknużt tsjii žoñi yek'antiquiztan anċha ayiñiżlaja, jalla niżta. ⁶ Jalla niżta sufris timpuquiz žoñinacaqui ticz pecaquiċha, pero anaż ticzñi ataquiċha. Jalla nuż ticz peccanami, ana wira ticz tjonaquiċha.

⁷ Nii langosta cċjita animalanacaqui quira tjacżta cawallunacażtakaztaċha. Ninacż aċhanacżquiz kor pillunacċhiztakaztaċha. Nii animalanacż yujcnaċcaqui žoñinacż yujc-nacażtakaztaċha. ⁸ Niżaza ninacż ċharaqui maatakanacż ċharażtakaztaċha. Niżaza ninacż iżkenacaqui león animalanacż iżkenacażtakaztaċha. ⁹ Niżaza ch'iztakaz kajpċhiztaċha. Nii kajpanacaqui jirużtakaztaċha ċurpunaca ċhjojżjapa. Laylaycan, nii animalanacaqui anċaž arnatċha, jaknuż cawallunacaqui tsjii quirquiz zalcan aranċhaja, jalla niżta. ¹⁰ Nii animalanacż kjurznacaqui yek'achuncaż kjurztakaztaċha. Ninacż kjurznacżtan yek'antasaċha žoñinaca sufriskatzjapa nii pjijska jiiz intiru. ¹¹ Nii animalanacż mantiñi jiliriqui nii koz tuj cjetñipachaċha. Nii jilirż tjuuqui Abadón cċjitaċha hebreo tawkquiziqui. Griego tawkquiz Apolión cċjitaċha. Apolión cċjiċha, akzñiqui, nii.

¹² Jalla niżta wataċcu primir anawaliċqui watchiċha. Nonżna. Imaziż iya pizc anawali-nacaqui tjonċha.

¹³ Jalla nekztanaqui sexto anjilaqui trompet pekz tjawunchiċha. Jalla nuż tjawun-tiquiztan tsjii jora nonzinċha. Yooz yujcquiz žejlñi kor altarquiztan nii joraqui ulanċhiċha. Pajkċic wajrichiztaċha nii kor altaraqui. ¹⁴ Nii joraqui sexto trompetċhiz anjilżquiz tuż ċjiċhiċha:

—Pajk Eufrates cċjita pujquiz pajkċic anjilanaca ċhejlta žejlċha. Jalla nii pajkċic anjilanaca cutzna, —jalla nuż cjetċha.

¹⁵ Nekztanaqui nii pajkċic anjilanacaqui cutstataċha, ċhjep parti žoñinaca conzjapa. Jalla niżta paazjapa tjacżtataċha, nii ora, nii tjuñi, nii jiiz, nii wata, jalla nii timpujapa niżta paazjapa tjacżtataċha. ¹⁶ Žoñinaca conzjapa wacċi žoñiż yawċhi cawallunaca želatċha, paa patac millonanacataċha. Jalla nuż wacċi nonzinċha.

¹⁷ Nii cawallunacataċha jalla tiżta cherċhiqui. Nii yawċhi žoñinacaqui weezi-nacċhiztaċha. Nii weċha weezinacaqui tiżta culuranacataċha, ljok, larama, k'illu, jalla niżta culuranacataċha. Nii cawallunacaqui león animalanacż aċhanacċhiztaċha. Jalla nii cawallunacż atquiztan uj, žketi, azupri ulanċhiċha. ¹⁸ Jalla nii ċhjep anawalinacataċha

anawali paachiqui. Jalla nii uj, žketi, azupri ulantiquiztan chjep parti žoñinaca contatača. ¹⁹Nii cawallunacž sufriskatz poderaqui ninacž atquiztača, nižaza ninacž kjurzquiztača. Nii cawallunacž kjurznacaqui zkoraztakaztača. Nii zkoranacaqui ch'atñi achchiztača, žoñinaca sufriskatzjapa.

²⁰Nii anawalinacaž ana conta žoñinacazti Yoozquin anapanž kuz tjaachiča. Žoñiž paata yooznacžquin rispitzquiztan anapan jaytichiča. Tirapan rispitchiča zajranacžquizimi nižaza žoñiž paata yooznacžquizimi. Ninacž yooznacaqui paatatača korquiztan, paazquiztan, mazquiztan, tabliquiztan, jalla nižtanaca. Nii žoñiž paata yooznacatača ana chernimi, nižaza ana nonžñimi, nižaza ana ojklayñimi. ²¹Nii parti žoñinacaqui anawal kamtiquiztan anapan jaytichiča. Tirapantača žoñi conzqui, nižaza yat'iri ojklayzqui, nižaza adulteriuquiz ojklayzqui, nižaza tjañizaz ojklayzqui.

10

TSJII LIWRUCHIZ ANJILA ŽELATČHA

¹Nekztanaqui pajk azziz anjila cherchinča, arajpachquiztan tjonñi. Nii anjilaqui tsjir taypiquiz tjonchiča, tsjii arcu iris cumari niž ach juntuñ. Nii anjilž yujcqui tjuñižtakaz c'ajatča. Lisnacaqui uj asñižtakaztača. ²Niž kjarquiz tsjii cjetža liwru tanzičha. Niž žew kjojchaqui pajk kotquiz tjecziča, niž zkar kjojchaqui yokquiz tjecziča. ³Nii anjilaqui altu joržtan kjawchiča, león animalažtakaz. Nekztanaqui pakallawk wilta jorjorchiča. ⁴Jalla nuž jorjortan, wejrcu cjiyrzmayatača. Pero cjiyrzmaya cjen arajpachquiztan tsjii joraqui wejtquin chiižquichiča, tuž cjican:

—Nii pakallawk jorjorñiž chiitaqui chjojzna. Ana nii puntu cjiira.

⁵Jalla nekztanaqui nii kotquizimi yokquizimi tjeczi anjilaqui žew kjara waytichiča arajpach kjutñi. ⁶Žew kjara waytižcu, juramintu paachiča Yooz tjuu chiican.

—Watay wata žejtñi Yoozqui paachiča arajpachami, yokami, kotami; nižaza arajpachquiz žejlñinacami, yokquiz žejlñinacami, kotquiz žejlñinacami, tjappacha paachiča. Jalla nii zinta Yooz tjuu chiican juramintu paachiča, tjapa Yooz puntu parliñi profetanacaž chiitanacaqui ana enenžcu cumplisjapa. ⁷Čhjulorat séptimo anjilaqui trompet pekz tjawznachaja, jalla nii timpu Yooz chjojzaka tantiita taku cumplisnaquiča. Tuqui timpuqui Yoozqui niž sirwiñi profetanacžquiz nii chjojzaka taku mazinchiča.

⁸Jalla nekztanaqui nii arajpachquiztan chiižquini joraqui wilta wejtquiz paljayžquichiča, tuž cjican:

Nii kotquizimi yokquizimi tjeczi anjilž kjarquiztan cjetta liwru tanzñi oka. Jalla nuž wejtquiz mantichiča.

⁹Jalla nekztanaqui anjilžquin liwru mayi ojkinča, wejtquiz nii liwru tjaajo. Nii anjilaqui wejtquiz cjichiča:

—Tanzna, nižaza lujlna. Am atquiz zuma mazk'až cjequiča. Pero am pjuchquiziqui jaruž tucaquiča.

¹⁰Nekztan anjilž kjarquiztan liwru tanžcu lujlzinča. Wejt atquiz ancha mazk'atača. Jalla nuž lujltiquiztan wejt pjuchquiz jaru cjiisča. ¹¹Nekztanaqui wejtquiz cjichiča:

—Wilta amqui Yooziž chiita taku paljaystanča, nacionanacž puntuquiztanami, tjapaman sarchiz žoñinacž puntuquiztanami, tjapaman takunachiz žoñinacž puntuquiztanami, mantiñinacž puntuquiztanami.

11

YOOZ TAKU PALJAYŇI ŽOÑINACA

¹Jalla nekztanaqui wejtquiz tsjii caña tjaatatača tupz paražtakaz. Nekztanaqui tsjiiqui wejtquiz mantichiča tuž cjican:

—Žaazna. Yooz kjuya mirižca, altaržtanpacha. Nižaza nekž žejlñi Yooz rispitiñinaca kanzna. ²Yooz kjuy patiuqui ana miriizaquiča. Jalla nii patiuqui yekja wajtchiz žoñinacžquin intirjitača. Jalla nii žoñinacaqui Yooz zuma watja akznaquiča pusi tunc

paani jiiznaca. ³Wejrqui cuchanžcača pucultan tisticu wejtquiztan paljayajo. Lut zquiti cujtchi ojklayaquiča, 1260 tjuñicama. —Jalla nuž wejtquiz mantichiča.

⁴Pizc olivo cjita muntinacami, nižaza pizc cantilirunacami tii yok mantiñi Yooz yujcquiz žejlča. Jalla nii muntinacami, nižaza cantilirunacami pucultan tisticu cjiča. ⁵Jakziltat Yooz taku paljayñi žoñinacžquiz sufriskatz yanznačhaja, jalla niiqui contaž cjequiča. Nii pucultan tisticunacž atquiztan ašni uj ulnaquiča ninacž quintra žoñinaca liwj ujjjapa. Nekztan ninacžquiz sufriskatz pecñinacaqui contaž cjequiča. ⁶Poderchizza nii pucultan tisticunacaqui ana chijinskatajo. Yooz taku paljaycan, jalla nii timpu ana chijinskataquiča. Nižaza nii pucultan tisticunacaqui kjaz ljok tuckatz poderchizzakazza. Nižaza tii yokquiz žejlñi žoñinacžquiz tjpaman anawalinacžtan sufriskatz poderchizzakazza. Čhjulora peccanami žoñinaca sufriskatasäča. ⁷Jalla nii pucultan tisticunacaqui Yooz taku paljayž žeržcu, contaž cjequiča. Tsjii anawal animalažtakaz anawal koz tu-jquiztan ulnaquiča. Yooz taku paljayñinacž quintra cjequiča. Nižaza nii pucultiquiztan atipauquiča, nižaza conaquiča. ⁸Nekztanaqui ninacž ticzi curpunacaqui jakowasaquiča, Jerusalén wajt callquiz. Nii pajk wajtquiz Jesucristuqui cruzquiz ch'awctatača. Nižaza Jerusalén watjaqui Sodoma cjatača tsjii parabolažtakaz. Nižaza Egipto cjitazakazza, tsjii parabolažtakaz. ⁹Čhjep maj chicatchiz tisticunacž ticzi curpuqui callquiz želaquiča. Jalla nuž želan žoñinacaqui ticzi curpunaca cheraquiča, tjapa nacionanacchiz žoñinacami, tjapa watjanacchiz žoñinacami, tjpaman takunacchiz žoñinacami, tjpaman saranacchiz žoñinacami, jalla ninaca. Nii cherzñi žoñinacaqui anaž nii ticzi curpunaca tjakataquiča. ¹⁰Nii pucultan tisticunacaqui tii yokquiz žejlñi žoñinacžquiz ancha sufriskatchitača. Jalla nuž ticžtquiztan tii yokquiz žejlñi anawal žoñinacaqui cuntintuž cjequiča, nižaza pjijzta paaquiča, nižaza porapat onantanaca onarassaquiča. ¹¹Nekztan čhjep maj chicatquiztan Yoozquii nii pucultan tisticunaca jacatatskataquiča, wilta žeti tjaacan. Jacatatžcu tsijtsnaquiča. Nekztan nii ticziquiztan jacatatchinaca cheržcu, žoñinacaqui ancha tsuctsuaquiča. ¹²Jalla nekztanaqui arajpachquiztan tsjii altu joraqui nii pucultižquiz paljayaquiča, tuž cjan:

—Tsewc yawžca ančhucqui. Tekz želaquiča.

Jalla nekztanaqui quintra žoñinacž cheran, nii pucultan tisticunacaqui arajpachquin waytitaž cjequiča tsjir taypiquiz. ¹³Nekztan cherchinča tužu. Jalla nii orapacha ancha yoka chekjinchiča. Jalla nuž yoka chekjintiquiztan tunca parti Jerusalén watjaqui pajlsiča. Nii yoka chekjintiquiztan pakallawk warank žoñinaca ticziča. Parti žejtñi žoñinacazti ancha tsuctsucchiča. Jalla nižtanaca wattiquiztan parti eclichi žoñinacaqui Yooz honora waytichiča.

¹⁴Jalla nii anawali wattan, pizc anawalinacaqui watchiča. Nižaza wajillaž tjonča tercer anawaliqui.

SEPTIMO ANJILA

¹⁵Jalla nekztanaqui séptimo anjilaqui trompet pekz tjawunchiča. Jalla nuž tjawuntiquiztan arajpachquin altu joranaca chiiñi nonzinča. Jalla tuž chiičiča:

“Tjapa tii muntuqui učhum Yooz Jiliriž mantita cjissiča. Nižaza Yooz Epiž uchta Jesucristuž mantita cjissiča. Jalla ninacača watay wata wiñaya mantiñiqui”.

¹⁶Jalla nekztanaqui nii paa tunc pusin jilirinacaqui Yooz yujcquiz yokquiz puct'ican, Yooz rispitchiča. Jalla ninacača Yooz yujcquiz mantiz puestunacquiz julžñiqui. ¹⁷Yooz rispitan, tuž cjichiča:

“Tjapa azziz Yooz Jiliri, amča anzimi tuquitanami žejlñiqui. Am juc'ant azi tjezamča, nižaza anziqii tjapa mantiñi kalltichamča. Jalla nižtiquiztan amquin gracias tjaa-uča. ¹⁸Nacionanacchiz žoñinacaqui am quintra žawjchiča. Pero ninaca casticz tjuñi tjonča. Nižaza ticzi žoñinaca pjalz tjuñi tjonča. Nižaza amquiz sirwiñinacžquiz zumanaca tjaaz tjuñi tjonča. Amquiz sirwiñinacami, am taku paljayñinacami, amquiz rispitiñinacami, amquiz kuz tjaañinacami, jalla tjapa ninacžquizimi zumanaca tjaataž cjequiča pjalz tjuñquiziqui. Nižaza tii yoka

akñinacami, tii yoka žejlñi žoñinaca akñinacami, jalla ninaca akskattaž cjequiča. Jalla nii tjuñiž tjonča”.

Nuž cjichiča nii paa tunc pusin jilirinacaqui.

¹⁹Jalla nekztanaqui Yooz arajpach kjuya cjetžtatača. Kjuj kjuyltan tsjii cajuna chertatača. Yooziž tjaata takutača nii cajunquiziqui. Nižaza arajpachquin rayunaca želatča, nižaza jorjorñinaca želatča. Nižaza yoka chekjinskatñi želatča. Nižaza pjursanti caraniza želatča.

12

TSJAA MAATAKATAN TSJII ANAWAL ANIMALŽTAN

¹Jalla nekztanaqui arajpachquin tsjii pajk siñala parizichiča. Nii siñalaqui tižtatača. Tsjaa maataka želatča. Naa maataka zquitiqiu tjuñižtakaztača. Nižaza naaža kjojch kotzan jiiž želatča. Naaža achquiz tuncapan warawara tewžintatača, tsjii pillužtakaz. ²Naa maatakui ictatača. Nuž cjen, ancha aynatča, majtzjapa. ³Jalla nekztanaqui tsjii siñala parizichizakazza arajpachquin. Tsjii juc'ant anawal pajk ljok animala želatča. Jalla niiqui dragón cjitatača. Pakallawk achchiztača, nižaza tunca wajrichiztača. Nižaza zapa achquiz mantiñi žoñž pillunacžtan tewžintatača. ⁴Niiž pajk kjurz wewcžcu, čhjep parti warawaranaca tjojtskatchiča yokquin. Jalla nii dragonqui maataka yujcquiz tsijtsiča, naa maataka majtz ora tjewžcan. Jalla nuž tsijtsiča, naaža majtta wawa lujljzjapa majttiquiztanpacha. ⁵Nekztanaqui naa maatakui lucmajch wawa majtchinča. Nii lucmajchqui tjapa nacionquiz žejlñi žoñinaca c'aripacha mantiñiž cjequiča. Pero jalla nuž majttiquiztan nii lucmajch wawaqui Yoozquin waytitatača, Yooziž tjaata puestunaca tanzjapa. ⁶Naa maatakzti ch'ekti yokquin atipassinča. Jalla nicju Yoozqui naa maatakaltajapa tsjii yoka tjaczinčiča. Jalla nicju 1260 tjuñinaca watzcama čhjerchiz cjequiča naaqui.

⁷Jalla nekztanaqui arajpachquin quira zaltissiča, Miguelžtan niiž mazi anjilanacžtan dragonž quintra quira zaltissiča. Nii dragonžtan niiž mazinacžtan ancha kichjassiča. ⁸Pero atipta cjišiča. Jalla nižtiquiztan arajpachquin ana iya želasāča. ⁹Jalla nižtiquiztan nii dragonžtan niiž mazi anjilanacžtan tii yokquiz chjatkatzquitača. Nii dragonqui Satanás diablupantača. Niiča tuquita žkoražtakaz incallñiqui. Tuquitan nii diabluiqui Evaquiz incalltiquiztan tjapa tii muntu incallčiča anawali cjskatzjapa.

¹⁰Jalla nekztanaqui wejrqui arajpachquin tsjii altu jora nonzinča, tuž cjiñi:

–Jaziqui ultim liwriiz tjuñi tjonča, nižaza Yooz azi tjeez tjuñi tjonča, nižaza uchum Yooz tjapa mantiz tjuñi tjonča. Nižaza Yooziž uchta Jesucristuž mantiz tjuñi tjonča. Učhum criichinacž quintrariunacaqui chjatkatta cjequiča. Majiñami weenami nii anawaliqui Yooz yujcquiz criichinacž quintra uj tjojtjuñitača. ¹¹Pero criichinacaqui anawal diablu atipchiča, Uuzažtakaz Jesucristuž ticziž cjen, nižaza Yooz taku paljaychiž cjen. Nižaza nii criichinacaqui Yooz taku paljaycan ana jiwjatchiča ticzuca cjenami. ¹²Arajpacha, nižaza arajpachquin kamñinaca, cuntintuž cjee. Yokquiz kamñinaca, kotquiz kamñinaca, ančucaquiz anawali cjskataquiča. Diabluiqui chjatkatzquitiqiztan ancha žawjziča. Jalla niiqui zizza, muntuquiz kamz timpuqui žkoluckazza.

¹³Jalla nekztanaqui nii dragonqui yokquiz chjatkatzquita nayžcu, naa lucmajch maatiñ maatakaquiz apziča tanzjapa. ¹⁴Nekztan naa maatakaquiz pizc pajk aquilž kjara tjaatkalča, ch'ekti yokquin laycan zkoražtakaz diabluzquiztan atipzjapa. Yoozqui nii yoka tjacziča, maatakaquiz čhjep wata chicatchiz čhjerchiz cjisjapa. Jalla nii yokquin maatakui layñi atipchinča. ¹⁵Nekztanaqui žkoražtakaz diabluiqui persun atquiztan wacchi kjaz jotchiča, pujužtakaz, kjaztan nii maataka tjuzjapa. ¹⁶Nekztan yokaqui maatakaquiz yanapzjapa, c'acchiča. Jalla nii c'actiquiz dragonž jotta kjazqui luzziča. ¹⁷⁻¹⁸Nii cheržcu, dragonqui maatakajapa juc'anti žawjchiča. Jalla nekztanaqui diabluiqui naaža majchmaatinacž quintra quira zali ojkchiča. Naa maataka majchmaatinacaqui tižtanacača. Jakziltat Yooz mantitanac jaru kamčhaja, nižaza Jesucristuž tjaajinta jaru

kamčhaja, jalla ninacaqui naa maataka majchmaatinaca cuntača. Nii diabluqui quira zali ojkžcu, kot atquiz tsijtsiča.

13

PIZC ANAWAL ANIMALANACA CHERCHINČHA

¹Jalla nektanaqui chawc kot kjazquiztan tsjii anawali pajk animala ulanžquini cherchinča. Jalla nii animalaqui pakallaw achchiztača, nižaza tunca wajrichiztača, nižaza zapa wajriquiz mantiñi žoñž pillunacžtan tewžintatača. Nižaza achanacquiz Yooz quintra tjuu cjjirtatača. ²Jalla nii weriž cherta animalatača tigrižtakaz tsijtchi. Nižaza niž ataqi leonž atažtakaztača. Jalla nektan dragonžtakaz diabluqui nii anawal animalžquiz niž poderchiz pustu tjaachiča, walja azziz mantizjapa. ³Tsjii achaqui nii animalž pakallaw achanacquiztan ticskatzmaya chjojrictažtakaztača. Pero ana ticziča. Antiz žejtchiča. Nektanaqui ispantižcuqui tjapa tii muntuquiz žejlñi žoñinacaqui anawal animala apziča. ⁴Žoñinacaqui nii dragón diablužquiz rispitchiča, Yoozquiztakaz. Nižaza nii dragonqui anawal animalžquiz niž mantiz poder tjaachiča. Jalla nižtiqiztan žoñinacaqui nii animalžquiz rispitchizakazza, tuž cjcjan:

—¿Jakziltat tii animalžquiztan juc'ant azzizqui? ¿Jequit tii animala atipasajo? ⁵Nektan nii anawal animalaqui mit takunacami Yooz quintra chiita takunacami chiizjapa permitta cjišsiča. Nižaza puzi tunc paan jižnaca watzcama mantiz poderchiz cjequiča. ⁶Jalla nektanaqui anawal animalaqui Yooz quintra chiichiča, Yooz tjuu quintrami, nižaza Yooz timplu quintrami, nižaza arajpachquin kamñinacž quintrami. Jalla nižta quintra chiichiča. ⁷Nižaza anawal animalaqui Yoozquin criichinacž quintra quira zalajo permittatača, ninaca atipzcama. Nižaza nižquiz mantiz poder tjaatatača, tjapa zaranacchiz žoñinacžquizimi, tjapa watjanacchiz žoñinacžquizimi, tjapa takunacchiz žoñinacžquizimi, tjapa nacionanacchiz žoñinacžquizimi, jalla tjapa nii ana criichi žoñinacžquizimi mantizjapa. ⁸Yoozquin ana criichiž cjen žoñinacaqui anawal animalžquiz rispitchiča, Yoozquiztakaz. Nii animalžquiz rispitiñi žoñinacž tjuunacaqui anaž cjjirtača, Uuzažtakaz Jesucristuž liwruquiz. Liwriita žoñinacž tjuunaca Jesucristuž liwruquiz cjjirtača. Jalla ninacž laycu ticziča Jesucristuqui. Ima tii muntu kalltan, jakziltižquiz Jesucristuqui wiñay žeti tjačhaja, jalla ninacž tjuunaca cjjirchiča arajpach liwruquiz.

⁹Jakziltat nonžñi cjuñchizlaja, nonžla. ¹⁰Jakzilta žoñit preso chjichta cječhaj niiqui, panž chjichtaž cjequiča. Nižaza jakzilta žoñit pajk cuchillžtan conta cječhaj niiqui, panž conta cjequiča. Jalla nižtiqiztan Yooz wajtchiz žoñinacaqui Yoozquin tjapa kuztan cjis waquiziča, nižaza pasinsis kuztan cjis waquiziča, sufrisnaca watzjapa.

SEGUNDO ANAWAL ANIMALA

¹¹Jalla nektanaqui yekja anawal animala cherchinča yokquiztan ulanñi. Jalla nii animalaqui pizc wajrichiztača, uuzažtakaz. Pero dragonžtakaz chiyatča. ¹²Jalla nii segundo anawal animalaqui tjapa nii primir animalž poderchiz mantichiča, primir animalžtan chica žejlcan. Nižaza segundo animalaqui tjapa tii muntuquiz žejlñi žoñinaca primir animalžquiz rispitskatchiča. Primir animalatača ticzmaya chjojrictiqiztan žejtchiqui. ¹³Nižaza segundo animalaqui pajk milajrunaca paachiča. Tsewctan yokquiz uj tjojtscatchiča žoñinacž cheran. ¹⁴Jalla nižta milajrunaca payi permittatača, primir animalaž želan. Jalla nižta milajrunaca paachiž cjen, tii muntuquiz kamñi žoñinacžquiz incallchiča. Nižaza žoñinaca mantichiča, chjojrictiqiztan žejtchi animalž irata tsjii yooz paajo. Nektan mantichiča, nii yooz rispitažo. Nii primir animalatača pajk cuchillžtan chjojrictaž cjenami, wilita žejtchi cjišsiqui. ¹⁵Segundo animalaqui primir animalž irata paata yooz žejtñi cjisckatchiča. Nižta poderchiz cjišsiča segundo animalaqui. Jalla nuž žejtñi cjcjan, nii paata yoozqui chiiñi cjišsiča. Nižaza jakziltat nii yooz ana rispitchaja, jalla niiqui contaj cjila, mantichiča žejtñi chiiñi yoozqui. ¹⁶Nižaza segundo anawal animalaqui mantichiča, tjapa žoñinacž yujc ayquizimi už žew kjarquizimi chimputa cjisjapa. Koltanacami, pajkinacami, ricachunacami, porinacami, žoñž mantuquiz cjiñinacami, ana žoñž mantuquiz cjiñinacami, liw mantichiča, chimputa

cjeyajo. ¹⁷ Ana chimputa cjenaqui ana kjaychucatača, nižaza ana tuychucatača. Nii chimpuqui tužutača, žoňž ayquiz anawal animalž tjuužtan už anawal animalž numeružtan cjiřtatažlaja, jalla nii. ¹⁸ Jalla nii intintisjapaqui walja zizňi cjiřtanča. Jakziltat zizňi cječhaja, jalla niiqui anawal animalž número tantiiz waquiziča. Nižaza nii numeruqui žoňinacž numeruča. Jalla nii numeruqui sojta patac sojta tuncan sojtani, jalla niiča.

14

144,000 ŽOŇINACA CHERCHINČHA

¹ Jalla nektanaqui Sión cjita cur kjutňi cherchinča. Jalla nicju Uuzažtakaz Jesucristuqui tsijtchi želatča. Niižtan chica 144,000 žoňinaca želatča. Nii žoňinacž ayquiz Jesucristuž tjuumi, niž Ejpž tjuumi, jalla nii tjuunaca cjiřtatača. ² Jalla nektanaqui arajpachquiztan tsjii jora nonzinča, wacchi pujnacž kjaz joražtakaz, nižaza pjursanti jorjorňiž joražtakaz. Nižaza nii weriž nonžta joraqui suyniňitača, jaknužt wacchi arpa quitaranaca suyničhaja, jalla nižta. ³ Jesucristužtan žejľňi žoňinacaqui ew wirsu itsiča. Nii mantiz puestuž yujcquiz nižaza nii pajkpic žejťňinacž yujcquiz, nižaza nii jilirinacž yujcquiz itsiča. Anaž iya jakziltami nii ew wirsu catoki atatča; nii 144,000 jalla nii alaja nii wirsu catokchiča. Nii 144,000 žoňinacaqui yokquiztan liwriitatača. ⁴ Jalla ninacaqui ana zalzi nižaza ana čjul maatakatan adulteriužtakaz paachiča. Jalla ninacaqui Uuzažtakaz Jesucristo apziča, jakziquin ojktčhaja, jalla nii. Nižaza ninacatača žoňinacžquiztan primero liwriita žoňinacaqui. Yooztajapami Uuzažtakaz Jesucristužtajapami liwriitatača. ⁵ Jalla ninacatača ana zinta toscara čiičiqui, nižaza ana čjul ujchiztača.

ČHJEP ANJILANACA CHERCHINČHA

⁶ Jalla nektanaqui arajpach taypiquiz tsjii anjila layňi cherchinča. Nii anjilaqui liwriiňi tawkchiztača, tii muntuquiz kamňi žoňinacžquiz parliňijapa. Nii liwriiňi takuča wiňayjapa werar razunaqui. Nii liwriiňi takuqui tjapa žoňinacžtajapa, tjapa nacionanacchiz žoňinacžtajapami, nižaza tjapa zaranacchiz žoňinacžtajapami, nižaza tjapa takunacchiz žoňinacžtajapami, nižaza tjapa watjanacchiz žoňinacžtajapa, jalla ninacžtajapatača. ⁷ Jalla nii anjilaqui altu joržtan tuž čiičiča:

—Yoozquin rispitiňiž cjee. Niižquin honora waytiňiž cjee. Niiž ultim casticz ora tjonča. Niiqui arajpachami, yokami, kot kjaznacami, nižaza kjaz jalzurinacami paachiča. Jalla nižtiquiztan niižquiz rispitiňiž cjee.

⁸ Jalla nektanaqui yekja anjilaqui apžquichiča, tuž cjan:

—Babilonia, nii pajk watjaqui akziča, akziča. Nii watjaqui parti watjanacchiz žoňinacžquiz anawali kamaňchiz cjskatchiča, jaknužt adulteriuquiz ojklayňinacaqui ana zuma kamaňchizlaja, jalla nižta.

⁹ Jalla nektanaqui tercer anjilaqui apžquichiča, altu joržtan tuž cjan:

—Jakziltat nii anawal animala rispitičhaja, nižaza nii žoňiž paata yooz rispitičhaja, jalla niiqui castictaž cjequiča. Nižaza jakziltat niž ayquiz anawal animalž chimputa cječhaja, už kjarquiz anawal chimputa cječhaja, ¹⁰ jalla niiqui Yooziž castictaž cjequiča. Jalla nii ana ultim Yooz rispitiňi žoňinacž quintra Yoozqui anča žawjwaquiča. Yoozqui ninaca anča casticaquiča. Ninacaqui infiernuquin nižaza asňi azupriquiz anča t'akjizaquiča Yooz zuma anjilanacž yujcquizimi, Uuzažtakaz Jesucristuž yujcquizimi. ¹¹ Infiernuquin wiňayjapa sufran, uj žketiqui žketaquiča watay wata. Nii sufrini žoňinacča majiňami weenami jeejzqui ana žejľchuca. Ninacaqui anawal animala rispitičquiztanami nižaza nii paata yooz rispitičquiztanami jalla nižta anča sufraquiča. Nižaza ninacaqui nii anawal animalž tjuužtan chimputaž cjen nižta anča sufraquiča. ¹² Jakziltat Yooz partiquiz žejľčhaja, nižaza Yooz tawk jaru kamčhaja, nižaza Jesucristužquin kuz tjaáčhaja, jalla ninacaqui tii muntuquiz pruebanaca watcan pasinsis kuzziz tira tjurt'ichej cjila.

¹³ Jalla nektanaqui wejrqui arajpachquiztan tsjii jora nonzinča. Nii joraqui tuž cjičiča:

—Jalla tiic cjiira: “Tekztan nawjochuc jakziltat Yooz Jiliržquiz tjurt'ichi kuzziz ticznáčhaja, jalla niiqui cuntintuž cjequiča”. Espíritu Santuqui tuž cjiča: “Ninacaqui ninacž langzquiztan jeejnaquiča. Nižaza ninacž zuma obranacquiztanami nižaza kamtiquiztanami pactaž cjequiča. Jalla nižtiquiztan cuntintuž cjequiča”.

ŽOŇINACA RICUJTA CUJICHAŽTAKAZ

¹⁴Jalla nektanaqui tsewc kjutñi cheržcu, chiw tsjiri cherchinča. Nii tsjir juntuñ tsjii žoñižtakaz julzi želatča, kor pillu achquiz tjewzi, nižaza kjarquiz cuchillu tanzi. ¹⁵Nektanaqui tsjii anjilaqui arajpach Yooz timpluquiztan ulanchiča altu joržtan kjawcan. Nii tsjir juñtuñtan julzi žoñžquiz paljaychiča, tuž cjican:

—Tii muntuquiz žejlñi kujich ora tjonchiča. Cujichaqui zuma pookchiča. Jalla nižtiquiztan am cuchillžtan pootzna, kujicha ricuja. —Nuž cjichiča anjilaqui. Tii muntuquiz žejlñi criichi žoñinacača kujichažtakazqui.

¹⁶Jalla nektanaqui nii tsjir juñtuñtan julzi žoñiqui cuchillžtan tii muntuquiz žejlñi kujicha ricujchiča. Jalla nižtiquiztan Yoozquin criichi žoñinacaqui ricujta cjissiča.

¹⁷Nektanaqui tsjii yekja anjilaqui arajpach Yooz timpluquiztan zakaz ulanchiča, cuchillžtan zakaz. ¹⁸Nektanaqui tsjii anjilaqui arajpach Yooz altarquiztan ulanchizakazza. Nii anjilaqui akzjapa poderchizza. Nektanaqui nii anjilaqui segundo cuchillžtan anjilžquiz paljaychiča, altu joržtan tuž cjican:

—Am cuchillžtan uwas kujicha ricuja. Uwasnacaqui zuma pookchiča. Jaziqui nii ricuja. —Nuž cjichiča anjilaqui. Tii muntuquiz žejlñi ana criichi žoñinacača uwas kujichažtakazqui.

¹⁹Jalla nektanaqui nii anjilaqui cuchillžtan ana Yoozquin criichi žoñinaca kujichažtakaz pootchiča, nižaza ricujchiča. Nektan nii ricujta žoñinacaqui uwas kujich uyquiztakaz tjojtatača, Yooz casticta cjisjapa. ²⁰Jalla nektanaqui jaknužt ricujta uwasanaca tjecančhaja, jalla nižta nii ricujta žoñinacaqui castictatača Yooz wajtž tjiiquin. Jalla nuž castictaž cjen, ancha ljoc ojkchiča, cawallunacž freno irantizcama. Quinsa patac kilómetro larcuquin nižta ljoc ojkchiča.

15

PAKALLAWK ANAWALINACA

¹Jalla nektanaqui arajpachquin tsjii siñala cherchinča. Nii pajk siñalaqui ancha ispantichucatača. Pakallawk anjilanacaqui želatča, pakallawk anawalinacchiz. Jalla nii anawalinaca wattan Yooz casticz žerzta cjequiča.

²Nižaza llijñi kota cherchinča, ispijužtakaz ujžtan t'ajžta. Nižaza nii ispijužtakaz kot atquin žoñinaca tsijtchi želatča. Nii žoñinacaqui Yooz arpi gitara tanzi želatča. Nii žoñinacaqui tii muntuquiz kamcan, anawal animalquiztan atipchiča, nižaza niž paata yoozquiztan atipchiča. Nižaza nii anawal animalž tjuužtan ana chimpanatača. ³Jalla nii žoñinacaqui Yooz sirwiñi Moisés itsñi itsatča, nižaza Uuzažtakaz Jesucristuž itsñi itsatča, tuž cjican:

“Tjapa azziz Yooz Jiliri, amiž paata pajk obranacača ancha zumanacaqui, nižaza ispantichucača. Am kamañauqui zuma ligitumča, werarapanča. Amča tjapa nacionchiz žoñinaca mantiñamqui. ⁴Yooz Jiliri, ¿ject amquin ana eksnasa? ¿ject amquin honora ana tjaasa? Am alaja ancha zumampanča. Amča zuma ligituma pjalžñamqui, jalla nižtiquiztan tjapa nacionquiztan žoñinacaqui tjonaquiča, am rispitzjapa”.

⁵Jalla nektanaqui arajpachquin cherchinča timplu kjuyltan. Jakziquizlaj Yooz lii, jalla nekz Yooz žejlž kjuya cjetzi cherchinča. ⁶Nektan cherchinča, timpluquiztan pakallawk anjilanacaqui pakallawk anawalinac casticchiz tjonchiča. Anča zuma llijñi tol zquitchiztača, nižaza kor tsjaychiztača, quecanaca jweržinta. ⁷Jalla nektanaqui tsjii-pajkpic žejtñinacžquiztan zapa mayni pakallawk anjilanacžquiz kor chuwa tjaachiča. Nii chuanacaqui wiñay žejtñi Yooz casticunaca chjijpžtatača. ⁸Nii timpluqui uj žketžtan

chjijpžtatačha, Yooz juc'ant azziz cjen, nižaza juc'ant honorchiz cjen. Nižaza anaž jecmi nii timpluquin luzi atasachha, nii pakallawk anjilanacž anawalinaca watzcama.

16

ANAWALINACA CUTZTA

¹Jalla nekztanaqui tsjii alto chiiñi jora nonzinčha. Timpluquiztan nii joraqui pakallawk anjilanacžquiz paljaychičha, tuž cjican:

—Oka. Ančhucaqui nii intirjita anawalinaca cutzna. Nii anawalinacžtan Yoozqui žoñinaca casticaquičha. —Jalla nuž paljaychičha nii joraqui.

²Jalla nuž paljaytiquiztan primir anjilaqui ojckhičha niižquiz intirjita anawalinaca tii muntu yokquiz cutzjapa. Jalla nekztanaqui jakziltat anawal animalž chimputažlaja, nižaza nii anawal animalž žoñiž paata yoozquiz rispitchaha, jalla tjapa ninacaqui anawal llajanacžtan llajchičha. Nižaza ancha kjawcan aynatčha.

³Jalla nekztanaqui segundo anjilaqui ojckhičha niižquiz intirjita anawalinaca tii muntu kotquiz cutzjapa. Nii kot kjazqui ticzi žoñž ljocnacažtakaz tucchičha. Jalla nižtiquiztan tjapa kotquiz zejłni animalanacaqui ticzičha.

⁴Jalla nekztanaqui tercer anjilaqui niižquiz intirjita anawalinaca cutzičha pujunacquizimi jalzurinacquizimi. Tjapa kjazqui ljoc tucchičha. ⁵Jalla nekztanaqui kjaz mantiñi anjilaž chiita nonzinčha. Nii anjilaqui tuž cjichičha:

—Ancha zumamčha Yooz Jiliri. Amqui tuquitanami jaztanami žejłčha. Amqui lititumakaz pjalžcu, castičha. ⁶Nii casticta žoñinacaqui am parti žoñinacami, nižaza am parti parliñi žoñinacami conchičha. Jaziqui amqui nii žoñinacžquiz ljoc lickatchamčha. Jalla nužupan ninacžta waquizičha.

⁷Nižaza altarquiztan tsjii chiižquiñi jora nonzinčha, tuž cjican:

—Tjapa azziz Yooz Jiliri. Amqui ultim werera pjalzamčha; nižaza lititumapan pjalžnamčha. Jalla nužupančha.

⁸Jalla nekztanaqui cuarto anjilaqui niižquiz intirjita anawali cutzičha tjuñquiz. Jalla nuž cutžtiquiztan, tjuñiž siiqui žoñinaca ujsičha, zmali kjakkan. ⁹Jalla nižtiquiztan žoñinacaqui tjuñiž ujta cjissičha. Jalla nuž ujtiquiztan, žoñinacaqui ana persun uj paaznacquiztan jaytichičha, “Ujchizpantčha” cjican. Nižaza Yoozquin ana honora tjaachičha. Antiz Yooz tjuu quintra chiichičha, Yooz nii anawalinaca mantizquichiž cjen.

¹⁰Jalla nekztanaqui quinto anjilaqui niižquiz intirjita anawali cutzičha, jakziquin nii anawal animalaqui mantiñi julzičhaja, jalla nicju. Jalla nekztanaqui nii mantita yokaqui ancha zumchi cjissičha. Jalla nuž cjen žoñinacaqui persun las ch'atsičha; ancha t'akjizichičha. ¹¹Jalla nuž sufrichiž cjenami, ana jaytichičha anawali paaznacquiztan, “Ujchizpantčha”, cjicanaqui. Pero arajpach Yooz quintra chiichičha, ninacaž nuž ayin-skatñi llajacama cjenauqui.

¹²Jalla nekztanaqui sexto anjilaqui niižquiz intirjita anawali pawk Eufrates cjita pujquiz cutzičha. Jalla nuž cutžtiquiztan, nii pujuqui kjonchičha, tuwantan tjonñi jilirinaca kjakžquizjapa.

¹³Nekztanaqui cherchinčha anawal dragonž atquiztan anawal ispiritu ulanchičha. Jalla nižtakaz ulanchičha anawal animalž atquiztanami, nižaza falso profetž atquiztanami. Nii čhjep ulanchi ispiritunacaqui zcaranacažtakaztačha. ¹⁴Nii ispiritunacaqui zajra ispiritunacatačha. Milajrunacaž paa-atčha. Nižaza tjapa tii muntuquiz mantiñinacaž juntatčha, quira zaltisjapa. Tjapa azziz Yooz Jiliriž uchta timpu pawk quira želaquičha. ¹⁵Nonžna. Jesucristuqui tuž cjicha: “Wejrqui tjañižtakal tiripintit tjonacčha. Jakziltat naazñi kuzziz cječhaja, cuntintuž cjequičha. Zquitchizpan cjee; nekztan ana k'ala okasačha, žoñinacaž ombrawillta cjisjapa”. ¹⁶Jalla nekztanaqui mantiñi jilirinacaqui juntantitaž cjissičha, tsjii yokquiz. Nii yokaqui hebreo tawkuiz Armagedón cjitačha.

¹⁷Jalla nekztanaqui séptimo anjilaqui intirjita anawali querquiz cutzičha. Jalla nuž cutžtiquiztan altu joraqui arajpach timpluquiz mantiz puestuquiztan chiichičha, tuž cjican:

—Yooz casticz obranaca cumplita cjiisa.

¹⁸Jalla nekztanaqui rayunacami, arañinacami, jorjorñinacami želatĉha. Nižaza juc'anti yoka chekjinchičha. Yooziž žoñi paatiquiztan jalla nii timpuquiztan anzcama tii yokaqui ana wira juc'anti chekjinchičha. Walja tsucuñi cheknatĉha. ¹⁹Jalla nuž yoka chekjinzĉu, Jerusalén pajk watjaqui ĉhjep parti t'akžtataĉha. Nižaza nacionanacž capitalanacaqui k'ala pajlsičha. Nižaza Yoozqui Babilonia pajk watja cjuñziĉha. Yoozqui Babilonia wajtž quintra žawjžcu, juc'anti casticchiĉha, jaru vinžtan liquintažtakaz. ²⁰Jalla nuž castican tjapa kot taypiquiz žejlñi yokanacami, nižaza curunacami katchičha. ²¹Nižaza arajpachquiztan žoñinacž juñtuñ pajk caranuzatjojtžcu, ojkchiĉha. Tsji caranuzauqui quintal jilataĉha, ancha liczitaĉha. Nekztanaqui žoñinacaqui Yooz quintra chiichiĉha nii caranuzaz nuž ojktiquiztan. Jalla nii anawaliquiztan ancha sufrichiĉha.

17

PUTIRII MAATAKA CHERCHINĉHA

¹Jalla nekztanaqui tsjii nii pakallawk ana walinacchiz anjilanacžquiztan wejtquiz tjonchiĉha, tuž cjian:

—Pichay. Putirii maataka amquiz tjeeznaĉha. Naa putirii maatakaqui pajk watja cjiĉha. Jaknužt nii pajk watja casticta cjeĉhaja, jalla nii zakal tjeeznaĉha. Jalla nii anawal watjaqui wacchi kjaznacaran žejlĉha. Juc'ant anawali putirii maatakažtakazza nii watjaqui. ²Tii yokquiz mantiñi jilirinacaqui naa putiriyatan adulteriuquiz ojklaychiĉha. Naa irat kamañichiz pecžcu, Yoozquiztan ancha zarakchiĉha nii mantiñinacaqui. Jaknužt vinžtan licchi žoñiqui tsjii kjuťni ojkĉhaja, jalla nižta cjiisičha.

³Jalla nekztanaqui Espiritu Santuqui wejr cherkatchičha jalla tižta. Tsjii anjilaqui wejr ĉhjitchičha ĉ'ekti yokquin. Jalla nicju tsjaa maataka cherchinĉha. Jalla naa maatakuqui ljoc animalž juntuñ yawchi želatĉha. Jalla nii animalaqui persun curpuquiz Yooz quintra tjuunacchiztaĉha. Nižaza pakallawk achchiztaĉha, nižaza tunca wajrichiztaĉha. ⁴Naa maatakuqui morat ljoc zquiti cujtchintaĉha. Nižaza koržtan, c'ajñi mazllanacžtan, c'achanacžtan, jalla ninacžtan alajitaĉha. Nižaza naaža kjarquiz kor wazu tanzinĉha. Nii kor wazuquiz anawalinacžtan nižaza ana zuma kamañanacžtan ĉhjijpžtataĉha. ⁵Nižaza naaža ayquiz tii ana intintazzuca tjuu ĉjijrtataĉha: “Pajk Babilonia, putirii maatakanacž maa, nižaza tii yokquiz ana zuma kamañanacchiz maa”. Jalla nuž ĉjijrtataĉha. ⁶Nekztanaqui wejrqui naa maatak cherchinĉha licchižtakaz. Naa maatakuqui wacchi Yoozquin criichinaca conchinĉha. Jesucristužquiz kuz tjaachiž cjen contataĉha nii criichinacaqui. Ninacž ljocžtan licchižtakaz ĉjistkalĉha. Jalla naa maataka cheržcu, wejrqui ancha ispantichinĉha. ⁷Weriž ispantiquiztan anjilaqui wejtquiz paljaychiĉha, tuž cjian:

—¿Kjažtiquiztan am ispantejo? Wejrqui naa maatakaž ana intintazzuca puntu amquiz maznaĉha. Nižaza nii pakallawk achchiz, tunca wajrichiz animalž ana intintazzuca puntu amquiz maznaĉha. ⁸Maatakaž yawta animala cherchamĉha. Jalla nii animala tuquitan tii muntuquiz želatĉha. Nekztan ana želatĉha. Wiruñ wila želaquiĉha, koz anawal tujquiztan ulanzcaquiĉha. Ultimquiziqui infernuquin ĉjatkattaž cjequiĉha. Tuquitan tii muntu paatiquiztanpacha Yoozquin ana criichi žoñinacž tjuunacaqui anaž Yooz liwruquiz ĉjijrtataĉha. Jalla nii žoñinacaqui anawal animala cheržcu ispantaquiĉha. Nii animalaqui žejlchiĉha, nekztan ana želatĉha, nekztan wila žejlĉha. Jalla nižtiquiztan ana criichi žoñinacaqui ispantaquiĉha.

⁹Jalla nii intintizjapa intintiñi kuzziz ĉjis waquiziĉha. Nii anawal animalž pakallawk acaqui pakallawk curunaca cjiĉha. Nii curunacž juntuñ tsjii watja julzi žejlĉha. Putirii maatakažtakazza nii watjaqui. ¹⁰Nii pakallawk achanacaqui pakallawk mantiñi jilirinaca cjiĉha. Pjijzkaltan mantiñinacaqui ezziĉha; katchičha. Tsjii mantiĉha anziqiu. Nii tsjiiqui ima tjonĉha. Jalla nii tjonžcu upacamakaz mantaquiĉha. ¹¹Nii tuqui žejlñi, nekztan ana žejlñi animalaqui octavo mantiñi jiliriĉha. Pero nii pakallawk mantiñinacž partiquiztankalĉha. Nižaza ultimquiziqui infernuquin ĉjatkattaž cjequiĉha.

¹² Nižaza nii amiž cherta tunca wajranacaqui tunca mantiñi jilirinaca cjiča. Nii tunca mantiñinacaqui imaž mantiz poder tanža. Nii anawal animalžtan chica tsjii orakaz mantaquiča. ¹³ Nii tunca mantiñinacaqui tsjii kuzzizza; ninacž mantiz poder tjaaquiča anawal animalžquiz. ¹⁴ Nii anawal mantiñinacaqui Uuzažtakaz Jesucristuž quintra quira zaltayskataquiča. Pero Uuzažtakaz Jesucristuqui criichi žoñinacžtan ninacžquiz atipaquiča. Jesucristuqui Jiliric jiliripanča, rey mantiñic mantiñipanča. Criichi žoñinacaqui nižtan chica želaquiča. Criichi žoñinacača Yooziž kjawža, nižaza illzta, nižaza Yoozquin tjurt'ini kuzzizpan.

¹⁵ Jalla nektanaqui nii anjilaqui wejtquiz cjichizakazza:

—Nii amiž cherta kjaznacaqui, jakziquin naa maataka julzinžlaja, jalla nii kjaznacaqui žoñinaca cjiča. Nii žoñinacaqui tjapaman watjanacchiztača, nižaza nacionanacchiztača, nižaza takunacchiztača. ¹⁶ Nižaza nii amiž cherta tunca wajranacažtakaz mantiñinacaqui anawal animalžtan naa puturii maatak quintra chjaawjkataquiča. Nektan naa maataka akznaquiča, nižaza ana zquitchiztakaz cjiskataquiča. Nižaza naaža curpu lujlnaquiča. Nižaza ujžtan ujznaquiča. ¹⁷ Jalla nuž nii mantiñinacaqui naa maataquiz paquiča. Yoozqui ninacž kuznacquiz nuž peckatchiča, Yooz muntacama paa-ajo. Jalla nuž Yooz muntacama paacan ninacaqui tsjii kuzziz cjequiča, anawal animalžquiz ninacž mantiz poder tjaažjapa, Yooz chiitacama cumpliskatzjapa. ¹⁸ Nižaza amiž cherta maataqui pajk watja cjiča. Nii watjača tii yokquiz žejlñi mantiñi jilirinacžquiz mantiñiqui.

18

BABILONIA CJITA WATJA EZZIČHA

¹ Jalla nektanaqui wejrqui tsjii anjila arajpachquiztan chjijwžquiñi cherchinča. Nii anjilaqui walja mantiz poderchiztača; nižaza walja kjanatča. Nuž kjanan tii yokaqui majiñažtakaz cjissiča. ² Nektanaqui nii anjilaqui altu joržtan kjawchiča, tuž cjan:

—Babilonia pajk watja ezziča, ezziča. Nii wajtquiz zajranacaqui watja chassiča, tjapaman anawal ispiritunacžtan, nižaza tjapaman chjaawjkatta wežlanacžtan. ³ Nii Babilonia watjaqui tjapa nacionanaca Yoozquiztan zarakskatchiča, licchinacažtakaz. Nižaza nii watjaž cjen tjapa tii yokquiz mantiñi jilirinacaqui ana zuma kamañchiz cjissiča. Nižaza nii wajtchiz žoñinacžquiz tjapaman cusasanaca tuytiquiztan, tuyñi žoñinacaqui ricachu cjissiča.

⁴ Jalla nektanaqui wilta tsjii jora nonzinča, arajpachquiztan chiižquiñi. Nii joraqui tuž cjichiča:

—Wejt parti žoñinaca, nii wajtquiztan ulna, ana nii wajtchiz žoñinacažtapacha uj paazjapa, nižaza nii wajtchiz žoñinacžtanpacha ana casticta cjisjapa. ⁵ Nii wajtchiz žoñinacž ujnacaqui juc'anti muntunacžtakaz yapchiča arajpacha irantizcamažtakaz. Juc'anti ujnaca paachiča. Jaziqiu Yoozqui ninacaž paata ujnaca naychiča. ⁶ Jaknužt nii wajtchiz žoñinacaqui yekja žoñinacžquiz anawali paatčhaja, jalla nii anawal paatiquiztan jama castictaj cjila. Ninacaž ujnaca paatiquiztan pizc wilta juc'anti castictaj cjila. Jaknužt yekja žoñinaca anawali cjiskatčhaja, jalla nižta irata pizc wilta juc'anti ana wali cjiskattaj cjila. ⁷ Jaknužt nii wajtchiz žoñinacaqui ancha persun honora waytitčhaja, nižaza jaknužt ninacaqui persun kuzcama kamtčhaja, jalla nuž anawali kamtiquiztan jama sufriskattaj cjila. Ninacž kuzquiz tuž cjinitača: “Wejrnacqui juc'ant zumtča. Anawalinaca wejtquiz anapan cjisnasacha. Anal wira tsjaa žewažtakaz kaaznasacha”. ⁸ Jalla nižtiquiztan nii wajtchiz žoñinacžquiziqui casticu tiripintit tjonaquiča. Ninacžquiz ancha anawalinaca tjonaquiča. Jaziqiu žoñinaca ticznaquiča; nižaza llacjizaquiča; nižaza čherž kjara paznaquiča; nižaza ujquin ujžtaž cjequiča. Muzpa azziz Yooz Jiliriqui nii žoñinaca jalžcu casticaquiča. Jalla nižtiquiztan nižta anawalinaca tjonaquiča.

⁹ Jalla nii cheržcu jakzilta mantiñinacat nii wajtchiz žoñinacžtan ana zuma kamañchizlaja, nižaza persun kuzcama kamchizlaja, jalla ninacaqui nii wajtchiz žoñinacž castictu cheržcu, kaaquiča, nižaza llacjizaquiča. Nii watja ujžnan, nii mantiñi jilirinacaqui uj žketñi cheraquiča. Nektan kaaquiča. ¹⁰ Jalla nuž cheržcu, nii watja nuž castictaž cjen,

azkquin tsijtchi želaquiĉha; ana macjatžcaquiĉha. Castictaž cjen tsucaquiĉha, tuž cjan: —¡Ay! ¡Ay! Babilonia pajk watja. Muzpa azziz cjenauqui, anawali cjissila. Tsĵii ratukaz casticta cjissila.

¹¹ Nii watja castictaž cjen, tii muntuquiz žejlñi tuyñinacazakaz kaaquiĉha, nižaza llacjizaquiĉha. Ninacž cusasanaca kjayñimi ana iya želaquiĉha. ¹² Ninacž cusasanacaqui tižtanacaĉha: kori, paaz, llijñi maznaca, c'achjanaca, zuma pañu, murat pañu, ser pañu, ljoc pañu, tjapaman zuma ulurchiz tablanaca, zuma marfila cjita maznaca, jila walurchiz maderanaca, korinaca, jirunaca, zuma marmol cjita llijñi maznaca, ¹³ canelanaca, zuma ulurchiznaca, insinsunaca, zuma ulurchiz mirra cjitanaca, zuma ulurchiz asitinaca, vinunaca, asitinaca, chiw llamp'u jac'unaca, trigonaca, kuzñi animalanaca, uuzanaca, cawallunaca, autunaca, tuyzjapa piyunanaca. Jalla tjapa nižtanaca tuytataĉha. ¹⁴ Nii tuyñinacaqui nii wajt puntuquiztanž cjequiĉha:

—Nii wajtquiziqui anaž iya tjapaman zumanaca želaquiĉha, nii ancha juztažta zumanacaqui. K'ala pertissiĉha, wiñayjapa. Walurchiz cusasanacaqui pertissiĉha, nižaza wajtquiz honora tjaañi cusasanacaqui pertissiĉha wiñayjapa. —Nuž chiyauquiĉha.

¹⁵ Nii cusasanaca tuyñinacaqui ricachu cjissiĉha nii wajtchiz žoñinacaz kjaychiž cjen. Jaziqui tuyñinacaqui nii watja casticu cheržcu, eksñi kuztan azkquin tsijtchi želaquiĉha. Nižaza altu joržtan kjawcan, kaaquiĉha, nižaza llacjizaquiĉha. ¹⁶ Nižaza ninacaqui tuž cjequiĉha: —¡Ay! ¡Ay! Anawali cjissila tii pajk watjaqui. Tsjaa ricach maatakažtakaz želatĉha, iñarato zquitchiz cujtchin, zuma pañ zquitchiz, murat pañ zquitchiz, ljoc pañ zquitchiz. Zuma iñarato želatĉha, koržtan, zuma walurchiz maznacžtan, zuma c'achjanacžtan. ¹⁷ Tsĵii ratukaz tjapa nii wajtquiz walja walurchiz cusasanaca pertissiĉha. —Jalla nuž cjequiĉha.

Jalla nii watja casticu cheržcu, warcu joojooñinacami, warcuquiz ojklajñinacami, warcuquiz langzñinacami, tjapa kot warcužtan langzñinacami azkquin tsijtchi želaquiĉha. ¹⁸ Jalla nii wajtquiztan uj žketñi cheržcu, kjawaquiĉha, tuž cjan:

—¿Jakzilta watjat tižta chawc watjažtapacha žejljo?

¹⁹ Jalla nektanaqui ninacaqui persun achanacquiz pjilžtan tjatznaquiĉha, ancha kaacan, nižaza ancha llacjizcan. Nižaza tuž cjequiĉha:

—¡Ay! ¡Ay! Ana wali cjissila nii chawc watjaqui. Nii wajtquin cusasanaca chjitchiž cjen, tjapa warcužtan langzñi žoñinacaqui cusa ricachu cjissiĉha. Nižaza tsĵii ratulla akžtala.

²⁰ Arajpachquin žejlñinacazti, nii watja akžtaž cjen, cuntintuž cjee. Yoozquin criichi žoñinaca, cuntintuž cjee. Nii wajtchiz žoñinacaqui anĉhucaquiz anawali paachiĉha. Yooz parti žoñinaca, nižaza Yooz uchta apostolonaca, nižaza Yooz puntu parliñinaca, tjapa anĉhucaltajapa Yoozqui nii watja casticaquiĉha. Jaziqui anĉhucaltajapa Yoozqui nii watja casticaquiĉha.

²¹ Jalla nektanaqui tsĵii walja azziz anjilaqui tsĵii pajk maz tjaažtakaz waytižcu kotquiz tjojtchiĉha, tuž cjan:

—Tii maz tjaaž tjojttažokaz Babilonia chawc watja tjojttaž cjequiĉha. Anaž wira iya cherta cjequiĉha. ²² Tii wajtž calliran anaž wira iya itsñi jora nonžtaž cjequiĉha, arpi guitar jorami, itsñi jorami, pincall jorami, trompet pekz jorami. Nižaza tii wajtquiz anaž wira iya oficiuchiz langzñinacami želaquiĉha. Nižaza tii wajtquiz anaž wira iya žoñinaca tjaažtan jawunñi jora nonžtaž cjequiĉha. ²³ Nižaza tii wajtquiz micha pekžta anaž iya cheraquiĉha. Nižaza anaž iya zalzñi pjijzta ch'ajwiñi nonznaquiĉha. Tuqui tii wajtquiz tuyñinacaqui žoñinacž yujcquiz pajk žoñitaĉha. Maña paacan, tii wajtchiz žoñinacaqui tjapa nacionanacchiz žoñinacžquiz incallchiĉha.

²⁴ Nižaza tii wajtchiz žoñinacaqui Yooz parti žoñinaca, nižaza Yooz puntu parliñinaca conchiĉha. Tjapaman žoñinaca contaĉha.

19

ARAJPACHQUIN YOOZQUI HONORCHIZZA

¹ Jalla nektanaqui arajpachquin wacchi žoñinacž jora nonzinĉha, tuž cjan:

“¡Aleluya! Učhum Yoozza liwriñiqui, walja azzizza, walja honorchizza. ² Učhum Yoozza lijituma pjalzñiqui. Jalla nuž Babilonia wajtchiz žoñinaca lijituma casticchiča. Nii žoñinacaqui tjapa wajtchiz žoñinacžquiz ana wali kamañchiz cjiskatchičha. Jalla nižtiquiztan casticta cjissičha. Nižaza Yoozquin sirwiñi žoñinaca conchiž cjen, Yoozqui nii žoñinaca casticchiča”.

³ Wilta nii arajpachquin žejlñinacaqui altu joržtan chiuchiča, tuž cjian:

—¡Aleluya! Nii wajtquiztan uj žketi wiñaya žketaquiča.

⁴ Nekztanaqui arajpachquin paa tunc puzin jilirinacžtan pajkpic žejtñinacžtan yokquiz quillžcu, puct'ichiča. Nižaza Yoozquiz rispitchičha. Yoozqui niž mantiz puestuquiztača. Rispitcan tuž cjichiča:

—¡Nužoj cjila! ¡Aleluya! ¡Amén!

⁵ Nekztanaqui mantiz puestuquiztan tsjii jora nonzinča tuž chiižquini:

“Tjapa Yoozquin sirwiñinaca, Yoozquiz honora waytila. Koltami pakjimi tjapa Yoozquin rispitiñinacami, Yoozquiz honora waytila”.

⁶ Nekztan wejrqui wacchi žoñinacž jora nonzinča. Wacchi kjaz pujquiz kjawñižtakaztača. Nii joranacaqui tuž cjichiča:

“¡Aleluya! Učhum tjapa azziz Yooz Jiliriqui tjapa mantiz kallantichiča. ⁷ Jalla nižtiquiztan ančaž chipžla učhumqui, cuntintuž cjila. Yoozquin honoraž tjaala. Uuzažtakaz Jesucristužtan niiž parti žoñinacžtan juntu kamz ora irantižquichiča, tsjii zalz pjijsta oražtakaz. Jesucristuž parti žoñinacaqui listu tjacziča, zalziñ turažtakaz.

⁸ Finu zquitinacžtan kujtziča; ancha limpu, nižaza llijñitača”.

Nii finu zquitinacžtan kujtchi tuž cjiča, Yoozquin criichinacaž zuma kamañanacchiz, jalla nii. Jalla nuž zquitinacžtan kujtzkatchičha Jesucristuž parti žoñinacžquiz.

⁹ Jalla nekztanaqui tsjii anjilaqui wejtquiz paljaychiča tuž cjian:

—Jalla tuž cjiira: “Uuzažtakaz Jesucristuž zalz pjijztiquiz invittanaca cuntintoj cjila”.

Nižaza wejtquiz cjichiča:

—Jalla tii weriž chiita takunacaqui Yooz zuma werar razunanacača.

¹⁰ Jalla nižtiquiztan wejrqui nii anjilž kojchquiz quillžcu puct'ichinča, nii rispitzjapa. Niiž wejtquiz chiižinchiča, tuž cjian:

—Ana nižta paa. Wejrqui Yooz sirwiñtča, amtan chica, nižaza am jilanacžtan chica.

Tjapa ančhucča Jesucristuž puntuquiztan parliñinacaqui. Yoozquin alaja rispita amqui.

Jakziltat Jesucristuž puntuquiztan mazinčhaja, jalla ničha werar Yooz taku parliñiqui.

CHIW CAWALLQUIZ YAWCHI ŽOŃI

¹¹ Jalla nekztanaqui arajpacha cjetzi cherchinča. Jalla nicju tsjii chiw cawallu jecžquichiča. Calwallquiz tsjii zuma žoñi yawchi cherchinča. Nii žoñiqui Zuma Lijituma cjitača, nižaza Werar Razunchiz cjitača. Jalla nii žoñičha zuma lijituma pjalzñiqui, nižaza ultim werar razunquiztanča quira zaltiñiqui. ¹² Nii žoñž čhujcquinacaqui ujžtakaz c'ajatča. Niiž achquiz wacchi mantiñi žoñinacž pillunacchiztača. Nižaza nižžquiz tsjii tjuu cjiirtatača. Nii tjuuqui niikaz zuma intintiča. ¹³ Nii žoñiqui ljocžtan tinta tol zquitchiztača. Niiž tjuuqui Yooz Taku cjitača. ¹⁴ Niižquiz apzcatča arajpach zultatunaca; chiw finu zquitchiznacatača, nižaza limputača. Nii zultatunacatača chiw cawallunacquiz yawchi. ¹⁵ Nii zuma žoñž atquiztan tsjii pajk ar cuchillu ulanchičha, nacionanacchiz žoñinaca casticzjapa. Tjapa nacionanacchiz žoñinacžquiz mantaquiča, tjapa anawali paatiquiztan jama casticcan. Jaknužt tsjii uwas kujichñi žoñiqui uwas kjaz zpjiťtjapa tjecančhaja, jalla nižta irata nii zuma žoñiqui Yooztajapa quintra žoñinaca tjecnaquiča. Tjapa azziz Yoozza anawali žoñinacž quintra žawjchipan. Anziqumi ninaca casticta cjissa. ¹⁶ Nii tjecanñi žoñž tol zquitquizimi niž lizquizimi tii tjuu cjiirtatača: “Tjapa mantiñi reynacžquiztan tsjan reyčha. Nižaza tjapa jilirinacžquiztan tsjan jiliričha”.

¹⁷ Jalla nekztanaqui cherchinča, tsjii anjila tjuñquiz tsjťchi. Alto joržtan arajpachquin laylayñi wežlanaca kjawziča, tuž cjian:

—Tekhuc picha. Nižaza tekz ajcsca, Yooz tjaata čheri lujlžjapa. ¹⁸ Tekz ajcsca, mantiñi reynacž janchi lujlžjapa, nižaza zultatu mantiñinacž janchi lujlžjapa, nižaza tjuu kuzziz

žoinacž janchi lujljapa, nižaza cawallunacž chjizwimi nii yawchi žoinacž janchimi lujljapa, nižaza tjpaman žoinacž janchi lujljapa, žoňž mantuquiz cjicjiňi žoinacž janchimi, ana žoňž mantuquiz cjicjiňi žoinacž janchimi, kolta žoinacž janchimi, pajk žoinacž janchimi; tjpaman žoinacž janchi lulaquiča. —Nuž cjichiča anjilaqui.

¹⁹Jalla nekztanaqui cherchinča, nii anawal animalžtan yokquiz mantiňi reynacžtanami ninacž zultatunacžtanami ajcsitača, chiw cawallquiz yawchi žoňž quintra kichjasjapa, niiz zultatunacžtanpacha. ²⁰Quira zaltizcu, nii anawal animalaqui preso tanta cjissiča, falso profetžtan chica. Jalla nii falso profetaqui animalž yujcquiz milajrunaca paachiž cjen, nii animalaž chimpata žoinaca incallchiča; nižaza nii animalž žoňž paata yoozquiz rispitiňi žoinaca incallchizakazza. Jalla nii pucultan anawalinacaqui azupri infiermuquin tjojtatača, žejtňi sufrisjapa. ²¹Nii chiw cawallquiz yawchi žoňqui parti quintra žoinaca pajk cuchillžtan conchiča. Nii pajk cuchilluča nii žoňž atquiztan ulanchiqui. Jalla nižtiquiztan tjapa nii ajcsi wežlanacaqui ninacž janchižtan, chjizwinacžtan ancha chjekchi cjissiča.

20

WARANK WATA PUNTU

¹Jalla nekztanaqui tsjii anjila cherchinča, arajpachquiztan tjonňi. Nii anjilaqui kjarquiz llawi tanziča; nižaza pajk carina tanziča. Nii llawiqui koz anawal tuj llawitača. ²Nekztan nii anjilaqui dragón tanchiča. Dragonqui žkoražtakaz Satanás diabluča. Jalla nii diabluqui warank wata watzcama čejltača. ³Nekztan nii anjilaqui diablu tjojtžcu, koz tuj chawjčchiča. Nižaza tsjii estampillžtan žcatžinchiča, diabluž nacionanacchiz žoinacžquiz ana iya incallajo, warank wata watzcama. Jalla nii warank watanaca wattanaqui, wilta cucta cjistanča tsjii upacamakaz.

⁴Jalla nekztan mantiz puestunaca cherchinča. Jalla nii puestunacquin julzi žoňinacaqui pjalzjapa poderchiztača. Nižaza acha muržinta criichinaca cherchinča. Nii criichinacaqui contatača, Yooz taku parlitiquiztan, nižaza Jesucristuž puntuquiztan ticlartiquiztan. Ninacaqui anawal animalžquizimi nižaza niiz paata yooznacžquizimi ana rispikalča. Nižaza anatača anawal animalž chimpata, ana yujc ayquizimi, ana kjarquizimi. Jalla nii conta criichinacaqui jacatatchi cherchinča. Warank watanaca Cristužtanuntu mantaquiča. ⁵Jalla niiča primiru jacatatzqui. Parti ticzi žoinacaqui ana jacatatchiča nii warank watanaca watzcama. ⁶Nii primiru jacatatchinacaqui cuntintuž cjequiča. Ancha zuma kamaňchiz cjequiča. Nii segundo ticzqui ninacžtaqui ana želaquiča. Nii segundo ticzqui tuž cjiča, infiermuquin chjatkatta wiňayjapa casticta cjisjapa. Pero nii jacatatchinacaqui Cristužtanuntu mantaquiča warank watanaca. Ninacaqui Yooztajapami Cristužtajapami sirwiňinaca cjequiča.

⁷Jalla nii warank watanaca wattiquiztan Satanás diabluqui cuctaž cjequiča koz tujquiztan. ⁸Jalla nuž cutztiquiztan Satanás diabluqui ulnaquiča tjapa tii yokquiz žejlňi nacionanaca incallzjapa. Gog cjita naciona, nižaza Magog cjita naciona nižaza tjapa nacionanacžquiz incallžcu, quira zalzjapa ajcskataquiča. Jalla nii nacionanacchiz zultatunacaqui walja tamača, kot at pjilažtakaz. Nuž cherchinča. ⁹Nii zultatunacaqui walja campuquin ojkiča, Yooz parti žoinaca muyuntizjapa, nižaza Yooziž pecta watja muyuntizjapa. Jalla nuž muyuntan, Yoozqui arajpachquiztan uj cutzinžquichiča, ninaca k'ala ujjjapa. ¹⁰Nekztanaqui incallňi diabluqui azuprižtan asňi uj kotquin tjojtatača. Jalla nicju tuquiqui anawal animalžtan toscar profetžtan tjojtatača. Jalla nicju majiňami weenami sufraquiča watay wata.

PAJK CHIW MANTIZ PUESTU

¹¹Jalla nekztanaqui tsjii pajk chiw mantiz puestu cherchinča. Nižaza nii puestuquiz tsjiťiqui julzi želatča. Jalla nii julzi mantiňiž nuž želan, niiz yujcquiz arajpachami yokami k'ala katchiča. Nekztan ana iya arajpachami yokami želatča. ¹²Nekztan ticzi žoinaca cherchinča, koltami pakjimi, mantiňi Yooz yujcquiz tsijtchi. Jalla nekztanaqui Yooz liwrunaca cjetžtatača. Nižaza yekja liwru cjetžtatača; liwriita žoinacž tjuu listichiz

liwrutača. Nii Yooz liwrunacquiz tjapa žoñinacaž paatanacaqui apuntitatača. Ticzinacaqui apuntita paatiquiztan jama pjalžtatača. ¹³Jakziltat pajk kotanacquiz ticztčhaja, jalla ninacaqui Yooz yujcquiz intirjitatača. Nižaza jakziltami ticztčhaja, nižaza ticzi žoñž yokquin žejltčhaja, jalla ninacaqui Yooz yujcquiz intirjitatača. Jalla nektzanaqui tjapa žoñinacaqui ninacaž paatiquiztan jama pjalžtatača. ¹⁴Ticzmi nižaza ticzi žoñinacž yokami ana iya želaquiča. Asñi ujquin tjojtatača. Nii asñi uj kotquin sufrisqui segundo ticz cjiča. ¹⁵Jakziltiž tjuuqui liwriita žoñinacž tjuu listiquiz ana žejlčhaja, jalla niiqui asñi uj kotquin tjojtazakaztača.

21

EW ARAJPACHA EW YOKA

¹Jalla nektzanaqui ew arajpachami ew yokami cherchinča. Primir arajpachami primir yoka katchičha, nižaza kotami. ²Nektzanaqui wejr Juanqui ew Jerusalén watja cherchinča, Yooz arajpachquiztan tjonñi. Jaknužt tsjaa zalzin turqui persun tjowažtajapa tjaczinžlaja, jalla nižta zuma tjacztača ew watjaqui. ³Nektzan arajpach mantiz puestuquiztan tsjii jora nonzinča. Altu tawkžtan tuž cjichiča:

—Cheržca. Yoozqui žoñinacž taypiquiz kamča. Yoozqui ninacžtan chica kamaquiča, nižaza nii žoñinacaqui Yooz wajtchiz žoñinaca cjequiča. Jalla nižtquiztan Yoozqui ninacžtan chicaž cjequiča. ⁴Yoozqui ninacž kjaz kaajmi chjujžinaquiča. Nižaza ninacžta anaž iya ticz želaquiča, nižaza iya kaazmi, llaquizmi, sufrismi anaž želaquiča. Jalla ninacaqui k'ala watchičha.

⁵Nektzanaqui nii mantiz puestuquiz julžñiqui tuž cjichiča:

—Cheržca, wejrqui tjappacha ew paa-uča. Tii cjjira. Tiiča werar takunacaqui, nižaza ljiitum takunaca.

⁶Jalla nektzanaqui cjichiča:

—Tjappachaž jazic žeržta. Wejrtča primirquiztanpacha, nižaza wiricama, jaknužt tsjii litranacaqui “A”quiztan kallantičhaja, nižaza “Z”quin wiricama žerzaja, jalla nižta. Jakziltat kjaztakaz zuma kamaña ancha pecčhaja, jalla niižquiz nužullakaz zuma kamaña tjaata cjequiča, jalzurquiztan žejtñi kjaztakaz. Wejrqui nii zuma kamaña tjaa-ača. ⁷Jakziltat tjapa anawalinacquiztan atipachhaja, jalla niižquiz irinsažtakaz tii zamanaca weriž tjaata cjequiča. Wejrqui ninacžtajapa Yooz cjeeča. Ninacaqui wejt maatinaca cuntaž cjequiča. ⁸Ana wejtquin kuzziz žoñinacazti azupri uj kotquin chjatkattaž cjequiča. Jalla tižta kamañchizza nii žoñinacaqui: Yooz nicñinaca, Yoozquin kuz ana tjaañinaca, ana zuma kamañchiz žoñinaca, žoñi conñinaca, adulteriuquiz ojklajñinaca, yat'irinaca, žoñiž paata yooznaca sirwiñinaca, toscara chiiñinaca. Jalla ninacaž asñi ujquin castictaž cjequiča. Jalla nii asñi uj infernuquin ojokquiz segundo ticz cjiča.

EW JERUSALEN CJITA WATJA

⁹Tuquiqui cherchinča pakallawk anawalinacaqui pakallawk anjilanacžquiz intirjitatača. Jalla nektzanaqui nii pakallawk anjilanacquiztan tsjiiqui wejtquin tjonchiča. Jalla tuž cjican, chiichiča:

—Pichay. Amquiz tjeeznača, Uuzažtakaz Jesucristuž tur.

¹⁰Jalla nektzanaqui Espiritu Santuqui wejtquiz tuž cherkatchičha. Wejrqui pajk curquiz chjichtatača. Jalla niwjtcan pajk zuma Jerusalén watja wejtquiz tjeeziča, arajpachquiztan Yoozquiztan tjonñi. ¹¹Nii watjaqui Yooz honorchizza; nižaza llijatča Yooztakaz. Llijñi maztakaztača llijñatča jaspe maztakaz, nižaza ispijužtakaz. ¹²Nii wajt muytata pajk pirka želatča, tuncapan zanchiz. Zapa zanquiz tsjii anjila želatča. Nižaza zapa zanquiz tsjii tjuu cjjirtatača. Nii tuncapan tjuunacaqui Israel žoñinacž t'akanacž tjuutača. ¹³Nii pirkatača tuwanchuc čhjep zanchiz, užachuc čhjep zanchiz, warchuc čhjep zanchiz, tajachuc čhjep zanchiz. ¹⁴Nii wajt muytat pirkaqui tuncapan maz simintuchiztača. Nii tuncapan maz simintuquiz tuncapan Jesucristuž apostolonacž tjuunaca cjjirtatača.

¹⁵Jalla nii wejtquiz chiiñi anjilaqui kor miriis parchizza, nii watja miriisjapa, zanami pirkanacami. ¹⁶Nii watjaqui isquinatutača, porap kjuttan igualatača. Anjilaqui kor

paržtan watja miriichiča, 2,200 kilometrotača, tsewcchuc altu kjutři, nižaza latuquin igualatača. ¹⁷ Nekztan pirka miriichiča. Nii muytat pirkaqui sojta tunc pusin metro miriichiča, žoňiž metružtan miriita, jalla nuž.

¹⁸ Muytat pirkaqui jaspe maztan pirkitatača. Watjaqui kori puru kjuyanacchiztača, limpu ispijužtakaz. ¹⁹ Nižaza wajt muytat pirkiž simintunacaqui c'achja maznacžtan alajitatača. Primiruqui jaspe maztan, segunduqui zafiro maztan, terceruqui ágata maztan, cuartoqui esmeralda maztan, ²⁰ quintoqui ónice maztan, sextuqui cornalina maztan, septimuqui crisólito maztan, octavuqui berilo maztan, novenuqui topacio maztan, decimuqui crisoprasa maztan, unodecimuqui jacinto maztan, duodecimuqui amatista maztan. ²¹ Nižaza nii tuncapan zanaqui tuncapan perla maznacžtan paatatača. Zapa zanaqui tsjii perližtankaz paatatača. Wajt chawc calliqui kori puru paatatača, limpu ispijužtakaz.

²² Wajtquiz ana timplu cherchinča. Tjapa azziz Yooz Jiliržtan Uuzažtakaz Jesucristužtan, jalla ninacaqui wajt timplu cuntača. ²³ Nižaza nii wajtquiz kamcan, anaž tjuňimi jiižmi pecasača, kjanžjapa. Yoozpachaž kjanča, Jesucristužtanpacha. ²⁴ Nacionanacquižtan liwriita žoňinacaqui Yooz kjanquizkaz ojklayaquiča wajtquiz kamcan. Nižaza yokquiz mantiňi reynacaqui nii wajtquin honora zjijcaquiča. ²⁵ Majiň zita zana cjetžtaž želaquiča. Nižaza anaž ween želaquiča. ²⁶ Tjapa nacionanacž honora chjichtaž cjequiča nii wajtquin. ²⁷ Jalla nii wajtquizqui anaž anawali kamaňchizqui luzasača. Nižaza Yooz chjaawjkatta žoňinacami ana luzasača, nižaza incallňi žoňinacami ana luzasača. Jakziltiž tjuut Uuzažtakaz Jesucristuž liwruquiz cjiirtažlaja, jalla ninacakaz Yooz wajtquiz luzasača.

22

¹ Nekztanaqui nii anjilaqui wejtquiz tsjii limpu puju tjeeziča. Nii puj kjazqui žeti tjaaňi cjiča. Nii kjazqui ispijužtakaztača. Yooz mantiz puestuquiztanami, Uuzažtakaz Jesucristuž mantiz puestuquiztanami ulnatča. ² Nii puj kjazqui wajt chawc call taypiquiz okatča, puj porap kjuttan žeti tjaaňi munti pakatča. Jalla nii muntiqui tuncapan wilta tsjii watquiz pookča, nižaza tuncapan frutchizza. Zapa jiižquiz fruta pookča. Nižaza nii munti chjaňinacaqui watjanacchiz žoňinaca čhjetinzjapača. ³ Nižaza nii wajtquiz kamňinacaqui ana iya casticz cheraquiča. Yooz Jiliriz mantiz julzmi, Jesucristuž mantiz julzmi nii wajtquiztača. Ninacž sirwiňinacaqui nii puculitižquiz rispitaquiča. ⁴ Nižaza Yooz wajtchiz žoňinacaqui Yooz cheraquiča. Nižaza Yooz tjuuquii nii žoňinacž ayquiz cjiirtaž cjequiča. ⁵ Nii wajtquiz ween ana želaquiča. Nižaza anaž sir kjanami, anaž lampar kjanami, anaž tjuň kjanami pecasača. Yooz Jiliripachaž ninacžtajapa kjana cjequiča. Nižaza Yoozquii nii wajtquiz kamňinacaqui watay wataž zuma mantaquiča.

JESUCRISTUŽ TJONZ TJUŇI WAJILLAČHA

⁶ Jalla nekztanaqui nii anjilaqui wejtquiz cjichiča:

—Tii chiita takunacaqui werarača, zuma ligitumapanča. Tuquitan Yooz Jiliriqui niiz puntu parliňinacžquiz chiikatchiča. Jalla nii Yoozpachaqui niiz anjila cuchanžquichiča, niiz sirwiňinacžquiz tjeežjapa, čhjulut wajilla wataquiča, jalla nii.

⁷ Jesucristuqui wajillaj tjonla.

Jakziltat tii liwruquiz cjiirta Yooz taku catokačhaja, jalla niiqui cuntintuž cjequiča.

⁸ Wejr Juanqui jalla tinaca cherchinča, nižaza nonzinča. Jalla nii nonžcu, cheržcu, nii wejtquiz tjeežňi anjilž yujcquiz quillzinča, nižquiz rispitzjapa. ⁹ Jalla nekztanaqui nii anjilaqui wejtquiz chiižinchiča, tuž cjican:

—Ana nižta paa. Wejrqui Yoozquin zakal sirwuča, am irata, nižaza Yooz parti parliňi jilanacaž irata, nižaza tii liwruquiz cjiirta Yooz taku catokňinacaž irata. Jalla nižtiquiztan Yoozquinkaz rispita.

¹⁰ Nekztanaqui wejtquin cjichizakazza:

—Tii liwruquiz cjiirta Yooz taku ana chjožzaka joojoowa. Wajillaž tii taku cumplis tjuňi žcatžinžquiča. ¹¹ Jalla nii timpu tjonan, jakziltat anazuma paacan žejlčhaja, jalla niiqui

anazuma kaj paala. Nižaza jakziltat anazuma kuzziz žejlčhaja, jalla niiqui anazuma kuzziz kaj kamlu. Nižaza jakziltat zuma kamañchiz žejlčhaja, jalla niiqui zuma kamañchiz kaj cjila. Nižaza jakziltat Yoozquinkaz kuzziz žejlčhaja, jalla niiqui Yoozquinkaz kuzziz kaj cjila.

Nekztan tsjii joraqui cjichiča:

¹²—Nužupan wejrqui wajillal tjonača. Jalla nuž tjoncan premiuchiz tjonača. Zapa maynižquiz tjaa-ača, ninacaž kamtiquiztan jama. ¹³Wejrtča primirquiztanpacha wiricama, nižaza wejrtča kalltiñtqui, nižaza žerzniñtqui, jaknužt tsjii litra “A”quiztan kalltičhaja, nižaza “Z”quin žerzaja, jalla nižta.

¹⁴Jakziltat persun ujnacquiztan pertuntažlaja, jalla ninacaqui limpu ajunta zquitchiz-takazza. Jalla nii pertunta žoñinacakaz cuntintuž cjequiča. Nižaza žeti tjaani muntiz frutunacquiztan lulasacha. Nižaza ew wajt zanquiztan luzasacha. ¹⁵Pero wajt zancu jalla tižta žoñinacaž eclaquiča: tsjii kjutni kuz tjaani žoñinaca, yat'irinaca, adulteriuquiz ojklajniñinaca, žoñi conñinaca, žoñiž paata yooznacžquin rispitiñinaca, nižaza tjapa in-callniñinaca, nižaza tjapa toscar taku pecniñinaca. Jalla nii anazuma žoñinacaž wajt zancu eclaquiča.

¹⁶—Wejr Jesucristučha. Wejt anjila cučanžquichinča, tjapa icliz žoñinacžquiz tii takunaca ticlarzjapa. Wejtquiztan David jiliriqui tjoniñča. Nižaza Davidž majchmaati-nacžquiztan wejrqui tjoniñča. Wejrtča weenzlak kjantat llijni warawaražtakaz.

¹⁷Espiritu Santuqui Jesucristužquiz kuzziz žoñinacžtan “Jesucristuqui tjonla” cjiča.

Nižaza jakziltat tii chiita taku nonznachaja, jalla nižakaz “Jesucristuqui tjonla” cjila.

Jakziltat kjaztakaz Yooz zuma kamaña ancha pecchaja, picha, Yoozquiztan zuma kamaña tanzjapa. Nužullakaz tanznasača. Zuma žeti tjaani kjaztakazza nii zuma kamañaqui.

¹⁸Jakziltat tii liwruquiz cjiirta Yooz taku nonžaja, jalla niižquiz chiižinžcuča, tuž cjican: Jakziltat tii cjiirta Yooz taku yapačhaja, jalla ninacžquiziqui tii liwruquiz cjiirta anawalinacaž wataquiča. ¹⁹Nižaza jakziltat tii liwruquiz cjiirta Yooz taku t'upznačhaja, jalla niiž tjuu Yooz liwruquiztan jurtaž cjequiča; nižaza zuma Yooz wajtquiz anaž luzasacha; nižaza tii liwruquiz cjiirta zumanaca ana niižtajapa cjequiča.

²⁰Jalla tii takunaca ticlarñiqui tuž cjiča:

—Ultimupan wejrqui wajillal tjonača.

Wejrzakaz cjiwčha:

—Jalla nužoj cjila. Amén. Jesucristo Jiliri, jalla nuž tjona.

²¹Učhum Jesucristo Jiliriqui tjapa ančucaquiz zumaj cjiskatla. Nužoj cjila. Amén.